


Tuhun cha sañahá ra
Jesucristo chi yo



New Testament in Mixtec, Jamiltepec (MX:mxt:Mixtec,
Jamiltepec)

Tuhun cha sañahá ra Jesucristo chi yo

New Testament in Mixtec, Jamiltepec (MX:mxt:Mixtec, Jamiltepec)

copyright © 1983 Wycliffe Bible Translators, Inc.

Language: Mixtec, Jamiltepec

Translation by: Wycliffe Bible Translators, Inc.

Mixteco, Jamiltepec [mxt], Mexico

Copyright Information

© 1983, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Jamiltepec

© 1983, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

7411d349-0f34-5963-987e-74457a7bad38

Contents

San Mateo	1
San Marcos	79
San Lucas	127
San Juan	212
Hechos	271
Romanos	346
1 Corintios	379
2 Corintios	409
Gálatas	430
Efesios	442
Filipenses	454
Colosenses	462
1 Tesalonicenses	470
2 Tesalonicenses	477
1 Timoteo	481
2 Timoteo	490
Tito	496
Filemón	500
Hebreos	502
Santiago	526
1 Pedro	535
2 Pedro	545
1 Juan	550
2 Juan	558
3 Juan	560
Judas	562
Apocalipsis	566

Tuhun Nyoo Cha Tyaa San Mateo

Ñáyivi vachi ra Jesucristo tata

(Lc. 3.23-38)

¹ Ican ihya cuví sivi ñáyivi vachi ra Jesucristo tata. Tata ra David ta tata ra Abraham cuví chi ra.

² Sehe ra Abraham cuví chi ra Isaac, sutu ra Jacob. Ta sehe ra Jacob cuví chi ra Judá ta yañi ra. ³ Ta sehe ra Judá chihin cu Tamar cuví chi ra Fares ta ra Zara. Ta sehe ra Fares cuví chi ra Esrom sutu ra Aram. ⁴ Ta sehe ra Aram cuví chi ra Aminadab sutu ra Naasón. Ta sehe ra Naasón cuví chi ra Salmón. ⁵ Ta sehe ra Salmón chihin cu Rahab cuví chi ra Booz. Ta sehe ra Booz chihin cu Rut cuví chi ra Obed, sutu ra Isaí. ⁶ Ta sehe ra Isaí cuví chi rey David. Ta sehe rey David chihin ñaha cha cuví ñasihí ra Urías cuví chi ra Salomón.

⁷ Ta sehe ra Salomón cuví chi ra Roboam sutu ra Abías. Ta sehe ra Abías cuví chi ra Aza. ⁸ Sehe ra Aza cuví chi ra Josafat, sutu ra Joram. Ta sehe ra Joram cuví chi ra Uzías. ⁹ Sehe ra Uzías cuví chi ra Jotam, sutu ra Acáz. Ta sehe ra Acáz cuví chi ra Ezequías. ¹⁰ Sehe ra Ezequías cuví chi ra Manasés, sutu ra Amón. Sehe ra Amón cuví chi ra Josías. ¹¹ Sehe ra Josías cuví chi ra Jeconías ta yañi ra. Cacacü ra quívi catiñ ra ñuu Babilonia chi ñu Israel, cuahan coyo ñu cua sacuvi ñu tyiño nuu ñu.

¹² Cha yaha cuan, ta chicoo sehe ra Jeconías, ta ican cuví ra Salatiel sutu ra Zorobabel. ¹³ Ta sehe ra Zorobabel ican cuví chi ra Abiud sutu ra Eliaquim. Ta sehe ra Eliaquim cuví chi ra Azor. ¹⁴ Ta sehe ra Azor cuví chi ra Sadoc sutu ra Aquim. Ta sehe ra Aquim cuví chi ra Eliud. ¹⁵ Ta sehe ra Eliud cuví chi ra Eleazar sutu ra Matán. Ta sehe ra Matán cuví chi ra Jacob. ¹⁶ Ta ra Jacob cuví sutu ra José yíi cu María. Ican ña cuví sihi ra Jesús ra cuví Cristo, o cuñi chi catyí, ra cha saquichi Nyoo vatyí cuví ra rey cuenda yo.

¹⁷ Ra Abraham chicoo uchi cumi tahan tata ra nyacua nya cacü ra David. Ta ra David chicoo uchi cumi tahan tata ra nyacua nya quívi tiñ ñu Babilonia chi ñu Israel. Ta nyacua nya quívi cuan chicoo uchi cumi ca tahan tata ñu nyacua nya quívi cacü ra Cristo.

Nu cacü ra Jesucristo

(Lc. 2.1-7)

¹⁸ Tyehe caa cacü ra Jesucristo: Cha yaha cundaa tyiño cha cutandaha cu María, sihi ra Jesús, chihin ra José. Ta cha ni cumañi ca coo ñu chihin tahan ñu, chicoñon sehe ña, soco cha cuenda maa Tatyí Ii Nyoo. ¹⁹ Ta ra José ra cua cuvi yíi ña, cuví ra noo ra vaha. Ta ña cuñi ra cuhva ra ticahan nuu chi ña, yucuan chaha tyaa ra cuhva cha sandoo xehe ra chi ña. ²⁰ Ta cha ni ri ca cha chicá xiñi ra tyicuan caa, tuví noo ángel Sutu Mañi yo nuu ra nu quixí ra. Ta nyehé ra ñumahna ta

catyí ángel cuan chi ra tyehe caa:

—Yoho José, tata ra David cuvún. Ma caca iñun quehun chi cu María cuvi ña ñasihun, vatyí sehe ña cha cua cacu, cuenda Tatyí Ii Nyoo cuví. ²¹ Ta cha yaha cacu cha lee cuan, cusacunañun chi cue: Jesús. Tyicuan caa cunañi ra vatyí cusacacu ra chi ñáyivi chihin cuatyí ñu.

²² Tandihí ihya cuvi tacuhva nachino cava tuhun cha cahān Sutu Mañi yo chihin yuhu ra cacuvi profeta ra ta cha naha, ra cachahá cuenda tuhun cahān ra.

²³ Ta catyí ra tyehe caa:

Ñaha tyivaa cha ta coo ca rayii chi, cucohon sehe ña.

Ta coo noo sehe ña. Ta cunañi cue: Emanuel.

Ta sivi cuan cuñí chi catyí: “Nyoo nyaá ra chihin yo.” Catyí ángel cuan chi ra José chichi ñumahna.

²⁴ Cuhva cha nducachi iñi ra José, sacuvi ra tari kuhva catyí ángel cuan chi ra. Ta quehen ra chi cu María vatyí cuvi ña ñasihí ra. ²⁵ Soco ña chiyo ra chihin ña cha numi ri. Nyacua nya cha yahā cacu sehe ña. Ta sacunañi ra chi cue: Jesús.

2

Nu cuahan coyo ra chiñi tuñi cua nyehe ra nu cacu ra Jesús

¹ Cacū ra Jesús noo ñuu cha nañí Belén. Ta ñuu cuan nyaá chi nu cuví Judea. Ta rey Judea cuan nañí ra Herodes. Tyicuan ta chaā coyo suhva ra nya ñuu Jerusalén. Quichi

coyo ra ityi nu caña ñanyii. Ta ra cachiñi tuñi xaan cacuvi ra. ² Ta candaca tuhun ra chi ñáyivi tyehe caa:

—¿Nya nyaá ra cuvi rey cuenda ñu Israel? Vatyí ityi nu caña ñanyii nyehe ndi tiño cha chahā cuenda tyi cacū ra ityi ihya. Ta vachi ndi vachi sacahnu ndi chi ra —cacatyí ra.

³ Ta quivi cha chito rey Herodes tuhun cuan cutyoño cuñí ra. Ta tyicuan caa tucu tandihí ñáyivi ñuu Jerusalén cuan. ⁴ Tyicuan ta canā ra Herodes chi tandihí ra cacuví nuu chi tata sutu ta ra casacuahá ley vehe ñuhu. Ta ndaca tuhun ra chi ra, nya maa maa tahán chi cacu ra Cristo. ⁵ Ta canacahān ra cuan ta cacatyí ra tyehe caa:

—Ñuu Belén ityi Judea, yucuan tahán chi cacu ra vatyí tyehe caa catyaa ra profeta Nyoo nu tutu ta cha naha:

⁶ Ta yoho ñuu Belén ityi Judá, vasi ñuu luhlu ri cuvún cha nuu ñuu nahnu ca iyó ityi Judá nu nyaún.

Soco cahnu ca cucuvun vatyí Belén chiña cucacu minoo ra cunyaca ñaha.

Ta cusaha cumi ra chi ñu Israel ñáyivi cuende.

Tyicuan caa catyí nu tutu Nyoo, —cacatyí ra cuan chi ra Herodes.

⁷ Tyicuan ta canā xehe ra Herodes chi ra chiñi tuñi cuan, ta ndaca tuhun ra chi ra ñáá kuhva ta ñáá quivi caña tiño cuan. ⁸ Tyicuan ta tachi ra chi ra nya ñuu Belén, ta catyí ra chi ra:

—Cuahan ndo, ta nducu tuhun vaha ndo tuhun cha

lee cuan. Ta tatu nañihi ndo chi cue, ta quichi catyi ndo chii, tacuhva vatyí cahun tucu yuhu cusacahni chi cue —catyi ra Herodes chi ra.

⁹ Cha yaha cachiñi ra chiñi tuñi cuan cha catyi ra Herodes, caquehen ra ityi ta cuahan coyo ra. Ta tiño cha canyehe ra ityi nu caña ñanyii cuan, cuahan ti ityi nuu ra. Ta chicuñi ti maa maa siqui nu catuvi cha lee cuan.

¹⁰ Ta cuhva cha canyehe ra chiñi tuñi cuan tyi chicuñi tiño cuan, si xaan cacuñi ra.

¹¹ Ta caquihvi ra chichi vehe nu catuvi cha lee cuan. Ta cananyehe ra chi cue chihin cu María sihi cue. Ta chicuñi chiti ra vatyí sacahnu ra chi cue. Tyicuan ta canuñi ra yuhu caja cha canyisó ra. Ta catava ra regalo cha cuvi xuhun cuan, ta cutu vixi chahan, ta ndutya vixi chahan cha nañi mirra. Ta cachaha ra chi cue. ¹² Yaha cuan ta catahan ra ñumahna ta cutuñi iñi ra vatyí ña tahan chi canayaha ra ityi nu nyaá ra Herodes, yucuan chaha sin ca ityi cuanuhu coyo ra.

Nu chinq xehe ra José ta cu María chihin cha lee nya Egipto

¹³ Cha yaha cuahan coyo ra chiñi tuñi cuan, tyicuan ta noo ángel Sutu Mañi yo tui nuu ra José chichi ñumahna. Ta catyi ra chi ra:

—Ndicuita, quehen chi ra lee ihya, ta chi sihi ra, ta cahun ndo nya Egipto. Ta yucuan cunyaa ndo nyacua nya sacote chi ndo. Vatyí

ra Herodes cunanducu ra chi cha lee ihya vatyí cahñi ra chi cue.

¹⁴ Tyicuan ta ndicuita ra José cha cuaa cuan. Ta quehen ra chi cha lee cuan ta chi sihi cue. Ta cuahan ñu nya Egipto. ¹⁵ Ta yucuan chinyaa ñu nyacua nya cha chihí ra Herodes. Tyehe caa cuvi tacuhva na chino cava tuhun cahán Nyoo cha tyaa ra profeta ta cha naha. Tyehe caa catyi ra: “Nya ñuu Egipto cané chi Sehi”, catyi ra.

Nu tachi ra Herodes na cahñi ra chi ra cuatyaa

¹⁶ Cha tui iñi ra Herodes vatyí ra cachiñi tuñi cuan sandavi ñaha ra chi ra, nduxaan vavaha ra. Ta tachi ra tyiño na cacahñi ra chi ra cuatyaa cha iyó ñuu Belén cuan ta ndaha ñuu ñandihí, ra cuatyaa cha ni cacu nyacua nya cha uvi cuiya. Tyicuan caa sacuvi ra vatyí nandichi xiñi ra vatyí tyicuan tahan cuiya ra Jesús tari cuhva catyi ra chiñi tuñi cuan chi ra. ¹⁷ Tyicuan caa chinq cava tuhun cahán Nyoo cha tyaa ra Jeremías profeta Nyoo ta cha naha, ta catyi ra tyehe caa:

¹⁸ Tyacú noo ndusu ñuu Ramá, cha chacú chaa ñáyivi, ta iyo tahan ñu.

Ta ican cuvi ñáyivi tata cu Raquel, ñáyivi Israel, chacú chaa ñu cha cuenda sehe ñu.

Soco ña cuñi ñu cha naquehen ndahvi ñu chi ñu cha cuenda cha cachihí sehe ñu, catyi chi nuu tutu Nyoo.

19 Soco cha yahā cha chihī ra Herodes, tyicuan ta tuvī tucu noo ángel cha tachī Sutu Mañi yo nuu ra José nu quixí ra ñuu Egipto. Ta catyí ra chi ra:

20 —Ndícuita ta quehen chi cha lee chiña, ta chi sihi cue. Ta cuanuhu ndo nya ñuu Israel, vatyí cha chihī ra nducu cahñi chi cue.

21 Tyicuan ta ndícuita ra José, ta quehen ra chi cha lee cuan ta chi sihi cue. Ta cuanuhu coyo ñu nya Israel.

22 Soco quiví chito ra José vatyí ra Arquelao cuví ra rey tyiño nuu sutu ra, ra Herodes, nya Judea, nayuhví ra ta ña cuñí ra cuhun ra yucuan. Ta vatyí sacoto Nyoo chi ra chichi ñumahna, yucuan chaha cuanuhu ñu nya Galilea. 23 Cha chaa ñu yucuan, cuahan ñu nya ñuu Nazaret, cua coo ñu. Ta yucuan chiyō ñu. Tyehe caa cuví tacuhva chino cava tuhun cha cahán Nyoo, cha catyaa ra profeta ta cha naha. Vatyí catyí ra tyi ra Jesús ra ñuu Nazaret cucunañi ra.

3

Ra Juan ra sacondutyā chi ñáyiví cahán ra tuhun Nyoo chihin ñu

(Mt. 1.1-8; Lc. 3.1-9, 15-17; Jn. 1.19-28)

1 Quiví cuan ra Juan ra sacondutyá chi ñáyiví cuahan ra noo chiqui ndi ityi Judea. Ta quichahā cahan ra tuhun Nyoo chihin ñu. 2 Ta catyí ra:

—Ndū uvi iñi ndo cuatyí ndo vatyí cha yatyin nyaá

Nyoo ra cua cunyaca ñaha añima yo.

3 Ican tuhun ra Juan ihya cuví cha tyaa ra Isaías ra cuví profeta Nyoo ta cha naha. Tyehe caa tyaa ra:

Chiñí yo cha caná chaa noo ra noo nu chiqui ndi ta catyí ra:

“Tari sanduvahá ndo noo ityi, tyicuan caa sanduvaha ndo añima ndo, vatyí cua quichi Sutu Mañi yo.

Nuña ndo noo ityi ndoo chi ra naquihví ra añima ndo.”

4 Ta ra Juan ñihno ra sahma chino chihin ixi camellu. Ta sincho ra, ñi cuví. Ta maa maa ri pinchi chachí ra ta tyañuñu cuhu chihí ra. 5 Náyiví ñuu Jerusalén ta tandihí ñu ñuu cha nyicú Judea, ta ñu ca iyó yatyin ri ityi yuvi cahnu Jordán cuan, quichi coyo ñu, quichi tyasoho ñu tuhun cahán ra. 6 Ta cha yahā nahma ñu cuatyí ñu, ra Juan sacondutyā ra chi ñu yuvi cahnu Jordán cuan.

7 Soco ra Juan nyehe ra vatyí cuaha xaan ra fariseo, ra quichahá xaan ley vehe ñuhu, ta cuaha xaan ra saduceo, caquichí coyo ra vatyí condutyā ra. Ta catyí ra chi ra:

—¡Nyoho, tari noo tata coo xaan cuví ndo! ¿Yóo cha sacoto chi ndo vatyí chihin cha condutyā ri ndo ta ma tachi tuñi ca Nyoo chi ndo? Ña ndicha. 8 Coo ndo noo cha quetuví vaha tyi ndicha cha ndu uvi iñi ndo cuatyí

ndo. ⁹ Ta ma cuyaa ndo catyí ndo vatyí tata ra Abraham vachi ndo. Vatyí nyacua nya chihin yuu ihya ta cuví savaha Nyoo ñáyiví tata ra Abraham. ¹⁰ Tari yutun cha ña chahá chiti, tyicuan caa cuví ndo. Vatyí ña sacuví ndo tari cuhva cuñí Nyoo. Ta yutun cha ña chahá chiti, cahnya ñáyiví chi tun. Ta cahmi ñu chi tun. Tyicuan caa tucu nyoho, cahun ndo nu cayú ñuhu. ¹¹ Cha ndicha vatyí yuhu sacondutyé chi ñáyiví chihin ndutyá, tari noo seña vatyí cha ndu uvi iñi ñu cuatyí ñu. Soco cha yaha sacondutyá yuhu chihin ndutyá, vachi inga ra cusacondutyá chi ñáyiví chihin Tatyí Ii Nyoo ta chihin ñuhu ihñi. Iyó ca tunyee iñi chi maa ra ta ñima ca yuhu. Ta ni cha cuise ndichan ra ta ña ñañe, vatyí cahnu xaan ca ra cuví ra. ¹² Tari noo ra cha cua naquehen vaha trigo ta natyihí vaha ra chichi yaca ta mihin cahmi ra, tyicuan caa cuví maa Sutu Mañi yo chihin yo. Tatu chinó iñi yo chi ra cunaquehen vaha ra chi yo. Ta cunyicu yo chihin ra. Soco tatu ña chinó iñi yo chi ra cutyihí ra chi yo anyaya nu cayu ñuhu cha ma ndahva ca maa —catyí ra Juan.

*Nu condutyá ra Jesús
(Mr. 1.9-11; Lc. 3.21-22)*

¹³ Tyicuan ta quitá ra Jesús Galilea ta chaá ra yuvi cahnu Jordán nu ñohó ra Juan, vatyí cuñí ra cha sacondutyá ra Juan chi ra. ¹⁴ Cha xihna ri ña cuñi ra Juan sacondutyá ra

chi ra, ta quichahá catyí ra chi ra Jesús tyehe caa:

—Yoho cuñún cha sacondutyé chuun, soco ña tahán chi cha sacondutyá yuhu chuun. Maun tahán chi sacondutyon chii —catyí ra.

¹⁵ Soco ra Jesús catyí ra chi ra:

—Cha vityin, na cuví chi cuhva catyí yuhu chuun. Vatyí cuñí chi cha sacuvi yo tandihí cha cuñí Nyoo —catyí ra chi ra Juan. Tyicuan ta ndoo ra Juan vaha.

¹⁶ Cha yahá ri condutyá ra Jesús ta quitá ra chichi ndutyá. Ta nuña ri andivi, ta ra Jesús nyehe ra yoso caa vachi noó Tatyí Ii Nyoo, tari noo paloma, ta chaá chi siqui ra. ¹⁷ Tyicuan ta tyacu noo ndusu ityi andivi, ta catyí chi tyehe caa:

—Ican ra ihya cuví Sehi, ra cuñí xain chi. Ta sii xaan cuñí chihin ra —catyí ndusu cuan.

4

Nu nducú nyehe cuihna chi ra Jesús

(Mr. 1.12-13; Lc. 4.1-13)

¹ Tyicuan ta Tatyí Ii Nyoo chinyacá chi ra Jesús noo chiqui ndi, tacuhva nducu nyehe cuihna chi ra.

² Ña chachi ra uvi xico quivi ta uvi xico ñuu. Ta yahá cuan ta chaá soco chi ra. ³ Tyicuan ta tuhva cuihna chi ra, vatyí cuñí ra nducu nyehe ra chi ra. Ta catyí ra chi ra:

—Tatu ndicha cha Sehe Nyoo cuví chuun, sananduvi pan yuu ihya —catyí cuihna chi ra Jesús.

⁴ Soco ra Jesús nacahan ra ta catyí ra:

—Tuhun Nyoo catyí chi tyehe caa: “Ñima chihin cha cachi ri ñáyivi ta conyito ñu. Conyito tucu añima ñu chihin tuhun cahán Nyoo” —catyí ra Jesús chi cuihna cuan.

⁵ Tyicuan ta chinyaca cuihna cuan chi ra Jesús nya ñuu Jerusalén. Ta sandaa cuan chi ra xiñi vehe ñuhu cahnu cuan.

⁶ Ta catyí cuan chi ra:

—Tatu ndicha cha Sehe Nyoo cuvún, sandupehla nyacua nya nu sucun ihya ta nyacua nya nu ñuhú. Vatyí nyaá nu catyí chi nu tutu Nyoo tyehe caa: “Nyoo cusaquichi ra ángel, quichi saha cuenda chuun. Cunaquehen ra chuun chihin ndaha ra ta ma cuhva ra cha taxin chahun chihin yuu” —catyí cuihna cuan chi ra.

⁷ Ta nacahan ra Jesús ta catyí ra:

—Soco catyí tucu chi nu tutu Nyoo tyehe caa: “Ma nducu nyehun chi Sutu Mañi yo Nyoo” —catyí ra Jesús chi cuihna.

⁸ Tyicuan ta chinyaca tucu cuihna cuan chi ra noo yucu sucun. Ta sañaha cuan tandihi cha cahnu cuví nu nyacá ñaha rey ta ra cuví tyiño chi ñáyivi iyó siqui ñuhu ñáyivi. ⁹ Ta catyí cuihna cuan chi ra tyehe caa:

—Yuhu cuhve tandihi maa ihya chuun, tatu yoho ta cuiñi chitun nui ta sacahnun chii —catyí cuan chi ra.

¹⁰ Tyicuan ta nacahan ra Jesús ta catyí ra chi cuihna cuan:

—Canyaha chuun nui, yoho cuihna. Vatyí tuhun cahán Nyoo nyaá chi nu tutu ta catyí chi tyehe caa: “Noo ri chi maa Nyoo sacahnu yo. Ta ñin ri chi maa ra quichaha yo.”

¹¹ Tyicuan ta cuahan cuihna cuan, ta ndoo ra Jesús, ta chaá coyo ángel ta tyinyee ra chi ra.

Nu quichaha saha tyiño ra Jesús ñuu cha nyicú ityi Galilea (Mr. 1.14-15; Lc. 4.14-15)

¹² Quivi cha chito ra Jesús vatyí ra Juan ñohó ra vehe caa, cuahan ra nya Galilea.

¹³ Soco ña ndoo ra ñuu Nazaret, nu chahnu ra. Cuahan ra cua coo ra nya ñuu Capernaum, noo ñuu cha nyaá yatyin ri yuhu miñi, cha nyaá yatyin ñuhú cuenda ra Zabulón chihin ñuhú ra Neftalí. ¹⁴ Tyehe caa cuví tacuhva chino cava tuhun cha tyaa ra Isaías nu tutu Nyoo ta cha naha. Catyí chi tyehe caa:

¹⁵ Ñuhú ra Zabulón ta ñuhú ra Neftalí cha nyaá yuhu miñi inga chiyo yuvi cahnu Jordán, cha cuví Galilea nu iyó ñu ñima ñu Israel cuví.

¹⁶ Chinyicu añima ñu nu ñaa ñni vatyí chinyaca ñaha ra ña vaha chi ñu chihin tuhun chihi, soco sandundichín ñuhu Sutu Mañi yo añima ñu nu nyicú ñu, catyí ra Isaías.

¹⁷ Nyacua nya quivi cuan, ta quichaha cahan ra Jesús

tuhun Nyoo chihin ñáyivi, ta catyí ra chi ñu:

—Ndu uvi iñi ndo cuatyí ndo vatyí yatyin ri nyaá Nyoo ra cua cunyaca ñaha aña ndo —catyí ra Jesús chi ñáyivi.

Nu cana ra Jesús chi cumi tahan ra catín tiyaca

(Mr. 1.16-20; Lc. 5.1-11)

¹⁸ Ra Jesús chicá noo ra yuhu miñi cha nañi Tyañuhu Galilea cuan. Ta nanyehe ra chi uvi tahan ra chihin yañi ra, ra Simón cha nañi tucu Pedro, ta ra Andrés. Ra catín tiyaca cacuví ra. Ta cacañi ra yuhva ra nu ndutyá. ¹⁹ Tyicuan ta quichaha catyí ra Jesús chi nanduvi ra tyehe caa:

—Cunyicon ndo chii. Ta yuhu cusacuvi vatyí tari ñihí ndo tiyaca, tyicuan caa cuñihi ndo anima ñáyivi (ta cutava ndo chi ñu nu quiñi caa na quihvi ñu cuenda Nyoo) —catyí ra Jesús chi ra.

²⁰ Caa cuhva ri cuan casandoꝝ ra yuhva ra ta cuahan coyo ra chihin ra Jesús.

²¹ Chiin ri ca chicá ra Jesús ityi nuu ca ta nanyehe ra chi uvi ca ra chihin yañi ra, ra Jacobo ta ra Juan. Sehe ra Zebedeo cacuví chi ra. Canyicú ra chichi noo canoa chihin sutu ra canaquicú ra yuhva ra. Ta cana ra Jesús chi ra. ²² Ta caa cuhva ri cuan casandoꝝ ra canoa cuan ta chi sutu ra, ta cuahan coyo ra chihin ra.

Nu sañahá ra Jesús chi cuaha ñáyivi

(Lc. 6.17-19)

²³ Cuahan ra Jesús chicá noo ra tandihí ñuu cha nyicú Galilea sañahá ra chichi vehe ñuhu tahan tahan ñuu. Cahán ra tuhun vaha yoso caa nyacá ñaha Nyoo aña yo. Ta sanduvaha ra chi ñu cuhví chihin tandihí ri nuu cuehe cha iyó chi ñu. ²⁴ Cachitó tandihí ñáyivi ñuu cha nyicú Siria tuhun ra Jesús. Ta quichí nyaca ñu tandihí ñu cuhví chi ra: tandihí ñu siin siin cuehe tahán. Ta suhva ñu yihí tatyí ña vaha chi ñu. Ta yihí ñu, yihí cuehe chihi tañi chi ñu. Ta yihí ñu ña cuví nacanda ñu. Ta ra Jesús sanduvaha ra chi tandihí ñu. ²⁵ Cuaha xaan ñáyivi nyicón chi ra Jesús: ñáyivi iyó ñuu cha nyicú Galilea, ñáyivi iyó ndi uchi ñuu Decápolis, ñáyivi iyó ñuu cha nyicú Judea, ta ñáyivi iyó inga chiyo yuvi cahnu Jordán ñandihí.

5

Nu cahán ra Jesús nuu ñáyivi nu chiqui

(Lc. 6.20-23)

¹ Cuhva cha nyehe ra Jesús tyi cuaha xaan ñáyivi, ndaa ra noo nuu yucu. Ta chicunyaá ra yucuan. Tyicuan ta ñu nyicón chi ra chicunyicú ñu nicachico nu nyaá ra. ² Tyicuan ta quichaha sañaha ra Jesús chi ñu tyehe caa:

³ —Tandihí ri ñu cha chitó vatyí chiñuhú Nyoo chi ñu, si xaan cucuvi chi ñu, vatyí tahán chi vatyí cunyaca ñaha Nyoo aña ñu.

4 'Ta tandihi ri ñu nducuihya iñi vityin cha catyi cutayi ñu, si xaan cucuvi chi ñu. Vatyí cusanaa Nyoo cha cuihya iñi ñu.

5 'Tandihi ri ñu cha ña cahnu sahá chi, si xaan cucuvi chi ñu, vatyí cuquehen cuenda ñu ñuhu ñayivi cha catyi Nyoo tyi cuhva ra chi ñu.

6 'Ta tandihi ri ñu cuñi xaan sacuvi cuhva catyi Nyoo, si xaan cucuvi chi ñu, vatyí Nyoo cutyinyee ra chi ñu tacuhva cuvi sacuvi ñu.

7 'Ta tandihi ri ñu cha iyó tucahnu iñi chi, si xaan cucuvi chi ñu, vatyí Nyoo, cucoo ticahnu iñi chi ra chihin ñu.

8 'Ta tandihi maa ñu ndundiñi añima saha Nyoo, si xaan cucuvi chi ñu, vatyí ñu cuan, cunyehe ñu chi Nyoo.

9 'Ta ñu nducú cuhva cha coo taxi ri ñayivi chihin Nyoo si xaan cucuvi chi ñu, vatyí Nyoo, cucatyí ra tyi sehe ra cuví chi ñu.

10 'Ta tandihi ñu cha tasi cuñi nyehe ñayivi chi ñu cha catyi cha sacuvi ñu tari cuhva catyi Nyoo, si xaan cuvi chi ñu, vatyí nyacá ñaha Nyoo añima ñu.

11 'Na cusii cuñi ndo tatu cahán ña vaha ñayivi siqui ndo. Ta sanyehé ñu tindoño chi ndo. Ta tavá ñu cuaha cuendu siqui ndo cha catyi yuhu. 12 Na cusii cuñi ndo vatyí tatu tyehe caa sacuvi ñu chihin ndo, si xaan cucuvi chi ndo, vatyí cahnu xaan ta tyaqui xaan cha cutahan chi chi ndo, nachaa ndo andivi.

Vatyí suri tyicuan caa chinyacuvi tucu ñu cha ña vaha chihin ra cacuvi profeta cuenda Nyoo ta cha naha.

Tatu sandihi yo cha chinó iñi yo chi Nyoo cuví yo tari ñii cha ndihi cha uhva
(Mr. 9.50; Lc. 14.34-35)

13 'Nyoho cha chinó iñi ndo chii, tari ñii vaha cuví ndo. Soco tatu ñii, ta ndihi cha uhva, ma sacu uhva ca chi cha cachi yo. Ña vaha ca ñii cuan. Tyicuan ta sacuita yo. Ta cuañi ñayivi siqui chi.

Tatu vaha quichahá yo tuhun cahán Nyoo, cuví yo tari ñuhú cha sandundichín nu cuahan ñayivi nu ñaa iñi

14 'Nyoho cuví ndo tari ñuhú cha sandundichín nu cuahan ñayivi. Noo ñuu cha nyaá xiñi noo yucu, ma cuvi quihí xehe. Tyicuan caa tahán chi cuvi ndo. 15 Ta yori yo cha tyaa yo noo ñuhú tima, ta tixehe yo chichi noo caja. Soco tyiso yo noo nu sucun vatyí sandichin chi chichi vehe tatu cua quihvi ñayivi, soco ndichin. 16 Ta tyicuan caa tahán chi sandundichin tucu nyoho chihin ñuhú Nyoo cha iyó añima ndo nu cuahan ñayivi. Tyicuan ta nanyehe ñu cha vaha cha nyacuví ndo, ta sacahnu ñu chi Sutú yo Nyoo ra nyaá andivi.

Sañahá ra Jesús vatyí niñi xaan sacuvi yo ta sañaha yo tandihi tuhun cha tachí Nyoo chi yo

17 'Ma cuñi ndo vatyí yuhu vachi sanai ley cha tachí Nyoo chi ra Moisés vatyí tyaa

ra. Ta ni ri ña vachi sanai tuhun cha tyaá ra cacuvi profeta cuenda Nyoo ta cha naha. Yuhu ña vachi vatyí sanai yucuan. Soco vachi quichahi tandihi cha catyí tuhun cuan, ta sañahá ñáá cha cuñí chi catyí. ¹⁸ Cha ndicha catyí chi ndo vatyí cha ni ri ca cha iyó ca andivi chihin ñuhu ñayivi ma naa ni chiin cha tyaá ra Moisés ta ra cacuvi profeta Nyoo ta cha naha, nyacua nya yaha cuvi tandihi tari cuhva nyaá cha catyaa ra. ¹⁹ Yucuan chaha, tatu ña quichahá ñayivi tuhun cha tachí Nyoo chi ñu, vasi noo tuhun luhlu ri cuví, ta tatu chasi ñu nu quichaha inga ñayivi, luhlu xaan cucuvi ñu nu nyacá ñaha Nyoo. Soco ñu cha quichahá tandihi, ta sañahá tucu ñu chi inga ñayivi. Ican ñu cuan cahnu xaan cucuvi ñu nu nyacá ñaha Nyoo. ²⁰ Vatyí cuñí chi cha quichahá vaha ca ndo chi Nyoo ican saha ra sacuahá cuenda ley vehe ñuhu, ta ra cacuvi fariseo. Yucuan ta cuvi quihvi ndo nu nyacá ñaha Nyoo.

Nu sañahá ra Jesús chi yo vatyí ma cuxaan yo chi ñayivi

²¹ Nyoho cha cuaha chaha chiñi ndo tuhun cha catyí Nyoo chi ñu chiyó ta cha naha. Catyí ra: “Ma cahñi ndo chi ñayivi, vatyí tatu cahñi ndo ñayivi, tahán chi cutuñi chi ndo.” ²² Soco yuhu, catyí chi ndo, vatyí vasi cha cuxaan ri ndo chi noo ñayivi, o vasi cha cahán uhvi ri ndo chi ñayivi, o vasi cha cahán

nyaa ri ndo chi ñayivi, tahán chi cutuñi chi ndo. Ta sin ri saha cuenda ndo chi ndo coto cuhun ndo anyaya chihin cuatyí cuan.

²³ Ta yucuan chaha quivi cuahun vehe ñuhu, ta nyisón cha cucuhvon chi Nyoo, ta tatu cha nanyaun cha cua cuhvon ta nichon iñun vatyí ña vaha iyó noo yañun chuhun. ²⁴ Sandoo cha cua cuhvon chi Nyoo yucuan. Ta cuhun vatyí na coo vahun chihin yañun. Tyicuan ta ndichun nya vehe ñuhu, ta cuhva cuendon cha cua cuhvon chi Nyoo.

Sañahá ra Jesús vatyí cacan yo ticahnu iñi cuatyí yo coto cuhun yo anyaya

(Lc. 12.57-59)

²⁵ Tatu yóo ra chicán cuatyí chahun, ta cuahan ra chuhun nya nuu ra cuví tyiño, nandacan ticahnu iñi chi ra ityi cuahun, coto cuhva cuenda ra chuun chi ra cuví tyiño. Ta ra cuví tyiño cua cuhva cuenda ra chuun chi policia. Ta policia cuan cutyíhi ra chuun vehe caa. ²⁶ Soco catyí chuun vatyí ma cuvi quiton vehe caa cuan nyacua nya tyiyahvun tandihi cha tahán chi tyiyahvun.

Sañahá ra Jesús vatyí ni cha ndichi xiñi yo cha coo nonga ñusihí, o nonga rayi chi yo, ta ña vaha

²⁷ Nyoho chiñi ndo tuhun vatyí catyí Nyoo ta cha naha vatyí nyoho cha iyó ñasihí ndo, ma coo inga ñusihí chi ndo. ²⁸ Soco yuhu catyí chi ndo, vatyí nya nyoho cha

nyehé ndo chi noo ñusihi ta quihvi iñi ndo chi ñu, catyí chi ndo vatyí chihin yucuan ri ta cha chicoo cuatyí ndo.

29-30 'Vatyí tatu chiti nuu chiyo vahun sanacavá chuun nu cuatyí, vaha taxin ca tava ta sacuiton cañi. Vatyí vaha ca quihvun nu nyacá ñaha Nyoo chihin noo chiti nuun, ta ñima ca chihin cha ninduvi chiti nuun ta cuhun nu cayu ñuhu chichi anyaya. O tatu ndahun sanacavá chuun nu cuatyí, vaha taxin ca cahnya ta sacuiton cañi. Vatyí vaha ca cha quihvun nu nyacá ñaha Nyoo chihin cha luu ndahun, ta ñima ca cha nanun ta cuhun nu cayu ñuhu chichi anyaya.

Nu sañahá ra Jesús siqui ra sandoo ñasihi
(Mt. 19.9; Mr. 10.11-12; Lc. 16.18)

31 'Ta suri catyí tucu Nyoo chi ñáyivi chiyo ta cha naha vatyí yóo ra sandoo ñasihi, cuñí chi cuhva ra noo tutu cuenda cha sandoo ra chi ña. 32 Soco catyí yuhu chi ndo, ñahri ityi iyó chi noo ra cha sandoo ra chi ñasihi ra tatu ña natuvi ña chihin inga rayi. Vatyí tatu sandoo ra chi ña, ta ñima cha catyí cuatyí cuan, chicoo cuatyí ra nuu Nyoo. Ta sin ri saccoo ra cuatyí ña vatyí tatu quehen ña inga ra, chicoo cuatyí ña nuu Nyoo. Ta chicoo tucu cuatyí ra cha quehen chi ña cuan.

Ma catyí yo "chito vaha maa Nyoo" tacuhva chino iñi ñáyivi vatyí ndicha cha cahán yo

33 'Ta chiñi tucu ndo, vatyí catyí tucu Nyoo chi ñu chiyo ta cha naha tyehe caa: "Tatu tyanaha ndo Nyoo tyi cusacuvi ndo noo cha cusacuvi ndo, tahan chi cha sacuvi ndo." 34 Soco yuhu catyí chi ndo vatyí ma tyanaha ndo Nyoo tacuhva chino iñi ñáyivi vatyí ndicha cha cahán ndo. Ta ma tyanaha ndo ni tuhun andivi, vatyí yucuan nu nyaá maa Nyoo cuví. 35 Ta ni ri tuhun ñuhu ñáyivi ihya ma tyanaha ndo, vatyí yucuan cuví nu chañi Nyoo. Ta ni ri tuhun ñuu Jerusalén, ta ma tyanaha ndo, vatyí yucuan cuví ñuu Nyoo ra cuví Rey cha cahnu ca. 36 Ta ni ri tuhun xiñi ndo, ta ma tyanaha ndo, vatyí ma cuvi sanducuichin ndo ni noo ixi xiñi ndo. Ta ni ma cuvi sandutoon tucu ndo. 37 "Ican" catyí ndo, tatu ican. Soco tatu ñima, "ñima", catyí ndo. Ta ma tyanaha ndo Nyoo vatyí ra ña vaha tyiyuhú chi ndo cuví cuan.

Nu sañahá ra Jesús vatyí tatu sacuvi ñáyivi cha ña vaha chihin yo, na sacuvi yo cha vaha chihin ñu
(Lc. 6.29-30)

38 'Ta chiñi tucu ndo cha catyí tuhun cha tyaá ra Moisés ta cha naha: "Vatyí tatu noo ñáyivi cañi ñu nuu ndo, ta tahvi noo noho ndo, o tiví noo chiti nuu ndo, o nya chi ndo sañicuehe ñu, tahán chi vatyí sañicuehe tucu ñáyivi chi maa ñu, tari cuhva cha sañicuehe ñu chi ndo." 39 Soco yuhu catyí chi ndo, vatyí ma nasacuvi ndo cha

ña vaha cha nyacuví ñu tasi iñi chi ndo. Vatyí tatu yóo cha cañi ñin chiyo xitín ndo, ma nduxaan ndo chi ñu. Soco cuhva tucu ndo inga chiyo xitín ndo na cañi ñu. ⁴⁰ O tatu chicán ñu cuatyí chaha ndo, ta cuñí ñu tinyaa ñu noo camisa ndo, ma cuxaan ndo chi ñu. Soco cuhva ndihi ndo chaqueta ndo chi ñu. ⁴¹ O tatu yóo cha catyí chi ndo na cuiso ndo cha chii ñu noo kilómetro, cuiso ndo uvi kilómetro. ⁴² Tatu yóo ñu chicán tumañi iñi chi ndo, cuhva ndo chi ñu. Ma catyí ndo cha ma saha ndo tumañi iñi cuan.

Na cuñi yo chi ñu xaan iñi chi yo

(Lc. 6.27-28, 32-36)

⁴³ Ta chiñi tucu ndo tuhun cha catyí ñu chiyo ta cha naha vatyí cuñi ndo chi ra tahan ndo. Ta chi ra xaan iñi chi ndo quíhi tisihi iñi ndo chi ra. ⁴⁴ Soco yuhu catyí chi ndo, cuñi ndo chi ñáyivi xaan iñi chi ndo. Ta sacuvi ndo cha vaha chihin ñáyivi cahan chi ndo, ta chi ñu ña cuñí nyehe chi ndo. Ta çacan tahvi ndo chaha ñu quiñi nyacuvi chihin ndo ta sanyehé tindoho chi ndo. ⁴⁵ Ta tyicuan caa sacuvi ndo tacuhva coto ñáyivi vatyí cuví ndo sehe Sutu yo ra nyaá andivi. Vatyí maa ra sacañá ra ñanyii, ta sacoon ra savi siqui tyiño sahá ñáyivi vaha ta ñáyivi ña vaha ñandíhi. ⁴⁶ Tatu nyoho ta cuñí ndo chi ñáyivi cha vaha iyó chihin ndo ta ña cuñí nyehe ndo chi ñáyivi xaan iñi chi ndo, ñahri cha vaha

cuñihi ndo. Vatyí suri tyicuan caa nyacuví tucu ra catavá xuhun cuenda gobiernu ñuu Roma. Ta quiñi ca iyó ra cuan cuñí maa ndo. ⁴⁷ O tatu chahá ndo nocumi chi ra tahan ri ndo, ñahri cha vaha xaan nyacuví ndo. Vatyí suri tyicuan caa sacuví tucu ñáyivi ña ñohó nuu Nyoo. ⁴⁸ Tari Sutu yo cha nyaá andivi maa maa ri cha vaha sacuví ra, tyicuan caa nyoho maa maa ri cha vaha sacuvi ndo.

6

Nu sañahá ra Jesús yoso caa sacuvi yo tumañi iñi

¹ Saha ndo cuenda ta ma cuyaa ndo ñáa tumañi iñi sacuvi ndo chi ñáyivi. Vatyí tatu cuyaa ndo nuu ñáyivi, ñahri cuñihi ndo nuu Sutu yo ra nyaá andivi. ² Cuhva cha sahá ndo tumañi iñi, ma sacoto ndo chi inga ñáyivi vatyí sahá ndo tumañi iñi. Ma sacuvi ndo tari sacuví ra sahá tyi vaha ta chicá noo ra nuyahvi ta chichi vehe ñuhu. Sahá ra tumañi iñi tacuhva na catyí ñáyivi vatyí vaha xaan ñáyivi cuví ra. Soco yucuan ri ñihí ra cuan ta ñahri ca cuñihi ra nuu Nyoo. ³ Soco nya quívi sahá ndo tumañi iñi chi ñu ndahvi, ma sacoto ndo ni chi ra tahan cahnu ndo. ⁴ Xehe ri sacuvi ndo, tacuhva cha ma coto ñáyivi. Tyicuan ta Sutu yo Nyoo nyehe ra cha sacuvi ndo tyicuan caa. Ta cuaha ca cha vaha cucuhva ra chi ndo.

Nu sañahá ra Jesús yoso caa cahan yo chihin Sutu yo Nyoo

(Lc. 11.2-4)

⁵ 'Ta cuhva cha chicán tahvi ndo chi Nyoo, ma cacan tahvi ndo tari cuhva sacuví ñu savahá chii. Vatyí ñu cuan tahán iñi ñu cacan tahvi ñu chi Nyoo nu tuví ñáyiví, tacuhva catyí ñáyiví vatyí vaha xaan ñáyiví cuví ñu, vaha xaan chinó iñi ñu chi Nyoo. Soco catyí chi ndo cha ndicha vatyí ñahri ca cuñihi ñu nuu Nyoo. Vatyí ñima cha ndicha sacuví ñu. ⁶ Soco nyoho ñáá quiví cacan tahvi ndo chi Nyoo, ma cacan tahvi ndo tacuhva nyehe ri ñáyiví chi ndo. Soco quihví ndo chichi vehe ndo ta nacasí ndo yuvehe ta cacan tahvi ndo chihin tandihí aña ndo. Ta noo tuhun ri maa Nyoo Sutu yo nyehe ra cha sacuvi ndo tyicuan caa vatyí nuu maa ra chicán tahvi ndo, ta ñima nuu ñáyiví. Ta cuaha ca cha vaha cucuhva ra chi ndo.

⁷ Cuhva cha cahán ndo chihin Nyoo ñima susuri tuhun cha ñima ri tuhun cahan ndo. Vatyí tyicuan caa sacuví ñu cha ñahri tuhun Nyoo caá aña. Cuñí maa ñu vatyí tyicuan caa ta cuiñi Nyoo cha cahán ñu. Vatyí cuaha xaan chaha cahán ñu susuri maa tuhun cuan. ⁸ Ma sacuvi ndo tyicuan caa. Vatyí Nyoo cha chitó ra ñáá cha chiñuhú chi ndo, cha ni ri ca cha cumañi ca cacan ndo chi ra. ⁹ Yucuan chaha nyoho, tatu cua cacan tahvi ndo chi Nyoo, tyehe caa catyí ndo:

Sutu Mañi yuhu, yoho cha

nyaún andiví. Sacahnú xaan ndi chuun.

¹⁰ Na quichi quiví cha nyaca ñahun ihya siqui ñuhu ñáyiví, tari nyacá ñahun andiví.

Na sacuvi ñáyiví ihya siqui ñuhu ñáyiví tandihí cuhva cuñí maun, tari cuhva cuví gloria.

¹¹ Cuhva cha cachi ndi tacuhva cha yaha ndi noo noo quiví.

¹² Saha tucahnu iñi chi ndi ñáá ndihí cha ña vaha nyacuví ndi, tari maa ndi sahá ndi ticahnu iñi chi ñu satasí iñi chi ndi.

¹³ Ma cuhvon cha nducu nyehe ra ña vaha chi ndi, tacuhva ma sacuvi ndi cuatyí nuun. Soco maun cuví ra sacacú chi ndi ndaha ra ña vaha.

Vatyí maun cuví ra nyacá ñaha tandihí. Ta maun cuaha xaan ca tunyee iñi iyó chuun. Ta tahán chi vatyí sacahnu tandihí ñáyiví chuun tyicuan ri maa. Ta na cuví chi tyicuan caa.

Tyicuan caa cuhva tahán chi cacan tahvi ndo chi Nyoo.

¹⁴ Vatyí tatu nyoho ta sahá ndo ticahnu iñi chi ñu nyacuví cha ña vaha chihin ndo, tyicuan caa ta Sutu yo ra nyaá andiví, cusaha ra ticahnu iñi chi maa ndo. ¹⁵ Vatyí tatu ma saha ndo ticahnu iñi chi ñu nyacuví cha ña vaha chihin ndo, tyicuan caa tucu Sutu yo, ma saha ra ticahnu iñi cuatyí maa ndo —catyí ra Jesús.

Ñáá quiví ña chachí yo ta nanducú yo chi Nyoo, ma sacoto yo chí inga ñáyiví

16 Ta catyí tucu ra Jesús chi ñu chicá noo chihin ra:

—Quiví cha ña chachí ndo ta nanducú ndo chi Nyoo, ma cuihya nyehe ndo, tari ñu savahá chii. Vatyí cuñí ñu cha coto ñáyiví vatyí ña chachí ñu ta nanducú ñu chi Nyoo. Soco catyí chi ndo vatyí yucuan ri ñihi ñu. Ñahri ca cuñihi ñu nuu Nyoo. 17 Soco tatu nya quiví ña chachí ndo ta nanducú ndo chi Nyoo, ñacatyá ndo nuu ndo. Ta ñacuaca ndo cuca xiñi ndo, 18 tacuhva vatyí ma tuvi iñi ñáyiví vatyí ña chachí ndo ta nanducú ndo chi Nyoo. Tyicuan ta noo tuhun maa Nyoo nyehe ra cha sacuví ndo cha xehe ri cuan. Ta cuaha ca cha vaha cua cuhva ra chí ndo chihin nuu ñáyiví.

Nu sañahá ra Jesús vatyí ma sacaya yo cha iyó siqui ñuhu ñáyiví

(Lc. 12.33-34)

19 'Ma sacaya ndo cha tyayí ihya ñáyiví. Vatyí coto tiví cha tyayí cuan. O cuví tucu quihví ra suhu, ta suhu ra tandihí cha tyayí ndo. 20 Vaha taxin ca sacaya ndo cha vaha chí ndo nu nyaá Nyoo gloria. Vatyí nuu Nyoo ña ndihí cha vaha cuan. Vatyí ní ri ra suhu, ní quití, yori cha sativí iyó yucuan. 21 Ta catyí chí ndo vatyí nu nyaá cha tyayí ndo, yucuan cuví nu nyaá xiñi ndo. Ta yucuan cunyaa aña ndo.

Tari sandichín chiti nuu yo chí yo tacuhva nyehe yo nu cuahan yo, tyicuan caa tucu sandundichín tuhun Nyoo aña yo

(Lc. 11.34-36)

22 'Chiti nuu ndo noo cha sandundichin ityi cuahan ndo cuví. Ta tyicuan caa tucu aña ndo, tatu iyó cha ndichin Nyoo, vaha ñáyiví cuví ndo. 23 Soco tatu ña vaha chiti nuu ndo, ña ndichin nyehe ndo nu cuahan ndo. Tandihí ri ta ñaa iñi. Ta tyicuan caa tucu tatu ñahri cha ndichin Nyoo nyaá aña ndo, tari noo ra cuaa cuví ndo. Ña cuví nyehe ndo ityi vaha cha cuahan nu nyaá Nyoo.

Sañahá ra Jesús vatyí ma cuvi quichaha yo chí Nyoo tatu cuñí xaan ca yo cha tyayí

(Lc. 16.13)

24 'Noo musu ma cuvi coo uvi chitoho ra. Vatyí musu cuan cuñí ca ra chí noo ra ta ñima ca chí inga ra. Ta quichahá ra chí noo ra, ta chí inga ra ma quichaha ra. Ta tyicuan caa tucu nyoho, ma cuvi cuñi ndo chí Nyoo, ta suri cuhva cuan cuñi ndo cha tyayí.

Sañahá ra Jesús vatyí ma caca xaan iñi yo ñáá ndihí cha chiñuhú chí yo

(Lc. 12.22-31)

25 'Yucuan chaha catyí chí ndo vatyí ma caca xaan iñi ndo yoso caa ñihi ndo cha cachi ndo ta cha cohó ndo. Ní ma caca iñi ndo ñáá cha cuihno ndo. Vatyí yahví ca nyaá aña ndo ta coño ñuhu

ndo nuu Nyoo, ican saha cha cachi ndo ta cha cuihno ndo. Vatyí maa ra chahá ra ñáyiví coo ndo. Ta ña yíi cuhva ra inga cha chiñuhú chi ndo ñandihí. ²⁶ Saha ndo cuenda chí saa. Ña savahá ti itu. Ta ña sahá tyiño ti. Ni ri ña naquehén vaha ti tyiño sahá ti chichi yaca. Soco Sutu yo Nyoo chahá ra cha cachi ti. ¿Atu ña yahvi ca nyaá nyoho nuu Nyoo ta ñima ca saa cuan? ²⁷ Ni ri maa chicá xaan xiñi ndo ma cuví sandusucun ndo ni chiin ca chí ndo.

²⁸ 'Ta tatu ni chiin cuan ña cuví chí ndo, ¿ñáá tuhun cha chicá xaan xiñi ndo tuhun sahma ndo? Saha ndo cuenda yoso caa iyó tu ita nu chiquí. Vatyí ña taví tun. Ta ni ña conó tun isa. ²⁹ Soco catyí chí ndo vatyí ni rey Salomón cha tyayíi xaan cuví ra, soco ña cuví cuihno ra cha tyaquí, tari cha sacuihnó Nyoo chí tu ita cuan. ³⁰ Ta tu ita cuan tyaquí xaan ñihno tun suhva ri quívi ta yaha cuan ta cuna ityí tun ta cucayu tun chichi horno. Ta nyoho, vaha ca cusacuihno Nyoo chí ndo. Soco chiin xaan chinó iñi ndo chí ra. ³¹ Yucuan chaha ma caca xaan xiñi ndo ta catyí ndo: “¿Ñáá cha cachi ndi, o ñáá cha coho ndi, o ñáá cha cuihno ndi?” ³² Vatyí ñáyiví cha ñahri tuhun Nyoo caá añima, chicá xaan xiñi ñu tuhun ihya. Soco nyoho ma caca iñi ndo tuhun cuan vatyí iyó noo Sutu ndo, ra nyaá andívi. Ta chitó ra ñáá ndihí cha chiñuhu chí ndo. ³³ Yucuan chaha, cunyaa xiñi ndo maa maa ri maa

tuhun maa Nyoo. Ta nducu ndo cuhva cunyaca ñaha ra añima ndo. Ta sacuvi ndo tari cuhva cuñí maa ra. Ta tyicuan caa ñihi ndo tandihí cuíi maa cha chiñuhú chí ndo. ³⁴ Tandihí quívi ta iyó tindoho chí ndo. Ma caca xiñi ndo tuhun tindoho cha vachí. Vatyí Nyoo nyaá ra chihin ndo.

7

Ma cahan yo cha caá inga ñáyiví

(Lc. 6.37-38, 41-42)

¹ 'Ma cahan ndo cha caá inga ñáyiví. Tyicuan caa ta ma tiin Nyoo cuenda cha caá ndo. ² Vatyí tari cuhva cahán ndo cha caá inga ñu, tyicuan caa cuhva cutachí tuñi Nyoo chí ndo. ³ ¿Yoso caa cha cuví nyehun cuatyí luhlu ra yañun ta ña cuví nyehún cuatyí cahnu cha iyó chí maun? ⁴ Tatu chíti nuu maun yihí noo vitu cahnu, ¿yoso caa cuví catyun chí ra yañun: “Nyaca, na tave mihin lee cha yihí chíti nuun?” ⁵ Yoho cha savahún chuun, tava xihna vitu cahnu cha yihí chíti nuu maun, tyicuan ta cuví nyehe vahun mihin lee cha cutavon chíti nuu ra yañun.

⁶ 'Ma sañihí ndo cahan ndo tuhun Nyoo chihin ñu ña cuñí coto, vatyí coto cañi ñu chí ndo. Tari ina cha tiin vavaha chí ndo, tyicuan caa cuví ñu. Ta tari quini cha chaca chaha ti cha yahvi nyaá, tyicuan caa cahán ña vaha ñu siquí tuhun Nyoo.

Ma cundihñi yo cacan yo chi Nyoo, tyicuan ta cuhva ra chi yo

(Lc. 11.9-13; 6.31)

⁷ 'Cacan ndo cha chiñuhú chi ndo chi Nyoo. Ta cuhva ra chi ndo. Nanducu ndo, ta nañihi ndo. Sacachan ndo yuvehe, ta nuña. ⁸ Vatyí tandihí ndo cha chicán ndo, ñihi ndo. Tatu nanducú ndo, nañihi ndo. Ta tatu sacachán ndo yuvehe, cunuña yuvehe.

⁹ 'Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chaha ndo noo yuu chi sehe ndo, tatu chicán ndotyín pan chi ndo. ¹⁰ Ta ña tuhvá ndo chaha ndo noo coo chi sehe ndo tatu chicán ndotyín noo tiyaca chi ndo. ¹¹ Nyoho cha quiñi iyó ndo soco chitó ndo yoso caa cuhva ndo cha vaha chi sehe ndo. Ta vihi ca Sutú yo, ra nyaá andiví. Cuaha ca cha vaha cuhva ra chi ndo tatu cacan ndo chi ra.

¹² 'Tari cuñi maa ndo cha cunyacuví ñáyiví cha vaha chihin ndo, tyicuan caa cunyacuví tucu maa ndo cha vaha chihin ñu. Vatyí tyicuan caa catyí tuhun cha tachí Nyoo, cha tyaa ra Moisés ta ra cacuví profeta Nyoo ta cha naha.

Tihin yuvehe ta cuiñi ityi cha cuahan nu nyaá Nyoo

(Lc. 13.24)

¹³ 'Nducú ndo cuhva quihví ndo yuvehe tihin. Vatyí quehen yuvehe, ta quehen ityi cha cuahan nya nu cunaa ñáyiví anyaya. Ta cuaha xaan ñu cuahan ityi cuan. ¹⁴ Soco

tihin yuvehe ta cuiñi ityi cha cuahan ñáyiví cha ma naa ca maa nu cucoo ñáyiví vaha. Soco suhva ri ñáyiví nañihi ityi cuan.

Chihin cha sacuví ri ñáyiví, ta nicohón nuu yo chi ñu tatu ñu vaha o ñu ña vaha cuví ñu
(Lc. 6.43-44)

¹⁵ 'Saha ndo cuenda chi ra cuendu. Vatyí cacatyí ra vatyí cuenda Nyoo cahán ra. Soco ña ndicha. Vatyí vachi coyo ra tari noo mbee nu nyicú ndo. Sahá ra tyi ra vaha cacuví ra. Soco tari noo ñaña xaan cacuví ra. ¹⁶ Nyoho cuví nicohón nuu ndo chi ra chihin cha nyacuví ra. Tari noo yutun ña vaha, tyicuan caa cacuví ra. Vatyí noo tuñiyaca ma cuhva tun mango, ta ni ri noo iñu nduhva ma cuví cuhva chi tichaha ndiví. ¹⁷ Ta tyicuan caa tucu tandihí yutun vaha. Chahá tun chiti vaha. Ta tandihí yutun ña vaha, chahá tun chiti ña vaha. ¹⁸ Ta yutun vaha, ma cuví cuhva tun chiti ña vaha. Ta ni ri yutun ña vaha ma cuví cuhva tun chiti vaha. ¹⁹ Ta tandihí yutun cha ña chahá chiti vaha, cahnya yo chi tun. Ta cahmi yo chi tun. ²⁰ Ta tyicuan caa, chihin cha nyacuví ñáyiví cuví nicohón nuu ndo chí ñu tatu ñu vaha cuví ñu, o ñu ña vaha cuví ñu.

Nu catyí ra Jesús vatyí ña tandihí ñáyiví quihví ñu nu nyaá ñaha Nyoo

(Lc. 13.25-27)

²¹ 'Ma tandihí ñu cha catyí chii: "Sutu Mañi yuhu, Sutu Mañi yuhu", cuquihví ñu

nu nyacá ñaha Nyoo gloria. Ñu sacuví tandihí cha catyí maa Nyoo Suti, ican ñu cuan cuquihvi nu nyacá ñaha ra. 22 Quiivi cha cucutuñi chí ñáyivi, cuaha xaan ñu cucatyí ñu chii tyehe caa: “Sutu Mañi yuhu. Yuhu cahin tuhun maun chihin ñáyivi. Ta chihin sivun tave tatyí ña vaha cha yihí añima ñáyivi. Ta cuaha xaan milagru savahí chihin sivun”, cucatyí ñu chii.

23 Tyicuan ta yuhu cucatyí chi ñu: “Ña ñohó nui chi nyoho. Canyaha ndo nu nyaí. Vatyí nyoho sacuvi ndo maa maa ri cha ña vaha.”

Nu sañahá ra Jesús yoso caa cucuvi chi ñu quichahá ta ñu ña quichahá tuhun cahán ra (Lc. 6.47-49; Mr. 1.22)

24 Iyha catyí chi ndo, yóo cha chiñi tuhun cahín ta sacuví tari cuhva catyí; cuví ra tari noo ra chiñi tuñi cha savaha ra vehe ra siqui cava.

25 Ta quichaha coon savi. Ta cama xaan yuvi ndutya yaha. Ta ñihi xaan caa tatyí. Soco ña cuví sanduva chi vehe cuan. Vatyí ñihi nanyaá siqui cava cuan. 26 Soco yóo cha chiñi tuhun cahín, ta ña sacuví ra tari cuhva catyí; cuví ra tari noo ra tondo, cha savaha ra vehe ra nu ñiti. 27 Ta chaa savi. Ta cama xaan yuvi ndutya yaha. Ta ñihi xaan caa tatyí. Ta vehe cuan tañi tyehe ri nduva —catyí ra Jesús chi ñu.

28 Cuhva cha ndihí cahan ra Jesús chihin ñáyivi, iyo xaan cuñi ñu tuhun cha sañahá ra. 29 Vatyí sañahá ra tari noo ra

cha nyacá ñaha. Ta ña sañahá ra tari ra sacuahá cuenda ley vehe ñuhu.

8

Nu sanduvahá ra Jesús chi noo ra cuhvi cha tyahyú coño (Mr. 1.40-45; Lc. 5.12-16)

1 Cuhva cha noo ra Jesús yucu cuan, cuaha ñáyivi nyicón chi ra. 2 Ta chaa noo ra cha tyahyú coño, ta chicuñi chiti ra nuu ra, ta catyí ra chí ra:

—Sutu Mañi yuhu, tatu yoho ta cuñún, cuví sanduvahun chii —catyí ra chi ra.

3 Tyicuan ta sanacaá ra Jesús ndaha ra ta tin ra chi ra, ta catyí ra:

—Cuñi sanduvahi chuun. Ta na nduvahun vityin ri —catyí ra.

Ta caa cuhva ri cuan ta nduvaha nu tyahyu cuan.

4 Tyicuan ta quichaha catyí ra Jesús chi ra:

—Nyehe, yori chihin cahun tuhun. Soco cuahan, ta sañahun chuun chí tata sutu, ta cuhva cuendon ofrenda cha catyí ra Moisés nu ley chahnu vatyí tacuhva coto ñu vatyí cha nduvahun.

Nu sanduvahá ra Jesús chi musu noo ra capitán (Lc. 7.1-10)

5 Cuhva cha chaá ra Jesús Capernaum, noo capitán, ra ñuu Roma, chaá ra nu nyaá ra Jesús ta chacu ndahvi ra nuu ra, 6 ta catyí ra:

—Sutu Mañi yuhu, musi catuví ra nu cama. Cuhvi ra. Ña cuví nducuíta ra vatyí ñihi xaan tahán ra.

⁷ Ta catyí ra Jesús chi ra:

—Cuhun mai ta cusanduvahi chi ra —catyí ra chi ra.

⁸ Nacahan capitán cuan ta catyí ra:

—Sutu Mañi yuhu, ña nañé cha cuhun vehi; soco tacuhva catyi run, ta musi nduvaha ra. ⁹ Vatyí suri iyó ra nyacá ñaha chi mai. Ta iyó sindaro nyacá ñaha tucu mai. Ta tatu cha tave tyiño chi noo ra, cuhun ra. Ta tatu cane chi inga ra, quichi ra. Ta tatu cha tave tyiño chi musi, sacuvi ra.

¹⁰ Ta cha chiñi ra Jesús cha cahan ra, iyo xaan cuñi ra. Ta catyí ra chi ñu nyicón chi ra:

—Cha ndicha catyí chi ndo, vatyí ñuu cha nyicú nicahnu Israel, ta nañihi que ni noo ñáyivi cha chinó xaan iñi ñu tari chinó iñi ra ihya. ¹¹ Ta catyí chi ndo vatyí cuaha ñu inga ñuu cuquichi coyo ityi nu caña ñanyii, ta ityi nu quee ñanyii, ta cunyicu ñu cachi ñu chihin ra Abraham ta ra Isaac ta ra Jacob nya andivi. ¹² Ta ñu Israel cha tahán chi cuhun andivi, yihí ñu, ma cuhun ñu, vatyí cuhun ñu nu ñaa iñi ityi chata. Ta yucuan cucuacu chaa ñu ta cucahñi noho ñu —catyí ra Jesús chi ñu.

¹³ Tyicuan ta quichaha catyí ra chi capitán cuan tyehe caa:

—Cuahan, ta na cuvi chi tari cuhva catyūn vatyí chinó xaan iñun chii —catyí ra.

Ta suri cuhva cuan nduvahā musu ra.

Nu sanduvahā ra Jesús chi maha tyiso ra Pedro

(Mr. 1.29-31; Lc. 4.38-39)

¹⁴ Ta cha yahā cuan, chaa ra Jesús vehe ra Pedro. Ta nanyehe ra chi maha tyiso ra Pedro, catuví ña nu chito chihin cahñi. ¹⁵ Ta tñin ra ndaha ña, ta quita cahñi cuan chi ña. Ta ndicuitā ña, ta quichaha tyiñuhu ña chi ra.

Nu sanduvahā ra Jesús cuaha ñu cuhvi

(Mr. 1.32-34; Lc. 4.40-41)

¹⁶ Ta cuhva cha cuaa cuan, quichi nyaca ñu cuaha xaan ñáyivi yihí tatyí ña vaha chi chi ra Jesús. Ta chihin noo ri tuhun cahan ra, tava ñehe ra chi tatyí ña vaha cuan, ta sanduvahā ra chi tandihí ñu cuhvi. ¹⁷ Tyicuan caa cuvi tacuhva vatyí na chino cava tari cuhva catyí ra profeta Isaías, quivi catyí ra tyehe caa: “Maa ra quehen ra cuehe cha yihí chi yo, ta tinyaa ra cha uhvi chi yo.”

¿Yoso chiquihí chi yo tatu cuñi yo cunyicon yo chi ra Jesús?

(Lc. 9.57-62)

¹⁸ Tyicuan ta nyehe ra Jesús vatyí nicachico nu nyaá ra nyicú ñáyivi. Ta catyí ra chi ñu vatyí cuyaha ra inga chiyo miñi. ¹⁹ Tyicuan ta chaa noo ra sacuaha ley vehe ñuhu ta catyí ra chi ra:

—Maestro, cuñi cunyiquen chuun tandihí ri ityi nu cuhun —catyí ra.

²⁰ Ta ra Jesús catyí ra chi ra:

—Ñaña, iyó vehe ti, ta saa cha chicó nu tatyí, iyó taca ti. Soco yuhu Rayñi cha quichi nya gloria, ñahri vehi ta ni ri

nu cava xiñi ta ñahri —catyí ra.

²¹ Inga tucu ra chicá noo chihin ra catyí ra chi ra:

—Tata, cuhva na cahun xi-hne cutyihí chi suti chichi ñuhú, tyicuan ta quichi ta cunyiquen chuun —catyí ra.

²² Ta catyí ra Jesús chi ra:

—Ñaha yoho vatyí cunyi-con chii. Saña chi ñu ña ñohó nuu chi Nyoo, na tyihi maa ñu chi tahan ñu chichi ñuhú —catyí ra.

Nu sacutaxín ra Jesús tatyí xaan

(Mr. 4.35-41; Lc. 8.22-25)

²³ Tyicuan ta quihvi ra chichi canoa, ta ra cachicá noo chihin ra, cuahan coyo ra chihin ra. ²⁴ Ta chaá noo tatyí ñihi xaan nu miñi cuan, ta nyacua chasí ndutya cuan canoa ra soco maa ra Jesús quixí ra. ²⁵ Ta ra cachicá noo chihin ra sandoyō ra chi ra, ta cacatyí ra:

—¡Sutu Mañi yuhu, sacacu chi yo, vatyí cuñi cunaa yo!

²⁶ Ta catyí ra Jesús chi ra:

—¿Ñáá tuhun cha yuhvi xaan ndo? ¡Nyoho chiin xaan chinó iñi ndo chii!

Tyicuan ta nacanda ra ta sacutaxín ra tatyí nu miñi cuan, ta tandihí cutaxín. ²⁷ Ta iyo xaan cacuñí ra cuan ta cacatyí ra:

—¿Yóó ra cuví ra ihya? Vatyí nyacua nya tatyí ta nyacua nya ndutya ta quichahá chi ra —catyí ra.

Nu nduvahá uvi ra ñuu Gadara ra cayihí tatyí ña vaha chi

(Mr. 5.1-20; Lc. 8.26-39)

²⁸ Tyicuan ta chaá coyo ra inga chiyo miñi cha nyaá ñuhú cha nañí Gadara. Ta chaá coyo uvi tahan ra yihí tatyí ña vaha chii. Ta nu ñaña caquita coyo ra cuan. Xaan vavaha ra, ta yori maa cuví yaha ityi cuan. ²⁹ Ta canachaá ra, ta cacatyí ra:

—¿Ñáá cha cuñún chihin ndi, yoho Jesús Sehe Nyoo? ¿Atu vachun vachi sanyehun tindoho chi ndi cha ni cumañi ca chaá quivi? —cacatyí ra cuan.

³⁰ Ta yatyin ri cuan nyicú cuaha quini cachachí ti. ³¹ Ta catyí tatyí ña vaha cuan chi ra Jesús:

—Tatu cuatava ñehun chi ndi, cuhva cha quihvi ndi chichi quini cuan —cacatyí tatyí ña vaha cuan.

³² —Vaha. Quihvi ndo —catyí ra Jesús.

Ta caquita coyo tatyí ña vaha cuan, ta quihvi coyo chichi tandihí quini canyicú cuan. Ta tandihí quini cuan cachino ti ta canacoyo ti noo xahva yuhu miñi cuan, ta chihí ti chihin ndutya cuan.

³³ Tyicuan ta ra casahá cumi chi ti cuan, cachinó vavaha ra cuahan coyo ra chichi ñuu, ta canacatyí ra tandihí cha cuví chi ra cayihí tatyí ña vaha cuan chi. ³⁴ Ta tandihí ñáyivi ñuu, chahan ñu chinyehé ñu chi ra Jesús, ta chacu ndahvi ñu nuu ra na quita ra yucuan.

9

Nu sanduvahá ra Jesús chi noo ra cuhvi cha ña cuví

nacanda

(Mr. 2.1-12; Lc. 5.17-26)

¹ Tyicuan ta quihví ra Jesús chichi canoa ta yahá sava ra inga chiyo miñi, ta nachaa ra nya ñuu nu iyó ra. ² Nu nyaá ra yucuan chinyaca ñáyivi chi noo ra cuhví cha ña cuví nacanda catuví ra nu chito. Ta cha nyehe ra Jesús vatyí chinó xaan iñi ñu chi ra, quichaha catyí ra chi ra cuhví cuan:

—Sanii iñun, suti vatyí cha chicoo ticahnu iñi cuatyun —catyí ra chi ra.

³ Tyicuan ta quichaha chica xiñi suhva ra sacuahá ley vehe ñuhu cha nyicú yucuan tyehe caa: “Ra ihya chicoo cuatyí ra nu Nyoo chihin tuhun cahán ra”, cachicá xiñi ra.

⁴ Soco ra Jesús chitó ri ra ñáa cha cachicá xiñi ra, ta catyí ra chi ra:

—¿Ñáa tuhun cha ña vaha maa chicá xiñi ndo? ⁵ Vatyí çnya cha yii ca catyí yo: atu yii ca catyí yo “Cuatyun cha yaha ndachi”, o yii ca catyí yo: “Ndicuita ta cacon”? ⁶ Vaha. Cuasañahi chi ndo vatyí yuhu Rayii cha quichi nya gloria, iyó ityi chii siqui ñuhu ñáyivi ihya vatyí sahi ticahnu iñi cuatyí —catyí ra Jesús.

Tyicuan ta catyí ra chi ra cuhví cuan:

—Ndicuita, naquehen chiton ta cuanuhu nya vehun —catyí ra.

⁷ Tyicuan ta ndicuita ra cuhví cuan ta cuanuhu ra nya vehe ra. ⁸ Cuhva cha nyehe ñáyivi tuhun ihya, canayuhví ñu. Ta casacahnú ñu chi

Nyoo vatyí chaha ra tunyee iñi cuan chi ñáyivi.

Nu caná ra Jesús chi ra Mateo

(Mr. 2.13-17; Lc. 5.27-32)

⁹ Quita ra Jesús yucuan, ta nanyehe ra chi noo ra cha nañi Mateo, nyaá ra quehen ra xuhun cha tyiyahví ñu Israel chi gobiernu ñuu Roma. Ta catyí ra chi ra:

—Coho chihin.

Tyicuan ta ndicuita ra Mateo ta tyinyicon ra chi ra.

¹⁰ Tyicuan ta cuví chi noo chaha ra Jesús nyaá ra nya vehe ra Mateo, chachí ra. Ta cachaa coyo cuaha ra catavá xuhun cuenda gobiernu ñuu Roma ta inga ca ra ca iyó cuatyí. Ta cachicunyicú tucu ra yucuan nu mesa in ri chihin ra Jesús ta ra cachicá noo chihin ra. ¹¹ Soco cha canyehe ra fariseo cha tyicuan caa, candaca tuhun ra chi ra cachicá noo chihin ra Jesús, ta cacatyí ra:

—¿Ñáa tuhun cha vatyí ra sacuahá chi nyoho chachí ra chihin ra catavá xuhun cuenda ra nyacá ñaha nya Roma ta chihin ra ca iyó cuatyí? —cacatyí ra.

¹² Chiñi ra Jesús cha cahan ra, ta catyí ra chi ra:

—Ña chiñuhú doctor chi ñu iyó vaha, ñu ña cuhví, soco chi ñu cuhví chiñuhú ra. ¹³ Cuahan ndo ta cutuhva ndo cha cuñi chi catyí nu tutu Nyoo, nu catyí ra tyehe caa: “Yuhu cuñi vatyí cundahvi cuñi ndo chi ñáyivi, ta ñima ca cha cahni ndo quití ta cuhva cuenda ndo chii.” Ña vachi

na cane chi ñu vaha, soco chi ñu iyó cuatyí, tacuhva na nasama ñu cuhva iyó ñu.

Nu catyí ra Jesús vatyí cha ni ri ca cha nyaá ca ra chihin ra cachicá noo chihin ra ña tahán chi cha saha ra ayunar
(Mr. 2.18-20; Lc. 5.33-35)

¹⁴ Tyicuan ta ra canyicón chi ra Juan, ra sacondutya chi ñáyiví, catuhva ra chi ra Jesús ta candacá tuhun ra chi ra ta cacatyí ra:

—¿Ñáá tuhun cha nyuhu ta ra cacuví fariseo, cuaha xaan chaha savaha ndi ayuno, ña chachí ndi ta nanducú ndi chi Nyoo? ¿Ta ra cachicá noo chihin yoho ñima tyicuan caa sacuvi ra? —cacatyí ra nyicón chi ra Juan.

¹⁵ Ta nacahan ra Jesús ta catyí ra:

—¿Atu cuví cunyaa cuihya ñu nyicú vico cha ni ri ca cha nyaá ra cua tandaha chihin ñu? Soco vachi quiví vatyí cucuachiyo ra nu nyicú ñu, tyicuan ndicha ta cusavaha ñu ayuno.

Nu sañahá ra Jesús vatyí ña chachí tahan tuhun chahnu cha iyó ñu chihin tuhun chaa cha sañahá ra chi ñu
(Mr. 2.21-22; Lc. 5.36-39)

¹⁶ Yori naquicú noo vestido chahnu chihin noo sahma chaa vatyí coto cundiyo nu naquicu ñu chihin cha chaa cuan, ta cahnya chi cha chahnu cuan, ta nu tahnya cuan nducahnu ca.

¹⁷ Ta ni ña tyihí yo vinu chaa chichi ñi chahnu vatyí tatu sacuvi yo tyicuan caa, tahnya ñi cuan, ta tari cunaa vinu,

ta cunaa ñi cuan. Yucuan chaha cuñí chi tyihi yo vinu chaa chichi ñi chaa, ta tyicuan ta ñinduvi ta cusaha cuenda chi chi tahan chi.

Sehe ra Jairo, ta ñaha cha tñ sahma ra Jesús
(Mr. 5.21-43; Lc. 8.40-56)

¹⁸ Cha ni ri ca cha catyí ra Jesús tuhun ihya, cha noo ra cuví nuu chi ñu Judea ta chicuiñi chiti ra nuu ra Jesús, ta catyí ra:

—Ni chihí sehi, soco tatu yoho quichun ta tyison ndahun siqui ña, cunandoto ña —catyí ra chi ra Jesús.

¹⁹ Ndicuita ra Jesús ta cuahan ra ñi ri chihin ra ta ra cachicá noo chihin ra ñandihi.

²⁰ Tyicuan ta noo ñaha, cuhví ña chihin cha chati niñi ña. Ta cha uchi uvi cuiya cuhví ña. Ta tuhva ña chi ra Jesús ityi chata ra, ta tñ ña yuhu sahma ra, ²¹ vatyí tyehe caa chicá xiñi ña: “Ma chihin cha tñ ri sahma ra ta nduvahi”, chicá xiñi ña.

²² Soco ra Jesús nanyocava ra nanyehe ra chi ña, ta catyí ra chi ña:

—Nduní iñun sihi, cha nduvahun vatyí chinó iñun —catyí ra.

Ta caa cuhva ri cuan ta nduvaha ña.

²³ Yaha cuan ta cha noo ra Jesús vehe ra cuví nuu cuan, ta nyehe ra vatyí ra música canyatú tuhva ra cha kuhun coyo ra nu quihvi cue chichi ñuhú. Ta ñáyiví cha nyicú cuan chacú chaa ñu. ²⁴ Ta catyí ra chi ñu:

—Quita ndo ihya. Ñaha tyi-
vaa ihya, ña chihí ña, soco
quixí ña —catyí ra.

Ta chacú cuehe ri ñáyivi
nyehe ñu chi ra. ²⁵ Soco
ra Jesús tava ra chi ñu ityi
chata vehe, tyicuan ta quihvi
ra ta tijn ra ndaha ñaha tyivaa
cuan, ta maa ña ndicuita ña.
²⁶ Ta tandihi ityi cuan chitya
tuhun cha cuví yucuan.

*Nu sanduvaha ra Jesús chi
uvi ra cuaa*

²⁷ Cuhva cha quita ra Jesús
yucuan, uvi tahan ra cuaa
canyicón chi ra suri caná
chaa ra ta cacatyí ra:

—¡Cudahvi cuñi chi ndi,
yoho ra vachi tata ra David!
—cacatyí ra.

²⁸ Ta cuhva cha quihvi ra
Jesús chichi vehe, ra cuaa
cuan, catuhva ra chi ra, ta
maa ra Jesús quichaha ndaca
tuhun ra chi ra:

—¿Atu chinó iñi nyoho
vatyí cuví sanduvahi chi
ndo? —catyí ra.

Ta canacahan ra ta catyí ra:

—Ay, chinó iñi ndi chuun,
Sutu Mañi yuhu —cacatyí ra.

²⁹ Tyicuan ta tijn ra Jesús
chiti nuu ra ta catyí ra chi ra:

—Na cuví maa yoso cuhva
chinó iñi ndo —catyí ra.

³⁰ Ta canduvaha chiti nuu
ra. Ta catyí vaha ra Jesús chi
ra tyehe caa:

—Ndücu ndo cuhva cha
yori coto.

³¹ Soco quita coyo cuiri ra
ta quichaha canacatyí ra cha
sacuví ra Jesús chihin ra chi
ñáyivi tandihi ityi yucuan.

*Nu sanduvaha ra Jesús chi
noo ra ñihí*

³² Cha ni ri ca cha caquita
coyo ra cucuaa cuan, suhva
ñáyivi quichí nyaca ñu chi
noo ra ñihí cha yihí noo tatyí
ña vaha chi nu nyaá ra Jesús.

³³ Ta caa cuhva ri cha tava
ñehe ra Jesús tatyí ña vaha
cuan, quichaha cuvi cahan ra
cuan. Ta iyo xaan cuñi ñáyivi,
ta catyí ñu:

—Ni noo chaha ta cuvi ca
cha tyehe caa Israel Ihya
—catyí ñu.

³⁴ Soco ra cacuvi fariseo,
cacatyí ra:

—Ra ihya tava ñehe ra tatyí
ña vaha chihin tunyee iñi chi
cuihna ra cuví nuu —catyí ra.

*Nu catyí ra Jesús vatyí
ña cuaha maa ñu sahá tyiño
cuenda Nyoo iyó*

³⁵ Ra Jesús chahan ra
tandihi ñuu sañahá ra chi
ñáyivi chichi vehe ñuhu
tahan tahan ñuu. Cahán ra
tuhun Nyoo yoso caa nyacá
ñaha Nyoo añima ñáyivi. Ta
sanduvahá ra tandihi nuu
cuehe cha yihí ñu. ³⁶ Ta
cha nanyehé ra chi ñáyivi,
cudahvi cuñi ra nyehé
ra chi ñu, vatyí nyehé ñu
tindoho ta cuihya cuñi ñu,
tari mbee quiti cha yori sahá
cumi chi. ³⁷ Tyicuan ta catyí
ra chi ra cachicá noo chihin
ra tyehe caa:

—Cha ndicha, cuaha tyiño
iyó, soco ra sahá tyiño, ña
cuaha ra. ³⁸ Yucuan chaha,
cacan ndo chi chitoho tyiño
yucuan, na tachi ra chi ra
saha tyiño na sataca ra tyiño
cuan.

10

Nu cachí ra Jesús chi ndi uchi uvi ra caca tyiño ra
(Mr. 3.13-19; Lc. 6.12-16)

¹ Tyicuan ta cana ra Jesús chi ndi uchi uvi ra chicá noo chihin ra ta chaha ra ityi chi ra vatyí tava ñehe ra chi tatyí ña vaha cha yihí añima ñáyivi, ta sanduvaha ra ndihí nuu cuehe ta cha uhvi ñandihí.

² Ican ihya cuví sivi ndi uchi uvi ra chicá tyiño ra: xihna ca, ra Simón, cha nañí tucu Pedro, ta yañi ra, ra Andrés, ra Jacobo ta yañi ra, ra Juan, sehe ra Zebedeo cacuví chi ra; ³ ta ra Felipe, ra Bartolomé, ra Tomás, ta ra Mateo ra tava xuhun cuenda gobiernu ñuu Roma, ra Jacobo sehe ra Alfeo, ra Lebeo cha nañí tucu Tadeo, ⁴ ta ra Simón cha yihí cuenda ityi ra cacuñí cuhun cuatyí siqui gobiernu ñuu Roma cha nyacá ñaha chi ñu, ta ra Judas Iscariote, ra cha naxico tuhun chi ra Jesús.

Nu tachí ra Jesús chi ra cachicá noo chihin ra, na cucahan ra tuhun Nyoo

(Mr. 6.7-13; Lc. 9.1-6)

⁵ Ta tyehe caa tachí ra Jesús chi uchi uvi tahan ra cuan, ta catyí ra:

—Ma cuhun ndo nu iyó ñu cha ñima ñu Israel cuví, ta ni ma quihvi ndo ñuu cha nyicú Samaria. ⁶ Cuahan ndo, soco nu nyicú mbee cha cuanaa cha cuví ñu ñuu Israel. ⁷ Cuahan ndo cuacahan ndo tuhun vatyí cha chaa cha cunyaca ñaha Nyoo añima ñáyivi. ⁸ Sanduvaha ndo chi ñu cuhví ñu tyahyú

coño, ta ñu yihí inga cuehe chii. Sanandoto ndo ndiyi, tava ñehe ndo chi tatyí ña vaha cha yihí chi ñu. Nyoho, naquehén cuenda ndo tunyee iñi ihya chihin cha ñahri yahvi, ta cotyiño ndo soco ma quehen ndo yahvi.

⁹ 'Ma cuiso ndo ni noo xuhun, ni xuhun cuaan ni xuhun cuichin, ni xuhun cuaha. ¹⁰ Ma cuiso ndo ni yono cha cuenda cha caca ityi ndo. Noo ri camisa cha ñihnó ndo cuhun chihin ndo. Ta ma cuiso ndo inga ityi ndichan, ni yutun ma tuví ndo, vatyí ra sahá tyiño, iyó ityi chi ra cha coo yahvi ra.

¹¹ 'Cuhva cha chaa ndo noo ñuu, nducu ndo noo ñáyivi cachi iyó, ta ndoo ndo vehe ñu nyacua nya quita ndo ñuu cuan. ¹² Cuhva cha cua quihvi ndo noo vehe, cuhva ndo nocumi chi ñáyivi iyó vehe cuan. Ta catyi ndo chi ñu: Na coo cha taxi Nyoo añima ndo, catyi ndo chi ñu. ¹³ Ta tatu ñu ñuu cuan ta nacotó ñu tyi chiñuhú cha taxi ri cuan chi ñu, cundoo cuan chihin ñu. Soco tatu ña nacotó ñu vatyí chiñuhú cuan chi ñu, ma ndoo cuan chihin ñu. ¹⁴ Ta tatu ña cuñi ñu quehen cuenda ñu chi ndo, ta ni ña cuñi ñu cuiñi ñu tuhun cahán ndo, tyicuan ta quita ndo vehe yucuan, o ñuu yucuan, ta naquisi ndo ñiyaca chaha ndo. ¹⁵ Cha ndicha catyí chi ndo vatyí quivi cutuñi chi ñáyivi, ñilhi ca cutachi tuñi Nyoo chi ñu cuan, ta ñima ca ñáyivi ñuu Sodoma ta ñuu Gomorra.

Nu sañahá chi ñáá ndihí

tindoho cunyehe ñu chicá tyiño
Nyoo

16 'Nyehē ndo! Yuhu tachí chi ndo, tari mbee mahñu lobo. Quiyi saha ndo chi ndo, tari coo, soco masu saha ndo chi ndo tari paloma. 17 Saha ndo cuenda chi ndo vatyí ñáyivi cucuhva cuenda ñu chi ndo chi ra cuví tyiño, ta chichi vehe ñuhu cucañi ñu chi ndo. 18 Ta cha cuenda yuhu, nyacua cunyaca ñu chi ndo nuu gobiernu ta nuu rey. Ta tyicuan caa ta cuví cahan ndo tuhun nuu ra ta nuu ñu cha ñima ñu Israel cuví. 19 Soco tatu nacuhva cuenda ñu chi ndo chi ra cuví tyiño, ma caca xiñi ndo yoso caa cahan ndo, vatyí tatu chaa cuhva cha cahan ndo, Nyoo cucuhva ra tuhun cha cahan ndo. 20 Vatyí ñima maa ndo cucahan, soco maa Tatyí Ii Sutu yo Nyoo cusacahan chi ndo.

21 'Rayi cunaxico tuhun ra suri chi yañi ra tacuhva na cacahñi ra chi ra. Ta yihí ra cunaxico tuhun ra chi sehe ra. Ta yihí ñáyivi cunanuhu ñu siqui sutu ñu ta sihi ñu, ta cusacuvi ñu, na cúvi ñu. 22 Tandihí ñáyivi, cucutasi cuñi nyehe ñu chi ndo cha catyi yuhu. Soco tatu ña ndu uvi iñi ndo chino iñi ndo chii, tyicuan ta cucacu añima ndo. 23 Tatu chica nyicon ñu chi ndo noo ñuu, cono ri ndo inga ñuu. Vatyí cha ndicha catyi chi ndo ni cha ta ndihí ca cahan ndo tuhun Nyoo tandihí ñuu nu nyicu ñáyivi Israel ta yuhu Rayi cha quichi nya gloria cuquichi

inga chaha.

24 'Ni noo ra cutuhvá, ña cahnu ca ra cuví ra ican saha ra sacuahha chi ra. Ta ni noo musu, ña cahnu ca cuví ra ican saha chitoho ra. 25 Ra cutuhva, cuñí chi ndoo ra vaha cha chaa ra cuví ra tari ra sacuahha chi ra, ta musu tari chitoho ra. Tatu yuhu ra cuví chitoho vehe, catyi ñu chii vatyí Beelzebú, cuihna ra cuví nuu, cuví, suri tyicuan caa cucatyí tucu ñu chi ñáyivi cuende.

Yóo chi tahán chi cuyuhvi
yo

(Lc. 12.2-7)

26 'Yucuan chaha ma yuhvi ndo chi ñáyivi, vatyí ni noo tuhun xehe ta cuñun, tyi ma natuvi. Ta ni ñahri cha ñohó xehe, ta cuñun tyi ma coto tandihí ñáyivi. 27 Tandihí cha catyi chi ndo nu ñaa iñi, catyi nyoho nu ndichin. Ta tandihí cha catyi chi ndo nu xehe, cana chaa ndo nya xiñi vehe, na coto tandihí ñáyivi. 28 Ma yuhvi ndo chi ñu chahñi coño ñuhu yo, vatyí ma cuvi cahñi ñu añima yo. Soco yuhvi ndo chi ra cuví sanaa coño ñuhu yo ta añima yo chichi anyaya ñandihí.

29 '¿Atu ñima chihin noo xuhun luhlu ri, sata yo uvi tahan saa? Ican. Soco ni noo ti ña canacava ti nu ñuhú tatu ña catyi maa Nyoo Sutu yo. 30 Vatyí nyacua nya ixi xiñi nyoho ta chitó Nyoo yoso tahan nyaá. 31 Ma yuhvi ndo. Nyoho, yahvi ca nyaá ndo ta ñima ca ticuiti saa.

*Ma yuhvi yo cahan yo
tuhun ra Jesucristo nuu ñáyivi*
(Lc. 12.8-9)

³² Tandihí ñu cha cahan vaha tuhin nuu ñáyivi, yuhu tucu cucahan vahi cuenda ñu nuu Suti ra nyaá andivi.

³³ Soco ñu cahan nuu cahan tuhin, yuhu tucu ma cahan tuhin ñu nuu Suti ra nyaá andivi.

*Cha cuenda ra Jesús cusin
ñáyivi*

(Lc. 12.51-53; 14.26-27)

³⁴ Ma cuñi ndo vatyí yuhu vachi cuhve cha taxi ri coo ndo siqui ñuhu ñáyivi ihya. Ña vachi cuhve cha taxi ri, soco cha cañi tahan ñáyivi. ³⁵ Vatyí sasiín chi ndo. Vatyí noo ra cahun ra siqui sutu ra. Ta noo ña cahun ña siqui sihi ña. Ta ñu cuví chono cucañi tahan ñu chihin tyiso ñu. ³⁶ Ta tyicuan caa suri ñáyivi chi ndo cucuyi ñu ñu xaan iñi chi ndo.

³⁷ Ñu cha cuñi ca chi sutu o chi sihi ican saha chi yuhu, ña tahan chi cuví ñu ñu cuende. Ta ñu cuñi ca chi sehe, ican saha chi yuhu, ña tahan chi cuví ñu ñu cuende. ³⁸ Ta ñu cha ña cuñi nyehe tindoho ta cunyicon ñu chii, ña tahan chi cuví ñu ñu cuende. ³⁹ Vatyí ñu ña cuñi nyehe tindoho cha cuenda yuhu, cunyehe ñu tindoho anyaya, soco ñu nyehé tindoho ta chahá ñáyivi cha catyí yuhu, cucacu aña ñu.

Yahvi cha tahan chi chi yo
(Mr. 9.41)

⁴⁰ Ñu quehén cuenda chi ndo, chi yuhu quehén cuenda ñu, ta ñu quehén cuenda chi yuhu, quehén cuenda

ñu chi ra cha tachí chii. ⁴¹ Ñu quehén cuenda noo ra profeta Nyoo cha cuenda vatyí cuenda Nyoo cahan ra, cuñihi ñu suri tahan yahvi cha cuñihi profeta cuan. Ta ñu quehén cuenda chi noo ra vaha cha cuenda tyi ra vaha cuví ra, suri tahan yahvi cha cuñihi ra vaha cuan cuñihi ñu. ⁴² Ta savahri ñu cha cuhva vasi noo vasu ndutya vichin coho ñu nyihi ihya cha cuenda cha nyicón ñu chii, cuñihi ñu cha cucuhva Nyoo chi ñu —catyí ra Jesús.

11

*Ra cha tachí ra Juan nu
nyaá ra Jesús*

(Lc. 7.18-35)

¹ Ndihi chaha ra Jesús tuhun chi uchi uvi ra chicá noo chihin ra, tyicuan ta quitá ra yucuan, vatyí cucahan ra tuhun Nyoo chihin ñáyivi cha iyó ñuu cha nyicú ityi cuan.

² Ta ra Juan nu ñohó ra vehe caa, ñihí ra tuhun cha sacuví ra Cristo. Tyicuan ta tachí ra chi uvi ra nyicón chi ra, cundaca tuhun ra noo tuhun chi ra Jesús. Ta cachaá coyo ra nu nyaá ra ³ ta cacatyí ra chi ra:

—¿Atu yoho cuvún ra Cristo cha tahan chi quichi sacacu chi ndi, o cuñi chi cha cuatu ndi chi inga ra? —cacatyí ra chi ra.

⁴ Nacahan ra Jesús ta catyí ra:

—Cuñan ndo ta catyí ndo chi ra Juan cha nyehé ndo, ta cha chiñi ndo. ⁵ Nacatyí ndo chi ra yoso caa nanyehé

ñu cuaa, yoso caa nacacá ñu coxo, ta ñu tyahyu coño yoso caa nduvahá ñu, ta yoso caa nacuiñi ñu soho, ta ñu ndiyi nandoto ñu, ta chihin ñu ndahvi cahán ndi tuhun Nyoo yoso caa sacacu ra añima ñu.

⁶ 'Sii xaan cuñi ñu ña chicá uvi iñi nyicón chii.

⁷ Cuhva cha cuahan coyo ra, ra Jesús quichaha cahan ra tuhun ra Juan chihin ñáyivi, ta catyí ra:

—¿Ñáá cha chahan nyoho chinyehe ndo chiqui ndii cuan? ¿Atu chinyehe ndo noo ndoo cha naquisí tatyí? ¿Ñáá cha nyehe ndo? ⁸ ¿Atu nyehe ndo noo ra vaha ñihnó? Ñima. Nyoho chitó ndo vatyí ra ñihnó vaha, nyaá ra vehe rey. ⁹ Tu tyicuan caa, ¿ñáá cha chahan ndo chi nyehe ndo? ¿Atu noo ra cuví profeta? Ican. Soco noo ra cha cahnu ca cuví ican saha noo profeta cuenda Nyoo. ¹⁰ Vatyí ican ra Juan ihya, cuví cha cahán tuhun nu tutu Nyoo tyehe caa:

Yuhu cuví Nyoo ta tachí chi noo ra cahan tuhin ityi nuu nu cuhun.

Vatyí cucahan ra tuhun chihin ñáyivi nanasama ñu cuhva iyo ñu ta cuatu tuhva ñu quivi quichun.

¹¹ 'Cha ndicha catyí chi ndo, vatyí chichi cha tandihi ñáyivi, ni noo chaha ta coo ca noo ra cahnu ca cuví ican saha ra Juan ra sacondutyá chi ñáyivi. Soco ra cha nyacá ñaha Nyoo añima, vasi cuví ra noo ra luhlu ca, soco

cahnu ca ra ta ñima ca ra Juan. ¹² Nyacua nya quivi cha chaá ra Juan ta nya vityin, cuaha ñu ndachan sahá chii nducú sativi ñu tuhun Nyoo, ña cuñi ñu cha cunyacá ñaha Nyoo añima ñáyivi. ¹³ Ra Moisés cahan ra tuhun yoso caa nyacá ñaha Nyoo añima ñáyivi, ta tyicuan caa tucu tandihi ra profeta nyacua nya quivi quichi ra Juan. ¹⁴ Ta tatu cuñi nyoho chino iñi ndo tuhun cahín, catyí chi ndo vatyí profeta Elías cha tahan chi quichi, ra Juan cuví ra. ¹⁵ Yóo ñu cha cutuñi iñi, na tyasoho ñu tuhun cahín.

¹⁶ '¿Yóo chihin sandu inuu ri chí ñáyivi cha iyó tyembu ihya? Tari ra cuatyaa cuví ñu, vatyí chicunyaa ndotyin nuyahvi nyasiqui ndotyin, ta canachaa ndotyin chi ra tahan ndotyin, ta catyí ndotyin tyehe caa: ¹⁷ "Tivi ndi flauta, soco ña chita chaha ndo. Chita ndi yaa cuihya soco ña chacu ndo." Tyicuan caa tucu nyoho, ni noo cuhva ña tahan iñi ndo. ¹⁸ Vatyí quichi ra Juan, cha ña chachi ra ta ña chihí ra, ta nyoho catyí ndo vatyí noo tatyí ña vaha yihí chi ra. ¹⁹ Yahá cuan ta quichi tucu yuhu Rayii cha quichi nya gloria. Ta yuhu chachí ta chihí tandihi, ta catyí ndo tyi ra cuahyi ra tuhvá chihí cuví. Ta ña tahan iñi ndo cha cutahín chihin ra iyó cuatyí ta ra tavá xuhun. Soco vasi ni noo ndi ña naquehén cuenda ndo tuhun cahán ndi, soco Nyoo chahá ra cha chiñi tuñi ra chi

ñu naquehén tuhun cahin ta tuhun cahān ra Juan, ta maa ñu cusañaha chi ndo vatyí vaha cha chiñi tuñi Nyoo —catyí ra Jesús.

Uvi ñuu nu ña tyasohó ñáyivi tuhun Nyoo (Lc. 10.13-15)

²⁰ Tyicuan ta quichaha cahan ra Jesús chi ñu ñuu nu sacuvi ra cuaha milagru, vatyí ñáyivi cuan ña canasama maa ñu cuhva iyó ñu, ta catyí ra:

²¹ —¡Ndahvi nyoho, ñu ñuu Corazin! ¡Ndahvi nyoho ñu ñuu Betsaida! Vatyí nyehé ndo nyatu cahnu ta ña nasama ndo cuhva iyó ndo. Soco ñáyivi ñuu Tiro ta ñuu Sidón cha sanaa Nyoo ta cha naha cha cuenda cuatyí ñu ñahri nyatu cahnu nyehe ñu. Soco tyehe ta nyehe ñu nyatu cahnu quivi cuan tari cha nyehé nyoho vityin, tañi tyehe ri ndihvi noo ñu sahma tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan. ²² Soco catyí chi ndo vatyí quivi cutuñi chi nyoho nuu Nyoo, cahnu ca cha uhvi cunyehe ndo ta ñima ca ñáyivi Tiro ta Sidón. ²³ Ta nyoho ñu ñuu Capernaum, cuñi maa ndo tyi cundaa ndo nya andivi, soco cunoo ndo nya nu nyicú ñu ndiyi. Vatyí tyehe ta cuví milagru ñuu Sodoma cuan, tahán cha cuví ñuu ndo, ñuu cuan coo ca nyacua nya vityin. ²⁴ Soco catyí chi ndo vatyí quivi cutuñi chi

nyoho, yaha ca cunyehe ndo tindoho, ta ñima ca ñu ityi ñuu Sodoma cuan.

Cuhva ndo chi ndo chii, ta cuhve cha nyitatu ndo, catyí ra Jesucristo (Lc. 10.21-22)

²⁵ Tyembu cuan catyí ra Jesús chi Nyoo tyehe caa:

—Sutu Mañi yuhu, Nyoo, ra nyacá ñaha andivi ta ñuhu ñayivi. Sacahní chuun vatyí sañahun tuhun maun chi ñu ñahri maa chitó. Ta tixehun tuhun maun chi ñu cha sahá tuhun tyi chitó xaan ta ñu chiñi tuñi ñandihí. ²⁶ Ndicha Sutu Mañi yuhu, vatyí tyicuan caa cuñi maun.

²⁷ Tyicuan ta catyí tucu ra:

—Suti nacuhva cuenda ra tandihí chii. Yori maa ñohó nuu noo cha ndicha chii, soco noo tuhun ri maa Suti ñohó nuu ra chii. Ta yori ñohó nuu noo cha ndicha chi Suti, soco noo tuhun ri mai, cha cuví Sehe ra chii, ñohó nui chi ra. Ta ñáyivi cha cuñi mai cha cohon nuu chi ra, ican ñu cuan cua cohon nuu chi ra. ²⁸ Tandihí nyoho cha chitatu ndo cha sahá tyiño ndo, ta chihin carga cha nyisó ndo, quichi ndo nu nyaí, ta yuhu cuhve cha nyitatu ndo. ²⁹ Cuhva ndo cha cunyaca ñahi chi ndo ta cutuhva ndo cuhva iyó yuhu. Vatyí yuhu masu iñi ta cama iñi. Tyicuan caa ta ñihi ndo nu nyitatu añima ndo. ³⁰ Ña yíi cha cuhva ndo chi ndo cha cunyaca ñahi. Ta carga cha chahí chi ndo, ñahma.

12

Nu tohón ra cachicá noo chihin ra Jesús yoco trigu quivi nyitatu ñáyivi

(Mr. 2.23-28; Lc. 6.1-5)

1 Noo quivi nyitatu ñáyivi, yahá ra Jesús mahñu nu iyó cha tachí ñu. Ta chaá soco chí ra cachicá noo chihin ra. Ta quichaha catohon ra yoco trigu cuan ta quichaha cachachi ra chiti yoco cuan.

2 Cuhva cha cananyehé ra fariseo cha tyicuan caa, cacatyí ra chi ra Jesús:

—Nyehé, ra cachicá noo chuhun sacuví ra noo cha ña tahán chi sacuví yo quivi nyitatu yo —catyí ra chi ra.

3 Soco maa ra Jesús catyí ra chi ra:

—¿Atu ta sacuaha ca nyoho cha sacuví ra David chihin ra tahan ra quivi cha chisoco ra? 4 Quiví ra chichi vehe Nyoo. Ta quehen ra pan ii cha cha yahá catuví nuu Nyoo. Ta chachí ra ta ña tahán chi cachi ra, ni maa ra ni ra ndihi chihin ra, vatyí maa ri maa tata sutu tahán chi cachi pan cuan. 5 ¿O ta sacuaha ca ndo nu ley cha chahá Nyoo chi ra Moisés nu catyí chi vatyí ra cacuví sutu, ña canyitatu ra quivi nyitatu yo, soco sahá tyiño ra chichi vehe ñuhu? Yucuan nyehé yo vatyí ñima cuatyí cuví cuan. 6 Ta catyí chi ndo, vatyí ihya nyaá yuhu cha cuví noo ra cahnu ca ican saha vehe ñuhu. 7 Nyoho, ta cutuñi ca iñi ndo nu catyí chi tyehe caa nu tuhun Nyoo: “Cha cuñi yuhu, cha cundahvi cuñi ndo nyehe ndo

chi tahan ndo, ta ñima ca cha cahñi ndo quiti ta cuhva cuenda ndo chíi.” Tyehe ta cutuñi iñi ndo tuhun ihya, ma tyaa ndo cuatyí siqui ñáyivi cha ñahri sacuvi. 8 Yuhu cuví Rayíi cha quichí nya gloria. Ta iyó ityi chíi vatyí catyí chi noo noo ndo ñáá cha sacuvi ndo quivi nyitatu yo —catyí ra Jesús.

Nu nduvahá ra cha ityi ndaha

(Mr. 3.1-6; Lc. 6.6-11)

9 Tyicuan ta quitá ra Jesús yucuan, ta cuahan ra vehe ñuhu. 10 Ta yucuan ñohó noo ra ityi inchiyo ndaha. Ta nyicú tucu suhva ra nducu cuhva yoso caa ta catyaa ra cuatyí siqui ra Jesús. Yucuan chaha candacá tuhun ra chi ra ta catyí ra:

—¿Atu cuví sanduvaha yo chi noo ñu cuhvi quivi nyitatu yo? —cacatyí ra chi ra Jesús.

11 Ta nacahan ra Jesús ta catyí ra:

—¿Nya noo nyoho, tatu canacava noo mbee sana ndo chichi noo yavi quivi nyitatu yo, atu ma cuhun ndo ta tava ndo chi ti? 12 Ta ¿atu ña yahvi ca nyaá noo ñáyivi ta ñima ca noo mbee? Yucuan chaha vatyí tahán chi sacuví yo cha vaha quivi nyitatu yo —catyí ra.

13 Tyicuan ta catyí ra chi ra cha ityi ndaha cuan:

—Sanacaa ndahun —catyí ra.

Ta cuhva cha sanacá ra, nduvahá ri ndaha ra tari inga chiyo cuan. 14 Tyicuan ta

caquita coyo ra fariseo cuan-
datuhun tahan ra yoso caa
cacahñi ra chi ra Jesús.

*Noo profeta, ra chahá
cuenda tuhun cahán Nyoo,
cahan ra tuhun ra Jesús cha
ni cumañi ca cacu ra*

¹⁵ Cha chito ra Jesús tuhun
tyi canducú ra chi ra, quita
ra yucuan ta cuaha ñáyivi
chinyicon chi ra. Ta maa ra
sanduvaha ra chi tandihi ñu
cuhví. ¹⁶ Ta catyí ra chi ñu
tyi ma cahan ñu tuhun vatyí
ican ra sanduvaha chi ñu.
¹⁷ Tyicuan caa cuví tacuhva
nachino cava tuhun cha tyaa
ra Isaías ra cuví profeta Nyoo
ta cha naha. Tyehe caa tyaa
ra:

¹⁸ Ican ra ihya cuví ra sacuvi
tyiño nui, ra cha
nacachí vahi.

Cuñí xain chi ra, ta sii cuñí
chihin ra.

Cusacuti chi ra chihin Tatyí li
cha iyó chii.

Ta cusacoto ra chi ñáyivi cha
ñima ñu Israel cuví
yoso caa sacuvahi chi
ñu nui.

¹⁹ Ta ma xaan cahan ra ta ni
ma cana chaa ra, ta ni
yori cuiñi ndusu ra ityi
cahnu.

²⁰ Ta ni noo ndoo yacua, ta ma
cahnu ndihi ra.

Ta ni ma ndahva ndihi
ra mecha cha caña
ñuhma.

Nyacua nya cha sanicoo vaha
ra chi ñáyivi chihin ra
ta cunyaca ñaha vaha
ra añima ñu.

²¹ Ta tandihi ñáyivi, ta chi ra
cuquihi iñi ñu.

*Nu catyí ñáyivi vatyí ra
Jesús, tunyee iñi ra ña vaha iyó
chi ra*

(Mr. 3.20-30; Lc. 11.14-23;
12.10)

²² Tyicuan ta nu nyaá ra
Jesús chinyaca ñu chi noo ra
yihí tatyí ña vaha chi, cuaa ra
ta ñihi ra. Ta ra Jesús san-
duvaha ra chi ra. Ta cuví
nacahan ra, ta cuví nanyehe
ra. ²³ Iyo xaan cuñí tandihi
ñáyivi, ta catyí ñu:

—¿Vasi ra vachi tata rey
David cuví chi ra ihya?
—catyí ñu.

²⁴ Soco cuhva cha cachiñi
ra fariseo tuhun cuan, ca-
catyí ra:

—Chihin fuerza ra
Beelzebú, ra cuví nuu chi
cuihna, tavá ra ihya tatyí ña
vaha —catyí ra.

²⁵ Soco ra Jesús chitó ra cha
cachicá xiñi ra, yucuan chaha
catyí ra chi ra:

—Tatu noo gobiernu ta
cacusiñ ra, cuaha ri ityi
nanduvi ra, cucañi tahan ra
chihin tahan ra, ta cundihí
tuhun cha canyacá ñaha ra. O
tatu noo ñuu o tandihi ñáyivi
noo vehe cacusiñ ñu chihin
tahan ñu, cutivi nu nyicú
ñu. ²⁶ Ta tyicuan caa tucu,
tatu cuihna ta tava ra suri
ra tahan maa ra, cuñí chi
catyí vatyí ña ñin ri cacuví
ra, ta cundihí fuerza cha iyó
chi ra. ²⁷ Ta nyoho catyí ndo
vatyi yuhu tavé tatyí ña vaha
chihin fuerza ra Beelzebú. Tu
tyicuan caa, ra nyicú chihin
maa ndo, ¿yóo cha chaha
fuerza vatyí tavá ra tatyí ña
vaha? Maa ra na sacoto ra
chi ndo cha ndicha, vatyí

nyoho tondo ri chicá xiñi ndo. ²⁸ Yucuan chaha catyí chi ndo, vatyí yuhu tave tatyí ña vaha chihin fuerza Tatyí li Nyoo. Ta cuñí chi catyí vatyí ndicha cuii Nyoo ra nyacá ñaha añima ñáyiví cha chaa ra nu canyicú ndo.

²⁹ 'Chichi vehe noo ra ñihi xaan, tari cuihna, ma cuví quihví noo ra ta quehen ra tandihí cha chii ra, soco tatu cuhñi xihna ra chí ra tyicuan caa ta cuví tinyaa ra tandihí cha chii ra.

³⁰ 'Ñáyiví cha ña nyaá tumañi iñi chii, ñáyiví xaan iñi chii cuví ñu. Ta tatu ña tyinyeé ndo chii cha cahán ndo tuhín nuu ñáyiví, cuñí chí catyí vatyí ña chahá ndo cha coto ñáyiví tuhún cahín.

³¹ 'Yucuan chaha catyí chi ndo vatyí Nyoo sahá ra ticahnu iñi cuatyí ñáyiví, ta ñáá cha ña vaha cahán ñu ñandihí, soco cha cahan ña vaha ñu siqui Tatyí li Nyoo, yucuan ndicha, ma coo ticahnu iñi cha cuenda ñu. ³² Ta yóo ri ñu cha cahán ña vaha siqui yuhu Rayí cha quichí nya gloria, coo ticahnu iñi chí ñu cha cuenda cuan. Soco ñu cahán ña vaha siqui Tatyí li Nyoo, ma coo maa ticahnu iñi chí ñu cha cuenda cuatyí cuan, niri ihya ñáyiví, ta niri inga ñáyiví ñandihí.

Chihin cha sacuvi ri ñáyiví ta nicohon nuu ri yo chí ñu tatu ñu vaha o ñu ña vaha cuví ñu (Lc. 6.43-45)

³³ 'Noo yutun vaha chahá tun chiti vixí, chiti vaha. Ta noo yutun ña vaha chahá tun chiti ña vaha. Nicohón nuu ri

yo tatu yutun vaha cuví tun chihin chiti cha chahá tun. ³⁴ ¡Nyoho, ñu quiñi iyó, tari tata coo xaan cuví ndo! ¿Yoso caa cuví quitá tuhún vaha yuhu ndo, ta ñáyiví quiñi caa añima cuví ndo? Vatyí cha quitá chichi añima yo ican cuan cahán yo. ³⁵ Noo ra vaha cahán ra tuhún vaha vatyí ñohó cha vaha añima ra. Ta ra quiñi iyó, maa maa ri tuhún quiñi caa cahán ra, vatyí cha quiñi caa ñohó añima ra. ³⁶ Ta yuhu catyí chí ndo vatyí quiví cutuñi chí tandihí ñáyiví, cucuhva ñu cuenda tandihí tuhún cha ña saha ñu cuenda ta cahan ñu. ³⁷ Vatyí yoso cuhva cahún, yucuan cuhva cucutuñi chuun, tatu iyó o ñahri cuatyun.

Ñu quiñi iyó cuñi ñu nyehe ñu seña milagru

(Mr. 8.12; Lc. 11.29-32)

³⁸ Tyicuan ta suhva ra fariseo ta ra sacuahá ley vehe ñuhu cacatyí ra chí ra Jesús tyehe caa:

—Maestro, cuñí ndi vatyí sacuvun noo seña milagru vatyí nyehe ndi.

³⁹ Ta nacahan ra Jesús ta catyí ra:

—Ñu quiñi iyó ta ñu nyicón inga nyoo cuñí ñu nyehe ñu seña milagru. Soco ma nyehe ca ñu inga seña, noo ri seña ra Jonás ra profeta Nyoo, yucuan ri cunyehe ñu. ⁴⁰ Vatyí tari ñohó ra Jonás chichi tiyaca cahnú cuan uñi quiví ta uñi ñuu, tyicuan caa cucohon yuhu Rayí cha quichí nya gloria chichi ñuhú uñi quiví ta

uñi ñuu. ⁴¹ Ta quivi cucutuñi chi tandihí ñáyivi, cundicuita ñu chiyo ñuu Ninive ta cha naha ta cucatyí ñu na tachi tuñi Nyoo chi nyoho ñáyivi cha iyó vityin, ta cucatyí ñu vatyí cucunaa ndo, vatyí maa ñu cha cuví ñu ñuu Nínive, canasama ñu cuhva iyó ñu quivi cahan ra Jonás tuhun Nyoo chihin ñu. Ta ihya nyaá ra cahnu ca cuví ta ñima ca ra Jonás. ⁴² Vatyí tyicuan caa tucu ñaha cha cuví reina ityi Sur, cundicuita ña quivi cucutuñi chi ñáyivi ta cucatyí ña vatyí cucunaa nyoho ñu iyó vityin, vatyí maa ña, vasi cañi ñuu ña soco quichí ña, quichí tyasoho ña tuhun cha chiñi tuñi ra Salomón. Ta ihya cahnu ca cuví ra cha cahan chihin ndo vityin ta ñima ca ra Salomón.

Yoso caa ndichi tucu tatyí ña vaha inga chaha añima ñáyivi tatu naa iñi ñu chi Nyoo (Lc. 11.24-26)

⁴³ Tatu noo tatyí ña vaha quita chi añima noo rayíi, chicá noo chi noo nu ityi, nanducú chi noo nu nyitatu chi, soco ña nañihi chi nu nyitatu chi. Tyicuan ta ndichi xiñi chi: ⁴⁴ “Cunuhu tiqui nya vehi nu quite.” Yucuan ta nachaa chi añima ra nu quita chi. Ta nanyehé chi vatyí ndii xaan, ta yori nyaá. ⁴⁵ Tyicuan ta cuanaquehen chi ucha ca tahan tatyí ña vaha, cha yaha ca cuhva ican saha maa chi. Tyicuan ta quihvi tandihí tatyí ña vaha cuan añima ra cuan. Yucuan chaha, quiñi ca cunicoo ra ta ñima ca cuhva

chiyo maa ra. Ta tyicuan caa cucuvi chi ñáyivi quiñi iyó ihya —catyí ra Jesús.

Tari yañi ra Jesús ta tari sihi ra cuví chi ñáyivi sacuvi cuhva catyí Nyoo

(Mr. 3.31-35; Lc. 8.19-21)

⁴⁶ Ni cahan ca ra Jesús chihin ñáyivi, ta chaá sihi ra ta yañi ra, ta ndoo ñu chata vehe, ta cuñi ñu cahan ñu chihin ra. ⁴⁷ Tyicuan ta sacoto noo ñáyivi nyaá cuan chi ra Jesús, ta catyí ñu:

—Sihun ta yañun nyicú ñu chata vehe. Ta cuñi ñu cahan ñu chuhun.

⁴⁸ Tyicuan ta nacahan ra Jesús ta catyí ra chi ñu:

—¿Yóó cha cuví sihi ta yañi? —catyí ra.

⁴⁹ Tyicuan ta sañaha ndaha ra chi ra cachicá noo chihin ra, ta catyí ra:

—Ican ra ihya cuví sihi ta yañi. ⁵⁰ Vatyí tandihí ñáyivi cha sacuvi cuhva cuñi Suti ra nyaá andivi, ican ñu cuan cuví yañi, ta cuhve, ta sihi —catyí ra Jesús.

13

Tari noo ra chicá noo tachí, tyicuan caa cuví ra cahan tuhun Nyoo chihin ñáyivi

(Mr. 4.1-9; Lc. 8.4-8)

¹ Quivi cuan quita ra Jesús vehe ra ta chicunyaá ra yuhu miñi. ² Ta chaha cha cuaha ñáyivi nataca nu nyaá ra, quihvi ra chichi noo canoa ta chicunyaá ra. Ta tandihí ñáyivi ndoo ñu nyicú ñu nu ñiti cuan. ³ Tyicuan ta cuaha ri cha quichaha sañahá ra chi

ñu chihin noo cuhva ta catyí ra:

—Noo chaha quita noo ra, tachí ra chiti trigu. ⁴ Ta nu cuahan ra quití ra chiti cuan, canacoyo suhva chiti cuan yuhu ityi. Ta quichi coyo saa ta cachachí ti. ⁵ Ta suhva ca canacoyo ticu yuu, nu ña cuaha ñuhú yihí. Ta yucuan caña chiti cuan cha numi ri vatyí ña cuaha ñuhú yihí chaha. ⁶ Soco cuhva cha caña ñanyii ñn na ityi ri tun, vatyí ña cono yihí yoho tun. ⁷ Suhva ca chiti canacoyo ticu iñu. Ta chahnu iñu cuan. Ta chasi chi nuu tun. Yucuan chaha ña chiyó chiti tun. ⁸ Soco suhva ca canacoyo nu ñuhú vaha. Ta quivi cachahnu tun, vaha xaan cachaha tun chiti, vatyí yihí tun noo cientu chiti chaha tun cha noo ri maa tun. Ta inga tun uñi xico, ta inga tun oco uchi chiti chaha tun. ⁹ ¡Tatu cutuñi iñi ndo, tyasoho ndo!

Nu sacoto ra Jesús ñáa tuhun cha chihin cuhva ri cahan ra ta ña cahán cachi ra (Mr. 4.10-12; Lc. 8.9-10)

¹⁰ Tyicuan ta tuhva ra cachicá noo chihin ra Jesús, ta candaca tuhun ra chi ra, ta catyí ra:

—¿Ñáa tuhun cha chihin cuhva ri cahún chihin ñáyivi, ta ña cahán cachun chihin ñu? —cacatyí ra.

¹¹ Ta nacahan ra Jesús ta catyí ra:

—Chi nyoho sacotó Nyoo tuhun xehe, yoso caa nyacá ñaha ra, soco chi maa ñu

ña chahá ra cha coto ñu. ¹² Vatyí ñáyivi cutuñi iñi tuhun cahín ta sacuví ñu, cuaha ca cucutuñi iñi ñu. Ta ñáyivi cha chihin ri cutuñi iñi, ta ña cuñi ñu sacuví ñu, cutinyaa ndihi cha cutuñi iñi ñu. ¹³ Yucuan chaha vatyí chihin cuhva ri cahín chihin ñu, tacuhva nyehe ñu ta cuví chi tari cha ña ndichin nyehe ñu. Ta cuiñi ñu soco ma cutuñi iñi ñu, tari cha ña chiñi ñu cuví cuan. ¹⁴ Ta tyicuan caa ta chinó cava tuhun cha cahan ra Isaías ra profeta Nyoo ta cha naha, ta catyí ra:

Cha ndicha vatyí nyoho cuiñi ndo tuhin, soco ma cutuñi iñi ndo.

Ta cunyehe ndo cha sacuví, ta ma cutuñi iñi ndo.

¹⁵ Vatyí cha ndundava ñanima ñáyivi ihya, ta ña cachi vaha chiñi ñu.

Ta tahán nuu ñu,

Tacuhva cha ma nyehe ñu chihin chiti nuu ñu.

Ta ma cuiñi ñu chihin soho ñu.

Ta ni ma cutuñi iñi ñu chihin ñanima ñu.

Ta ni ma nanducu ñu chii, tacuhva sanduvahi chi ñu.

¹⁶ 'Soco sii xaan cuví chi nyoho, vatyí nyehé ndo chihin chiti nuu ndo, ta chiñi ndo chihin soho ndo. ¹⁷ Cha ndicha catyí chi ndo, vatyí cuaha ra cacuvi profeta Nyoo ta cuaha ñáyivi vaha, cacuñi ñu nyehe ñu cha nyehé nyoho cha sacuví, soco ña nyehe ñu. Cuñi ñu cuiñi ñu tandihi tuhun cha chiñi nyoho vityin, soco ña chiñi ñu.

*Nu catyí ra Jesús ñáá cha
cuñí chi catyí cuhva cha cahán
ra*

(Mr. 4.13-20; Lc. 8.11-15)

18 "Tyasoho ndo ñáá cha
cuñí chi catyí noo cuhva
cha catyí chi ndo tuhun ra
cha tachí chiti trigu cuan:
19 Ñáyivi cha chiñí tuhun yoso
caa cuñí Nyoo cunyaca ñaha
ra añima ñu, ta ña cutuñí iñi
ñu, tari nu canacoyo chiti
yuhu ityi, tyicuan caa cuví ñu.
Vatyí quichí cuihna ta tava
ra tuhun Nyoo cha caa añima
ñu. 20 Ta tari nu canacoyo
chiti ticu yuu cuan, tyicuan
caa cuví tucu ñáyivi cha chiñí
tuhun Nyoo, ta sii xaan cuví
chi ñu naquehen cuenda ñu
noo ri cuhva. 21 Vatyí nu
caña chiti ticu yuu cuan, chiin
ri ñuhú yihí chaha. Yucuan
chaha caña soco ña cuví tyihi
yoho chi. Ta tyicuan caa ñu
cuan. Suhva ri quivi chinó iñi
ñu. Soco quivi cha quichaha
nyehe ñu tindoho, ta satasi
iñi ñáyivi chi ñu cha cuenda
tuhun Nyoo ta sandihi ri ñu
tuhun cha chinó iñi ñu. 22 Ta
tari nu canacoyo chiti chichi
iñu cuan, tyicuan caa cuví
tucu inga ñu cha chiñí tuhun
Nyoo. Chiñí ñu, soco ña cuñí
ñu sacuvi ñu tari cuhva chiñí
ñu. Vatyí nyaá xaan ca xiñi
ñu tuhun tindoho ñayivi ican
saha tuhun Nyoo. Ta nyiyo
ca iñi ñu cha tyayii. Ta tandihi
tuhun cuan sayanga chi chi
ñu, ta ña chahá nanducu vaha
ñu chi Nyoo. 23 Soco tari nu
canacava chiti nu ñuhu vaha,
tyicuan caa cuví ñu chiñí
tuhun Nyoo, ta cutuñí iñi ñu,

ta sacuvi ñu tandihi tuhun
cahán ra. Yihí ñu cuví ñu tari
yutun cha chaha noo cientu
chiti, ta inga ñu tari yutun cha
chaha uñi xico, o tari yutun
cha chahá oco uchi chiti noo
noo tun.

*Nu catyí ra Jesús yoso caa
cuahan tuhun trigu ta cuhu ña
vaha*

24 Ta chaha tucu ra Jesús
inga cuhva ihya chi ñu; ta
catyí ra:

—Cha nyacá ñaha Nyoo
añima ñáyivi cuví chi tari
noo ra cha tachí chiti trigu
nu noo ñuhú. 25 Soco cuhva
cha caquixí tandihi ra casahá
tyiño cuan, quihvi noo ra
xaan iñi chi ra, ta tachí ra
chiti cuhu ña vaha, ta cuahan
ra. 26 Ta quivi caña chiti trigu
cuan, ta caña yoco chi, ta
yucuan na tuvi tucu cuhu
ña vaha cuan. 27 Tyicuan ta
ra cacuví musu, cachahan
ra chicatyí ra chi chitoho
ra: "Tata, tatu maa maa
ri maa chiti trigu tachun,
¿nya quita cuhu ña vaha
cuan?" cacatyí ra. 28 Ta
nacahan ra cuan ta catyí
ra: "Iyó noo ra xaan iñi chi
yo tachí." Tyicuan ta musu
cuan, catyí ra chi chitoho ra:
"¿Atu cuñún cha cuhun ndi
ta tohon ndi cuhu ña vaha
cuan?" 29 Soco chitoho ra
catyí ra: "Ma tohon ndo,
coto cuhva cha tohon ndo
cuhu ña vaha cuan, ta coyo
ndihi trigu cuan. 30 Saña
ndo, na cuahnu maa chi in
ri chihin trigo cuan, tyicuan
ta quivi cunicoñehi tyiño sahi,
cutachi chi ra casaha tyiño
cutohon xihna ca ra cuhu ña

vaha cuan ta cuhñi ra cuenda sucun, vatyí cahmi ra. Ta yaha cuan ta canaquehen vaha ra cha vaha cuan chichi yaque.”

Nu catyí ra Jesús vatyí tari chiti mostaza cuví cha nyacá ñaha Nyoo aña yoy

(Mr. 4.30-32; Lc. 13.18-19)

³¹ Tyicuan ta catyí tucu ra Jesús inga cuhva ihya chi ñu:

—Cha nyacá ñaha Nyoo aña ñáyivi cuví chi tari noo chiti yutun cha nañi mostaza cha tachi noo ra nu ñuhú ra.

³² Vatyí ícan chiti cuan cuví cha luhlu ca ícan saha tandihi ca chiti. Soco quivi chahnu tun cuví tun noo yutun cahnu vavaha. Ta quichi coyo saa, ta casavahá ti taca ti nuu tun —catyí ra Jesús.

Nu catyí ra Jesús vatyí tari yuchan iya cuví cha nyacá ñaha Nyoo aña ñáyivi

(Lc. 13.20-21)

³³ Ta catyí tucu ra Jesús inga cuhva ihya:

—Cha nyacá ñaha Nyoo aña ñáyivi cuví chi tari yuchan iya cha nasaca noo ñaha chihin uñi cuhva yutyi pan. Vatyí tari ndaa tandihi pan cuan chihin yuchan iya cuan, tyicuan caa cuahan nducuaha ca ñu nyacá ñaha Nyoo aña —catyí ra.

Yoso caa chotyño ra Jesús noo cuhva cha cahán ra

(Mr. 4.33-34)

³⁴ Tandihí tuhun ihya cahán ra Jesús chihin ñáyivi chihin cuhva ri. Ta tandihí tuhun cha catyí ra chi ñu soco maa maa ri chihin noo cuhva ri. ³⁵ Tyehe caa sacuvi

ra tacuhya chino cava tuhun cha cahán ra profeta ta cha naha ta tyaa ra tyehe caa:

Chihin cuhva ri cucahin chihin ñáyivi.

Cucatyí chi ñu tuhun cha ñohó xehe nyata savaha Nyoo ñuhu ñáyivi.

Nu catyí ra Jesús ñáa cha cuñi chi catyí tuhun cuhu ña vaha cha caña mahñu chiti trigu cuan

³⁶ Tyicuan ta sacunuhu ra Jesús chi ñáyivi, ta ndihvi ra chichi vehe. Ta catuhva ra cachicá noo chihin ra chí ra, ta catyí ra chí ra:

—Ñacatyí chi ndi ñáa cha cuñi chi catyí tuhun cha caña cuhu ña vaha cuan nu ñuhu cuan.

³⁷ Tyicuan ta quichaha catyí ra Jesús chí ra:

—Ra cha tachi chiti trigu cuan ícan cuví yuhu Rayi cha quichi nya gloria. ³⁸ Ta ñuhú cuan, ícan cuví aña ñáyivi iyó siqui ñuhu ñáyivi. Ta chiti trigu cuan ícan cuñi chi catyí ñáyivi cha nyicón chi Nyoo, ta chiti cuhu ña vaha cuan cuñi chí catyí ñáyivi cha nyacuví cuhva cuñi ra ña vaha.

³⁹ 'Ra cha tachi cuhu ña vaha cuan, ícan cuví cuhna ra xaan iñi chí Nyoo. Ta quivi cunacoñehe ra tyiño saha ra, ícan cuví quivi cucunaa ñuhu ñáyivi. Ta ra cha cunacoñehe chiti cuan, ícan cuví ra cacuví ángel. ⁴⁰ Tari nasataca ra cuhu ña vaha cuan vatyí cayu chí, tyicuan caa cucuví quivi naa ñáyivi. ⁴¹ Yuhu Rayi cha quichi nya gloria cutachi chí ángel cunasataca ra chí

ñu sacoo cuatyí inga ñu, ta ñu cha sacuví cha ña vaha. ⁴² Ta cutyihí ra chí ñu chichi horno nu cayú ñuhu. Ta cucuacu ñu ta cusacahñi ñu noho ñu. ⁴³ Ta ñu cha sacuví cuhva cuñí Nyoo cutuvi ñu nuu Nyoo Sutu yo. Ta tari cha ndichin ñanyii, tyicuan caa cucuvi ñu. Tatu cutuñí iñi ndo, tyasoho ndo tuhun cahín.

Noo xuhun cuaan cha ñohó xehe

⁴⁴ 'Cha nyacá ñaha Nyoo añima ñáyivi cuví chí tari noo xuhun cuaan ñohó xehe chichi ñuhú. Ta noo ra nañihí xuhun cuaan cuan, soco natyihí xehe tucu ra inga chaha ta sii xaan cuñí ra cuanuhu ra ta xico ra tandihí cha iyó chí ra, ta satá ra ñuhu nu ñohó xehe xuhun cuaan cuan.

Noo cuhva cha cahan ra Jesús cuenda noo perla cha yahvi xaan nyaá

⁴⁵ 'Ta cha nyacá ñaha Nyoo añima ñáyivi, cuví tucu chí tari noo ra satá ta naxicó perla finu. ⁴⁶ Ta cuhva cha ñihí ra noo cha yahví vavaha nyaá, ta xico ra ndii maa cha cumí ra, ta satá ra perla vaha cuan.

Nu sañahá ra Jesús noo cuhva cuenda tarraya

⁴⁷ 'Ta suri cuví tucu cha nyacá ñaha Nyoo añima ñáyivi tari tarraya cha cañí ra nu tyañuhu, ta ñihí ra ndihí nuu tiyaca chihin. ⁴⁸ Ta cuhva cha chitú tarraya cuan chihin tiyaca, catavá ra ityí nu ñiti, ta yucuan canacachí ra chí ti, canaquehen vaha ra chí

quití vaha chichi noo tica, ta sacuitá ra chí quití ña vaha cuan. ⁴⁹ Ta tyicuan caa cucuvi quivi naa ñayivi, cuquichi coyo ángel, quichi tava siin ra chí ñu vaha ta ñu ña vaha. ⁵⁰ Ta cutyihí ra chí ñu ña vaha cuan chichi anyaya nu cayú ñuhu, nu cucuacu ñu ta cusacahñi ñu noho ñu.

Nu sañahá chí vatyi vaha tuhun chahnu ta tuhun chaa Nyoo

⁵¹ Tyicuan ta ra Jesús ndaca tuhun ra chí ra cachicá noo chihin ra, ta catyí ra:

—¿Atu cutuñí iñi ndo tandihí tuhun ihya?

Ta nacahan ra ta cacatyí ra:

—Ay, Sutu Mañi yuhu. Cutuñí iñi ndi.

⁵² Tyicuan ta catyí ra Jesús chí ra:

—Tatu noo ra sacuahá cuenda ley vehe ñuhu, ta cutuhva ra tuhun yoso caa nyacá naha Nyoo añima ñáyivi, cumí ra cha vaha tuhun chahnu Nyoo, ta cumí tucu ra tuhun chaa cha sañahí. Ta cuví ra tari noo ra cuví nuu, ra chitó ta sañahá ra tuhun chahnu ta tuhun chaa cha sañahí —catyí ra Jesús.

Nu ñohó ra Jesús Nazaret ñuu nu chahnu ra

(Mr. 6.1-6; Lc. 4.16-30)

⁵³ Ndihi cahan ra Jesús cuhva ihya ta cuahan ra. ⁵⁴ Ta nachaa ra ñuu ra. Ta yucuan quichaha sañaha ra chichi vehe ñuhu ñuu cuan. Ta iyo cuñí ñáyivi ta catyí ñu:

—¿Nya maa maa cutuhva ra ihya cha chiñi tuñi xaan ra? ¿Ta yoso caa cuví sacuvi

ra milagru? ⁵⁵ Vatyí sehe ra satyá vitu cuan cuví chi ra. Ta cu María cuví sihi ra. Ta yañi ra cuví chi ra Jacobo, ta ra José, ta ra Simón ta ra Judas. ⁵⁶ Ta cuhva ra ñandihí, iyó ñu ityi nu iyó yo. Tu tyicuan caa, ¿nya maa maa cutuhvā ra tandihí tuhun ihya? —catyí ñu.

⁵⁷ Ta yucuan chaha ña cuñi ñu quichaha ñu chi ra. Soco ra Jesús catyí ra chi ñu:

—Tandihí ñáyivi tandihí ri ityi sahá ñu ñáyivi chi ra profeta. Soco ña quichahá ñu chi ra tatu ra ñuu ñu, o ra vehe ñu cuví chi ra —catyí ra.

⁵⁸ Ta ña cuaha milagru sacuví ra yucuan cha cuenda vatyí ña chinó iñi ñu chi ra.

14

Nu catyí chi yoso caa chihí ra Juan ra sacondutya
(Mr. 6.14-29; Lc. 9.7-9)

¹ Quiví cuan ra Herodes, ra cuví gobiernu nacahnu nu cuví Galilea, ñihí ra tuhun ra Jesús. ² Ta catyí ra chi ra nyicú chihin ra:

—Ican ra cuan cuví ra Juan ra sacondutya chi ñáyivi, ra cha chihí ta vityin nandoto ra. Yucuan chaha iyó tunyee iñi chi ra cha sacuví ra milagru.

³⁻⁴ Tyicuan caa catyí ra vatyí suri maa ra tyihí tyiño ta catiñ ra chi ra Juan. Ta chahñi ra chi ra chihin cadena, ta tyihí ra chi ra vehe caa. Tyicuan caa sacuví ra tyi xaan cuñi ra tyi catyí ra Juan tyi ña vaha cha nyaá ra chihin

cu Herodías cha cuví ña ñasihi yañi ra ra Felipe.

⁵ Ta yucuan chaha, ra Herodes, cuñi ra cahñi ra chi ra Juan, soco yuhví ra chi ñáyivi, vatyí tandihí ñu chinó iñi ñu tyi ra Juan cuenda Nyoo cahán ra. ⁶ Soco noo quívi cha vico ra Herodes, ta quichahá chita chaha sehe cu Herodías nu nyicú ñu vico cuan. Ta tahañ xaan iñi ra Herodes. ⁷ Ta tyaa ra cuhva vatyí cuhva ra ñáá ri cha cacán ñaha tyivaa cuan, ta ma nacahnu ra tuhun cahan ra. ⁸ Tyicuan ta tyiyuhú sihi ña chi ña, na catyí ña chi ra Herodes tyehé caa:

—Cuhva xiñi ra Juan ra sacondutya ñáyivi chii nu noo coho —catyí ña.

⁹ Cha chihí rey Herodes tuhun cahan ña, nducuihya cuñi ra. Soco cha cuenda cha tyaa ra cuhva vatyí cuhva ra ñáá ri cha cacán ña nuu ñu canyicú vico cuan ta ma cuví nacahnu ra, yucuan chaha tachí ra nacuhva ra xiñi ra Juan chi ña. ¹⁰ Ta tachí ra tyiño na cutahnya sucun ra Juan nu ñohó ra vehe caa. ¹¹ Tyicuan ta caquichí nyaca ra xiñi ra, yihí noo nu coho. Ta cachahā ra chi ñaha tyivaa cuan. Ta maa ña nacuhvā cuenda ña chi sihi ña.

¹² Tyicuan ta chaā coyo ra canyicon chi ra Juan ta canaquehen ra coño ñuhu ra, ta catyihí ra chichí ñuhu. Ta yahā cuan ta chahan coyo ra chisacoto ra chi ra Jesús.

Nu chahá ra Jesús cha cachi ohon mil rayi

(Mr. 6.30-44; Lc. 9.10-17; Jn. 6.1-14)

¹³ Cha chito ra Jesús tuhun ihya, quehen ra noo canoa, ta cuahan noo tuhun ri maa ra noo nu taxi ri iyó. Soco chito ri ñáyivi, ta quita coyo ñu ñuu ñu, ta cuahan coyo ñu chata ra ityi nu ñuhú. ¹⁴ Cha quita ra Jesús chichi canoa cuan, nanyehe ra cuaha xaan ñáyivi. Ta cundahvi xaan cuñi ra nyehé ra chi ñu. Ta sanduvaha ra chi ñu cuhvi cha cha chihin ñu. ¹⁵ Ta vatyi cha cua cua, ra cachicá noo chihin ra Jesús chaa coyo ra, ta catyí ra chi ra:

—Cha iñi xaan, ta yori ñáyivi iyó yatyin ri ihya. Yucuan cuenda natachi chi ñáyivi ihya na cunuhu coyo ñu nya ñuu cusata ñu cha cachi ñu —cacatyí ra chi ra Jesús.

¹⁶ Ta ra Jesús catyí ra:

—Ña tahan chi cuhun ñu. Cuhva maa ndo cha cachi ñu.

¹⁷ Ta nacahan ra ta cacatyí ra:

—Noo tuhun ohon tahan sin pan ta uvi tahan sin tiyaca cumí ndi.

¹⁸ Ta catyí ra Jesús:

—Nyaca ndo chii.

¹⁹ Tyicuan ta tachí ra tyiño na cunyicu ñáyivi nu cuhu cuan. Yahá cuan ta quehen ra ohon tahan pan cuan, ta ni nduvi tiyaca cuan. Ta nanyehe ndaa ra andivi, ta nacuhva ra tyahvi nyoo chi Nyoo ta tahvi ra pan cuan. Ta chaha ra chi ra cachicá noo chihin ra, na casacha ra chi

ñáyivi cuan. ²⁰ Ta tandihi ñu cachachi ñu ta ndaha iñi ñu. Yahá cuan ta canasataca ra yiquin cha ndoo. Ta quita uchi uvi tahan tica. ²¹ Ta cha tandihi ñu cachachi cuan, quita ta cha ohon mil cha maa ri maa rayi. Ta ña quihvi cuenda ñusihi ni ra cuatyaa.

Nu chicá ra Jesús nu ndutya

(Mr. 6.45-52; Jn. 6.16-21)

²² Ta cha yaha tuhun cuan ta catyí ra Jesús chi ra cachicá noo chihin ra, na quihvi coyo ra chichi canoa, vatyí cayaha sava ra miñi cuan ta cuhun coyo ra inga chiyo. Ta niri ca cha cuahan coyo ra cuan, ra Jesús ndoo ra natachi ra chi ñáyivi na cuhun coyo ñu. ²³ Cha yahá cha natachi ra chi ñu cuan, ta ndaa ra yucu cuan cua cacan tahvi noo tuhun ri maa ra chi Nyoo. Ta yucuan ñohó ra ta cuaa ndihi. ²⁴ Ta cha ni ri ca cha chicán tahvi ra cha cuahan vavaha canoa cuan nya mahñu miñi. Ta ndutya miñi cuan cañi chi chi canoa cuan cha cuenda vatyí ñihi xaan caá tatyí nu cuahan coyo ra. ²⁵ Ta cuhva cha ñaa ca cuan cua tuhva ra Jesús nu cuahan coyo ra chihin canoa cuan suri chicá ra nu ndutya. ²⁶ Ta cuhva cha cananyehe ra chi ra, chicá ra nu ndutya cuan, canayuhvi xaan ra. Ta cacana chaa vavaha ra, ta catyí ra:

—iNoo cha sayuhvi cuví!

²⁷ Soco nacahan ra Jesús chihin ra, ta catyí ra:

—¡Saníi ndo iñi ndo, yuhu cuví, ma yuhvi ndo! —catyí ra.

²⁸ Tyicuan ta nacahañ ra Pedro ta catyí ra:

—Sutu Mañi yuhu, tatu icon cuvún, çatyí na quichi yuhu nu ndutya chiña nyacua nya nu vachun.

²⁹ Ta ra Jesús catyí ra chi ra:

—Ñaha.

Tyicuan ta noo ra Pedro nu canoa cuan, ta quichaha chica ra nu ndutya vatyí cuhun ra nu vachi ra Jesús. ³⁰ Soco cuhva cha tuví iñi ra tyi ñihi xaan fuerza tatyí cuan, nayuhví ra ta quichaha nducu nyee ra, ta quichaha cana chaa ra ta catyí ra:

—¡Sacaacu chii, Sutu Mañi yuhu!

³¹ Ta caa cuhva ri cuan, ta tñin ra Jesús ndaha ra, ta catyí ra chi ra:

—¡Chiin xaan chinó iñun chii! ¿Ñáá tuhun cha nacaca uvi iñun? —catyí ra Jesús chi ra.

³² Ta cuhva cha ndaa coyo ra nu canoa cuan, cutaxin ri tatyí cuan. ³³ Tyicuan ta ra cañohó chichi canoa cuan cachicuiñi chiti ra nuu ra Jesús, ta cacatyí ra chi ra:

—Ndicha ndicha cuii vatyí Sehe Nyoo cuví chuun —cacatyí ra.

Nu sanduvaha ra Jesús chi ñu cuhví ñuu cha nyicú nicacahna Genesaret
(Mr. 6.53-56)

³⁴ Cha cayaha sava ra miñi cuan, cachaá coyo ra nu cuví Genesaret. ³⁵ Ta cuhva cha canicoñon nuu ñáyivi iyó yucuan chi ra Jesús, sacoto ñu

chi tandihi ñáyivi ityi cuan. Ta quichi nyaca ñu tandihi ñu cuhví nu nyaá ra. ³⁶ Ta chacú ndahvi ñu nuu ra, na cuhva ra tñin ñu vasi chiin sahma ra. Ta tandihi ñu tñin sahma ra, nduvaha ñu.

15

Nu sañahá chi ñáá cha sativi chi ñáyivi
(Mr. 7.1-23)

¹ Tyicuan ta suhva ra cacuví fariseo ta ra casacuaha ley vehe ñuhu quita coyo ra Jerusalén. Ta chaá coyo ra nu nyaá ra Jesús ta candaca tuhun ra chi ra, ta catyí ra:

² —¿Ñáá tuhun cha ña sacuví ra cachicá noo chuhun costumbre cha sañahá ra cacuví mandoñi ñuu yo? Vatyí ña canacatyá ra ndaha ra tari cuhva cha tahán chi, tatu cuacachi ra xita —cacatyí ra.

³ Soco ndaca tuhun ra Jesús chi ra, ta catyí ra:

—¿Ñáá tuhun cha ña quichahá tucu nyoho tuhun cahán Nyoo ta ñihi xaan ca quichaha ndo costumbre maa ndo? ⁴ Vatyí Nyoo catyí ra: “Saha ndo ñáyivi chi sutu ndo ta chi sihi ndo. Ta tandihi ñu cha cahán ña vaha chi sutu o chi sihi, na cúvi ñu”, catyí Nyoo. ⁵ Soco nyoho catyí ndo tyi noo ñáyivi cuví catyí ñu chi sutu ñu o chi sihi ñu tyehe caa: “Ma cuví tyinyei chuun vatyí tandihi cha iyó chii cha yaha chaha cuende chi Nyoo.” ⁶ Ta tatu cha catyí ndo tyicuan caa, ña cuñi ca chi cha tyinyee ca ndo

chi sutu ndo o chi sihi ndo, catyí ndo. Ta tyicuan caa sacuachiyó xiin ndo tuhun cha catyí Nyoo tyi sacuvi ndo, vatyi cuñí ndo sacuvi maa ndo cuhva costumbre maa ndo. ⁷ ¡Nyoho cha sahá ndo tyi vaha ndo! Ndicha vaha tuhun cha tyaa ra Isaías, ra profeta Nyoo ta cha naha nu catyí Nyoo tuhun ndo tyehe caa:

⁸ Náyivi ihya, chihin yuhu ri ñu catyí ñu tyi cuñí ñu chii.

Soco ñima chihin tandihi añima ñu, tyi siin nu nyaá xiñi ñu.

⁹ Ta ñahri maa tuhun cha sacahnú ñu chii.

Vatyi cha sañahá ñu maa maa ri cuhva sañahá ñáyivi ri cuví,

tyehe caa tyaa ra Isaías tuhun ndo, catyí ra Jesús.

¹⁰ Tyicuan ta cana ra chi ñáyivi ta catyí ra chi ñu:

—Tyasoho ndo, ta cutuñi iñi ndo tuhun cahín. ¹¹ Vatyi cha quihví yuhu ñáyivi, ñima cuan sativí chi ñu nuu Nyoo. Soco cha quitá yuhu ñu, ican cuan sativí chi ñu.

¹² Tyicuan ta catuhva ra cachicá noo chihin ra Jesús ta candaca tuhun ra chi ra, ta catyí ra:

—¿Atu chitón vatyi ra fariseo quiñi xaan cuñí ra cha cachiñi ra tuhun cahún?

¹³ Soco maa ra Jesús nacahan ra:

—Tandihí yutun cha ña tachí Suti, ra nyaá andivi, cucoyo tun nya yoho tun.

¹⁴ Saña ndo chi ra vatyi ra cuaa cacuví ra, ta casañahá

ra ityi chi inga ra cuaa. Ta tatu noo ra cuaa ta sañahá ra ityi chi inga ra cuaa, ni nduvi ra cucanacoyo ra chichi noo yavi.

¹⁵ Tyicuan ta quichaha catyí ra Pedro chi ra Jesús:

—Nacatyí chi ndi ñáa cha cuñí chi catyí cuhva cha cahun cuan.

¹⁶ Tyicuan ta ra Jesús catyí ra chi ra:

—¿Atu ni nyoho ta ña cutuñi iñi ndo? ¹⁷ ¿Atu ña cutuñi iñi ndo vatyi cha quihví ityi yuhu yo, chichi yo cuahan? Yahá cuan ta quita tucu.

¹⁸ Soco tuhun cha quitá yuhu yo, chichi añima yo quitá, ta ican cuan cuví cha sativí chi ñáyivi nuu Nyoo. ¹⁹ Vatyi nya chichi añima ñu quitá cha quiñi caá chicá xiñi ñu. Ta cuñun, cha chahñi ñu chi ñáyivi, cha quichi cuvi iñi ñu coo ñu chihin inga ñu cha ñima ñasihí ñu cuví. Ta tandihí ca cha quiñi caa cha sacuvi ñu chihin coño ñuhu ñu. O yihí ñu cha suhu ñu cha chii ñáyivi. O sandaví ñaha ñu. O cahán ndasi ñu. ²⁰ Ican cuan cuví cha sativí chi ñáyivi. Soco cha ma sacuvi ñu costumbre cha nacatyá xaan ñu ndaha ñu cha ni cumañi ca cachi ñu, ña sativí cuan chi ñu —catyí ra Jesús.

Nu nachino iñi noo ñaha inga ñuu chi ra Jesús

(Mr. 7.24-30)

²¹ Quita ra Jesús ñuu cuan ta cuahan ra ityi ñuu Tiro ta ñuu Sidón. ²² Ta noo ñaha ñuu Canaan iyó ña ityi cuan,

suri caná chaa ña vachi ña nu vachi ra Jesús, ta catyí ña:

—Sutu Mañi yuhu, ra vachi tata rey David cuvún. Cundahvi cuñi nyehun chii, vatyí sehi yihí noo tatyí ña vaha chi ña, ta nyehé xaan ña tindoho —catyí ña.

²³ Soco ra Jesús ña nacahan ra nu cahán ña. Tyicuan ta tuhva ra cachicá noo chihin ra chi ra ta cachacu ndahvi ra nuu ra ta catyí ra chi ra:

—Catyí chi ña na cunuhu ña vatyí caná chaa xaan ña vachi ña chata yo.

²⁴ Tyicuan ta catyí ra Jesús chi ra:

—Nyoo noo ri nu tachí ra chii, cuenda mbee cha cuanaa. Ta mbee cuan ican cuví ñu ñuu Israel.

²⁵ Soco ñaha cuan tuhva ña ta chicuiñi chiti ña nuu ra ta catyí ña chi ra:

—Sutu Mañi yuhu, ¡tyinyee chii!

²⁶ Ta ra Jesús catyí ra chi ña:

—Ña vaha cha tinyaa yo pan yuhu sehe yo ta kuhva yo cachi ina —catyí ra chi ña.

²⁷ Soco maa ña ña quichaha ña ta catyí ña chi ra:

—Ndicha, Sutu Mañi yuhu. Soco nyacua nya ina ta chachí ti yiquin cha canacoyo nu mesa chitoho ti —catyí ña.

²⁸ Tyicuan ta catyí ra Jesús chi ña:

—Sihi ¡ñana cha chinó xaan iñun chii! Cua sacuvi tari kuhva cuñún.

Ta caa kuhva ri cuan ta nduvaha sehe ña.

Nu sanduvaha ra Jesús cuaha ñu kuhví

²⁹ Quita ra Jesús yucuan ta yaha ra yuhu miñi Galilea, ta ndaa ra noo yucu ta chicunya ra yucuan. ³⁰ Ta cuaha ñáyivi cha coyo nu nyaá ra ta quichi nyaca ñu cuaha ñu kuhví: ñu coxo, ñu cuaa, ñu luu, ñu ñihi. Ta cuaha ca ñu kuhví quichi nyaca ñu nu nyaá ra. Ta chacun ñu chi ñu nuu ra, ta maa ra sanduvaha ra chi ñu. ³¹ Ta iyo cuñi ñáyivi nyehé ñu yoso caa nacahan ñu ñihi ta yoso caa nduvaha ñu luu, ta yoso caa nacacá ñu coxo, ta yoso caa nanyehé ñu cuaa. Ta quichaha casacahnu ñu chi ra cuví Nyoo cuenda ñu, ñu Israel.

Nu chahá ra Jesús cha cachi cumi mil rayii

(Mr. 8.1-10)

³² Tyicuan ta cana ra Jesús chi ra cachicá noo chihin ra, ta catyí ra chi ra:

—Ndahvi xaan cuñi nyehi chi ñáyivi ihya, vatyí cha uñi quivi nyicú ñu ihya chihin, ta ñahri maa cha cachi ñu nyisó ñu. Ta ña cuñi natachi chi ñu nya vehe ñu vatyí ta cachi ca ñu, coto coñaa ñu ityi cunuhu ñu —catyí ra Jesús.

³³ Tyicuan ta ra cachicá noo chihin ra cacatyí ra chi ra:

—Soco ¿nya cuquehen yo cha cachi ñáyivi cuaha ihya, nu yori maa ñáyivi iyó ihya?

³⁴ Tyicuan ta ra Jesús ndaca tuhun ra chi ra:

—¿Yoso tahan pan cumí ndo?

Ta maa ra catyí ra:

—Ucha tahan pan, ta uvi tahan tiyaca nyihi ri.

35 Tyicuan ta tach̄i ra na cunyicu ñáyiv̄i cuan nu ñuhú.
 36 Tyicuan ta quehen ra ndi ucha pan cuan ta tiyaca cuan, ta nacuhv̄a ra tyahvi nyoo chi Nyoo. Tyicuan ta tahv̄i ra ta chah̄a ra chi ra cachicá noo chihin ra, ta maa ra cachicá noo chihin ra canasach̄a ra chi ñáyiv̄i. 37 Tandih̄i ñu chachi ñu, ta chit̄u chichi ñu. Ta yah̄a cuan casacut̄u ra ucha tica chihin yiquin cha ndoo cuan. 38 Cumi mil raȳi cachach̄i, ta ña quihv̄i cuenda ñusih̄i ni ri ra cuatyaa. 39 Yah̄a cuan ta sacunuhu ra chi ñáyiv̄i, ta quihv̄i ra nu canoa, ta cuahan ra ityi nu cuv̄i Magdala.

16

Ra fariseo ta ra saduceo cachicán ra chi ra Jesús na sacuvi ra noo milagru
 (Mr. 8.11-13; Lc. 12.54-56)

1 Tyicuan ta ra fariseo ta ra saduceo chahan coyo ra nu nyaá ra Jesús. Vatyí cacuñí ra nducu nyehe ra chi ra yucuan chaha chicán ra na sacuvi ra noo milagru chihin tunyee iñi Nyoo. 2 Soco nacahan ra Jesús ta catyí ra chi ra:

—Cha cha iñi cuhva cha cuaa quee ñanyii, tuhv̄a ndo catyí ndo: “Vaha xaan cucuvi quiv̄i tyaan, vatyí tyaqui xaan cuaha andiv̄i.” 3 Ta cha ñaha ri catyí ndo: “Vityin ña tyaqui maa cucuvi quiv̄i vatyí cuaha ta iñi ñaa xaan andiv̄i”, catyí ndo. Nyoho vaha xaan chitó ndo ¿yoso caa nacotó ndo tuhun vico andiv̄i soco ña cuv̄i nacoto ndo yoso

caa cuahan tuhun cha sañahá Nyoo chi ndo vityin? 4 Ñáyiv̄i iyó vityin, quiñi iyó ñu ta ña chinó iñi ñu chi Nyoo. Cuñi ñu nyehe ñu noo cha iyo. Soco ma cuhve nyehe ñu vatyí cha yah̄a sañah̄a Nyoo cha iyó cha sacuv̄i ra chihin ra Jonás —catyí ra Jesús chi ra, ta sandoo ra chi ra, ta cuahan ra.

Tuhun cahán ra fariseo cuv̄i chi tari yuchan iya
 (Mr. 8.14-21)

5 Cuhva cha cayah̄a ra cachicá noo chihin ra Jesús inga chiyo miñi cuan, canaa iñi ra cacuiso ra pan. 6 Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra saduceo —catyí ra Jesús chi ra.

7 Tyicuan ta quichah̄a candatuhun ra chihin ra tahan ra ta catyí ra:

—Cha cuenda vatyí ñahri pan nyisó yo vachi, yucuan chaha catyí ra tyicuan caa chi yo —catyí ra.

8 Ta tuv̄i iñi ra Jesús tuhun candatuhún ra, ta catyí ra chi ra:

—Nyoho, chiin xaan chinó iñi ndo chii. ¿Ñáa tuhun cha catyí ndo vatyí ñahri pan nyisó ndo? 9 ¿Atu ta cutuñi ca iñi ndo? ¿Atu ña nichón iñi ndo quiv̄i sacachi chi ndi ohon mil raȳi chihin ohon tahan ri pan? Ta ¿yoso tahan tica sacut̄u ndo chihin yiquin cuan? 10 ¿Atu ña nichón iñi ndo quiv̄i sacach̄i chi cumi mil ca ra chihin ucha tahan

pan? Ta ¿yoso tahan tica sacutu ndo chihin yiquin cuan?
 11 ¿Yoso caa cha ña tuví iñi nyoho vatyí ñima tuhun pan cahín, cuhva cha catyí vatyí na saha ndo cuenda chi ndo chihin yuchan iya ra fariseo ta ra saduceo? —catyí ra Jesús chi ra.

12 Tyicuan ta cacutuñí iñi ra vatyí ñima tuhun yuchan iya pan cuan cahán ra, soco na casaha ra cuenda chi ra chihin tuhun cha casañahá ra fariseo ta ra saduceo.

Nu catyí cachi ra Pedro vatyí ra Jesús cuví Cristo ra cha quita nu nyaá Nyoo

(Mr. 8.27-30; Lc. 9.18-21)

13 Cuhva cha chaꝥ ra Jesús ityi ñuuu Cesarea Filipino, ndaca tuhun ra chi ra cachicá noo chihin ra ta catyí ra:

—¿Ñáá catyí ñáyivi? ¿Yóó ra cuvi Rayi cha quichi nya gloria? —catyí ra.

14 Ta canacahan ra ta catyí ra:

—Yihí ñu catyí ñu tyi ra Juan ra sacondutya chi ñáyivi cuvún. Ta inga ñu catyí ñu tyi ra Elías, ta yihí tucu ñu catyí ñu tyi ra Jeremías, o inga ra cuví profeta Nyoo ta cha naha.

15 Tyicuan ta catyí ra chi ra:

—Ta cha cuenda chi nyoho, ¿Yóó ra cuví yuhu?

16 Tyicuan ta nacahan ra Simón Pedro:

—Yoho cuvún ra Cristo, Sehe Nyoo nyitó —catyí ra.

17 Ta nacahan ra Jesús ta catyí ra:

—Si xaan cuví chi yoho, Simón sehe ra Jonás, vatyí ni

noo rayi ña sañahꝥ ra chuun tuhun ihya, soco maa Suti ra nyaá andivi sañahꝥ chuun.

18 Ta yuhu catyí chuun tyi yoho cuvún ra Pedro. Ta siqui cava ihya, savahí vehe ñuhi. Ta ma cuvi chasaha tuhun chihi chi chi. 19 Yuhu cuhve ndaha tucu andivi nu nyacá ñaha Nyoo chuun. Ta cha cuhñun ihya siqui ñuhu ñayivi, cha nuhñi saha maa Nyoo nya andivi. Ta tandihi cha ndachun ihya siqui ñuhu ñayivi, cha ndachi maa Nyoo nya andivi.

20 Tyicuan ta catyí ra Jesús chi ra cachicá noo chihin ra tyi yori chihin cacahan ra tuhun vatyí ican ra cuví Cristo cha quita nu nyaá Nyoo.

Nu sacotó ra Jesús tyi cucúvi ra

(Mr. 8.31—9.1; Lc. 9.22-27)

21 Nya ndaha quivi cuan quichahꝥ catyí ra Jesús chi ra cachicá noo chihin ra, vatyí cuñí chi cha cuhun ra ñuuu Jerusalén. Ta ra cacuví mandoñi, ta ra cacuví nuu chi tata sutu, ta ra sacuaha ley vehe ñuhu, cucasanyehe xaan ra tindoho chi ra. Ta catyí tucu ra vatyí cucahñi ra chi ra soco nu cu uñi quivi ta cunandoto ra. 22 Tyicuan ta quehen ra Pedro chi ra ta quita sñin ra chihin ra ta quichahꝥ catyí ra chi ra Jesús vatyí ña vaha cha cahán ra ta catyí ra:

—Ña cuñí Nyoo ta cuvi chuun tyehe caa, Sutu Mañi yuhu.

²³ Soco nanyocavaḡ ra Jesús, ta quichahaḡ catyí ra chi ra Pedro:

—¡Canyaha chuun nui, cuihna! Vatyí cha cahún tyiña caa nducú sanacavon chii. Vatyí ña chicá xiñun cuhva chicá xiñi Nyoo. Soco cuhva chicá xiñi ñáyiví chicá xiñun —catyí ra.

²⁴ Tyicuan ta ra Jesús catyí ra chi ra cachicá noo chihin ra:

—Tatu nya nyoho cuñí ndo cunyicon ndo chii, cuñí chi sanaa ndo iñi ndo tuhun maa ndo. Ta ma ndu uvi iñi ndo cha nyicón ndo chii, vasi nyehe ndo tindoho cha cuende vatyí yucuan cuví cruzi cha tahán chi cuiso ndo. ²⁵ Vatyí nya nyoho ña cuñí ndo nyehe ndo tindoho cha cuenda yuhu, cucúvi ndo ta cuhun ndo anyaya. Soco nya ndo cuhva ndo ñayiví ndo cha cuende, cucacu añima ndo. ²⁶ Vatyí ñáá ri tuhun cha saha ganaa ndo tandihí cha tyayí cha iyó siqui ñuhu ñayiví tatu cunaa añima ndo. Vatyí ñahri chihin cutyiyahvi ndo ta cacu añima ndo. ²⁷ Vatyí yuhu Rayí cha quichí nya gloria, cuquichi tiquí soco chihin cha cahnu cuví Suti, ta cuquichi coyo ángel chihin. Tyicuan ta cutyiyahvi chi noo noo ndo yoso cuhva sacuví ndo. ²⁸ Cha ndicha catyí chi ndo, vatyí yihí nyoho cha nyicú ndo ihya cha ma cúvi ñaha ndo nyacua nya nyehe ndo chi yuhu Rayí cha quichí nya gloria, cunyehe ndo yoso caa vachi cunyaca ñahi chi

ndo —catyí ra Jesús.

17

Nu sañahá Nyoo yoso caa ra Jesús noo cha ndicha nu nyacá ñaha ra

(Mr. 9.2-13; Lc. 9.28-36)

¹ Iñu quivi cha yahaḡ, ta quehen ra Jesús chi ra Pedro ta ra Jacobo, ta ra Juan yañi ra Jacobo. Ta cuahan coyo ra noo yucu sucun xaan chihin ra. ² Ta yucuan nasamaḡ cuhva caa ra Jesús nuu ra ndihí chihin ra. Ta xiño vavaha nanduví nuu ra tari ñanyii. Ta sahma ra cuichin xaan nanduví tari maa ñuhú cuichin. ³ Tyicuan ta cananyehé ra chi ra Moisés ta ra Elías, candatuhún ra chihin ra. ⁴ Ta quichahaḡ catyí ra Pedro chi ra Jesús:

—Sutu Mañi yuhu, vaha xaan cha nyicú ndi ihya. Tatu cuñún na savaha ndi uñi tahan vehe. Noo chuun, noo chi ra Moisés, ta nonga chi ra Elías —catyí ra Pedro chi ra Jesús.

⁵ Cha ni ri ca cha cahán ra Pedro, quichí ri noo vico cha xiño vavaha siqui ra. Ta sahvi cuan chi ra. Ta chichi vico cuan quitaḡ noo ndusu cha catyí chi tyehe caa:

—Ican ra ihya cuví Sehi, ta cuñí xain chi ra. Ta sii xaan cuñí chihin ra. Tyasoho ndo tuhun cahán ra —catyí ndusu cuan.

⁶ Cha cachiñi ra cachicá noo chihin ra Jesús tuhun cuan, cachicavaḡ ra nya ñuhu, ta cayuhvi xaan ra. ⁷ Tyicuan ta tuhvaḡ ra Jesús nu cayucú ra, ta tiñ ra chi ra, ta catyí ra:

—Ndícuita ndo. Ma yuhvi ndo.

⁸ Ta cuhva cha cananyehe ra, noo tuhun ri ca ra Jesús nanyaá, ta uvi ca ra cuan, yori ca ra.

⁹ Ta cuhva cha vachi noo coyo ra yucu cuan, catyí ra Jesús chi ra:

—Yori chihin cahan ndo tuhun cha nyehe ndo ihya. Cahan ndo tuhun soco nya yaha cúvi ta nandoto yuhu Rayi cha quichi nya gloria —catyí ra.

¹⁰ Tyicuan ta candaca tuhun ra cachicá noo chihin ra chi ra,

—¿Ñáá tuhun cha catyí ra casacuahá ley vehe ñuhu vatyí xihna ca ra Elías tahan chi quichi?

¹¹ Ta nacahan ra Jesús ta catyí ra:

—Cha ndicha vatyí xihna ca ra Elías quichi ta cusanduvaha ra tandihi. ¹² Soco yuhu catyí chi ndo vatyí cha yaha quichi ra Elías, soco ña nichon nuu ñáyivi chi ra, ta casacuvi ñu chihin ra tandihi cuhva cuñi maa ñu. Ta tyicuan caa tucu yuhu Rayi cha quichi nya gloria, cusanyehe ñu tindoho chii —catyí ra.

¹³ Tyicuan ta cacutuñi ñi ra vatyí tuhun ra Juan ra sacondutya cahan ra Jesús.

Nu sanduvaha ra Jesús chi noo ra tyivaa chayihí noo tatyí ña vaha chi
(Mr. 9.14-29; Lc. 9.37-43)

¹⁴ Cuhva cha cachaa coyo ra nu nyicú ñáyivi, tuhva noo ra ta chicuñi chiti ra nuu ra Jesús, ta catyí ra chi ra:

¹⁵ —Tata, cundahvi cuñi nyehun chi sehi, vatyí yihí noo cuehe chihi tañi chi ra, ta cuaha xaan tindoho nyehé ra chihin cuehe cuan. Ta cuaha xaan chaha nduva ra nu ñuhu ta cayu ra, ta nduva ra nu ndutya ñandihí. ¹⁶ Ta quichi nyaque chi ra chi ra cachicá noo chuhun, soco ña cuvi sanduvaha ra chi ra —catyí ra.

¹⁷ Ta nacahan ra Jesús ta catyí ra:

—¡Nyoho, ñu ña chinó ñi cuví ndo! ¡Ta nicaa ni quiñi iyó ndo! ¿Yoso tahan ca quivi cunyai chihin ndo ta cunyei tisihi ndo nyacua nya cutuhva ndo ta chino ñi ndo chii? Nyaca ndo chi ra tyivaa chiña tyehe —catyí ra.

¹⁸ Tyicuan ta tava ñehe ra Jesús chi tatyí ña vaha cuan, ta quitá cuan chi ra tyivaa cuan. Ta caa cuhva ri cuan ta nduvaha ra.

¹⁹ Cha yaha cuan ta ndaca tuhun sin ra chicá noo chihin ra Jesús chi ra ta catyí ra:

—¿Ñáá tuhun cha ña cuvi tava nyuhu chi tatyí ña vaha cuan?

²⁰ Ta ra Jesús nacahan ra ta catyí ra:

—Cha cuenda cha chiin xaan chinó ñi ndo chii. Cha ndicha catyí chi ndo vatyí tyehe ta chinó ñi ndo chii, tari cuhva cha cahnu noo chiti mostaza, cuví catyí ndo chi yucu ihya na canyaha chi ta cuhun chi inga ityi, ta yucu ihya cuhun chi inga ityi. Ta ñahri cha ma cuvi sacuvi ndo tatu ndicha cha chinó ñi ndo chii. ²¹ Soco tahan tatyí ña vaha cuan, quita chi chihin

cha ma cachi yo ta cacan tahvi yo —catyí ra Jesús chi ra.

Inga tucu chaha cahán ra Jesús tuhun yoso caa cucahñi ñáyivi chi ra

(Mr. 9.30-32; Lc. 9.43-45)

²² Cha ni ri ca cha in ri cachicá noo ra ityi Galilea cuan, ra Jesús catyí ra chi ra cachicá noo chihin ra:

—Yuhu Rayi cha quichi nya gloria, cucuhva cuenda ñu chii chichi ndaha ra xaan iñi chii. Ta cucahñi ra chii.

²³ Soco nu cu uñi quivi ta cunandote —catyí ra.

Ta canducuihya xaan iñi ra cachicá noo chihin ra cha cachiñi ra tuhun cuan.

Nu catyiyahví ra cuenda vehe ñuhu cahnu

²⁴ Cuhva cha chaá ra Jesús ta ra cachicá noo chihin ra ñuu Capernaum, ra catavá xuhun cuenda vehe ñuhu cuan, chahan coyo ra chinyehe ra nu nyaá ra Pedro ta candaca tuhun ra chi ra:

—¿Atu ña tyiyahví ra sacuahá chi nyoho xuhun cha tahán chi cuenda vehe ñuhu cahnu? —cacatyí ra chi ra Pedro.

²⁵ Ta nacahan ra Pedro ta catyí ra:

—Tyiyahví ra.

Cuhva cha quihvi ra Pedro chichi vehe nu ca iyó ra, xihna ca ra Jesús nacahan ra ta catyí ra:

—¿Yoso caa catyi tucu yoho vityin Simón? Ra cuví tyiño siqui ñuhu ñáyivi ihya, ¿yóó chi caquehen ra yahvi? ¿Atu chi ñu ñuu maa ra o chi ñu inga ñuu?

²⁶ Nacahan ra Pedro ta catyí ra:

—Chi ñu inga ñuu.

Ta catyí ra Jesús chi ra:

—Tu tyicuan caa, ñu ñuu maa ra ña tahán chi tyiyahvi ñu. ²⁷ Soco tacuhva vatyí ma cuhva yo tisihi chi ni noo ra, cuahan miñi cuan, ta tyihun anzuelo, ta tiyaca cha tavon cha xihna ri, chichi yuhu ti cunañihun noo xuhun. Ta ñihi tyiyahvun cha cuende ta cha cuenda maun. Quehun ta cutyiyahvun —catyí ra Jesús chi ra Pedro.

18

Nu sañahá ra Jesús yóó ra cha cahnu ca cucuvi nu nyacá ñaha Nyoo

(Mr. 9.33-37; Lc. 9.46-48)

¹ Quivi cuan catuhva ra cachicá noo chihin ra Jesús chi ra, ta candaca tuhun ra chi ra:

—¿Nya ndi cahnu ca cuví nu nyacá ñaha Nyoo?

² Tyicuan ta ra Jesús cana ra chi noo ra cuehe luhlu, ta chinanyaá ra chi cue mahñu ra. ³ Ta catyí ra:

—Cha ndicha catyí chi ndo, vatyí tatu nyoho ta ma nasama ndo cuhva iyó ndo, ta tatu ma cuví ndo tari ra cuatyaa, ma cuví quihvi ndo nu nyacá ñaha Nyoo. Vatyí ra cuatyaa chahá ndotyin cunyaca ñaha sutu ndotyin chi ndotyin, ta tyicuan caa cuhva ndo chi ndo cunyaca ñaha Nyoo chi ndo. ⁴ Ta tyicuan caa ra cahnu ca cuví nuu Nyoo, ican cuví ñu ña cahnu sahá chi, ta cuví ñu

tari ra cuehe luhlu ihya.
⁵ Ta ñáyivi cha natiin cuenda chihin sivi chi noo ra ña cahnu sahá chi, tari ra cuehe luhlu ihya, chi yuhu natiin cuenda ñu.

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha
 (Mt. 5.29-30; Mr. 9.42-48; Lc. 17.1-2)

⁶ Tatu yóo ñu sanacavá nu cuatyí chi noo ra nachinó iñi chii ta cuví ra tari minoo ra luhlu, vaha taxin ca, cuhñi ñu noo yuu vee sucun ñu ta tuchi ñu chi ñu nu cono tyañuhu. ⁷ ¡Ñana cha ña vaha cha cuenda ñáyivi iyó siqui ñuhu ñayivi, vatyi iyó tuhun cha sacoo ñu cuatyí tahan ñu! Ta tyicuan ri coo tuhun cuan, soco jndahvi ñu ndahvi cha sanacava nu cuatyí chi inga ñu!

⁸ 'Yucuan chaha tatu ndahun o tatu chahun sanacava chuun nu cuatyí, vaha taxin ca cahnya ta sacuiton cañi. Vatyi vaha ca quihvun nu coun chihin Nyoo chihin cha luu ndahun o luu chahun, ta ñima ca cha naniun ta tuchi Nyoo chuun nu cayú ñuhú cha ma ndahva ca maa. ⁹ Ta tatu noo chiti nuun sanacavá chuun nu cuatyí, vaha taxin ca tava ta sacuiton cañi. Vatyi vaha ca quihvun nu coun chihin Nyoo chihin noo chiti nuun, ta ñima ca chihin cha ninduvi chiti nuun ta tuchi Nyoo chuun nu cayú ñuhú chichi anyaya.

Nu sañahá ra Jesús tyi tari noo mbee cha cuanaa, tyicuan caa cuví yo

(Lc. 15.3-7)

¹⁰ 'Ma tava xiin ndo chi ni noo ra cha cuví tari noo ra luhlu, vatyi catyí chi ndo tyi ángel cha sahá cuenda chi ra, tyicuan ri sacuví ra tyiño nuu Suti, ra nyaá andivi. ¹¹ Vatyi yuhu Rayi cha quichi nya gloria, vachi sacaqui chi ñáyivi cha cuanaa chihin cuatyí ñu.

¹² ¿Yoso caa catyi nyoho? Tatu noo ra cumí ra noo cientu mbee, ta cuanaa noo ti, ¿atu ma sandoo ra ndi cumi xico chahun cumi tahan ca ti cuan yucu cuan, ta cuhun ra cunanducu ra chi quití cha cuanaa cuan? Yuhu catyí tyi sandoo ra ta cuhun ra. ¹³ Ta tatu nañihi ra chi ti, cha ndicha vatyi cusí ca cuñí ra chihin quití cuan, ta ñima ca chihin cumi xico chahun cumi ca quití cha ña chinaa cuan. ¹⁴ Ta tyicuan caa tucu, Sutu ndo ra nyaá andivi ña cuñí ra cha cunaa ni noo ñu cuví tari noo ra luhlu.

Yoso caa tahan chi saha yo ticahnu iñi chi tahan yo

(Lc. 17.3)

¹⁵ 'Tatu ra yañun ta sacuvi ra cha ña vaha chahun, cahan chihin noo tuhun ri maa ra ta caryun chi ra tyi ña vaha cuhva sacuvi ra. Ta tatu quichaha ra tuhun cahún, cha saha ganaun chi ra cuví cuan. ¹⁶ Soco tatu ña quichahá ra chuun, tyicuan ta canon chi uvi o uñi ra, tacuhva tandihí cha cahun cucuvi ra testigu. ¹⁷ Tatu ña

quichahā ra ni chi ra cha chahan coyo chuhun cuan, tyicuan ta çahan chihin ra chihin nuu ñáyivi nyicú vehe ñuhu. Ta tatu ña quichaha ra chi ñu vehe ñuhu, tyicuan ta cuví saha ndo tuhun tyi tari noo ra ña chinó iñi chi Nyoo cuví ra, o tari ra catavá xuhun cuenda gobiernu ñuu Roma.

18^o Cha ndicha catyí chi ndo, vatyí tandihí cha cuhñi ndo ihya siqui ñuhu ñayivi, ta cha nuhñi saha maa Nyoo nya andivi. Ta tandihí cha ndachi ndo ihya siqui ñuhu ñayivi, cha ndachi maa Nyoo nya andivi.

19^o Ta suri catyí tiqui chi ndo, vatyí tatu uvi nyoho ihya siqui ñuhu ñayivi, ndu ñin ri ndo ta cacán tahvi ndo cuenda ñáá noo cha cuñi ndo cacán ndo, Suti, ra nyaá andivi cuhva ra chi ndo. 20^o Vatyí nu nyicú uvi o uñi ñu sacahnú chii, yucuan cunyai mahñu ñu —catyí ra Jesús.

21^o Tyicuan ta chahan ra Pedro chindaca tuhun ra chi ra Jesús ta catyí ra:

—Sutu Mañi yuhu, tatu ra tahin ta sacuvi ra ñáá noo cha ña vaha chihin, ¿yoso tahan chaha tahan chi sahi ticahnu iñi chi ra? ¿Atu ucha tahan chaha?

22^o Ta nacahan ra Jesús ta catyí ra:

—Catyí chuun vatyí ñima ucha tahan ri chaha, soco tandihí ri chaha.

Nu cahán ra Jesús noo cuhva cuenda noo ra cha ña cuñi saha ticahnu iñi

23^o Yucuan chaha cha nyacá ñaha Nyoo aña ñáyivi cuví chi tari noo rey cha nacana chi tandihí musu vatyí cuanyehe ra yoso yosó yica ñu chi ra. 24^o Ta cuhva cha quichahā natava ra cuenda, ta quichí nyaca ñu chi noo musu cha cuaha millón pesu yosó yica chi ra. 25^o Ta musu cuan ñahri maa chihin tyiyahvi ra chi chitoho ra, ta chitoho ra catyí ra: “Cuaxico ndo chi ra ñin cuenda ri chihin ñasihí ra, ta chihin sehe ra ta tandihí cha iyó chi ra tacuhva vatyí chihin xuhun cuan cunatyiyahvi ra cha yosó yica ra chii.”

26^o Tyicuan ta musu cuan chicuñi chiti ra nuu chitoho ra, ta chacu ndahvi ra nuu ra, ta catyí ra: “Tata, cuatu noo chiin chii, ta tyiyahvi mai tandihí chuun”, catyí ra. 27^o Ta cundahvi cuñi chitoho ra chi ra, ta saha ra ticahnu iñi chi ra, ta sanaa ra tandihí cha yoso yica ra, ta saña ra chi ra.

28^o Soco cuhva cha quitā musu cuan, nañihí ra chi noo ra tahan ra cha cuví musu tari maa ra. Ta ra cuan yosó yica ra chiin ri chi ra. Ta tñin ra chi ra cuan, ta quichahā quitu ra sucun ra, ta catyí ra chi ra: “Tyiyahvi cha yosó yicon chii.” 29^o Tyicuan ta chicuñi chiti ra cuan nuu ra, ta chacu ndahvi ra nuu ra ta catyí ra: “Cuatu noo chiin chii, ta tyiyahvi mai tandihí chuun”, catyí ra. 30^o Soco maa ra ña cuñi ra, ta chahan ra ta tyihí ra chi ra vehe caa nyacua nya cha tyiyahvi ra cha yosó yica ra chi ra. 31^o Cha canyehe

inga ca musu cha sacuví ra, uhvi xaan cacuví chi ra, ta chahan coyo ra chinacatyí ra chi chitoho ra cha sacuví ra cuan. ³² Tyicuan ta chitoho ra cuan tachi ra tyiño na quichi ra ta catyí ra chi ra: “Musu ña vaha cuvún. Yuhu sahi tichahnu iñi tandihí cha yosó yicon chii, vatyí chacu ndahvun nui. ³³ Tyicuan caa tucu cuñí chi cundahvi cuñun chi ra tahun cuan tari cundahví cuñi nyehi chuun”, catyí ra chi ra. ³⁴ Ta cuxaan xaan chitoho ra, ta tachi ra tyiño na tachi tuñi ñu chí ra, nyacua nya cha tyiyahvi ra tandihí cha yosó yica ra.

³⁵ Ta nu ndihí cahan ra Jesús, ta catyí ra tyehe caa:

—Tyicuan caa tucu cusacuvi Suti, ra nyaá andívi, chihin ndo tatu ma saha ndo tichahnu iñi chihin cha tandihí añima ndo chi tahan ndo.

19

Nu sañahá ra Jesús tyi ña vaha sandoo ñáyivi chi ñasihí ñu o yí ñu

(Mr. 10.1-12; Lc. 16.18)

¹ Cha yahá cha catyí ra Jesús tuhun ihya, ta quitá ra Galilea cuan, ta cuahan ra ityi Judea cha nyaá inga chiyo yuvi cahnu Jordán, ityi nu caña ñanyii. ² Cuaha ñáyivi chinyicon chi ra, ta yucuan sanduvahá ra chi ñu cuhvi.

³ Tyicuan ta suhva ra fariseo catuhvá ra chi ra Jesús, vatyí cacuñí ra nducu ra cuhva tyaa ra cuatyí síqui ra. Ta candacá tuhun ra chi ra ta catyí ra:

—¿Atu vaha cha sandoo rayí chi ñasihí ra cha cuenda ñáá ri tisihi luhlu chahá ña chi ra?

⁴ Ta nacahan ra ta catyí ra:

—¿Atu ta sacuaha ca nyoho nu tutu Nyoo nu catyí chi vatyi ra cha savahá chi ndo nya quívi xihna ri, savahá ra rayí ta ñaha sihi? ⁵ Ta catyí tucu chi tyehe caa: “Tahán chi sandoo rayí chi sutu ra ta chi sihi ra, ta ndu ñin ri ra chihin ñasihí ra. Ta chichi cha ñanduvi ñu, cucuvi ñu tari cha noo ri ñáyivi.” ⁶ Yucuan chaha, ñima ca uvi tahan cuví ñu, soco cha nanduví ñu noo ri ñáyivi. Yucuan chaha, cha sandu ñin ri Nyoo ña tahán chi cha sasiñ ñáyivi —catyí ra.

⁷ Tyicuan ta candacá tuhun ra chi ra Jesús ta cacatyí ra:

—¿Ñáá tuhun cha tyaá ra Moisés vatyí cuví cahnya noo rayí tutu chihin ñasihí ra ta sandoo ra chi ña?

⁸ Ta ra Jesús catyí ra chi ra:

—Cha cuenda cha ndavá añima ndo, yucuan chaha, chahá ra Moisés cha sandoo ra ñasihí ra. Soco quívi xihna ri ñima tyicuan caa cuví. ⁹ Yuhu catyí chi ndo tyehe caa: Ra cha sandoo ñasihí, ta ñima cha cuenda cha natuvi ña chihin inga ra, ta tandahá ra chihin inga ñu, chicoo cuatyí ra nuu Nyoo. Ta ra cha tandaha chihin noo ñaha sihi cha sandoo yí chi, suri chicoo tucu cuatyí ra cuan —catyí ra.

¹⁰ Tyicuan ta ra cachicá noo chihin ra, cacatyí ra chi ra:

—Tatu tyicuan caa tahán chi coo rayⁱⁱ chihin ñasihi ra, vaha taxin ca ma tandaha yo.

¹¹ Ta ra Jesús catyí ra chi ra:

—Soco ña tandihi ñáyivi cuví cutuñi iñi ñu tuhun ihya. Soco ñu cha chaha Nyoo cha cutuñi iñi, ican ñu cua cutuñi iñi. ¹² Cha ña tandaha ñáyivi, cuaha ri cuenda cuví. Yihí ñu ña quichi cuví iñi ñu tandaha ñu vatyí in caa maa ñu cacu ñu. Ta inga ñu ña quichi cuví iñi ñu tandaha ñu vatyí cha yaha tava ñáyivi ñi ñu. Ta yihí ñu ña tandaha ñu cha cuenda cha cuñi ñu sacuvi ñu tyiño nuu Nyoo, na nducuaaha añima cha nyacá ñaha Nyoo. Tandihí ñu cuví sacuvi tyehe caa, na sacuvi ñu —catyí ra Jesús.

Nu nasocó ra Jesús chi ra cuatyaa

(Mr. 10.13-16; Lc. 18.15-17)

¹³ Tyicuan ta quichi nyaca ñu suhva ra cuatyaa chi ra Jesús tacuhva na tyiso ra ndaha ra siqui ndotyin, ta cacan tahvi ra chaha ndotyin. Soco ra cachicá noo chihin ra quichaha cacahan ra chi ñu quichi nyaca chi ndotyin. ¹⁴ Soco ra Jesús catyí ra:

—Saña ndo chi ra cuatyaa, na quichi maa ndotyin nu nyaí. Ta ma casi ndo. Vatyí ñu nyacá ñaha Nyoo añima, cuví ñu tari ra cuatyaa ihya —catyí ra.

¹⁵ Tyicuan ta tyiso ra ndaha ra siqui ndotyin. Yaha cuan ta cuahan ra.

Nu cahán noo ra tyivaa tyayⁱⁱ chihin ra Jesús

(Mr. 10.17-31; Lc. 18.18-30)

¹⁶ Noo ra tyivaa chahan ra chindaca tuhun ra chi ra Jesús ta catyí ra:

—Maestro vaha xaun. ¿Ñáa cha vaha tahán chi sacuvi ta ñihi ñáyivi cha ma naa ca maa coi?

¹⁷ Ta ra Jesús catyí ra chi ra:

—¿Ñáa tuhun cha catyun tyi vaha yuhu? Noo ri ra vaha iyó ta ican ra cuan cuví Nyoo. [Ta cha catyun tyi vahi, nacotón tyi Nyoo cuví.] Soco tatu cuñún quihvun ñáyivi cha ma naa ca maa, sacuvun tandihí tuhun cha tachí Nyoo tyi sacuvi yo —catyí ra chi ra.

¹⁸ Ta ra tyivaa cuan catyí ra:

—¿Nya cha cuví cuan?

Ta ra Jesús catyí ra chi ra:

—Ma cahñun chi ñáyivi. Ma coo inga ñusihi chuun. Ma suhun cha chii ñáyivi. Ma cahun cuendu siqui ñu. ¹⁹ Saña ñáyivi chi sutun ta chi sihun. Ta cuñun chi ñáyivi, tari cha cuñún chi maun.

²⁰ Ta ra tyivaa cuan, catyí ra chi ra:

—Tandihí tuhun ihya ta quichahí nyata luhli ta nya vityin. ¿Ñáa ca cha cumañi chii?

²¹ Ta ra Jesús catyí ra chi ra:

—Tatu cuñún cuvun noo ra cui^{ti} nuu Nyoo, cuahan ta xicon cha iyó chuun, ta cuhvon chi ñu ndahvi, ta cunyicon chii. Tyicuan ta coo cha tyayⁱⁱ chuun nya gloria —catyí ra.

22 Soco cuhva cha chiñi ra tyivaa cuan cha cahan ra Jesús tyehe caa, cuihya xaan cuanuhu ra vatyí tyayí xaan ra.

23 Tyicuan ta ra Jesús catyí chi ra cachicá noo chihin ra:

—Cha ndicha catyí chi ndo vatyí yí xaan cuhva ra tyayí cha cunyaca ñaha Nyoo ñima ra. 24 Catyí chi ndo inga chaha, vatyí numi ca yaha noo camellu xiyu noo yiqui ticu, ta ñima ca noo ra tyayí ta cuhva ra chi ra cha cunyaca ñaha Nyoo —catyí ra Jesús.

25 Cha cachiñi ra cachicá noo chihin ra tuhun ihya, iyo xaan cacuñi ra, ta quichaha candaca tuhun ra chi ra tahan ra, ta cacatyí ra:

—Tu tyicuan caa, ¿yóo cha cuví cacu vii?

26 Tyicuan ta nanyehe ra Jesús nu nyicú ra ta catyí ra:

—Ñáyivi ma cuvi sacuvi ñu tyehe caa, soco Nyoo cuví sacuvi ra tandihi.

27 Tyicuan ta quichaha catyí ra Pedro chi ra:

—Sutu Mañi yuhu, nyuhu tandihi maa cha iyó chi ndi sandoo ndi ta nyicón ndi chuun. ¿Ñáa cha cuñihi ndi? —catyí ra chi ra.

28 Ta nacahan ra Jesús ta catyí ra:

—Cha ndicha catyí chi ndo, vatyí quivi cha cunduchaa tandihi, yucuan quivi yuhu Rayí cha quichi nya gloria cucunyai ta cunyaca ñahi, ta nyoho cha nyicón ndo chii, cunyaa tucu nyoho nu uchi uvi tahan tyayu tyaqui. Ta cunyaca ñaha ndo chi ndi

uchi uvi tahan ityi ñáyivi Israel. 29 Ta tandihi ndo cha sandoo ndo vehe ndo, o yañi ndo, o cuhva ndo, o sutu ndo, o sihi ndo, o ñasihí ndo o sehe ndo, o ñuhú ndo cha catyí yuhu, cunañihi ndo noo cientu ca chaha siqui cuan, ta cunañihi tucu ndo ñáyivi cha ma naa ca maa coo ndo. 30 Cuaha xaan ñu cuahan ityi nuu vityin, ican ñu cuan, cuhun nya nu ndihi. Ta cuaha xaan ñu cuahan nu ndihi vityin, ican ñu cuhun ñu ityi nuu.

20

Nu sañahá ra Jesús noo cuhva cuenda ra casahá tyiño

1 'Cha nyacá ñaha Nyoo ñima ñáyivi, cuví chi tari noo chitoho chacu yoho tichaha ndivi. Ta chitoho chacu cuan ñaha cuiri quita ra cuanducu ra cuaha ri musu cusaha tyiño nu tyiño saha ra. 2 Ta sandaa ra tyiño chihin musu cuan vatyí cutiyahvi ra yahvi cha tahán chi chi ra cha noo quivi, ta tachi ra chi ra cusaha tyiño ra nu iyó tyiño sahá ra. 3 Yahá cuan ta quita tucu ra cuhva cha caa ñin cha ñaha ri. Ta nanyehe ra chi suhva ca ra canyicú ri maa nuyahvi cuan. 4 Ta catyí ra chi ra: “Cuahan tucu nyoho cua saha tyiño ndo nu iyó tyiño sahi, ta tyiyahvi mai yahvi cha tahán chi chi ndo.” Tyicuan ta cuahan coyo tucu ra cuan. 5 Tyicuan ta chitoho chacu cuan quita tucu ra inga chaha cuhva cha ora. Yucuan ta quita tucu ra cuhva cha caa uñi cha cha

iñi. ⁶ Ta yaha cuan ta quita tucu ra cuhva cha caa ohon cha cha iñi ta nanyehe ra canyicú ri maa suhva ca ra nuyahvi cuan. Ta catyí ra chi ra: “¿Ñáá tuhun cha canyicú ri maa nyoho ndiyaca ihya, ta ña sahá tyiño ndo?” ⁷ Ta canacahan ra cuan ta catyí ra: “Yori maa cahan chihin ndi cha cusaha tyiño ndi.” Tyicuan ta catyí ra chi ra: “Cuahan tucu nyoho cua saha tyiño ndo nu iyó tyiño sahí. Ta tyiyahvi mai chi ndo yoso cuhva cha tahán chi chi ndo”, catyí ra. ⁸ Ta cuhva cha caa cuan, chitoho tyiño cuan catyí ra chi ra cuví nuu chi musu cuan: “Na canon chi musu, ta tyiyahvun chi ra. Quichaha tyiyahvun chi ra cha caquihvi nu ndihi, ta nu ndihi ta tyiyahvun chi ra cha caquihvi cha xihna ri”, catyí ra. ⁹ Tyicuan ta cha coyo ra cha caquihvi cuhva cha caa ohon cha cha iñi cuan. Ta tahan tahan ra quehen ra yahvi nani noo quivi. ¹⁰ Yaha cuan, ta cuhva cha tahán chi chi ra cha caquihvi coyo cha xihna ri cuan, cacuñi maa ra vatyí cuaha ca cutiyahvi ra chi ra. Soco suri in ri yahvi noo quivi caquehen ra. ¹¹ Ta cuhva cha caquehen ra, quichaha cacahan ra chi chitoho tyiño cuan. ¹² Ta catyí ra: “Ra cha cacha coyo nu ndihi ihya, noo tuhun hora casaha tyiño ra. Ta in ri cuhva tyiyahvun chi ra chihin nyuhu cha saha tyiño ndi nu cahni ndiyaca”, cacatyí ra. ¹³ Soco nacahan

chitoho tyiño cuan, ta catyí ra chi noo ra cuan: “Amigo, ñahri cha ña vaha sacuvi chuhun. ¿Atu ñima yahvi cha noo quivi catyí vatyí tyiyahvi chuun? ¹⁴ Quehen yahvun, ta cuanuhu. ¿Atu ñahri ityi iyó chii cha tyiyahvi chi ra cha quihvi nu ndihi in ri cuhva cha tyiyahvi chi yoho? ¹⁵ ¿Atu ñahri ityi iyó chii cha sacuvi cha cuñi mai chihin xuhin? ¿Atu quini cuñun tyi vaha ñáyivi cuví chihin inga ra cuan?” catyí ra. ¹⁶ Ta tyicuan caa ñu quihvi nu ndihi, cuhun ñu ityi nuu. Ta ñu cuahan ityi nuu, nya nu ndihi cuhun ñu. Vatyí cuaha xaan ñu nacaná Nyoo chi. Soco chiin xaan ri ñu nacachí ra.

Inga chaha sacotó ra Jesús yoso caa cucahni ñáyivi chi ra
(Mr. 10.32-34; Lc. 18.31-34)

¹⁷ Cuhva cha cuñi cuhun ra Jesús nya Jerusalén, cana sin ra chi ndi uchi uvi ra cachicá noo chihin ra ta catyí ra chi ra:

¹⁸ —Ta cha nyehe maa ndo vatyí cuahan yo Jerusalén vityin. Ta yucuan cucuhva cuenda ñu chi yuhu Rayi cha quichi nya gloria chi ra cacuví nuu chi tata sutu, ta chi ra casacuaha ley vehe ñuhu, ta cucatyí ra tyi tahán chi cúvi. ¹⁹ Ta cucuhva cuenda ra chii chi ra ñuu Roma, ta cucuacu nyaa ra chii, ta cucañi ra chii, ta cucahni ra chii nu cruzi. Soco nu cu uñi quivi cunandote —catyí ra Jesús chi ra.

Nu chicán sihi ra Jacobo ta ra Juan noo tumañi iñi chi ra Jesús

(Mr. 10.35-45)

²⁰ Tyicuan ta sihi ra Jacobo ta ra Juan sehe ra Zebedeo tuhva ña nu nyaá ra Jesús chihin ninduvi sehe ña. Ta chicuiñi chiti ña nuu ra vatyí cacan ña noo tumañi iñi chi ra. ²¹ Ta quichaha ndaca tuhun ra Jesús chi ña:

—¿Ñáá cha cuñún?

Ta catyí ña:

—Quivi cha cunyaun nu nyacá ñahun nya andivi, cuhva cha cunyaa ninduvi sehi xiun. Na cunyaa noo ra chiyo vahun, ta inga ra cunyaa ra chiyo satyun.

²² Soco nacahan ra Jesús ta catyí ra:

—Nyoho ña chitó ndo cha chicán ndo. ¿Atu cuví nyehe nyoho tindoho cha cunyehe yuhu? ¿Atu cuví cuhun ndo tuhun chihi tari cuhva cuhun yuhu? —catyí ra.

Ta canachan ra ta catyí ra:

—Cuví chi ndi.

²³ Ta catyí ra Jesús chi ra:

—Cha ndicha vatyí cunyehe ndo tindoho, ta cuhun ndo tuhun chihi tari cuhun yuhu tuhun chihi. Soco tuhun cha cunyaa ndo chiyo vahi ta chiyo satyin, ñima yuhu tahan chi cuhve chi ndo, soco maa Suti cucatyí ra yóo cha cuñihi nyatu cuan —catyí ra Jesús chi ra.

²⁴ Ta cha cachiñi uchi ca ra cachicá noo chihin ra Jesús tuhun cuan cacuxaun ra chihin ninduvi ra cuan. ²⁵ Soco cana ra Jesús chi ra ta catyí ra chi ra:

—Cha chitó maa ndo, vatyí ra nyacá ñaha chi ñáyivi iyó siqui ñuhu ñayivi ihya, ñihi xaan nyacá ñaha ra chi ñu tari nyaca ñaha ra musu ra. ²⁶ Soco ñima tyicuan caa tahan chi sacuvi nyoho. Vatyí ra cha cuñi cucahnu ca nu Nyoo, cuñi chi cuví ra musu tandihi ca ndo. ²⁷ Ta nya nyoho cha cuñi ndo cuví ndo nuu, cuñi chi cuví ndo musu tandihi ca ñu. ²⁸ Tari yuhu Rayi cha quichi nya gloria, ña vachi vatyí sacuvi ndo tyiño nui, soco vachi sacuvi tyiño nuu ndo, ta cuhve ñayivi. Vatyí chihin cuan ta cuví sacaqui cuaha ñáyivi.

Nu sanduvahá ra Jesús chi uvi ra cuaa

(Mr. 10.46-52; Lc. 18.35-43)

²⁹ Cuhva cha cua quitá coyo ra ñuu Jericó, cuaha xaan ñáyivi cuahan chihin ra Jesús.

³⁰ Ta yuhu ityi cuan canyicú uvi tahan ra cuaa. Ta cuhva cha cachiñi ra vatyí cua yaha ra Jesús, quichaha canachaa ra. Ta catyí ra:

—Sutu Mañi yuhu, ra vachi tata ra David cuvún, ¡Cundahvi cuñi nyehun chi ndi! —cacatyí ra.

³¹ Ta ñáyivi quichaha cahan ñu chi ra na cacasi ra yuhu ra. Soco maa ra ñihi ca cacana chaa ra:

—Sutu Mañi yuhu, ra vachi tata ra David cuvún, ¡Cundahvi cuñi nyehun chi ndi!

³² Tyicuan ta chicuiñi ra Jesús ta cana ra chi ninduvi tahan ra cuaa cuan, ta ndaca tuhun ra chi ra:

—¿Ñáá cha cuñí ndo cha sacuvi chihin ndo?

³³ Ta canacahan ra ta catyí ra:

—Sutu Mañi yuhu, cuñí ndi nyehe ndi.

³⁴ Tyicuan ta cundahvi cuñí ra Jesús nyehe ra chi ra, ta tñin ra chiti nuu ra. Ta caa cuhva ri cuan cananyehe ra, ta cananyicon ra chi ra Jesús.

21

Nu quihvi ra Jesús Jerusalén

(Mr. 11.1-11; Lc. 19.28-40; Jn. 12.12-19)

¹ Cuhva cha cua chaá coyo ra ñuu Jerusalén, ta cachaa ra ñuu Betfagé, yatyin ri nu cuví yucu yutun Olivo. Tyicuan ta tachí ra Jesús tyiño chi uvi ra chicá noo chihin ra. ² Ta catyí ra chi ra:

—Cuahan ndo ñuu cha nyaá ityi nuu ihya. Ta yucuan cunañihi ndo noo burru sihi, nuhñí ti. Ta nyacá ti noo burru luhlu. Ndachi ndo chi ti, ta quichi nyaca ndo chi ti chii. ³ Ta tatu yóo cha catyí ñáá cha catyí chi ndo, catyí ndo chi ñu: “Vatyí chihuhú ti chi maa ra nyacá ñaha, soco numi ri quichi nanyaca ndi chi ti”, catyí ndo chi ñu —catyí ra.

⁴ Tyehe caa cuví tacuhva na chino cava tuhun cha catyí ra profeta nu tyaa ra tyehe caa:

⁵ Catyí ndo chi ñu ñuu Sión:

“Nyehe ndo, vachi rey maa ndo nu nyaá ndo.

Ndahvi ri vachi ra yosó ra noo burru luhlu, sehe

noo quití cha tuhvá nyisó carga”, catyí ra profeta.

⁶ Tyicuan ta cuahan coyo ra cachicá noo chihin ra, ta casacuví ra tari cuhva catyí ra Jesús chi ra. ⁷ Caquichí nyaca ra chi ti chihin sihi ti. Ta catyiso ra sahma ra siqui ti, ta ndaa ra Jesús chi ti. ⁸ Ta cuaha xaan ñáyivi candica ñu sahma ñu ityi nu cuahan ra, ta inga ñu catohon ñu numa yutun ta cachacun ñu ityi. ⁹ Ta ñáyivi cha cuahan ityi nuu ta ityi chata, quichaha cana chaa ñu ta catyí ñu:

—¡Cahnu xaan cuví ra vachi tata rey David! ¡Cahnu xaan cuví ra vachi cuenda Sutu yo Nyoo! ¡Ta sacahnú xaan yo chi Nyoo nu nyaá ra ityi andivi! —catyí ñu.

¹⁰ Cuhva cha chaá ra Jesús ñuu Jerusalén cuan, tandihi maa ñáyivi ñuu naquiqui, ta cuaha xaan ñu candacá tuhun ñu chi tahan ñu, ta catyí ñu:

—¿Yóo ra cuví ra ihya?

¹¹ Ta ñáyivi catyí ñu:

—Ra Jesús, ra chahá cuenda tuhun cahan Nyoo, ra ñuu Nazaret nu cuví Galilea cuví ra —catyí ñu.

Nu tavá ñehe ra Jesús chi ra caxicó chichi vehe ñuhu cahnu
(Mr. 11.15-19; Lc. 19.45-48; Jn. 2.13-22)

¹² Yahá cuan ta quihvi ra Jesús chichi vehe ñuhu cahnu Nyoo. Ta tavá ñehe ra chi tandihi ra casatá ta ra caxicó yucuan. Ta sanduva ra mesa ra canasamá xuhun chi ñáyivi yucuan. Ta sanduva ra

tyayu ra caxicó paloma. ¹³ Ta catyí ra:

—Nu tutu Nyoo catyí chi tyehe caa: “Vehi, vehe nu chicán tahvi ñáyivi chii cuví, ta tyicuan caa cucunañi chi. Soco nyoho cha nasahá ndo vehe nu nyicú ra suhu” —catyí ra.

¹⁴ Chichi vehe ñuhu cuan catuhvá suhva ra cuaa ta ra coxo chi ra Jesús. Ta maa ra sanduvahá ra chi ra. ¹⁵ Soco canyehe ra cacuví nuu chi tata sutu ta ra casacuahá ley vehe ñuhu cuan vatyí savahá ra Jesús milagru, ta canachaa ra cuatyaa chichi vehe ñuhu, ta catyí ndotyin:

—¡Cahnu xaan cuví ra vachi tata rey David! —catyí ndotyin.

Tyicuan ta cacuxaan tata sutu ta inga ra cuan cha canyehe ra ta cha cachiñi ra. ¹⁶ Ta cacatyí ra chi ra Jesús tyehe caa:

—¿Atu chiñún cha cahán ndotyin?

Ta nacahan ra Jesús ta catyí ra:

—Chiñí. Soco ¿atu ta sacuahá ca ndo nu tutu Nyoo nu catyí chi tyehe caa?

Sutu Mañi yuhu, sacuvun vatyí ra cuatyaa nyihi cata ndotyin.

Ta ra cuatyaa lee cha chaxín sacahnú ndotyin chuun, catyí chi, —catyí ra Jesús.

¹⁷ Tyicuan ta sandoo ra chi ra, ta quitá ra ñuu cuan ta cuahan ra ñuu Betania. Ta yucuan ndoo ra cha cuaa cuan.

Nu tyanahá ra Jesús chi tu higo vatyí ñahri higo iñi nuu tun

(Mr. 11.12-14, 20-26)

¹⁸ Tuvi inga quivi. Ta cha ñaha ri, cua ndichi ra Jesús nya Jerusalén, ta chaa soco chi ra. ¹⁹ Ta nanyehe ra noo tu higo yatyin ri yuhu ityi cuan. Ta tuhva ra nu nanyaa tun, soco ñahri maa nañihi ra nuu tun. Maa maa ri maa numa ri iñi nuu tun. Tyicuan ta catyí ra chi tun tyehe caa:

—¡Ni nonga chaha ma cuhva con chiti!

Ta caa cuhva ri cuan ta na ityi tun. ²⁰ Ta cha nyehe ra cachicá noo chihin ra cha sacuvi ra, iyo cacuñi ra, ta ndaca tuhun ra chi ra ta catyí ra:

—¿Ñáá tuhun cha numi xaan na ityi tu higo cuan?

²¹ Ta nacahan ra Jesús ta catyí ra:

—Cha ndicha catyí chi ndo, vatyí tatu chinó iñi ndo ta ma nacaca uvi iñi ndo, ñima ihya ri cha sacuvi chi tu higo ihya cuví sacuvi ndo, soco cuví catyí ndo chi yucu ihya tyehe caa: “Canyaha chuun ihya ta cuahan nya chichi tyañuhu.” Ta tyicuan caa cucuvi. ²² Ta tandihi cha can ndo nu chicán tahvi ndo, tatu chinó iñi ndo tyi cucuhva Nyoo, cuñihi ndo —catyí ra Jesús.

Nu sañahá chi yóo ra chaha tyiño chi ra Jesús

(Mr. 11.27-33; Lc. 20.1-8)

²³ Yahá cuan ta quihvi ra Jesús chichi vehe ñuhu cahnu, ta cha ni ri ca cha sañahá ra yucuan, tuhva ra cacuvi

nuu chi tata sutu chi ra, ta ra cacuvi mandoñi ñu ñuu Israel, ta candaca tuhun ra chi ra:

—¿Yóo cha tyaa tyiño vatyí sacuvun tyehe caa, ta yóo cha chaha tyiño cuan chuun?

24-25 Ta nacahan ra Jesús ta catyí ra:

—Yuhu tucu cua ndaca tuhun noo tuhun chi ndo. ¿Yóo cha tachi chi ra Juan vatyí sacondutya ra chi ñáyivi? ¿Atu Nyoo tachi chi ra, o ñáyivi? Tatu catyí ndo chii, cucatyí tucu yuhu chi ndo yóo cha tyaa tyiño ihya chii —catyí ra Jesús chi ra.

Tyicuan ta quichaha cacuvi yuhu ra chihin ra tahan ra, ta cacatyí ra:

—Tatu catyí yo tyi Nyoo tachi chi ra, cucatyí ra chi yo: “Tu tyicuan caa, ¿ñáa tuhun ña chinó iñi ndo chi ra?”

26 Ta tatu catyí yo tyi ñáyivi, ñáyivi cuví nacanda ñu siqui yo, vatyí tandihí ñu chinó iñi ñu tyi ra Juan, cuenda Nyoo cahan ra —catyí ra chi ra tahan ra.

27 Tyicuan ta quichaha cacatyí ra chi ra Jesús tyehe caa:

—Ña chitó ndi.

Tyicuan ta ra Jesús catyí ra chi ra:

—Ni yuhu, ta ma catyí chi ndo yóo cha tyaa tyiño ihya chii.

Nu cahan ra Jesús noo cuhva cuenda uvi tahan sehe noo ra

28 Ra Jesús catyí ra chi ra:

—¿Yoso caa catyí ndo cuenda tuhun cha cua catyí ihya? Noo ra, iyó uvi tahan sehe ra. Ta catyí ra chi noo

sehe ra: “Cuahan cua saha tyiño nu iyó tyiño sahí.” 29 Ta nacahan sehe ra ta catyí ra: “¡Ma cuhin!” Soco yaha cuan ta nasama cuhva chicá xiñi ra ta chahan ra chisaha tyiño ra. 30 Yaha cuan ta sutu ra chahan ra nu nyaá inga sehe ra. Ta catyí tucu ra chi ra na cahun ra cusaha tyiño ra. Soco ra yucuan numi ri quehen ra tuhun, ta catyí ra: “Vaha, Tata, cuhin.” Soco ña chahan ra. 31 Chichi cha ninduvi tahan ra, ¿nya ra sacuvi ra cha catyí sutu ra? —catyí ra Jesús.

Ta nacahan ra ta cacatyí ra:

—Ra cha cahan ra chihin cha xihna ri.

Ta catyí ra Jesús chi ra:

—Cha ndicha catyí chi ndo, vatyí xihna ca ra catavá xuhun cuenda gobiernu, ta ñu cata iñi cuquihvi ñu nu nyacá ñaha Nyoo, ican saha nyoho. 32 Vatyí ra Juan ra sacondutya quichi ra, quichi sañaha ra chi ndo yoso caa tahan chi coo ndo, soco nyoho ña chinó iñi ndo chi ra, soco ra catavá xuhun ta ñu cata iñi cachino iñi ñu chi ra. Ta nyoho vasi nyehe ndo ihya, soco ña nasama ndo cuhva iyó ndo, tacuhva chino iñi ndo chi ra.

Nu catyí ra Jesús vatyí ra cacahñi chi ra cuví ra tari ra sahá tyiño ña vaha

(Mr. 12.1-12; Lc. 20.9-19)

33 Tyasoho ndo inga cuhva ihya: Chiyo noo chitoho noo ñuhú, ta tachi ra yoho tichaha ndivi, ta tyihí ra noo chacu. Ta savaha ra noo nu cuhñi ra

tichaha ndivi cuan ta tava ra ndutya chi. Ta savaha tucu ra noo vehe sucun tacuhva vatyí cuvi saha ra cuenda tandihi.

³⁴Yaha cuan ta chaha noo ra ñuhú cuan chi suhva ra casahá tyiño, ta cuahan ra inga ñuu. ³⁴Ta cha cha quivi cha iyó tichaha ndivi cuan, tachi ra chi suhva musu, na cucacan ra chi ra casahá tyiño cuan, na cuhva ra suhva tichaha ndivi cha tahán chi chi ra. ³⁵Soco ra casaha tyiño cuan, catiín ra chi musu cuan, ta cacañi ra chi noo ra. Ta chi inga ra cachahñi ra, ta catuchi ra yuu chi inga ra. ³⁶Tyicuan ta cha inga chaha, cuaha ca musu tachi chitoho chacu cuan ta ñima ca cha xihna ri. Soco tari casacuvi ra chi ra cha xihna ri, sacuvi tucu ra chi ra ihya.

³⁷Nu ndihi tachi ra chi maa maa sehe ra, vatyí cuñi maa ra vatyí cusaha ra ñáyivi chi sehe ra. ³⁸Soco cuhva cha cananyehe ra casahá tyiño cuan chi sehe ra, catyí ra chi ra tahan ra tyehe caa: “Ican ra ihya cundoo chihin tandihi ihya. Na cahñi yo chi ra tacuhva ndoo maa yo chihin”, cacatyí ra. ³⁹Tyicuan ta catiín ra chi ra, ta catava ra chi ra ityi chata chacu, ta cachahñi ra chi ra —catyí ra Jesús.

⁴⁰Tyicuan ta ndaca tuhun ra Jesús chi ñu:

—Quivi quichi chitoho ñuhú cuan, ¿ñáa cha cusacuvi ra chihin ra casahá tyiño quiñi iyó cuan?

⁴¹Ta nacahan ra ta cacatyí ra:

—Ma cuatu ra, soco cahñi ra chi ra caquiñi iyó cuan. Ta cuhva ra ñuhú cuan chi inga ra casahá tyiño. Ta quivi coo tichaha ndivi, cunacuhva cuenda ra chi chitoho chacu cuan cha tahán chi chi ra.

⁴²Tyicuan ta quichaha catyí ra Jesús chi ñu:

—¿Atu ta sacuaha ca nyoho nu tutu Nyoo nu catyí chi tyehe caa?

Yuu cha ña cuñi ra casavahá vehe cotyiño ra,

ican cuan cuví yuu cha niñi ca.

Ican ihya cuví cha sacuvi Sutu yo Nyoo.

Ta tyaqui xaan tuhun cuan cha cuenda chi yo, catyí chi.

⁴³Yucuan chaha catyí chi ndo vatyí ma cuhva ca Nyoo cahun ndo nu nyacá ñaha ra, ta cucuhva ra chi ñu cha ndicha nyacá ñaha ra aña. Vatyí maa ñu cunacuhva cuenda ñu cha vaha cha tahán chi chi ra. ⁴⁴Ta cha cuenda yuu cuan, yóo ñu cha nduva siqui chi, yiquin maa cucuvi ñu. Ta tatu yuu cuan ta canacava siqui yóo ñu, cutaxin nyihi maa ñu —catyí ra Jesús.

⁴⁵Cuhva cha catuvi iñi ra cacuvi nuu chi tata sutu cuan ta ra fariseo vatyí cuenda ra cahan ra Jesús cuhva ihya, ⁴⁶cacuñi ra catiín ra chi ra, soco cayuhvi ra chi ñáyivi vatyí ñáyivi, chitó ñu vatyí ra Jesús cuenda Nyoo cahan ra.

22

Nu chahá ra Jesús noo cuhva cuenda vico tandaha (Lc. 14.15-24)

¹ Quichahá cahan tucu ra Jesús chihin ñu inga chaha chihin cuhva, ta catyí ra:

² —Cha nyacá ñaha Nyoo añima ñáyivi cuví chi tari noo rey cha savahá noo vico cha cuenda cha cua tandaha sehe ra. ³ Ta tachí ra chi musu ra na cuhun ra cucana ra chi ñu cha nacatyí tuhun ra, soco ñu cuan, ña cacuñí ñu quichi coyo ñu. ⁴ Tachí ra inga chaha chi inga musu, ta catyí ra chi ra tyehe caa: “Catyí ndo chi ñu cha nacatyí tuhun, vatyí cha yahá chahñi sindiqui sane, ta inga quití cha xahan ñandihí, ta cha nyaá vaha nyayu, ta tandihí cha nyatú tuhva. Na quichi ñu vico tandaha”, catyí ra.

⁵ Soco ñu nacatyí tuhun ra, ña caquichahá ñu chi ra. Noo ñu chahan coyo ñu nu iyó chacu ñu, inga ñu chahan ñu nu tyiño sahá ñu. ⁶ Ta inga ñu tiñ ñu chi musu rey cuan ta cañi vavaha ñu chi ra nyacua chahñi ñu chi ra.

⁷ Tyicuan ta rey cuan cuxaan vavaha ra, ta tachí ra chi sindaro ra, cucahñi ra chi ra cachahñi cuan, ta cahmi ra ñuu ra. ⁸ Tyicuan ta quichahá catyí ra chi musu ra: “Tandihí ta cha iyó vaha cha cuenda vico tandaha, soco ñu nacatyí tuhun cuan, ña tahán chi cha quichi coyo ñu. ⁹ Cuañan ndo tandihí calle ta nacatyí tuhun ndo chi tandihí ri ñu cha nañihi ndo na quichi coyo ñu

vico tandaha”, catyí rey cuan. ¹⁰ Musu cuan cuahan coyo ra tandihí calle, ta casandu ñin ri ra chi tandihí ñu canañihí ra: ñu quiñi iyó, ta ñu vaha. Ta tyicuan caa chitu chichi vehe ra chihin ñáyivi.

¹¹ Tyicuan ta quihvi rey cuan cua nyehe ra chi ñáyivi cha canacatyí tuhun musu cuan. Ta nanyehe ra chi noo ra ñohó yucuan, soco ñahri sahma vico tandaha ñihnó ra. ¹² Ta catyí rey chi ra: “Amigo, ¿yoso caa cha quihvun ihya ta ñahri sahma vico tandaha ñihnón?” Soco ra cuan ña na cahan maa ra. ¹³ Tyicuan ta catyí rey cuan chi ra catyihí mesa cuan: “Cuhñi ndo chaha ra ta ndaha ra, ta tuchi ndo chi ra nu ñaa iñi ityi chata vehe, ta yucuan cucuacu ra, ta cusacahñi ra noho ra”, catyí ra. ¹⁴ Vatyí cuaha xaan ñu nacana Nyoo chii, soco chiin xaan ñu nacachi ra —catyí ra Jesús.

Nu candacá tuhun ra cuenda xuhun cha tavá gobiernu

(Mr. 12.13-17; Lc. 20.20-26)

¹⁵ Tyicuan ta catyihí tahan ra fariseo tuhun chihin tahan ra vatyí cusacahan ra chi ra Jesús noo cuhva cha ña tahán chi, vatyí tyicuan caa ta coo cuatyí catyaa ra siqui ra. ¹⁶ Ta tachí ra chi suhva ra cuenda ra, ñin ri chihin suhva ra cuenda ra Herodes. Ta catyí ra chi ra Jesús tyehe caa:

—Maestro, chitó ndi vatyí cha ndicha cahún. Ta chihin cha ndicha sañahún ityi

Nyoo. Ta ña quichahún cha cahán ñáyiví, vatyí ña tiiñ cuendon cuhva caá ri ñu. ¹⁷ Catyí chi ndi yoso caa chicá xiñun: ¿Atu vaha cha tyiyahví yo cha chicán gobiernu ñuu Roma chí yo, o ma tyiyahví yo?

¹⁸ Soco tuví iñi ra Jesús vatyí ña vaha cuhva cachicá xiñi ra, ta catyí ra chí ra:

—Nyoho sahá ndo tyi vaha ndo, soco ña ndicha ndo. ¿Ñáá tuhun cha nducu nyehe ndo chii? ¹⁹ Sañaha ndo xuhun cha tuhva ndo tyiyahví ndo chí gobiernu —catyí ra.

Ta caquichí nyaca ra noo xuhun cha nañi denariu chí ra. ²⁰ Ta cuhva cha nanyehe ra Jesús, ta quichahá ndaca tuhun ra chí ra:

—¿Yóó chí nuu ta yóó chí siví nyaá ihya?

²¹ Ta nacahan ra ta cacatyí ra:

—Chí ra nyacá ñaha.

Tyicuan ta catyí ra Jesús chí ra:

—Cuhva ndo chí ra nyaca ñaha cha tahán chí chí ra, ta cuhva tucu ndo chí Nyoo cha tahán chí chí Nyoo —catyí ra.

²² Cuhva cha cachiñi ra cha cahan ra Jesús, iyo xaan cacuñi ra. Ta cuahan coyo ra.

Nu canducu tuhun ra saduceo siqui tuhun cha nandotó ndiyi

(Mr. 12.18-27; Lc. 20.27-40)

²³ Suri quivi cuan suhva ra saduceo chahan coyo ra nu nyaá ra Jesús. Ta ra saduceo cuan ña cachino iñi ra cha cunandoto ndiyi quivi cu naa

ñayivi. Yucuan chaha candaca tuhun ra chí ra Jesús, ta catyí ra:

²⁴ —Maestro, ra Moisés catyí ra vatyí tatu noo ra tandaha ta chihí ra ta ña chiyo sehe ra, tahán chí cha tandaha yañi ra chihin ñaha chihí yí cuan. Tyicuan ta coo sehe ra chihin ña cha cuenda yañi ra cha chihí.

²⁵ Vaha. Vityin tyehe caa cuví chí noo ra chiyo ucha tahan ra chihin yañi ra. Ra cha xihna ri tandaha ra. Yaha cuan ta chihí ra. Soco vatyí ña chiyo sehe ra, ndoo ñasihi ra chí yañi cu uvi ra. ²⁶ Ta suri tyicuan caa cuví chí yañi ra ra cu uvi. Ta yaha cuan, ta ra cu uñi quehen ra chí ña, ta suri chihí tucu ra. Ta tyicuan caa cuví chí ndi ucha ra. ²⁷ Ta cha yaha cuan nu ndihi tuhun chihí ndihi maa ña cuan.

²⁸ Ta cha tyicuan caa, quivi cunandoto ñu, chichi cha ucha ra chihin yañi ra, ¿nya ra cucuvi ñasihi chí ñaha cuan? ¿Vatyí tandihi ra tandaha ra chihin ña? —cacatyí ra.

²⁹ Nacahan ra Jesús ta catyí ra:

—Nyoho, cahán tondo ri maa ndo, cha cuenda vatyí ña chitó ndo cha nyaá nu tutu Nyoo, ni tunyee iñi Nyoo, ta ña chitó ndo. ³⁰ Vatyí quivi cunandoto ndiyi, ni ma tandaha ñu, ta ni ma cuhva ñu sehe ñu tandaha, vatyí tari ángel Nyoo ra nyaá andivi cucuvi ñu. ³¹ Soco tuhun cha nandotó ñu ndiyi, ¿atu ta sacuaha ca ndo tuhun cha catyí maa Nyoo chí ndo? Catyí ra tyehe caa:

32 “Yuhu cuví Nyoo cuenda ra Abraham, ta ra Isaac ta ra Jacob.”

Ihya nyehé yo vatyí canyito añima ra cuan, vasi cha naha chihí ra vatyí Nyoo ñima Nyoo cuenda ñu ndiyí cuví ra, soco Nyoo cuenda ñu nyitó cuví ra —catyí ra.

33 Iyo cuñí ñáyiví cha chiñí ñu tuhun sañahá ra Jesús.

Ley cha ñiñi ca cha chaha Nyoo

(Mr. 12.28-34)

34 Cha cachito ra fariseo vatyí ra Jesús chasi ra yuhu ra saduceo, candu ñin ri ra. 35 Ta noo ra cha cuví ra sacuahá ley vehe ñuhu, cuñí ra nducu nyehe ra chí ra Jesús. Ta quichaha ndaca tuhun ra chí ra, ta catyí ra:

36 —Maestro, ¿nya mandamiento cha nyaa nu ley cuví cha ñiñi ca?

37 Ta catyí ra Jesús chí ra:

—“Cuñun chí Sutu Mañi yo Nyoo chihin cha ñi ñun ta chihin cha tandihí añimon, ta chihin cha tandihí cha chiñi tuñi xiñun.” 38 Ican ihya mandamiento cha ñiñi ca, ta cha xihna ri ñandihí. 39 Ta cha cu uvi cha yatyin ri tyicuan caa, ta catyí chí: “Cuñun chí ñáyiví tahun tari cuñun chí maun.” 40 Ican uvi tahan mandamiento ihya cuví cha nyisó chí ley cha chaha Nyoo chí ra Moisés ta tandihí tuhun cha casañahá ra profeta Nyoo ta cha naha.

Ra Cristo quichí ra tata ra David, ta suri cuví ra Sehe Nyoo

(Mr. 12.35-37; Lc. 20.41-44)

41 Cha ñi ri ca cha canyicú ñin ri ca ra fariseo, 42 ra Jesús ndaca tuhun ra chí ra, ta catyí ra:

—¿Yoso caa chicá xiñi nyoho cuenda ra cuví Cristo? ¿Yóo chí tata vachi ra cuñi maa ndo?

Ta canacahan ra ta catyí ra:

—Tata ra David cuví chí ra.

43 Tyicuan ta ra Jesús catyí ra chí ra:

—¿Ta yoso caa cha vatyí ra David cuan, maa Tatyí Ii Nyoo chotyíño chí ra? ta catyí ra vatyí ra cuví Cristo, ra nyacá ñaha chí ra cuví ra, vatyí catyí ra tyehe caa:

44 Cahan Suti Nyoo chihin Suti ra Cristo, ta catyí ra chí ra:

“Cunyaa chiyo vahi nyacua nya quiví cuhve chí ra xaan ñi chuun vatyí cuaca chahun siqui ra” tyaá ra David.

45 ¿Yoso caa cha ra vachi tata ra David cuví chí ra Cristo, tatu suri maa ra David catyí ra vatyí ra Cristo Sutu ra cuví chí ra? —catyí ra Jesús.

46 Ta yori maa cuví nacahan ni noo tuhun. Ta nya ndaha quiví cuan, yori ca maa caña ñi candaca tuhun ñáa ca cha candaca tuhun chí ra.

23

Nu cahan ra Jesús chí ra sacuahá ley vehe ñuhu ta ra fariseo

(Mr. 12.38-40; Lc. 11.37-54; 20.45-47)

1 Tyicuan ta ra Jesús catyí ra chí ñáyiví, ta chí ra cachicá noo chihin ra tyehe caa:

2 —Ra sacuahá ley ta ra fariseo nyicú ra tyiño cha sañahá ra ley cha tyaá ra Moisés. 3 Ta cha tyicuan caa, quichaha ndo cha cahán ra ta sacuvi ndo tandihi cha cacatyí ra chi ndo. Soco ma quehen ndo kuhva iyó ra, vatyí maa ra, siin cha sañaha ra, ta siin cha sacuví ra. 4 Vatyí yori ndoyo carga cha tyaá ra siqui ñáyivi. Ta saniñi ra chi ñu na cuiso ñu, ta maa ra ni chiin nundaha ra ña nañi chata carga cuan. 5 Tandihi cha casacuví ra, cha cuñi ra na nyehe ñáyivi. Vatyí tahán iñi ra catyaa ra tuhun Nyoo tyaan ra ta soco ra chihin letra nahnu. Ta tahán iñi ra cacuihno ra sahma chihin adorno nañi. 6 Ta nu vaha ca, cuñi ra cunyicu ra vico, ta cachi ra. Ta nu vaha ca cuñi ra cunyicu ra chichi vehe ñuhu. 7 Ta nu chicá noo ra cacuñi ra vatyí kuhva ñáyivi nocumi chi ra chihin cha sahá xaan ñu ñáyivi chi ra. Ta cuñi tucu ra cha catyí ñu chi ra vatyí chito xaan ra. 8 Soco nyoho, ma kuhva ndo ityi cha catyí ñáyivi vatyí chitó xaan ndo. Vatyí tandihi nyoho, yañi ndo cuví. Ta noo ri ra chitó iyó, ta ican ra cuví Cristo. 9 Ta ma catyí ndo Sutu ndo chi ninoo ra ñuhu ñáyivi ihya, vatyí iyó noo Sutu ndo, ta nyaá ra andivi. 10 Ta ma catyí ndo vatyí ra cuví nuu cuví ndo, vatyí noo ri maa ra Cristo cuví nuu. 11 Ra cha sacuví tyiño nuu tandihi ca ra, ican ra cuan cuví ra cahnu ca nu nyicú ndo. 12 Vatyí ra cahnu sahá chii, cunocuee ra.

Ta ra ña cahnu sahá chii cucu-cahnu ra.

13 '¡Ndahvi nyoho ra sacuahá ley vehe ñuhu, ta ra fariseo! ¡Ndahvi nyoho cha sahá ndo tyi vaha ndo! Vatyí chasí ndo yuvehe nu nyacá ñaha Nyoo, tacuhva ma cuvi quihvi ñáyivi. Ta ni ri maa ndo ña quihví ndo ta ni ña chahá ndo cha quihvi ñáyivi, ñu cuñi quihvi.

14 '¡Ndahvi nyoho ra sacuahá ley ta ra fariseo, nyoho cha sahá ndo tyi vahá ndo! Vatyí tinyaá ndo vehe ñu chihí yí, tyí ña cuví tyiyahvi ñu ñáá xuhun tavá ndo siqui ñu. Ta yahá cuan, ta naha chicán tahvi ndo nu tuvi vatyí sahá ndo tyi vaha ndo. Ta cuenda cha sacuví ndo tyehe caa, cahnu ca tindoho cunyehe ndo.

15 'Ndahvi nyoho ra sacuahá ley vehe ñuhu, ta ra fariseo. ¡Sahá ndo tyi vaha ndo, soco ña ndicha ndo! Vatyí nducú xaan ndo kuhva na cunyicon ñáyivi chi ndo. Ta tatu cha nandihvi ñu cuenda ndo, quiñi caa nicoo ñu saha ndo, ta ñima ca maa ndo. Ta cha tyicuan caa nyacuví ndo, ñihi ca sacuhún ndo chi ñu anyaya cha nuu maa ndo.

16 '¡Ndahvi nyoho ra ndahvi! Vatyí cuñi ndo saquehen ityi ndo chi ñáyivi, ¡soco cuaa ndo! Vatyí catyí ndo tatu noo ñu catyí ñu cha cusacuví ñu noo cha cusacuví ñu, ta tyanaha ñu chihin sívi vehe ñuhu, yucuan ña niñi cha sacuví ñu. Soco tatu xuhun cuan cha iyó vehe ñuhu cuan

tyanaha ñu, yucuan ndicha, niñi cuñi chi cha sacuvi ñu, catyí ndo. ¹⁷ ¡Tondo xaan ndo ta cuaa ndo! ¿Nya cha niñi ca? ¿Atu niñi ca xuhun cuaan cuan, o vehe ñuhu cha sacu ii chi xuhun cuaan cuan? ¹⁸ Ta suri catyí tucu ndo: “Tatu yihí ñu catyí ñu cha cusacuvi ñu cha cusacuvi ñu, ta tyanaha ñu cuenda arta cha yoso cha chahá cuenda ñu chi Nyoo, ña niñi cha sacuvi ñu. Soco tatu tyanaha ñu cuenda ofrenda cha yosó siqui arta cuan, yucuan ndicha niñi cuñi chi sacuvi ñu, catyí ndo.” ¹⁹ ¡Tondo xaan ndo ta cuaa ndo! ¿Nya cha niñi ca? ¿Atu niñi ca ofrenda o arta cuan cha sacu ii chi ofrenda cuan? ²⁰ Vatyí ñu tyanahá cuenda arta cuan, ñima cuenda ri cuan tyanaha ñu, soco cha cuenda tandihi cha yosó nuu ñandihí. ²¹ Ta ñu tyanahá cuenda vehe ñuhu cahnu, ñima cuenda vehe ñuhu ri cuan, soco cuenda Nyoo tyanahá ñu ñandihí, vatyí iyó ra yucuan. ²² Ta tyicuan caa tucu ñu tyanahá cuenda andivi, tyanahá tucu ñu cuenda tyayu Nyoo ta suri cha cuenda maa Nyoo ñandihí, tyi maa ra cuví ra nyaá nyacá ñaha yucuan.

²³ ¡Ndahvi nyoho ra sacuahá ley vehe ñuhu ta ra fariseo! sahá ndo tyi vaha ndo vatyí chahá ndo diesmo chi Nyoo cha cuví menta, ta añii, ta comino. Soco ña quichahá ndo tuhun cha niñi ca cha nyaá nu ley cha tahán chi sacuvi yo. Ta cuñun, cha

sacuví yo cha vaha chihin tandihí ñáyivi, cha cundahvi cuñi yo chi ñu, cha chinó iñi yo chi Nyoo ta ma sandoo yo chi ra. Ican ihya cuñi chi sacuvi ndo, ta ma sandihí ndo cha cuhva ndo diesmo cuan ñandihí. ²⁴ Nyoho cuñi ndo casaquehen ityi ndo chi ñáyivi, soco cuaa ndo. Vatyí sacuita ndo noo tiyucun luhlu, soco coco ndo noo camellu. Cuatyí luhlu ri nyehe ndo ta ña sahá ndo cuenda cuatyí cahnu cuví cuan.

²⁵ ¡Ndahvi nyoho ra sacuahá ley vehe ñuhu ta ra fariseo, ra casaha tyi vaha! Vatyí ityi chata ri vasu ta ityi chata ri coho sanduvií ndo, soco ityi chichi ña sanduvií ndo. Vatyí chichi añima ndo tyitu ñohó cha quiñi caa. Chicá xiñi ndo cha ñihi ndo nu cusuhu ndo, ta ña cuví chasaha ndo cha quiñi caa cha quichi cuví xaan iñi ndo. ²⁶ ¡Ra fariseo cuaa cuví ndo! Sanduvii xihna ndo ityi chichi vasu ta coho, tyicuan ta cuvii tucu ityi chata.

²⁷ ¡Ndahvi nyoho ra sacuahá ley vehe ñuhu ta ra fariseo, ra casavaha chii! Vatyí cuví ndo tari noo ñaña ndiyi cha nacahyu, vatyí ityi chata chi tyaqui xaan, soco ityi chichi tyitu ñohó yiqui ndiyi, ta tandihí nuu cha quiñi caa. ²⁸ Tyicuan caa cuví nyoho. Vatyí ityi chata tari maa tyi vaha xaan ndo nuu ñáyivi, soco ityi chichi, tyitú ñohó cha cuendu ndo, ta cha quiñi caa.

29 'jNdahvi nyoho ra sacuahá ley vehe ñuhu, ta nyoho ra fariseo! Sahá ndo tyi vaha ndo ta ña ndicha. Nyoho samá ndo ñaña ra profeta Nyoo ra chiyo ta cha naha. Ta nyoho nacahyu ndo ñaña ñáyivi vaha ñu chiyo ta cha naha. 30 Ta yucuan ta catyí ndo! "Tyehe ta chiyo ndi quívi chiyo ñáyivi chahnu ndi, ma tyinyee ndi chi ra chahñi chi ra profeta Nyoo", catyí ndo. 31 jMa chihin yucuan ri! Suri maa ndo nacotó ndo vatyí vachi ndo tata ñu cachahñi chi profeta Nyoo. 32 jVaha vityin, chaha chi cuhva savaha ndihi ndo cha quiñi caa cha quichaha savaha sutu chahnu ndo!

33 jNyoho ñu quiñi iyó, ñu vachi tata cool! ¿Yoso caa cucacu nyoho tacuhva ma cuhun ndo anyaya? Ma cuvi. 34 Yucuan chaha cutachi chi ra profeta Nyoo nu nyicú ndo, cutachi tiqui chi ra chiñi tuñi, ta ra sacuahá nu nyicú ndo. Soco nyoho cucahñi ndo chi ra ta cutyaa ndo chi suhva ra nu cruzi. Ta chi inga ra cucañi ndo chi ra chichi vehe ñuhu. Ta cacanyicon ndo chi ra tahan tahan ñuu. 35 Yucuan chaha, siqui ndo cucunyaa cuatyí cha cuenda cha cachihí tandihí ra vaha cha cachahñi ñu nyacua nya ra Abel ta nyacua nya ra Zacarías sehe ra Berequías ra cha chahñi ndo chichi vehe ñuhu yatyin nu nyaá arta cha yosó cha chahá cuenda yo chi Nyoo. 36 Cha ndicha catyí chi ndo, vatyí tandihí cuatyí ihya

cucoso siqui ñáyivi cha iyó vityin —catyí ra Jesús chi ra.

Nu nducuihya iñi ra Jesús nyehe ra chi ñuu Jerusalén ta chacu ra

(Lc. 13.34-35)

37 jJerusalén, Jerusalén! jNdahvi nyoho ñu iyó ñuu chiña! Vatyí chahñi ndo chi ra profeta Nyoo. Ta tuchi ndo yuu chi tandihí ra cha saquichí Nyoo nu nyicú ndo. Cuaha xaan chaha cuñi saha cuende chi ndo, tari noo ndivi cha sahá cuenda ti chi sehe ti, ta naquehén ndahvi ti chi ti chichi ndichin ti, soco ña cuñi ndo. 38 Nyehe ndo vityin, vatyí cha sandoo ndahvi chi ndo. 39 Vatyí catyí chi ndo, vatyí ma nyehe ca ndo chii nyacua nya chaa chi quívi cucatyí ndo tyehe caa: "Cahnu xaan ra cuví ra vachi chihin tunyee iñi sivi Sutu yo Nyoo", cucatyí ndo —catyí ra Jesús.

24

Nu catyí ra Jesús vatyí cutani vehe ñuhu cahnu
(Mr. 13.1-2; Lc. 21.5-6)

1 Quita ra Jesús chichi vehe ñuhu cahnu cuan, ta cha cuñi cuhun ra, ta catuhva ra cachicá noo chihin ra chi ra, ta quichaha casañaha ra vehe ñuhu cuan chi ra. 2 Soco nacahan ra Jesús ta catyí ra:

—¿Atu nyehé ndo tandihí ihya? Cha ndicha catyí chi ndo, vatyí ihya ni noo yuu ta ma ndoo coso nyitahan. Tandihí ta cutani —catyí ra.

Nu catyí ra Jesús ñáá ndihi seña cucuvi cha ni cumañi ca naa ñayivi

(Mr. 13.3-23; Lc. 21.7-24; 17.22-24)

³Tyicuan ta cuahan coyo ra yucu yutun Olivo. Ta cuhva cha nyaá ra Jesús yucuan, ra cachicá noo chihin ra quichi coyo ra ta catyí xehe ra chi ra tyehe caa:

—Cuñí ndi cha catyun chi ndi, ama cucuvi tuhun cuan. ¿Ñáá seña cucuvi cha cuquichun inga chaha ta cha cunaa ñayivi?

⁴ Tyicuan ta nacahan ra Jesús:

—Saha ndo cuenda chi ndo coto yóo cha sandahvi ñaha chi ndo. ⁵ Vatyí cuaha xaan ra cuquichi, ta cotyíño ra sivi, ta cucatyí ra tyehe caa: “Yuhu cuví Cristo ra cha saquichi Nyoo.” Ta cuaha ñu cusandavi ñaha ra. ⁶ Nyoho cuñihi ndo tuhun tyi iyó cuatyí ta cañí tahan ñáyivi ityi cuan ityi ihya. Soco ma nayuhvi ndo, vatyí tyicuan caa tahan maa chi cuví. Soco ta chaa ca quivi cunaa ñayivi. ⁷ Vatyí ñáyivi noo ñuu cahnu, cucañi tahan ñu chihin ñáyivi inga ñuu cahnu. Ta cucoo cuatyí noo ñuu chihin inga ñuu. Ta cucoo soco, ta cucoo cuehe, ta cha taan nahnu cuaha ri ityi. ⁸ Tandihí ihya ta nu cua quichaha ñáyivi nyehe ñu tindoho cuví.

⁹ Tyicuan ta cucuhva cuenda ñu chi nyoho vatyí sanyehe ra tindoho chi ndo. Ta cacahñi ra chi ndo. Ta tandihí ñu iyó siqui ñuhu ñayivi cutasi cuñi nyehe ñu

chi ndo cha cuenda yuhu.

¹⁰ Quivi cuan cuaha xaan ñu cusandihí ñu cha chino iñi ñu chii, ta cutasi cuñi ñu nyehe ñu chi tahan ñu. Ta cunaxico tuhun ñu chi tahan ñu. ¹¹ Cuaha xaan ra cuendu cunatuvi, ta cucatyí ra vatyí cuenda Nyoo cacahan ra. Ta cuaha xaan ñáyivi cucasandavi ñaha ra. ¹² Ta cuaha xaan cha quiñi caa cucoo. Yucuan chaha cuaha xaan ñu cusandihí ñu cha cuñi ñu chi tahan ñu. ¹³ Soco ñu cha ña ndu uvi iñi chino iñi chii nyacua nya nu ndihi, cucacu añima ñu. ¹⁴ Ta cucutya nicahnu ñayivi tuhun vaha cha nyacá ñaha Nyoo añima ndo, tacuhva coto tandihí ñáyivi iyó siqui ñuhu ñayivi, tyicuan ta cunaa ñayivi.

¹⁵ Tandihí nyoho cha sacuahá ndo ihya, na cutuñi iñi ndo tuhun ihya: Ra Daniel, ra profeta Nyoo ta cha naha, tyaá ra tuhun noo cha sacuquiñi caa, noo cha sativi. Ta quivi nyehe ndo vatyí chaa ihya Nu Ii, ¹⁶ tyicuan ta ñu ñohó Judea, cuñí chi cono ñu ityi yucu. ¹⁷ Ta ñu yosó xiñi vehe, noo ñu, soco ma quihvi ñu chichi vehe ñu tava ñu cha iyó chichi vehe cuan. ¹⁸ Ta ñu ñohó nu chiqui, ni ma cunuhu ca ñu cunaquehen ñu ni sahma ñu. ¹⁹ ¡Ndahvi ñusihí cha cañohó sehe quivi cuan! O tatu iyó sehe ñu cha chaxín, ¡ndahvi ñu cuan! ²⁰ Cacan ndo chi Nyoo tacuhva cha ma tahan chi caca cono ndo quivi vichin, ni quivi nyitatú yo. ²¹ Vatyí

cuaha xaan tindoho cucoo quivi cuan, noo tindoho cha ta coo ca maa nyata chingo ñuhu ñayivi, ta ni ma coo ca cha yaha tuhun cuan. ²² Soco tatu Nyoo, ta ma sanducuiti ra quivi cuan, yori maa cacu. Soco cusanducuiti ra cha cuenda cha cuñi ra chi ñu nacachi maa ra.

²³ 'Ta tatu yoo cha catyi chi nyoho: "Nyehe ndo, ma ra Cristo ihya" o "Nyehe ndo ma ra nyaá yucuan", ma chino iñi ndo. ²⁴ Vatyí cuquichi coyo ra casandavi ñaha ta cucatyí ra vatyí ra Cristo cacuví ra. Ta cucatyí ra vatyí ra profeta Nyoo cacuví ra. Ta cusavaha ra seña ta milagru nahnu tacuhva casandavi ñaha ra. Nyacua nya ñu cha nacachi maa Nyoo ta cusandavi ñaha ra tatu cuví chi ra. ²⁵ Saha ndo cuenda vatyí cha yaha catyi chi nyoho cha ni cumañi ca cuvi. ²⁶ Yucuan chaha tatu catyi ñu chi ndo tyehe caa: "Nyehe ndo, ma ra Cristo nyaá nu chiqui ndi cuan", catyi ñu chi ndo, ma cuhun ndo. O tatu catyi ñu chi ndo: "Nyehe ndo, ma ra nyaá chichi cuarto ihya", ma chino iñi ndo. ²⁷ Vatyí tari noo cha quihvi tacha cha nyehé yo cuxiño nya nu caña ñanyii ta nya nu quee ñanyii, tyicuan caa cucuvi quivi quichi yuhu Rayi cha quichi nya gloria. ²⁸ Nu caá coño chihí, yucuan cuchaa coyo chii.

Yoso caa cuquichi ra Cristo inga chaha
(Mr. 13.24-37; Lc. 21.25-

33; 17.26-30, 34-36)

²⁹ 'Ta cha yahá ri cha nyehé ñu tindoho, ta cunduña ñanyii, ta yoo ma sacundichin ca chi. Ta tiño cucanacoyo ti andivi, ta nyacua nya cha iyó andivi cunacanda. ³⁰ Tyicuan ta cuquetuvi noo seña ityi andivi nu vachi yuhu Rayi cha quichi nya gloria. Cuquichi nu vico ityi andivi chihin tunyee iñi cahnu ta chihin cha cahnu cuví Nyoo. Ta tandihí ñayivi iyó siqui ñuhu ñayivi, cucuacu chaa xaan ñu cha nanyehe ñu chii. ³¹ Ta cutachi ángel cuende tacuhva vatyí chihin cha ñihí tiví ra cutu ra ta cusandu ñi ri ra chí ñu nacachi maa Nyoo chí, cuquita ñu nicacahnu nu ñuhu ñayivi, nyacua nya nu ndihí ñuhu ñayivi ta nyacua nya nu ndihí andivi.

³² 'Cutuñi iñi ndo noo cuhva yutun cha nañi higo: Tatu cha yutya soco tun, ta caña ndaha tun, nyoho cha chitó ndo vatyí cha vachi vico savi. ³³ Ta suri tyicuan caa, tatu cha nyehé ndo tandihí maa cha cucuvi ihya, coto ndo vatyí cha cuyatyin quichi. Cha nyañaí yuvehe cuví chi cuan. ³⁴ Cha ndicha catyi chi ndo vatyí tandihí tuhun ihya, cucuvi cha ni ri ca cha iyó ñayivi. ³⁵ Andivi ta ñuhu ñayivi cundihí chí, soco tuhun cahán yuhu, ma ndihí chí. Ta cuchino cava tandihí tuhun cahin chihin ndo ihya.

³⁶ 'Soco quivi ta cuhva cha cucuvi cuan, yori chitó, ni ángel andivi ta ña chitó ra. Ni yuhu Rayi cha quichi nya

gloria ta ña chité. Noo tuhun ri maa Nyoo Suti chitó ra.

³⁷ Tari cuví quiví chiyó ra Noé, tyicuan caa cucuvi quiví quichi tucu yuhu Rayíi cha quichi nya gloria. ³⁸ Quiví ta ni cumañi ca coon savi xaan, ñáyiví cuan, chachí ñu, ta chihí ñu, tandahá ñu, ta chahá ñu chi sehe ñu tandaha nyacua nya quiví quihví ra Noé chichi barcu cuan. ³⁹ Ta sana iñi ñu ta chaḡ savi ta tyañi tandihí ñu. Ta tyicuan caa cucuvi tucu quiví quichi tucu yuhu Rayíi cha quichi nya gloria. ⁴⁰ Quiví cuan, tu uvi ra ñohó ra nu chiquí. Noo ra cunaquehin, ta noo ra ndoo ra. ⁴¹ Tu uvi ñusihí nyicó ñu molinu. Noo ña cunaquehin, ta noo ña ndoo ña. ⁴² Cuatu tuhva vaha ndo vatyi ña chitó ndo ñáá cuhva cuquichi ra nyacá ñaha chi ndo. ⁴³ Soco coḡo ndo tuhun ihya vatyi tatu noo chitoho vehe ta chitó ra ñáá cuhva cuquihví ra suhu chichi vehe ra, cuatu tuhva vaha ra ta ma cuhva ra cha quihví ra suhu cuan. ⁴⁴ Yucuan chaha nyoho, cuatu tuhva ndo. Vatyi sana ri iñi ndo, ta cuquichi yuhu Rayíi cha quichi nya gloria.

Ñu cha nyatú tuhva na ndichi ra Cristo, ican ñu cuví musu vaha ra

(Lc. 12.41-48)

⁴⁵ Noo musu cha tyasohó tuhun cahán chitoho, ta tyicuan ri sacuví ra tyiño tyaaḡ ra chi ra, yucuan cuví noo musu vaha. Ta sahá cuenda ra vehe chitoho ra. Ta chahá ra cha cachi inga

musu cha vahri cuhva. ⁴⁶ Ta sii xaan cuví chi musu cuan tatu cuhva cha sahá tyiño ra ta nachaa chitoho ra. Vatyi quichahá ra tandihí cha tahán chi sacuvi ra. ⁴⁷ Ta cha ndicha catyí chi ndo, vatyi chitoho ra cunatyaa ra tandihí cha cumí ra ndaha ra, vatyi vaha quichahá ra chihin tyiño sahá ra. ⁴⁸ Soco tatu noo musu quiñi iyó ta chicá xiñi ra vatyi naha cuahan chitoho ra, ⁴⁹ ta quichaha nyacuvi ra cha ña vaha chihin inga musu cuan, ta quichaha chachi ra ta chihí ra ndixi chihin ra chiñi, ⁵⁰ tyicuan ta sana iñi ra ta ndichi chitoho ra quiví cha ña nyatú ra chi ra. ⁵¹ Tyicuan ta chitoho ra ñihi xaan cutachi tuñi ra chi ra chihin ñáyiví quiñi iyó cha savaha chii soco ña ndicha. Tyicuan ta cucuacu ra ta cusacahñi ra noho ra.

25

Nu chahá ra Jesús noo cuhva cuenda uchi tahan ñu tyivaa

¹ 'Cha nyacá ñaha Nyoo aña ñáyiví cuví chi tari uchi tahan ñu tyivaa cha quehen ñu lámpara cha yihí acetye ta cuahan coyo ñu noo vico tandaha cua quehen cuenda ñu chi ra cha cua tandaha. ² Ohon tahan ñu, tondo xaan ñohó iñi ñu, ta ohon tahan ñu cachi xaan ñohó iñi ñu. ³ Ñu cha tondo ñohó iñi cuan, canyisó ñu lámpara ñu soco ña quehen ñu suhva ca acetye vatyi natyihi ñu chichi lámpara ñu

tatu ndihi. ⁴ Soco ñu cachi ñohó iñi cuan, canyisó sñn ñu yutyi acetye chihin lámpara ñu. ⁵ Ta vatyí cucuee ca chaa ra cha cua tandaha cuan, catiñ ñumahna chi tandihi ñu, ta caquixí ñu. ⁶ Tyicuan ta ñáá cuhva ñuu, ta chiñi ñu noo ndusu cha catyí tyehe caa: “¡Cha vachi ra cha cua tandaha! ¡Quita ndo, quehen cuenda ndo chi ra!” catyí ndusu cuan. ⁷ Tandihi ñu tyivaa cuan canducuita coyo ñu ta quichaha casanduvaha ñu lámpara ñu. ⁸ Tyicuan ta quichaha catyí ohon ñu tondo ñohó iñi cuan chi inga ohon ñu cuan: “Cuhva ndo suhva acetye ndo chi ndi, vatyí cuñí ndahva lámpara ndi”, catyí ñu. ⁹ Soco ñu tyivaa cha cachi ñohó iñi cuan nacahan ñu tyehe caa: “Ma cuhva ndi vatyí coto ma ñihi, ni cha cuenda maa ndi ta ni cha cuenda maa ndo. Cuahan taxi ndo nya nu quiyahví chi, ta sata ndo cha cuenda ndo.” ¹⁰ Soco cha ni ri ca cha cuahan coyo ndi ohon ñu cha tondo ñohó iñi cuan, cua sata ñu acetye, ta chaa ra cha cua tandahá cuan. Ta ñu tyivaa cha nyatú tuhva cuan, quihví coyo ñu chihin ra chichi vehe nu cuaco vico tandaha cuan. Ta nicunyasí ri yuvehe. ¹¹ Yahá cuan ta cachaa coyo tucu ñu chisata acetye cuan, ta catyí ñu: “¡Tata! ¡Tata! ¡Nuña yuvehe naquihví ndi!” ¹² Soco maa ra nacahan ra, ta catyí ra: “Cha ndicha vatyí ña ñohó nui chi nyoho.”

¹³ Tyicuan ta quichaha

catyí ra Jesús:

—Cuatu tuhva ri nyoho, vatyí ña chitó ndo nya quivi ta ñáá cuhva cuquichi yuhu Rayí cha quichi Nya gloria.

*Noo cuhva cuenda xuhun
(Lc. 19.11-27)*

¹⁴ 'Cha nyacá ñaha Nyoo añima ñáyíví cuví chi tari noo ra cha cha nyaá cha cua quita cuhun inga ñuu. Ta cana ra chi musu ra, ta chaha cuenda ra xuhun chi ra.

¹⁵ 'Chi noo ra chaha ra ta cha ohon mil xuhun, ta chi inga ra chaha ra ta cha uvi mil, ta chi inga ra tari noo mil. Chaha ra chi noo noo ra yoso cuhva cha cuví saha tyiño ra chihin. Tyicuan ta cuahan ra.

¹⁶ Musu cha quehen cuenda ohon mil xuhun cuan, saha ra lucha chihin xuhun cuan, ta saha ganaa ra nonga ohon ca mil chihin xuhun cuan.

¹⁷ Ta suri tyicuan caa tucu ra cha quehen cuenda uvi mil cuan, saha ganaa ra uvi ca mil chihin xuhun cuan.

¹⁸ Soco ra cha quehen cuenda noo ri mil cuan, chahan ra ta chatya ra noo yavi chichi ñuhú ta tixehe ra xuhun chitoho ra.

¹⁹ 'Cuaha quivi yaha ta nachaa chitoho musu cuan. Ta quichaha natava ra cuenda chihin noo noo ra.

²⁰ Xihna ca ra cha quehen cuenda ohon mil xuhun cuan chaa, ta nacuhva cuenda ra ohon ca mil siqui cuan, ta catyí ra: “Tata, ohon mil chahun chii, ma inga ohon mil ihya cha saha ganai.”

²¹ Ta chitoho ra catyí ra chi ra: “Vaha. Noo musu vaha

xaan cuvún. Ta sacuvún tandihí cha catyí. Ta vasi chiin ri xuhun chahí chuun soco vaha xaan chotyíñon chi chi. Vityin cuaha ca cucuhva cuende chuun. Quihvi nu vaha ihya, ta cusí cuñun chihin.”²² Yaha cuan ta chaq tucu musu cha quehen cuenda uvi mil xuhun cuan, ta catyí ra: “Tata, uvi mil chahun chii, ma uvi ca mil ihya cha saha ganai siqui.”²³ Ta catyí chitoho ra chi ra: “Vaha. Noo musu vaha xaan cuvún, ta sacuvún cha catyí. Vasi chiin ri xuhun chahí chuun soco vaha xaan chotyíñon chi chi. Vityin cuaha ca cucuhva cuende chuun. Quihvi nu vaha ihya, ta cusí cuñun chihin”, catyí ra.²⁴ Soco cuhva cha chaq musu cha quehen cuenda noo mil ri xuhun cuan, catyí ra chi chitoho ra: “Tata, yuhu chité vatyí cuvún noo ra xaan ta cuñun naquehún xuhun noo nu ña sahá tyiñon, ta cuñun naquehun cosecha noo nu ña tachun.”²⁵ Yucuan chaha nayuhvi ta chahin ta tyihí xehi xuhun chichi ñuhú. Soco ma xuhun ihya cha chahun chii”, catyí ra.²⁶ Tyicuan ta nacahan chitoho ra, ta catyí ra chi ra: “Musu quiñi iyó ta musu suchan cuví yoho. Tatu chitón vatyí cuñí naquehín nu ña saha tyiñe, ta quehín cosecha noo nu ña tachí,²⁷ ¿ñáá tuhun ña chityihun xuhin banco? Ta cha ndichi ta, cunaquehin xuhun cuan chihin xuhun siqui cha saha ganaa chi”, catyí ra.

²⁸ Tyicuan ta quichaha catyí ra chi ñu nyicú cuan: “Tinyaa ndo noo mil xuhun cha nyisó ra, ta cuhva ndo chi ra cha nyisó uchi mil.”²⁹ Vatyí ñu iyó chii, cuhva que chi ñu, ta coo cuaha chi ñu, nyacua ndoo ca. Soco ñu ñahri chii, nyacua nya cha chiin cha cumí ñu, cutinyaa ndihí chi ñu.³⁰ Ta musu cha ña chiñuhú ihya, tuchi ndo chi ra nu ñaa ñni ityi chata, ta yucuan cuacu cha ra, ta cusacahñi ra noho ra chihin cha nyehe ra tindoho.”

Nu catyí ra Jesús vatyí cucutuñi chi tandihí ñáyivi

³¹ Quivi cuquichi yuhu Rayí cha quichí nya gloria, cuquichi chihin cuaha ángel cuende, ta cucunyai tyayu tyaqui ta cunyaca ñahi.³² Ñáyivi tandihí ri ñuu cundu in ri ñu nui. Ta cusasiin chi noo noo ñu, tari ra sahá cumi mbee tavá siin ra chi mbee ta tava siin ra ndixihyu.³³ Ta cucuatyai chi mbee cuan chiyo vahi, ta chi ndixihyu cuan, chiyo satyin.³⁴ Tyicuan ta yuhu cha cuví Rey cucatyí chi ñu nyicú chiyo vahi: “Ñaha nyoho vatyí nyoho ñáyivi cha nasocó Suti cuví ndo. Quehen cuenda ndo nu cucunyata ndo nu nyacá ñaha Nyoo, vatyí cha cuenda maa ndo chinó ihya nyata quivi savaha Nyoo ñuhu ñayivi.”³⁵ Vatyí quivi chisoque, ta nyoho chaha ndo cha cachi. Quivi cu ityi ndutya ta chaha ndo cohi. Ta quivi chicá noi tari ra inga ñuu ta nyoho chaha ndo vehe coi.³⁶ Quivi

cumañi sahme, ta nyoho chaha ndo sahme. Quivi cuhvi ta nyoho chahan ndo chinyehē ndo chii. Ta quivi ñohi vehe caa, ta quichi nyehe ndo nu ñohi.”³⁷ Ta ñu cha vaha cuan cundaca tuhun ñu chii, ta catyi ñu: “Sutu Mañi yuhu, ¿ama nyehe ndi chisocon, ta chaha ndi cha cachun? ¿Ama nyehe ndi ityun ndutya ta chaha ndi cohun?”³⁸ ¿Ama nyehe ndi chuun chicá noun tari ra inga ñuu ta chaha ndi vehe coun? ¿Ama cumañi sahmon, ta chaha ndi chuun?”³⁹ ¿Ama nyehe ndi cuhvún, o ñohún vehe caa, ta chahan ndi chinyehē ndi chuun?” cucatyí ñu.⁴⁰ Ta yuhu cha cuví Rey cucatyí chi ñu: “Cha ndicha catyí chi ndo, vatyí tandihí tumañi iñi sacuvi ndo chihin ra ndahvi, ra yañi ihya, chi yuhu sacuvi ndo tumañi iñi cuan.” Tyicuan caa cucatyí yuhu chi ñu.⁴¹ Tyicuan ta yuhu cha cuví Rey cucatyí tiqui chi ñu nyicú chiyo satyin tyehe caa: “Canyaha ndo nui, nyoho ñu tahán chi cuhún anyaya. Cuahan ndo nu ñuhú cha ma ndahva ca maa. Vatyí yucuan cuví nu chinq cha cuenda cuihna ta cha cuenda tatyí ña vaha cuenda ra.”⁴² Vatyí chisoque, ta nyoho ña chaha ndo cha cachi. Cu ityi ndutya, ta ña chaha ndo ndutya cohi.⁴³ Chicá noi tari chicá noo ra inga ñuu, ta ña chaha ndo nu coi. Cumañi sahme ta ña chaha ndo sahma cuihne. Cuhvi ta ñohi vehe caa, soco

ña chahan ndo chinyehē ndo chii nu ñohi”, cucatyí chi ñu.⁴⁴ Tyicuan ta cucatyí ñu chii tyehe caa: “Sutu Mañi yuhu, ¿ama nyehe ndi chisocon, o ityun ndutya, o chicán noun tari ra inga ñuu, o ñahri sahmon, o cuhvún, o ñohún vehe caa, ta ña tyinyee ndi chuun?” cucatyí ñu.⁴⁵ Ta yuhu cha cuví Rey cucatyí chi ñu tyehe caa: “Cha ndicha catyí chi ndo vatyí tandihí maa cha ña sacuvi ndo chi ñáyivi ndahvi ihya, suri ña sacuvi tucu ndo chi yuhu cuví cuan”, cucatyí yuhu chi ñu.⁴⁶ Tyicuan ta ñu cuan cuhun coyo ñu nu cayú ñuhú cha ma ndahva ca maa. Ta ñáyivi vaha cuan cuhun ñu cucoo ñu noo ñayivi cha ma naa ca maa.

26

Nu canducu ra cuhva yoso caa catin ra chi ra Jesús

(Mr. 14.1-2; Lc. 22.1-2; Jn. 11.45-53)

¹ Cuhva cha ndihí catyi ra Jesús tuhun ihya, ta quichaha catyi ra chi ra cachicá noo chihin ra tyehe caa:

² —Nyoho chitó ndo vatyí uvi ca quivi ta sanducahnu yo vico pascua. Ta yuhu Rayi cha quichi nya gloria cucuhva cuenda ñu chii vatyí tyaa ñu chii nu cruzi —catyí ra.

³ Quivi cuan ra cacuví nuu chi tata sutu, ta ra casacuahá ley vehe ñuhu, ta ra cacuví mandoñi ñu Israel, candu in ri ra nuquehe vehe tyiño ra Caifás, ra cuví nuu chi tata sutu.⁴ Yucuan casandaq ra

tyiño yoso caa ta sandavi ñaha ra chi ra Jesús ta catiïn ra chi ra ta caçahñi ra chi ra. ⁵ Soco cacatyí ra:

—Ma cahñi yo chi ra cha ni ri ca cha chichi vico, tacuhva cha ma naquiqui xaan ñáyivi —catyí ra.

Nu chosó noo ñaha sihi ndutyá vixi chahan xiñi ra Jesús

(Mr. 14.3-9; Jn. 12.1-8)

⁶ Ra Jesús ñohó ra ñuu Beta-
nia, vehe ra Simón, cha catyí
ñu Ra Tyahyu Coño chi, sivi
saca ra cuví cuan. ⁷ Ta tuhva
noo ñaha nu nyaá ra Jesús,
nyisó ña noo yutyí tyitú yihí
ndutyá vixi chahan. Ta yahvi
xaan nyaá ndutyá cuan. Ta
ra Jesús nyaá ra yuhu mesa
ta chosó ña ndutyá cuan xiñi
ra. ⁸ Cuhva cha cananyehē ra
chicá noo chihin ra cacuxaḡn
ra ta quichahḡ catyí ra:

—¿Ñáá tuhun cha sativi ña
ndutyá vixi chahan cuan?
⁹ Vaha ca tyehe ta xico ña, ta
ñihi ña cuaha xuhun chihin
ta tyinyee ña chi ñu ndahvi
chihin xuhun cuan —catyí ra.

¹⁰ Tyicuan ta chiñi ra Jesús,
ta catyí ra chi ra:

—¿Ñáá tuhun cha sayangá
ndo chi ñaha ihya? Vatyí
cha sacuvi ña chihin, noo
cha vaha cuví. ¹¹ Vatyí ñu
ndahvi tyicuan ri cunyaa
ñu chihin ndo, soco yuhu,
ñima tyicuan ri cua cunyai
chihin ndo. ¹² Chosó ña
ndutyá vixi chahan siqui
coño ñuhi, vatyí sanduvahḡ
ña cuenda cha cohin chichi
ñuhú. ¹³ Cha ndicha catyí
chi ndo, vatyí tandihí ri

nu cahan ñu tuhun Nyoo
nicahnu ñayivi, cunacatyí
tucu ñu cha sacuvi ñaha ihya,
tacuhva nicohon iñi ñáyivi
chi ña —catyí ra Jesús.

*Nu naxico tuhun ra Judas
Iscariote chi ra Jesús*

(Mr. 14.10-11; Lc. 22.3-6)

¹⁴ Tyicuan ta noo ra chicá
noo chihin ra Jesús, ra cha
nañi Judas Iscariote, chahan
ra chicahan ra chihin ra
cacuvi nuu chi tata sutu. ¹⁵ Ta
catyí ra chi ra:

—¿Yoso cuhva ndo chii tatu
cuhva cuende chi ra Jesús chi
ndo?

Tyicuan ta ra cacuvi nuu
cuan cacatyí ra vatyí oco uchi
tahan xuhun cuichin. ¹⁶ Ta
nya cuhva cuan ta quichahḡ
nducu ra Judas ñáá noo
cuhva cuvi nacuhva cuenda
ra chi ra Jesús chi ra cacuvi
nuu chi tata sutu cuan.

*Nu cuxiñi ra Jesús chihin ra
cachicá noo chihin ra*

(Mr. 14.12-25; Lc. 22.7-23;
Jn. 13.21-30; 1 Co. 11.23-26)

¹⁷ Quivi xihna ri cha
quichahḡ vico ta chachí ñu
pan cha ñahri yuchan iya yihí
chihin, ra cachicá noo chihin
ra Jesús tuhva ra chi ra ta
quichahḡ candaca tuhun ra
chi ra:

—¿Nya cuñun cha sandu-
vaha ndi cha cuxiñun cuenda
vico pascua ihya?

¹⁸ Ta catyí ra Jesús chi ra:

—Cuhan ndo chichi ñuu ta
chaḡ ndo vehe noo ra cuan.
Ta catyí ndo chi ra: “Ra
Sacuaha catyí ra vatyí cha
cuyatyin cua cúvi ra, ta vehun

cusanducahnu ndi vico pas-
cua”, catyi ndo chi ra —catyi
ra Jesús.

¹⁹ Tyicuan ta casacuvj ra
tari cuhva catyi ra Jesús chi
ra. Yahā cuan ta casandu-
vaha ra cha cacuxiñi ra cha
vico pascua cuan.

²⁰ Cuhva cha cuaa, chicun-
yaa ra Jesús nu mesa chihin
ndi uchi uvi ra chicá noo chi-
hin ra. ²¹ Ta cha ni ri ca cha
cachachí ra, catyi ra Jesús chi
ra:

—Cha ndicha catyi chi ndo
vatyi noo nyoho cucuhva
cuenda ndo chii chi ra xaan
iñi chii.

²² Ta canducuihya xaan
iñi ra, ta quichaha candaca
tuhun ñn ñn ra chi ra ta
cacatyi ra:

—Sutu Mañi yuhu, ¿atu
yuhu cuví?

²³ Ta nacahan ra Jesús ta
catyi ra:

—Ra cha chachí ñn ri coho
chihin, ican ra cuan cua na
cuhva cuenda chii. ²⁴ Yuhu
Rayñi cha quichi nya gloria,
cuahin ityi cha catyi nu tutu
tuhun Nyoo. Soco ndahvi
ra ndahvi cha cunacuhva
cuenda chii. Quitá vihi ca
cuenda chi ra, tyehe ta ña
cacu taxin ra —catyi ra Jesús.

²⁵ Tyicuan ta nacahan ra
Judas, ra cha cua cuhva
cuenda chi ra, ta catyi ra:

—Maestro, ¿atu yuhu cuví?

Ta nacahan ra Jesús, ta
catyi ra:

—Ican yoho cuvún.

²⁶ Cha ni ri ca cha cachachí
ra, ra Jesús quehen ra pan ta
nacuhva ra tyahvi nyoo chi
Nyoo, ta cha yahā tahvi sava

ra, ta chaha ra chi ra cachicá
noo chihin ra, ta catyi ra:

—Cachi ndo. Ican ihya cuví
coñe.

²⁷ Yahā cuan ta quehen
tucu ra copa, ta nacuhva
ra tyahvi nyoo chi Nyoo, ta
sayaha ra chi tandihí ra ta
catyi ra:

—Coho tandihí ndo ihya.

²⁸ Vatyí ican ihya cuví ñiñi.
Ta chihin ñiñi natyihí tahan
Nyoo tuhun chaa chihin ndo,
vatyi cucatí ñiñi cha catyi cha
vaha chi cuaha ñu, vatyi chi-
hin ñiñi coo tichahnu ñiñi cu-
atyí ñu. ²⁹ Soco catyi chi
ndo, vatyi ma coho que tahan
vinu tichaha ndivi ihya, ny-
acua nya cha cohi vinu chaa
chihin ndo nya nu nyacá ñaha
Suti andivi —catyi ra.

*Nu catyi ra Jesús vatyi cu-
catyi ra Pedro vatyi ña ñohó
nuu ra chi ra*

(Mr. 14.26-31; Lc. 22.31-
34; Jn. 13.36-38)

³⁰ Cha yahā cha cachitā ra
yaa chi Nyoo, ta cuahan coyo
ra yucu yutun Olivo cuan.

³¹ Tyicuan ta quichaha catyi
ra Jesús chi ra:

—Tandihí nyoho ta cucaca
uvi ñiñi ndo cha nyicón ndo
chii vityin cha cuaa. Vatyí
nu tutu Nyoo catyi chi tyehe
caa: “Cucahñi chi ra sahá
cumi mbee, ta mbee cuquiti
cuatyi ti”, catyi chi. ³² Soco
cha yahā nandote, xihna que
cuhin Galilea, ican saha ny-
oho.

³³ Tyicuan ta nacahan ra
Pedro ta catyi ra:

—Vasi tandihí ra ndu uvi iñi ra cha nyicón ra chuun, soco yuhu ma ndu uvi iñi.

³⁴ Tyicuan ta quichaha catyi ra Jesús chi ra:

—Cha ndicha catyi chuun vatyí suri maa cha cuaa ihya, cha ni cumañi ca cuacu loho, yoho cucatyun uñi chaha vatyí ña ñohó nuun chii —catyi ra.

³⁵ Ta ra Pedro catyi ra:

—Vasi cúvi chuhun, soco ma catyi cha ña ñohó nui chuun —catyi ra.

Ta suri tyicuan caa catyi tandihí ra chicá noo chihin ra.

Nu chicán tahvi ra Jesús chi Nyoo nu cuví Getsemaní

(Mr. 14.32-42; Lc. 22.39-46)

³⁶ Tyicuan ta chaḥ ra Jesús chihin ra cachicá noo chihin ra noo nu nañi Getsemaní, ta catyi ra chi ra:

—Cunyicu ndo ihya, cha niri ca cha cuahin yucuan, cua cacan tahvi.

³⁷ Ta quehen ra chi ra Pedro ta chi ni nduvi sehe ra Zebedeo, cuahan coyo chihin ra. Ta quichaha nducuihya cuñi ra, ta tyoño xaan cuñi ra.

³⁸ Tyicuan ta catyi ra chi ra:

—Cahnu xaan tucuihya iñi nyaá añime. Nyacua cuñi chi cahñi chi chii. Ndoḡ ndo ihya ri ta conyito ndo chihin —catyi ra.

³⁹ Tyicuan ta cuahan ra Jesús chiin ca ityi nuu ca ta chicuiñi chiti ra ta chacun ra nuu ra nu ñuhú, ta chican tahvi ra chi Nyoo ta catyi ra:

—Sutu Mañi yuhu, tu yoho ta cuñun, cuhva cha ma nyehi

tindoho ihya. Soco ma cuvi tari cuhva cha cuñi mai, soco tari cuhva cuñi maun na cuvi —catyi ra.

⁴⁰ Tyicuan ta nachaḥ ra nu nyicú ra cachicaḥ noo chihin ra, ta nyehe ra vatyí caquixí ra. Ta catyi ra chi ra Pedro tyehe caa:

—¿Atu ni minoo hora ña cuví conyito ndo chihin?

⁴¹ Conyito ndo, ta cacan tahvi ndo tacuhva cha ma cuvi chasaha cuihna chi ndo. Cha ndicha vatyí añima ndo, cuñi xaan chi nanducu chi Nyoo, soco coño ñuhu ndo vita cuñi chi —catyi ra Jesús chi ra.

⁴² Nu cu uvi chaha chahan ra, ta chican tahvi ra tyehe caa:

—Sutu Mañi yuhu, tatu ma cuvi cha ma nyehi tindoho ihya, tu tyicuan caa, na cuvi maa cuhva cuñun —catyi ra.

⁴³ Tyicuan ta nachaḥ ra inga chaha ta caquixí tucu ra cachicá noo chihin ra, vatyí nicunyasi maa chiti nuu ra chihin cha cacuñi ra cusu ra.

⁴⁴ Tyicuan ta sandoḡ ra chi ra, ta cuahan ra cha cu uñi chaha cua cacan tahvi ra. Ta catyi ra suri maa tuhun cha yaha cahan ra cha chican tahvi ra chi Nyoo.

⁴⁵ Tyicuan ta nachaḥ ra nu cunyicu ra cachicá noo chihin ra, ta catyi ra chi ra:

—Vityin ndicha, cusu ndo ta nyitatu ndo. Vatyí cha chaḥ cuhva cha cua nacuhva cuenda ra chii chi ra quiñi iyó, ta Rayiḥ cha quichi nya gloria cuví. ⁴⁶ Ndicutita ndo, ta coho ndo. Vatyí cha vachi

ra cha cunacuhya cuenda chii —catyí ra Jesús.

Nu catiñ ra xaan iñi chi ra Jesús cuahan ra vehe caa

(Mr. 14.43-50; Lc. 22.47-53; Jn. 18.2-11)

⁴⁷ Ni cahán ca ra Jesús tuhun ihya, ta chaḡ ra Judas, ta ra Judas cuví noo ra chicá noo chihin ra Jesús. Ta cuaha ra vachi coyo chihin ra, canyisó ra mityi ta yutun. Ra cuví nuu chi tata sutu, ta ra cacuví mandoñi ñu Israel, ican tachí chi ra. ⁴⁸ Ra Judas, ra cha chahá cuenda chi ra Jesús, cha yahḡ chahḡ ra noo seña chi ra cuan, tacuhva coto ra yóo chi tiñ ra. Ta catyí ra:

—Ra cha cutyayuhi chi, ican ra cuan cuví. Tiñ ndo chi ra.

⁴⁹ Tyicuan ta tuhva ra chi ra Jesús ta catyí ra:

—Nocumi chuun, Maestro. Ta tyayuhḡ ra chi ra.

⁵⁰ Tyicuan ta nacahan ra Jesús ta catyí ra chi ra:

—Amigo, sacuvi ñáá tyiño vachun.

Tyicuan ta catuhva ra ta catiñ ra chi ra Jesús.

⁵¹ Tyicuan ta noo ra ndihi chihin ra Jesús, tava ra mityi ra ta chahnya ra soho noo musu ra cuví nuu chi tata sutu cuan. ⁵² Ta catyí ra Jesús chi ra:

—Natyihi mityun chichi vena. Vatyí tandihi ñu cacañi tahan chihin mityi, suri chihin mityi cúvi ñu. ⁵³ ¿Atu ña chitón vatyí tatu yuhu ta cuñí, cuví caquen chi Suti, ta maa ra cutachi ra vityin vityin yaha ca uñi xico uchi

mil ángel, ta sacacu ra chii? ⁵⁴ Soco tatu tyicuan caa, ¿yoso caa chino cava cuhva nyaá nu tutu Nyoo? Vatyí catyí chi tyi tahán maa chi cuví chi yuhu tyehe caa —catyí ra.

⁵⁵ Ta catyí tucu ra Jesús chi ñáyivi:

—¿Atu vachi coyo nyoho vachi tiñ ndo chii chihin cha xaan ta chihin yutun? Tari cha noo ra suhu cuví yuhu sahá ndo. Ndiquivi chinyai sañahi nu nyicú ndo chichi vehe ñuhu cahnu, soco ña tiñ ndo chii cha cuhin vehe caa. ⁵⁶ Vatyí tandihi cha cuví chii vityin, ta chicunyaḡ nu tutu Nyoo, cha catyaa ra profeta Nyoo ta cha naha.

Tyicuan ta ndi ra cachicá noo chihin ra, cachino ra. Noo tuhun ca maa ra Jesús casandoḡ ra.

Nu cutuñi chi ra Jesús nuu ra cacuví tyiño cuenda ñu Israel

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ta ra cha catiñ chi ra Jesús cuan, chinyaca ra chi ra nuu ra Caifás, ra cuví nuu chi tata sutu. Suri yucuan canyicú in ri ra sacuaaha ley vehe ñuhu ta ra cacuví mandoñi. ⁵⁸ Soco ra Pedro cuahan ra chata ra, nya sava ri nya nuquehe vehe ra cuví nuu chi tata sutu cuan. Ta quihvi ra ta ndoḡ ra nyaá ra chihin policía cuan, vatyí nyehe ra yoso caa quita tuhun cuan.

⁵⁹ Ra cacuví nuu chi tata sutu, ta ra cacuví mandoñi, ta tandihi ra cuví tyiño, canducu ra noo cuatyí catyaa ra siqui ra Jesús, vasi ña

ndicha, tacuhva vatyí chihin cuatyí cuan ta cuví cahñi ra chí ra. ⁶⁰ Soco ña cañihí maa ra cuatyí ra, vasi cuaha ñáyivi chahan ñu chicatyí ñu cuendu siquí ra. Soco nu ndihí tuhun, chaḡ coyo uvi ca testigu cuendu. ⁶¹ Ta cacatyí ra:

—Ra ihya, catyí ra vatyí cuví satani ra vehe ñuhu cahnu Nyoo, ta chichi cha uñi quívi cunacananyaa ra inga chaha, na —cacatyí ra.

⁶² Tyicuan ta ra cuví nuu chí tata sutu cuan, ndicuita ra, ta catyí ra chí ra Jesús:

—¿Atu ña nacahun nu cahán ra ihya? ¿Ñáá cha cuví cha cacatyí ra ihya sicun?

⁶³ Soco ra Jesús taxi ri nanyaá ra. Tyicuan ta quichahaḡ catyí ra cuví nuu chí tata sutu cuan chí ra:

—Chihin sivi Nyoo nyitó, catyí chuun vatyí catyun cha ndicha vaha. ¿Atu ra Cristo Sehe Nyoo nyitó cuví chuun? —catyí ra.

⁶⁴ Ta catyí ra Jesús chí ra:

—Ican cuví, tari cuhva catyí maun. Ta suri catyí chí ndo, vatyí cunyehe ndo chí yuhu Rayi cha quichi nya gloria, cunyai chiyo vaha Nyoo ra iyó tandihí tunyee iñi chii, ta cunyehe ndo nu quichi tiquí nu vico ityi andívi —catyí ra.

⁶⁵ Tyicuan ta ra cuví nuu chí tata sutu cuan chahnya ra sahma ra tari noo seña tyi cuñí maa ra tyi ña vaha cha cahán ra Jesús, ta catyí ra:

—Ra ihya chicoḡ cuatyí ra nuu Nyoo chihin tuhun

cahán ra. ¡Nyēhe ndo vityin! Ña niñi cha tava yo cha ndaa. Nyoho cha chiñi ndo tuhun ña vaha cahán ra. ⁶⁶ ¿Ñáá catyí ndo vityin?

Ta canacahan ra ta cacatyí ra:

—Iyó cuatyí ra, ta cuñí chí cha cuví ra.

⁶⁷ Tyicuan ta catyicusí ra nuu ra ta cacañi ra chí ra. Inga ra cacatu ra nuu ra chihin chiqui ra. ⁶⁸ Ta cacatyí ra chí ra:

—Yoho, cha sahún Cristo chuun. ¡Nacoto yóo cha cañi chuun!

Nu catyí ra Pedro vatyí ña ñohó nuu ra chí ra Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Cha niri ca cha nyaá ca ra Pedro nuquehe ityi chata cuan, ta noo ñaha cha cuví musu tata sutu cuan, tuhva ña nu nyaá ra ta catyí ña chí ra:

—Yoho tucu chicaḡ noun chihin ra Jesús, ra Galilea cuan.

⁷⁰ Ta ra Pedro catyí ra vatyí ña ñohó nuu ra chí ra nuu tandihí ñu nyicú cuan, ta catyí ra:

—Ña chité ñáá tuhun cahún.

⁷¹ Tyicuan ta cuahan ra Pedro ityi yuvehe, ta nyehe inga ña chí ra, ta catyí ña chí ra nyicú cuan:

—Suri chicaḡ noo tucu ra ihya chihin ra Jesús, ra ñuu Nazaret cuan —catyí ña.

⁷² Ta inga chaha tucu tixehē ra Pedro cha ñohó nuu ra chí ra ta catyí ra:

—Cha ndicha vaha tyi ña ñohó nui chi ra cuan.

⁷³ Suhva ri ca cuhva cuan, ta ra canyicú cuan catuhva ra nu nyaá ra Pedro ta cacatyí ra chi ra:

—Ra tahan ra cuan cuví chi yoho, ndicha. Vatyí quetuvi nyacua nya cuhva cahún.

⁷⁴ Tyicuan ta iyo xaan tyanaha ra ta catyí ra:

—Chitó vaha Nyoo tyi ña ñohó nui chi ra cuan, ta nacañi Nyoo chii tatu ña ndicha cha cahín —catyí ra.

Ta suri cuhva cuan nacua cu chaa noo loho. ⁷⁵ Tyicuan ta nicohon iñi ra Pedro tuhun cha catyí ra Jesús chi ra: “Cha ni cumañi ca cuacu loho, yoho cha yaha catyun uñi chaha vatyí ña ñohó nuun chii.” Tyicuan ta quita ra Pedro yucuan, ta chacu vavaha ra cha cuihya iñi ra cha sacuví ra tyicuan caa.

27

Nu cachahá cuenda ra chi ra Jesús chi ra Pilato

(Mr. 15.1; Lc. 23.1-2; Jn. 18.28-32)

¹ Cuhva cha cundichin, tandihí ra cacuví nuu chi tata sutu ta ra cacuví mandoñi ñuu cuan, catyihí tahan ra tuhun vatyí cacahñi ra chi ra Jesús. ² Ta nuhñi ra. Ta chahan coyo ra chicuhva cuenda ra chi ra chi ra Poncio Pilato, ra cuví gobiernu cuenda ñuu Roma cha nyacá ñaha ñuu Israel cuan.

Nu chihí ra Judas

³ Cha nyehe ra Judas, ra cha naxico tuhun chi ra

Jesús, vatyí cuacúvi ra, ta ndu uví iñi ra cha sacuví ra, ta nacuhva ra ndi oco uchi xuhun cuichin cuan chi ra cacuví nuu chi tata sutu cuan, ta chi ra cacuví mandoñi ñuu cuan. ⁴ Ta catyí ra:

—Chicoo cuatyí yuhu, vatyí chaha cuende chi noo ra ñahri cuatyí na cúvi ra.

Soco maa ra canacahan ra ta cacatyí ra:

—Ta yucuan ¿ñáá cuenda nyuhu? ¡Nyehé maa yoho!

⁵ Tyicuan ta tuchi ra Judas xuhun cuan chichi vehe ñuhu cahnu, ta chahan ra ta chicuhñi ra yoho sucun ra ta suri maa ra chitacaá ra chi ra. Ta chihí ra.

⁶ Ra cacuví nuu chi tata sutu cuan canaquehen ra xuhun cuan ta cacatyí ra:

—Ma cuvi tyihi yo xuhun ihya chichi caja ofrenda vatyí yahvi cha chahñi ñu noo ñáyivi cuví.

⁷ Tyicuan ta catyihí tahan ra tuhun, ta chihin xuhun cuan casata ra noo ñuhú cha nañi Ñuhú Ra Savahá Quisi. Vatyí coo nu cuchí ra chi ñu inga ñuu tu chihi ñu. ⁸ Yucuan chaha nañi ñuhú cuan nyacua nya vityin Ñuhú Sata Ñu Chihin Xuhun Yahvi Cha Chihí Náyivi. ⁹ Ta tyicuan caa chingo cava cha tyaa ra Jeremías profeta Nyoo ta cha naha. Catyí chi tyehe caa: “Quehen ra ndi oco uchi xuhun cuichin, yahvi cha tyaa ñu Israel chi ra. ¹⁰ Ta chihin cuan, casata ra Ñuhú Ra Savahá Quisi, tari cuhva catyí Sutú Mañi yo chii”, catyí chi.

Nu nyehe ra Pilato vatyí ñahri maa cuatyí ra Jesús

(Mr. 15.2-5; Lc. 23.3-5; Jn. 18.33-38)

¹¹ Cachinyaca ra chi ra Jesús nuu gobiernu, ta ra cuan ndaca tuhun ra chi ra, ta catyí ra:

—¿Atu ican yoho cuví rey cuenda ñu Israel?

Ta ra Jesús catyí ra chi ra:

—Ican, yuhu cuví. Ndicha cha cahún.

¹² Ta cuhva cha catyaa ra cacuví nuu chi tata sutu cuan ta mandoñi cuatyí siqui ra, ra Jesús ña nacahan maa ra.

¹³ Tyicuan ta quichaha catyí ra Pilato chi ra:

—¿Atu ña chiñún tandihi cha cacahán ra sicun?

¹⁴ Soco ra Jesús ña nacahan ra. Ta nyacua iyo cuñi gobiernu cuan vatyí ña nacahan ra. Ta ña chitó ra ñáá cunyacuvi ra.

Nu cutuñi chi ra Jesús ta cacatyí ñu vatyí cucúvi ra

(Mr. 15.6-20; Lc. 23.13-25; Jn. 18.38—19.16)

¹⁵ Soco cha vico pascua cuan, iyó noo tuhun chi ñu vatyí tuhva ra gobiernu saña ra noo ra ñohó vehe caa, nya ra cachi maa ñáyivi. ¹⁶ Ta quivi cuan ñohó noo ra cha nañi Barrabás vehe caa. Ta chitó tandihi ñáyivi tuhun ra.

¹⁷ Ta cuhva cha canyicú ñn ri ñu, ra Pilato ndaca tuhun ra chi ñu, ta catyí ra:

—¿Yóó chí cuñi nyoho cha sañe? ¿Atu chi ra Barrabás o chi ra Jesús, ra nañi Cristo? —catyí ra.

¹⁸ Vatyí chitó ra vatyí cha cuenda cha tasi cuñi nyehe

ñu chi ra Jesús, yucuan cuenda chaha cuenda ñu chi ra.

¹⁹ Cha ni ri ca cha nyaá ra Pilato nu tyayu ra, nu cuví ra tyiño, tachi ñasihí ra noo tyiño chi ra ta catyí ña: “Ma tyihun chuun chihin ra vaha chiña. Vatyí cuñi tahin noo ñumahna cha cuenda ra. Ta quiñi xaan tahin chihin”, catyí ña.

²⁰ Soco ra cacuví nuu chi sutu ta mandoñi ñuu cuan, cacuñihi ra catyiyuhu ra chí ñáyivi na cacan ñu cha saña ra Pilato chi ra Barrabás, ta na cúvi ra Jesús. ²¹ Ta gobiernu cuan cahan ra chihin ñu inga chaha, ta catyí ra:

—Chichi cha ninduvi ra, ¿nya ra cuñi ndo cha sañe?

Ta maa ñu nacahan ñu, ta catyí ñu:

—Chi ra Barrabás.

²² Ta ra Pilato ndaca tuhun ra chi ñu, ta catyí ra:

—¿Ta ñáá cha cusacuvi chihin ra Jesús cha nañi Cristo ihya?

Tandihí ñu nacahan ñu ta catyí ñu:

—¡Na cúvi ra nu cruzi!

²³ Tyicuan ta quichaha catyí ra Pilato chi ñu:

—Soco ¿ñáá cha ña vaha sacuvi ra?

Soco maa ñu nacana chaa tucu ñu inga chaha ta catyí ñu:

—¡Cahñi chi ra nu cruzi!

²⁴ Cuhva cha nyehe ra Pilato vatyí ñahri maa cha cuví sacuvi ra, vatyí quiñi xaan cacuví ñu, chican ra ndutya, ta nacatya ra ndaha ra chihin nuu ñáyivi cuan, ta catyí ra:

—Yuhu ñahri cuatyí cha cua cúvi ra ñahri cuatyí ihya. Na ndoo siqui maa ndo.

²⁵ Ta tandihí ñáyivi canacahan ñu, ta catyí ñu:

—Na ndoo chi siqui maa ndi ta siqui sehe ndi.

²⁶ Tyicuan ta ra Pilato saña ra chi ra Barrabás, ta tachí ra na ndoho ra Jesús, ta nacuhva cuenda ra chi ra na cúvi ra nu cruzi.

²⁷ Tyicuan ta sindaro cuenda gobiernu cuan chinyaca ra chi ra Jesús nya vehe tyiño, ta casandu iin ri ra chi tandihí sindaro cuan nicachico. ²⁸ Tyicuan ta catava ra sahma ra ta casacuihno ra noo sahma cuaha chi ra. ²⁹ Ta catyihí ra noo corona cha chinq chihin iñu xiñi ra. Ta chaha ra noo yutun na quindaha ra chihin chiyo vaha ra. Tyicuan ta cachicuiñi chiti ra nuu ra, ta cachacu nyaa ra chi ra ta catyí ra:

—¡Nocumi chuun, yoho Rey cuenda ñu Israel!

³⁰ Ta catyicu si ra chi ra ñandihí. Ta quehen ra yutun cuan ta cañi ra xiñi ra. ³¹ Cha yaha cha cachacu nyaa ra chi ra ta catava ra sahma cuaha cuan chi ra ta sandihvi noo tucu ra sahma maa ra chi ra. Tyicuan ta quehen ra chi ra cua cahñi ra chi ra nu cruzi.

Nu catyaa ra chi ra Jesús nu cruzi

(Mr. 15.21-32; Lc. 23.26-43; Jn. 19.17-27)

³² Cuhva cha caquita coyo ra yucuan, catahan ra chi noo ra ñuu Cirene, nañi ra Simón.

Ta casaniñi ra chi ra na cuiso ra cruzi ra Jesús.

³³ Ta cachaa coyo ra noo nu nañi Gólgota, ta cuñi chi catyí Nu Cuví Yiqui Xiñi Ndiyi. ³⁴ Ta yucuan cachaha ra vinu nasaca chihin cava uva coho ra Jesús. Soco cha yaha cha chihí ra chiin, ña cuñi ca ra coho. ³⁵ Ta cha yaha cha catyaa ra chi ra nu cruzi, tyicuan ta sindaro cuan caquehen ra sahma ra ta chahan ra noo sihva chihin. Ta nya ra saha ganaa, ñihí ra sahma cuan. Ta tyicuan caa chinq cava tuhun cha tyaa noo profeta Nyoo ta cha naha nu catyí chi tyehe caa: “Casacha ra sahme chihin cha chahan ra sihva”, catyí chi. ³⁶ Tyicuan ta cachicunycu ra yucuan vatyí saha cuenda ra chi ra. ³⁷ Ta ityi xiñi ra catyaa ra noo letra cha catyí ñáá tuhun cua cahñi ra chi ra. Ta catyí chi tyehe caa: “Ican ra ihya cuví ra Jesús, rey cuenda ñu ñuu Israel.”

³⁸ Tacoyó tucu uvi ra suhu chihin ra nu uvi ca cruzi cuan. Noo ra chiyo vaha ra, ta inga ra chiyo satyin ra. ³⁹ Ta ñu yahá coyo cuan, cacahan ñu chi ra, ta quisi xiñi ñu, ⁴⁰ ta catyí ñu chi ra:

—¡Yoho cha catyun tyi cusanduvon vehe ñuhu cahnu, ta chichi cha uñi quivi ta nacananyaa tucun! ¡Sacacu chuun vityin! ¡Tatu Sehe Nyoo cuví chuun, noo nu cruzi chiña! —catyí ñu chi ra.

⁴¹ Ta suri tyicuan caa cachacu nyaa tucu ra cacuví

nuu chi tata sutu chi ra, ta ra sacuahá ley vehe ñuhu, ta mandoñi ñuu ñandihí. Ta cacatyí ra chi tahan ra tyehe caa:

⁴²—Sacacu ra chi inga ñu, soco ña cuví sacacu ra chi maa ra. Tatu Rey cuenda ñu Israel cuví ra, na noo ra nu cruzi cuan, tacuhva chino iñi yo chi ra. ⁴³ Itá iñi ra chi Nyoo, vityin na sacacu Nyoo chi ra, tatu ndicha cuñí ra chi ra. Vatyí catyí ra chi yo vatyí Sehe Nyoo cuví chi ra.

⁴⁴ Ta nyacua nya ra suhu cha tacaá nu cruzi xiin ra ta cacahan ra chi ra ñandihí.

Nu chihí ra Jesús

(Mr. 15.33-41; Lc. 23.44-49; Jn. 19.28-30)

⁴⁵ Tyicuan ta tandihí siqui ñuhu ñayiví nduñaa iñi, nyacua nya ora ta nyacua nya ca uñi cha cha iñi. ⁴⁶ Ta suri cuhva cuan, cana chaa ra Jesús chihin cha chaa ndusu ra. Ta catyí ra tyehe caa:

—Elí, Elí, ¿lama sabactani? —ta cuñí chi catyí: Nyoo Suti, Nyoo Suti, ¿ñáá tuhun cha sandoó ñihnon noo tuhun mai?

⁴⁷ Suhva ra canyicú cuan, cachiñi ra cha cahan ra, ta cacatyí ra:

—Chi ra Elías, ra profeta Nyoo ta cha naha, ican cana chaa ra.

⁴⁸ Ta caa cuhva ri cuan, cuahan vavaha noo ra cua quehen ra noo xixan, ta satyí ra chihin vinu iya, ta tyaa ra noo nu yutun, ta satuhva ra yuhu ra Jesús tacuhva na coho ra. ⁴⁹ Soco inga ra cacatyí ra:

—Saña chi ra. Na nyehe yo tatu quichi sacacu ra Elías chi ra.

⁵⁰ Inga tucu chaha cana chaa ñihi ra Jesús, tyicuan ta chihí ra. ⁵¹ Ta caa cuhva ri cuan ndata sava sahma cha tacaá chichi vehe ñuhu cahnu cuan, nyacua nya siqui ta nyacua nya yuvi ndata. Ta taan. Ta ndata yuu. ⁵² Ta nuña yuhu ñaña. Ta nyacua canandoto cuaha ñu chinó iñi chi Nyoo, ñu cachihí. ⁵³ Ta cha yahá nandoto ra Jesús caquita coyo ñu nu ñaña ta quihvi coyo ñu chichi ñuu Jerusalén, ta cuaha ñayivi nyehe chi ñu. ⁵⁴ Tyicuan ta capitán ta sindaro cha casahá cumi chi ra Jesús, cayuhvi xaan ra cuhva cha taan. Ta cha canyehé ra inga ca cha cuví, ta cacatyí ra:

—Ndicha ndicha cuii, vatyí Sehe Nyoo cuví chi ra ihya.

⁵⁵ Cuaha ñusihi cha chinyicon chi ra Jesús nya Galilea ta tyinyee ñu chi ra, nyicú ñu canyehé ñu nya sava ri yucuan. ⁵⁶ Ta ican suhva ñu ihya cuví cu María ñaha Magdala, ta cu María sihi ra Jacobo ta ra José, ta sihi sehe ra Zebedeo.

Nu cua cuchi ra chi ra Jesús

(Mr. 15.42-47; Lc. 23.50-56; Jn. 19.38-42)

⁵⁷ Cuhva cha cua cuaa, quichi noo ra tyayí cha nañi José. Ra ñuu Arimatea. Ta suri chinó iñi ra chi ra Jesús. ⁵⁸ Ta cahan ra chinyehé ra nu nyaá ra Pilato, ta chican ra coño ñuhu ra Jesús. Tyicuan ta tyihí ra Pilato tyiño na cuhva ra coño ñuhu ra chi

ra. ⁵⁹ Tyicuan ta quehen ra José coño ñuhu ra, tyihí ra chichi noo sinduhu ndí. ⁶⁰ Ta tyihí ra chi ra chichi noo ñaña nicaa chaa cha cuví noo yavi yuu cha tyihí ra tyiño cachatya ra. Ta cha yaha cha nacasi ra yuhu ñaña cuan chihin noo yuu cahnu, ta cuahan ra. ⁶¹ Soco cu María ñaha Magdala, ta inga cu María, ndoo ñu nyicú ñu yuhu ñaña cuan.

Nu casahá cumi sindaro ñaña ra Jesús

⁶² Ta cha inga quivi, quivi nyitatu ñu cuví, ta ra cacuví nuu chi tata sutu, ta ra fariseo chahan coyo ra chinyehé ra nu nyaá ra Pilato. ⁶³ Ta catyí ra chi ra:

—Tata, nicohón iñi ndi vatyí ra cuendu cuan, catyí ra ta nyitó ca ra vatyí cha yaha cha uñi quivi cunandoto ra. ⁶⁴ Yucuan chaha tyihí tyiño na casaha cumi vaha ra ñaña cuan, nya yaha cha uñi quivi, coto quichi coyo ra cachica noo chihin ra cha cha cuaa, ta casuhu ra coño ñuhu ra. Yaha cuan ta cucatyí ra chi ñayivi vatyí cha nandoto ra. Ta cha tyicuan caa nu ndihi tuhun ihya, yaha ca cuhva cucuvi —catyí ra.

⁶⁵ Ta ra Pilato catyí ra chi ra:

—Ma suhva sindaro chiña. Cuahan ndo, ta saha cumi vaha ndo ñaña cuan, yoso cuhva cha vaha cuví saha cumi ndo —catyí ra.

⁶⁶ Tyicuan ta cuahan coyo ra, ta casaha cumi vaha ra ñaña cuan, ta catyaa ra noo sellu chata yuu cha chasí

cuan. Ta casandoo ra chi sindaro sahá cumi yucuan.

28

Nu nandoto ra Jesús

(Mr. 16.1-8; Lc. 24.1-12; Jn.

20.1-10)

¹ Cha yaha quivi cha nyitatu ñu, cuhva cha vachi cundichin, nu quichaha vitya cuví. Ta cu María ñaha Magdala cuan, ta inga cu María chahan coyo ñu nu ñaña. ² Ta quichi minoo cha taan vatyí quichi ángel Sutu Mañi yo noo ra nya ityi andivi, ta chaa ra nu ñaña cuan. Ta sacanyaha ra yuu cha nyasi yuhu cuan, ta chicunyaa ra siquí. ³ Ta xiño vavaha ra, tari cha quihvi tacha. Ta sahma ra cuichin vavaha. ⁴ Cuhva cha cananyehé sindaro cuan chi ra, canayuhvi vavaha ra nyacua nihí ra, ta nyacua coña ra chihin cha yuhvi ra. ⁵ Tyicuan ta quichaha catyí ángel cuan chi ñusihi cuan:

—Ma yuhvi ndo. Yuhu chité vatyí chi ra Jesús cha chihí nu cruzi nanducú ndo. ⁶ Yori ca ra ñohó ihya, vatyí cha nandoto ra, tari catyí ra. Ñaha ndo ta nyehe ndo nu catuvi ra. ⁷ Ta cuhun ndo numi ri, ta catyí ndo chi ra cachica noo chihin ra vatyí cha nandoto ra, ta cha cuahan ra Galilea, nyatú ra chi ra yucuan. Ican ihya cuví cha nyaa catyí chi ndo —catyí ángel cuan chi ñu.

⁸ Tyicuan ta numi ri quita coyo ñu nu ñaña cuan. Suhva ri yuhvi ñu, ta suhva ri sii vavaha cuñí ñu. Ta chingo

vavaha ñu cua catyi ñu chi ra cachicā noo chihin ra Jesús.
 9 Ta cuhva cuan tuvi ra Jesús nuu ñu ta chaha ra nocumi chi ñu. Tyicuan ta catuhva ñu chi ra ta chicuiñi chiti ñu nuu ra ta casacahnu ñu chi ra, ta suri numi ñu chaha ra. 10 Ta catyí ra chi ñu:

—Ma yuhvi ndo. Cuahan ndo cua sacoto ndo chi yañi vatyí na cuhun coyo ra Galilea, ta nyicuan cuñihi tahan ndi —catyí ra chi ñu.

Tuhun cha canacatyí sindaro

11 Cha ni ri ca cha cuahan coyo ñu cuan, suhva sindaro cha casaha cumi yucuan, cuahan coyo ra nya ñuu, cua nacatyí ra cha cuvi cuan chi ra cacuvi nuu chi sutu. 12 Tyicuan ta ra cacuvi nuu cuan chahan coyo ra chichahan ra chihin ra mandoñi ñuu vatyí catyíhi tahan ra tuhun yoso caa casacuvi ra. Tyicuan ta cuaha xuhun cachaha ra chi sindaro cuan. 13 Ta cacatyí ra chi ra:

—Nyoho, catyí ndo vatyí cha cha cuaa cha ni ri ca cha quixí ndo, chahan coyo ra cachicā noo chihin ra Jesús ta chिकासuhu ra coño ñuhu ra. 14 Ta tatu chito gobiernu tuhun ihya, cua nyehe maa ndi yoso caa catyí ndi chi ra, ta nyoho ma caca iñi ndo. Ñahri cucuvi chi ndo.

15 Tyicuan ta caquehen sindaro cuan xuhun, ta cuahan coyo ra cua casacuvi ra cha cacatyí ra chi ra. Ta nya vityin ta tyicuan caa catyí ñayivi ñuu Israel.

Nu tyaqra Jesús tyiño chi ra cachicá tyiño ra

(Mr. 16.14-18; Lc. 24.36-49; Jn. 20.19-23)

16 Ta tyicuan caa, ndi uchi ñin ra cachicā noo chihin ra, cuahan coyo ra nya Galilea nya yucu nu catyí maa ra Jesús chi ra vatyí cuhun coyo ra. 17 Ta cuhva cha cananyehe ra chi ra Jesús, casacahnu ra chi ra soco suhva ra chica uvi iñi ra. 18 Tyicuan ta tuhva ra Jesús chi ra ta catyí ra chi ra:

—Nyoo chaha ra cha cunyaca ñaha yuhu tandihi andivi ta siqui ñuhu ñayivi. 19 Yucuan chaha, cuahan ndo tandihi nu nyicú ñayivi, tandihi ri ñuu, ta catyí ndo chi ñu na nanyicon ñu chii. Ta sacondutya ndo chi ñu chihin sivi Sutu yo Nyoo ta chihin sivi yuhu Sehe Nyoo, ta chihin sivi Tatyí Ii Nyoo. 20 Ta sañaha ndo chi ñu na naquichaha ñu tandihi cha catyí yuhu tyi sacuvi ñu. Ta çoto ndo vatyí yuhu cunyai chihin ndo tandihi quivi nyacua nya naa ñayivi —catyí ra Jesucristo chi ra cachicá tyiño ra.

Tuhun Nyoo Cha Tyaa San Marcos

Nu sacondutyá ra Juan chi ñáyivi ta cahán ra tuhun Nyoo chihin ñu

(Mt. 3.1-12; Lc. 3.1-9, 15-17; Jn. 1.19-28)

¹ Tyehe caa quichaha tuhun vaha ra Jesuscristo Sehe Nyoo. ² Ra Isaías profeta Nyoo tyaa ra tuhun ra Cristo ta tuhun ra Juan. Tyehe caa catyí Nyoo chi ra Cristo:

Cumañi ca cuhun siqui ñuhu ñáyivi ta cutachi chi noo ra cusacoto chi ñáyivi vatyí nyaá cuhun nu nyicú ñu, catyí Nyoo chi ra Cristo.

³ Chiñi yo ndusu noo ra cha canachaá nu chiqui ndi,

ta catyí ra: “Tari sanduvahá ndo noo ityi, tyicuan caa sanduvaha ndo añima ndo vatyí cua quichi Sutu Mañi yo.

Nuña ndo noo ityi ndoo chi ra na quihvi ra añima ndo.”

Tyicuan caa tyaa ra profeta Isaías nu tutu Nyoo ta cha naha.

⁴ Ta tyicuan caa quichi ra Juan sacondutyá ra chi ñáyivi nu chiqui ndi cuan. Ta catyí ra chi ñu na ndu uvi iñi ñu cuatyí ñu, ta na condutyá ñu tari noo seña tyi nasama ñu cuhva iyó ñu, ta tyicuan caa ta Nyoo cusaha ra ticahnu iñi cuatyí ñu. ⁵ Ta tandihi ñáyivi

ityi Judea quichi coyo ñu tya-soho ñu tuhun cahán ra, ta ñu ñuu Jerusalén ñandihí. Ta cha yahá nahma ñu cuatyí ñu, sacondutyá ra Juan chi ñu yuvi cahnu Jordán.

⁶ Ta sahma cha ñihno ra Juan cuan chihin ixi camellu chingo chi. Ta ñií cuví sinchu ra. Ta pinchi tuhvá ra chachí. Ta tyañuñu cuhu tuhvá ra chihí. ⁷ Ta cahán ra tuhun Nyoo ta catyí ra:

—Cha yaha yuhu ta vachi noo ra iyó xaan ca tunyee iñi chi ican saha yuhu. Ta ña nañé ni cha ndachi ñií xityin ndichan ra. ⁸ Yuhu sacondutyé chi ndo chihin ndutyá. Soco maa ra cusacondutyá ra chi ndo chihin Tatyí Ii Nyoo —catyí ra Juan.

Nu condutyá ra Jesús

(Mt. 3.13-17; Lc. 3.21-22)

⁹ Quivi cuan quita ra Jesús ñuu Nazaret, cha nyaá ityi Galilea, ta cuahan ra nya yuvi cahnu Jordán. Ta yucuan sacondutyá ra Juan chi ra. ¹⁰ Ta cha yahá condutyá ra Jesús, ta cuhva cha cua quita ra chichi ndutyá, ta nanyehe ra andivi cuahan nuña. Ta nyehe ra Tatyí Ii Nyoo tari noo paloma, vachi noó siqui ra. ¹¹ Ta tyacú noo ndusu ityi andivi ta catyí ndusu cuan tyehe caa:

—Yoho cuvún Sehi ta cuñi xain chuun. Ta sií xaan cuñi chuhun —catyí ndusu cuan.

Nu nducú nyehe ra ña vaha chi ra Jesús

(Mt. 4.1-11; Lc. 4.1-13)

¹² Yahá cuan ta sacuhun Tatyí Ii Nyoo chi ra Jesús

noo nu chiqui ndii. ¹³ Ta yucuan chinyaꝯ ra uvi xico quivi nu chiqui ndii cuan, nu yori ñáyivi iyó, maa ri quití iyó. Ta nducú nyehe cuihna chi ra. Ta yahá cuan ta chaꝯ coyo ángel ta catyiñuhú ra chí ra.

Nu quichahá saha tyiño ra Jesús ityi Galilea

(Mt. 4.12-17; Lc. 4.14-15)

¹⁴ Cha yahá catyihí ñu chi ra Juan vehe caa, ta ra Jesús cuanuhu ra Galilea ta cahán ra tuhun vaha Nyoo chihin ñáyivi. ¹⁵ Ta catyí ra:

—Cha chaꝯ cuhva cha cua cunyaca ñaha Nyoo añima ndo. Yatyin ri nyaá ra chihin ndo. Ndu uvi iñi ndo cuatyí ndo, ta chino iñi ndo tuhun Nyoo cha sacacu añima ndo —catyí ra Jesús.

Nu caná ra Jesús chi cumi tahan ra catín tiyaca

(Mt. 4.18-22; Lc. 5.1-11)

¹⁶ Chicá noo ra Jesús yuhu miñi cha nañí Tyañuhu Galilea. Ta nanyehe ra chi ra Simón ta chi yañi ra, ra Andrés, cacañí ra yuhva ra nu ndutya, vatyí ra catín tiyaca cacuví ra. ¹⁷ Ta catyí ra Jesús chi ra:

—Cunyicon ndo chii, ta yuhu cusacuvi vatyí tari ñihí ndo tiyaca, tyicuan caa cuñihi ndo añima ñáyivi, tava ndo chi ñu nu quiñi caa, na quihvi ñu cuenda Nyoo —catyí ra Jesús chi ra Simón ta chi ra Andrés cuan.

¹⁸ Caa cuhva ri cuan casandoꝯ ra yuhva ra, ta cuahan coyo ra chihin ra.

¹⁹ Yahá cuan ta chiin ri ca chica ra Jesús, ta nanyehe ra chi ra Jacobo, sehe ra Zebedeo, ta chi yañi ra, ra Juan. Cañohó ra chichi noo canoa canaquicú ra yuhva ra. ²⁰ Caná ra Jesús chi ra. Ta ninduvi tahan ra casandoꝯ ra sutu ra, ra Zebedeo, chichi canoa chihin ra catyinyeé chi ra. Ta cuahan coyo ra chihin ra Jesús.

Nu nduvahá noo ra yihí tatyí ña vaha añima

(Lc. 4.31-37)

²¹ Ta chaꝯ coyo ra ñuu Capernaum. Ta cuví chi noo quivi nyitatu ñáyivi, ta quihvi ra Jesús chichi vehe ñuhu, ta quichahá sañaha ra tuhun Nyoo chi ñáyivi. ²² Ta iyo cuñi ñu tuhun cahán ra, vatyí sañahá ra tari noo ra iyó vaha ityi chii cha cahán. Ña cahán ra cuhva cahán ra casacuahá cuenda ley vehe ñuhu. ²³ Chichi vehe ñuhu cuan ñohó noo ra yihí tatyí ña vaha añima. Ta caná chaꝯ ra ta catyí ra:

²⁴ —¿Ñáá tuhun cha tyihún chuun chihin ndi, yoho Jesús ra ñuu Nazaret? ¿Atu vachun vatyí sanaun chi ndi? Yuhu ñohó nui chuun, ta chité vatyí Sehe Ii Nyoo cuví chuun —catyí ra yihí tatyí ña vaha cuan chi ra Jesús.

²⁵ Nacahan ra Jesús ta catyí ra chi tatyí ña vaha cuan:

—¡Taxi ri! ¡Saña chi ra ndahvi chiña! —catyí ra.

²⁶ Ta tatyí ña vaha cuan, chihí tañi ra cuhvi cuan saha chi, ta iyo canachaꝯ tatyí

cuan quitā chi ra. ²⁷ Tandihī ñáyivī yuhvi xaan ñu cuvī, ta candacā tuhun ñu chi tahan ñu, ta catyí ñu:

—¿Ñáá cha cuvī ihya? ¿Ñana vaha tuhun chaa sañahá ra ihya? ¡Vatyí iyo vaha tunyee iñi chi ra, nyacua nya tatyí ña vaha, ta quichahá chi ra! —catyí ñu.

²⁸ Ta numi ri cachito ñáyivī tandihī ñuu cha iyó Galilea cuan tuhun ra Jesús.

Nu sanduvahā ra Jesús chi maha tyiso ra Simón Pedro
(Mt. 8.14-15; Lc. 4.38-39)

²⁹ Cuhva cha quitā coyo ra chichi vehe ñuhu, ta cuahan ra Jesús vehe ra Simón ta ra Andrés. Ta cuahan tucu ra Jacobo ta ra Juan chihin ra. ³⁰ Ta maha tyiso ra Simón catuví ña nu chito, cuhví ña chihin cahñi. Ta catyí ñu chi ra Jesús tyí cuhví ña. ³¹ Tyicuan ta tuhva ra Jesús, ta tñn ra ndaha ña. Ta nacoñehē ra chi ña. Ta caa cuhva rí cuan, tinyaa cahñi chi ña. Ta quichaha tyiñuhu ña chi ra.

Nu sanduvahā ra Jesús chi cuaha ñu cuhví
(Mt. 8.16-17; Lc. 4.40-41)

³² Cuhva cha queē ñanyii ta cha cua caa, quichī nyaca ñu tandihī ñu cuhví ta ñu yihí tatyí ña vaha nu nyaá ra Jesús. ³³ Ta tandihī ñáyivī ñuu cuan candu ñn ri ñu yuvehe cuan. ³⁴ Ta cuaha ñu cuhví cha siñ siñ cuehe sanduvahā ra. Ta tava ñehe ra chi cuaha tatyí ña vaha, soco ña chahā ra cha cahan tatyí cuan, vatyí chitó cuan yóo ra cuví ra.

Nu cahán ra Jesús tuhun Nyoo ityi Galilea
(Lc. 4.42-44)

³⁵ Ta cha inga quivī cuhva cha ni ñaa ca, ndicuitā ra Jesús, ta cuahan ra ityi chata ñuu. Cuahan ra noo nu yori sayanga chi ra cua cacan tahvi ra chi Nyoo. ³⁶ Ta ra Simón ta ra tahan ra cuahan coyo ra cua nanducu ra chi ra. ³⁷ Ta cuhva cha canañihī ra chi ra cacatyí ra chi ra:

—Tandihī ñáyivī nanducú ñu chuun —cacatyí ra chi ra Jesús.

³⁸ Soco maa ra catyí ra chi ra:

—Coho ndo inga ñuu cha nyicú yatyin ri ihya, vatyí cahan tiqui tuhun Nyoo yucuan, vatyí yucuan tyiño vachi —catyí ra Jesús chi ra.

³⁹ Yucuan chaha chica noo ra Jesús tandihī ri ñuu cha iyó Galilea, cahán ra tuhun Nyoo chichi vehe ñuhu tahan tahan ñuu. Ta tava ñehe ra tatyí ña vaha cha yihī añima ñáyivī.

Nu sanduvahā ra Jesús chi noo ra cha tyahyu coño
(Mt. 8.1-4; Lc. 5.12-16)

⁴⁰ Noo chaha tuhva noo ra cuhví cha tyahyu coño nu nyaá ra Jesús. Ta chicuiñi chiti ra nuu ra, ta catyí ra chi ra:

—Tatu cuñún, cuví sanduvahun chii —catyí ra.

⁴¹ Ta cundahvi cuñi ra Jesús nyehé ra chi ra, ta tyiso ra ndaha ra siqui ra, ta catyí ra:

—Cuñí sanduvahi chuun. Ta na nduvahun vityin ri —catyí ra chi ra.

⁴² Caa cuhva ri cha catyí ra tyehe caa, tinyaa cuehe

cuan chi ra, ta nduvahā ra. ⁴³ Tyicuan ta catyí ra Jesús vatyí cha cuví cuhun ra, soco catyí xaan ra chi ra na sacuvi ra tyehe caa:

⁴⁴ —Nyehe. Yori chihin cahun tuhun. Soco cuāhan nu nyaá tata sutu. Ta sañahun chuun chi ra, ta cuhvon cha tahán chi cuhvon na ndundiun nu Nyoo tari cuhva catyí nu ley cha tyaa ra Moisés, vatyí tacuhva coto tandihí ñáyiví tyi cha nduvahun chihin cuehe cuan —catyí ra Jesús chi ra.

⁴⁵ Soco ra cuan chahan ra, ta quichahā nacatyí ra chi tandihí ñáyiví. Yucuan chaha ña cuví ca quihví ndichin ra Jesús chichi ni noo ñuu. Ta ityi chata ri ñuu chicá noo ra nu yori ñáyiví iyó, soco tandihí ri ityi quitā coyo ñu, quichí nyehe ñu chi ra.

2

Nu sanduvahā ra Jesús chi noo ra cuhví cha ña cuví nacanda

(Mt. 9.1-8; Lc. 5.17-26)

¹ Suhva quiví yahā ta quihví ra Jesús inga chaha chichi ñuu Capernaum. Ta cachito ñáyiví tyi nyaá ra vehe. ² Ta numi ri candu ĩn ri cuaha ñáyiví. Ta nyacua ña chitahan ñu, ni yuvehe. Ta maa ra Jesús cahan ra tuhun Nyoo chihin ñu. ³ Tyicuan ta cumi tahan ra canyísó chi noo ra cuhví cha ña cuví nacanda, caquichí nyaca ra chi ra nu nyaá ra Jesús. ⁴ Soco ña cuví caquihví ra nya nu nyaá ra Jesús cha

cuenda vatyí tuvi xaan ñáyiví. Tyicuan ta candaā ra ityi xiñi vehe. Ta sacuachiyo ra suhva tyiyo. Ta sanoo ra chi ra cuhví cuan chihin chito. ⁵ Nyehe ra Jesús vatyí cachinó xaan iñi ra cuan. Ta catyí ra chi ra cuhví cuan:

—Cha ndachí cuatyun, suti —catyí ra Jesús chi ra.

⁶ Soco suhva ra sacuahā cuenda ley vehe ñuhu nyicú ra cuan, ta cachicá xiñi ra tyehe caa: ⁷ “¿Ñáá tuhun cha cañá iñi ra ihya cahan ra tyehe caa? Chicoo cuatyí ra nuu Nyoo chihin tuhun cahan ra vatyí yori cuví sandachi cuatyí, noo tuhun ri maa Nyoo cuví sandachi ra cuatyí”, cachicá xiñi ra. ⁸ Soco ra Jesús chitó ra cha cachicá xiñi ra. Ta catyí ra chi ra:

—¿Ñáá tuhun cha chicá xiñi nyoho tyicuan caa?

⁹ ¿Ñáá cha yí ca, cha catyí yo chi ra cuhví ihya vatyí cuatyí ra cha yahā ndachi, o cha catyí yo chi ra vatyí nducuita ra ta naquehen ra chito ra ta caca ra? ¹⁰ Vaha, vityin chihin cha sanduvahi chi ra ihya, cusañahi chi ndo vatyí yuhu ra cuví Rayíi cha quichí nya gloria, iyó ityi chii cha sandachi cuatyí ñáyiví —catyí ra Jesús chi ra.

Tyicuan ta quichaha catyí ra chi ra cuhví cuan:

¹¹ —Catyí chi yoho, ndicuita, naquehen chiton, ta cuānuhu nya vehun —catyí ra Jesús chi ra.

¹² Ta ra cuhví cuan ndicuita ra. Naquehen ra chito ra, ta

cuanuhu ra. Ta tandihí ñu nyehe ñu, ta iyo cuñí ñu, ta sacahnú ñu chí Nyoo, ta catyí ñu:

—Ni noo chaha ta nyehe ca yo cha tyehe caa —catyí ñu.

Nu cana ra Jesús chí ra Leví (Mt. 9.9-13; Lc. 5.27-32)

¹³ Yaha cuan ta cuahan tucu ra Jesús inga chaha yuhu miñi cuan. Ta cuhva cha nataca ñáyivi nu nyaá ra, quichaha cahan ra nuu ñu.

¹⁴ Tyicuan ta cuahan ra ta nu yaha ra nanyehe ra chí ra Leví sehe ra Alfeo, nyaá ra nu sahá tyiño ra, tavá ra xuhun cuenda gobiernu ñuu Roma. Ta catyí ra Jesús chí ra:

—Coho chihin.

Tyicuan ta nducuita ra Leví, ta cuahan ra chihin ra.

¹⁵ Yaha cuan ta tahan chí nyaá ra Jesús chihin ra cachicá noo chihin ra cachachí ra nu mesa vehe ra Leví. Ta nyicú tucu cuaha ra catavá xuhun chihin inga ñáyivi iyó cuatyí. Vatyí cuaha xaan ñu nyicón chí ra.

¹⁶ Soco ra casacuahá cuenda ley vehe ñuhu, ta ra cacuví fariseo, ra cha quichahá xaan ley vehe ñuhu, cha canyehe ra vatyí chachí ra Jesús chihin ra catavá xuhun, ta ñu iyó cuatyí, ta cacatyí ra chí ra cachicá noo chihin ra Jesús:

—¿Yoso caa cha ra sacuaha chí nyoho chachí ra ta chihí ra chihin ra catavá xuhun ta ñu iyó cuatyí?

¹⁷ Chiñi ra Jesús cha cacahan ra ta catyí ra:

—Ña chiñuhú doctor chí ñu ña cuhví, soco chiñuhú ra chí ñu cuhví. Vachi yuhu soco

ñima cha cuenda cha vaha chí ñu vaha, soco cha cuenda cha vaha chí ñu iyó cuatyí —catyí ra Jesús chí ra.

Nu sañahá ra Jesús vatyí nya cha yaha canyaha ra chí ñu nyicón chí ra, tyicuan ta cuctahan chí savaha ñu ayuno (Mt. 9.14-15; Lc. 5.33-35)

¹⁸ Noo chaha, ra canyicón chí ra Juan ta ra canyicón chí ra fariseo, ña chachí ra ta nanducú ra chí Nyoo. Ta suhva ñáyivi quichi coyo ñu nu nyaá ra Jesús, ta ndaca tuhun ñu chí ra, ta catyí ñu chí ra:

—¿Ñáá tuhun cha ra canyicón chí ra Juan ta ra canyicón chí ra fariseo tuhvá ra savaha ra ayuno, ta ra cachicá noo chuhun ña tuhvá ra? —catyí ñu.

¹⁹ Ta nacahan ra Jesús ta catyí ra:

—Noo vico tandaha, ¿atu cuví cha ma cachi ra ñohó vico cha ni ri ca cha nyaá ra cha cua tandaha cuan chihin ra? Tatu nyaá ca ra cua tandaha cuan chihin ra, ma cuví cha ma cachi ra. ²⁰ Soco vachi chí quivi cha cutinyaa ra chí ra tandaha cuan nu nyicú ra tahan ra. Yucuan ndicha quivi coo cuhva cha ma cachi ra ta nanducu ra chí Nyoo —catyí ra Jesús chí ñu.

Nu sañahá ra Jesús vatyí ña nacachi tahan tuhun chahnu cha iyó ñáyivi chihin tuhun chaa cha sañahá ra (Mt. 9.16-17; Lc. 5.36-39)

²¹ Catyí ra Jesús:

—Yori naquicu noo sahma chahnu chihin noo sahma chaa, vatyí cha chaa cuan

nandiꝑi ta cahnya chi sahna chahnu, ta nu tahnya cuan cunducahnu ca. ²² Ta ni ri ña tuhvá yo tyihi yo vinu chaa chichi ñi chahnu, vatyí vinu chaa chahnyá chi ñi, ta chati vinu, ta tivi ñi. Yucuan chaha cuñí chi cha tyihi yo vinu chaa chichi ñi chaa—catyí ra Jesús.

Nu catohon ra cachicá noo chihin ra Jesús yoco trigu quivi nyitatu ñáyivi

(Mt. 12.1-8; Lc. 6.1-5)

²³ Noo quivi cha tuhvá ñáyivi nyitatu, cuahan ra Jesús chicá ra mahñu nu iyó cha tachí ñáyivi. Ta ra cachicá noo chihin ra quichaha catohon ra yoco trigu cuan cuhva cha yahá coyo ra. ²⁴ Tyicuan ta quichaha cacatyí ra fariseo chi ra Jesús:

—¡Nyehe xihna! ¿Ñáá tuhun cha sacuví ra cachicá noo chuhun tyiño cha ña tahán chi sacuví yo quivi nyitatu yo? —cacatyí ra.

²⁵ Soco maa ra Jesús catyí ra chi ra:

—¿Atu ni noo chaha ta sacuaa ca nyoho cha sacuvi ra David chihin ra tahan ra noo quivi cha cachisoco vavaha ra? ²⁶ Quivi cha cuví ra Abiatar tyiño cha cuví ra nuu chi tata sutu, quihvi ra David chichi vehe Nyoo. Ta chachí ra pan ii, cha tahán chi cachi maa ri maa ra cuví sutu. Ta chaha tucu ra cachi ra ndihi chihin ra —catyí ra Jesús.

²⁷ Ta catyí tucu ra Jesús chi ra:

—Chicoo quivi nyitatu yo, cuenda cha vaha chi ñáyivi, soco ñáyivi ña chicoo ñu cha cuenda cha vaha chi quivi nyitatu yo. ²⁸ Yucuan chaha yuhu Rayi cha quichi nya gloria, iyó ityi chii cha catyi chi noo noo ndo ñáá cha sacuvi ndo quivi nyitatu yo —catyí ra Jesús.

3

Nu nduvaha noo ra na ityi inchiyo ndaha

(Mt. 12.9-14; Lc. 6.6-11)

¹ Quihvi ra Jesús inga chaha chichi noo vehe ñuhu. Ta yucuan nyaá noo ra na ityi inchiyo ndaha. ² Ta cañañí ra fariseo chi ra Jesús nyehé ra tatu sanduvaha ra chi ra quivi nyitatu ñu, vatyí tacuhva coo cuatyí tyaa ra siqui ra. ³ Tyicuan ta ra Jesús catyí ra chi ra na ityi ndaha cuan:

—Ndicuita ta cuinanyaa mahñu ihya.

⁴ Yaha cuan ta ndaca tuhun ra chi inga ñu cha tayucú cuan, ta catyí ra:

—¿Ñáá cha tahán chi sacuvi yo quivi nyitatu yo? ¿Atu sacuví yo cha vaha o cha ña vaha? ¿Atu tahán chi sanduvaha yo ñáyivi o cha cahñi yo? —catyí ra Jesús.

Tyicuan ta taxi taxi maa candoo ñu cuan. ⁵ Tyicuan ta xaan nanyehe ra Jesús chi ñu, ta cuihya cuñí ra vatyí ña cuñí ñu cutuñi iñi ñu. Ta catyí ra chi ra cuan:

—Sanacaa ndahun.

Ta sanacaa ra, ta nduvaha ndaha ra. ⁶ Tyicuan ta quita

coyo ra fariseo, ta quichaha catyihí tahan ra tuhun chihin ra cuenda ra Herodes, yoso caa cacahñi ra chi ra Jesús.

Nu nyicú cuaha ñáyivi yuhu miñi

⁷ Soco ra Jesús cuahan ra chihin ra cachicá noo chihin ra yuhu miñi, ta cuaha ñáyivi ityi Galilea canyicón chi ra.

⁸ Ta cha chito ñáyivi tuhun nahnu cha sacuví ra, cuaha xaan ñu quichí coyo ñu ñuu Jerusalén ta inga ñuu cha iyó ityi Judea, ta ñuu cha iyó Idumea, ta inga chiyo yuvi cahnu Jordán, ta ñuu Tiro ta ñuu Sidón ñandihí, vatyí cuñí ñu nyehe ñu chi ra.

⁹ Yucuan chaha catyí ra Jesús chi ra cachicá noo chihin ra na casanduvaha ra noo canoa, tacuhva vatyí tatu ndutihin xaan chihin ñáyivi, cuví quihvi ra chichi canoa cuan. ¹⁰ Vatyí cuaha xaan ñu cha yahá sanduvahá ra, ta yucuan chaha tandihí ñu cuhví cuahan ñu nu nyaá ra vatyí cuñí ñu tñn ñu chi ra tacuhva nduvaha ñu. ¹¹ Ta ñu yihí tatyí ña vaha añima, chicuiñi chiti ri ñu nuu ra, ta canachaa tatyí ña vaha cuan, ta catyí chi tyehe caa:

—¡Yoho cuvún Sehe Nyoo!

¹² Soco ra Jesús chasí ra yuhu tatyí cuan vatyí ma catyí ca chi yóo ra cuví ra.

Nu nacachí ra Jesús chi uchi uvi apóstol vatyí cacaca ra tyiño ra

(Mt. 10.1-4; Lc. 6.12-16)

¹³ Yahá cuan ta ndaa ra Jesús noo yucu ta caná ra chi

ra cuñí maa ra nacachi ra. Ta quichí coyo ra nu nyaá ra. ¹⁴ Ta tyiso ra chi uchi uvi tahan ra vatyí cundihi ra chihin ra, ta vatyí tyatyíño ra chi ra na cucahan ra tuhun Nyoo. ¹⁵ Ta chahá ra ityi chi ra vatyí sanduvaha ra chi ñu cuhví, ta tava ñehe ra chi tatyí ña vaha. ¹⁶ Ta ican ra ihya cacuví ndí uchi uvi tahan ra: ra Simón cha sacunañi ra Jesús Pedro chi; ¹⁷ ra Jacobo ta yañi ra ra Juan, sehe ra Zebedeo. Ta Boanerges sacunañi ra chi ninduvi tahan ra ta cuñí chi catyí: ra ñihí cahán tari cahán savi, ¹⁸ ra Andrés, ra Felipe, ra Bartolomé, ra Mateo, ra Tomás, ra Jacobo sehe ra Alfeo, ra Tadeo, ta inga ra Simón cha yihí cuenda ityi ra cuñí cahun cuatyí siqui gobiernu ñuu Roma cha nyacá ñaha chi ñu, ¹⁹ ta ra Judas Iscariote, ra cha naxico tuhun chi ra Jesús.

Nu tyaá ñáyivi cuatyí siqui ra Jesús, ta catyí ñu vatyí tunyee iñi cuihna iyó chi ra

(Mt. 12.22-32; Lc. 11.14-23; 12.10)

Yahá cuan ta quihvi ra Jesús noo vehe chihin ra cachicá noo chihin ra. ²⁰ Ta inga chaha natacá cuaha ñáyivi, ta nyacua ni ña cuví ca cachi ra. ²¹ Cha cachito ñáyivi chi ra Jesús vatyí nyaá ra yucuan, quichí coyo ñu vatyí cunuhun ra chihin ñu, vatyí catyí ñáyivi chi ñu tyí nduloco ra.

²² Ta suhva ra casacuahá cuenda ley vehe ñuhu

Jerusalén cha quichj coyo suri tyicuan caa cacatyí ra:

—Ra ihya, ra Beelzebú ra cuví nuu chi cuihna yihí chi ra. Ta chihin tunyee iñi cuihna tava ñehe ra tatyí ña vaha —cacatyí ra.

²³ Tyicuan ta cana ra Jesús chi ra, ta catyí ra chi ra:

—¿Yoso caa, atu tava ñehe cuihna suri chi ra tahan maa ra? Ma sacuvi cuihna tyicuan caa. ²⁴ Tatu noo gobiernu cacusin ra, ta cacañi tahan ra chihin tahan ra, gobiernu cuan ña naha cuacunyaca ñaha ra. ²⁵ O tatu ñáyivi noo vehe, ña in ri cuví ñu chihin tahan ñu ta cañi tahan ñu, cutivi nu nyicú ñu. ²⁶ Ta tatu cuihna cacusin ra ta canducita ra siqui tahan ra, ¿yoso caa cucuvi chi ra? Cundihi tuhun ra.

²⁷ Yori cuví quihvi chichi vehe noo ra ñihi tari cuihna ta tinyaa ra cha chii ra, tatu ma cuhñi xihna ra chi ra. Yucuan ndicha ta cuví tinyaa yo cha chii ra.

²⁸ 'Cha ndicha catyí chi ndo vatyí cuví coo ticahnu iñi tandihi nuu cuatyí ñáyivi, ta tandihi cha quiñi caa cha cahán ñu. ²⁹ Soco ñu cahán ña vaha siqui Tatyí li Nyoo, ma cuví maa coo ticahnu iñi cuenda cuan, soco tyicuan ri maa coo cuatyí ñu —catyí ra Jesús.

³⁰ Tyicuan caa catyí ra Jesús chi ra casacuahá cuenda ley vehe ñuhu, vatyí maa ra cacatyí ra vatyí ñohó noo tatyí ña vaha chi ra.

Yóo ñu cuví sihi ra Jesús ta yañi ra

(Mt. 12.46-50; Lc. 8.19-21)

³¹ Tyicuan ta chaa coyo sihi ra Jesús ta yañi ra, soco ndoo ñu ityi chata vehe, ta tachj ñu cucana chi ra. ³² Ta ra nyicú nicachico nu nyaá ra Jesús cacatyí ra chi ra:

—Sihun ta yañun ta cuhvon nyicú ñu ityi chata vehe, ta nanducú ñu chuun —catyí ra chi ra.

³³ Soco maa ra catyí ra:

—¿Yóo ñu cuví sihi ta yañi? —catyí ra.

³⁴ Tyicuan ta nanyehē ra chi ñu nyicú nicachico, ta catyí ra:

—Ican ñu ihya cuví sihi ta yañi. ³⁵ Vatyí savahri ñu sacuvi cuhva cuñi Nyoo, ican ñu cuan cuví yañi, ta cuhve, ta sihi —catyí ra Jesús.

4

Tari noo ra chicá noo tachí, tyicuan caa cuví ra cahán tuhun Nyoo

(Mt. 13.1-9; Lc. 8.4-8)

¹ Inga chaha quichaha sañaha ra Jesús yuhu miñi, ta ndu in ri cuaha ñáyivi nu nyaá ra. Yucuan chaha quihvi ra chichi noo canoa cha tacaá nu ndutya yuhu miñi cuan. Ta chicunyaá ra, ta tandihi ñáyivi ndoo ñu nu ñiti. ² Tyicuan ta cuaha cha sañaha ra chi ñu chihin cuhva ri. Ta nu sañahá ra chi ñu, ta catyí ra chi ñu:

³ —Tyasoho ndo tuhun ihya. Minoos ra quitā ra vehe ra, cuahan ra nu iyó tyiño sahá ra. Ta quichaha quitā ra

chiti trigu nu ñuhú ra. ⁴Ta ityi cuahan ra quiti ra, suhva chiti cuan canacoyo yuhu ityi, ta quichi coyo saa ta cachachiti. ⁵Suhva ca chiti canacoyoticu yuu nu ña cuaha ñuhú yihí. Ta chiti cuan numi ri caña, vatyí ña cono xaan yihí ñuhú cuan. ⁶Soco cuhva cha caña ñanyii, na ityi chi vatyí ña cono yihí yoho chi. ⁷Ta suhva ca chiti canacoyochichi tu iñu. Ta chahnu tu iñu cuan, ta chasi tun nuu trigo cuan. Yucuan chaha ña chiyo chiti tun. ⁸Soco suhva chiti cha canacoyonu ñuhú vaha. Ta caña ta chahnu. Ta vaha chahā tun chiti. Suhva tun chahā tun oco uchi chiti cha noo noo tun. Inga tun chaha tun uñi xico chiti. Ta inga tun chahā ciento chiti —catyí ra Jesús chi ñu.

⁹Ta catyí tucu ra chi ñu:

—Tatu cutuñi iñi ndo, tyasoho ndo tuhun cahín.

Nu sacotó ra Jesús ñáá cuenda sañahá ra chihin cuhva ri chi ñáyivi

(Mt. 13.10-17; Lc. 8.9-10)

¹⁰Yahā cuan ta ndoo maa ri maa ra Jesús chihin ñu nyicón chi ra ta ndi uchi uvi tahan ra chicá noo chihin ra. Ta candaca tuhun ñu chi ra ñáá cha cuñi chi catyi tuhun cuan. ¹¹Ta catyí ra chi ñu:

—Chi nyoho sacotó Nyoo tuhun xehe yoso caa nyacá ñaha ra añima ñáyivi. Soco chi ñu cha ña chinó iñi chi ra, maa maa ri chihin cuhva ri sañahí chi ñu. ¹²Vatyí tatu nyehé ñu soco cuví chi tari cha ña nyehé ñu, ta tatu

chiñi ñu soco ma cutuñi iñi ñu. Tacuhva cha ma nasama ñu cuhva iyó ñu ta ni ma coo ticahnu iñi cuatyí ñu —catyí ra Jesús chi ñu.

Nu chahā ra Jesús cuenda yoso caa cuahan tuhun ra tachí chiti cuan

(Mt. 13.18-23; Lc. 8.11-15)

¹³Ta catyí tucu ra chi ñu:

—¿Atu ña cutuñi iñi nyoho tuhun ihya? Tatu tyicuan caa ña cutuñi iñi ndo, ¿yoso caa cuví cutuñi ini ndo tandihí inga tuhun sañahí chi ndo?

¹⁴Ra cha tachí chiti trigu cuan cuví ra tari noo ra cahán tuhun Nyoo. ¹⁵Yihí ñáyivi cuví ñu tari nu canacoyochiti yuhu ityi: chiñi ñu tuhun Nyoo, soco cha yahā chiñi ñu, quichi cuhna ta tinyaa ra tuhun Nyoo cha tachí ra añima ñu. ¹⁶Inga ñáyivi cuví ñu tari nu canacoyochiti ticu yuu: chiñi ñu tuhun Nyoo ta si cuñi ñu natin cuenda ñu noo ri cuhva. ¹⁷Vatyí nu caña chiti ticu yuu cuan, chiin ri ñuhú yihí chaha, yucuan chaha caña soco ña cuví tyihi yoho vaha chi. Ta tyicuan caa ñu cuan, suhva ri quivi chino iñi ñu. Soco quivi vachi tindoho siqui ñu, o satasi iñi ñáyivi chi ñu cha cuenda tuhun Nyoo, sandihí ri ñu tuhun cha chinó iñi ñu. ¹⁸Ta inga ñu cuví ñu tari nu canacoyochiti chichi tu iñu: chiñi ñu tuhun Nyoo, ¹⁹soco cutyoono ca iñi ñu cha cuenda tindoho cha iyó siqui ñuhu ñáyivi ihya. Cha tyayii sandaví ñaha chi ñu, ta cuñi ñu tandihí ri nuu cha iyó.

Tandihí ihya quihví xiñi ñu ta ña nyaá ca xiñi ñu tuhun Nyoo, ta ña chahá chi sacuvi ñu cha vaha cha cuenda cuan. ²⁰Soco yihí ñu cha chiñí ñu tuhun Nyoo ta naquehén cuenda ñu, ta vaha sacuví ñu, tari nu canacoyo chiti nu ñuhú vaha cuví ñu. Yihí ñu cuví ñu tari yutun cha caña ta chahá tun oco uchi tahan chiti tahan tahan tun. Ta inga ñu cuví ñu tari yutun cha chahá uñi xico. Ta inga ñu tari yutun cha chahá ciento.

Ma tyihi xehe yo ñuhú cha sandundichin Nyoo añima yo coto tinyaa ra

(Lc. 8.16-18)

²¹ Ta catyí tucu ra chi ñu:

—¿Atu quichi nyaca yo noo tima vatyí cananyaa yo chichi noo cajón o xiu chito? Ñima. Tima cuan cuñí chi tyiso yo noo nu sucun vatyí na sacundichin chi chichi vehe. ²² Ta tyicuan caa tucu, ñahri cha ñohó xehe, ta cuñun, tyi ma natuvi. Ta ñahri noo tuhun xehe, ta cuñun, tyi ma coto yo. ²³ Nyoho cha cutuñí iñi ndo, tyasoho ndo tuhun cahín —catyí ra Jesús chi ñu.

²⁴ Catyí tucu ra tyehe caa:

—Tyasoho vaha ndo tuhun cahín. Yoso cuhva sacuví ndo chi ñáyivi, yucuan cuhva sacuvi Nyoo chihin ndo. Ta cuaha ca cuçuhva ra chi ndo tatu tyasohó ndo cha cahán ra. ²⁵ Vatyí ñu tyasohó cha cahín, cuaha ca cuhva Nyoo chi ñu. Soco ñu ña tyasohó, cutinyaa ndihí ra cha chiin cha cha yahá chahá ra chi ñu.

Nu sañahá ra Jesús cuhva chahnu noo chiti yutun

²⁶ Catyí tucu ra Jesús tyehe caa:

—Cha nyacá ñaha Nyoo añima ñáyivi cuví chi tari noo ra tachí noo chiti chichi ñuhú. ²⁷ Ta cuahan ra cua cusu ra. Yahá cuan ta ndicuita ra. Ta cuaha quivi yaha. Ta caña chiti cuan, ta chahnu yutun. Soco maa ra ña chitó ra yoso caa chahnu tun. ²⁸ Cha cuenda vatyí maa ñuhú cuan sacuvahá chi tun tyicuan ri caa. Xihna ca quita xityin tun, ta yaha cuan yoco tun, yaha cuan ta quita chiti nu yoco cuan. ²⁹ Ta tatu cha chityi chiti cuan, cutohon ra vatyí cha cha quivi cha coyo —catyí ra Jesús.

Nu sañahá ra Jesús vatyí tari chahnu noo chiti mostaza, tyicuan caa nducuaaha nu nyacá ñaha Nyoo

(Mt. 13.31-32; Lc. 13.18-19)

³⁰ Ta catyí tucu ra Jesús:

—¿Ñáá chihin sanandiqui tahin cha nyacá ñaha Nyoo añima yo? ¿Ñáá chihin sandu inuu ri yo? ³¹ Cuví chi tari noo chiti mostaza cha tachí yo nu ñuhú. Ican chiti cuan, lee ca cha nuu tandihí chiti iyó siqui ñuhu ñáyivi. ³² Soco tatu tachí yo, caña ta cuahnu. Ta cahnu vavaha cuví tun. Ta nahnu soco tun, ta nyacua nya saa cha chicó nu tatyí cuví nyitatu ti nu vati tun.

Yoso caa sañahá ra Jesús chihin cuhva ri chi ñáyivi
(Mt. 13.34-35)

³³ Tyehe caa sañaha ra Jesús chi ñu, chihin cuaha cuhva, nyacua nya nu cuví cutuñi íñi ñu. ³⁴ Ñahri maa cha catyí ra chi ñu tatu ñima chihin noo cuhva. Soco chi ra cachicá noo chihin ra, nacatyí vaha ra chi ra.

Nu sacutaxín ra Jesús tatyí ta miñi

(Mt. 8.23-27; Lc. 8.22-25)

³⁵ Suri maa quivi cuan, cuhva cha cuaa, catyí ra chi ra cachicá noo chihin ra:

—Coho ndo inga chiyo miñi cuan.

³⁶ Tyicuan ta casandoo ra chi ñáyivi. Ta cuahan ra Jesús chihin ra chichi canoa cha catuvi cuan. Ta cuahan tucu inga canoa chihin ra.

³⁷ Ta quichaha caa noo tatyí ñihi xaan, ta quichaha quihvi ndutya chichi canoa cuan, ta quichaha chitu. ³⁸ Ta ra Jesús quixí ra síqui noo cabecera cha nyaá inchiyo xiin canoa cuan. Ta casandoyo ra chi ra, ta cacatyí ra:

—¡Maestro! ¿atu ñahri cuendon cha cuñi nyee yo?

³⁹ Tyicuan ta ndicuita ra Jesús ta cahan ra chi tatyí cuan na cutaxin. Ta catyí ra chi ndutya miñi cuan tyehe caa:

—¡Taxi ri! ¡Taxi cunyaun! —catyí ra.

Ta tatyí cuan cutaxin, ta taxi taxi cuví. ⁴⁰ Tyicuan ta catyí ra Jesús chi ra cachicá noo chihin ra:

—¿Ñáá tuhun cha yuhví xaan ndo? ¿Atu ta chino ca íñi ndo? —catyí ra chi ra.

⁴¹ Soco maa ra cayuhví xaan ra cha cuví cuan. Ta cacatyí ra chi ra tahan ra:

—¿Yóó ra cuví ra ihya, vatyí nyacua nya tatyí ta miñi quichahá chi ra? —cacatyí ra.

5

Nu nduvaha ra yihí tatyí ña vaha chii ñuu Gadara

(Mt. 8.28-34; Lc. 8.26-39)

¹ Chaa coyo ra yuhu miñi, inga chiyo nu nyaá ñuu Gadara. ² Ta quitá ri ra Jesús chichi canoa, ta quitá noo ra nu ñaña cuan ta chaa ra nu nanyaá ra Jesús. Ta yihí noo tatyí ña vaha añima ra. ³ Ta nu ñaña cuan iyó maa ra cuan. Ta yori maa cuví chasaha chi ra, ni ri chihin cadena.

⁴ Cuaha xaan chaha chahñi ñu chaha ra ta ndaha ra chihin cadena, soco chahnya ra. Yiquin maa sacuvi ra. Ta yori maa cuví chasaha chi ra. ⁵ Ñicahñu ta cha cuaa chicá noo ra canachaá ra nya nu yucu ta nya nu ñaña. Ta sañicuehé ra suri chi maa ra chihin yuu. ⁶ Soco cañi ca nanyehe ra chi ra Jesús, ta chino vavaha ra chaa ra. Ta chicuiñi chiti ra nuu ra. ⁷ Ta cana chaa ra ta catyí ra:

—¿Ñáá tuhun cha tyihún chuun chihin yuhu, yoho Jesús, Sehe Nyoo ra cuví nuu? Chacú ndahvi nuun chihin sívi Nyoo, ma sanyehun tindoho chii.

⁸ Catyí tatyí cuan tyehe caa vatyí ra Jesús cha catyí ra chi ra:

—¡Saña chi ra chiña, yoho tatyí ña vaha! —catyí ra.

⁹ Ta ra Jesús ndacā tuhun ra chi ra, ta catyí ra:

—¿Ñáá nañún?

Ta nacahan tatyí ña vaha cuan:

—Legión nañí, vatyí cuaha xaan ndi —catyí chi chi ra Jesús.

¹⁰ Ta chacu ndahvi tatyí ña vaha cuan nuu ra Jesús tacuhva cha ma tachi ra chi chi nu cañi. ¹¹ Ta yatyin ri yucu cuan nyicú cuaha xaan quini cachachí ti. ¹² Yucuan chaha catyí tatyí ña vaha cuan chi ra Jesús tyehe caa:

—Tachi chi ndi na quihvi ndi quini cuan —catyí tatyí cuan.

¹³ Tyicuan ta chaha ra Jesús, ta tatyí cuan quitá coyo chi ra cuan, ta quihvi chi quini cuan. Ta cha uvi mil quini nyicú cuan, cachino ti, ta canacoyo ti chichi noo xahva yuhu miñi cuan, ta cachihí ti chichi ndutya cuan.

¹⁴ Tyicuan ta ra sahá cumi quini cuan, chino xaan ra chihin cha yuhví ra, ta chinacatyí ra chi ñáyivi ñuu cuan ta ñu ñohó nu chiqui. Ta quichí coyo ñáyivi, quichí nyehe ñu ñáá cha cuví.

¹⁵ Cuhva cha cha coyo ñu nu nyaá ra Jesús, nanyehe ñu chi ra cha yihí tatyí ña vaha cuan chi. Ta vityin nyaá ra ñihnó ra sahma, ta cachi vaha iyó xiñi ra. Ta yuhví xaan ñu cuví.

¹⁶ Ta ñu cha nyehe cha cuví chi ra cuan ta chi quini cuan, canacatyí ñu chi tandihí ca ñu. ¹⁷ Tyicuan ta quichaha chacu ndahvi ñu nuu ra Jesús, na quita ra ñuu ñu.

¹⁸ Ta cuhva cha cua quihvi ra Jesús chichi canoa, ra cha yihí tatyí ña vaha cuan chi chacu ndahvi ra nuu ra Jesús na cuhva ra cuhun ra chihin ra. ¹⁹ Soco ra Jesús ña chaha ra cuhun ra, ta catyí ra chi ra:

—Cuñuhu nya vehun, nu nyaá ñáyivi chuun, ta nacatyun chi ñu tandihí cha sacuvi Sutu yo Nyoo chuhun, ta yoso caa cundahvi cuñi ra nyehe ra chuun. ²⁰ Ta ra cuan cuahan ra ta quichaha nacatyí ra chi ñáyivi tandihí ñuu Decápolis tandihí cha sacuvi ra Jesús chihin ra. Ta tandihí ñu, iyo cuñi ñu.

Nu nduvaha sehe ra Jairo ta ñaha sihi cha tñin sahma ra Jesús

(Mt. 9.18-26; Lc. 8.40-56)

²¹ Ta cuhva cha nachaa ra Jesús chihin canoa nya inga chiyo miñi cuan, cha coyo cuaha ñáyivi nu nyaá ra. Ta ndoo ra yuhu miñi cuan. ²² Tyicuan ta cha noo ra cuví nuu vehe ñuhu. Nañí ra Jairo. Ta cuhva cha nanyehe ra chi ra Jesús, chicuiñi chiti ra nuu ra. ²³ Ta chacu ndahvi ra nuu ra ta catyí ra:

—Cha cuñí cúvi sehi. Coho chihin ta tyison ndahun siqui ña na nduvaha ña ta ma cúvi ña.

²⁴ Tyicuan ta cuahan ra Jesús chihin ra, soco cuaha ñáyivi nyicón chi ra, ta nyacua nañi tahan ri ca maa ñu. ²⁵ Ta mahñu ñáyivi cuan ñohó noo ñaha cha cuhví. Cha quita uchi uvi cuiya ndoho ña cuehe cha chatí niñi ña. ²⁶ Ta cuaha tindoho nyehe ña

cha cuaha xaan doctor nyehe chi ña. Ta cha sanaa ña tandihi maa cha iyó chi ña, soco ñahri maa tyinyee chi chi ña. Soco ñihi ndihi ca nanduvi. ²⁷ Cuhva cha chitó ña tuhun milagru cha sacuví ra Jesús, tuhva ña ityi chata ra ta tñin ña sahma ra. ²⁸ Vatyí chicá xiñi ña: “Ma chihin cha tñin ri sahma ra, ta nduvahi”, chicá xiñi ña. ²⁹ Ta caa cuhva ri cha tñin ña sahma ra ta cha chatí niñi ña cutaxin. Ta tuví iñi coño ñuhu ña tyi cha nduvaha ña chihin cuehe cuan. ³⁰ Tyicuan ta tuví iñi ra Jesús vatyí nduvaha noo ñáyivi chihin suhva tunyee iñi cha quitá chi ra. Tyicuan ta nanyehe ra ityi chata ra ta quichaha ndaca tuhun ra:

—¿Yóó cha tñin sahme?
—catyí ra.

³¹ Tyicuan ta ra cachicá noo chihin ra quichaha catyí ra chi ra:

—Cha nyehun vatyí ñáyivi tyandahá chuun tyi tñin xaan. ¿Yoso caa cha ndaca tuhun: “Yóó cha tñin chii”?
—cacatyí ra chi ra.

³² Soco ra Jesús nyehe ra ityi cuan ityi ihya, vatyí cuñí ra nyehe ra yóó cha tñin chi ra.

³³ Tyicuan ta ñaha cuan niñi ña chihin cha yuhví ña vatyí chitó ña ñáa cha cuví chi ña. Ta chahan ña chicuiñi chiti ña nuu ra. Ta nacatyí ña tandihi cha ndicha chi ra. ³⁴ Ta catyí ra Jesús chi ña:

—Cha nduvahun, Sihi, vatyí chinó iñun. Cuahan, ta ma caca xiñun, vatyí cha nduvahun chihin cuehe cha

ndohun —catyí ra Jesús chi ña.

³⁵ Ni cahán ca ra Jesús ta chaá coyo ñu vehe ra cuví nuu cuan, ta catyí ñu chi ra cha cuví sutu cha luhlu cuan:

—Sehun, cha chihí ña. Náa ri ca tuhun cha sayangon chi Ra Sacuaha chiña —catyí ñu.

³⁶ Soco ra Jesús ña quichaha ra cha cahan ñu, ta catyí ra chi ra cuví nuu vehe ñuhu cuan:

—Ma yuhvun. Chino iñun —catyí ra chi ra.

³⁷ Ta ña chaha ra yóó ca cha cuhun chihin ra, notuhun ri ra Pedro ta ra Jacobo ta ra Juan, yañi ra Jacobo.

³⁸ Ta cuhva cha chaha coyo ra vehe ra cuví nuu vehe ñuhu, nyehe ra cha chacú chaa ñáyivi ta caná chaa ñu.

³⁹ Quihví ra ta catyí ra chi ñu:

—¿Ñáa tuhun cha iyo xaan cuví ndo, ta chacú ndo tyiña caa? Cuehe luhlu ihya, ña chihí cue, quixí cue —catyí ra chi ñu.

⁴⁰ Soco chacú cuehe ri ñu nyehe ñu chi ra. Tyicuan ta ra Jesús tava ra chi tandihi ñu, ta quehen ra chi sutu cue ta sihi cue ta chi ra cha chaá coyo chihin ra, ta quihví coyo ra nu catuví cue. ⁴¹ Ta tñin ra ndaha cue, ta catyí ra chí cue:

—Talita cumi —ta cuñí chi catyí cuan: Catyí chuun, yoho cuehe luhlu, ¡ndicuita!

⁴² Ta caa cuhva ri cua ndicuita cuehe luhlu cuan. Iyó uchi uvi cuiya cue. Ta cuví nacaca cue. Ta ñáyivi iyó xaan cuñí ñu. ⁴³ Soco ra Jesús ñihi chaha ra tuhun chi ñu, tyi ma cahan maa ñu tuhun,

ta catyí ra chi ñu na cuhva ñu cha cachi cue.

6

Nu ñoho ra Jesús ñuu Nazaret

(Mt. 13.53-58; Lc. 4.16-30)

¹ Tyicuan caa cuví ta quita ra Jesús yucuan, ta cuanuhu ra nya ñuu ra. Ta ra cachicá noo chihin ra cuahan coyo ra chihin ra. ² Ta chaq quivi nyitatu ñáyivi, ta quichaha sañaha ra chichi vehe ñuhu. Ta cuaha ñáyivi chiñi tuhun cahán ra, ta iyo cuñi ñu, ta catyí ñu:

—¿Nya cutuhva ra ihya tandihí tuhun ihya? ¿Yóo cha chaha cha chiñi tuñi ihya chi ra? ¿Yoso caa cha cuví sacuvi ra milagru nahnu xaan ihya? ³ ¿Atu ñima ra satyá vitu cuan cuví ra? Sehe cu María cuví chi ra. Ta yañi ra Jacobo, ta ra José, ta ra Judas, ta ra Simón, ta cuhva ra iyó tucu ñu chihin yo ihya —catyí ñu.

Ta quiñi cuñi ñu nyehe ñu chi ra. ⁴ Soco catyí ra Jesús chi ñu:

—Tandihí ñu inga ñuu sahá ñu ñáyivi chi noo ra profeta Nyoo, soco ñu ñuu ra ña quichahá ñu chi ra, ni ñu vehe ra, ni ñáyivi chi ra —catyí ra Jesús.

⁵ Ta ña cuví sacuvi ra ni noo milagru yucuan, soco tyiso ra ndaha ra siqui suhva ri ñu cuhví, ta sanduvaha ra chi ñu.

⁶ Ta iyo cuñi ra vatyí ñu ñuu ra ña chinó iñi ñu chi ra. Ta chahan ra tandihí ñuu nyihí cha nyicú yatyin ri cuan, ta sañaha ra.

Nu tyatyíño ra Jesús chi ra cachicá noo chihin ra nu cucahan ra tuhun Nyoo

(Mt. 10.5-15; Lc. 9.1-6)

⁷ Yahá cuan ta cana ra chi ndi uchi uvi ra chicá noo chihin ra, ta quichaha tachi ra chi uvi uvi ra. Ta chaha ra ityi chi ra vatyí tava ñehe ra chi tatyí ña vaha yihí añima ñáyivi. ⁸ Ta catyí ra chi ra vatyí ñahri maa cha cacuiso ra ityi. Ni yono, ni cha cachi ra, ni xuhun. Ñahri maa cuquindaha ra, noo ri yutun tuvi ra cuiso ra. ⁹ Ndichan ri quihi chaha ra. Ta noo ri sahma cuihno ra, ñima uvi tahan. ¹⁰ Ta catyí ra chi ra:

—Cuhva cha chaa ndo noo ñuu ta quihvi ndo noo vehe, ndo ndo yucuan ri nyacua nya cha quita ndo ñuu cuan. ¹¹ Ta tatu ñáyivi iyó noo ñuu, ña cuñi ñu tin cuenda ñu chi ndo, ta ña cuñi ñu tya-soho ñu tuhun cahan ndo, quita ndo yucuan ta naquisi ndo ñiyaca chaha ndo tari noo seña vatyí ña vaha sacuvi ñu. Cha ndicha catyí chi ndo, vatyí quivi cucutuñi chi ñáyivi iyó siqui ñuhu ñáyivi, ñu cha ma cuñi tin cuenda tuhun cahan ndo, cuaha ca tindoho cunyehe ñu, ta ñima ca ñu ñuu Sodoma ta ñuu Gommorra —catyí ra Jesús chi ra.

¹² Tyicuan ta quita coyo ra ta chichan ra tuhun Nyoo chihin ñáyivi na ndu uvi iñi ñu cuatyí ñu, ta na nanducu ñu chi Nyoo. ¹³ Ta catava ñehe ra cuaha tatyí ña vaha añima ñáyivi. Ta cahyu ra acetye chi cuaha ñu cuhví ta casanduvaha ra chi ñu.

Nu catyí chi yoso caa chihí ra Juan ra sacondutyá chí ñáyivi

(Mt. 14.1-12; Lc. 9.7-9)

¹⁴ Chito rey Herodes tuhun ra Jesús vatyí tandihí ñáyivi cahán ñu tuhun cha sacuví ra, ta chicá xiñi ra tyehe caa:

—Ra Juan ra sacondutyá chí ñáyivi cuví ra cuan. Nandoto ra cha yahá chihí ra, yucuan chaha iyó tunyee iñi chí ra —chicá iñi ra.

¹⁵ Inga ñu catyí ñu:

—Ra Elías profeta Nyoo ta cha naha cuví ra ihya —catyí ñu.

Ta inga ñu catyí ñu:

—Inga profeta Nyoo cuví ra, tari ra profeta Nyoo ra chiyo ta cha naha.

¹⁶ Cuhva cha chiñi ra Herodes tuhun ihya, catyí ra:

—Ican ra cuan cuví ra Juan cha tyihí tyiño tahnya sucun, ta vityin nandoto ra —catyí ra Herodes.

¹⁷ Tyicuan caa catyí ra Herodes vatyí cha catyí cu Herodías, ta tyihí ra chí ra Juan vehe caa ta chahñi ra chí ra chihin cadena. Cu Herodías cuan, ñasihi ra Felipe, yañi ra Herodes, cuví chí ña. Soco ra Herodes quehen ra chí ña vatyí cuví ña ñasihi ra. ¹⁸ Ta ra Juan catyí ra chí ra Herodes vatyí ña vaha cha cunyaa ra chihin ñasihi yañi ra.

¹⁹ Yucuan chaha cu Herodías tasi xaan cuñi ña nyehe ña chí ra Juan, ta cuñi ña cahñi ña chí ra, soco ña cuví. ²⁰ Vatyí ra Herodes chitó ra vatyí ra Juan cuví ra noo ra vaha, ra ii, ta yuhví ra

chí ra. Yucuan chaha sahá cuenda vaha ra chí ra, ña chahá ra cha sacuví ña cha cuñi maa ña chihin ra. Ta vasi ña cuaha cutuñi iñi ra Herodes cha cahán ra Juan soco vaha cuñi ra chiñi ra cha cahán ra. ²¹ Soco cu Herodías ñihí ña noo cuhva nu ndihí ra Herodes cuiya, vatyí sacco ra noo vico cha cuenda ra cacuví tyiño, ta comandante cuenda sindaro, ta ra nahnu ca ityi Galilea cuan. ²²⁻²³ Ta quihvi sehe cu Herodías vico cuan, ta quichaha chita chaha ña. Ta tahañ xaan iñi ra Herodes ta ra cha nyicú cuxiñi chihin ra. Ta tyaa ra cuhva vatyí cuhva ra ñáá cha cacan ña chí ra. Ta catyí ra chí ña:

—Cacan ñáá cha cuñun chii, ta cuhve chuun —catyí ra chí ña.

Ta catyí ra vatyí cuhva ra ñáá ri cha cacan ña, vasi sava ñuhú ñuu nu nyacá ñaha ra. ²⁴ Quita ña ta catyí ña chí sihi ña:

—¿Ñáá cha caquen chí ra? —catyí ña.

Ta catyí sihi ña:

—Cacan xiñi ra Juan ra sacondutyá —catyí ña chí sehe ña.

²⁵ Ta numi ri ndihvi ñaha tyivaa cuan nu nyaá rey Herodes, ta catyí ña chí ra:

—Cuñi vatyí cahnyon xiñi ra Juan ra sacondutyá ta tyihun nuu noo coho ta cuhvon chii vityin vityin —catyí ña chí ra.

²⁶ Tyicuan ta nducuihya xaan iñi rey cuan. Soco cha tyaa ra cuhva vatyí cuhva ra chí ña, ta sin ri cachiñi ra

canyicú chihin ra, ta ña cuñí ra nacahnu ra cha catyí ra chi ña. ²⁷ Numi ri tachi rey cuan tyiño chi noo sindaro na quichi nyaca ra xiñi ra Juan. ²⁸ Chahan sindaro cuan chichi vehe caa cuan, ta chahnyā ra xiñi ra Juan. Ta quichi nyaca ra, yihí nu noo coho. Tyicuan ta chahā ra chi ñaha tyivaa cuan, ta maa ña nacuhvā ña chi sihi ña.

²⁹ Cha chito ra canyicón chi ra Juan, chahan coyo ra chinaquehen ra coño ñuhu ra, ta cachityihí ra chichi ñuhú.

Nu chahā ra Jesús cha cachi ohon mil rayii

(Mt. 14.13-21; Lc. 9.10-17; Jn. 6.1-14)

³⁰ Yahā cuan ta ndu iin ri ra chā tyatyino ra Jesús chi chihin ra, ta canacatyí ra tandihí cha casacuví ra, ta cha casañahā ra nu chahan ra chicahan ra tuhun Nyoo.

³¹ Ta catyí ra Jesús chi ra:

—Ñaha ndo, na nyitatu yo chiin noo nu taxi ri iyó —catyí ra chi ra.

Tyicuan caa catyí ra vatyí cuaha ñáyivi cuahan ta vachi ñu, ta nyacua ña cacuyatyí ra cha cacachi ra. ³² Tyicuan ta maa ri maa ra Jesús ta ra cachicá noo chihin ra cuahan coyo ra chihin noo canoa noo nu yori maa ñáyivi nyicú, minoo nu taxi ri. ³³ Soco cuaha ñu nyehē nu quitá ra. Ta canicohon nuu ñu chi ra. Ta cuahan coyo vavaha ñu chihin chaha ñu, quitā ñu tandihí ñuu ta xihna ca maa ñu chaā coyo. ³⁴ Cuhva cha chaā ra Jesús, quitā ra chichi canoa

ta nanyehē ra tyi cuaha xaan ñu nyicú yucuan. Ta cundahví cuñí ra nyehé ra chi ñu, vatyí nyicú ñu tari mbee cha yori ra sahá cumi chi ti. Ta quichahā sañaha ra cuaha tuhun chi ñu. ³⁵ Cha cua iñi xaan, ta ra cachicá noo chihin ra catuhvā ra ta catyí ra chi ra:

—Cha iñi xaan, ta yucu taxin cuví ihya. ³⁶ Catyí chi ñu, na cuhun ñu ñuu cha nyicú yatyin ihya, ta sata ñu pan, vatyí ñahri cha cachi ñu iyó ihya —cacatyí ra chi ra.

³⁷ Soco nacahan ra Jesús, ta catyí ra:

—Cuhva maa ndo cha cachi ñu.

Canacahan ra ta catyí ra:

—Vasi saha tyiño ndi iñu yoo, soco ma caña xuhun cha cusata ndi pan cachi tandihí ñu ihya.

³⁸ Ta catyí ra Jesús chi ra:

—¿Yoso tahan pan nyisó ndo? Cuahan ndo cua nyehē ndo.

Ta cuhva cha cachito ra yoso tahan, cacatyí ra chi ra:

—Ohon tahan pan ta uvi tiyaca.

³⁹ Tyicuan ta catyí ra na cunyicú noo noo ticuítí ñu nu cuhu cuii cuan. ⁴⁰ Ta chicunyicú ñu cuenda ciento ta cuenda uvi xico uchi ñu. ⁴¹ Tyicuan ta quehen ra Jesús ndi ohon tahan pan cuan ta nanduvi tiyaca cuan. Ta nanyehē ndaa ra andivi, ta nacuhvā ra tyahvi nyoo chi Nyoo, ta tahví ra pan cuan, ta chahā ra chi ra cachicá noo chihin ra na casacha ra. Tyicuan ta casachā ra

chi ñáyiví cuan. Yaha cuan ta casachā tucu ra n̄nduvi tiyaca cuan chi ñu. ⁴² Tandihí ñu cachachí ta ndaha iñi ñu. ⁴³ Ta nyacua ndoo ca ta casacutu ra uchi uvi tica chihin yiquin pan ta tiyaca. ⁴⁴ Ta ohon mil rayihí cachachí pan cuan.

*Nu chicá ra Jesús nu miñi
(Mt. 14.22-27; Jn. 6.16-21)*

⁴⁵ Tyicuan ta catyí ra Jesús chi ra cachicá noo chihin ra na quihví coyo ra chichi canoa vatyí cuhun coyo ra ityi nuu nya inga chiyo miñi cuan ñuu Betsaida. Vatyí maa ra Jesús cunasacha xihna ra ñáyiví, tyicuan ta cuhun ra catyí ra. ⁴⁶ Ta cha yaha cuahan coyo ra, ra Jesús cuahan ra nu yucu, cua cacan tahvi ra. ⁴⁷ Ta cuhva cha cuaa, canoa nu ñohó ra cachicá noo chihin ra cha cuahan nya mahñu miñi cuan, ta ndoo noo tuhun ri maa ra. ⁴⁸ Ta nyehe ra vatyí ña cacuví vaha casacaca ra canoa cuan vatyí ñihi xaan tatyí. Ta cha ñaa ca cuan tuhva ra Jesús chicá ra nu ndutyá cuan. Ta saha ri ra cha cua yaha ra nu canoa cuan. ⁴⁹ Soco cananyehe ra chi ra, chicá ra nu ndutyá. Ta cacuñi maa ra vatyí noo cha sayuhví cuví, ta cacana chaa ra. ⁵⁰ Vatyí tandihí ra canyehe ra chi ra ta cayuhví ra. Soco maa ra cahan ra chihin ra ta catyí ra:

—¡Sanyee ndo iñi ndo!
¡Yuhu cuví! ¡Ma yuhvi ndo!
—catyí ra.

⁵¹ Quihví ra chichi canoa nu canyicú ra, ta cutaxin tatyí

cuan. Ta iyo xaan cacuñí ra ⁵² cha cuenda vatyí ta cutuñi ca iñi ra milagru cha sacuvi ra chihin pan, vatyí ni ndava ca añima ra.

*Nu sanduvaha ra Jesús chi
ñu cuhví ñuu Genesaret
(Mt. 14.34-36)*

⁵³ Cayaha sava ra miñi cuan ta cachaa coyo ra ñuu Genesaret, ta cachahñi ra canoa cuan yuhu ndutyá ri cuan. ⁵⁴ Ta cha quita coyo ri ra chichi canoa cuan, nicohon nuu ri ñáyiví chi ra Jesús. ⁵⁵ Ta cachino vavaha ñu nicahnu ityi cuan sacotó ñu vatyí chaa ra. Ta quichi coyo ñu tandihí ri ñuu, quichi nyaca ñu chi ñu cuhví chihin chito nya nu nyaá ra Jesús. ⁵⁶ Ta tandihí ri ityi nu quihví ra chichi ñuu luhlu o chichi ñuu nahnu, o chichi cuhu, chacun ñu chi ñu cuhví yuhu ityi. Ta chacu ndahvi ñu nuu ra na cuhva ra cha tin ñu vasi chiin yuhu sahma ra. Ta tandihí ri ñu tin chi ra, nduvaha ñu.

7

*Nu sañahá ra Jesús ñáá cha
sativí chi ñáyiví
(Mt. 15.1-20)*

¹ Yaha cuan ta ra fariseo ta suhva ra sacuahá cuenda ley vehe ñuhu quichi coyo ra nya ñuu Jerusalén, ta catuhva ra chi ra Jesús. ² Ta canyehe ra vatyí yihí ra cachicá noo chihin ra Jesús cachachí ra ta ña nacatyá ra ndaha ra tari cuhva cha tahán chi cha costumbre. Yucuan chaha cacahan nyaa ra chi ra. ³ Vatyí

ra fariseo ta tandihí ñu Is-
rael cuan nyicón ca ñu cos-
tumbre sutu chahnu ñu, vatyí
ma cachi ra tatu ma ndoo
ndaha ra cuaha chaha tari
cuhva costumbre iyó chí ñu.

4 Ta tatu nachaa coyo ñu cha
chahan ñu nuyahví, ma cachi
ñu tatu ma sacuví ñu cuhva
cuan cha canacatyá xaan ñu
ndaha ñu. Ta iyó cuaha ca
costumbre cha canyicón ñu.
Iyó noo cuhva cha tahán chí
nacatyá ñu vasu, jarra, ta
tandihí ndaha tyiño caa cha
iyó chí ñu ta cama ñu ñandihí.

5 Tyicuan ta ra fariseo ta
ra sacuahá cuenda ley cuan
candaca tuhun ra chí ra Jesús,
ta catyí ra:

—¿Ñáá tuhun ña sacuví ra
nyicón chuun cuhva costum-
bre sutu chahnu yo? Vatyí
ña nacatyá ra ndaha ra tari
cuhva tahán chí tatu cua-
cachi ra xita —catyí ra chí ra.

6 Ta nacahan ra Jesús, ta
catyí ra:

—Ndicha cha cahan ra
Isaías tuhun ndo vatyí sahá
ndo tyi vaha ndo ta ña ndicha
ndo. Catyí ra tyehe caa:

Ñáyiví ihya, chihin yuhu ri
ñu catyí ñu tyi cuñí ñu
chii.

Soco ñima chihin cha tandihí
añima ñu, tyi sñn nu
nyaá xiñí ñu.

7 Ñahri maa tuhun cha sac-
ahnú ñu chii,

vatyí cha sañahá ñu chí tahan
ñu, maa maa ri maa
cuhva sañahá ñáyiví
ri cuví, tyaá ra Isaías
tuhun ndo.

8 Vatyí nyoho sandoó ndo
cuhva catyí Nyoo, ta nany-
icón ndo cuhva costumbre
ñáyiví ri, tuhun cha nacatyá
xaan ndo ndaha tyiño ndo, ta
cuaha cha tyicuan caa sacuví
ndo.

9 Nyoho sanducaxiñ
ndo tuhun cha catyí Nyoo
tyi sacuvi ndo, tacuhva vatyí
cuví sacuvi ndo costumbre
cha iyó ndo. 10 Soco ra Moisés
catyí ra nu ley cha tyaá ra:
“Saha ndo ñáyiví chí sutu
ndo ta chí sñhí ndo.” Ta
catyí tucu ra: “Tandihí ñu cha
cahán ña vaha chí sutu o chí
sñhí ñu, tahán chí cúvi ñu.”
catyí ra Moisés nu ley Nyoo.

11 Soco nyoho catyí ndo tyi
noo ñáyiví cuví catyí ñu chí
sutu ñu o chí sñhí ñu tyi ma
cuví tyinyee ñu chí ñu vatyí
tandihí cha iyó chí ñu Corbán
cuví. (Cuñí chí catyí: “Cha
chahí chí Nyoo cuví.”) 12 Ta
tatu catyí ñu tyicuan caa, ña
cuñí ca chí cha tyinyee ñu chí
sutu ñu o chí sñhí ñu catyí ndo.

13 Ta tyicuan caa sacuachiyó
ndo tuhun cha catyí Nyoo tyi
sacuvi ndo, vatyí cuñí ndo
sacuvi ri maa ndo tuhun cha
iyó ndo. Ta cuaha ca cha inuu
ri caa sacuví ndo —catyí ra
Jesús.

14 Tyicuan ta caná tucu ra
Jesús chí ñáyiví ta catyí ra chí
ñu:

15 —Tyasoho vaha tandihí
ndo tuhun cahín, ta natyihí
tuñi iñi ndo. Cha quihví yuhu
ñáyiví ta chachí ñu, ña cuví
satíví chí chí ñu. Soco cha
quitá añima ñu, ican cuan
satíví chí ñu. 16 Nyoho cha
cutuñí iñi ndo, tyasoho ndo

tuhun cahín —catyí ra Jesús chi ñu.

¹⁷ Tyicuan ta sandoꝝ ra Jesús chi ñáyivi cuan, ta quihvᵢ ra chichi vehe. Ta ra cachicá noo chihin ra candaca tuhun ra chi ra ñáá cha cuñí chi catyí tuhun cuan. ¹⁸ Ta catyí ra Jesús chi ra:

—Tu tyicuan caa, ni nyoho, ña cutuñí iñi ndo. ¿Atu ña cutuñí iñi ndo vatyí cha quihvᵢ chichi yuhu yo ña sativí chi chi yo? ¹⁹ Vatyí ñima añima yo quihvᵢ chi, soco chichi yo. Ta yaha cuan ta quita chi chichi coño ñuhu yo —catyí ra Jesús.

Chihin cuan cuñí ra catyí ra vatyí tandihí nyayu ta vaha cachi yo. ²⁰ Ta catyí tucu ra:

—Cha quitá añima ñáyivi, ican cuan sativí chi ñu. ²¹ Vatyí añima ñu quitá cha ña vaha chicá xiñi ñu, ta sacuví ñu cha ña vaha. Yihí ñu iyó ñu chihin rayi o chihin ñusihí ta ñima ñasihí ra cuví, ta ñima yᵢ ñu cuví. Yihí ñu casuhú ñu. Yihí ñu cachahñí ñu. ²² Yihí ra iyó ñasihí ra ta chicá noo ra chihin inga ñu. Yihí ñu quichi cuvi iñi ñu cha chii inga ñáyivi. Yihí ñu sacuví ñu cha quiñi caa. Yihí ñu sandaví ñaha ñu. Yihí ñu iyó viciu chi ñu. Yihí ñu nyiyo iñi ñu. Yihí ñu ñiñi ñu cuendu. Yihí ñu cahnu sahá ñu chi ñu. Yihí ñu ña chaa cha chiñi tuñi xiñi ñu. ²³ Tandihí tuhun ña vaha ihya, quitá chi ityí chichi añima ñáyivi, ta sativí chi chi ñu —catyí ra chi ra.

Noo ñaha inga ñuu cha chino iñi chi ra Jesús

(Mt. 15.21-28)

²⁴ Yaha cuan ta quita ra Jesús yucuan, ta cuahan ra ityí ñuu Tiro ta Sidón. Quihvᵢ ra chichi noo vehe ta ña cuñí ra cha coto ni noo ñáyivi, soco ña cuví tixehe nuu ra. ²⁵ Ta sihi noo ñaha tyivaa cha yihí noo tatyí ña vaha añima, numi ri chito ña tuhun ra Jesús. Ta chaa ña ta chicuiñi chiti ña nuu ra. ²⁶ Ñaha cuan, ñaha inga ñuu cuví ña, ñaha ñuu Sirofenicia cuví ña. Quichi ña ta chacú ndahvi ña nuu ra Jesús na tava ra tatyí ña vaha cha yihí añima sehe ña. ²⁷ Soco catyí ra Jesús chi ña:

—Saña, nacachi xihna ca ñu Israel ñu cuví sehe Nyoo, vatyí ña vaha cha tinyaá yo pan chi sehe yo ta cuhva yo cachi ina —catyí ra Jesús chi ña.

²⁸ Ta nacahan ña ta catyí ña:

—Ndicha, Tata, soco ina cuan chachí tucu ti yiquin cha canacoyo xiu mesa cuan —catyí ña chi ra.

²⁹ Tyicuan ta catyí ra Jesús chi ña:

—Vaha nacahun. Ta cha cuenda cuan cuví cuhun, vatyí tatyí ña vaha cha yaha quita chi añima sehun —catyí ra chi ña.

³⁰ Ta cuhva cha nachaa ña vehe ña, catuví sehe ña nu chito, ta tatyí ña vaha cuan cha yaha quita chi cue.

Nu sanduvaha ra Jesús chi noo ra soho ta ñiñi

³¹ Ta quita tucu ra Jesús ñuu Tiro, ta yaha ra ñuu Sidón, ta cuahan ra ityí ñuu cha canañí

Decápolis, ta nachaa ra miñi Galilea. ³² Nu nyaá ra Jesús yucuan, quichi nyaca ñu chi noo ra soho ta ña cuví vaha cahán ra. Ta chacu ndahvi ñu nuu ra Jesús na tyiso ra ndaha ra siqui ra. ³³ Tava siin ra Jesús chi ra in chiyo xiin, nu yori ñáyivi, ta tyihí ra nundaha ra chichi soho ra, ta tyaa sii ra nu yaa ra. ³⁴ Yucuan ta nanyehé ndaa ra andivi. Ta naxitá ra tatyí ra, ta catyí ra:

—¡Efata! —ta cuñí chi catyí: ¡Nuña! —catyí ra.

³⁵ Ta chihin cuan nuña soho ra soho cuan, ta nduvaha yaa ra, ta nacahan vaha ra. ³⁶ Ta catyí ra Jesús chi ñu tyi yori chihin cahan ñu tuhun, soco tatu catyí ra chi ñu tyicuan caa, ñihi ca canacatyí ñu. ³⁷ Ta iyo cuñí ñu ta catyí ñu:

—Tandihí ta vaha sacuvi ra. Nyacua cuvi nacuiñi ñáyivi soho sahá ra ta cuví tucu nacahan ñáyivi ñihí ñandihí.

8

Nu chaha ra Jesús cha cachi cumi mil ñáyivi
(Mt. 15.32-39)

¹ Quiví cuan nataca tucu cuaha xaan ñáyivi. Ta ñahri maa cha cachi ñu iyó. Tyicuan ta cana ra Jesús chi ra cachicá noo chihin ra, ta catyí ra:

² —Cundahvi cuñí nyehi chi ñáyivi ihya, vatyí cha uñi quiví nyicú ñu ihya chihin, ta ñahri maa cha cachi ñu iyó. ³ Tatu natachi chi ñu nya vehe ñu cucachi ñu, coto coña ñu

ityi, vatyí yihí ñu cañi quichi coyo ñu —catyí ra Jesús chi ra.

⁴ Ta nacahan ra cachicá noo chihin ra, ta catyí ra chi ra:

—¿Soco yoso caa cuhva yo cha cachi ñu ihya, ta yori maa ñáyivi iyó ta xico ñu chi yo?

⁵ Ta ndaca tuhun ra Jesús chi ra, ta catyí ra:

—¿Yoso tahan pan nyisó ndo?

Ta cacatyí ra:

—Ucha tahan.

⁶ Ta catyí ra na cunyicu ñáyivi cuan nu ñuhú. Ta quehen ra ucha pan cuan, ta nacuhva ra tyahvi nyoo chi Nyoo. Yaha cuan ta tahvi sava ra pan cuan, ta chaha ra chi ra cachicá noo chihin ra, na casacha ra chi ñáyivi cuan. ⁷ Ta canyisó tucu ra suhva tiyaca nyihi. Ta nacuhva tucu ra Jesús tyahvi nyoo chi Nyoo, ta chaha ra chi ra na casacha ra. ⁸ Tandihí ñu cachachi ñu, ta cachitu chichi ñu. Ta casacutu ra ucha tahan tica chihin yiquin cha ndoo ca.

⁹ Ta cha cumi mil tahan ñu cachachi. Yaha cuan ta catyí ra Jesús chi ñu na cunuho coyo ñu. ¹⁰ Ta quihvi ra chichi noo canoa chihin ra cachicá noo chihin ra. Ta cuahan coyo ra ityi Dalmanuta.

Nu cacatyí ra fariseo chi ra Jesús na sacuvi ra noo milagru
(Mt. 16.1-4; Lc. 12.54-56)

¹¹ Tyicuan ta cachaa coyo ra fariseo, ta quichaha cuvi yuhu ra chihin ra Jesús. Ta cacatyí ra chi ra na sacuvi ra noo milagru tatu ndicha cha Nyoo tachí chi ra. Tyicuan caa catyí ra vatyí cuñí

ra nducu nyehe ra chi ra.
¹² Ta ra Jesús uhvi uhvi naxita
 ra tatyí ra, ta catyí ra:

—¿Ñáá tuhun cha chicán
 ñáyiví iyó vityin milagru?
 Cha ndicha catyí chi ndo
 vatyí ma sacuvi ni noo
 milagru nyehe ndo —catyí ra
 chi ra.

¹³ Tyicuan ta sandoq ra
 chi ra, ta nandihví ra chichi
 canoa ta cuahan ra inga
 chiyo miñi.

*Cuhva iyó ra fariseo tari
 yuchan iya cuvi, catyí ra Jesús
 (Mt. 16.5-12)*

¹⁴ Naa iñi ra cachicá noo
 chihin ra Jesús cacuiso ra cha
 cacachi ra. Ta noo pan ri ñohó
 chihin ra chichi canoa cuan.

¹⁵ Tyicuan ta catyí ra Jesús chi
 ra:

—Saha ndo cuenda chi ndo
 chihin yuchan iya ra fariseo
 ta ra Herodes —catyí ra chi
 ra.

¹⁶ Ta ra cachicá noo chihin
 ra quichaha cacatyí ra chi ra
 tahan ra:

—Cha cuenda vatyí ñahri
 pan nyisó yo, yucuan cuenda
 cahan ra tuhun cuan —catyí
 ra chi ra tahan ra.

¹⁷ Tuví iñi ra Jesús cha
 ndatuhún ra, ta catyí ra chi
 ra:

—¿Ñáá tuhun cha catyí ndo
 tyí ñahri pan nyisó ndo? ¿Atu
 ta cutuñi ca iñi nyoho? ¿Atu
 ta coto ca ndo? ¿Atu ni ndava
 xaan añima ndo? ¹⁸ Nyaá chiti
 nuu ndo, ¿atu ña nyehé ndo?
 Nyaá soho ndo. ¿Atu ña chiñí
 ndo? ¿Atu ña nichon iñi ndo
¹⁹ quiví cha sache ohon tahan
 pan cuan chi ndi ohon mil
 rayi? ¿Yoso tahan tica yiquin

naquehen ndo? —catyí ra
 Jesús, ndacá tuhun ra chi ra
 cachicá noo chihin ra.

Ta maa ra cacatyí ra:

—Uchi uvi.

²⁰ Ta catyí tucu ra Jesús chi
 ra:

—Ta quiví sache ucha
 tahan pan chi cumi mil
 ñu, ¿yoso tahan tica tyitu
 nacoñehe ndo?

Ta cacatyí ra:

—Ucha tahan.

²¹ Tyicuan ta catyí ra Jesús
 chi ra:

—¿Atu ta cutuñi ca iñi ndo?

—catyí ra chi ra cachicá noo
 chihin ra.

*Nu sanduvaha ra Jesús chi
 noo ra cuaa ñuu Betsaida*

²² Yaha cuan ta chaa ra
 Jesús chihin ra cachicá noo
 chihin ra nya ñuu Betsaida.
 Ta quichi nyaca ñu chi noo
 ra cuaa. Ta cachacu ndahvi
 ñu nuu ra na tiin ra chi ra.

²³ Tyicuan ta tiin ra ndaha
 ra cuaa cuan, ta cuahan ra
 chihin ra ityi chata ñuu. Ta
 tyaa siñ ra chiti nuu ra, ta ty-
 iso ra ndaha ra siqui ra, ta
 ndaca tuhun ra chi ra tatu
 cuví nyehe ra chiin. ²⁴ Ra
 cuaa cuan nanyehe ra ta catyí
 ra:

—Nyehí in cahnu ri maa
 chi ñáyiví. Cuhva caa yutun
 caa ñu cahvi iñi, soco chicá ñu
 —catyí ra.

²⁵ Tyicuan ta tiin tucu ra
 Jesús chiti nuu ra inga chaha,
 ta maa ra nanyehe vaha ra ta
 nduvaha ra. Nanyehe cachi
 vaha ra tandihi. ²⁶ Tyicuan ta
 natachi ra Jesús chi ra ta catyí
 ra chi ra:

—Ma quihvun chichi ñuu ta
 ni yori chihin cahun tuhun.

Nu catyi ra Pedro vatyí ra Jesús cuví Cristo

(Mt. 16.13-20; Lc. 9.18-21)

²⁷ Yaha cuan ta chahan ra Jesús chihin ra cachicá noo chihin ra ñuu cha ca iyó Cesarea Filipo. Ta ityi cuahan ra, ta ndaca tuhun ra chi ra cachicá noo chihin ra, ta catyí ra:

—¿Ñáá catyí ñáyivi? ¿Yóó ra cuví yuhu? —catyí ra chi ra.

²⁸ Ta canacahan ra ta catyí ra:

—Yihí ñu catyí ñu tyi ra Juan ra sacondutyá chi ñáyivi cuvún. Inga ñu catyí ñu tyi ra Elías cuvún. Ta inga ñu catyí ñu tyi inga ra profeta Nyoo cuvún —cacatyí ra chi ra.

²⁹ Tyicuan ta ndaca tuhun ra chi ra, ta catyí ra:

—¿Ta nyoho, yóó ra cuví yuhu, cuñi tucu nyoho?

Ra Pedro catyí ra chi ra:

—Yoho cuví Cristo.

³⁰ Soco catyi ra Jesús chi tandihi ra tyi yori chihin cacahan ra tuhun cuan.

Nu cahan ra Jesus tuhun tyi cucúvi ra

(Mt. 16.21-28; Lc. 9.22-27)

³¹ Tyicuan ta quichaha sañaha ra vatyí Rayi cha quichi nya gloria cunyehe ra cuaha xaan tindoho. Ta ra mandoñi ta ra cacuví nuu chi tata sutu ta ra casacuahá cuenda ley vehe ñuhu ma cuñi ra natin cuenda ra chi ra. Catyí ra Jesús chi ra vatyí cucahñi ñu chi ra soco chichi cha cu ñni quivi cunandoto ra.

³² Catyí cachi ra chi ra tuhun ihya. Tyicuan ta tavá sin ra Pedro chi ra ta

quichaha catyi ra tyi ña vaha cha cahan ra cha tyicuan caa.

³³ Soco ra Jesús nanyocava ra, ta nanyehe ra chi inga ra cachicá noo chihin ra. Ta quichaha cahan ra chi ra Pedro ta catyí ra:

—¡Cuachiyo chuun nui, cuihna! Vatyí yoho ña chicá xiñun tari cuhva chicá xiñi Nyoo, soco tari chicá xiñi ñáyivi, chicá xiñun —catyí ra Jesús chi ra Pedro.

³⁴ Tyicuan ta cana ra Jesús chi ñáyivi ta chi ra cachicá noo chihin ra ta catyí ra chi ñu:

—Tatu nya ndo cuñi ndo cunyicon ndo chii, cuñi chi cahnya ndo iñi ndo tuhun maa ndo. Ta ma ndu uvi iñi ndo cha yihí ndo cuende vasi nyehe ndo tindoho cha cuende. Vatyí yucuan cuví cruzi cha tahañ chi cuiso ndo.

³⁵ Vatyí nya ndo ña cuñi ndo cúvi ndo cha cuende, suri cha cúvi maa ndo cuví, ta cahun ndihi ndo anyaya. Soco nya ndo cuhva ndo ñáyivi ndo cha cuende ta cha cuenda tuhun Nyoo, cucacu añima ndo.

³⁶ Tatu sacunaa ndo añima ndo anyaya, ¿ñáá ri tuhun cha saha ganaa ndo tandihi cha tyayí cha iyó siqui ñuhu ñáyivi? ³⁷ Vatyí tatu sacunaa ndo añima ndo, ñahri maa cha iyó cha cuví cuhva ndo ta sacacu ndo añima ndo. ³⁸ Tatu nya noo ndo cucahan nuu ndo nyehe ndo chii, ta cucahan nuu ndo tuhun cahín nuu ñáyivi cha iyó cuatyí ta ña quichahá tuhun Nyoo, yuhu Rayi cha quichi nya gloria cucahan

tucu nuu mai nyehi chi ndo quiví quichi tiqui chihin ángel cuenda Nyoo. Vatyí cuquichi chihin cha tyaqui maa Suti.

9

1'Cha ndicha catyí chi ndo, vatyí yihí ndo cha nyicú ndo ihya, ma cúvi ñaha ndo nyacua nya nyehe ndo yoso caa nyacá ñaha Nyoo. Vatyí cuquichi chihin tunyee iñi ra —catyí ra Jesús.

Nu sañahá Nyoo yoso caa ra Jesús noo cha ndicha nu nyacá ñaha ra

(Mt. 17.1-13; Lc. 9.28-36)

2 Iñu quiví yaha ta cuahan ra Jesús noo yucu sucun. Ta ra Pedro, ra Jacobo, ta ra Juan ri cuahan coyo chihin ra. Ta yucuan nasama cuhva caa nuu ra Jesús. ³ Nduxiño xaan sahma ra ta cuichin xaan nanduví. Yori maa siqui ñuhu ñayiví ihya cuví nacatya ta nducuichin tyicuan caa. ⁴ Ta cananyehe ra tyi nanyaá ra Elías ta ra Moisés, candatuhún ra chihin ra Jesús. ⁵ Tyicuan ta ra Pedro catyí ra chi ra Jesús:

—Maestro, ¡vaha xaan cha nyicú ndi ihya! Na savaha ndi uñi tahan tiyahva: noo cha cuenda maun, ta noo cha cuenda ra Moisés, ta nonga cha cuenda ra Elías —catyí ra Pedro, ⁶ vatyí ña chitó ra ñáá tuhun cahán ra. Vatyí maa ra ta inga ra cayuhví ra.

⁷ Tyicuan ta noo xica noo vico siqui ra ta sahví chi ra. Ta chichi vico cuan tyacu noo ndusu cha catyí:

—Ican ihya cuví Sehi, ta cuñí xain chi ra. Tyasoho ndo tuhun cahan ra —catyí ndusu cuan.

⁸ Ta cuhva cha cananyehe ra, yori ca ra tayucú chihin ra, noo ri ca maa ra Jesús.

⁹ Cuhva cha cuanoo coyo ra yucu cuan, catyí ra Jesús chi ra tyi ma cacahan ra tuhun cha canyehe ra yucuan, soco nya yaha cha nandoto Rayíi cha quichi nya gloria, tyicuan ta cuvi cahan ra tuhun. ¹⁰ Yucuan chaha ña cacahan maa ra tuhun, vasi cacatyí ra chi tahan ra ñana vaha tuhun cuví cha cunandoto ra. ¹¹ Tyicuan ta quichaha candaca tuhun ra chi ra Jesús:

—¿Ñáá tuhun cha catyí ra casacuahá cuenda ley vehe ñuhu vatyí cuquichi xihna ca ra Elías?

¹² Ta nacahan ra, ta catyí ra:

—Cha ndicha vatyí xihna ca ra Elías nyaá quichi ta sanduvaha ra tandihi. ¿Ta yoso caa catyí tuhun Nyoo cuenda Rayíi cha quichi nya gloria? Catyí chi tyi cunyehe ra tindoho, ta ma cuñi nyehe ñáyiví chi ra. ¹³ Soco yuhu catyí chi ndo tyi cha yaha quichí ra Elías. Ta sacuví maa ñáyiví cha cuñi ñu chihin ra, tari cuhva catyí nu tutu Nyoo cha cucuvi chi ra —catyí ra Jesús chi ra.

Nu sanduvaha ra Jesús chi noo ra tyivaa chayihí noo tatyí ña vaha chi

(Mt. 17.14-21; Lc. 9.37-43)

¹⁴ Yaha cuan ta nachaa coyo ra nu nyicú inga ra cachicá noo chihin ra Jesús.

Ta canyehe ra tyi cuaha ñáyivi tayucú nicachico. Ta nyicú tucu ra sacuahá cuenda ley yucuan, ta cacuvi yuhu ra chihin ra. ¹⁵ Tyicuan ta cha nanyehe ñu chi ra Jesús, tandihi ñu iyo cuñi ñu, ta cachino ñu chicuhva ñu nocumi chi ra. ¹⁶ Tyicuan ta ndaca tuhun ra Jesús chi ra cacuvi yuhu cuan ta catyí ra:

—¿Ñáá cuenda cuví yuhu xaan ndo? —catyí ra chi ra.

¹⁷ Ta noo ra nanyaá chichi cha cuaha ñáyivi yucuan, nacahan ra ta catyí ra:

—Maestro, ihya vachi nyaque chi sehi. Yihí noo tatyí ña vaha chi cue ta sacuñihi chi cue. ¹⁸ Vatyí tandihi ri nu tñn tatyí cuan chi cue, sanduva chi cue nu ñuhú, ta yucuan quita tiñi yuhu cue ta cahñi noho cue. Ta ndundava cue. Cha catyí chi ra cachicá noo chuhun na tava ra tatyí ña vaha cuan, soco ña cacuvi chi ra —catyí ra cuan chi ra Jesús.

¹⁹ Nacahan ra Jesús ta catyí ra:

—¡Nyoho ñu ña chinó iñi cuví ndo! ¿Yoso tahan ca quivi cunyai chihin ndo ta cunyei tisihi ndo nyacua nya cha cuthva ndo ta chino iñi ndo chii?

Ta catyí ra chi ra cuan:

—Nyaca chi ra luhlu chiña tyehe —catyí ra.

²⁰ Quichi nyaca ra chi ra luhlu cuan. Ta cuhva cha nanyehe tatyí cuan chi ra Jesús, quehen tatyí cuan chi cue. Ta nduva cue nu ñuhú, sacañuhú cue chi cue, ta quita

tiñi yuhu cue. ²¹ Tyicuan ta ndaca tuhun ra Jesús chi sutu cue:

—¿Ama quichaha cuvi chi ra tyehe caa? —catyí ra chi ra.

Ta nacahan sutu cue, ta catyí ra:

—Nyata luhlu ra. ²² Ta cuaha chaha tyihí tatyí ña vaha ihya chi cue nu cayú ñuhu, o nu ndutya. Cuñi chi cahñi chi chi cue. Soco tatu cuví chuun, cundahvi cuñi nyehun chi ndi, ta tyinyeun chi ndi —catyí sutu cue chi ra Jesús.

²³ Ta catyí ra Jesús chi ra:

—Tatu chinó iñun, tandihi ta cuví cha cuenda ñu chino iñi —catyí ra Jesús.

²⁴ Tyicuan ta sutu cue canachaá ra ta catyí ra:

—¡Chinó iñi! ¡Tyinyee chii na chino ca iñi! —catyí ra chi ra Jesús.

²⁵ Cuhva cha nyehe ra Jesús tyi cuaha ñáyivi candu iñn ri, ta tava ñehe ra chi tatyí ña vaha cuan, ta catyí ra:

—Yoho tatyí ña vaha cha sañihí ta sasohó chi cue ihya, catyí chuun, na quiton. Saña chi ra luhlu ihya, ta ma ndihvi con chi ra —catyí ra Jesús chi tatyí ña vaha cuan.

²⁶ Ta tatyí cuan quiñi xaan canachaá ta na quisi chi chi cue inga chaha ta quita. Ta sandoo tatyí cuan chi cue tari noo ndiyi. Ta cuaha ñu catyí vatyí cha chihí cue. ²⁷ Soco tñn ra Jesús ndaha cue, ta nacoñehe ra chi cue, ta nicuinanyaá cue.

²⁸ Tyicuan ta quihvi ra Jesús noo vehe, ta ra cachicá noo chihin ra candacá tuhun ra chi ra ta catyí ra:

—¿Ñáá tuhun ña cuvi tava ndi chi tatyí ña vaha cuan?

²⁹ Ta catyí ra Jesús:

—Cha cuenda vatyi tahan tatyí ña vaha ihya, quitá, soco chihin cha ma cachi yo ta cacan tahvi yo chi Nyoo —catyí ra chi ra.

Nu cahán ra Jesús tuhun inga chaha vatyi cucúvi ra

(Mt. 17.22-23; Lc. 9.43-45)

³⁰ Quivi cha quitá coyo ra yucuan, yahá coyo ra ityi Galilea. Ta ña cuñí ra Jesús cha coto ñáyivi. ³¹ Vatyi

sañahá ra chi ra cachicá noo chihin ra. Ta catyí ra chi ra vatyi Rayi cha quichi nya gloria cunacuhva cuenda ñu chi ra ndaha ñáyivi. Ta cucahñi ñu chi ra, soco cha cu uñi quivi cunandoto ra.

³² Soco ña cacutuñi iñi ra tuhun cahán ra chihin ra. Ta cayuhvi ra candaca tuhun ra chi ra.

¿Yóo ra cahnu ca?

(Mt. 18.1-5; Lc. 9.46-48)

³³ Tyicuan ta cachaa coyo ra ñuu Capernaum. Ta cuhva cha nyicú ra nya vehe, ra Jesús ndacá tuhun ra chi ra ta catyí ra:

—¿Ñáá tuhun cuvi xaan yuhu nyoho ityi vachi yo? —catyí ra ndaca tuhun ra.

³⁴ Taxi taxi cacuvi ra, vatyi ityi vachi coyo ra, ta cacuvi yuhu ra nya ra cuví ra ra cahnu ca. ³⁵ Tyicuan ta chicunyaá ra Jesús ta caná ra chi

ndi uchi uvi ra chicá noo chihin ra, ta catyí ra chi ra:

—¿Nya ndo cuñi ndo cuvi ndo nuu, cuñi chi cha cuvi ndo ra nu ndihi cha nuu tandihi ra, ta sacuvi ndo tyiño nuu tandihi ra? —catyí ra Jesús chi ra.

³⁶ Tyicuan ta quehen ra chi noo ra cuehe luhlu ta chinanyaá ra chi cue mahñu ra. Ta tyihí sucun ndaha ra chi cue, ta catyí ra:

³⁷ —Ñáyivi cha natiín cuenda chi noo ra cuehe luhlu chihin sivi, chi yuhu natiín cuenda ñu. Ta ñu natiín cuenda chii, ñima chi yuhu ri natiín cuenda ñu, soco chi ra cha tachí chii ñandihí.

Tatu ña cuahan ñáyivi siqui yo, tumañi iñi chi yo cuahan ñu
(Mt. 10.42; Lc. 9.49-50)

³⁸ Tyicuan ta catyí ra Juan chi ra Jesús:

—Maestro, nyehe ndi chi noo ra cuan ta chihin sivun tavá ñehe ra chi tatyí ña vaha. Soco vatyi ñima chihin yo chicá noo ra, catyí ndi chi ra tyi ma sacuvi ca ra —catyí ra Juan chi ra Jesús.

³⁹ Soco catyí ra Jesús chi ra:

—Ma casi ndo. Vatyi ni noo ra cha casacuvi milagru chihin sivi ta yaha cuan ta caña iñi ra cahan ña vaha ra siqui. ⁴⁰ Vatyi ñu cha ña cuahan siqui yo, tumañi iñi chi yo cuahan ñu. ⁴¹ Tatu cuhva noo ñu, vasí noo vasu ndutya coho ndo chihin sivi, cha cuenda vatyi ñu cuenda yuhu ra Cristo cuví ndo, cha ndicha vatyi cuñihi ñu cha cuacuhva Nyoo chi ñu.

*Yica xaan cha sanacava yo
chi noo yañi yo nu cuatyí*
(Mt. 18.6-9; Lc. 17.1-2)

42 Tatu yóó ñu sanacava nu cuatyí chi noo ñu chinó iñi chii, vaha taxin ca cuhñi ñáyivi noo yuu sucun ñu ta tuchi ñu chi ñu cuan nu tyañuhu. 43 Tatu ndahun sanacavá chuun nu cuatyí, vaha taxin ca cahnya. Vatyí vaha ca cha quihvun nu coun chihin Nyoo chihin cha luu ndahun ta ñima ca chihin cha ninduvi ndahun ta cuhun anyaya nu cayú ñuhu cha ma ndahva ca maa. 44 Ta yucuan ña chihí tindacu chachí chi ñu, ta ñuhu ña ndahva maa ni noo chaha. 45 Ta tatu chahun ta sanacavá chuun nu cuatyí, vaha taxin ca cahnya. Vatyí vaha ca cuhun nu coun chihin Nyoo chihin cha luu chahun ta ñima ca chihin cha ninduvi chahun ta tuchi Nyoo chuun anyaya. Vatyí yucuan ma ndahva ca maa ñuhu. 46 Ta ña chihí tindacu chachí chi ñu, ta ñuhu ni noo chaha ña ndahva. 47 Ta tatu noo chiti nuu sanacavá chuun nu cuatyí, vaha taxin ca tava. Vatyí vaha ca cha quihvun nu nyacá ñaha Nyoo chihin noo chiti nuu ta ñima ca chihin ninduvi chiti nuun ta tuchi Nyoo chuun anyaya. 48 Vatyí yucuan ña chihí tindacu chachí chi ñu, ta ni noo chaha ña ndahva ñuhu.

49 Soco tandihí ñu nyicon chii, tari cha cayú ñu chihin ñuhu tatu nyehe ñu tindoho cha cuende, vatyí chihin cuan cua sanduvaha Nyoo chi ñu, tari nduvaha nyayu chihin ñi. 50 Ñi vaha xaan.

Soco tatu ndihí cha uhva, ¿yoso caa cuví cotyiño yo inga chaha? Tyicuan caa tucu nyoho, ma sandihí ndo cha coo tuhun Nyoo añima ndo cha cuví tari ñi vaha. Tyicuan caa ta coo taxi ri ndo chihin tahan ndo.

10

*Nu sañahá ra Jesús tyi ña
vaha sandoo rayi chi ñasihi ra*
(Mt. 19.1-12; Lc. 16.18)

1 Quita ra Jesús Capernaum ta cuahan ra ityi Judea nya inga chiyo yutya Jordán. Yucuan candu in ri ñáyivi inga chaha nu nyaá ra, ta quichaha sañaha tucu ra chi ñu tari tuhvá maa ra. 2 Tyicuan ta suhva ra fariseo catuhva ra nu nyaá ra Jesús, vatyí nducu ra cuhva tyaa ra cuatyí siqui ra. Ta candaca tuhun ra chi ra tatu vaha cha sandoo noo rayi chi ñasihi ra. 3 Tyicuan ta nacañan ra Jesús ta catyí ra:

—¿Ñáá cha catyí ra Moisés tyi sacuví ndo?

4 Ta canacañan ra ta catyí ra:

—Ra Moisés chaha ra cha cuví cahnya noo ra tutu cha tandaha ra tyicuan ta cuví sandoo ra chi ñasihi ra —catyí ra chi ra.

5 Tyicuan ta catyí ra Jesús chi ra:

—Catyí ra Moisés cha sacuvi ndo tyicuan caa soco cha cuenda cha ndava añima ndo. 6 Soco quivi xihna ri, quivi savaha Nyoo tandihí maa, savaha ra rayi ta ñaha sihi. 7 “Yucuan cuenda sandoó rayi chi sutu ra ta

chi sihi ra vatyí ndu ñin ri ra chihin ñasihi ra. ⁸ Ta chichi cha ninduvi tahan ñu cucuvi ñu tari cha noo ri ñáyivi.” Yucuan chaha ñima ca uvi tahan cuví ñu, soco cha nanduvi ñu noo ri ñáyivi. ⁹ Yucuan chaha, ña tahan chi cha sasiin ñáyivi cha sandu ñin ri Nyoo —catyí ra Jesús chi ra.

¹⁰ Yahá cuan ta nachaa coyo ra nya vehe, ta quichahá ndaca tuhun ra cachicá noo chihin ra inga chaha siqui tuhun cuan. ¹¹ Ta catyí ra Jesús chi ra:

—Ra cha sandoó ñasihi ta tandaha ra chihin inga ñu, chicoó cuatyí ra vatyí ña vaha sacuvi ra chihin ñasihi ra, ñaha cha xihna ri cuan. ¹² Ta tyicuan caa tucu ñusihi. Tatu sandoó ñu chi yí ñu ta tandaha ñu chihin inga ra suri chicoo tucu cuatyí ñu —catyí ra Jesús.

Nu nasoco ra Jesús chi ra cuatyaa

(Mt. 19.13-15; Lc. 18.15-17)

¹³ Tyicuan ta quichi nyaca ñu suhva ra cuatyaa chi ra Jesús tacuhva natyiso ra ndaha ra siqui ndotyin. Soco ra cachicá noo chihin ra ña chahá ca ra cha quichi nyaca ñu chi ndotyin. ¹⁴ Soco cuhva cha nanyehé ra Jesús, cuxaan ra. Ta catyí ra chi ra:

—Saña ndo. Na quichi nyaca ñu chi ra cuatyaa nu nyaí. Ta ma casi ndo. Vatyí ñu nyacá ñaha Nyoo aña, cuví ñu chinó ñi chi Nyoo tari chinó ñi ra cuatyaa ihya. ¹⁵ Cha ndicha catyí chi ndo vatyí

tatu ma nacuhva cuenda ndo chi ndo chi Nyoo tari noo ra cuatyaa chihin sutu ndotyin, ma cuvi quihvi ndo nu nyacá ñaha Nyoo —catyí ra Jesús chi ra.

¹⁶ Ta quehen ra chi noo noo ndotyin ta tyihí sucun ndaha ra. Ta tyiso ra ndaha ra siqui ndotyin, ta chican tahvi ra chaha ndotyin.

Nu ndatuhún minoo ra tyivaa tyayí chihin ra Jesús

(Mt. 19.16-30; Lc. 18.18-30)

¹⁷ Yahá cuan ta cuahan ra Jesús. Ta chinqo vavaha noo ra cuan chata ra ta chicuiñi chiti ra nuu ra, ta ndaca tuhun ra chi ra, ta catyí ra:

—Maestro, ra vaha cuvún. ¿Yoso caa sacuvi ta ñihi ñayivi cha ma naa ca maa coi? —catyí ra chi ra Jesús.

¹⁸ Ta catyí ra Jesús chi ra:

—¿Yoso caa chitón tyi vahi? Noo ri ra vaha iyó, ta ican ra cuan cuví Nyoo. (Ta cha catyún tyi vahi, nacotón tyi Nyoo cuví.) ¹⁹ Yoho cha chitón cha catyí Nyoo cha sacuvi yo: “Ma coun chihin inga ñusihi tatu ñima ñasihun cuví. Ma cahñun. Ma suhun. Ma cahun cuendu siqui ni noo ñu. Ma sandavi ñahun. Sahun ñáyivi chi sutun ta chi sihun” —catyí ra Jesús chi ra.

²⁰ Ta nacahan ra cuan ta catyí ra:

—Maestro, tandihi ihya cha sacuvi nyata luhli —catyí ra.

²¹ Tyicuan ta cusí cuñí ra Jesús nanyehé ra chi ra. Ta catyí ra chi ra:

—Cumañi noo ri ca cha cumañi chuun. Cuahan ta xicon tandihí cha iyó chuun ta cuhvon chi ñu ndahvi. Tyicuan ta coo cha tyayíun nya andiví. Yaha cuan ta quichun cunyicon chii vasi nyehún tindoho —catyí ra Jesús chi ra.

²² Soco cha chihñi ra tuhun cahan ra Jesús tyehe caa, nducuihya ñi ra, ta cuihya xaan cuanuhu ra vatyí tyayíi xaan ra.

²³ Tyicuan ta nanyehe ra Jesús nicachico chata ra, ta catyí ra chi ra cachicá noo chihin ra:

—¡Ñana cha yíi ta cuvi nacuhva cuenda ñu tyayíi chi ñu na cunyaca ñaha Nyoo chi ñu! —catyí ra chi ra.

²⁴ Iyo cacuñí ra cachicá noo chihin ra tuhun cahan ra. Soco catyí ra Jesús chi ra inga chaha:

—Sehi, ñu cha tyaa xaan xiñi cha tyayíi, iyíi xaan quihvi ñu nu nyacá ñaha Nyoo! ²⁵ Tañi tyehe yaha noo camellu xiu noo yiquí ticu, ta ñima ca cha cuhva noo ñu tyayíi cunyacá ñaha Nyoo chi ñu —catyí ra Jesús.

²⁶ Cha cachiñi ra tuhun ihya, iyo xaan cacuñí ra, ta candaca tuhun ra chi ra tahan ra, ta catyí ra:

—Tu tyicuan caa, ¿yóo cha cuví cacu añima? —catyí ra.

²⁷ Nanyehe ra Jesús chi ra ta catyí ra chi ra:

—Ñáyiví ña cuví sacuvi ñu ihya. Soco Nyoo cuví chi ra. Vatyí cha cuenda Nyoo ñahri cha yíi sacuvi ra.

²⁸ Tyicuan ta catyí ra Pedro chi ra:

—Sutu Mañi yuhu, nyuhu sandoq ndi tandihí cha iyó chi ndi, ta vityin nyicón ndi chuun.

²⁹ Nacahan ra Jesús ta catyí ra:

—Cha ndicha catyí chi ndo vatyí tandihí ñu sandoq vehe, o yañi, o cuhva, o sutu, o sihi, o ñasihí, o sehe, o ñuhú, cha cuenda yuhu ta cha cuenda cha sacoto ñu chi ñáyiví tyi cuñí Nyoo sacacu ra chi ñu, ³⁰ cuañihi ñu ciento chaha siqui cha sandoq ñu ihya ñuhu ñáyiví. Cuañihi ñu vehe ta yañi ñu, ta cuhva ñu, ta sihi ñu, ta sehe ñu, ta ñuhú, vasi sanyehe ñáyiví tindoho chi ñu. Soco inga ñáyiví cha vachi, cuñihi ñu ñáyiví cha ma naa ca maa. ³¹ Soco cuaha xaan ñu cha cuvi nuu vityin, ñu nu ndihí cucuvi ñu. Ta cuaha xaan ñu cuví ñu nu ndihí vityin, ican ñu cucuvi nuu —catyí ra Jesús.

Nu cahan ra Jesús inga chaha tyi cucúvi ra

(Mt. 20.17-19; Lc. 18.31-34)

³² Cuahan coyo ra ndaa ra ityi cuahan ñuu Jerusalén, ta ra Jesús cuahan ra ityi nuu ñu nyicón chi ra. Ta maa ñu iyo cuñí ñu ta chihin cha yuhví ñu cuahan coyo ñu chata ra. Tyicuan ta cana siñ ra chi ndi uchi uvi ra cachicá noo chihin ra. Ta quichaha catyí ra cha cucuvi chi ra. ³³ Ta catyí ra:

—Tari cuhva nyehé ndo vityin, cua ndaa yo ityi cuahan ñuu Jerusalén nu

cucuhva cuenda ñu chi yuhu Rayi cha quichi nya gloria chi ra cuví nuu chi tata sutu, ta chi ra sacuahá cuenda ley vehe ñuhu. Ta cucatyí ra tyi cucúvi ta cucuhva cuenda ra chii chi ra inga ñuu. ³⁴ Ta cucuacu nyaa ra chii, cucañi ra chii, cutyicu s# ra chii. Ta cucahñi ra chii. Soco cha cu uñi quivi cunandote cha yaha cúvi —catyí ra Jesús.

Nu cachican ra Jacobo ta ra Juan noo tumañi iñi chi ra Jesús

(Mt. 20.20-28)

³⁵ Tyicuan ta ra Jacobo ta ra Juan, ra cacuví sehe ra Zebedeo, catuhva ra nu nyaá ra Jesús, ta catyí ra chi ra:

—Maestro, cuñi ndi cha sañun noo tumañi iñi chi ndi —catyí ra.

³⁶ Ta ndaca tuhun ra Jesús chi ra:

—¿Náa cha cuñi ndo cha sacuvi cha cuenda ndo?

³⁷ Ta canacahan ra ta catyí ra:

—Cuhva cha cunyaa ndi chuhun nu nyacá ñahun, noo ndi chiyo vahun, ta inga ndi chiyo satyun —catyí ra chi ra Jesús.

³⁸ Tyicuan ta catyí ra Jesús chi ra:

—Nyoho ña chitó ndo cha chicán ndo. ¿Atu cuví nyehe nyoho tindoho cha cuanyehe yuhu? ¿Atu cuví cuhun ndo tuhun chihi tari cuhun yuhu? —catyí ra chi ra.

³⁹ Ta canacahan ra:

—Cuví chi ndi.

Ta ra Jesús catyí ra:

—Cha ndicha vatyí cunyehe ndo tindoho ta cuhun

ndo tuhun chihi tari cuhun yuhu. ⁴⁰ Soco tuhun cha cunyaa ndo chiyo vahi ta chiyo satyin, ñima yuhu tahán chi cuhve chi ndo, soco maa Nyoo cucatyí yóo cha cuñihi nyatu cuan —catyí ra Jesús chi ra.

⁴¹ Cha cachiñi uchi ca tahan ra chicá noo chihin ra Jesús tuhun cuan, cacuxaan ra chihin ra Jacobo ta ra Juan. ⁴² Soco cana ra Jesús chi ra ta catyí ra chi ra:

—Chitó nyoho vatyí ra canyacá ñaha chi ñáyivi siqui ñuhu ñayivi, ñihi xaan yosó ra siqui ñu. ⁴³ Soco ñima tyicuan caa tahán chi sacuvi nyoho. Vatyí ra cuñi cucahnu ca, cuñi chi cuví ra musu tandihí ca ndo. ⁴⁴ Ta nya nyoho cha cuñi ndo cuví ndo nuu, cuñi chi cuví ndo musu tandihí ca ñu. ⁴⁵ Vatyí ni ri yuhu Rayi cha quichi nya gloria ta ña vachi vatyí sacuvi ñáyivi tyiño nui. Soco vachi vatyí sacuvi tyiño nuu ndo. Ta vachi vatyí cuhve ñayivi tari noo cha cutyiyahvi ta cusacaqui cuaha ñáyivi —catyí ra Jesús.

Nu sanduvaha ra Jesús chi ra Bartimeo ra cha cuaa

(Mt. 20.29-34; Lc. 18.35-43)

⁴⁶ Tyicuan ta cachaa coyo ra ñuu Jericó. Ta cua yaha ri ra ñuu cuan. Ta cuhva cha quita ra Jesús ñuu cuan cuaha xaan ñáyivi cuahan chata ra, in ri chihin ra cachicá noo chihin ra. Ta yucuan nyaá noo ra cuaa cha nañi Bartimeo. Sehe ra Timeo cuví chi ra. Nyaá ra cuan yatyin ri

yuhu ityi cuan, chicán ra caridada. ⁴⁷ Ta cha chiñi ra cuaa cuan tyi cua yaha ra Jesús ra ñuu Nazaret, quichaha cana chaa ra, ta catyí ra:

—¡Yoho Jesús, ra vachi tata ra David, cundahvi cuñi chii! —catyí ra canachaá ra.

⁴⁸ Cuaha ñu chasi yuhu ra na cutaxin ra, soco maa ra ñihi ca cana chaa ra ta catyí ra:

—¡Yoho ra vachi tata ra David, cundahvi cuñi chii! —catyí ra.

⁴⁹ Tyicuan ta chicuiñi ra Jesús ta catyí ra:

—Cana ndo chi ra.

Ta cacana ra chi ra cuaa cuan ta catyí ra chi ra:

—Sanii iñun. Nducuita, vatyí caná ra chuun —cacatyí ra chi ra.

⁵⁰ Tyicuan ta tuchi ñihno ra sahma ndichi ra. Ta ndava ra noo ta tuhva ra nuu nyaá ra Jesús. ⁵¹ Tyicuan ta quichaha ndaca tuhun ra Jesús chi ra:

—¿Ñáá cha cuñún cha sacuvi chuhun?

Ta nacahan ra cuaa cuan ta catyí ra:

—Maestro, cuñi cha sanduvahun chiti nui —catyí ra.

⁵² Ta catyí ra Jesús chi ra:

—Cuahan. Cha nduvahun vatyí chinó iñun chii.

Ta caa cuhva ri cuan cuví nanyehe ra cuaa cuan. Ta cuahan ra chata ra Jesús ityi cuahan ra.

11

Nu quihvi ra Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

¹ Cachaa coyo ra yatyin ri ñuu Jerusalén, nu nyaá ñuu Betfagé ta ñuu Betania. Ta yucu yutun Olivo nyaá ityi nuu chiin ca. Tyicuan ta catyí ra Jesús chi uvi ra chicá noo chihin ra:

² —Cuahan ndo chichi ñuu cha nyaá ityi nuu chiña. Ta nu cua chaa ndo cunañihi ndo noo burru chaa nuhñi ti, quiti ta quih ca tyayu cuví ti. Ndachi ndo chi ti, ta quichi nyaca ndo chi ti. ³ Ta tatu yóo cha ndaca tuhun ñáá tuhun sacuvi ndo tyicuan caa, catyí ndo chi ñu vatyí chiñuhú ti chi ra nyacá ñaha, ta numi ri cunanyaca ndo chi ti, catyí ndo chi ñu —catyí ra Jesús chi ra.

⁴ Tyicuan ta cuahan coyo ra, ta canañihi ra burru cuan nuhñi ti ityi cahnu yatyin ri noo yuvehe, ta candachi ra chi ti. ⁵ Ta suhva ra canyicú cuan catyí ra chi ra:

—¿Ñáá cha nyacuvi ndo? ¿Ñáá tuhun cha ndachí ndo burru chiña? —catyí ra chi ra.

⁶ Tyicuan ta canacahan ra tari cuhva cha catyí ra Jesús chi ra. Ta cachaha ra cuhun coyo ra. ⁷ Tyicuan ta caquehen ra burru cuan ta chinyaca ra chi ra Jesús. Ta catyiso ra sahma ra siqui ti, ta ndaa ra Jesús chi ti. ⁸ Ta cuaha ñu ndica ñu sahma ñu ityi cuahan ra, ta inga ñu chahnu ñu soco numa ta cachacun ñu.

⁹ Tyicuan ta ñu cha cuahan ityi nuu ra ta ñu cha cuahan ityi chata, quichaha cana chaa ñu ta catyí ñu:

—¡Cahnu xaan cuví Nyoo! ¡Na sacahnu yo chi ra vachi cuenda Sutu yo Nyoo! ¹⁰ ¡Sacahnu yo chi ra vachi nyacá ñaha tari chinyacá ñaha sutu chahnu yo ra David! ¡Cahnu xaan ca cuví ra nyaá andívi! —catyí ñu.

¹¹ Tyicuan ta quihví ra Jesús chichi ñuu Jerusalén, ta cuahan ra vehe ñuhu cahnu. Ta cha yaha nanyehé ra ityi cuan ityi ihya, ndaca chata ra ñuu Betania chihin ndi uchi uvi ra chicá noo chihin ra vatyí cha ñi.

Nu soco ra Jesús chi yutun higo cha ñahri chiti ñi nuu tun
(Mt. 21.18-19)

¹² Cha inga quívi quita coyo ra ñuu Betania cuan, ta cha ni ri ca cha cuahan ra chicá ityi ra cha noo soco chi ra Jesús.

¹³ Ta nyasava ri nanyehé ra noo tu higo cha nyaá numa. Ta chahan ra chinyehé ra tatu ñi chiti nuu tun, soco maa maa ri numa ri ñi, vatyí ta chaa ca quívi quita chiti tun. ¹⁴ Tyicuan ta cahan ra Jesús chihin tun, ta catyí ra chi tun tyehe caa:

—Ma coo ca chiti cachi ñáyivi nuun —catyí ra chi tun.

Ta ra cachicá noo chihin ra cachiñi ra cha cahan ra.

Nu tava ñehe ra Jesús chi ra caxicó chichi vehe ñuhu cahnu
(Mt. 21.12-17; Lc. 19.45-48; Jn. 2.13-22)

¹⁵ Yaha cuan ta nachaa coyo ra Jerusalén. Ta quihví tucu ra Jesús chichi vehe ñuhu cahnu. Ta quichaha tava ñehe ra chi ra caxicó ta ra casatá yucuan. Sanduva ra

mesa ñu canasamá xuhun chi ñáyivi. Ta suri tyicuan caa sacuvi ra chihin tyayu ra caxicó paloma. ¹⁶ Ta ña chaha ca ra ca cuiso ñu ñáa cha cuiso ñu ityi chichi vehe ñuhu cuan. ¹⁷ Ta quichaha sañaha ra chi ñu, ta catyí ra:

—Nu tutu Nyoo catyí chi: “Vehi, vehe nu chicán tahvi tandihi ñáyivi iyó siqui ñuhu ñáyivi cuvi”, catyí Nyoo. ¡Soco nyoho nasahá ndo vehe nu nyicú ra suhu! —catyí ra Jesús.

¹⁸ Ta ra cacuví nuu chi tata sutu ta ra casacuahá cuenda ley vehe ñuhu cachiñi ra cha cahan ra, ta quichaha canducu ra cuhva cha cacahñi ra chi ra vatyí cayuhví ra chi ra tyi cha tandihi ñáyivi iyo cuñi ñu cha sañahá ra. ¹⁹ Soco cuhva cha cua cuaa ra Jesús quita ri ra ñuu cuan chihin ra cachicá noo chihin ra.

Nu na ityi tu higo cha soco ra Jesús

(Mt. 21.20-22)

²⁰ Cha ñaha ri cha inga quívi cuan, nayaha coyo ra nu nanyaá tu higo cuan. Ta cananyehé ra vatyí na ityi nyacua nya yoho tun.

²¹ Tyicuan ta nichon ñi ra Pedro vatyí soco ra Jesús chi tun ta catyí ra chi ra Jesús:

—Maestro, nyehé tu higo cha socon, cha na ityi tun —catyí ra.

²² Nacahan ra Jesús, ta catyí ra:

—Chino ñi ndo chi Nyoo.

²³ Vatyí cha ndicha catyí chi ndo vatyí nya nyoho catyí ndo chi yucu ihya,

“Na canyaha ta cahun nu tyañuhu”, ta tatu ña chicá uvi ñni ndo, ta chinó ñni ndo, tuhun cahan ndo cua cuvi. ²⁴ Yucuan chaha catyí chi ndo vatyí tandihí cha chicán tahvi ndo, ta tatu chinó ñni ndo tyi cha naquehen ndo, tyicuan caa cucuvi. ²⁵ Ta tatu chicán tahvi ndo chi Nyoo ta cuxaán ndo chi inga ñu, saha ndo tichahnu ñni chi ñu, tacuhva vatyí Sutu ndo, ra nyaá andiví, saha tucu maa ra tichahnu ñni cuatyí ndo. ²⁶ Soco tatu ña sahá ndo tichahnu ñni chi ñu, ni ri Sutu ndo, ra nyaá andiví, ma saha ra tichahnu ñni cuatyí maa ndo.

Yóo cha chaha ityi chi ra Jesús vatyí sacuvi ra cha sacuví ra
(Mt. 21.23-27; Lc. 20.1-8)

²⁷ Tyicuan ta nachaa coyo ra Jerusalén. Ta cha niri ca cha chicá noo ra Jesús chichi vehe ñuhu cahnu cuan, catuhva ra cacuví nuu chi tata sutu, ta ra sacuahá cuenda ley, ta ra cacuví mandoñi nu nyaá ra. ²⁸ Ta candaca tuhun ra chi ra.

—¿Yóo cha tyaá tyiño chuun vatyí sacuvun tyehe caa? ¿Yóo cha chaha ityi chuun vatyí sacuvun? —ca-catyí ra.

²⁹⁻³⁰ Ta nacahan ra Jesús, ta catyí ra:

—Cua ndaca tuhun tucu yuhu noo tuhun chi ndo. ¿Yóo cha tachí chi ra Juan vatyí sacondutya ra chi ñáyiví? ¿Atu Nyoo tachí chi ra, o ñáyiví? Tatu catyí ndo chii, tyicuan ta cua catyí

tucu yuhu chi ndo yóo cha tyatyíño ihya chii —catyí ra Jesús chi ra.

³¹ Tyicuan ta quichaha cacuvi yuhu maa ra chihin tahan ra ta cacatyí ra:

—Tatu catyí yo tyi Nyoo tachí chi ra Juan, cucatyí ra chi yo: “Tu tyicuan caa, ¿ñáá tuhun ña chingo ñni ndo chi ra?” ³² ¿Ta yoso caa catyí yo tyi ñáyiví tachí chi ra? Ma cuvi —cacatyí ra, vatyí cayuhví ra chi ñáyiví, vatyí tandihí ñu cachinó ñni ñu vatyí cha ndicha cuenda Nyoo cahan ra Juan.

³³ Tyicuan ta quichaha cacatyí ra chi ra Jesús:

—Ña chitó ndi.
Tyicuan ta ra Jesús catyí ra chi ra:

—Ni yuhu ma catyí chi ndo yóo cha tyaá tyiño chii tyi sacuvi cha sacuví —catyí ra Jesús chi ra.

12

Nu chaha ra Jesús noo cuhva yoso caa cucahñi ñu chi ra

(Mt. 21.33-46; Lc. 20.9-19)

¹ Tyicuan ta chihin cuhva ihya quichaha cahan ra Jesús chihin ra, ta catyí ra chi ra:

—Chiyó noo ra cha tachí ra yoho tichaha ndiví. Ta chasí ra chaha. Ta savaha ra noo nu cuhñi ra tichaha ndiví. Ta savaha ra noo vehe sucun tacuhva vatyí cuví saha ra cuenda tandihí.

‘Yaha cuan ta chaha noo ra ñuhú cuan chi suhva ra casahá tyiño. Ta cuahan ra inga ñuu. ² Ta cha chaa quiví iyó chiti yoho cuan, chitoho

ñuhú cuan tachí ra noo musu nu nyicú ra casahá tyiño cuan vatyí cacán ra suhva chiti cha tahán chi chi ra. ³ Soco catiñ ra chi ra. Ta cacañi ra chi ra. Ta canatachi ra chi ra chihin nu ndaha nu ndi ra. ⁴ Tyicuan ta chitoho ñuhú cuan tachí ra chi inga musu, soco chi ra ihya catuchi ra yuu chi ra, catahvi ra xiñi ra, ta cacahan uhvi ra chi ra. ⁵ Ta inga tucu musu tachí chitoho ñuhú cuan. Ta chi ra cuan cachahñi ra. Yahá cuan ta tachí ra cuaha ca ra. Soco cacañi ra chi suhva ra. Ta chi suhva ca ra cachahñi ra. ⁶ Ta ndoo noo ri ca ra cha cuví tachi chitoho ñuhú cuan. Ican cuví sehe ra cha cuñi xaan ra. Ta nu ndihi tachi ra chi sehe ra vatyí cuñi maa ra chicá xiñi ra: “Cucasaha ra ñáyivi chi sehi”, cuñi ra chicá xiñi ra. ⁷ Soco nu cha sehe ra, ra casahá tyiño cuan catyí ra chi tahan ra: “Ican ra ihya cundoo chihin tandihi ihya. Na cahñi yo chi ra, ta ndoo maa yo chihin”, catyí ra. ⁸ Ta tyicuan caa catiñ ra chi ra ta cachahñi ra chi ra. Tyicuan ta cachituchi ra coño ñuhu ra ityi chata chacu cuan —tyicuan caa cuhva cahan ra Jesús chihin ra cuan.

⁹ Tyicuan ta ndaca tuhun ra Jesús chi ra ta catyí ra:

—¿Ñáá cha cusacuvi ra cuví chitoho ñuhú cuan? Cuiichi ra ta cuahñi ra chi ra casahá tyiño cuan. Ta cuhva ra ñuhú cuan chi inga ra. ¹⁰ ¿Atu ta sacuaha ca nyoho nu tutu Nyoo nu catyí chi tyehe caa?

Yuu cha ña cacañi ra

casavaha vehe cotyiño ra,

ican cuan cuví yuu cha niñi ca.

¹¹ Ican ihya cuví cha sacuvi Sutu yo Nyoo.

Ta tyaqui xaan tuhun cha cuenda chi yo, catyí chi nu tutu Nyoo —catyí ra Jesús chi ra cacuví nuu chi tata sutu cuan.

¹² Tyicuan ta canducu ra cuhva cha tyihi ra chi ra Jesús vehe caa vatyí cachitó ra vatyí cahan ra cuhva ihya soco cha cuenda maa ra. Soco vatyí cayuhví ra chi ñáyivi, casandoo ra chi ra, ta cuahan coyo ra.

Nu ndaca tuhun ra chi ra Jesús cha cuenda xuhun cha tavá gobiernu ñuu Roma

(Mt. 22.15-22; Lc. 20.20-26)

¹³ Tyicuan ta catachi ra suhva ra cuenda ra Herodes ta suhva ra fariseo nu nyaá ra Jesús vatyí casacahan ra chi ra ta coo cuatyí catyaa ra siqui ra. ¹⁴ Cha coyo ra ihya ta quichaha catyí ra chi ra Jesús:

—Maestro, chitó ndi vatyí cahún cha ndicha, ta ña quichahún cha cahán ñáyivi, ta ña natiñ cuendon cuhva caa ri ñu. Ta ndicha sañahún ityi Nyoo. Yucuan chaha cuñi ndi coto ndi, ¿atu vaha cha tyiyahvi yo cha chicán gobiernu ñuu Roma chi yo, o ña vaha? ¿Atu tahán chi cha tyiyahvi yo, o ña tahán chi? —cacatyí ra chi ra Jesús.

¹⁵ Soco ra Jesús chitó ra vatyí ñima cha vaha chicá xiñi ra, ta catyí ra chi ra:

—¿Ñáá tuhun cha cuñí ndo sandavi ñaha ndo chii? Nyaca ndo noo xuhun chii, na nyehi —catyí ra.

¹⁶ Caquichí nyaca ra chi ra. Ta cuhva cha nanyehé ra ta ndaca tuhun ra chi ra, ta catyí ra:

—¿Yóó chi nuu ihya, ta yóó chi sívi nyaá ihya? —catyí ra chi ra.

Ta canacahan ra ta cacatyí ra:

—Chi gobiernu.

¹⁷ Tyicuan ta catyí ra Jesús chi ra:

—Cuhva ndo chi gobiernu cha tahán chi chi ra. Ta cuhva tucu ndo chi Nyoo cha tahán chi Nyoo —catyí ra Jesús chi ra.

Ta iyo cacuñí ra tuhun cha nacahan ra.

Nu canducu tuhun ra saduceo síqui tuhun cha nandotó ndiyi

(Mt. 22.23-33; Lc. 20.27-40)

¹⁸ Tyicuan ta cuahan coyo suhva ra saduceo nu nyaá ra Jesús. Ican ra saduceo ihya catyí ra vatyí ña nandotó ndiyi. Yucuan chaha cacahan ra tyehe caa ta catyí ra chi ra Jesús:

¹⁹ —Maestro, tyaá ra Moisés tuhun yoso caa tahán chi sacuvi yo tatu noo rayii ta chihí ra ta ndoo ñasihi ra soco ña chicoo sehe ra chihin ña. Catyí ra vatyí tahán chi tandaha yañi ra chihin ñaha cha chihí yii cuan, tacuhva vatyí coo sehe ña cha cuenda ndi yañi ra. ²⁰ Noo chaha chiyo ucha tahan ra chihin yañi ra. Ra cha xihna ri

tandaha ra chihin noo ña, ta yori sehe ra chicoo. ²¹ Ta ra cu uvi tandaha ra chihin ñaha cha ndoo cuan. Ta suri chihí ra. Ta suri yori sehe ra chicoo. Ta tyicuan caa tucu cuví chihin ra cu uñi cuan. ²² Ta tyicuan caa ndi ucha tahan ra tandaha chihin ña. Ta ni noo ra ña cachiyó sehe ra chihin ña. Ta nu ndihi tuhun, chihí ndihi maa ña. ²³ Ta vityin, quivi cunandoto ñáyivi, ¿nya ra cucuvi yii ña? Vatyí ndi ucha tahan ra cuan chiyo chihin ña —cacatyí ra chi ra Jesús.

²⁴ Tyicuan ta nacahan ra Jesús ta catyí ra chi ra:

—Nyoho cahán tondo ri maa ndo, vatyí ña chitó ndo cha nyaá nu tutu tuhun Nyoo. Ta ni ña chitó ndo yoso caa tunyee iñi Nyoo. ²⁵ Vatyí quivi cunandoto ndiyi, ni ma tandaha ñu ta ni ma cuhva ñu sehe ñu tandaha, vatyí tari ángel cha nyaá andivi tyicuan caa cucuvi ñu. ²⁶ Ta tuhun cha nandotó ndiyi cuan, ¿atu ta sacuaha ca ndo nu libru ra Moisés yoso caa cahan Nyoo chihin ra nu cayú taca iñu cuan? Ta tyehe caa catyí ra chi ra: “Yuhu cuví Nyoo cuenda ra Abraham, ta cuenda ra Isaac, ta cuenda ra Jacob”, catyí Nyoo chi ra Moisés. ²⁷ Ta cha catyí Nyoo tyicuan caa cuñí chi catyí vatyí vasi cha naha cachihí ra, soco canyitó añima ra vatyí Nyoo ñima Nyoo cuenda ñu ndiyi cuví ra, soco Nyoo cuenda ñu nyitó cuví ra. Yucuan chaha catyí

vatyí nyoho cahán tondo ri ndo —catyí ra Jesús chi ra.

Ley cha niñi ca cha chaha Nyoo

(Mt. 22.34-40)

²⁸ Chaꝝ tucu noo ra sacuahá cuenda ley vehe ñuhu cuan, ta chiñi ra cacuvi yuhu ra. Ta vatyí chitó ra vatyí ra Jesús vaha nacahan ra nu cacahan ra yucuan, ta ndaca tuhun ra chi ra ta catyí ra:

—Chichi cha tandihí ley, ¿nya cha niñi ca sacuvi yo? —catyí ra.

²⁹ Ta nacahan ra Jesús ta catyí ra:

—Cha xihna ca sacuví yo cha nuu tandihí, ican cuví ihya: “Cuiñi ndo ñu Israel. Sutu yo Nyoo, noo ri maa ra iyó. ³⁰ Cuiñun chi Sutu yo Nyoo chihin cha niñi iñun ta chihin cha tandihí añimon, ta chihin cha tandihí cha chiñi tuñi xiñun, ta chihin cha tandihí tunyee iñun.” Ican ihya cuví cha xihna ca cha tahán chi sacuvi yo. ³¹ Ta cha cu uvi catyí chi: “Cuiñun chi tahun tari cuiñun chi maun.” Ñahri ca tuhun cha niñi ca ican saha nduvi tahan ihya —catyí ra Jesús.

³² Tyicuan ta ra sacuahá cuenda ley cuan catyí ra chi ra:

—Vaha xaan nacahun, Maestro. Ndicha cha catyún vatyí noo ri Nyoo iyó, ta yori ca Nyoo iyó, noo tuhun ri maa ra. ³³ Ta cha cuiñi yo chi Nyoo chihin cha niñi iñi yo ta chihin cha tandihí cha chiñi tuñi xiñi yo, ta chihin cha tandihí añima yo, ta chihin

cha tandihí fuerza yo, ta cuiñi yo chi tahan yo tari cha cuiñi yo chi maa yo, vale ca cuan ta ñima ca tandihí quití cha chahá yo chi Nyoo cha chahñi yo ta chahmí yo —catyí ra sacuahá cuenda ley cuan chi ra Jesús.

³⁴ Nyehe ra Jesús vatyí vaha nacahan ra chihin cha cachi xiñi ra. Ta catyí ra chi ra:

—Chiin ri ca cuiñi chi ta ñihun cuhva yoso caa nacuhvon añimon chi Nyoo na cunyaca ñaha ra —catyí ra Jesús chi ra.

Ta ni noo ca ñu ña cañá ca iñi ñu candaca tuhun ñu ñáá cha ndaca tuhun ñu chi ra Jesús.

¿Yóo chi tata vachi ra Cristo?

(Mt. 22.41-46; Lc. 20.41-44)

³⁵ Sañahá ra Jesús chichi vehe ñuhu cahnu, ta catyí ra:

—¿Yoso caa cha cacatyí ra sacuahá cuenda ley vehe ñuhu vatyí ra Cristo vachi ra tata ra David? ³⁶ Vatyí suri maa ra David chotyíñi Tatyí Ii chi ra ta catyí ra:

Cahan Suti Nyoo chihin Suti ra Cristo, ta catyí ra:

“Cunyata chiyo vahi nyacua nya cuhve chi ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

³⁷ ¿Yoso caa cha ra vachi tata ra David cuví chi ra Cristo, ta suri maa ra David catyí ra vatyí ra Cristo cuví Sutu ra? —catyí ra Jesús.

Ta cuaha xaan ñáyivi ny-
icú yucuan s̄i xaan cacuñi ñu
chiñi ñu tuhun cahán ra.

*Nu catyí ra Jesús vatyí iyó
cuatyí ra casacuahá cuenda
ley vehe ñuhu*

(Mt. 23.1-36; Lc. 11.37-54;
20.45-47)

³⁸ Nu sañahá ra Jesús ta
catyí ra tyehe caa:

—Saha ndo cuenda chi ndo
chihin ra casacuahá cuenda
ley vehe ñuhu, vatyí tahán
iñi ra cacuihno ra sahma
nañi ta chicá noo ra nuyahvi
tacuhva saha ndo ñáyivi chi
ra, ta cuhva ndo nocumi chi
ra. ³⁹ Maa ra cananducú
ra nu vaha ca cunyicu ra
chichi vehe ñuhu. Ta nu vaha
ca cacuñi ra cachi ra nyayu
nu iyó vico. ⁴⁰ Ta ican ra
catinyaá vehe ñu chihí ȳi,
vatyí ña cuví tyiyahvi ñu ñáá
xuhun tava ra siqui ñu. Ta
cuñi ra sacuvaha ra chi ra
nuu ñáyivi. Yucuan chaha
naha chicán tahvi ra nu tuvi.
Maa ra cuví cha cutachi tuñi
ca Nyoo chii —catyí ra Jesús.

*Noo cha chahá noo ñaha
chihí ȳi*

(Lc. 21.1-4)

⁴¹ Noo chaha nyaá ra Jesús
chichi vehe ñuhu cahnu
yatyin ri nu nyaá chatun nu
cumí ñu xuhun cha chahá
ñáyivi chi Nyoo. Ta nyehe ra
yoso caa tyihí ñáyivi xuhun
yucuan. Ta cuaha ñu tyayii
chahá ñu cuaha xaan xuhun.
⁴² Tyicuan ta chaá tucu noo
ñaha ndahvi chihí ȳi, ta
tyihí ña uvi tahan xuhun
cuatyí cha caha xaan nyaá.
⁴³ Tyicuan ta caná ra Jesús chi

ra cachicá noo chihin ra, ta
catyí ra chi ra:

—Cha ndicha catyí chi ndo
vatyí ñaha ndahvi chihí ȳi
ihya, cuaha ca chahá ña ta
ñima ca inga ñu catyihí xuhun
chiña. ⁴⁴ Vatyí tandihí ñu
cachahá ñu cha ndoo ri ca chi
ñu. Soco maa ña chihin cha
ndahvi ña chahá ña tandihí
cha cumí ña —catyí ra Jesús.

13

*Nu catyí ra Jesús vatyí cu-
tani vehe ñuhu cahnu*

(Mt. 24.1-2; Lc. 21.5-6)

¹ Cuhva cha cua quita ra
Jesús chichi vehe ñuhu cahnu
cuan, noo ra chicá noo chihin
ra catyí ra chi ra:

—¡Maestro, nyehe ñana cha
tyaqui yuu yihí vehe ihya!
¡Ñana cha nahnu vehe ihya!
—catyí ra chi ra Jesús.

² Soco nacahan ra Jesús, ta
catyí ra chi ra:

—¿Atu nyehún vehe nahnu
ihya? Soco catyí chuun vatyí
ma ndoo ni noo yuu coso
siqui tahan, vatyí tandihí cu-
tani —catyí ra Jesús.

*Seña cha cucuvi cha ni
cumañi ca naa ñáyivi*

(Mt. 24.3-28; Lc. 21.7-24;
17.22-24)

³ Tyicuan ta cuahan coyo
ra nya yucu yutun Olivo cha
nyaá inga chiyo xahva ityi
nuu vehe ñuhu cahnu. Ta
cuhva cha nyaá ra Jesús yu-
cuan, ra Pedro, ra Jacobo, ra
Juan, ta ra Andrés candaca
tuhun xehe ra chi ra:

⁴—Cuñi ndi cha catyun chi
ndi ama cucuvi tandihí tuhun
cha cahun tuhun. ¿Ñáá seña

cucuvi tatu cha cua cuvi?
—cacatyí ra.

⁵ Nacahan ra Jesús ta catyí ra:

—Saha ndo cuenda chi ndo tacuhva yori sandavi ñaha chi ndo. ⁶ Vatyí cuaha xaan ra cuquichi coyo ra, ta cuco-tyiño ra sivi ta cucatyí ra: “Yuhu cuví ra Cristo.” Ta cusandavi ñaha ra chi cuaha xaan ñáyivi.

⁷ Soco tatu chiñí ndo tuhun tyi iyó cuatyí ta cañí tahan ñáyivi, ma nayuhvi ndo. Vatyí tyicuan caa tahán chi cucuvi, soco ta chaa ca quivi cunaa ñáyivi. ⁸ Vatyí noo ñuu cucañi tahan chi chihin inga ñuu, ta ñáyivi cuenda noo gobiernu cucañi tahan ñu chihin ñáyivi cuenda inga gobiernu. Ta cucoo cha taan nahnú cuaha ri ityi. Ta cucoo tama. Ta cunaquiqui ñáyivi. Ta tyehe caa cua quichaha cha nyehe ñáyivi tindoho. ⁹ Soco saha ndo cuenda chi ndo. Vatyí cucuhva cuenda ñu chi ndo chi ra cacuví tyiño. Ta cucañi ñu chi ndo chichi vehe ñuhu. Cucuhva cuenda ñu chi ndo nuu gobernador ta nuu rey cha cuenda yuhu. Ta tyicuan caa cuví cahan ndo tuhun nuu ra. ¹⁰ Vatyí cha ni cumañi ca naa ñáyivi, cuñí chi cucutya tuhun Nyoo yoso caa sacacú ra añañima ñáyivi tandihi ñuu. ¹¹ Ta cuhva cha cunyaca ñu chi ndo nuu ra cacuví tyiño, ma caca xiñi ndo ñáá tuhun cucahan ndo, ni ma ndichi xiñi ndo. Cahan ndo cha catyí Nyoo chi ndo cha cahan ndo cuhva cuan. Vatyí ñima nyoho cucahan,

soco maa Tatyí li Nyoo. ¹² Yihí ra cunacuhva cuenda ra nyacua nya chi yañi maa maa ra. Ta sacuvi ra na cacahñi ñu chi ra. Ta yihí ñáyivi cunacuhva cuenda ñu chi sehe ñu. Ta yihí ñu cunaquiqui ñu siqui sutu ñu ta sihi ñu. Ta cunacuhva cuenda ñu chi ñu na cahñi ra chi ñu. ¹³ Tandihí ñáyivi cutasi cuñi nyehe ñu chi ndo cha cuenda yuhu. Soco tatu cunyehe iñi ndo nyacua nya nu ndihí, cucacu ndo.

¹⁴ 'Ra Daniel, ra profeta Nyoo ta cha naha, tyaá ra yoso caa cuahan tuhun noo cha cusacaquini nu ii xaan. Ta cusativi chi tandihí. Tatu nyehé ndo nanyaá yucuan nu ña tahán chi cuinanyaa, (nyoho cha sacuahá ndo ihya na cutuñi iñi ndo) cuñí chi cha cono tandihí ñu iyó Judea nya ityi yucu. ¹⁵ Ta ñu ñohó xiñi vehe quivi cuan, noo ñu, soco ma quihvi ñu chichi vehe ñu tava ñu ñáá cha tava ñu. ¹⁶ Ta ñu ñohó nu chiqui, ma cunuhu ñu nya vehe ñu cha cunaquehen ñu sahma ñu. ¹⁷ ¡Ndahvi ñusihí cha cañohó sehe quivi cuan! ¡Ndahvi tucu cuvi ñusihí cha chaxín sehe quivi cuan! ¹⁸ Cacan ndo chi Nyoo tacuhva cha ma tahan chi caca cono ndo quivi vichin. ¹⁹ Vatyí quivi tindoho cucuvi. Ta ni noo chaha ta cuví ca tyicuan caa nyata quivi chinqo ñuhu ñáyivi nyacua nya vityin. Ta ni ma coo ca tindoho tahán ihya nu cuahan ca chi. ²⁰ Tyehe ta ma sanducuti Sutu Mañi

yo tyembu cuan, yori maa cucacu. Soco cusanducuiti ra cha cuenda cha cuñi ra chi ñu cuenda ra, ñu cha nacachi maa ra.

²¹ Tatu yóo cha catyí chi ndo: “Nyehe ndo, ma ra Cristo ihya” o “Nyehe, ma ra nyaá yucuan”, ma chino iñi ndo. ²² Vatyí cuquichi ra casandaví ñaha, cucatyí ra tyi ra Cristo cuví ra. Ta yihí ra cucatyí ra vatyí profeta Nyoo cacuví ra. Ta cucasavaha ra seña, milagru, vatyí canducú ra kuhva sandaví ñaha ra nyacua nya chi ñu cha nacachi maa Nyoo tatu cuví chi ra. ²³ Soco saha vaha ndo cuenda vatyí yuhu cha sacote chi ndo cha ni cumañi ca cuví tyicuan caa —catyí ra Jesús.

Nu sacote ra Jesús yoso caa cuquichi tucu ra inga chaha

(Mt. 24.29-35, 42-44; Lc. 21.25-36)

²⁴ Ta catyí tucu ra Jesús tyehe caa:

—Soco quivi cha yaha tindoho, cunduñaa ñanyii. Ma cundichin ca yoo. ²⁵ Tiño cunacoyo andivi. Ta nyacua nya tandihi cha iyó andivi ta cunacanda. ²⁶ Tyicuan ta cunyehe ndo chi yuhu Rayi cha quichi nya gloria inga chaha, vachi nu vico chihin cha ndicha ñuhu Nyoo, ta chihin cha cahnu cuví ra. ²⁷ Tyicuan ta cutachi chi ángel ta cusandu in ri chi ñu nacachi nichanu siqui ñuhu ñayivi, nyacua nya nu ndihi ñuhu ñayivi ta nyacua nya nu ndihi andivi.

²⁸ Cutuñi iñi ndo kuhva tu higo ihya: Tatu nduyutya soco tun ta caña numa tun cha chitó ndo vatyí cha cuñi chaa quivi coo chiti, cha vachi vico savi. ²⁹ Ta suri tyicuan caa tatu cha nyehe ndo tuhun ihya, coto ndo tyi cha nyañaa yatyin quivi quichi tiqui. Cha nyañai yuvehe cuví cuan. ³⁰ Cha ndicha catyí chi ndo vatyí tandihi ihya cucuvi cha ni ri ca cha iyó ñayivi. ³¹ Tyicuan ta cunaa andivi ta ñuhu ñayivi cha iyó cha vityin. Soco tuhun cahin tyicuan ri cucuvi tari kuhva catyí.

³² Soco yori chitó ñáa quivi ta ñáa kuhva cucuvi tandihi ihya, ni ángel Nyoo, ni yuhu Sehe Nyoo. Noo tuhun ri maa Nyoo Suti cuví ra chitó.

³³ Yucuan chaha conyito vaha ndo, ta saha ndo cuenda ta cacan tahvi ndo, vatyí ña chitó ndo ñáa quivi cuchaa kuhva. ³⁴ Tari noo ra cha cua kuhun nu cañi. Ta cha ni cumañi ca kuhun ra, chaha cuenda ra vehe ra chi musu ra. Ta chaha ra tyiño chi noo noo ra. Ta tachi ra chi ra sahá cumi yuvehe cuan na saha ra cuenda. ³⁵ Yucuan chaha nyoho conyito ndo vatyí ña chitó ndo ñáa kuhva cuquichi ra cha cuví tari chitoho vehe cuan, an cha ni cua caaa, an ñuu, an kuhva cha chacú chaa loho, an cha ñaha ri. ³⁶ Conyito ndo coto sana iñi ndo ta quichi ra, ta nañihi ra chi ndo quixí ndo. ³⁷ Cha catyí chi nyoho, catyí tiqui chi tandihi ñayivi ñandihi. Na conyito ñu.

14

Nu canducu ra cuhva cati:n ra chi ra Jesús

(Mt. 26.1-5; Lc. 22.1-2; Jn. 11.45-53)

¹ Uvi ca quivi cumañi ta cua tahan chi vico cha nañi pascua ta vico cha tuhva ñu chachi ñu pan cha ñahri yuchan iya yihí. Ta ra cacuvi nuu chi tata sutu ta ra casacuahá cuenda ley vehe ñuhu canducú ra cuhva cati:n xehe ra chi ra Jesús ta cacahñi ra chi ra. ² Soco cacatyí ra chi ra tahan ra:

—Ma ti:n yo chi ra cha chichi vico vityin coto naquiqui ñáyivi —cacatyí ra.

Nu choso noo ñaha sihi ndutya vixi chahán chira Jesús
(Mt. 26.6-13; Jn. 12.1-8)

³ Ñohó ra Jesús ñuu Betania vehe ra Simón, cha catyí ñu: “Simón ra cha tyahyu coño.” Ta cha ni ri ca cha nyaá ra mesa, chaá noo ñaha sihi ndaha ña noo yutyi cha chingo chihin noo yuu cha nañi alabastro. Tyitu yihí chihin ndutya vixi chahán cha nañi nardo. Ta yahvi vavaha nyaá. Ta tahvi ña yutyi cuan ta choso ña ndutya vixi chahán cuan xiñi ra Jesús. ⁴ Soco suhva ra canyicú yucuan cacuxaan ra ta cacatyí ra chi tahan ra:

—¿Ñáá tuhun sativi ña ndutya vixi chahán cuan?
⁵ Tyehe ta quiyahvi cuan, cuenda mil cuñihi yo chihin chi, ta tyinyee chi chi ñu ndahvi —catyí ra.

Ta cahan ra chi ña.

⁶ Soco ra Jesús catyi ra:

—¡Saña ndo chi ña! ¿Ñáá tuhun cha sayangá ndo chi ña? Cha choso ña chii tyehe caa, cha vaha cuvi. ⁷ Vatyí ñu ndahvi tyicuan ri cua cunyaa ñu chihin ndo, ta cuvi sacuvi maa ndo cha vaha chihin ñu ñáá ri quivi cuñi ndo. Soco yuhu ñima tyicuan ri cua cunyai chihin ndo. ⁸ Ñaha sihi ihya sacuvi ña yoso cuhva cha cuvi chi ña. Choso ña ndutya vixi chahán coño ñuhi, cha ni cumañi ca cucuvi ta quihvi chichi ñuhu. ⁹ Cha ndicha catyí chi ndo, vatyí tandihi ri nicahnu ñuhu ñayivi nu cahan ñu tuhun Nyoo, cunacatyí tucu ñu tuhun cha sacuvi ñaha ihya, tacuhva nicohon iñi ñáyivi tuhun ña —catyí ra Jesús.

Nu nacuhva cuenda ra Judas chi ra Jesús chi ra xaan iñi chira

(Mt. 26.14-16; Lc. 22.3-6)

¹⁰ Yahá cuan ta ra Judas Iscariote, noo ra chichi cha uchi uvi tahan ra cachicá noo chihin ra Jesús, chahan ra chindatuhun ra chihin ra cacuvi nuu chi tata sutu, vatyí casandaa ra noo tyiño ta nacuhva cuenda ra chi ra Jesús chichi ndaha ra. ¹¹ Cuhva cha cachiñi ra ihya, cusii xaan cacuñi ra, ta catyí ra vatyí cuhva ra xuhun chi ra. Tyicuan ta quichahá nducu ra Judas cuhva nacuhva cuenda ra chi ra Jesús.

Nu cuxiñi ra Jesús chihin ra cachicá noo chihin ra

(Mt. 26.17-29; Lc. 22.7-23; Jn. 13.21-30; 1 Co. 11.23-26)

12 Cuví chi quivi quichaha vico cha chachí ñu pan cha ñahri yuchan iya yihí. Yucuan quivi cha vico pascua tuhvá ñu chahñi ñu mbee luhlu cha chahá ñu chi Nyoo. Ta ra cachicá noo chihin ra Jesús candaca tuhun ra chi ra, ta cacatyí ra:

—¿Nya maa maa cuñún cha sanduvaha ndi cha cuxiñun cha vico ihya?

13 Tyicuan ta tachí ra chi uvi tahan ra ta catyí ra chi ra:

—Cuahan ndo chichi ñuu, ta yucuan cunañihi ndo chi noo ra cha nyisó noo quivi ndutya. Cuahan ndo chata ra. 14 Ta nu quihvi ra, catyí ndo chi ra cuví chitoho vehe yucuan tyehe caa: “Ra Sacuaha cuñi ra coto ra nya nyaá cuarto nu cusanducahnu ra vico chihin ra cachicá noo chihin ra”, catyí ndo chi ra. 15 Ta maa ra cusañaha ra noo cuarto cahnu nu piso sucun chi ndo. Cha yahá nduvii, ta yucuan cusanduvaha ndo cha cuxiñi yo —catyí ra Jesús chi ra.

16 Cuahan coyo ra. Ta chaa coyo ra chichi ñuu. Canañihi ra tari cuhva catyí ra Jesús chi ra, ta casanduvaha ra cha cuxiñi ra cha vico pascua cuan. 17 Ta cha cuaa cuan chaa ra Jesús chihin ndi uchi uvi ra chicá noo chihin ra. 18 Ta cuhva cha canyicú ra nu mesa cachachí ra, ra Jesús catyí ra:

—Cha ndicha catyí chi ndo vatyí noo nyoho cha chachí ndo chihin cunaxico tuhun ndo chii.

19 Tyicuan ta canducuihya iñi ra ta quichaha candaca tuhun tahan tahan ri ra chi ra, ta cacatyí ra:

—¿Atu yuhu?

20 Ta nacahan ra Jesús ta catyí ra:

—Noo ra chichi cha uchi uvi ndo. Ra cha satyí pan ñin ri nu coho chihin, ican ra cuan cuví. 21 Vatyí yuhu Rayí cha quichí nya gloria cucuvi chii tari cuhva catyí nu tutu tuhun Nyoo. Soco ñndahvi ra ndahvi ra naxicó tuhun chii! Vaha taxin ca cha cuenda ra, tyehe ta ña cacú ra —catyí ra Jesús.

22 Cha ñi ri ca cha cachachí ra, ra Jesús quehen ra pan ta nacuhvā ra tyahvi nyoo chi Nyoo. Ta tahvi ra ta chahā ra chi tandihi ca ra, ta catyí ra:

—Quehen ndo. Ican ihya cuví coñe —catyí ra chi ra.

23 Yahā cuan ta quehen ra vaso vinu. Ta cha yahā cha nacuhvā ra tyahvi nyoo chi Nyoo, chahā ra chi ra. Ta tandihi ra cachihí ra cha ñohó chichi vaso cuan. 24 Ta catyí ra chi ra:

—Vinu cha yihí chichi vasu ihya tari ñiñi cuví. Ta chihin ñiñi tyihí tahan Nyoo tuhun chaa chihin ndo vatyí cucati cha cuenda cha vaha chi cuaha ñáyivi. 25 Cha ndicha catyí chi ndo vatyí ma coho que vinu nyacua nya quivi nachai nu nyacá ñaha Nyoo ta cohi vinu chaa —catyí ra Jesús chi ra.

Nu catyí ra Jesús tyi cucatyí ra Pedro tyi ña ñohó nuu ra chi ra

(Mt. 26.30-35; Lc. 22.31-34; Jn. 13.36-38)

²⁶ Cha yaha cha cachita ra yaa, ta caquita ra cuahan coyo ra nya yucu yutun Olivo. ²⁷ Tyicuan ta catyí ra chi tandihí ra:

—Tandihí nyoho cusandoo notuhun maa ndo chii vityin cha cuaa. Vatyí catyí chi nu tutu tuhun Nyoo tyehé caa: “Cucahñi chi ra sahá cumi mbee, ta mbee cacacono ti ityi cuan ityi ihya”, catyí chi. ²⁸ Soco cha yaha cha nandote, xihna que cuhun ityi Galileica can saha nyoho —catyí ra Jesús chi ra.

²⁹ Tyicuan ta quichaha catyí ra Pedro chi ra:

—Vasi tandihí ra sandoo ra chuun, soco yuhu ma sandoi chuun —catyí ra chi ra Jesús.

³⁰ Soco ra Jesús catyí ra chi ra:

—Cha ndicha catyí chuun, vatyí suri maa cha cuaa ihya, cha ni cumañi ca cuacu loho uvi chaha, yoho cucatyun tyi ña ñohó nuun chii uñi chaha —catyí ra Jesús chi ra Pedro.

³¹ Soco saniñi ra Pedro ta catyí ra:

—Vasi cúvi chuhun, soco ma tixehi cha ñohó nui chuun —catyí ra Pedro.

Ta tandihí ra cacatyí ra tyicuan caa.

Nu chicán tahvi ra Jesús nu cuví Getsemaní

(Mt. 26.36-46; Lc. 22.39-46)

³² Tyicuan ta cachaa coyo ra noo nu nañi Getsemaní. Ta

ra Jesús catyí ra chi ra cachicá noo chihin ra:

—Cunyicu ndo ihya ni ri cuhin cucacan tahvi —catyí ra Jesús.

³³ Ta quehen ra chi ra Pedro, ta ra Jacobo ta ra Juan cuahan chihin ra. Ta quichaha chica xaan iñi ra ta cutyoño cuñi ra. ³⁴ Ta catyí ra chi ra:

—Tuví iñi añime noo tucuihya iñi, ta cuñi cahñi chi chii. Ndo nyoho ihya, ta conyito ndo —catyí ra.

³⁵ Tyicuan ta cuahan ra chiin ca ityi nuu ca. Ta chicuiñi chiti ra nu ñuhú. Ta chicán ra chi Nyoo tatu cuvi cha ma nyehé ra tindoho cha cua cuvi chi ra cuhva cuan, catyí ra chicán tahvi ra.

³⁶ Ta nu chicán tahvi ra, ta catyí ra:

—Sutu Mañi yuhu, cha cuenda yoho ñahri cha ma cuvi chuun. Tu yoho ta cuñun na canyaha tindoho ihya chii. Soco ma cuvi tari cuhva cha cuñi mai, soco cuhva cha cuñi maun na cuvi —catyí ra Jesús chicán tahvi ra.

³⁷ Yaha cuan ta nachaa ra nu nyicú ra. Ta nyehé ra tyi caquixí ra. Ta catyí ra chi ra Pedro:

—Yoho Simón, ¿atu quixún? ¿Atu ña cuví conyiton ni noo hora? ³⁸ Conyito ndo ta çacan tahvi ndo tacuhva cha ma sanacava ra ña vaha chi ndo nu cuatyí. Cha ndicha, cuñi añima ndo sacuvi ndo cha vaha, soco coño ñuhu ndo vita xaan cuñi chi —catyí ra Jesús chi ra.

39 Tyicuan ta cuahan ra inga chaha. Ta chican tahvi ra suri maa cha chican ra cha xihna ri. 40 Tyicuan ta nachaa tucu ra inga chaha, nyehe ra tyi caquixi ra. Vatyí nicunyasi maa chiti nuu ra chihin cha cacuñi xaan ra cusu ra. Ta ña cachitó ra ñáá cha naca-han ra chihin ra Jesús. 41 Ta chahan ra cha cu uñi chaha, ta nachaa ra, ta catyí ra:

—Vityin ndicha cusu ndo, nyitatu ndo. Cha iyó vaha ri vityin, cha chaá cuhva cha cucuhva cuenda ra chi yuhu Rayi cha quichi nya gloria ndaha ra ca iyó cuatyí. 42 Ndicuita ndo, coho ndo. Cha vachi ra naxicó tuhun chii —catyí ra Jesús chi ra.

Nu catin ra chi ra Jesús

(Mt. 26.47-56; Lc. 22.47-53; Jn. 18.2-11)

43 Ni cahan ca ra Jesús ta chaá ri ra Judas, noo ra chichi cha uchi uvi tahan ra chicá noo chihin ra. Ta cuaha sindaro ta policia vachi coyo chihin ra canyisó ra mityi ta yutun. Vachi coyo ra cuenda ra cacuví nuu chi tata sutu, ta ra casacuaha cuenda ley vehe ñuhu, ta cuenda ra mandoñi. 44 Cha ni cumañi ca cachaa coyo ra, ra Judas, ra cha naxicó tuhun chi ra, chaha ra noo seña chi ra ta catyí ra:

—Ra cha tyayuhi, ican ra cuan cuví. Tin vaha ndo chi ra na cuhun ra chihin ndo.

45 Ta cuhva cha chaá ra tuhva ra nu nyaá ra Jesús ta catyí ra chi ra:

—Maestro.

Ta tyayuhu ra xitin ra. 46 Tyicuan ta catin ra chi ra Jesús ta cuahan ra vehe caa.

47 Soco noo ra cha nyaá yucuan tava ra mityi ra ta chah-nya ra soho musu ra cuví nuu chi tata sutu. 48 Tyicuan ta ra Jesús catyí ra chi ra cachaa coyo cuan:

—¿Atu vachi tin ndo chii chihin mityi ta chihin yutun, tari cha vatyí cuví yuhu noo ra suhu? 49 Ndi quivi chinyai chihin ndo sañahi chichi vehe ñuhu cahnú cuan. Ta ni noo chaha ña tin ndo chii. Soco cuví chi tyehe caa vityin, tacuhva chino cava tari cuhva catyí nu tutu tuhun Nyoo —catyí ra Jesús chi ra.

50 Tyicuan ta tandihi ra cachicá noo chihin ra, cachingo ra ta casandoo noo tuhun maa ra chi ra Jesús. 51 Soco noo ri ca ra tyivaa nycón ra chi ra, ndichí ra noo sinduhu ta catin tucu ra chi ra. 52 Soco sandoo ra sinduhu cuan ta cuahan vavaha ra vityiaa vityi cañi ra.

Nu cutuñi chi ra Jesús nuu ra cuví tyiño

(Mt. 26.57-68; Lc. 22.54-55, 63-71; Jn. 18.12-14, 19-24)

53 Tyicuan ta cachinyaca ra chi ra Jesús nuu ra cuví nuu chi tata sutu, ta candu in ri tandihi ra chihin ra cacuví mandoñi, ta ra casacuahá cuenda ley vehe ñuhu. 54 Ta ra Pedro cuahan ra chata ra nya sava ri, nyacua nya nuquehe vehe ra cuví nuu chi tata sutu cuan. Ta ndoo ra nyaá ra chihin policia sanasaá ra chi ra yatyin yunuhu.

55 Ra cacuví nuu chi tata sutu, ta tandihí ra cuví tyiño canducu ra ñáá noo cuatyí tyaa ra síqui ra Jesús, tacuhva cuví cacahñi ra chi ra soco ña cañihí maa ra. 56 Vasi cuaha ñáyivi cahán ñu cuendu síqui ra, soco ña nacachí tahan tuhun cahán ñu. 57 Yihí ñu candicuitá ñu ta catyaa ri maa ñu cuendu síqui ra, ta cacatyí ñu:

58 —Nyuhu chiñi ndi cha cahán ra vatyí cusatani ra vehe ñuhu cahnu cha savaha ñáyivi. Ta chichi cha uñi quivi cunacananyaa ra inga vehe ñuhu cha ñima ñáyivi savaha, na —catyí ñu.

59 Soco ni tyicuan caa ña nacachí tahan cha catyí ñu. 60 Tyicuan ta ra cuví nuu chi tata sutu ndicuitá ra mahñu nu nyicú tandihí ra yucuan, ta quichaha ndaca tuhun ra chi ra Jesús, ta catyí ra:

—¿Atu ña nacahan maun? ¿Ñáá cha cuví ihya cha cacahán ra sícun? —catyí ra chi ra.

61 Soco ra Jesús taxi ri nanyaá ra, ta ña nacahan maa ra. Ta ra cuví nuu chi tata sutu cuan ndaca tuhun ra chi ra inga chaha, ta catyí ra:

—¿Atu yoho cuvún Cristo, Sehe Nyoo ra cha iyó cha vaha chí?

62 Ra Jesús catyí ra chi ra:

—Ican, yuhu cuví. Ta nyoho cunyehe ndo chi yuhu Rayi cha quichi nya gloria, cucunyai chiyo vaha Nyoo ra cha iyó tandihí tunyee iñi chi. Ta cunyehe ndo chii quivi

quichi nu vico andivi —catyí ra chi ra.

63 Tyicuan ta ra cuví nuu chi tata sutu cuan, chahnya ra sahna ra tari noo seña vatyí ña tahan iñi ra, ta catyí ra:

—¿Ñáá ca cha ndaa cuñi yo? 64 Nyoho cha chiñi ndo vatyí chicoo cuatyí ra nuu Nyoo chihin tuhun cahán ra. ¿Yoso caa cuñi nyoho? —catyí ra.

Ta tandihí ra cacatyí ra vatyí tahan chi cúvi ra.

65 Tyicuan ta suhva ra quichaha tyicu si ra chi ra. Ta chasi ra nuu ra, ta cañi ra chi ra chihin chiqui ra ta cacatyí ra chi ra:

—¡Nacoto yóo cha cañi chuun! —cacatyí ra chi ra.

Ta policía cacatu ra nuu ra.

Nu catyí ra Pedro vatyí ña ñohó nuu ra chi ra Jesús

(Mt. 26.69-75; Lc. 22.56-62; Jn. 18.15-18, 25-27)

66 Ra Pedro nyaá ra ityi yuvi nuquehe. Tyicuan ta cha noo ñaha sahá tyiño chihin ra cuví nuu chi tata sutu cuan. 67 Ta cuhva cha nanyehe ña chi ra Pedro vatyí sanasaá ra chi ra yunuhu cuan, ndoo ña nyehé vavaha ña chi ra, ta catyí ña chi ra:

—Yoho ñandihí, chica noun chihin ra Jesús ra ñuu Nazaret cuan —catyí ña chi ra.

68 Soco ra Pedro tixehe ra, ta catyí ra:

—Ña ñohó nui chi ra, ña chité ñáá tuhun cahún —catyí ra chi ña.

Tyicuan ta quitá ra ityi yuvehe. Tyicuan ta chacu noo loho. 69 Tyicuan ta ñaha

cha nyaá tyiño yoo cuan, nanyehē tucu ña chi ra inga chaha ta quichahā catyi ña chi ra canyicú yucuan:

—Noo ra tahan ra cuan cuví ra ihyā —catyi ña.

⁷⁰ Soco tixehē ra inga chaha. Ta yaha suhva ri ca cuhva ta ra canyicú yucuan cacatyí tucu ra inga chaha chi ra Pedro:

—Cha ndicha vatyi noo ra yucuan cuví yoho, vatyi ra Galilea cuvún, vatyi tari cahán ñu, cahún —catyi ra chi ra.

⁷¹ Tyicuan ta iyo xaan tyanaha ra Pedro, ta catyi ra:

—¡Chitó vaha Nyoo tyi ña ñohó nui chi ra cha cahán nyoho tuhun! ¡Na cahñi Nyoo chii tatu ña ndicha cha cahín! —catyi ra.

⁷² Ta caa cuhva ri cuan chacu ri loho cha cu uvi chaha. Tyicuan ta nicohon iñi ra Pedro tuhun cha cahān ra Jesús chihin ra: “Cha ni cumañi ca cuacu loho uvi chaha, yoho cucatyun vatyi ña ñohó nuun chi yuhu uñi tahan chaha.” Nicohon iñi ra Pedro ta quichaha chacu chaa ra.

15

Nu nanyaq ra Jesús nuu ra Pilato

(Mt. 27.1-2, 11-14; Lc. 23.1-5; Jn. 18.28-38)

¹ Cuhva cha cundichin candu ñin ri ra cacuví nuu chi tata sutu chihin ra cacuví mandoñi ta chihin ra casacuahá cuenda ley vehe ñuhu ta tandihí ra cuví tyiño ñu Israel. Ta ra Jesús nuhñí ra, chinacuhva cuenda ra chi

ra chi ra Pilato. ² Ta ndaca tuhun ra Pilato chi ra, ta catyi ra:

—¿Atu rey cuenda ñu Israel cuví yoho?

Ta nacahan ra Jesús ta catyi ra:

—Ican, yuhu cuví. Ndicha cha cahún.

³ Ta ra cacuví nuu chi tata sutu cuaha xaan cha catyaa ra siqui ra. ⁴ Tyicuan ta quichahā ndaca tuhun tucu ra Pilato inga chaha chi ra, ta catyi ra:

—¿Atu ña nacahan maun? Nyehē yoso cha cuaha cha tyaá ra sicun.

⁵ Soco ra Jesús ña nacahan maa ra. Yucuan chaha ña chitó ra Pilato ñáá cha caca xiñi ra.

Nu cutuñi chi ra Jesús vatyi cucúvi ra

(Mt. 27.15-31; Lc. 23.13-25; Jn. 18.38—19.16)

⁶ Ta vico cuan tuhvá ra Pilato saña ra chi noo ra ñohó vehe caa, noo ra cha cacan maa ñáyivi. ⁷ Ta ñohó noo ra nañi Barrabás vehe caa cuan, ñin ri chihin inga ra cha cachahñi chi ñáyivi noo nu naquiqui ñáyivi siqui gobiernu. ⁸ Ta quichij coyo ñáyivi quichahā chican ñu chi ra Pilato na saña ra chi noo ra tari tuhvá maa ra. ⁹ Ta nacahan ra Pilato, ta catyi ra:

—¿Atu cuñi nyoho cha sañe chi Rey cuenda ñu Israel?

¹⁰ Tyicuan caa catyi ra vatyi tuví iñi ra vatyi ra cacuví nuu chi tata sutu cuan tasi cuñi ra chi ra Jesús tyi cuaha ñáyivi nyicón chi ra, yucuan chaha nacuhva cuenda ra chi ra. ¹¹ Soco ra cacuví nuu chi tata

sutu cuan catiyuhū ra chi ñáyivi na catyi ñu na saña ra chi ra Barrabás. ¹² Tyicuan ta ndaca tuhun ra Pilato chi ñu, ta catyí ra:

—¿Ta ñáá cha cuñi ndo sacuvi chihin ra cha catyí nyoho Rey cuenda ñu Israel chi? —catyí ra chi ñu.

¹³ Tyicuan ta nacanachaa ñu, ta catyí ñu:

—¡Na cúvi ra nu cruzi! —catyí ñu, canachaa ñu.

¹⁴ Ta catyí ra Pilato chi ñu:

—Soco ¿ñáá cha ña vaha sacuvi ra? —catyí ra.

Soco canachaa ca ñu ta catyí ñu:

—¡Na cúvi ra nu cruzi! —catyí ñu.

¹⁵ Tyicuan ta vatyí cuñi ra Pilato cuvaha ra nuu ñu, saña ra chi ra Barrabás. Tyicuan ta tyihí ra tyiño na ndoho ra Jesús, ta cha yaha cuan chaha cuenda ra chi ra vatyí cúvi ra nu cruzi.

¹⁶ Tyicuan ta chinyaca sindaro chi ra nuquehe vehe tyiño cuan. Ta casandu ñin ri ra tandihí sindaro. ¹⁷ Ta casacuihno ra noo sahmatyacu nyaa chi ra. Ta caquicu ra noo corona chihin ñu. Ta catyihí ra xiñi ra. ¹⁸ Yaha cuan ta quichaha cacana chaa ra siqui ra chacú nyaa ra chi ra, ta catyí ra:

—¡Nocumi chuun, yoho Rey cuenda ñu Israel! —catyí ra.

¹⁹ Ta cacañi ra xiñi ra chihin noo yutun, ta tyicú sii ra chi ra. Ta cachicuiñi chiti ra casaha ra tyi sacahnu ra chi ra. ²⁰ Cha yaha cha chacu nyaa ra chi ra tyicuan caa, tinyaq ra sahmatyacu cuan

chi ra, ta sandihvi noo ra sahmatyacu ra chi ra. Yaha cuan ta cuahan ra chihin ra vatyí cuatyaa ra chi ra nu cruzi.

Nu cuacúvi ra Jesús nu cruzi

(Mt. 27.32-44; Lc. 23.26-43; Jn. 19.17-27)

²¹ Yaha noo ra ñuu Cirene, nañi ra Simón. Sutu ra Alejandro ta ra Rufo cúvi chi ra. Ni cua nachaa ra cha chahan ra nu chiqui. Ta cuhva cha cua yaha ra ityí cuan, casaniñi sindaro chi ra na cuiso ra cruzi ra Jesús.

²² Ta cachinyaca ra chi ra Jesús noo nu nañi Gólgota. Ta cuñi chi catyí: Nu Cuví Yiqui Xiñi Ndiyí. ²³ Ta cachaha ra vinu nasaca chihin noo tatan cha nañi mirra coho ra. Soco ra Jesús ña chihí ra. ²⁴ Cha yaha catyaa sindaro chi ra nu cruzi, cachahan ra sihva chihin sahmatyacu ra ta nya ra saha ganaa caquehen ra sahmatyacu ra.

²⁵ Caa ñin cha ñaha ri catyaa ra chi ra nu cruzi. ²⁶ Ta letra cha catyaa ra xiñi cruzi cuan, catyí chi ñáá cuatyí ra. Ta catyí chi tyehe caa: “Ican ra ihya cúvi Rey cuenda ñu ñuu Israel.” ²⁷ Ta chinanyaa ra uvi ca cruzi nu chitacaq ra uvi tahan ra suhu, noo ra chiyo vaha ra, ta inga ra chiyo satyin ra. ²⁸ Ta tyicuan caa quitá chi tari cuhva catyí nu tutu tuhun Nyoo tyehe caa: “Sahá ñu tuhun tyi cúvi ra noo ra quiñi iyó.” ²⁹ Ta ñu yaha coyo chacú nyaa ñu chi ra. Ta quisí xiñi ñu, ta catyí ñu chi ra:

—¡Jaan! ¡Yoho cha catyūn tyi cusatanun vehe ñuhu cahnu, ta chichi cha uñi quivī cunacoñehun inga chaha!³⁰ ¡Sacacu maun chuun ta noo nu cruzi chiña! —catyí ñu.

³¹ Ta tyicuan caa tucu ra cacuví nuu chi tata sutu ta ra casacuahá cuenda ley vehe ñuhu, cachacú nyaa ra chi ra, ta catyí ra chi tahan ra:

—¡Chi inga ñu sacacu ra, soco ña cuví sacacu ra chi maa ra!³² Na noo ra nu cruzi vityin, na nyehe yo ta chino iñi yo tyi Cristo Rey cuenda ñu Israel cuví ra —catyí ra.

Ta nyacua nya ra tacaá inga cruzi inchiyo inchiyo xiin ra ta cacahán ra chi ra.

Nu chihī ra Jesús

(Mt. 27.45-56; Lc. 23.44-49; Jn. 19.28-30)

³³ Cuhva cha cua cu hora, tandihī ñuhu ñayivī nduñaa, nyacua nya caa uñi cha cha iñi. ³⁴ Ta suri cuhva cuan canachaa ra Jesús chihin tandihī fuerza ra, ta catyí ra:

—Eloi, Eloi, ¿lama sabac-tani? —ta cuñí chi catyí: Nyoo Suti, Nyoo Suti, ¿ñáá tuhun sandoo noo tuhun maun chii? —catyí ra.

³⁵ Suhva ra tayucu yucuan cachiñí ra ta catyí ra:

—¡Xihna! Caná chaa ra chi ra profeta Elías —catyí ra.

³⁶ Tyicuan ta chingo noo ra yucuan chiquehen ra noo tari caa xixan ta satyijī ra chihin vinu iya. Ta tyaá ra noo nu yutun ta satuhvā ra yuhu ra na coho ra, ta catyí ra:

—Cuātu ndo. Na nyehe yo tatu quichi ra Elías sanoo ra chi ra —catyí ra cuan.

³⁷ Tyicuan ta ñihi xaan canachaa ra Jesús, ta chihī ra. ³⁸ Ta sahma cha tacaá chichi vehe ñuhu cahnu ndatā sava maa chi, nya siqui ta nyacua nya ityi yuvi. ³⁹ Ta noo capitán cuenda sindaro Roma nanyaá ra yatyin nuu ra Jesús cuan. Cha nyehe ra yoso caa cana chaa ra, ta yoso caa chihī ra, ta catyí ra:

—Cha ndicha ndicha cuii vatyī Sehe Nyoo cuví chi ra ihya —catyí ra.

⁴⁰ Ta nya sava ri tayucu tucu suhva ñusihī canyehé ñu. Ta mahñu ñu cuan nanyaá cu María ñaha Magdala, ta cu María sihi ra José ta ra Jacobo ra tyivaa ca. Ta nanyaá tucu cu Salomé. ⁴¹ Ican ñusihī ihya cachinyicon chi ra Jesús, ta tyinyeé ñu chi ra quivī chica noo ra ityi Galilea. Ta siin ri nyicú cuaha ca ñu cha chaa coyo chihin ra Jerusalén cuan.

Nu chicuchī ñu chi ra Jesús

(Mt. 27.57-61; Lc. 23.50-56; Jn. 19.38-42)

⁴² Cuví chi quivī cha sanduvaha ñu cha cachi ñu vatyī inga quivī tuhvá ñu nyitatu.

⁴³ Ta cha cuaa cuan chaa ra José ra ñuu Arimatea. Noo ra cuví tyiño. Nyatú tucu maa ra nu cunyaca ñaha Nyoo. Ta ndachan cuñí ra ta quihvī ra nu nyaá ra Pilato, ta chican ra coño ñuhu ra Jesús chi ra. ⁴⁴ Iyo cuñí ra Pilato cha nacotō ra vatyī cha chihī ra Jesús. Ta cana ra chi capitán

vatyí ndaca tuhun ra tatu cha yaha_h chihí ra. ⁴⁵ Ta cha catyí capitán vatyí cha yaha_h chihí ra, ra Pilato chaha_h ra coño ñuhu ra chi ra José. ⁴⁶ Tyicuan ta sata_h ra José noo sinduhu cha chino_h chihin sahma finu cha ñañi lino, ta sano_h ra coño ñuhu ra. Ta siquí noo ra chihin sinduhu cuan. Yaha_h cuan ta chityihí ra chi ra noo chichi ñaña cha cachatya_h ra chichi noo yuu. Ta chasi_h ra yuhu ñaña cuan chihin noo yuu cahnu. ⁴⁷ Ta cu María ñaha Magdala cuan ta cu María sihi ra José, chaa coyo ñu nyehe ñu nu tyihí ra chi ra.

16

Nu nandoto ra Jesús

(Mt. 28.1-10; Lc. 24.1-12; Jn. 20.1-10)

¹ Yaha_h quiví nyitatú ñu. Tyicuan ta cu María ñaha Magdala ta cu María sihi ra Jacobo, ta cu Salomé sata_h ñu ndutya vixi chahán ta cuahan coyo ñu cua tyihi ñu coño ñuhu ra Jesús. ² Ta timingu cuví, quiví quichaha vitya, ñaha cuii ri cuhva cha vachi cundichin cuhva cha ni cua caña ñanyii, chaa_h coyo ñu nu ñaña. ³ Ta catyí ñu chi tahan ñu:

—¿Yóó cha cusacanyaha yuu yuhu ñaña cuan? —catyí ñu chi tahan ñu.

⁴ Soco cuhva cha nanyehe ñu, yuu cahnu cha nyasi_h yuhu ñaña cuan cha cuachiyó chi nya sava. ⁵ Quihví coyo ñu chichi ñaña yucuan. Ta nanyehe ñu chi noo ángel tari caa noo ra tyivaa, nyaá

ra chiyo vaha. Ta ñihno_h ra sahma cañi ta cuichin. Ta canayuhví ñu. ⁶ Soco catyí ra chi ñu:

—Ma yuhvi ndo. Nyoho nanducú ndo chi ra Jesús ra ñuu Nazaret, ra cha chihí nu cruzi. Soco cha nandoto_h ra. Ña ñohó ca ra ihya. Nyehe ndo nu chacun ra chi ra. ⁷ Cuahan ndo cua sacoto ndo chi ra Pedro ta chi inga ra cachica_h noo chihin ra. Catyí ndo chi ra vatyí na cuhun coyo ra ityi Galilea vatyí yucuan nyatú ra Jesús chi ra, tari cuhva catyí ra chi ra. Vatyí ra Jesús cha cuahan ra ityi nuu —tyicuan caa catyí ángel cuan chi ñu.

⁸ Tyicuan ta cuahan coyo vavaha ñu, vatyí suri canihí ñu cha cuenda cha yuhví ñu. Ta yori maa chihin cahán ñu tuhun cha cuenda cha yuhví ñu.

Nu tuví ra Jesús nuu cu María ñaha Magdala
(Jn. 20.11-18)

⁹ Cuví chi timingu quiví quichaha vitya cha nandoto_h ra Jesús. Yaha_h cuan ta xihna ca nuu cu María ñaha Magdala tuví ra. Maa ña cuví ñaha cha tava_h ñehe ra ucha tahan tatyí ña vaha. ¹⁰ Ta chahan ña chisacoto ña chi ra cachica_h noo chihin ra, vatyí canyicú cuihya ra ta cachacú chaa ra. ¹¹ Soco cuhva cha cachiñi_h ra vatyí iyó ra Jesús ta vatyí nyehe ña chi ra, ña cachino_h iñi ra.

Nu tuví ra Jesús nuu uvi tahan ra chica_h noo chihin ra
(Lc. 24.13-35)

¹² Cha yahā cuan, ra Jesús tuvī ra nuu uvi tahan ra cha cuahan coyo chica ityi ityi nu chiqui. Soco siin caa cuhva caá ra cananyehe ra chi ra. ¹³ Ta cuanuhu coyo ra ta sacoto ra chi tandihī ca ra. Soco suri ña cachinō iñi ra cha cacahan ra cuan.

Tuhun cha chahā ra Jesús chi ra cha tyatyñō ra chi

(Mt. 28.16-20; Lc. 24.36-49; Jn. 20.19-23)

¹⁴ Ta cuee ca ta tuvī ra Jesús nuu ndi uchi in ra cha cachicā noo chihin ra, cha ni ri ca cha canyicú ra nu mesa. Ta cahan ra chi ra cha cuenda cha ña cachinó iñi ra, ta cha cuenda cha candava añima ra vatyī ña cachinō iñi ra tuhun cahan ñu nyehē tyi nandoto ra. ¹⁵ Ta catyí ra chi ra:

—Cuahan ndo nicacahnu ñuhu ñayivī, ta cahan ndo chihin tandihī ñáyivī, ta catyi ndo chi ñu yoso caa sacacú Nyoo añima ñu. ¹⁶ Ta ñu cha chinó iñi ta condutya ñu, cucacu añima ñu. Soco ñu cha ña chinó iñi cundoo cuatyī ñu siqui ñu ta cunaa ñu. ¹⁷ Ta tandihī seña ihya cusacuvi ñu cha chinó iñi chii: Chihin sivi cutava ñehe ñu tatyī ña vaha. Cucahan ñu inga sahan cha ña chitó ñu. ¹⁸ Cutiin ñu coo, ta tatu coho ñu cha yihí venenu, ma saha cuehe chi ñu. Ta siin ri cutyiso ñu ndaha ñu siqui ñu cuhvī, ta cunduvaha ñu.

Nu nandaq xica ra Jesús andivī

(Lc. 24.50-53)

¹⁹ Nu ndihī cahan Sutu Mañi yo Jesús chihin ra, ta

nandaq xica ra andivī, ta chicunyaq ra chiyo vaha Nyoo. ²⁰ Tyicuan ta ra cachicā noo chihin ra quita ra ta chahan coyo ra chichan ra tuhun Nyoo yoso caa sacacú ra añima yo tandihī ri ityi. Suri maa Sutu Mañi yo tyinyee chi ra vatyī chahā ra cha sacuvi ra cuaha milagru. Ta tyicuan caa nyehé ñayivī tyi ndicha tuhun cacahan ra.

Tuhun Nyoo Cha Tyaa San Lucas

Nu sacuhun ra Lucas noo tuhun chi ra Teófilo

1-3 Cha chitón yoho Tata Teófilo, vatyi cha cuaha ñáyivi nducú ñu cuhva ta tyaa ñu nuu tutu tuhun cha cuví nu nyicú ndi. Tyaa ñu tari maa cuhva nacatyí ñáyivi chi yo, ñáyivi cha nyehe ta cahán tuhun ra Jesús nya quivi xihna ri. Ta vityin tahán tucu chi chi yuhu tyi sacote tuhun ra chuun. Vatyi cha yaha sacuahí ta nyehe vahi tandihi nya nu quichaha. Ta vityin ñaño ñaño ri cuatyai tuhun ra. ⁴ Vatyi coto vahun tyi ndicha cha sacoto ñáyivi chuun.

Nu sacoto noo ángel chi ra Zacarías ama cucacu ra Juan ra sacondutyá chi ñáyivi

⁵ Quivi cha cuví ra Herodes rey nicahnu Judea, chiyo noo tata sutu, chinañi ra Zacarías. Ta yihí ra cuenda ityi tata sutu cha chinañi Abías. Ta ñasihí ra chinañi ña Elisabet. Ta vachi ñu tata ra Aarón, ra chiyo ta cha naha. ⁶ Ta ñahri maa cuatyí ñu iyó nuu Nyoo. Vatyi vaha xaan quichahá ñu tuhun cahán Nyoo. Ta yori maa cuví tyaa cuatyí siqui ñu. ⁷ Soco yori maa sehe ñu chicoo. Vatyi cu Elisabet, ña cuví coo sehe ña. Ta siin ri ninduvi tahan ñu chahnu xaan ñu.

⁸ Ta noo quivi tahan chi ityi cuenda ra Zacarías cha

sacuvi ra tyiño nuu Nyoo. ⁹ Tari cuhva costumbre maa tata sutu, nyehe ra nya ra tahan chi nyatu chi. Ta tahan chi nyatu chi ra Zacarías cha quihvi ra chichi vehe ñuhu, vatyi cahmi ra cutu. ¹⁰ Cha ni ri ca cha ñohó ra chahmí ra cutu cuan, cuaha xaan ñáyivi chicán tahvi ñu ityi chata vehe. ¹¹ Yucuan ta tuví noo ángel cuenda Nyoo nuu ra Zacarías. Ta chicuinanyaa ra chiyo vaha arta nu chahmí ra cutu. ¹² Ta cha nanyehe ra Zacarías chi ángel cuan, iyo xaan cuñi ra. Ta yuhví xaan ra. ¹³ Soco ángel cuan catyí ra chi ra:

—Zacarías, ma yuhvun. Vatyi Nyoo chiñi ra tuhun cahún. Ta ñasihun cu Elisabet cucoo noo sehe ña. Ta Juan cusacunañun chi cue. ¹⁴ Sii xaan cucuvi chuun. Ta cuaha xaan ñu, cusii cuñi quivi cacu cue. ¹⁵ Vatyi sehun, cahnu xaan ra cucuví ra nuu Nyoo. Ma coho ra vinu ta ni ndixi. Ta ñihi xaan cuquihí Tatyí Ii Nyoo chi ra nyata cumañi cacu ra ta tandihi tyembu cha coo ra. ¹⁶ Ta cuaha xaan ñáyivi Israel cunyicon chi Sutu yo Nyoo cha cuenda ra. ¹⁷ Ta cucoo tunyee iñi Nyoo chi ra. Ta cuquihí xaan Tatyí Ii Nyoo chi ra. Vatyi cucuvi ra tari ra Elías, ra cuví profeta Nyoo ta cha naha. Ta cusanicoo vaha ra chi ñáyivi chihin sehe ñu. Ta cusañaha ra chi ñáyivi quiñi iyó na quichaha ñu tuhun cahán Nyoo. Tyicuan caa cusanduvaha ra chi ñáyivi ta cuatu tuhva ñu chi Nyoo

—catyí ángel chi ra Zacarías.

18 Ta ndaca tuhun ra Zacarías chi ángel, ta catyí ra:

—¿Yoso caa ta cote noo cha ndicha vaha? Vatyí yuhu cha chahnu xain. Ta ñasihi cha chahnu xaan ña ñandihí —catyí ra.

19 Ta ángel cuan quichaha catyí ra:

—Yuhu Gabriel nañí. Ta chiqué tyiño Nyoo. Maa ra tachí chii vatyí cahin nuun ta sacote tuhun vaha ihya chuun. 20 Ta vityin nduñihun. Vatyí ña chinó iñun tuhun cahín. Ta ma cuví cahun nyacua nya chino cava tuhun cahin chuhun —catyí ángel cuan chi ra.

21 Ta ñáyivi cha nyatú chi ra Zacarías ityi chata vehe, iyo xaan cuñi ñu ñáá tuhun cha cucuee xaan ra chichí vehe ñuhu. 22 Soco kuhva cha quita ra Zacarías, ña cuví maa cahan ra chihin ñu. Tyicuan ta tui iñi ñu vatyí iyó cha nyehe ra chichí vehe ñuhu cuan. Ta quichaha cahan ra chihin ñu chihin seña ri. Vatyí ña cuví cahan ra.

23 Ta quivi cha ndihí tyiño saha ra Zacarías vehe ñuhu cuan, ta cuanuhu ra nya vehe ra. 24 Ta cha yaha tuhun cuan chicohon sehe ñasihi ra, cu Elisabet. Ta ña quita maa ña chata vehe cha ni ri ca cha ohon yoo. Ta chicá xiñi ña: 25 “Tyehe caa sacuví Sutu Mañi yuhu chihin, tacuhva ma cahan cuehe ca ñáyivi chii”, chicá xiñi ña.

Nu sacoto noo ángel chi cu María vatyí cucacu ra Jesús

26 Nu cu iñu yoo cha ñohó sehe cu Elisabet, tachí Nyoo chi ángel Gabriel ñuu Nazaret ityi Galilea. 27 Vatyí cucahan ra chihin noo ñaha tyivaa cha nañí María. Ta cha nyaña cha tandaha ña chihin noo ra nañí José. Ta ra José cuan vachi ra tata rey David. 28 Ta tui ángel cuan nu nyaá ña. Ta quichaha catyí ra chi ña:

—Nocumi chuun, María. Ñihun tumañi iñi nuu Nyoo. Vatyí maa ra nyaá chuhun. Ta chi yoho nasocó xaan ca Nyoo nuu tandihí ca ñusihi —catyí ángel cuan chi ña.

29 Ta kuhva cha chiñi ña cha cahan ra, iyo xaan cuñi ña tuhun cahan ra. Ta ndichí xiñi ña: “¿Ñáá tuhun cha chaha ra ihya nocumi chi yo tyicuan caa?” ndichí xiñi ña.

30 Ta catyí ángel cuan:

—Ma yuhvun, María, vatyí ñihún tumañi iñi nuu Nyoo. 31 Vatyí cuacohon noo sehun. Ta sacunañun Jesús chi ra. 32 Cahnu xaan ra cuacuvi ra. Ta cunañi ra Sehe Nyoo ra cuvi nuu. Ta Nyoo Sutu Mañi yo cusacuvi ra rey chi ra. Tari cuví ra David, ra vachi ra tata. 33 Vatyí cunyaca ñaha ra chi ñáyivi Israel tandihí maa tyembu. Ta ma ndihí maa cha cunyaca ñaha ra —catyí ángel cuan chi ña.

34 Yucuan ta ndaca tuhun cu María chi ángel, ta catyí ña:

—¿Yoso caa cuahan tuhun ihya? Vatyí yuhu, ta coo ca yii.

35 Ta nacahan ángel ta catyí ra:

—Maa Tatyí Ii Nyoo cuquichi sicun. Ta tunyee iñi Nyoo cahnu cuquichi tari noo vico ta casi chi sicun. Yucuan chaha ra ii cha cucacu cunañi ra Sehe Nyoo. ³⁶ Tyicuan caa tucu cu Elisabet ñáyivi chuun. Cucacu noo sehe ña vasi cha chahnu ña. Ñaha cha catyí ñáyivi vatyí ña cuví maa coo sehe. Soco vityin cha ñohó sehe ña. Cha iñu yoo ñohó. ³⁷ Vatyí Nyoo ñahri cha ma cuví sacuvi ra —catyí ángel chi ña.

³⁸ Ta quichaha catyí cu María:

—Yuhu cuví musu Sutu yo Nyoo. Na sacuvi maa ra yoso cuhva catyún —catyí ña.

Yucuan ta cuahan ángel cuan.

Cuahan cu María cuanyehe ña chi cu Elisabet

³⁹ Cuví noo quivi cuan, numi xaan cuahan cu María noo ñuu ityi Judea nu maa ri maa yucu cuví. ⁴⁰ Ta quihvi ña chichi vehe ra Zacarías. Ta chaha ña nocumi chi cu Elisabet. ⁴¹ Cuhva cha chiñi cu Elisabet tuhun cahñ cu María, natyoño cha lee cha ñohó chichi ña. Ta chitu ña chihin Tatyí Ii Nyoo. ⁴² Ta chaa nacahan ña, ta catyí ña:

—Nyoo sahá ra tumañi iñi chuun cha nuu tandihi ñusihi. Ta nasocó ra chi sehun. ⁴³ ¿Ta yóo ñaha cuví yuhu? Vatyí quichi sihi Sutu Mañi yo quichi nyehe ña nu nyai. ⁴⁴ Cuhva cha chiñi tuhun cahñ, ta natyoño sehi cha ñohó chichi. Vatyí sii xaan cuví chi ra. ⁴⁵ Ta sii xaan cuñi añimon vatyí chinó iñun cha

cuacuvi tuhun cahán Nyoo chuhun —catyí cu Elisabet.

⁴⁶ Ta quichaha catyí cu María:

—Sacahní chi Nyoo chihin tandihi añime.

⁴⁷ Ta sii xaan cuví chii vatyí sacacú Nyoo añime.

⁴⁸ Vatyí cuví yuhu noo ñaha ndahvi ta Nyoo tñn cuenda ra chii. Ta vityin tandihi quivi cucatyí ñáyivi chii vatyí cahnu xaan tumañi iñi ñihi.

⁴⁹ Vatyí Nyoo, cahnu xaan cuví ra. Ta cahnu cha sacuví ra chihin. Ta ii xaan sivi ra.

⁵⁰ Ta tyicuan ri ndahvi cuñi ra chi tandihi ñáyivi cha sahá ñáyivi chi ra.

⁵¹ Cahnu xaan cha sacuví ra chihin tunyee iñi iyó chi ra.

Sanaá ra cuhva chicá xiñi ñu cahnu sahá chi.

⁵² Sanocueé ra chi ñu sacahnú chii. Ta ra cha ña cahnu sahá chii, sacucahnú ra chi ra.

⁵³ Chahá Nyoo cha vaha chi ñu cuñi coto cha vaha, ñu chitó vatyí chiñuhú Nyoo chi. Soco ñu tyayii cha cuñi maa tyi ñahri chiñuhu chi, chihin nundaha nu ndii ñu, sacuhún ra chi ñu.

⁵⁴ Tyinyeé ra chi ñáyivi Israel cha cuví musu ra.

Ta ña naá iñi ra chi ñu. Nyehé ndahvi ra chi ñu.

⁵⁵ Tari cuhva catyí Nyoo chi ra Abraham, sutu yo, ta chi sehe ra, tyicuan caa sacuví Nyoo tyicuan ri maa —catyí cu María.

56 Ta cu María ndoo ña chihin cu Elisabet uñi yoo. Ta cha yahā uñi yoo cuan ta cuanuhu ña nya vehe ña.

Quivi cacu ra Juan, ra cha sacondutya

57 Ta chaā quivi cha cacu cha lee sehe cu Elisabet. Cacu cue ta rayii cuvi cue. 58 Ta cha chiñi ñáyivi cha nyicú yatyin yuvehe ña ta ñáyivi chi ña cha tyicuan caa, sii xaan cuví chi ñu. Ta sii xaan cuñi tucu maa ña. Vatyí vaha xaan cha sacuvi Nyoo chihin ña. 59 Ta nu cu uña quivi cha cacu cue, chahan ñu chihin cue vehe ñuhu. Vatyí cuhva cuenda ñu chi cue chi Nyoo. Ta saha ñu circuncidar chi cue tari cuhva iyó maa ñu. Chahnya ñu chiin ñii cue nu cuví cue rayii. Ta cuñi ñu sacunañi ñu Zacarías chi cue tari sutu cue. 60 Soco sihi cue catyí ña:

—Ma cuvi. Juan, cunañi cue.

61 Ta quichaha catyí ñu:

—¿Ñáá tuhun sacunañún Juan chi cue? Yori ñáyivi chi ndo cha nañi tyicuan caa —catyí ñu.

62 Ta quichaha ndaca tuhun ñu chihin seña ri chi sutu cue. Vatyí coto ñu ñáá sivi cuñi ra cha cunañi cue. 63 Ta chican sutu cue noo vitu, ta nuu vitu cuan tyaa ra tyehe caa: “Juan cuví sivi cue”, tyaa ra.

Ta tandihi maa ñu cuan iyo xaan cuñi ñu tuhun cuan. 64 Ta nacahan ra Zacarías caa cuhva ri cuan. Ta quichaha sacahnu ra chi Nyoo. 65 Tandihi maa ñu iyó

yatyin ri yuvehe ñu, yuhvi xaan ñu tuhun ihya. Ta tandihi maa ñáyivi cha iyó yucu ityi Judea cuan nacatyí ñu chi tahan ñu tuhun ihya. 66 Ta tandihi maa ñáyivi cha chitó tuhun cuan, ndichi xiñi ñu, ta ndaca tuhun ñu chi tahan ñu:

—¿Yóó ra cuví cha lee cuan? —catyí ñu.

Vatyí ndicha, Nyoo nasoco xaan ra chi cue.

Nu sacahnú ra Zacarías chi Nyoo

67 Sutu cue, ra Zacarías, tyitú ra chihin Tatyí Ii Nyoo. Tyicuan ta quichaha cahan ra tuhun cha chahá Nyoo chi ra, ta catyí ra:

68 —Cahnu xaan ra cuví Sutu Mañi yo Nyoo cuenda yo ñu Israel.

Vatyí quichi ra nu nyicú yo, cha cuví yo ñáyivi chi ra.

Ta sacacu ra chi yo.

69 Ta chaha ra noo ra cahnu chi yo, cha cusacacu chi yo.

Tata ra David ra cha sacuvi tyiño nuu Nyoo vachi ra.

70 Tyicuan caa cahan Nyoo chihin yuhu ra cacuvi profeta cuenda ra ta cha naha.

71 Vatyí tyicuan caa cusacacu ra chi yo ndaha ra xaan iñi chi yo, ra cha tasi cuñi nyehé chi yo.

72 Tyicuan caa cundahvi cuñi nyehé ra chi ñáyivi chi yo ta cha naha.

Ta ma sanaa ra iñi ra tuhun cahan ra.

73 Ican ihya tuhun cahān Nyoo chihin ra Abraham sutu yo.

74 Catyí ra vatyí cusacacu ra chi yo ndaha ra xaan iñi chi yo.

Vatyí ma yuhvi ca yo sacahnu yo chi ra.

75 Ta maa ra sanducachi ra iyó yo nuu ra.

Ta vaha coo yo nuu ra tandihí quiví cha cuacoo yo ñáyiví —catyí ra Zacarías.

76 Ta catyí ra Zacarías chi cha lee cuan tyehe caa:

—Ta yoho sehi, profeta Nyoo cahnu cucatyí ñáyiví chuun.

Vatyí cuhun ityi nuu Sutu Mañi yo. ta cucahun tuhun ra chihin ñáyiví vatyí cha cuñí quichi ra.

77 Ta cusacoton chi ñáyiví vatyí cunasaha Nyoo tucahnu iñi cuatyí ñu.

Ta tyicuan caa ta cacu añima ñu.

78 Vatyí Sutu yo Nyoo cuñí ra chi yo. Ta cundahvi cuñí ra chi yo.

Ta saquichí ra noo ra tyinyeé chi yo. Tari noo ñuhu ñanyii cucuvi ra.

79 Vatyí chihin cha sañahá ra chi yo sacundichín ra nu nyicú yo nu ñaa iñi cha catyí cuatyí yo.

Ta cusañaha ra chi yo yoso caa quihvi yo ityi vaha —catyí ra Zacarías.

80 Ta cha luhlu cuan cuahan chahnu ra. Nyee cuñí ra chihin Tatyí li Nyoo. Ta

chicoo ra noo chiqui ndi nyacua nya quiví cha chicohon nuu ñáyiví Israel chi ra.

2

Quiví cacu ra Jesús (Mt. 1.18-25)

¹ Ta quiví cuan iyó noo ra nyacá ñaha, nañi ra Augusto. Tachí ra tyiño natyaa ra sivi tandihí ñáyiví nicahnu ñuhu ñáyiví. ² Ta quiví cuan ra Cirenio cuví ra ra nyacá ñaha tandihí ñuu ityi Siria.

³ Ta tahán chi cuhun tandihí ñáyiví nya ñuu ñu. Vatyí cuhva ñu sivi ñu yucuan.

⁴ Yucuan chaha quita ra José ñuu Nazaret ityi Galilea. Ta chahān ra ityi Judea ñuu Belén nu cacu ra David. Yucuan chahān ra vatyí tata ra David vachi ra. ⁵ Ta chahān ra chi cuhva ra sivi ra chihin cu María. Ta cha cuñí tandaha ña chihin ra. Ta ñohó sehe ña. ⁶ Ta chiquitahān chaa quiví cha cacu sehe ña cha ni ri ca cha ñohó ñu Belén cuan. ⁷ Ta yucuan cacu sehe nuu ña. Ta natyihí ña chi cue chichi sahma. Ta nandacun ña chi cue chichi noo nu chachí quití. Vatyí cuaha xaan ñáyiví chaa coyo ñuu cuan. Ta ña nuña ca ni minoo vehe nu cunyaa ñu.

Nu cahán ángel chihin ra sahá cumi mbee

⁸ Yatyin ñuu Belén cuan nyicú suhva ra casahá cumi mbee sana ra cha cha cuaa cuan. ⁹ Ta sana iñi ra ta tuví noo ángel Nyoo. Ta cha ndichin Nyoo Sutu Mañi yo ndundichin nicachico ri nu canyicú ra. Ta nayuhví xaan

ra. ¹⁰ Ta quichaha cahán ángel cuan, ta catyí ra tyehe caa:

—Ma yuhvi ndo. Vatyí cuacatyí mai noo tuhun chi ndo. Noo tuhun cha sii xaan cuacuvi chi tandihí ñáyivi.

¹¹ Vatyí vityin cacu ra sacacú añima ndo ñuu ra David. Noo ra cuví Cristo, ra cuví Sutu Mañi yo. ¹² Ta ihya cuví seña chahi chi ndo, cunyehe ndo chi cha lee cuan, siqui noo cue sahma. Catuví cue chichi noo nu chachí quití

—catyí ángel chi ra casahá cumi mbee cuan.

¹³ Ta caa cuhva ri cuan chaá coyo cuaha xaan ca ángel casacahnú ra chi Nyoo, ta cacatyí ra:

¹⁴ Sacahnu yo chi Nyoo nu nyaá ra gloria.

Ta ñáyivi iyó siqui ñuhu ñáyivi cha ñihi tumañi iñi ra, na coo taxi añima ñu, catyí angel cuan.

¹⁵ Yucuan ta cuanuhú coyo ángel cuan gloria. Tyicuan ta ra casahá cumi mbee quichahá catyí ra chi ra tahan ra:

—Coho ndo Belén. Cunyehe yo ñáá cha cuví. Vatyí maa Sutu yo Nyoo sacotó chi yo.

¹⁶ Tyicuan ta numi xaan cuahan coyo ra Belén. Ta nañihí ra chi cue chihin cu María ta ra José. Ta catuví cue noo nu chachí quití. ¹⁷ Ta yahá cha canyehe ra chi cue, ta canacatyí ra chi ñu ñáá ndihí tuhun cahán ángel chihin ra cuenda cha lee cuan. ¹⁸ Ta tandihí ñu chiñi tuhun cahán ra, iyo xaan cuñi ñu. ¹⁹ Soco cu María ta cuhva chicá ri xiñi ña tuhun

cuan. ²⁰ Ta ra sahá cumi chi mbee cuan cuanuhú coyo ra. Ta casacahnú ra chi Nyoo cha cuenda cha cachiñi ra ta canyehe ra. Vatyí chinó cava tandihí cha catyí ángel chi ra.

Nu cuacuhva cuenda ñu chi ra Jesús chi Nyoo vehe ñuhu cahnu

²¹ Ta nu cu uña quivi, sahá ñu circuncidar chi cue, tari cuhva tuhva maa ñu. Ta sacunañi ñu chi cue, Jesús. Suri maa sivi cha catyí ángel chi cu María quivi cha cumañi ca cohon sehe ña.

²² Ta cha yahá quivi cha tahan chi vatyí ndundi ñu nuu Nyoo, tari cuhva catyí maa ley Nyoo cha tyaa ra Moisés, tyicuan ta cuahan ñu Jerusalén. Vatyí cuacuhva cuenda ñu chi cue chi Nyoo.

²³ Sacuvi ñu tyicuan caa vatyí in caa maa catyí ley tyehe caa: “Tandihí rayi cha cuví sehe nuu ñu, cucuhva cuenda ñu chi Nyoo”, catyí ley cuan.

²⁴ Ta chahan ñu chicuhva cuenda ñu uvi tahan quití tari cuhva catyí maa ley Sutu yo Nyoo nu catyí chi tyehe caa: “Cuhva ndo uvi tahan cucu o uvi tahan ndicuiya”, catyí ley cuan.

²⁵ Ta quivi cuan iyó noo ra ñuu Jerusalén cha nañi Simeón. Ta cuví ra noo ra vaha, ra sacahnú chi Nyoo. Ta nyatú tuhva ra nya quivi cusacacu Nyoo chi ñáyivi Israel. Ta yihí ra Tatyí Ii Nyoo.

²⁶ Ta sacotó Tatyí Ii Nyoo chi ra vatyí ma cúvi ra cha ni ri ca cha ta nyehe ca ra chi ra sacacú chi ñu Israel, ra cuví Cristo, ra cha cusaquichi

Sutu yo Nyoo. ²⁷ Ta ra cuan chahan ra vehe ñuhu cuhva catyí maa Tatyí Ii Nyoo chi ra. Cuhva cuan chahan tucu sutu ta sihi cha lee cuan chinyaca ñu chi cue vehe ñuhu cahnu, vatyí sacuvi ñu tari cuhva catyí maa ley. ²⁸ Ta quehen ra Simeón chi ra Jesús. Ta tyihí sucun ndaha ra chi ra. Ta quichaha sacahnu ra chi Nyoo. Ta catyí ra:

²⁹ —Sutu Mañi yuhu. Na cúvi mai vityin chihin cha vaha.

Vatyí cha sacuvun cha catyun chi yuhu cha cuví sehun.

³⁰ Vatyí cha nyehí chihin nui chi ra cusacacu chi ndi.

³¹ Vatyí sañahun chi ra nuu tandihí ñáyivi.

³² Cha catyí ra ta cucahnu ñáyivi Israel nuu inga ñáyivi.

Ta ican ra cuví ra cha sacundichín ñáñima tandihí inga ñáyivi cha ñima ñu Israel cuví. Vatyí cusacuvi ra na cutuñi iñi ñu tuhun Nyoo —catyí ra Simeón.

³³ Ta ra José chihin sihi ra Jesús, iyo xaan cuñi ñu cha cahan ra Simeón tuhun cha lee cuan. ³⁴ Yucuan ta chicán tahvi ra Simeón chi Nyoo chaha ñu. Ta catyí ra chi cu María sihi ra Jesús:

—Nyehé chi cha lee ihya. Vatyí cuaha xaan ñáyivi cuchino iñi ñu chi ra quivi coto ñu tuhun ra, ta cucacu ñáñima ñu. Soco cuaha ñu ma chino iñi ñu chi ra, ta cunaa ñu. Ta cucahan ñu chi ra. ³⁵ Ta cha tyicuan caa

cusanatuvi ra cha caa ñáñima noo noo ñáyivi. Soco cha cuenda yoho, María. tari cha uhvi cha yahá sava noo tyicaa ñáñima ñáyivi, tyicuan caa cha uhvi cunyhún cha catyí cha lee ihya —catyí ra Simeón.

³⁶ Ta yucuan ñohó tucu noo ñaha cha cuví profeta Nyoo. Ta cha chahnu xaan ña. Nañí ña Ana. Ta sehe ra Fanuel noo ra vachi tata ra Aser cuví chi ña. Luhlu xaan ña ta tandaha ña, ta ucha ri cuiya chiyo ña chihin yí ña ta chihí ri ra. ³⁷ Ta cha cumi xico cumi cuiya chihí yí ña. Ta vehe ñuhu cahnu ña quitá ña, vatyí ndiyaca ta ñiyaca chicán tahvi ña chi Nyoo. Ta iyó cuhva cha ña chachi ña cha ni ri ca cha chicán tahvi ña. ³⁸ Ta cuhva cha ñohó ra José ta cu María chihin cha lee, cha ña nu canyicú ñu. Ta nacuhva ña tyahvi nyoo chi Nyoo. Ta quichaha cahan ña tuhun ra Jesús chihin tandihí ñáyivi cha nyatú tuhva cha quita ñuu Jerusalén chichi ndaha ra ñuu Roma.

Nu cuanuhu ñu nya Nazaret

³⁹ Cha yahá cha sacuvi ñu tandihí maa yoso caa catyí ley Sututu yo Nyoo, ta cuanuhu ñu nya Galilea nya ñuu ñu nu nañí Nazaret. ⁴⁰ Ta ra Jesús cuahan chahnu ca ra. Ta cuahan ndunyeé ca ra ta cuahan chicoo ca cha chiñi tuñi Nyoo. Vatyí nasoco Nyoo chi ra.

Nu ñohó ra Jesús chichi vehe ñuhu

⁴¹ Ra José chihin sihi ra Jesús ndihí cuiya ri tuhva

ñu chahán nya Jerusalén cha vico pascua. ⁴² Ta quivi ndihí ra Jesús uchi uvi cuiya, chahan tandihí ñu Jerusalén tari tuhvá maa ñu chahán cha vico. ⁴³ Ta quivi ndihí vico ta cuandichí ñu, ta ra Jesús ndoo ra Jerusalén. Ta ña saha ñu cuenda. ⁴⁴ Cuñí maa ñu vatyí cuandichí ra mahñu nu tuvi ñáyivi cuan. Yucuan chaha ñahri chicá iñi ñu chicá ityi ñu noo quivi. Tyicuan ta nanducu ñu chí ra chichi nu tuvi ñáyivi cuan, ⁴⁵ ta ña nañihí ñu chí ra. Tyicuan ta cuanuhu chata ñu cuananducu ñu chí ra nya Jerusalén.

⁴⁶ Cha yaha cha uñi quivi ta nañihí ñu chí ra chichi vehe ñuhu cahnu cuan. Nyaá ra chihin ra sacuahá cuenda ley vehe ñuhu. Ta tyasohó ra cuan tuhun cahán ra. Ta ndacá tuhun ra tuhun chí ra. ⁴⁷ Ta tandihí ñu chiñí tuhun cahán ra, iyo xaan cuñí ñu chihin cha chiñi tuñi ra, ta chihin tuhun cha nahán ra. ⁴⁸ Cuhva cha nanyehé sutu ra ta sihi ra chí ra, iyo xaan cuñí ñu. Ta sihi ra catyí ña chí ra:

—Sehe luhli. ¿Ñáá tuhun cha sacuvun chí ndi tyehe caa? Sutun ta yuhu chica xaan iñi ndi ta nanducu xaan ndi chuun —catyí ña.

⁴⁹ Tyicuan ta catyí ra Jesús:

—¿Ñáá tuhun cha nanducu ndo chí? ¿Atu ña chito ndo vatyí ñiñi cuñí chí cha cahin tuhun Suti chihin ñáyivi? —catyí ra.

⁵⁰ Soco ña cutuñí iñi ñu tuhun cahán ra.

⁵¹ Tyicuan ta cuanuhu ra chihin ñu nya Nazaret. Ta quichahá ra tuhun cahán ñu. Ta sihi ra naquehen vaha ña tandihí tuhun ihya chichi añima ña. ⁵² Yucuan cuví nu cuacuahnu ca ra Jesús. Ta cuahan chaa ca cha chiñi tuñi xiñi ra. Ta sii xaan cuví chí Nyoo chihin ra ta ñáyivi ñandihí.

3

Ra Juan, ra sacondutya, cahán ra tuhun Nyoo nuu ñáyivi

(Mt. 3.1-12; Mr. 1.1-8; Jn. 1.19-28)

¹ Nu ndihí chahun cuiya cha cuví ra Tiberio rey cahnu ñuu Roma, ta ityi Judea nyacá ñaha ra Poncio Pilato. Ta ra Herodes nyacá ñaha ra Galilea. Ta yañi ra, ra Felipe nyacá ñaha ra Iturea chihin Traconite. Ta ra Lisaniás nyacá ñaha ra Abilinia quivi cuan. ² Ta ra Anás chihin ra Caifás, ican ra cuví ra ra cacuví nuu chí tandihí tata sutu. Ta quivi cuan cahán Nyoo chihin ra Juan sehe ra Zacarías noo nu chiqui ndi.

³ Ta ra Juan chicá noo ra tandihí ñuu cha nyaá yatyin ri nu nyaá noo yuvi cahnu cha nañí Jordán cahán ra tuhun Nyoo chihin ñáyivi. Ta catyí ra chí ñu na ndu uvi iñi ñu cuatyí ñu ta na condutya ñu. Tyicuan caa ta Nyoo saha ra tucahnu iñi chí ñu, catyí ra.

⁴ Tyehe caa cuví tari kuhva catyí nu libru cha tyaa ra Isaiás profeta Nyoo ta cha naha. Ta catyí ra:

Chiñí yo cha caná chaa noo ra
noo nu chiqui ndi, ta
catyí ra:

“Tari sanduvahá ndo noo
ityi, tyicuan caa
sanduvaha ndo añima
ndo vatyí cuaquichi
Sutu Mañi yo.

Nuña ndo noo ityi ndoo chi ra
na quihvi ra añima ndo.

⁵Tari cha sanandutú ndo noo
ticoho,

ta tari sandundaá ndo noo
yucu cahnu,

ta tari sandundoó ndo cha
yacua,

ta tari sanduvií ndo nu
quiñi caa, tyicuan caa
nasama ndo cuhva iyó
ndo.

⁶Tyicuan caa ta tandihi ñáyivi
ta nyehe ñu vatyí Nyoo
chaha ra cha cacú
añima ñu.”

⁷Ta tyicuan caa cahán ra
Juan chihin ñáyivi. Yucuan
ta cuhva cha chiñí ñu tuhun
cahán ra, ta catyí ñu chi ra
vatyi na sacondutya ra chi ñu.
Yucuan ta quichaha catyí ra
chi ñu:

—¡Nyoho tari noo tata coo
xaan cuví ndo! ¿Yóó cha
sañaha chi ndo vatyí chihin
cha condutya ri ndo ta ma
tachi tuñi ca Nyoo chi ndo?

⁸Nasama ndo cuhva iyó ndo,
na nyehe ñáyivi vatyí cha ndu
uvi ñni ndo cuatyí ndo. Ta ma
catyí ndo vatyí tata ra Abra-
ham vachi ndo. Vatyí nyacua
nya noo yuu ihya, Nyoo cuví
sananduvi ra noo ñáyivi chi
ra Abraham. ⁹Tari yutun cha
ña chahá chiti, tyicuan caa
cuví ndo. Vatyí ña sacuví ndo

tari cuhva cuñí Nyoo. Ta yu-
tun cha ña chaha chiti, cah-
nya ñáyivi chi tun. Ta cahmi
ñu chi tun. Tyicuan caa tucu
nyoho cha cuñí cuiri cuhun
ndo nu cayu ñuhu —catyí ra
Juan.

¹⁰Yucuan ta quichaha
ndaca tuhun ñáyivi chi ra:

—¿Yoso caa sacuvi ndi, cuñí
yoho? —catyí ñu.

¹¹Ta nacahan ra Juan, ta
catyí ra:

—Yóó ra cha iyó uvi tahan
camisa, tahán chi cuhva ra
noo chi ra cha ñahri chi. Ta
yóó ñu cha iyó cha cachi,
tahán chi cuhva ñu cha cachi
ñu ñahri chi —catyí ra.

¹²Ta chaá coyo tucu suhva
ra catavá xuhun cuenda go-
biernu Roma, ta cuñí ra con-
dutya ra. Ta candaca tuhun
ra chi ra Juan:

—Maestro, ¿yoso caa sacuvi
tucu nyuhu? —catyí ra.

¹³Ta catyí ra Juan chi ra:

—Tari cuhva catyí ley tava
ndo xuhun. Ta ma tava ndo
cuaha ca.

¹⁴Yucuan ta quichaha
candaca tuhun tucu suhva
sindaro chi ra, ta catyí ra:

—Ta nyuhu tucu, ¿yoso caa
sacuvi ndi? —catyí ra.

Ta nacahan ra Juan ta catyí
ra:

—Ma tinyaa ca ndo cha chii
ñáyivi. Ta ma tyanaha ndo
chi ñu. Ma tyaa ndo cuatyí
siqui ñu tatu ñahri cuatyí ñu.
Ta ndoo ndo vaha yoso cuhva
yahvi ndo —catyí ra Juan.

¹⁵Iyo cuñí ñáyivi tuhun
cahán ra Juan. Ta cuñí ñu
tyi ican ra cuví Cristo, ra cha

sacacú chi yo. ¹⁶ Soco ra Juan catyí ra chi tandihí ñu:

—Cha ndicha vatyí sacondutyé chi ndo chihin ndutya. Soco cha yaha yuhu cuhin cuquichi inga ra cusacondutya chi ndo chihin Tatyí li Nyoo ta chihin ñuhú. Iyó ca tunyee iñi chi maa ra, ta ñima ca yuhu. Vatyí ña nañé cha cuví musu ra ta ñiri cha ndachi ñi xityin ndichan ra. ¹⁷ Tari noo ra cha cuanaquehen vaha ñi, ta natyihí vaha ra chichi yaca. Ta cahmi ra mihin. Tyicuan caa cuví maa Sutu Mañi yo chihin yo. Tatu chinó iñi yo chi ra, cunaquehen vaha ra chi yo, ta cunyicu yo chihin ra. Soco tatu ña chinó iñi yo chi ra cutyihí ra chi yo anyaya nu cayu ñuhú cha ma ndahva ca maa —catyí ra Juan.

¹⁸ Ta tyehe caa cahan ra Juan chihin ñu. Ta cuaha xaan ca tuhun cahan ra nuu ñu tyi cuaquichi Sehe Nyoo ta cua sacacu ra chi yo. ¹⁹ Ta cahan ra Juan chi ra Herodes cha cuenda tandihí cuii cha ña vaha nyacuví ra. Vatyí naquehen ra chi cu Herodías, ñasihí ra Felipe yañi ra. Ta cuaha ca cha ña vaha nyacuví ra. ²⁰ Soco ra Herodes tahn chi cha tyasohó ra tuhun ihya soco ña cuñí ra. Nu ndihí tuhun tyihí ndihí ra chi ra Juan vehe caa.

Quiví cua condutya ra Jesucristo
(Mt. 3.13-17; Mr. 1.9-11)

²¹ Cumañi ca cha cohon ra Juan vehe caa sacondutya ra

chi tandihí ñáyivi. Ta sacondutya tucu ra chi ra Jesús. Ta cha ñi ri ca cha chicán tahvi ra Jesús chi Nyoo ta nuña andivi. ²² Ta nyehe ra Tatyí li Nyoo quichí siqui ra tari noo paloma. Ta tyacu noo ndusu andivi cha catyí tyehe caa:

—Yoho cuvún Sehi cha cuñí. Ta sñi xaan cuñí chuhun —catyí ndusu cuan.

Ñáyivi vachi ra Jesucristo tata

(Mt. 1.1-17)

²³ Oco uchi cuiya ra Jesús ta quichaha saha tyiño ra tyiño Nyoo. Ta tandihí ñáyivi cuñí maa ñu vatyí sehe ra José cuví chi ra. Ta ra José, sehe ra Elí cuví chi ra. ²⁴ Ta ra Elí, sehe ra Matat cuví chi ra. Ta ra Matat, sehe ra Leví cuví chi ra. Ta ra Leví, sehe ra Melqui cuví chi ra. Ta ra Melqui, sehe ra Jana cuví chi ra. Ta ra Jana, sehe ra José cuví chi ra. ²⁵ Ta ra José, sehe ra Matatías cuví chi ra. Ta ra Matatías, sehe ra Amós cuví chi ra. Ta ra Amós sehe ra Nahum cuví chi ra. Ta ra Nahum, sehe ra Esli cuví chi ra. Ta ra Esli, sehe ra Nagai cuví chi ra. ²⁶ Ta ra Nagai, sehe ra Maat cuví chi ra. Ta ra Maat, sehe ra Matatías cuví chi ra. Ta ra Matatías sehe ra Semei cuví chi ra. Ta ra Semei, sehe ra José cuví chi ra. Ta ra José, sehe ra Judá cuví chi ra. ²⁷ Ta ra Judá, sehe ra Joana cuví chi ra. Ta ra Joana sehe ra Resa cuví chi ra. Ta ra Resa, sehe ra Zorobabel cuví chi ra. Ta ra Zorobabel, sehe ra Salatiel cuví chi ra. Ta ra Salatiel, sehe ra Neri cuví chi ra. ²⁸ Ta ra Neri, sehe ra Melqui cuví

chi ra. Ta ra Melqui, sehe ra Adi cuví chi ra. Ta ra Adi, sehe ra Cosam cuví chi ra. Ta ra Cosam, sehe ra Elmodam cuví chi ra. Ta ra Elmodam, sehe ra Er cuví chi ra. ²⁹ Ta ra Er, sehe ra Josué, cuví chi ra. Ta ra Josué, sehe ra Eliezer cuví chi ra. Ta ra Eliezer, sehe ra Jorim cuví chi ra. Ta ra Jorim, sehe ra Matat cuví chi ra. ³⁰ Ta ra Matat, sehe ra Leví cuví chi ra. Ta ra Leví, sehe ra Simeón cuví chi ra. Ta ra Simeón, sehe ra Judá cuví chi ra. Ta ra Judá, sehe ra José cuví chi ra. Ta ra José sehe ra Jonán cuví chi ra. Ta ra Jonán, sehe ra Eliaquim cuví chi ra. ³¹ Ta ra Eliaquim, sehe ra Melea, cuví chi ra. Ta ra Melea, sehe ra Mainán cuví chi ra. Ta ra Mainán, sehe ra Matata cuví chi ra. Ta ra Matata, sehe ra Natán cuví chi ra. ³² Ta ra Natán, sehe ra David, cuví chi ra. Ta ra David, sehe ra Isaí cuví chi ra. Ta ra Isaí, sehe ra Obed cuví chi ra. Ta ra Obed, sehe ra Booz cuví chi ra. Ta ra Booz, sehe ra Salmón cuví chi ra. Ta ra Salmón, sehe ra Naasón cuví chi ra. ³³ Ta ra Naasón, sehe ra Aminadab cuví chi ra. Ta ra Aminadab, sehe ra Aram cuví chi ra. Ta ra Aram, sehe ra Esrom cuví chi ra. Ta ra Esrom, sehe ra Fares cuví chi ra. Ta ra Fares, sehe ra Judá cuví chi ra. ³⁴ Ta ra Judá, sehe ra Jacob cuví chi ra. Ta ra Jacob, sehe ra Isaac cuví chi ra. Ta ra Isaac, sehe ra Abraham cuví chi ra. Ta ra Abraham sehe ra Taré cuví chi ra. Ta ra Taré, sehe ra Nacor cuví chi ra. ³⁵ Ta ra Nacor, sehe ra Serug cuví chi ra. Ta ra Serug, sehe ra Ragau

cuví chi ra. Ta ra Ragau, sehe ra Peleg cuví chi ra. Ta ra Peleg, sehe ra Heber cuví chi ra. Ta ra Heber, sehe ra Sala cuví chi ra. ³⁶ Ta ra Sala, sehe ra Cainán cuví chi ra. Ta ra Cainán, sehe ra Arfaxad cuví chi ra. Ta ra Arfaxad, sehe ra Sem cuví chi ra. Ta ra Sem, sehe ra Noé cuví chi ra. Ta ra Noé, sehe ra Lamec cuví chi ra. ³⁷ Ta ra Lamec, sehe ra Matusalén cuví chi ra. Ta ra Matusalén sehe ra Enoc cuví chi ra. Ta ra Enoc, sehe ra Jared cuví chi ra. Ta ra Jared, sehe ra Mahalaleel cuví chi ra. Ta ra Mahalaleel, sehe ra Cainán cuví chi ra. ³⁸ Ta ra Cainán, sehe ra Enós cuví chi ra. Ta ra Enós, sehe ra Set cuví chi ra. Ta ra Set, sehe ra Adán cuví chi ra. Ta ra Adán, sehe Nyoo cuví chi ra.

4

Nu nducú nyehe cuihna chi ra Jesús

(Mt. 4.1-11; Mr. 1.12-13)

¹ Ta chitú ra Jesús chihin Tatyí Ii Nyoo cha yahā condutya ra. Yucuan ta quitā ra nu cuví yuvi cahnu Jordán ta cuanuhu ra. Ta Tatyí Ii Nyoo chinyacā chi ra noo nu chiqui ndü. ² Yucuan chinyaa ra uvi xico quivi. Ta nducú nyehe cuihna chi ra. Ña chachi maa ra quivi cuan. Yahā cuan ta quichaha chisoco ra. ³ Yucuan ta quichaha catyí cuihna chi ra:

—Tatu ndicha cha Sehe Nyoo cuví chuun, catyí chi yuu cha catuví ihya, na nanduvi pan.

⁴ Ta ra Jesús nacahan ra, ta catyí ra:

—Catyí tuhun Nyoo tyi ñima chihin cha cachi ri ñáyivi ta conyito ñu. Soco conyitó tucu añima ñu chihin tandihi tuhun cahán Nyoo —catyí ra Jesús chi cuihna.

⁵ Yucuan ta quehen cuihna chi ra Jesús. Ta cuahan ra chihin ra noo nu sucun ca. Ta numi ri sañaha ra tandihi nu nyacá ñaha ñáyivi siqui ñuhu ñayivi. ⁶ Ta cuihna catyí ra chi ra Jesús:

—Ndaha yuhu nyaá tandihi ñayivi ihya. Vatyí chaha Nyoo cha cunyaca ñahi tandihi ihya siqui ñuhu ñayivi. Ta cuví cuhve yóo chi cuñí mai cuhve. ⁷ Cuhve tandihi ñayivi cuan chuun tatu yoho ta cuiñi chitun nui, ta sacahnun chii —catyí cuihna cuan chi ra Jesús.

⁸ Soco ra Jesús catyí ra chi cuihna:

—Canyaha chuun nui, cuihna. Vatyí nyaá tuhun cahán Nyoo ta catyí chi tyehe caa: “Noo ri chi maa Nyoo sacahnu yo. Ta ñin ri chi maa ra quichaha yo.”

⁹ Yahá cuan ta quehen tucu cuihna cuan chi ra Jesús. Ta chinyaca ra chi ra nya ñuu Jerusalén. Ta sandaa ra chi ra xiñi vehe ñuhu cahnu. Ta quichaha catyí ra chi ra Jesús:

—Tatu ndicha cha Sehe Nyoo cuví chuun, sandupehla nyacua nya nu ñuhú. ¹⁰ Vatyí nyaá nu catyí chi nu tutu Nyoo tyehe caa:

Nyoo cusaquichi ra ángel, quichi saha cuenda chuun.

¹¹ Cunaquehen ra chuun chihin ndaha ra. Ta

ma cuhva ra cha taxin chahun chihin yuu —catyí ra chi ra.

¹² Tyicuan ta nacahan ra Jesús, ta catyí ra:

—Soco catyí tucu nu tutu Nyoo tyehe caa: “Ma nducu nyehun chi Sutu Mañi yo Nyoo”, —catyí ra.

¹³ Ta cuihna ña cuví sandahvi ñaha ra chi ra Jesús. Ta cuahan ra suhva quivi.

Nu quichaha ra Jesús cahan ra tuhun Nyoo chihin ñáyivi

(Mt. 4.12-17; Mr. 1.14-15)

¹⁴ Cha yaha tuhun cuan, ta nachaa ra ityi Galilea. Ta tyitú ra yihí chihin tunyee iñi Tatyí Ii Nyoo. Ta cahán ñáyivi tuhun ra tandihi ri ityi. ¹⁵ Ta sañahá ra chi ñáyivi nu cuví vehe ñuhu tandihi ri ñuu. Ta tandihi ñu sacahnú ñu chi ra.

Nu nyaá ra Jesús Nazaret ñuu nu chahnu ra

(Mt. 13.53-58; Mr. 6.1-6)

¹⁶ Tyicuan ta nachaa ra Jesús nya Nazaret, ñuu nu chahnu ra. Ta noo quivi nyitátú ñáyivi, ta quihvi ra chichi vehe ñuhu, tari tuhva maa ra. Ta chicunanyaá ra vatyí cua sacuaha ra tuhun Nyoo. ¹⁷ Ta chaha ñu noo libru Nyoo chi ra cha tyaa ra Isaías ra profeta Nyoo ta cha naha. Ta cuhva cha nuña ra, nañihí ra noo nu catyí tyehe caa. Ta quichaha sacuaha ra:

¹⁸ Nyaá Tatyí Ii Nyoo chihin vatyí maa ra tachí chii.

Vatyí nacachí ra chii vatyí sañahi tuhun vaha

ra chi tandihí ñáyivi ndahvi.

Tachí ra chii vatyí sanduvahi chi ñu uhvi añima.

Tachí ra chii vatyí sacote tuhun ra chí ñu nyaá ndaha ra ña vaha, vatyí cusacacu Nyoo chí ñu.

Tachí ra chii vatyí sanyehi chí ñáyivi cuaa.

Ta sacote chí ñu nyehe tindoho vatyí cucacu ñu.

19 Ta sacote chí ñu vatyí cha chaá quívi cha chahá Nyoo tumañi iñi chí ñu.

20 Ndihi sacuahá ra ta nacasi ra nu libru cuan. Ta nacuhvá ra chí noo ra cha nyaá vehe ñuhu cuan. Ta chicunyaá ra. Yucuan ta tandihí ñáyivi cha nyicú cuan ndoq ñu nyehe ñu chí ra.

21 Yucuan ta quichaha catyí ra chí ñu:

—Vityin quívi ihya chino cava tuhun cha nyaá nu libru cha sacuahí nuu ndo —catyí ra Jesús chí ñu.

22 Tandihí ñu, vaha cahán ñu tuhun ra Jesús. Ta iyo cuñí ñu tuhun cha cahán ra vatyí vaha xaan cha cahán ra. Ta quichaha ndaca tuhun ñu chí tahan ñu:

—¿Atu ñima ra ihya cuví sehe ra José?

23 Ta quichaha catyí ra Jesús chí ñu:

—Chité cha nacacá iñi ndo. Vatyí tyehe caa cua catyí ndo chii: “Tatu ra sanduvahá cuvún, sanduvaha xihna ca chí maun. Tandihí cha chiñi ndi cha sacuvún ñuu Capernaum. Sacuvi tucu ñuu maun vityin.”

24 Ta catyí tucu ra Jesús:

—Cha ndicha vatyí ni noo ra profeta Nyoo, ta ña quichaha ñáyivi ñuu ra chí ra.

25 Ta cha ndicha catyí chí ndo vatyí cuaha xaan ñu chihí yí chiyó Israel ihya cuiya cha chicá noo ra Elías. Ta cuiya cuan ña coon savi uñi cuiya sisava. Ta cuaha xaan tama chiyó. 26 Soco ña tachí Nyoo chí ra Elías vatyí tyinyee ra chí ni noo ñu chihí yí Israel cuan. Soco tachí Nyoo chí ra nu nyaá noo ñaha chihí yí ñuu Sarepta cha nyaá yatyin ñuu Sidón.

27 Ta tyicuan caa tucu cuaha ra yihí cuehe cha tyahyu coño chí chiyó Israel quívi chicá noo ra Eliseo, profeta Nyoo. Soco ña nduvahá ni noo ra Israel cuiya cuan. Minoo ri ra Naamán ra ñuu Siria nduvahá —catyí ra Jesús.

28 Ta cha chiñi ñáyivi nyicú vehe ñuhu cuan tuhun cuan, cuxaan xaan tandihí cuii ñu.

29 Ta nducuita ñu. Ta tiñ ñu chí ra Jesús. Tava ñu chí ra xiñi noo yucu nya yuhu ñuu, vatyí tuchi ñu chí ra yucuan.

30 Soco ra Jesús yaha ri ra mahñu ñu ta cuahan ra.

Noo ra cha yihí tatyí ña vaha chí

(Mr. 1.21-28)

31 Ta cuahan ra Jesús Capernaum cha nyaa Galilea quívi nyitatú ñáyivi. Ta quichaha sañaha ra chí ñáyivi. 32 Ta iyo cuñí ñu tuhun cahán ra. Vatyí ñihi cahán ra tari noo ra iyó vaha ityi chí cha cahán.

33 Ta chichi vehe ñuhũ cuan nyaá noo ra cha yihĩ tatyĩ ña vaha chi. Ta quichaha canachaa ra, ta catyĩ ra:

34 —Saña chi ndi, yoho Jesús ra ñuu Nazaret. ¿Ñáá tuhun cha tyihun chuun chihin ndi? ¿Atu vachi sanaun chi ndi? Yuhu, ñohó nui chuun. Ta chité vatyĩ Sehe Nyoo cuvĩ chuun —catyĩ tatyĩ ña vaha cuan sacahan chi chi ra cuan.

35 Ta cahan ra Jesús chihin tatyĩ ña vaha cuan, ta catyĩ ra: —Taxi ri. Saña chi ra ndahvi chiña —catyĩ ra.

Tyicuan ta tatyĩ ña vaha cuan sanduva chi ra cuan nu ñuhú. Ta quitã tatyĩ cuan chi ra ta cuahan. Ta ñahri ca sacuvi chi chi ra ndahvi cuan. 36 Tandihĩ ñáyivĩ nayuhvĩ ñu. Ta quichaha catyĩ ñu chi tahan ñu:

—¿Ñáá túhun cuvĩ ihya? Ra Jesús ihya chihin cha iyó ityi chi ra ta chihin tunyee iñi ta tachi ra chi tatyĩ ña vaha cuan na quita. Ta quichaha chi nu cahán ra —catyĩ ñu.

37 Ta tandihĩ ri ityi cahán ñáyivĩ tuhun ra Jesús.

Nu sanduvahã ra Jesús chi maha tyiso ra Simón Pedro
(Mt. 8.14-15; Mr. 1.29-31)

38 Ta quitã ra Jesús chichi vehe ñuhu cuan. Ta chaã ra vehe ra Simón. Ta tyiso ra Simón cuhvĩ ña chihin cahñi. Ta quichaha cahán ñu chihin ra Jesús cha cuenda ña. 39 Ta nanyehe noo ra nu catuvĩ ña. Ta quichaha catyĩ ra chi cahñi cuan vatyĩ na quita. Ta caa cuhva ri cuan

ta quita cahñi cuan chi ña. Ta nducuita ri ña. Ta quichaha tyiñuhu ña chi ra.

Cuahã xaan ñu cuhvĩ sanduvahã ra Jesús

(Mt. 8.16-17; Mr. 1.32-34)

40 Ta cuhva cha quee ñanyii, tandihĩ maa ñu cha cumĩ chi ñu cuhvĩ tandihĩ nuu cuehe, chinyaca ñu chi ra Jesús. Ta tyiso ra ndaha ra siqui noo noo ñu. Ta tyicuan caa ta sanduvahã ra chi ñu. 41 Ta chichi cha tandihĩ ñu yihĩ ñu cha yihĩ tatyĩ ña vaha chi, ta quitã chi. Ta suri cana chaa chi cuahan coyo chi, ta catyĩ chi:

—Yoho Sehe Nyoo cuvĩ chuun —catyĩ chi.

Soco ña chahã ca ra Jesús cha cahan chi. Vatyĩ chitó chi vatyĩ ra Cristo, ra cha saquichĩ Nyoo cuvĩ ra.

Nu cahán ra Jesús tuhun Nyoo nuu tandihĩ cuii ñáyivĩ ñuu cha iyó Galilea

(Mr. 1.35-39)

42 Cundichin cuan ta quitã ra Jesús ñuu cuan. Ta cuahan ra noo nu taxi ri iyó. Soco ñáyivĩ nanducu ñu chi ra. Ta chaã ñu nya nu ñohó ra. Ta ña cuñi ñu cha cuhun ra. 43 Soco catyĩ ra Jesús chi ñu:

—Cumañi sacote chi ñáyivĩ inga ñuu tuhun vaha yoso caa nyacá ñaha Nyoo aña ñu. Vatyĩ yucuan chaha vachi siqui ñuhu ñáyivĩ.

44 Ta tyicuan caa chicá noo ra Jesús cahán ra tuhun Nyoo vehe ñuhu ityi Galilea.

5

Nu chahā ra Jesús noo nyatu cha ñihi ra cuaha xaan tiyaca

(Mt. 4.18-22; Mr. 1.16-20)

¹ Noo quivi nyaá ra Jesús yuhu miñi nu cuví Genesaret. Ta chaā coyo cuaha xaan ñáyivi, vatyí cuñí ñu cuiñi ñu tuhun Nyoo. Ta tihin xaan ñohó ra Jesús mahñu ñu.

² Ta nanyehé ra uvi tahan canoa yatyin ri yuhu miñi cuan. Yori ñohó chichi. Vatyí cha quitā coyo ra catiñ tiyaca cuan. Ta cha quichaha canacatya ra yuhva ra.

³ Yucuan ta quihvi ra Jesús chichi noo canoa cuan. Ta canoa cuan chi ra Simón cuví. Ta catyí ra chi ra vatyí na tyandaha ra suhva ca cuhun nya mahñu ca cuan. Tyicuan ta chicunyaā ra Jesús chichi canoa cuan. Ta quichaha sañaha ra chi ñáyivi. ⁴ Cuhva cha ndihí cahan ra, catyí ra chi ra Simón:

—Sacuhun canoa nya nu cama ca ndutya cuan. Ta tuchi ndo yuhva vatyí tiñ ndo tiyaca —catyí ra Jesús chi ra.

⁵ Ta nacahan ra Simón ta catyí ra:

—Maestro, cha sahá tyiño xaan ndi ñiyaca maa ta ni noo tiyaca ña ñihi ndi. Soco tatu maun catyí, cuatuchi tucu ndi yuhva —catyí ra Simón.

⁶ Cuhva cha cacañi ra yuhva cuan, cuaha xaan tiyaca ñihi ra. Ta nyacua tahnya yuhva ra chihin cha vee ti. ⁷ Tyicuan ta cachahā ra seña chi ra tahan ra, ra cha canyicú chichi inga canoa

cuan, na quichi coyo ra ta tyinyee ra chi ra. Yucuan ta chaā coyo ra cuan. Ta casacutu ra ninduvi canoa cuan chihin tiyaca. Ta nyacua cuñi nyee canoa cuan cha tyitu yihí tiyaca. ⁸ Cha nanyehé ra Simón Pedro cha tyicuan caa, ta chicuiñi chiti ra nuu ra Jesús. Ta catyí ra chi ra:

—Cuāchiyo chuun nui, Sutu Mañi yuhu, vatyí yuhu ra iyó cuatyí cuví —catyí ra.

⁹ Vatyí ra Simón iyo xaan cuñi ra chihin tandihí ra canyicu chihin ra. Vatyí cuaha xaan tiyaca catiñ ra.

¹⁰ Tyicuan caa tucu ra tahan ra Simón: ra Jacobo chihin ra Juan, sehe ra Zebedeo, iyo xaan cacuñi ra. Ta catyí ra Jesús chi ra Simón:

—Ma iyo xaan cuñun. Vatyí vityin ta nu cuahan ca chi quivi, ma tiñ con tiyaca. Soco cunducun ñáyivi, tavon chi ñu nu quiñi caa na quihvi ñu cuenda Nyoo —catyí ra Jesús chi ra Simón.

¹¹ Yucuan ta casacunuhu ra canoa nya ñuhu ityi. Ta casandoq ra tandihí cha iyó chi ra nyacua nya tiyaca cha tiñ ra. Ta cuahan ra chihin ra Jesús.

Nu sanduvahā ra Jesús chi noo ra tyahyu coño

(Mt. 8.1-4; Mr. 1.40-45)

¹² Noo quivi ñohó ra Jesús noo ñuu nu iyo noo ra cuhvi. Ta tyahyu xaan coño ra. Ta cha nanyehé ra chi ra Jesús, ta chicuiñi chiti ra nuu ra. Ta nacañinoo ra xiñi ra nya nu

ñuhu. Ta chacu ndahvi ra nuu ra, ta catyí ra:

—Sutu Mañi yuhu, tu yoho ta cuñún, cuví sanduvahun chii —catyí ra.

¹³ Tyicuan ta tyiso ra Jesús ndaha ra siqui ra. Ta catyí ra:

—Cuñí sanduvahi chuun. Ta na nduvahun vityin ri —catyí ra Jesús chi ra.

Ta caa cuhva ri cuan ta nduvaha ra cuan. ¹⁴ Tyicuan ta catyí ra Jesús chi ra:

—Ma nacatyun chi ñáyivi. Noo ri catyí chuun, cuahan nu nyaá tata sutu. Ta sañahun chuun chi ra. Ta cuhva cuendon cha tahán chi cuhvon tari cuhva catyí nu ley ra Moisés tacuhva coto ñáyivi vatyí nduvahun —catyí ra Jesús chi ra.

¹⁵ Vasi ña cuñí ra cha coto ñáyivi, soco cuaha ca ñáyivi ñihi ñu tuhun ra. Ta cuaha xaan ñáyivi ndu in ri ñu, vatyí cuñí ñu cuñi ñu tuhun cahán ra. Ta cuñí xaan ñu nduvaha ñu. ¹⁶ Soco ra Jesús, canyaha canyaha ri ra nu iyó ñáyivi. Ta cuahan ra noo nu yori ñáyivi iyó. Ta yucuan chicān tahvi ra chi Nyoo.

Nu sanduvaha ra Jesús chi noo ra cuhvi cha ña cuví nacanda

(Mt. 9.1-8; Mr. 2.1-12)

¹⁷ Noo qui vi sañahá ra Jesús chi ñáyivi. Ta chicunyicú suhva ra fariseo, ra quichahá xaan ley vehe ñuhu cha tyaa ra Moisés ta cha naha. Ta nyicú tucu suhva ra sacuahá cuenda ley vehe ñuhu cuan. Quichi coyo ra ñuu cha iyó Galilea, ta ñuu Jerusalén, ta tandihi ca ñuu cha iyó Judea.

Ta iyó xaan tunyee iñi Nyoo chi ra Jesús, tacuhva vatyí sanduvaha ra chi ñu cuhvi. ¹⁸ Yucuan ta cha coyo ra canyisó chihin noo chito chi noo ra ña cuví nacanda. Ta cuñí ra quihvi ra chichi vehe ta cacun ra chi ra nuu ra Jesús. ¹⁹ Soco ña cuví quihvi ra vatyí tuvi xaan ñáyivi. Tyicuan ta canda ra ityi xiñi vehe. Ta sacuachiyo ra suhva tyiyo. Tyicuan ta sanoo ra chi ra cuhvi cuan maa maa nuu ra Jesús mahñu nu tuvi ñáyivi cuan. ²⁰ Yucuan cuví nu nyehe ra Jesús vatyí cachinó xaan iñi ra chi ra. Ta quichaha catyí ra chi ra cuan:

—Xaa, cha chicoo ticahnu iñi tandihi cuatyun —catyí ra Jesús.

²¹ Tyicuan ta ra casacuahá cuenda ley vehe ñuhu chihin ra fariseo quichaha nacuaan iñi ra: “¿Yóó ra cuví ra ihya? Vatyí cuñí maa ra vatyí cuví saha ra ticahnu iñi cuatyí yo. Noo ri maa Nyoo cuví saha ra ticahnu iñi cuatyí yo”, ndichi xiñi ra.

²² Soco ra Jesús chitó ra tuhun chicá xiñi ra. Ta quichaha catyí ra chi ra:

—¿Ñáá tuhun chicá xiñi ndo tyehe caa? ²³⁻²⁴ ¿Ñáá cha yii ca catyí yo? ¿Atu yii ca catyí yo: “Cuatyun cha yaha ndachi”, o yii ca catyí yo chi noo ñáyivi: “Ndicuita ta cacon”? Soco vityin cua sañahi chi ndo vatyí iyó ityi chii cha sahi ticahnu iñi cuatyí. Vatyí yuhu Rayii cha quichi nya gloria cuví. Ta vityin cua sanduvahi chi ra

ña cuví caca ihya —catyí ra Jesús.

Tyicuan ta quichaha catyí ra chi ra cha catuví cuan:

—Catyí chuun, ndicuita. Naquehen chiton ta cuanuhu nya vehun.

²⁵ Ta caa cuhva ri cuan nducuita ra cha cuhvi cuan, ta naquehen ra chito ra. Ta cuanuhu ra vehe ra, suri sacahnú ra chi Nyoo. ²⁶ Tandihí ñáyivi iyo xaan cuñí ñu. Ta yuhví xaan ñu. Ta sacahnú ñu chi Nyoo, ta catyí ñu:

—Vityin ndicha nyehé yo minoo tuhun cha iyo caa —catyí ñu.

Nu cana ra Jesús chi ra Leví (Mt. 9.9-13; Mr. 2.13-17)

²⁷ Yahā cuan ta quita ra Jesús vehe cuan. Ta nanyehe ra chi noo ra cha tavá xuhun cuenda gobiernu ñuu Roma. Ta nañí ra Leví. Ta nyaá ra nu tyiyahví ñáyivi. Ta catyí ra Jesús chi ra:

—Coho chihin —catyí ra.

²⁸ Tyicuan ta nducuita ra Leví. Ta sandoo ra tandihí cha iyó chi ra. Ta cuahan ra chata ra Jesús.

²⁹ Tyicuan ta savaha ra Leví noo vico cahnu vehe ra cuenda ra Jesús. Ta cuaha vavaha ra catavá xuhun cuenda gobiernu ñuu Roma canyicú ra mesa. Ta canyicú tucu inga ñáyivi. ³⁰ Soco ra fariseo chihin ra sacuahá ley vehe ñuhu quichaha cahan nyaa ra chi ra cachicá noo chihin ra Jesús ta catyí ra:

—¿Ñáá tuhun chachí ndo ta chihí ndo chihin ra catavá

xuhun ta chihin ra cahnu cuatyí? —catyí ra.

³¹ Ta ra Jesús nacahan ra, ta catyí ra:

—Ña chiñuhú doctor chi ra iyó vaha. Chi ra cuhví, yucuan ra chiñuhú doctor chi. ³² Yuhu ña vachi tyinyei chi ñu vaha sahá chi, soco vachi tyinyei chi ñu chitó vatyí iyó cuatyí, vatyí tacuhva nasama ñu cuhva iyó ñu —catyí ra Jesús chi ra.

Nu sañahá ra Jesús vatyí chayaha canyaha ra chi ñu nyicón chi ra, cusavaha ñu ayuno (Mt. 9.14-15; Mr. 2.18-20)

³³ Tyicuan ta quichaha can-daca tuhun ra chi ra Jesús, ta catyí ra:

—Ra canyicón chi ra Juan savahá ra ayuno, ña cachachí ra ta nanducú ra chi Nyoo, ta tyicuan caa tucu ra fariseo. Soco ra cachicá noo chihin yoho, ndi quivi maa chachi ra ta chihí ra. ¿Ñáá tuhun? —catyí ra.

³⁴ Ta nacahan ra Jesús, ta catyí ra:

—¿Atu cuví cha ma cuhva ndo cachi ñu canyicu vico tandaha tatu nyaá ra cha cua tandaha chihin ñu? Ma cuví. Vatyí siñ cuñí ñu, ta cuñí ñu cachi ñu. ³⁵ Soco cuchia quivi cuachiyo ra tandaha cuan nu nyicú ñu. Yucuan ndicha quivi, ta cusaha ñu ayunar.

Nu sañahá ra Jesús vatyí ña nacachi tahan tuhun chahnu cha iyó ñáyivi chihin tuhun chaa cha sañahá ra (Mt. 9.16-17; Mr. 2.21-22)

³⁶ Tyicuan ta cahan ra Jesús noo cuhva chihin ñu, ta catyí ra:

—Yori cahnya noo sahma chaa, ta chihin cuan naquicu ñu noo sahma chahnu. Vatyí tatu sacuvi ñu tyicuan caa, cundiyyi sahma chaa cuan. Ta sñn ri ma cuhva chi chihin sahma chahnu cuan. ³⁷ Ta tyicuan caa tucu ma cuvi tyihi ñáyivi vinu chaa chichi ñi chahnu. Vatyí cutahnya ñi cuan chihin vinu chaa cuan. Ta tiví vinu cuan ta tiví ñi chahnu cuan ñandihi. ³⁸ Yucuan chaha tahán chi tyihi yo vinu chaa chichi ñi chaa. Vatyí tyicuan ta ninduvi ta saha cuenda chi tahan. ³⁹ Ta yori ñu chihi vinu chahnu, ta cuñí ñu coho ñu cha chaa. Vatyí catyí ñu, vaha ca vinu chahnu. Cuñí ca ñu vinu chahnu cuan vatyí ícan cuan cuví costumbre cha iyó maa ñu.

6

Tohon ra cachicá noo chihin ra Jesús yoco trigu quivi nyitatu ñáyivi

(Mt. 12.1-8; Mr. 2.23-28)

¹ Noo quivi cha nyitatu ñáyivi, yahá ra Jesús mahñu cha tachí ñu. Ta ra cachicá noo chihin ra catohón ra yoco trigu. Ta casacoyó ra chihin ndaha ra. Ta cachachí ra chiti cuan. ² Tyicuan ta catyí suhva ra fariseo chi ra:

—¿Ñáá tuhun cha sacuvi ndo noo tyiño cha ña tahán chi sacuvi yo quivi nyitatu yo?

³ Ta nacahan ra Jesús, ta catyí ra:

—¿Atu ta sacuaha ca ndo cha sacuvi ra David chihin ra tahan ra quivi cha chisoco ra?

⁴ Quihvi ra chichi vehe Nyoo. Ta quehen ra pan cha chacun ñáyivi nuu Nyoo. Ta chachi ra. Ta chaha ra chi ra candihi chihin ra. Ta maa ri maa tata sutu tahán chi cachi pan cuan —catyí ra Jesús.

⁵ Yucuan ta catyí tucu ra Jesús:

—Yuhu cuví Rayi cha quichi nya gloria. Ta iyó ityi chii vatyí catyí chi noo noo ndo ñáá cha sacuvi ndo quivi nyitatu yo —catyí ra.

Nu sanduvaha ra Jesús chi noo ra cha ityi ndaha

(Mt. 12.9-14; Mr. 3.1-6)

⁶ Inga quivi cha nyitatu ñáyivi, quihvi ra Jesús chichi vehe ñuhu. Ta quichaha sañaha ra chi ñáyivi. Ta yucuan nanyehé ra chi noo ra cha na ityi chiyo ndaha vaha. ⁷ Ta ra casacuaha cuenda ley chihin ra fariseo, canducú nyehe ra chi ra Jesús, tatu sanduvaha ra chi ra cuhvi cuan quivi nyitatu ñu. Tyicuan caa ta cuvi tyaa ra cuatyí siqui ra. ⁸ Soco ra Jesús chitó ra tuhun chicá xiñi ra. Ta catyí ra chi ra cha ityi ndaha cuan:

—Nducuita. Ta cuinanyaun mahñu ihya.

Tyicuan ta ra cha ityi ndaha cuan nducuita ra. Ta chicunanyaá ra mahñu. ⁹ Tyicuan ta catyí ra Jesús chi ra canyicú cuan:

—Cua nducu tuhun noo tuhun chi ndo. ¿Yoso caa cuhva tahán chi cha sacuvi yo

quivi nyitatu yo? ¿Atu tahan chi vatyí sacuvi yo cha vaha, o cha ña vaha? ¿Atu tahan chi vatyí sacacu yo chi ñáyivi, o cha cahñi ndihi yo chi ñu?

¹⁰ Tyicuan ta ra Jesús nanyehe ra chi noo noo ra canyicú cuan. Ta quichaha catyi ra chi ra cuhví cuan:

—Sanacaa ndahun.

Tyicuan ta ra cuhví cuan sanacaa ra ndaha ra. Ta nduvaha ndaha ra. ¹¹ Soco suhva ra canyicú cuan, cuxaan xaan ra. Ta quichaha candaca tuhun ra chi ra tahan ra:

—¿Yoso caa sacuví yo tacuhva cha ma cuví ca cahan ra Jesús nuu ñáyivi? —cacatyí ra.

Nacachi ra Jesús ndi uchi uvi tahan ra tyi caca ra tyiño ra

(Mt. 10.1-4; Mr. 3.13-19)

¹² Quivi cuan ndaa ra Jesús noo yucu. Ta ñiyaca maa chicán tahvi ra chi Nyoo.

¹³ Cuhva cha cundichin, cana ra chi tandihi ri ñu nyicón chi ra. Ta nacachi ra uchi uvi tahan ri ra. Ta sacunañi ra chi ra, apóstol ra, ta cuñí chi catyí, ra caca tyiño nuu ra.

¹⁴ Ta ihya nyaá sivi ndi uchi uvi tahan ra: Ra Simón ra cha sacunañi ra Cristo Pedro chi, ta yañi ra, ra Andrés, ta ra Jacobo, ra Juan, ra Felipe, ra Bartolomé, ¹⁵ ra Mateo, ra Tomás, ra Jacobo sehe ra Alfeo, ta ra Simón ra yihí cuenda ityi ra cacuñí cuhun cuatyí siqui gobiernu ñuu Roma cha nyacá ñaha chi ñu.

¹⁶ Ta ra Judas, yañi ra Jacobo,

ta ra Judas Iscariote, ra cha naxico tuhun chi ra Jesús.

Nu sañahá ra Jesús chi cuaha xaan ñáyivi

(Mt. 4.23-25)

¹⁷ Noo ra Jesús yucu cuan chihin ndi uchi uvi tahan ra. Ta chicutayucu ra nu ndaa cuan chihin ñu nyicón chi ra. Ta cuaha ri ityi quita coyo ñáyivi. Quita coyo ñu ñuu Jerusalén ta tandihi ca ñuu cha iyó Judea, ta ñuu Tiro chihin ñuu Sidón cha nyicú yuhu tyañuhu. Ta cha ñáyivi cuan vatyí cuiñi ñu tuhun cahan ra Jesús. Ta tandihi ñu cuhví cuñí ñu vatyí sanduvaha ra chi ñu. ¹⁸ Ta tandihi ñu cha yihí tatyí ña vaha chi, nduvaha ñu saha ra. ¹⁹ Ta tandihi ñu cuñí ñu tñin ñu chi ra. Vatyí nduvaha ñu chihin tunyee iñi Nyoo, vasi tacuhva tñin ri ñu chi ra.

Ñu ñihí tumañi iñi, ta ñu ña ñihí tumañi iñi

(Mt. 5.1-12)

²⁰ Tyicuan ta nanyehe ra Jesús chi ra cachicá noo chihin ra. Ta quichaha catyí ra chi ra:

—Tandihi nyoho cha ndahvi ndo, sñi xaan cuví chi ndo, vatyí tahan chi cha cunyaca ñaha Nyoo aña ndo.

²¹ Tandihi nyoho cha chisocó ndo vityin, sñi xaan cuví chi ndo. Vatyí coo quivi cha ma nyehe ca ndo soco. Tandihi nyoho cha chacú chaa ndo cha cuihya iñi ndo, sñi xaan cuví chi ndo vatyí coo quivi ta ñahri ca tucuihya iñi

coo chi ndo. Ta cuacu ndo chihin cha s̄i cuñi ndo.

22 S̄i xaan cucuvi chi ndo, quivi cha tasi cuñi ñáyivi nyehé ñu chi ndo, quivi tavá ñehe ñu chi ndo nu nyaá ñu, quivi cahán ñu chi ndo, quivi catyí ñu vatyí ñáyivi ña vaha cuví ndo vatyí chinó iñi ndo chi yuhu Raȳi cha quichi nya gloria. 23 S̄i xaan cucuvi chi ndo quivi nyehé ndo tindoho cuan vatyí tyicuan caa tucu sacuvi ñáyivi ta cha naha. Cahán vavaha ñu chi ra cacuvi profeta Nyoo. Caña ndava ndo chihin cha s̄i cuñi ndo. Vatyí cahnu xaan cha cucuhva Nyoo chi ndo gloria.

24 Soco ndahvi nyoho, ñu tyaȳi. Vatyí vityin s̄i xaan cuñi ndo chihin tandihi cha tyaȳi ndo. Soco coo quivi maa maa ri tundoho cunyehe ndo. Vatyí ñahri cuñihi ndo nuu Nyoo.

25 Ta ndahvi nyoho cha cuñi maa ndo vatyí ñahri cumañi chi ndo cha vityin, vatyí coo quivi cunyehe ndo soco. Nyoho cha s̄i cuñi ndo cha vityin, ndahvi nyoho vatyí coo quivi cunyehe ndo tucuihya iñi. Ta cuacu chaa ndo. 26 Ta ndahvi nyoho vatyí vaha cahán ñáyivi siqui ndo. Vatyí tyicuan caa tucu ñáyivi ta cha naha, vaha xaan cahán ñu siqui ra cha cahán cha ña ndicha.

Cuñi ndo chi ñu xaan iñi chi ndo

(Mt. 5.38-48; 7.12)

27 Tandihí nyoho cha chiñi ndo tuhun cahín, catyí chi ndo tyehé caa: Cuñi ndo chi

ñu xaan iñi chi ndo. Sacuvi ndo cha vaha chihin ñu cha tasi cuñi nyehé chi ndo.

28 Cahán ndo cha vaha chihin ñu cha cahán ña vaha siqui ndo. Cacan tahvi ndo chaha ñu cahán chi ndo. 29 Tatu yóo cha cañi inchiyo nuu ndo, cuhva tucu ndo inga chiyo nacañi maa ñu. Tatu yóo cha tinyaa chaqueta ñihno ndo, cuhva ndihí ndo camiseta ndo. 30 Cuhva ndo ñáá ndihí cha chicán ñu chi ndo. Tatu tinyaa ñu ñáá cha iyó chi ndo, ma ndacan ndo chi ñu. 31 Tari cuhva cuñi ndo cha sacuvi ñáyivi cha vaha chihin ndo, tyicuan caa sacuvi ndo cha vaha chihin ñu.

32 Tatu cuñi ndo chi maa ri maa ñu cha cuñi chi ndo, ñahri cha vaha xaan sacuvi ndo. Vatyí tyicuan caa nyacuví tucu ñu quiñi iyó, cuñi ñu chi ñáyivi ñohó nuu ri ñu. 33 O tatu sacuvi ndo cha vaha chihin ñu cha sacuvi cha vaha chihin ndo, ñahri cha vaha xaan nyacuví ndo. Vatyí tyicuan caa nyacuví tucu ñu quiñi iyó. 34 O tatu sacuvi ndo tumañi iñi chi noo ñáyivi, ta yihí iñi ndo vatyí cusacuvi tucu ñu cuan tumañi iñi chi ndo, ñahri cha vaha nyacuví ndo. Vatyí tyicuan caa nyacuví tucu ñu quiñi iyó. Tatu ñáá noo tumañi iñi sacuvi ñu chi tahan ñu, nyatú ñu cha nacuhva tucu ñu cuan tumañi iñi chi ñu. 35 Soco nyoho, cuñi ndo chi ñu xaan iñi chi ndo. Ta sacuvi ndo cha vaha chi ñu. Ta cuhva noo ndo chi ñu. Soco ma cuatu ndo ñáá tumañi iñi cunacuhva ñu chi ndo. Tyicuan ta cahnu xaan

cha cuñihi ndo nuu Nyoo ta cucuvi ndo sehe vaha Nyoo cahnu. Vatyí Nyoo vaha ñáyiví cuví ra chihin ñu cha ña nacuhva tyahvi nyoo chi ra ta chihin ñu quiñi iyó. ³⁶Vaha ñáyiví cuví ndo chihin ñáyiví, tari maa Nyoo Sutu yo, vaha ñáyiví cuví ra chihin ndo.

Ma cahan yo cha caa inga tahan yo

(Mt. 7.1-5)

³⁷Ma cahan ndo cha caá tahan ndo, tyicuan ta Nyoo ma tiin cuenda ra cha caá maa ndo. Ma soco ndo chi ñáyiví cha cuhun ñu anyaya, tyicuan ta ma sacuhun Nyoo chi ndo anyaya. Saha ndo tucahnu iñi chi ñáyiví. Ta Nyoo cusaha ra tucahnu iñi chi maa ndo. ³⁸Cuhva ndo cha chiñuhú chi ñáyiví. Ta tyicuan caa cuhva tucu maa Nyoo cha chiñuhú chi maa ndo. Noo ñáyiví vaha, tatu xicó ñu ñáá cha xicó ñu chi ndo, tyitu maa chahá ñu chi ndo, tyicuan caa tucu cuhva Nyoo chi ndo. Vatyí tari cuhva cuhva ndo chi ñáyiví, tyicuan caa cuhva cuhva Nyoo chi ndo —catyí ra Jesús.

³⁹Ta chahá ra Jesús cuhva ihya chi ñu, ta catyí ra:

—Noo ra cuaa ña cuví sañaha ra ityi chi nonga ra cuaa. Vatyí ninduvi ra ña nyehé ra ityi cuahan ra. Ta cuví canacoyo ra chichi noo xahva. Tyicuan caa tucu noo ra ña chitó ityi Nyoo, vasi cuñí ra, soco ma cuví sañaha ra ityi Nyoo chi nonga ra. ⁴⁰Ni noo ra cuatyaa sicuela ma

cuvi coto ra cha chitó ra cha sañaha chi ra. Vatyí nicaa ni quichaha sacuahá ra. Coto ra soco nya ndihi sacuahá ra.

⁴¹¿Yoso caa tyi nyehún cuatyí luhlu cha cuví tari mihin lee ri cha yihí chiti nuu tahun, ta ña sahun cuenda cuatyí cahnu cha iyó chuun cha cuví tari vitu cahnu cha yihí nuu maun? ⁴²Tatu chiti nuu maun yihí noo vitu cahnu, yoso caa cuví catyun chi ra yañun: “Nyaca, natave mihin lee cha yihí chiti nuun.” ¡Yoho cha savahún chuun! Tava xihna vitu cahnu cha yihí chiti nuun. Tyicuan ta cuví nyehe vahun mihin lee cha cutavon chiti nuu yañun.

Chihin cha sacuví ñáyiví ta nicohon nuu ri yo chi ñu tatu ñu vaha, o ñu ña vaha cuví ñu
(Mt. 7.17-20; 12.34-35)

⁴³Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha. ⁴⁴Tandihí yutun nicohon nuu yo chi tun chihin chiti ri tun. Vatyí tuñiyaca, ma cuhva tun mangu. Ta ni ri noo iñu nduhva ma cuhva tun tichaha ndiví. ⁴⁵Ta tyicuan caa tandihí ñáyiví vaha, tuhun vaha cahán ñu. Vatyí yihí cha vaha aña ñu. Soco ñáyiví ña vaha, maa maa ri maa tuhun ña vaha cahán ñu. Vatyí yihí cha caquiñi aña ñu. Chihin yuhu ñu cahán ñu tandihí cha quiñi caa cha quitá aña ñu.

Cacu aña ñu quichahá tuhun cahán ra Jesús, ta ñu ña

quichahá tuhun cahán ra, ma cacu ñu

(Mt. 7.24-27)

⁴⁶ ¿Ñáá tuhun cha catyí ndo chii, “Sutu Mañi yuhu, Sutu Mañi yuhu”, tatu ña sacuvi ndo tari cuhva cha catyí chi ndo? ⁴⁷ Ihya cua catyí chi ndo yóó chi ndacu nyoho cha vachi ndo nu nyaí, ta tyasohó ndo cha cahín, ta sacuví ndo cha catyí. ⁴⁸ Tari noo ra chitó vaha savaha vehe cuví ndo. Vatyí xihna ca chatyá ra cono vavaha ta tahan ra yuu. Ta siqui yuu cuan savahá ra vehe ra. Ta quivi coon xaan savi, ta cama xaan ndutya yahá, ta ña nduva vehe cuan vatyí siqui yuu nanyaá chi. ⁴⁹ Soco ñu cha chiñi tuhun cahín ta ña sacuví ñu tari cuhva catyí, cuví ñu tari minoo ra ña chitó savaha vehe. Vatyí ña chatyá ra nu quihí chaha vehe ra. Ta ñima nu yuu savaha ra vehe ra. Ta chaa quivi cha coon savi. Cama xaan ndutya yaha. Ta chatya chi chaha vehe ra vatyí ñuhu ri cuví. Ta nduva vehe ra vatyí ña cunye. (Ta tyicuan caa cuví ñáyivi, tatu sacuví ñu tari cuhva catyí, tyicuan ta cacu ñu. Soco tatu ma sacuví ñu, ma cacu ñu) —catyí ra Jesús.

7

Nu sanduvaha ra Jesús noo musu capitán sindaro

(Mt. 8.5-13)

¹ Cuhva cha ndihí cahan ra Jesús chihin ñáyivi, ta cuanuhu tucu ra inga chaha nya Capernaum. ² Ta yucuan

iyó noo capitán cha nyacá ñaha noo cientu sindaro cuatyí. Ta iyó noo musu ra cha cuñi vavaha ra. Ta cuhvi ra. Ta cha cuñi cúvi ra. ³ Quivi cha chitó capitán cuan tuhun ra Jesús, tachí ra chi suhva ra cacuvi mandoñi ñuu Israel na cucahan ra chihin ra Jesús, vatyí na quichi ra vatyí sanduvaha ra chi musu ra. ⁴⁻⁵ Tyicuan ta chaa coyo ra mandoñi cuan nu nyaá ra Jesús. Ta quichaha catyí ra chi ra:

—Iyó noo capitán cuenda ñuu Roma. Ta vaha xaan ñáyivi cuví ra chihin yo cha cuví yo ñáyivi Israel. Nyacua savaha ra noo vehe ñuhu yo. Ta tahan chi vatyí tyinyeun chi ra. Vatyí cuhvi xaan noo musu ra. Ta cuñi ra vatyí sanduvahun chi ra.

⁶ Tyicuan ta cuahan ra Jesús chihin ra. Soco cuhva cha cumañi ca chaa ra nya vehe capitán cuan, capitán cuan tachí ra chi suhva ra tahan ra. Ta quichaha catyí ra chi ra Jesús:

—Tata, catyí capitán vatyí ma sayangon chuun cha cuhun nya vehe ra na. Vatyí ña naña ra cha cuhun, na. ⁷ Yucuan chaha ña caña iñi ra quichi ra nu nyaún. ¿Atu ma sahun noo tumañi iñi chi ra vatyí noo tuhun cahan run ihya ri, ta nduvaha ri musu ra, na? ⁸ Vatyí maa ra capitán cuví ra. Ta nyacá ñaha rey chi ra. Ta maa ra nyacá ñaha ra chi ra cuatyí ca cha nuu ra. Tatu tava ra tyiño chi noo ra cuatyí cuan, na cuhun ra. Cuhun ra. O tatu catyí ra chi nonga ra na

quichi ra, quichi ra. O tatu tachi ra chi inga ra na sacuvi ra tyiño, sacuvi ra. Ta tyicuan caa tucu yoho, tatu catyun na nduvaha musu ra, tyicuan ta nduvaha ra na —catyí ra tahan capitán cuan chi ra Jesús.

⁹ Cha chiñi ra Jesús cha catyí ra cuan ta iyo xaan cuñi ra. Ta nanyehe ra chi ñáyivi cha nyicú chihin ra, ta catyí ra:

—Ndicha ndicha cuii vatyí chinó xaan iñi capitán cuan. Ta nañihi que chi ni noo ra Israel cha chinó xaan iñi tari ra cuan —catyí ra.

¹⁰ Yucuan ta cuanuhu ra tahan capitán cuan. Ta cha nachaḡ coyo ra nya vehe, ta nanyehe ra vatyí cha nduvahaḡ musu cuan.

Nu sanandoto ra Jesús chi sehe noo ñaha ndahvi chihí yii

¹¹ Cha yahḡ tuhun cuan ta cuahan ra Jesús noo ñuu cha nañi Naín. Ta cuahan tucu ra cachicá noo chihin ra, ta cuaha xaan ñáyivi ñandihí. ¹² Tyicuan ta cuhva cha cua cha ra yatyin ñuu cuan, nanyehe ra cuaha ñáyivi quitá coyo ñuu cuan. Ta canyisó ñu noo ndiyi, cuacuchi ñu sehe noo ñaha ndahvi cha chihí yii. Ta noo tuhun ri maa ra iyó chi ña, ta chihí ra. ¹³ Ta cha nanyehe ra Jesús chi ña, ta cundahvi cuñi nyehe ra chi ña. Ta quichahaḡ catyí ra chi ña:

—Ma cuacun.

¹⁴ Tyicuan ta tuhvaḡ ra ta tñin ra chatun cha yihí ndiyi cuan. Tyicuan ta ra canyisó

chi ndiyi cuan chicuitayucu ra. Ta catyí ra Jesús chi ndiyi cuan:

—Ndicuita, ra cuehe —catyí ra.

¹⁵ Tyicuan ta ndicuita ndiyi cuan. Ta nicunyaa ra. Tyicuan ta quichaha cahan ra. Ta ra Jesús nacuhva cuenda ra chi ra chi sihi ra. ¹⁶ Cha nanyehe ñu cha tyicuan caa ta yuhvi xaan ñu cuvi. Ta quichaha sacahnu ñu chi Nyoo. Ta catyí ñu:

—Cahnu xaan ra profeta Nyoo tuví nu nyicú yo ihya.

Ta catyí tucu ñu:

—Maa Nyoo, ican vachi nu nyicú yo, vachi tyinyee ra chi yo —catyí ñu.

¹⁷ Ta tandihí maa ñáyivi nicahnu ityi Judea, chitó ñu cha sacuvi ra Jesús.

Nu tachí ra Juan uvi tahan ra chicá noo chihin ra nu nyaá ra Jesús

(Mt. 11.2-19)

¹⁸ Ta ra cachicá noo chihin ra Juan nacatyí ra tuhun cha sacuvi ra Jesús. Tyicuan ta canaḡ ra Juan chi uvi tahan ra. ¹⁹ Ta tachí ra chi ra nu nyaá ra Jesús, vatyí cundaca tuhun ra chi ra tatu ican ra cuví Cristo ra cha cusaquichi Nyoo. Vatyí tatu ñima ra, tyi cuatu ra inga ra. ²⁰ Tyicuan ta ra cha tachí ra Juan, cuahan coyo ra. Ta chaḡ ra nu nyaá ra Jesús. Ta quichahaḡ catyí ra:

—Ra Juan, ra sacondutyá, tachí ra chi ndi vatyí ndaca tuhun ndi chuun tatu icon cuví Cristo ra cha cusaquichi Nyoo. Vatyí tatu ñimon, cuatu ndi chi inga ra —catyí ra.

21 Ta cuhva cha canyicú ra tachí ra Juan cuan, ra Jesús sanduvahá ra cuaha xaan ñu cuhví, ta cuaha xaan ñu yihí tatyí ña vaha chi. Ta sananyehe ra chi ñu cuaa. 22 Tyicuan ta catyí ra Jesús chi ra tachí ra Juan:

—Cuahan ndo. Ta nacatyí ndo chí ra Juan tandihí cha nyehe ndo, ta tandihí cha chiñi ndo. Ta catyí ndo chí ra yoso caa nanyehé ra cuaa, yoso caa nacacá ra coxo, yoso caa nduvahá ra tyahyu coño, yoso caa nacuiñi ra soho, yoso caa nandotó ndiyí, yoso caa cahín tuhun Nyoo chihin ñu ndahvi yoso caa sacacú ra añima ñu. Ta catyí tucu ndo chí ra vatyí 23 sñi xaan cuví chi ñu ña chicá uvi iñi nyicón chii —catyí ra Jesús chi ra.

24 Cuhva cha cuahan coyo ra cha tachí ra Juan, ta quichaha cahan ra Jesús tuhun ra Juan chihin ñáyivi. Ta catyí ra:

—¿Ñáá cha chahan ndo chinyehe ndo quivi chahan ndo chiqui ndi cuan? ¿Atu chahan ndo chinyehe ndo noo ndoo cha naquisí tatyí? 25 ¿O noo ra cha ñihnoó sahma vaha chinyehe ndo vaha? Ñima. Vatyí chitó ndo vatyí ra ñihnoó sahma vaha iyó vaha ra ñáyivi ta iyó ra vehe rey. 26 ¿Atu ña chinyehe ndo chí noo profeta Nyoo? Ican. Ta cahnu ca ra cuví ra ican saha noo profeta. 27 Ican tuhun ra Juan nyaá nuu tutu cha tyaa ra Isaías ta cha naha. Ta catyí Nyoo tuhun ra tyehé caa:

Yuhu tachí chi noo ra cahan tuhun ityi nuu nu cuahun.

Vatyí cucahan ra tuhun chihin ñáyivi na nasama ñu cuhva iyó ñu, ta cuatu tuhva ñu quivi quichun.

28 'Ta catyí chi ndo vatyí chichi cha tandihí ra cha cacu, yori profeta cha cahnu ca ican saha ra Juan. Soco ra cha nyacá ñaha Nyoo añima, vasi cuví ra noo ra luhlu ca soco cahnu ca ra ican saha ra Juan ra sacondutyá —catyí ra Jesús.

29 Cha chiñi ñu tuhun ihya, tandihí ñáyivi ta ra catavá xuhun cuenda gobiernu ñuu Roma cha sacondutyá ra Juan nacoto ñu vatyí cuhva sacuví Nyoo vaha xaan. 30 Soco tandihí ra fariseo chihin ra sacuahá cuenda ley vehe ñuhu, maa ra cuví ra ña cuñí cha sacondutyá ra Juan chí ra, vatyí ña cuñí ra quehen ra cha chahá Nyoo.

31 Ta catyí ra Jesús:

—¿Ñáá chihin sandu inuu ri chí nyoho, ñu iyó quivi ihya? ¿Yóo cha tari caa caá ndo? 32 Tari ra cuatyaa cuví nyoho. Vatyí ra cuatyaa nyasiquí ndotyín nuyahvi. Ta caná chaa ndotyín chí tahan ndotyín, ta catyí ndotyín: “Tivi ndi tiyoo ta ña chita chaha ndo. Ta chita ndi yaa cuihya, soco ña chacu ndo.” Ta tyicuan caa ni noo cuhva ña tahan iñi ndo. 33 Vatyí ra Juan ra sacondutyá, quichi ra ta ña chachí vaha ra. Ta ña chihí ra vinu. Ta nyoho catyí

ndo vatyí tatyí ña vaha yihí chi ra. ³⁴ Ta quichí tucu yuhu Rayí cha quichi nya gloria. Ta chachí ta chihí. Ta nyoho catyí ndo vatyí ra cuahyí cuví ta cuví noo ra tuhvá chihí. Ta ña tahán iñi ndo cha cutahín chihin ra iyó cuatyí, ta chihin ra tavá xuhun. Soco vasi ni noo ndi ña quehen cuenda ndo, ³⁵ soco catyí chi ndo vatyí cha chiñi tuñi Nyoo, chahá ra chi ñu naquehen tuhun cahín ta tuhun cahán ra Juan. Ta maa ñu cusañaha ñu chi ndo vatyí vaha cha chiñi tuñi Nyoo —catyí ra Jesús.

Nu nyaá ra Jesús vehe ra Simón ra cuví fariseo

³⁶ Noo ra fariseo cha nañi Simón nacatyí tuhun ra chi ra Jesús noo víco vehe ra. Ta chaá ra Jesús vehe ra, ta chicunyata ra mesa. ³⁷ Tyicuan ta noo ñaha cata iñi ñuu cuan chitó ña vatyí nyaá ra Jesús yucuan. Ta chaá ña chihin noo yutyí alabastro tyitu yihí ndutya vixi chahán. ³⁸ Ta chicunyata ña yatyin ri chaha ra. Ta quichaha chacu chaá ña vatyí ndu uvi iñi ña cuatyí ña. Ta quitá ndutya nuu ña. Ta chihin ndutya nuu ña nacatya ña chaha ra. Yahá cuan ta sana ityí ña chaha ra chihin ixi xiñi ña. Ta tyayuhu ña chaha ra. Tyicuan ta choso ña ndutya vixi chahán cuan siqui chaha ra. ³⁹ Cuhva cha nyehé ra fariseo cuan cha tyicuan caa, ndichí xiñi ra: “Tatu ndicha ndicha cha Nyoo saquichi chi ra ihya, coto ra yóo ñaha tñn chaha

ra, vatyí ñaha cuan, ñaha iyó cuatyí cuví ña.”

⁴⁰ Tyicuan ta ra Jesús catyí ra chi ra fariseo cuan:

—Yoho Simón, iyó noo tuhun cua catyí chuun —catyí ra chi ra.

Tyicuan ta nacahan ra Simón:

—Vaha, catyí chii, Maestro —catyí ra.

⁴¹ Ta quichaha catyí ra Jesús tyehe caa:

—Uvi tahan ra yosoyicá ra xuhun chi noo ra cha tuhva chahá noo. Ta noo ra cuan yosiyicá ra ohon cientu denario. Ta nonga ra yosiyicá ra uvi xico uchi ri denario (tari ohon cientu ri pesu). ⁴² Ta ninduvi tahan ra ña cuví tyiyahvi ra. Ta ra tuhvá chahá noo cuan, saha ra ticahnu iñi chi ninduvi tahan ra. Ta vityin catyí chii, yoho Simón ¿nya ra cua cuñi ca chi ra cha chahá noo cuan? —catyí ra Jesús.

⁴³ Tyicuan ta nacahan ra Simón, ta catyí ra:

—Ra cha cuaha ca saha ra tucahnu iñi chi —catyí ra.

Tyicuan ta catyí ra Jesús:

—Ndicha cha cahún.

⁴⁴ Tyicuan ta nanyehé ra Jesús chi ñaha sihi cuan, ta catyí ra chi ra Simón:

—¿Nyhún chi ñaha ihya? Yuhu quihvi chichi vehun. Ta ña chahun ndutya cha ndoo chahi tari cuhva costumbre cha iyó chi yo. Ta ñaha ihya nacatya ña chahi chihin ndutya nuu ña. Ta yahá cuan, ta sana ityí ña chihin ixi xiñi ña. ⁴⁵ Yoho ña tyayuhun ndahi, tari costumbre cha iyó

chi yo, soco maa ña nyacua nya cuhva cha quihvi ihya ta ña sandihi ña cha tyayuhú ña chahi. ⁴⁶ Ta yoho ña tyihun aceitye xiñi, soco ñaha ihya tyihí ña ndutya vixi chahán chahi. ⁴⁷ Ta catyí chuun, yoho Simón, vasi cahnu xaan cuatyí ña, soco sahí ticahnu iñi chi ña. Yucuan chaha cuñí xaan ña chii. Ta ñu sahí tucahnu iñi chiin ri cuatyí, chiin ri cuñí ñu chii—catyí ra Jesús.

⁴⁸ Tyicuan ta quichaha catyí ra Jesús chi ña:

—Cuatyun cha yaha sandachi. Vatyí cha saha Nyoo ticahnu iñi chuun —catyí ra chi ña.

⁴⁹ Tyicuan ta ra nyicú chihin ra quichaha ndichí xiñi ra: “¿Yóó ra cuví ra ihya? Vatyí sahá ra tucahnu iñi cuatyí ñáyivi.”

⁵⁰ Tyicuan ta quichaha catyí ra Jesús chi ñaha sihi cuan:

—Cuahan vityin, cha cacun vatyí chinó iñun chii. Cuahan chihin cha vaha—catyí ra chi ña.

8

Ñusihí cha tyinyeé chi ra Jesús

¹ Cha yaha tuhun cuan, ta cuahan ra Jesús chicá noo ra noo noo ñuu cahnu ta noo noo ñuu luhlu. Ta cahan noo ra nuu ñáyivi. Ta sacoto ra chi ñu tuhun vaha yoso cuhva cuñí Nyoo cunyaca ñaha ra chi ñu. Ta ndi uchi uvi tahan apóstol, ra cha tyatyíño ra chi, cuahan coyo ra chihin ra. ² Ta cuahan coyo tucu suhva ñusihí cha sanduvaha

ra, ñu cuhvi ta ñu yihí tatyí ña vaha chi. Ta chihin ñu cuahan cu María noo ñaha ñuu Magdala, cha yihí ucha tahan tatyí ña vaha chi ta nduvaha ña. ³ Ta cuahan tucu cu Juana ñasihí ra Chuza ra cuví tyiño cuenda ra Herodes, ta cu Susana chihin cuaha xaan ca ñu cha tyinyeé chi ra chihin ñaáa cha iyó chi ñu.

Nu sañahá ra Jesús vatyí tari noo ra chicá noo tachí, tyicuan caa cuví ra cahán tuhun Nyoo

(Mt. 13.1-9; Mr. 4.1-9)

⁴ Ta cuaha xaan ñáyivi quitá noo noo ñuu, vatyí cua nyehe ñu nu cahan ra Jesús tuhun Nyoo. Ta tuvi xaan ñu nyicú ñu, ta quichaha catyí ra chi ñu chihin noo cuhva:

⁵ —Quitá noo ra vehe ra. Ta cuahan ra nu iyó tyiño sahá ra, vatyí cua quití ra chiti trigu nu ñuhú ra. Ta cuhva cha quití ra canacoyo suhva chiti cuan yuhu ityi. Ta chañí ñáyivi siqui. Ta quichí saa ta chachí ti. ⁶ Ta suhva ca chiti cuan canacoyo ticu yuu. Cañá chiti cuan. Soco na ityi ri vatyí chiin xaan ñuhu yihí chaha. Ta siin ri ña cachin. ⁷ Ta suhva ca chiti canacoyo chichi chiti iñu, soco quivi cañá tun in ri, tu iñu cuan chahñi chi tun. ⁸ Soco suhva ca chiti canacoyo nu ñuhú vaha ta quivi chahnu tun, vaha xaan chaha tun chiti. Vatyí noo ri chiti cuan, cientu chiti quitá chihin —catyí ra Jesús.

Ta cha yaha catyí ra tuhun cuan. Ta quichaha cana chaa

ra vatyí na cuiñi ñáyivi, ta catyí ra:

—Tatu cutuñi iñi ndo, tyasoho ndo tuhun cahín —catyí ra.

Nu sacotó ra Jesús ñáá cuenda sañahá ra chihin cuhva ri

(Mt. 13.10-17; Mr. 4.10-12)

⁹ Yaha cuan ta ra cachicá noo chihin ra, ndaca tuhun ra chi ra ñáá cha cuñi chi catyí tuhun cha nacatyí ra chi ñáyivi. ¹⁰ Tyicuan ta quichaha catyí ra:

—Chi nyoho sacotó Nyoo tuhun xehe, yoso caa nyacá ñaha ra. Soco chi tandihi ca ñu cuan, cuhva ri chahi chi ñu. Tacuhva nyehe ñu ta cuví chi tari cha ña ndichin nyehé ñu, ta cuiñi ñu soco ma cutuñi iñi ñu ñáá tuhun cuví.

Nu sacotó ra Jesús ñáá cha cuñi chi catyí tuhun ra tachí cuan

(Mt. 13.18-23; Mr. 4.13-20)

¹¹ Cuhva cha catyí chi ndo, cuñi chi catyí tyehe caa: chiti cuan tari tuhun Nyoo cuví. ¹² Ta tari nu canacoyo chiti trigu cuan yuhu ityi, tyicuan caa cuví noo ñu chiñi tuhun Nyoo. Soco quichi cuihna ta tinyaa ra tuhun Nyoo chi ñu tacuhva cha ma chino iñi ñu. Ta ma cacu ñu. ¹³ Ta tari nu canacoyo chiti cuan ticu yuu, tyicuan caa tucu inga ñáyivi cha chiñi tuhun Nyoo. Ta si xaan cuví chi ñu suhva ri quivi. Soco vatyí ña yihí vaha yoho ñu, suhva ri quivi chingo iñi ñu, soco quivi cha quichaha nyehe ñu tindoho, ta sandihi ri ñu tuhun cha chinó iñi ñu. ¹⁴ Tari nu

canacoyo chiti chichi iñu, tyicuan caa cuví tucu inga ñu chiñi tuhun Nyoo. Chiñi ñu tuhun Nyoo soco ña cuñi ñu sacuvi ñu tari cuhva chiñi ñu. Vatyí yihí ñu, nyaá ca xiñi ñu tuhun tindoho ican saha tuhun Nyoo. Ta nonga ñu nyiyo ca iñi ñu cha tyayii. Ta nonga tucu ñu si ca cuñi ñu chica noo yanga ri ñu. Ta tari cha ña chicoo chiti nuu ñu cuví cuan. ¹⁵ Soco tari nu canacava chiti nu ñuhú vaha, tyicuan caa cuví noo ñu cha chiñi tuhun Nyoo. Ta vaha aña ñu vatyí chinó iñi ñu chihin tandihi aña ñu. Ta vaha tyasohó ñu tuhun Nyoo, ta ña naa maa iñi ñu tuhun ra. Ta sacuvi ñu tandihi tuhun cahán ra.

Ma tyihi xehe yo ñuhú cha sandundichin Nyoo aña ñu yo coto tinyaa ra

(Mr. 4.21-25)

¹⁶ Yori yo cha natyaa yo ñuhú tima ta tixehe yo xiu chito o nonga nu xehe. Natyaa yo ñuhú tima soco cha cananyaa yo noo nu sucun. Ta cuhva quihvi ñáyivi chichi vehe soco ndichin. ¹⁷ Vatyí ñahri noo cha ñohó xehe, ta cuñún, tyi ma natuvi. Ta ni noo tuhun xehe, ta cuñun, tyi ma quita nu ndichin ta coto yo. ¹⁸ Yucuan chaha tyasoho ndo tuhun cahín. Vatyí tatu quichaha ndo tuhun cahín, cuaha ca cusañahi chi ndo. Soco tatu ma tyasoho ndo, tyicuan ta cutinyaa Nyoo tandihi maa chi ndo nyacua nya cha chiin ri cha cuñi maa ndo tyi cumí ndo.

Tari yañi ra, ta tari sihi ra, tyicuan caa cuví chi ñu quichaha tuhun Nyoo, catyí ra Jesús

(Mt. 12.46-50; Mr. 3. 31-35)

¹⁹ Tyicuan ta chaq̄ sihi ra Jesús chihin yañi ra nu nyaá ra. Soco ña cuví chaa ñu vatyí tuví xaan ñáyivi. ²⁰ Tyicuan ta sacoto ñáyivi canyicú cuan chi ra Jesús, ta catyí ñu:

—Sihun chihin yañun nyicú ñu chata vehe. Ta cuñi ñu cahan ñu chuhun.

²¹ Tyicuan ta nacahan ra Jesús, ta catyí ra:

—Tandihí maa ñáyivi cha chiñi ta sacuví tuhun Nyoo cha cahín, ican ñu cuví sihi, ta ican ñu cuví yañi —catyí ra Jesús.

Nu sacutaxin ra Jesús tatyí ñihi vavaha nu miñi

(Mt. 8.23-27; Mr. 4.35-41)

²² Cuví chi noo quívi cuan quihví ra Jesús chichi noo canoa chihin ra cachicá noo chihin ra. Ta quichaha catyí ra chi ra:

—Coho ndo inga chiyo miñi ihya.

Yucuan ta cuahan coyo ra chihin canoa cuan. ²³ Ta cha ni ri ca cha cuahan ra mahñu miñi cuan, tññ ñumahna chi ra Jesús. Tyicuan ta sana iñi ra ta chaq̄ noo tatyí ñihi vavaha. Ta quichaha tyihí chi ndutya chichi canoa cuan. Ta quichaha cuñi nyee canoa cuan vatyí cama xaan ndutya quihví. ²⁴ Tyicuan ta casandoyō ra chi ra Jesús. Ta quichaha catyí ra:

—¡Maestro! ¡Maestro! Cha cuñi nyee yo chichi ndutya —catyí ra.

Tyicuan ta nducuita ra Jesús. Ta quichaha catyí ra chi tatyí cuan ta chi ndutya cuan, na cutaxin chi. Ta cutaxin ri. ²⁵ Tyicuan ta quichaha catyí ra chi ra cachicá noo chihin ra:

—¿Ñáá tuhun yuhví ndo? ¿Atu ña chinó iñi ndo vatyí yuhu sahá cuende chi ndo? —catyí ra.

Soco ra cuan, yuhvi xaan ra. Ta iyo xaan cuñi ra. Ta quichaha ndaca tuhun ra chi ra tahan ra:

—¿Yóó ra cuví ra ihya? Vatyí nyacua nya tatyí ta ndutya ta quichahá tuhun cahan ra.

Nu nduvaha noo ra yihí tatyí ña vaha ñuu Gadara

(Mt. 8.28-34; Mr. 5.1-20)

²⁶ Tyicuan ta chaq̄ coyo ra ityi Gadara cha nyaá inga chiyo miñi ityi nuu Galilea.

²⁷ Ta quit̄a ra chichi canoa cuan. Ta yucuan chaq̄ noo ra cha quichi noo ñuu ityi cuan chisatahan ra chi ra. Ta yihí tatyí ña vaha chi ra. Ta cha naha xaan ña ñihnó maa ra sahama. Ni ri ña iyó ra vehe ra. Chicá noo ri maa ra nu ñaña calavari cuan. ²⁸⁻²⁹ Ta tuhvá tatyí ña vaha cuan naquiquí chí ra. Ta yucuan chaha chahñi ñu ndaha ra ta chaha ra chihin cadena. Soco tatyí ña vaha cuan chahá fuerza chi ra cha cahnya ra. Ta sacono chí chí ra. Ta chinyaca chí chí ra noo nu yori maa ñáyivi iyó. Ta cuhva cha

nyehē ra chi ra Jesús, chicuñi chiti ra nuu ra. Ta quichaha canachaa ra, ta catyí ra:

—¿Ñáá tuhun tyihún chuun chihin yuhu, yoho Jesús, Sehe Nyoo cahnu? Chiquén chuun vatyí ma sanyehun tundoho chii —catyí ra yihí tatyí ña vaha cuan chi ra Jesús.

Ta catyí ra tyehe caa vatyí ra Jesús tachí ra chi tatyí ña vaha cuan, na quita chi ra ndahvi cuan. ³⁰ Ta quichaha ndaca tuhun ra Jesús chi tatyí ña vaha cuan, ta catyí ra:

—¿Ñáá nañún?

Ta tatyí ña vaha cuan sacahan chi ra cuan, ta catyí ra:

—Nyuhu nañí ndi, Legión.

Tyicuan caa catyí ra vatyí cuaha xaan tatyí ña vaha yihí chi ra. Cuenda mil tatyí ña vaha cuan yihí chi ra. ³¹ Tyicuan ta tatyí ña vaha cuan catyí chi ra Jesús vatyí ma tuchi ra chi chi nu tindoho nu ma cuvi maa quita chi. ³² Ta chicán tatyí ña vaha cuan chi ra Jesús nacuhva ra caquihvi chi chichi quini cha canyicú yuhu miñi cuan. Tyicuan ta chaha ra Jesús permiso cha caquihvi chi chichi quini cuan. ³³ Ta quita tatyí ña vaha cuan chi ra ndahvi cuan. Ta caquihvi chi chichi quini cuan. Tyicuan ta cachino quini cuan. Ta yatyin cuan nyaá noo xahva yuhu miñi cuan. Yucuan canacoyo ti chichi miñi cuan. Ta cachihi ti chihin ndutya cuan.

³⁴ Tyicuan ta ra casahá cumi chi quini cuan, yuhvi xaan ra. Ta cuahan coyo vavaha ra cua nacatyí ra chi ñáyivi nya ñuu. Ta tandihí ri ñáyivi cha nyehe ra, ta nacatyí ra tuhun cuan. ³⁵ Tyicuan ta chaá coyo ñáyivi cua nyehe ñu ñáá cha cuvi cuan. Tyicuan ta chaá ñu nu nyaá ra Jesús. Ta nañihí ñu chi ra cha yihí tatyí ña vaha cuan chi. Nyaá ra nuu ra Jesús. Ta ñihnó ra sahma ra. Ta vaha cuñí ra. Ta yuhvi xaan ñu cuvi. ³⁶ Tyicuan ta tandihí ñu cha nyehe cha cuvi cuan, nacatyí ñu chi tandihí ca ñáyivi yoso caa quita tatyí ña vaha chi ra ndahvi cuan, ta nduvaha ra. ³⁷⁻³⁹ Yucuan ta tandihí ñáyivi ityi Gadara cuan quichaha catyí ñu chi ra Jesús na cunuhu ra ityi nu quichi ra. Vatyí yuhvi xaan ñu chihin cha sacuvi ra chihin tatyí ña vaha cuan. Tyicuan ta ra cha quita tatyí ña vaha cuan chi, catyí ra chi ra Jesús, na cuhva ra cha cahun ra chihin ra. Soco catyí ra Jesús chi ra:

—Cuanuhu nya vehun. Ta nacuhva cuendon chi ñáyivi chuun ñáá cha sacuvi Nyoo chuhun —catyí ra.

Yucuan ta ra Jesús nandihvi ra chichi canoa cuan. Ta cuanuhu ra chihin ra cacticá noo chihin ra. Tyicuan ta ra ndahvi cha nduvaha cuan, cuanuhu ra nya ñuu ra. Ta ityi cuahan ra nacatyí ra chi tandihí ñáyivi ñuu cuan yoso caa sanduvaha ra Jesús chi ra.

Nu nduvahā sehe ra Jairo ta ñaha sihi cha t̄in sahma ra Jesús

(Mt. 9.18-26; Mr. 5.21-43)

⁴⁰ Quiyivi cha nachaa ra Jesús cha chahan ra inga chiyo miñi cuan, cuaha xaan ñáyivi nyatú ñu chi ra. Ta sii xaan cuñi ñu vatyí nachaa ra.

⁴¹ Tyicuan ta chaa noo ra cha nañi Jairo, ra cuví nuu vehe ñuhu, ta chicuiñi chiti ra nuu ra. Ta quichaha chacu ndahvi ra nuu ra, na cuhun ra vehe ra. ⁴² Vatyí iyó noo tuhun ri sehe ra, ta iyó uchi uvi cuiya ña. Ta cha cuñi cúvi ña chihin cuehe. Ta cuahan ra Jesús vehe ra. Ta cuaha xaan ñáyivi cuahan chihin ra Jesús, ta tihin xaan cuahan ra mahñu ñu. ⁴³ Ta chihin ñáyivi cuan cuahan noo ñaha cuhvi. Cha iyó uchi uvi cuiya ndoho ña noo cuehe niñi. Ta cha ndihi maa xuhun ña sanaa ña, ta ña nduvahá ña. ⁴⁴ Soco chaa ña nu nyaá ra Jesús ityi chata ra. Ta t̄in ña sahma ra. Ta caa cuhva ri cuan, ta chicunyasi cha chati niñi ña.

⁴⁵ Tyicuan ta quichaha catyí ra Jesús:

—¿Yóó cha t̄in sahme?

Ta tandihi ñu cuahan chihin ñu catyí ra:

—Yori.

Ta catyí ra Pedro ta ra tahan ra chi ra Jesús:

—Maestro, cuaha xaan ñáyivi cuahan chuhun, ta tihin xaan cuahun. Ta suri maa ñu tyandahá ñu chuun. Ta ndacá tuhun con “¿Yóó cha t̄in sahme?” —catyí ra.

⁴⁶ Soco ra Jesús catyí ra:

—Chitó mai vatyí iyó noo cha t̄in sahme. Vatyí tuví iñi cuahan suhva tunyee iñi cha iyó chii —catyí ra.

⁴⁷ Tyicuan ta ñaha sihi cuan nyehe ña vatyí cha chitó ra. Ta quichaha nihi ña chihin cha yuhvi ña. Ta chicuiñi chiti ña nuu ra. Ta quichaha nacatyí ña chi ra ñáá tuhun cha t̄in ña sahma ra, ta yoso caa nduvahā ña caa cuhva ri cuan. Ta chiñi tandihi ñáyivi cuan cha nacatyí ña. ⁴⁸ Yucuan ta catyí ra Jesús chi ña:

—Yoho sihi, cha nduvahun vatyí chinó iñun chii. Cuahan chihin cha vaha —catyí ra.

⁴⁹ Ni cahán ca ra Jesús tuhun ihya, ta chaa noo ra quitā vehe ra cuví nuu vehe ñuhu cuan. Ta quichaha catyí ra chi ra Jairo cuan:

—Sehun cha yaha chihi ña. Ma sayanga con chi Ra Sacuaha chiña —catyí ra.

⁵⁰ Soco cha chiñi ra Jesús tuhun cuan. Ta quichaha catyí ra:

—Ma yuhvun. Chino iñun. Ta sehun cua nduvaha ña —catyí ra.

⁵¹ Ta cuhva cha chaa ra Jesús vehe ra Jairo, ña chaha ra quihvi ñáyivi chichi vehe. Maa ri maa ra Pedro ta ra Jacobo ta ra Juan ta maa ra Jairo chihin ñasahi ra, quihvi ñu chichi vehe cuan nu catuvi cuehe luhlu cha chihí cuan.

⁵² Ta tandihi ñu chacú chaa ñu cha cuenda vatyí chihí cue. Soco ra Jesús catyí ra chi ñu:

—Ma cuacu ca ndo. Vatyí ña chihí cue. Quixí cue —catyí ra.

53 Soco chacú nyaa ñu tuhun cahan ra. Ta ña chinó iñi ñu. Vatyí chitó ñu tyi cha chihí cue. 54 Tyicuan ta tñn ra Jesús ndaha cue. Ta ñihi cahan ra ta catyí ra chi cue:

—Nducuita, cuehe luhlu —catyí ra.

55 Tyicuan ta nandoto cue. Ta caa cuhva ri cuan nducuita cue. Ta quichaha catyí ra Jesús:

—Cuhva ndo cha cachi cue.

56 Ta sutu cue ta sihi cue, iyo xaan cuñí ñu. Soco catyí ra Jesús chi ñu vatyí yori maa chihin cahan ñu tuhun cha cuví cuan.

9

Nu tachí ra Jesús ndi uchi uvi tahan ra cachicá noo chihin ra vatyí cucahan ra tuhun Nyoo

(Mt. 10.5-15; Mr. 6.7-13)

1 Sandu ñn ri ra Jesús ndi uchi uvi tahan ra cachicá noo chihin ra. Ta chaha ra tunyee iñi chi ra vatyí cuví tava ra tatyí ña vaha, ta cuví sanduvaha ra chi ñu cuhví.

2 Ta tachí ra tyiño chi ra vatyí na sanduvaha ra chi ñu cuhví, ta cahan ra tuhun Nyoo yoso caa nyacá ñaha ra añima ñáyivi. 3 Ta catyí ra chi tandihí ra cuan:

—Ñahri cha cuison ndo ityi cahun ndo, ni yutun ma tuvi ndo. Ni yitin, ta ni ri cha cachi ndo ta ma cuison ndo. Ta ni ri xuhun ta ma cuison ndo. Tacuhva ñihnó ri ndo cahun ndo. 4 Ta savaha ri vehe cha chaa ndo, cunyaa ndo yucuan nyacua nya cha chaa quívi cha cahun ndo inga ñuu.

5 Ta nu ña cuñí ñu cuiñi ñu tuhun cahan ndo, quita ndo ñuu cuan. Ta naquisi ndo ñiyaca chaha ndo. Tyehe caa sacuvi ndo na cuvi chi tari minoo seña chi ñu, vatyí ña cuñí ñu tyasoho ñu tuhun Nyoo —catyí ra Jesús chi tandihí ra cuan.

6 Tyicuan ta cuahan coyo ra tandihí cuii maa ñuu. Ta cahan ra tuhun vaha Nyoo ta yoso caa cuñí chi ta cacu ñu. Ta sanduvaha ra chi ñu cuhvi.

Nu cuñí ra Herodes coto ra yóo ra chicá noo cahan tuhun Nyoo ta sanduvahá chi ñáyivi
(Mt. 14.1-12; Mr. 6.14-29)

7 Ra Herodes ra cuví ra nyacá ñaha ñicahnu ityi Galilea, ñihí ra tuhun cha sacuví ra Jesús. Ta ña ñihí vaha ra cuhva yóo ra cuví ra. Vatyí yihí ñu catyí ñu vatyí ra Juan, ican ra nandoto. 8 Ta yihí ñu catyí ñu vatyí ra Elías, ican ra nandoto. Ta yihí ñu catyí ñu vatyí inga ra profeta Nyoo ta cha naha, ican nandoto. 9 Soco catyí ra Herodes:

—Maa mai tyihí tyiño chicahnya sucun ra Juan. ¿Tu tyicuan caa, yóo ra chiñi xain tuhun ihya? —catyí ra.

Ta ra Herodes cuan nducú xaan ra cuhva yoso caa nyehe ra chi ra cha chicá noo cuan.

Nu chaha ra Jesús cha cachi ohon mil rayi

(Mt. 14.13-21; Mr. 6.30-44; Jn. 6.1-14)

10 Ta cuhva cha nachaa coyo ra chicá tyiño nuu ra Jesús, canacatyí ra chi ra Jesús tandihí cuii maa cha

cuví nu chahan coyo ra. Tyicuan ta tava s̄in ra Jesús chi ra ta cuahan coyo ra yatyin ri noo ñuu cha nañí Betsaida. ¹¹ Soco cuhva cha ñihí ñáyivi tuhun vatyí cuahan ra Jesús nyicuan, ta cuahan coyo vavaha ñu nya nu nyaá ra. Tyicuan ta quichaha cahan ra chihin ñu tuhun yoso caa nyacá ñaha Nyoo añima ñáyivi. Ta sanduvaha ra chi ñu cuhvi.

¹² Ta cuhva cha cua iñi xaan, ndi uchi uvi tahan ra chicá noo chihin ra quichaha catyí ra chi ra:

—Catyí chi ñáyivi ihya na cunuhu ñu cunyitatu ñu, ta na cunducu ñu noo cha cachi ñu noo ñuu cha nyaá yatyin ri cuan. Vatyí ihya ñahri maa cha cachi yo iyó —catyí ra.

¹³ Tyicuan ta quichaha catyí ra Jesús chi ndi uchi uvi tahan ra cuan:

—Cuhva ndo cha cachi ñu —catyí ra.

Tyicuan ta quichaha catyí ra chicá noo chihin ra chi ra tahan ra:

—Ñahri maa cha iyó ihya. Ohon tahan ri pan, ta uvi tahan ri tiyaca iyó. Soco ma ñihí cha cachi tandihí ñáyivi ihya. Ni ri cusata ndi soco ma ñihí —catyí ra.

¹⁴ Vatyí ohon mil rayi nyicú yucuan. (Ta s̄in ri nyicú ñusihí chihin sehe ñu.) Yucuan ta ra Jesús catyí ra chi ra cachicá noo chihin ra:

—Na cunyicu ñáyivi cha uvi xico uchi tahan ñu noo nu cunyicu ñu.

¹⁵ Tyicuan ta chicunyicu tandihí ñu. ¹⁶ Tyicuan ta

quehen ra Jesús ohon tahan pan cuan chihin uvi tahan tiyaca cuan. Ta nanyehe ndaa ra andivi, ta nacuhva ra tyahvi nyoo chi Nyoo. Tyicuan ta tahvi sava ra pan ta tiyaca cuan. Ta chaha ra chi ra cachicá noo chihin ra na casacha ra chi ñáyivi. ¹⁷ Tyicuan ta tandihí ñu chachi ñu. Ta chitu chichi ñu. Yaha cuan ta ndoo ca yiquin ta sacutu ra uchi uvi tahan tica chihin yiquin cuan.

Nu catyí ra Pedro tyi ra Jesús cuví ra Cristo, ra sacacú chiyó

(Mt. 16.13-19; Mr. 8.27-29)

¹⁸ Noo quivi quitá s̄in ra Jesús chihin ra cachicá noo chihin ra. Ta quichaha chicán tahvi ra chi Nyoo. Ta nu ndihí chicán tahvi ra, ta quichaha ndaca tuhun ra chi ra chicá noo chihin ra ta catyí ra:

—¿Ñáá catyí ñáyivi, yóo ra cuví yuhu?

¹⁹ Tyicuan ta nacahan ra cachicá noo chihin ra, ta catyí ra:

—Yihí ñu catyí ñu vatyí ra Juan ra sacondutya chi ñáyivi cuvún. Ta yihí ñu catyí ñu vatyí ra Elías cuvún. Ta yihí ñu catyí ñu vatyí inga ra profeta Nyoo ta cha naha cuvún —catyí ra.

²⁰ Tyicuan ta ndaca tuhun ra Jesús chi tandihí ra, ta catyí ra:

—Ta nyoho, ¿yóo ra cuví yuhu, cuhva cha cuñi nyoho?

Tyicuan ta nacahan ra Pedro, ta catyí ra:

—Yoho cuví ra Cristo ra cha quitá nu nyaá Nyoo.

Nu sacoto ra Jesús yoso caa cucahñi ñáyivi chi ra

(Mt. 16.20-28; Mr. 8.30—9.1)

²¹ Ta catyí ra Jesús chi ra cachicá noo chihin ra vatyí yori maa chihin cahan ra tuhun cuan. ²² Tyicuan ta catyí tucu ra chi ra:

—Yuhu Rayi cha quichi nya gloria cuví. Ta tahán chi vatyí cuaha xaan tundoho cunyehe. Ta ra cacuví mandoñi ta ra cacuví nuu chi tata sutu chihin ra casacuaha cuenda ley, ma chino iñi ra chii. Ta cucahñi ra chii. Soco nu cu uñi quivi cunandote —catyí ra.

²³ Tyicuan ta quichaha catyí tucu ra chi tandihí ra:

—Tatu nya nyoho cuñí ndo cunyicon ndo chii, cahnya iñi ndo cha cuñí maa ndo sacuvi ndo, tacuhva cuví sacuvi ndo cha cuñí Nyoo. Ma ndu uvi iñi ndo cha yihí ndo cuende vasi ndiquivi nyehe ndo tundoho. Vatyí yucuan cuví cruzi cha tahán chi cuiso ndo. ²⁴ Ta nya ndo ña cuñí ndo nyehe ndo tundoho cha catyí yuhu, cunyehe ndo tundoho anyaya. Soco nya ndo cuhva ndo ñayivi ndo cha catyí yuhu, cucacu añima ndo. ²⁵ ¿Ñáa cuenda quita chi ndo cha saha ganaa ndo tandihí cha iyó ñayivi, tatu cuhun añima ndo anyaya?

²⁶ Vatyí tatu cahan nuu ndo cha cahán ñayivi chi ndo cha catyí yuhu, ta cha catyí tuhun cahín, cucahan tucu nuu mai

nyehi chi ndo nachaa quivi quichi inga chaha. Vatyí cuquichi chihin cha cahnu cuví, ta cha cahnu cuví Sutuy Nyoo ta ángel cuenda ra. Vatyí yuhu cuví Rayi cha quichi nya gloria. ²⁷ Ta catyí chi ndo vatyí yihí ndo cha nyicú ndo ihya vityin, ma cúvi ndo nyacua nya nyehe ndo yoso caa cuví nu nyacá ñaha Nyoo.

Uñi tahan ra cachicá noo chihin ra Jesús nyehé ra yoso caa cuví nu nyacá ñaha Nyoo

(Mt. 17.1-8; Mr. 9.2-8)

²⁸ Uña quivi yaha cha catyí ra Jesús tuhun cuan. Ta ndaa ra noo yucu vatyí cua cacan tahvi ra chi Nyoo. Ta cuahan ra Pedro, ra Jacobo ta ra Juan chihin ra. ²⁹ Ta cha ni ri ca cha chicán tahvi ra Jesús, nasama cuhva caá sahma ra ta nuu ra. Tyaqui xaan cuichin nanduvi sahma ra. Ta xiño xaan. ³⁰ Tyicuan ta tuvi uvi tahan ra candatuhún chihin ra, ra Moisés ta ra Elías. ³¹ Ta ndichin xaan nu tayucú ra. Ta cacahán ra tuhun yoso caa cunyehe ra Jesús tundoho Jerusalén ta cúvi ra. ³² Ta vasi cuñí xaan ra Pedro chihin ra tahan ra cacusu ra, soco ña quixí ra. Ta nyehé ra cha ndichin xaan cuan nu nanyaá ra Jesús chihin ra cha tayucú chihin ra. ³³ Cuhva cha cuahan coyo ra tayucú chihin ra Jesús cuan, catyí ra Pedro:

—Maestro, vaha xaan cha nyicú ndi ihya. Na savaha ndi uñi tahan vehe, noo chuun, noo chi ra Moisés, ta noo chi ra Elías —catyí ra.

Soco ña chitó ra Pedro tuhun cahán ra. ³⁴ Ta cha ni ri ca cha cahán ra ta quichí noo vico síqui ra. Ta yuhví xaan ra cacuví cha caquihví ra chichi vico cuan. ³⁵ Tyicuan ta chichi vico cuan chiñi ra noo ndusu cha catyí:

—Ican ra ihya cuví Sehi, ta cuñí xain chi ra. Tyasoho ndo tuhun cahán ra —catyí ndusu cuan.

³⁶ Ta cha yaha cahán ndusu cuan, nanyehe ra Pedro ta ra ndihí chihin ra vatyi noo ri ca maa ra Jesús nanyaá yucuan. Ta yori maa chihin cacahan ra tuhun cha nyehe ra.

Nu sanduvaha ra Jesús chi noo ra cuehe luhlu cha yihí tatyí ña vaha chii

(Mt. 17.14-21; Mr. 9.14-29)

³⁷ Ta cha inga quívi cha noo ra Jesús yucu cuan, cuaha xaan ñáyivi chisatahan chí ra. ³⁸ Tyicuan ta chichi cha cuaha ñáyivi cuan, noo ra cana chaa xaan ra, ta catyí ra:

—Maestro, saha tumañi iñi chii. Nyehe ndahvi chi sehi. Vatyi noo tuhun maa ra iyó chii. ³⁹ Ta yihí ndihí tatyí ña vaha chi ra. Ta sacanachaa chí chí ra. Ta tuchí chí chí ra nyasava. Ta quitá tiñi yuhu ra. Ta quiñi xaan nyacuví chí chihin ra. Ta ña cuñí maa tatyí ña vaha cuan saña chi ra.

⁴⁰ Cha cahín chihin ra cachicá noo chuhun na tava ra tatyí ña vaha cuan, soco ña cuví chí ra —catyí ra.

⁴¹ Tyicuan ta nacahan ra Jesús ta catyí ra:

—Nyoho, ñu ña chinó iñi cuví ndo. Ta ni caa ni quiñi

iyó ndo. ¿Yoso ca tahan quívi cunyai chihin ndo ta cunyeé iñi tisihi ndo nyacua nya cha cutuhva ndo ta chino iñi ndo chii?

Ta catyí ra chí ra cuan:

—Nyaca chí sehung.

⁴² Ta cuhva cha cua tuhva ra cuehe cuan nu nyaá ra Jesús, ta tuchí tatyí ña vaha cuan chí cue nya sava. Soco ra Jesús tava ra chí tatyí ña vaha cuan. Ta sanduvaha ra chí cue. Tyicuan ta nacuhva cuenda ra chí cue chí sutu cue. ⁴³ Ta tandihí ñáyivi, iyo xaan cuñí ñu cha cahnu cha sacuví Nyoo chihin ñu.

Inga chaha tucu cahán ra Jesús tuhun yoso caa cucahñi ñáyivi chí ra

(Mt. 17.22-23; Mr. 9.30-32)

Cha ni ri ca cha iyo cuñí ñáyivi cha sacuví ra Jesús, ta quichaha catyí ra chí ra cachicá noo chihin ra:

⁴⁴ —Tyasoho vaha ndo tuhun cahín. Ta ma naa iñi ndo. Vatyi yuhu Rayñi cha quichí nya gloria, cucuhva cuenda ñu chí ndaha ra xaan iñi chí —catyí ra Jesús.

⁴⁵ Soco ra cachicá noo chihin ra ña cutuñi iñi ra ñáá tuhun cahán ra. Vatyi Nyoo ña chaha ra cha cacutuñi iñi ra. Ta cayuhví ra ndaca tuhun ra chí ra Jesús ñáá cha cuví cuan.

Nu sañaha ra Jesús yóo ra cha cahnu ca cucuvi nu nyacá ñaha Nyoo

(Mt. 18.1-5; Mr. 9.33-37)

⁴⁶ Yucuan ta ra cachicá noo chihin ra quichaha cacuví yuhu ra tuhun nya ra cahnu ca cuví chí chí cha uchi uvi

tahan ra. ⁴⁷ Tyicuan ta chitó ra Jesús cha chicá xiñi ra, ta quehen ra chi noo ra cuehe luhlu. ⁴⁸ Ta quichaha catyí ra chi tandihí ra cuan:

—Tatu chihin sivi natiin cuenda ndo chi noo ñáyivi ña cahnu sahá chi tari ra cuehe luhlu ihya, chi yuhu natiin cuenda ndo. Ta tatu natiin cuenda ndo chii, chi maa Nyoo cha saquichí chii, natiin cuenda ndo. Vatyí ra cha ñima ri tuhun sahá maa ndo tuhun, ican ra cuví ra cahnu nuu Nyoo —catyí ra Jesús.

Ñu cha ña cahán chi yo, ican ñu cuan tyinyee chi yo
(Mr. 9.38-40)

⁴⁹ Yucuan ta ra Juan catyí ra chi ra Jesús:

—Maestro, nyehe ndi chi noo ra cuan. Cahán ra sivun ta tavá ra tatyí ña vaha. Soco ña chaha ca ndi. Vatyí ñima chihin yo chicá noo ra —catyí ra.

⁵⁰ Tyicuan ta catyí ra Jesús chi ra:

—Ma casi ndo nu cahan ra. Vatyí yóo ra ña cahán chi yo, tumañi iñi chi yo cuahan ra —catyí ra.

Nu catyí ra Jesús chi ra Juan ta chi ra Jacobo vatyí ña vaha cha chicá xiñi ra

⁵¹ Tuvi iñi ra Jesús vatyí cha nyaña yatyin cha tahán chi cunuhu ra gloria, ta sanduní ra iñi ra. Ta quehen ra ityi ta cuahan ra Jerusalén nu cucuví ra. ⁵² Ta tachí ra tyiño na cuhun coyo ra cachicá noo chihin ra ityi nuu ca noo ñuu ityi Samaria. Vatyí canducu

ra nu nyitatu ra. ⁵³ Soco ñu Samaria cuan, ña cuñí ñu cha ndoo ra yucuan, vatyí tuví iñi ñu vatyí Jerusalén cuahan coyo ra, ta ñu Samaria ña cuví nyehe ñu chi ñu Jerusalén. ⁵⁴ Cuhva cha chitó ra Jacobo ta ra Juan cha ña chahá ñu Samaria cuan cha ndoo ra yucuan, cuxaan ra. Ta quichaha catyí ra chi ra Jesús:

—Sutu Mañi yuhu, ¿atu cuñun cha sacuvi yo tari sacuvi ra Elías? cacan yo chi Nyoo na saquichi ra ñuhu andivi siqui ñáyivi Samaria cuan, vatyí cayu ñu vatyí ña cuñí ñu cha ndoo yo ñuu ñu —cacatyí ra.

⁵⁵ Tyicuan ta nanyehe ra Jesús chi ra. Ta cahan ra chi ra ta catyí ra:

—Taxi ri ndo. Vatyí ña cutuñi iñi ndo ñáa tyiño vachi yuhu. ⁵⁶ Vatyí yuhu Rayíi cha quichí nya gloria, ña vachi vatyí sanai añima ñáyivi, Soco vachi vatyí sacaqui chi ñu —catyí ra.

Tyicuan ta cuahan coyo ra inga ñuu.

Ñu cha cuñí quihvi cuenda ra Jesús
(Mt. 8.19-22)

⁵⁷ Ta cuhva cha cachica ityi ra, quita noo ra, ta catyí ra chi ra Jesús:

—Sutu Mañi yuhu, cuñí cunyi quen chuun. Ta cuhin chuhun tandihí ri ityi cuahun —catyí ra.

⁵⁸ Yucuan ta catyí ra Jesús chi ra:

—¿Atu ndichon? Vatyí yuhu ñahri maa cha iyó chii.

Ñaña iyó vehe ti. Ta saa iyó taca ti. Soco yuhu Rayi cha quichi nya gloria ñahri maa nu cava xiñi iyó —catyí ra chi ra cuan.

⁵⁹ Tyicuan ta catyí ra Jesús chi inga ra:

—Coho chihin.

Tyicuan ta nacahan ra cuan ta catyí ra:

—Tata, cuatu noo chii, na cuhun xihne cucuchi chi suti —catyí ra.

⁶⁰ Tyicuan ta ra Jesús nacahan ra ta catyí ra chi ra:

—Sandoo chi ñu ña ñohó nuu chi Nyoo natyihi maa ñu chi tahan ndiyi ñu chichi ñuhu. Soco yoho cuahan cua cahan tuhun Nyoo chihin ñáyivi nacuhva cuenda ñu chi ñu chi Nyoo na cunyaca ñaha ra chi ñu —catyí ra.

⁶¹ Tyicuan ta quichaha catyí inga ra chi ra Jesús:

—Tata, cuñi cunyi quen chuun. Soco cuhva xihna na cuhin cucahin chihin ñu vehi —catyí ra.

⁶² Tyicuan ta ra Jesús catyí ra:

—Tari noo ra tahví ñuhú chihin arado, tatu nanyehe chata ra ña quita vaha yucun nu sahá tyiño ra. Ta tyicuan caa cuví noo ra nyicón chii, tatu yihí iñi ra cha sandoo ra, ña yihí vaha iñi ra cha cuví cunyaca ñaha Nyoo chi ra —catyí ra Jesús chi ra.

10

Nu tachí ra Jesús chi uñi xico uchi tahan ra cucahan tuhun Nyoo chihin ñáyivi

¹ Cha yahá tuhun cuan ta nacachi Sutu Mañi yo Jesús

chi inga uñi xico uchi tahan ca ra. Ta tachí ra chi uvi uvi ra noo noo ityi cuahan ra tandihí ñuu ta tandihí ityi nu tahán chi cuhun ra Jesús. ² Ta catyí ra chi ra:

—Tari noo itu cahnu vavaha, tyicuan caa nu tyiño sahí. Soco ña cuaha musu. Yucuan chaha çacan ndo chi Nyoo na saquichi ca ra musu. Vatyí tyínyee ra chi ndo cahan ndo tuhun ra chihin ñáyivi. ³ Ta cuahan ndo ta nyehe ndo vatyí cua sacuhin chi ndo tari mbee mahñu lobo. Vatyí lobo tuhvá ti chachí ti chi mbee. Ta tyicuan caa cucuñi ñáyivi sata si iñi ñu chi ndo. ⁴ Ta ma cuiso ndo ni yono ta ni cha quihí xuhun ndo, ni inga ityi ndichan ndo. Sanumi ndo. Ta ma cohon vaha ndo ityi ndatuhun ndo tuhun cha ñima ri tuhun. ⁵ Cuhva cha quihví ndo chichi vehe noo ñáyivi, cahan vaha ndo chihin ñu. Ta catyí ndo, na coo cha vaha añima ñu. ⁶ Ta tyicuan caa tatu iyó ñáyivi vaha vehe cuan, ndoo cha vaha cuan chihin ñu. Soco tatu yori ñu vaha añima, ma ndoo cha vaha chihin ñu. ⁷ Ta ndoo ndo suri maa vehe cuan. Tatu chaha ñu cha cachi ndo, çachi ndo. Tatu chaha ñu cha coho ndo, coho ndo yucuan. Vatyí ra sahá tyiño, iyó ityi chi ra cha cachi ra cha sahá ganaa ra. In ri maa vehe cuan cunyaa ndo nyacua nya cha chaa chi quivi cha cuhun ndo inga ñuu. ⁸ Ta nu chaa ndo noo ñuu ta vaha cahan ñu chihin ndo, çachi ndo ta coho ndo

tandihí cha cuhva ñu chi ndo. ⁹ Ta sanduvaha ndo chi ñu cuhví ñuu cuan. Ta catyi ndo chi ñu: “Cha nyaña yatyin Nyoo ra cunyaca ñaha ñima ndo.” ¹⁰ Soco tatu chaa ndo noo ñuu ta ña cuñí ñu tyasoho ñu tuhun cahan ndo, quita ndo ityi cahnu. Ta catyi ndo chi ñu: ¹¹ “Nyacua nya ñiyaca ñuu ndo cha iñi chaha ndi, ta cunaquisi ndi. Vatyí tari noo seña vatyí ndoo cuatyí ndo siqui ndo. Vatyí Nyoo nyaña yatyin ra chi ndo ta ña tyasohó ndo tuhun cahan ra yoso caa cuñí ra cunyaca ñaha ra ñima ndo.” Tyicuan caa catyi ndo chi ñu —catyi ra Jesús chi ra nyicón chi ra.

¹² Ta quichaha catyi tucu ra chi ra:

—Quivi tachi tuñi Nyoo chi ñáyivi, yaha ca cuhva cunyehe ñáyivi ñuu cuan tundoho, ta ñima ca ñáyivi chiyo ta cha naha ñuu Sodoma, ñu chihí cha catyi cuatyí ñu —catyi ra Jesús.

Ñáyivi ña tyasohó tuhun cahan ra Jesús cunyehe ñu tundoho

(Mt. 11.20-24)

¹³ Ta catyi ra:

—jNdahvi nyoho, ñáyivi ñuu Corazín! Ta jndahvi nyoho, ñáyivi ñuu Betsaida! Vatyí nyehé ndo nyatu cahnu, ta ña nasamá ndo cuhva iyó ndo. Soco ñáyivi ñuu Tiro ta ñuu Sidón cha sanaa Nyoo ta cha naha cha cuenda cuatyí ñu, ñahri nyatu cahnu nyehe ñu. Soco tyehe ta nyehe ñu quiivi cuan cha nyehé nyoho vityin, tañi tyehe ri ndihvi

noo ñu sahma tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan. ¹⁴ Yucuan chaha, nyoho ñuu Corazín chihin ñuu Betsaida, ñihi ca cutachi tuñi Nyoo chi ndo ican saha ñáyivi Tiro ta ñáyivi Sidón cuan. ¹⁵ Ta nyoho ñu ñuu Capernaum, cuñí maa ndo vatyí cundaa ndo nyacua nya andivi. Soco cunoo ndo nyacua nya anyaya, vatyí ña quichahá ndo tuhun Nyoo —catyi ra Jesús.

¹⁶ Ta catyi ra chi ndi uñi xico uchi tahan ra cuan:

—Ñáyivi cha tyasohó tuhun cahan nyoho, tuhun cahan yuhu tyasohó ñu cuví cuan. Ta ñu ña quichahá tuhun cahan nyoho, tuhun cahan yuhu ña quichahá ñu cuví cuan. Ta ñu ña quichaha tuhun cahan yuhu, tuhun cahan ra cha saquichí chii, ña quichahá ñu cuví cuan —catyi ra Jesús chi tandihí ra.

Nu nachaa coyo ndi uñi xico uchi tahan ra cha chicahān tuhun Nyoo

¹⁷ Yucuan cuví nu nachaa coyo ndi uñi xico uchi ra cha chicahān tuhun Nyoo chihin ñáyivi. Ta si xaan cacuví chi ra. Ta cacatyí ra chi ra Jesús:

—Sutu Mañi yuhu, nyacua nya tatyí ña vaha ta quichahá tuhun cahan ndi tatu cahan ndi sivun —catyi ra.

¹⁸ Tyicuan ta catyi ra Jesús chi ra:

—Ay, yuhu nyehi andivi nu cana cava cuihna, ra nañi Satanás. Tari noo tacha, tyicuan caa cana cava ra. ¹⁹ Ta yuhu, chahi fuerza chi ndo vatyí cuví chasaha ndo chi ra ña vaha cuan. Ta cuví cuaca chaha ndo siqui coo ta tisuhma, ta ñahri cha cuvi chi ndo. ²⁰ Soco ma sií xaan cuvi chi ndo vatyí cuví tava ñehe ndo tatyí ña vaha cuan. Sií ca cuvi chi ndo vatyí nyaá sivi ndo nu libru Nyoo —catyí ra Jesús.

Nu sacahnú ra Jesús chi Nyoo vatyí sií cuñí ra vatyí sañahá Nyoo tuhun vaha chi ñu ndahvi

(Mt. 11.25-27; 13.16-17)

²¹ Cuhva cuan sií xaan cuñí ra Jesús sahá Tatyí li Nyoo, ta catyí ra:

—Sacahní chuun, Sutu Mañi yuhu, vatyí nyacá ñahun andivi ta ñuhu ñayivi. Vatyí maun sañahún tuhun maun chi ñu ndahvi ihya. Ta ña sañahún chi ra chitó ta ra cha chiñi tuñi. Tyicuan caa Sutu Mañi yuhu vatyí tyicuan caa cuhva cuñún —catyí ra Jesús.

²² Ta catyí ra Jesús chi tandihi ra sacuví tyiño nuu ra:

—Tandihi maa tuhun cuan chaha Suti chii. Yori ñohó nuu chii, noo tuhun ri maa Suti ñohó nuu chii. Ta yori ñohó nuu chi Suti, noo tuhun ri mai ñohó nuí chi ra. Ta chi ñayivi cuñí mai sacote tuhun ra, chi ñu cuan cusacote —catyí ra.

²³ Tyicuan ta nanyehe ra chi ra cachicá noo chihin ra. Ta catyí ra chi ra:

—Sií xaan cuñí nyoho ta ñayivi cha iyó vityin vatyí nyehé ndo cha sacuví. ²⁴ Vatyí cuaha xaan rey ta ra profeta Nyoo ta cha naha cuñi ra nyehe ra cha nyehé nyoho vityin. Soco ña nyehe ra. Ta cuñí ra cuiñi ra tuhun cha chiñi nyoho vityin. Soco ña chiñi ra —catyí ra Jesús.

Nu sañaha ra Jesús chi yo vatyí tahán chi tyinyee yo chi ñayivi savaha ri

²⁵ Tyicuan ta chaq noo ra sacuahá cuenda ley vehe ñuhu. Ta quichaha ndaca tuhun ra chi ra Jesús, Vatyí nducu nyehe ra chi ra. Ta catyí ra:

—Maestro, ¿yoso caa cun-yacuví ta cuhin nu coi noo ñayivi cha ma naa ca maa?

²⁶ Tyicuan ta nacahan ra Jesús, ta catyí ra:

—¿Ñáá catyí nu ley? ¿Yoso caa tuhun cha sacuahún?

²⁷ Tyicuan ta nacahan ra sacuahaha cuenda ley cuan ta catyí ra:

—Catyí ley, cuñi yo chi Nyoo chihin tandihi añima yo ta chihin cha ñi iñi yo, ta chihin tandihi fuerza yo, ta chihin cha tandihi cha chiñi tuñi xiñi yo. Ta cuñi yo chi ñayivi tahan yo tari cha cuñi yo chi maa yo. Tyicuan caa catyí chi —catyí ra cuan.

²⁸ Tyicuan ta catyí ra Jesús chi ra:

—Ndicha cha cahún. Tyicuan caa sacuvun ta cacu añimon ta coun ñayivi cha ma naa ca maa —catyí ra Jesús.

²⁹ Soco ra sacuahaha cuenda ley cuan cuñí ra savaha ra chi

ra, ta quichaha catyi tucu ra chi ra Jesús:

—¿Yóo cha cuví ñáyivi tahin? —catyi ra.

³⁰ Tyicuan ta nacahan ra Jesús, ta catyi ra:

—Noo ra quita ra Jerusalén ta cuahan ra nya ñuu Jericó. Ta tahan ra chi ra suhu. Ta suhu ra tandihi cuii maa cha nyiso ra, nyacua nya sahma ra. Ta cañi ra chi ra nyacua chacun taxin ra chi ra. Ta sandoo maa ra chi ra yucuan. ³¹ Tyicuan ta yaha noo tata sutu ityi cuan. Soco cuhva cha nanyehę ra chi ra catuvi cuan nya sava ri yaha ra. ³² Tyicuan ta yaha tucu nonga ra cha yihí cuenda vehe ñuhu, cha nañi levita. Soco cha nanyehę ra chi ra catuvi cuan suri nya sava ri yaha ra. ³³ Tyicuan ta quichi tucu noo ra Samaria. Ta cua yaha tucu ra suri ityi cuan. Ta nanyehę ra chi ra catuvi yucuan, ta quichi nundahvi cuñi ra nyehe ra chi ra. ³⁴ Ta tuhva ra nu catuvi ra, ta quichaha saha ra tatan chi ra. Ta tyihj ra aceitye ta vinu nu cahvi chi ra. Ta sahvi ra noo sahma chata ra. Yaha cuan ta sandaa ra chi ra burru sana ra, ta naquehen ra chi ra, ta cuahan ra chihin ra nu nyaá noo vehe. Ta yucuan saha cuenda ra chi ra. ³⁵ Ta cha inga quivi cha cuñi cuhun ra Samaria cuan. Ta tava ra uvi tahan xuhun. Ta chaha ra chi chitoho vehe cuan. Ta catyi ra chi ra: “Saha cuenda vahun chi ra ihya. Ta cuhvon cha cachi ra. Ta saton tatan chi ra na nduvaha ri ra. Tatu

cuñi ca chi xuhun, tyiyahvi mai chuun nandichi”, catyi ra. Yucuan ta cuahan ra —catyi ra Jesús.

³⁶ Nu ndihj nacatyj ra Jesús tuhun ihya, quichaha ndaca tuhun ra chi ra sacuaha cuan, ta catyi ra:

—Vaha. ¿Chichi cha uñi tahan ra cuan, nya ra cuví ra tahan ra ndahvi cuan? —catyi ra Jesús.

³⁷ Tyicuan ta quichaha catyi ra sacuaha cuan:

—Ra cha cundahvi cuñi chi ra —catyi ra.

Tyicuan ta quichaha catyi ra Jesús:

—Cuahan ta sacuvi tucu yoho tyicuan caa chihin ñáyivi cha iyó tundoho chii —catyi ra.

Nu chinyaq ra Jesús vehe cu Marta chihin cu María

³⁸ Ta quehen ra Jesús ityi cuahan ra. Ta chaq ra noo ñuu. Ta yucuan iyó noo ñaha cha nañi Marta. Ta chaq ra vehe ña. ³⁹ Ta cu Marta iyó noo cuhu ña cha nañi María. Ta cu María chicunyaq ña yatyin ri chaha ra Jesús, vatyj cuiñi ña tuhun cahán ra. ⁴⁰ Soco cu Marta cuaha xaan tyiño nyaá sacuvi ña. Ta chaq ña nu nyaá ra Jesús, ta quichaha catyi ña chi ra:

—Tata. ¿Atu ña chicá xiñi yoho vatyj cuhi sandoó maa ña chii chihin tyiño? Catyi chi ña na tyinyee ña chii —catyi ña chi ra.

⁴¹ Soco ra Jesús catyi ra chi ña:

—Marta, Marta, chicá xaan xiñun ta cutyiño xaan cuñun chihin tyiño chiña. ⁴² Soco

iyó noo tuhun cha tahán chi caca xiñi yo. Ta cu María ihya nacachí ña tyiño vaha ca sacuvi ña cha tyasohó ña tuhun cahín. Ta yuhu ma cuvi tinyai chi ña —catyí ra Jesús chi cu Marta.

11

Nu sañaha ra Jesús chi ra cachicá noo chihin rayoso caa cacán tahvi ra chi Nyoo

(Mt. 6.9-15; 7.7-11)

¹ Cuví noo chaha cha chicán tahvi ra Jesús. Ta cuhva cha ndihí chican tahvi ra, ta quichaha catyí noo ra chicá noo chihin ra chi ra:

—Sañaha chi ndi yoso caa cacán tahvi ndi chi Nyoo. Tari sañaha ra Juan chi ra chicá noo chihin ra —catyí ra.

² Tyicuan ta catyí ra Jesús chi ra:

—Cua cuhve cuhva chi ndo yoso caa. Tyehe caa çacan tahvi ndo:

Sutu Mañi yuhu, yoho cha nyaun andivi. Sacahnu xaan ndi chuun.

Na quichí quivi cha nyaca ñahun ihya siqui ñuhu ñayivi.

Na sacuvi ñáyivi ihya siqui ñuhu ñayivi tandihi cuhva cuñi maun, tari cuhva cuví gloria.

³ Cuhva cha cachi ndi tacuhva yoso cuhva yaha ndi noo noo quivi.

⁴ Saha tucahnu iñi chi ndi. Tari maa ndi sahá ndi tucahnu iñi chi ñu tasi iñi chi ndi.

Ma cuhvon cha nducu nyehe ra ña vaha chi ndi, soco sacacu chi ndi tacuhva

ma sacuvi ndi cuatyí nuun.

Tyicuan caa cacán tahvi ndo —catyí ra Jesús.

⁵ Ta catyí tucu ra ñandihí:

—Saha yo tuhun tyi nyoho iyó noo amigon, ta chaa ra vehun cha ñuu ta catyí ra chuun: “Xaa, saha tumañi iñi chii, cuhva noo uñi tahan pan chii. ⁶ Vatyí noo ra tahin nichaa ra vehi. Ta cañi xaan quichí ra. Ta ñahri maa cha iyó chii cuhve chi ra.” ⁷ Ta yoho cunacahun ta catyun chi ra: “Ma sayangon chii, ndee. Vatyí nyasí yuvehi. Ta niquixi chihin sehi. Ta ña cuvi nducuite ta cuhve cha cuhve chuun cha vityin.”

Tyicuan caa cucatyun chi ra. ⁸ Ta catyí yuhu chuun.

Vasí ra tahun cuví chi ra, ma nducuiton ta cuhvon chi ra cha numi ri. Soco tatu ndoo

ra yucuan, ta ma cundihñi ra cacán ra chuun, sacachan

ra yuehun ta cana chaa ra chuun tacuhva cha ma

cuvi cusun, ta cundihñun cha sacachan ra yuehun,

tyicuan ta nducuiton ta cuhvon chi ra, tacuhva cha

ma sayanga ca ra chuun. ⁹ Ta tyicuan caa tucu nyoho,

çacan ndo chi Nyoo. Ta cuhva ra chi ndo. Nanducu

ndo ta ñihi ndo. Sacachan ndo yuvehe ta nuña. ¹⁰ Vatyí

tatu chican ndo, ñihi ndo. Tatu nducu ndo, ñihi ndo. Ta

tatu sacachan ndo yuvehe, nuña yuvehe.

¹¹ Tyicuan caa tucu nyoho cha iyó sehe ndo. Chahá

ndo cha vaha chi sehe ndo. Ña tuhvá ndo chahá noo yuu

chi sehe ndo tatu chican ndotyin pan. Ta ña tuhvá ndo chaha ndo noo coo chi sehe ndo, tatu chicán ndotyin tiyaca. ¹² Ta ña tuhvá ndo chaha ndo noo tisuhma chi sehe ndo tatu chicán ndotyin ndivi cachi ndotyin. ¹³ Nyoho cha quiñi iyó ndo, soco chitó ndo yoso caa cuhva ndo cha vaha chi sehe ndo. Ta vihi ca Sutu Mañi yo cha nyaá andivi, cuaha ca cha vaha cuhva ra chi ndo tatu cacán ndo chi ra. Ta cuhva ra Tatyí li ra cunyaa añima ndo.

Ra xaan iñi chi ra Jesús catyí ra vatyí chihin fuerza cuihna sacuví ra milagru

(Mt. 12.22-30; Mr. 3.20-27)

¹⁴ Ra Jesús tavá ra tatyí ña vaha cha yihí chi noo ra cha ñihi sahá cuihna. Ta cuhva cha quitá tatyí ña vaha cuan chi ra ñihi cuan, nacahan ra. Tyicuan ta ñáyivi, iyo xaan cuñí ñu. ¹⁵ Ta yihí ñu catyí ñu:

—Ra ihya, tavá ra tatyí ña vaha soco chihin fuerza ra Beelzebú ra cuví nuu chi cuihna —catyí ñu.

¹⁶ Ta yihí ñu cuñí ñu nducu nyehe ñu chi ra, ta chicán ñu chi ra Jesús na savaha ra noo seña chi ñu chihin tunyee iñi Nyoo. ¹⁷ Soco ra Jesús chitó ra tuhun chicá xiñi ñu. Ta quichaha catyí ra chi ñu:

—Tatu gobiernu ta cacusiin ra, cuaha ri ityi nanduvi ra, cucañi tahan ra chihin tahan ra, ta cundihi tuhun cha cunyaca ñaha ra. Tatu noo vehe ta cacusiin ñu chihin tahan ñu, cutivi nu nyicú ñu. ¹⁸ Ta tyicuan caa tucu cuihna. Tatu tandihi ra cacusiin ra chihin tahan ra cundihi fuerza cha

iyó chi ra. Ta ihya catyí chi ndo tyehe caa vatyí nyoho catyí ndo vatyí chihin fuerza ra Beelzebú tavé tatyí ña vaha. ¹⁹ Soco tyehe ta tavé tatyí ña vaha tari cuhva catyí ndo, ndaca tuhun ndo chi ra nyicú chihin ndo yóo chi fuerza tavá maa ra tatyí ña vaha. Maa ra sacoto ra chi ndo cha ndicha vatyí nyoho tondo ri chicá xiñi ndo. ²⁰ Soco catyí chi ndo vatyí yuhu tave tatyí ña vaha chihin fuerza Nyoo. Ta cuñí chi catyí cuan vatyí ndicha cuii Nyoo ra nyacá ñaha añima ñáyivi cha chaq ra nu nyicú ndo.

Nu sañahá ra Jesús vatyí ñihi ca fuerza Nyoo ta ñima ca fuerza cuihna

²¹ Tatu noo ra iyó vavaha fuerza chi ra ta nyisó ra mityí ra, ta sahá cumi ra vehe ra. Ñohó xehe vaha ndaha tyiño ra chichi vehe ra tacuhva cha ma cuvi tinyaa ra suhu.

²² Soco tatu quichi inga ra cha cuaha ca fuerza iyó chi, ta cañi tahan ra chihin ra, ta cuvi chasaha ra chi ra, tyicuan ta tinyaa ra ndaha tyiño ra, ta sachá ra chi ra tahan ra. ²³ Ñáyivi ña sahá tyiño chihin, sativi ñu tyiño sahí. Ta ñu ña tyinyeé chii cha cahán ñu tuhun Nyoo chihin ñáyivi, cuñí chi catyí vatyí ña chahá ñu cha coto ñáyivi tuhun cahín.

Nu sañahá ra Jesús chi yo yoso caa ndichi tucu tatyí ña

*vaha inga chaha tatu naa iñi
yo chi Nyoo*

(Mt. 12.43-45)

²⁴ Tatu noo tatyí ña vaha quita chi noo ñáyivi, chicá noo chi noo ñuhu ityi, nanducú chi noo nu nyitatu chi. Soco ña nañihi maa chi nu nyitatu chi, tyicuan ta ndichí xiñi chi: “Cunuhu tiqui nya vehi nu quite.” ²⁵ Yucuan ta nachaa chi añaima nu quita chi. Ta nanyehę chi vatyí ndii xaan ta vii xaan. ²⁶ Tyicuan ta cua naquehen chi ucha ca tahan tatyí ña vaha cha yaha ca cuhva ta ican saha maa chi. Tyicuan ta in ri quihvi tandihi chi añaima ñu cuan. Yucuan chaha yaha ca cuhva nanduvi ñu ican saha cha cuví maa ñu —catyí ra Jesús.

*Ñu cha ndicha iyó vaha
ñáyivi*

²⁷ Cha ni ri ca cha cahán ra Jesús tuhun cuan, ta cana chaa noo ñaha cha ñohó mahñu ñáyivi cuan. Ta quichaha catyí ña:

—Ñana cha sii cuví chi ñaha cha sacacu chuun ñaha cha chaha caxun —catyí ña.

²⁸ Soco ra Jesús catyí ra:

—Sii ca cuñí ñu cha chiñi tuhun cahán Nyoo ta quichahá ñu —catyí ra.

*Ñáyivi ña vaha, maa ri maa
nyatu cahnu cuñí ñu nyehe ñu*
(Mt. 12.38-42; Mr. 8.12)

²⁹ Tyicuan ta chaq coyo ñáyivi nu nyaá ra Jesús. Ta quichaha catyí ra chi ñu:

—Ñáyivi cha iyó vityin quiñi xaan iyó ñu. Ta nyiyo

iñi ñu. Cuñí ñu nyehe ñu seña ta cha iyo. Soco noo ri cunyehe ñu, tahan cha sacuvi Nyoo chihin ra Jonas. ³⁰ Tari ra Jonás cuví ra seña chi ñáyivi ñuu Nínive ta cha naha, tyicuan caa tucu yuhu Rayii cha quichi nya gloria, cuví tari noo seña chi ñáyivi cha iyó vityin. ³¹ Quivi tachi tuñi Nyoo chi ñáyivi cunandoto ñaha cuví reina ityi sur ta cha naha, ta cucatyí ña vatyí cuhun ndo anyaya, vatyí maa ña vasi cañi ñuu ña, soco quichí ña, quichí tyasoho ña tuhun cha chiñi tuñi cahan ra Salomón. Ta ihya cahnu ca cuví ra cha cahán chihin ndo vityin ta ñima ca ra Salomón. ³² Ta quivi cutuñi chi tandihi ñáyivi, cunducuita ñu chiyo ñuu Nínive ta cha naha, ta cucatyí ñu vatyí nyoho ñu cha iyó vityin cuhun ndo anyaya, vatyí maa ñu ñu Nínive, canasama ñu cuhva iyó ñu quivi cahan ra Jonás tuhun Nyoo chihin ñu. Ta vityin yuhu ra cahnu ca cahán chihin ndo ta ñima ca ra Jonás.

*Nu sañaha ra Jesús vatyí na
saha yo cuenda añaima yo coto
vaha ñahri cha ndichin Nyoo
nyaá*

(Mt. 5.15; 6.22-23)

³³ Yori ndo tyaa ndo lámpara ta tyihi xehe ndo, o tyihi ndo chichi noo caja. Vatyí ñuhu cuan tahan chi coso minoo nu sucun. Tacuhva quihvi ñáyivi vehe ndo, soco ndichin. ³⁴ Chiti nuu ndo noo cha sandichin chi ndo cuví. Ta tyicuan

caa tucu añima ndo, tatu iyó cha ndichin Nyoo añima ndo, vaha ñáyivi cuví ndo. Tatu ñahri cha ndichin Nyoo nyaá tari noo ra cuaa cuví ndo, ña cuví nyehe ndo ityi vaha cha cuahan nu nyaá Nyoo. ³⁵ Yucuan chaha saha ndo cuenda añima ndo. Tatu nyaá cha ndichin Nyoo chihin ndo, o nyaá cha ñaa iñi. ³⁶ Tatu tyitu añima ndo chihin cha ndichin Nyoo ñahri ca maa noo nu ñaa iñi iyó chi ndo, vatyi sandichin chi tandihi ndo. Tari cha nyaá noo lámpara sacatá chi ñuhu chi ndo cuví cuan —catyí ra Jesús.

Cahán ra Jesús chi ra casacuaha cuenda ley vehe ñuhu ta chi ra fariseo, ra caquichaha xaan ley cuan
(Mt. 23.1-36; Mr. 12.38-40; Lc. 20.45-47)

³⁷ Cuhva cha ndihí cahan ra Jesús nuu ñáyivi, noo ra fariseo, ra quichaha xaan ley vehe ñuhu, catyí ra chi ra Jesús, vatyi na cahun ra cucachi ra nya vehe ra. Ta chaa ra Jesús vehe ra. Ta quihví ra chicunyaa ra mesa.

³⁸ Tyicuan ta ra fariseo cuan iyo cuñí ra vatyi ña nacatya ra Jesús ndaha ra, tari cuhva costumbre maa ñu cha cumañi cachi ñu. ³⁹ Soco ra Jesús catyí ra chi ra:

—Nyoho, ra cacuvi fariseo, tari cha chata ri vaso ta coho sanduvii nyoho. Soco ityi chichi, quiñi caa. Vatyi ña nacatya ndo. Tyicuan caa nyoho. Vatyi cuñí ñáyivi vatyi vaha ñáyivi cuví ndo. Soco

xehe ri suhu ndo ta ña sacuvi ndo cha vaha. ⁴⁰ Ndava xaan iñi ndo. ¿Atu ña chitó ndo vatyi ra cha savahá ityi chata vaso, suri maa ra savahá ityi chichi? Vatyi tari vaso cuví ndo. ⁴¹ Tahán chi sahá ndo tumañi iñi chi ñáyivi, ta tyinyee ndo chi ñu. Sacuvi ndo cha vaha chihin ñu, tyicuan ta nduvii tucu ityi chichi ndo.

⁴² ¡Ndahvi nyoho ra fariseo! Vatyi nyoho vasi vaha chaha ndo diesmo chi Nyoo cuenda yucu cha nañi menta ta ruda ta ñáa ndihí ca yucu cha tachi ndo, soco ña quichahá ndo cuhva cha vaha cha cuñí Nyoo sacuvi yo, ta cha cuñí yo chi ra. Ta ican ihya cuví cha tahán chi sacuvi ndo, soco ma sandihí ndo cha cuhva ndo diesmo ñandihí. ⁴³ ¡Ndahvi nyoho cha cuví ndo fariseo! vatyi cuñí ndo cunyaa ndo nu tyayu vaha ca chichi vehe ñuhu. Ta cuñí ndo cha saha ñáyivi ñáyivi chi ndo nuyahvi. ⁴⁴ ¡Ndahvi nyoho ra sacuaha cuenda ley, ta nyoho ra fariseo! Vaha sahá ndo chi ndo, soco cuví ndo tari noo ñaña ndiyi cha ña quetuví. Vatyi yahá ñáyivi siqui soco ña chitó ñu ñáa cha ñohó chichi ñaña cuan. Vatyi ñahri seña catuví nu yihí ndiyi cuan. Cuñí maa ñu vatyi vaha ndo, soco ña chitó ñu vatyi ña vaha añima ndo —catyí ra Jesús.

⁴⁵ Tyicuan ta nacahan noo ra sacuahá cuenda ley vehe ñuhu, ta catyí ra:

—Maestro, cha catyún tyehe caa, nañi tucu chiin chi nyuhu —catyí ra.

46 Tyicuan ta quichaha catyí ra Jesús chi ra:

—¡Ndahvi tucu nyoho ra casacuaha cuenda ley vehe ñuhu! Vatyí sanducuaha ca ndo ley cha tachí Nyoo ta cha naha. Ta ña tahán chi. Ta yori ndoyó carga cuan, ta saniñi ndo na sacuvi ñu ta ni maa ndo ni chiin ña tyinyee ndo chi ñáyivi. 47 ¡Ndahvi nyoho! Vatyí sanduvahá vaha ndo ñaña nu ñohó yiqui ra profeta Nyoo cha cachahñi sutu chahnu ndo ta cha naha.

48 Chihin cuan cuñí chi catyí vatyí ndoó ndo vaha cha sacuvi sutu chahnu ndo ta cha naha. Vatyí sutu ndo cachahñi ra chi ra profeta Nyoo. Ta nyoho sanduvahá ndo ñaña ra. 49 Yucuan chaha catyí Nyoo ta cha naha vatyí cutachi ra suhva ra profeta ta ra caca tyiño ra nu nyicú ndo. Ta cucahñi ndo suhva ra ta inga ra cusacono ndo chi ra. 50 Ta ndicha tyicuan caa sacuví ndo. Nyoo cutachi tuñi ra chi ndo cha cuenda tandihí ra profeta ra cachahñi sutu chahnu ndo nyata chinqo ñuhu ñayivi ta nyacua nya vityin. 51 Nyacua nya niñi ra Abel cha chati cha chahñi ra Caín yañi ra, ta nyacua nya niñi ra Zacarías cha cachahñi ñu chichi vehe ñuhu yatyin nu nyaa arta. Yucuan chaha catyí Nyoo vatyí cutachi tuñi ra chi ñáyivi cha iyó vityin cha catyí cuatyí ñu chiyo ta cha naha. 52 ¡Ndahvi nyoho ra casacuaha cuenda ley vehe ñuhu! Vatyí tari cha tyihí xehe ndo ndaha ticu cuenda yuvehe nu quihvi

ñáyivi ityi Nyoo. Ta ni maa ndo ña quihvi ndo nu nyaa Nyoo. Ta ni ri ña chahá ndo cha quihvi inga ñáyivi cha cuñí quihvi —catyí ra Jesús.

53-54 Ndihí cahan ra Jesús tuhun cuan, ta quitá ra. Soco ra casacuaha ley vehe ñuhu chihin ra fariseo, nduxaan xaan ra ta quichaha cuquiñi cuñi ra nyehe ra chi ra Jesús. Ta canducu ra cuhva yoso caa cahan ra Jesús noo tuhun ña vaha, ta tyaa ra cuatyí siqui ra.

12

Nu sañahá ra Jesús vatyí ma cuvi tixehe yo cuatyí yo

1 Cuenda mil ñáyivi ndu ñin ri nyacua nañi tahan ñu, vatyí cuaha xaan ñu. Tyicuan ta ra Jesús catyí xihna ca ra chi ra cachicá noo chihin ra:

—Saha ndo cuenda chi ndo chihin ra fariseo coto sandahvi ñaha ra chi ndo. Vatyí tari ndaa pan chihin yuchan iya, tyicuan caa cuví cuatyí ra tyi sahá ra tyi vaha ra. Soco ma cuvi tixehe ra cuatyí ra. 2 Vatyí ñahri noo cha ñohó xehe ta cuñún, tyi ma natuvi, ta ñahri cha xehe ta cuñun, vatyí ma coto ñáyivi. 3 Yucuan chaha ñáá ndihí tuhun cha cahán ndo nu xehe, cuquita chi nu ndichin. Ta ñáá ndihí tuhun cha cahan ndo chichi vehe ndo, cucuiñi tandihí ñáyivi noo quivi.

¿Yóó chi tahán chi cuyuhvi yo, chi ñáyivi o chi Nyoo?

(Mt. 10.28-31)

4 Ta catyí chi ndo cha cuví ndo ra tahin, vatyí ma yuhvi

ndo chi ra chahñi coño ñuhu ri. Vatyí yahá tuhun cuan ta ñahri ca cha cuví sacuvi ra. ⁵ Soco cua catyí chi ndo yóo chi tahán chi cuyuhvi ndo. Yuhvi ndo ta quichaha ndo, soco chi maa Nyoo ra cuví tinyaa ñáyiví ndo. Ta yaha cuan ta cuví tyihi ra añima ndo anyaya.

⁶ Saa, ña yahvi nyaá ti. Cuví sata yo ohon tahan ti chihin uvi ri xuhun. Soco vasi nyihi ri ti, Nyoo ña naa iñi ra chi ni noo ti. ⁷ Ta nyoho, yahvi ca nyaá ndo nu Nyoo ta ñima ca cuaha saa ta nyacua nya ixi xiñi ndo ta chitó Nyoo yoso tahan nyaá. Yucuan chaha ma yuhvi ndo.

Ma yuhvi yo cahán yo tuhun ra Jesucristo nuu ñáyiví (Mt. 10.32-33; 12.32; 10.19-20)

⁸ 'Catyí chi ndo vatyí nya ndo cahán ndo tuhun chihin ñáyiví, tyicuan caa tucu cucahin tuhun ndo nuu ángel Nyoo gloria. Vatyí yuhu Rayíi cha quichi nya gloria cuví. ⁹ Soco nya nyoho cha cahán nuu ndo cahán ndo tuhun chihin ñáyiví, tyicuan caa tucu yuhu, ma cahin tuhun ndo nuu ángel cuenda Nyoo. ¹⁰ Ta vasi cahán ñáyiví chi yuhu Rayíi cha quichi nya gloria, Nyoo cusaha ra tucahnu iñi chi ñu. Soco yóo cha cahán ña vaha siqui Tatyí Ii Nyoo ma ñihi ñu tucahnu iñi cuenda cuan.

¹¹ 'Cuhva cha cunyaca ñáyiví chi ndo chichi vehe ñuhu, o nu juez, o nuu ra cuví tyiño, ma caca xiñi

ndo ñáá tuhun cunacahan ndo. ¹² Vatyí cuhva cha cua nacahan ndo, yucuan cuhva cuhva maa Tatyí Ii Nyoo ñáá tuhun tahán chi nacahan ndo —catyí ra Jesús.

Nu chahá ra Jesús cuhva vatyí ña tahán chi cunyicon yo cha tyayíi

¹³ Noo ra cha ndihi chihin ñáyiví cuaha cuan, catyí ra chí ra Jesús:

—Maestro, catyí chi yañi vatyí natahvi sava ra cha tyayíi cha sandoo sutu ndi chi ndi —catyí ra.

¹⁴ Tyicuan ta catyí ra Jesús chi ra:

—¿Yóo cha tyiso chi yuhu cha cuví juez ta catyí ndo vatyí tahvi sava yuhu cha chii ndo? —catyí ra.

¹⁵ Tyicuan ta quichaha catyí tucu ra:

—Saha ndo cuenda ta ma nyiyo iñi ndo cha tyayíi. Vatyí ña chiñuhú ri cha coo cuaha ndaha tyiño yo tacuhva coo vaha yo ñáyiví —catyí ra.

¹⁶ Tyicuan ta chahá ra Jesús noo cuhva ihya chi ñu:

—Chiyó noo ra tyayíi. Ta cuaha xaan tyiño sahá ra iyó.

¹⁷ Tyicuan ta ndichi xiñi ra:

“¿Yoso caa cusacuvi? Ñahri nu naquehen vahi tandihi tyiño sahi. ¹⁸ Soco cha chité yoso caa cunyacuvi. Cusatani yaca nyihi nu yihí niñi, vatyí nyihi xaan. Ta cusavahi cha nahnu ca. Ta yucuan cunaquehen vahi tandihi maa niñi cha cuquita nu iyó tyiño sahi. ¹⁹ Tyicuan ta cuaha cuiya ma saha tyiño que. Cunyatati ta cusíi cuñi.

Ta cachi vahi. Ta cucoho vahi”, ndichi xiñi ra. ²⁰ Soco catyí Nyoo chi ra: “Tondo xaan iyón. Vatyí vityin cha cuaa cucúvun. Ta cha cumí vahun ¿yóo chi cua ndoo?” ²¹ Tyicuan caa cuví chi ñáyiví cha sacayá tandihí cha tyayíi soco ñahri maa iyó chi ñu nuu Nyoo —catyí ra Jesús.

Ma caca xaan iñi yo ñáá ndihí cha chiñuhú chi yo
(Mt. 6.25-34)

²² Tyicuan ta quichaha catyí ra Jesús chi ra cachicá noo chihin ra:

—Catyí chi ndo, vatyí ma caca xaan xiñi ndo yoso caa ñihi ndo cha cachi ndo, ta tuhun sahma cuihno ndo. ²³ Vatyí yahvi ca nyaá ñayiví yo ican saha cha cachi yo. Ta yahvi ca nyaá coño ñuhu yo ican saha cha cuihno yo. ²⁴ Saha ndo cuenda saa vatyí ña sahá tyiño ti. Ta ni ri ña naquehén vaha ti cha cachi ti. Soco chachí ti, vatyí Nyoo chahá ra cha cachi ti. Ta nuu Nyoo yahvi ca nyaá nyoho ta ñima ca saa. ²⁵ Ta vasi chicá xaan xiñi ndo soco ma cuví sandusucun ca ndo ni chiin ca chi ndo. ²⁶ Tatu ni chiin cuan ña cuví chi ndo, ¿ñáá tuhun cha chicá xaan xiñi ndo tuhun tandihí ca cha chiñuhu chi ndo?

²⁷ Saha ndo cuenda yoso caa iyó tu ita vatyí ña sahá tyiño tun. Soco catyí chi ndo vatyí ni rey Salomón chihin tandihí cha tyayíi ra ta ña tyaqui cha ñihnó ra tari cha sacuihno Nyoo chi tu ita cuan. ²⁸ Tatu tyicuan caa sacuihnó Nyoo chi tun ita cha

iyó nu chiqui vityin, ta tyaan cucayu tun chichi horno, ta nyaca cuví chi nyoho ta ma sacuihno ra. Soco maa ndo ña chinó vaha iñi ndo chi ra. ²⁹ Ma caca xaan xiñi ndo tuhun cha cachi ndo ta cha coho ndo. ³⁰ Vatyí ñáyiví cha ña chinó iñi chi Nyoo chicá xiñi ñu tuhun ihya. Soco nyoho chinó iñi ndo chi Sutu yo Nyoo ta maa ra chitó ra ñáá cha chiñuhú chi ndo. ³¹ Vaha ca cha nanducu ndo yoso caa nacuhva cuenda ndo chi ndo chi Nyoo vatyí cunyaca ñaha ra añaima ndo. Ta tyicuan caa ta ñihi ndo tandihí cha chiñuhú chi ndo.

Cha vaha cha iyó gloria
(Mt. 6.19-21)

³² Ma yuhvi nyoho, mbee sane. Vasi ña cuaha ndo soco Sutu yo Nyoo cuñi ra chi ndo. Yucuan chaha cucuhva ra quihvi ndo nu nyacá ñaha ra. ³³ Xico ndo cha iyó chi ndo. Ta cuhva ndo chi ñu ndahvi. Tatu sacuví ndo tyehe caa, sacayá ndo cha vaha nuu Nyoo cuví cuan. Vatyí nuu Nyoo ña ndihí cha vaha cuan. Vatyí ni ri ra suhu, ni quití, yori cha sativí iyó yucuan. ³⁴ Vatyí nuu cunyaa cha tyayíi ndo, yucuan cuví nu nyaá xiñi ndo. Ta yucuan cucunyaa añaima ndo —catyí ra.

Nu sañahá ra Jesús chi yo yoso caa cuatu tuhva yo chi ra quiví quichi ra inga chaha

³⁵ Cuatu tuhva vaha ndo quiví quichi inga chaha. ³⁶ Ta cuví ndo tari musu cha canyatú tuhva chi chitoho ñáá cuhva ndichi ra cha cuahan

ra noo vico tandaha. Ta nyatú tuhva ra, vatyí tacuhva tañi tyehe ri nuña ra yuvehe cuhva cha sacachan chitoho ra cha nachaa ra. ³⁷⁻³⁸ Ta caa cuhva ri cuan sií xaan cuñi ra nyehe ra chi ra. Vatyí nyatú tuhva ra chi ra nyacua nya nachaa ra, vasi cha cuaa, vasi ñaa ca. Ta cuatyaa ra chi musu cuan yuhu mesa ta cacachi ra. Tyicuan ta sií xaan cucuñi musu cuan. Vatyí tyicuan caa nyacuví chitoho ra chihin ra. ³⁹ Ta coto ndo tuhun ihya vatyí tatu noo chitoho noo vehe, ta coto ra ñáá cuhva cuquihvi ra suhu vehe ra, saha ra cuenda vehe ra. Ta ma cuhva ra quihvi ra suhu cuan chichi vehe ra. Vatyí coto quehen ra tandihí cha iyó chi ra. ⁴⁰ Ta tyicuan caa cuví tucu nyoho, cuatu tuhva ri ndo. Vatyí yuhu Rayí cha quichi nya gloria, sana ri iñi ndo ta cuquichi —catyí ra Jesús.

Musu vaha ta musu ña vaha

(Mt. 24.45-51)

⁴¹ Tyicuan ta quichaha ndaca tuhun ra Pedro chi ra Jesús:

—¿Yóó chi cuenda cahun tuhun ihya? ¿Atu cha cuenda maa ri maa ndi, o cha cuenda tandihí ñáyivi?

⁴² Tyicuan ta nacahan ra Jesús, ta catyí ra chi ra:

—Musu cha tyasohó tuhun cahán chitoho, yucuan cuví musu vaha. Vatyí sahá cuenda ra vehe chitoho ra. Ta vaha ri cuhva chahá ra cha cachi tandihí ca musu cuan. ⁴³ Ta sií xaan cuví chi musu

cuan tatu cuhva cha sahá tyiño ra, ta nachaa chitoho ra. Vatyí quichaha ra tandihí cha tahán chi sacuvi ra. ⁴⁴ Ta catyí chi ndo vatyí cha ndicha cuví. Vatyí chitoho ra cunatyaa ra tandihí cuii cha cumí ra ndaha ra. Vatyí vaha quichahá ra chihin tyiño sahá ra. ⁴⁵ Soco tatu chicá xiñi musu cuan vatyí naha xaan cuahan chitoho ra, ta quichaha nyacuvi ra cha ña vaha chihin ñu nyaá tyiño yoo, ta chihin ra canyicú tucu sahá tyiño cuan. Ta ña cuñi ra sahá tyiño ra. Tyiño chachí ta tyiño chihí ndixi iyó ra. ⁴⁶ Tyicuan ta sana iñi ra ta ndichi chitoho ra quiví cha ña nyatú ra chi ra noo cuhva cha ña chito ra. Tyicuan ta cutachí tuñi chitoho ra chi ra, tari tuhva maa ra chihin musu cha ña quichahá tuhun cahán ra.

⁴⁷ Ta noo musu cha chitó yoso caa iyó chitoho ta ña sacuvi tari cuhva cuñi chitoho ra, cuaha xaan tundoho cunyehe ra. ⁴⁸ Soco tatu noo musu cha ña chitó ta sacuvi ra cha ña vaha, tachi tuñi chitoho ra chi ra. Soco chiin ri, vatyí ña chitó ra, ta chinyacuví ra. Tatu noo musu ta cuaha cha chaha chitoho ra chi ra, cuaha tahán chi nacuhva cuenda ra chi chitoho ra. Ta ra cha cuaha xaan nyaá ndaha, cuaha xaan tahán chi nacuhva cuenda ra chi chitoho ra.

Nu catyí ra Jesús vatyí cha catyí ra cucañi tahan ñáyivi chihin tahan ñu
(Mt. 10.34-36)

49 'Tari cha sanatahín ñuhu siqui ñuhu ñayivi, tyicuan caa cuví tyiño vachi. ¡Ñana cha cuñí cha nacayu catyin ri ñuhu ihya! 50 Vatyí nyaá yahi noo tundoho cahnu, ta ñana cha nyehí tundoho nyacua nya ndihi tyiño sahí. 51 Cuñí maa ndo vatyí cha vachi cuhve cha taxi ri coo ndo siqui ñuhu ñayivi ihya. Soco yuhu vachi vatyí sasiin chi ndo. 52 Vatyí cha vityin ta ityi nuu ca, ohon ñáyivi noo vehe cucusin ñu. Uñi ñu cañi tahan chihin uvi ñu. Ta uvi ñu cucañi tahan chihin uñi ñu. 53 Ta ra cuví sutu, cucañi tahan ra chihin sehe ra. Ta ra cuví sehe cucañi tahan ra chihin sutu ra. Ta ñu cuví sihi cucañi tahan ñu chihin sehe ñu. Ta ñu cuví sehe cucañi tahan ñu chihin sihi ñu. Ta ñu cuví tyiso cucañi tahan ñu chihin chono ñu. Ta ñu cuví chono cucañi tahan ñu chihin tyiso ñu —catyí ra Jesús.

Nu catyí ra Jesús chi ñáyivi vatyí ña nacotó ñu vatyí cha chaq quivi cha quichi Sehe Nyoo

(Mt. 16.1-4; Mr. 8.11-13)

54 Catyí tucu ra Jesús chi ñáyivi cuaha cha nyicú yucuan:

—Tatu cha nyehe ndo vatyí cha ndihvi vico, catyí ndo vatyí cua coon saví. Ta tyicuan caa cuví. 55 Tatu cha nyehe ndo vatyí cha caá tatyí ityi tyañuhu, catyí ndo vatyí cha chaa quivi ihñi. Ta tyicuan caa cuví. 56 Nyoho sahá ndo tyi chitó ndo, ta nacotó ndo tandihi tuhun andivi, ta tandihi tuhun ñuhu ñayivi. Soco ¿ñáá tuhun cha

ña nacotó ndo ñáá tyembu nyaá ndo vityin?

Nducu yo cuhva yoso caa coo vaha yo chihin ra chicán cuatyí chaha yo coto cuhun yo vehe caa

(Mt. 5.25-26)

57 '¿Ñáá tuhun ña sahá ndo cuenda nya cha vaha ta nya cha ña vaha? 58 Tatu noo ra chicán cuatyí chahun ta cuahun chihin ra nu nyaá ra cuví tyiño, ityi cuahun nducun cuhva ni coo vahun chihin ra cha cumañi ca chaa ndo nu nyaá ra cuví tyiño. Coto nacuhva cuenda ra chuun chi juez. Ta juez cuan cunacuhva cuenda ra chuun chi policia. Ta policia cuan cutyihí ra chuun chichi vehe caa. 59 Tatu tyicuan caa cuví, catyí chuun vatyí ma quiton nyacua nya tyiyahvun tandihi cha tahán chi tyiyahvun —catyí ra Jesús.

13

Cuñí chi cha nasama yo cuhva iyó yo o cunyehe yo tundoho

1 Tyicuan ta suri quivi cuan canyicu suhva ra. Ta quichaha canacatyí ra chi ra Jesús yoso caa cha nyacuvi ra Pilato chihin suhva ra Galilea. Vatyí tyihí ra tyiño na cucañi sindaro chi ra Galilea cha cachaha ofrenda chi Nyoo vehe ñuhu. Ta nasaca ra niñi ra cuan chihin niñi quití cha cua cuví ofrenda cuan. 2 Ta nacahan ra Jesús ta catyí ra chi ra:

—¿Atu chicá xiñi nyoho vatyí cahnu xaan ca cuatyí ra Galilea cuan cha nuu tandihí ra ityi ñuu ra. Ta yucuan chaha cachihí ra? ³ Ñima. Vatyí tatu nyoho ta ma nasama ndo cuhva iyó ndo, tyicuan caa tucu cunaa nyoho. ⁴ Ta ndi chahun uñi ra cachihí cha canacava torre Siloé cuan siqui ra. ¿Atu cuaha ca cuatyí ra ta ican saha inga ra cha iyó ñuu Jerusalén cuñi maa ndo? ⁵ Ñima. Vatyí tatu nyoho ta ma nasama ndo cuhva iyó ndo, cunaa tucu nyoho.

Nu catyí ra Jesús noo cuhva yoso caa nyatú Nyoo cha nasama yo cuhva iyó yo

⁶ Tyicuan ta chahá ra Jesús noo cuhva. Ta catyí ra:

—Noo ra iyó yutun cha nañi higo chi ra. Ta nanyaá tun nu ñuhú ra. Ta chahan ra chinyehe ra tatu iñi chiti tun. Ta nanyehe ra vatyí ñahri. ⁷ Ta quichaha catyí ra chi ra sahá cuenda chi tun: “Cha uñi cuiya tyito ri quichi nyehi tatu iyó chiti tun. Ta ñahri maa chiti tun iñi. Na cahnya yo chi tun. Vatyí ¿ñáá ri tuhun sayangá tun nu ñuhú ihya? Vatyí ñahri chiti chahá tun”, catyí ra. ⁸ Soco ra cha sahá cuenda ñuhú cuan quichaha catyí ra: “Tata, ma cahnya yo chi tun vityin. Na cuinanyaa maa tun nonga cuiya ihya. Cusanduvite ñuhú chaha tun ta cutyihí ñuhú tyahyu. ⁹ Vasi tyicuan caa ta cuhva tun chiti. Soco tatu ña chaha tun chiti,

tyicuan ta cahnya yo chi tun”, catyí ra.

Quivi nyitatu ñáyivi sanduvahá ra Jesús chi noo ñaha tihí chata

¹⁰ Noo quivi cha nyitatu ñáyivi sañahá ra Jesús chi ñu chichi vehe ñuhu. ¹¹ Ta yucuan nyaá noo ñaha cha yihí tatyí ña vaha chi. Ta cha chahun uñi cuiya cuhví ña cha ndutihí chata ña. Ta ña cuví ndundoo ña. ¹² Tyicuan ta nanyehe ra Jesús chi ña. Ta caná ra chi ña. Ta quichaha catyí ra chi ña:

—Cha nduvahun. Ñahri ca cuehe ndohún —catyí ra chi ña.

¹³ Tyicuan ta tyiso ra ndaha ra siqui ña. Ta caa cuhva ri cuan ta ndundoo ña. Tyicuan ta quichaha sacahnu ña chi Nyoo. ¹⁴ Soco ra cuví nuu vehe ñuhu, cuxaan xaan ra. Vatyí quivi nyitatu ñáyivi sanduvahá ra Jesús chi ña. Ta quichaha catyí ra chi ñáyivi canyicú cuan:

—Iyó iñu tahan quivi tahn chi saha tyiño yo. Yucuan quivi quichi ndo quichi cuví tatan chi ndo. Ta ma quichi ndo quivi nyitatu yo —catyí ra.

¹⁵ Tyicuan ta ra Jesús quichaha catyí ra chi ra:

—Nyoho cha sahá ndo tyi vaha ndo. ¿Atu ña ndachi tucu nyoho quiti sana ndo vatyí sacoho ndo ndutya chi ti quivi nyitatu yo? ¹⁶ Ta tyicuan caa tucu ñaha ihya, vachi ña tata ra Abraham. Ta cha chahun uñi cuiya nuññi ña chihin cuehe ihya sahá ra

ña vaha. Ta yori ndachi chi ña. ¿Atu ña tahán chi ndachi yo chi ña vasi quivi nyitatu yo? —catyí ra Jesús.

¹⁷ Tyicuan ta cuhva cha catyí ra Jesús tuhun cuan, tandihí maa ra xaan iñi chí ra cahán cuví nuu ra. Soco tandihí maa ñáyivi cusii cuñi ñu chihin cha cahnu cha sacuví ra Jesús.

Nu catyí ra Jesús vatyí tari noo chiti mostaza cuví cha nyacá ñaha Nyoo aña yoy

(Mt. 13.31-32; Mr. 4.30-32)

¹⁸ Tyicuan ta quichaha catyí ra Jesús:

—¿Ñáá chihin sandiqui tahin cha nyacá ñaha Nyoo aña yoy? ¿Ñáá chihin sandu inuu ri yoy? ¹⁹ Tari noo chiti mostaza, tyicuan caa cuví. Vatyí noo ra tachí ra noo chiti nu ñuhú, ta chahnu tun. Ta cuví tun noo yutun cahnu vavaha. Tyicuan ta chaá coyo saa nuu yutun cuan. Ta yucuan savahá ti taca ti.

Nu catyí ra Jesús vatyí tari yuchan iya tyicuan caa cuví cha nyacá ñaha Nyoo aña yoy

(Mt. 13.33)

²⁰ Tyicuan ta quichaha catyí ra Jesús inga chaha:

—¿Ñáá ca chihin sandu inuu ri yoy yoso caa nyacá ñaha Nyoo aña yoy? ²¹ Cuví chí tari noo yuchan iya cha nasaca noo ñaha sihi chihin uñi cuhva yutyí pan. Vatyí tari ndaa pan cuan chihin yuchan iya cuan, tyicuan caa cuahan nducuaha ca ñu nyacá ñaha Nyoo aña yoy —catyí ra.

Yuvehe tihin ta ityi cuiñi cha cuahan nu nyaá Nyoo

(Mt. 7.13-14, 21-23)

²² Ityi cuahan ra Jesús Jerusalén cahán ra tuhun Nyoo chihin ñáyivi tandihí ñuu nu yaha ra. ²³ Ta quichaha ndaca tuhun noo ra chí ra:

—¿Atu ña cuaha maa ñáyivi cucacu aña yoy? —catyí ra.

Tyicuan ta nacahan ra Jesús, ta catyí ra:

²⁴ —Nanducu ndo cuhva quihvi ndo yuvehe tihin. Vatyí yii xaan quihvi ndo nu nyacá ñaha Nyoo. Vatyí cuaha xaan ndo cha cucuñi ndo quihvi ndo yucuan. Ta ma cuví. ²⁵ Vatyí tari chitoho noo vehe tyicuan caa cuví Nyoo. Ta chitoho vehe cuan cunacasi ra yuvehe. Tyicuan ta nyoho cha nyicú ndo ityi chata cusacachan ndo yuvehe, ta cucatyí ndo: “Nyña yuvehe.” Ta ra cuan cucatyí ra chí ndo: “Ña chité nya ityi quichi nyoho.”

²⁶ Tyicuan ta nyoho cucatyí ndo: “Nyuhu chachí ndi ta chíhi ndi chuhun. Maun sañahun tuhun Nyoo chí ndi ityi nu nyaá vehe ndi”, cucatyí ndo chí ra cuan.

²⁷ Soco ra cuan cunacahan ra chíhi ndo ta cucatyí ra: “Cha catyí chí ndo vatyí ña chité nya ityi quichi nyoho. Canyaha ndo nu nyai, tandihí nyoho ñu nyacuví cha ña vaha”, cucatyí ra chí ndo.

²⁸ Yucuan ta cuacu ndo ta sacahñi noho ndo cha nyehe ndo chí ra Abraham ta chí ra Isaac ta chí ra Jacob, ta

chi tandihí ra profeta Nyoo cha chiyo ta cha naha. Vatyí canyicú ra nu nyacá ñaha Nyoo. Ta nyoho ndoo ndo ityi chata. ²⁹ Ta cuquichi ñáyivi ityi tyañuhu, ta ityi norte, ta ityi nu caña ñanyii, ta ityi nu quee ñanyii. Ta cunyicu ñu cachi ñu chihin Nyoo nu nyacá ñaha ra. ³⁰ Ta yóo ñu cha cuñí cuhun ityi nuu, ican ñu cuhun nu ndihí. Ta ñu cuahan nu ndihí, ican ñu cuhun ityi nuu —catyí ra.

Nu nducuihya iñi ra Jesús nyehé ra chi ñáyivi ñuu Jerusalén

(Mt. 23.37-39)

³¹ Suri maa quívi cuan chaa coyo suhva ra fariseo. Ta catyí ra chi ra Jesús:

—Quita ihya vatyí ra Herodes cuñí ra cahñi ra chuun —catyí ra.

³² Soco ra Jesús quichaha catyí ra chi ra:

—Cuahan ndo ta catyí ndo chi ra ñucuii quiñi iyó cuan, vatyí nyacua nya nu chaa maa chi quívi cha ndihí tyiño sahí cha tave tatyí ña vaha ta cha sanduvahi chi ñu cuhví, tyicuan ta cundihi tyiño sahí.

³³ Soco nya tahán chi cha ndihí maa tyiño sahí, tyicuan ta cuhun mai cucúvi nya Jerusalén. Vatyí ma cuvi cha cúvi noo ra profeta Nyoo ityi chata Jerusalén.

³⁴ ¡Ndahvi nyoho ñáyivi Jerusalén! vatyí chahñí ndo chi ra profeta ra cachahá cuenda tuhun cahán Nyoo chi ndo. Ta tuchi ndo yuu chi tandihí ra cha saquichí Nyoo

nu nyicú ndo. Ta yuhu cuaha xaan chaha cuñí saha cuende chi ndo tari noo ndívi cha sahá cuenda tí chi sehe tí, ta naquehen vaha tí chi tí chichi ndichin tí. Soco maa ndo ña cuñí ndo. ³⁵ Nyehe ndo vityin vatyí cha sandoj chi ndo. Ta catyí chi ndo vatyí ma nyehe ca ndo chii nyacua nya chaa chi quívi cuacatyí ndo vatyí cahnu xaan ra vachi chihin sívi Nyoo —catyí ra Jesús.

14

Nu sanduvaha ra Jesús chi noo ra cuhví cha yihí cuiño chi

¹ Cuví chi noo quívi nyitatu ñáyivi. Ta ra Jesús cuahan ra cua cachi ra vehe noo ra cuví nuu chi ra fariseo. Ta suhva ca fariseo cuan cañañi ra chi ra Jesús tatu ñáa cha ña vaha cunyacuvi ra. ² Yucuan ta nuu ra Jesús nyaá noo ra cuhví cha yihí cuiño chii.

³ Tyicuan ta quichaha catyí ra Jesús chi ra casacuaha ley vehe ñuhu ta chi ra fariseo:

—¿Atu vaha sanduvaha yo chi ñáyivi cuhví quívi nyitatu yo? —catyí ra.

⁴ Tyicuan ta tandihí ra cuan, taxi taxi cacuvi ra. Yucuan cuví nu tyiso ra Jesús ndaha ra síqui ra cuhví cuan. Ta sanduvaha ra chi ra. Ta natachí ra chí ra na cunuho ra. ⁵ Tyicuan ta quichaha catyí ra Jesús chi ra fariseo:

—Tatu canacava noo burru sana ndo, o nonga quiñi sana ndo chichi noo xahva, ¿atu ma cutava ndo chi tí tañi tyehe ri, vasi quívi nyitatu yo cuví? —catyí ra.

⁶ Tyicuan ta inga chaha tucu taxi cuii ri nicunyicu ra fariseo. Vatyí ña ñihi ca ra tuhun nacahan ra.

Nu sañahā ra Jesús chi yo vatyí ma cahnu saha yo chi yo

⁷ Cha nyehe ra Jesús vatyí tandihí ra canyicú vico cuan nacachí ra tyayu vaha ca cunyaa ra. Tyicuan ta quichaha chaha ra tuhun ihya chi ra:

⁸ —Nya quiví cahun ndo vico tandaha, ma nanducu ndo tyayu vaha ca cunyaa ndo. Vatyí coto quichi inga ra cha cahnu ca cuvi ican saha ndo, ⁹ ta coto quichi ra cha nacatyí tuhun ta catyí ra chuun: “Cuhva tyayu chiña. Vatyí cunyaa ra ihya.” Tyicuan ta yoho chihin cha cahán nuun, ta cuhvon. Yucuan ta cunyaun nu ndihí. ¹⁰ Soco catyí chi ndo, vatyí nya quiví nacatyí tuhun ra chí ndo, cunyaa ndo noo nu ñima ri tuhun. Vatyí quichi maa ra cha nacatyí tuhun chí ndo ta catyí ra chí ndo: “Ra tahin, ñaha, cunyaun nu tyayu vaha tyehe.” Ta tyicuan caa sacucahnu ra chuun nu ñáyiví nyicú yuhu mesa chuhun. ¹¹ Vatyí yóo ra cha cahnu sahá chii, cuquehen ra ticahan nuu. Ta yóo ra cha ndahví sahá chii, cahnu cucuvi ra —catyí ra Jesús.

¹² Tyicuan ta quichaha catyí tucu ra chí ra nacatyí tuhun chí ra:

—Nya quiví coo vico vehun, ma nacatyí tuhun chí ra tahn, ní chí yañun, ní ri chí ñáyiví chuun, níri chí

ñu nyicú yuvehun ñu tyayí. Vatyí ñu cuan cuví nacatyí tuhun ñu chuun, na coo tucu vico vehe maa ñu. Tyicuan ta nacahnya ñu cuenda cha chahan ñu vico vehun. ¹³ Soco cua catyí chuun vatyí nya quiví coo vico vehun, nacatyí tuhun chí ñu ndahví, chí ñu cuhví, chí ñu coxo, ta chí ñu cuaa. ¹⁴ Tyicuan ta síi cuví chuun, vatyí ñu cuan ma cuvi natyiyahví ñu chuun. Soco cuñihun yahvun quiví cunandoton chihin ñáyiví vaha.

Nu chahā ra Jesús noo cuhva yoso caa nacatyí tuhun ra chí yo vatyí quihví yo nu nyacá ñaha Nyoo

(Mt. 22.1-10)

¹⁵ Ta chíñi noo ra cha nyaá yuhu mesa cuan tuhun cahán ra Jesús. Ta quichaha catyí ra chí ra:

—Síi xaan cuvi chí ñu cachi nu nyacá ñaha Nyoo —catyí ra.

¹⁶ Tyicuan ta catyí ra Jesús:

—Noo ra cuan savahā ra noo vico cahnu vavaha vehe ra. Ta nacatyí tuhun ra chí cuaha xaan ñáyiví. ¹⁷ Tyicuan ta chaā cuhva cha cuxiñi ñu, ta tachí ra chí musu ra nacana ra chí ñu. Vatyí cha chaā cuhva cha cuxiñi ñu. ¹⁸ Soco tandihí ñu cuan quichaha catyí ñu vatyí ma cahun ñu. Ta noo ra cuan catyí ra: “Ní satę noo ñuhú. Ta cuñí chí cuhin cunyehe. Ican tuhun chiquén na saha ra tucahnu iñi chí vatyí ma cuhin.” ¹⁹ Tyicuan ta inga tucu ra cuan catyí ra: “Ní sata cuiri ohon tahan yunta

quiti. Ta cuhin cunyehe tatu vaha ti. Ican tuhun chiquén tumañi iñi chi ra na saha ra tucahnu iñi chii, vatyí ma cuvi cuhin.”²⁰ Tyicuan ta inga tucu ra cuan catyí ra: “Ni ndihi tandahi, ta ma cuvi cuhin”, catyí ra.²¹ Tyicuan ta musu ra cuan cuanuhu ra. Ta nacatyí ra tandihi tuhun cuan chi ra cha tachí chi ra. Cha chiñi ra savaha vico cuan cha tyicuan caa, ta cuxaan xaan ra. Ta catyí ra chi musu ra: “Cuahan tandihi maa ityi. Ta quichi nyacon chi ñu ndahvi, chi ñu cuhvi, ta chi ñu coxó, ta chi ñu cuaa”, catyí ra.²² Ta cha yahā nachaa musu cuan ta catyí ra chi ra cha tachí chi ra: “Cha sacuvi tandihi maa cha catyún. Ta nuñá ca chichi vehe”, catyí ra.²³ Tyicuan ta chitoho ra catyí ra chi ra: “Cuahan cua nducu ca chi ñu tandihi maa ityi. Ta sanñun chi ñu na quichi coyo ñu, vatyí na cutu chichi vehi.²⁴ Vatyí catyí chuun vatyí ni minoo ñu cha nacatyí tuhun cha xihna ri, ma cachi ñu chihin” —catyí ra Jesús.

Cuaha xaan tundoho nyehe yo tatu cuenda ra Jesús yihí yo

(Mt. 10.37-38)

²⁵ Cuaha xaan ñáyivi nyicón chi ra Jesús. Tyicuan ta nanyehe ra chi ñu, ta quichaha catyí ra:

²⁶ —Tandihí nyoho cha nyicón ndo chii, tatu cuñi ca ndo chi ñáyivi chi ndo ican saha chi yuhu, ñima cuende yihí ndo. Ta tatu cuñi ca ndo

chi maa ndo ican saha chi yuhu, ñima cuende yihí ndo.

²⁷ Vatyí nya nyoho cha ña cuñi ndo nyehe ndo tundoho cha cunyicon ndo chii, ña tahán chi cuví ndo ñu cuende, vatyí cha nyehe ndo tindoho yucuan cuví cruzi cha tahán chi cuiso ndo.²⁸ Vatyí tatu nya nyoho cuñi ndo savaha ndo noo vehe cahnu, xihna ca cunyaa ndo ta ndichi xiñi ndo tatu caña xuhun ndo cha cananyaa ndo vehe cuan.²⁹ Vatyí tatu quichaha sacacu ndo vehe cuan, ta quichaha ña cuví sandihí ndo vatyí ñahri ca xuhun ndo, cuacu nyaa ñáyivi chi ndo.

³⁰ Ta cuacatyí ñu: “Ra cuan quichaha savaha ra vehe ra, ta ni ña cuví sandihí ra”, cucatyí ñu.³¹ O tatu noo rey cha cuñi cañi tahan chihin inga rey ¿atu ña chicunyaa xihna ra ta ndichi xiñi ra tatu ñihi uchi mil sindaro cha cuahan chihin ra cua cañi tahan chihin inga rey cha vachi chihin oco mil sindaro cuan?³² Tatu chitó ra vatyí ma cuvi chasaha ra chi inga rey cuan, tyicuan ta cañi ca vachi rey cuan, ta tachi ra chi noo musu ra vatyí cucatyí ra chi rey cuan na ndihí tuhun yucuan ri.³³ Ta tyicuan caa cuví chi nyoho. Tatu ma cahnya iñi ndo tandihí maa cha cuñi ndo ta cha cumi ndo, ma cuví cunyicon ndo chii.

Nu sañahá ra Jesús vatyí tari ñi cha ndihí cha uhva, tyicuan caa cuví yo tatu ndu uvi iñi yo cha chino iñi yo chi ra

(Mt. 5.13; Mr. 9.50)

³⁴ Vaha ñi vatyí sacú uhva chi cha cachi yo. Soco tatu ndihi cha uhva chi, ña vaha ca chi. ³⁵ Ñahri ca tyiño cuví saha chi. Ta sacuita yo vatyí ña vaha ca. Nya nyoho cha cutuñí iñi ndo, tyasoho ndo tuhun cahín —catyí ra Jesús.

15

Nu sañahá ra Jesús vatyí tari mbee cha cuanaa tyicuan caa cuví yo

(Mt. 18.10-14)

¹ Tandihí ra tavá xuhun cuenda gobiernu ñuu Roma, ta ra iyó cuatyí, tuhva ra nu nyaá ra Jesús, tacuhva cuiñi ra tuhun cahán ra. ² Tyicuan ta ra fariseo ta ra casacuaha ley vehe ñuhu quichaha cacahan nyaa ra, ta cacatyí ra:

—Ra ihya, cahán ra chihin ra iyó cuatyí. Ta chachí ra chihin ra —cacatyí ra.

³ Tyicuan ta ra Jesús cahan ra noo cuhva ihya, ta catyí ra:

⁴ —Ta nya nyoho cha iyó noo cientu mbee sana ndo, tatu cuanaa noo ti, zatu ma sandoo ndo chi tandihí ca ti cuan nu chiquí. Ta cunanducu ndo chi quití cha cuanaa cuan, nyacua nya cha nañihi ndo chi ti? ⁵ Ta cuhva cha nañihi ndo chi ti, ta natyiso soco ndo chi ti. Ta sii vavaha cuví chi ndo. ⁶ Ta cuhva cha nachaa ndo vehe ndo, ta ndu ñn ri ndo chihin ra tahanan ndo ta chihin ñu nyicú yatyin yuvehe ndo, yucuan ta catyí ndo chi ñu vatyí na cusii cuñi ñu chihin ndo vatyí nañihí ndo chi mbee sana ndo cha chinaa. ⁷ Ta ihya catyí chi ndo, vatyí

sii xaan ca cuví chi ángel Nyoo andiví cha catyí noo ra cha iyó cuatyí ta nasama cuhva iyó ra, ta ñima ca cha catyí ndi cumi xico chahun cumi tahanan ñáyiví cha ñahri cuatyí.

Ñaha sihi cha cuanaa xuhun ta nañihí ña

⁸ Ta catyí chi ndo, tatu iyó noo ñaha cha iyó uchi tahanan xuhun ña, ta tatu cuanaa noo xuhun ña, tyaa ña noo candil. Ta tihví ña tandihí cuii maa chichi vehe ña. Ta nanducu ña tandihí cuii nyacua nya cha nañihi ña xuhun cuan. ⁹ Ta cuhva cha yahá nañihí ña, cuahan ña cua nanducu ña chi ñaha tahanan ña, ta ñáyiví cha nyicú yuvehe ña, ta catyí ña chi ñu: “Cusii cuñi ndo chihin vatyí cha nañihí xuhin cha chinaa”, catyí ña. ¹⁰ Ta catyí chi ndo vatyí tyicuan caa sii cuví chi ángel Nyoo cha catyí noo ra iyó cuatyí ta ndu uvi iñi ra cuatyí ra —catyí ra Jesús.

Nu sañahá ra Jesús yoso caa cuñí Nyoo chi noo ra ndu uvi iñi cuatyí

¹¹ Tyicuan ta quichaha catyí tucu ra Jesús cuhva ihya:

—Noo ra, chiyó uvi tahanan sehe ra. ¹² Ta noo chaha, ra luhlu ca cuan catyí ra chi sutu ra vatyí nacuhva ra cha tahanan chi chi ra. Tyicuan ta sutu ra chaha ra chi ninduvi sehe ra. ¹³ Ta ña cuaha ri quiví cuan ta ra luhlu ca cuan xico ra tandihí cuii maa cha chaha sutu ra chi ra. Ta sandu ñn ri ra xuhun ra, ta quehen ra ityi ta cuahan ra noo ñuu

cañi. Ta yucuan chiyo ra, sanaa ra tandihi maa xuhun ra chihin tusii iñi. Ta quiñi xaan chicá noo ra. ¹⁴ Tyicuan ta chaa noo tama ityi nu iyó ra. Ta quichaha chisoco ra vatyí ndihi xuhun ra sanaa ra. ¹⁵ Tyicuan ta chahan ra chicacan ra tyiño chi noo ra ñuu cuan. Ta ra cuan tachí ra chí ra noo nu iyó quini sana ra, vatyí cusaha cuenda ra chí ti. ¹⁶ Ta cuví noo chaha cuan chisoco xaan ra. Ta ñahri maa cha cachi ra iyó, nyacua quichi cuvi iñi ra cachi ra cha cachachí quini cuan soco yori maa chaha cha cachi ra. ¹⁷ Tyicuan ta nichon iñi ra tuhun sutu ra. Ta ndichi xiñi ra: “¿Atu chiin cuaha ra casahá tyiño chihin suti? Soco ñahri maa cha cumañi chí ra. Ta yuhu cuñi cúvi soco ihya. ¹⁸ Vityin cunuhin nu nyaá suti. Ta catyí chí ra tyi chicoo cuatyí nuu Nyoo ta nuu maa ra. ¹⁹ Ta ña naña que cha cuvi sehe ra chii, ta na saha ra tuhun vatyí noo musu ri ra cuví chii.” Tyicuan caa ndichi xiñi ra.

²⁰ Tyicuan ta quehen ra ityi cuanuhu ra nya vehe sutu ra. Cañi ca vachi ra ta nanyehe sutu ra chí ra, ta cundahvi cuñi ra nyehe ra chí ra. Ta chino ra chisatahan ra chí sehe ra. Ta nanumí ra chí ra. ²¹ Tyicuan ta quichaha catyí ra chí sutu ra: “Tata, chicoo cuatyí nuu Nyoo ta chicoo cuatyí nu maun. Ta yucuan chaha ña naña que cha cuví sehun chii”, catyí ra chí sutu ra. ²² Soco sutu ra tyihi ra tyiño, ta catyí

ra chí musu ra: “Tava ndo sahma vaha ca ta sacuihno ndo chí ra. Ta tyihi ndo noo xehe nundaha ra. Ta nyaca ndo zapato quihí chaha ra ñandihí. ²³ Ta siin ri cahñi ndo noo becerru cha xahan ca, vatyí cachi yo chí ti. Vatyí vityin cucoo yo noo vico. ²⁴ Vatyí ra sehi ihya cha chíhi ra saha mai tuhun. Cuñi mai vatyí ma nyehe que chí ra, soco natuví ra”, catyí sutu ra. Tyicuan ta quichaha chicoo ñu vico. Ta sii xaan cacuñi ñu vatyí natuví ra cuan.

²⁵ Tyicuan ta inga sehe ra, ra cha chahnu ca, ñohó ra nu chiqui. Ta cuhva cha cuanachaa ra nya vehe ra, ta quichaha chíhi ra yaa. Ta chíhi ra vatyí sii xaan cachitá chaha ñu. ²⁶ Tyicuan ta cuhva cha cuyatyin ra nya vehe ra ta cana ra chí noo musu ra. Ta ndaca tuhun ra ñáá cha cuví cuan. ²⁷ Tyicuan ta musu ra quichaha catyí ra: “Yañun, ican nachaa. Ta yucuan chaha tachí sutun vatyí na cahñi ra chí noo becerru xahan ca. Vatyí vaha ri nachaa yañun, ta ñahri cha cuví chí ra”, catyí ra. ²⁸ Tyicuan ta cuxaan xaan cuñi ra. Ta ña cuñi ra ndihvi ra chíhi vehe. Soco sutu ra chahan ra chicahan ndahvi ra chíhi ra, vatyí na ndihvi ra chíhi vehe. ²⁹ Tyicuan ta nacahan ra ta catyí ra chí sutu ra: “¿Atu chiin cuiya sahá tyiñe chuhun? Ta tyasohí tuhun cahún. Ta ni noo chaha ta ta nacahnu que nu cahún. Soco ni noo ndixihyu lee ta cuhva con

chii vatyi coi vico chihin ra tahin. ³⁰ Soco vityin cha nachaa sehun ihya, ra cha sanaa xuhun chihin ñu cata iñi. Ta vityin chahun noo becerro quitì xahan ca chi ra”, catyí ra chi sutu ra. ³¹ Tyicuan ta nacahan sutu ra ta catyí ra chi ra: “Sehi, yoho tyicuan ri nyaún chihin. Ta tandihì cha cumi, chuun cuví. ³² Soco vityin tahn chi sacuvi yo vico ihya. Ta cusii cuñi yo. Vatyi nachaa yañun, ra cha saha mai tuhun vatyi chihì. Tari quivi nandoto ra cuvì ihya. Ta chinaa ra, ta nañihì tucu yo chi ra inga chaha”, catyí ra chi sehe ra —catyí ra Jesús.

16

Nu sañahá ra Jesús chi yo yoso caa saha yo tumañi iñi chihin cha iyó chi yo

¹ Tyicuan ta quichaha catyí ra Jesús chi ra cachicá noo chihin ra:

—Iyó noo ra tyayii vavaha ra. Ta iyó noo ra yindaha tandihì tyiño sahá ra. Ta chahan coyo musu ra canacatyí ra chi ra tyayii cuan, vatyi ra yihí ndaha tyiño cuan, sanaa ra tandihì cha iyó chi ra. ² Tyicuan ta cana ra tyayii cuan chi ra yindaha tyiño cuan, ta catyí ra chi ra: “Cha cuaha xaan cuatyí chahún quichi nu nyaí. Naçuhva cuendon tandihì tyiño cha sacuvun chii. Vatyi ma saha tyiño con chihin”, catyí ra chi ra. ³ Tyicuan ta ra yindaha tyiño cuan ndichi xiñi ra: “¿Yoso caa

cunyacuvi vityin? Chitohi ña cuñi ca ra cha sahá tyiñe chihin ra. Ta ñahri fuerza iyó chii cha saha tyiñe nu ñuhú. Ta cahán nui caye chichi ñuu. ⁴ Soco cha chité yoso caa cunyacuvi vityin, ta vaha coo ñáyivi chihin quivi cha ma coo ca tyiño sahi, ta vaha chai vehe ñu”, ndichi xiñi ra. ⁵ Tyicuan ta cana ra chi noo noo ra yosoyicá chi chitoho ra. Ta quichaha catyí ra chi noo ra cuan: “¿Yoso yosoyicón chi chitohi?” catyí ra. ⁶ Tyicuan ta nacahan ra cuan ta catyí ra: “Yuhu yosoyiqué noo cumi mil litru aceitye.” Tyicuan ta ra yindaha tyiño cuan catyí ra chi ra: “Quehen nonga tutu ihya. Ta natyaa uvi mil ri. Ta sacuiton tutu chahnu cuan”, catyí ra. Tyicuan caa sacuvi ra. Ta cuahan ra. ⁷ Tyicuan ta cha inga ra. Ta quichaha ndaca tuhun tucu ra chi ra cuan ta catyí ra: “¿Yoso yosoyicá yoho chi chitohi?” Ta nacahan ra cuan ta catyí ra: “Yosoyiqué noo mil arroba trigu”, catyí ra. Tyicuan ta quichaha catyí ra yindaha tyiño cuan: “Quehen inga tutu, ta natyaun uña cientu ri arroba. Ta sacuita tutu chahnu chiña”, catyí ra. ⁸ Tyicuan ta chitó chitoho ra cha ña vaha cha chinyacuvi ra. Ta iyo xaan cuñi ra vatyi yatyi xaan saha ra cuan chi ra —catyí ra Jesús.

Ta quichaha catyi tucu ra chi ra cachicá noo chihin ra:

—Ñáyivi ña vaha aña yatyí xaan ca sahá ñu chi ñu

ican saha ñáyiví vaha añima.

⁹ 'Ta catyí chi ndo, vatyí cotyíño ndo cha tyayíi cha iyó síqui ñuhu ñayiví ihya, ta saha ganaa ndo amigo. Ta quiví cha ndihi cha tyayíi cuan, cuñihi ndo nu cunyicu ndo nya nu nyaá Nyoo tyicuan ri ma.

¹⁰ 'Tatu chitó ndo cotyíño ndo chiin cha iyó chi ndo cha cuenda cha vaha, tyicuan caa coto tucu ndo cotyíño ndo tatu cuaha iyó chi ndo. Soco tatu ña chitó ndo cotyíño ndo chiin cha iyó chi ndo, tyicuan caa ma coto tucu ndo cotyíño ndo tatu cuaha coo chi ndo.

¹¹ Ta catyí chi ndo, tatu ña sahá ndo tumañi iñi chihin cha iyó chi ndo síqui ñuhu ñayiví ihya, Nyoo ma cuhva ra noo cha tyayíi cha ndicha chi ndo. ¹² Tandihí cha iyó chi ndo maa Nyoo chahá noo chi ndo. Soco tatu ña sahá ndo tumañi iñi chihin cuan, ma cuhva ra cha tahán chi chi ndo.

¹³ 'Noo musu ma cuví coo uvi tahan chitoho ra. Vatyí musu cuan cuñí ca ra chi noo ra, ta ñima ca chi inga ra. O chi noo ra, vaha quichahá ra tuhun cahán ra, ta chi inga ra, ma quichaha ra cha cahán ra. Ma cuví cuñi ndo chi Nyoo ta suri cuhva cuan cuñi tucu ndo cha tyayíi —catyí ra Jesús.

¹⁴ Tyicuan ta cha chiñi ra fariseo tandihí tuhun cahán ra Jesús. Tyicuan ta quichaha chacu cuehe ra nyehe ra chi ra. Vatyí maa ra fariseo cuan cuñi xaan ra chi xuhun. ¹⁵ Tyicuan ta quichaha catyí ra Jesús chi ra:

—Vaha xaan sahá ndo chi ndo nuu ñáyiví. Soco chitó Nyoo vatyí añima ndo ña vaha. Ta tandihí cha catyí ñáyiví vatyí cahnu xaan ihya síqui ñuhu ñayiví, Nyoo ña cuñí nyehe ra.

Nu sañahá ra Jesús tuhun ley ra Moisés, ta tuhun yoso caa cunyaca ñaha Nyoo añima yo chí yo

¹⁶ 'Ley cha tachí Nyoo chi ra Moisés vatyí tyaa ra, ta tuhun cha tyaa ra profeta Nyoo ta cha naha, ican chi cuví cha saquehen ityi chi ñáyiví nyacua nya quiví chaá ra Juan. Ta maa ra Juan quichaha cahán ra tuhun vaha vatyí cha cuñí quichi Nyoo vatyí cunyaca ñaha ra. Ta tandihí ñáyiví cha nducú cuhva yoso caa cunyaca ñaha Nyoo añima ñu, ican ñu quihví ndaha ra.

¹⁷ 'Soco catyí chi ndo, vasi cunaa andiví ta ñuhu ñayiví, soco cha cuví ley Nyoo cha tyaa ra Moisés, ma naa nyacua nya cha yahá cuví tandihí.

Sañahá ra Jesús vatyí ña vaha cha sandoo rayíi chí ñasihí ra

(Mt. 19.1-12; Mr. 10.1-12)

¹⁸ 'Tatu noo rayíi iyó ñasihí ra, ta sanandoo ra chi ña, ta tandaha ra chihin inga ña, iyó cuatyí ra nuu Nyoo. Ta tatu tandaha noo rayíi chihin noo ñaha cha sandoo yíi chíi, coo tucu cuatyí ra nuu Nyoo.

Nu sañahá ra Jesús tuhun noo ra tyayíi chihin ra Lázaro

¹⁹ 'Chiyó noo ra tyayíi. Ta vaha ñihnó ra. Ta tandihí

quíví iyó ra vico ta chachí vaha ra. ²⁰ Ta chiyo tucu noo ra ndahvi cha nañí Lázaro. Ta cuaha xaan ndihyí ñi ra. Ta nyaá ra yuvehe ra tyayíí cuan. ²¹ Ta ra ndahvi cuan, cuñí ra cachi ra, vasi cha canacoyo nu mesa ra tyayíí cuan. Ta nyacua nya ina ta chaá ti nu nyaá ra, ta yuyaá ti nu cahvi chi ra. ²² Ta noo quíví cuan chihí ra ndahvi cuan. Ta ángel Nyoo quehen ra chi ra ta cua nyaca ra chi ra nya nu nyaá ra Abraham gloria. Tyicuan ta chihí tucu ra tyayíí cuan. Ta chicuchi ñu chi ra. ²³ Tyicuan ta ra tyayíí cuan nyehé xaan ra tundoho nu ñohó ra anyaya. Ta nanyehe ra nu cañi. Ta nanyehe ra chi ra Abraham chihin ra Lázaro, nyaá ra chihin ra yucuan. ²⁴ Tyicuan ta canachaá ra ta catyí ra: “Tata Abraham, cundahvi cuñi chii. Tachi chi ra Lázaro na satyí ra chiin nundaha ra. Ta na satoo ra ñin titi ndutya nu yai. Vatyí nyehé xain tundoho nu cayú ñuhu ihya”, catyí ra. ²⁵ Soco ra Abraham catyí ra chi ra: “Ñicohon ñhun vatyí vaha chiyon ñuhu ñayiví. Ta ra Lázaro, ña vaha chiyo ra. Vityin vaha iyó ra ihya, ta yoho nyehún tundoho. ²⁶ Ta sñn ri, mahñu ihya cono xaan. Ta ma cuvi yaha ra iyó tyehe cahun ra chiña. Ta ma cuvi yaha ra iyó chiña, quichi ra tyehe”, catyí ra Abraham chi ra. ²⁷ Tyicuan ta quichaha catyí ra tyayíí cuan: “Tata Abraham, sahun

tumañi ñi chii. Ta tachun chi ra Lázaro nya vehé suti. ²⁸ Vatyí iyó ohon tahan yañi. Ta cuñí vatyí nacatyí ra chi ra yoso caa iyé ihya nu nyehí tundoho, coto quichi coyo tucu ra cuan ihya”, catyí ra. ²⁹ Tyicuan ta quichaha catyí ra Abraham: “Iyó ley cha tyaa ra Moisés. Ta iyó tuhun cha tyaa ra profeta Nyoo ta cha naha. Na quichaha ra tu cuñí ra”, catyí ra Abraham. ³⁰ Tyicuan ta quichaha catyí ra tyayíí cuan: “Tata Abraham. Ma quichaha ra. Soco tatu yóo cha nandoto, ta cahun cucahan chihin ra, yucuan ta tyasoho ra ta nasama ra cuhva iyó ra”, catyí ra cuan. ³¹ Soco ra Abraham catyí ra: “Tatu ña cuñí ra quichaha ra tuhun tyaa ra Moisés ta tuhun cha tyaa ra profeta Nyoo ta cha naha, ma chino ñi ra tuhun cahan noo ndiyí tatu nandoto ra ta cahan ra chihin ra.”

17

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha
(Mt. 18.6-7, 21-22; Mr. 9.42)

¹ Tyehe caa catyí ra Jesús chi ra cachicá noo chihin ra:

—Tyicuan ri iyó cha quiñi caa cha sativí chi ñáyiví. Soco ndahvi ra ndahvi ra sativí chi ñáyiví. ² Vaha taxin ca cuhñi ra noo yuu sucun ra. Ta cutuchi ra chi ra nu tyañuhu. Coto sativí ra chi ñu ni nasama cuhva iyó ihya.

³Saha ndo cuenda chi ndo. Tatu noo ra tahan ndo ta sacuvi ra noo cha ña vaha chihin ndo. Catyi ndo chi ra vatyí ña vaha cha sacuvi ra. Tatu nasama ra cuhva iyó ra, saha ndo tucahnu iñi chi ra. ⁴Ta ni ri maa sacuvi ra cha ña vaha chihin ndo ucha tahan chaha cha noo quivi. Tatu ndi ucha tahan chaha ta catyi ra chi ndo vatyí ndu uvi iñi ra cha sacuvi ra chi ndo, ndi ucha tahan chaha saha ndo tucahnu iñi chi ra.

Nu sañahá ra Jesús chi yo vatyí tatu chinó iñi yo chi ra, cuví sacuvi yo cuaha cha vaha

⁵Tyicuan ta quichaha catyi ra cachicá tyiño nuu ra Jesús chi ra:

—Cuhva cha chinó ca iñi ndi chuun —catyi ra.

⁶Tyicuan ta catyi ra Jesús chi ra:

—Tatu chinó iñi ndo chi yuhu vasi chiin ri tari cuhva noo chiti mostaza luhlu, cuví catyi ndo chi yutun sicómoro cha nanyaá ihya nacoyo tun, ta cucuinanyaa tun nu tyañuhu. Ta cucuvi nu cahan ndo —catyi ra Jesús.

Yoso caa tahán chi quichaha yo chi Nyoo

⁷Ta catyi ra Jesús:

—Tatu noo nyoho ta iyó noo musu ndo. Ta nachaa ra cha chahan ra nu chiqui chi sahatyiño ra, o chi saha cumi ra quití sana ndo, ¿atu catyi ndo chi ra: “Cunyaa ta cachun”? Ña catyi ndo chi ra tyicuan caa. ⁸Soco tyehe caa catyi ndo chi ra: “Sanduvaha cha cuxiñi. Ta tyihun cha cachi. Cha yaha

cha cachi tyicuan ta cachi tucu maun”, catyi ndo chi ra.

⁹Ni ña tuhvá ndo nacuhva ndo tyahvi nyoo chi ra vatyí sacuvi ra ñáá noo tyiño tava ndo chi ra. ¹⁰Tyicuan caa tucu nyoho chihin Nyoo. Quivi ndi hi sacuvi ndo cha catyi Nyoo chi ndo, tahán chi catyi ndo: “Nyuhu chiin ri cha tachun chi ndi, yucuan ri sacuvi ndi. Ta ña yaha ca.”

Nu sanduvahá ra Jesús chi uchi tahan ra tyahyu coño

¹¹Ityi cuahan ra Jesús ityi ñuu Jerusalén yaha ra nu cuví xahñi Samaria chihin Galilea. ¹²Nu chaá ra noo ñuu, quitá coyo uchi tahan ra cuhvi chihin cha tyahyu coño ra. Ta chicuitayucu ra nyasava ri. ¹³Ta quichaha cacanachaa ra chi ra Jesús, ta catyi ra:

—Yoho, Maestro Jesús, cundahvi cuñi chi ndi —catyi ra.

¹⁴Tyicuan ta nanyehe ra Jesús chi ra ta catyi ra chi ra:

—Cuahan ndo. Ta cua sañaha ndo chi ndo chi tata sutu vatyí cha nduvahá ndo.

Tyicuan ta cuahan coyo ra cuan. Ta ityi cuahan coyo ra ta cananyehe ra vatyí nduvahá ra. ¹⁵Tyicuan ta cuhva cha nanyehe noo ra cuan vatyí nduvahá ra, cuanuhu chata ra nu nyaá ra Jesús. Ta cana cha ra, ta sacahnu ra chi Nyoo. ¹⁶Ta chicuñi chiti ra. Ta nacañi noo ra xiñi ra nya nu ñuhu nuu ra Jesús. Ta nacuhva ra tyahvi nyoo chi ra. Ta ra cuan, ra Samaria cuví ra.

17 Tyicuan ta catyí ra Jesús chi ra:

—¿Atu ñima uchi tahan ndo nduvaha? ¿Nya nyaá inga ñn tahan ca ra?

18 ¿Ñáá tuhun cha noo tuhun ri maa ra inga ñuu nandichi chata ra ta sacahnu ra chi Nyoo? —catyí ra Jesús.

19 Tyicuan ta quichaha catyí ra chi ra cuan:

—Nducuíta ta cuahan. Nduvahun vatyí chinó ññun —catyí ra Jesús chi ra.

Yoso caa cuquichi Nyoo cunyaca ñaha ra nu iyó yo ihya (Mt. 24.23-28, 36-41)

20 Candaca tuhun ra fariseo chi ra Jesús, ta catyí ra:

—¿Ama quichi Nyoo cunyaca ñaha ra?

Tyicuan ta ra Jesús quichaha catyí ra:

—Cha cunyaca ñaha Nyoo ihya siqui ñuhu ñayivi, ñima cha nyehé yo cuví. 21 Ma cuví catyí ñáyivi: “Ma ra nyaá ihya, o ma ra nyaá ityi cuan.” Vatyí Nyoo cha cha ra mahñu ndo, ta nyacá ñaha ra aña ñáyivi cuenda ra —catyí ra chi ra.

22 Yahá cuan ta catyí ra chi ra cachicá noo chihin ra:

—Cuchaa chi quivi vatyí cucuñi ndo nyehe ndo chi yuhu Rayi cha quichi nya gloria. Soco ma nyehe ndo chii. 23 Cuchaa tucu chi quivi ta cucatyí ñáyivi chi ndo: “Ihya nyaá ra”, o “Yucuan nyaá ra.” Soco ma cahun ndo cunyehe ndo. Ta ma cunyon ndo chi ra cuan vatyí ñime cuví. 24 Vatyí tandihi ñáyivi cunyehe chi yuhu

Rayi cha quichi nya gloria quivi quichi inga chaha. Tari nyehé tandihi ñáyivi nu quihvi tacha nicahnu andivi, tyicuan caa cucuvi. 25 Soco cunyehe xihne tundoho. Vatyí ñáyivi cha iyó cha vityin cua cutasi cuñi nyehe ñu chii. 26 Tari cuví quivi ra Noé, tyicuan caa cucuvi quivi quichi yuhu Rayi cha quichi nya gloria inga chaha.

27 Quivi ra Noé, chachí ñu. Chihí ñu. Tandahá ñu. Ta chahá ñu sehe ñu tandaha. Nya quivi quihvi ra Noé chichi barcu ra, ta coon savi xaan. Ta tandihi ñu cachihí ñu. 28 Tyicuan caa tucu cuví quivi ra Lot. Chachí ñu. Chihí ñu. Satá ñu. Xicó ñu. Tachí ñu. Ta savahá ñu vehe ñu. 29 Soco quivi cha quita ra Lot ñuu Sodoma cuan, coon ñuhu chihin azufre andivi. Ta chihí tandihi ñáyivi Sodoma. 30 Ta tyicuan caa cucuvi quivi cha quichi tucu yuhu Rayi cha quichi nya gloria inga chaha.

31 “Ta quivi cuan tatu nyicú ndo nuquehe ndo, ma ndihvi ndo chichi vehe ndo vatyí tava ndo ndaha tyiño ndo. O tatu chicá noo ndo nu chiqui, ma cunuhu ndo nya vehe ndo. 32 Nícohon ññi ndo ñasihí ra Lot, ñáá cha cuví chi ña. 33 Tandihí ndo cha cuñi ca ndo cha iyó siqui ñuhu ñayivi ihya, cucunaa ndo. Ta tandihí ndo cha ña quichaha ndo cha iyó ñáyivi ihya, cucacu ndo.

34 “Ta catyí chi ndo vatyí cha cuaa cuan uvi tahan ra cucava noo nu chito. Noo ri ra cunaquehin. Ta nonga ra cundoo ra. 35 Ta uvi tahan

ñusihí ñn ri cu nyicó ñu quiví cuan. Noo ri ña, cunaquehin. Ta nonga ña cundoo ña. ³⁶ Ta catyí chí ndo vatyí uvi tahan ra cohon nu chiquí. Noo ra cunaquehin, ta nonga ra cundoo ra —catyí ra Jesús.

³⁷ Cuhva cha chiñi ñu tuhun ihya, quichaha ndaca tuhun ñu chi ra Jesús.

—¿Nya maa maa cucuvi ihya Tata? —catyí ñu.

Tyicuan ta nacahan ra Jesús ta catyí ra:

—Nu catuví coño ñuhu chihí, yucuan cundu ñn ri chíi.

18

Nu sañahá ra Jesús vatyí tari chicán noo ñaha chíhí yí chí juez, tyicuan caa tahán chí cacanyo chí Nyoo

¹ Tyicuan ta chaha ra Jesús noo kuhva ihya. Vatyí na cacan tahvi ñu tyicuan ri maa, ta ma cundihñi ñu. ² Ta catyí ra:

—Iyó noo ñuu cha nyaá noo juez. Ta juez cuan ña sahá maa ra ñáyiví chí Nyoo. Ta ní ri ña quichaha maa ra chí ñáyiví. ³ Ta suri ñuu cuan iyó tucu noo ñaha ndahvi cha chíhí yí. Ta chahan ña chichan ña chihin ra, vatyí chicá ña cuatyí chaha noo ra xaan iñi chí ña. ⁴ Ta juez cuan ña quichaha maa ra chí ña. Ña sandaa maa ra tyiño chicá ña. Ta cha naha xaan chicán ña. Tyicuan ta quichaha ndichí xiñi juez cuan: “Vasí ña yuhví chí Nyoo, ta ñahri cuende chí ñáyiví, ⁵ soco ñaha ihya

sayangá xaan ña chíi. Ta yucuan chaha cua sacaqui chí ña. Vatyí coto quichi ca ña, ta sanaquiqui ña tisihi”, ndichí xiñi ra.

⁶ Tyicuan ta catyí ra Jesús:

—Tyicuan caa catyí juez ña vaha cuan. Tu juez cuan cha quiñi iyó ra ta tyinyee ra chí ñaha ndahvi cuan, ⁷ ta nyaca cuví Nyoo, ¿atu ma tyinyee ra chí ñáyiví cha chicán ndiyaca ta ndiquiví chí ra? ¿Atu cuatu xaan ra cha tyinyee ra chí ñu?

⁸ Catyí chí ndo, vatyí numi ri cutyinyee ra chí ñu. Soco quiví quichi yuhu, Rayí cha quichí nya gloria, inga chaha, chitó Nyoo tatu nañihi que chí ñu cha ndicha chinó iñi chíi —catyí ra Jesús.

Noo kuhva cuenda ra tavá xuhun cuenda gobiernu ñuu Roma ta cuenda ra fariseo

⁹ Tyicuan ta chaha ra Jesús nonga kuhva cuenda ra savahá chíi, ta ña cuñí nyehe ra chí inga ra. Ta quichaha catyí ra:

¹⁰ —Iyó uvi tahan ra chahan chichi vehe ñuhu chican tahvi ra chí Nyoo. Noo ra cuan ra fariseo cuví ra. Ta inga ra cuan ra tavá xuhun cuenda gobiernu ñuu Roma cuví ra. ¹¹ Ta ra fariseo cuan chicuinanyaa ra, ta quichaha cahan ra chihin Nyoo. Ta cahnu saha ra chí ra. Ta catyí ra: “Sutu Mañi yuhu, nacuhve tyahvi nyoo chuun vatyí yuhu ñima tari inga ñáyiví cuví. Vatyí suhu ñu. Quiñi iyó ñu. Iyó ñasihí ra ta iyó inga ñusihí chí ra. Ta ní ri ñima tari

ra tavá xuhun cuan cuví.
 12 Vaha ca quichahí tuhun maun ta ñima ca inga ñáyivi. Vatyí uvi chaha cha noo vitya ña chachí. Ta chahí uchi siquí noo noo cientu cha sahá ganai chuun”, catyí ra.
 13 Soco ra tavá xuhun cuenda gobiernu Roma cuan cha cañi ri chiin nanyaá ra. Ta ña caña iñi ra nanyehe ndaa ra. Ta cañi ra ndaha ra añima ra vatyí ndu uvi iñi ra cuatyí ra. Ta catyí ra: “Sutu Mañi yuhu. Nyehé ndahvi chii vatyí iyó xaan cuatyí”, catyí ra —catyí ra Jesús.

14 Ta catyí tucu ra Jesús tyehe caa:

—Catyí chi ndo vatyí Nyoo sahá ra tucahnu iñi chi ra tavá xuhun cuan. Sanaa Nyoo cuatyí ra ta cuanuhu ra nya vehe ra. Soco ra fariseo cuan, ñahri tucahnu iñi ñihi ra, vatyí yóó ñáyivi cha savahá xaan chi nuu Nyoo, cusanocuee Nyoo chi ñu, ta ñu sanocuee chi, Nyoo cusanducahnu ra chi ñu —catyí ra Jesús.

Nu nasocó ra Jesús chi ra cuatyaa

(Mt. 19.13-15; Mr. 10.13-16)

15 Tyicuan ta quichi nyaca ñáyivi chi ra cuatyaa chi ra Jesús vatyí na tyiso ra ndaha ra xiñi ndotyín. Soco cuhva cha nanyehe ra cachicá noo chihin ra vatyí tyicuan caa, ña chaha ca ra. 16 Tyicuan ta cana ra Jesús chi ra cachicá noo chihin ra, ta catyí ra chi ra:

—Saña ndo chi ra cuatyaa na quichi maa ndotyín nu

nyai. Ta ma casi ndo, vatyí ñu nyacá ñaha Nyoo añima, cuví ñu tari ra cuatyaa ihya. 17 Ta catyí chi ndo vatyí tatu ña ita iñi ndo chi Nyoo, tari noo ra cuatyaa ita iñi ndotyín chi sutu ndotyín, ma cuví quihvi ndo nu nyacá ñaha Nyoo.

Nu chahá ra Jesús tuhun vatyiyi xaan nacuhva cuenda noo ra tyayí chi ra chi Nyoo
 (Mt. 19.16-30; Mr. 10.17-31)

18 Tyicuan ta noo ra cha cuví nuu cuenda vehe ñuhu ndacá tuhun ra chi ra Jesús, ta catyí ra:

—Maestro, ra vaha cuvún. ¿Yoso caa cunyacuvi ta ñihi ñáyivi cha ma naa ca maa coi? —catyí ra.

19 Tyicuan ta catyí ra Jesús chi ra:

—¿Ñáa tuhun catyún vatyí ra vaha cuví? Noo ri maa Nyoo cuví ra ra vaha. (Ta cha catyún tyi vahi, nacotón tyi Nyoo cuví.) 20 Yoho chitón tandihí tuhun cha tachí Nyoo tyi sacuvi yo: “Cha ma coo inga ñusihi chuun. Ma cahñun chi ñáyivi. Ma suhun. Ma cahun cuendu siquí ñáyivi. Ta sahun ñáyivi chí sutun ta chí sihun” —catyí ra Jesús.

21 Tyicuan ta ra cuan catyí ra:

—Tandihí ihya ta quichahí nyata luhli ta nyacua nya vityín —catyí ra.

22 Nu chiñi ra Jesús cha catyí ra cuan, tyicuan ta catyí ra chi ra:

—Soco cumañi sacuvun nonga cha sacuvun. Xico tandihí cha iyó chuun. Ta

cuhva chi ñu ndahvi. Ta quichun chate. Tyicuan ta coo cha tyayii chuun nya gloria —catyí ra.

²³ Soco ra cuan nu chiñi ra tuhun cuan, nducuihya xaan iñi ra, vatyí tyayii xaan ra. ²⁴ Cha nanyehé ra Jesús vatyí nducuihya iñi ra, ta quichaha catyí ra:

—Yii xaan ta cuvi nacuhva cuenda ñu tyayii chi ñu na cunyaca ñaha Nyoo aña ñu. ²⁵ Tañi tyehe yaha noo camello xiu noo yiqui ticu, ta ñima ca cha quihvi noo ñu tyayii nu nyacá ñaha Nyoo —catyí ra.

²⁶ Ta ñu cha cachiñi tuhun ihya catyí ñu:

—Tatu tyicuan caa, ¿yóo cha cuví cacu vii? —catyí ñu.

²⁷ Tyicuan ta ra Jesús catyí ra:

—Tandihí cha ña cuví sacuvi rayii, Nyoo cuví sacuvi ra —catyí ra.

²⁸ Tyicuan ta ra Pedro catyí ra:

—Sutu Mañi yuhu, nyuhu tandihí maa cha iyó chi ndi sandoo ndi, ta nyicón ndi chuun —catyí ra.

²⁹ Tyicuan ta catyí ra Jesús chi ra:

—Cha ndicha catyí chi ndo. Vatyí tandihí ndo cha sandoo ndo vehe ndo, o ñasihi ndo, o yañi ndo, o sutu ndo, o sehe ndo cha catyí cha chaha ndo cha cunyaca ñaha Nyoo aña ndo, ³⁰ cuaha xaan cha vaha cunañihi ndo ihya ñayivi ta cunañihi ndo inga ñayivi cha ma naa ca maa —catyí ra Jesús.

Inga chaha sacotó ra Jesús yoso caa cucahñi ñáyivi chi ra (Mt. 20.17-19; Mr. 10.32-34)

³¹ Ta cana siin ra Jesús chi ndi uchi uvi ra cachicá noo chihin ra, ta catyí ra chi ra:

—Vityin cuhun yo nya Jerusalén. Vatyí yucuan cuchino cava tandihí tuhun cha tyaa ra profeta Nyoo ta cha naha. Vatyí yuhu Rayii cha quichi nya gloria cuví. ³² Vatyí cucuhva cuenda ra chii chi ra inga ñuu, ra cha ñima ra ñuu Israel cuví. Ta cucuacu nyaa ra chii. Ta cucahan ra chii. Ta cutyicusii ra nui. ³³ Ta cucañi ra chii, ta cucahñi ra chii, soco nu cu uñi quivi ta cunandote —catyí ra Jesús.

³⁴ Ta ra cachicá noo chihin ra ña cutuñi iñi ra tuhun cuan ni ña cachitó ra ñáa tuhun cahán ra Jesús chihin ra. Vatyí ña chaha Nyoo vatyí cacutuñi iñi ra.

Nu sananyehé ra Jesús chi noo ra cuaa ñuu Jericó (Mt. 20.29-34; Mr. 10.46-52)

³⁵ Cuhva cha cua chaa ra Jesús ñuu Jericó. Ta yuhu ityi cuan nyaá noo ra cuaa. Ta chicán ra limuxtan. ³⁶ Tyicuan ta chiñi ra vatyí cuaha xaan ñáyivi cua yaha. Ta ndaca tuhun ra ñáa cha cuví cuan. ³⁷ Ta ñáyivi nacatyí ñu chi ra vatyí ra Jesús, ra ñuu Nazaret, ican cua yaha cuan. ³⁸ Tyicuan ta quichaha cana chaa ra:

—¡Yoho Jesús, ra vachi tata rey David! ¡Cundahvi cuñi nyehun chii! —catyí ra.

39 Ta ra cha cuahan coyo ityi nuu cuan, quichaha catyi ra chi ra, nacasi ra yuhu ra. Soco chaa ca caná chaa ra, ta catyi ra:

—¡Yoho, ra vachi tata ra David! ¡Cundahvi cuñi nyeahun chii! —catyi ra.

40 Tyicuan ta chicuñi ra Jesús yucuan. Ta tachí ra tyiño na cuquehen chí ra cuaa cuan. Ta cuhva cha chaá ra cuaa cuan nu nanyaá ra Jesús, ta ra Jesús quichaha ndaca tuhun ra chi ra, ta catyi ra:

41 —¿Ñáá cha cuñún vatyí sacuvi chuun?

Tyicuan ta ra cuaa cuan nacahan ra, ta catyi ra:

—Sutu Mañi yuhu, cuñi nanyehi —catyi ra.

42 Tyicuan ta catyi ra Jesús chi ra:

—Nanyehé. Cha nduvaha chiti nuun, vatyí chinó iñun chii —catyi ra.

43 Ta caa cuhva ri cuan, ra cuaa cuan nanyehé ra. Ta cuahan ra chata ra Jesús. Ta sacahnú ra chi Nyoo. Ta tandihí ñáyivi cha nyehe ñu tyicuan caa, sacahnú ñu chi Nyoo.

19

Nu cuahan ra Jesús vehe ra Zaqueo

1 Yucuan ta quihvi ra Jesús ñuu Jericó cuan. Ta cua yaha ra chichi ñuu cuan. 2 Ta yucuan iyó noo ra tyayí vavaha. Nañi ra Zaqueo. Ta ra cuvi nuu cuenda ra catava xuhun cuenda gobiernu ñuu Roma cuvi ra. 3 Ta cuñi xaan ra cohon nuu ra chi ra Jesús. Ta

ña cuvi nyehe ra chi ra vatyí cuaha xaan ñáyivi. Ta maa ra tyaha xaan ra. 4 Yucuan ta chino vavaha ra cuahan ra ityi nuu, ta ndaa ra nu noo yutun cha nañi sicómoro cha nanyaá yuhu ityi nu cua yaha ra Jesús, tacuhva cuvi nyehe ra chi ra. 5 Ta cuhva cha yaha ra Jesús nanyehé ndaa ra ityi siqui ta nanyehé ra chi ra Zaqueo. Ta quichaha catyi ra chi ra:

—Zaqueo, sanumi ta nōun nu yutun chiña. Vatyí vityin cuhin vehun —catyi ra chi ra.

6 Tyicuan ta numi ri noo ra Zaqueo nuu yutun cuan. Ta sií vavaha cuvi chi ra. Ta quehen cuenda ra chi ra Jesús. Ta cuahan ra chihin ra nya vehe ra. 7 Ta cha nyehe ñáyivi cha tyicuan caa, ta tandihí ñu quichaha cahán nyaa ñu chi ra Jesús. Ta catyi ñu vatyí ndoo ra vehe noo ra iyó cuatyí. 8 Nu canyicú ra chichi vehe cuan, ra Zaqueo nicuinanyaá ra. Ta quichaha catyi ra chi ra Jesús:

—Sutu Mañi yuhu, yuhu cua cuhve sava cha iyó chii chí ñu ndahvi. O tatu suhi chí ñáyivi chihin cha sandavi ñahi chí ñu, vityin cunacuhva cuende nya cumi ca tahan chaha chí ñu —catyi ra chi ra.

9 Tyicuan ta catyi ra Jesús:

—Vityin cacu añimon, ta ñáyivi chí ra Abraham cuvún. Vatyí nacuhva cuendon chuun chí Nyoo tari nacuhva cuenda ra Abraham chí ra chí Nyoo. 10 Vatyí yuhu Rayí cha quichí nya gloria vachi nanduqui ta vachi sacaqui

chi ñáyiví cha cua naa —catyí ra Jesús.

Nu sañahá ra Jesús na saha tyiño yo chihin cha chahá Nyoo chi yo

(Mt. 25.14-30)

11 Ta cha ni ri ca cha chiñí ñáyiví tuhun cahán ra Jesús, quichaha cahan tucu ra inga cuhva ihya. Vatyí cha cuyatyin chaa ra Jerusalén. Ta ñáyiví cuñí maa ñu vatyí cha cua quichaha ra cunyaca ñaha ra yucuan. 12 Tyicuan ta catyí ra:

—Chiyo noo ra vaha ta cuñí cuhun ra noo ñuu cañi. Vatyí yucuan cunanduví ra rey tacuhva vatyí ndichi ra ñuu ra, soco cha cuví ra rey. 13 Ta cuhva cha cumañi cuhun ra, caná ra chí uchi tahan musu ra. Ta chahá cuenda ra noo xuhun chí noo noo ra. Ta catyí ra chí ra: “Saha tyiño ndo chihin xuhun chiña nyacua nya ndichi mai”, catyí ra. 14 Soco suhva ñáyiví ñuu ra, tasi cuñí ñu nyehe ñu chí ra ta ña cuñí ñu cha cuví ra rey chí ñu. Ta tachí ñu chí suhva ra cuhun chata ra, vatyí catyí ra vatyí ña cuñí ñu cha cuví ra rey chí ñu. 15 Soco ra cuan nduví ra rey. Tyicuan ta nachaa ra nya ñuu ra. Ta quiví cha nachaa ra, caná ra chí musu ra, ra cha sandoo ra xuhun chii. Vatyí coto ra yoso saha ganaa xuhun ra cha ni ri ca cha chahan ra. 16 Ta chaa noo ra cuan. Ta catyí ra: “Tata, saha ganai uchi ca tahan chaha siqui xuhun cha sandoun chii”, catyí ra. 17 Tyicuan ta

quichaha catyí rey cuan chí ra: “Vaha xaan. Yoho vaha musu cuvún. Vatyí vaha saha tyiño chihin chiin xuhun cha chahí chuun. Ta vityin cunyaca ñahun uchi tahan ñuu”, catyí rey cuan chí ra. 18 Tyicuan ta chaa tucu inga ra cha chahá ra xuhun chii. Ta quichaha catyí ra: “Ma xuhun ihya. Saha ganai ohon tahan ca chaha siqui xuhun cha sandoun chii”, catyí ra. 19 Tyicuan ta catyí rey chí ra: “Yoho cunyaca ñahun ohon tahan ñuu”, catyí ra. 20 Tyicuan ta chaa tucu inga ra cuan. Ta quichaha catyí ra: “Ma xuhun ihya cha chahun chii. Yuhu chicumí vahi chichi noo pañitu. 21 Vatyí yuhví xain chuun, vatyí yoho cuvún noo ra xaan. Vatyí naquehun cha ñima chuun cuví. Ta naquehun tyiño saha inga ñáyiví”, catyí ra cuan. 22 Tyicuan ta rey cuan catyí ra chí ra: “Yoho musu ña vaha cuvún. Vityin suri chihin tuhun cha cатыun chii, cucatyí tucu yuhu chuun. Tatu chitón vatyí yuhu, xain, ta chitón vatyí naquehin cha ñima chii cuví, ta naquehín cha ña saha tyiño, 23 ¿ñáá tuhun ña chahun ta chityihun xuhin banco vatyí nachai soco cha nducuaha ca xuhin?” catyí rey cuan. 24 Ta quichaha catyí ra chí ra canyicú cuan: “Tĩnyaa ndo xuhun cha chahí chí ra, ta cuhva ndo chí ra cha saha ganaa uchi ca tahan cuan”, catyí ra. 25 Tyicuan ta quichaha catyí ra chí rey

cuan: “Tata, soco ra cuan, cha iyó uchi tahan chi ra”, catyí ra. ²⁶ Tyicuan ta rey cuan catyí ra: “Soco catyí yuhu chi ndo. Vatyí ra cha vaha ca sahá tyiño chihin cha चाहि चि, cucuhva que chi ra. Ta ra cha चाहि चीन रि, ta ña cuñí ra sahá tyiño ra chihin cuan, cutinyaa ndihi chi ra. ²⁷ Ta tandihi ñu xaan iñi chii, ñu ña cuñí vatyí cunyaca ñahi chi ñu, nyaca ndo chi ñu tyehe vatyí cahñi ndo chi ñu nui”, catyí rey cuan —catyí ra Jesús.

*Nu cua chaa ra Jesús
Jerusalén*

(Mt. 21.1-11; Mr. 11.1-11;
Jn. 12.12-19)

²⁸ Cha yaha cahan ra Jesús cuhva cuan, ta sañihi ra cuahan ra ityi Jerusalén. ²⁹ Yucuan ta cua chaa ra ñuu Betfagé chihin ñuu Betania, yatyin ri noo yucu cha nañi Olivo, vatyí maa maa ri maa tun Olivo iyó yucuan. Ta tava ra tyiño chí uvi tahan ra cachicá noo chihin ra. ³⁰ Ta catyí ra chi ra:

—Cuahan ndo ñuu cha nyaá yatyin ri cuan. Ta yucuan cunañihi ndo noo burru luhlu, quití ta coto ca tyayu, nuhñí ti. Ndachi ndo chí ti. Ta nyaca ndo chí ti tyehe. ³¹ Tatu yóo cha catyí chí ndo: “¿Ñáá tuhun cha ndachi ndo chí ti?” catyí ndo chí ñu: “Vatyí chiñuhú ti chí maa ra nyaca ñaha chí yo.”

³² Tyicuan ta ra cachicá noo chihin ra, cuahan coyo ra. Ta nañihí ra chí ti tari cuhva catyí maa ra Jesús. ³³ Ta

cuhva cha candachi ra chí ti, chaꝓ coyo chitoho ti. Ta candaca tuhun ra chí ra:

—¿Ñáá tuhun cha ndachi ndo chí burru chiña? —catyí ra.

³⁴ Tyicuan ta canacahan ra cuan ta cacatyí ra:

—Ndachí ndi chí ti vatyí chiñuhú ti chí maa ra nyacá ñaha —catyí ra.

³⁵ Tyicuan ta quehen ra chí ti. Ta chinyacá ra chí ti nu nyaá ra Jesús. Ta tyiso ra sahma ra siqui ti. Tyicuan ta casandaꝓ ra chí ra Jesús siqui ti. ³⁶ Tyicuan ta cuahan ra Jesús. Ta cuaha vavaha ñáyivi cachacun ñu sahma ñu ityi nu

cua yaha ra, yosó ra burru cuan. ³⁷ Tyicuan ta cha cua cuyatyin tandihi ñu chihin ra Jesús nu iñi noo yucu Olivo cuan. Ta quichaha cana chaa tandihi ñu chinó iñi chí ra chihin cha siꝓ cuví chí ñu. Ta sacahnú ñu chí Nyoo vatyí cuaha xaan cha vaha nyehe ñu cha sacuví ra. ³⁸ Yucuan chaha catyí ñu:

—¡Na sacahnu yo chí Rey ihya vatyí vachi ra chihin siꝓi Nyoo! ¡Na coo cha taxi ri andivi! ¡Ta na sacahnu yo chí Nyoo! —catyí ñu.

³⁹ Tyicuan ta suhva ra fariseo cha cuahan coyo chihin ñáyivi cuan quichaha cacatyí ra:

—Maestro, sacutaxin chí ñu nyicón chuun —cacatyí ra.

⁴⁰ Nacahan ra Jesús ta catyí ra:

—Tatu ñáyivi ihya ta cu taxin ñu, nyacua nya yuu ta nacana chaa chí, ta sacahnu chí chí —catyí ra Jesús.

⁴¹ Yucuan ta cha cua chaa ra yatyin ri Jerusalén cuan. Ta nanyehe ra Jesús chi ñuu cuan ta quichaha chacu chaa ra vatyí cuihya iñi ra. ⁴² Ta catyí ra:

—Tyehe ta chitó nyoho, ta cutuñi iñi ndo yoso caa cha vaha cha vachi nyaque chi ndo quivi ihya. Soco xehe xaan ñohó cha chiñi tuñi cuan, ta ña nañihí maa ndo. ⁴³ Soco cuchaa quivi ña vaha vatyí ra xaan iñi chi ndo cutyihí chacu ra chi ndo. Vatyí tandihí ri ityí cuquichi coyo ra siqui ndo. Ta cucañi tahan ra chihin ndo. ⁴⁴ Ta cucacun ñuhú ra chi ndo ta cucañi ra chi ndo. Ta ni noo yuu yoso nyitahan ta ma sandoo ra. Tyicuan caa cucuvi vatyí ña cuñí ndo nacoto ndo cha quichí Nyoo quichi sacacu ra chi ndo.

Nu tavá ñehe ra Jesús chi ra caxico chichi vehe ñuhu cahnu
(Mt. 21.12-17; Mr. 11.15-19; Jn. 2.13-22)

⁴⁵ Tyicuan ta ra Jesús quihvi ra chichi nuquehe vehe ñuhu cahnu. Ta quichaha tava ñehe ra tandihí ra caxicó ta casatá yucuan. ⁴⁶ Ta catyí ra chi ra:

—Nu tutu Nyoo catyí chi vatyí vehe Nyoo, nu chicán tahvi yo chi ra cuví. Soco nyoho sananduví ndo vehe nu nyicú ra suhu —catyí ra.

⁴⁷ Ta tandihí quivi chahán ra Jesús chisañaha ra chi ñáyivi chichi vehe ñuhu cuan. Soco ra cacuví nuu chi tata sutu, ta ra casacuahá cuenda ley vehe ñuhu, ta ra cacuví nuu chi ñuu cuan, canducú

ra cuhva yoso caa ta cahñi ra chi ra. ⁴⁸ Soco ña ñihí maa ra cuhva yoso caa sacuvi ra. Vatyí tandihí ñáyivi ta vaha tyasohó ñu tuhun cahán ra Jesús.

20

Nu ndaca tuhun ra fariseo chi ra Jesús yóo cha tachí chi ra vatyí cahán ra nuu ñáyivi
(Mt. 21.23-27; Mr. 11.27-33)

¹ Noo quivi cuan cha ni ri ca cha sañahá ra Jesús chi ñáyivi chichi vehe ñuhu cahnu, ta cahán ra tuhun yoso caa sacacú Nyoo chi ñu. Ta chaá coyo ra cuví nuu chi tata sutu chihin ra casacuahá cuenda ley vehe ñuhu, in ri chihin ra cacuví mandoñi. ² Ta cacatyí ra chi ra:

—Catyí chi ndi ¿yóo cha tyaa tyiño chuun vatyí sacuvun tyehe caa? —catyí ra.

³ Tyicuan ta ra Jesús quichaha catyí ra chi ra:

—Yuhu tucu cua ndaca tuhun noo tuhun chi ndo. ⁴ ¿Yóo cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi?

⁵ Tyicuan ta cacatyí ra cuan chi ra tahan ra:

—Tatu catyí yo vatyí Nyoo tachí chi ra Juan cuan, cucatyí ra chi yo “Ñáá tuhun ña chinó iñi ndo tuhun cahán ra.” ⁶ Ta tatu catyí yo vatyí ñáyivi tachí chi ra, ñáyivi cahñi ñu chi yo chihin yuu. Vatyí tandihí ñu, ta cuñí ñu vatyí Nyoo tachí chi ra —cacatyí ra.

⁷ Tyicuan ta cacatyí ra chi ra Jesús vatyí ña cachitó ra yóo cha tachí chi ra Juan vatyí na sacondutya ra chi ñáyivi. ⁸ Tyicuan ta ra Jesús catyí ra chi ra:

—Ni ri yuhu, ta ma catyí chi ndo yóo cha tachí chii, cha sacuvi tyehe caa.

Nu sañahá ra Jesús vatyí tari ra sahá tyiño ña vaha tyicuan caa cuví ra cha cucahñi chi ra

(Mt. 21.33-44; Mr. 12.1-11)

⁹ Tyicuan ta quichaha catyí ra Jesús noo cuhva ihya chi ñáyivi:

—Noo ra tachí ra cuaha yoho tichaha ndivi nu ñuhú ra. Yahá cuan ta chahá noo ra ñuhú cuan chi suhva ra casaha tyiño. Tyicuan ta naha cuahan ra inga ñuu.

¹⁰ Ta chaá quivi cha iñi chiti cuan. Tyicuan ta tachí ra chi noo musu vatyí cuquehen ra suhva chiti cha tahán chi chi ra. Soco cacañi xaan ra casahá tyiño cuan chi musu cuan. Ta sacunuhu ra chi ra chihin nu ndaha nu ndii ra. ¹¹ Tyicuan ta chitoho yoho tichaha ndivi cuan tachí tucu ra chi inga musu. Suri cacañi xaan ra chi ra. Ta cacahan uhvi ra chi ra. Ta natachí ra chi ra. Soco suri ñahri cachaha ra cuiso ra cunuhu.

¹² Tyicuan ta chitoho cuan tachí tucu ra chi inga ra. Soco suri tyicuan caa chinyacuvi tucu ra chihin ra. Ta sañicuehe ra chi ra. Ta tava ñehe ra chi ra yucuan.

¹³ Yahá cuan ta quichaha catyí chitoho ñuhu cuan: “¿Yoso caa cunyacuvi vityin?

Cua tachi chi sehi, ra cha cuñi vavahi. Ta cha nanyehe ra chi ra, vasi casaha ra ñáyivi chi ra, vatyí sehi cuví chi ra.”

¹⁴ Soco cuhva cha cananyehe ra casahá tyiño cuan chi ra, catyí ra chi ra tahan ra: “Ican ra ihya cundoo chihin ñuhú ihya tatu chihi sutu ra. Soco nacañi yo chi ra. Vatyí ndoo maa yo chihin ñuhú ihya”, catyí ra. ¹⁵ Tyicuan ta tava ñehe ra chi sehe chitoho ñuhú cuan ityi chata chacu. Ta cachahñi ra chi ra —catyí ra Jesús.

Tyicuan ta catyí ra Jesús chi ñáyivi nyicú cuan:

—¿Ñáá cha cusacuvi chitoho ñuhú cuan chi ra cachahñi chi sehe ra cha cuhva cha cuñi nyoho?

¹⁶ Catyí chi ndo vatyí quichi ra ta cahñi ra chi ra casahá tyiño cuan. Ta cuhva ra ñuhú cuan chi inga ra —catyí ra Jesús.

Ta cuhva cha chiñi ñáyivi tuhun cuan, yuhví xaan ñu cuví. Ta quichaha catyí ñu:

—¡Ña cuñi Nyoo ta cuvi tyicuan caa! —catyí ñu.

¹⁷ Soco ra Jesús nanyehe ra chi ñu ta catyí ra:

—Tyicuan caa cucuvi. Vatyí nyaá nu tutu Nyoo ta catyí chi tuhin tyehe caa:

Yuu cha ña cuñi ra casavahá vehe cotyiño ra, Ican cuan cuví yuu cha niñi ca.

¹⁸ Tari tahnú noo ra cha canacava siqui yuu, tyicuan caa tivi ñu ña cuñi quichaha tuhun cahín. Ta sñn ri, tari taxin nyihi noo ra cha canacava yuu siqui,

tyicuan caa cunaa ñu ña cuñi quichaha tuhun cahín —catyí ra Jesús.

¹⁹ Ta ra cacuví nuu chi tata sutu ta ra casacuahá cuenda ley vehe ñuhu catuvi ñi ra vatyí tuhun cha catyí ra Jesús, chi maa ra ña ni cuan. Ta cuñi ra catiín ra chi ra Jesús vatyí cacahni ra chi ra. Soco ña cachitó maa ra yoso caa. Vatyí yuhví ra chi ñáyivi.

Tuhun cha tyiyahví ñu xuhun chi gobiernu ñuu Roma (Mt. 22.15-22; Mr. 12.13-17)

²⁰ Tyicuan ta catachí ra chi suhva ra vatyí cunducu nyehe ra chi ra Jesús. Ta casahá ra tyi ra vaha cacuvi ra. Vatyí coto ra ñáá noo tuhun ña vaha cahán ra Jesús tacuhva cuvi catiín ra chi ra. Ta cuhva cuenda ra chi ra chi gobernador. ²¹ Yucuan chaha candaca tuhun ra casavaha chii cuan chi ra Jesús:

—Maestro, chitó ndi vatyí vaha tuhun cahín. Ta sañahún cha vaha chi ñáyivi. Ta ñima cuhva iyó ri ñu nyehun soco añima ñu ñandihí. Ta maa ri maa ityi Nyoo sañahún. ²² Catyí chi ndi ¿atu vaha cha tyiyahví yo cha chicán gobiernu ñuu Roma chi yo, o ña vaha? —catyí ra.

²³ Soco ra Jesús tuví ñi ra vatyí cuñi ra nducu nyehe ra chi ra. Ta catyí ra chi ra:

—¿Ñáá tuhun cuñi ndo nducu nyehe ndo chii? ²⁴ Sañaha ndo noo xuhun chiña chii, na nyehi. ¿Yóó chi nuu ta yóó chi sivi nyaá nu xuhun ihya? —catyí ra.

Tyicuan ta nacahan ra cuan, ta catyí ra:

—Nuu gobiernu, ta sivi ra ñandihí —cacatyí ra.

²⁵ Tyicuan ta catyí ra Jesús: —Tu tyicuan caa, cuhva ndo xuhun chiña chi ra cuvi gobiernu cuan vatyí chi maa ra tahán chi. Ta cuhva tucu ndo chi Nyoo cha tahán chi chi ra —catyí ra Jesús chi ra.

²⁶ Ta ña cuví maa sandahvi ñaha ra chi ra Jesús chihin tuhun cahán ra nuu ñáyivi. Ta iyo xaan cacuñi ra tuhun cha nacahan ra. Ta taxi ri cuví ra.

Nu cacuñi ra saduceo sandavi ñaha ra chi ra Jesús

(Mt. 22.23-33; Mr. 12.18-27)

²⁷ Cha yaha cuan ta chaá coyo suhva ra saduceo nu nyaá ra Jesús. Maa ra cuví ra casañahá vatyí ña nandotó ndiyi.

²⁸ Tyicuan ta catyí ra chi ra Jesús:

—Maestro, sandoo ra Moisés tuhun ihya vatyí tatu noo ra chihí ra ta ndoo ñasihí ra, tatu yori sehe ra chiyó chihin ña, tahán chi cha tandaha yañi ra chihin ña tacuhva cha ma cunaa tata yañi ra. ²⁹ Soco cuñi ndi coto ndi vatyí chiyó ucha tahan ra chihin yañi ra. Ta ra cha ñihi ca chicoo ñasihí ra, soco yori sehe ñu chiyó, ta chihí ra. ³⁰ Tyicuan ta naquehen ra cha cu uvi suri maa ña cuan. Ta yori tucu sehe ñu chiyó. Ta chihí tucu ra cuan. ³¹ Ta suri tyicuan caa cuví chihin ra cu uñi cuan. Ta suri tyicuan caa cuví chi ndi ucha ra. Ni noo

ra ta yori sehe ra chiyo chihin ña. ³² Ta nu ndihi tuhun chihí ndihi maa ña. ³³ Ta cuñí ndí coto ndi yóo ra cuví ñasihi chi ña chichi cha ndi ucha tahan ra cuan nu cunandoto ñu nuu Nyoo —cacatyí ra saduceo cuan.

³⁴ Tyicuan ta nacahan ra Jesús, ta catyí ra:

—Ihya ñayivi, rayi ta ñusihí tandaha ñu. ³⁵ Soco ñu cha tahan chi nandoto inga ñayivi nu nyacá ñaha Nyoo, ña tandaha ca ñu ta ni ma cuhva ca ñu sehe ñu tandaha. ³⁶ Ta ñahri tuhun chihí iyó nyicuan. Soco cucuvi ñu tari ángel. Ta cuví ñu sehe Nyoo cha ndicha vaha vatyí nandoto ñu. ³⁷ Cha ndicha cuví vatyí ra Moisés nu sacoto ra tuhun cha cayu taca iñu cuan, yucuan sacotó ra chi yo vatyí ñu chihí nandotó ñu. Vatyí yucuan catyí ra vatyí Sutu Mañi yo Nyoo cuenda ra Abraham, ta Nyoo cuenda ra Isaac, ta Nyoo cuenda ra Jacob, cuví chi ra. ³⁸ Vatyí Nyoo ñima Nyoo cuenda ñáyivi chihí cuví ra. Nyoo cuenda ñu nyitó cuví ra. Vatyí cha cuenda Nyoo tandihi yo ta nyitó aña yo vasi chihí coño ñuhu yo —catyí ra Jesús.

³⁹ Tyicuan ta suhva ra casacuahá cuenda ley vehe ñuhu catyí ra:

—Vaha xaan nacahun Maestro —catyí ra.

⁴⁰ Yucuan ta ña caña ca maa iñi ra candaca tuhun ra ñáa ca tuhun chi ra Jesús.

Cristo vachi ra tata ra David, ta suri cuví tucu ra

Sehe Nyoo

(Mt. 22.41-46; Mr. 12.35-37)

⁴¹ Tyicuan ta ndaca tuhun ra Jesús chi ñu:

—¿Ñáa tuhun cha catyí ndo vatyí ra Cristo tata ra David vachi ra? ⁴²⁻⁴³ Vatyí suri maa ra David catyí ra nu libru Salmo tyehe caa:

Cahán Suti Nyoo chihin Suti ra Cristo, ta catyí ra chi ra:

“Cunyaa chiyo vahi nyacua nya cuhve chi ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

⁴⁴ ¿Yoso caa cha ra vachi tata ra David cuví chi ra Cristo, ta suri maa ra David catyí vatyí Sutu ra cuví chi ra Cristo? —catyí ra Jesús.

Nu catyí ra Jesús vatyí cuaha xaan cuatyí ra casacuahá cuenda ley vehe ñuhu iyó

(Mt. 23.1-36; Mr. 12.38-40; Lc. 11.37-54)

⁴⁵ Tandihí ñáyivi cachiñí ñu tuhun cahán ra Jesús chihin ra cachicá noo chihin ra nu catyí ra tyehe caa:

⁴⁶ —Saha ndo cuenda chi ndo chihin ra casacuahá ley vehe ñuhu. Tahan xaan iñi ra cuihno ra sahma cañi. Ta cuñí ra vatyí saha ndo ñáyivi chi ra nuyahvi ta cuhva ndo nocumi chi ra. Ta nanducú ra tyayu vaha cunyaa ra chichi vehe ñuhu ta nu cuahan ra vico. ⁴⁷ Ta naha chicán tahvi ra chi Nyoo nu tuvi, cha cuñí ra cha catyí ñáyivi tyi vaha ñáyivi cuví ra. Soco suri maa

ra tinyaá ra vehe ñu ndahvi cha chih_i y_{ii} vatyí ña cuví tyiyahvi ñu xuhun cha tavá ra siqui ñu. Yucuan chaha ñihi ca cutachi tuñi Nyoo chi ra —catyí ra Jesús.

21

Noo ofrenda cha chaha noo ñaha sihi cha chih_i y_{ii} (Mr. 12.41-44)

¹ Ta nyehe ra Jesús vatyí cuaha xaan ñu tyay_{ii} catyih_i ra xuhun chichi caja cha nanyaá chichi vehe ñuhu cahnu. ² Ta nyehe tucu ra noo ñaha ndahvi cha chih_i y_{ii}. Ta tyih_i ña uvi tahan rí xuhun cuatyí. ³ Ta catyí ra Jesús:

—Cha ndicha catyí chi ndo vatyí nuu Nyoo cuaha ca tyih_i ñaha ndahvi ihya ta ñima ca tandih_i ñu tyay_{ii} cuan. ⁴ Vatyí cha ndoó ri siqui chi ñu catyih_i ñu. Soco ñaha ihya tyih_i ña tandih_i cha iyó chi ña —catyí ra.

Nu catyí ra Jesús vatyí cucani ñáyiv_i vehe ñuhu cahnu (Mt. 24.1-2; Mr. 13.1-2)

⁵ Tyicuan ta suhva ñu ndatuhún ñu tuhun vehe ñuhu cahnu cuan. Ta catyí ñu vatyí tyaqui xaan yuu. Tyaqui xaan tacaá cha chaha ñáyiv_i. Tyicuan ta quichaha catyí ra Jesús:

⁶ —Coo quiv_i ta tandih_i cha nyehé ndo ihya cutani. Ni noo yuu ta ma coso ca siqui tahan. Vatyí cusanacoyo ra xaan iñi chi ndo.

Ñáá ndih_i seña cha cucuvi cha ni cumañi ca naa ñáyiv_i (Mt. 24.3-28; Mr. 13.3-23)

⁷ Tyicuan ta quichaha can-daca tuhun ra chi ra Jesús, ta catyí ra:

—Maestro, ¿ama cucuvi tandih_i tuhun cahun ihya? ¿Yoso caa ta coto ndi tatu cha cuyatyn cha naa ñáyiv_i? —cacatyí ra.

⁸ Tyicuan ta catyí ra Jesús:

—Saha vaha ndo cuenda, coto sandavi ñaha ra chi ndo. Vatyí cuaha xaan ra cuquichi, ta cucotyíño ra sivi, ta cucatyí ra: “Yuhu cuví Cristo ra cha saquich_i Nyoo chi. Cha cuñí cunaa ñáyiv_i”, cucatyí ra. Soco ma cunyicon ndo chi ra. Ta ma chino iñi ndo chi ra. ⁹ Ta quiv_i ñihi ndo tuhun tyi iyó cuatyí ta cañi tahan ñáyiv_i, ma nayuhvi ndo. Vatyí tandih_i cuan cutahan chi cuvi xihna ca. Soco cumañi ca chaa quiv_i cha naa ñáyiv_i.

¹⁰ Ta catyí tucu ra:

—Ñáyiv_i iyó noo ñuu cu-cañi tahan ñu chihin ñáyiv_i inga ñuu. Ta cucoo cuatyí. ¹¹ Ta cutaan nahnu. Ta cucoo tama. Ta cucoo cuehe tandih_i ri ityi. Ta cunyehe ñáyiv_i cuaha xaan cha yuhví andiv_i. Cuaha xaan seña nahnu cha ña tuhvá ñu nyehe cunyehe ñu. ¹² Soco cha cumañi ca cuv_i ihya, cutasi iñi ñáyiv_i chi ndo. Ta cucacan ñu cucatyí chaha ndo. Vatyí cucutuñi chi ndo ta cucuhva cuenda ñu chi ndo chi tata sutu. Ta cutyih_i ñu chi ndo chichi vehe caa. Ta cunyaca ñu chi ndo nuu rey ta nuu ra cacuví tyiño cha catyí yuhu. ¹³ Tyicuan ta cuv_i cahan ndo tuhun chihin ñu. ¹⁴ Soco

saha ndo cuenda ta ma caca xiñi ndo ñáá tuhun cunacahan ndo chihin ra cuví tyiño cuan. ¹⁵ Vatyí yuhu cucuhve tuhun cunacahan ndo. Ta cucuhve cha chiñi tuñi xiñi ndo. Vatyí ni noo ra xaan iñi chi ndo ta ma cuví chasaha ra chi ndo chihin tuhun cahán ra. ¹⁶ Soco ñáyivi cunacuhva cuenda ñu chi ndo nuu ñu xaan iñi chi ndo. Nyacua nya sutu ndo ta sihi ndo, yañi ndo, tahan ndo, ta ra tahan ndo cunacuhva cuenda ra chi ndo chi ñu xaan iñi chi ndo. Ta yihí nyoho cucahñi ñu chi ndo. ¹⁷ Tandihí ñáyivi ta cutasi cuñi ñu nyehe ñu chi ndo cha catyí yuhu. ¹⁸ Soco ni noo ixi xiñi ndo ta ma cunaa. ¹⁹ Tatu ma ndu uvi iñi ndo chií, cucacu añima ndo.

²⁰ 'Quívi nyehe ndo vatyí nicachico yuhu ñuu Jerusalén ihya nyicú sindaro, coto ndo vatyí cha cuñi chaa quívi cha sanaa ra ñuu ihya. ²¹ Ta ñáyivi cha nyicú ityi Judea, na cono ñu ta na tixehe nuu ñu ityi yucu. Ta ñu nyicú ñuu Jerusalén ihya, na quita ñu. Ta ñu nyicú nu chiqui, ma ndichí ñu ñuu ihya. ²² Vatyí yucuan quívi cutachi tuñi Nyoo chí ñáyivi ñuu ihya. Vatyí cuchino cava tandihí cuhva catyí maa nu tutu Nyoo. ²³ Ta ndahvi ñusihi cha ñohó sehe quívi cuan. Ta ndahvi ñu cha iyó cha lee sehe cha ni chaxín ca. Vatyí cuaha xaan tindoho cunyehe ñu ta tandihí ñáyivi. Vatyí cuxaan xaan Nyoo chihin ñáyivi ñuu Jerusalén ihya. ²⁴ Sindaro cucahñi ra chi

suhva ñáyivi chihin mityi ra. Ta suhva ñu cutiin ra ta cunyaca ra chí ñu vehe caa inga ñuu. Ta ñáyivi cha ñima ñu Israel cuví, cucuaca chaha ñu Jerusalén nyacua nya quívi cha catyí maa Nyoo.

Yoso caa cuquichi Rayii cha quichi nya gloria inga chaha

(Mt. 24.29-35, 42-44; Mr. 13.24-37)

²⁵ 'Tyicuan ta cuaha cha iyo cunyehe ñáyivi nu ñanyii, ta nu yoo, ta nu tiño. Ta ihya siqui ñuhu ñáyivi cunayuhvi ñáyivi chihin cha iyo cunacatyin tyañuhu. ²⁶ Ta cucoñaa ñu chihin cha yuhví ñu cha chicá xiñi ñu ñáá ndihí cha cua cuví ihya siqui ñuhu ñáyivi. Vatyí nyacua nya cha iyó andívi cunacanda. ²⁷ Tyicuan ta cunyehe ñu chí yuhu Rayii cha quichí nya gloria vachi chichí noo vico tyaquí chihin tunyee iñi Nyoo, ta chihin cha cahnu cuví ra. ²⁸ Ta cuhva cha quichaha tuhun ihya, sandunií ndo iñi ndo ta cusii cuñi ndo vatyí numi xaan ta cucacu ndo —catyí ra.

²⁹ Tyicuan ta chaha ra Jesús noo cuhva ihya, ta catyí ra:

—Saha ndo cuenda noo yutun cha nañí higuera, o ñáá nonga yutun. ³⁰ Tatu cha cua cuyatyin cha coon savi cha nduyutya numa tun. ³¹ Ta tyicuan caa tucu nyoho, tatu cha nyehe ndo vatyí cha quichaha tandihí tuhun cha catyí chí ndo, coto ndo vatyí cha cuyatyin quívi cha

cunyaca ñaha Nyoo siqui ñuhu ñayivi ihya.

³² Soco catyí chi ndo vatyí tuhun ihya cucuvi cha ni ri ca cha iyó ñáyivi. ³³ Ta coo quivi cucunaa andivi ta ñuhu ñayivi, soco tuhun cahán yuhu, tyicuan ri cucuvi tari cuhva catyí.

³⁴ Ta saha ndo cuenda chi ndo coto ndundava añima ndo chihin vicio, ta coho xaan ndo ndixi, o caca xaan iñi ndo tuhun tundoho ñayivi ihya. Ta coto sana iñi ndo ta chaa quivi quichi yuhu ta quichi tundoho siqui ndo.

³⁵ Vatyí tyicuan caa cucuvi chi tandihi ñáyivi iyó siqui ñuhu ñayivi. Sana iñi ñu ta tari noo cha cua nacasi Nyoo nu ñohó ñu ta ma cuvi quita ñu. ³⁶ Soco nyoho cuatu tuhva ri ndo. Çacan tahvi ndo chi Nyoo tandihi quivi, tacuhva tyinyee ra chi ndo. Ta ma cunaa ndo quivi cuan, tacuhva cuvi chaa vaha ndo nuu yuhu Rayi cha quichi nya gloria —catyí ra Jesús.

³⁷ Ta cha ñucahñu sañahá ra Jesús chi tandihi ñáyivi chichi vehe ñuhu cahnu. Ta cha cha cuaa chahán ra yucu Olivo.

³⁸ Ta tandihi ñáyivi chaa coyo ñu chichi vehe ñuhu cahnu ndihi ñaha ri. Vatyí cuiñi ñu tuhun cahán ra.

22

Nu cua xico ra Judas Iscariote chi ra Jesús

(Mt. 26.1-5; Mr. 14.1-2, 10-11; Jn. 11.45-53)

¹ Ta cha nyaña yatyin quivi cha coo vico pascua vico nu tuhva ñu chachi pan cha ñahri

yuchan iya yihí chihin. ² Ta ra cacuví nuu chi tata sutu chihin ra casacuahá cuenda ley vehe ñuhu, nducú xaan ra cuhva yoso caa ta cacahñi ra chi ra Jesús. Soco cayuhví ra chi ñáyivi.

³ Tyicuan ta quihvi cuihna chi ra Judas cha catyí ñáyivi Iscariote chi. Ta maa ra cuvi noo ra cha uchi uvi tahan ra cha nacachí ra Jesús. ⁴ Ta ra cuan, chahan ra chi chahan ra chihin ra cuvi nuu chi tata sutu, ta chihin ra cuvi nuu chi ra sahá cuenda vehe ñuhu cahnu. Ta candatuhun tahan ra yoso caa cunacuhva cuenda ra chi ra Jesús. ⁵ Ta ra cuan sñi xaan cacuví chi ra. Ta tyaq ra cuhva vatyí cuhva ra xuhun chi ra Judas. ⁶ Ta ra Judas ndoo ra vaha. Ta quichaha nducu ra cuhva yoso caa cuhva cuenda ra chi ra Jesús chi tata sutu cuan, cuhva cha yori ñáyivi nyicú chihin ra.

Nu cuxiñi ra Jesús chihin ra cachicá noo chihin ra

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ta chaa quivi cha cuvi vico nu chachi ñu pan cha ñahri yuchan iya yihí. Ta suri quivi cuan tuhva ñu chahñi ñu noo mbee luhlu cha vico pascua cuan. Vatyí cachi ñu chi ti. ⁸ Ta ra Jesús tachí ra chi ra Pedro chihin ra Juan, ta catyí ra chi ra:

—Cuañan ndo cua sanduvaha ndo mbee cha cuxiñi yo —catyí ra.

⁹ Tyicuan ta quichaha ndaca tuhun ra chi ra:

—¿Nya cuñún cha sanduvaha ndi cha cuxiñi yo? —catyí ra.

¹⁰ Tyicuan ta catyí ra Jesús chi ra:

—Cuahan ndo chichi ñuu. Ta yucuan cunañihi ndo chi noo ra nyisó noo quiyi ndutya. Ta cuahan ndo chata ra nyacua nya nu quihvi ra chichi vehe. ¹¹ Ta catyí ndo chi chitoho vehe cuan: “Ra Sacuaha, cuñi ra coto ra nya nyaá cuarto nu sanduvaha ra cha cuxiñi ra chihin ra cachicá noo chihin ra, vatyí casanducahnu ra vico pascua.” Tyicuan caa catyí ndo chi ra. ¹² Tyicuan ta maa ra cuan cusañaha ra cuarto cahnu ityi siqui nu cu uvi piso chi ndo. Ta cha yaha nduvii. Ta yucuan sanduvaha ndo cha cuxiñi yo —catyí ra chi ra.

¹³ Tyicuan ta cuahan coyo ra. Ta nañihi ra tandihi tari cuhva catyí ra Jesús. Tyicuan ta casanduvaha ra cha cuxiñi ra cha vico pascua cuan.

¹⁴ Yucuan ta cha cha cuhva cha cuxiñi ra Jesús ta tandihi apóstol ra, cachicunyicu ra yuhu mesa. ¹⁵ Tyicuan ta ra Jesús quichaha catyí ra:

—Cuñi xain cuxiñi in caa ri chihin ndo cuenda vico pascua ihya cha ni ri ca cha cumañi ca cunyehe tundoho ta cúvi. ¹⁶ Vatyí nya ri ca ihya cua cachi ta cucúvi. Yucuan ta cachi tiqui soco nya nu nyacá ñaha Nyoo —catyí ra.

¹⁷ Tyicuan ta quehen ra noo vasu vinu. Ta nacuhva ra tyiyahvi nyoo chi Nyoo, ta sayaha ra chi tandihi ra nyicú

chihin ra. Ta quichaha catyí ra:

—Quehen ndo ihya. Ta coho ndo suhva suhva. ¹⁸ Vatyí catyí chi ndo vatyí ma coho que vinu tichaha ndivi nyacua nya quichi cha nyacá ñaha Nyoo ñayivi ihya —catyí ra.

¹⁹ Ta yaha cuan ta quehen ra pan. Ta nacuhva ra tyahvi nyoo chi Nyoo. Ta tahvi sava ra. Ta chaha ra chi ra cachicá noo chihin ra. Ta quichaha catyí ra:

—Ican ihya cuví coñe. Vatyí cha catyí ndo ta cua cuhva cuende chii ta cúvi. Tyicuan ri nichon iñi ndo chii ta cuxiñi ndo tyehe caa —catyí ra.

²⁰ Ta cha yaha cuxiñi ra, tyicuan ta quehen tucu ra vaso vinu tichaha ndivi, ta quichaha catyí ra:

—Chihin ihya natyihí tahan Nyoo tuhun chaa chihin ndo vityin. Vatyí vinu cha yihí chichi vaso ihya, tari niñi cuví. Ta cha catyí nyoho ta cucati niñi. Vatyí cucúvi cha catyí ndo.

²¹ ‘Soco vityin, ra cha cua nacuhva cuenda chii chi ra xaan iñi chii, in ri yoso ndaha ra chihin ndahi nu mesa ihya.

²² Vatyí yuhu Rayi cha quichi nya gloria cua cuvi chii tari cuhva cha nyaá maa tyi cuvi chii. Soco jndahvi ra ndahvi, ra cha cunacuhva cuenda chii! —catyí ra Jesús.

²³ Tyicuan ta ra cachicá noo chihin ra Jesús quichaha candaca tuhun ra chi tahan ra, nya ra cuví ra cua nacuhva

cuenda chi ra chi ra xaan iñi chi ra.

Nu candatuhún ra cachicá noo chihin ra Jesús yóo ra cahnu ca cuví

²⁴ Yahá cuan ta quichaha candatuhun ra cachicá noo chihin ra Jesús nya ra cahnu ca cuví. ²⁵ Soco ra Jesús catyí ra:

—Chitó nyoho vatyí ra nyacá ñaha chí ñáyivi iyó siqui ñuhu ñáyivi, ñihi xaan yosó ra siqui ñu. Ta cacuñí ra vatyí catyí ñáyivi tyi tyinyee ra chí ñu. ²⁶ Soco nyoho ña tahán chí sacuvi ndo tari sacuví ra cuan. Vatyí tatu cuñí ndo cuví ndo ra cuví nuu, tahán chí sacuvi ndo tyiño nuu ñáyivi. Vatyí tatu sacuví ndo tyiño nuu ñáyivi, ican ndo cuví ra cuví nuu. ²⁷ Vatyí ihya siqui ñuhu ñáyivi ra cuví nuu cuví ra cha ña sahá tyiño. Ta nyaá ra yuhu mesa ta musu ra sacuví ra tyiño nuu ra. Soco yuhu ra cuví nuu cuví, ta sacuví tyiño nuu ndo.

²⁸ 'Soco nyoho tyicuan ri ndihi ndo chihin, tandihi chaha cha nyehí tundoho. ²⁹ Yucuan chaha, yuhu चाहí noo nu cunyaca ñaha ndo tari cha chaha Suti chii cha cunyaca ñahi. ³⁰ Vatyí cucachi ndo cucho ndo yuhu mesa chihin nya nu nyacá ñahi. Ta yucuan cunyaa ndo nu tyayu tyaqui. Ta cunyaca ñaha ndo chí ndi uchi uvi tahan ityi ñáyivi vachi tata ra Israel.

Catyí ra Jesús vatyí cua catyí ra Pedro vatyí ña ñohó

nuu ra chí ra

(Mt. 26.31-35; Mr. 14.27-31; Jn. 13.36-38)

³¹ Tyicuan ta catyí ra Jesús chí ra Pedro:

—Nyehé vahun, yoho Simón. Vatyí cuihna, ra nañi Satanás, cha chican ra chí Nyoo na cuhva ra ityi chí ra vatyí quisi ñihno ra chí ndo tari naquisi ñihno yo trigu, tacuhva ndu uvi iñi ndo chí Nyoo. ³² Soco chicán xain chí Nyoo cha catyun, vatyí ma ndihi cha chinó iñun chí ra. Ta quivi ndu uvi iñun cuatyun ta na chino vaha iñun chii cutyinyeun chí ra tahan cha ma sandihi ra cha cachino iñi ra chii —catyí ra Jesús chí ra Simón.

³³ Ta ra Simón catyí ra chí ra:

—Sutu Mañi yuhu, cha iyó vahi vatyí cuhin chuhun vasi vehe caa, vasi tuhun chihi —catyí ra.

³⁴ Tyicuan ta catyí ra Jesús chí ra:

—Pedro, catyí chuun vatyí vityin cha ni ri ca cha cumañi ca cuacu chaa loho, yoho cha uñi tahan chaha cucatyun vatyí ña ñohó nuun chii —catyí ra Jesús chí ra.

Nu cha cuñi chaa cuhva cha cunacuhva cuenda ra Judas chí ra Jesús

³⁵ Tyicuan ta ndaca tuhun ra Jesús chí ra cachicá noo chihin ra, ta catyí ra:

—Nicohon iñi ndo quivi cha tachí chí ndo vatyí cucahan noo ndo nuu ñáyivi ta ñahri nyiso ndo, ni ri cha cachi ndo, ni ri xuhun, ni ri sahma ndo. ¿Atu chiyo cha

cumañi chi ndo quivi cuan?
—catyí ra Jesús.

Tyicuan ta canacahan ra,
ta catyí ra:

—Ñahri cha cumañi chi ndi.

³⁶ Tyicuan ta quichaha
catyí ra Jesús chi ra:

—Soco vityin, tatu iyó cha
cachi ndo ta iyó xuhun ndo,
cujso ndo. Ta tatu ñahri mityi
ndo, xico ndo noo sahma ndo
ta sata ndo. ³⁷ Vatyí catyí chi
ndo, vatyí tandihí tuhín cha
nyaá nu tutu Nyoo cuchino
cava vatyí tyehe caa catyí chi:
“Sahá ñu tuhún tyi cuví ra
noo ra quiñi iyó.” Tyicuan
caa catyí tuhín nu tutu Nyoo.
Ta tandihí cuan cuchino cava
—catyí ra.

³⁸ Tyicuan ta quichaha
catyí ra cachicá noo chihin
ra:

—Ihya nyaá uvi tahan mi-
tyi —catyí ra.

Tyicuan ta catyí ra Jesús:

—Cha iyó vaha ri —catyí
ra.

*Nu chican tahvi ra Jesús chi
Nyoo Getsemani*

(Mt. 26.36-46; Mr. 14.32-
42)

³⁹ Tyicuan ta quitá ra Jesús
vehe cuan. Ta cuahan ra nya
yucu Olivo. Tari cuhva tuhvá
maa ra chahan. Ta ra cachicá
noo chihin ra cuahan coyo ra
chata ra. ⁴⁰ Ta cuhva cha chaa
ra yucuan, quichaha catyí ra
chi ra cachicá noo chihin ra:

—Cacan tahvi ndo chi
Nyoo tacuhva ma cuvi
chasaha cuihna chi ndo.

⁴¹ Tyicuan ta cuahan ra
Jesús cha cañi ca, tari cuhva
cha chaa noo yuu tatu tuchi
yo. Yucuan ta chicuiñi chiti

ra. Ta quichaha cahan ra chi-
hin Nyoo, ⁴² ta catyí ra:

—Sutu Mañi yuhu, tu yoho
ta cuñún, cuhva cha ma nyehi
tundoho ihya. Soco ma cuvi
tari cuhva cha cuñi mai. Soco
na cuvi tari cuhva cha cuñi
maun —catyí ra.

⁴³ Tyicuan ta tuvi noo ángel,
vatyí cuhva ca ra tunyee iñi
chi ra. ⁴⁴ Ta cha ni ri ca cha
nyehé xaan ra Jesús tundoho
vatyí cuihya vavaha iñi ra,
ta ñihi ca chicán tahvi ra chi
Nyoo. Ta cuaha xaan tyeen ra
quitá ta canacoyó nu ñuhú, ta
tari caa niñi caa.

⁴⁵ Yucuan ta nducuita ra
cha ndihí cahan ra chíhin
Nyoo. Ta cuanuhu ra nu
canyicu tandihí ra cachicá
noo chihin ra. Ta nyehe ra
vatyí caquixí ra, cha cuenda
vatyí cacuihya xaan iñi ra,
ña cacunyeē ra ñumahna ta
caquixi ra.

⁴⁶ Tyicuan ta quichaha
catyí ra Jesús chi ra:

—¿Ñáá tuhún cha caquixí
ndo? Nducuita ndo. Ta cacan
tahvi ndo chi Nyoo, tacuhva
cha ma cuvi chasaha cuihna
chi ndo.

*Nu chaha cuenda ra Judas
chi ra Jesús chi ra xaan iñi chi
ra*

(Mt. 26.47-56; Mr. 14.43-
50; Jn. 18.2-11)

⁴⁷ Ni cahan ca ra Jesús
tuhún ihya, ta cuaha xaan
ra cachaa coyo. Ta ityi nuu
vachi ra Judas, noo ra chicá
noo chihin ra Jesús cuví
ra. Ta tuhva ra chi ra Jesús
vatyí cua tyayuhu ra xitin ra.
⁴⁸ Tyicuan ta catyí ra Jesús chi
ra:

—Judas, ¿atu chihin cha cua tyayuhun chii, nacuhvá cuendon chi yuhu, Rayi cha quichi nya gloria, chi ra xaan iñi chii? —catyí ra Jesús.

⁴⁹ Ta ra canyicú chihin ra Jesús quichaha ndaca tuhun ra chi ra:

—Sutu Mañi yuhu, ¿atu sañicuehe ndi chi ra chihin mityi? —catyí ra.

⁵⁰ Yucuan ta noo ra, chahnya ra soho chiyo vaha noo ra cha cuví musu ra cuví nuu chi tata sutu.

⁵¹ Soco ra Jesús catyí ra chi ra:

—Saña ndo. Vaha ri —catyí ra.

Tyicuan ta naquehen ra Jesús soho ra cuan. Ta natyaa ra, ta nduvaha. ⁵² Ta ra cacuví nuu chi tata sutu chihin ra cacuví nuu chi ra sahá cuenda vehe ñuhu,

chihin ra cacuví mandoñi, ican ra cuví ra quichi coyo vatyí catiñ ra chi ra Jesús. Ta quichaha catyí ra Jesús chi ra:

—¿Atu vachi coyo nyoho siqui chihin cha xaan ta chihin yutun tari cha vatyí minoo ra suhu cuví yuhu sahá ndo? ⁵³ Ndiquivi chinyai chichi vehe ñuhu cahnu, ¿ñáá tuhun ña cuví tñi ndo chii? Soco vityin chaá cuhva cha ñaa iñi vatyí ra ña vaha nyacá ñaha. Yucuan chaha vachi tñi ndo chii.

Nu catyí ra Pedro vatyí ña ñohó nuu ra chi ra Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Tyicuan ta catiñ ra chi ra Jesús. Ta cua nyaca ra chi ra nya vehe ra cuví nuu

chi tata sutu. Ta ra Pedro nyasava ri cuahan ra chata ra. ⁵⁵ Ta cha chaá coyo ra vehe ra cuví nuu chi tata sutu cuan, casanatahan ra ñuhu nuquehe. Ta chicunycú cutya ra nicachico ri nu cayú ñuhu cuan. Ta chicunyaá tucu ra Pedro mahñu ñáyivi cuan.

⁵⁶ Ta cuhva cha ndundichin cha cayu ñuhu cuan, tyicuan ta noo ñaha cha cuví musu tata sutu cuan nanyehe ña chi ra. Ta quichaha catyí ña:

—Ra ihya chicá noo ra chihin ra cuan —catyí ña.

⁵⁷ Soco ra Pedro catyí ra:

—Yuhu ña ñohó nui chi ra cuan.

⁵⁸ Tañi ri cuan ta nyehe tucu inga ra chi ra, ta catyí ra:

—Yoho, ra cuenda ra cuan cuvún —catyí ra.

Ta ra Pedro catyí ra:

—Ñima —catyí ra.

⁵⁹ Ta cha yahá noo ora, ta nanyehe tucu inga ra chi ra ta catyí ra chi ra tahan ra:

—Cha ndicha cuii vatyí ican ra ihya cuví noo ra cha chicá noo chihin ra cuan. Vatyí suri ra Galilea cuví ra —catyí ra.

⁶⁰ Tyicuan ta catyí ra Pedro:

—Ña chité ñáá tuhun cahún —catyí ra.

Ta caa cuhva ri cuan, ni cahán ca ra Pedro tuhun cuan, ta chacu chaa ri noo loho.

⁶¹ Tyicuan ta ra Jesús nanyehe ra nuu ra Pedro. Ta ra Pedro nicohon iñi ra tuhun cha catyí ra Jesús chi ra: “Cuhva cha ni cumañi ca cuacu chaa loho, yoho cha

catyun tyi ña ñohó nuun chii uñi tahan chaha.”

⁶² Tyicuan ta quitā ra Pedro ityi chata vehe. Ta chacu vavaha ra cha cuihya iñi ra.

Nu cachacú nyaa ra chi ra Jesús ta cacañi ra chi ra

(Mt. 26.67-68; Mr. 14.65)

⁶³ Tyicuan ta ra casahá cuenda chi ra Jesús, quichaha chacu nyaa ra chi ra. Ta cacañi ra chi ra. ⁶⁴ Cachahñi ra sahma nuu ra, ta quichaha cacatu ra nuu ra. Ta cacatyí ra chi ra:

—Nacoto yóo cha cañi chuun —cacatyí ra chi ra.

⁶⁵ Ta cuaha vavaha ca cha cacahan ra chi ra.

Nu ndacá tuhun ra chi ra Jesús tatu Sehe Nyoo cuví chi ra

(Mt. 26.59-66; Mr. 14.55-64; Jn. 18.19-24)

⁶⁶ Ta cha cundichin inga quivi cuan. Ta candu ñn ri ra chahnu ñuu cuan chihin ra cuví nuu chi tata sutu, ta ra casacuahá cuenda ley vehe ñuhu. Ta caquehen ra chi ra Jesús. Ta cuahan coyo ra chihin ra nya nu cuví junta cahnu. Ta quichaha candaca tuhun ra chi ra:

⁶⁷ —Catyí chi ndi ¿atu ra Cristo ra cha saquichi Nyoo cuvún? —catyí ra chi ra.

Ta ra Jesús nacahan ra, ta catyí ra:

—Tatu catyí chi ndo vatyí ican, ma chino iñi ndo. ⁶⁸ O tatu ndaca tuhun ñáa cha ndaca tuhun chi ndo, ma nacahan ndo ni ma saña ndo chii. ⁶⁹ Soco vityin ta ityi nuu ca yuhu Rayi cha quichi nya gloria cucunyai chiyo

vaha Nyoo ra cha iyó tandihi tunyee iñi chi —catyí ra.

⁷⁰ Tyicuan ta tandihi ra quichaha ndaca tuhun ra chi ra:

—Tu tyicuan caa, Sehe Nyoo cuví chuun —catyí ra.

Tyicuan ta nacahan ra Jesús ta catyí ra:

—Suri maa ndo catyí tyi ican cuví.

⁷¹ Tyicuan ta quichaha cacatyí ra cuan chi ra tahan ra:

—Nyehe nuu. Yuhu maa ra quitā. Ña niñi ca cha tava yo cha ndaa. Vatyí suri maa yo chiñi —cacatyí ra.

23

Nu nyehe ra Pilato vatyí ñahri cuatyí ra Jesús

(Mt. 27.1-2, 11-14; Mr. 15.1-5; Jn. 18.28-38)

¹ Tyicuan ta tandihi ra nducuitā ra. Ta cua nyaca ra chi ra nya nu nyaá ra Pilato, ra cuví gobernador. ² Tyicuan ta quichaha cacatyí ra chi ra Pilato:

—Ra ihya, sativí ra chi ñáyivi chihin cha cahán ra nuu ñu, ta catyí ra vatyí ña vaha tyiyahvi ndi xuhun chi gobiernu ñuu Roma. Ta siin ri catyí ra vatyí ra Cristo ra cha saquichi Nyoo vatyí cuví ra rey cuví ra —cacatyí ra.

³ Tyicuan ta ra Pilato quichaha ndaca tuhun ra chi ra Jesús, ta catyí ra:

—¿Atu ican yoho cuví Rey cuenda ñu Israel? —catyí ra.

Ta nacahan ra Jesús, ta catyí ra:

—Ican, suri maun catyí.

⁴ Tyicuan ta quichaha catyí ra Pilato chi ra cuví nuu chi tata sutu ta chi ñáyivi:

—Ñahri cuatyí ra ihya —catyí ra chi ñu.

⁵ Soco xaan ca nanduví ñu. Ta quichaha cacatyí ñu:

—Cahnu xaan cuatyí ra. Cuaha xaan tisihi chaha ra, vatyí cahán ra nuu ñáyivi. Cha xihna ri quichaha cahan noo ra nuu ñáyivi ityi Galilea. Ta nicañi maa ityi vachi ra cahán ra chihin ñáyivi nyacua nya chaá ra Judea ihya —catyí ñu.

Nu tachi ra Pilato chi ra Jesús nuu ra Herodes

⁶ Cuhva cha chiñi ra Pilato tuhun ihya, quichaha ndaca tuhun ra tatu ra Galilea cuví ra Jesús. ⁷ Ta catyí ñáyivi chi ra vatyí ican. Tyicuan ta sacuhun ra Pilato chi ra nya nu nyaá ra Herodes. Vatyí ra Herodes cuví ra gobernador nicañu Galilea. Soco quivi cuan ñohó ra ñuu Jerusalén. ⁸ Ta kuhva cha nanyehe ra Herodes chi ra Jesús, si xaan cuví chi ra. Vatyí cha naha xaan cuñí ra nyehe ra chi ra. Vatyí ñihí ra tuhun vatyí cuaha xaan milagru sacuví ra. Ta cuñí xaan ra nyehe ra noo milagru cha sacuví ra Jesús. ⁹ Ta cuaha xaan tuhun ndaca tuhun ra chi ra. Soco ra Jesús ña nacahan maa ra. ¹⁰ Ta yucuan canyicú tucu ra cuví nuu chi tata sutu ta ra casacuahá ley vehe ñuhu. Ta catyaa xaan ra cuatyí siqui ra. ¹¹ Tyicuan ta ra Herodes chihin sindaro cuenda ra chacu nyaa ra chi ra. Ta sandihvi

noo ra noo sahma yahvi ta tyaqui chi ra, tari cha tuhvá rey ñihnó. Tyicuan ta natachi ra Herodes chi ra inga chaha nuu ra Pilato. ¹² Ta quivi cuan ra Pilato chihin ra Herodes nduvaha iyó ra chihin tahan ra. Vatyí nu quichi chi, ña cuví canyehe ra chi tahan ra.

Nu cutuñi chi ra Jesús vatyí cucúvi ra
(Mt. 27.15-26; Mr. 15.6:15; Jn. 18.39—19.16)

¹³ Tyicuan ta ra Pilato sandu ñin ri ra chi ra cuví nuu chi tata sutu, ta chi ra cuví tyiño, ta chi ñáyivi ñandihí. ¹⁴ Ta catyí ra chi ñu:

—Nyoho quichi nyaca ndo chi ra ihya chii. Ta catyí ndo vatyí sativí ra chi ñáyivi. Soco yuhu cha sacutuñi chi ra nuu ndo. Ta ñahri cuatyí ra ñañihí tari kuhva catyí ndo. ¹⁵ Ta ni ri ra Herodes ña ñañihí ra ni noo cuatyí ra. Yucuan chaha sandichí ra chi ra inga chaha nu nyaí. Nyehe ndo vatyí ñahri cha sacuví ra, ñahri cuatyí ra. Ta ña tahán chi cha cúvi ra. ¹⁶ Yucuan chaha cua tachi tuñi ri chi ra. Yahá cuan ta sañe chi ra —catyí ra Pilato.

¹⁷ Tyicuan caa catyí ra Pilato vatyí cha ni ri ca cha iyó vico cuan, tahán chi cha saña ra noo ra ñohó vehe caa, tari kuhva cha tuhva maa ra. ¹⁸ Soco tandihí ñu ñin ri nacanachaa ñu, ta catyí ñu:

—Cahñi chi ra Jesús. Ta saña chi ra Barrabás —catyí ñu.

¹⁹ Ta ra Barrabás cuan ñohó ra vehe caa cha cuenda cha cuñí ra nacanda ra siqui ra cuví tyiño. Ta siñ ri chahñi

ra chi ñáyivi. ²⁰ Ta ra Pilato cuñí ra saña ra chi ra Jesús. Ta quichaha catyí ra chi ñáyivi cuan inga chaha vatyí cusaña ra chi ra. ²¹ Soco ñáyivi chaa ca caná chaa ñu, ta catyí ñu:

—Na cúvi ra nu cruzi.

²² Tyicuan ta cha cu uñi chaha catyí ra Pilato chi ñu:

—Soco ¿ñáá cha ña vaha sacuví ra ihya? Nyehi tyi ña tahán chi cúvi ra. Tacuhva cutachi tuñi ri chi ra, ta saña chi ra —catyí ra Pilato.

²³ Soco ñáyivi caná chaa ca ñu, ta catyí ñu vatyí tyaa ra chi ra nu cruzi. Ta cuví chasaha ñu. Vatyí maa ñu ta ra cacuví nuu chi tata sutu caná chaa ñu. ²⁴ Tyicuan ta sacuví ra Pilato tari cuhva catyí ñu. ²⁵ Ta tari cuhva catyí ñáyivi, saña ra chi ra Barrabás cha ñohó vehe caa cha cuenda cha cuñí ra nacanda ra siqui ra cuví tyiño ta cha cuenda cha chahñi ra. Ta sacuví ra chi ra Jesús tari cuhva catyí ñu.

Nu cua cunyaa ra Jesús nu cruzi

(Mt. 27.32-44; Mr. 15.21-32; Jn. 19.17-27)

²⁶ Yucuan ta quehen sindaro chi ra Jesús. Ta cuahan ra chihin ra. Ta catiñin tucu ra chi noo ra Cirene cha nañi Simón. Ra cuan ni cua ndichi ra cha chahan ra nu chiqui. Ta saniñi sindaro chi ra, na cuiso ra cruzi ra Jesús ta cuahan ra chata ra.

²⁷ Ta cuaha xaan ñáyivi cuahan chata ra. Ta cuaha xaan ñusihí chacú chaa ñu cha cuihya iñi ñu cha catyí ra. ²⁸ Soco ra Jesús nanyehé

ra chi ñu. Ta quichaha catyí ra chi ñu:

—Tandihí nyoho ñusihí ñuu Jerusalén, ma cuacu ndo cha catyí yuhu. Cuacu ndo, soco cha catyí maa ndo ta cha catyí sehe ndo. ²⁹ Vatyí cuquichi quivi nu cunyehe xaan ndo tundoho. Ta cucahan ñáyivi chihin tandihí ndo cha cuví ndo ñusihí cha yori sehe ndo iyó. Ta cucatyí ñu chi ndo: “Vaha xaan vatyí yori sehe ndo iyó vatyí cuaha xaan tundoho nyehé yo vityin”, cucatyí ñu chi ndo. ³⁰ Vatyí quivi cuan cucuñí ñu vatyí na canacoyo yucu siqui ñu tacuhva sahvi chi chi ñu. ³¹ Vatyí tatu tyehe caa sacuvi ñu chihin yuhu cha ñahri cuatyí. Yaha ca cuhva cunyacuví tucu ñu chihin maa ndo cha iyó cuatyí ndo —catyí ra Jesús.

³² Ta quehen tucu sindaro cuan chi uvi tahan ra quiñi iyó, vatyí cahñi ra chi ra ñin ri chihin ra Jesús. ³³ Tyicuan ta cachaa ra noo nu nañi Nu Cuví Yiqui Xiñi Ndiyi. Ta yucuan chicatacaá ra chi ra Jesús nu cruzi. Ta tyicuan caa tucu chinyacuví ra chihin ninduvi tahan ra iyó cuatyí cuan. Noo ra chitacaá ra nuu cruzi chiyo vaha ra Jesús. Ta nonga ra cuan chitacaá ra nuu cruzi chiyo satyin ra. ³⁴ Ta cuhva cha tacaá ra Jesús nu cruzi cuan, quichaha catyí ra:

—Sutu Mañi yuhu, saha tucahnu iñi chi ra. Vatyí ña chitó ra ñáá cha nyacuví ra chihin —catyí ra.

Tyicuan ta sindaro cuan chahan ra noo sihva chihin sahma ra Jesús. Nya ra saha ganaa caquehen ra sahma cuan. ³⁵ Ta ñáyivi tayucú ñu nyehé ñu. Ta nyacua nya ra cacuví nuu cuenda vehe ñuhu, ta chacú cuehe ra nyehé ra chi ra Jesús. Ta catyí ra:

—Sacacú ra chi inga ñáyivi. Soco vityin na sacacu tucu ra chi maa ra, tatu ndicha cha Cristo, ra cha saquichi Nyoo, cuví ra —cacatyí ra.

³⁶ Ta suri cahán cuehe tucu sindaro chi ra. Ta catuhva ra chi ra. Ta chaha ra vinu iya coho ra. ³⁷ Ta quichaha cacatyí ra chi ra:

—Tatu rey cuenda ñáyivi Israel cuvún. Sacacu chuun —cacatyí ra.

³⁸ Ta siqui cruzi ityi xiñi ra nyaá noo nu tyaá ra chihin griego, chihin latín, ta chihin hebreo. Tyehe caa quita cahán letra cuan: “Ican ra ihya cuví Rey cuenda ñu ñuu Israel” —catyí nu vitu cuan.

³⁹ Ta noo ra quiñi iyó cha tacaá xiin ra Jesús, quichaha cahan ra chihin ra, ta catyí ra:

—Tatu ndicha cha Cristo cuvún, sacacu chuun. Ta sacacu chí ndi ñandihí —catyí ra.

⁴⁰ Soco inga ra cuan catyí ra chi ra:

—¿Atu ña yuhvún chi Nyoo? Vatyí nyehún suri tundoho cha nyehé maa ra vityin. ⁴¹ Maa yo nyehé yo tundoho ihya vatyí iyó cuatyí yo. Soco ra ihya ñahri cuatyí ra iyó —catyí ra.

⁴² Tyicuan ta quichaha catyí ra chi ra Jesús:

—Yoho Jesús, ñicohon iñun tuhin quivi cunyaca ñahun —catyí ra.

⁴³ Tyicuan ta ra Jesús catyí ra chi ra:

—Cha ndicha catyí chuun vatyí tañi ri vityin ta cunyaun chihin nya paraíso nu nyaá añima ñu chinó iñi chi Nyoo —catyí ra Jesús chi ra.

Nu chihí ra Jesús

(Mt. 27.45-56; Mr. 15.33-41; Jn. 19.28-30)

⁴⁴ Tyicuan ta ñáa cuhva ora quichaha nduñaa ñáyivi, nyacua nya caa uñi cha cha iñi. ⁴⁵ Vatyí nduñaa ñanyii. Ta sahma cha tacaá chichi vehe ñuhu cahnu cuan, tahnaya sava.

⁴⁶ Tyicuan ta quichaha cana chaa ra Jesús:

—Sutu Mañi yuhu, natyaí añime chichi ndahun —catyí ra.

Ta cuhva cha catyí ra tuhun ihya, ta chihí ra.

⁴⁷ Ta ra cuví nuu chi sindaro cuan, nyehé ra tandihí cha cuví cuan. Ta sacahnú ra chi Nyoo, ta catyí ra:

—Ñahri ndicha cuí cuatyí ra iyó —catyí ra.

⁴⁸ Ta tandihí ñáyivi cha canyicú yucuan canyehé ñu cha cuví cuan. Ta cuahan coyo ñu ta suri cacañi ñu ndaha ñu yiqui nyica ñu. Vatyí chitó ñu vatyí ña vaha cha chinyacuví ñu chihin ra Jesús. ⁴⁹ Ta tandihí ñu cha ñohó nuu chi ra Jesús, ta ñusihí cha chinyicon chi ra nya Galilea, canyicú ñu nya

sava ri. Ta nyehe ñu tandihi cha cuvī yucuan.

24

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

Nu cua cuchira chira Jesús
(Mt. 27.57-61; Mr. 15.42-47; Jn. 19.38-42)

⁵⁰ Ta iyó noo ra vaha, nañi ra José. Ta Arimatea ityi Judea cuvī ñuu ra. Ta cuvī ra noo ra cuvī nuu cuenda Junta Cahnu ñu Israel. ⁵¹ Ta ra José cuan nyatú ra quivi cha cunyaca ñaha Nyoo. Ta ña ndoo ra vaha chihin cha sacuvi ra tahan ra, ra cacuvi nuu cuenda tata sutu cuan. ⁵² Tyicuan ta chahan ra chican ra coño ñuhu ra Jesús chi ra Pilato. ⁵³ Ta yahā cha sanoo ra José cuan coño ñuhu ra Jesús nu cruzi, ta natyihī ra chichi noo sahma cha cuvī lino. Ta cuahan ra cua cuchī ra chi ra chichi noo ñaña chaa cha cuvī yavi yuu cha savahā ñu. ⁵⁴ Ta viarni cuvī, quivi cha sanduvahā ñayivi cha cachi ñu cha sabaru inga quivi, quivi nyitatu ñu. Ta cha cuñi cuvī sabaru.

⁵⁵ Ta tandihi ñusihī cha quichi chihin ra Jesús nya Galilea, cuahan ñu chata ra. Ta nyehe ñu chichi yavi yuu cuan. Ta nyehe ñu yoso caa chicava coño ñuhu ra. ⁵⁶ Ta cuanuhu coyo ñu nya vehe ñu. Ta sanduvahā ñu ndutya vixi chahán vatyī cutyihī ñu coño ñuhu ra Jesús coto coo xico. Vatyī tyicuan caa cuvī costumbre cuiya cuan. Tyicuan ta nyitatu ñu inga quivi cuan tari cuhva catyī maa tuhun cha tachī Nyoo chi yo.

¹ Cundichin timingu quivi nu quichaha vitya. Ta ñaha cuirī cuahan coyo ñusihī cuan nya nu ñaña ra Jesús. Ta nyisó ñu ndutya vixi chahán cha sanduvahā ñu. ² Ta cuhva cha chaā coyo ñu, nanyehe ñu vatyī ña nyasī ca yavi yuu cuan tari cuhva chinyasī maa. ³ Ta quihvi ñu chichi, soco ña nañihī ñu coño ñuhu Sutu Mañi yo Jesús. ⁴ Ta yucuan tayucú ñu chihin cha yuhvi ñu. Ta ña chitó ñu ñáá cunyacuvi ñu. Ta tuvī uvi tahan rayi nuu ñu. Ta xiño vavaha sahma cañihnó ra. ⁵ Ta chihin cha yuhvi ñu, ta chicuiñi chiti ñu chihin nuu ñu nya nu ñuhú. Tyicuan ta quichaha cacatyī ra cuan chi ñu:

—¿Ñáá tuhun nanducú ndo chi ra Jesús ihya nu ñohó ndiyi? ⁶ Yori ra ñohó ihya, vatyī cha nandoto ra. Nīcohon iñi ndo tuhun cha chahan ra chihin ndo quivi chicá noo ra Galilea. ⁷ Catyī ra vatyī tahán chi cucuhva cuenda ñu chi ra ndaha ra iyó cuatyī. Vatyī cuvī ra Rayi cha quichi nya gloria. Ta tahán chi cucahñi ra chi ra nu cruzi. Soco nu cu uñi quivi cunandoto ra. Tyicuan caa catyī ra chi ndo —catyī ángel cuan chi ñu.

⁸ Tyicuan ta nichohon iñi ñu tuhun chahan ra Jesús quivi cuan. ⁹ Ta cuanuhu coyo ñu. Ta nacatyī ñu chi ndi uchi iñ

tahan ra apóstol ra Jesús chihin tandihi ca ñáyivi. ¹⁰ Ta ñu sacoto tuhun cuan chi ra cuan cuví ñu cu María, ñaha Magdala, ta cu Juana, ta cu María sihi ra Jacobo, ta suhva ca ñusihí. ¹¹ Soco ra cachica noo chihin ra Jesús cuñí maa ra vatyí cahán ri maa ñu. Ta ña chinó iñi ra tuhun cahán ñu.

¹² Soco ra Pedro nducuita ra ta chinq vavaha ra cuahan ra cuanyehe ra nya chichi ñaña ra Jesús tatu ndicha. Ta nanyehe ra chichi yavi yuu cuan tyí sahma ri cayucú inchiyo xiin. Tyicuan ta cuanuhu ra nya vehe. Ta iyo cuñí ra vatyí ñahri ca coño ñuhu ra Jesús catuví chichi ñaña cuan.

*Noo cha cuví ityi Emaús
(Mr. 16.12-13)*

¹³ Suri maa quivi cuan, uvi tahan ra chicá noo chihin ra Jesús cuahan coyo ra nya ñuu cha nañí Emaús, tari noo cha uchi ñin kilómetro cha quita yo Jerusalén. ¹⁴ Ta cuahan coyo ra ta ndatuhún ra tuhun ñáá ndihi cha cuví. ¹⁵ Ta cha ni ri ca cha candatuhún ra, ta ra Jesús natahan ra chi ra nu cuahan coyo ra. ¹⁶ Soco ni ri maa nyehé ra chi ra Jesús, ña canicohon nuu ra chi ra. Vatyí tari cha iyó noo cha chasi nuu ra tacuhva cha ma canicohon nuu ra chi ra Jesús. ¹⁷ Tyicuan ta quichaha ndaca tuhun ra Jesús chi ra:

—¿Ñáá tuhun ndatuhún xaan ndo? ¿Ñáá tuhun cha cuihya xaan iñi ndo? —catyí ra chi ra.

¹⁸ Ta ra cha nañí Cleofas, nacahan ra. Ta catyí ra:

—¿Atu ñima nya Jerusalén quichi yoho? ¿Atu ra inga ñuu cuvún? ¿Atu ña chitón cha cuví ñuu cuan? —catyí ra.

¹⁹ Tyicuan ta catyí ra Jesús chi ra:

—¿Ñáá cha cuví?

Ta quichaha canacatyí ra chi ra:

—Tuhun ra Jesús ra ñuu Nazaret. Vatyí cuví ra noo ra profeta Nyoo. Ta chihin tunyee iñi cahnu Nyoo sacuvi ra cha vaha nuu Nyoo ta nuu ñáyivi. ²⁰ Soco ra cacuví nuu chi tata sutu ta ra cacuví nuu cuenda vehe ñuhu, nacuhva cuenda ra chi ra chi sindaro ñuu Roma. Ta cachahñi ra chi ra. Ta chihí ra nu cruzi. ²¹ Ta cha vityin cha iyó uñi quivi cuví tuhun cuan. Ta nyuhu cuñí maa ndi vatyí ican ra cuví ra cusacacu chi ñáyivi Israel. ²² Soco vityin iyo xaan cuñí ndi cha nacatyí suhva ñusihí chi ndi. Vatyí maa ñu, ñaha cuii ri chahan coyo ñu nu ñaña ra. ²³ Ta nacatyí ñu chi ndi vatyí ñahri ca coño ñuhu ra catuví. Ta nacatyí ñu vatyí nyehé ñu uvi tahan ángel. Ta catyí ángel cuan chi ñu vatyí ra Jesús nyitó ra. ²⁴ Yahá cuan ta chahan coyo tucu suhva ra tahan ndi nu ñaña. Ta nyehé ra vatyí cha ndicha cuví tari cuhva catyí ñusihí cuan. Vatyí ñahri ca coño ñuhu ra Jesús catuví —catyí ra chi ra.

²⁵ Tyicuan ta ra Jesús catyí ra chi ra:

—Chiin xaan cutuñí iñi ndo. Ta cuee xaan chinó iñi

ndo tuhun tyaa ra profeta Nyoo ta cha naha. ²⁶ ¿Atu ña chitó ndo vatyí tahán chi cha cunyehe xihna ra Cristo tundoho? Yaha cuan ta tahán chi cuñihi ra tyiño cha cunyaca ñaha ra —catyí ra Jesús chi ra.

²⁷ Tyicuan ta quichaha nacuhva ra cuenda yoso caa cuahan tuhun ra nu tutu Nyoo. Ta quichaha cahan ra tuhun cha tyaa ra Moisés ta cha naha. Ta yahá cuan ta cahan ra tuhun tandihi libru cha tyaa ra profeta Nyoo.

²⁸ Ta cuhva cha chaá ra nya ñuu Emaús cuan nu cuahan coyo ra, ta sahá ra Jesús vatyí cañi ca cuahan ra. ²⁹ Tyicuan ta cacatyí ra chi ra na ndoo ra chihin ra. Ta catyí ra:

—Ndoo chihin ndi vatyí cha cua quee ñanyii —cacatyí ra.

Tyicuan ta cuahan ra Jesús nya vehe ninduvi ra cuan.

³⁰ Ta cuhva cha chicunyaá ra yuhu mesa chihin ra, quehen ra pan. Ta chahá ra tyahvi nyoo chi Nyoo. Ta chahnú sava ra, ta chahá ra chi ra.

³¹ Ta caa cuhva ri cuan nuña nuu ra canicohon nuu ra chi ra Jesús. Soco ra Jesús cuanaa ri ra. ³² Tyicuan ta quichaha catyí ra chi ra tahan ra:

—Yucuan chaha vaha xaan cuñí aña yó cuhva cha vachi ra chihin yo, ta nacatyí vaha ra yoso caa cuahan tuhun Nyoo cha nyaa nu tutu chi yo, ta nicohon nuu yo chi ra —cacatyí ra.

³³ Ñahri ca cha canyatu ra, ta cuanuhu coyo ra nya Jerusalén. Ta yucuan nañihi

ra chi ndi uchi ñn ra chicá noo chihin ra Jesús, canyicú ra. ³⁴ Tyicuan ta quichaha canacatyí ndi uchi ñn tahan ra chi ra cha nichaa coyo cuan:

—Ndicha vatyí Sutu Mañi yo, nandoto ra. Vatyí ra Simón nyehé ra chi ra —cacatyí ra.

³⁵ Tyicuan ta ra cha ni nachaa coyo cuan canacatyí tucu ra yoso caa ndatuhun ra Jesús chihin ra ityí cuahan ra ñuu Emaús, ta yoso caa canicohon nuu ra chi ra nu chahnú ra pan.

Nu tuvi ra Jesús nu canyicu ra cachica noo chihin ra

(Mt. 28.16-20; Mr. 16.14-18; Jn. 20.19-23)

³⁶ Ni cahan ca ra tuhun cuan ta tuví ra Jesús nu canyicú ra. Ta chahá ra nocumi, ta catyí ra:

—Na coo cha taxi ri aña ndo.

³⁷ Tyicuan ta canayuhví xaan ra. Ta cacuñí maa ra vatyí noo tatyí ri cuví.

³⁸ Tyicuan ta catyí ra Jesús chi ra:

—¿Ñáá tuhun cha nayuhvi ndo? ¿Ñáá tuhun cha chicá uvi iñi ndo? ³⁹ Nyehé ndo ndahi. Ta nyehé ndo chahi. Vatyí suri mai cuví. Tñn ndo chii ta coto ndo. Vatyí tatyí, ñahri coño ñuhu. Ta ñahri yiqui tari cha nyehé ndo tyi yihí chi yuhu —catyí ra Jesús.

⁴⁰ Ta cuhva cha catyí ra tuhun ihya, sañahá ra ndaha ra ta chaha ra. ⁴¹ Soco maa ra chaha cha iyo cacuñí ra ta sii cacuñí ra nyacua ña chinó

vaha iñi ra. Tyicuan ta catyí ra Jesús chi ra:

—¿Atu iyo cha cachi?
—catyí ra.

⁴² Tyicuan ta chaha ra chiin yuhu tiyaca tyihyo chihin tyañuñu chi ra. ⁴³ Ta quehen ra. Ta quichaha chachi ra. ⁴⁴ Ta catyí ra chi ra:

—Tandihí cha cuví chii, ican ihya cuví cha catyí chi ndo quívi cuan. Ta catyí chi ndo vatyí tyicuan caa cucuvi, tari kuhva nyaá tuhun cha tyaa ra Moisés ta ra profeta Nyoo ta cha nyaá nu libru salmo —catyí ra chi ra.

⁴⁵ Tyicuan ta chaha ra Jesús vatyí na cutuñi iñi tandihí ra cuan yoso caa catyí nu tutu Nyoo. ⁴⁶ Tyicuan ta catyí ra Jesús chi ra vatyí tyicuan caa nyaá nu tutu Nyoo vatyí tahán chi cha cúvi ra Cristo. Ta nu cu uñi quívi nandoto ra. ⁴⁷ Ta tahán chi coto ñáyivi tuhun sívi ra Cristo ñuu Jerusalén, ta yaha cuan ta tandihí ñuu nicahnu ñuhu ñayivi. Tacuhva cuvi ndu uvi iñi ñu ta ndachi cuatyí ñu.

⁴⁸ —Ta nyoho cuví ndo cha ndaa tandihí tuhun ihya. ⁴⁹ Ta cusaquichi mai Tatyí li Nyoo síqui ndo tari catyí Sutyí kuhva ra chi ndo. Soco cunyicu ndo Jerusalén ihya. Ta ma quita maa ndo nyacua nya quíchi tunyee iñi Tatyí li Nyoo cuquihí chi ndo —catyí ra Jesús.

Nu nandaa xica ra Jesús andivi

(Mr. 16.19-20)

⁵⁰ Tyicuan ta ra Jesús cuahan ra chihin tandihí ra

cachicá noo chihin ra ityi chata ñuu, nya ñuu Betania. Ta sandaa ra ndaha ra. Ta nasoco ra chi ra. ⁵¹ Ta chani ri ca cha nasocó ra chi ra, nandaa xica ra andivi. ⁵² Tyicuan ta tandihí ra sacahnú xaan ra chi ra. Ta síi xaan cacuví chi ra, cuanuhu coyo ra Jerusalén. ⁵³ Ta tyicuan ri chinyicú ra chichi vehe ñuhu cahnu cuan, ta sacahnú xaan ra chi Nyoo.

Tuhun Nyoo Cha Tyaa San Juan

Tuhun Cahán Nyoo nanduví noo rayíi, ta ican cuví ra Cristo

¹ Nyata quiví xihna ri, nyata ni cumañi ca coo tandihí cha iyó, ta cha iyó ra cuví Tuhun Cahán Nyoo. Nyaá ra chihin Nyoo. Ta Nyoo cuví ra.

² Ta chicoo ra chihin Nyoo nyata quiví xihna ri. ³ Ta chihin ra, savaha Nyoo tandihí cuii maa cha iyó. Ta ñahri savaha Nyoo cha maa ri maa ra. ⁴ Ta chihin ra cuví Tuhun Cahán Nyoo nyaá ñayiví cha ma naa ca maa. Ta ñayiví cuan, ican cuví cha sacundichín ñayiví. ⁵ Ta cha ndichin ihya, sacundichín chi nu ñaa iñi. Ta cha ñaa iñi ña cuñihí chi ndahva chi cha ndichin cuan.

⁶ Chiyó noo ra cha tachí Nyoo chi. Ta nañí ra Juan.

⁷ Quichí ra cuví ra noo cha ndaa. Vatyí cahan ra tumañi iñi cuenda ra cuví cha ndichin cuan, tacuhva vatyí chino iñi tandihí ñayiví chi ra. ⁸ Ra Juan, ñima cha ndichin cuan cuví ra. Noo cha ndaa ri cuví ra cha cuenda cha ndichin cuan. ⁹ Vatyí cha ndichin cha ndicha vaha cuan, ni cuachaa chi siqui ñuhu ñayiví, tacuhva vatyí sacundichín chi ñayiví cha iyó siqui ñuhu ñayiví ihya.

¹⁰ Ra cuví Tuhun Cahán Nyoo quichí ra siqui ñuhu ñayiví. Ta ican ra cuví ra Cristo. Ta suri maa ra savaha

ra ñuhu ñayiví. Soco ñayiví iyó siqui ñuhu ñayiví, ña nicohon nuu ñu chi ra. ¹¹ Quichí ra nu nyicú ñayiví cha savaha ra, soco ñayiví cha savaha ra ña natíin cuenda ñu chi ra. ¹² Soco tandihí ñu natíin cuenda chi ra, ta chinó iñi ñu chi ra, ican chi ñu cuan, chaha ra ityi vatyí nanduví ñu sehe Nyoo. ¹³ Vatyí nacacú chaa ñu. Soco ñima tari cacú ñu ta lee ñu cuenda coño ñuhu ñu. Ta ni ñima cha cuenda cha quichí cuví iñi noo rayíi coo ra chihin noo ñaha sihi. Ñima cha cuenda cha cuñi ñayiví coo sehe ñu. Soco maa Nyoo sanacacú chaa chi ñu.

¹⁴ Ta ra cuví Tuhun Cahán Nyoo nanduví ra noo rayíi. Ta chicoo ra chihin yo. Ta nyehe ndi cha cahnu cuví ra. Ta cahnu cuví ra vatyí Sehe mañi Sutu yo Nyoo cuví chi ra. Tyitu yihí ra chihin cha ndicha ta tumañi iñi cha cua cuhva ra chi yo. ¹⁵ Ta ra Juan cuan cahan ra tumañi iñi cuenda ra, ta catyí ra:

—Ican ra ihya cha cahin tuhun quiví cuan, vatyí ra cha vachi ityi chate, cahnu ca ra cuví ra ican saha yuhu. Vatyí nyata tyembu chahnu ta cha iyó maa ra —catyí ra Juan.

¹⁶ Tandihí yo naquehén cuenda yo tumañi iñi cahnu cha chaha ra chi yo, vatyí nasocó xaan ra chi yo. ¹⁷ Ra Moisés chaha cuenda ra ley Nyoo chi yo. Soco ra Jesucristo cundahví iñi ra chi yo ta saha ra ticahnu iñi cuatyí yo. Ta chaha ra

cha ndicha coo chi yo. ¹⁸ Ta yori ca maa nyehé chi Nyoo. Notuhun ri maa Sehe mañi ra cha iyó ñi ri chihin ra. Ican ra cuví ra chahá cha cohon nuu yo chi Sutu ra.

Nu cahán ra Juan, ra sacondutyá, tumañi iñi cuenda ra Jesucristo

(Mt. 3.11-12; Mr. 1.7-8; Lc. 3.15-17)

¹⁹ Ra cacuví nuu chi ñu Israel cha iyó ñuu Jerusalén, catachi ra chi tata sutu ta chi ra cacuví levita nu nyaá ra Juan na ndaca tuhun ra chi ra yóo ra cuví ra. ²⁰ Ta maa ra Juan catyí cachi ra:

—Yuhu ñima ra Cristo cuví.

²¹ Tyicuan ta candaca tuhun ra inga chaha chi ra:

—¿Yóo ra cuví yoho? ¿Atu ra Elías, ra cuví profeta Nyoo ta cha naha cuvún? —catyí ra chi ra.

Ta ra Juan nacahan ra:

—Ñima ra cuan cuví.

Ta sañihi ca ra candaca tuhun ra chi ra, ta catyí ra:

—Tu tyicuan caa, ¿atu icon cuví ra profeta Nyoo cha nyaá cha quichi?

Ta nacahan tucu ra Juan ta catyí ra:

—Ñima.

²² Ta inga tucu chaha candaca tuhun ra chi ra:

—¿Yóo ra cuví yoho? Vatyí cuñi chi cuiso ndi tyiño chi ra cha tachí chi ndi. ¿Yóo ra cuví yoho? —catyí ra chi ra.

²³ Ta ra Juan nacahan ra:

—Yuhu cuví ra cahán ta canachaá noo nu chiqui ndi, ta catyí: “Nuña ndo noo ityi ndoo chichi aña ndo vatyí cha vachi Sutu Mañi yo.” Tari

cuhva cahán ra Isaías profeta Nyoo tuhun ta cha naha —catyí ra Juan chi ra.

²⁴ Ra cha cacahán chihin ra Juan, ra cacuví fariseo tachí chi ra. ²⁵ Ta candaca tuhun tucu ra chi ra:

—Tatu ñima ra Cristo, ni ra Elías, ni ra profeta cuan cuvún, ¿ñáá tuhun cha sacondutyón chi ñáyivi? —catyí ra chi ra Juan.

²⁶ Ta ra Juan catyí ra chi ra:

—Yuhu sacondutyé chihin ndutya. Soco mahñu ndo nanyaá noo ra cha ña ñohó nuu ndo. ²⁷ Ican ra cuví ra vachi chate. Soco cha iyó maa ra ta caqui. Ta ña naña mai ni cha cuví musu ra ta ndachi ñi xityin ndichan ra —catyí ra Juan.

²⁸ Tandihí tuhun ihya cuví noo nu nañi Betábara cha nyaá inga chiyo yuvi cahnu Jordán nu ñohó ra Juan sacondutyá ra.

Ra Jesucristo, Mbee Luhlu sana Nyoo cuví ra

²⁹ Cha inga quivi nanyehe ra Juan chi ra Jesús cuachaa ra nu nyaá ra, ta catyí ra Juan:

—Nyehe ndo, ican ra ihya cuví Mbee Luhlu sana Nyoo vatyí cucuhva ra ñayivi ra tacuhva cahnya ra cuatyí ñáyivi iyó siqui ñuhu ñayivi.

³⁰ Tuhun maa ra cahin quivi cha catyí chi ndo vatyí cha yaha yuhu ta vachi nonga ra cha cahnu ca cuví ta ñima ca yuhu, vatyí nyata tyembu chahnu ta cha iyó ra. ³¹ Ni yuhu ta ña ñohó nui chi ra quivi cuan. Soco vachi sacondutyé chihin ndutya

tacuhva vatyí ñu ñuu Israel
cohon nuu ñu chi ra —catyí
ra Juan.

³² Ta catyí tucu ra Juan
ñandihí:

—Yuhu nyehí chi Tatyí
Ii Nyoo quichí ityí andiví
vachí chi tari noo paloma,
ta ndoo chi síqui ra. ³³ Yuhu
ta coto que yóo ra cuví ra
quíví cuan. Soco Nyoo, ra
cha tachí chii na sacondutye
chihin ndutya, catyí ra chii:
“Quíví nyehun Tatyí Ii yuhu,
vachí noó síqui noo rayí, ican
ra cuan cuví ra sacondutyá
chihin Tatyí Ii yuhu”, catyí
Nyoo chii. ³⁴ Yuhu cha yaha
nyehí chi ra. Ta cuví cha ndaa
vatyí ican ra cuví Sehe Nyoo
—catyí ra Juan.

*Ra cha xihna ca nanyicon
chi ra Jesús*

³⁵ Cha inga quíví, ra Juan
nyaá tucu ra yucuan inga
chaha, ta nyicú tucu uvi ra
nyicón chi ra. ³⁶ Ta cuhva
cha nyehé ra, yahá ra Jesús, ta
catyí ra:

—Nyehe ndo, ican ra cuan
cuví Mbee Luhlu sana Nyoo
—catyí ra Juan.

³⁷ Cha chiñí ninduvi ra ny-
icon chi ra Juan tuhun cahān
ra, ta cananyicon ra chi ra
Jesús. ³⁸ Tyicuan ta nanyehe
ra Jesús ityí chata ra, ta nyehe
ra tyí canyicón ra chi ra, ta
catyí ra:

—¿Ñáá cha nducú ndo?

Tyicuan ta canacahān ra ta
catyí ra:

—Maestro, ¿nya iyón?

³⁹ Ta ra Jesús catyí ra chi ra:

—Coho ndo chihin. ta
nyehé ndo —catyí ra chi ra.

Tyicuan ta cuahan coyo ra
chihin ra. Ta canyehé ra nu
iyó ra. Ta yucuan cuaa ndihí
ra vatyí tari cha caa cumi cha
cha ñni cuhva cha chaā ra yu-
cuan.

⁴⁰ Chichi cha ninduvi ra cha
chiñí tuhun cahān ra Juan ta
nanyicon ra chi ra Jesús, noo
ra cuví ra ra Andrés yañí ra
Simón Pedro. ⁴¹ Ta ra An-
drés numi ri chinanducū ra
chi yañí ra, ra Simón, ta catyí
ra chi ra:

—Nañihí ndi chi ra cha cuví
Mesías —catyí ra.

Ta tuhun Mesías cuan cuñí
chí catyí, ra Cristo, o ra cha
nacachí vaha Nyoo, vatyí
cuví ra rey chi yo.

⁴² Tyicuan ta ra Andrés
chinyacā ra chi ra Simón yañí
ra nu nyaá ra Jesús. Ta cuhva
cha nyehe ra Jesús chi ra
Simón, ta catyí ra chi ra:

—Yoho Simón, sehe ra
Jonás cuví chuun. Soco
cunañun Cefas. —catyí ra chi
ra.

Ta Cefas cuñí chi catyí Pe-
dro chihin sahan griego, ta
ninduvi tahan sívī cuan, cuñí
chí catyí “yuu”.

*Nu canā ra Jesús chi ra Fe-
lipe ta chi ra Natanael*

⁴³ Cha inga quíví tyaa ra
Jesús cuhva cuhun ra ityí
Galilea. Tyicuan ta nañihí ra
chi ra Felipe. Ta catyí ra chi
ra:

—Cunyicon chii —catyí ra.

⁴⁴ Ra Felipe ihya, ra ñuu
Betsaida cuví ra. Ta yucuan
iyó tucu ra Andrés ta ra Pe-
dro. ⁴⁵ Tyicuan ta chahān ra

Felipe chinanducū ra chi ra Natanael. Ta catyí ra chi ra:

—Nyehe ndi chi ra cha tyaa ra Moisés tuhun nu libru ley, ta suri tuhun ra catyaa tucu ra profeta Nyoo ta cha naha. Jesús nañi ra. Sehe ra José ra ñuu Nazaret cuví chi ra.

⁴⁶ Ta catyí ra Natanael:

—¿Atu cuví quita cha vaha ñuu Nazaret cuan? —catyí ra chi ra Felipe.

Ta nacahan ra Felipe ta catyí ra:

—Ñaha ta nyehun —catyí ra.

⁴⁷ Yahā cuan ta cuachaa ra Natanael nu nyaá ra Jesús. Ta cuhva cha nanyehe ra Jesús tyi vachi ra, ta quichaha catyí ra:

—Ihya vachi noo ra cha ndicha ndicha ra ñuu Israel cuví. Ta ña tuhvá ra sandaví ñaha —catyí ra Jesús tuhun ra Natanael.

⁴⁸ Tyicuan ta ra Natanael ndaca tuhun ra chi ra:

—¿Yoso caa cha ñohó nuun chii?

Ta ra Jesús nacahan ra ta catyí ra:

—Yuhu nyehi chuun nyata ni cumañi ca cana ra Felipe chuun, cuhva cha nyaún chaha tun higo cuan —catyí ra Jesús chi ra.

⁴⁹ Tyicuan ta quichaha catyí ra Natanael:

—Sutu Mañi yuhu, yoho cuvún Sehe Nyoo. Yoho cuvún rey cuenda ndi ñu Israel.

⁵⁰ Ta ra Jesús catyí ra chi ra Natanael:

—¿Atu chinó iñun chii cha cuenda vatyí catyí tyi nyehi chuun chaha tun higo? Soco

nahnu ca cha cunye hun ican saha cuan —catyí ra chi ra.

⁵¹ Ta catyí tucu ra Jesús:

—Cha ndicha catyí chi ndo vatyí nyoho cunyehe ndo andivi cuitanuña ta cuaha ángel Nyoo cundaa ra, ta cunoo ra siqui yuhu ra cuví Rayi cha quichi nya gloria —catyí ra Jesús chi ra.

2

Noo vico tandaha iyó ñuu Caná ityi Galilea

¹ Yahā uñi quivi ta chicoo noo vico tandaha ñuu Caná ityi Galilea. Ta sihi ra Jesús ñohó ña yucuan. ² Ta suri canacatyí tuhun ñu chi ra Jesús ta chi ra cachicá noo chihin ra cha cuhun coyo ra vico tandaha cuan. ³ Tyicuan ta cuahan coyo ra. Ta nyicú ñu vico, ta ndihí vinu. Tyicuan ta catyí sihi ra Jesús chi ra:

—Ñahri ca vinu ñu —catyí ña.

⁴ Ta catyí ra Jesús chi ña:

—¿Náá cha cuñún cha sacuvi yuhu, Maha? Ta chaa ca cuhva cha sañahi chi ndo yóo ra cuví yuhu —catyí ra chi ña.

⁵ Soco sihi ra catyí ña chi ra cha catyinyeé vico cuan:

—Sacuvi ndo tandihí cha catyí ra chi ndo —catyí ña chi ra.

⁶ Ta tayucú iñu tahan quisi yuu nahnu cha quihi ndutya cha catuhvá ra Israel choty-iño nu tuhvá ra canacatyá xaan ra ndaha ra tari cuhva costumbre cha ca iyó maa ra. Ta tahan tahan quisi cuan chitahan tari uvi xico uchi

o uñi xico uchi litru ndutyá.
 7 Tyicuan ta catyí ra Jesús chi ra cha catyinyeé vico cuan:

—Sácutu ndo quisi ihya chihin ndutyá —catyí ra chi ra.

Tyicuan ta sacuví ra tari cuhva catyí ra. 8 Tyicuan ta catyí ra Jesús chi ra:

—Vityin tava ndo suhva ta cunyaca ndo chi ra cuví nuu cuenda vico ihya —catyí ra Jesús chi ra.

Ta tyicuan caa casacuví ra. 9 Ra cuví nuu cuenda vico cuan chihí ra ndutyá cha nanduví vinu cuan. Soco ña chitó ra nya quichi. Maa ri maa ra catyinyee vico cuan cachitó ra, vatyí maa ra catava ndutyá cuan. Tyicuan ta ra cuví nuu cuenda vico cuan cana ra chi ra cha tandaha cuan. 10 Ta catyí ra chi ra:

—Tandihí ñáyivi, xihna ca vinu vaha tuhvá ñu tava. Yaha cuan ta tatu cha cachihí xaan ñu, tyicuan ta tava ñu vinu pehe ca. Soco yoho chicumí vahun vinu vaha. Ta nya vityin tavon —catyí ra chi ra.

11 Cha sacuví ra Jesús ñuu Caná ityi Galilea, ican cuan cuví milagru cha xihna ri savaha ra vatyí sañaha ra cha cahnu cuví ra. Ta ra cachicá noo chihin ra cachino ñi ra chi ra vatyí ican ra cuví ra cha tachí Nyoo.

12 Cha yaha cuan ta cuahan ra ñuu Capernaum. Ta cuahan síhi ra, yañi ra ta ra cachicá noo chihin ra. Ta yucuan chinyicu ñu suhva quívi.

Nu tava ra Jesús chi ñu caxicó chichi vehe ñuhu cahnu (Mt. 21.12-13; Mr. 11.15-18; Lc. 19.45-46)

13 Cha cuñí chaa quívi vico cha nañí pascua cha sanducahnú ñu Israel. Yucuan chaha cuahan ra Jesús ñuu Jerusalén. 14 Ta chaa ra ñuu cuan, ta quíhví ra nuquehe vehe ñuhu cahnu cuan, ta nanyehé ra chi ra caxicó sindiquí, mbee, ta paloma. Ta na nyehe tucu ra chi ñu nyicú nasama xuhun chi ñáyivi. 15 Ta cha nyehe ra Jesús cha tyicuan caa, savaha ra noo yoho. Ta chihin yoho cuan tava ñehe ra chi tandihí ñu nuquehe vehe ñuhu ñi ri chihin mbee ta chihin sindiquí sana ñu. Ta ñu nasamá xuhun cuan, sacuita ra xuhun ñu nu ñuhu ta sanduva ra mesa ñu. 16 Ta catyí ra chi ñu xicó paloma cuan:

—¡Tava ndo paloma chiña ihya! ¡Ma nasaha ndo vehe Suti tari noo nuyahvi! —catyí ra chi ñu.

17 Tyicuan ta ra cachicá noo chihin ra, canicohon ñi ra cha catyí nu tutu Nyoo tyehe caa: “Cuiño xain chihin vehun”, catyí chí, nichohon ñi ra.

18 Tyicuan ta quichaha candaca tuhun ra cacuví nuu chi ñu Israel chi ra:

—¿Ñáá seña cuhvon chi ndi ta sañahun vatyí chaha Nyoo ityi chuun cha sacuvun tyehe caa? —catyí ra chi ra.

19 Ta nacahan ra Jesús ta catyí ra:

—Satani ndo vehe ñuhu ihya, ta chichi cha uñi quívi,

yuhu cusanandai inga chaha —catyí ra chi ra.

²⁰ Tyicuan ta quichaha catyí ra cuan chi ra:

—Uvi xico iñu cuiya cañoho ra casavaha ra vehe ñuhu ihya. Ta yoho catyún tyi chichi cha uñi quivi cusanandaun inga chaha —catyí ra chi ra.

²¹ Soco vehe ñuhu cha cahan ra Jesús tuhun, ican cuví coño ñuhu ra. ²² Yucuan chaha ra cachicá noo chihin ra canicohon iñi ra tuhun ihya quivi nandoto ra Jesús. Ta cutuñi iñi ra vatyí tuhun cha nyaá nuu tutu Nyoo cahán chi cuenda ra Jesús. Ta canachino iñi ra tuhun cahan ra Jesús ta tuhun cha nyaá nu tutu Nyoo.

Ra Jesús chitó ra cha caá añima ñáyivi

²³ Quivi cha ñohó ra Jesús Jerusalén, quivi vico pascua cuan, cuaha xaan ñu nachino iñi ñu chi ra cha cuenda cha cuaha xaan milagru sacuvi ra. ²⁴ Soco ra Jesús ña cuni iñi ra nyehé ra chi ñu vatyí chitó ra cha caá añima tandihí ñu. ²⁵ Ña chiñuhú ri cha nacatyí yo chi ra yoso caa ñáyivi, vatyí maa ra chitó ra ñáa cha caá chichi añima ñu.

3

Nu ndatuhún ra Nicodemo chihin ra Jesús

¹ Chiyó noo ra fariseo cha nañi Nicodemo. Ta cuví ra noo ra cuví nuu chi ra ñuu Israel. ² Ra Nicodemo ihya, chahan ra nu nyaá ra Jesús noo cha cuaa. Ta catyí ra chi ra:

—Maestro, chitó ndi vatyí Nyoo tachí chuun quichi sañahun chí ndi. Vatyí yori ñáyivi cuvi sacuvi milagru tahan cha sacuvún, tatu yori Nyoo nyaá chihin ñu —catyí ra chi ra Jesús.

³ Tyicuan ta catyí ra Jesús chi ra:

—Cha ndicha catyí chuun vatyí tatu ma nacacu chaa ñáyivi inga chaha, ma cuvi nyehe ñu nu nyacá ñaha Nyoo —catyí ra.

⁴ Tyicuan ta ndaca tuhun ra Nicodemo ta catyí ra:

—¿Yoso caa cuví cacu noo rayi inga chaha tatu cha chahnu ra? ¿Atu cuvi ndihvi ra chichi sihi ra ta nacacu chaa ra inga chaha? —catyí ra.

⁵ Nacahan ra Jesús ta catyí ra:

—Cha ndicha catyí chuun vatyí ñima chihin cha cacu ri ñáyivi chihin coño ñuhu ñu ta cuví quihvi ñu nu nyacá ñaha Nyoo. Soco niñi tucu cuñí chi cha nacacu ñu chihin Tatyí Ii Nyoo. ⁶ Vatyí ñáyivi cha cacu chihin coño ñuhu, coño ñuhu ri nyisó ñu. Ta ñu cha nacacu chaa chihin Tatyí Ii Nyoo, iyó Tatyí Ii Nyoo añima ñu. ⁷ Ma iyo cuñun cha catyí chuun tuhun ihya vatyí tandihí ñu, cuñí chi nacacu chaa ñu. ⁸ Tari caá tatyí tandihí ri ityi nu cuñí chi ta chiñún cayú chi, soco ña chitón nya ityi quichi chi, ni nya ityi cuahan chi; ta tyicuan caa tandihí ñu nacacu chihin Tatyí Ii Nyoo —catyí ra Jesús chi ra.

⁹ Tyicuan ta ndacā tuhun tucu ra Nicodemo inga chaha chi ra:

—¿Yoso caa cuahan tuhun ihya? —catyí ra chi ra.

¹⁰ Nacahan ra Jesús ta catyí ra:

—Yoho cha cuvún noo ra sacuaha cuenda ñu Israel, tahán chi coton tuhun ihya.

¹¹ Cha ndicha catyí chuun vatyí cahín cha chité ta cuví cha ndaa cha nyehí. Soco nyoho ña chinó iñi ndo cha catyí chi ndo. ¹² Tatu ña chinó iñi ndo chii nu cahín tuhun ñayiví ihya chihin ndo, ¿yoso caa chino iñi ndo tu cahin tuhun andiví chihin ndo?

¹³ Yori chahan andiví chinyehé yoso caa iyó. Noo ri yuhu Rayí cha quichí nya gloria nyehí, vatyí yucuan iyé. ¹⁴ Tari nacatacā ra Moisés noo coo cha chino chihin caa nu noo chiquí ndí, tyicuan caa cunacatacā tucu ñu chi yuhu Rayí cha quichi nya gloria, ¹⁵ tacuhva vatyí tandihí ñu cha chinó iñi chii, ma cunaa ñu. Soco coo ñu ñayiví cha ma naa ca maa.

Nyoo cuñí xaan ra chi ñáyiví

¹⁶ Vatyí Nyoo cuñí xaan ra chi tandihí ñáyiví iyó siqui ñuhu ñayiví. Yucuan cuenda chahā ra vatyí cúvi Sehe mañi ra nu cruzi cha cuenda ñu. Tacuhva vatyí tandihí ñu cha chinó iñi chi Sehe ra, ma cunaa ñu, soco coo ñu noo ñayiví cha ma naa ca maa. ¹⁷ Nyoo ña tachí ra chi Sehe ra siqui ñuhu ñayiví vatyí sacunaa ra chi ñáyiví, soco tachí ra chi ra na sacacu ra aña ñu

tacuhva ma cuhun ñu anyaya cha catyí cuatyí ñu.

¹⁸ Vatyí ñu chinó iñi chi Sehe Nyoo ma cunaa ñu, soco ñu ña chinó iñi chi ra, cha cuanaa ñu cha cuenda cha ña chinó iñi ñu chi noo ri Sehe mañi Nyoo. ¹⁹ Ñu ña chinó iñi, cha cuanaa ñu. Vatyí quiví quichí ra cuví ñuhu ndichin cha sacundichín siqui ñuhu ñayiví, ña natiin cuenda ñu chi ra tyi tahan ca iñi ñu nu ñaa iñi vatyí nyacuví ñu cha ña vaha. ²⁰ Tandihí ñu cha nyacuví cha ña vaha, ña tahan iñi ñu ñuhu ndichin, vatyí coto quetuví cha ña vaha cha nyacuví ñu. ²¹ Soco ñu nyacuví cha ndicha, nanyitá ñu nu ndichin tacuhva na cundichin nyehe ñayiví vatyí sacuví ñu cuhva cuñí Nyoo vatyí nyaá ra chihin ñu —catyí ra Jesús.

Nu cahán ra Juan, ra sacondutyá, tuhun ra Jesús inga chaha

²² Cha yahā tuhun ihya, ra Jesús chihin ra cachicá noo chihin ra cuahan coyo ra nu cuví Judea. Ta candō ra suhva quiví yucuan, vatyí casacondutya ra chi ñáyiví. ²³ Tyicuan caa tucu ra Juan cuan ñohó ra sacondutyá ra chi ñáyiví nu cuví Enón yatyin ri nu cuví Salim, vatyí yucuan ñohó cama ndutya. Ta ñáyiví chaá coyo ñu ta condutya ñu. ²⁴ Tuhun ihya cuví ta ni cumañi ca catyihí ra chi ra Juan vehe caa.

²⁵ Tyicuan ta suhva ra nyicón chi ra Juan quichahā cuví yuhu ra chihin noo ra

ñuu Israel siqui yoso caa sandundii ñáyivi chi ñu nuu Nyoo. ²⁶ Tyicuan ta cuahan coyo ra nu nyaá ra Juan. Ta catyí ra chi ra:

—Maestro, ra cha ñoho chuhun inga chiyo yuvi cahnu Jordán, ra cha cahun tuhun chihin ndi, vityin sacondutyá ra ta tandihi ñu nanyicón ñu chi ra —catyí ra chi ra.

²⁷ Tyicuan ta ra Juan catyí ra chi ra:

—Ni noo yo ta ñahri cha cuví sacuvi yo, tyehe ta ña chahá Nyoo tunyee iñi ra chi yo. ²⁸ Suri maa ndo chiñi vaha ndo cha cahin vatyí yuhu ñima ra Cristo cuví. Noo ra cha tachí ri Nyoo ityi nuu ra cuví yuhu. ²⁹ Vatyí noo vico tandaha, ra nyaá xiin ñaha tyivaa cuan, ican ra cuan cutandaha chihin ña. Ta ra tahan ra nyaá ra yatyin ri cuan. Ta cusii cuñi ra chiñi ra tuhun cahán ra cha cuatandaha. Ta tyicuan caa tucu yuhu, sii cuñi vatyí naquehen ñáyivi tuhun cahán ra Jesús ta nyicón ñu chi ra. ³⁰ Maa ra cahnu ca ra cuacuvi ra. Ta yuhu cunocuee que vatyí tyicuan caa tahan maa chi.

Ra quita nya gloria ta quichi siqui ñuhu ñáyivi

³¹ 'Ra cha quichí nya gloria, cahnu ca ra cuví ra cha nuu tandihi ñáyivi. Vatyí ra iyó siqui ñuhu ñáyivi, cuenda ñuhu ñáyivi cuví ra. Ta cahán ra tuhun ñuhu ñáyivi. Soco ra quichí nya gloria, cahnu ca ra cuví ra. ³² Ta cahán

ra cha nyehé ra ta cha chiñi ra, soco yori chinó iñi tuhun cahán ra. ³³ Soco tatu nya noo yo chinó iñi yo chi ra, cuví yo noo cha ndaa vatyí Nyoo ndicha cha cahán ra. ³⁴ Vatyí ra cha tachí Nyoo chii, tuhun Nyoo cahán ra vatyí Nyoo ña tyicuhvá ra Tatyí Ii ra chaha ra chi ra. Chaha ra nanii Tatyí Ii ra chi ra. ³⁵ Nyoo Sutu yo cuñi ra chi Sehe ra. Ta natyaa ra tandihi ndaha ra. ³⁶ Ñu cha chinó iñi chi Sehe Nyoo, iyó ñu noo ñáyivi chaa cha ma naa ca maa. Soco ñu ña cuñi chino iñi chi ra, ma coo ñu ñáyivi cuan. Ta cutachi tuñi Nyoo chi ñu.

4

Nu ndatuhun ra Jesús chihin noo ñaha Samaria

¹ Cachitó ra cuví fariseo vatyí cuaha ca ñáyivi nyicón chi ra Jesús ican saha ra Juan. Ta cuaha ca ñu sacondutyá ra ñandihí. ² Vasi ñima maa ra Jesús sacondutyá, soco ra cachicá noo chihin ra, ican casacondutyá. ³ Ta quivi chito ra Jesús vatyí cachito ra tuhun ihya, ta quita ra Judea cuan ta cuanuhu ra nya Galilea. ⁴ Ta ityi cuanuhu ra, tahan chi yaha ra nu cuví Samaria. ⁵ Yucuan ta chaá ra noo ñuu cha nyaá ityi Samaria cha nañi Sicar yatyin nu nyaá ñuhú ra Jacob nu chaha ra chi ra José sehe ra. ⁶ Ta yucuan nyaá noo yavi ndutyá cha catyí ñu tyi chi ra Jacob cuví. Ta vatyí chitatú xaan ra Jesús cha chica ityi ra, ta chicunyaá ra

yuhu yavi cuan, ñáá cuhva hora cuví. ⁷⁻⁸ Ta ra cachicá noo chihin ra, yori ra canyicú vatyí cuahan coyo ra chichi ñuu, cuasata ra cha cacachi ra. Tyicuan ta chaá noo ñaha Samaria cuatava ña ndutya chichi yavi cuan. Ta quichaha catyí ra Jesús chi ña:
—Cuhva chiin ndutya cohi —catyí ra chi ña.

⁹ Tyicuan ta ñaha Samaria cuan catyí ña chi ra Jesús:

—Yoho cha cuvún noo ra ñuu Israel, ¿yoso caa cha chicón ndutya cohun chi yuhu cha cuví ñaha Samaria? —catyí ña vatyí ñu Israel ña vaha iyó ñu chihin ñu Samaria.

¹⁰ Tyicuan ta ra Jesús nacahan ra ta catyí ra:

—Tyehe ta chitón cha chahá Nyoo, ta chitón yóó cha chicán ndutya chuun, maun cucacon ndutya chii. Ta yuhu cuhve ndutya nyitó chuun —catyí ra chi ña.

¹¹ Tyicuan ta catyí ña chi ra:

—Tata, ni ñahri vihi chihin tavon ndutya ihya. Vatyí yavi ihya cono xaan. ¿Nya cuquehun ndutya nyitó cuhvon cohi? ¹² Vatyí sutu chahnu yo, ra Jacob sandoo ra yavi ihya chi yo. Ta suri ihya chihí tucu maa ra ndutya. Ta suri ihya chihí tucu sehe ra ta quití sana ra. ¿Atu cahnu ca ra cuví yoho ican saha ra cuan? —catyí ña chi ra.

¹³ Tyicuan ta nacahan ra Jesús ta catyí ra chi ña:

—Tandihí ñu chihí ndutya ihya, cu ityi ca ñu ndutya.

¹⁴ Soco ñu chihí ndutya cha chahá yuhu, ma cu ityi ca ñu. Vatyí ndutya cha chahí chi ñu cucaña chi tari noo ndohyo chichi añima ñu tacuhva coo ñu ñayiví cha ma naa ca maa —catyí ra chi ña.

¹⁵ Tyicuan ta quichaha catyí ña chi ra:

—Tata, cuhva ndutya cuan cohí, tacuhva cha ma cu ityi que ndutya, ta ni ma quichi que quichi tave ndutya chichi yavi ihya —catyí ña chi ra.

¹⁶ Tyicuan ta ra Jesús catyí ra chi ña:

—Cuahan cuacana chi yíun ta quichun —catyí ra chi ña.

¹⁷ Ta nacahan ña ta catyí ña:

—Yori yí iyó —catyí ña.

Tyicuan ta catyí ra Jesús chi ña:

—Ndicha cha cahun, vatyí yori yíun iyó. ¹⁸ Vatyí cha ohon tahan yíun chiyo, ta ra nyaá chuhun vityin ñima yíun cuví chi ra. Ndicha tuhun cha cahún —catyí ra chi ña.

¹⁹ Cha chihí ña tuhun cahan ra, quichaha catyí ña chi ra:

—Tata, tuví iñi vatyí noo profeta cuenda Nyoo cuvún. ²⁰ Sutu chahnu ndi, ra Samaria, sacahnu ra chi Nyoo yucu ihya. Soco nyoho ñu Israel catyí ndo vatyí Jerusalén yucuan tahan chi sacahnu yo chi Nyoo —catyí ña chi ra.

²¹ Tyicuan ta ra Jesús nacahan ra ta catyí ra chi ña:

—Chino iñun tuhun cahín chuhun. Vatyí vachi cuhva vatyí cusacahnu ndo chi Sutu yo Nyoo. Soco ña chihí ri cha quichi ndo yucu ihya

o cahun ndo nya Jerusalén.
 22 Nyoho ñu Samaria, ña chitó ndo yóo chi sacahnú ndo. Soco nyuhu chitó ndi yóo chi sacahnú ndi. Vatyí chitó ndi vatyí cuenda noo ra Israel cuasacacu Nyoo chi ñáyivi. 23 Soco chaa chi cuhva ta cuhva cuan nyaa yo vityin vatyí ñáyivi cha ndicha sacahnú chi Sutu yo Nyoo, cusacahnu ñu chi ra chihin añima ñu ta cha ndicha. Tari cuhva saquehen ityi Tatyí li Nyoo chi ñu. Vatyí Sutu yo Nyoo tyicuan caa cuñí ra cha sacuvi ñu cha sacahnú chi ra. 24 Vatyí Nyoo Tatyí li cuví ra. Ta ñu sacahnú chi ra cuñí chi sacahnú ñu chi ra chihin cha ndicha tari cuhva saquehen ityi Tatyí li chi ñu —catyí ra chi ña.

25 Ta nacahan ña ta catyí ña chi ra:

—Yuhu chité vatyí cuquichi ra cuví Mesías, ra Cristo, ra cuví rey chi yo. Ta quivi quichi ra, maa ra cunacatyí tandihi chi yo —catyí ña chi ra.

26 Tyicuan ta nacahan ra Jesús ta catyí ra chi ña:

—Ra cha cahún tuhun cuan, ican ra cahán chuhun —catyí ra chi ña.

27 Tyicuan ta canachaa coyo ra cachicá noo chihin ra ta iyo cacuñí ra cha ndatuhún ra Jesús chihin noo ñaha sihi. Soco ni noo ra ña cañá iñi ra ndaca tuhun ra ñáá cha cuñí ra o ñáá cuenda ndatuhún ra chihin ñaha cuan. 28 Tyicuan ta sandoq ña quiyi ña ta cuanuhu ña chichi ñuu. Ta catyí ña chi ñáyivi ñuu ña:

29 —Ñaha ndo cunyehe ndo chi noo ra cha catyí tandihi cha cai. ¿Atu ñima ra Cristo cuví ra? —catyí ña chi ñu.

30 Tyicuan ta quita coyo ñu ñuu cuan ta cuahan coyo ñu nu nyaá ra Jesús. 31 Ta cha niri ca cha cumañi chaa ñu nu nyaá ra, ra cachicá noo chihin ra, saniñí ra chi ra na cachi ra chiin. Ta cacatyí ra chi ra:

—Maestro, cachi chiin —catyí ra.

32 Soco catyí ra Jesús chi ra:

—Yuhu iyó noo nyayu cuacachi, ta nyoho ña chitó ndo —catyí ra chi ra.

33 Tyicuan ta ra cachicá noo chihin ra quichaha candaca tuhun ra chi ra tahan ra, ta catyí ra:

—¿O iyó yóo cha quichi nyaca cha cachi ra, vaha? —catyí ra.

34 Soco ra Jesús catyí ra chi ra:

—Cha chachí yuhu ican cuví cha sacuví cuhva cuñí ra cha tachí chii ta sacuví tyiño chaha ra chii. 35 Nyoho catyí ndo: “Soco cumañi ca cumi yoo ta naquehen yo cha tachí yo.” Soco yuhu catyí chi ndo vatyí nyehe ndo ta saha ndo cuenda cha cuaha ñáyivi cuñí ñu quichi ñu chihin, cuví ñu tari noo itu cha cuan ta cuñí chi cha cahnu yo niñi.

36 Ra cha naquehén niñi cuan ñihi ra yahví ra. Ta niñi cha naquehen vaha ra cuví ñu cha ñihi noo ñáyivi cha ma naa ca maa. Ta tyicuan caa cuví tacuhva vatyí ra cha tachí, ta ra cha naquehén niñi cuan in ri cacusiñi cuñi ra.

³⁷ Ta iyó noo tuhun ñayiví cha catyí vatyí s̄in ñu tachí ta s̄in ñu naquehén niñi. Ta ndicha tuhun cuan. ³⁸ Yuhu sacuhin chi ndo vatyí cucahnu ndo niñi cha iyó nu ña saha tyiño ndo. Vatyí inga ra saha tyiño. Ta nyoho nyari cucahnu ndo ta naquehen vaha ndo niñi cuan —catyí ra Jesús chi ra.

³⁹ Ta cuaha xaan ñu ñuu Samaria cuan canachino iñi ñu chi ra Jesús cha cuenda cha catyí ñaha cuan, vatyí catyí ña: “Catyí ra tandihi cha cai chii”, catyí ña. ⁴⁰ Ta cuhva cha cachaa coyo ñu Samaria nu nyaá ra Jesús, cha cundahví ñu nuu ra nandoo ra chihin ñu. Ta ra Jesús ndoo ra yucuan uvi quiví chihin ñu. ⁴¹ Ta cuaha ca ñu cachino iñi ñu cha chiñi ñu tuhun cahán maa ra. ⁴² Tyicuan ta quichaha catyí ñu chi ñaha sihi cuan:

—Vityin chinó iñi ndi, ñima cha cuenda vatyí catyun chi ndi, soco vatyí chiñi maa ndi chihin soho ndi tuhun cahán ra, ta chitó vaha ndi vatyí ican ra cuví Cristo ra sacacú chi ñayiví iyó siqui ñuhu ñayiví ihya —catyí ñu.

Nu sanduvaha ra Jesús chi sehe noo ra cuví tyiño

⁴³ Cha yaha uvi quiví ta quitá ra Jesús ñuu Samaria cuan ta cuahan ra ityi nu cuví Galilea. ⁴⁴ Vatyí suri maa ra Jesús catyí ra vatyí ñayiví ñuu noo ra cuví profeta, ra chahá cuenda tuhun cahán Nyoo, ña sahá ñu ñayiví chí ra. ⁴⁵ Tyicuan ta cuhva cha

chaa ra Galilea, ñu iyó yucuan vaha tyiñuhu ñu chi ra, vatyí chahan coyo tucu maa ñu Jerusalén vico cuan, ta nyehe ñu cha vaha cha sacuví ra.

⁴⁶ Tyicuan ta cuanuhu tucu ra Jesús nya ñuu Caná nu cuví Galilea nu sananduví ra vinu chihin ndutya. Ta iyó noo ra cuví tyiño cuenda rey, ta iyó noo sehe ra cha cuhví ñuu Capernaum. ⁴⁷ Quiví cha chito ra cuan vatyí nachaa ra Jesús Galilea cha chahan ra Judea, chahan ra chinyehé ra chi ra, ta chican ra tumañi iñi chi ra na cuhun ra vehe ra ta sanduvaha ra chi sehe ra, vatyí cha cuñí cuii ri cúvi sehe ra. ⁴⁸ Tyicuan ta ra Jesús catyí ra chi ra:

—Nyoho ma chino iñi ndo tatu ma nyehe xihna ndo noo milagru —catyí ra chi ra.

⁴⁹ Soco ra cha vaha cuan catyí ra chi ra Jesús:

—Tata, coho chihin cha numi ri vityin cha ta cúvi ca sehi —catyí ra chi ra.

⁵⁰ Tyicuan ta ra Jesús catyí ra chi ra:

—Cuñuhu nya vehun. Sehun cha nduvaha ra —catyí ra chi ra.

Tyicuan ta ra cha vaha cuan chinó iñi ra tuhun cahán ra Jesús ta cuanuhu ra.

⁵¹ Ta cuhva cha cuanachaa ra nya vehe ra, quitá coyo musu ra ta cacatyí ra chi ra:

—¡Cha nduvaha sehun!

⁵² Tyicuan ta quichaha ndaca tuhun ra chí ra ñáa cuhva nduvaha ra. Ta cacatyí ra chi ra:

—Icu cuhva ca ñin cha yaha hora tinyaa cahñi chi ra —catyí ra.

⁵³ Tyicuan ta tuví ñi ra cha vaha cuan, vatyí cuhva cuan catyí ra Jesús chi ra, “Cuñuhu vatyí sehun cha nduvaha ra.” Ta maa ra ta tandihí ñáyivi chi ra nachino ñi ñu chi ra Jesús.

⁵⁴ Ican ihya cuví cha cu uvi milagru cha sacuvi ra Jesús cha nachaa ra Galilea cha chahan ra Judea.

5

Nu sanduvaha ra Jesús chi noo ra ña cuví caca

¹ Cha yaha tuhun cuan ta ra Jesús cuahan ra Jerusalén inga chaha vatyí ñu ñuu Israel sanducahnu ñu noo vico. ² Ta ñuu cuan iyó noo yuvehe cha nañí Yuvehe Cuenda Mbee. Ta yatyin ri nyaa noo vehe cahnu. Ta chichi vehe cuan ñohó ndutya. Ta cha chihin sahan hebreo nañí chi Betesda. Ta iyó ohon tahan corredor. ³ Ta yucuan cayucu cuaha ñu cuhví: ñu cuaa, ñu coxo, ta ñu ña cuví nacanda. Canyatú ñu ñáa cuhva nacanda ndutya cuan.

⁴ Vatyí ña naha ña naha ri ta noó noo ángel sanacanda ra ndutya cuan. Ta yóo cha quihvi xihna ca cha yaha nacanda ndutya cuan, nduvaha ñu niri maa ñáa ca cuehe ndoho ñu. ⁵ Ta yucuan catuví noo ra cuhví cha iyó oco chahun uñi cuiya cuhví ra. ⁶ Cuhva cha nanyehe ra Jesús chi ra catuví ra yucuan, tuví ñi ra vatyí cha cañi xaan

cuiya caá ra tyicuan caa. Ta ndaca tuhun ra chi ra, ta catyí ra:

—¿Atu cuñún nduvahun?

⁷ Ta ra cuhví cuan nacahan ra ta catyí ra:

—Tata, yori maa tyihi chii chichi tanque tatu cha nacandá ndutya. Vatyí tahan ri cha cuñí quihvi, inga ñu quihvi xihna ca —catyí ra cuhví cuan chi ra Jesús.

⁸ Tyicuan ta catyí ra Jesús chi ra:

—Ndícuita ta naquehen yuvun ta cacon —catyí ra chi ra.

⁹ Ta caa cuhva ri cuan nduvaha ra, naquehen ra yuvi ra, ta nacaca ra. Soco vatyí quivi nyitatu ñu cuví, ¹⁰ ra cacuví nuu chi ñu Israel catyí ra chi ra cha nduvaha cuan:

—Quivi nyitatú yo cuví vityin, ña tahan chi cuison yuvun —catyí ra chi ra.

¹¹ Ta ra cha nduvaha cuan nacahan ra ta catyí ra:

—Ra cha sanduvaha chii, ican ra catyí chii: “Naquehen yuvun ta cacon”, catyí ra chii.

¹² Tyicuan ta quichaha candaca tuhun ra chi ra, ta catyí ra:

—¿Yóo ra cha catyí chuun vatyí naquehun yuvun ta cacon?

¹³ Soco ra cha nduvaha cuan ña chitó ra yóo cha sanduvaha chi ra. Vatyí cuaha xaan ñáyivi yucuan, ta ra Jesús yori ca ra vatyí cha cuahan ra. ¹⁴ Yaha cuan ta nañihí ra Jesús chi ra chichi vehe ñuhu cahnu, ta catyí ra chi ra:

—Nyehé, vityin cha nduvahun, ma sacuvi con cuatyí,

coto ñáa ca cha cahnu ca cuvi chuun —catyí ra chi ra.

¹⁵ Tyicuan ta chahan ra chicutyí ra chi ra Israel cuan vatyí ra Jesús cuví ra cha sanduvaha chi ra. ¹⁶ Ta cha cuenda cha sacuví ra Jesús tyehe caa quiví nyitatu ñu, yucuan chaha cuxaan xaan ra cacuví nuu chi ñu Israel chi ra Jesús. Ta cuñí ra cahñi ra chi ra. ¹⁷ Soco ra Jesús catyí ra chi ra:

—Maa Suti, nya vityin ta sahá tyiño ra. Ta yuhu tucu sahá tyiñe —catyí ra.

¹⁸ Ta cha cuenda cha cahan ra tuhun ihya, xaan ca cuñí ra Israel cuan. Ta ñihi ca cuñí ra cahñi ra chi ra vatyí cuñí maa ra vatyí ña sahá ra ñáyiví quiví nyitatu ñu, ta siin rí tyi sahá ra tuhun tyi iin ri cuví ra chihin Nyoo vatyí catyí ra tyi sutu ra cuví chi Nyoo.

Sehe Nyoo iyó xaan ityi chi ra cha cunyaca ñaha ra

¹⁹ Tyicuan ta ra Jesús catyí ra chi ra:

—Cha ndicha catyí chi ndo vatyí yuhu, cha cuví Sehe Nyoo, ñahri cha savahí cha maa ri mai. Soco sacuví cha nyehí sacuví Suti. Tandihí cha sacuví Suti ta sacuví tucu maí. ²⁰ Vatyí cuñí xaan Suti chii, vatyí Sehe ra cuví chii, yucuan chaha sañahá ra tandihí cha sacuví ra chii. Ta nahnu ca cha cusañaha ra, tacuhva cu iyo cuñi ndo.

²¹ Tari sanandotó Nyoo Suti chi ndiyí, ta chahá ra ñáyiví coo ñu, tyicuan caa tucu yuhu cha cuví Sehe ra, चाहí ñáyiví chi ñu cuñí mai kuhve.

²² Ta Suti Nyoo ña sandaa

ra cuatyí ni noo ñu, soco chi yuhu cha cuví Sehe ra chaha ra ityi na sandai cuatyí ñáyiví. ²³ Tyicuan caa sacuví Suti Nyoo vatyí cuñí ra tyi sacahnu ñáyiví chi Sehe ra tari sacahnú ñu chi maa ra. Ñu ña sacahnú chi yuhu Sehe Nyoo, niri chi Suti ta ña sacahnú ñu. Tyi maa ra tachi ra chi yuhu cha cuví Sehe ra.

²⁴ Ta cha ndicha catyí vatyí ñu tyasohó tuhun cahín ta chinó iñi ñu chi ra cha tachi chii, iyó ñu noo ñáyiví chaa cha ma naa ca maa. Ta ma cahun ca ñu anyaya cha catyí cuatyí ñu vatyí cha sacacu Nyoo aña ñu ndaha tuhun chihí, ta nacuhva ra ñáyiví chaa coo ñu. ²⁵ Ñáyiví tari cha ndiyí cuví ñu soco cha ndicha catyí chi ndo vatyí vachi chi quiví vatyí cuiñi ñu ndusu Sehe Nyoo. Ta ñu cha quichahá cha cahán ra, curoo ñu ñáyiví cha ma naa ca maa. Ta vityin cuví quiví cha cahín tuhun. ²⁶ Vatyí Nyoo Suti iyó ra ñáyiví cha ma naa ca maa. Ta chaha tucu ra ityi chi yuhu cha cuví Sehe ra vatyí kuhve ñáyiví coo ñáyiví. ²⁷ Ta Nyoo chaha ra vatyí sandai cuatyí ñáyiví, vatyí Rayíi cha quichi nya gloria cuví yuhu. ²⁸ Ma iyo cuñi ndo tuhun ihya, vatyí cuchaa chi quiví vatyí ñu ndiyí chichi ñaña cucuiñi ñu ndusu Sehe Nyoo. ²⁹ Ta cuquita coyo ñu chichi ñaña. Ta ñu cha sacuví cha vaha cunandoto ñu vatyí coo ñu noo ñáyiví chaa. Soco ñu ña sacuví cha vaha cunandoto ñu vatyí cahun ñu

anyaya nu cutachi tuñi Nyoo chi ñu.

Nu sañahq chi vatyira Jesús iyó ityi chi ra cha cuhva ra ñayivi chaa coo ñáyivi

³⁰ 'Yuhu ñima noo tuhun ri mai sacuví ñáá noo cha sacuví. Nyehí cha caá aña ñáyivi yoso cuhva catyí Suti. Ta vaha cuhva nyehí vatyí ña sacuví cuhva cuñí mai, soco cuhva cuñí Suti, ra cha tachí chii. ³¹ Ta tatu suri mai cuví cha ndaa chi mai, ñahri yahvi nyaá cha ndaa cuan. ³² Soco iyó inga ra cuví cha ndaa cuenda yuhu. Ta yuhu chité vatyí cha cahán ra cuende yucuan cuví noo cha ndaa ta cha ndicha. ³³ Nyoho chindaca tuhun ndo chi ra Juan. Ta tuhun cha cahan ra, ndicha vaha. ³⁴ Soco yuhu ña chiñuhú cha cuví rayi cha ndaa cuende. Soco catyí tuhun ihya chi ndo cha cuenda cha vaha chi ndo, tacuhva vatyí chino iñi ndo chii ta cacu aña ndo. ³⁵ Ra Juan cuví ra tari noo lámpara cha cayú ta sacundichín. Ta nyoho tahañ iñi ndo cusii iñi ndo nu ndichin ñuhú ra suhva ri quivi. ³⁶ Soco yuhu iyó noo cha ndaa vaha ca cha nuu cha catyí ra Juan. Vatyí tandihi cha sacuví yuhu, maa Suti catyí chii na sacuvi. Ta ican cuví cha ndaa cha nyehé ndo vatyí ndicha vatyí maa Suti tachí chii. ³⁷ Ta tyicuan caa tucu Suti, ra cha tachí chii, cuví ra cha ndaa cuende. Nyoho ta cuiñi ca ndo ndusu ra. Ta ni ta nyehe ca ndo chi ra. ³⁸ Ta tuhun ra cha cahín nuu ndo, ña ndoó chi aña ndo

vatyí ña chinó iñi ndo vatyí Nyoo tachí ra chii. ³⁹ Nyoho chihin cuenda xaan sacuaha ndo nu tutu Nyoo, vatyí cuñí maa ndo vatyí nuu cuan cuanañihi ndo ñayivi chaa cha ma naa ca maa. Soco nu tutu Nyoo cuan, tuhun yuhu cahán chi. ⁴⁰ Ta nyoho ña cuñí ndo quichi ndo nu nyaí tacuhva vatyí cuhve ñayivi chaa cuan coo ndo.

⁴¹ 'Yuhu ña nduqui nu cuvahi nuu ñáyivi. ⁴² Vatyí yuhu ñohó nui chi nyoho ta chité vatyí ña cuñí ndo chi Nyoo. ⁴³ Yuhu vachi cuenda Suti ta nyoho ña naquehén ndo tuhun cahín. Soco tatu inga ra vachi ra cuenda maa ra, chi ra cuan nachino iñi ndo. ⁴⁴ Nyoho ña cuví chino iñi ndo chii vatyí cuñí ndo cuvaha ndo nu tahan ndo. Ta ña nducú ndo nu cuvaha ndo nuu Nyoo cha noo tuhun ri maa iyó. ⁴⁵ Ma cuñi ndo vatyí cutyaa yuhu cuatyí chaha ndo nuu Suti. Ra Moisés cuví ra tyaá cuatyí chaha ndo vatyí ña sacuví ndo ley cha tyaá ra. Ta ley ra cuñí maa ndo vatyí cunyaca chi chi ndo andivi. ⁴⁶ Vatyí tyehe ta chinó iñi ndo tuhun cahan ra Moisés, chinó tucu iñi ndo tuhun cahán yuhu. Vatyí tuhun yuhu ican tyaá ra. ⁴⁷ Soco tatu ña chinó iñi ndo tuhun cha tyaá ra, ¿yoso caa cuchino iñi ndo tuhun cahán yuhu? —catyí ra Jesús chi ra cacuví nuu chi ñu Israel.

6

Nu chahq ra Jesús cha

cachi ohon mil rayii

(Mt. 14.13-21; Mr. 6.30-44; Lc. 9.10-17)

¹ Cha yaha cuan, ra Jesús cuahan ra inga chiyo miñi cahnu cha nañi Tyañuhu Galilea. Ta suri miñi cuan nañi chi Miñi Tiberias. ² Cuaha xaan ñáyivi cuahan nyicon chi ra cha cuenda vatyí nyehé ñu milagru cha sacuví ra vatyí sanduvahá ra chi ñu cuhvi. ³ Tyicuan ta ra Jesús ndaa ra noo yucu ta chicunyaá ra yucuan chihin ra cachicá noo chihin ra. ⁴ Ta cha nyañaa quivi vico cha nañi pascua cha sanducahnú ñu Israel. ⁵ Cha nanyehe ra Jesús vatyí cuaha ñáyivi nyicón chi ra, ta quichaha catyí ra chi ra Felipe:

—¿Yoso caa cusata yo cha cachi tandihi ñáyivi cuaha ihya? —catyí ra chi ra.

⁶ Soco catyí ri maa ra chi ra Felipe cha nducú nyehe ra chi ra ñáá catyí ra, vatyí ra Jesús chitó vaha ra ñáá cha cuasacuvi ra. ⁷ Tyicuan ta nacahan ra Felipe ta catyí ra:

—Yahvi cha quehen yo cha saha tyiño yo ucha tahan yoo ta ma ñihi sata yo cha cachi ñu chiin chiin —catyí ra Felipe.

⁸ Ta ra Andrés nonga ra nyicón chi ra Jesús, ta yañi ra Simón Pedro cuví chi ra, catyí ra chi ra Jesús:

⁹ —Ihya nyaá noo ra cuehe luhlu nyisó cue ohon tahan pan cebada ta uvi tahan tiyaca. Soco ¿nyata cuví ihya ta cuaha ñáyivi ihya? —catyí ra Andrés.

¹⁰ Tyicuan ta ra Jesús catyí ra chi ra:

—Catyí ndo chi tandihi ñu na cunyicu ñu —catyí ra.

Iyo vavaha cuhu yucuan ta chicunyicu ñu ta cha ohon mil rayii, ta siin ri ñushi chihin ra cuatyaa. ¹¹ Tyicuan ta quehen ra Jesús pan cuan ta cha yaha nacuhva ra tyahvi nyoo chi Nyoo, chaha ra chi ra cachicá noo chihin ra. Ta ra cachicá noo chihin ra casacha ra chi tandihi ñu canyicú cuan. Suri tyicuan caa sacuvi tucu ra chihin tiyaca cuan, chaha ra cachi ñu nyacua nya cha chitu chi ñu. ¹² Ta cuhva cha ndaha iñi ñu, ra Jesús catyí ra chi ra cachicá noo chihin ra:

—Nacoñehe ndo yiquin cha ndoo tacuhva vatyí ñahri cha tiví —catyí ra chi ra.

¹³ Canacoñehe ra, ta casa-cutu ra uchi uvi tahan tica chihin yiquin cha ndoo cuan cha cuenda ohon tahan pan cuan. ¹⁴ Tyicuan ta cha yaha nyehe ñáyivi cuan milagru cha savaha ra Jesús, ta catyí ñu:

—Ican ndicha cuii ra ihya cuví profeta, ra chahá cuenda tuhun cahan Nyoo cha nyaá cha quichi siqui ñuhu ñayivi ihya —catyí ñu.

¹⁵ Soco tuví iñi ra Jesús vatyí cuñi ñu quehen ñu chi ra chihin fuerza vatyí sacuvi ñu rey chi ra. Ta cuahan ri ra nu sucun yucu cuan inga chaha vatyí cunyaa notuhun maa ra.

Nu chicá ra Jesús nu ndutya

(Mt. 14.22-27; Mr. 6.45-52)

16 Ta cha cuaa, ta noo coyo ra cachicá noo chihin ra Jesús yuhu miñi cuan. 17 Ta quihv̄i coyo ra chichi canoa ta cuayaha sava ra mahñu miñi cuan vatyí cuchaa ra Capernaum. Cha cuñaa ta ra Jesús suri cha ta ndichi ca ra. 18 Tyicuan ta chaḡ noo tatyí ñihi. Ta iyo ndicuita ndutya miñi cuan. 19 Tyicuan ta cha cayahaḡ ra chihin canoa cuan tari noo cha ohon o iñu kilómetro, ta cananyeheḡ ra chi ra Jesús suri chicá ra nu ndutya cuan cuachaa ra nu nyaá canoa cuan, ta canayuhv̄i ra. 20 Soco ra Jesús catyí ra chi ra:

—¡Yuhu cuví, ma yuhvi ndo!

21 Tyicuan ta chihin cha casii cuñi ra caquehen cuenda ra chi ra Jesús chichi canoa. Tyicuan ta tañi ri ta cachaaḡ ra yuhu miñi nu cuahan coyo ra.

Nu nanducú ñáyivi chi ra Jesús

22 Tuvi inga quivi cuan cha ñaha cuiri chitó ñáyivi cha ndoo inga chiyo miñi cuan vatyí ra cachicá noo chihin ra Jesús cuahan coyo ra chihin noo canoa cha iyó cuan. Vatyí noo ri maa iyó. Ta chitó ñu tyi ña cuahan ra Jesús chihin ra. 23 Soco chaḡ coyo ca canoa cha quitḡ coyo ñuu Tiberias. Chaḡ chi yatyin ri ityi nu cachachi ñu pan, yahaḡ cha nacuhv̄a Sutu Mañi yo tyahvi nyoo chi Nyoo. 24 Tyicuan ta cha nanyeheḡ ñu tyi yori ra Jesús yucuan ta ni ra cachicá

noo chihin ra, quihv̄i coyo ñu chichi inga canoa cuan ta cuahan ñu nya Capernaum cuananducu ñu chi ra.

Ra Jesús cuví pan cha chahá ñáyivi chaa coo yo

25 Cha chaḡ coyo ñu inga chiyo miñi cuan, nañih̄i ñu chi ra Jesús. Ta ndacaḡ tuhun ñu chi ra:

—Maestro, ¿ama chaun ihya? —catyí ñu chi ra.

26 Soco ra Jesús catyí ra chi ñu:

—Cha ndicha catyí chi ndo vatyí nyoho nanducú ndo chii soco cha cuenda vatyí chachiḡ ndo nyacua nya cha chitḡ chi ndo. Soco ñima vatyí nyehē ndo milagru cha sacuvi. 27 Ma saha tyiño ndo cuenda nyayu cha ndihi, soco saha tyiño ndo cuenda nyayu cha ña ndih̄i ta chahá chi noo ñáyivi chaa cha ma naa ca maa coo ndo. Ican ihya cuví nyayu cha cucuhve chi ndo vatyí Nyoo Suti tyaaḡ tyiño cuan chii vatyí yuhu cuví Rayii cha quichi nya gloria —catyí ra Jesús.

28 Tyicuan ta quichahaḡ ndaca tuhun ñu chi ra ta catyí ñu:

—¿Ñáá cha cuví sacuvi ndi tacuhva sacuvi ndi cuhva cuñi Nyoo? —catyí ñu.

29 Tyicuan ta ra Jesús catyí ra chi ñu:

—Cha cuñi Nyoo cha sacuvi ndo ican cuví ihya: Cha ch̄ino iñi ndo chi yuhu, ra cha tach̄i ra chi —catyí ra Jesús chi ñu.

30 Ta candacaḡ tuhun tucu ñu chi ra, ta catyí ñu:

—¿Ñáá seña cuhvon chi ndi tacuhva vatyí nyehe ndi ta chino iñi ndi chuun? ¿Ñáá cha cuasacuvun? ³¹ Sutu chahnu ndi chachí ñu maná chiqui ndi nu yori ñáyivi iyó quívi cuan, tari catyí tuhun Nyoo: “Nyoo chahá ra pan cha quichí ityi andívi cachi ñu” —catyí ñu chi ra Jesús.

³² Ta ra Jesús nacahan ra ta catyí ra:

—Cha ndicha catyí chi ndo. Ñima ra Moisés chahá pan cha quichí ityi andívi cachi ñu, soco Nyoo Suti cuví ra chahá pan cha ndicha vaha cha quichí ityi andívi. ³³ Vatyí pan cha chahá Nyoo, ican cuví ra cha noo ityi andívi. Ta ican cuví ra cha chahá noo ñayivi chaa coo ñu iyó siqui ñuhu ñayivi —catyí ra Jesús.

³⁴ Tyicuan ta quichahá catyí ñu chi ra:

—Tata, cuhva pan chiña cachi ndi tyicuan ri maa —catyí ñu.

³⁵ Ta nacahan ra Jesús ta catyí ra chi ñu:

—Yuhu cuví pan cha chahá cha conyito añima ndo. Ñu vachi nu nyaí ma cusoco ca añima ñu, ta ñu chino iñi chii ma cu ityi ca maa añima ñu. ³⁶ Soco cha yahá catyí chi ndo vatyí nyoho ña chinó iñi ndo vasi cha nyehé ndo chii. ³⁷ Tandihí ñáyivi cha chahá Nyoo Suti chii, vachi ñu nu nyaí, ta ñu vachi nu nyaí, naquehén cuende chi ñu. ³⁸ Vatyí yuhu quichí ityi andívi soco ñima cha cuenda cha sacuvi cuhva cuñí mai, soco sacuvi cuhva cuñí ra cha

tachí chii. ³⁹ Ta cuhva cuñí ra cha tachí chii, ican cuví ihya: cha ma sacunai ni noo ñu cha chahá ra chii, tacuhva vatyí sanandote chi ñu nu cuandihí quívi. ⁴⁰ Suti, ra cha tachí chii, cuñí ra vatyí tandihí ñáyivi cha nyehe chi yuhu ra cha cuví Sehe Nyoo, ta chino iñi ñu chii, coo ñu noo ñayivi cha ma naa ca maa. Ta suri yuhu cusanandote chi ñu nu cuandihí quívi —catyí ra Jesús chi ñu.

⁴¹ Cha cuenda cha cahan ra Jesús tyehe caa, ñu Israel quichaha cacahan nyaa ñu chi ra vatyí catyí ra: “Yuhu cuví pan cha quichí ityi andívi”, catyí ra. ⁴² Tyicuan ta quichaha catyí ñu:

—¿Atu ñima ra cuví ra Jesús, sehe ra José vii? Yoó ñohó nuu yo chi sutu ra ta chi sihi ra. ¿Yoso caa cha catyí ra vatyí ityi andívi quichí ra? —catyí ñu.

⁴³ Tyicuan ta ra Jesús catyí ra chi ñu:

—Sandihí ndo tuhun cha cahan nyaa ndo. ⁴⁴ Yori maa ñu quichi nu nyaí tatu ñima Suti, ra cha tachí chii, cana chi ñu. Ta cusanandote chi ñu nu cuandihí quívi. ⁴⁵ Nu libru cha catyaa ra profeta Nyoo ta cha naha catyí chi tyehe caa: “Nyoo cusañaha ra chi tandihí ñáyivi.” Yucuan chaha vatyí ñu cha tya-sohó tuhun cahan Nyoo Suti ta cutuhvá ñu tuhun cahan ra, ican ñu vachi nu nyaí.

⁴⁶ Ñima cha cuenda vatyí nyehé ñu chi Nyoo Suti, vatyí yori nyehé chi ra. Soco noo

ri mai nyehé chi ra. Ta iquen cuví ra cha quita nu nyaá ra. ⁴⁷ Cha ndicha catyí chi ndo vatyí ñu chinó iñi chii coo ñu noo ñayiví chaa cha ma naa ca maa. ⁴⁸ Yuhu cuví pan cha chahá cha conyito añima ndo. ⁴⁹ Sutu chahnu ndo chachí ñu maná chiqui ndii cuan, soco suri cachihí ñu. ⁵⁰ Soco yuhu, tuhun pan cha quichí ityi andiví cahín chihin ndo, vatyí nya ñu cachi pan cuan, ma cúvi añima ñu. ⁵¹ Suri mai cuví pan nyitó cha quichí ityi andiví. Yóo cha cachi pan ihya coo ñu tyicuan ri maa. Pan cha cuhva yuhu, ican cuví coño ñuhi. Ta cuhve ñayiví cha cuenda tandihí ñayiví iyó siqui ñuhu ñayiví —catyí ra Jesús chi ñu.

⁵² Tyicuan ta ra Israel cuan quichaha candatuhun ra chihin tahan ra ta cacatyí ra:

—¿Yoso caa cuhva ra cha cachi yo coño ñuhu ra?

⁵³ Ta ra Jesús catyí ra:

—Cha ndicha catyí chi ndo, yuhu cuví Rayii cha quichí nya gloria, ta tatu nyoho ta ma cachi ndo coño ñuhi, ta tatu ma coho ndo niñi, ma cuvi coo ndo ñayiví chaa. ⁵⁴ Ñu chachí coño ñuhi ta chihí ñu niñi, iyó ñu noo ñayiví chaa cha ma naa ca maa. Ta yuhu cusandote chi ñu nu cuandihí quivi. ⁵⁵ Vatyí coño ñuhi ican cuví pan cha ndicha vaha cha tahán chi cachi ndo, ta niñi cuví vinu cha ndicha vaha cha tahán chi coho ndo. ⁵⁶ Ñu chachí coño ñuhi ta chihí niñi, in ri cuví ñu chihin. Ta mai in ri cuví chihin ñu. ⁵⁷ Suti ra

tachí chii, Nyoo nyitó cuví ra. Ta yuhu iyé chihin tunyee iñi ra. Ta suri tyicuan caa tucu ñu chachí coño ñuhi, coo ñu chihin tunyee iñi iyó chii. ⁵⁸ Tuhun pan cha quichí ityi andiví cahín. Pan ihya ñima tari maná cha chachí sutu chahnu ndo, vatyí suri chihí ñu. Ñu chachí pan cha cuví coño ñuhi, coo ñu tyicuan ri maa —catyí ra Jesús.

⁵⁹ Ican tuhun ihya sañaha ra Jesús nu ndu in ri ñu chichi vehe ñuhu Capernaum.

⁶⁰ Cuaha xaan ñayiví nyicón chi ra Jesús. Ta cuhva cha chiñi ñu tuhun ihya catyí ñu:

—Tuhun cha cahan ra ihya, yii xaan cha natiin cuenda yo. Yori cuví quichaha tuhun cahán ra —catyí ñu.

⁶¹ Tyicuan ta tuví iñi ra Jesús vatyí ña cuñí ñu naquehen ñu tuhun cuan. Ta ndaca tuhun ra chi ñu:

—¿Atu quiñi cuñí ndo cha cahín tuhun ihya? ⁶² Ta ¿yoso caa sacuvi ndo tatu nyehe ndo chi yuhu Rayii cha quichi nya gloria nandaa xica tiqui inga chaha ityi nu quite quivi xihna ri? ⁶³ Tatyí Ii Nyoo ican cuví cha chahá ñayiví chaa. Coño ñuhu, ña tyinyeé chi coo yo ñayiví cuan. Ta tuhun cha cahín chihin ndo, Tatyí Ii Nyoo cuví ta chahá chi cha conyito añima ndo. ⁶⁴ Soco yihí suhva ndo cha ña chinó iñi ndo chii —tyicuan caa catyí ra Jesús.

Vatyí nya quivi xihna ri ta chitó ra yóo cha ña chinó iñi

chi ra ta yóo cha cunaxico
tuhun chi ra. ⁶⁵ Ta catyí ra:

—Yucuan chaha catyí chi
ndo vatyí yori ñu cuví quichi
nu nyaí tatu ñima Nyoo Suti
cana chi ñu —catyí ra Jesús.

⁶⁶ Nya ndaha quiví cuan
cuaha xaan ñu nyicon chi ra
Jesús sandoo ñu chi ra. Ta
ña chicá noo ca ñu chihin ra.
⁶⁷ Tyicuan ta ra Jesús ndaca
tuhun ra chi ndihí uchi uvi
tahan ra chicá noo chihin ra,
ta catyí ra:

—¿Atu cuñí tucu nyoho
cuhun ndo? —catyí ra chi ra.

⁶⁸ Soco nacahan ra Simón
Pedro ta catyí ra:

—Sutu Mañi yuhu, ¿yóo
chi cunyicon ndí? Ta noo
tuhun yoho cahún tuhun
ñayiví cha ma naa ca maa coo
ndí. ⁶⁹ Nyuhu chinó iñi ndí,
ta ñoho nuu ndí chuun vatyí
yoho cuvún ra cuví Cristo
Sehe Nyoo nyitó.

⁷⁰ Ta nacahan ra Jesús ta
catyí ra:

—¿Atu ñima yuhu nacachi
chi ndí uchi uvi nyoho?
Ta noo nyoho cuví cuihna
—catyí ra.

⁷¹ Tuhun cha cahán ra Jesús
ihya, tuhun ra Judas Iscariote
sehe ra Simón cuví. Vatyí
ra Judas cuví ra cucuhva
cuenda chi ra Jesús chi ra
xaan iñi chi ra, vasí noo ra
cha uchi uvi cuan cuví ra.

7

*Nu ña cachinó iñi yañi ra
Jesús chi ra*

¹ Cha yaha tuhun ihya, ta ra
Jesús chicá noo ra ityí Galilea.
Ña cuñí ra cuhun ra Judea

vatyí ra cacuví nuu chi ñu Is-
rael cuan cacuñí ra cacahñi
ra chi ra. ² Ta cha nyaña
quiví vico cha sanducahnu ñu
Israel ndí cuiya ri. Ta nañí chi
vico Tabernáculo. ³ Yucuan
chaha yañi ra Jesús cacatyí ra
chi ra:

—Ma ndoun ihya. Cuahan
Judea tacuhva vatyí ñu
naquehén tuhun cahún cha
nyicú yucuan nyehe ñu tyiño
cha sacuvún. ⁴ Vatyí tatu
cuñí yo cha cohon nuu ñáyiví
chi yo, ma xehe ri sacuví yo
cha sacuví yo. Ta yoho tatu
ndicha cha sacuvún tuhun
ihya, sacuví nuu tandihí
ñáyiví —cacatyí yañi ra chi
ra.

⁵ Tyicuan caa cacatyí ra
vatyí ni yañi ra ta ña chinó iñi
ra chi ra. ⁶ Tyicuan ta ra Jesús
catyí ra chi ra:

—Ta chaa ca cuhva cha
cuhun yuhu. Soco nyoho
savahri quiví cuví cuhun
ndo. ⁷ Vatyí ñáyiví ña cutasi
cuñí ñu nyehé ñu chi ndo,
soco chi yuhu tasi cuñí ñu
nyehé ñu cha cuenda vatyí
cachi ri catyí chi ñu vatyí
ña vaha cha nyacuví ñu.
⁸ Cuahan nyoho vico cuan.
Yuhu ma cuhin vatyí ta chaa
ca cuhva cha tahán chi cuhin
—catyí ra.

⁹ Yahá cuan ta ndoo ra nya
Galilea.

*Nu ñohó ra Jesús vico
Tabernáculo*

¹⁰ Cha yaha cuahan coyo
yañi ra Jesús, cuahan tucu
maa ra vico cuan, soco xehe
ri. ¹¹ Ta ra cacuví nuu chi
ñu Israel cananducú ra chi ra

vico cuan, ta cacatyí ra chi ra tahan ra:

—¿Nya nyaá ra cuan? —catyí ra.

¹² Ta ñáyivi ñohó vico cuan cacahán ñu tuhun ra. Ta yihí ñu catyí ñu: “Noo ra vaha cuví ra.” Ta inga ñu catyí ñu: “Ña vaha ra, sandaví ñaha ra chi ñáyivi”, catyí ñu.

¹³ Soco yori cahán ndichin tuhun ra cha cuenda cha yuhví ñu chi ra cacuví nuu cuan.

¹⁴ Cha cusava iyó vico ta quihvi ra Jesús chichi vehe ñuhu cahnu quichahá cahan ra nuu ñáyivi. ¹⁵ Ta ra cacuví nuu cuan iyó cacuñí ra ta cacatyí ra chi ra tahan ra:

—¿Yoso caa chitó ra ihya ta ña sacuahá ra? —catyí ra.

¹⁶ Ta nacahan ra Jesús ta catyí ra:

—Tuhun cha sañahí, ñima cha cuenda mai cuví, soco cuenda ra cha tachí chii cuví.

¹⁷ Tatu yihí nyoho cha cuñí ndo sacuvi ndo cuhva cuñí Nyoo, cua coto ndo vatyí cuenda Nyoo sacote ta ñima cha cuenda mai. ¹⁸ Ra cha cahán cuenda maa, cahán ra na sacahnu ñáyivi chí ra. Soco ra nanducú cha sacahnu ñu chí Nyoo, ra cha tachí chí ra, ican ra cuan cahán cha ndicha. Ta ñahri cha sandaví ñaha ra.

¹⁹ ¿Atu ña ndicha vatyí ra Moisés chahá ley chí ndo? Soco ni noo nyoho ña quichahá ndo ley cuan. ¿Ñáá tuhun cuñí ndo cahñi ndo chii? —catyí ra.

²⁰ Ta nacahan ñáyivi ta catyí ñu chí ra:

—Noo tatyí ña vaha yihí chí yoho. Yori cuñí cahñi chuun —catyí ñu chí ra.

²¹ Ta catyí ra Jesús:

—Cha catyí noo milagru cha sacuvi quivi nyitatu yo, iyo xaan cuñí nyoho. ²² Soco ra Moisés catyí ra chí ndo vatyí sacuvi ndo costumbre circuncisión. Vasi ñima ra quichahá chihin tuhun cuan, soco ñáyivi chí ra ityi chata, casacuvi tyicuan caa. Yucuan chaha nyoho sacuví ndo costumbre cuan vasi tahán chí quivi nyitatu yo. ²³ Ta vityin, vaha tatu cha cuenda cha ña cuñí ndo nacahnu ndo ley ra Moisés sacuvi ndo tyicuan caa vasi quivi nyitatu yo tahán chí. Soco tatu tyicuan caa sacuvi ndo, ¿ñáá tuhun cha cuxaan ndo chii cha cuenda vatyí sanduvahí nanii coño ñuhu noo ra cuan quivi nyitatu yo? ²⁴ Ma tyaa ndo cuatyí siqui ñáyivi tatu ña chitó vaha ndo ñáá cha sacuvi ñu. Cuatu ndo nya nyehe vaha ndo, tyicuan ta cucoto ndo yoso caa sacutuñi ndo chihin cha ndaa ta chihin cha ndicha vaha.

Nu cahán ra Jesús tuhun maa ra

²⁵ Tyicuan ta suhva ñu iyó Jerusalén, quichahá ndaca tuhun ñu:

—¿Atu ñima chí ra ihya canducu ra cha cahñi ra? ²⁶ Ta maa ra nanyaá cuan cahán ra nuu ñáyivi. Ta yori maa catyí ñáá cha catyí chí ra. ¿O vasi ca chinó tucu iñi ra cacuví nuu vatyí ra ihya ra Cristo ra cuví rey cha saquichi Nyoo cuví ra? ²⁷ Soco yoó chitó yo

nya quitá ra ihya. Soco quivi quichi ra Cristo yori coto nya ityi quichi ra cuan —catyí ñu.

²⁸ Chitó ra Jesús tuhun cha ndatuhún ñu ihya cuhva cha sañahá ra chichi vehe ñuhu. Ta ñihi cahán ra ta catyí ra:

—¡An ñohó nuu ndo chii ta chitó ndo nya ityi quichi, cuñi maa ndo! Soco yuhu vachí soco ñima cuenda mai. Vachí cuenda ra cha tachí chii, ra cha cuví cha ndicha. Ta nyoho ña ñohó nuu ndo chi ra. ²⁹ Yuhu ñohó nui chi ra vatyí cuenda ra vachi, ta maa ra tachí chii —catyí ra Jesús.

³⁰ Tyicuan ta cuñí ñu tyihi ñu chi ra chichi vehe caa. Soco ni noo ñu ña tñin ñu chi ra cha cuenda vatyí ta chaa ca quivi cha tahán chi tñin ra chi ra. ³¹ Soco cuaha xaan ñu chinó iñi chi ra. Ta catyí ñu:

—Ican ra ihya cuví Cristo. ¿Atu cuaha ca milagru sacuvi inga ra tatu quichi ra? —catyí ñu.

Nu tachi ra cuví fariseo policia cuquehen chi ra Jesús cohon ra vehe caa

³² Cha chiñi ra fariseo cha cahán ñáyivi tuhun ra Jesús, maa ra ta ra cacuví nuu chi tata sutu catachí ra chi policia cuenda vehe ñuhu cuan cuquehen ra chi ra tyi cohon ra vehe caa. ³³ Tyicuan ta ra Jesús catyí ra:

—Cunyai chihin ndo suhva ri ca quivi. Yahá cuan ta cunuhi nu nyaá ra cha tachí chii. ³⁴ Nyoho cunanducu ndo chii. Soco ma ñañihi ndo chii. Vatyí ma cuví cuhun ndo nu cuacunyai —catyí ra Jesús.

³⁵ Tyicuan ta quichaha candaca tuhun ra cacuví nuu chi ñu Israel chi ra tahan ra:

—¿Nya cuhun ra ihya cha ma ñañihi yo chi ra? ¿O cuhun ra nu nyaá ra Israel cha ca iyó ñuu Grecia vatyí sañaha ra chi ñu iyó yucuan, vaha? ³⁶ ¿Ñáá cha cuñí chi catyí tuhun cahán ra chihin yo? Vatyí catyí ra: “Cuananducu ndo chii soco ma ñañihi ndo chii. Vatyí ma cuví cuhun ndo nu cucunyai” —tyicuan caa cacuví yuhu ra tuhun ra.

Ñu chinó iñi chi Nyoo cucohon Tatyí Ii ra añima ñu

³⁷ Quivi nu ndihi chiyo vico, yucuan quivi cha ñiñi ca. Ta quivi cuan ndicuitá ra Jesús ta ñihi cahán ra ta catyí ra:

—Tatu nya noo ndo ityi añima ndo tuhun Nyoo, ñaha ndo ta nachino iñi ndo chii. ³⁸ Ñu cha chinó iñi chii, chichi añima ñu cucono tari noo yuvi ndutya cha nyitó, tari cuhva catyí nu tutu Nyoo —catyí ra Jesús.

³⁹ Soco chihin cuan cuñí ra catyí ra vatyí ñu chinó iñi chi ra cunaquehen ñu Tatyí Ii Nyoo, vatyí quivi cuan ta quichi ca Tatyí Ii Nyoo vatyí ra Jesús, ta cunuhu ca ra nya gloria nu cusacahnu Sutú ra chi ra.

Nu cusin ñáyivi cha ña tahán iñi tuhun cahan ra

⁴⁰ Suhva ñáyivi cha chiñi ñu tuhun ihya, catyí ñu:

—Ndicha vatyí ra ihya profeta Nyoo cha nyaá quichi cuví ra —catyí ñu.

⁴¹ Ta inga ñu catyí ñu:

—Ican ra cuví Cristo —catyí ñu.

Soco inga ñu catyí ñu:

—¿Yoso caa cha ra Galilea cuví ra Cristo? ⁴² Vatyí nu tutu Nyoo catyí chi vatyí ra Cristo cucuvi ra ñáyivi vachi tata rey David ta ra ñuu Belén cucuvi ra tari ra David —catyí ñu.

⁴³ Tyicuan ta ñáyivi cuan canatahví sava ñu cha cuenda ra Jesús. ⁴⁴ Yihí ñu cuñí ñu quehen ñu chi ra cutyihí ñu chi ra chichi vehe caa. Soco yori tñn chi ra.

Ra cacuví nuu vehe ñuhu ña cachinó iñi ra chi ra Jesús

⁴⁵ Tyicuan ta policia vehe ñuhu cahnu cuan, cuanuhu coyo ra nu nyicú ra fariseo ta ra cuví nuu chi tata sutu. Ta candaca tuhun ra chi policia cuan ta cacatyí ra:

—¿Ñáá tuhun ña quehen ndo chi ra?

⁴⁶ Ta policia cuan cacatyí ra:

—¡Ni noo chaha ta ni yori tuhva cahan tari cahan ra cuan! —cacatyí ra.

⁴⁷ Tyicuan ta ra fariseo catyí ra chi policia cuan:

—¿Atu sandaví ñaha ndihi ra chi nyoho ñandihí?

⁴⁸ ¿Nyehe ndo vatyí ni noo ra cuví nuu chi ndi cha cuví ndi fariseo ta ña chinó iñi chi ra cuan? ⁴⁹ Soco maa ri ñáyivi cha ña chitó nyicón chi ra. Soco ña vaha ñu nuu Nyoo —catyí ra.

⁵⁰ Tyicuan ta ra Nicodemo, ra cha chahan nu nyaá ra Jesús cha cha cuaa, cuví ra noo ra fariseo, ta catyí ra chi ra:

⁵¹ —Catyí ley vatyí ma cuví tachi tuñi yo chi noo ra tatu ma cuñi xihna yo tuhun cahan ra, tacuhva coto yo ñáá cha sacuví ra —catyí ra chi ra.

⁵² Tyicuan ta canacahan ra ta cacatyí ra chi ra:

—¿Atu suri ra Galilea cuví tucu yoho? Sacuaha nu tutu Nyoo ta nyehun, vatyí ni noo ra chahá cuenda tuhun cahan Nyoo ta ña nyaá chi cha quichi ra ityi Galilea —cacatyí ra.

Ñaha sihi cha natuvi chihin rayii ta iyó yii ña

⁵³ Tyicuan ta tahan tahan ra cuanuhu coyo ra vehe ra.

8

¹ Soco ra Jesús cuahan ra yucu cha nañi Olivo. ² Ta cha inga quivi cuhva cha vachi cundichin, cuahan tucu ra inga chaha vehe ñuhu cahnu. Ta tandihí ñáyivi tuhva ñu nu nyaá ra. Ta maa ra chicunyaá ra ta quichaha cahan ra nuu ñu. ³ Tyicuan ta ra sacuahá cuenda ley ta ra cuví fariseo cha coyo ra chihin noo ñaha iyó yii vatyí natñn ra chi ña nu cuatyí ña chihin inga rayii. Ta cuatyaa ra chi ña mahñu ñáyivi nyicú cuan. ⁴ Ta quichaha cacatyí ra chi ra Jesús:

—Maestro, ñaha sihi ihya natñn ndi chi ña nu cuatyí ña chihin inga rayii. ⁵ Ta ley cha tyaa ra Moisés catyí chi vatyí nacahñi yo chihin yuu chi ñusihí cha sacuví tyehe caa. ¿Ta yoho, yoso caa catyun vitin? —catyí ra chi ra.

6 Cacatyí ra tuhun ihya chi ra Jesús cha cuenda cha nducú nyehe ra chi ra tacuhva tyaa ra noo cuatyí siqui ra. Tyicuan ta ra Jesús chicunyaá tyayí ra nu ñuhú ta quichaha tyaa ra letra nu ñuhú chihin nundaha ra. 7 Soco vatyí candacá tuhun ca ra chi ra, tyicuan ta nicuinanyaá ra ta catyí ra chi ra:

—Xihna ca nyoho cha ñahri cuatyí ndo quehen ndo yuu ta cañi ndo chí ña —catyí ra chi ra.

8 Ta nicunyaá tucu ra ta quichaha sañihi ra tyaa ra letra nu ñuhú. 9 Soco maa ra cha cachíñi ra tuhun ihya, tuví iñi ra tyi iyó tucu cuatyí maa ra. Ta quichaha quita coyo tahan tahan ri ra, quichaha xihna ca ra chahnu. Ta cuhva cha ndihi ra quitá coyo ta ndoo noo tuhun ca maa ra Jesús chihin ñaha sihi cuan mahñu nu nyicu ñáyivi. 10 Tyicuan ta nicuinanyaá ra Jesús ta nyehe ra tyi cha cuahan coyo ra cuan ta ndoo noo tuhun ri ca ñaha. Tyicuan ta catyí ra chí ña:

—¿Nya nyaá ra tyaa cuatyí sicun vityin? ¿Yori ni minoo ca ra cuñi cahñi chuun? —catyí ra chí ña.

11 Ta nacahan ña ta catyí ña:

—Ni nonga ra, Tata.

Tyicuan ta ra Jesús catyí ra chí ña:

—Ni yuhu ta ma cahñi chuun. Cuahan vityin. Ta ma sacuvi con cuatyí —catyí ra chí ña.

Ra Jesús cuví cha ndichin cha sandichin añima ñáyivi

12 Tyicuan ta cahan tucu ra Jesús nuu ñáyivi inga chaha, ta catyí ra chí ñu:

—Yuhu cuví ra cha sandichin añima ñáyivi iyó siqui ñuhu ñáyivi. Yóo cha nyicón chii, coo ñu noo ñáyivi chaa nu ndichin. Ta ma caca noo maa ñu nu ñaa iñi —catyí ra Jesús chí ñu.

13 Tyicuan ta ra cacuvi fariseo cacatyí ra chí ra:

—Yoho, cahun tumañi iñi cuenda maun. Ta yucuan ña ndicha —catyí ra chí ra.

14 Nacahan ra Jesús ta catyí ra:

—Vasi suri mai cahn tumañi iñi cuende, soco ndicha cha cahn vatyí yuhu chité nya ityi quichí ta nya ityi cuahín. Soco nyoho ña chitó ndo nya ityi quichí ni nya ityi cuahín. 15 Nyoho yatyin xaan cahan ndo cha caa ñáyivi. Soco yuhu, yori chí cahn cha caa. 16 Soco tatu catyí cha caa ñáyivi, catyí cha ndicha. Vatyí ñima noo ri mai nyehí, soco Suti ra cha tachi chí, ican ra nyehé chihin. 17 Nu ley nyoho nyaá vatyí tatu uvi ra chaha cha ndaa, cuñi chí chinó iñi yo cha ndaa cuan. 18 Ta vityin vaha, suri mai cuví cha ndaa cuenda mai. Ta Suti, ra cha tachí chí, cuví inga cha ndaa —catyí ra Jesús chí ra.

19 Tyicuan ta candacá tuhun ra chí ra:

—¿Nya nyaá sutun?

Ta ra Jesús catyí ra:

—Nyoho ña ñohó nuu ndo chí yuhu. Ta ni chí Suti ña

ñohó nuu ndo. Tyehe ta ñohó nuu ndo chii, cohon nuu ndo chi Suti —catyí ra.

²⁰ Tuhun ihya cahān ra Jesús cha ni ri ca cha sañahá ra chichi vehe ñuhu cahnu, nu nyaá caja nu tyihí ñáyivi xuhun. Soco yori tyihí chi ra vehe caa, vatyí ta chaa ca quívi cha tahán chi cohon ra.

“Nu cahun yuhu ma cuvi cahun ndo”, catyí ra Cristo

²¹ Ra Jesús catyí ra chi ra cacuvi fariseo inga chaha:

—Yuhu cuhin, ta nyoho cunanducu ndo chii, soco cucúvi ndo ta cundoo cuatyí ndo síqui ndo. Nu cuahan yuhu, nyoho ma cuvi cahun ndo —catyí ra Jesús chi ñu.

²² Tyicuan ta ra cacuví nuu chi ñu Israel cacatyí ra:

—¿Atu cucahñi maa ra chi ra? vatyí catyí ra vatyí ma cuvi cahun yo nu cuahan ra —cacatyí ra.

²³ Tyicuan ta ra Jesús catyí ra:

—Nyoho ra cuenda ityi yuvi ihya cuví ndo. Soco yuhu ra cuenda ityi síqui cuví. Nyoho ñu ñuhu ñáyivi ihya cuví ndo. Soco yuhu ñima ra ñuhu ñáyivi ihya cuví.

²⁴ Yucuan chaha catyí chi ndo vatyí cucúvi ndo ta cundoo cuatyí ndo síqui ndo. Vatyí tatu ña chinó iñi ndo cha yuhu cuví ra tinyaá cuatyí ndo, cundoo cuatyí ndo síqui ndo quívi cúvi ndo —catyí ra Jesús chi ra.

²⁵ Tyicuan ta quichaha candaca tuhun ra chi ra, ta catyí ra:

—¿Yóó ra cuví yoho?

Ta ra Jesús nacahan ra ta catyí ra:

—Cha yaha catyí chi ndo nyata quívi xihna ri. ²⁶ Cuaha xaan ca cha nyaá cha catyí chi ndo, ta cuaha xaan ca nyaá catyí cha caá ndo. Soco tuhun cha catyí yuhu chi ñáyivi iyó síqui ñuhu ñáyivi, tuhun cha chiñi cha cahán ra cha tachí chii cuví. Ta maa ra cahán ra cha ndicha —catyí ra.

²⁷ Soco maa ra cacuví nuu chi ñu Israel ña cutuñi iñi ra vatyí tuhun Nyoo Sutu yo cahán ra chihin ra. ²⁸ Yucuan chaha catyí ra chi ra:

—Cutyaa ndo chi ra cuví Rayi cha quichi nya gloria nu cruzi. Tyicuan ta cunacoto ndo vatyí yuhu cuví, ta cunacoto ndo vatyí tyiño sahí ñima cha cuenda mai sacuví, soco cahín cha sañahá Suti chii. ²⁹ Vatyí Suti, ra cha tachí chii, nyaá ra chihin. Ta ña sandoó ra chii cha maa ri mai. Vatyí yuhu tyicuan ri sacuví cuhva cuñi ra —catyí ra Jesús.

³⁰ Cha cahán ra Jesús tuhun ihya, cuaha ra quichaha chino iñi ra chi ra.

Ñu cha cuví Sehe Nyoo ta ñu cha sacuví cha quiñi caa

³¹ Tyicuan ta catyí ra Jesús chi ra cacuvi nuu chi ñu Israel cha chinó iñi chi ra:

—Tatu nyoho ta sañihi ca ndo sacuví ndo cuhva sañahí chi ndo, cuchaa ndo cuví ndo noo ñu yihí cuende. ³² Ta cunacoto ndo cha ndicha. Ta chihin cha ndicha cuan cundoo ndo libre —catyí ra.

³³ Ta canacahán ra ta catyí ra:

—Nyuhu ñáyiví vachi tata ra Abraham cuví ndi. Ta ni noo chaha ta cuví ca ndi musu chi ni noo ñáyiví. ¿Yoso caa cha catyí yoho tyi ndoo ndi libre? —catyí ra chi ra.

³⁴ Ta ra Jesús catyí ra:

—Cha ndicha catyí chi ndo vatyí tandihí ñu sacuví cha quiñi caa, musu cuenda cha quiñi caa cuví ñu. ³⁵ Noo musu ña nyaá ra vehe chitoho ra tyicuan ri. Soco noo sehe ra cuví chitoho cuan, nyaá ra tyicuan ri chihin sutu ra. ³⁶ Yucuan chaha tatu yuhu cha cuví Sehe Nyoo ta tave chi ndo ndaha ra ña vaha, ndicha cuii cucoo ndo libre. ³⁷ Cha chité vatyí ñáyiví chi ra Abraham cuví chi ndo. Soco yihí ndo cuñí ndo cahñi ndo chii, vatyí ña tñn cuenda ndo tuhun cahin. ³⁸ Yuhu cahín cha sañaha Suti chii. Ta nyoho sacuví ndo cha catyí sutu ndo chi ndo —catyí ra chi ra.

³⁹ Ta canacahan ra ta catyí ra:

—Sutu ndi cuví chi ra Abraham —catyí ra.

Soco ra Jesús catyí ra chi ra:

—Tyehe ta ndicha cha sehe ra Abraham cuví chi ndo, sacuví ndo cha sacuví ra. ⁴⁰ Soco nyoho, vasi catyí chi ndo cha ndicha cha sañaha Nyoo chii, nyoho cuñí ndo cahñi ndo chii. ¡Ra Abraham ña sacuví ra cha tyicuan caa! ⁴¹ Nyoho tari sacuví sutu ndo, sacuví ndo —catyí ra chi ra.

Tyicuan ta nacahan ra ta catyí ra:

—Nyuhu ñima sehe ndahvi ñu cuví chi ndi. Iyó noo ri

sutu ndi ta ican ra cuví Nyoo —catyí ñu.

⁴² Tyicuan ta ra Jesús catyí ra:

—Tyehe ta ndicha cha Nyoo cuví sutu ndo, nyoho cuñí ndo chii. Vatyí yuhu quite nu nyaá ra ta chaj nyehe. Ña vachí cuenda mai, soco Nyoo tachí chii. ⁴³ ¿Ñáá tuhun cha ña cutuñí iñi ndo tuhun cha catyí chi ndo? Cha cuenda tyi ña cuñí ndo tyasohó ndo tuhun cahín.

⁴⁴ Cuihna ican ra cuví sutu ndo. Ta sehe ra cuví chi ndo. Ta cuñí ndo sacuví ndo cuhva cuñí ra. Ra chahñi ñáyiví cuví cuihna nyata quiví xihna ri. Ni noo chaha ña sacuví ra cha ndicha. Ta ni noo chaha ña cahán ra cha ndicha. Cuhva cha cahán ra cuendu, cahán ra cuhva caá ra, vatyí cuendu ra. Ta sutu ñu cuendu cuví chi ra. ⁴⁵ Ta yuhu vatyí cahín cha ndicha, ña chinó iñi ndo chii. ⁴⁶ ¿Nya noo nyoho cuví catyí ndo vatyí yuhu iyó noo cuatyí? Ni noo ndo. Ta cha tyicuan caa cahín cha ndicha, ¿ñáá tuhun cha ña chinó iñi ndo chii? ⁴⁷ Ñu cuenda Nyoo tyasohó ñu tuhun cahán Nyoo. Soco vatyí nyoho ñima ñu cuenda Nyoo cuví ndo, yucuan chaha ña cuñí ndo tyasoho ndo tuhun cahín —catyí ra Jesús.

Ra Cristo, nyata nicumañi coo ra Abraham, ta cha iyó ra

⁴⁸ Tyicuan ta ra cacuví nuu chi ñu Israel cacatyí ra chi ra:

—¿Atu ña ndicha vatyí yoho ra ñuu Samaria cuvún, ta ñohó noo tatyí ña vaha chuun? —cacatyí ra chi ra.

49 Ta nacahan ra Jesús ta catyí ra:

—Ñahri tatyí ña vaha ñohó chi yuhu. Chi Suti sacahní. Ta nyoho cahán ña vaha ndo siqui. 50 Yuhu ña nanduquí nu sacahnu ñáyivi chii, soco iyó noo ra nanducú cha sacahnu ñu chii. Ta maa ra cunyehe ra tatu sacahnú ndo chii. 51 Cha ndicha catyí vatyí ñu quichahá tuhun cahín ma chaa tuhun chihi añima ñu —catyí ra Jesús chi ra.

52 Tyicuan ta ra Israel cuan canacahan ra ta catyí ra:

—Vityin chitó vaha ndi vatyí yihí noo tatyí ña vaha chuun. Vatyí ra Abraham ta tandihi ra cuví profeta Nyoo cachihí ra. Ta yoho catyún vatyí ñu quichahá tuhun cahún ma cúvi maa ñu. 53 ¿Atu cahnu ca ra cuví yoho ican saha sutu ndi ra Abraham? Maa ra chihí ra ta ra cuví profeta Nyoo ñandihí. ¿Yóo ra cuví yoho cuñí maun? —catyí ra chi ra.

54 Ta nacahan ra Jesús ta catyí ra:

—Tatu suri mai sacahní chii, ñahri maa vale cuan. Soco ra sacahnú chii, ican cuví Suti. Ta suri maa ra cuví cha catyí nyoho tyi Nyoo cuenda ndo cuví chi ra. 55 Soco nyoho ña ñohó nuu ndo chi ra. Yuhu, ñohó nui chi ra. Ta tatu catyí tyi ña ñohó nui chi ra, cuví noo ra cuendu tari nyoho. Soco yuhu ndicha cha ñohó nui chi ra, ta quichahí tuhun cahán ra. 56 Ra Abraham sutu chahnu ndo cusí xaan cuñí ra vatyí cunyehe ra quívi

quichi yuhu siqui ñuhu ñayivi. Ta nyehe ra ta cusí xaan cuñí ra —catyí ra Jesús chi ñu.

57 Tyicuan ta ra Israel cuan cacatyí ra chi ra Jesús:

—Ni uvi xico uchi cuiya ta quita con, ta catyún tyi nyehun chi ra Abraham.

58 Ta ra Jesús nacahan ra ta catyí ra:

—Cha ndicha catyí chi ndo vatyí nyata ni cumañi coo ra Abraham ta cha iyó yuhu —catyí ra Jesús chi ra.

59 Tyicuan ta quehen ra yuu vatyí cañi ra chi ra Jesús. Soco maa ra quíhví xehe ra, ta quita ra chíchi vehe ñuhu cuan. Ta yahá ra mahñu ra ta cuahan ra.

9

Nu sanduvahá ra Jesús chi noo ra cha cuaa nyata cacu

1 Cuhva cha yahá ra Jesús noo nu yahá ra, nyehe ra chi noo ra cha cuaa nyata cacu.

2 Ta quichahá ndaca tuhun ra cachicá noo chihin ra Jesús chi ra:

—Maestro, ¿ñáá tuhun cha cacu cuaa ra ihya? ¿Atu cha cuenda cuatyí sihi ra ta sutu ra, o cha cuenda cuatyí maa ra? —cacatyí ra chi ra.

3 Ta ra Jesús nacahan ra ta catyí ra:

—Ñima cuatyí maa ra, ta ni ñima cuatyí sihi ra ta sutu ra. Soco cha cuenda vatyí cuví sañaha Nyoo tunyee íñi ra chihin ra. 4 Cha ni ri ca cha ñicahñu, cuñí chi cha sacuvi tyiño ra cha tachí chii. Vatyí vachi cha cuaa cha ma cuví ca saha tyiño yo. 5 Cha ni ri

ca cha nyaí siqui ñuhu ñayivi ihya, ñuhu ndichin cuenda ñayivi iyó siqui ñuhu ñayivi cuví.

⁶ Cha yaha cha catyí ra Jesús tuhun ihya, ta tyicu sii ra nu ñuhú. Ta savaha ra chiin nyahyu chihin sii ra ta tyaa ra chiti nuu ra cuaa cuan. ⁷ Tyicuan ta catyí ra chi ra:

—Cuahan cuanacatyá nuun nya tanque Siloé cuan. —Sivi cuan cuñí chi catyí: “Tachi Chuun.”

Tyicuan caa ta ra cuaa cuan chahan ra chinacatyá ra nuu ra. Ta kuhva cha nachaa ra, cha nyehe ra. ⁸ Tyicuan ta ñu nyicú yatyin yuvehe ra, ta ñu cha nyehe chi ra cha cucuaa ra ta cayá ra, catyí ñu:

—¿Atu ñima ra ihya cuví cha tuhva chinyaa chican caridaa? —catyí ñu.

⁹ Yihí ñu catyí ñu:

—Ican ra.

Inga ñu catyí ñu:

—Ñima ra cuví ra, soco ndacú xaan ra chi ra.

Soco maa ra catyí ra:

—Ican yuhu cuví —catyí ra.

¹⁰ Tyicuan ta quichaha candaca tuhun ñu chi ra:

—¿Ta yoso caa cha cuví nyehun vityin? —catyí ñu.

¹¹ Ta catyí ra:

—Ra cha nañí Jesús cuan, ican savaha nyahyu ta tyaa ra chiti nui ta catyí ra chii: “Cuahan nya tanque Siloé ta nacatyon nuun.” Tyicuan ta chahin. Ta cha yaha nacatye nui ta nanyehi —catyí ra chi ñu.

¹² Tyicuan ta quichaha ndaca tuhun ñu chi ra:

—¿Nya nyaá ra cuan vityin?

Ta maa ra catyí ra:

—Ña chité —catyí ra chi ñu.

Nu casanahma ra cuví fariseo chi ra cha cucuaa ta nanyehé

¹³ Tyicuan ta chinyaca ñu chi ra cha cucuaa cuan nuu ra cuví fariseo. ¹⁴ Vatyí quivi cha savaha ra Jesús nyahyu ta sanduvaha ra chi ra cha cucuaa cuan, quivi nyitatú yo cuví. ¹⁵ Yucuan chaha ra fariseo candaca tuhun tucu ra chi ra yoso caa cha vatyí nanyehé ra. Ta maa ra catyí ra:

—Tyaa ra nyahyu chiti nui, ta nacatye ta vityin ndichin nyehí —catyí ra chi ra.

¹⁶ Tyicuan ta suhva ra fariseo cacatyí ra:

—Ra cha sacuvi tyehe caa ñima ra cuenda Nyoo cuví ra, vatyí ña sahá ra ñayivi quivi nyitatú yo —cacatyí ra.

Soco inga ra cacatyí ra:

—¿Yoso caa cha cuví sacuvi ra milagru ihya tatu ra iyó cuatyí cuví ra? —catyí ra.

Ta siin siin cha cacahan ra. Ta cacusiin ra. ¹⁷ Ta candaca tuhun tucu ra inga chaha chi ra cha cucuaa cuan, ta catyí ra chi ra:

—¿Ta yoho, ñáá catyún cuenda ra cha sanduvaha chiti nuun? —catyí ra.

Ta nacahan ra ta catyí ra:

—Yuhu catyí vatyí noo profeta cuenda Nyoo cuví ra —catyí ra.

¹⁸ Soco ra cacuvi nuu chi ñu Israel ña cuñí ra chino iñi ra cha cucuaa ra cuan ta vityin

nyehé ra. Ta nyacua nya cha cacana ra chi sihi ra ta chi sutu ra cha nduvaha cuan. ¹⁹Ta candaca tuhun ra chi ñu, ta catyí ra:

—¿Atu ican ra ihya cha cuví sehe ndo cha catyí ndo tyi cuaá ra ta cacu ra? ¿Yoso caa cha cuví nyehe ra vityin? —catyí ra.

²⁰Ta nacahan sutu ra ta sihi ra ta catyí ñu:

—Chitó ndi vatyi ican ra ihya cuví sehe ndi. Ta cuaá ra nyata cacu ra. ²¹Soco ña chító ndi ñáá tuhun cha cuví nyehe ra vityin. Ta ni ña chító ndi yóo cha sanduvaha chiti nuu ra. Ndaça tuhun ndo chi maa ra. Cha iyó cuiya ra. Ta cuví nacatyí maa ra chi ndo —catyí ñu chi ra.

²²Sutu ra sihi ra catyí ñu tyehe caa cha cuenda cha yuhví ñu chi ra cacuví nuu chi ñu Israel, vatyi cha catyihí tahan ra tuhun vatyi cutava ñehe ra chi ñu vehe ñuhu, yóo ri ñu cha catyí vatyi ra Jesús cuví Cristo. ²³Yucuan chaha catyí ñu: “Cha ñihi ra. Ndaça tuhun ndo chi maa ra.”

²⁴Tyicuan ta canacana tucu ra chi ra cha cucuaa cuan inga chaha. Ta cacatyí ra chi ra:

—Chihin nuu Nyoo catyi cha ndicha chi ndi. Vatyi nyuhu chító ndi tyi rayii cuan, ra iyó cuatyí cuví ra —cacatyí ra.

²⁵Tyicuan ta nacahan ra cha cucuaa cuan ta catyí ra:

—Yuhu ña chité tatu ra iyó cuatyí cuví ra, o ñima. Soco noo ri cha chité vatyi yuhu

cucuaí, ta vityin ndichin nyehí —catyí ra.

²⁶Ta candaca tuhun tucu ra chi ra inga chaha ta catyí ra:

—¿Ñáá cha sacuví ra chuun? ¿Yoso caa sacuví ra ta nanyehún? —cacatyí ra chi ra.

²⁷Ta catyí ra:

—Cha catyi chi ndo, ta ña quichahá ndo chii. ¿Ñáá tuhun cha cuñí ndo cha catyi inga chaha? ¿Atu cuñí tucu nyoho cunyicon ndo chi ra?

²⁸Tyicuan ta cacahan ra chi ra, ta catyí ra:

—Yoho yihún cuenda ra, soco nyuhu cuenda ra Moisés yihí ndi. ²⁹Nyuhu chító ndi tyi Nyoo cahan chihin ra Moisés. Soco ra cuan, ña chító ndi nya quita ra —cacatyí ra.

³⁰Tyicuan ta nacahan ra cucuaa cuan ta catyí ra:

—¡Ñana vaha cha cuví ihya! Nyoho ña chító ndo nya quita ra, ta chi yuhu sananyehe ra.

³¹Chító vaha yo vatyi Nyoo ña tyasohó ra nu chicán ra iyó cuatyí. Soco ra cha sacahnú chi ra ta sacuví cuhva cuñí ra, tyasohó Nyoo nu chicán ra cuan. ³²Ni noo chaha ta cuñi ca yo vatyi iyó noo ra sananyehe chi noo ra cuaá nyata cacu. ³³Tyehe ta ra ihya ta ñima cuenda Nyoo vachí ra, ñahri cha cuví sacuvi ra —catyí ra chi ra.

³⁴Tyicuan ta cacatyí ra chi ra:

—Yoho ra iyó cuatyí cuvún nyata cacun. ¿Ta cuñun sañahun chi nyuhu? —cacatyí ra.

Ta catava ñehe ra chi ra vehe ñuhu.

Ñu cha ñahri tuhun Nyoo caa aña tari cha cuaa ñu

³⁵ Ra Jesús chitó ra vatyí catava ñehe ra chi ra cucuaa cuan vehe ñuhu. Ta cuhva cha nañihí ra chi ra ta catyí ra chi ra:

—¿Atu chinó iñi yoho chi Rayí cha quichi nya gloria? —catyí ra chi ra.

³⁶ Ta nacahan ra ta catyí ra: —Tata, catyí chii, yóo ra cuví ra vatyí chino iñi chi ra —catyí ra chi ra.

³⁷ Ta ra Jesús catyí ra: —Cha nyehun chi ra. Ta ican ra ndatuhún chuhun —catyí ra chi ra.

³⁸ Tyicuan ta chicuiñi chiti ra chaha ra Jesús ta catyí ra chi ra:

—Chinó iñi chuun, Sutu Mañi yuhu —catyí ra chi ra Jesús.

³⁹ Ta ra Jesús catyí ra: —Yuhu vachí vatyí catyí cha caá aña ñáyivi iyó siqui ñuhu ñayivi ihya. Vatyí ñu cuaa, ñu ña chitó tuhun Nyoo cunanyehe ñu vatyí cucava tuhun Nyoo aña ñu. Ta ñu cuñí maa tyi ndichin nyehe tyi catyí ñu tyi chitó ñu tuhun Nyoo, coto ñu tyi cuaa ñu tyi ña chinó iñi ñu chii —catyí ra Jesús.

⁴⁰ Tyicuan ta suhva ra cuví fariseo cha nyicú yucuan chiñi ra cha cahan ra Jesús, ta catyí ra chi ra:

—¿Atu cuaa tucu nyuhu ñandihí? —catyí ra.

⁴¹ Tyicuan ta catyí ra Jesús chi ra:

—Tyehe ta cuaa nyoho, nicohón nuu ndo tyi chiñuhú tuhun Nyoo chi ndo, ta ma coo cuatyí ndo. Soco vatyí catyí ndo tyi nyehé ndo ta chitó ndo, yucuan chaha ndoó cuatyí siqui ndo —catyí ra chi ra.

10

Mbee sana Nyoo cuví ñáyivi yihí cuenda ra, ta ñohó nuu ñu chi ra cha tachí Nyoo vatyí sahá cumi ra chi ñu

¹ Cahán ca ra Jesús ta catyí ra:

—Cha ndicha catyí chi ndo, tatu noo ra cuaquihvi chichi noo chacu mbee, ta cha nuu cha quihví ra yuhu chacu, quihví ra inga ityi, ra suhu cuví ra. ² Soco ra quihví ityi yuhu chacu, ra sahá cumi mbee cuan cuví ra. ³ Ra nyaá yuhu chacu cuan nuña ra na quihvi ra sahá cumi mbee cuan. Ta mbee cuan nicohón soho ti ndusu ra. Noo noo ti ta iyó sivi ti sahá ra, ta cana ra chi ti ta tavá ra chi ti ityi chata chacu. ⁴ Ta cha yaha tava ra chi ti, ta cuahan ra ityi nuu ti ta nyicón ti chi ra, vatyí nicohón soho ti ndusu ra. ⁵ Soco tatu ña ñohó soho ti ndusu ra, chinó ti chi ra ta ma cunyicon ti chi ra.

⁶ Tyehe caa tuhun cahan ra Jesús chihin ñu. Soco maa ñu ña cutuñí iñi ñu ñáá tuhun cuñí ra cahán ra cha tyicuan caa.

Ra Jesús cuví ra sahá cumi vaha mbee

⁷ Tyicuan ta catyí ra Jesús inga chaha chi ñu:

—Cha ndicha catyí chi ndo vatyí yuhu cuví tari noo yuhu chacu nu quihví coyo ñáyiví cuende cha cuví ñu tari mbee sane. ⁸ Tandihí ra cha yaha caquichí coyo, ra suhu cacuví ra. Soco mbee ña quichaha ti cha cacahan ra. ⁹ Yuhu cuví yuvehe gloria. Ñu quihví cuende, cacú ñu cha ma cuhun ñu anyaya. Ta cuví ñu tari noo mbee cha quihví ta quitá chichi chacu cuan. Ta ñihí ti cuhu cachi ti.

¹⁰ 'Noo ra suhu vachí ra, soco vachí suhu ra, vachí cahñi ra, vachí sativí ra. Soco yuhu vachí vatyí coo ndo noo ñáyiví chaa cha ma naa ca maa. ¹¹ Yuhu cuví noo ra vaha sahá cumi mbee. Vatyí ra sahá cumi mbee chahá ra ñáyiví ra cuenda sana ra. ¹² Soco ra cuví musu, tatu nyehé ra vachí lobo cha cuví noo quití xaan, sandoo maa ra chi mbee sana chitoho ra. Ta chinó ra. Vatyí ñima sana maa ra cuví ti. Tyicuan ta tiin quití xaan chi mbee cuan. Ta saquicono ti chi ti ityi cuan ityi ihya. ¹³ Musu cuan chino ra cha cuenda vatyí cha cuenda xuhun ri sahá tyiño ra. Ta ñahri cuenda ra chi mbee, tyí ñima sana ra cuví.

¹⁴ 'Yuhu cuví ra sahá cumi vaha mbee sane. Ta ñohó nui chi ti. Ta maa ti ñohó nuu ti chii, ¹⁵ tari ñohó nuu Suti chii, ta yuhu ñohó nui chi ra. Yuhu chahí ñáyiví cuenda mbee sane. ¹⁶ Iyó tucu inga mbee sane cha ñima chichi chacu ihya iyó ti. Cuñí chi cha cuhin cunaquehin chi ti. Ta cuquichaha ti chii. Ta coo noo

ri nu quihí tandihí ti. Ta noo ri ra sahá cumi chi ti cucoo.

¹⁷ 'Suti cuñí ra chii vatyí chahí ñáyiví cha catyí ñáyiví cuende. Soco yaha cuan, nacuhva tucu ra ñáyiví inga chaha. ¹⁸ Yori tinyaa ñáyiví, soco cha iyó vaha iñi mai ta chahí. Iyó ityi chii cha cuhve ñáyiví ta cúvi, ta iyó tucu ityi chii cha naquehen tiqui inga chaha vatyí cunandote. Ican ihya cuví tyiño cha tyaa Suti chii —catyí ra Jesús.

¹⁹ Cha cachiñi tucu ra cacuví nuu chi ñu Israel tuhun cha cahán ra Jesús ihya, cacusin tucu ra chihin tahan ra inga chaha. ²⁰ Ta cuaha xaan ra catyí ra:

—¿Ñáá tuhun cha quichaha ndo chi ra chiña? Ta yihí noo tatyí ña vaha chi ra, ta loco ra —cacatyí ra.

²¹ Ta inga ra catyí ra:

—Yori ñu ñohó tatyí ña vaha chi cahán tyehe caa. ¿Atu cuví sananyehe noo tatyí ña vaha chi noo ra cuaa? —catyí ra.

Nu ña cuñí ra cacuví nuu chi ñu Israel chi ra Jesús

²² Nya ñuu Jerusalén yoo vichin cuví. Ta sanducahnú ñu noo vico quiví nanduchin cuiya cha suhñi ñu vehe ñuhu cahnu cuan. ²³ Ta ra Jesús chicá noo ra vehe ñuhu cuan ityi corredor ra Salomón. ²⁴ Ta ra cacuví nuu chi ñu Israel cachicuitayucu cutya ra nuu ra. Ta quichaha ndaca tuhun ra chi ra:

—¿Ama catyí cachun chi ndi tatu icon cuví Cristo? ingaña ri catyí cachi chi ndi.

25 Ta ra Jesús catyí ra:

—Cha yaha catyi chi ndo, ta ña chinó iñi ndo chii. Tyiño sacuví nuu Suti ican cuví cha ndaa cuende. 26 Soco nyoho ña chinó iñi ndo chii vatyí ñima mbee sane cuví chi ndo. Tari cuhva catyí chi ndo ndaa ri. 27 Mbee sane nicohón soho ti ndusi, ta yuhu ñohó nui chi ti. Ta maa ti nyicón ti chii. 28 Yuhu chahí ñayivi cha ma naa ca maa coo ti. Ta ma cunaa ti. Ta ni yori maa cuví tinyaa chi ti chichi ndahi. 29 Maa Suti chaha chi ti chii. Ta cahnu ca cuví maa ra ican saha tandihi ca. Ta yori cuví tinyaa chi ti chichi ndaha ra. 30 Yuhu ta Suti Nyoo, noo ri cuví ndi —catyí ra Jesús.

31 Tyicuan ta ra cacuví nuu chi ñu Israel cuan caquehen tucu ra yuu vatyí tuchi ra chi ra. 32 Ta ra Jesús catyí ra chi ra:

—Cuaha xaan cha vaha sacuví yuhu nuu ndo chihin tunyee iñi Suti. ¿Ta nya cuenda cuan cua tuchi ndo yuu chii? —catyí ra Jesús chi ra.

33 Ta ra cacuví nuu chi ñu Israel cuan cacatyí ra:

—Ñima cha cuenda noo cha vaha sacuvun cutuchi ndi yuu chuun, soco cha cuenda vatyí yahun nuu Nyoo chihin tuhun cahún. Noo rayi ri cuvún, soco sahún tari Nyoo chuun —cacatyí ra chi ra.

34 Tyicuan ta catyí ra Jesús chi ra:

—Nu tutu tuhun Nyoo nyaá vatyí Nyoo catyí ra: “Nyoho cuví ndo nyoo”, catyí Nyoo.

35 Chitó yo vatyí cha cahán

tuhun Nyoo, ma cuvi catyi yo tyi ña ndicha. Ta Nyoo sacunañi ra nyoo chi ñu naquehén tuhun cahán ra. 36 Ta tatu maa Nyoo nacachi chi yuhu ta tachi ra chii siqui ñuhu ñayivi ihya ¿yoso caa catyí nyoho vatyí yaha yuhu nuu Nyoo nu catyí tyi Sehe Nyoo cuví chii? 37 Tatu ña sacuví cha sacuví Suti, ma chino iñi ndo chii. 38 Soco tatu sacuví, vasi ma chino iñi ndo chii, soco chino iñi ndo tyiño sacuví. Tyicuan ta cucoto cachi ndo vatyí Nyoo Suti ñn ri cuví ra chihin. Ta yuhu ñn ri cuví chihin Nyoo Suti —catyí ra Jesús.

39 Inga tucu chaha cacuñi ra catyí ra chi ra vehe caa, soco ra Jesús cuahan ri ra. 40 Tyicuan ta cuanuhu ra ityi nu caña ñanyii inga chiyo yuvi cahnu Jordán cuan nu sacondutyá ra Juan ta xihna ri. 41 Cuaha ñayivi chahan chinyehe chi ra, ta catyí ñu:

—Ndicha, vasi ni noo milagru ña sacuví ra Juan, soco tandihi tuhun cha cahan ra cuenda ra ihya ta ndicha —catyí ñu.

42 Ta cuaha xaan ñu cachiño iñi ñu chi ra Jesús ityi cuan.

11

Nu chihí ra Lázaro

1 Iyó noo ra cuhví cha nañi Lázaro ñuu Betania nu cuví ñuu cu María ta cu Marta cuhu ña. 2 Ta cu María, cuhva ra Lázaro cuan ican ña cuví ñaha cha choso ndutya vixi chahán chaha Sutu Mañi yo, ta chihin ixi xiñi ña nacuhva

ña. ³ Ta tyicuan caa n̄nduvi tahan ñu, cu María chihin cuhu ña, tach̄i ñu tyiño na cucatyí ra chi ra Jesús tyehe caa;

—Sutu Mañi ndi, amigon cuhví ra —catyí ñu, tach̄i ñu tyiño.

⁴ Ta cha chiñi ra Jesús tuhun ihya ta catyí ra:

—Cuehe cuan ma cahñi chi chi ra. Cuhví ra tyehe caa tacuhva vatyí quiví nduvaha ra cunyehe ñáyiví tyi cahnu xaan ca ra cuví Nyoo ta tyicuan caa tucu Sehe ra —catyí ra Jesús tuhun maa ra.

⁵ Cuñí vavaha ra Jesús chi cu Marta ta chi cuhu ña, ta chi cuhva ña, ra Lázaro.

⁶ Soco cuhva cha catyí ñu chi ra tyi cuhví ra Lázaro, ndoo ra nu ñohó ra uvi ca quiví.

⁷ Tyicuan ta catyí ra chi ra cachicá noo chihin ra:

—Coho ndo inga chaha nya Judea —catyí ra.

⁸ Tyicuan ta ra cachicá noo chihin ra cacatyí ra chi ra:

—Maestro, ta cunaha ca cha cuñí ra cacuví nuu chi ñu Israel cahñi ra chuun chihin yuu. Ta vityin, ¿inga chaha cuñún cuhun yucuan? ¿Ñáa tuhun?

⁹ Ta catyí ra Jesús:

—¿Atu ñima uchi uvi hora iyó noo quiví? Vatyí tatu cha ñicahñu chicá noo noo ra, ma nduva ra vatyí ndichin nyehé ra ta sacuví ra tyiño nuu Nyoo. ¹⁰ Soco tatu cha cha cuaa chicá noo ra, nduva ra vatyí ñahri ñuhú.

¹¹ Tyicuan ta quichaha catyí tucu ra Jesús:

—Amigo yo, ra Lázaro quixí ra. Soco cuhin cusandoye chi ra —catyí ra chi ra.

¹² Tyicuan ta catyí tucu ra cachicá noo chihin ra:

—Tata, tatu quixí ra, cuñí chi catyí vatyí cuanduvaha ra —cacatyí ra.

¹³ Soco ra Jesús cuñí ra catyí ra vatyí cha chih̄i ra Lázaro. Ta ra cachicá noo chihin ra, cuñí maa ra vatyí cha ndicha quixí ra cuan. ¹⁴ Tyicuan ta catyí cachi ra Jesús chi ra:

—Ra Lázaro cha chih̄i ra.

¹⁵ Ta cusii cuñí vatyí yori chinyaá yucuan. Vatyí tyicuan caa vaha ca cha cuenda nyoho, tacuhva chino iñi ndo chii. Coho ndo cunyehe ndo chi ra —catyí ra chi ra.

¹⁶ Tyicuan ta ra Tomás, cha catyí ñu: “ra tinihi cuan”, catyí ra chi inga ra cachicá noo chihin ra Jesús:

—Coho tucu yo vatyí cúvi yo ñn ri chihin ra —catyí ra.

Ra Jesús cuví ra sanandotó chi yo ta chahá ra ñayiví coo yo

¹⁷ Cha chaá ra Jesús Betania, ñih̄i ra tuhun vatyí ra Lázaro cha cumi quiví ñohó ra chichi ñuhú. ¹⁸ Ñuu Betania cuan nyaá chi vatyin ri nu nyaá ñuu Jerusalén, tari noo uvi kilómetro sisava. ¹⁹ Ta cuaha ra cacuví nuu chi ñu Israel cuahan ra cuanyehe ra nu nyaá cu Marta ta cu María vatyí chih̄i cuhva ñu. ²⁰ Ta ñih̄i cu Marta tuhun vatyí cha cuachaa ra Jesús. Ta cuahan ña cuasatahan ña chi ra. Soco cu María ndoo ña vehe. ²¹ Ta cu Marta catyí ña chi ra Jesús:

—Sutu mañi yuhu, tyehe ta nyaun ihya, ma cúvi cuhve.
 22 Soco yuhu chité vatyí Nyoo cusacuvi ra tandihí cha cacon chí ra —catyí ña chí ra.

23 Ta ra Jesús catyí ra chí ña:

—Cuhvon cunandoto ra.

24 Ta cu Marta catyí ña:

—Ndicha, chité vatyí cunandoto ra quivi nandoto ndiyi nu cuandihí quivi —catyí ña.

25 Tyicuan ta catyí ra Jesús chí ña:

—Yuhu cuví ra sanandotó chí ndiyi. Ta chahí cha conyito ñayivi. Ñu chinó iñi chii, vasi cha chihí ñu soco coo tucu ñu. 26 Ta tandihí ñu nyitó ca ta chinó iñi ñu chii, ma cúvi maa ñu. ¿Atu chiñó iñun tuhun ihya? —catyí ra chí ña.

27 Ta maa ña catyí ña:

—Chinó iñi, Sutu Mañi yuhu, vatyí yoho cuvún Cristo Sehe Nyoo, ra cha nyaá cha quichi síqui ñuhu ñayivi ihya —catyí ña.

Nu chacu ra Jesús nu ñaña ra Lázaro

28 Cha yaha cha catyí cu Marta tuhun ihya, ta chahan ña chiquehen ña chí cuhu ña, cu María, ta catyí xehe ña chí ña:

—Cha cha Ra Sacuaha. Ta tachí ra tyiño nacuhun nu nyaá ra —catyí ña.

29 Ta cha chiñi cu María tuhun ihya, nducuita ri ña, ta cuahan ña nu nyaá ra Jesús,
 30 Ta ra Jesús ta quihvi ca ra chichi ñuu cuhva cuan, nyaá ra nu nañihí cu Marta chí ra.
 31 Ta nya vehe cu María, nyicú ra cacuví nuu chí ñu Israel

tyinyeé ra chí ñu. Ta nyehe ra vatyí numi ri quitá ña. Ta cuñi maa ra tyi cuahan ña nu ñaña cuacuacu ña. Ta cuahan coyo ra chata ña.

32 Ta cuhva cha cha cu María nu nyaá ra Jesús chicuiñi chiti ña chaha ra, ta catyí ña:

—Sutu Mañi yuhu, tyehe ta chinyaun ihya, cuhve ma cúvi ra —catyí ña.

33 Nyehe ra Jesús cha chacu cu María chihin ra Israel cha vachi coyo chihin ña, ta nducuihya xaan cuñi añima ra.

34 Ta ndaca tuhun ra chí ñu:

—¿Nya maa maa tyihí ndo chí ra? —catyí ra.

Ta catyí ñu:

—Tata, coho ta nyehun —catyí ñu chí ra.

35 Ta ra Jesús chacu ra.

36 Tyicuan ta catyí ra Israel cuan:

—Nyehe ndo yoso cha cuñi ra chí ra —catyí ra.

37 Soco suhva ñu catyí ñu:

—Ican ra ihya cha sananyehé chí ra cuaa cuan. ¿Atu ña cuví sanduvaha tucu ra chí ra Lázaro ihya? —catyí ñu.

Nu sanandoto ra Jesús chí ra Lázaro

38 Nducuihya cuñi ra Jesús inga chaha ta tuhva ra nu ñaña cuan. Noo chichi yuu cuví. Ta nyasí noo yuu yuhu chí. 39 Ta catyí ra Jesús:

—Sacanyaha ndo yuu chiña —catyí ra.

Ta cu Marta, cuhva ndiyi cuan, catyí ña:

—Soco cha cañá xico, Sutu Mañi yuhu, vatyí cha cumi quívi cha chihí ra —catyí ña.

⁴⁰ Soco ra Jesús catyí ra chi ña:

—¿Atu ña cha catyí chuun vatyí tatu chinó iñun, cun-yehun yoso cha cahnu cuví Nyoo? —catyí ra chi ña.

⁴¹ Tyicuan ta sacanyaha ñu yuu cuan. Ta ra Jesús nanyehé ndaa ra ityi andívi, ta catyí ra:

—Sutu Mañi yuhu, tyahvi nyoo chuun tyi chiñun cha cahín. ⁴² Yuhu chité vatyí tyicuan ri chiñún tuhun cahín. Soco tyehe caa cahín cha cuenda cha vaha chi ñáyivi nyicú ihya, tacuhva nachino iñi ñu tyi yoho tachí chii —catyí ra Jesús chi Nyoo.

⁴³ Cha yaha cha catyí ra tuhun ihya, canachaa ra, ta catyí ra:

—¡Lázaro, quita chiña!

⁴⁴ Ta quita ra cha chihí cuan, nuhñí ndaha ra ta nuhñí chaha ra chihin sahma. Ta nuhñí nuu ra chihin noo sahma. Ta ra Jesús catyí ra chi ñáyivi nyicú yucuan:

—Ndachi ndo chi ra. Ta saña ndo chi ra nacuhun ra —catyí ra Jesús chi ñu.

Nu nducú cahñi ñu chi ra Jesús

(Mt. 26.1-5; Mr. 14.1-2; Lc. 22.1-2)

⁴⁵ Ta cuaha xaan ra cacuví nuu chi ñu Israel cha chahan coyo chihin cu María nachino iñi ñu cha nyehe ñu cha sacuví ra Jesús. ⁴⁶ Soco suhva ra chahan ra chisacoto ra chi ra fariseo cha sacuví ra Jesús.

⁴⁷ Tyicuan ta ra fariseo ta ra cacuví nuu chi tata sutu sacoo ra noo junta ta cacatyí ra:

—¿Ñáá cha sacuví yo? Vatyí cuaha xaan milagru sacuví ra cuan. ⁴⁸ Tatu cuhva yo cha sacuví ca ra tyicuan caa, tandihí ñáyivi cuchino iñi ñu chi ra. Ta ra cacuví tyiño nya ñuu Roma cuquichi ra ta cusatani ra vehe ñuhu yo ta ñuu yo —cacatyí ra chi ra tahan ra.

⁴⁹ Soco ra cuví nuu cahnu ca chi tata sutu cuiya cuan, ra nañí Caifás cahan ra ta catyí ra chi ra:

—Nyoho ñahri maa cha chitó ndo. ⁵⁰ Ni ña cutuñí iñi ndo vatyí vaha ca cha cúvi noo ri rayi cha cuenda tandihí ñáyivi ñuu, ta ñima ca cha cúvi tandihí yo —catyí ra Caifás.

⁵¹ Soco ra Caifás cuan ñima cha cuñí maa ra ta cahán ra, soco vatyí ra cuví nuu cahnu ca chi tata sutu cuiya cuan cuví ra, yucuan chaha maa Nyoo sacahan chi ra. Vatyí catyí ra vatyí ra Jesús cucúvi ra cha cuenda tandihí ñáyivi ñuu Israel. ⁵² Ta ñima cha cuenda ri ñu cuan, soco vatyí cusandu in ri ra chi tandihí ñu cuví sehe Nyoo cha iyó inga ñuu ñandihí. ⁵³ Yucuan ta nyacua nya quívi cuan ta ra cacuví nuu chi ñu Israel cuan, nducu ra cuhva yoso caa cahñi ra chi ra Jesús.

⁵⁴ Yucuan chaha tyi ra Jesús ña chicá noo ndichin ca ra nu nyicú ñu Israel. Ta quita ra ityi Judea cuan. Ta cuahan ra noo ñuu cha nañí Efraín cha nyaá yatyin ri ñuhu ityi.

Ta yucuan ndoó ra chihin ra cachicá noo chihin ra.

⁵⁵ Ña cuaha ri ca quiví ta chaá vico cuenda ñu Israel, vico cha nañí pascua. Ta cuaha xaan ñáyiví quita ñu ñuu ñu ta cuahan ñu Jerusalén cuasacuví ñu cha tuhvá maa ñu sacuví cha sandundií ñu chí ñu nuu Nyoo cha ni cumañi ca cha quiví vico cuan. ⁵⁶ Nanducú ñu chí ra Jesús. Ta cuhva cha nyicú ñu chichi vehe ñuhu cahnu cuan ta ndacá tuhun ñu chí tahan ñu, ta catyí ñu:

—¿Yoso caa cuñí nyoho? ¿Atu cuquichi ra vico ihya, o ma quichi ra? —catyí ñu chí tahan ñu.

⁵⁷ Ta ra cacuví fariseo ta ra cacuví nuu chí tata sutu, catyí ra vatyí tatu nya noo ñu chitó ñu nya nyaá ra Jesús, nacatyí ñu. Vatyí cutiin ra chí ra vatyí cohon ra vehe caa.

12

Nu chosó cu María ndutya vixi chahán chaha ra Jesús (Mt. 26.6-13; Mr. 14.3-9)

¹ Cumañi iñu ca quiví cha cuatahan chí vico pascua, ta chaá ra Jesús ñuu Betania nu iyó ra Lázaro, ra cha sanandoto ra Jesús chí. ² Yucuan savahá ñu cha cuxiñi ra Jesús. Cu Marta tyihí ña coho nu mesa. Ta chicunyaá ra Jesús nu mesa. Ta nyaá tucu ra Lázaro chihin ra. ³ Tyicuan ta cu María quehen ña ta cha sava litro ndutya vixi chahán cha chinqo chihin maa ri nardo, noo cha yahví xaan nyaá. Ta cuhví ña chaha ra Jesús chihin ndutya vixi

chahán cuan. Yahá cuan ta sana ityi ña chihin ixi xiñi ña. Tandihí chichi vehe cuan chitú chihin xico ndutya vixi chahán cuan. ⁴ Ta yucuan nyaá tucu ra Judas Iscariote, sehe ra Simón. Cuví ra noo ra chicá noo chihin ra Jesús. Ta suri maa ra cuví ra cha naxico tuhun chí ra Jesús nuu ra xaan iñi chí ra. Ta quichaha catyí ra Judas cuan chí ñu cuan:

⁵ —¿Ñáá tuhun ña xico ndo ndutya vixi chahán ihya chí ñáyiví, cuhva ñu cuenda mil chí ndo chihin, ta tyinyee ndo chí ñu ndahvi? —catyí ra.

⁶ Soco ra Judas ña catyí ra tuhun ihya cha cuenda cha ndahvi cuñí ra nyehe ra chí ñu ndahvi, soco vatyí ra suhu cuví ra. Ta vatyí ndaha maa ra nyaá yitin xuhun ta tuhvá ra suhu ra cha tyihí ñu chichi yitin cuan. ⁷ Tyicuan ta catyí ra Jesús chí ra:

—Saña chí ña, vatyí ñaha ihya sacuví ña tyehe caa cha cuenda cha cuquihvi coño ñuhi chichi ñuhu. ⁸ Ñu ndahvi tyicuan ri cu cunycú ñu chihin ndo, soco yuhu ña tyicuan ri —catyí ra Jesús chí ra Judas cuan.

Nu nducu cahñí ra chí ra Lázaro

⁹ Cuaha xaan ñu Israel ñihí ñu tuhun tyi ra Jesús ñohó ra Betania, ta chahan coyo ñu nyicuan. Ñima cha cuñí ñu nyehe ñu chí ra Jesús ri, soco cuñí tucu ñu nyehe ñu chí ra Lázaro, ra cha sanandoto ra Jesús chí. ¹⁰ Tyicuan ta ra cacuví nuu chí tata sutu

catyihí tahanan ra tuhun vatyí cucahñi tucu ra chi ra Lázaro ñandihí. ¹¹ Vatyí cha cuenda ra ta cuaha xaan ñu Israel cacusiin ñu chihin ra ta nachino iñi ñu chi ra Jesús.

Nu quihvi ra Jesús ñuu Jerusalén

(Mt. 21.1-11; Mr. 11.1-11; Lc. 19.28-40)

¹² Cuaha xaan ñáyivi cuahan ñu Jerusalén cha vico pascua. Ta cha inga quivi cachitó ñu tyi ra Jesús cuachaa ra. ¹³ Tyicuan ta chahnya ñu ndaha tunducaha ta cuahan coyo ñu cuasatahan ñu chi ra Jesús. Ta canachaa ñu, ta catyí ñu:

—¡Cahnu xaan ca cuví maa Nyoo! ¡Nasoco xaan Nyoo chi ra vachi ihya chihin tunyee iñi Nyoo! ¡Nasoco xaan Nyoo chi Rey cuenda yo ñu Israel! —cacatyí ñu, canachaa ñu.

¹⁴ Ta ra Jesús ñihí ra noo burru ta chicoşo ra chi ti tari cuhva catyí maa nu tutu Nyoo tyehe caa:

¹⁵ Ma yuhvi ndo ñáyivi ñuu Sión

Nyehé ndo, vachi Rey ndo. Yosó ra noo burru —catyí chi nu tutu Nyoo.

¹⁶ Quivi cuan ra cachicá noo chihin ra Jesús, ña cacutuñi iñi ra tuhun cuan cha nyaá nu tutu Nyoo. Soco cha yahá cuanuhu ra Jesús gloria, canicohon iñi ra vatyí tandihí tuhun cuan ta nyaá nu tutu Nyoo tyi tyicuan caa cucuvi chi ra. Ta tyicuan caa cuví chi ra.

¹⁷ Ta ñáyivi cha nyehé quivi cha caná ra Jesús chí ra Lázaro chichi ñaña, quivi

sanandoto ra chi ra, nacatyí ñu cha nyehé ñu. ¹⁸ Ta yucuan chaha cuaha xaan ñáyivi chisatahan ñu chi ra Jesús, vatyí chito ñu milagru cha sacuvi ra. ¹⁹ Tyicuan ta ra cuví fariseo cacatyí ra chi ra tahanan ra:

—Cha nyehé maa ndo tyi ñahri maa cuví sacuvi yo, vatyí tandihí ñáyivi nyicón chi ra —cacatyí ra.

Nu nducú suhva ra ñuu Grecia chí ra Jesús

²⁰ Ñohó tucu suhva ra ñuu Grecia mahñu ñáyivi cha chahan coyo chisacahnu vico ñuu Jerusalén cuan.

²¹ Tyicuan ta catuhva ra ñuu Grecia cuan nu nyaá ra Felipe, ra ñuu Betsaida nu cuví Galilea, ta cachacu ndahvi ra nuu ra ta cacatyí ra:

—Tata, cuñi ndi cahan ndi chihin ra Jesús —cacatyí ra.

²² Ta ra Felipe chahan ra chicatyí ra chi ra Andrés. Ta ninduvi ra chinacatyí ra chi ra Jesús vatyí ra Grecia cuan cuñi ra cahan ra chihin ra.

²³ Ta nacahan ra Jesús, ta catyí ra:

—Chaa cuhva vityin vatyí yuhu cha cuví Rayi cha quichi nya gloria, cuanuhu tiqui nya gloria, ta cusacahnu Suti chii. ²⁴ Chá ndicha catyí chí ndo vatyí tatu noo chiti ta ma quihí chichi ñuhú ta ma tyahyu chí, noo ri chiti cucuvi chí tyicuan ri maa. Soco tatu tyahyu chí, nduchaa chí inga chaha ta coo cuaha ca chiti chí. ²⁵ Ñu cuñi xaan ñáyivi

iyó ñu, cucunaa ñu. Soco ñu ña cuñí ñáyiví ñuhu ñáyiví ihya, cunañihi ñu noo ñáyiví cha ma naa ca maa cucoo ñu. ²⁶ Tatu yihí ndo cuñí ndo sacuvi ndo tyiño nui, cunyicon ndo chii. Ta nu cuacunyai, yucuan cucunyaa tucu ñu sacuví tyiño nui. Tatu nya nyoho sacuví ndo tyiño nui, Suti cusacahnu ra chi ndo.

Nu cahán ra Jesús tuhun yoso caa cucúvi ra

²⁷ Vityin chicá xaan xiñi. Ta ¿ñáá cha cucatyí? ¿Atu catyí chi Suti na sacanyaha ra tindhó cha nyaá cunyehe vityin? Ma catyí cha tyicuan caa vatyí cha cuenda cuan vachi siqui ñuhu ñáyiví ihya. ²⁸ Vaha ca catyí chi Suti: “Sutu Mañi yuhu, sacahnu sivun” —catyí ra Jesús.

Tyicuan ta cahán noo ndusu ityi andívi ta catyí chi tyehe caa:

—Cha yaha sacahni sívi, ta cusacahni inga chaha —catyí ndusu cuan.

²⁹ Ta ñu nyicú yucuan, chiñi ñu ndusu cuan, ta catyí ñu vatyí savi cahán. Ta inga ñu catyí ñu:

—Noo ángel cahán chihin ra.

³⁰ Tyicuan ta ra Jesús catyí ra chi ñu:

—Ñima cha cuenda cha vaha chi yuhu cahán ndusu cuan soco cha cuenda cha vaha chi maa ndo cuví. ³¹ Vityin cuví cuhva cutachí tuñi Nyoo chi ñáyiví iyó siqui ñuhu ñáyiví. Ta vityin cuhva cutava ñehe Nyoo chi

ra nyacá ñaha siqui ñuhu ñáyiví ihya. ³² Ta cuhva cha cuitacai nu cruzi, yucuan cuhva cunaxite chi tandihi ñáyiví —catyí ra Jesús.

³³ Cahán ra tyehe caa cha cuñí ra na cutuñi iñi ñu tyi tyicuan caa cuhva cucúvi ra.

³⁴ Ta ñáyiví nacahán ñu ta catyí ñu chi ra:

—Tuhvá ndi chiñi ndi sacuaha ra nu libru ley yo vatyí ra cuví Cristo tyicuan ri maa cucoo ra. ¿Yoso caa cha catyí yoho tyi cusandaa ñu chi Rayi quichi nya gloria nu cruzi? ¿Yóo ra cuví Rayi cha quichi nya gloria cha cahún tuhun? —catyí ñu, ndacá tuhun ñu chi ra.

³⁵ Tyicuan ta ra Jesús catyí ra chi ñu:

—Iyó cha ndichin nu nyicu ndo, soco suhva ri ca quívi. Caca ndo ityi nu ndichin cha ni ri ca cha ndichin. Coto sana ri iñi ndo ta nduñaa iñi, vatyí ñu chicá noo nu ñaa iñi ña chitó ñu nya ityi cuahan ñu. ³⁶ Chino iñi ndo chi yuhu ra cuví ñuhu ndichin cuan, cha ni ri ca cha nyaá que chihin ndo. Tyicuan ta cuví ndo ñáyiví iyó nu ndichin.

Cha yaha catyí ra Jesús tuhun ihya tixehé nuu ra chi ñu.

Nu catyí chi ñáá tuhun cha ña cachinó iñi ra cacuvi nuu chi ñu Israel chi ra Jesús

³⁷ Vasi cuaha xaan milagru sacuví ra Jesús nuu ñu soco ña chinó iñi ñu chi ra. ³⁸ Vatyí tahán chi cha cuví tari catyí ra Isaías profeta Nyoo, nu cahán ra tyehe caa:

Sutu Mañi yuhu, yori cuñí chino iñi tuhun cahán ndi.

Yori cutuñí iñi tunyee iñi iyó chuun, Sutu Mañi yuhu, catyí ra Isaías ta cha naha.

³⁹ Ta cha cuenda tuhun ihya cha nyaá nu tutu, yucuan chaha vatyí ña cuví chino iñi ñu vatyí suri tyaa tucu ra Isaías tyehe caa:

⁴⁰ Nyoo sanducuaa ra chi ñu. Ta sandundava ra añima ñu,

tacuhva cha ma nyehe ñu chihin chiti nuu ñu,

ta ma cutuñi iñi añima ñu, ta ni ma nacuhva cuenda ñu chi ñu chi ra tacuhva sanduvaha ra chi ñu.

⁴¹ Ra Isaías catyí ra tyehe caa vatyí nyehe ra nu nyacá ñaha Sutu Mañi yo Jesús ta cahan ra tuhun ra.

⁴² Soco cuaha ñu Israel chinó iñi chi ra Jesús, ta nyacua nya suhva ra cacuví nuu, soco ña saquetuví ra nuu ñáyivi vatyí yuhví ra chi ra cacuví fariseo coto tava ñehe ra chi ra vehe ñuhu.

⁴³ Vatyí cuñí ca ra cuvaha ra nuu ñáyivi ta ñima ca cha cuvaha ra nuu Nyoo.

Tuhun cahan ra Jesús cusa-cutuñi chi ñáyivi

⁴⁴ Ñihi cahán ra Jesús, ta catyí ra:

—Ñu chinó iñi chii, ñima chi maa ri mai chinó iñi ñu, soco chinó tucu iñi ñu chi ra cha tachí chii. ⁴⁵ Ta ñu nyehé chii, nyehé tucu ñu chi ra cha tachí chii. ⁴⁶ Yuhu cha cuví tari noo cha ndichin vachi ñuhu ñáyivi ihya, vatyí tacuhva vatyí ñu chinó iñi chii ma

ndoo ñu nu ñaa iñi. ⁴⁷ Soco tatu yihí ndo chiñí ndo tuhun cahín, ta ña sacuví ndo cha cahín, ñima yuhu tachi tuñi chi ndo. Vatyí ña vachi yuhu ñuhu ñáyivi ihya vatyí tachi tuñi chi ñáyivi. Soco vachi sacaqui añima ñu. ⁴⁸ Ñu ña cuñí naquehen tuhun cahín ta ña cuñí ñu sacuvi ñu tari cuhva cuñí, iyó cha cutachi tuñi chi ñu. Tuhun cha cahín, ican cuan cutachi tuñi chi ñu nu cundihi quívi. ⁴⁹ Vatyí ñima cuenda mai cahín. Suti ra cha tachí chii, chaha ra tuhun chii ñáa cha cucahin ta ñáa cha cusañahi. ⁵⁰ Ta chité vatyí tuhun cha chaha ra, chahá chi noo ñáyivi cha ma naa ca maa coo ñáyivi. Yucuan chaha, tuhun cha cahín, cahín soco cuvha catyí maa Suti cha cahín cuví.

13

Nu nacatyá ra Jesús chaha ra cachicá noo chihin ra

¹ Nonga quívi cumañi ta chaa vico pascua chitó ra Jesús vatyí cha chaa cuvha cha cuaquita ra ñuhu ñáyivi ihya ta cunuhu ra nu nyaá Sutu ra. Tyicuan ri cuñí xaan ra chi ñu cuenda ra cha iyó siqui ñuhu ñáyivi ihya. Ta vityin cua sañahá ra chi ñu tyi cuñí xaan ra chi ñu vatyí cuacúvi ra cha cuenda ñu.

² Ta cuxiñí ra Jesús chihin ra cachicá noo chihin ra. Ta cha quihví cuihna añima ra Judas Iscariote sehe ra Simón tyiyuhu ra chi ra, naxico tuhun ra chi ra Jesús ta nacuhva cuenda ra chi ra chi ra xaan iñi chi ra.

³ Soco ra Jesús chitó ra vatyí chaha cuenda Sutu ra tandihí chi ra vatyí cunyaa ndaha ra. Ta chitó ra vatyí nu nyaá Nyoo quita ra ta suri yucuan cunanuhu ra. Ta nyaá ra Jesús cuxiñí ra. ⁴ Tyicuan ta nicuinanyaa ra ta tava ra sahma chata ra, ta chahñi ra noo toalla chichi ra. ⁵ Tyicuan ta tyihí ra ndutya chichi noo caa ta quichaha nacatya ra chaha ra cachicá noo chihin ra. Ta quichaha nacuhva ra chihin toalla cuan.

⁶ Ta cha cuanacatya ra chaha ra Simón Pedro ta catyí ra Simón chi ra:

—Sutu Mañi yuhu, ¿atu yoho cuanacatyon chahi?

⁷ Tyicuan ta catyí ra Jesús:

—Vityin ña cutuñi iñun cha sacuví. Soco cucutuñi maa iñun nu cuahan ca chi.

⁸ Soco ra Pedro catyí ra chi ra:

—Ni noo chaha ta ma nacatyon chaha yuhu.

Ta catyí ra Jesús chi ra:

—Tatu ma nacatye chahun, ñima ra cuende cuvún.

⁹ Tyicuan ta catyí ra Pedro chi ra Jesús:

—Tu tyicuan caa, Sutu Mañi yuhu, ñima chaha ri nacatyon, soco nacatya tucun ndahi ta xiñi ñandihí —catyí ra.

¹⁰ Soco ra Jesús catyí ra chi ra:

—Ñu cha ni chityi, ña cuñi chi cha ndoo tandihí coño ñuhu ñu. Chaha ri ca ñu cuñi chi, vatyí cha ndi maa naní ñu. Nyoho cha ndi ndo, vasi ña tandihí ndo —catyí ra Jesús.

¹¹ Ta catyí ra vatyí ña tandihí ra ndi ra vatyí chitó ra yóo cha cunaxico tuhun chi ra chi ra xaan iñi chi ra.

¹² Ta cha yaha cha nacatya ra Jesús chaha ra cachicá noo chihin ra, ndihvi noo ra sahma ra, ta nicunya tu ra inga chaha nu mesa ta catyí ra chi ra:

—¿Atu cutuñi iñi nyoho cha sacuví chi ndo? ¹³ Nyoho catyí ndo chii, Maestro ta Sutu mañi yuhu, ta ndicha vatyí ican cuví. ¹⁴ Yuhu cha cuví Ra Sacuaha ta Sutu Mañi ndo, nacatye chaha ndo, tyicuan caa cuñi tucu chi cha nacatya ndo chaha tahan ndo. ¹⁵ Yuhu chahí noo cuhva chi ndo vatyí sacuvi ndo tari cuhva sacuvi mai. ¹⁶ Cha ndicha catyí chi ndo vatyí ni noo musu ta ña cahnu ca ra ican saha chitoho ra. Ta ni noo ra cha cuahan tyiño, ña cahnu ca ra ican saha ra cha tachí chi ra. ¹⁷ Tatu cutuñi iñi ndo tuhun ihya, ta sacuví ndo, si xaan cucuví chi ndo.

¹⁸ Ñima cha cuenda tandihí ndo cahín. Yuhu chité yóo chi nacachí mai. Soco cuñi chi cha cucuvi tari catyí tuhun Nyoo tyehe caa: “Ra cha chachí pan chihin, ican ra cuan cunaxico tuhun chii chi ra xaan iñi chii”, catyí chi nu tutu Nyoo. ¹⁹ Catyí chi ndo tuhun ihya cha ni cumañi ca chino cava tacuhva vatyí quivi nacuvi tyehe caa, chino iñi ndo tyi iquen cuví ra cha tinyaa cuatyí ndo. ²⁰ Cha ndicha catyí chi ndo vatyí ñu tiñ cuenda chi ñu tachí yuhu chi, chi yuhu tiñ cuenda ñu

cuví cuan. Ta ñu cha tñn cuenda chi yuhu, tñn cuenda tucu ñu chi ra cha tachí chii —catyí ra Jesús.

Nu sacotó ra Jesús vatyi cunaxico tuhun ra Judas chi ra chi ra xaan iñi chi ra

(Mt. 26.20-25; Mr. 14.17-21; Lc. 22.21-23)

²¹ Cha yaha cha catyí ra Jesús tyehe caa, quichaha nducuihya xaan cuñi añima ra, ta catyí cachi ra:

—Cha ndicha catyí chi ndo, vatyi noo nyoho cunaxico tuhun ndo chii nuu ra xaan iñi chii —catyí ra Jesús.

²² Tyicuan ta ra cachicá noo chihin ra, quichaha canyehe ra nuu tahan ra, ta ña cachitó ra yóo chi tuhun cahán ra Jesús. ²³ Noo ra chicá noo chihin ra nyañaá ra chi ra Jesús nu cuxiñi ra. Ta ican ra cuví ra cha cuñi xaan ra Jesús chi. ²⁴ Ta ra Simón Pedro savaha ra seña chi ra, na ndaca tuhun ra yóo chi tuhun cahán ra. ²⁵ Tyicuan ta nyañaá ra chi ra Jesús, ta ndaca tuhun ra chi ra:

—Sutu Mañi yuhu, ¿yóo ra cuví ra cha cahún tuhun?

²⁶ Ta nacahan ra Jesús ta catyí ra:

—Cuasatyii chiin pan, ta ra cha cuhve chi, ican ra cuan cuví ra —catyí ra.

Tyicuan ta quehen ra chiin pan ta satyii ra, ta chaha ra chi ra Judas Iscariote, sehe ra Simón. ²⁷ Ta cha quehen ra Judas pan cuan ta quihvi ra ña vaha añima ra. Tyicuan ta ra Jesús catyí ra chi ra:

—Tuhun cha yihí iñun sacuvun, sacuvi cha numi ri —catyí ra Jesús chi ra Judas.

²⁸ Soco ni noo ra canyicú nu mesa cuan, ña cacutuñi iñi ra ñaá tuhun cha catyí ra chi ra tyicuan caa. ²⁹ Soco cha cuenda vatyi ndaha ra Judas nyaá yitin xuhun, yucuan chaha yihí ra cuñi maa ra vatyi cuñi ra Jesús cha cusata ra cha chiñuhú chi ra cha cuenda cha vico cuan, o nacuhva ra suhva xuhun cuan chi ñu ndahvi, cacuñi maa ra. ³⁰ Cha yaha chachi ra Judas pan, tyicuan ta quitá ra. Ta cha cuaa cuví cuan.

Ley cha chaha ra Jesús cha cuñi yo chi tahan yo

³¹ Cha yaha cha cuahan ra Judas, ra Jesús catyí ra:

—Vityin cunyehe ñáyivi yoso cha cahnu yuhu cha cuví Rayi cha quichi nya gloria. Ta cuanyehe ñu yoso cha cahnu Nyoo cha cuende. ³² Ta tatu Rayi cha quichi nya gloria sacahnú ra chi Nyoo, tyicuan ta Nyoo cusacahnu ra chi ra. Ta cha cha quivi cuasacahnu ra chi ra. ³³ Sehe luhli, ña naha ca cuacunyai chihin ndo. Nyoho cunanducu ndo chii, soco tari catyi chi ra cacuví nuu chi ñu Israel cuan, catyí chi ndo vityin, vatyi ma cuvi cahun ndo nu cuahin. ³⁴ Chahí noo tuhun chaa chi ndo. Cuñi ndo chi tahan ndo. Tari cuñi yuhu chi ndo, tyicuan caa cuñi chi cha cuñi ndo chi tahan ndo. ³⁵ Tatu cuñi ndo chi tahan ndo, tandihi ñáyivi ta coto ñu vatyi ñu nyicón chii cuví ndo.

Nu catyí ra Jesús vatyí ra Pedro cucatyí ra vatyí ña ñohó nuu ra chi ra

(Mt. 26.31-35; Mr. 14.27-31; Lc. 22.31-34)

³⁶ Ra Simón Pedro ndaca tuhun ra chi ra Jesús ta catyí ra:

—Sutu Mañi yuhu, ¿nya cuhun? —catyí ra.

Ta ra Jesús nacahan ra ta catyí ra:

—Nu cuahan yuhu, vityin ma cuvi cunyicon chii. Soco nu cuahan ca chi, ta cunyicon chii —catyí ra Jesús.

³⁷ Tyicuan ta catyí ra Pedro chi ra:

—Sutu Mañi yuhu, ¿ñáá tuhun ma cuvi cunyiquen chuun vityin? Nyái cha cuhve ñayiví cha cuendon —catyí ra.

³⁸ Ta nacahan ra Jesús ta catyí ra:

—¿Atu ndicha cha cuhvon ñayivun cha cuende? Cha ndicha catyí chuun, vatyí cha ni cumañi ca cuacu chaa loho, yoho cucatyun uñi chaha tyi ña ñohó nuun chii —catyí ra Jesús chi ra Pedro.

14

Ra Jesús cuví ityí cuhun yo ta chaa yo nu nyá Sutu yo Nyoo

¹ Ta catyí ra Jesús:

—Ma caca xaan xiñi ndo. Chino iñi ndo chi Nyoo, ta chino iñi ndo chii. ² Vehe Suti cuaha xaan nuu coo ndo iyó. Tyehe ta ñima tyicuan caa, cha naha catyí yuhu chi ndo. Ta cuhin cusanduvahi noo nu coo ndo. ³ Ta cha yaha cha cuhin ta sanduvahi

nu coo ndo, ta cuquichi inga chaha, quichi naquehin chi ndo. Tacuhva cunyaa ndo nu cuacunyai. ⁴ Nyoho chitó ndo nya cuhin, ta chitó ndo ityí.

⁵ Ta catyí ra Tomás chi ra:

—Tata, ña chitó ndi nya cuhun. Ta ¿yoso caa coto ndi ityí? —catyí ra.

⁶ Ta ra Jesús catyí ra:

—Yuhu cuví ityí cha cuahan gloria. Ta yuhu cuví cha ndicha. Ta suri yuhu cuví ra chahá ñayiví coo ndo. Noo tuhun ri cha cuenda yuhu, cuvi chaa ndo nu nyaá Suti.

⁷ Ñohó nuu ndo chii, ta cha cuenda cuan ñohó nuu tucu ndo chi Suti. Ta nya vityin ta nu cuahan ca chi, ñohó nuu ndo chi ra, vatyí cha nyehé ndo chi ra —catyí ra Jesús.

⁸ Tyicuan ta catyí ra Felipe chi ra:

—Tata, cuhva cha nyehe ndi chi Sutu yo Nyoo, ta chihin yucuan ri ta ndoo ndi vaha.

⁹ Ta nacahan ra Jesús, ta catyí ra:

—Yoho Felipe, cha naha nyái chihin ndo, ta ¿yoso caa cha catyún cha ta cohon nuu con chii? Ñu cha nyehé chii, nyehé tucu ñu chi Nyoo Suti. Ta ¿ñáá tuhun catyún chii: “Cuhva cha nyehe ndi chi Sutu yo Nyoo”? ¹⁰ ¿Atu ña chinó iñun tyi ñn ri cuví yuhu chihin Suti Nyoo? Ta maa ra ñn ri cuví ra chihin. Tuhun cha catyí chi ndo, ñima yuhu ri catyí, soco Suti cha nyaá chihin, ican ra sacuví tyiño ra chihin. ¹¹ Chino iñi ndo chii vatyí ñn ri ra cuví chihin

Nyoo Suti. Ta Nyoo Suti #n ri ra cuví ra chihin. O cuví tucu chino iñi ndo chii cha cuenda tyiño Nyoo Suti cha sacuví. ¹² Cha ndicha catyí chi ndo vatyí ñu chinó iñi chii, cusacuví tucu ñu cha sacuví yuhu. Ta cahnu ca cusacuví ñu, vatyí yuhu cuhin nu nyaá Nyoo Suti. ¹³ Ta tandihí cha cacán ndo chihin sivi, yuhu cusacuví tacuhva vatyí sacahnu ñáyiví chi Suti Nyoo cha cuenda cha cuví Sehe ra. ¹⁴ Yuhu cusacuví ñáá cha cacán ndo chihin sivi.

Nu catyí ra Jesús vatyí cuhva ra Tatyí Ii ra chiyo

¹⁵ 'Tatu cuñí ndo chii, quichaha ndo tuhun cahín. ¹⁶⁻¹⁷ Ta cacán tahvi mai chi Nyoo Suti na saquichi ra noo ra naquehen ndahvi chi ndo. Ta ican ra cuan cuví Tatyí Ii Nyoo, ra cha cahán maa ri cha ndicha. Ta cucunyaa ra chihin ndo tyicuan ri maa. Soco ñáyiví cha tahán ca iñi cha iyó siquí ñuhu ñáyiví ihya ma cuvi naquehen ñu Tatyí Ii Nyoo vatyí ña cuví nyehe ñu chi ra. Ta ni ña caá ra añima ñu. Ta ni ña ñohó nuu ñu chí ra. Soco nyoho ñohó nuu ndo chi ra vatyí nyaá ra chihin ndo ta cuandoo ra chihin ndo. ¹⁸ Ma sandoo maa ri mai chi ndo. Quichi tiquí nu nyaá ndo. ¹⁹ Chiin ri ca, ta ñáyiví cuenda ñuhu ñáyiví ma nyehe ca ñu chii. Soco nyoho nyehé ndo chii. Vatyí yuhu iyé, yucuan chaha nyoho coo ndo ñandihí. ²⁰ Quívi cuan cucoto ndo tyi yuhu #n ri cuví chihin Suti. Ta nyoho #n ri cuví ndo chihin. Ta yuhu #n

ri cuví chihin ndo. ²¹ Ñu cha cumí vaha tuhun cahín, ta sacuví ñu cuhva catyí, ican ñu cuan cuví ñu cha cuñí chii. Ta ñu cha cuñí chii, Suti cucuñi ra chi ñu. Ta cuñí tucu yuhu chi ñu ta cusañahi chi ñu yóó ra cuví yuhu —catyí ra Jesús.

²² Ta catyí ra Judas, ñima ra Judas Iscariote, inga ra.

—Sutu Mañi yuhu, ¿yoso caa cha chi nyuhu cusañahun chuun, ta ñima chi ñu cuenda ñuhu ñáyiví?

²³ Nacahán ra Jesús ta catyí ra:

—Ñu cuñí chii, sacuví ñu tuhun cahín. Ta Suti cuñí ra chi ñu. Ta quichi ndi nu nyaá ñu ta coo ndi chihin ñu. ²⁴ Ñu ña cuñí chii, ña sacuví ñu cha catyí. Ta tuhun cahín cha chiñi ndo, ñima tuhun mai cuví, tuhun cahán Suti, ra cha tachí chii cuví.

²⁵ 'Catyí tandihí tuhun ihya chi ndo cha ni ri ca cha nyaí chihin ndo. ²⁶ Soco nu cuahan ca chi cutachi Suti Tatyí Ii ra tyiño nui. Maa ra cuví ra cutyinyee chi ndo ta cunaquehen ndahvi ra chi ndo ta cusañaha ra tandihí chi ndo. Ta cusanicohon ra iñi ndo tuhun cha yaha cahín chihin ndo.

²⁷ 'Sandoí noo cha taxi coo añima ndo, tari cha taxi cuñí añime. Ican चाहí chi ndo. Ñima tari cha taxi cha ñihí ndo siquí ñuhu ñáyiví ihya. Ma caca xaan iñi ndo ta ma yuhvi ndo. ²⁸ Chiñi ndo tuhun cha cahín nu catyí vatyí cuahin ta quichi tiquí nu nyicú ndo. Tatu cuñí ndo chii, cucusi cuñi ndo tyi catyí vatyí cuahin nu nyaá Suti.

Vatyi cahnu ca cuví Suti ican saha yuhu. ²⁹ Ta vityin catyí tiqui chi ndo cha ni cumañi ca cuhin, tacuhva quivi cuhin, cunachino iñi ndo chii.

³⁰ Ma cahan cuaha que chihin ndo. Vatyi vachi ra nyacá ñaha siqui ñuhu ñayivi ihya. Vasi ña nyacá ñaha ra chii. ³¹ Soco cuñi chi nacoto ñayivi iyó siqui ñuhu ñayivi vatyi yuhu cuñi chi Nyoo Suti, ta sacuvi tyiño tyaa ra chii.

¹ Ndicutita ndo. Cōho ndo, naquita yo ihya.

15

Tari noo yoho tichaha ndivi cha ndicha vaha cuví ra Jesucristo

¹ Yuhu cuví yoho tichaha ndivi cha ndicha vaha. Ta Suti cuví ra sahá cumi chi yoho cuan. ² Chahnyá ra soco cha ña chahá chiti. Ta soco cha chahá chiti nacahnyá ra nuu chi, ta sanduvii ra, tacuhva nacuhva ca chi cuaha ca chiti. ³ Suti cha sandundi ra chi ndo chihin tuhun cha cahín chihin ndo. ⁴ Sañihi ca ndo cu ñin ri ndo chihin, tari yuhu ñin ri cuví chihin ndo. Tari noo soco yoho cuan ma cuví cuhva chi chiti cha maa ri maa chi tatu ña nyañaá chi chata yoho cahnu, tyicuan caa nyoho, ma cuví sacuvi ndo cha vaha tatu ña ñin ri cuví ndo chihin.

⁵ Yuhu cuví yoho cahnu cuan. Ta nyoho cuví ndo soco yoho cuan. Ñu cha nyañaá chii, ta yuhu nyañaá chi ñu, cuaha cha vaha sacuvi ñu, vatyi ñahri cha cuví sacuvi ndo tatu yori yuhu nyaá chihin ndo. ⁶ Ñu cha ña nyaña

chii, cusacuita Suti chi ñu, tari sacuitá yo soco yoho cha chahnya yo vatyi ña chahá chiti. Ta na ityi ta nasataca yo, ta cucaya nu ñuhu.

⁷ Tatu nyoho ta tyicuan ri nyaña ndo chii, ta ña naa iñi ndo tuhun, çacan ndo ñáá cha cuñi ndo, ta yuhu cuhve, ⁸ Tatu cuaha cha vaha sacuvi ndo, sacahnú xaan ndo chi Suti. Ta tyicuan caa sañahá ndo tyi cuví ndo noo ñu ndicha cha nyicón chii. ⁹ Yuhu cuñi chi ndo, tari cuñi Suti chii. Ma naa iñi ndo cuhva cuñi chi ndo. ¹⁰ Tatu quichahá ndo tuhun cahín, cuacuñi que chi ndo. Tari yuhu quichahí nu cahán Suti, ta cuñi xaan ra chii.

¹¹ Cahín tyehe caa chihin ndo tacuhva na cusii cuñi ndo chihin. Ta cucusii vavaha cuñi ndo. ¹² Tuhun cha catyí chi ndo, ican cuví ihya: na cuñi ndo chi tahan ndo, tari cuñi yuhu chi ndo. ¹³ Tatu yaha xaan cuñi yo chi tahan yo, caña iñi yo cuhva yo nyacua nya ñayivi yo cha cuenda ñu. ¹⁴ Nyoho cuví ndo amigue, tatu sacuvi ndo cha catyí chi ndo. ¹⁵ Ña catyí que vatyi musi cuví chi ndo, vatyi noo musu ña chitó ra ñáá cha sacuvi chitoho ra. Amigue, catyí chi ndo vatyi sacote chi ndo tandihí maa cha catyí Suti chii. ¹⁶ Nyoho ña cachí ndo chii. Mai nacachí chi ndo. Ta catyí chi ndo na cuhun ndo ta sacuvi ndo tyiño nui. Ta tyiño sahá ndo cucuvaha xaan tari cuvaha noo itu. Ta cuaha vavaha niñi cucoo, ta ma tiví maa chi. Ta

tyicuan caa ta Suti cuhva ra tandihí cha cacan ndo chihin sívi. ¹⁷ Ican ihya cuví cha catyí chi ndo: Cuñi ndo chi tahan ndo.

Ñáyivi cuenda ñuhu ñayivi tasi cuñi nyehé ñu chi ra Jesús ta chi ñu nyicón chi ra

¹⁸ Tatu ñu cuenda ñuhu ñayivi ña cuñi nyehe ñu chi ndo, coto ndo vatyí xihna ca chi yuhu ña cuñi nyehe ñu. ¹⁹ Tyehe ta cuví ndo ñu cuenda ñuhu ñayivi, cucuñi ñu chi ndo tari cuñi ñu chi tahan ñu. Soco yuhu nacachí chi ndo mahñu ñu. Ta yucuan chaha tasi cuñi nyehe ñu chi ndo, vatyí ñima ca ñu cuenda ñuhu ñayivi cuví ndo.

²⁰ Nícohon iñi ndo tuhun cha catyí chi ndo, tyi ni noo musu ta ña cahnu ca ra ican saha chitoho ra. Ta tatu quichahá ñu tuhun cahín chihin ñu, tyicuan caa cuquichaha tucu ñu tuhun sañaha ndo chi ñu. Ta tatu satasí iñi ñu chii, cusatasí iñi tucu ñu chi nyoho. ²¹ Tandihí ihya cusacuvi ñu chi ndo cha catyí yuhu, vatyí ña ñohó nuu ñu chi ra cha tachí chii.

²² Tyehe ta ña quichí cahin chihin ñu, yucuan ndicha ñahri cuatyí ñu. Soco vityin ñahri síqui tyaa ñu cuenda cuatyí ñu, vatyí cha yaha catyí chi ñu. ²³ Ñu cha tasi cuñi nyehé chii, tasi cuñi nyehé ñu chi Suti ñandihí. ²⁴ Ñahri cuatyí ñu, tyehe ta ña sacuví milagru cha ni nonga ñáyivi ta sacuví ca. Soco cha nyehé ñu tandihí ihya. Ta vasi cha nyehé ñu soco tasi

cuñi nyehé ñu chii, ta chi Suti ñandihí. ²⁵ Soco tandihí tuhun ihya cuví chi tyehe caa, vatyí cuñi chi cha chino cava tari cuhva catyí nu tutu ley cha sacua ha ñu nu catyí chi tyehe caa: “Ñahri vihi tuhun, ta cutasi cuñi ñu nyehe ñu chii”, catyí chi.

²⁶ Soco cuquichi Tatyí Ii, ra cha cahán maa ri cha ndicha. Maa ra cuví ra cha naquehen ndahvi chi ndo. Nachai nu nyaá Suti ta cusaquichi ndi chi ra nu nyicú ndo. Ta quívi quichi ra, cucahan ra tumañi iñi cuende. ²⁷ Ta nyoho tucu cucahan ndo tumañi iñi cuende, vatyí nyaá ndo chihin nyata quívi quichaha sahatyíne.

16

¹ Catyí tuhun ihya chi ndo tacuhva cha ma sandihí ndo cha chinó iñi ndo chii. ² Cutava ñehe ñáyivi chi ndo vehe ñuhu. Ta cuchaa chi quívi vatyí ñu cahñi chi ndo, cucuñi ñu vatyí tyiño nuu Nyoo sacuví ñu. ³ Tyehe caa cusacuvi ñu cha cuenda vatyí ni chiin maa ta cohon nuu ca ñu ni chi Suti ta ni chi mai. ⁴ Catyí tuhun ihya chi ndo tacuhva vatyí quívi chaa chi tari cuhva catyí chi ndo, nicohon iñi ndo vatyí cha yaha catyí chi ndo.

Tyiño sahá Tatyí Ii Nyoo

Ña catyí tuhun ihya chi ndo quívi xihna ri cha cuenda tyi nyaá que chihin ndo. ⁵ Soco vityin cuhin vatyí cunyai chihin ra cha tachí chii. Ta ni noo nyoho ña ndacá tuhun ndo chii nya

cuhin. ⁶ Soco nducuihya ndihí iñi ndo cha catyí tuhun ihya chi ndo. ⁷ Soco catyí cha ndicha chi ndo: vaha ca cha cuhin cha cuenda cha vaha chi ndo. Vatyí tatu ma cuhin, ma quichi Tatyí li cha naquehen ndahvi chi ndo. Soco tatu cuhin, cutachi mai chi ra. ⁸ Ta quiví quichi ra cusacoto ra chi ñáyiví iyó siqui ñuhu ñayiví vatyí iyó cuatyí ñu. Ta cusañaha ra chi ñu vatyí iyó noo cuhva vaha tahán chi coo ñu. Ta cusacoto ra chi ñu vatyí cutuñi chi ñu nuu Nyoo. ⁹ Cusacoto ra chi ñu tyí iyó cuatyí ñu cha cuenda cha ña chinó iñi ñu chii. ¹⁰ Cusacoto ra chi ñu tyí iyó noo cuhva vaha cha tahán chi coo ñu, vatyí yuhu cuhin nu nyaá Suti ta ma nyehe ca ndo chii. ¹¹ Ta cu coto ñu tyí cusandaa Nyoo cuatyí ñu vatyí cha yaha cundaa cuatyí ra cuví cuihna, ra nyacá ñaha siqui ñuhu ñayiví ihya.

¹² Ta cuaha ca tuhun nyaá catyí chi ndo, soco ma cutuñi iñi ndo vityin. ¹³ Soco quiví quichi Tatyí li cha cahán maa ri cha ndicha, maa ra cusañaha tandihí cha ndicha chi ndo. Vatyí ñima cuenda maa ra cucahan ra, soco cucahan ra tandihí cha chiñí ra. Ta cusacoto ra tuhun ñáá cha cucuví nu cuahan ca chi. ¹⁴ Cusacahnu ra chii, vatyí cunaquehen ra tuhun ta cusañaha ra chi ndo. ¹⁵ Tandihí cha iyó chí Suti, chi mai cuví ñandihí. Yucuan chaha vatyí Tatyí li cuquehen cuenda ra cha iyó chii, ta cusañaha ra chi nyoho.

Ra cha cachicá noo chihin ra Jesús cuihya iñi ra, soco nu cuahan ca chí cucusiñi cuñi ra, catyí ra Jesús

¹⁶ Ña naha ca ta ma nyehe ca ndo chii, soco yaha cuan ta cunyehe tucu ndo chii, vatyí yuhu cuhin nu nyaá Suti —catyí ra Jesús.

¹⁷ Tyicuan ta suhva ra cachicá noo chihin ra, candaca tuhun ra chi tahan ra ta catyí ra:

—¿Ñana vaha tuhun cahán ra ihya? Catyí ra chi yo vatyí ña naha ca ta ma nyehe ca yo chi ra, ta yaha cuan ta cunyehe tucu yo chi ra inga chaha vatyí cuhun ra nu nyaá Sutu ra. ¹⁸ ¿Ñáá cha cuñí chi catyí cha ña naha ca cuan? Ña cutuñí iñi yo ñáá túhun cahan ra —cacatyí ra.

¹⁹ Ra Jesús tuví iñi ra vatyí cacuñí ra candaca tuhun ra chi ra, ta catyí ra:

—Yuhu catyí chi ndo vatyí ña naha ca ta ma nyehe ca ndo chii, soco yaha cuan ta nanyehe tucu ndo chii. ¿Atu ican ihya cuví cha ndacá tuhun ndo chi tahan ndo? ²⁰ Cha ndicha catyí chi ndo vatyí nyoho cucuacu ndo ta cunducuihya iñi ndo, soco ñu cuenda ñuhu ñayiví cusíñi cuñi ñu. Soco vasí cuihya iñi ndo vityin, tucuihya iñi cha iyó chí ndo cunanduvi chí tusíñi iñi. ²¹ Cuhva cha cuacacu sehe noo ñaha síhi nyehé ña cha uhvi. Soco cha yaha cha cacu cha lee cuan, ni tuhun cha uhvi cuan ña nicohon ca iñi ña cha cuenda cha síñi cuñí ña vatyí cacu noo cha lee sehe ña. ²² Tyicuan caa tucu

nyoho vityin, nducuihyá iñi ndo. Soco cunanyehe tiqui chi ndo inga chaha. Tyicuan ta cundusiï tucu iñi añima ndo. Ta yori cuví tinyaa tusiï iñi cuan chi ndo.

²³ Qui_vi cuan ñahri ca cha cundaca tuhun ndo chii. Cha ndicha catyí chi ndo vatyí Nyoo Suti cucuhva tandihi cha cacan ndo chi ra chihin sivi. ²⁴ Nya vityin ta ta ñaha ca cha cacan ndo chihin sivi yuhu. Cacán ndo ta cuñihi ndo tacuhva na cusii xaan cuñi ndo.

Ra Jesucristo cuví chasaha ra chi cha ña vaha iyó ñayiví

²⁵ Maa maa ri chihin cuhva ri sañahi chi ndo. Soco nu cuahan ca chi, ñima ca chihin cuhva cuasañahi chi ndo, soco cuacatyí cachi chi ndo tuhun Suti. ²⁶ Qui_vi cuan chihin sivi cucacan ndo cha cacan ndo chi ra. Ta ña chiñuhú ca cha cucuacu ndahvi nuu Suti cha cuenda ndo. ²⁷ Vatyí maa Nyoo Suti suri cuñi ra chi ndo. Cuñi ra chi ndo vatyí nyoho cuñi ndo chii. Ta nachinó iñi ndo vatyí nu nyaá Nyoo quite. ²⁸ Nu nyaá Suti quite vatyí quichi siqui ñuhu ñayiví ihya. Soco vityin cusandoi ñuhu ñayiví ihya vatyí cunuhi nu nyaá ra —catyí ra Jesús.

²⁹ Tyicuan ta ra cachicá noo chihin ra cacatyí ra:

—Vityin ndicha catyí cachun chi ndi. ³⁰ Vityin nyehe ndi vatyí chitón tandihi maa tuhun, ta ña nyatun cha ndaca tuhun ndi chuun, vatyí cha chitón nyacua nya tandihi cha chicá xiñi ndi. Yucuan chaha chinó

iñi ndi vatyí nu nyaá Nyoo quiton —cacatyí ra chi ra Jesús.

³¹ Ta catyí ra Jesús:

—Ta vityin ¿atu chinó iñi ndo chii? ³² Soco catyí chi ndo vatyí cha vachi chi cuhva ta vityin cuví cuhva vatyí nyoho cuquití cuatyí ndo siin siin ityi, ta cusandoo ndo notuhun mai. Soco ñima notuhun ri mai nyaá, vatyí nyaá Suti chihin. ³³ Catyí tuhun ihya chi ndo tacuhva na coo cha taxi ri añima ndo cha cuenda cha in ri cuví ndo chihin. Ñuhu ñayiví ihya cunyehe ndo tindoho, soco sanyee ndo iñi ndo vatyí yuhu cha cuví chasahi chi cha ña vaha cha iyó ñuhu ñayiví ihya.

17

Nu chicán tahvi ra Jesús cuenda ra cachicá noo chihin ra

¹ Cha yaha cha catyí ra Jesús tuhun ihya, nanyehe ndaa ra ityi andiví ta catyí ra:

—Sutu Mañi yuhu, cha cha_a cuhva vityin. Sacahnu chi yuhu cha cuví sehun, tacuhva sacahnu tucu yuhu chuun. ² Vatyí tyaun tyiño chii siqui tandihi ñáyiví, vatyí cuhve ñayiví cha ma naa ca maa chi tandihi ñu chahun chii. ³ Ta ihya cuví cuhva coo ñu ñayiví cha ma naa ca maa: Cha cohon nuu ñu chuun vatyí noo tuhun ri maun cuví Nyoo cha ndicha vaha, ta cohon nuu ñu chi yuhu ra Jesucristo ra cha tachun chi.

4 'Cha sacahn̄ chuun ihya siqui ñuhu ñayiv̄i ta cha sandih̄i tyiño cha chahun̄ chii. 5 Ta vityin, Sutu Mañi yuhu, cua ndichi nu nyaun, ñacuhva cha cahnun̄ cuv̄i maun̄ chii, tari cuhva cha chiyo chii nyata ni cumañi ca chino ñuhu ñayiv̄i.

6 'Tandih̄i ra cha chahun̄ chii ra cha natavā vahun̄ mahñu ñu iyó siqui ñuhu ñayiv̄i ihya sacotē chi ra yóo ra cuv̄i yoho. Chi maun̄ cuv̄i chi ra ta chahun̄ chi ra chii. Ta quichahá ra tuhun̄ cahún. 7 Vityin cachitó ra vatyi tandih̄i cha chahun̄ chii, nu nyaún̄ quita. 8 Vatyi catyī chi ra tuhun̄ cha catyun̄ chii, ta maa ra canatīn̄ cuenda ra. Ta tuv̄i ñi ra vatyi ndicha cha quitē nu nyaún̄, ta chinó ñi ra tyi maun̄ tach̄i chii.

9 'Yuhu chiquén̄ cha cuenda ra chuun. Ña chiquén̄ cha cuenda ñáyiv̄i ña ñohó nuu chuun, soco chiquén̄ cha cuenda ra cha chahun̄ chii, vatyi chi maun̄ cuv̄i chi ra. 10 Tandih̄i cha iyó chii, chi maun̄ cuv̄i. Ta tandih̄i cha chuun, chi mai cuv̄i. Ta tandih̄i cuan sacahn̄u chii.

11 'Yuhu ma ndoo que ñuhu ñayiv̄i ihya, soco maa ra cundoo ra ñuhu ñayiv̄i ihya. Ta yuhu cuhin̄ tyi cunyai chuhun. Sutu Mañi yuhu, saha cumi chihin̄ cha ndicha ñuhu chi ra cha chahun̄ chii, tacuhva na cu ñin̄ ri ra chihin̄ ra tahan̄ ra, tari yoho chihin̄ yuhu, ñin̄ ri cuv̄i yo. 12 Quiv̄i chinyai ñuhu ñayiv̄i ihya chihin̄ ra, saha cumi chi ra

cha chahun̄ chii chihin̄ cha ndicha ñuhun. Ta sahī cuenda chi ra. Ta ni noo ra ña cuanaā soco noo tuhun̄ ri ra cha cha nyaá maa cunaa, ican̄ ra cuan̄ cunaa, tacuhva chino cava tari cuhva catyí nu tutu maun.

13 'Vityin cha vachi nu nyaún̄, soco cha ni ri ca cha nyaí siqui ñuhu ñayiv̄i ihya, catyí tuhun̄ ihya tacuhva na cusiī cuñi ra tari mai. 14 Yuhu catyī chi ra tuhun̄ cahún, soco ñáyiv̄i cuenda ñuhu ñayiv̄i tasi cuñi nyehe ñu chi ra nyicón̄ chi yo, cha cuenda vatyi ñima ra cuenda ñuhu ñayiv̄i cuv̄i ra, tari yuhu, ñima ra cuenda ñuhu ñayiv̄i cuv̄i. 15 Ña chiquén̄ chuun cha tavon̄ chi ra nyicón̄ chi yo nu ñuhu ñayiv̄i ihya, soco saha cumun̄ chi ra coto ñáá cha saha ra ña vaha chi ra. 16 Tari yuhu ñima ra cuenda ñuhu ñayiv̄i cuv̄i, tyicuan̄ caa tucu ra ihya, ñima ra cuenda ñuhu ñayiv̄i cuv̄i ra. 17 Cuhva cha ndicha chi ra nasacuv̄i ra maa maa ri cuhva cuñi maun. Tuhun̄ cahún, ican̄ cuv̄i cha ndicha. 18 Tari tachun̄ chi yuhu nu nyicú ñu iyó siqui ñuhu ñayiv̄i, tyicuan̄ caa tach̄i tucu yuhu chi maa ra nyicón̄ chi yo nu nyicú ñu iyó siqui ñuhu ñayiv̄i. 19 Ta cha cuenda cha vaha chi ra, sacuv̄i yuhu maa maa ri cuhva cuñi maun, tacuhva vatyi chihin̄ cha ndicha, cuv̄i sacuvī tucu maa ra maa maa ri cuhva cuñi maun.

20 'Soco ñimā cha cuenda ri ra ihya chiquén̄ chuun, soco chicán̄ tiquī cha cuenda ñáyiv̄i cha cuchino ñi chii chihin̄ tuhun̄ cahán̄ ra ihya

nu cuahan ca chi. ²¹ Chiquén chuun na tandihí ñu ta ñn ri na cuvi ñu chihin tahan ñu. Ta noo ri na cuvi ñu chihin yo, Sutu Mañi yuhu. Tari yoho nyaún chihin ta yuhu nyaí chuhun, na cu ñn ri cuvi ñu chihin yo, tacuhva vatyí tandihí ñáyiví iyó siqui ñuhu ñáyiví chino iñi ñu tyi maun tachí chii. ²² Yuhu चाहि चा ndicha ñuhu chi ñu nyicón chi yo, suri cha ndicha ñuhu cha chahun chii. Vatyí chihin cuan na ñn ri cuvi ñu tari yoho chihin yuhu noo ri cuvi yo. ²³ Yuhu nyaí chihin ñu ta yoho nyaún chihin, tacuhva na cuvi yo noo ri chihin ñu. Tyicuan caa ta coto tandihí ñáyiví iyó siqui ñuhu ñáyiví tyi maun tachí chii, ta cuñí xaun chi ñu nyicón chi yo tari cuñún chi yuhu.

²⁴ Sutu Mañi yuhu, maun chahun chi ñu chii. Ta cuñí cha cunyaa ñu chihin nu cuacunyai, tacuhva nanyehe ñu cha ndicha ñuhu cha chahun chii vatyí cuñún chii nyata ni cumañi ca chino ñuhu ñáyiví. ²⁵ Sutu Mañi yuhu, ra vaha cuvún, ta ñu cuenda ñuhu ñáyiví ña ñohó nuu ñu chuun, soco yuhu ñohó nui chuun. Ta ra nyicón chi yo ihya chitó ra tyi maun tachí chii. ²⁶ Cha catyí chi ra yóo ra cuvún, ta cucatyí tiqui inga chaha, tacuhva vatyí tari cuhva cuñún chii, tyicuan caa cuhva cuacuñi tucu maa ra chi ra tahan ra. Ta yuhu cunyai añima ra.

18

Nu cuahan ra Jesús vehe caa
(Mt. 26.47-56; Mr. 14.43-50; Lc. 22.47-53)

¹ Cha yaha cha catyí ra Jesús tuhun ihya, quitá ra ta cuahan ra chihin ra cachicá noo chihin ra inga chiyo yuhu yuvi Cedrón. Ta yucuan nyaá noo chacu yutun yucu. Ta yucuan quihví ra Jesús chihin ra cachicá noo chihin ra. ² Ta ra Judas, ra cha naxicó tuhun chi ra, chitó ra nu cuahan ra Jesús. Vatyí tuhvá ra Jesús chahán ra yucuan chihin ra cha cachicá noo chihin ra. ³ Ta yucuan chaá ra Judas chihin cuaha sindaro ta cuaha policia cuenda vehe ñuhu cha tachí ra cuvi nuu chi tata sutu ta ra cuvi fariseo. Chaá coyo ra yucuan, canyisó ra mityí, ta canyiso ra lámpara ta ñuhu yiti. ⁴ Ta vatyí ra Jesús cha chitó ra tandihí cha cucuvi chi ra, quitá ra ta ndaca tuhun ra chi ra:

—¿Yóo chi nanducú ndo? —catyí ra.

⁵ Ta cacatyí ra chi ra:

—Chi ra Jesús ra ñuu Nazaret.

Ta catyí ra Jesús:

—Yuhu cuvi —catyí ra.

Ta ra Judas, ra cha naxicó tuhun chi ra Jesús nuu ra xaan iñi chi ra, nanyaá ra chihin ra yucuan. ⁶ Ta cuhva cha catyí ra Jesús: “Yuhu cuvi”, tandihí ra canandaca chata ra ta canduva ra nu ñuhú. ⁷ Tyicuan ta inga tucu chaha ndaca tuhun ra Jesús chi ra, ta catyí ra:

—¿Yóo chi nanducú ndo?

Ta cacatyí ra:

—Chi ra Jesús ra ñuu Nazaret.

⁸ Ta catyí ra Jesús:

—Cha catyí chi ndo tyi yuhu cuví. Tatu chii nanducú ndo, saña ndo chi ra chica noo chihin na cunuhun coyo ra —catyí ra Jesús chi ra.

⁹ Ican tyehe caa catyí ra Jesús tacuhva na chino cava cha catyí maa ra ta ityi chata ca nu catyí ra: “Ra cha chaha Suti chii, ni noo ra ña cua-naá.” ¹⁰ Tyicuan ta ra Simón Pedro nyisó ra noo mityi. Ta tava ra ta chahnya ra soho chiyo vaha noo ra cha nañí Malco. Cuví ra cuan musu ra cuví nuu chi tandihi tata sutu. ¹¹ Soco ra Jesús catyí ra chi ra Pedro:

—Natyihi mityun chichi veno. Tatu Nyoo Suti ta cuñí ra cha nyehi tindoho, tahan chi cha nyehi —catyí ra Jesús chi ra.

Nu nanyaq ra Jesús nuu ra cuví nuu chi tata sutu

(Mt. 26.57-58; Mr. 14.53-54; Lc. 22.54)

¹² Tyicuan ta sindaro cuan chihin capitán ra, ta policia cuenda vehe ñuhu, catiín ra chi ra Jesús, ta chahñi ra chi ra vatyí cuhun ra vehe caa.

¹³ Tyicuan ta chinyaca ra chi ra vehe ra Anás, vatyí ra Anás cuan tyiso ra Caifás cuví chi ra. Ta cuiya cuan cuví ra Caifás ra cuví nuu chi tata sutu. ¹⁴ Ican ra Caifás ihya cuví ra cha catyí chi ra cacuví nuu chi ñu Israel vatyí vaha ca cha cúvi noo ri rayi cha cuenda tandihi ñáyivi ñuu.

Nu catyí ra Pedro tyi ña ñohó nuu ra chi ra Jesús

(Mt. 26.69-70; Mr. 14.66-68; Lc. 22.55-57)

¹⁵ Ra Simón Pedro ta nonga ra cha chica noo chihin ra Jesús, canyicón ra chi ra Jesús nu cuahan ra nuquehe vehe ra Anás cuan. Ta ra cuví nuu chi tata sutu cuan ñohó nuu ra chi inga ra cuan. Yucuan chaha quihvi ra cuan chihin ra Jesús nuquehe ra cuví nuu cuan. ¹⁶ Soco ra Pedro ndoo ra yuvehe chata vehe. Yucuan chaha quitá ra cha ñohó nuu chi ra cuví nuu chi tata sutu cuan, ta cahán ra chihin ñaha cha nyaá yuvehe cuan. Ta tyihí ra chi ra Pedro chichi nuquehe cuan. ¹⁷ Tyicuan ta ñaha cha nyaá yuvehe cuan ndaca tuhun ña chi ra Pedro, ta catyí ña:

—¿Atu ñima noo ra chica noo chihin rayi cuan cuvún?

Ta ra Pedro catyí ra:

—Ñime cuví —catyí ra chi ña.

¹⁸ Tyicuan ta musu ta policia cha tayucú yucuan, casanatahan ra ñuhu vatyí vichin xaan. Ta tayucú ra casanasaá ra chi ra. Ta ñohó tucu ra Pedro cuan yunuhu cuan, sanasaá ra chi ra.

Nu sanahma ra cuví nuu chi tata sutu chi ra Jesús

(Mt. 26.59-66; Mr. 14.55-64; Lc. 22.66-71)

¹⁹ Tyicuan ta ra cuví nuu chi tata sutu quichaha ndaca tuhun ra chi ra Jesús, yóo ra cuví ra cachicá noo chihin ra, ta ñaá cha sañahá ra chi ñáyivi. ²⁰ Ta ra Jesús catyí ra chi ra:

—Yuhu chihin nuu tandihí ñáyiví cahín. Ta sañahí chichi vehe ñuhu tahan tahan ñuu ta chichi vehe ñuhu cahnu ñuu ihya nu ndu ín ri tandihí ñu Israel. Ta ñahri tuhun xehe cahín. ²¹ ¿Ñáá tuhun cha ndacá tuhun chii? Vaha taxin ca ndaca tuhun chi ñu cha chiñi tuhun cahín, ta maa ñu nacatyí ñu ñáá tuhun cahín chihin ñu. Maa ñu chitó ñu ñáá tuhun cahín —catyí ra Jesús chi ra.

²² Cuhva cha catyí ra Jesús tuhun ihya, noo policía vehe ñuhu cha nanyaá cuan, cañi ra noo nuu ra Jesús ta catyí ra:

—¿Atu tyiña caa nacahún nu cahán ra cuví nuu chi tata sutu? —catyí ra chi ra Jesús.

²³ Ta ra Jesús catyí ra:

—Tatu cahín noo tuhun ña vaha, catyí chii nya maa maa ña vaha cahín. Soco tatu cahín tuhun vaha, ¿ñáá tuhun cha cañun chii? —catyí ra Jesús chi ra cuan.

²⁴ Yahá cuan ta nuhñí ra Jesús, ta tachí ra Anás chi ra nu nyaá ra Caifás, ra cuví nuu chi tata sutu.

Nu catyí ra Pedro inga chaha vatyí ña ñohó nuu ra chi ra Jesús

(Mt. 26.71-75; Mr. 14.66-72; Lc. 22.58-62)

²⁵ Ta ra Pedro nanyaá ca ra yunuhu cuan sanasaá ra chi ra. Ta catyí ñu chi ra:

—¿Atu ñima noo ra chicá noo chihin ra cuan cuví yoho? —catyí ñu chi ra.

Ta ra Pedro tixehe ra, ta catyí ra:

—Ñime.

²⁶ Tyicuan ta noo musu ra cuví nuu chi tata sutu, noo ra cha cuví ñáyiví chi ra cha chahnya ra Pedro soho, quichahá ndaca tuhun ra ta catyí ra:

—Ta caa cuirí tyi nyehí chuun chihin ra chichi chacu cuan —catyí ra chi ra Pedro.

²⁷ Ta ra Pedro tixehe ra inga chaha, ta caa cuhva ri cuan ta chacu noo loho.

Nu nanyaá ra Jesús nuu ra Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yahá cuan ta quita coyo ra chihin ra Jesús vehe ra Caifás ta chinyaca ra chi ra vehe tyiño gobernador. Cha vachi cundichin ta ra Israel ña caquihví ra chichi vehe tyiño cuan vatyí ñima vehe ñu Israel cuví. Ta vatyí catyí ñu tyi yíca cha quihví ñu vehe savahri vatyí coto ma cuví cuxiñi ñu quiví vico pascua cuan. ²⁹ Yucuan chaha quita ra Pilato vatyí cahan ra chihin ra, ta catyí ra:

—¿Ñáá cuatyí tyaá ndo siquí ra ihya? —catyí ra Pilato chi ra ñuu Israel.

³⁰ Ta canacahan ra Israel ta catyí ra:

—Tyehe ta ñima noo ra iyó cuatyí cuví ra, ma nacuhva cuenda ndi chi ra chuun —catyí ra chi ra Pilato.

³¹ Tyicuan ta ra Pilato catyí ra chi ra:

—Quehen maa ndo chi ra, na cutuñi chi ra nuu maa ndo tari cuhva catyí ley maa ndo.

Ta nacahan ra ñuu Israel cuan ta cacatyí ra:

—Soco nyuhu ñu Israel ñahri ityi iyó chi ndi cha cahñi ndi chi ni noo ñáyiví —catyí ra.

³² Tyicuan caa ching cava cha catyí ra Jesús yoso caa cucúvi ra. ³³ Tyicuan ta nandihv_i tucu ra Pilato chichi vehe tyiño cuan inga chaha. Ta cana ra chi ra Jesús ta ndaca tuhun ra chi ra:

—¿Atu yoho cuvún rey cuenda ñu Israel? —catyí ra chi ra.

³⁴ Ta ra Jesús catyí ra:

—¿Atu cha cuenda maun ndaca tuhun, o inga ñu nacatyí ñu tuhun chuun? —catyí ra Jesús chi ra Pilato.

³⁵ Ta catyí ra Pilato:

—Ñima ra ñuu Israel cuví yuhu. Suri ra ñuu maun ta ra cuví nuu chi tata sutu ñuu maun cuví ra canacuhva cuenda chuun chii. ¿Ñáá cha sacuvun? —catyí ra chi ra Jesús.

³⁶ Tyicuan ta nacahan ra Jesús ta catyí ra:

—Nu nyacá ñahi ñima cuenda ñuhu ñáyiv_i ihya cuví. Tyehe ta ican, ra nyicón chii cañi tahan ra tacuhva ma cunyai ndaha ra Israel. Soco nu nyacá ñahi, ñima cuenda ihya cuví —catyí ra Jesús chi ra Pilato.

³⁷ Tyicuan ta ra Pilato catyí ra chi ra:

—¿Tu tyicuan caa, rey cuvún vii? —catyí ra Pilato chi ra Jesús.

Ta nacahan ra Jesús ta catyí ra:

—Rey cuví tari catyun chiña. Yucuan cuenda caqui ta vachi ñuhu ñáyiv_i ihya,

vatyí catyí ñáá cha cuví cha ndicha. Tandih_i ñu quichaha cha ndicha, tyasohó ñu tuhun cahín —catyí ra Jesús.

³⁸ Ta ra Pilato catyí ra chi ra:

—¿Ta ñáá cha cuví cha ndicha? —catyí ra.

Nu cuacacahñi ra chi ra Jesús

(Mt. 27.15-31; Mr. 15.6-20; Lc. 23.13-25)

Cha yaha cha ndaca tuhun ra tuhun ihya, quita ra Pilato chicahan ra chihin ra Israel inga chaha ta catyí ra:

—Yuhu ña nañihi mai ni noo cuatyí ra ihya. ³⁹ Soco nyoho iyó noo costumbre chi ndo cha chican ndo na sañe chi noo ra ñohó vehe caa cha vico pascua ihya. ¿Atu cuñi ndo cha sañe chi ra cha cuví rey cuenda ndo ñu Israel? —catyí ra Pilato chi ra.

⁴⁰ Tyicuan ta tandih_i ra quichaha canachaa ra ta catyí ra:

—¡Ma sañon chi ra chiña! ¡Chi ra Barrabás sañon! —catyí ra.

Ta ra Barrabás cuví ra noo ra suhu.

19

¹ Tyicuan ta quehen ra Pilato chi ra Jesús ta tach_i ra na cucañi sindaro chi ra. ² Ta sindaro savaha ra noo corona chihin iñu ta catyih_i ra xiñi ra Jesús. Ta sacuihno ra chi ra chihin noo sahma tyacu nyaa tari cha tuhvá rey cañihnó.

³ Tyicuan ta catuhva ra nu nanyaá ra ta chacú nyaa ra chi ra, ta cacatyí ra:

—¡Nocumi chuun yoho Rey cuenda ñu Israel! —cacatyí ra, ta cacatu ra chi ra.

⁴ Tyicuan ta quita tucu ra Pilato inga chaha ta catyí ra chi ra:

—Nyehē ndo cuatave chi ra ityi nuu ndo tacuhva nanyehē ndo vatyí ni noo cuatyí ra ña nañihí —catyí ra Pilato chi ra.

⁵ Ta quita ra Jesús yihí corona iñu cuan xiñi ra, ta ñihno ra sahma tyacu nyaa cuan. Tyicuan ta ra Pilato catyí ra chi ra:

—¡Ma ra ihya! —catyí ra chi ra.

⁶ Cuhva cha cananyehē ra cacuví nuu chi tata sutu ta policia chi ra, quichaha cacana chaa ra ta catyí ra:

—¡Cahñi chi ra nu cruzi! ¡Cahñi chi ra nu cruzi! —cacatyí ra.

Soco ra Pilato catyí ra chi ra:

—Quehen maa ndo chi ra ta cahñi maa ndo chi ra nu cruzi. Vatyí yuhu ni noo cuatyí ra ña nañihí.

⁷ Soco nacahan ra Israel cuan ta cacatyí ra:

—Iyó noo ley chi ndi, ta cuhva catyí ley ndi, cuñi chi cha cúvi ra vatyí nasahá ra Sehe Nyoo chi ra —cacatyí ra.

⁸ Cha chiñi ra Pilato tuhun ihya, nayuhví ca ra. ⁹ Ta ndihví tucu ra inga chaha chichi vehe tyiño, ta ndaca tuhun ra chi ra Jesús:

—¿Nya quita yoho? —catyí ra chi ra.

Soco ra Jesús ñahri cha nacahan ra.

¹⁰ Tyicuan ta ra Pilato catyí ra chi ra:

—¿Ñáá tuhun ña nacahún nu cahán yuhu? ¿Atu ña chitón vatyí ra cuví tyiño cuví ta iyó ityi chii cha tyai chuun nu cruzi, ta iyó tucu ityi chii cha sañe chuun? —catyí ra Pilato chi ra Jesús.

¹¹ Ta nacahan ra Jesús ta catyí ra:

—Tyehe ta ña chaha Nyoo tyiño cuan chuun, ñahri ityi iyó chuun cha tachi tuñun chii. Yucuan chaha, ra cha cachaha cuenda chii chuun, cahnu ca cuatyí ra ican saha yoho —catyí ra Jesús chi ra Pilato.

¹² Nya cuhva cuan ta nducu ra Pilato cuhva saña ra chi ra Jesús, soco ra Israel cacana chaa ra siqui ra, ta catyí ra:

—¡Tatu sañon chi ra, ñima amigo rey cahnu cuví chuun! Vatyí tandihí ri ra cha catyí tyi rey cuví ra, ra xaan iñi chi rey cahnu cuví ra —cacatyí ra.

¹³ Tyicuan ta cha chiñi ra Pilato tuhun ihya, tachi ra na quita ra Jesús ityi chata vehe. Ta chicunyaá ra Pilato nu tyayu ra nu tuhvá ra sandaa cuatyí ñáyivi nu nañi chi Gabata chihin sahan hebreo, ta cuñi chi catyí: “Nu yihí yuu”. ¹⁴ Ta cuví chi noo quivi cha ni cumañi ca vico pascua, ñáá cuhva ora. Tyicuan ta ra Pilato catyí ra chi ra Israel cuan:

—¡Ma rey ndo chiña!

¹⁵ Soco maa ra Israel canachaa ra ta cacatyí ra:

—¡Na cúvi ra! ¡Na cúvi ra! ¡Cahñi chi ra nu cruzi! —cacatyí ra.

Ta ra Pilato catyí ra chi ra:

—¿Atu cahñi nu cruzi chi rey ndo?

Soco ra cacuví nuu chi tata sutu cacatyí ra:

—Yori ca rey iyó. Noo tuhun ri ra César, cha cuví rey cahnu —catyí ra.

¹⁶ Tyicuan ta ra Pilato chahā cuenda ra chi ra Jesús chi ra na cunyaa ra nu cruzi. Ta quehēn sindaro chi ra, ta cuahan ra chihin ra.

Nu chihí ra Jesucristo nu cruzi

(Mt. 27.32-44; Mr. 15.21-32; Lc. 23.26-43)

¹⁷ Ta nyisó ra Jesús cruzi ra, cuahan ra noo nu nañi: “Yiqui Xiñi Ndiyí”. Ta chihin sahan hebreo nañi chi Gólgota. ¹⁸ Ta yucuan catyaa ra chi ra nu cruzi chihin clavu. Ta ñin ri chihin ra catyaa ra uvi ca ra. Noo ra tacaá ra noo nu cruzi inchiyo xiin ra ta inga ra inga chiyo xiin ra. Ta ra Jesús tacaá ra mahñu. ¹⁹ Ta ra Pilato tachi ra tyiño na cunyaa letra xiñi cruzi cuan. Ta catyí chi tyehe caa: “Ra Jesús ra ñuu Nazaret, Rey cuenda ñu ñuu Israel.”

²⁰ Ta cuaha ñu Israel sacuañā ñu tuhun cuan, vatyí yatyin ri ñuu ñu cuví nu chinanyaa ra cruzi ra Jesús. Ta letra cuan nyaá chihin sahan hebreo, ta sahan griego, ta sahan latín. ²¹ Yucuan chaha ra cacuví nuu chi tata sutu cacatyí ra chi ra Pilato:

—Ma tyaun: “Rey cuenda ñu ñuu Israel”, vaha ca tyaun: “Ican ra ihya cha catyí vatyí rey cuenda ñu ñuu Israel cuví ra” —cacatyí ra.

²² Soco ra Pilato catyí ra:

—Noo cha yaha tyai, nandoo maa tyicuan caa —catyí ra chi ra.

²³ Cha yaha cha catyaa sindaro cuan chi ra Jesús nu cruzi, canaquehēn ra sahma ra ta cha cumi tahan ra quehēn ra noo noo sahma ra. Ta ndoq nonga sahma ra cha ña quicu ñu. Noo ri savahā ñu nyacua nya siqui ta nya yuvi. ²⁴ Ta sindaro cuan cacatyí ra chi ra tahan ra:

—Ma cahnya yo. Cuhun yo noo sihva, nyehe yo yóo chi tahán chi sahma cuan —cacatyí ra.

Tyicuan caa cuví tari cuhva catyí nu tutu Nyoo nu catyí chi tyehe caa: “Casachā ra sahme ta chahan ra noo sihva chihin chi, nyehe ra yóo ra saha canaa.” Ta ican ihya casacuví sindaro cuan.

²⁵ Ta chaha cruzi ra Jesús nanyaá sihi ra. Ta nanyaá tucu cuhu ña, ta cu María ñasihi ra Cleofas, ta cu María ñaha Magdala. ²⁶ Ta nanyehe ra Jesús chi sihi ra, nanyaá ña yatyin ri. Ta nanyehe tucu ra chi ra cha chica noo chihin ra, ra cha cuñí xaan ra chi. Ta catyí ra chi sihi ra:

—Ma sehun nanyaá chiña —catyí ra.

²⁷ Tyicuan ta catyí ra chi ra cha cuñí xaan ra chi:

—Ma sihun nanyaá chiña —catyí ra chi ra.

Ta nya quivi cuan ta naquehēn cuenda ra chi ña cuanuhu ña vehe ra.

Nu chihí ra Jesús

(Mt. 27.45-56; Mr. 15.33-41; Lc. 23.44-49)

28 Cha yahā tuhun ihya, cha nyehe ra Jesús vatyí cha ndihí tyiño saha ra. Tyicuan ta catyí ra:

—Ityi ndutya —catyí ra.

Ta chihin tuhun cuan nachino cava tuhun cha nyaá nu tutu Nyoo.

29 Ta yucuan nanyaá noo quíyí tyitú chihin vinagre. Tyicuan ta casatyí ra chihin noo xixan ndutya iya cuan. Ta tyaa ra noo nu soco yutun cha nañí hisopo, ta catyaña ra nya yuhu ra. 30 Chihí ra Jesús ndutya cuan ta catyí ra:

—Cha iyó vaha tandihí vi-tyin —catyí ra.

Tyicuan ta nacañi noo ra xiñi ra ta chihí ra.

Nu quiñi lanza yiqui naha ra Jesús

31 Noo ri ca quívi cumañi ta cuví quívi cahnu ca vico pascua cuan, ta ra cacuví nuu chi ñu Israel ña cuñí ra cha ndoo coño ñuhu cuan nu cruzi quívi nyitatú ñu, vatyí quívi nyitatú ñu quívi ii cuví. Yucuan chaha chican ra tumañi iñi chi ra Pilato na tachi ra na cucahnu sindaro sihin ra cha catacoyo nu cruzi cuan tacuhva na cacúvi ra cha numi ri, ta cañehe ra coño ñuhu ra. 32 Tyicuan ta cuahan coyo sindaro nu tayucú cruzi cuan. Ta chahnu ra sihin noo ra cha tacaá yucuan. Tyicuan ta chahnu tucu ra sihin inga ra cha tacaá xiin ra Jesús. 33 Soco cuhva cha cuatuhva ra nu tacaá ra Jesús, cananyehe ra vatyí cha chihí ra. Ta yucuan chaha ña cachahnu ca ra sihin ra.

34 Soco suvita ri noo sindaro cuan quiñi ra lanza yiqui naha ra Jesús. Ta quita ñiñi ta ndutya. 35 Ra cha nacatyí tuhun ihya, noo ra cha nyehe cuví ra. Ta cha ndicha cahán ra, vatyí maa ra chitó ra vatyí cha ndicha cahán ra, tacuhva nachino tucu iñi nyoho. 36 Vatyí tuhun ihya cuví chi tyehe caa tari cuhva catyí tuhun Nyoo nu catyí chi: “Ni noo yiqui ra ta ma tahnú.” 37 Ta iyó nonga tucu nu catyí chi nu tutu Nyoo tyehe caa: “Cunyehe ñu chi ra cha quiñi ra lanza chi.”

Nu quihvi ra Jesús chichi ñuhú

(Mt. 27.57-61; Mr. 15.42-47; Lc. 23.50-56)

38 Cha yahā tuhun ihya, ra José ra ñuu Arimatea chican ra chi ra Pilato nacuhva ra cha naquehen ra coño ñuhu ra Jesús. Ta ra José cuan cuví ra noo ra yihí cuenda ra Jesús vasi xehe ri cha cuenda cha yuhví ra chi ra cacuví nuu chi ñu Israel. Tyicuan ta chaha ra Pilato permisú chi ra, ta ra José chahan ra chinaquehen ra coño ñuhu cuan. 39 Chahan tucu ra Nicodemo, ra cha chahan chichan chihin ra Jesús cha cha cuaa. Cha ra chihin ndutya vixi chahan. Ta noo ndutya vixi chahan cha nañi mirra nasaca ñu chihin inga cha nañi áloe. Ta quita chi tari noo oco uchi kilu cha tandihí. 40 Yucuan ta ra José ta ra Nicodemo caquehen ra coño ñuhu ra Jesús ta canasiqui noo ra chi ra chihin sahma cuiñi cahyu

ra ndutya vixi chahán cuan, tari cuhva noo tuhun cha iyó chi ñu Israel tu cuatyihí ñu noo ndiyí chichi ñuhú. ⁴¹ Yatyin nu cachahñi ra chi ra Jesús nu cruzi nyaá noo chacu yutun yucu vixi. Ta chichi chacu cuan nyaá noo ñaña chaa nu ta cohon ca ni noo ndiyí. ⁴² Yucuan tyihí ra coño ñuhu ra Jesús vatyí yatyin ri cuan nyaá ñaña cuan ta vatyí cha cua quichaha quivi nyitatu ñu Israel.

20

Nu nandoto ra Jesús

(Mt. 28.1-10; Mr. 16.1-8; Lc. 24.1-12)

¹ Cha timingu cha ñaa ca, cu María ñaha Magdala cuan chahan ña nu ñaña. Ta nyehe ña tyi ñahri ca yuu nyasí yuhu ñaña cuan. ² Tyicuan ta chinó vavaha ña cuahan ña nu nyaá ra Simón Pedro ta inga ra chicā noo chihin ra Jesús, ra cha cuñi xaan ra Jesús chi. Ta catyí ña chi ra:

—Quehen ñáyivi coño ñuhu Sutú Mañi yo chichi ñaña, ta ña chitó yo nya chinyacā ñu —catyí cu María chi ra Pedro ta chi inga ra cuan.

³ Tyicuan ta ra Pedro ta inga ra cuan cuahan coyo ra nu ñaña. ⁴ Nĩnduvi ra ñin ri cuahan coyo ra cachino ra. Soco chino ca inga ra cuan ican saha ra Pedro, ta xihna ca ra chaā nu ñaña. ⁵ Quichaha nyehe ñihñi ra chichi ñaña, ta nyehe ra sahma cuiñi cha yihí coño ñuhu ra Jesús, catuví cuan.

Soco ña quihvi ra chichi ñaña. ⁶ Yahā cuan ta chaā ra Simón Pedro chata ra, ta quihvi ra chichi ñaña cuan. Suri nyehe tucu ra cuan sahma cuan catuví. ⁷ Ta suri nyehe tucu ra vatyí sahma cha siquí noo xiñi ra Jesús, ña ñin ri cayucú chihin inga sahma cuan, soco catuví ñin. ⁸ Tyicuan ta quihvi tucu inga ra chicā noo chihin ra Jesús cuan, ra cha chaā cha xihna ri nu ñaña cuan. Ta nyehe ra cha cuví cuan, ta chingo ñi ra. ⁹ Vatyí cha cuví maa ta cutuñi ca ñi ra cha catyí nu tutu Nyoo, vatyí ra Jesús cuñi chi cha nandoto ra cha yahā chihi ra. ¹⁰ Tyicuan ta ra cachicā noo chihin ra Jesús cuanuhu coyo ra nya vehe.

Nu tuvi ra Jesús nuu cu María ñaha ñuu Magdala
(Mr. 16.9-11)

¹¹ Soco cu María ndoo ña chata yatyin ri yuhu ñaña, chacú chaa ña. Cha ñiri ca cha chacú ña, nyehe ñihñi ña chichi ñaña. ¹² Ta nyehe ña uvi tahan ángel ñihno ra sahma cuichin, nyicú ra nu catuví coño ñuhu ra Jesús. Noo ra nyaá ityi nu catuví xiñi ra, ta nonga ra ityi nu catuví chaha ra. ¹³ Ta ángel cuan ndacā tuhun ra chi ña ta catyí ra:

—Maha, ¿ñáá tuhun chacú chaun?

Ta catyí ña:

—Vatyí quehen ñu chi Sutú Mañi yuhu, ta ña chité nya tyihí ñu chi ra —catyí ña chi ángel cuan.

14 Ni cahán ña tuhun ihya ta nanyocavā ña ta nanyehē ña chi ra Jesús yucuan. Soco ña chitó ña cha ra Jesús cuví ra. 15 Tyicuan ta ra Jesús ndaca tuhun ra chi ña:

—¿Ñáá tuhun chacún? ¿Yóó chi nanducún? —catyí ra chi ña.

Cuñí maa ña vatyí ra sahá cumi chacu cuan cuví ra. Ta catyí ña:

—Tata, tatu yoho quehün chi ra Jesús, catyí chii nya sandoun chi ra, vatyí naquehin chi ra —catyí ña chi ra.

16 Tyicuan ta catyí ra Jesús chi ña:

—¡María! —catyí ra chi ña.

Maa ña nanyehē ña ta cahān ña chihin ra chihin sahan hebreo, ta catyí ña:

—¡Raboni! —Ta cuñí chi catyí: “Maestro”.

17 Ta catyí ra Jesús chi ña:

—Ma tiun chii, vatyí ta nandaa que nu nyaá Suti. Soco cuahān ta catyun chi tandihí yañi vatyí cuahin nu nyaá Suti, ta suri Sutu ndo cuví chi ra. Cuahin nu nyaá Nyoi, ta suri Nyoo ndo cuví chi ra —catyí ra Jesús chi ña.

18 Tyicuan ta chahān cu María ñaha Magdala cuan chisacoto ña chi ra cachicā noo chihin ra Jesús vatyí nyehē ña chi ra Jesús ta catyí ra tuhun cuan chi ña.

Nu tuví ra Jesús nuu ra cachicā noo chihin ra

(Mt. 28.16-20; Mr. 16.14-18; Lc. 24.36-49)

19 Suri maa quiví cuan cha quichaha vitya, cha cuacuaa ta candu ün ri ra cachicā

noo chihin ra Jesús. Ta nyasí vaha yuvehe nu nyicú ra cha cuenda cha yuhví ra chi ra cacuví nuu chi ñu Israel. Ta ra Jesús tuví ra ta chicuinanyaa ra mahñu. Ta chaha ra nocumi chi ra, ta catyí ra:

—Na coo cha taxi ri añima ndo —catyí ra.

20 Cha yaha cha catyí ra tuhun ihya ta sañaha ra ndaha ra ta yiqui naha ra. Ta maa ra cacusí cuñi ra cha nanyehé ra chi Sutu Mañi yo.

21 Ta catyí tucu ra Jesús inga chaha chi ra:

—Na coo cha taxi ri añima ndo. Tari tachí Suti tyiño chii, tyicuan caa tachí tyiño chi nyoho —catyí ra chi ra.

22 Tyicuan ta tiví ra siqui ra ta catyí ra chi ra:

—Naquehen ndo Tatyí Ii Nyoo. 23 Ñu cha sahá ndo tucahnu iñi chi, iyó tucahnu iñi chi ñu. Ta ñu cha ña sahá ndo tucahnu iñi chi, ñahri tucahnu iñi iyó chi ñu —catyí ra Jesús chi ra.

Nu nyehē ra Tomás chi Sutu Mañi yo cha yaha nandoto ra

24 Soco ra Tomás, noo ra chicā noo chihin ra Jesús, ra cha catyí ñu: “ra tinihi”, yori ra nyaá chihin ra cuhva cha quichí ra Jesús. 25 Yaha cuan ta canacatyí ra cachicā noo chihin ra Jesús chi ra:

—Nyehe ndi chi Sutu Mañi yo —cacatyí ra chi ra.

Soco ra Tomás catyí ra:

—Tatu ma nyehi ndaha ra nu cahví nu yihí clavu, ta tatu ma tyihi ndahi nu yihí clavu

21

cuan, ta tatu ma tyihi ndahi yiqui naha ra, ma chino iñi —catyí ra Tomás.

²⁶ Uña quiví yaha ta canyicú tucu ra cachica noo chihin ra Jesús noo vehe. Ta nyaá ra Tomás chihin ra. Tyicuan ta vasi nyasí vaha yuvehe soco quihví ra Jesús ta chicuinanyaa ra mahñu ra. Ta chaha ra nocumi ta catyí ra:

—Na coo cha taxi ri añima ndo.

²⁷ Tyicuan ta quichaha catyí ra chi ra Tomás:

—Tyihi nu ndahun nu cahví ndahi. Ta tyihi ndahun yiqui nahi. Ta ma caca uvi iñun, soco chino iñun —catyí ra Jesús chi ra Tomás.

²⁸ Tyicuan ta nacahan ra Tomás ta catyí ra:

—¡Sutu Mañi yuhu! ¡Nyoo Suti cuví chuun! —catyí ra Tomás.

²⁹ Ta catyí ra Jesús chi ra:

—Yoho Tomás, vityin chinó iñun tyi nyehún chi. Sií ca cuñí ñu cha ña nyehe ta chinó iñi ñu —catyí ra Jesús chi ra Tomás.

Nu sacoto ra Juan ñáa cuenda chino libru ihya

³⁰ Ta cuaha ca milagru sacuví ra Jesús nuu ra cachica noo chihin ra, ta ñahri chicunyaa nu libru ihya. ³¹ Soco chicunyaa tuhun ihya vatyí ra Jesús cuví Cristo, ra cuví Sehe Nyoo, ta vatyí coo ndo ñayiví cha ma naa ca maa tatu chinó iñi ndo chi ra.

Nu tuví ra Jesús nuu ucha tahan ra cachica noo chihin ra

¹ Cha yaha cuan ta tuví tucu ra Jesús nuu ra cachica noo chihin ra inga chaha. Tyehe caa tuví ra yuhu miñi Tiberias. ² In ri nyicú ra Simón Pedro ta ra Tomás cha catyí ñu: “ra tinihi” chi, ta ra Natanael, ra ñuu Caná nu cuví Galilea. Nyicú tucu sehe ra Zebedeo ta uvi ca ra cachica noo chihin ra Jesús. ³ Ta catyí ra Simón Pedro chi ra:

—Cuahin cuatín tiyaca —catyí ra.

Ta cacatyí ra chi ra:

—Cuhun tucu nyuhu chuhun —cacatyí ra.

Cuahan coyo ra ta quihví coyo ra chichi noo canoa, soco cha cuaa cuan ni noo tiyaca ña catín ra. ⁴ Cha vachi cundichin cuan tuví ra Jesús nu ñiti yuhu miñi cuan. Soco ra cachica noo chihin ra, ña canicohón nuu ra chi ra. ⁵ Tyicuan ta catyí ra chi ra:

—Yoho ra tahan yo, ¿atu ta ñihi ca ndo tiyaca?

Ta canacahan ra ta catyí ra:

—Ta ñihi ca ndi.

⁶ Tyicuan ta nacahan ra Jesús ta catyí ra:

—Tyihi ndo tarraya chiyo vaha canoa chiña, ta ñihi ndo —catyí ra Jesús chi ra.

Tyicuan caa casacuví ra, ta yaha cuan ta nyacua ña cuví tava ra tarraya cuan nu ndutya chaha cha cuaha tiyaca yihí. ⁷ Ta ra cha cuñí xaan ra Jesús chii catyí ra chi ra Pedro:

—¡Sutu Mañi yo cuví!
—catyí ra chi ra Pedro.

Cha chiñi ra Simón Pedro vatyí Sutu Mañi yo cuví, ndihvi noo ra sahma ra, vatyí tavá ra cha cuatiin ra tiyaca, ta quiñi ra cuahan ra chichi ndutya cuan. ⁸ Ta inga ra cachicá noo chihin ra Jesús chaá coyo ra nya yuhu miñi cuan chihin canoa, caxitá ra tarraya cuan tyitú yihí tiyaca, vatyí yatyin ri yuhu miñi cuan cañohó ra ta cha noo cientu metru ri. ⁹ Cuhva cha canoó ra nu ñuhú, cananyehe ra noo nu caá titi ñuhu. Ta catuví noo tiyaca siqui titi ñuhu cuan, ta pan ñandihi. ¹⁰ Ta ra Jesús catyí ra chi ra:

—Nyaca ndo suhva tiyaca cha ni tiñi ndo —catyí ra Jesús chi ra.

¹¹ Ta ra Simón Pedro ndaa ra nu canoa ta quichahá xita quiñoho ra tarraya tyitú yihí tiyaca nahnu. Cientu uvi xico uchi uñi tahan ti ñohó. Ta vasi cuaha ti, ña tahnya tarraya cuan. ¹² Tyicuan ta catyí ra Jesús chi ra:

—Ñaha ndo ta curumusa ndo —catyí ra Jesús chi ra.

Ta ni noo ra cachicá noo chihin ra ña cacaña ñi ra candaca tuhun ra yóó ra cuví ra vatyí cachitó ra vatyí Sutu Mañi yo cuví ra. ¹³ Tyicuan ta tuhva ra Jesús ta quehen ra pan, ta chahá ra chi ra. Ta suri tyicuan caa sacuvi ra chihin tiyaca. ¹⁴ Ican ihya cuví chaha cu uñi cha tuvi ra Jesús nuu ra cachicá noo chihin ra cha yahá cha nandotó ra.

Nu cahán ra Jesús chihin ra Simón Pedro

¹⁵ Cha yahá cha curumusa ra Jesús, ndaca tuhun ra chi ra Simón Pedro:

—Simón, sehe ra Jonás, ¿atu cuñi con chii ican saha ra ihya?

Ta nacahan ra Pedro ta catyí ra:

—Ay, Sutu Mañi yuhu, maun chitón tyi cuñi chuun —catyí ra Pedro.

Ta catyí ra Jesús chi ra:

—Cuhva cha cachi mbee nyihi sane —catyí ra Jesús chi ra Pedro.

¹⁶ Ta ndaca tuhun ra Jesús chi ra inga chaha:

—Simón sehe ra Jonás, ¿atu cuñun chii? —catyí ra Jesús chi ra.

Ta nacahan ra Pedro ta catyí ra:

—Sutu Mañi yuhu, maun chitón tyi cuñi chuun —catyí ra Pedro chi ra.

Ta catyí ra chi ra:

—Saha cumi mbee sane —catyí ra Jesús chi ra Pedro.

¹⁷ Ta chaha cu uñi ndaca tuhun ra chi ra:

—Simón Pedro, sehe ra Jonás, ¿atu cuñun chii? —catyí ra Jesús chi ra.

Cuhva cha ndaca tuhun ra chi ra cha cu uñi chaha tatu cuñi ra chi ra, ra Pedro nducuihya ñi ra, ta catyí ra chi ra:

—Sutu Mañi yuhu, maun chitón yoso caa añime ta maun chitón tyi cuñi chuun —catyí ra Pedro.

Ta ra Jesús catyí ra chi ra:

—Saha cuenda mbee sane. ¹⁸ Cha ndicha catyí chuun vatyí ta tyivaun ndihvi

noun sahmon ta chahun nu cuñún. Soco na cuchahnun, cusanacaun ndahun ta inga ra cusandihvi noo chuun. Ta cunyaca ra chuun nu ña cuñún cuhun —catyí ra Jesús chi ra Pedro.

¹⁹ Cha catyí ra Jesús tuhun ihya cuñí ra catyí ra yoso caa cucúvi ra Pedro ta cusacahnu ra chi Nyoo cha cuenda cuan. Yahá cuan ta catyí ra Jesús chi ra Pedro:

—¡Cunyon chii! —catyí ra chi ra.

Nu cahán ra Juan tuhun maara

²⁰ Tyicuan ta nyocava ra Pedro ta nanyehe ra vatyí nyicón inga ra cha chica noo chihin ra Jesús, ra cha cuñí xaan ra Jesús chi. Suri maa ra chinyaña ra chi ra Jesús cha cuxiñi ra quivi cuan. Ta ndaca tuhun ra ta catyí ra: “Sutu Mañi yuhu, ¿yóo ra cunaxico tuhun chuun?” catyí ra, ndaca tuhun ra quivi cha ni cumañi cúvi ra Jesús.

²¹ Cuhva cha nanyehe ra Pedro chi ra, ndaca tuhun ra chi ra Jesús:

—Sutu Mañi yuhu, ta ra ihya, ¿ñáá cha cucuvi chi ra? —catyí ra chi ra.

²² Nacahan ra Jesús ta catyí ra:

—Tatu cuñí mai cha coo ra nyacua nya ndichi inga chaha, ¿ñáá cha cuenda yoho? Yoho cunyon chii —catyí ra Jesús chi ra Pedro.

²³ Tyicuan ta chitya tuhun ihya nu canyicú yañi yo vatyí ra cuan, ma cúvi ra. Soco ña catyí ra Jesús cha ma cúvi ra. Catyí ra: “Tatu cuñí yuhu

cha coo ra nyacua nya quichi inga chaha, ¿ñáá cha cuenda yoho?”

²⁴ Yuhu cuví ra yucuan, ra cha cahán ra Jesús tuhun. Ta nyehi tandihí cuii maa cha cuví ta tyají nu libru ihya. Yuhu chite vatyí tandihí cha tyají, ndicha.

²⁵ Iyó cuaha ca cha sacuvi ra Jesús. Tyehe ta chicunyaá tahan tahan tuhun cuan nu libru, cahví iñi tyi naní ñuhu ñayivi ma cutahan tandihí libru cuan.

T*yi*ño Cha Casacuv*i* Ra Apóstol: Ra Cha Tyaty*ño* Ra Jesucristo Chi

*Nu catyí ra Jesús tyi
cuaquichi Tatyí Ii Nyoo*

¹ Yoho Teófilo, yuhu ra Lucas sacuhin tutu chuun quivi cuan. Ta nu sacuhin tutu cha xihna ri cuan, tyaj tandihí cha quichaha sacuvi ra Jesús ta tandihí cha sañaha ra nya quivi xihna ri ² ta nya quivi nandaq xica ra andivi. Ta cha cumañi ca nandaq ra andivi, nacachi ra chi ra apóstol cuenda ra. Ta tyatyño ra chi ra chihin Tatyí Ii Nyoo tyi cacaca ra tyiño ra. ³ Ta maa ra Jesús nyehe ra tindoho ta chihí ra. Ta cha yaha cuan, nandoto ra ta tuví ra nu canyicú ra apóstol. Ta chichi cha uvi xico quivi, cuaha xaan chaha tuví ra nu canyicú ra, vatyí na cacoto ra vatyí ndicha cha nyitó ra. Ta cahan ra tuhun yoso caa nyacá ñaha Nyoo chi yo.

⁴ Cuhva cha nyaá ca ra chihin ra, ra Jesús catyí ra chi ra:

—Ma quita ndo Jerusalén ihya, nyacua nya naquehen ndo Tatyí Ii cha catyí Suti tyi cuhva ra chi ndo, tari catyí chi ndo quivi cuan. ⁵ Chihin ndutya sacondutya ra Juan chi ñáyivi. Soco nyoho ña cuaha ca quivi ta cucondutya

ndo chihin Tatyí Ii —catyí ra Jesús.

Nu nandaq xica ra Jesús andivi

⁶ Cuhva cha canyicú ra apóstol iin ri chihin ra Jesús, ta candaca tuhun ra chi ra:

—Sutu Mañi yuhu, ¿atu vityin ri cusacacun chi ñuu yo Israel ihya ndaha ra ñuu Roma? —catyí ra.

⁷ Ta nacahan ra Jesús ta catyí ra:

—Ña tahan chi coto nyoho nya quivi. Noo tuhun ri maa Nyoo Sutu yo cuacatyí ra ama. ⁸ Soco cuhva cha quichi Tatyí Ii siqui ndo cunaquehen ndo tunyee iñi, ta cuquita ndo vatyí cahan ndo tuhun Jerusalén ihya ta tandihí ñuu cha nyicú Judea ta Samaria, ta ñicahnu ñuhu ñayivi.

⁹ Ta cha yaha cha catyí ra Jesús tuhun ihya, ta cha ni ri ca cha canyehé ra chi ra, nandaq xica ra andivi, ta quihvi ra chichi noo vico. Ta ña canyehé ca ra chi ra. ¹⁰ Ta cuhva cha canyehé ndaa ra andivi, ta tuví uvi tahan ángel yatyin nu canyicú ra. Ñihnó ra sahma cuichin. ¹¹ Ta cacatyí ra cuan chi ra:

—Nyoho ra Galilea, ¿ñáá tuhun cha ndoo ndo nyehé ndaa ndo andivi? Suri maa ra Jesús cha nyehe ndo nandaq xica ihya, tyehe caa cuquichi tucu ra inga chaha.

*Nu canacachí ra apóstol chi
ra Matías vatyí ndihvi ra tyiño
nuu ra Judas*

¹² Tyicuan ta quita coyo ra apóstol nu chinyicu ra

yucu nu iyó yutun olivo cuan. Ta cuanuhú coyo ra ñuu Jerusalén. Ta yatyin ri nyaá ñuu cuan, tari sava hora ri. Ta sava ri hora cuví caca ñáyivi quívi nyitatú ñu, vatyí tyicuan caa catyí ley cha tyaá ra Moisés. ¹³ Cuhva cha nachaa coyo ra Jerusalén cuan, candaá ra nu cu uvi piso noo vehe nu ca iyó ra. Ta tandihí ra cuan, ican ra cuví, ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, ta ra Simón cuenda ra cacuñí naquiquí siquí gobiernu Roma, ta ra Judas yañi ra Jacobo. ¹⁴ Ta nyita ri ndu ñn ri ra ta ñn ri kuhva cachicá xiñi ra ta cachicán tahvi ra chí Nyoo. Ta nyicú tucu yañi ra Jesús ta cu María sihi ra, ta inga ñusihí ñandihí.

¹⁵ Tari noo ciento oco ñáyivi ndu ñn ri ñu quívi cuan. Ta nicuinanyaá ra Pedro. Ta catyí ra chí ñu:

¹⁶ —Nyoho yañi, cuñi chí cha cuví tari kuhva catyí nu tutu Nyoo. Vatyí cahān Tatyí li chihin yuhu ra David yoso caa cucuhva cuenda ra Judas chí ra Jesús chí ra xaan iñi chí ra. ¹⁷ Ta ra Judas cuví ra noo ra chindihí chihin yo. Ta ñn ri chicā ra tyiño Sutu Mañi yo chihin yo. ¹⁸ Soco chahān ra, ta satā ra noo ñuhú chihin xuhun cha ñihí ra cha chahā cuenda ra chí ra Jesús. Yahā cuan ta canacava ra chihin xiñi ra, ta ndatā chichi ra ta quitā tandihí chiti yíhvi ra. ¹⁹ Ta quívi cha cachitō ñu ca

iyó Jerusalén ihya cha chihí ra, casacunañi ñu chí ñuhu cuan Acéldama. Ta cha chihin sahan maa ñu cuñi chí catyí Nu Catuvi Niñi. ²⁰ Vatyí nu libru Salmo catyí chí tuhun ra Judas tyehe caa:

Na ndoo maa ri maa vehe ra. Ta yori coo chichi. Ta catyí tucu chí:

Inga ra cunanduvi tyiño nuu ra.

²¹⁻²² 'Ta vityin nyicú ra cachicā noo chihin yo quívi chinyaá Sutu Mañi yo Jesús chihin yo; nya quívi sacondutyā ra Juan chí ra, ta nya quívi nandaá xica ra andivi. Ta vityin cuñi chí cha ndu ñn ri noo ra chihin yo, vatyí cuví ra cha ndaa cha cuenda cha nandotō ra Cristo —catyí ra Pedro.

²³ Tyicuan ta cacana ra chí uvi tahan ra, chí ra José cha nañi Barsabás, ta suri nañi tucu ra Justo; ta cacana tucu ra chí ra Matías. ²⁴ Ta cachicān tahvi ra tyehe caa:

—Sutu Mañi yuhu, yoho chitón cha caa añima tandihí ndi. Sañaha chí ndi chichi cha uvi tahan ra ihya, nya ra cha nacachi maun, ²⁵ vatyí sacuvi ra tyiño cha sacunaá ra Judas cha cuenda cuatyí ra, ta cuahān ra nu tahān chí kuhun ra —cacatyí ra, chicán tahvi ra.

²⁶ Tyicuan ta cachahān ra noo sihva, tacuhva nyehe ra nya ra tahān chí nyatu cuan chí. Ta tahān chí chí ra Matías. Ta yucuan cuví nu ndu ñn ri ra chihin ndi uchi ñn apóstol.

2

Nu chaq Tatyí Ii

¹ Ta ñin ri nyicú ñáyivi yihí cuenda ra Jesús ta chaq quívi vico Pentecostés cha sanducahnú ñáyivi Israel. Ta ñin ri cuhva chicá xiñi ñu. ² Ta sana iñi ñu ta nacuiñi ñu noo cha cayu vachi ityi andivi. Tari cha cayu yahá noo tatyí ñihi. Ta iyo cuví tandihi chichí vehe nu canyicú ñu.

³ Tyicuan ta tuví tari yaa ñuhu quití cuatyí síqui noo noo ñu.

⁴ Ta tandihi ñu chitu ñu chihin Tatyí Ii. Ta quichahá cahan ñu inga sahan yoso cuhva saquehen ityi maa Tatyí Ii chi ñu.

⁵ Ta quívi cuan cuaha xaan ra Israel ra vaha chicá chihin Nyoo canyicú ra ñuu Jerusalén cuan. Cuaha xaan ra ca iyó inga ityi nicahnu síqui ñuhú ñáyivi chaq coyo vatyí casanducahnu ra vico Pentecostés. ⁶ Ta cha cachiñi ra cuan cha iyo xaan cuví nu canyicú ñu, ta cuahan coyo ra ta nataca ra yatyin ri nu nyicú ñu. Ta ña cutuñi iñi ra ñáa cha cuví cuan, vatyí noo noo ra cachiñi ra cahan ñu cuhva sahan cha cacahan maa ra. ⁷ Iyo cuñi ra ta catyí ra chi ra tahan ra:

—¿Atu ñima ñu Galilea cuví tandihi ñu cha cahan ihya?

⁸ ¿Ñáa tuhun cha chiñi yo cahan ñu cuhva sahan noo noo yo? ⁹ Ihya nyicú yo cha cuví yo ñu Partia, ta ñu Media, ta ñu Elam, ta ñu Mesopotamia, ta ñu Judea, ta ñu Capadocia, ta ñu Ponto, ta ñu Asia. ¹⁰ Ta ñu Frigia ta ñu Panfilia, ta ñu Egipto, ta

ñu iyó ityi nuu ca Cirene ityi Africa. Ta nyicú tucu ñu ñuu Roma cha iyó ñuu ihya. Ta suhva ñu cuví ñu ñu Israel nya quívi cacú ñu. Ta inga ñu cuví ñu ñáyivi nanduví cuenda ñu Israel ta nyicon ñu ley ra Moisés. ¹¹ Iyó tucu ñáyivi ñuhú Creta ta ñu Arabia. Soco tandihi yo ta chiñi yo cahan ñu chihin sahan cha cahan yo. Ta nacatyí ñu cha cahnu cha sacuví Nyoo —cattyí ra.

¹² Tandihi ra, iyo xaan cacuñi ra, ta yihí ra ndacá tuhun ra chi tahan ra:

—¿Ñáa cha cuñi chi catyí chi tandihi tuhun ihya? —cattyí ra.

¹³ Soco inga ra cahan nyaa ra ta cacatyí ra vatyí cachiñi ñu.

Nu cahan noo ra Pedro nuu ñáyivi

¹⁴ Tyicuan ta nicuinanyaa ra Pedro chihin inga uchi ñin tahan apóstol. Ta chihin cha chaahán ra ta catyí ra:

—Nyoho yañi, cha cuví ndo ra Israel, ta tandihi nyoho cha iyó ndo Jerusalén ihya. Coto ndo tuhun ihya. Ta cuiñi vaha ndo tuhun cha cuacatyí chi ndo. ¹⁵ Vatyí cuñi maa ndo tyi chiñi ndi. Soco ña chiñi ndi, vatyí ña tuhvá ñáyivi chiñi cha cuhva ihya, vatyí ni ca ñin cha ñaha ri cuví. ¹⁶ Soco ihya cuví tuhun cha cahan ra Joel, ra cuví profeta Nyoo ta cha naha. Vatyí catyí ra:

¹⁷ Nu cuandihí ca quívi, catyí Nyoo, cusaquichi Tatyí

Ii siqui tandihi ñáyivi. Ta cucahan sehe ndo cuende. Ta ra tyivaa ta ñu tyivaa cunyehe ñu cha sañaha Nyoo chi ñu. Ta ra chahnu cunyehe ra ñumahna.

¹⁸ Cusaquichi Tatyí Ii siqui ñu sacuví tyiño nui. Ta cucahan ñu cuende, catyí Nyoo.

¹⁹ Ta catyí ra vatyí cusañaha ra cha iyo cucuvi ityí andivi. Ta ityí nu ñuhu ñayivi cusañaha ra seña, seña niñi, seña ñuhu, ta vico ñuhma.

²⁰ Cunduñaa ñanyii. Ta yoo tari caa tyacu niñi cunanduvi. Tyicuan caa cucuvi cha niri ca cha chaá quivi quichi Sutu Mañi yo. Ta cucuvi noo quivi cahnu vatyí cucutuñi chi yo nuu ra.

²¹ Ta tandihi ñu chicán tahvi sivi ra cucacu ñu. Tyicuan caa catyí ra Joel.

²² 'Cuiñi ndo nyoho ra Israel. Cuiñi ndo tuhun cha cuacatyí ihya. Ra Jesús ra Nazaret cuví ra noo ra cha cachí Nyoo chi vatyí quichi ra nu nyicu yo. Ta chitó yo vatyí ndicha vatyí cuaha xaan cha iyo, ta cuaha xaan milagru ta seña sacuvi Nyoo nu canyicú yo cha cuenda ra Jesús. Ta nyoho chitó vaha ndo tuhun ihya. ²³ Soco quivi quehen cuenda ndo chi ra, sacuvi ndo tari cuhva tyaa maa Nyoo cuhva nyata quivi xihna ri. Vatyí chahá cuenda ndo chi ra chi ra quiñi iyó. Ta chitacaá ra chi ra nu cruzi. Ta tyicuan caa chahñi ndo chi

ra. ²⁴ Soco Nyoo sanandoto ra chi ra vatyí sacacu ra chí ra ndaha tuhun chihi. Vatyí tuhun chihi ña cuví cunyaca ñaha chi ra. ²⁵ Vatyí ra David cahan ra tuhun ra Cristo ta cha naha, ta catyí ra:

Tyicuan ri nyehí chi Sutu Mañi yo ityí nui.

Maa ra nyaá ñn chiyo vahi ta ñahri maa cha cuví sayuhvi chii.

²⁶ Yucuan chaha cusii xaan cuñí añime. Ta chité yaa chihin cha sii cuñi.

Ta siin ri coño ñuhi cunyitatu chi vatyí chité tyi cunandote.

²⁷ Vatyí yoho Nyoo Suti, ma sandoun añime nu nyicu ñu chihi, ta ni ma cuhvon cha tyahyu coño ñuhi.

Vatyí sehe iun cuví chii.

²⁸ Sañahún ityí cha cuahán nu coi ñayivi chaa cha ma naa ca maa. Ta sacutún chii chihin tusii iñi vatyí nyaún chihin, catyí ra David ta cha naha.

²⁹ 'Nyoho yañi, chitó cachi yo vatyí ra David sutu chahnu yo chihí ra ta quihvi ra chichi ñuhu. Ta ñaña ra nyaá ca chi ihya nya vityin.

³⁰ Soco ra David cuví ra noo profeta cuenda Nyoo. Ta chitó ra vatyí Nyoo tyaa ra cuhva ta ñn ri tuhun cahan ra chihin ra vatyí suri tata maa ra ican cuacacu ra Cristo. Ta ra Cristo, ican ra cunyaca ñaha. ³¹ Ta tyicuan caa ra David tari cha vatyí nyehe ra cha cuacuvi nu cuahan ca chi quivi. Ta cahan ra tuhun cha cunandoto ra Cristo. Ta

catyí ra vatyí ma ndoo añima ra nu nyicu ñu chihí. Ta ni ma tyahyu coño ñuhu ra, catyí ra. ³² Ta ra Jesús ihya sanandoto Nyoo chi ra. Ta tuhun ihya tandihí maa ndi cuví ndi cha ndaa. ³³ Nyoo sacahnú ra chi ra Jesús, ta cuatyaa ra chi ra chiyo vaha ra andivi. Ta ra Jesús naquehen cuenda ra Tatyí Ii cha catyí Sutu yo Nyoo ta cha naha vatyí cuhva ra chi yo. Ta ican cuví cha chahá ra chi ndi vityin. Ican cuví nyehé ndo ta chiñí ndo. ³⁴ Vatyí ñima ra David nandaa ra andivi. Vatyí suri maa ra David cahan ra tuhun ra Jesús, ta catyí ra:

Catyí Suti Nyoo chi Suti ra Cristo: “Cunyaa chiyo vahi

³⁵ cha ñiri ca cha caquin chi ra xaan iñi chuun chahun”, catyí Nyoo chi ra Cristo chihin yuhu ra David.

³⁶ Nyoho ta tandihí ca ñu Israel, coto vaha ndo vatyí tuhun ra Jesús ican cahín ihya. Chitacaá ndo chi ra nu cruzi. Soco Nyoo cuatyaa ra chi ra tyi cuví ra Sutu Mañi yo, ra nyaca ñaha chi yo —catyí ra Pedro.

³⁷ Cuhva cha chiñi ñu tuhun cahan ra Pedro ihya, nducuihya iñi ñu. Ta ndaca tuhun ñu chi ra Pedro ta chi tandihí ca ra apóstol, ta catyí ñu:

—Nyoho yañi, ¿yoso caa sacuví ndi vityin? —catyí ñu chi ra.

³⁸ Yucuan ta catyí ra Pedro chi ñu:

—Noo noo ndo ndu uvi iñi ndo cuatyí ndo ta nasama ndo cuhva iyó ndo nuu Nyoo. Ta condutya ndo chihin sivi ra Jesucristo. Tacuhva na saha ra ticahnu iñi cuatyí ndo. Tyicuan caa ta cua cuhva Nyoo Tatyí Ii ra chi ndo. ³⁹ Vatyí cha naha catyí Nyoo vatyí cuhva ra Tatyí Ii ra chi maa ndo, ta chi sehe ndo, ta chi ñu cha cañi nyaa ñandihí. Vatyí tandihí ñu cha nacana Sutu Mañi yo Nyoo chii cucuhva ra Tatyí Ii ra chi ñu.

⁴⁰ Chihin tuhun ihya ta chihin inga tuhun, ra Pedro chahá ra tuhun chi ñu ta catyí ra chi ñu:

—Nducu ndo cuhva na sacacu Nyoo chi ndo, tacuhva cuví sandoo ndo cha caa ñáyivi quiñi iyó ihya —catyí ra chi ñu.

⁴¹ Tyicuan ta tandihí ñu cha natin cuenda tuhun cahan ra Pedro condutya ñu. Ta quita tari noo uñi mil ñu, ta ndu in ri ñu chihin ñu yihí cuenda ra Jesucristo. ⁴² Ta tyicuan ri ndu in ri tandihí ñu, ta chihin cha ñi iñi ñu tyasoho ñu cha sañahá ra apóstol chi ñu. Ta in ri cuví ñu chihin tahan ñu, ta chicán tahvi ñu ta chachí ñu pan ta chihí ñu vinu vatyí nicohón iñi ñu tyi chihí ra Cristo tyiño nuu ñu.

Cuhva iyó ñu yihí cuenda Sutu Mañi yo Jesucristo quivi cuan

⁴³ Ta cuaha milagru ta seña sacuvi Nyoo chihin ndaha ra apóstol. Ta tandihí maa ñáyivi iyó cuñí ñu. ⁴⁴ Tandihí ñu

yihí cuenda ra Cristo ñn ri cacuví ñu chihin cha iyó chi ñu. ⁴⁵ Xicó ñu cha tyayí ñu ta cha iyó chi ñu. Ta sachá ñu xuhun ñu chi tahan ñu yoso cuhva cha chiñuhú chi noo noo ñu. ⁴⁶ Ndiqivi ta ndu ñn ri ñu nya vehe ñuhu cahnu. Ta ndu ñn tucu ri ñu noo noo vehe tahan ñu ta chachí ñu pan ta chihí ñu vinu. Ta ñn ri cachachí ñu chihin cha sñ cuñí añima ñu. Ta chahá ñu cha cachi tahan ñu chihin cha ññi ñu. ⁴⁷ Ta sacahnú ñu chi Nyoo. Ta vaha cahán tandihí ñáyivi siqui ñu. Ta tahan tahan quivi cuahan sanducuahá ca Sutu Mañi yo chí ñu cha cuahán sacacu ra.

3

Nu nduvahá noo ra coxo

¹ Noo quivi cuahán coyo ra Pedro chihin ra Juan vehe ñuhu cahnu. Cuví chí cuhva caa uñi cha cha ññi, cuhva cha tuhvá ñáyivi Israel cachicán tahvi ñu chí Nyoo. ² Ta ndi quivi maa nyaá noo ra ndahvi, ra coxo nyata cacu, yuvehe ñuhu cahnu cuan. Vatyí chinyacá ñu chí ra na cacan ra limuxtan chí ñáyivi quihvi yuvehe cuan, ta nañi chí: Yuvehe Tyaquí. ³ Tyicuan ta nanyehe ra coxo cuan chí ra Pedro ta chí ra Juan cha cuaquihvi ra chichí vehe ñuhu cahnu. Ta chican ra noo limuxtan chí ra. ⁴ Ta cananyehe ra Pedro ta ra Juan chí ra. Ta ra Pedro catyí ra chí ra:

—Nyehe chí ndi —catyí ra.

⁵ Tyicuan ta quichahá nyehe ra coxo cuan chí ra.

Cuñí maa ra vatyí iyó cha cuacuhva ra chí ra. ⁶ Soco ra Pedro catyí ra chí ra:

—Ñahri maa xuhun cuichin ta xuhun cuaan iyó chii, ta cuhve chuun. Soco nonga cha iyó chii cua cuhve chuun. Chihin sivi ra Jesucristo ra Nazaret, catyí chuun, ndicuita ta caçon —catyí ra Pedro chí ra.

⁷ Tyicuan ta tñn ra Pedro ndaha chiyo vaha ra ta na-coñehé ra chí ra. Ta caa cuhva ri cuan nicoo fuerza chaha ra ta tatu chaha ra. ⁸ Tyicuan ta ra coxo cuan ndava ra noo, ta nicuinanyaá ra. Ta quichahá chica ra. Ta quihvi ra chihin ra chichí vehe ñuhu. Ta chicá ra. Ta cañá ndava ra. Ta sacahnú ra chí Nyoo. ⁹ Tandihí ñáyivi nyehe ñu chicá ra ta sacahnú ra chí Nyoo. ¹⁰ Ta iyo xaan cuñí ñu ta yuhvi ñu cha cuenda cha nduvahá ra cuan. Vatyí nicohón nuu ñu chí ra. Ta chitó ñu vatyí suri maa ra cuví cha tuhva chinyaa Yuvehe Tyaquí cuan chican ra limuxtan.

Nu cahán noo ra Pedro tuhun ra Cristo nuu ñáyivi nu cuví corredor ra Salomón

¹¹ Ra coxo cha nduvahá cuan, ña sañá maa ra chí ra Pedro ta ra Juan. Ta tandihí ñáyivi iyo cuñí ñu ta chino ñu natacá ñu nu nyicú ra, nya nu cuví corredor ra Salomón chichí vehe ñuhu. ¹² Cha nanyehe ra Pedro cha tyicuan caa, catyí ra chí ñáyivi:

—Nyoho ra Israel, ¿ñaá tuhun cha iyo xaan cuñí nyoho? ¿Ñáá tuhun cha

nyehé xaan ndo chi nyuhu? Tari cha vatyí chihin tunyee iñi maa ndi, o cha cuenda cha cachi iyó ndi nuu Nyoo, sanduvahá ndi chi rayi ihya, cuñí maa ndo. ¹³ Nyuhu ña cuví sanduvaha ndi chi ñáyivi. Nyoo cuenda sutu chahnu yo, ra Abraham, ra Isaac, ta ra Jacob, ican ra sacahnú xaan ca ra chi Sehe ra, ra Jesús. Ta maa ndo chahá cuenda ndo chi ra chi ra Pilato, ra cuví tyiño. Ta maa ra cuñi ra saña ra chi ra. Soco nyoho ña chahá ndo. ¹⁴ Cha nuu cha cacan ndo cha saña ra chi ra vaha, ra ii cuan, nyoho chican ndo cha saña ra chi noo ra tuhvá chahñi ñáyivi. ¹⁵ Tyicuan caa chahñi ndo chi ra cha chahá ñáyivi chaa coo yo chihin Nyoo. Soco Nyoo sanandoto ra chi ra. Ta ña ndoo ra chihin ñu chihí. Ta nyuhu cuví ndi cha ndaa. ¹⁶ Ta suri maa ra Jesús cuví ra chahá fuerza chaha ra coxo ihya. Vatyí chinó iñi ndi tyi iyó tunyee iñi chi ra Jesús. Yucuan chaha ndunyee chaha ra ihya, ta ñohó nuu vaha ndo chi ra ihya. Ta nduvahá ra vatyí chinó iñi ndi chi ra Jesús. Ta tandihí nyoho cha nyehé maa ndo vityin.

¹⁷ 'Chité yañi —catyí ra Pedro— vatyí quivi cha chahñi ndo chi ra Jesús, ña chitó ndo tyi ña vaha cha nyacuví ndo. Ta tyicuan caa tucu ra cuví nuu chi ndo, ña cachitó ra. ¹⁸ Soco tyehe caa chinó cava tuhun cahan Nyoo chihin yuhu ra profeta cuenda ra ta cha

naha, vatyí catyí ra vatyí ra Cristo cunyehe ra tindoho. ¹⁹ Yucuan chaha ndu uvi iñi ndo cuatyí ndo. Ta ñacuhva ndo aña ndo chi Nyoo, tacuhva na ndachi cuatyí ndo. Tyicuan ta Sutu Mañi yo sandunyee ra aña ndo vatyí cohon ra aña ndo. ²⁰ Tyicuan ta cutachi ra chi ra Jesús ra cuví Cristo na quichi ra inga chaha. Vatyí quivi xihna ri tyaa Nyoo cuhva tyi quichi ra cha cuenda ndo. ²¹ Tahán chi cha ndoo ra Jesucristo andivi cha vityin nyacua nya sanduchaa Nyoo tandihí maa. Tari cuhva catyí maa ra chihin yuhu ra profeta cuenda ra ta cha naha. ²² Vatyí tyicuan caa catyí ra Moisés chi sutu chahnu yo: “Cusaquichi Sutu yo Nyoo chi noo ra cahan cuenda ra. Ta suri ñáyivi chi yo cucuvi ra. Ta cuacahan ra tuhun Nyoo chihin ndo tari cahán yuhu. Quichaha ndo tandihí cha catyí ra chi ndo. ²³ Vatyí tandihí ñu cha ma tyasoho tuhun cahan ra, cunaa ñu, vatyí ma cu ñn ri ñu chihin ñáyivi cachi Nyoo chi”, catyí ra Moisés.

²⁴ 'Ta tyicuan caa tucu tandihí profeta cuenda Nyoo nya quivi ra Samuel ta nyacua nya vityin, casacoto ra tuhun cha cuví vityin. ²⁵ Tandihí promesa cha chahá Nyoo cha cahan ra profeta tuhun ta cha naha, chi maa ndo cuví. Ta tuhun cha natyihí tahan Nyoo chihin sutu chahnu yo, chihin ra Abraham, suri cha

cuenda maa ndo cuví. Vatyí catyí Nyoo chi ra Abraham: “Tandihi ñáyivi cha iyó siqui ñuhu ñayivi cunasoque chi ñu cha cuenda ñáyivi chuun.”²⁶ Ta quivi sanandoto Nyoo chi Sehe ra, xihna ca nu nyicú ndo tachí ra chi ra, vatyí nasoco ra chi ndo. Tacuhva vatyí tahan tahan ndo sandoo ndo cha quiñi caa —catyí ra Pedro chi ñu.

4

Nu catiñ ra cacuví nuu vehe ñuhu cahnu chi ra Pedro ta chi ra Juan

¹ Ni cahán ca ra Pedro ta ra Juan chihin ñáyivi, ta chaá coyo tata sutu cuenda ñu Israel chihin ra cuví nuu chi ra sahá cumi vehe ñuhu, ta chihin ra cuví saduceo.² Cacuxaan xaan ra vatyí ra Pedro ta ra Juan sañahá ra chi ñáyivi ta catyí ra vatyí ndicha cha nandotó ñu chihí, vatyí ra Jesús nandoto ra.³ Tyicuan ta catiñ ra chi ra. Ta catyihí ra chi ra vehe caa. Ta candoo ra nyacua nya inga quivi vatyí cha iñi xaan cuhva cuan.⁴ Soco cuaha ñu cha chiñi tuhun cahán ra Pedro nachinó iñi ñu. Ta candu ñn ri ñu chihin ñu yihí cuenda ra Jesús. Ta cha tandihi ñu vasi quita ohon mil ñu cha maa ri maa rayi ri.

⁵ Tuvi inga quivi ta candu ñn ri ra cacuví tyiño chi ñu Israel, ra chahnu, ta ra casacuaha cuenda ley cha tyaá ra Moisés, nya Jerusalén cuan.⁶ Ta ñohó tucu ra Anás ra cuví nuu chi tata sutu. Ta ra Caifás, ta ra Juan, ta

ra Alejandro. Ta nyicú tucu tandihi ñáyivi chi ra cacuví nuu chi tata sutu.⁷ Tyicuan ta catachí ra tyiño chiquehen chi ra Pedro ta chi ra Juan. Ta chitayucu ra chi ra mahñu. Ta candaca tuhun ra chi ra:

—¿Yóó cha chahá ityi chi ndo vatyí sanduvahá ndo chi ra cuan? ¿Yóó chi cha cuenda nyacuví ndo tyehe caa? —catyí ra chi ra.

⁸ Ta ra Pedro tyitu ra yihí Tatyí Ii Nyoo. Ta catyí ra chi ra:

—Nyoho ra nyacá ñaha Israel ñuu yo ihya. Ta nyoho ra chahnu.⁹ Vityin ndacá tuhun ndo chi ndi tuhun vaha cha cuví chi noo ra coxo ihya, vatyí cuñí ndo coto ndo yoso caa nduvahá ra.¹⁰ Yucuan chaha cunacatyí ndi chi ndo tacuhva nacoto tandihi ñáyivi Israel. Vatyí ra ihya nanyaá ra nuu tandihi ndo. Vatyí nduvahá ra chihin tunyee iñi ra Jesucristo ra ñuu Nazaret, ra cha chahá cuenda ndo vatyí cúvi ra nu cruzi. Soco Nyoo sanandoto ra chi ra.¹¹ Ta suri ra Jesús ihya cuví yuu cha chiñuhú ca cha ña cuñí ra savahá vehe cotyiño ra, tari cuhva catyí nuu tutu Nyoo. Ta ican ndo cuví tari ra savahá vehe ta ña cuñí ndo yuu cha chiñuhu ca cuan.¹² Vatyí yori inga ra cuví sacacú chi yo. Vatyí noo tuhun ri maa ra chahá Nyoo vatyí sacacu ra chi yo. —catyí ra Pedro chi ñu.

¹³ Tyicuan ta cachiñi ra cacuví tyiño cuan vatyí ñi xaan iñi ra Pedro ta ra Juan cacahán ra. Ta ñima ra cañoho

vaha sicuela cacuví ra. Ta iyo xaan cuñi ra. Tyicuan ta nicohon nuu ra chi ra vatyí ican ra cuví ra cha cachica noo chihin ra Jesús. ¹⁴ Ta sin ri, ra cha nduvaha cuan, nanyaá ra chihin ra yucuan. Yucuan chaha ña cuví cahan ña vaha ra cacuvi tyiño cuan siqui ra Pedro ta ra Juan. ¹⁵ Tyicuan ta catyi ra chi ra naquita coyo ninduñi ra chata vehe. Ta candoo maa ra cacuví tyiño cuan candatuhun tahan ra. ¹⁶ Ta catyi ra:

—¿Yoso caa cunyacuvi yo chihin ra ihya? Vatyí tandihi maa ñu Jerusalén chitó ñu seña cha casacuví ra ihya. Ta ma cuvi catyi yo vatyí ña ndicha. ¹⁷ Soco tacuhva cha ma cono tuhun ihya nicahnu chichi ñuu ihya, cutyanaha yo chi ra, tacuhva vatyí ma cahan ca ra tuhun ra Jesús chihin ñáyivi —cacatyí ra.

¹⁸ Tyicuan ta cacana ra chi ra Pedro ta ra Juan. Ta catyi ra chi ra vatyí ni chiin ca maa ta ma cahan ca ra tuhun ra Jesús. Ta ma sañaha ca ra chi ñáyivi. ¹⁹ Soco ra Pedro ta ra Juan canacahan ra ta catyi ra:

—Ndichi xiñi nyoho ta nyehe ndo tatu vaha ca cha quichaha ndi chi maa ndo o vaha ca cha quichaha ndi chi Nyoo. ²⁰ Vatyí nyuhu ma cuvi cha sandihi ndi cha nacatyí ndi tuhun cha nyehe ndi ta chiñi ndi —cacatyí ra.

²¹ Tyicuan ta nacatyanaha tucu ra chi ra. Soco saña ra chi ra vatyí ña ñihí ra cuhva tachi tuñi ra chi ra. Vatyí tandihi ñáyivi sacahnú

ñu chi Nyoo cha cuenda cha cuví cuan. ²² Vatyí rayi cha nduvaha cuan, yaha ca uvi xico cuiya ra, ta tyicuan cuiya nyehe ra tindoho ta nduvaha ra saha Nyoo.

Nu chican ñu yihí cuendara Cristo tunyee iñi Nyoo

²³ Ta casaña ra chi ra Pedro ta chi ra Juan. Tyicuan ta cuahan coyo ra nu nyicú ra tahan ra. Ta canacatyí ra tandihi cha cacatyí ra chahnu ta ra cacuví nuu chi tata sutu chi ra. ²⁴ Cuhva cha chahiñi ñu tuhun ihya tandihi ñu ta in ri quichaha chican tahvi ñu chi Nyoo. Ta catyi ñu:

—Sutu Mañi yuhu, yoho savahun andivi ta ñuhu ñayivi. Savahun tyañuhu. Ta tandihi ca cha iyó, maun savaha. ²⁵ Ta yoho chihin Tatyí Iun sacahun chi ra David ta cha naha. Ta catyi ra:

¿Ñáá tuhun cha naquiqui ñáyivi ña ñohó nuu Nyoo? ¿Ñáá tuhun chicá xiñi ñu cha ñima ri tuhun?

²⁶ Rey ta inga cha nyacá ñaha siqui ñuhu ñayivi ihya candu cuita ra sicun Sutu Mañi yuhu, ta siqui ra Cristo, catyi ra David.

²⁷ Sutu Mañi yuhu, ndicha vatyí ra Herodes, ta ra Poncio Pilato candu in ri ra ñuu Jerusalén ihya chihin ra ñuu Roma ta chihin ra Israel vatyí cahñi ra chi ra Jesús Sehe iun cha cachí vahun. ²⁸ Ta tyicuan caa ta casacuví ra, tari cuhva cha catyi maun

ta cha naha tyi cucuvi. ²⁹ Ta vityin, Sutu Mañi yuhu, nyēhe cha tyanaha ra chi ndi. Ta cūhva cha cunñi ca iñi ndi tyi tyiño nuu maun sacuvi ndi, Sutu Mañi yuhu. Ta cūhva cha cahan ndi tuhun chihin cha ña yuhví ndi. ³⁰ Ta chihin fuerza maun ta cunduvaha ñu cuhví, ta cunyehe ndi seña ta milagru cha cuenda tunyee iñi ra Jesús Sehe iun —catyí ñu chicán tahvi ñu.

³¹ Ta cūhva cha ndihi savaha ñu oración ta taan nu nyicu ñu. Ta tandihi ñu chitu ñu chihin Tatyí Ii ta cahan ñu tuhun Nyoo chihin cha ñi iñi ñu.

Ñahri cha cumañi chi ñu yihí cuenda Nyoo

³² Tandihi ñu cha chinó iñi, ñn ri cuví ñu, ta ñn ri cūhva chicá xiñi ñu. Ni noo ñu ta ña catyí ñu vatyí chí maa ñu cuví cha iyó chí ñu, soco chí tandihi ñu cuví, catyí ñu. Vatyí ñn ri nyicú ñu.

³³ Ta chihin tunyee iñi cahnu, cacahán ra apóstol tuhun cha nandoto Sutu Mañi yo Jesús. Ta Nyoo nasocó xaan ra chí tandihi ra. ³⁴ Ta ni noo ñu ta ñahri cumañi chí ñu vatyí tandihi ñu cha iyó vehe o ñuhú, xicó ñu. Ta quichi nyacá ñu xuhun, ³⁵ ta chahá cuenda ñu chí ra apóstol. Ta maa ra nasachá ra chí noo noo ñu yoso cūhva cha chiñuhú chí ñu. ³⁶ Tyicuan caa sacuvi noo ra cha nañi José. Ra cuan vachi ra tata ra Levi. Ta cacu ra ñuhú Chipre cha nyaá mahñu tyañuhu. Ta ra apóstol sacunañi ra

Bernabé chí ra. Ta cuñi chí catyí sivi cuan: Ra Naquehen Ndahvi. ³⁷ Ta ra Bernabé cuan xico ra ñuhú ra. Ta chaha ra xuhun cuan chí ra apóstol.

5

Cuatyi ra Ananías ta cu Safira

¹ Soco noo ra cha nañi Ananías chihin cu Safira ñasihí ra, xico ñu noo ñuhú.

² Soco tixehe ñu suhva xuhun. Tyicuan ta chinyaca ra Ananías suhva xuhun chí ra apóstol. Ta catyí ra vatyí tandihi xuhun cha quiyahví ñuhú cuví cuan. ³ Tyicuan ta catyí ra Pedro chí ra:

—Yoho Ananías, ¿ñáá tuhun cha chahun cha quihví ra ña vaha añimon, vatyí cuñún sandavi ñahun chí Tatyí Ii, ta catyún vatyí tandihi xuhun cha quiyahví ñuhu cuví ihya ta ndoún chihin suhva? ⁴ Chuun cuví ñuhú, ta chuun cuví xuhun cha ñihun cuenda ñuhú cuan. ¿Ñáá tuhun cha cuñún sandavi ñahun chí Nyoo ta catyún tyi tandihi xuhun chahun? Ñima chí nyuhu sandaví ñahun, chí Nyoo sandaví ñahun —catyí ra Pedro chí ra Ananías.

⁵ Cha chiñi ra Ananías tuhun cha cahan ra Pedro, nduva ra ta chihí ra. Ta quichi noo cha yuhví cuñi ñáyivi cha chito ñu tuhun ihya. ⁶ Tyicuan ta quichi coyo suhva ra tyivaa ta tyihí ra coño ñuhu ra chichi noo sahna. Ta chahan ra chityihí ra chí ra chichi ñuhú. ⁷ Yaha noo uñi hora ta chaa ñasihí ra

Ananías ta quihvi ña nu nyicú ra apóstol. Soco ña chitó ña cha cuví cuan. ⁸ Ta quichaha ndaca tuhun ra Pedro chi ña ta catyí ra:

—¿Atu tyehe cuví yahvi cha quiyahvi ñuhú ndo? —catyí ra.

Ta nacahan ña ta catyí ña:

—Ay, tyehe cuví yahvi chi —catyí ña chi ra.

⁹ Tyicuan ta catyí ra Pedro chi ña:

—¿Ñáá tuhun cha ñoho naha ndo tuhun ta sandavi ñaha ndo chi Tatyí Ii Sutu Mañi yo Nyoo? Cha cuandichi coyo ra cha chahan chityihi chi yün chichi ñuhú. Ta vityin huhun tucu ra cutyihí ra chi yoho —catyí ra Pedro chi ña.

¹⁰ Caa huhva ri cuan ta nduva ña chaha ra Pedro, ta chihí ña. Ta caquihvi coyo ra tyivaa cuan, ta nyehe ra vatyí chihí ña. Ta canacoñehe ra chi ña ta chityihi ra chi ña xiin yí ña. ¹¹ Ta tandihí ñáyivi yihí cuenda ra Cristo, ta tandihí ca ñu chitó tuhun cuan, canayuhvi xaan ñu.

Cuaha milagru ta seña sacuvi ra apóstol

¹² Cuaha seña ta milagru sacuvi ra apóstol sahá Nyoo nu nyicú ñáyivi. Ta tandihí ñu yihí cuenda ra Cristo ndu ñin ri ñu nu cuví corredor ra Salomón. ¹³ Ta ni nonga ñu cha inga cuenda ta ña cañá ñi ñu cutahan ñu chihin ñu yihí cuenda ra Cristo. Soco vaha cahán ñáyivi siqui ñu. ¹⁴ Ta cuaha xaan ñáyivi nachinó ñi chi Sutu Mañi yo Jesús,

tari rayi ta ñusihi. ¹⁵ Ta nyacua tavá ñu chi ñu huhvi ityi cahnu, chacún ñu chi ñu nu chito. Vatyí tatu yaha ra Pedro soco vasi xiñahñu ra yaha siqui ñu, ta nduvaha ñu. ¹⁶ Tyicuan tucu ñu iyó yatyin ri Jerusalén cuan, quichí nyaca ñu chi ñu huhvi ta ñu cha yihí tatyí ña vaha chi. Ta nduvaha tandihí ñu.

Nu nyehe ra Pedro ta ra Juan tindoho

¹⁷ Tyicuan ta ra cuví nuu chi tata sutu, ta ra cayihí cuenda ra cuví saduceo, quiñi cuñi ra nyehe ra chi ra apóstol cha cuenda cha vaha cha casacuví ra chihin tunyee ñi chahá Nyoo chi ra. ¹⁸ Tyicuan ta catyín ra chi ra apóstol. Ta catyihí ra chi ra vehe caa. ¹⁹ Soco cha cuaa cuan quichí noo ángel cha tachi Sutu Mañi yo, ta nuñá ra yuvehe caa cuan. Ta tavá ra chi ra. Ta catyí ra chi ra:

²⁰ —Cuahan ndo ta cuñanyaa ndo chichi vehe ñuhu cahnu. Ta nacatyí ndo chi ñáyivi yoso caa cuví coo ñu ñáyivi chaa cha iyó ndo —catyí ángel cuan chi ra.

²¹ Cha cachiñi ra tuhun cahan ángel cuan, ta cuahan coyo ra. Ta ñaha cui ri quihvi coyo ra chichi vehe ñuhu cahnu. Ta quichaha sañaha ra chi ñáyivi. Ta cha ni ri ca cha sañahá ra apóstol cuan, ndu ñin ri ra cuví nuu chi tata sutu ta ra ndihí chihin ra. Ta cana ra chi ra cacuví tyiño cuenda ñáyivi Israel vatyí coo ra junta. Tyicuan ta tachi ra na cuquehen chi ra apóstol

nu cañohó ra vehe caa cuan. ²² Soco cuhva cha chaꝥ coyo policia chichi vehe caa cuan, ña nañihí ra chi ra apóstol. Ta cuanuhu coyo ra cuanacatyí ra chi ra cuví nuu chi tata sutu. ²³ Ta cacatyí ra chi ra:

—Nyasi yuvehe caa cuan ta chaꝥ ndi. Ta sindaro, tayucú ra yuvehe casahá cumi ra. Soco cuhva cha nuña ndi, ña nañihí ndi chi ni noo ra chichi vehe caa cuan —catyí ra chi ra.

²⁴ Cuhva cha cachiñí tata sutu chihin ra cuví nuu chi ra, ta ra cuví nuu chi ra casaha cuenda vehe ñuhu tuhun ihya, iyo xaan cuñí ra. Ta candatuhun tahan ra yoso caa sacuvi ra ta cundihi tuhun cuan. ²⁵ Tyicuan ta chaꝥ noo ra ta catyí ra:

—Ra cha tyihí ndo vehe caa cuan, nyicú ra chichi vehe ñuhu sañahá ra chi ñáyivi —catyí ra.

²⁶ Tyicuan ta ra cuví nuu chi ra casahá cuenda vehe ñuhu, chahan ra chihin policia, ta chiquehen ra chi ra chihin cha vii ri ta ña cañí ra chi ra, vatyí yuhví ra chi ñáyivi coto tuchi ñu yuu chi ra. ²⁷ Chinyacꝥ ra chi ra nuu ra cacuvi tyiño vehe ñuhu cahnu. Ta ra cuví nuu chi tata sutu catyí ra chi ra:

²⁸ —Nyuhu catyí cachi ndi chi ndo vatyí ma cahan ca ndo tuhun ra Jesús. Soco nyoho ña tyasohó maa ndo. Cha ndihi maa chichi ñuu Jerusalén sacotó ndo tuhun ra. Ta cuñí ndo natyaa ndo siqui ndi vatyí nyuhu chahñí ndi chi ra cuan —catyí ra

cuví nuu chi tata sutu chi ra apóstol.

²⁹ Tyicuan ta nacahan ra Pedro ta inga ra apóstol, ta catyí ra:

—Nyaá siqui ndi cha quichaha xihna ca ndi chi Nyoo ta ñima ca chi rayii. ³⁰ Nyoo cuenda sutu chahnu yo ican sanandoto chi ra Jesús, ra cha chitacaꝥ ndo nu cruzi ta chahñí ndo chi ra. ³¹ Ta ra Jesús ican ra cuví ra cha sacahnú xaan Nyoo chi, ta cuatyaꝥ ra chi ra chiyo vaha ra, vatyí cunyaca ñaha ra tandihi. Ta noo tuhun ri maa ra cuví ra sacacú chi yo. Vatyí tyicuan caa chahá ra cuhva chi yo cha cuví yo ñu Israel na ndu uvi iñi yo cuatyí yo tacuhva saha ra ticahnu iñi cuatyí yo. ³² Ta nyuhu cuví ndi cha ndaa cuenda ihya. Ta tyicuan caa tucu Tatyí Ii cha chahꝥ Nyoo cunyaa añima ñu quichahá chi ra —catyí ra Pedro chi ra.

³³ Ta cha cachiñí ra cha catyí ra Pedro, nduxaan xaan ra. Ta cuñí ra cahñi ra chi ra. ³⁴ Soco mahñu ra cacuví tyiño cuan ñohó noo ra cuví fariseo cha nañi Gamaliel. Ta cuví ra ra sacuahá cuenda ley ra Moisés. Ta ñáyivi sahá xaan ñu ñáyivi chi ra. Ta ra Gamaliel cuan, nicuinanyaa ra. Ta tachí ra naquita coyo ra apóstol cuan noo cuhva ri. Tyicuan ta quita coyo ra. ³⁵ Ta quichahꝥ catyí ra Gamaliel cuan chi inga ra cacuví tyiño:

—Nyoho ra nyacá ñaha ñu Israel, saha ndo cuenda chi ndo chihin cha cua cunyacuvi ndo chihin ra chiña.

³⁶ Nīcohon iñi ndo vatyi cha iyó suhva quivī ndicuita noo ra cha nañi Teudas. Ta catyi ra vatyi cuvī ra noo ra vaha. Ta tari cha cumi cientu rayii chinyicon chi ra. Soco yaha cuan chahñi ñáyivi chi ra. Ta tandihi ra chinyicon chi ra nacutya cuatyí ra. Ta ndihi tuhun. ³⁷ Yaha cuan ta nu cuahan ca chi, quivī nacahvi ra gobiernu chi ñáyivi, ta ndicuita ra Judas ra ityi Galilea cuan. Ta cuaha ñu chinyicon chi ra. Soco suri chahñi ñáyivi chi ra. Ta tandihi ñu cha chinyicon chi ra chitya cuatyí ñu. ³⁸ Yucuan chaha saña ndo chi ra chiña. Ta ma tyihi ndo chi ndo chihin ra vatyi tatu tuhun ñáyivi ri cuvī cha chicá noo ra, cundihī tuhun. ³⁹ Soco tatu ndicha tyi tuhun Nyoo cuvī, ma cuvī chi nyoho sativi ndo. Saha ndo cuenda chi ndo coto vaha chihin Nyoo cañi tahan ndo —catyí ra Gamaliel chi ra.

⁴⁰ Tandihī ra ndoo ra vaha. Tyicuan ta cana ra chi ra apóstol. Cacañi policia chi ra. Ta chasi ra nu cahan ca ra tuhun ra Jesús. Tyicuan ta saña ra chi ra. ⁴¹ Ta quita coyo ra apóstol nuu ra cuvī tyiño. Ta si xaan cacuñi ra vatyi chaha Nyoo cuhva vatyi nyehé ra tindoho cha cuenda ra Jesús. ⁴² Ta ña casandihī ra cha cacahán ra. Ta ndiquivi ri sañahá ra tuhun ra Jesucristo vehe ñuhu ta vehe ñáyivi ñandihī.

Nu nacachí ñu yihí cuenda ra Jesús ucha tahan ra vatyi saha cuenda ra ñáá cha chiñuhu chi ñu

¹ Ta nu cuahan ca chi quivī cuaha xaan nanduvī ñáyivi cha yihí cuenda ra Cristo. Tyicuan ta ñu cha cahán sahan griego quichaha cahan ñu siqui ñu cha cahán sahan hebreo cuan. Vatyi catyí ñu tyi ña tyiñuhú vaha ra cha cahán sahan hebreo chi ñu chihī yii cuenda ñu, cuhva cha sachá ra cha cacachi ñu ndiquivi ri. ² Tyicuan ta ndi uchi uvi tahan apóstol sandu in ri ra chi tandihī ñu yihí cuenda ra Cristo. Ta cacatyí ra chi ñu:

—Ña vaha cha sandihī ndi cha cahan ndi tuhun Nyoo ta sacha ndi cha cachi ndo. ³ Yucuan chaha yañi, nanducu ndo ucha tahan ra nu canyicú ndo ihya, ra vaha iyó chihin Nyoo, ra chiñi tuñi, ra tyitú yihí chihin Tatyí Ii. Ta cuhva yo tyiño ihya chi ra. ⁴ Ta nyuhu sañihī ndi cacan tahvi ca ndi. Ta cuasañaha ca ndi tuhun Nyoo —catyí ra apóstol.

⁵ Tandihī ñu ndoo ñu vaha. Ta nacachí ñu chi ra Esteban. Vatyi chinó xaan iñi ra chi Nyoo. Ta tyitu ra chihin Tatyí Ii. Ta nacachí tucu ra chi ra Felipe, ta chi ra Prócoro, ta chi ra Nicanor, ta chi ra Timón, ta chi ra Parmenas, ta chi ra Nicolás cha cuvī ra noo ra ñuu Antioquía, ta nanduvī ra noo ra Israel. ⁶ Tyicuan ta quichi nyaca ra chi ra nu nyicu ra apóstol. Tyicuan ta catyiso ra ndaha ra xiñi noo noo ra

ta cachican tahvi ra chi Nyoo cha cuenda ra.

⁷ Ta cuahan chitya ca tuhun Nyoo. Ta nducuaḡa ca ñu yihí cuenda ra Cristo ñuu Jerusalén. Ta na chinqo iñi tucu cuaha tata sutu cuenda ñu Israel ñandihí.

Nu catyihí ra chi ra Esteban vehe caa

⁸ Ra Esteban cuví ra noo ra cha tyitú chihin tunyee iñi Nyoo. Ta vaha xaan ñáyivi cuví ra vatyí tyitu añima ra chihin cha vaha Nyoo. Ta cuaha xaan milagru ta seña sacuví ra nu nyicú ñáyivi.

⁹ Tyicuan ta suhva ra vehe ñuhu ñuu Israel cha nañi Vehe Ñuhu Cuenda Ñáyivi Ndoó Libre, candu ñin ri ra chihin ra ñuu Cirene, ta ra ñuu Alejandría, ta ra ityí Cilicia, ta ra ityí Asia. Ta quichahaḡa cuví yuhu ra chihin ra Esteban.

¹⁰ Soco ña cacuví chasaha ra chi ra, vatyí ra Esteban cahán ra chihin cha chiñi tuñi cha chaha Tatyí Ii chí ra. ¹¹ Tyicuan ta catyiyahví ra cuan chi suhva ra vatyí canducu ra cuendu chaha ra Esteban ta catyí ra cuendu cuan vatyí ra Esteban cahán ña vaha ra siqui ra Moisés, ta siqui Nyoo. ¹² Yucuan chaha tandihí ñáyivi cuan naquiqui ñu. Tyicuan ta ra chahnu ta ra sacuaḡa cuenda ley ra Moisés, catiñ ra chi ra Esteban. Ta chahan ra chinyaca ra chi ra nu ndu ñin ri ra cuví tyiño cuenda vehe ñuhu ñu Israel. ¹³ Ta canducu ra chi ra cahan cuendu chaha ra. Ta maa ra catyí ra tyehé caa:

—Ra Esteban ihya, ña sandihí ra cha cahan cuehe ra siqui vehe ñuhu yo ta siqui ley ra Moisés. ¹⁴ Ta chiñi ndi cahan ra vatyí ra Jesús ra Nazaret cuan cusatani ra vehe ñuhu cahnu ihya. Ta cunasama ra costumbre cha sandoḡ ra Moisés chi yo na —catyí ra cuendu cuan siqui ra Esteban.

¹⁵ Tyicuan ta ra cacuví tyiño ta ra canyicú yucuan canyehé ra chi ra Esteban vatyí tari maa nuu ángel tyicuan caa nuu ra cuhva cuan.

7

Nu cahán ra Esteban tuhun Nyoo chihin ñáyivi nducú cahñi chi ra

¹ Tyicuan ta ra cuví nuu chi tata sutu ndacaḡa tuhun ra chi ra Esteban, ta catyí ra:

—¿Atu ndicha cha catyí ra ihya?

² Tyicuan ta nacahan ra Esteban ta catyí ra:

—Nyoho yañi, ta nyoho tata, cuiñi ndo tuhun cahín. Sutú yo Nyoo cha cahnu ca tuví ra nuu sutu chahnu yo, ra Abraham quivi nyaá ra ityí Mesopotamia cha ñiri ca cha cumañi cucoo ra nya ñuu Harán. ³ Ta catyí ra chí ra: “Sandoḡ ñuun, ta chí tandihí ñáyivi chuun. Ta cunuhu inga ñuu cha cusañahi chuun”, catyí Nyoo chí ra Abraham. ⁴ Tyicuan ta ra Abraham quitaḡa ra ñuu Caldea ityí Mesopotamia cuan, ta cuanuhu ra nya ñuu Harán. Ta yucuan cuví nu chihí sutu ra. Yaha cuan

saquichi Nyoo chi ra ñuhú nu iyó yo vityin. ⁵ Soco ñahri ñuhú chaha Nyoo chi ra quivi cuan. Ni noo nu cuinanyaa chaha ra ta ña chaha ra. Soco catyi Nyoo chi ra vatyí cucuhva ra. Ta cutahan chi chi sehe ra chata cha yaha cúvi ra. Tyicuan caa catyi Nyoo chi ra Abraham, vasi ta coo ca sehe ra quivi cuan. ⁶ Ta siin ri catyi Nyoo chi ra vatyí ñáyivi chi ra cucoo ñu inga ñuu. Ta cusacuvi ñu tyiño nuu ñáyivi ñuu cuan, ta ma tyiyahvi ñu chi ñu. Ta cunyehe ñu tindoho cumi cientu cuiya. ⁷ Soco catyi tucu Nyoo chi ra tyehe caa: “Ñáyivi ñuu cuan cusanyehe ñu tindoho chi ñáyivi chuun. Yucuan cuenda cuatachi tuñi yuhu chi ñu. Ta yaha cuan ta cuquita ñáyivi chuun ñuu cuan ta cucuichi ñu ihya. Ta cusacuvi ñu tyiño nuu mai ihya”, catyi Nyoo chi ra Abraham.

⁸ Tyicuan caa natyihí tahan Nyoo tuhun chihin ra. Ta chaha Nyoo noo costumbre cha cuasacuvi ñu coto naa iñi ñu. Chaha ra tyi cutahnya chiin ñi xiñi ndivi cha lee sehe ñu, o cha sahá ñu circuncidar chi sehe ñu cuví cuan. Ta cha yaha uña quivi cha cacú ra Isaac sehe ra Abraham, tyicuan caa chinyacuvi ra chihin ra. Ta suri tyicuan caa sacuvi tucu ra Isaac chihin ra Jacob sehe ra. Ta ra Jacob tucu chihin uchi uvi tahan sehe ra, tyaa ra noo seña cuan chi noo noo sehe ra. Ta ican ra cuan cacuví sutu chahnu yo.

⁹ Ta ican uchi iñi tahan ra sehe ra Jacobo ihya catasi cuñi ra nyehe ra chi ra José yañi ra cha cuenda vatyí vaha ca ra nuu sutu ra. Yucuan chaha cacico ra chi ra na cuhun ra Egipto. Soco Nyoo ña sandoó ra chi ra José. ¹⁰ Ta sacacú ra chi ra nu nyehé ra tindoho. Ta chaha ra cha chiñi tuñi ra chi ra. Ta chaha ra cha vaha coo ra nuu ra Faraón, ra cuví rey Egipto. Ta rey cuan chaha ra cha cuvi ra José gobiernu Egipto cuan. Ta chinyaca ñaha tucu ra vehe maa rey ñandihí.

¹¹ Tyicuan ta chiyó tama nicahnu ityi Egipto ta ityi Canaán. Ta nyehe xaan ñáyivi tindoho. Ta tandihí sutu chahnu yo cha chicoo tyembu cuan ña cañihí ra cha cachi ra. ¹² Soco quivi chito ra Jacob vatyí iyó trigu nya Egipto, ta tachi ra chi sehe ra na cuquehen ra. Ta chahan coyo ra noo chaha. ¹³ Ta cha cu uvi chaha cha chahan coyo ra, ra José sacotó ra chi ra vatyí yañi ra cuví chi ra. Yucuan quivi chito ra Faraón yóó chi tata vachi ra José. ¹⁴ Tyicuan ta tachi ra José tyiño na quichi sutu ra, ra Jacob, chihin tandihí ñáyivi chi ra, uñi xico chahun tahan ñu. ¹⁵ Ta tyicuan caa cuvi cha cuahan ra Jacob cuacoo ra Egipto cuan. Yaha cuan ta chihí ra yucuan. Ta chihí tucu sehe ra, ra cacuví sutu chahnu yo. ¹⁶ Tyicuan ta chaa quivi cha chinanyaca ñu yiqui ra Jacob ta yiqui sehe ra nya Siquem. Ta yucuan quihvi

ra chichi ñuhú nu sata ra Abraham noo ñaña chi sehe ra Hamor ta cha naha.

17 'Soco cha ni cumañi ca quita ñu Egipto, ñáyivi chi ra Abraham cha iyó Egipto cuan cuaha xaan nanduvi ñu. Ta cha nyaña yatyin quivi cha cuacuhva Nyoo ñuhú chi ñu tari cuhva catyi cachi ra chi ra Abraham. 18 Tyicuan ta quichaha nyaca ñaha noo rey cha ña ñohó nuu chi ra José.

19 Rey cuan sandavi ñaha ra chi ñáyivi chi yo cuan. Ta sanyehé xaan ra tindoho chi ñu, ta saniñi ra chi ñu na sanandoo ñu chi sehe ñu cha ni cacu vaty na cúvi ndotyin.

20 Ta suri quivi cuan cacu ra Moisés. Ta tahan xaan iñi Nyoo chi ra lee cuan. Ta uñi yoo sacuahnu sihi ra chi ra nya vehe ña. 21 Yaha cuan ña cuví ca tixehe sihi ra chi ra. Ta sandoo ña chi ra chichi noo tica yuhu yutya. Tyicuan ta sehe maa rey Egipto cuan nañihí ña chi ra. Ta naquehen ña chi ra. Ta sacuahnu ña chi ra, tari cha sehe ña cuví chi ra. 22 Yucuan chaha cuthva ra Moisés tandihí cha chitó ñu Egipto. Ta siin ri nyee xaan cuhva cahan ra, ta cuhva sacuví ra ñandihí.

23 'Ta quivi cha chaá uvi xico cuiya ra Moisés quichi cuví iñi ra cuhun ra cunyehe ra nu nyicú ñu Israel, ñáyivi chi ra. 24 Tyicuan ta noo quivi nyehe ra nu cañi noo ra Egipto cuan chi noo ra Israel cuan. Tyicuan ta chahñi ra Moisés chi ra Egipto cuan vaty satasi iñi ra chi ra Israel ra ñuu ra. 25 Cuñi maa ra Moisés cuan vaty

ñáyivi Israel cuan cutuñi iñi ñu tyi Nyoo tachí chi ra vaty cusacacu ra chi ñu. Soco maa ñu ña tuví iñi ñu cha tyicuan caa cucuvi. 26 Tyicuan ta

cha inga quivi cuan nyehé ra Moisés chi uvi tahan ra Israel cha cacañi tahan ra. Ta ra Moisés, cuñi ra cha ma cacañi tahan ca ra, ta quichaha catyi ra: "Ña vaha cha cacañi tahan nyoho, vaty suri yañi ndo cuví", catyi ra chi ra.

27 Tyicuan ta ra cha cañi chi tahan cuan tyandaha ra chi ra Moisés, ta catyi ra chi ra: "¿Yóo cha tyatyíño chi yoho vaty cunyaca ñahun ta cuvun juez chi ndi? 28 ¿Atu cuñun cahñun chii tari chahñun chi ra Egipto cuan icu?" catyi ra chi ra Moisés. 29 Cuhva cha chiñi ra Moisés cha catyi ra, chingo ra. Ta cuahan ra nya ñuu Madián. Yucuan ñihí ra ñasihi ra. Ta yucuan chiyo uvi tahan sehe ra.

30 'Yaha uvi xico cuiya. Tyicuan ta noo quivi chicá noo ra Moisés chiqui ndii yatyin noo yucu cha nañi Sinaí. Ta nyehe ra noo taca iñu cha cayú. Tyicuan ta tuví noo ángel chichi ñuhú cha cayu cuan. 31 Iyo xaan cuñi ra Moisés cha nyehé ra yucuan. Ta cuhva cha tuhva yatyin ca ra vaty tacuhva nyehe vaha ra, chiñi ra noo ndusu Sutu Mañi yo. Ta catyi ra tyehe caa: 32 "Yuhu cuví Nyoo cuenda sutu chahnun, Nyoo cuenda ra Abraham, ta ra Isaac, ta ra Jacob", catyi Nyoo chi ra. Tyicuan ta ra Moisés quichaha ñihí ra chihin cha

yuhvi ra. Ta ña caña iñi ra nanyehe ra. ³³ Ta quichaha catyi tucu Sutu Mañi yo chi ra: “Tava ndichan chahun vatyi ñuhú nu chañun, ñuhú ii cuví. ³⁴ Yuhu nyehí tandihi tindoho cha nyehé ñáyivi cuende ñuu Egipto chiña. Ta chiñi ndusu ñu cha chacú chaa ñu. Yucuan chaha noó xique vityin vatyí sacaqui chi ñu. Ñaha, vatyí cutachi chuun nya Egipto”, catyí Nyoo chi ra Moisés.

³⁵ Quívi cuan ña cuñi ñáyivi Israel chi ra Moisés cha cunyaca ñaha ra chi ñu, ta catyí ñu chi ra: “¿Yóo cha tyatyíño chi yoho vatyí cunyaca ñahun ta cuvun juez chi ndi?”, catyí ñu chi ra. Ta vasi ña cuñi ñu cha cunyaca ñaha ra chi ñu, soco Nyoo tachí chi ra vatyí cuvi ra nuu, ta sacacu ra chi ñu. Vatyí tyicuan caa catyí ángel cha tuví nuu ra nu taca iñu cha cayu cuan. ³⁶ Ta ican ra Moisés cuan tava chi ñáyivi Israel Egipto cuan. Ta cha yaha savaha ra milagru ta seña ñuu cuan, ta sacuvi tucu ra nu yaha ñu Tyañuhu Cuaha. Ta nu chica noo ñu ñuhú ityi chichi cha uvi xico cuiya sacuvi tucu ra ñandíhi. ³⁷ Ta suri maa ra Moisés cuan cuví ra cha catyí chi ñu Israel ta cha naha tyehe caa: “Nyoo cutachi ra noo profeta ra tari tachí ra chi mai. Ta cucuvi ra noo ra Israel tari maa ndo. Quichaha ndo chi ra”, catyí ra. ³⁸ Ta suri maa ra Moisés cuan ndíhi ra chihin ñáyivi chahnu yo nu chica noo ñu ñuhú ityi cuan. Ta ican ra cuví ra cha cahan ángel

cuan chihin nya yucu Sinaí. Ta ican ra quehen cuenda ra tuhun yoso caa coo ñáyivi ta sañaha ra chi yo.

³⁹ Soco ñáyivi chahnu yo ña quichaha ñu chi ra. Tava xiin ñu chi ra. Ta cacuñi ñu cunuhu coyo ñu nya Egipto. ⁴⁰ Yucuan chaha cuhva cha nyaá ca ra Moisés yucu Sinaí ta cahan ñáyivi chihin ra Aarón ta catyí ñu: “Savahun suhva nyoo cha cuhun coyo ityi nuu ndi. Vatyí ña chitó ndi ñáá cha cuví chi ra Moisés, ra cha tava chi ndi Egipto”, catyí ñu. ⁴¹ Tyicuan ta casavaha ñu noo becerru xuhun cuaan. Tyicuan ta cachahñi ñu quití vatyí cuhva cuenda ñu chi xitohyo cuan. Ta sii xaan cuñi ñu cachiyo ñu vico cuenda xitohyo cha casavaha ñu chihin ndaha ñu. ⁴² Tyicuan ta Nyoo cuachiyo ra chi ñu. Ta saña ndaha ra chi ñu vatyí cusacahnu ñu chi ñanyii, chi yoo, ta ñáá ndíhi tiño cha iyó ityi andívi. Vatyí tyehe caa catyaa ra profeta cuenda Nyoo nu libru ta cha naha:

Nyoho ñáyivi Israel, ¿atu chahñi ndo quití vatyí cuhva cuenda ndo chi yuhu chichi cha uvi xico cuiya cha chica noo ndo ñuhu ityi? Ñima.

⁴³ Soco sacahnu ndo chi nyoo cha nañi Moloc, ta sacahnu tucu ndo chi nyoo cha nañi Renfán cha caá tari caá tiño andívi.

Suri maa ndo savaha xitohyo cuan, vatyí sac-

ahnu ndo.

Yucuan chaha yuhu cuatave chi ndo ñuu ndo, ta cuasacuhin chi ndo noo nu cañi ityi nuu ca Babilonia, catyí Nyoo chi ñu.

⁴⁴ 'Nu chicá noo sutu chahnu yo ñuhú ityi cuan, chicumi ra noo vehe ñuhu cha chinq chihin ñii quiti. Ta chichi vehe cuan chicumi ra tabla yuu cha nyaá ley Nyoo nuu. Ta ra Moisés tachí ra tyiño na savaha ñu vehe ñuhu cuan ta ityi chata ca tari cuhva sañaha maa Nyoo chi ra. ⁴⁵ Yucuan ta ra Josué nanduví ra nuu chi ñu. Ta quehen ñu vehe ñuhu ta chicoo ñu chihin nu nyaá yo ihya vityin. Vatyí Nyoo tava ñehe ra chi ñáyivi chiyo ñuhu ihya ta nacuhva cuenda ra chi ñu Israel ñáyivi chi yo. Ta chotyíño ñu vehe ñuhu cuan nyacua nya quivi chiyo rey David. ⁴⁶ Ta rey David ñihí ra tumañi iñi nuu Nyoo. Ta cuñi ra savaha ra noo vehe vaha nu coo Nyoo. Suri Nyoo ihya sacahnu ra Jacob ta cha naha. ⁴⁷ Soco ra Salomón savaha vehe Nyoo. ⁴⁸ Vasi ña iyó Nyoo chichi vehe ñuhu cha savahá ñáyivi. Tari catyí ra chihin yuhu ra profeta ta cha naha tyehe caa:

⁴⁹ Andívi cuví tyayu nu nyaí ta nyacá ñahi tandihi. Ta ñuhu ñayivi, yucuan cuví nu chañi chahi.

¿Atu cuví savaha ndo vehi ta coi chichi, cuñi maa ndo?

¿Ta nya maa maa cuví nyitati, cuñi maa ndo?

⁵⁰ ¿Atu ña chitó ndo vatyí mai savahi andívi ta ñuhu ñayivi? catyí Nyoo.

⁵¹ 'Soco nyoho —catyí ra Esteban— tyicuan ri tuhvá ndo sandava ndo iñi ndo. Ta ña cuñi ndo naquehen ndo tuhun cahán Nyoo. Tyicuan ri ña quichahá ndo chi Tatyí Ii. Inuu ri caa ndo chihin sutu chahnu ndo. ⁵² Sutu chahnu ndo sataşi iñi ra ta cachahñi ra chi tandihi ra profeta cuenda Nyoo ta cha naha. Ta ican ra cuan cacatyí vatyí cuquichi noo ra vaha. Ta cha quichí ra vityin, nyoho ña cuñi nyehe ndo chi ra, ta cachahñi ndo chi ra. ⁵³ Nyoho naquehen cuenda ndo ley Nyoo cha chaha ángel chi ndo, soco ña cuñi ndo sacuvi ndo cuhva catyí ley cuan —catyí ra Esteban.

Nu chihí ra Esteban

⁵⁴ Cuhva cha chiñi ra cacuví tyiño vehe ñuhu cahnu tuhun ihya, xaan xaan cuñi ra, nyacua casacahñi noho ra nyehé ra chi ra Esteban. ⁵⁵ Soco ra Esteban tyitú cuii maa ra chihin Tatyí Ii ta nanyehé ra ityi andívi. Ta nyehé ra cha cahnu cuví Nyoo. Ta suri nyehe ra chi ra Jesús nanyaá ra chiyo vaha Nyoo. ⁵⁶ Tyicuan ta catyí ra Esteban:

—¡Nyehe ndo! Nyehí tanuña andívi. Ta nyehí chi ra Jesús, Rayi cha quichí nya gloria, nanyaá ra chiyo vaha Nyoo —catyí ra Esteban.

⁵⁷ Soco ra cuan cachasi ra soho ra, cha ma cuiñi ra tuhun cahán ra Esteban. Tyicuan ta vaa ri cananduvi

ra. Ta tandihí ra cuahan coyo ra siqui ra Esteban.⁵⁸ Tyicuan ta catava ra chi ra yuhu ñuu. Ta ca chahñi ra chi ra chihin yuu. Ta ra cha casacuví cha ña vaha cuan, casandoo ra sahma cha nyaa chata ra vatyí sahadumi noo ra tyivaa cha nañi Saulo.⁵⁹ Cha niri ca cha cacañi ra yuu chi ra Esteban, quichaha chican tahvi ra Esteban chí Nyoo, vatyí tuvi iñi ra cuacúvi ra. Ta catyí ra tyehe caa:

—Sutu Mañi yuhu Jesús, naquehen añime —catyí ra.

⁶⁰ Yahá cuan, tyicuan ta chicuñi chiti ra, ta chaa canachaa ra ta catyí ra:

—Sutu Mañi yuhu, ma tiin cuendon cuatyí cha sacuví ñu —catyí ra.

Ta cha yahá catyí ra tyehe caa, ta chihí ri ra.

8

Nu chicá nyicon ra Saulo chi ñáyivi yihí cuenda ra Cristo

¹ Ta ra Saulo ña chinó iñi ra chi ra Jesús, ta ndoó ra vaha cha chahñi ra chi ra Esteban.

Ta suri quivi cuan quichaha nducu xaan ñáyivi chi ñu yihí cuenda ra Cristo ñuu Jerusalén cuan vatyí cuahñi ñu chi ñu. Soco ra apóstol ña caquita ra. Candoo ra nyicú ra Jerusalén. Ta tandihí ca ñu cachino ñu, cuahan coyo ñu cuacoo ñu ityi Samaria, ta ityi Judea.

² Ta suhva ra cha nyicón vaha chi Nyoo Jerusalén cuan, catyihí ra coño ñuhu ra Esteban chichi ñuhú. Ta cachacu xaan ra cha cuenda ra. ³ Cha niri ca cha tyicuan

caa, ra Saulo chicá nyicon vavaha ra chi ñáyivi yihí cuenda Cristo. Ta tahan tahan vehe ñu chahan ra. Ta suri quiñoho ñaa ra chi ñu, ta chahá cuenda ra chi ñu vatyí cohon ñu vehe caa, rayii ta ñusihí.

Nu cacahán ñu tuhun ra Cristo ityi Samaria

⁴ Soco tandihí ñu cha quita ñuu Jerusalén, cahán ñu tuhun yoso caa sacacú ra Cristo añima ñu tandihí ri maa ityi nu cha coyo ñu. ⁵ Minoo ra cha nañi Felipe cha ra noo ñuu ityi Samaria. Ta quichaha cahan ra tuhun ra Cristo chihin ñu. ⁶ Ta tandihí ri ñáyivi ta tyasohó ñu tuhun cha cahán ra. Ta nyehé ñu milagru ta seña cha savahá ra. ⁷ Vatyí cuaha vavaha ñáyivi cha yihí tatyí ña vaha chii nduvaha ñu. Vatyí tatyí ña vaha cha yihí chi ñu, quita chi ta suri canachaa chi cuahan chi. Ta cuaha vavaha ñáyivi coxo ta ñáyivi cha ña cuví nacanda, nduvaha ñu. ⁸ Yucuan chaha ñáyivi ñuu cuan, si xaan cacuví chi ñu.

⁹ Soco ñuu Samaria cuan iyó noo ra tasi cha nañi Simón. Ta sandaví ñaha ra chi ñáyivi cuan. Catyí ra vatyí cuví ra noo ra cahnu. ¹⁰ Ndi cuii maa ñáyivi tyasohó ñu tuhun cahan ra, nya ñu tyayii, ta nya ñu ndahvi. Ta cacatyí ñu:

—Ndicha ndicha cuii, vatyí tunyee iñi Nyoo nyaá chihin ra ihya —catyí ñu.

¹¹ Quichahá xaan ñu tuhun cahán ra vatyí cha naha xaan

sandaví ñaha ra chi ñu chihin tuhun tasi. ¹² Tyicuan ta quichí ra Felipe. Ta sacoto ra chi ñu yoso caa nyacá ñaha Nyoo añima ñáyivi. Ta yoso cuhva cha cahnu cuvi ra Jesucristo. Ta yucuan ta chino iñi ñu chi ra Cristo, rayii ta ñusihí. Ta condutyá ñu. ¹³ Nyacua nya ra Simón cuan, ta nachino iñi ra chi ra Cristo, ta condutyá ra. Ta quichaha chica noo ra chihin ra Felipe. Ta iyo xaan cuñi ra nyehe ra milagru, ta seña cha sacuví ra Felipe cuan.

¹⁴ Tyicuan ta ra apóstol cha canyicú ñuu Jerusalén cuan ñihí ra tuhun cha canachinó iñi ñáyivi ityi Samaria cuan tuhun Nyoo. Ta catachi ra chi ra Pedro ta chi ra Juan. ¹⁵ Cuhva cha chaꝯ coyo ra yucuan, ta chican tahvi ra chaha ñu quihvi cuenda ra Cristo vatyí tacuhva tyi naquehen ñu Tatyí Ii. ¹⁶ Vatyí ñu cuan, ta naquehen ca ñu Tatyí Ii. Tacuhva condutyá ri ñu chihin sivi Sutu Mañi yo Jesús. ¹⁷ Tyicuan ta ra Pedro ta ra Juan catyiso ra ndaha ra siqui ñu, ta naquehen ñu Tatyí Ii. ¹⁸ Ta ra Simón cuan nyehe ra cuhva cha catyiso ra apóstol ndaha ra siqui ñu cuan, ta naquehen ñu Tatyí Ii. ¹⁹ Ta quichaha catyí ra tyehe caa:

—Yoso xuhun cuñi ndo ta cuhva ndo tunyee iñi chiña chii, vatyí tacuhva cuvi tyise ndahi siqui ñáyivi, ta naquehen tucu ñu cuan Tatyí Ii —catyí ra Simón cuan chi ra apóstol.

²⁰ Tyicuan ta nacahan ra Pedro ta catyí ra:

—Na cunaun iin ri chihin xuhun chiña. Vatyí chicá iñun tyi cuví sata yo chihin xuhun nyatu cha chahá maa Nyoo chi yo. ²¹ Yoho, ña tahan chi tyihun chuun chihin tuhun ihya. Vatyí añimon ña vaha nuu Nyoo. ²² Ndu uvi iñun cuhva chicá xiñun chiña, vatyí cahnu cha quiñi caa cuví cuan nuu Nyoo. Ta cacan tahvi chi ra na nyehe yo tatu saha ra ticahnu iñi chuun cha cuenda cha caa chichi añimon. ²³ Vatyí nyehí tyi chichi añimon tyitú maa yihí cha quiñi caa cha cuvi tari cha uva. Ta cha quiñi caa cuan, ña chahá coton cha vaha. —catyí ra Pedro chi ra Simón cuan.

²⁴ Tyicuan ta nacahan ra Simón ta catyí ra:

—Cacan tahvi maa ndo cha cuende nuu Nyoo, ta cuhva cha ma quichi tandihí tuhun cha catyún chiña siqui —catyí ra Simón chi ra Pedro.

²⁵ Cha yaha cuan ta ra apóstol nacatyí ra tandihí cha nyehe ra cha sacuví ra Cristo. Ta cahan ra tuhun Nyoo. Tyicuan ta cuanuhꝯ coyo ra nya Jerusalén. Ta suri sacoto ra tuhun yoso caa sacuví yo ta cacu añima yo tandihí ñuu ityi Samaria nu yaha ra.

Nu cahan ra Felipe tuhun Nyoo chihin noo ra Etiopía

²⁶ Cha yaha tuhun cuan tyicuan ta cahan noo ángel Nyoo chihin ra Felipe, ta catyí ra:

—Nd̄icuita ta cuhun ityi sur, ityi quita nya Jerusalén ta cuahan nya Gaza —catyí ángel cuan chi ra.

Yucuan cuvi ityi cha yahá noo ñuhú ityi. ²⁷ Tyicuan ta ra Felipe ndicuita ra ta cuahan ra. Ta ityi cuahan ra ta ñihi tahan ra chihin noo ra ñuu Etiopía. Ta cuvi ra eunuco. Cuví ra noo ra cuví tyiño cahnu ñuu Etiopía, vatyí sahá cuenda ra xuhun cu Candace, ñaha cha cuví reina ñuu Etiopía cuan. Ta chahan ra Etiopía cuan chisacahnu ra chi Nyoo nya Jerusalén. ²⁸ Ta ityi cuanuhú ra nya ñuu ra nyaá ra siqui carru ra. Ta sacuahá ra libru cha tyaa ra Isaías ra profeta cuenda Nyoo ta cha naha. ²⁹ Tyicuan ta Tatyí li catyí chi ra Felipe:

—Satuhva ca nu cuahan carru cuan.

³⁰ Ta cuhva cha tuhva ra Felipe, chiñi ra vatyí sacuahá ra cuan nu libru cha tyaa ra Isaías. Ta ndaca tuhun ra chi ra:

—¿Atu cutuñí iñun cha sacuahún? —catyí ra.

³¹ Tyicuan ta nacahan ra cuan ta catyí ra:

—¿Yoso caa cutuñí iñi ta yori sañahá chii? —catyí ra chi ra.

Ta chican ra chi ra Felipe na ndaa ra ta cunyaa ra chihin ra.

³² Ta nu cuahan sacuahá ra, catyí chi tyehe caa:

Chahñi ra chi ra tari chahñi ra noo mbee.

Vatyí tari ña chacú mbee tatu cuasatya ra ixi ti, ta tari ña chacú ti tatu chahñi ra chi ti, tyicuan caa

cuví ra cuan tyi nyehe ra tindoho ta ñahri maa catyí ra.

³³ Sanocuee ñu chi ra ta yori cuñí sacacu chi ra.

¿Yóo ra cuvi nacatyí tuhun sehe ra cha cuacoo?

Yori, vatyí chihí ra.

Catyí chi nu tutu cha sacuahá ra cuan.

³⁴ Tyicuan ta ra cuan quichaha ndaca tuhun ra chi ra Felipe, ta catyí ra:

—Saha tumañi iñi chii, ta catyun chiin chii yóo chi tuhun cahán ra profeta ihya. ¿Atu tuhun maa ra, o yóo chi tuhun cahán ra? —catyí ra chi ra Felipe.

³⁵ Tyicuan ta ra Felipe quichaha cahan ra siqui tuhun cha cha yahá sacuahá ra cuan, ta nacatyí ra chi ra vatyí tuhun ra Jesús cahán ra cuan. Ta nacatyí ra vatyí ra Jesús cuví ra cha sacacú chi yo. ³⁶ Tyicuan ta cha cuayaha ra noo nu ñohó ndutya. Ta ra cuan quichaha catyí ra chi ra Felipe:

—Ihya ñohó ndutya. ¿Atu ma cuvi condutye vityin? —catyí ra.

³⁷ Tyicuan ta nacahan ra Felipe, ta catyí ra:

—Tatu chinó iñun chihin cha tandihi añimon, cuví condutyon —catyí ra chi ra.

Tyicuan ta nacahan ra cuan, ta catyí ra:

—Chinó iñi yuhu vatyí Sehe Nyoo cuví chi ra Jesucristo —catyí ra.

³⁸ Tyicuan ta ra cuan catyí ra chi musu ra na sacucuiñi ra carru cuan. Tyicuan ta canoo nduvi tahan ra. Ta

caquihv̄i ra chi ndutyā. Tyicuan ta sacondutyā ra Felipe chi ra. ³⁹ Ta cuhva cha caquita coyo ra chichi ndutyā cuan, Tatyí Ii Sutu Mañi yo naquehen chi chi ra Felipe. Ta ra cuan ña nyehe ca ra chi ra. Soco s̄i xaan cuví chi ra, cuanuhu ra. ⁴⁰ Ta ra Felipe chaā ra ñuu Azoto. Ta cuahan ra tahan tahan ñuu, ta cahan ra tuhun ra Cristo chihin ñáyivi nyacua nya cha chaā ra ñuu Cesarea.

9

Nu nachinó iñi ra Saulo chi ra Cristo
(Hch. 22.6-16; 26.12-18)

¹ Cha ñi ri ca cha chicá noo ra Felipe cahán ra tuhun ra Cristo chihin ñáyivi, ra Saulo ña sandihí ra tuhun cha nducú cahñi ra chi ñu yihí cuenda Sutu Mañi yo. Ta chahan ra nu nyaá ra cuví nuu chi tata sutu, ² chicacān ra noo tutu chi ra, tacuhva nacuhva ra cuhun ra vehe ñuhu ñuu Damasco, ta tiñn ra chi ñu cuahan ityi ra Cristo, ta quichi nyaca ra chi ñu vehe caa Jerusalén, rayñi o ñusihi. ³ Ñihí ra Saulo tutu cuan ta cuahan ra. Ta cuhva cha cuachaa ra ñuu Damasco cuan, sana cuii ri iñi ra, ta quichí noo nduva ñuhū ityi andivi, sacundichin nicachico maa nu cuahan ra. ⁴ Tyicuan ta ra Saulo nduva ra nu ñuhú. Ta chihñi ra noo ndusu cha catyí tyehe caa:

—Saulo, Saulo, ¿ñáá tuhun cha chicá nyicon chi yuhu? —catyí ndusu cuan chi ra.

⁵ Tyicuan ta nacahan ra Saulo ta ndaca tuhun ra chi ra ta catyí ra:

—¿Yóó yoho Tata? —catyí ra.

Tyicuan ta nacahan ndusu cuan chihin ra, ta catyí:

—Yuhu cuví ra Jesús, ra chicá nyicon chi. Suri chi maun sañicuehún, tari sañicuehé sindiqui quití tahví ñuhu chi ti cha chañí nyaá ti nu noo cha xaan cha saquehen ityi ra chi ti —catyí ra Jesús chi ra.

⁶ Tyicuan ta ra Saulo suri ñihí ra chihin cha yuhvi ra. Ta catyí ra:

—Sutu Mañi yuhu, ¿ñáá cha cuñún tyi sacuvi? —catyí ra.

Tyicuan ta Sutu Mañi yo catyí ra chi ra tyehe caa:

—Ndicuita ta quihvun chichi ñuu Damasco chiña. Ta yucuan cucatyí noo ra chuun ñáá cha cusacuvun —catyí ra Jesús chi ra Saulo.

⁷ Ra cha candihí chihin ra Saulo, yuhvi xaan ra cacuví. Ta ña cañihí ra tuhun cahan ra vatyí cachiñi ra ndusu cuan soco yori chi nyehe ra.

⁸ Tyicuan ta ra Saulo ndicuita ra. Soco cuhva cha nuñā ra chiti nuu ra, ña cuví ca maa nyehe ra vatyí nducuaa ra. Yucuan chaha, ra tahan ra cayindahā ra ndaha ra ta chinyaca ra chi ra ñuu Damasco cuan. ⁹ Yucuan chinyaa ra uñi tahan quivi. Ta ña cuví nyehe ra. Ta ñiri ña chachí ra, ta ña chihí ra ndutyā.

¹⁰ Ñuu Damasco cuan iyó noo ra chinó iñi chi Nyoo. Ta nañí ra Ananías. Ta nyehe ra

noo visión nu catyí Sutu Mañi yo chi ra tyehe caa:

—¡Ananías! —catyí ra chi ra.

Tyicuan ta nacahan ra Ananías, ta catyí ra:

—Ma yuhu ihya, Sutu Mañi yuhu —catyí ra chi ra.

¹¹ Tyicuan ta Sutu Mañi yo catyí ra:

—Ndicuita, ta cūhun noo ityi cahnu cha nañi Ndoo. Ta nanducun vehe noo ra cha nañi Judas. Ta ndaca tuhun sivi noo ra cha nañi Saulo, ra ñuu Tarso. Vatyí chicán tahvi ra chi Nyoo. ¹² Ta nyehé ra noo visión, ta nyehé ra chi noo ra nañi Ananías. Ta chaá ra nu nyaá ra, ta tyisó ra ndaha ra siqui ra tacuhva cuví nanyehe ra inga chaha —catyí Sutu Mañi yo chi ra Ananías.

¹³ Tyicuan ta nacahan ra Ananías ta catyí ra:

—Sutu Mañi yuhu, cuaha xaan ñáyivi nacatyí chii vatyí cuaha xaan cha ña vaha chinyacuví ra Saulo cuan chihin ñu yihí cuendon nya ñuu Jerusalén. ¹⁴ Ta vityin vachi tucu ra ihya vatyí chaha ra cacuví nuu chi tata sutu ityi chi ra cha tyihi ra chi ñáyivi chicán tahvi chihin sivan vehe caa —catyí ra Ananías chi Sutu Mañi yo.

¹⁵ Soco Sutu Mañi yo catyí ra chi ra:

—Cuahan vatyí yuhu cha nacachí vahí chi ra Saulo cuan, vatyí cahan ra tuhin chihin ñáyivi inga ñuu, ta chihin rey inga ñuu, ta suri cahan tucu ra chihin ñáyivi Israel ñandihí. ¹⁶ Yuhu cusañahi chi ra yoso caa cha

cuaha tindoho cunyehe ra cha cuende —catyí Sutu Mañi yo chi ra Ananías.

¹⁷ Tyicuan ta cuahan ra Ananías vehe nu nyaá ra Saulo. Chaá ra vehe cuan ta quihvi ra chichi vehe. Ta tyiso ra ndaha ra siqui ra Saulo, ta catyí ra chi ra tyehe caa:

—Yañi Saulo, Sutu Mañi yo ra Jesús ra tuví nuun ityi vachun, ican ra tachí chii vatyí tacuhva cuvi nanyehun inga chaha. Ta cusacutu ra chuun chihin Tatyí Ii ra —catyí ra Ananías chi ra Saulo.

¹⁸ Caa cuhva ri cuan ta cana coyo noo cha tari caa soo tiyaca cha yihí chiti nuu ra Saulo. Tyicuan ta cuví nanyehe ra inga chaha. Yahá cuan ta condutyá ra. ¹⁹ Yahá cuan ta chachí ra. Ta ndun-yeé coño ñuhu ra inga chaha. Ta ndoo ra suhva quivi chihin ñu yihí cuenda ra Cristo ñuu Damasco cuan.

Nu quichaha cahan ra Saulo tuhun ra Cristo chihin ñáyivi ñuu Damasco

²⁰ Tyicuan ta numi ri quichaha cahan ra Saulo tuhun ra Cristo chihin ñáyivi tandihí vehe ñuhu ñu Israel ñuu Damasco cuan. Ta catyí cachi ra vatyí ra Jesús, Sehe Nyoo cuví chi ra. ²¹ Ndií cuii maa ñáyivi cha chiñi tuhun cahan ra, iyo vavaha cuñi ñu. Ta catyí ñu chi tahan ñu:

—¿Atu ñima ra ihya cuví ra cha chica nyicon chi ñu chicán tahvi chihin sivi ra Jesús ityi ñuu Jerusalén cuan? ¿Atu suri ñima ra cuví cha

vachi t̄in chi ñu ityi tyehe vatyí cucuhva cuenda ra chi ñu chi ra cacuví nuu chi tata sutu? —catyí ñu.

²² Soco ra Saulo ñihi ca cahan ra tuhun ra Cristo chihin cha ñi ca iñi ra. Ta sañahá ra vatyí ra Jesús cuví ra Cristo, Sehe Nyoo. Nyacua ña cutuñí iñi ra Israel nyicú Damasco cuan nya ityi chino iñi ra.

Nu chinq xehe ra Saulo chi ra Israel

²³ Cha yaha suhva quivi, ta ra Israel cha ña chinó iñi chi ra Cristo catyihí tahan ra tuhun cha cahñi ra chi ra Saulo. ²⁴ Ta ndiyaca ta ñiyaca canyatú ra chi ra yuvehe cahnu ñuu cuan. Soco ra Saulo cuan numi ri chito ra tuhun cuan. ²⁵ Tyicuan ta ñáyivi cha chinó iñi chi ra Cristo ñuu cuan catyihí ñu chi ra chichi noo tica cahnu. Ta noo cha cuaa casanoo ñu chi ra ityi ventana noo vehe cha cacú chihin barda cha nyaá nicachico yuhu ñuu cuan. Ta tyicuan caa chinq ra cuahan ra.

Nu ñohó ra Saulo Jerusalén

²⁶ Quivi cha chaq ra Saulo Jerusalén, cuñi ra ndu in ri ra chihin ñu yihí cuenda ra Cristo. Soco tandihí maa ñu cuan ta yuhvi ñu chi ra. Vatyí ña chinó iñi ñu cha yihí ra cuenda ra Jesús. ²⁷ Soco noo ra cha nañi Bernabé, naquehen ra chi ra. Ta chaha cuenda ra chi ra chi ra apóstol. Ta nacatyí ra chi ra yoso caa nyehe ra Saulo chi Sutu Mañi yo ra Cristo ityi ñuu Damasco; ta nacatyí ra

yoso caa cahan Sutu Mañi yo chihin ra. Ta yoso caa cahan ra tuhun ra Cristo chihin cha ña yuhvi ra nya ñuu Damasco cuan. ²⁸ Tyicuan ta ndoq ra Saulo Jerusalén chihin ñu yihí cuenda ra Cristo. ²⁹ Ta cahan ra tuhun Sutu Mañi yo chihin cha ña yuhvi ra. Ta ndatuhún xaan ra tuhun ra Cristo chihin ra Israel cha cahan sahan griego. Soco ra cuan cananducu ra cuhva yoso caa ta cacahñi ra chi ra. ³⁰ Soco cachitó ra hermano cuan vatyí tyicuan caa yihí iñi ra cuan. Yucuan chaha chinyaca ra chi ra Saulo nya ñuu Cesarea. Ta yucuan ta natachi ra chi ra nya Tarso ñuu ra.

³¹ Tyicuan ta ñu yihí cuenda ra Cristo cha nyicú tandihí ityi Judea, ta ityi Galilea, ta ityi Samaria, vii xaan nyicu ñu vatyí ña cuxaan ca ñáyivi chi ñu. Ta ndunyeē ca iñi ñu chihin fuerza Nyoo vatyí quichaha vaha ñu cuhva catyí Nyoo, vatyí yuhví ñu coto ma sacuvi ñu cuhva cuñí ra. Iyó ñu chihin cha tyinyeé Tatyí Ii chi ñu. Ta cuaha xaan ñu cuahan nanduvi.

Nu nduvaha ra Eneas

³² Tyicuan caa cuví ta ra Pedro tuhvá ra chica noo ra nyehe ra yoso caa canyicu hermano noo noo ñuu. Ta chahan tucu ra chinyehe ra nu nyicu ñu yihí cuenda ra Jesucristo noo ñuu cha nañi Lida. ³³ Yucuan nañihí ra chi noo ra cuhvi. Nañi ra Eneas. Ta cha uña cuiya catuví ra ña

cuvi nacanda ra vatyí ndundava coño ñuhu ra. ³⁴ Soco ra Pedro catyí ra chi ra:

—Yoho Eneas, ra Jesucristo sanduvaha ra chuun. Ndícuita ta natuvi yuvun —catyí ra chi ra.

Tyicuan ta caa cuhva ri cuan ndícuita ra Eneas. ³⁵ Ta nyehe tandihí ñáyivi ñuu Lida cuan tyi nduvaha ra. Ta ñáyivi ñuu Sarón ñandihí. Tyicuan ta ñu cuan nachino ñi ñu chi Sutu Mañi yo. Ta sandoo ñu tuhun chahnu cha chino ñi ñu ta cumañi ca coto ñu tuhun ra Cristo.

Nu nandoto cu Dorcas

³⁶ Quivi cuan chiyó noo ñaha chinó ñi chi ra Cristo ñuu Jope. Ta nañi ña Tabita, soco chihin sahan griego, Dorcas nañi ña. Ta tyicuan ri sacuvi ña cha vaha chihin ñáyivi. Tyinyee ña chi ñu ndahvi. ³⁷ Ta quivi cuan cu Dorcas quehen noo cuehe chi ña ta chihí ña. Ta cha yaha sacutyi ñu chi ña, chicacun ñu chi ña chichi noo cuarto nu cu uvi piso. ³⁸ Ñuu Jope cuan yatyin ri nyaá chihin ñuu Lida, nu nyaá ra Pedro. Ta ñu cha yihí cuenda ra Cristo ñuu Jope cuan chitó ñu vatyí nyaá ra Pedro ñuu Lida cuan. Tyicuan ta tachí ñu chi uvi tahan ra na cucatyí ra chi ra Pedro vatyí naquichi ra cha numi ri. Cuahan ra cuan ta catyí ra chi ra Pedro:

—Coho nya Jope. Sanumi ta ma cucueun —catyí ra chi ra.

³⁹ Tyicuan ta ra Pedro ndícuita ra ta cuahan ra chihin ra. Ta cuhva cha chaa

ra, chinyaca ra chi ra nya cuarto nu caa ndiyi cuan. Ta tandihí maa ñu chihí yí catuhva ñu nicachico chata ra. Suri chacú chaa ñu. Ta sañahá ñu sahma cha quicu cu Dorcas ta chinyito ña. ⁴⁰ Tyicuan ta ra Pedro tava ra chi tandihí ñáyivi cuarto cuan. Tyicuan ta chicuñi chiti ra ta quichaha chican tahvi ra chi Nyoo. Tyicuan ta nanyehe ra chi ñaha chihí cuan catuvi ña. Ta quichaha catyí ra chi ña:

—Hermana Tabita, ndícuita —catyí ra chi ña.

Tyicuan ta nandica ña chiti nuu ña. Ta cuhva cha nanyehe ña chi ra Pedro, nicunyaá ña. ⁴¹ Tyicuan ta ra Pedro tin ra ndaha ña ta sandícuita ra chi ña. Tyicuan ta cana ra chi ra hermano, ta chi ñu chihí yí. Ta nacuhva cuenda ra chi ña chi ñu vatyí nandoto ña. ⁴² Yaha cuan ta ndi cuii maa ñu Jope chitó ñu cha nandoto ña cuan. Ta cuaha vavaha ñu nachino ñi chi Sutu Mañi yo. ⁴³ Ta ra Pedro ndoo ra cuaha ri quivi ñuu cuan. Nyaá ra vehe noo ra satyahyu ñi. Nañi ra Simón.

10

Ra Pedro ta ra Cornelio

¹ Ñuu Cesarea iyó noo ra cha nañi Cornelio. Ta cuvi ra capitán cuenda noo ciento sindaro. Ta ityi sindaro cuan, Italia nañi. ² Ta ra Cornelio cuan yuhví ra chi Nyoo ta vaha sacahnú ra chi ra, maa ra ta ñáyivi chi ra ñandihí. Ta siin ri cuaha vavaha xuhun

chahá ra chi ñu ndahvi ñu Israel. Ta tyicuan ri chicán tahvi ra chi Nyoo. ³ Ta cuví noo quiví cuan cuhva cha caa uñi cha cha iñi, nyehe ra noo visión. Ta yucuan cuví nu cachi xaan nyehe ra vatyí noo ángel cha tachí Nyoo quihví nu nyaá ra, ta catyí ra chi ra:

—¡Yoho Cornelio! —catyí ángel cuan chi ra.

⁴ Tyicuan ta nanyehe ra Cornelio chi ángel cuan. Ta yuhvi xaan ra cuvi. Ta quichaha ndaca tuhun ra ta catyí ra:

—¿Ñáa cha cuví ihya, Tata? —catyí ra chi ángel cuan.

Tyicuan ta ángel cuan quichaha catyí ra chi ra:

—Nyoo chiñi ra ndi cuii maa cha chicón chi ra. Ta tahán iñi ra vatyí tyinyee xaan chi ñu ndahvi. ⁵ Ta vityin cuñí chi cha tachun tyiño nya ñuu Jope na cuquehen chi noo ra cha nañí Simón Pedro. ⁶ Ta maa ra cuan cuacatyí ra chuun ñáa cha tahán chi sacuvun. Ta iyó ra vehe noo ra cha nañí tucu Simón, cuví ra noo ra satyahyú ñi. Ta iyó vehe ra yuhu tyañuhu —catyí ángel cuan chi ra Cornelio, ta cuahan ángel cuan.

⁷ Ta cha yaha cuahan ángel cuan, ra Cornelio cana ra chi uvi tahan musu ra, ta chi noo sindaro cha chinó xaan iñi chi Nyoo. Ta cuví tucu ra noo ra sahá cuenda chi ra Cornelio ñandíhi. ⁸ Ndi cuii tuhun cahán ángel cuan chihin ra Cornelio ta nacatyí ra chi nduñi tahan ra cuan. Ta tachí ra chi ra ñuu Jope.

⁹ Tuví inga quiví ta cuahan coyo ra cuan. Ta cuhva cha cuachaa coyo ra yuhu ñuu Jope cuan, ra Pedro ndaa ra xiñi vehe vatyí cuacacan tahvi ra chi Nyoo, ta cha cuñí hora cuví cuhva cuan.

¹⁰ Ta chaa noo soco chi ra ta chisocó vavaha ra. Soco cha niri ca cha sanduvahá ñu cha cachi ra, quichaha nyehe ra noo visión. ¹¹ Ta nyehe ra vatyí nicuitacoho andívi. Ta nyehe ra cua noo noo sahma cahnu vavaha ityi andívi. Ta tari quiví nuhñi noo noo tutun sahma cuan ta cuahan noo ityi nu ñuhu. ¹² Ta chichi sahma cuan ñohó tandíhi maa nuu quiti cha cumi tahan chaha. Ta tandíhi nuu coo, ta tandíhi nuu saa. ¹³ Tyicuan ta chiñi ra noo ndusu cha catyí chi ra:

—Pedro, ndicuita ta cahñi quiti ihya, ta cachun —catyí ndusu cuan chi ra.

¹⁴ Soco ra Pedro nacahan ra ta catyí ra:

—Ma cachi, Sutu Mañi yuhu. Yuhu ña tuhvé chachi quiti cha catyí ley tyi yica cha cachi ndi —catyí ra Pedro.

¹⁵ Tyicuan ta quichaha catyí tucu ndusu cuan chi ra inga chaha:

—Ma catyun vatyí yica cha cachun noo cha cha yaha sanduvij yuhu —catyí ndusu cuan chi ra Pedro.

¹⁶ Uñi tahan chaha sañaha Nyoo visión ihya chi ra. Tyicuan ta sahma cahnu cuan nandaa cuanuhu tucu ityi andívi. ¹⁷ Cha niri ca cha chicá xiñi ra Pedro ñáa cha cuñí chi catyí visión cuan,

chaa coyo musu cha tachj ra Cornelio. Ta candaca tuhun ra nya nyaá vehe ra Simón. ¹⁸ Ta cha chaa coyo ra ityi yuvehe candaca tuhun ra tatu yucuan iyó noo ra cha nañi Simón Pedro. ¹⁹ Ta ra Pedro suri cha chicá xiñi ra ñáa cha cuñi chi catyi visión cha nyehe ra. Tyicuan ta Tatyí li quichaha catyi chi ra:

—Nyehe Pedro, uñi tahan ra nanducú chuun. ²⁰ Ndícuita ta cuhun chihin ra, ta ma quihí uvi iñun vatyí mai tachj chi ra ihya —catyí Tatyí li chi ra.

²¹ Tyicuan ta ra Pedro noo ra nu canyicu ra cha tachj ra Cornelio, ta catyí ra chi ra:

—Yuhu cuví ra nanducú ndo. ¿Náa tyiño vachi ndo?

²² Tyicuan ta canacahan musu ra Cornelio ta catyí ra:

—Ra Cornelio, ra cuví capitán chi ndi ican tachj chi ndi. Noo ra vaha xaan ñáyivi cuví. Ta vaha xaan quichahá ra nu cahán Nyoo. Ta tandihí maa ra Israel ityi Judea ihya cacuñi ra chi ra chaha cha cuenda cha vaha ñáyivi cuví ra. Ta noo ángel Nyoo catyí chi ra vatyí na cana ra chuun, vatyí cuhun vehe ra vatyí tacuhya cuiñi ra tuhun cha cuacahun —cacatyí musu ra Cornelio chi ra Pedro.

²³ Tyicuan ta chaha ra Pedro quihvi coyo ra chichi vehe. Ta candoo ra chihin ra cha cuaa cuan. Ta cha inga quiví cuan ta cuahan ra Pedro chihin ra. Ta cuahan suhva ra hermano cha iyó Jope cuan ñandihí.

²⁴ Cha inga quiví chaa coyo ra nya Cesarea nu nyatú ra Cornelio chi ra chihin ñáyivi chi ra, ta chihin tandihí ra tahan ra. ²⁵ Cuhva cha chaa ra Pedro vehe ra, ra Cornelio quita ra ta cahan ra chihin ra. Ta chicuñi chiti ra nuu ra ta quichaha sacahnu ra chi ra. ²⁶ Soco ra Pedro nacoñehé ra chi ra, ta catyí ra chi ra:

—Ndícuita vatyí noo rayi ri cuví yuhu tari yoho, ta ñima Nyoo cuví —catyí ra chi ra.

²⁷ Ta cha niri ca cha cahán ra chihin ra, quihvi ra ta nanyehe ra cuaha ñáyivi candu ñn ri. ²⁸ Tyicuan ta catyí ra Pedro chi ñu:

—Nyoho chitó ndo vatyí ley nyuhu cha cuví ndi ñu Israel, ña chahá chi cha cu ñn ri ndi chihin ñáyivi inga ñuu. Ta ni ri chichi vehe ñu ta ma cuví quihvi ndi. Soco Nyoo sañaha ra chii, ta catyí ra: “Yoho, ma catyun chi ni noo ñáyivi tyi ña vaha ñu”, catyí Nyoo chii. ²⁹ Yucuan chaha quiví cha cana ndo chii, numi ri vachi. Ta vityin cuñi cote ñáa cuenda cana ndo chii —catyí ra Pedro chi ra Cornelio.

³⁰ Tyicuan ta nacahan ra Cornelio, ta catyí ra:

—Cha iyó cumi quiví vityin, suri maa cuhva ihya cha nyaí vehi ta ña chachí ta chicán tahvi chi Nyoo cha cha iñi. Ta tuví noo ra nui. Ñihnó ra noo sahma xiño vavaha. ³¹ Ta catyí ra chii: “Yoho Cornelio, Nyoo chiñi ra cha chicán tahvun. Ta nichón iñi ra cha sacuvún vatyí tyinyeún chi ñu ndahvi. ³² Tachi tyiño nya ñuu Jope na quichi ra

Simón Pedro. Nyaá ra vehe inga tucu ra cha nañi Simón, noo ra cha satyahyu ñi. Ta vehe ra nyaá yatyin ri yuhu tyañuhu. Ta na quichi ra Simón Pedro ta cahan ra chuhun", catyí ángel cuan chii. ³³ Tyicuan ta numi ri tachí tyiño vatyí cuquehen chuun. Ta vaha vatyí vachun. Ta vityin tandihí yo nyicú yo nuu Nyoo. Ta cuñí ndi cuiñi ndi tandihí cuii maa cha tachí Sutu Mañi yo chuun vatyí nacatyun chí ndi.

Nu cahan ra Pedro tuhun ra Cristo vehe ra Cornelio

³⁴ Tyicuan ta quichaha cahan ra Pedro ta catyí ra:

—Vityin cutuñi iñi vatyí Nyoo cuñí ra chí tandihí ñáyivi. Cuví ri yo ñu Israel, o cuví ri yo ñu inga ñuu. ³⁵ Soco naquehen ra chí yo tatu quichaha yo chí ra, ta sacuví yo cha vaha. ³⁶ Cahan ra chihin nyuhu ñu vachi tata ra Israel, ta sacoto ra vatyí nduvaha coo yo chihin ra cha cuenda ra Jesucristo. Maa ra nyacá ñaha tandihí maa yo. ³⁷ Nyoho chitó vaha ndo tandihí cha cuví ñuu Israel ñui, yoso caa quichaha chí nu cuví Galilea cha yaha cha cahan noo ra Juan nuu ñáyivi, ta sacondutyá ra chí ñu. ³⁸ Chitó ndo yoso caa chaha Nyoo tunyee iñi Tatyí Ii ra chí ra Jesús, ra Nazaret. Ta chica noo ra sacuví ra cha vaha, sanduvaha ra chí tandihí ñu cha nyehé tindoho sahá ra ña vaha. Tyehe caa sacuví ra Jesús vatyí Nyoo nyaá ra chihin ra. ³⁹ Nyuhu

cuví ndi cha ndaa tandihí cha sacuví ra Jesús ñicahnu Judea ta ñuu Jerusalén. Yaha cuan ta chahñi ñu chí ra nu cruzi. ⁴⁰ Soco sanandoto Nyoo chí ra nu cu uñi quivi. Ta tuví ra nuu ndi. ⁴¹ Ña tuví ra nuu tandihí ñáyivi. Soco tuví ra nuu nyuhu vatyí nacachí ra chí ndi nyata ityi chata ca vatyí cuví ndi cha ndaa cuenda ra. Nyuhu chachí ndi ta chihí ndi chihin ra cha yaha cha nandoto ra. ⁴² Ta tachí ra chí ndi vatyí cahan ndi tuhun ra chihin ñáyivi. Ta cuví ndi cha ndaa vatyí Nyoo cuatyaá ra chí ra Jesús tyi cuví ra juez chí ñu cha nyitó ta ñu cha chihí. ⁴³ Ta tyicuan caa tucu nyata ityi chata ca, cacahan tandihí ra profeta Nyoo tuhun ra Jesús. Ta cacatyí ra vatyí tandihí ñu cha chinó iñi chí ra Jesús, cusandachi Nyoo cuatyi ñu cha cuenda maa ra.

Nu naquehén ñu Tatyí Ii ta ñima ñu Israel cuví ñu

⁴⁴ Ni cahan ca ra Pedro ta noo xica ri Tatyí Ii siqui tandihí ñu tyasohó tuhun cahan ra. ⁴⁵ Ta ra Israel cha cayihí cuenda ra Jesús cha chaá coyo chihin ra Pedro iyo xaan cuñí ra vatyí chaha tucu Nyoo Tatyí Ii ra chí ñu cha ñima ñu Israel cuví. ⁴⁶ Chitó ra tyi tyicuan caa cuví vatyí chiñí ra cahan ñu inga sahan, ta sacahnú ñu chí Nyoo. ⁴⁷ Tyicuan ta quichaha catyí ra Pedro chí ra cha chaá coyo chihin ra:

—Ma cuví casi yo nu condutya ñáyivi ihya. Vatyí cha

naquehen tucu maa ñu Tatyí li tari maa yo —catyí ra chi ra.

⁴⁸ Tyicuan ta tachí ra Pedro chi ñu ni ñihí Tatyí li na condutya ñu chihin sivi ra Jesucristo. Tyicuan ta chacu ndahvi ñu nuu ra Pedro vatyí cuñí ñu cha ndoo ra suhva quivi chihin ñu.

11

Nu nacatyí ra Pedro chi ñu yihí cuenda ra Cristo Jesús nya Jerusalén yoso caa cuahan chitya tuhun ra inga ñuu

¹ Ra apóstol ta inga ra hermano cha nyicú Judea, ñihí ra tuhun vatyí nyacua nya ñu cha ñima ñu Israel cuví ta naquehén ñu tuhun Nyoo.

² Tyicuan ta nachaa ra Pedro Jerusalén. Ta ra cha catyí vatyí cuñí chi cha sacuvi yo costumbre circuncisión ta cuhva cuvi cacu yo, xaan xaan cuñí ra nyehe ra chi ra Pedro. ³ Ta cacatyí ra chi ra tyehe caa:

—¿Ñáá tuhun cha chahun vehe ñu cha ñima ñu Israel cuví ta chachun chihin ñu? —catyí ra.

⁴ Tyicuan ta ra Pedro nacatyí ra nya nu quichaha tandihí cha cuví chi ra ta catyí ra:

⁵ —Yuhu nyaí ñuu Jope. Ta cuhva cha chacán tahvi chi Nyoo ta nyehí noo visión. Ta nyehí tari noo sahma cahnu cha noó ityi andivi. Tari cha nuhñí noo noo tutun ta cuahan noo ityi nu ñuhú nu nyaí. ⁶ Ta nanyehe vahi ñáá cha ñohó chichi. Ta nyehí quiti cha cumi chaha, quiti

cuhu, ta coo, ta saa. ⁷ Ta chiñi noo ndusu cha catyí chii: “Ndicuita Pedro. Cahñi quiti ihya ta cachun”, catyí ndusu cuan chii. ⁸ Ta nacahan ta catyí tyehe caa: “Sutu Mañi yuhu, ma cuvi, vatyí ni noo chaha ta ta cachi que coño quiti quiñi caa.” ⁹ Tyicuan ta ndusu andivi nacahan chi chihin inga chaha, ta catyí chi: “Ma catyí yoho vatyí ma cachun noo cha yaha sanduvij”, catyí ndusu cuan chi. ¹⁰ Uñi chaha cuví tyehe caa. Yaha cuan ta nandaa tandihí chihin sahma cuan ityi andivi. ¹¹ Ta caa cuhva ri cuan chaá coyo uñi tahan ra vehe nu nyaí, quita ra ñuu Cesarea ta nanducu ra chii. ¹² Ta Tatyí li tachí chii na cuhin chihin ra. Ta catyí ra chii tyi ma caca iñi cha ñima ñu Israel cuví ñu. Ta chahan coyo tucu iñu tahan ra yañi yo ihya chihin. Ta cha chaá ndi nya Cesarea quihvi ndi chichi vehe noo ra. ¹³ Ta nacatyí ra cuan chi ndi yoso caa nyehe ra chi noo ángel chichi vehe ra. Nanyaá ángel cuan ta catyí ra chi ra vatyí na tachi ra musu ra ñuu Jope na cana ra chi noo ra cha nañi Simón Pedro. ¹⁴ Vatyí ican ra cucatyí ra chi ra yoso caa cacu añima ra ta añima tandihí ñáyivi chi ra, catyí ángel cuan chi ra cuan na. ¹⁵ Ta sacuvi ra cuan tari cuhva catyí ángel cuan chi ra. Ta cuhva cha chaí vehe ra quichaha cahín chihin ñu. Ta quichí ri Tatyí li siqui ñu tari quichí siqui yo cha xihna ri. ¹⁶ Tyicuan

ta nicohon iñi cha catyḡi Sutu Mañi yo quivḡi cuan. Ta catyḡi ra tyehe caa: “Ndicha vatyḡi ra Juan sacondutyḡa ra chi ñáyivḡi chihin ndutyḡa. Soco nyoho cucondutyḡa ndo chihin Tatyḡi Ii”, catyḡi ra. ¹⁷ Nyoo chaha tucu ra Tatyḡi Ii ra chi ñu cuan tari chaha ra chi maa yo quivḡi chino iñi yo chi Sutu Mañi yo Jesucristo. Ta cha tyicuan caa zyóó ra cuvi yuhu vatyḡi casi cha sacuvḡi Nyoo? —catyḡi ra Pedro chi ra.

¹⁸ Tyicuan ta cuhva cha cachiñḡi ra yañi yo ra Jerusalén tuhun cuan ña nacahan ca ra. Ta casacahnu ra chi Nyoo. Ta cacatyḡi ra:

—Tu tyicuan caa cuvḡi, cuñí chi catyḡi vatyḡi Nyoo chahá tucu ra chi ñu cha ñima ñu Israel cuvḡi vatyḡi ndu uvi iñi tucu maa ñu cuatyḡi ñu, ta coo ñu ñayivḡi cha ma naa ca maa —cacatyḡi ra.

Ñu yihí cuenda ra Cristo ñuu Antioquía

¹⁹ Quivḡi cha cachahñḡi ra chi ra Esteban, quichaha chica nyicon ra chi inga ñu yihí cuenda ra Cristo. Ta yihí ñu cachino ñu ta cuahan coyo ñu ityi Fenicia. Ta inga ñu nya noo ñuhú cha nyaá mahñu tyañuhu cha nañí Chipre. Ta yihí ñu chaḡ coyo ñu ñuu Antioquía. Ta suri cahan ñu tuhun ra Cristo soco in ri maa chihin ñu Israel. ²⁰ Ta chihin ñu cha cuahan coyo cuan, ndihí suhva ñáyivḡi ñuhú Chipre. Ta yihḡi tucu suhva ñu ñuu Cirene. Ta cha chaḡ coyo ñu ñuu Antioquía, ta

quichaha cahan tucu ñu cuan chihin ñu cha ñima ñu Israel cuvḡi. Ta sacoto ñu tuhun Sutu Mañi yo Jesús, ra cha sacacu añima yo. ²¹ Ta tunyee iñi Sutu Mañi yo nyaa chihin ñu. Ta yucuan chaha cuaha ñáyivḡi casandoḡ ñu tuhun chahnu cha chino iñi ñu. Ta nachino iñi ñu chi Sutu Mañi yo. ²² Tyicuan ta chaḡ tuhun cuan nya Jerusalén. Ta ñu yihí cuenda Cristo tachḡi ñu chi ra Bernabé na cahun ra nya Antioquía. ²³ Ta cha chaḡ ra Bernabé Antioquía cuan, nyehe ra yoso caa nasocó Nyoo chi ñu. Ta ndusiḡi xaan cuñí ra. Ta cahán ra nuu ñu na cunyicon ñu chi Sutu Mañi yo chihin cha nḡi iñi ñu. ²⁴ Tyicuan caa sacuvḡi ra Bernabé vatyḡi cuvḡi ra noo ra vaha. Tyitú ra chihin Tatyḡi Ii. Ta chinó xaan iñi ra chi Nyoo. Ta tyicuan caa ta cuaha ñáyivḡi quihvḡi ñu cuenda Sutu Mañi yo. ²⁵ Cha yaha cuan ta cuahan ra Bernabé cuananducu ra chi ra Saulo nya ñuu Tarso. Ta cha nañihḡi ra chi ra, chinyaca ra chi ra nya ñuu Antioquía. ²⁶ Ta cachinyicu ra chihin ñu yihí cuenda Nyoo ñuu cuan noo cuiya nanḡi ta sañaha ra tuhun Nyoo chi cuaha ñáyivḡi. Ta suri ñuu Antioquía cuan cuvḡi nu quichaha catyḡi ñáyivḡi: Cristiano chi ñu, o ñu yihí cuenda ra Cristo cuvḡi cuan.

²⁷ Ta quivḡi cuan chaḡ coyo ra cachahá cuenda tuhun cahán Nyoo, ra cacuvḡi profeta. Quitḡa ra ñuu Jerusalén ta chaḡ coyo ra Antioquía.

28 Ta noo ra cuan nañi ra Agabo chicuinyaa ra nu nyicu ra yihí cuenda ra Cristo ta cahan ra tuhun cha chaha Tatyí Ii chi ra. Ta catyí ra vatyí cuquichi noo tama nicacahnu ñayivi. Ta tyicuan caa cuvi quivi chinyaa ra Claudio cuví ra rey cahnu. 29 Tyicuan ta ñu yihí cuenda Cristo nya Antioquiá tyihí tahan ñu tuhun vatyí cucuhva ñu yoso cuhva cundaa iñi maa noo noo ñu, vatyí cutyinyee ñu chi ñu yihí cuenda Cristo cha iyó ityi Judea. 30 Tyicuan caa sacuvi ñu ta sacuhun ñu xuhun chí ra cuví nuu chi ñu yihí cuenda Cristo nya Jerusalén. Ta ra Bernabé ta ra Saulo chinyaca ra xuhun cuan.

12

Nu chihí ra Jacobo ta nu quihvi ra Pedro vehe caa

1 Ta quivi cuan quichaha chica nyicon rey Herodes chi suhva ñu yihí cuenda ra Cristo. 2 Ta tachí ra tyiño vatyí na cahñi ra chí ra Jacobo yañi ra Juan chihin mityi. 3 Ta nyehe ra Herodes vatyí tahan xaan iñi ñu Israel cha sacuvi ra tyicuan caa, ta tyihí ra tyiño vatyí tñn ndihi ra chí ra Pedro. Ta cuví chi noo quivi vico pascua nu tuhva ñu chachi ñu pan cha ñahri yuchan iya yihí chihin. 4 Cha yaha cha tñn ra chí ra Pedro, tyihí ra chí ra vehe caa. Ta cumi ityi sindaro sahá cumi chí ra. Ta cumi sindaro cha noo ityi ra ta sahá cuenda

ra suhva suhva cuhva chí ra. Ta tyaá ra Herodes cuhva vatyí nayahá vico cuan ta cucuhva cuenda ra chí ra chí ñayivi. 5 Ta tyicuan caa ñohó ra Pedro vehe caa. Ta sindaro cuan sahá cumi vaha xaan ra chí ra. Soco cha ni ri ca cha ñohó ra yucuan, ñu yihí cuenda ra Cristo chicán tahvi xaan ñu nyita cui ri maa cha cuenda ra.

Nu sacacu Nyoo chí ra Pedro vehe caa

6 Ta tyaá ra Herodes cuhva vatyí cha ñaha ri inga quivi cuan cutava ra chí ra Pedro nuu ñayivi. Ta suri cha caa cuan ra Pedro quixí vavaha ra mahñu uvi sindaro cuan. Ta nuhñi ra chihin uvi cadena. Ta uvi ca sindaro canyicu ra yuvehe casahá cumi ra. 7 Ta tañi ri ta tuvi noo ángel cha tachí Sutu Mañi yo. Ta ndundichin ri chichi vehe caa cuan. Ta ángel cuan tñn ra xiin ra Pedro. Ta sandoyo ra chí ra. Ta catyí ra chí ra:

—Sanumi. Ndícuita —catyí ángel cuan chí ra.

Tyicuan ta ndachí cadena cha nuhñi ndaha ra Pedro. 8 Ta ángel cuan catyí ra chí ra: —Nacuhñi vaha chichun ta natyihí ndichan chahun —catyí ángel cuan.

Tyicuan caa sacuvi ra Pedro. Ta catyí ángel chí ra:

—Quehen sahmon ta tyaun chaton ta quichun chate —catyí ángel cuan chí ra Pedro.

9 Ta ra Pedro quitá ra chata ángel cuan. Soco ña chitó ra tatu cha ndicha o cha ña ndicha cuví cuan, ta cuñi

maa ra vatyí visi3n nyeh3 ra.
 10 Soco cuahan ra chata 3ngel
 cuan ta cayah3 ra noo nu
 sah3 cumi sindaro. Tyicuan
 ta cayah3 ra inga tucu nu
 casah3 cumi sindaro cuan.
 Yah3 cuan ta cha3 coyo ra
 yuvehe caa cahnu nu quita
 ñáyívi ta quihvi ñu chichi ñuu.
 Ta yuvehe cuan nuña ri maa.
 Ta quita3 coyo ra. Ta cha
 yah3 yaha ra noo ityi cahnu,
 ta sando3 3ngel cuan chi ra.
 11 Tyicuan ta nacot3 ra Pe-
 dro vatyí ndicha ta quichaha
 catyí ra:

—Ndicha, ñima visi3n cuvi.
 Soco maa Sutu Mañi yo tachí
 ra noo 3ngel vatyí sacacu
 ra chii ndaha ra Herodes ta
 ndaha ra Israel —catyí ra
 Pedro.

12 Chic3 xiñi ra tuhun ihya
 ityi cuahan ra. Ta cha3 ra
 vehe cu María sihi ra Juan
 Marcos. Ta cuaha xaan ñu
 canyicú cuan chicán tahvi ñu
 chi Nyoo. 13 Ta cuhva cha
 sacachan ra Pedro yuvehe
 nuquehe, quita3 noo ñaha tyi-
 vaa cha nañi Rode chinyehe
 ña y33 cha sacachan cuan.
 14 Soco cuhva cha nicohon
 soho ña ndusu ra Pedro, ña
 nuña ña yuvehe. Vatyí sii
 xaan cuñi ña, ta chino ña cua
 nacatyí ña. Ta catyí ña vatyí
 ra Pedro nanya3 ra yuvehe.
 15 Tyicuan ta quichaha catyí
 ñu chi ña:

—Loco yoho —catyí ñu chi
 ña.

Soco ña cuan catyí ña vatyí
 ndicha cha cahán ña. Soco ñu
 cuan catyí ñu tyi ñima ra Pe-
 dro cuví ra, soco 3ngel cuenda
 ra cuví, catyí ñu.

16 Ta ra Pedro sañihí ca
 ra sacachan ra yuvehe.
 Ta cuhva cha nuña ñu ta
 nanyehe ñu chi ra, iyo xaan
 cuñi ñu ta yuhvi ñu cuví.
 17 Soco savaha3 ra seña chihin
 ndaha ra nacutaxin ñu. Ta
 nacatyí ra chi ñu yoso caa
 tava Sutu Mañi yo chi ra vehe
 caa. Ta catyí ra chi ñu:

—Nacatyí ndo chi ra
 Jacobo ta chi inga yañi yo
 —catyí ra.

Ta quita3 ra ta cuahan
 ra inga ityi. 18 Cuhva cha
 cundichin, iyo cacuvi sindaro
 cha sah3 cumi chichi vehe
 caa cuan, vatyí ña cachit3
 ra yoso caa quita3 ra Pedro.
 19 Tyicuan ta tachí ra Herodes
 cunanducu chi ra. Ta vatyí
 ña nañihí ra chi ra, tyicuan
 ta tachí ra na cacahñi ra
 chi ra sah3 cumi vehe caa
 cuan. Yah3 cuan ta quita3
 ra Herodes ityi Judea cuan
 ta cuahan ra ñuu Cesarea
 cuacoo ra.

Nu chihí ra Herodes

20 Ta ra Herodes cuxaan
 xaan ra chihin ñáyívi ñuu Tiro
 ta ñáyívi ñuu Sid3n. Soco
 cuñi ñu cuan nduvaha coo
 ñu chihin ra vatyí ñuu cha
 nyac3 ñaha ra yucuan quit3
 cha cachi ñu. Tyicuan ta
 ndu in ri ñu ta cuahan coyo
 ñu cuacutahan ñu chihin noo
 ra cha nañi Blasto. Ican ra
 sah3 cuenda chi ra Herodes.
 Ta chicán ñu cha nduvaha
 coo ra Herodes chihin ñu.
 21 Tyicuan ta catyí ra Herodes
 vatyí cuhun ñu nu nya3 ra
 noo quivi. Ta cha3 quivi
 cuan ta ndihvi noo ra sahna
 tyiño ra. Ta chicunyaa ra nu
 tyayu cahnu ra. Ta cah3n

noo ra nuu ñu. ²² Tyicuan ta quichaha canachaa ñáyiví, ta catyí ñu:

—Ra cha cahán ihya ñima noo rayi ri cuví ra. Nyoo cuví ra —catyí ñu.

²³ Ta caa cuhva ri cuan noo ángel Sutu Mañi yo chaha ra noo cuehe chi ra Herodes vatyí chaha ra cha catyí ñáyiví tyi Nyoo cuví ra. Ta quihví tindacu chi ra, ta chihí ra.

²⁴ Soco tuhun Nyoo cuahan chitya ca. Ta cahan ñu tuhun Nyoo tandihí ri ityi. ²⁵ Quiví cha ndihí tyiño saha ra Bernabé ta ra Saulo nya Jerusalén, cuanuhu coyo ra ñuu Antioquia. Ta cuahan tucu ra Juan Marcos chihin ra.

13

Nu quichaha cachicá ra Saulo ta ra Bernabé tyiño Nyoo

¹ Vehe ñuhu Antioquía cuan iyó ra cacuví profeta Nyoo. Ta iyó tucu ra cha sañahá tuhun Nyoo chi ñáyiví. Ta siví ra cuan ican cuvi ihya: Ra Bernabé, ra Simón Toon, ra Lucio ra ñuu Cirene, ra Manaén cha chahnu in ri chihin ra Herodes cha cuví rey ityi Galilea, ta ra Saulo. ² Ta noo quiví nyicú tandihí ra ta casacahnú ra chi Sutu Mañi yo. Ta casahá ra ayunar: ña cachachi ra ta cananducu ra chi Nyoo cuví cuan. Tyicuan ta catyí Tatyí Ii chi ra:

—Tava sin ndo chi ra Bernabé ta ra Saulo cha cuenda tyiño cha cané chi ra —catyí Tatyí Ii chi ra.

³ Tyicuan ta cha ndihí saha ra ayunar, ta catyiso ra ndaha ra siqui ra, ta cachican tahvi ra chi Nyoo cha cuenda ra. Ta cacahan ra chihin ra tahan ra ta cuahan coyo ra.

Nu cahán ra apóstol tuhun Nyoo ñuhu Chipre

⁴ Yaha cuan tachí Tatyí Ii chi ra Bernabé ta chí ra Saulo noo ñuu cha nañí Seleucia. Tyicuan ta cuahan coyo ra. Ta yucuan caquihví ra chichi noo barcu ta cuahan ra nya ñuhú Chipre cha nyaa mahñu tyañuhu. ⁵ Yucuan ta cachaa coyo ra noo ñuu yuhu tyañuhu cha nañí Salamina. Ta quichaha cahan ra tuhun Nyoo vehe ñuhu ra Israel. Cuahan tucu ra Juan chihin ra vatyí tyinyee ra chi ra.

⁶ Tyicuan ta cuahan coyo ra cahán ra tuhun Nyoo noo noo ñuu cha nyaa Chipre cuan nyacua nya chaa coyo ra ñuu cha nañí Pafos. Ta yucuan nañihi ra chi noo ra Israel cha nañí Barjesús. Ta chitó ra tuhun tasí. Cuví ra noo ra cuendu vatyí catyí ra vatyí cuenda Nyoo cahán ra. ⁷ Ta ra tasi cuan nyaá ra chihin gobernador Sergio Paulo. Ta ra Sergio cuví ra noo ra cachi ñi. Ta cana ra chi ra Bernabé ta chí ra Saulo, vatyí cuñí ra cuiñi ra tuhun Nyoo. ⁸ Ta ra tasi cuan nañí tucu ra Elimas, ta chasí ra nu chino ñi gobernador cuan chí ra Cristo. ⁹ Tyicuan ta ra Saulo cha nañí tucu Pablo, tyitú ra chihin Tatyí Ii. Ta nyehe vavaha ra chí ra Elimas cuan. ¹⁰ Ta catyí ra chí ra:

—Yoho ra sandaví ñaha, cuendu xaun. Sehe cuihna cuví chuun. Ta cuñún sativun tandihí cha vaha. Ta tyicuan ri chasún ityi vaha Sutu Mañi yo. ¹¹ Ta vityin Sutu Mañi yo cutachi tuñi ra chuun, vatyí cunducuaun. Ta ma cuví nyehun ñuhú ñanyii suhva quívi —catyí ra Pablo chi ra Elimas.

Tyicuan ta caa cuhva ri cuan ta nducuaa ra. Ta ndoo ra nu ñaa iñi. Ta nducu ra noo ra tiin ndaha ra vatyí ña ndichin ca nyehé ra. ¹² Cuhva cha nyehe gobernador cuan cha cuví chi ra Elimas, chinq iñi ra chi ra Jesucristo. Vatyí iyo cuñi ra nyehe ra cha sañahá Sutu Mañi yo.

Cuahan ra Pablo ta ra Bernabé nya ñuu Antioquía ityi Pisidia

¹³ Ra Pablo ta ra tahan ra quihví ra chichi noo barcu ñuu Pafos. Ta cuahan coyo ra nya ñuu Perge ityi Panfilia. Soco ra Juan Marcos sandoo ra chi ra ta cuanuhu ra nya Jerusalén. ¹⁴ Yahá cuan ta caquita ra Perge cuan, ta cuahan coyo ra ñuu Antioquía cha nyaá ityi Pisidia. Yucuan quihví coyo ra chichi vehe ñuhu ñu Israel ta cuví chi noo quívi nyitatu ñu. Ta chicunyicu ra. ¹⁵ Tyicuan ta quichahá sacuahá ñáyivi nu libru ley cha tyaa ra Moisés. Ta sacuahá tucu ñu libru cha tyaa ra cacuví profeta Nyoo ta cha naha. Yahá cuan ta ra cacuví nuu vehe ñuhu catyí ra chi ra hermano nyicú cuan, vatyí tatu iyó noo tuhun cuñi ra cahan ra chihin ñáyivi,

cuví cahan ra. ¹⁶ Tyicuan ta ndicuitá ra Pablo ta sacuví ra noo seña chihin ndaha ra vatyí na cutaxin ñu. Ta catyí ra:

—Cuiñi ndo nyoho ra Israel, ta nyoho cha quichahá ndo chi Nyoo. ¹⁷ Nyoo cuenda yo, ñu Israel, nacachí vaha ra chi sutu chahnu yo. Ta quívi cha iyó ca ñu ityi Egipto sacuví ra noo ñuu cahnu chi ñu. Vasi ñima ñáyivi ñuu cuan cuví ñu, soco sanducuaaha ra chi ñu. Yahá cuan ta tava ra chi ñu ityi cuan chihin tunyee iñi chi ra. ¹⁸ Ta cunyee iñi Nyoo tandihí cuhva chiyo ñu nu chicá noo ñu ñuhú ityi chichi cha uvi xico cuiya. ¹⁹ Ta sanaa ra ucha tahan ñuu nahnu cha chiyo nicahnu Canaán, vatyí chahá ra ñuhú cuan chi sutu chahnu yo. ²⁰ Yahá cuan ta sacuví Nyoo vatyí cunyaca ñaha maa maa ri juez chí ñáyivi cuan. Tari noo cumi ciento sisava cuiya chinyaca ñaha juez chí ñu nyacua nya quívi chinyaca ñaha ra profeta Samuel chí ñu. ²¹ Tyicuan ta maa ñu chican ñu noo rey cha cunyaca ñaha chí ñu. Ta Nyoo chahá ra chí ra Saúl sehe ra Cis chí ñu, vatyí cunyaca ñaha ra chí ñu. Ta ra Saúl vachí ra tata ra Benjamín. Ta uvi xico cuiya chinyaca ñaha ra chí ñu. ²² Yahá cuan ta Nyoo tava ra chí ra Saúl cha cuví ra rey. Ta chahá ra vatyí cuví ra David rey. Ta catyí ra: “Nyehí vatyí ra David sehe ra Isaí cuví ra noo rayii cha tahan iñi cuhva iyó. Ta cusacuví ra tandihí cha cuñi yuhu”, catyí Nyoo

tuhun ra David. ²³ Ta minoo ra vachi tata ra David cuan ican cuví ra Jesús. Ta maa Nyoo tachí chi ra vatyí sacacu ra chi yo ñu Israel, tari catyí ra chi sutu chahnu yo. ²⁴ Ta cumañi ca quichi ra Jesús, ra Juan ra sacondutya chi ñáyiví cahán ra nuu tandihí ñáyiví Israel. Ta catyí ra chi ñu vatyí cuñí chi cha ndu uvi ñi ñu cuatyí ñu, ta condutya ñu. ²⁵ Ta cha cuandihí tyiño saha ra Juan ta catyí ra: “¿Atu cuñí maa ndo vatyí yuhu cuví noo ra cahnu cha saquichí Nyoo? Soco ñima yuhu cuví ra cahnu cuan. Vatyí chata cha yahá yuhu ta vachi nonga ra. Ta ni ndichan nyaá chaha ra ta ña nañé cha ndachi. Vatyí cahnu xaan ra cuví ra”, catyí ra Juan.

²⁶ 'Hermano —catyí ra Pablo— nyoho ñu vachi tata ra Abraham, ta nyoho cha quichahá ndo chi Nyoo. Cha cuenda nyoho cuví tuhun ihya tyi sañahá Nyoo chi yo yoso caa cacu añima yo.

²⁷ Ñáyiví ñuu Jerusalén ta ra cuví nuu chi ñu cuan, ña chitó ñu vatyí ra Jesús cuví ra cha sacacú chi yo. Ta ni ña cutuñí ñi ñu tuhun cha catyaa ra profeta Nyoo ta cha naha, vasi sacuahá vavaha ñu tuhun cuan tandihí quiví cha nyitatu ñu, soco ña cutuñí ñi ñu. Ta quiví chahñí ñu chi ra Jesús chingo cava tari cuhva catyí ra profeta Nyoo cuan. ²⁸ Vatyí vasi ñahri cuatyí ra nañihí ñu, soco chicán ñu chi ra Pilato na tyihi ra tyiño cucahñi chi ra. ²⁹ Ta cha

yahá sacuví ñu chi ra tari cuhva catyí maa tuhun ra nu libru Nyoo ta chihí ra. Tyicuan ta sanoo ñu chi ra nu cruzi. Ta tyihí ñu chi ra chichi ñuhú. ³⁰ Soco Nyoo sanandoto ra chi ra. ³¹ Ta chichi cha cuaha quiví tuví ra nuu ra cha quichi coyo chihin ra quiví quitá ra ityi Galilea, ta quichí ra Jerusalén. Ta ican ra cuan cacahán tuhun ra chihin ñáyiví vityin. ³² Ta yucuan chaha nyuhu cahán ndi tuhun vaha cha catyí Nyoo chi sutu chahnu yo vatyí cuhva ra chi yo. ³³ Vatyí cha cuenda cha vaha chi maa yo cha cuví yo ñáyiví vachi tata ñu cuan, sacuví maa Nyoo cha catyí ra. Vatyí sanandoto ra chi ra Jesús tari cuhva nyaá nu cu uvi salmo nu catyí Nyoo tyehe caa: “Sehi cuví chuun, ta yuhu chahí ñayiví coun vityin”, catyí Nyoo. ³⁴ Nyoo tyaa ra cuhva vatyí sanandoto ra chi ra, tacuhva cha ma tyahyu coño ñuhu ra. Vatyí catyí nu tutu Nyoo: “Cuhve chi nyoho cha vaha cha catyí chi ra David.” ³⁵ Yucuan chaha catyí tucu nu inga salmo tyehe caa. “Ma cuhvon cha tyahyu coño ñuhu Sehe iun”, catyí chi. ³⁶ Ra David sacuví ra tyiño nuu ñu cha chiyo quiví chiyo ra, yoso cuhva cha catyí Nyoo chi ra tyi sacuví ra. Yahá cuan ta chihí ra ta chicuchí ñu chi ra tari chicuchí ñu chi sutu ra. Ta tyahyu coño ñuhu ra. ³⁷ Soco ra cha sanandoto Nyoo chi, ña tyahyu coño ñuhu ra.

38 Yañi, cuñi chi coto ndo vatyí cha cuenda cha chihí ra Jesús tyiño nuu yo, Nyoo sahá ra ticahnu iñi cuatyí yo.

39 Ta cha cuenda ra Jesús sahá Nyoo ticahnu iñi chi tandihí ñu cha chinó iñi chi ra, tyi ley ra Moisés ña cuví sacuvaha chi yo nuu Nyoo. 40 Saha ndo cuenda coto ndoo siqui ndo cha catyaa ra profeta Nyoo nu catyí ra tyehe caa:

41 Nyehe nyoho, ra chacú nyaa, tahán chi cha iyo cuñi ndo ta cunaa ndo. Vatyí yuhu cuví Nyoo, ta sacuví minoo cha cahnu quivi cha iyó ndo vityin.

Soco ma chino iñi ndo tandihí cha sacuví yuhu vasi nacatyí ñáyivi chi ndo, catyí Nyoo.

42 Ndihi cahan ra Pablo ta cuaquita ra chata vehe ñuhu cuan chihin ra tahan ra. Tyicuan ta ñu cha ñima ñu Israel cuví quichaha catyí ñu chi ra, vatyí na cahan tucu ra tuhun ihya chihin ñu inga vitya quivi cha nyitatu ñu.

43 Cuhva cha ndihí ndu in ri ñu, cuaha xaan ñu Israel ta ñu cha yihí cuenda ñu Israel, cachinyicon ñu chi ra Pablo ta chi ra Bernabé. Ta chaha ra tuhun chi ñu vatyí na cahun ca ñu ityi nuu ca chihin Nyoo. Ta naquehen vaha ñu tumañi iñi cha chahá Nyoo chi ñu.

44 Cha inga vitya quivi nyitatu ñu, ndu in ri ñu. Ta cha yatyin cha tandihí ñáyivi ñuu cuan ndu in ri ñu vatyí cuiñi ñu tuhun Nyoo. 45 Soco cuhva cha canyehe ra Israel, cuxaan ra vatyí nyehe ra vatyí

cuaha ñáyivi nyicón chi ra cuan. Ta quichaha cacuvi yuhu ra chihin ra Pablo, ta cacahan ra chi ra. 46 Soco ña yuhví ra Pablo ta ra Bernabé. Ta quichaha cacatyí ra chi ra:

—Cuñi chi cha cahan xihna ndi tuhun Nyoo chihin nyoho cha cuví ndo ñu Israel. Soco ña cuñi ndo naquehen ndo. Ta cuñi maa ndo vatyí ña naña ndo cha ñihi ndo ñáyivi chaa cha ma naa ca maa. Yucuan chaha cahun ndi cacahan ndi chihin ñu cha ñima ñu Israel cuví. 47 Vatyí tyicuan caa tachí Sutu Mañi yo chi ndi ta catyí ra tyehe caa:

Tyai chuun tari ñuhu chi ñáyivi nicahnu ñuhu ñáyivi.

Tacuhva vatyí cusañahun ityi chi ñu yoso caa cacu añima ñu, catyí Nyoo.

48 Cuhva cha cachiñi ra cha ñima ra Israel cuví, ndusiñi cuñi ra. Ta quichaha catyí ra vatyí tuhun Nyoo vaha xaan. Ta nachino iñi tandihí ñu cha nacachi maa Nyoo chii, vatyí coo ñu ñáyivi chaa cha ma naa ca maa. 49 Ta tyicuan caa chitya tuhun Nyoo tandihí ityi ñuu cuan. 50 Soco ra Israel cacahan ra chihin suhva ñusiñi tyayii cha nyicón ley ra Moisés. Catyí ra chi ñu vatyí ña vaha tuhun cahan ra Pablo. Ta cahan tucu ra chihin ra cuví nuu chi ñuu cuan. Ta yucuan cuvi nu quichaha chica nyicon ñu chi ra Pablo ta chi ra Bernabé, nyacua nya cha tava ñehe ñu chi ra ñuu cuan. 51 Tyicuan ta canaquisi ra ñiyaca chaha ra tari noo seña vatyí ndoo cuatyí ñáyivi

cuan siqui maa ñu. Ta cuahan coyo ra ñuu Iconio. ⁵² Soco ñu yihí cuenda Nyoo ñuu Antioquía cuan sii xaan cacuví chi ñu. Ta tyitu ñu chihin Tatyí Ii.

14

Nu ñohó ra Pablo ta ra Bernabé ñuu Iconio

¹ Ñohó ra Pablo ta ra Bernabé ñuu Iconio. Ta caquihvi ra chichi vehe ñuhu ñu Israel. Ta vaha xaan cacahan ra tuhun Nyoo chihin ñáyivi.

Ta cuaha xaan ñu nachino iñi ñu chi ra Cristo, ñu Israel ta ñu cha ñima ñu Israel cuví ñandihí. ² Soco ra Israel cha ña chinó iñi chi ra Cristo catiyuhú ra chi ñu cha ñima ñu Israel cuví vatyí caca ña vaha iñi ñu nyehe ñu chi ra yihí cuenda ra Cristo.

³ Yucuan chaha ra Pablo ta ra Bernabé candoo ra yucuan cuaha quivi. Ta chihin chani iñi ra cacahan ra tuhun ra Cristo. Ta chinó xaan iñi ra chi Sutu Mañi yo. Ta Sutu Mañi yo tyinyee ra chi ra cha cacahan ra tuhun ra yoso caa cuñí ra chi yo. Ta chaha Sutu Mañi yo cha casacuví ra seña ta milagru tacuhva coto ñáyivi tyi ndicha cha cahan ra. ⁴ Soco ñáyivi ñuu, ña ñin ri cuví ñu. Yihí ñu cuahan ñu tumañi iñi chi ra Israel. Ta inga tucu ñu cuahan ñu tumañi iñi chi ra apóstol.

⁵ Tyicuan ta ra Israel ta ra cha ñima ra Israel cuví, catyihí tahan ra tuhun chihin ra cuví tyiño, vatyí cahan ña vaha ra siqui ra, ta catuchí ra yuu chi ra. ⁶ Soco ra Pablo ta ra Bernabé ñihí ra tuhun vatyí cusacuví ra tyicuan caa, ta

cuahan coyo ra nya ñuu Lистра, ta nya ñuu Derbe ityi Licaonia. Ta cachicā noo ra ityi cuan. ⁷ Ta cacahan tucu ra tuhun Nyoo yoso caa sacacu ra añima yo.

Nu cañi ñáyivi yuu chi ra Pablo nya ñuu Lистра

⁸ Nya Lистра iyó noo rayii cha pehe chaha. Ta nya ndaha cacu ra ta ña cuví caca ra. Vatyí pehe ninduvi chaha ra. ⁹ Ta suri maa ra pehe chaha cuan tyasohó vavaha ra nu cahan ra Pablo. Ta ra Pablo, tuví iñi ra vatyí chinó iñi ra cuan vatyí cuví nduvaha ra. ¹⁰ Tyicuan ta ra Pablo cahan ra chihin cha chaa ndusu ra, ta catyí ra:

—Nícuinanyaa ndoo
—catyí ra Pablo chi ra.

Ta ra cuan, noo ri caña ndava ra, ta nícuinanyaa ra. Ta quichaha chica ra. ¹¹ Cha nyehé ñáyivi cha sacuvi ra Pablo, quichaha cana chaa ñu chihin sahan Licaonia, ta catyí ñu:

—Nyoo cha tari caá rayii cha coyo nu nyicú yo —catyí ñu.

¹² Ta catyí ñu tyi ra Bernabé cuví ra noo nyoo cha nañi Júpiter, ta ra Pablo cuví nyoo cha nañi Mercurio, vatyí ican ra cuví ra cahan. ¹³ Ta iyó noo tata sutu cuenda Júpiter cuan, saha cumí ra vehe ñuhu cha nyaá yuhu ñuu ri cuan. Ta quichí nyaca ra toro ta ita vatyí maa ra ta ñáyivi cuñí ñu sacahnu ñu chi ra Pablo ta chi ra Bernabé. Ta cuacahñi ñu toro tyi cuacuhva cuenda ñu chi ra, vatyí cuñí ñu tyi nyoo

cacuví ra. ¹⁴ Soco cuhva cha catuví iñi ra apóstol, ra Bernabé ta ra Pablo, cha chicá xiñi ñu, quichahá chahnya ra sahma ra. Ta casacuví ra tyicuan caa tari noo seña vatyí ña ndoó ra vaha. Ta quihví coyo ra mahñu nu tuvi ñáyivi, ta cacana chaa ra, ¹⁵ ta catyí ra:

—Nyoho tata, ¿ñáá tuhun cha nyacuví ndo tyehe caa? Nyuhu rayi ri cuví ndi tari maa ndo. Ta vachi ndi vatyí catyí ndi chi ndo vatyí na saña ndo cha sacuvi ndo tyehe caa. Vatyí ña chiñuhu maa cha tyehe caa. Ta na cunyicon ndo chi Nyoo nyitó. Vatyí ican ra savaha andivi ta ñuhu ñayivi. Ta savaha ra tyañuhu ta tandihi cha iyó chichi tyañuhu cuan. ¹⁶ Ta tyiembu chahnu ta nya vityin, Nyoo saña ndaha ra chi ñáyivi na sacuvi maa ñu yoso cuhva cuñi ñu, ¹⁷ vasi tyicuan ri sañahá ra chi ñu yóó ra cuví ra, chihin cha vaha cha sacuví ra. Maa ra sacoón ra savi nu canyicú yo. Chahá ra cha vaha coo tyiño saha yo quivi tahan chi. Ta chahá ra cachi yo. Ta chahá ra cha cusii cuñi añima yo —catyí ra Pablo chi ñu.

¹⁸ Soco vasi catyí ra tyicuan caa, yii xaan ta chasi ra cha cahñi ñu toro cuan, vatyí cuñi ñu sacahnu ñu chi ra chihin cuan.

¹⁹ Tyicuan ta chaá coyo suhva ra Israel, ra ña chinó iñi chi ra Cristo, ra ñuu Antioquía, ta ra ñuu Iconio. Ta tyiyuhu ra chi ñáyivi, ta catyí ra vatyí na tuchi ñu yuu

chi ra Pablo. Ta tyicuan caa sacuvi ñu. Ta cuñi maa ñu vatyí cha chihí ra. Ta xita quiñoho ñu chí ra ityi chata ñuu. ²⁰ Soco candu iin ri ra cayihí cuenda Nyoo nu catuví ra Pablo. Ta ndicuita ri ra. Ta quihví ra inga chaha chichi ñuu. Ta cha inga quivi cuahan ra ñuu cha nañi Derbe ta cuahan ra Bernabé chihin ra.

²¹ Ta cahán tucu ra tuhun Nyoo nya ñuu Derbe yoso caa sacacu Nyoo añima yo. Ta cuaha ñáyivi nacuhva ñu chi ñu chi Nyoo. Yaha cuan ta cuanuhu coyo ra ityi quichi ra. Ta yaha ra ñuu Listra ta ñuu Iconio inga chaha, ta nachaa ra nya Antioquía. ²² Ta tandihi ñuu cuan sandunii ca ra iñi ñu yihí cuenda Nyoo. Ta catyí ra chi ñu na cuhun ñu ityi nuu ca chihin cha chino iñi ñu Nyoo. Ta catyí tucu ra chi ñu vatyí tatu cuñi yo cha cunyacá ñaha Nyoo chi yo, cuñi chi cha nyehe yo tindoho. ²³ Ta canatyiso ra chi ra ca quihí ndaha chí ñu yihí cuenda Nyoo noo noo vehe ñuhu. Ta cananducu ra Nyoo chihin cha ña chachí ra xita ta cachican tahvi ra chi Nyoo cha cuenda ra. Yaha cuan ta catyí ra chi ra:

—Chino iñi ndo chi Sutu Mañi yo. Maa ra na cocumi ra chi ndo —catyí ra chi ra.

Nu cuanuhu coyo ra Pablo ta ra Bernabé Antioquía ityi Siria

²⁴ Yaha cuan ta yaha coyo ra Pablo ta ra Bernabé ityi Pisidia, ta chaá coyo ra ityi

Panfilia. ²⁵ Cacaḥan ra tuhun Nyoo ñuu Perge. Yaha cuan ta chahaḥan ra ñuu Atalia. ²⁶ Yucuan quihvi coyo ra chichi noo barcu ta cuanuhu coyo ra Antioquia. Yucuan cuví ñuu nu natyaa ñu chi ra ndaha Nyoo tyi cusacuvi ra tyiño nuu ra, ta vityin cha nachaa coyo ra. ²⁷ Cuhva cha nachaa coyo ra Antioquia sandu in ri ra chi ñu yihí cuenda Nyoo. Ta nacatyí ra chi ñu tandihí cha sacuvi Nyoo chihin ra. Ta yoso caa nuña Sutu Mañi yo ityi vatyí chinó tucu iñi ñu cha ñima ñu Israel cuví. ²⁸ Ta naha xaan ndoo ra Pablo ta ra Bernabé chihin ñu yihí cuenda Nyoo ñuu cuan.

15

Nu casandaa ra apóstol tyiño nya Jerusalén

¹ Nyaá ca ra Pablo ta ra Bernabé Antioquia, ta cha coyo ra quitá coyo ityi Judea. Ta quichaha sañahá ra chi ra yihí cuenda Nyoo. Ta catyí ra vatyí cuñí chi sacuvi ra costumbre circuncisión tari kuhva catyí ra Moisés, tyicuan ta cacu ra. ²⁻³ Ta ñihi xaan caḥan ra Pablo ta ra Bernabé chihin ra cuan cha cuenda cuan. Tyicuan ta catyiso ñu hermano Antioquia cuan chi ra Pablo ta ra Bernabé chihin suhva ca ra vatyí cahun coyo ra Jerusalén. Vatyí cusandaa ra tyiño ihya chihin ra apóstol ta ra yihí ndaha ñu nyicu vehe ñuhu ñuu Jerusalén cuan. Tyicuan ta cuahan coyo

ra. Ta ityi cuahan ra, yaha ra ityi Fenicia ta Samaria. Ta canacatyí ra chi ñu yihí cuenda Nyoo yoso caa sañá ñu cha ñima ñu Israel cuví tuhun chahnu cha chingo iñi ñu. Vatyí nacuhvá cuenda ñu chi ñu chi Nyoo. Ta tandihí ñu hermano cusí xaan cuñí ñu cha chitó ñu tuhun cuan.

⁴ Quivi cha coyo ra Pablo ta ra Bernabé Jerusalén, cuahan ra nu ndu in ri ñu yihí cuenda Nyoo. Ta tandihí ñu chihin ra apóstol, ta ra yihí ndaha chi ñu, chaha ñu lugar chi ra. Ta canacatyí ra tandihí cha sacuvi Nyoo chihin ra. ⁵ Soco suhva ra fariseo cha cachinó iñi chi ra Cristo, nicuinanya ra ta catyí ra:

—Tandihí ra cha ñima ra Israel cuví ta chinó iñi ra chi ra Jesús, niñi cuñí chi cha sacuvi ra costumbre circuncisión. Ta cuñí tucu chi cha sacuvi ra kuhva catyí ley cha tyaa ra Moisés —catyí ra.

⁶ Tyicuan ta candu in ri apóstol ta ra yihí ndaha chi ñu vehe ñuhu vatyí candatuhun vaha ra tuhun cuan. ⁷ Cha yaha cha cuviyuhu vavaha ra ta ndicuita ra Pedro, ta catyí ra:

—Yañi, chitó ndo vatyí chichi cha tandihí yo cachí Nyoo chi yuhu ra ndahvi quivi cuan, vatyí cahin tuhun yoso caa cacu aña yoy chihin ñu cha ñima ñu Israel cuví, vatyí nachino iñi ñu chi Sutu Mañi yo. ⁸ Ta Nyoo, ra chitó aña tandihí ñáyivi, sañaha ra chi yo vatyí cuñí ra chi ñu cuan. Ican tuhun chaha ra Tatyí Ii ra chi ñu, tari chaha

ra chi yo. ⁹ Nyoo ña sahá ra tyi vaha ca yoó cha nuu ñu cuan. Soco sanduvií tucu ra añima maa ñu cha cuenda cha chinó iñi ñu chi ra. ¹⁰ Vityin ñacaca xiñi yo cuhva cuñi Nyoo. Vatyí ña vaha cha tyisó yo ley ra Moisés siqui ñu. Vatyí ñiri maa sutu chahnu yo ta ñiri maa yo ta ña cuví naquehen vaha yo ley cuan. ¹¹ Ñima tyicuan caa cacú yo. Yoó chitó yo vatyí cacú yo chihin tumañi iñi cha sacuví Sutu Mañi yo Jesús chihin yo. Ta tyicuan caa tucu ñu cuan —catyí ra Pedro chi ra.

¹² Tyicuan ta taxi ri cacuvi tandihí ra. Ta tyasohó ra tuhun cahan ra Bernabé ta ra Pablo. Vatyí canacatyí ra seña ta milagru cha sacuvi Nyoo nu cacahan ra tuhun Nyoo nu nyicú ñu cha ñima ñu Israel cuví. ¹³ Cuhva cha ndihí cahan ra, quichaha cahan ra Jacobo, ta catyí ra:

—Nyoho yañi, cuiñi ndo tuhun cahín. ¹⁴ Cha nacatyí ra Simón Pedro chi yo yoso caa quichaha chaha Nyoo tumañi iñi chi ñu cha ñima ñu Israel cuví. Vatyí cachí tucu ra chi suhva ñu vatyí cuví ñu noo ñáyivi cuenda ra. ¹⁵ Ta ñiri nanduvi tuhun ihya chihin tuhun cha cahan ra profeta cuenda Nyoo ta cha naha, tari cuhva nyaa nu tutu Nyoo tyehe caa:

¹⁶ Yaha tandihí tuhun ihya cuquichi tiqui nu nyaá ndo.

Quivi chiyo ra David, vaha sacahnu ñáyivi chii.

Soco yaha cuan sandihí ñu tuhun cha sacahnu ñu chii.

Soco cuquichi tiqui ta tari cha cunacoñehi vehe ñuhu ra David inga chaha.

Vatyí cusacahnu tucu ñáyivi chii.

¹⁷ Tacuhva cuví nanducu tandihí ca ñáyivi chii, tandihí ñu cha ñima ñu Israel cuví cha chicán tahvi chihin sivi.

¹⁸ Tyicuan caa catyí Sutu Mañi yo ta sañaha ra tuhun ihya chi ñáyivi chiyo ta cha naha ta chi ñáyivi cha iyó vityin.

¹⁹ Yucuan chaha catyí yuhu vatyí ña vaha sayanga yo chi ñáyivi cha ñima ñu Israel cuví cha sandoo ñu tuhun cha chiyo ñu ta quihvi ñu cuenda ra Cristo. Ña vaha catyí yo tyi cuñi chi cha quichaha ñu ley chahnu.

²⁰ Vaha ri maa chihin cha sacuhun yo tutu chi ñu. Ta catyí yo chi ñu vatyí ma cachi ñu coño cha chaha cuenda ñáyivi chi xitohyo. Ta ni noo ñu ta ma coo ri maa ñusihí o rayií chi ñu, tatu ñima ñasihí o yíi ñu cuví. Ta ma cachi ñu coño quiti chihí cha cava ñu sucun ta ña chati niñi. Ta ma cachi ñu niñi. ²¹ Vatyí nyata tyembu ta chiyo ra cha sañahá ley ra Moisés vehe ñuhu ñu Israel ta sañaha ra tuhun cuan tahan tahan ñuu. Ta tahan uña quivi quivi nyitatú ñu, sacuaha ra tuhun cha tyaa ra Moisés —catyí ra Jacobo chi ra.

²² Tyicuan ta ra apóstol ta ra cayihí ndaha chí ñu ny-

icú vehe ñuhu chihin tandihi ñu yihí cuenda Nyoo nacachí ñu chi suhva ra. Ta yaha cuan ta tachí ñu chi ra vatyí cuhun ra Antioquía chihin ra Pablo ta ra Bernabé. Ta ra cha canatyisó ñu ican cuví ra Judas cha nañí Barsabás, ta ra Silas. Ican ra cacuví ra ra cananyisó tyiño vehe ñuhu ñuu Jerusalén cuan. ²³ Ta chihin ra tachi ñu noo carta. Ta catyí carta cuan tyehé caa:

“Nyuhu ra apóstol, ta ra yihí ndaha chi ñu nyicú vehe ñuhu ta yañi ndo cuenda Nyoo, tandihi ri ndi chahá ndi nocumi chi nyoho cha ñima ra Israel cuví ndo vatyí yañi ndi cuví chi ndo vasi ñima ñu Israel cuví ndo. Tandihi ri ndo cha iyó ndo Antioquía ta nyoho ñu Siria, ta ñu Cilicia ñandihí, sacuhún ndi carta ihya chi tandihi ri ndo. ²⁴ Chitó ndi vatyí quita suhva ra ityi nu nyicú ndi ihya. Ta cuahan ra nu nyicu ndo. Soco ña catyí nyuhu chi ra tyi cuhun ra cusayanga ra chi ndo chihin tuhun cahan ra. Satondo ra cuan xiñi ndo vatyí catyí ra chi ndo tyi cuñí chi cha sacuví ndo costumbre circuncisión ta naquehen vaha ndo ley ra Moisés. Soco ñima nyuhu catyí tyi cuhun ra cucatyí ra chi ndo tyicuan caa. ²⁵ Yucuan chaha ndu ñin ri ndi ta nacachí tahan tuhun cahan ndi ta vaha cuñi ndi cha tachi ndi chi ra hermano ihya chihin ra Pablo ta ra Bernabé nu nyicu ndo. ²⁶ Nduvi tahan ra ihya nyehé xaan ra tindoho cha cuenda Sutu Mañi yo. Ta vasi

cuñí ñáyivi cahñi ñu chi ra soco ña sandihí ra tuhun cha sacoto ra tuhun Sutu Mañi yo Jesucristo. ²⁷ Ta yucuan chaha tachí ndi chi ra Judas ta chi ra Silas. Ta maa ra cucahan ra chihin yuhu ra chihin ndo, vatyí nacatyí ra tandihí cha tyaa ndi nu tutu ihya. ²⁸ Vatyí niri Tatyí Ii ta niri nyuhu ta ña cuñí ndi tyiso ca ndi carga siqui ndo, soco ihya ri cha niñi ca tahán chi cha naquehen vaha ndo. ²⁹ Ma cachi ndo coño cha chaha cuenda ñu chi xitohyo. Ta suri ma cachi ndo niñi, ni coño quití cha chihí ta ña chatí niñi ti. Ta ma coo ñusihí o rayi chi ndo tatu ñima ñasihí ndo o yí ndo cuví. Tatu ma sacuvi ndo tyicuan caa, vaha xaan cuacoo ndo. Ta Nyoo na cocumi ra chi ndo”, catyí ra nu carta cuan.

³⁰ Ta cuahan coyo ra cha catachi ra chi cuan. Ta chaa coyo ra Antioquía. Ta sandu ñin ri ra chi tandihí ñu, ta nacuhva cuenda ra carta cuan. ³¹ Cuhva cha sacuhá ñu carta cuan ndusi xaan cuñí ñu vatyí vaha xaan cahán chi. ³² Ta ra Judas ta ra Silas cuví tucu ra cuan profeta cuenda Nyoo. Ta sanduní ra iñi ra hermano chihin tuhun cahan ra. ³³ Ta cha yaha chinyicu ra cuan suhva quivi ta cuanuhu coyo ra nya nu nyicú ñu catachi chi ra. Ta tandihí ñu yihí cuenda ra Cristo catyí ñu vatyí na cuhun vaha ra. ³⁴ Soco ra Silas natyaa ra cuhva vatyí cundoo ra. ³⁵ Ta ra Pablo ta ra Bernabé candoo tucu ra Antioquía yucuan. Ta maa ra

chihin cuaha ca ra casañaha ca ra chi ñáyivi. Ta cacahan ca ra tuhun Sutu Mañi yo chihin ñu.

Nu cu uvi chaha cuahan ra Pablo tuhun Nyoo ta nu cusin ra chihin ra Bernabé

³⁶ Ta cha yaha suhva quivi ta catyí ra Pablo chi ra Bernabé:

—Coho inga chaha cunyehe yo nu nyicú ñu yihí cuenda ra Cristo tandihí ri ñuu nu cahan yo tuhun Sutu Mañi yo. Vatyí nyehe yo yoso caa canyicu ñu —catyí ra chi ra.

³⁷ Ta ra Bernabé cuñí ra cha cahun tucu ra Juan Marcos chihin ra. ³⁸ Soco ra Pablo ña tahn iñi ra cha cahun ra Juan chihin ra, vatyí sandoq ra chi ra nya Panfilia quivi cuan. Ta ña chahan ca ra chisaha tyiño ra chihin ra.

³⁹ Ta ña chitahan iñi ni noo ra, ta cacusin ra. Ra Bernabé cuahan ra chihin ra Juan Marcos. Ta quihvi ra chichi noo barcu ta cuahan coyo ra Chipre. ⁴⁰ Ta ra Pablo cachí ra chi ra Silas. Ta cha yaha chican tahvi ra hermano chí Nyoo na tyinyee ra chi ra, ta cuahan coyo ra. ⁴¹ Ta yaha ra ityi Siria, ta ityi Cilicia, ta sanduní ca ra iñi ñu yihí cuenda Nyoo noo noo ñuu.

16

Nu cuahan ra Timoteo chihin ra Pablo ta ra Silas

¹ Ra Pablo ta ra Silas chaq coyo ra ñuu Derbe, ta ñuu Listra. Ta yucuan nañihí ra chi noo ra yihí cuenda Cristo. Nañí ra Timoteo. Ta sihi ra cuví ña noo ñaha Israel. Ta

suri yihí tucu ña cuenda ra Cristo. Soco sutu ra ra Grecia cuví ra. ² Vaha xaan chicá ra Timoteo chihin Nyoo catyí ñu yihí cuenda Cristo ñuu Listra ta ñuu Iconio. ³ Ta ra Pablo cuñí ra cha cahun ra Timoteo chihin ra. Ta saha ra circuncidar chi ra Timoteo. Vatyí coto ma cuiñi ñu Israel cha iyó ityi cuan tuhun ra Cristo cha cahan ra. Vatyí tandihí ñu chitó ñu vatyí sutu ra cuví ra ra ñuu Grecia. ⁴ Tyicuan ta cuahan coyo ra noo noo ñuu. Ta nacatyí ra chi ñu yihí cuenda ra Cristo tuhun cha chaha ra apóstol ta ra yihí ndaha chí ñu nyicu vehe ñuhu Jerusalén chi ra. ⁵ Ta tyicuan caa ta nduní ca iñi ñu yihí cuenda ra Cristo ta chino ca iñi ñu chí Nyoo. Ta tahan quivi ta cuahan nducuaha ca ñu.

Nu nyehé ra Pablo noo visión chí noo ra Macedonia

⁶ Ña chaha Tatyí Ii cha cahan ra tuhun Nyoo ityi Asia. Yucuan chaha yaha sava ra ityi Frigia nu iyó xahñi ñuhu chihin ityi Galacia. ⁷ Ta chaq coyo tucu ra ityi Misia. Ta cuñí tucu ra cahun coyo ra ityi Bitinia, soco Tatyí Ii ra Jesucristo ña chaha cahun coyo ra. ⁸ Tyicuan ta nya sava ri yaha ra ñuu Misia ta canoq coyo ra ñuu Troas cha nyaá yuhu tyañuhu. ⁹ Cañohó ra ñuu Troas cuan, ta noo cha cuaa nyehe ra Pablo noo visión. Nyehe ra chi noo rayí ityi Macedonia. Nanyaá ra ta chacú ndahvi ra nuu ra, ta catyí ra chi ra: “Ñaha,

vatyí tyinyeun chi ndi”, catyí ra. ¹⁰ Ta cha nyehe ra Pablo visión cuan, yuhu ra Lucas chihin ra Pablo ta inga ra sanduvaha ndi chi ndi ta cuahan ndi nya Macedonia cuan. Vatyí chitó vaha ndi vatyí Nyoo cana chi ndi, vatyí cahan ndi tuhun ra yoso caa sacacú ra ańima yo chihin ñáyivi ityi cuan.

Nu ñohó ra Pablo ta ra Silas ñuu Filipos

¹¹ Quihvi ndi noo barcu ñuu Troas. Ta chahan ndoo ityi ri ndi nya Samotracia noo ñuhú luhlu iyó mahñu tyañuhu. Ta cha inga quivi cha ndi ñuu Neápolis. ¹² Ta yucuan quita ri ndi ta cuahan ndi ñuu Filipos cha cuví noo ñuu cuenda ñu Roma. Ta cuví chi noo ñuu cahnu ca cha nuu tandihi ñuu ityi Macedonia cuan. Ta yucuan chinyicu ndi suhva quivi. ¹³ Noo quivi cha nyítatu ñáyivi ta quita ndi ityi chata ñuu, yatyin noo yutya nu tuhvá ñu chican tahvi ñu chi Nyoo. Chicunya ndi yucuan ta cahan ndi tuhun Nyoo chihin ñusihi cha candu in ri yucuan. ¹⁴ Noo ñaha nańi ña Lidia. Ta ñuu ña cuví Tiatira. Ta tuhvá ña xico ña sahna finu, tyacu nyaa. Yucuan cuví tyiño sahá ña. Ta sacahnú ña chi Nyoo tari ñu Israel. Ta chińi ña cha cahán ra Pablo. Ta Nyoo nuña ra ańima ña na quichaha ña cha cahan ra. ¹⁵ Ta condutya ña chihin ñáyivi chi ña. Ta yaha cuan ta chacu ndahvi ña nuu ndi, ta catyí ña:

—Tatu nyehé ndo vatyí ndicha cha chinó ińi chi Sutu Mańi yo, ñaha ndo, coo ndo vehi —catyí ña chi ndi.

Ta sanińi ña chi ndi cha ndoo ndi vehe ña.

¹⁶ Ta cuví noo chaha cha cuahan ndi nu chicán tahvi ndi. Ta cha niri ca cha cuahan ndi, tahan ndi chi noo ñaha tyivaa. Yihí noo tatyí ña vaha chi ña. Yucuan chaha cuví nacoto ña ñáá ndihi cha cucuvi ityi nuu. Ta cuví ña noo ñaha iyó chitoho. Ta cuaha xaan xuhun sahá ganaa ña cuenda chitoho ña, vatyí cuví nacotó ña. ¹⁷ Ta ñaha tyivaa cuan quichaha nyicon ña chi ndi, ta chi ra Pablo ñandihí. Ta cana chaa ña ta catyí ña:

—Rayi ihya ra casacuví tyiño nuu Nyoo cahnu cuví ra. Ta cahán ra tuhun yoso caa cuví cacu ańima yo —catyí ña.

¹⁸ Cuaha quivi sacuvi ñaha tyivaa cuan tyicuan caa. Tyicuan ta ra Pablo ña cunye ca ińi ra, ta nanyocava ra ta catyí ra chi tatyí ña vaha cha yihí chi ña:

—Chihin sivi ra Jesucristo catyí chuun vatyí quiton chi ñaha tyivaa ihya —catyí ra.

Ta tatyí ña vaha cuan quita chi chi ña caa cuhva ri cuan.

¹⁹ Soco cuhva cha canyehe chitoho ña vatyí ma cuví ca saha ganaa ra xuhun chihin ña, catiın ra chi ra Pablo ta ra Silas chinyaca ra chi ra nya vehe tyiño. ²⁰ Ta cachican ra cuatyí chaha ra nuu ra cacuvi tyiño. Ta catyí ra:

—Ra Israel ihya sanaquiquí ra chi ñáyivi ñuu yo. ²¹ Ta

sañahá ra costumbre cha ña cuví naquehen yo, ñiri ña cuví sacuvi yo vatyí ñu cuenda ñuu Roma cuví yo —catyí ra.

²² Tyicuan ta nduxaḥan ñáyivi chi ra Pablo ta ra Silas. Ta ra cacuví tyiño cuan chahnya ra sahma ra Pablo ta ra Silas ta tachí ra tyiño nacañi ra chi ra chihin yutun. ²³ Cha yahá cha cañi vavaha ra chi ra, ta catyihí ra chi ra vehe caa. Ta tachí ra chi ra sahá cumi chi ra na saha vaha ra cuenda chi ra. ²⁴ Cuhva cha quehen ra sahá cumi cuan tuhun, tyihí ra chi ra nya chichi cuii vehe caa. Ta tyihí vaha ra chaha ra ticu vitu. ²⁵ Soco ñáa cuhva hora ñuu cuan cachitá vavaha ra Pablo ta ra Silas. Ta cachicán tahvi ra chi Nyoo. Ta ra cañohó vehe caa cuan catyasohó ra. ²⁶ Ta saná iñi ra ta quichí noo cha taan ñihi vavaha. Ta naquisi chi cimientu vehe caa cuan, ta caa cuhva ri cuan nuña tandihi yuvehe, ta ndachi cadena tandihi ra ñohó vehe caa cuan. ²⁷ Ta cha ndoyo ra sahá cumi cuan, nyehe ra vatyí tacoho yuvehe. Tyicuan ta tava ra mityi ra vatyí cahñi maa ra chi ra. Vatyí chicá xiñi ra vatyí ndihi ra ñohó vehe caa cuan cachino. ²⁸ Soco ra Pablo cana chaa ra chi ra, ta catyí ra:

—Ma cahñun chuun, vatyí tandihi ndi nyicú ndi ihya —catyí ra chi ra.

²⁹ Tyicuan ta ra sahá cumi cuan chicān ra noo ñuhū. Ta quicono ra quihvi ra nu

cañohó ra. Ta ñihí ra chihin cha yuhví ra. Ta chicuiñi chiti ra nuu ra Pablo ta ra Silas. ³⁰ Numi ri tava ra chi ra nu ñoho ra yucuan. Ta ndacá tuhun ra chi ra ta catyí ra:

—¿Nyoho Tata, yoso caa sacuvi ta cacu añime? —catyí ra chi ra.

³¹ Ta ra cuan canacahan ra ta cacatyí ra:

—Chino iñi chi Sutu Mañi yo Jesucristo ta cacun, maun ta ñáyivi chuun ñandihí —catyí ra.

³² Ta cacahan ra tuhun Sutu Mañi yo chihin ra ta chihin tandihi ñu nyicu vehe ra. ³³ Ta suri maa cha cuaa cuan ra sahá cumi vehe caa cuan nacatya ra nu cahvi chi nduvi tahan ra nu cañi ra chi ra. Yahá cuan ta maa ra ta tandihi ñáyivi chi ra condutya ñu suri cha cuaa cuan. ³⁴ Tyicuan ta chinyaca ra chi ra nya vehe ra. Ta chaha ra cha cachi ra. Ta maa ra chihin ñáyivi chi ra sii xaan cuñi ñu vatyí chinó iñi ñu chi Nyoo. [Tyicuan ta cuanuhu coyo ra nya vehe caa cuan coto cuxaan ra cuví tyiño chihin ra saha cumi chi ra.]

³⁵ Tuví inga quivi ta catachí ra cacuví tyiño chi policia nu nyaá ra sahá cumi cuan, ta catyí ra vatyí na saña ra chi ra Pablo. ³⁶ Tyicuan ta ra sahá cumi vehe caa cuan catyí ra chi ra Pablo:

—Chaa tyiño chii saha ra cuví tyiño, vatyí sañe chi ndo. Ican tuhun cha cuví quita ndo vityin —catyí ra chi ra.

³⁷ Soco ra Pablo catyí ra:

—Chi nyuhu cha cuví ndi ra cuenda ñuu Roma ican cañi ra nu tuvi. Ta ni ña cutuñi chi ndi tari cuhva tahán chi. Ta tyihí ra chi ndi vehe caa. Ta vityin cuñi ra saña xehe ra chi ndi. Soco ma cuví. Naquichi tava maa ra chi ndi —catyí ra Pablo chi ra sahá cumi cuan.

³⁸ Ta ra policia nacatyí ra chi ra cacuví tyiño. Ta ra cuan cayuhvi ra cuví cha cachitó ra vatyí ra cuenda ñuu Roma cuví ra Pablo. ³⁹ Ta chahān coyo ra chinandacān ra tīcāhnu iñi chi ra Pablo ta chi ra Silas. Tyicuan ta catava ra chi ra ta cachacu ndahvi ra nuu ra na quitā ra ñuu cuan. ⁴⁰ Ta cha quitā coyo ra vehe caa, chahān coyo ra vehe cu Lidia. Ta yahā cuan ta chinyehē ra chi ra hermano ta sandunī ra iñi ra ta cuahan coyo ra.

17

Nu naquiqui ñáyivi ñuu Tesalónica

¹ Nu cuahan coyo ra Pablo ta ra Silas, cayahā coyo ra ñuu Anfīpolis, ta ñuu Apolonia. Yahā cuan ta chaā coyo ra ñuu Tesalónica nu nyaá noo vehe ñuhu ñu Israel. ² Ta chahān ra Pablo vehe ñuhu cuan tari cuhva tuhva maa ra chahán noo noo ñuu. Ta cahān ra tuhun Nyoo chihin ñáyivi chichi vehe ñuhu cuan uñi tahan quivi nyitatú ñu. ³ Quehēn ra libru tuhun Nyoo ta sañahā ra tuhun ra Cristo chi ñu yoso caa catyí chi vatyí cunyehe ra tīndoho ta cucúvi ra. Yahā cuan cunandoto ra. Ta catyí ra chi ñu vatyí

suri maa ra Jesús cha cahán ra tuhun chihin ñu cuví ra Cristo.

⁴ Ta suhva ñáyivi Israel cuan nachino iñi ñu. Ta candu iñ ri ñu chihin ra Pablo ta ra Silas. Ta cachino tucu iñi cuaha ñu Grecia cha sacahnú chi Nyoo. Ta cuaha ñusihi tyayī ñuu cuan ñandihī. ⁵ Soco ra Israel cha ña chinó iñi, quiñi cacuñi ra cha nyehé ra vatyí nyicón ñáyivi chi ra Pablo. Ta sandu iñ ri ra chi noo ityi ra quiñi iyó cha cachicá noo yanga ri maa. Ta sanaquiqui ra ñuu cuan. Ta quihvi ra vehe ra Jasón, nanducú ra chi ra Pablo ta chi ra Silas, vatyí tava ra chi ra, ta nacuhva cuenda ra chi ra chi ñáyivi. ⁶ Soco cha cuenda cha ña nañihí ra chi ra Pablo ta ra Silas yucuan, ta quehēn ra chi ra Jasón. Ta xitā quiñoho ra chi ra ta chi suhva ca ra hermano ta cuahan coyo ra nuu ra cuví tyiño ñuu cuan. Ta canā cha ra ta catyí ra:

—Ra ihya cuví ra cachicá noo satodó chi tandihí ñáyivi nicāhnu ñuhu ñayivi. Ta vityin chaā coyo tucu ra ihya. ⁷ Ta ra Jasón chiña chahā ra vehe ra cunyicu ra. Ta tandihí maa ra ña sahá ra ñáyivi chi ra cuví rey cahnu nya Roma. Vatyí catyí ra vatyí iyó nonga rey ta nañí ra Jesús.

⁸ Cha cachiñi ñu tuhun cuan, ñáyivi ta ra cacuví tyiño canaquiqui ñu. ⁹ Soco ra Jasón ta inga ra cachahā ra xuhun ta caquita yīca ra.

Nu cuahan coyo ra Pablo ta ra Silas ñuu Berea

10 Ta suri cha cuaa cuan quiyi cuii ri casacuhun ra hermano chi ra Pablo ta ra Silas ityi ñuu Berea. Ta cha chaꝥ coyo ra yucuan ta chahan coyo ra vehe ñuhu ñu Israel. 11 Ta ra Israel cha iyó ñuu Berea cuan vaha ca ñáyivi cacuví ra ta ñima ca ra Tesalónica. Vatyí chihin cha ñi ñi ra naquehen ra tuhun Nyoo. Ta ndiquivi nanducú ra nuu tutu Nyoo, nyehé ra tatu ndicha cha cacatyí ra Pablo ta ra Silas ta ra Timoteo chi ra. 12 Yucuan chaha cuaha vavaha ñu nachino ñi ñu chi ra Cristo. Ta ñu Grecia nachino tucu ñi ñu cuan, tari ñushi tyayii ta rayii ñandihi. 13 Soco cha cachitoꝥ ra Israel cha ca iyó ñuu Tesalónica vatyí ra Pablo ñohó ra Berea cahán ra tuhun Nyoo, ta chahan coyo ra ta sanaquiqui ra chi ñáyivi yucuan. 14 Soco ra hermano numi cuii ri tachí ra chi ra Pablo nya ityi yuhu tyañuhu. Soco ra Silas ta ra Timoteo candoꝥ ra Berea. 15 Ta ra cha cuahan coyo chihin ra Pablo chinyaca ra chi ra nya ñuu Atenas. Tyicuan ta cuanuhꝥ coyo ra nya Berea cuanacuhva ra tyiño cha tachí ra Pablo chi ra Silas ta chi ra Timoteo, na sanumi ra ta cuhun ra nu nyaá ra.

Nu ñohó ra Pablo ñuu Atenas

16 Cha ñiri ca cha nyatú ra Pablo chi ra Silas ta ra Timoteo ñuu Atenas cuan quiñi cuñi añima ra cha nyehé ra vatyí cuaha xaan xitohyo iyó ñuu cuan. 17 Yucuan

chaha cahan ra chihin ra Israel, ta chihin inga ra cha tuhvá sacahnú chi Nyoo chichi vehe ñuhu cuan. Ta ndi quivi cahán ra chihin ñu cha nyicu nuyahvi ñandihi. 18 Ta ñihi tahan ra chihin ñu cha sacuaha tuhun sañahá noo ityi ñáyivi cha nañi ñu epicúreo. Ta ñihi tahan tucu ra chihin ñu cha sacuaha tuhun sañahá ñáyivi estoico. Ta cacahan ñu chihin ra. Ta yihí ra catyí ra:

—¿Ñáá tuhun cahan xaan ra ihya? —catyí ra.

Ta inga ra catyí ra:

—Tuhun inga nyoo cahán ra ihya —catyí ra.

Tyehe caa catyí ra vatyí ra Pablo cahán ra tuhun ra Jesús, ta cahán tucu ra tuhun cha nandotoꝥ ñáyivi chihí. 19 Tyicuan ta chinyaca ra chi ra Pablo noo nu nañi Areópago, nu tuhva ra cacuví tyiño ndu ñi ri ra. Ta cacatyí ra chi ra:

—Cuñi ndi coto ndi tuhun chaa cha vachi sañahún. 20 Vatyí sacotón tuhun cha ña chitó ndi. Ta cuñi ndi coto ndi ñáá cha cuñi chi catyí tandihí tuhun ihya —cacatyí ra chi ra.

21 Vatyí tandihí ñu Atenas ta ñu inga ñuu cha iyó yucuan tahan xaan ñi ñu tyasoho ñu ta nacatyí ñu ñáá ndihí tuhun chaa.

22 Tyicuan ta ra Pablo nicuinanyaꝥ ra mahñu nu nyicu ñu yucu Areópago, ta catyí ra:

—Nyoho Tata ñuu Atenas, yuhu nyehí vatyí chinó xaan ñi ndo chi cuaha nyoo. 23 Vatyí chahin chinyehi nu

tuhvá ndo savaha ndo culto. Ta nañihí noo arta nu nyaá letra cha catyí: “Cuenda Nyoo cha ña ñohó nuu yo”, catyí letra cuan. Nyoho sacahnú ndo chi Nyoo cuan vasi ña ñohó nuu ndo chi ra. Ican Nyoo cuan cuví cha cahín tuhun chihin ndo. ²⁴ Nyoo cha savahá ñuhu ñayiví ta tandihí cha iyó síqui ñuhu ñayiví. Chi maa ra cuví andiví ta ñuhu ñayiví. Ta ña iyó ra chichi vehe ñuhu cha savahá ñáyiví. ²⁵ Ta ña itá iñi ra cha tyinyeé ñáyiví chi ra. Vatyí suri maa ra chahá ra ñayiví coo tandihí yo. Ta chahá ra tatyí cha xitá yo. Maa ra chahá tandihí chi yo. ²⁶ Cha xihna ri savahá Nyoo chi noo tuhun ri rayíi. Ta maa ra cuví sutu tandihí yo. Yucuan chaha noo ri niñi nyisó tandihí yo. Ta chahá Nyoo cha coo yo ñicahnu ñuhu ñayiví. Cha ni cumañi ca savahá ra chi yo ta catyí ra ñáá cuiya coo noo noo yo síqui ñuhu ñayiví ihya. Ta catyí tucu ra nya cucoo noo noo yo. ²⁷ Tyicuan caa sacuví ra vatyí tacuhva quichaha nanducu yo chi ra. Tari nanducú minoo ra cuaa noo cha nanducú ra chihin ndaha ra, vasi tyicuan caa ta cuví nañihi yo chi ra. Soco cha ndicha, Nyoo ña cañi nyaá ra chihin noo noo yo. ²⁸ Vatyí cha cuenda Nyoo iyó yo ta candá yo. Tari catyí tucu noo ra ñuu ndo, vatyí catyí ra: “Ñáyiví chi Nyoo cuví chi yo”, catyí ra. ²⁹ Tatu ñáyiví chi Nyoo cuví yo, ña

tahán chi caca xiñi yo vatyí Nyoo cuví ra noo xitohyo cha chino chihin xuhun cuaan, o xuhun cuichin, o chihin yuu vaha cha savahá ñáyiví cuhva chicá xiñi maa ñu. ³⁰ Nyoo sahá ra ticahnu iñi chi ñu chiyo ta cha naha, vatyí ña chitó ñu. Soco vityin catyí ra chi tandihí ñáyiví tandihí ri ityí vatyí na ndu uvi iñi ñu cuatyí ñu. ³¹ Vatyí Nyoo tyaa ra cuhva vatyí coo noo quiví cha cucutuñi chi ñáyiví iyó síqui ñuhu ñáyiví nuu noo ra cha nacachí vaha maa ra chi. Ta sañahá ra chi tandihí yo vatyí tyicuan caa cuví vatyí sanandoto ra chi ra cuan cha yahá chihí ra —catyí ra Pablo.

³² Cuhva cha chiñí ñu tuhun cha nandotó ñu chihí, yihí ñu chacu nyaá ñu, ta inga ñu catyí:

—Quichun inga quiví ta cahun tuhun ihya chihin ndi —catyí ñu.

³³ Tyicuan ta cuahan ra Pablo. ³⁴ Soco yihí ñu chinyicon ñu chi ra, ta nachino iñi ñu chi Nyoo. Ta noo ra nañí ra Dionisio, ta cuví ra noo ra cuví tyiño ñuu cha tuhvá ndu ñin nya Areópago cuan. Ta noo ñaha síhi cha nañí Dámaris chino tucu iñi ña, ta inga tucu ñu ñándihí.

18

Nu ñohó ra Pablo ñuu Corinto

¹ Yahá cuan ta quitá ra Pablo ñuu Atenas ta cuahan ra ñuu Corinto. ² Ta yucuan nañihí ra chi noo ra Israel tari maa ra. Nañí ra Aquila.

Ta ñuu Ponto cacu ra. Ta maa ra chihin ñasihí ra, cu Priscila quita ñu Italia. vatyí ra Claudio, ra cuví rey cahnu yucuan, tava ra tandihí ra Israel. Catyí ra na quita ra ñuu Roma. Ta ra Pablo cuahan ra nu nyaá ñu ñuu Corinto cuan. ³ Ta ñn ri tyiño sacuví ra chihin ñu. Savahá ñu vehe sahma. Ta ndoo ra chihin ñu vatyí sahá tyiño ñu ñn ri. ⁴ Ta quivi nyitatu ñu Israel tahan vitya, ra Pablo chahan ra vehe ñuhu ñu. Ta ndatuhun tahan ra chihin ñu Israel ta chihin ñu cha ñima ñu Israel cuví. Vatyí nducú ra cuhva cha chino iñi ñu chi ra Jesucristo.

⁵ Ta quivi chaq coyo ra Silas ta ra Timoteo cha quita ra Macedonia, ra Pablo sandoo ra tyiño sahá ra ta ñn ri ca tyiño cha cahán ra tuhun Nyoo nicunyaq ra. Ta catyí cachi ra chi ñu Israel vatyí ra Jesús cuví Cristo ra cha nyatú xaan ñu. ⁶ Soco ñu cuan xaan cuñi ñu. Ta quichaha cahan ña vaha ñu siqui Sutu Mañi yo. Tyicuan ta ra Pablo naquisi ra sahma ra tari noo seña vatyí cuandoo cuatyí ñu siqui ñu. Ta catyí ra chi ñu:

—Cuatyí maa ndo cuví tatu cahun ndo anyaya. Ñahri ca nyaá siqui. Vityin ta ityi nuu ca cuhin cucahin chihin ñu cha ñima ñu Israel cuví —catyí ra chi ñu.

⁷ Ta quita ra vehe ñuhu cuan. Ta cuahan ra vehe noo ra cha nañi Justo. Noo ra cha sacahnú chi Nyoo. Ta nyaá vehe ra ityi xiin vehe ñuhu cuan. ⁸ Ta noo ra cha

nañi Crispo, ra cuví nuu vehe ñuhu cuan nachino iñi ra chi Sutu Mañi yo, ta ñáyivi chi ra ñandihí. Ta cuaha ca ñáyivi iyó Corinto cuan, cha yaha cha chiñi ñu tuhun cahán ra Pablo, nachino tucu iñi ñu chi ra Jesús, ta condutyá ñu. ⁹ Tyicuan ta noo cha cuaa nyehe ra Pablo noo visión. Ta cahan Sutu Mañi yo chihin ra, ta catyí ra:

—Ma yuhvun. Cahan ca tuhun ta ma sandihun cha cahun. ¹⁰ Vatyí yuhu nyaí chuhun. Ta yori cuví sata si iñi chuun. Vatyí cuaha xaan ñáyivi nyaá sacaqui ñuu ihya —catyí Sutu Mañi yo chi ra Pablo.

¹¹ Yucuan chaha ra Pablo ndoo ra noo cuiya sisava ñuu Corinto cuan. Sañahá ra tuhun Nyoo chi ñáyivi.

¹² Soco quivi cha cuví ra Galión gobernador nicahnu ityi Acaya cuan, candu ñn ri ra Israel siqui ra Pablo. Ta cachican ra cuatyí chaha ra nuu ra gobernador. ¹³ Ta catyí ra chi gobernador cuan:

—Ra ihya tyiyuhú ra chi ñáyivi na sacahnu ñu chi Nyoo noo cuhva cha ñahri nyaá nu ley ndi —cacatyí ra.

¹⁴ Tyicuan ta cuhva cha cuanacahan ra Pablo, naca han ri ra Galión, ta catyí ra chi ra Israel cuan:

—Nyoho ra Israel, tatu cuenda noo cuatyí cahnú o cuatyí ndiyi cuví sandai yoso cuhva tahán chi. ¹⁵ Soco maa maa ri tuhun cahán ri cuví ihya. Ta yuhu ña cuñi sandai tyiño ihya, ta ñn ri cuenda ley maa ndo cuví.

Nyēhe maa ndo. Sandaa ndo tyiño vatyí yuhu ña cuñí cuví juez cuenda ihya —catyí gobernador cuan.

¹⁶ Ta tava ra chi ra nu cuví vehe tyiño ra. ¹⁷ Tyicuan ta tandihí ra Grecia catiñ ra chi ra Sóstenes, ra cuví nuu vehe ñuhu ñu Israel. Ta cacañi ra chi ra suri maa nuu ra Galión, ra cuví gobernador cuan. Soco ra Galión cuan ña cahān ri ra.

Nu cuanuhu ra Pablo ñuu Antioquía. Yahā cuan ta cuahan tucu ra tuhun Nyoo, cha cu uñi chaha

¹⁸ Ta ra Pablo ndoo ca ra ñuu Corinto cuaha quivi. Yahā cuan ta catyí ra chi ra hermano vatyí cuhun ra. Ta cuahan ra Aquila chihin cu Priscila chihin ra Pablo. Tyicuan ta chaā coyo ñu Cencrea. Ta ra Pablo satya ndi ra xiñi ra vatyí sacuví ra noo cha tyaá ra cuhva tyi sacuvi ra nuu Nyoo. Tyicuan ta caquihvi ñu chichi noo barcu cha cuahan ityi Siria. ¹⁹ Ta cha chaā barcu cuan nya ñuu Éfeso, ta caquita ñu. Ta ra Aquila chihin cu Priscila ndoo ñu yucuan. Ta ra Pablo cuahan ra vehe ñuhu ñu Israel. Ta cahān ra chihin ñu Israel cha ndu ñn ri yucuan. ²⁰ Ta chacu ndahvi ñu nuu ra na ndoo ra cuaha ca quivi. Soco ña cuñí ra. ²¹ Ta catyí ra chi ñu vatyí cha cuahan ra, ta catyí tucu ra tyehē caa:

—Cuñí chi cha cuhin ñuu Jerusalén vatyí sanducahni vico cha vachí cutahan. Soco

cuquichi inga chaha nu nyicu ndo tatu Nyoo ta cuñí ra —catyí ra chi ñu.

Tyicuan ta cuahan ra quihvi ra chichi noo barcu cha cuahan ityi Siria. ²² Quivi nachaa ra ñuu Cesarea ityi Siria cuan, chahan ra chichuva ra nocumi chi ñu yihí cuenda Nyoo Jerusalén. Yahā cuan ta cuahan ra Antioquía. ²³ Ta cha yahā chinyaa ra suhva quivi yucuan, quita ra ta cuahan ra tahan tahan ñuu ityi Galacia ta Frigia. Ta sanduni ra iñi tandihí ñu yihí cuenda Nyoo.

Nu cahán ra Apolos tuhun Nyoo ñuu Éfeso

²⁴ Quivi cuan chaā noo ra Israel ñuu Éfeso. Nañi ra Apolos. Ta ñuu ra cuví Alejandría. Ta cuví ra minoo ra vaha cahán tuhun Nyoo. Ta chitó xaan ra tuhun Nyoo tuhun chahnu cha nyaá nu libru. ²⁵ Ta vaha xaan cutuhva ra tuhun Sutu Mañi yo. Ta cahán ra chihin cha ñi iñi ra. Ta vaha xaan nyicón ra chi Nyoo. Ta cachi xaan sañahá ra tuhun ra Jesús. Vasi cuhva cha sacondutyā ra Juan ri chitó ra. ²⁶ Ta quichaha chan ra chichi vehe ñuhu chihin cha ñi iñi ra. Ta cuhva cha chini ra Aquila ta cu Priscila, tava ñn ñu chi ra ta nacatyí cachi ca ñu tuhun ityi Nyoo chi ra. ²⁷ Tyicuan ta quichaha cuñí ra Apolos cuhun ra ityi Acaya. Ta ra hermano catyinye ra chi ra. Ta catyaa ra noo carta chi ñu yihí cuenda Nyoo ityi cuan,

ta catyí ra chi ñu vatyí na vaha cahan ñu chihin ra tatu chaa ra. Tyicuan ta cuahan ra. Ta cuhva cha chaa ra Acaya cuan tyinyee xaan ra chi ñu chinó iñi chi Nyoo cha cuenda tumañi iñi cha chaha ra chi ñu. ²⁸ Vatyí nu tuví sañaha cachi xaan ra yoso caa cuhva ña vaha cha sacuví ñu Israel. Ta sañaha ra cha catyí nu tutu Nyoo vatyí ra Jesús cuví Cristo, ra cha nyatú xaan ñu chi.

19

Nu cuahan tucu ra Pablo ñuu Éfeso

¹ Cha ni ri ca cha ñohó ra Apolos ñuu Corinto, ra Pablo yaha ra ityi yucu ta chaa ra nya ñuu Éfeso. Ta yucuan nañihí ra chi cuaha ri ra yihí cuenda Nyoo. ² Ta ndaca tuhun ra chi ra:

—¿Atu naquehen ndo Tatyí li quivi nachino iñi ndo? —catyí ra Pablo chi ra.

Ta canacahan ra cuan ta catyí ra:

—Ni chiin ña chitó ndi cha iyó Tatyí li.

³ Tyicuan ta ra Pablo ndaca tuhun ra chi ra:

—¿Ñáá chihin condutyá nyoho? —catyí ra.

Ta nacahan ra ta catyí ra:

—Chihin cuhva sacondutyá ra Juan yucuan cuhva condutyá ndi —catyí ra.

⁴ Tyicuan ta catyí ra Pablo chi ra:

—Ra Juan sacondutyá ra chi ñáyivi cha ndu uvi iñi cuatyí. Soco catyí tucu ra chi ñu vatyí cuñí chi cha chino iñi ñu chi ra cha cuaquichi ta ican

ra cuan cuví ra Cristo Jesús —catyí ra Pablo chi ra.

⁵ Cuhva cha cachiñi ra cha catyí ra Pablo tuhun ihya, tyicuan ta nacondutyá ra inga chaha chihin sivi Sutu Mañi yo Jesús. ⁶ Ta cuhva cha tyiso ra Pablo ndaha ra siqui ra, quichi Tatyí li siqui ra. Ta quichaha cahan ra inga sahan. Ta saha ra profetizar, o chaha cuenda ra tuhun chaha Tatyí li Nyoo chi ra cuví cuan. ⁷ Ta uchi uvi tahan ra cha tandihí ra.

⁸ Tyicuan ri chica ra Pablo vehe ñuhu ñuu cuan chichi cha uñi yoo. Ta cahan ra tuhun Nyoo chihin cha ni iñi ra. Ta ñihi cahan ra chihin ñu yoso caa nyacá ñaha Nyoo aña yoo. ⁹ Soco yihí ñu sandava ñu aña ñu. Ta ña cuñí ñu chino iñi ñu. Ta cahan ña vaha ñu siqui tuhun ra Cristo nuu ñáyivi, ta catyí ñu vatyí ña vaha ityi Sutu Mañi yo. Tyicuan ta ra Pablo canyaha ra nu nyicú ñu. Ta chinyaca ra chi ñu chinó iñi chi ra Cristo noo sicuela ra cha nañi Tiranno. Ta yucuan cahan ra tuhun ra Cristo chihin ñáyivi ndiquivi ri. ¹⁰ Ta tyicuan caa chinyacuví ra chichi cha uvi cuiya. Ta tandihí ñáyivi nicahnu ityi Asia cuan chiñi ñu tuhun Sutu Mañi yo Jesús, tari ñu Israel ta ñu cha ñima ñu Israel cuví ñandihí. ¹¹ Ta nahnu milagru sacuví Nyoo chihin ndaha ra Pablo. ¹² Vatyí nyacua nya pañitu ta sahma cha tin ra Pablo, ta chinyaca ñu chi ñu cuhví ta nduvaha ñu. Ta ñu yihí tatyí ña vaha

chi, quitā chi chi ñu.

¹³ Ta iyó suhva ra Israel cha cachicā noo tahan tahan ñuu. Catavā ra tatyí ña vaha chi ñáyivi. Ta cacuñí ra cotyiño ra sivi Sutu Mañi yo Jesús vatyí tavā ra chi tatyí ña vaha. Ta catyí ra chi tatyí ña vaha cuan:

—Chihin sivi ra Jesús cha cahán ra Pablo tuhun catyí chi ndo vatyí quitā ndo —catyí ra.

¹⁴ Tyehe caa chinyacuví ndi ucha tahan sehe noo ra Israel cha nañi Eſceva. Ta ra Eſceva cuan cuví ra noo ra cuví nuu chi tata sutu. ¹⁵ Ta cha cacahañ ra cuan chihin tatyí ña vaha cuan, nacahañ tatyí ña vaha cuan chihin ra ta catyí chi tyehe caa:

—Ñohó nui chi ra Jesús. Ta chité yóo ra cuví ra Pablo. Soco nyoho ¿yóo ra cuví nyoho? —catyí tatyí ña vaha cuan chi ra.

¹⁶ Tyicuan ta ra cha yihí tatyí ña vaha cuan chii, ndava ra siqui ra cuan. Ta chihin cha cuaha fuerza ra cuví chasaha ra chi tandihí ra. Ta chahnyā cuatyí ra sahma ra. Ta sanduvityaa ra chi ra. Ta sañicuehe ra chi ra. Yucuan ta chihin cha cayuhvi ra ta cachino ra ta cuahañ coyo ra.

¹⁷ Tyicuan ta tandihí ñu Éfeso, ñu Israel, ta ñu cha ñima ñu Israel cuví ñandihí, chito ñu tuhun cuan. Ta yuhví xaan ñu cuví. Ta sacahnú ñu sivi Sutu Mañi yo Jesús.

¹⁸ Ta cuaha xaan ñu chinó iñi ñu chi ra. Ta chaā coyo ñu ta nahmā ñu cuatyí ñu, tandihí cha ña vaha cha

chinyacuví ñu ta ityi chata ca. ¹⁹ Ta cuaha ñu cha sacuañā tuhun tasi, quichí nyaca ñu libru ñu. Ta chahmjí ñu libru cuan nuu tandihí ñáyivi. Ta natavā ñu cuenda yoso yahvi libru cuan. Cha tandihí quitā ta cha uvi xico uchi mil xuhun cuichin. ²⁰ Ta tyicuan ri ta cuahan chitya ca tuhun Sutu Mañi yo. Ta nducuañā ca ñu yihí cuenda ra. Ta tyicuan caa nyehé ñáyivi yoso cha cahnu tunyee iñi iyó chi ra. ²¹ Ta cha yahā tuhun ihya, ra Pablo natyaa ra cuhva cha cuhun ra ityi Macedonia, ta ityi Acaya. Yahā cuan ta cunuhū ra nya Jerusalén tyaá ra cuhva. Ta catyí ra vatyí yahā cuan ta cuñi chi cha cuhun ra nya ñuu Roma. ²² Tyicuan ta tachí ra chi uvi tahan ra tyinyeé chi ra nya Macedonia, ra Timoteo ta ra Erasto. Soco ndoo maa ra suhva ca quivi ityi Asia cuan.

Nu naquiquí ñáyivi Éfeso siqui tuhun Nyoo

²³ Ta suri quivi cuan naquiquí ñáyivi ñuu Éfeso siqui tuhun Nyoo, ²⁴ vatyí noo ra cha nañi Demetrio sanaquiquí. Vatyí maa ra tuhvá ra saha tyiño chihin xuhun cuichin. Savahá ra vehe ñuhu nyihi nyoo Diana chihin xuhun cuichin cuan. Ta cuaha sahá ganaa ra chihin ra casahá tyiño chihin ra. ²⁵ Ta canā ra Demetrio cuan chi ra cha sahá tyiño chihin ra. Ta canā tucu ra chi ra cha casahá tyiño in ri tyiño cuan. Ta catyí ra chi ra:

—Nyoho ra tahan yo, chitó ndo vatyí chihin tyiño ihya iyó cha tyayí yo. ²⁶ Soco nyoho nyehé ndo ta chiñí ndo yoso caa sacuví ra Pablo ñuu yo Éfeso ihya, ta ñicahnu ityi Asia. Vatyí catyí ra tyi nyoo cha savahá ñáyiví ñima Nyoo cuví. Ta cuaha xaan ñáyiví nachino iñi sahá ra. ²⁷ Ta ña vaha cha sacuví ra vatyí ma quiyahvi ca xitohyo cha savahá yo. Ta sñin ri ma sacahnu ca ñáyiví chi nyoo Diana ta ma saha ca ñu ñáyiví vehe ñuhu ña, ta ña vaha tyicuan caa, vatyí ñaha cuan cahnu xaan cuví ña. Ta tandihí ñáyiví ityi Asia chihin ñu ñicahnu ñayiví sacahnú ñu chi ña. Ta nu cuahan ca chí quiví ma sacahnu ca ñáyiví chi ña tatu chino iñi ñu cha cahán ra Pablo —catyí ra Demetrio.

²⁸ Ta cuhva cha cachiñí ra cha catyí ra, Xaan xaan cacuñí ra. Ta quichaha cacana chaa ra ta cacatyí ra:

—Cahnu xaan cuví cu Diana, nyoo cuenda ñáyiví Éfeso ihya —catyí ra.

²⁹ Ta cutondo xiñi tandihí ñu ñuu cuan. Ta catiñ ñu chí ra Gayo, ta chí ra Aristarco, uvi ra Macedonia cha chicá noo chihin ra Pablo. Ta caxitá quiño ho ra chí ra nyacua nya nu tuhva ñu candu ñin ri ñu. ³⁰ Ta ra Pablo cuñí ra quihví ra nu nataca ñáyiví vatyí cahán ra chihin ñu. Soco ra hermano, ña chaha ra. ³¹ Ta tyicuan caa tucu suhva ra cuví tyiño ityi Asia, ra cuví amigo ra Pablo, tachí ra tyiño vatyí ña tahán chí tyihí ra

chi ra yucuan. ³² Ta nu ndu ñin ri ñu yucuan, suhva ñu caná chaa noo tuhun. Ta inga ñu caná chaa ñu inga tuhun. Vatyí naquiquí ñu. Ta cuaha xaan ñu cha ni ña chitó ñu ñáá tuhun cha nat-acá ñu. ³³ Tyicuan ta ñu Israel, tyatyíño ñu chí noo ra cha nañí Alejandro na quita ra ityi nuu. Ta suhva ñu tayucú yucuan nacatyí ñu chí ra yoso caa cucahan ra. Tyicuan ta sacuví ra seña chihin ndaha ra vatyí na taxi ri cuví ñu vatyí cuñí ra catyí ra vatyí ñahri cuatyí ñu Israel. ³⁴ Soco cuhva cha chitó ñu vatyí ra Israel cuví ra, tandihí maa ñu cana chaa ñu. Ta chichi cha uvi hora caná chaa ñu, ta catyí ñu:

—Cahnu xaan cuví cu Diana nyoo cuenda ñu Éfeso —catyí ñu, caná chaa ñu.

³⁵ Tyicuan ta secretario ñuu cuan cuhva cha cuví sacutaxin ra ñáyiví, ta catyí ra:

—Nyoho tata ñuu Éfeso ihya. Tandihí ñáyiví chitó ñu vatyí nyaá siquí yo ñu Éfeso cha saha cumí yo vehe ñuhu cu Diana tyi cahnu xaan cuví ña. Ta cumí yo xitohyo ña cha cana cava ityi andiví. ³⁶ Ta yori cuví catyí tyi ña ndicha. Taxi ri ndo, ta ma cunyacuví ri maa ndo tatu ña chitó ndo ñáá cha cuacunyacuví ndo. ³⁷ Vatyí ra cha quichí nyaca ndo ihya ñahri cha suhú ra vehe ñuhu ndo. Ta ni ña cahán ña vaha ra siquí nyoo cuenda ndo. ³⁸ Tatu ra Demetrio ta ra cha sahá tyiño chihin ra chicán ra cuatyí chaha noo

ra, na cuhun ra nu nyaá juez. Cuví cacan ra cuatyí nuu ra cuan, ta maa ra cusandaa ra cuatyí cuan. ³⁹ Ta tatu inga tuhun chicán ndo, cuñí chí sacuví ndo nu nyicu ra cuví tyiño, tari cuhva catyí ley. ⁴⁰ Vatyí tatu coto gobiernu ta cana ra chí yo cha cuenda cha cuví ihya, ta ma ñihi yo tuhun cahan yo tatu ndacá tuhun ra chí yo ñáá cuenda naquiqui yo —catyí ra cuví secretario cuan.

⁴¹ Ta cha yaha catyí ra tuhun cuan catyí ra vatyí na cunuhu ñu nya vehe ñu.

20

Nu yahá ra Pablo ityi Macedonia ta cuahan ra Grecia

¹ Cha yaha tuhun cha naquiqui ñáyivi ñuu Éfeso cuan, cana ra Pablo chí tandihi ñu yihí cuenda Nyoo, vatyí cahan ra suhva nuu ñu ta cuhva ca ra tunyee iñi chí ñu. Vatyí maa ra cha chí quivi cha cuhun ra inga ityi. Ta cahan ra chihin ñu. Tyicuan ta cuahan ra Macedonia. ² Ta cahan ra tandihi ityi cuan ta sandunij ca ra iñi tandihi ñu yihí cuenda ra Cristo cha iyó ityi cuan chihin tuhun cahán ra. Tyicuan ta cha ra ityi Grecia. ³ Ta yucuan ndoo ra uñi yoo. Ta cha nyaá ra cha cuaquehen ra barcu ta cuhun ra Siria, ta chito ra vatyí nducú ñáyivi Israel chí ra vatyí cahñi ñu chí ra. Yucuan chaha natyaa ra iñi ra cha cuhun ra chihin chaha

ra ityi nu ñuhu ri. Ta nayaha ra inga chaha ityi Macedonia.

⁴ Ta cuahan ra Sópater, ra ñuu Berea chihin ra. Ta cuahan ra Aristarco ta ra Segundo, ta uvi tahan ra ihya, Tesalónica cuví ñuu ra. Ta cuahan ra Gayo, noo ra ñuu Derbe, ta ra Timoteo, ta uvi tahan ra ityi Asia, ra Tíquico ta ra Trófimo.

⁵ Ra hermano ihya cayaha ra ityi nuu ta canyatú ra chí ndi ñuu Troas. ⁶ Ta nyuhu nyatu ndi na yaha vico pascua nu tuhvá ñu Israel chachí ñu pan cha ñahri yuchan iya yihí. Tyicuan ta quita ndi ñuu Filipino chihin barcu. Ta nu cu ohon quivi ta natahan ndi chí ra cha cuahan ityi nuu nya ñuu Troas. Ta yucuan ndoo ndi ucha quivi.

Nu cahán ra Pablo tuhun Nyoo ñuu Troas

⁷ Ta cha timingu cuan ndu ín ri ndi chihin ñu yihí cuenda Nyoo ñuu Troas cuan. Ta quivi cuan cuacachi ndi pan ta coho ndi vinu vatyí nicohon iñi ndi tyi chihí ra Cristo cha cuenda cuatyí yo. Ta ra Pablo cahán ra nuu ñu ta cuví ora ñuu, vatyí cha nyaá cha cuhun ndi inga quivi cuan. ⁸ Canyicú ndi noo cuarto nu cu uñi piso. Ta ndichin xaan nu canyicú ndi chichi vehe cuan vatyí cuaha xaan ñuhu candil cayú. ⁹ Ta noo ra tyivaa cha nañí Eutico nyaá ra ventana tyasohó ra, soco ña cunyeé ra ñumahna vatyí ra Pablo, cha vehe xaan cahan ra. Quixí ra Eutico, ta ña chito ra canacava ra

nya nu ñuhu. Ta nacoñehé ra chi ra soco cha chihí ra. ¹⁰ Tyicuan ta ra Pablo noq ra ta chaq ra nu catuví ra tyivaa cuan. Ta natyihí nundaha ra chi ra tyivaa cuan, ta catyí ra chi ndii hermano:

—Ma yuhvi ndo. Nyitó ra —catyí ra.

¹¹ Tyicuan ta nandaq tucu ra Pablo ta chachí ndi pan ta chihí ndi vinu cha cuenda Sutu Mañi yo. Tyicuan ta cahan ca ra Pablo tuhun Nyoo nyacua nya cundichin. Tyicuan ta cuahan ra. ¹² Ta ra tyivaa cuan nandoto ra ta cuanuhú ra nya vehe ra. Ta sii xaan nanduví cuñi ñu.

Nu quita ra Pablo ñuu Troas ta cuahan ra nya ñuu Mileto

¹³ Nyuhu yaha ndi ityi nuu ta cuahan ndi chihin barcu nya ñuu Asón. Vatyí yucuan cuñihi tahan ndi chihin ra Pablo, vatyí tyicuan caa sandaq maa ndi tyiño chihin ra. Vatyí maa ra cuñi ra cuhun ra ityi nu ñuhú ri chihin chaha ra. ¹⁴ Ta cuhva cha nañihí tahan ndi chihin ra nya ñuu Asón cuan, quihví ra chichi barcu chihin ndi ta cuahan ndi nya ñuu Mitilene. ¹⁵ Quita ndi yucuan ta yaha ndi ityi nuu noo ñuhú luhlu cha nañi Quío nyaá mahñu tyañuhu. Ta cha inga quiví cuan chaq ndi inga ñuhú luhlu cha nañi Samos. Yaha ndi yucuan ta nyitatu ndi ñuu Trogilio. Ta cha inga quiví chaq ndi nya ñuu Mileto. ¹⁶ Tyicuan caa cuví vatyí ra Pablo ña cuñi ra cunyaa ca ra cuaha quiví

ityi Asia. Ña cuñi ra cuhun ra Éfeso vatyí numi ri cuñi ra chaa ra ñuu Jerusalén, vatyí tatu cuhva chí cuhva cunyaa ra quiví vico Pentecostés cha sanducahnú ñu Israel.

Nu cahán ra Pablo chihin ra ñuu Éfeso vatyí cuhun ra ta ma quichi ca ra

¹⁷ Ta cuhva cha nyicu ndi ñuu Mileto, cana ra Pablo chí ra yihí ndaha chí ñu yihí cuenda Nyoo Éfeso. ¹⁸ Ta cuhva cha chaq coyo ra, catyí ra tyehe caa chí ra:

—Maa ndo chitó ndo yoso caa cuhva chica noi nyata quiví xihna ri cha chaj Asia ihya. ¹⁹ Tandihí quiví cha chinyaj chihin ndo ta sacuví tyiño nuu Sutu Mañi yo chihin cha nduquí cuhva cha ma cahnu sahi chii, vasi cuaha tindoho chihin cha cuaha tucuihya iñi. Ta cuaha tindoho quichi siqui sacuví ñáyiví Israel. ²⁰ Soco ña sandihí cha cahán noi tuhun Nyoo nuu ndo. Vatyí ihya cuví tandihí cha chiñuhú chí ndo tacuhva coo vaha ndo. Ta sañahí tuhun Nyoo chí ndo nu ndu in ri ndo ta nya vehe ndo ñandihí. ²¹ Ta sañahí tuhun ihya chí ñu Israel ta chí ñu cha ñima ñu Israel cuví. Sañahí chí ñu na nasama ñu cuhva iyó ñu nuu Nyoo ta nachino iñi ñu chí Sutu Mañi yo Jesusucristo. ²² Ta vityin cuhin nya ñuu Jerusalén vatyí maa Tatyí li catyí. Ta ña chité ñáá cha cucuvi chii yucuan. ²³ Soco noo ri cha chité vatyí tandihí ri nu cuahín Tatyí li catyí chii vatyí nyatú vehe

caa chii, ta cuaha tindoho ñandihí. ²⁴ Soco ni noo ihya ta ña chicá xiñi. Ta ni ñayivi ta ña vale cha cuenda mai, tacuhva vatyí chihin tusi ñi ta cuví sañihi sahatyiñe tyiño cha chaha Sutu Mañi yo Jesús chii, cha sañahi tuhun vaha yoso cuhva cuñi Nyoo chi yo.

²⁵ Ta vityin chitó vahi vatyí tandihí nyoho cha cahin tuhun Nyoo chihin ndo, ma nyehe ca maa ndo chii. ²⁶ Yucuan chaha cuñi catyi chi ndo vityin vatyí ñahri ca cuatyí yuhu cha cuenda ni noo nyoho. ²⁷ Vatyí chihin cha niñi cuñi ta cahin tuhun Nyoo chihin ndo ta ñahri cha tixehi. ²⁸ Yucuan chaha saha ndo cuenda chi ndo. Ta saha tucu ndo cuenda chi tandihí ñu yihí cuenda Nyoo. Vatyí maa Tatyí li tyatyíño chi ndo vatyí saha cuenda ndo chi ñáyivi iyó vehe ñuhu Sutu Mañi yo. Maa ra satá ra chi ñu chihin niñi ra. ²⁹ Vatyí chité vatyí quivi cuhin, cuquichi inga ra. Ta cuñi ra sativi ra chi ñu yihí cuenda Sutu Mañi yo. Tari lobo xaan cha chahñi chi mbee, tyicuan caa cuquichi ra cuan sativi ra añima ndo. ³⁰ Ta suri nu nyicu ndo, cundicuita suhva ra. Ta cusañaha ra cha ña ndicha tacuhva cunyicon ndo chi ra. ³¹ Yucuan chaha saha vaha ndo cuenda. Nícohon ñi ndo vatyí chichi cha uñi cuiya ña sandihí cha cahin tuhun Nyoo nuu ndo. Cha ñicahñu ta cha cuaa cahin chihin noo noo nyoho, ta chihin cha cuihya ñi coto sandihí ndo

tuhun Nyoo.

³² Ta vityin nyoho yañi, natyaí chi ndo ndaha Nyoo. Saha ndo cuenda ndi tuhun cahan ra chihin yo. Sacotó ra chi yo tyi cuñi xaan ra chi yo. Ta yucuan sandunyeé xaan chi ñi yo tacuhva cuvi yo ñáyivi yihí vaha cuenda ra chihin tandihí inga ñu cha nacuhva cuenda ñu chi ñu chi ra. ³³ Yuhu ña nyiyó ñi ni minoo cha iyó chi ndo. Ni ri xuhun ndo, ni ri sahman do. ³⁴ Nyoho chitó vaha ndo vatyí sahá tyiño xain chihin ndahi tacuhva ñihi cha chiñuhú chii chihin ra chicá noo chihin. ³⁵ Tyicuan ri sañahí chi ndo vatyí cuñi chi cha saha tyiño ndo ta tyinyee ndo chi ñu iyó cha chiñuhu chi. Ta nícohon ñi ndo tuhun cahán Sutu Mañi yo Jesús nu catyi ra tyehe caa: “S# ca cuñi noo ñáyivi ñu chahá, ta ñima ca ñu ita ñi”, catyi Sutu Mañi yo.

³⁶ Cha yaha cha catyi ra Pablo tuhun ihya, chicuiñi chiti ra. Ta chican tahvi ra chihin tandihí ñu. ³⁷ Ta tandihí ñu cuihya xaan nduvi ñi ñu ta chacu xaan ñu. Ta nanumi ñu chi ra. ³⁸ Vatyí ra Pablo catyi ra tyi cuhun ra inga ñuu ta ma cuhun ca ra nu nyicu ñu. Tyicuan ta chinyaca ñu chi ra nyacua nya nu quihvi ra chichi barcu.

21

Nu cuahan ra Pablo ñuu Jerusalén

¹ Tyicuan ta sandoo ndi chi ra hermano ta quihvi ndi

chichi barcu. Ta cuahan ndi ñn ndoo ityi ri nya Cos noo ñuhú luhlu mahñu tyañuhu. Ta cha inga quivi chaá ndi nya Rodas inga ñuhú luhlu ri. Yucuan ta cuahan ndi nya Pátara. ² Ta ñuu Pátara cuan nañihí ndi nonga barcu cha cuahan nya Fenicia. Ta quihvi ndi chichi inga barcu cuan ta cuahan ndi. ³ Ta cha cuahan ndi nyehe ndi ñuhú Chipre chiyo satyin ndi. Ta yaha ri ndi cuahan ndi ityi nu ca, ityi Siria. Ta chaá ndi nya ñuu Tiro vatyi yucuan cuatava ra carga cha nyisó barcu cuan. ⁴ Ta cha nañihí ndi chi ñu yihí cuenda Nyoo ñuu cuan, ndoo ndi chihin ñu ucha quivi. Ta catyí ñu chi ra Pablo vatyi ña tahán chi cha cuhun ra Jerusalén vatyi tyicuan caa sañaha Tatyí Ii chi ñu. ⁵ Soco cha ndihí ucha quivi cuan quita ndi ñuu cuan. Ta nu cuaquita ndi tandihí ra hermano chihin ñasihí ra ta sehe ra chinyaca ñu chi ndi nyacua nya ityi chata ñuu. Ta nu ñiti yuhu tyañuhu cuan nicuiñi chiti ndi, ta chicán tahvi ndi chi Nyoo. ⁶ Tyicuan ta nanumi ndi chi tahan ndi. Tyicuan ta quihvi ndi chichi barcu. Ta maa ñu cuanuhu coyo ñu vehe ñu.

⁷ Ta quita ndi ñuu Tiro cuan ta cuahan ndi nya ñuu Tolemaida. Ta yucuan chaha ndi nocumi chi ñu hermano. Ta ndoo ndi chihin ñu noo quivi. ⁸ Ta cha inga quivi quita ndi ta cuahan ndi ñuu Cesarea. Ta yucuan chahan ndi vehe ra Felipe ra cha sacotó xaan chi

ñáyivi yoso caa sacacu Nyoo añima ñu. Cuví ra noo ra chichi cha ucha tahan ra nyisó tyiño vehe ñuhu. Ta yucuan ndoo ndi chihin ra. ⁹ Ra Felipe, iyó cumi tahan ñu tyivaa sehe ra cha ta tandaha ca. Ta tuhvá ñu chahá cuenda ñu tuhun cahán Nyoo. O cuvi chican sahá ñu profetizar. ¹⁰ Ta cha cuaha ri quivi cha chaá ndi yucuan, tyicuan ta chaá noo profeta Nyoo cha nañi Agabo. Quichí ra ityi Judea. ¹¹ Quichí nyehe ra nu nyicu ndi. Ta quehen ra sincho ra Pablo, ta cháhñi ra chaha ra ta ndaha ra, ta catyí ra:

—Tatyí Ii Nyoo catyí chii vatyi tyehe caa cunuhñi chitoho sincho ihya nya Jerusalén. Ta cucuhva cuenda ñáyivi Israel chi ra chi ra inga ñuu —catyí ra Agabo.

¹² Cha chiñi ndi tuhun ihya, nyuhu ta ra ñuu Cesarea chacú ndahvi ndi nuu ra Pablo vatyi ma cuhun ra Jerusalén. ¹³ Soco ra Pablo catyí ra:

—¿Ñáá tuhun chacú ndo ta sanducuihyá ndo iñi? Yuhu ñahri cuende. Ñima cha cunuhñi ri, vasi cahñi ra chii soco cha cuenda Suñu Mañi yo Jesús —catyí ra chi ndi.

¹⁴ Ta cha nyehe ndi tyi ña cuvi chasaha ndi chi ra, saña ndi. Ta catyí ndi:

—Na cuvi maa cuhva cuñi maa Sutu Mañi yo.

¹⁵ Cha yaha tuhun ihya sanduvaha ndi chi ndi ta cuahan ndi nya Jerusalén. ¹⁶ Ta cuahan suhva ra Cesarea ra yihí cuenda ra Cristo chihin ndi. Ta cuahan tucu noo ra

ñuhú Chipre. Mnasón nañí ra. Cuaha xaan cuiya chinó iñi ra chi ra Cristo. Maa ra chinyaca ra chi ndi nya vehe ra cha nyaá Jerusalén vatyí yucuan cunyaa ndi.

Nu cuanyehe ra Pablo nu nyaá ra Jacobo

17 Cuhva cha chaꞗ ndi Jerusalén, ñu yihí cuenda ra Cristo chihin cha sꞑi cuñí ñu cahán ñu chihin ndi. 18 Ta inga quiví cuan cuahan ndi chihin ra Pablo cuanyehe ndi nu nyaá ra Jacobo. Ta yucuan nyicú tucu tandihí ra yihí ndaha vehe ñuhu. 19 Chahaꞗ ra Pablo nocumi chi ra. Yahaꞗ cuan ta nacatyí ra tahan tahan ri tuhun yoso caa chotyíño Nyoo chi ra nu cahan ra tuhun Nyoo chihin ñu cha ñima ñu Israel cuví. 20 Cuhva cha cachiñi ñu tuhun ihya, casacahnu ñu chi Nyoo, ta catyí ñu chi ra Pablo:

—Vaha yañi yo, soco cha nyehun vatyí cuaha xaan mil ñu Israel chinó iñi ñu chi ra Cristo. Ta tandihí ñu catyí ñu vatyí niñi cha cunyicon yo ley ra Moisés. 21 Ta ñihí ñu tuhun vatyí yoho sañahún chi tandihí ñu Israel cha iyó inga ñuu vatyí ma quichaha ca ñu ley cha sañahaꞗ ra Moisés, ta catyún chi ñu vatyí ña tahán chi sacuví ñu costumbre circuncisión chihin cha lee sehe ñu, ta ni ma sacuvi ca ñu costumbre chahnu yo. 22 ¿Yoso caa sacuvi yo vityin? Vatyí ñáyivi cuañihi ñu tuhun tyi chaun ihya. 23 Vaha taxin ca cha sacuvun tyehe caa. Ihya iyó cumi tahan rayii

cha nyaá sacuvi ra noo cha tyaaꞗ ra cuhva tyi sacuvi ra nuu Nyoo. 24 Cuahan chihin ra na ndundiun nuu Nyoo chihin ra. Ta yoho tyiyahvun cha tahán chi tyiyahvi ra. Tyicuan ta maa ra cuvi satya ndi xiñi ra cuhva catyí ley. Ta cha sacuvun tyicuan caa ta coto tandihí ñáyivi vatyí ña ndicha cha cahán ñu sicun, soco cunyehe ñu vatyí quichahá tucu yoho ley ra Moisés. 25 Ta cha cuenda ñu cha ñima ñu Israel cuví, ta nachinó iñi ñu tuhun Nyoo, cha sacuhun ndi tutu chi ñu, ta catyí ndi chi ñu vatyí ña tahán chi caca xiñi ñu tuhun ihya. Soco noo cha ma cachi ñu coño cha chahá ñáyivi chi xitohyo. Ni ma cachi ñu niñi ni coño quití cha cava ñu sucun ta ña chati niñi. Ta ni noo ñu ta ma coo ñusihí o rayii chi ñu tatu ñima ñasihí o yii ñu cuví —catyí ra chahnu vehe ñuhu chi ra Pablo.

Nu nacandá ñu Israel siqui ra Pablo

26 Tyicuan ta tuví inga quiví ta cuahan ra Pablo chihin ndi cumi tahan ra cuan. Ta sandundií ra chi ra nuu Nyoo iin ri chihin ra cuan. Tyicuan ta quihvi ra chichi vehe ñuhu chahnu vatyí sacoto ra chi tata sutu ama cundihi cha ucha quiví cha ndundií ndi cumi tahan ra cuan, ta cuacuhva ra ofrenda cha cuenda noo noo ra. 27 Soco cha cuñí cuii ri ndihí ucha quiví cuan, ta suhva ra Israel cha quichi nya Asia canyeheꞗ ra chi ra Pablo chichi vehe ñuhu. Ta casanaquiqui ra chi tandihí

ñáyivi, ta catiñ ra chi ra Pablo. ²⁸ Ta cacanaachaá ra ta cacatyí ra:

—Nyoho ñáyivi Israel, tyinyee ndo chi ndi. Ican ra ihya cuví ra cha chicá noo tandihí ri ityi. Ta sañahá ra chi tandihí ñáyivi. Catyí ra vatyí cha ñima ri tuhun cuví yo ñu Israel. Ta catyí ra tyi ña vaha ley cha tyaa ra Moisés, ta ña vaha vehe ñuhu ihya. Ta siin ri vityin tyihí ra chi suhva ra Grecia chichi vehe ñuhu sativí ra nu ii ihya —catyí ra canachaá ra.

²⁹ Tyehe caa cacatyí ra vatyí ta ityi chata ca canyehe ra chi ra Pablo chichi ñuu, chicá noo ra chihin ra Trófimo, noo ra ñuu Éfeso. Ta cacuñí maa ra vatyí ra Pablo chinyaca chi ra chichi vehe ñuhu. ³⁰ Ta tandihí ri ñáyivi ñuu naquiquí ñu. Ta ñáyivi chinó vavaha ñu vachi coyo ñu. Tyicuan ta catiñ ñu chi ra Pablo. Ta caxita quiñoho ñu chi ra nya ityi chata vehe ñuhu, ta numi ri nacasi ñu yuvehe. ³¹ Cha cuñí ñu cahñi ñu chi ra, ta cha tyiño chi comandante cuenda sindaro vatyí tandihí ñu Jerusalén iyó xaan naquiquí. ³² Tyicuan ta comandante cuan sandu iñ ri ra capitán ta sindaro. Ta cachino ra cuahan coyo ra nu nyicú ñáyivi. Cuhva cha nanyehe ñu chi comandante chihin sindaro, sandihí ñu cha cañí ñu chi ra Pablo. ³³ Tyicuan ta tuhva comandante nu nyaá ra Pablo. Ta tachí ra tyiño natñ sindaro chi ra,

ta chahñi ra chi ra chihin uvi tahan cadena. Yahá cuan ta ndaca tuhun ra chi ra yóo ra cuví ra, ta ñáa cha sacuvi ra. ³⁴ Soco ñáyivi siin siin tuhun canachaá ñu. Ta comandante cuan ña cutuñí maa iñi ra cha cuenda cha quiñi cuvaa ñu. Ta tachí ra cha cunyaca sindaro chi ra Pablo nya cuartel. ³⁵ Cuhva cha cachaá ra nu cuayí yuvehe cuartel cuan, quiñi xaan nanduví ñáyivi ta ña chahá ca ñu caca ra Pablo. Yucuan chaha catyaa soco sindaro cuan chi ra. ³⁶ Vatyí tandihí ñu nyicón ñu chi ra, ta canachaá ñu ta catyí ñu:

—¡Cahñi ndo chi ra! —cacatyí ñu.

Nu sacacú ra Pablo chi ra nuu ñáyivi

³⁷ Cuhva cha cuatyihí ra chi ra Pablo chichi cuartel, ta quichaha catyí ra chi comandante:

—¿Atu cuhvon cha catyí noo tuhun chuun? —catyí ra chi ra.

Ta comandante cuan catyí ra:

—¿Atu cuví cahún griego?

³⁸ Tu tyicuan caa, ñima yoho cuví ra ñuu Egipto cha quichi quivi cuan ta sacañi tahan ra chi ñáyivi siqui gobiernu ta chinyaca ra chi cumi mil tahan ñáyivi ityi ñuhu ityi —catyí comandante cuan chi ra Pablo.

³⁹ Tyicuan ta ra Pablo catyí ra chi ra:

—Yuhu noo ra Israel cuví ta caqui noo ñuu cha nañí Tarso cha cuví minoo ñuu cahnu ityi Cilicia. Soco saha noo tumañi iñi chii vatyí

cuhvon nacahin chiin chihin ñáyivi —catyí ra Pablo chi comandante cuan.

⁴⁰ Tyicuan ta chahá comandante cuan permiso chi ra. Tyicuan ta nicuinanyaa ra nu cuayi ta chahá ra noo seña chi ñu na cutaxin ñu. Ta cahán ra chihin sahan hebreo, ta catyí ra:

22

1 —Nyoho tata, ta nyoho yañi, cuiñi ndo cha catyí chi ndo tyi coto ndo vatyí yuhu ñahri cuatyí —catyí ra Pablo chi ñáyivi cuan.

2 Cha cachiñi ñu vatyí cahán ra chihin ñu chihin sahan hebreo, taxi ri cacuvi ñu. Ta ra Pablo catyí ra:

3 —Yuhu ra Israel cuví tari maa ndo. Ta caqui ñuu Tarso ityi Cilicia. Soco Jerusalén ihya chahni. Ta ra Gamaliel sañaha chii tandihi maa cuhva yoso caa quichahi ley sutu chahnu yo. Ta tyicuan ri nduquí cuhva sacuví tyiño nuu Nyoo chihin cha tandihi añime, tari maa cuhva nyacuví nyoho quivi vityin. ⁴ Yuhu, nu quichi chi chicá nyiquen ta satasi iñi chi ñu yihí cuenda ra Cristo. Ta nacuhva cuende chi ñu na cacahni ra chi ñu. Ta tyihí chi ñu chichi vehe caa, rayii ta ñusihi. ⁵ Ra cuví nuu chi tata sutu chihin ra cacuví mandoñi, cacuví ra cha ndaa vatyí ican ra chahá tutu vatyí cuvi tin chi yañi yo, ra yihí cuenda ra Cristo ñuu Damasco. Chahin nyicuan chinanduqui chi ñu chinó iñi chi ra Cristo, vatyí tacuhva

cunuhni ñu chihin cadena, ta quichi nyaque chi ñu nya Jerusalén ihya vatyí cutachi tuñi ra chahnu chi ñu.

Nu nacatyí ra Pablo yoso caa nanduvi ra cuenda ra Cristo

(Hch. 9.1-19; 26.12-18)

⁶ 'Soco cuhva cha cuahin ityi cha cuachaa ndi Damasco, ñáá cuhva ora cuví cuan. Ta sana iñi ta ndundichin nicachico nu cuahin chihin noo nduva ñuhu cha quichi ityi andivi. ⁷ Tyicuan ta nduve nu ñuhú. Yahá cuan ta chiñi noo ndusu cha catyí chii: "Saulo, Saulo, ¿ñáá tuhun cha chicá nyicon chii tyehe caa?" catyí ndusu cuan chii. ⁸ Tyicuan ta ndacá tuhun chi ra ta catyí: "¿Yóo yoho tata?" Ta catyí ra chii: "Yuhu cuví ra Jesús, ra ñuu Nazaret, ra chicá nyicon chi", catyí ra. ⁹ Ndii ra cha cuahan coyo chihin canyehe ra ñuhu cuan, ta nayuhvi ra. Soco ña cachiñi ra ndusu ra cha cahán chihin. ¹⁰ Tyicuan ta quichahá catyí yuhu chi ra: "Sutu Mañi yuhu, ¿ñáá cha tahán chi sacuvi?" Ta catyí ra chii: "Ndicuita ta cuahan nya Damasco. Ta yucuan cucatyí noo ra chuun tandihi cha tahán chi sacuvun", catyí Sutu Mañi yo chii. ¹¹ Ta vatyí nducuai saha ñuhu cuan, ra tahin cayindahá ndahi ta cachinyaca ra chii nya Damasco.

¹² 'Ta yucuan iyó noo ra cha nañi Ananías. Ta sacahnú xaan ra chi Nyoo cuhva catyí ley cha tyaá ra Moisés. Ta tandihi ñu Israel cha iyó

Damasco catyí ñu vatyí vaha xaan ñáyivi cuví ra Ananías. ¹³ Quichí nyehe ra cuan chii. Ta cuhva cha chaá ra, catyí ra chii: “Yañi Saulo, ñanyehe inga chaha”, catyí ra chii. Ta caa cuhva ri cuan nanyehi. Ta cuví nyehi chi ra Ananías cuan. ¹⁴ Ta catyí ra chii: “Nyoo cuenda sutu yo nacachí ra chuun nyata ityi chata ca, vatyí coton cuhva cuñí ra, ta nyehun chi ra Jesucristo vatyí vaha ra, ta cuiñun ndusu ra. ¹⁵ Vatyí yoho cuacahun tuhun ra nuu tandihi ñáyivi. Cuanacatyun cha nyehun ta cha chiñun. ¹⁶ Ta vityin, ma cuatu con. Ndícuita ta condutyon. Ta çacan tahvun chi Sutú Mañi yo tyi cuasandachi ra cutyún”, catyí ra Ananías chii.

Nu nacatyí ra Pablo yoso caa chaha Nyoo tyiño chi ra vatyí cuhun ra inga ñuu cuacahan ra tuhun ra Cristo

¹⁷ Yahá cuan ta cuanuhin Jerusalén ta cuhva cha nachai, chahin vehe ñuhu cahnu chicacán tahvi. Ta nyehi noo visión. ¹⁸ Nyehi chi Sutú Mañi yo. Ta catyí ra chii: “Sanumi. Quita cha numi ri Jerusalén vatyí ma chino iñi ñu tuhun cha cuacahun”, catyí ra chii. ¹⁹ Tyicuan ta quichaha catyí yuhu chi ra: “Sutú Mañi yuhu, maa ñu chitó ñu vatyí yuhu chahin tandihi vehe ñuhu. Ta tijn chi ñu chinó iñi chuun, ta tyihí chi ñu vehe caa ta cañi chi ñu. ²⁰ Ta quivi chati niñi ra Esteban ra cha cahan cuendon, yuhu

ñandihí nyaí yucuan. Ta ndoí vaha cha chahñi ñu chi ra. Ta sahacumi sahma ra cha cachahñi chí ra”, catyí yuhu chi Sutú Mañi yo. ²¹ Tyicuan ta catyí ra chii: “Cuahan, vatyí tachí chuun nu cañi, nu nyicu ñu cha ñima ñu Israel cuví”, catyí Sutú Mañi yo chii.

Nu nyaá ra Pablo ndaha ra comandante cuenda ñuu Roma

²² Ihya ri tyasohó ñu tuhun cahán ra Pablo. Tyicuan ta quichahá canachaá ñu ta catyí ñu:

—¡Cahñi ndo chi ra chiña! Ña tahán chi coo ra ñayivi —catyí ñu.

²³ Ta canachaá ca ñu. Ta sacaá ñu sahma ñu. Ta sacaá ñu ñiyaca nu tatyí cha cuenda cha xaan xaan cuñí ñu. ²⁴ Yucuan chaha comandante cuan catyí ra na cutyihí sindaro chi ra chichi cuartel. Ta tachí ra tyiño na cañi ra chi ra, vatyí cuñí ra cha quita cha ndaa ñáá tuhun cha canachaá ñáyivi siqui ra cha tyicuan caa. ²⁵ Soco cha yahá cachahñi ra chi ra ta cuacañi ra chi ra, tyicuan ta ra Pablo nacatyí ra chi capitán cha nanyaá yucuan:

—¿Atu iyó ityi chi nyoho cha cañi ndo chii? Vatyí yuhu ra cuenda ñuu Roma cuví ta sijn ri ta cutuñi ca chii nu juez —catyí ra Pablo chi ra.

²⁶ Cuhva cha chiñi capitán cha cahan ra Pablo, chahan ra chisacoto ra chi comandante. Ta catyí ra chi ra:

—Saha cuenda chuun chihin cha nyacuvún. Vatyí ra

cuan, ra cuenda ñuu Roma cuví ra —catyí ra chi ra.

²⁷ Tyicuan ta comandante cuan cuahan ra nu nyaá ra Pablo. Ta ndacá tuhun ra chi ra tatu ndicha vatyí ra cuenda ñuu Roma cuví ra. Ta ra Pablo catyí ra vatyí ican.

²⁸ Tyicuan ta catyí comandante cuan chi ra:

—Yuhu cuaha xaan xuhun tyiyahví ta nanduví noo ra cuenda Roma.

Ta ra Pablo catyí ra:

—Soco yuhu ra cuenda Roma cuví nyata caqui —catyí ra.

²⁹ Ta tyicuan caa ta sindaro cha cuacañi chi ra canyahá ra ta cuahan coyo ra. Ta nyacua nya comandante ta nayuhví ra cha cuenda cha cháhñi ra chi ra chihin cadena. [Vatyí cuatyí cuví cha sacuví ra cha tyicuan caa chihin noo ra cuenda ñuu Roma.]

Nu nanyaá ra Pablo nu candu ñn ri ra Israel

³⁰ Tuví inga quiví ta comandante cuan cuñi ra coto ra ñáa cuatyí tyaá ñu Israel chaha ra Pablo. Ta ndachí ra cadena cha nuhñi ra. Ta tachí ra tyiño na ndu ñn ri ra cuví nuu chi tata sutu, ta tandihí ra cuenda junta. Tyicuan ta tava ra chi ra Pablo vehe caa ta chinyaca ra chi ra nu iyó junta cuan.

23

¹ Ta ra Pablo nyehe ra chi tandihí ra chihin cha ña cahan nuu ra, ta catyí ra chi ra:

—Nyoho ra yañi yo, nyacua nya quiví ihya iyó vahi nuu Nyoo ta ñahri cha ña

vaha sacuví nuu ra —catyí ra Pablo.

² Tyicuan ta ra Ananías ra cuví nuu chi tata sutu tachí ra chi ra nyicú yatyin ri nu nyaá ra Pablo, na nacañi ra ndaha yuhu ra. ³ Soco ra Pablo nacahan ra nu cahán ra ta catyí ra:

—¡Xihna ca chi maun cucañi Nyoo, vatyí sahá xaun tyi ra vaha cuvún nyaún chiña! ¿atu cutuñi chii nuun tari cuhva catyí ley? ¿Ñáa tuhun cha tachun nacañi ra chii? ta ñima tyicuan caa catyí ley —catyí ra Pablo.

⁴ Tyicuan ta ra canyicu yucuan catyí ra chi ra:

—Ña vaha cha cahún chi ra cuví nuu chi tata sutu cuenda Nyoo —catyí ra chi ra Pablo.

⁵ Tyicuan ta ra Pablo catyí ra:

—Yañi yuhu, ña chite tatu ra cuví nuu chi tata sutu cuví ra. Vatyí catyí tuhun Nyoo tyi ma cahan ña vaha yo siqui ra cuví tyiño ñuu yo —catyí ra.

⁶ Tyicuan ta tuví iñi ra Pablo vatyí suhva ra cuenda junta cuan, yihí ra cuenda ityi ra cuví saduceo. Ta inga ra yihí ra cuenda ra cuví fariseo. Tyicuan ta cahan ra chihin cha ñihi ndusu ra ta catyí ra:

—Nyoho yañi, yuhu ra fariseo cuví tari suti. Ta cutuñi chi nuu ndo vatyí chinó iñi tyi nandotó ñu chihi —catyí ra Pablo.

⁷ Cuhva cha catyí ra tuhun ihya, ra fariseo ta ra saduceo, quichahá candatuhun tahan ra suri chihin tahan maa ra, ta cacusiñ ra. ⁸ Vatyí ra saduceo catyí ra vatyí

ña nandotó ndiyi. Ta ni yori ángel ta ni yori tatyí ña vaha iyó catyí ra. Soco ra fariseo chinó iñi ra tandihí ihya. ⁹ Tandihí ra vaa ri ca cananduví ra. Ta ndicuita ra fariseo, ra sacuahá cuenda ley ra Moisés, ta catyí ra:

—Nyēhe xihna ndo, ñahri cha ña vaha sacuví ra ihya. Soco tatu noo ángel cahan chihin ra, saha yo cuenda coto vaha siquí Nyoo cahan ña vaha yo —catyí ra.

¹⁰ Cha chiñi ra tuhun ihya, vaa ri ca cananduví ra. Nyacua nayuhví comandante cuan coto cahnya cuatyí ra chi ra Pablo. Yucuan chaha tachí ra tyiño na tava sindaro chi ra Pablo nu nyicú ra, ta cunanyaca ra chi ra nya cuartel. ¹¹ Ta cha cuaa cuan tuví Sutu Mañi yo nuu ra Pablo ta catyí ra chi ra:

—Sanduní iñun, Pablo. Vatyí tari cahun tuhun Jerusalén ihya, tyicuan caa tucu cucahan tucun nya ñuu Roma —catyí Sutu Mañi yo chi ra Pablo.

Nu tyaá ra Israel cuhva cahñi ra chi ra Pablo

¹² Cha inga quiví, suhva ra Israel catyihí tahan ra tuhun. Catyí ra vatyí ni ma cacachi ra, ni ma coho ra nyacua nya cahñi ra chi ra Pablo. Ta nya noo ra ma sacuvi tyicuan caa na sanaa Nyoo chi ra siquí ñuhu ñáyiví, cacatyí ra.

¹³ Yaha ca uvi xico ra catyihí tahan tuhun ihya nuu Nyoo.

¹⁴ Chahan coyo ra nu nyicu ra cuví nuu chi tata sutu ta ra cacuví mandoñi cuenda ñu Israel. Ta catyí ra chi ra:

—Nyuhu ñin ri tuhun cahan ndi nuu Nyoo vatyí ma cachi ndi ta ni ma coho ndi cha ni ri ca cha ma cahñi ndi chi ra Pablo. Ta na sanaa Nyoo chi ndi tatu ma sacuvi ndi tari cuhva catyí ndi. ¹⁵ Ta vityin nyoho sacuhun ndo tuhun chi comandante. Catyí ndo chi ra na quichi nyaca ra chi ra Pablo nuu ndo ityaan. Saha ndo tuhun vatyí cuasandaa vaha ndo tyiño, ta nyuhu cuatu tuhva ri ndi nu yahá ra ta cucahñi ndi chi ra —catyí ra chi ra.

¹⁶ Soco sehe cuhva ra Pablo chiñi cue cha cahan ra. Ta chahan cue chisacoto cue chi ra Pablo nya cuartel. ¹⁷ Tyicuan ta ra Pablo cana ra chi minoo capitán. Ta catyí ra chi ra:

—Cuan yaca chi ra cuehe luhlu ihya nuu comandante vatyí iyó noo tuhun cuñí cue sacoto cue chi ra —catyí ra Pablo chi ra.

¹⁸ Tyicuan ta chinyaca capitán cuan chi cue nuu comandante. Ta catyí ra chi ra:

—Ra Pablo cha ñohó vehe caa cana ra chii ta catyí ra chii vatyí quichi nyaque chi ra cuehe luhlu ihya vatyí cuñí cue cahan cue chuhun —catyí ra chi ra.

¹⁹ Tyicuan ta tñin comandante ndaha ra cuehe luhlu cuan ta tava sñin ra chi cue ta catyí ra chi cue:

—¿Ñáá túhun cuñún cатыun chii?

²⁰ Ta ra cuehe luhlu cuan catyí cue chi ra:

—Ra Israel catyihí tahan vaha ra tuhun vatyí catyí

ra chuun na sacuhun chi ra Pablo nu iyó junta tyaan. Vatyí casaha ri maa ra cha cuñi ra cha cutuñi vaha ca chi ra. ²¹ Soco ma chino iñun chi ra vatyí vaha ca uvi xico tahan ra nyatú xehe chi ra ityi. Ta tyanaha ra chihin nuu Nyoo vatyí ma cachi ra ta ma coho ra nyacua nya cahñi ra chi ra Pablo. Ta tatu ña cuví cahñi ra chi ra, vaha taxin ca nacúvi noo noo maa ra na. Ta vityin nyatú tuhva ra coto ra ñáá cucatyí maun —catyí cue.

²² Tyicuan ta catyí comandante chi ra cuehe luhlu cuan vatyí yori chihin cahán cue tuhun cha catyí cue chi ra. Yaha cuan ta natachí ra chi cue.

Nu cacu ra Pablo ndaha ra Israel ta cuahan ra nuu ra gobernador cha ñañi Félix

²³ Tyicuan ta comandante cana ra chi uvi capitán, ta catyí ra chi ra:

—Sanduvaha ndo chi ndo vatyí cuhun ndo Cesarea cuhva caa iñn cha cha cuaa. Cuacuhun uvi ciento sindaro chihin chaha ra, ta uñi xico uchi ra chihin caballo, ta uvi ciento ra cuiso ra lanza. ²⁴ Sanduvaha ndo caballo coso ra Pablo. Ta saha cuenda vaha ndo chi ra ityi cuahan ndo na chaa vaha ra nu nyaa ra Félix gobernador —catyí comandante chi capitán cuan.

²⁵ Tyicuan ta tyaá ra noo tutu quindaha ra cuhun ra. Ta tuhun cha tyaá ra nu carta, ican cuví ihya:

²⁶ “Yuhu ra Claudio Lisias sacuhin noo carta ihya chi

yoho, tata gobernador Félix, vatyí vaha ñáyivi cuvun. Ihya vachi nocumí chuun.

²⁷ Ra Pablo ihya, catiñ ra Israel chi ra. Ta cacuñi ra cacahñi ra chi ra. Soco cuhva cha chite vatyí ra cuenda ñuu Roma cuví ra, chahin chihin sindaro ta sacaquí chi ra. ²⁸ Ta vatyí cuñi cote ñáá cuatyí tyaá ñu síqui ra, chinyaque chi ra nu iyó junta ra cacuví mandoñi ñu Israel. ²⁹ Soco cuenda ley ri maa ñu cuví. Ta cha cuenda ley yoó, ñahri cuatyí ra ta cahñi yo chi ra. Ta ni ri ña tahán chi cohon ra vehe caa. ³⁰ Soco vatyí ñihí tuhun vatyí ra Israel canducu cahñi ra chi ra, yucuan chaha tachí chi ra nuu yoho. Ta catyí tiquí chi ra cha tyaá cuatyí síqui ra, na cuhun ra nu nyaun na cacan ra cuatyí ra nuu maun”, catyí ra Claudio chi ra Félix nu tutu cha tyaá ra.

³¹ Tyicuan ta quehen sindaro chi ra Pablo tari cuhva catyí ra Claudio chi ra, ta chinyaca ra chi ra nya Antípatris suri maa cha cuaa cuan. ³² Cha inga quivi sindaro cha cuahan chihin chaha, canandichí coyo ra nya cuartel. Ta ra cha cayosó caballo cuahan coyo ca ra chihin ra Pablo. ³³ Ta cuhva cha chaá coyo ra ñuu Cesarea, cachaha ra carta cuan chi ra Félix, gobernador, ta cachaha cuenda ra chi ra Pablo chi ra ñandihí. ³⁴ Cha yaha cha sacuaha ra Félix carta cuan, quichaha ndacá tuhun ra chi ra Pablo nya ñuu ra. Ta cha chito ra vatyí ra Cilicia cuví ra ³⁵ ta catyí ra chi ra:

—Na quichi xihna ra tyaá cuatyí chahun. Tyicuan ta cusandai tyiño —catyí ra chi ra.

Tyicuan ta tachí ra tyiño na casaha cumi sindaro chi ra nya vehe tyiño cha savaha ra Herodes ta cha naha.

24

Nu cutuñi chi ra Pablo nuu ra Félix

¹ Yaha ohon quivi ta ra Ananías, ra cuví nuu chi tata sutu, chaá ra ñuu Cesarea cuan chihin suhva ra cacuví mandoñi, ta chihin noo ra cahan chaha ñáyivi cha nañi Tértulo. Chaá coyo ra nuu ra gobernador Félix vatyí cacan ra cuatyí chaha ra Pablo. ² Tyicuan ta tachí ra Félix na quichi nyaca sindaro chi ra Pablo. Tyicuan ta quichaha chican ra Tértulo cuatyí chaha ra Pablo. Ta catyí ra chi ra Félix:

—Tyahvi nyoo chuun, tata gobernador. Vatyí taxi ri iyó ñuu ndi, ta vaha iyó ndi vatyí yindaha vahun ñuu ndi. ³ Nacuhvá xaan ndi tyahvi nyoo chi yoho tata Félix, vatyí yoho, vaha ñáyivi cuvún. ⁴ Soco ña cuñi sayangue chuun chihin cha cuaha tuhun cahin, yucuan chaha chiquén noo tumañi iñi chuun na cuiñun suhva tuhun cuacahan ndi. ⁵ Vatyí chitó ndi tyi rayi ihya ñima ra vaha cuví ra, noo cuehe cuví ra. Ta tandihí ri ityi sanaquiquí ra chi ñu Israel. Ta ican ra cuví xiñi noo ityi ñáyivi nyicón chi ra Jesús ra ñuu Nazaret. ⁶ Nyacua cuñi

ra sacuvi ra noo cha ña tahán chi vatyí ña sahá ra ñáyivi vehe ñuhu cahnu. Ta nyuhu tiñ ndi chi ra, tacuhva tachi tuñi ndi chi ra tari cuhva ley maa ndi. ⁷ Soco comandante Licias chasi ri ra ta chihin cuaha fuerza ta tinyaa ra chi ra chi ndi. ⁸ Ta catyí ra vatyí tatu cuñi ndi cacan ndi cuatyí chaha ra, cuñi chi cha cacan ndi nuu maun. Nyehhe maun. Sanahmon chi ra ta coton tyi ndicha cha catyí ndi —catyí ra Tértulo.

⁹ Tyicuan caa tucu ra Israel cha canyicu yucuan, catyí ra vatyí ndicha tandihí tuhun cahan ra Tértulo. ¹⁰ Tyicuan ta ra Félix savaha ra seña chi ra Pablo vatyí nacahan ra. Ta ra Pablo quichaha catyí ra:

—Chité tyi cha cuaha xaan cuiya nyacá ñahun ñuu ihya. Ta yucuan chaha si vavaha cuñi vatyí nuu maun cuacutuñi chi yuhu vityin. ¹¹ Tatu ndaca tuhun cuacoton tyi cha iyó ri noo uchi uvi quivi cha chahin Jerusalén. Chahin yucuan vatyí sacahni chi Nyoo. ¹² Ta yori chihin cuvi yuhi. Ni ña sanaquiqui chi ñáyivi chichi vehe ñuhu cahnu. Ñahri maa sacuvi, ni ri chichi vehe ñuhu, ni ri chichi ñuu. ¹³ Ta cuatyí cha tyaá ra ihya siqui, ña ndicha maa. ¹⁴ Soco noo cha catyí chi ndo vityin vatyí yuhu sacahni chi Nyoo cha sacahnu sutu chahni. Sacahni chi ra cuhva sañahá ra Jesucristo. Ta catyí maa ra ihya tyi ña vaha. Soco yuhu chinó iñi ndi maa tuhun cha nyaá nu libru ley

cha tyaā ra Moisés. Ta chinó iñi tandihī tuhun catyāā ra profeta cuenda Nyoo ñandihī.

¹⁵ Ta suri chinó iñi vatyī Nyoo cusanandoto ra ñáyivī chihī, ñu vaha ta ñu quiñi iyó, tari chinó iñi tucu maa ra ihya. ¹⁶ Ta yucuan chaha tyicuan ri nduquí cuhva cha cachi coí nuu Nyoo, ta nuu ñáyivī ñandihī.

¹⁷ 'Cuaha cuiya chica noj inga ityi. Yaha cuan ta cuanuhī nya Jerusalén ñui vatyī nacuhva cuende xuhun chí ñu ndahvi ñu yihī cuenda Nyoo, ta vatyī cuhve noo cha cuhve chí Nyoo. ¹⁸ Yuhu tyicuan caa sacuví chichi vehe ñuhu cahnu, ta suhva ra Israel ityi Asia, nyehe ra chii yucuan cha yaha cha sandundi chii nuu Nyoo cuhva catyí maa nu ley ndi. Soco ña cuaha ñáyivī nyicu, ta ni ña naquiqui ñu. ¹⁹ Ican ra cha nyehe chii cuan, cuñí chí cha quichi ra ta cuhva ra cuenda tatu iyó cha sacuvī. ²⁰ O nacatyī maa ra cha canyicu ihya tatu nañihī ra cuatyī yuhu quivī cutuñī chii nuu ra nu chiyo junta ra cacuví nuu chí ñu Israel. ²¹ O vasi cuví chí cha cuenda noo ri tuhun cahin chihin nuu ra nyicú junta cuan tyehe caa: "Nyoho nducú ndo cuatyī chahi cha cuenda tyi chinó iñi cha nandotó ñáyivī chihī" —catyí ra Pablo.

²² Ta ra Félix chitó vaha ra yoso caa cuahan tuhun ñu nyicón chí ra Cristo. Ta catyí ra chí ra canyicu cuan:

—Vaha ri vityin. Na quichi

xihna comandante Lisias. Tyicuan ta cusandai tuhun ndo —catyí ra.

²³ Tyicuan ta tachī ra Félix chí capitán na cunatyihī ra chí ra Pablo vehe caa. Soco ma ñihī xaan saha cumi ra chí ra. Ta na cuhva ra cahun ra tahan ra nu ñohó ra, ta cahan ra chihin ra.

²⁴ Yaha suhva quivī ta nachaa ra Félix inga chaha chihin cu Drusila ñasihī ra. Ta cuví ña ñaha Israel. Ta tachī ra na quichi ra Pablo vatyī cuñí ñu tyasoho ñu yoso caa tuhun cha chinó iñi ra chí ra Jesucristo. ²⁵ Ta ra Pablo cahan ra tuhun yoso caa tahán chí sacuvi yo cha vaha, yoso caa cunyaca ñaha maa yo chí yo ta ma sacuvi yo cha quiñi caa. Ta cahan tucu ra yoso caa cucutuñi chí yo nuu Nyoo quivī tahan chí. Ta ra Félix yuhvī xaan ra cuvi, ta catyí ra chí ra:

—Cuahan vityin. Ta na nanuña xihne, ta cana mai chuun inga chaha —catyí ra chí ra.

²⁶ Ta ra Félix cuñí maa ra tyi ra Pablo cucuhva ra xuhun chí ra, tacuhva vatyī numi ri saña ra chí ra. Yucuan chaha vatyī tyito tyito ri cana ra chí ra, vatyī ndatuhun ra chihin ra. ²⁷ Uvi cuiya yaha, tyicuan ta nicunyaa ra Porcio Festo cuví ra gobernador tyiño nuu ra Felix. Ta ra Felix cuñí ra cuvaha ra nuu ra Israel ta sandoo ra chí ra Pablo vehe caa.

25

Nu cutuñí chí ra Pablo nuu ra Festo

1 Tyicuan ta cha cu uñi quiví cha cuví ra Festo tyiño, quita ra ñuu Cesarea cuan ta cuahan ra nya ñuu Jerusalén. 2 Chaq ra Jerusalén, tyicuan ta chaq coyo ra cuví nuu chi tata sutu ta ra cuví tyiño ñu Israel ta cachican ra cuatyí chaha ra Pablo. 3 Ta chican ra noo tumañi iñi cahnu chi ra Festo. Cuñi ra vatyí tachi ra Festo tyiño na quichi nyaca sindaro chi ra Pablo nya Jerusalén. Vatyí maa ra cuñi ra cahñi ra chi ra ityi vachi ri ra. 4 Soco ra Festo nacahan ra, ta catyí ra:

—Ra Pablo ñohó ra vehe caa nya Cesarea. Ta yuhu tyai cuhva cha cunuhi yucuan cha numi ri. 5 Yucuan chaha, nyoho cha cuví ndo tyiño ñuu ihya, cahun maa ndo chihin. Tyicuan ta cuvi cacan ndo cuatyí chaha ra tatu iyó cha sacuví ra —catyí ra Festo chi ra.

6 Uña o uchi ri quiví chi nyaa ra Festo Jerusalén, ta cuanuhu ra Cesarea. Ta cha inga quiví chaq ra chichi vehe tyiño ra vatyí cutuñi chi ra ca iyó cuatyí nuu ra. Tyicuan ta cana ra chi ra Pablo. 7 Cuhva cha quihvi ra Pablo, catuhva ra Israel cha quichí coyo nya Jerusalén, ta quichaha catyaa ra cuatyí cahnu siqui ra. Soco ñahri maa cha ndaa catava ra. 8 Tyicuan ta cahan ra Pablo ta catyí ra:

—Yuhu ni noo cuatyí ta sacuví que, ni siqui ley ñu Israel, ni siqui vehe ñuhu cahnu Jerusalén, ni siqui rey cahnu Roma —catyí ra.

9 Soco vatyí cuñi ra Festo ndoo vaha ra chihin ra Israel, ndacá tuhun ra chi ra Pablo: —¿Atu cuñún cahun Jerusalén vatyí sandaí tyiño nyicuan? —catyí ra chi ra.

10 Ta ra Pablo catyí ra:

—Cha nyai nu maun. Ta maun cuví ra cuví tyiño cuenda rey cahnu Roma. Ihya cuví nu tahán chi cutuñi chii, vatyí ra cuenda ñuu Roma cuví. Ta chitó vahun tyi ñahri maa sacuví chi ñu Israel. 11 Tatu sacuví noo cuatyí cahnu cha tahán chi cahñi ndo chii, ma nduqui cuhva caqui. Soco tatu ña ndicha tuhun cha cahan ra Israel ihya, yori cha iyó ityi chii cha cuhva cuenda chii chi ra cuñi cahñi chii. Chiquén vatyí cuhin nuu rey cahnu vatyí cutuñi chii nuu maa ra —catyí ra Pablo chi ra Festo.

12 Tyicuan ta ra Festo cha yaha cha cahan tahan ra chihin ra tyinyeé chi ra chihin tyiño, ta catyí ra chi ra Pablo:

—Chicón cha cutuñi chuun nuu rey cahnu. Vaha. Cua cahun nuu maa ra —catyí ra chi ra.

Nu nacatyí ra Festo tuhun ra Pablo chi ra Agripa

13 Yaha suhva quiví, tyicuan ta chaq rey Agripa chihin cu Berenice nya Cesarea, vatyí cuacuhva ñu nocumi chi ra Festo. 14 Quita suhva quiví chinyicu ñu yucuan, ta nacatyí ra Festo tuhun ra Pablo chi rey. Ta catyí ra:

—Iyó noo rayi ihya cha sandoq ra Félix vehe caa. 15 Ta

cha chahin Jerusalén, ra cuví nuu chi tata sutu, ta ra cacuví mandoñi ñu Israel chaha cuenda ra noo tutu cuatyí ra, ta chicán ñu na cúvi ra. ¹⁶ Ta catyí yuhu chi tandihí ra vatyí ña tuhvá ra cuví tyiño cuenda Roma chahñi chi noo ñáyivi tatu ta cahan tahan ca ñu ta nducu ñu cuhva sacacu ñu chi ñu. ¹⁷ Yucuan chaha, quivi quichi coyo ra cacuví nuu chi ñu Israel cuan, ña sacunaj cuhva. Ta cha inga quivi chahin vehe tyiño vatyí cutuñi chí ra cha cacahán ra tuhun. Ta tachí tyiño na quichi ra cuan. ¹⁸ Soco ra catyaa cuatyí siqui ra, ña cuaha maa tuhun cacahan ra. Ta cuñí maa yuhu vatyí cahnú cuatyí cuatyaa ra siqui ra. ¹⁹ Cuñí ra cuan cuatyí chihin ra cha cuenda tuhun costumbre, cuhva chinó iñi ñu Israel. Cahán ra tuhun noo ra cha nañi Jesús cha chihí. Ta ra Pablo catyí ra vatyí iyó ra. ²⁰ Ta ña chité yoso caa sacuvi chihin tuhun cha tyicuan caa, ta ndaca tuhun chi ra Pablo tatu cuñí ra cahun ra Jerusalén, vatyí cutuñi chi ra cuenda tuhun ihya. ²¹ Soco maa ra chicán ra cha cutuñi chi ra nuu rey cahnú Augusto nya Roma. Yucuan chaha ñohó ca ra vehe caa nyacua nya cuví tachi chi ra nuu ra Augusto —catyí ra Festo chi rey Agripa.

²² Tyicuan ta ra Agripa catyí ra chi ra Festo:

—Cuñí tucu yuhu cuiñi cha cahán ra cuan —catyí ra.

Ta ra Festo catyí ra chi ra:

—Tyaan cuiñun cha cahán ra —catyí ra chi ra.

²³ Tuví inga quivi ta chaa ra Agripa chihin cu Berenice. Iyo xaan caa ñu quihvi coyo ñu chichi vehe vatyí rey cuví ñu. Quihvi tucu comandante ta ra cacuví tyiño ñuu cuan. Tyicuan ta ra Festo catyí ra na quichi ra Pablo. ²⁴ Tyicuan ta quichaha catyí ra Festo:

—Yoho Rey Agripa, ta nyoho tata, cha nyicu ndo ihya. Nyehe ndo chi ra ihya. Tandihí ñu Israel ñuu Jerusalén ta ñu Cesarea cahan ñu siqui ra. Ta ña sandihí ñu cha catyí ñu chii vatyí tahán chi cúvi ra. ²⁵ Soco cha cuenda yuhu ñahri cuatyí ra cha tahán chi cúvi ra. Ta suri maa ra chicán cha cutuñi chí ra nuu ra Augusto. Yucuan chaha cutachi chí ra. ²⁶ Soco vatyí ñahri cuatyí ra ñihí, yucuan chaha ña ñihí tuhun tyai nu tutu cha cusacuhin chi ra nyacá ñaha chí yo. Yucuan chaha cané chi ra Pablo nuu ndo, ta nuu yoho Rey Agripa, tacuhva tyi ndaca tuhun chí ra ta cote ñáa cha tahán chí sacote chí rey cahnú. ²⁷ Vatyí ña vaha cha sacuhin chí ra tatu ñahri tuhun cahín ñáa cuatyí ra.

26

Nu quichaha cahán ra Pablo nuu rey Agripa

¹ Tyicuan ta ra Agripa catyí ra chí ra Pablo:

—Cuví cahun vityin —catyí ra chí ra.

Ta ra Pablo sandaa ra ndaha ra ta catyí ra tyehe caa:

2 —Sii xaan cuñi vatyí cuví cahin nuu yoho, rey Agripa, ta cuví catyí mai chuun yoso caa tandihi cuatyí cha tyaá ra Israel siqui. 3 Vatyí, yoho chitón tandihi costumbre cha iyó chi yo ñu Israel. Ta chitón tuhun tuhva yo cuví yuhu. Yucuan chaha chiquén chuun nacuiñi vahun cha cahín.

Nu catyí ra Pablo chi ra Agripa yoso caa ñayivi ra chani cumañi ca quihvi ra cuenda ra Cristo

4 Tandihí ñu Israel chitó ñu yoso caa chiye nyata ni luhli nya ñui. Ta chitó ñu cuhva chiye nya Jerusalén. 5 Ta suri chitó ñu vatyí nyata luhli cuví noo fariseo. Ta ra fariseo vaha xaan caquichahá ra costumbre yo. Ta na catyí maa ñu tatu ña ndicha cha cahín. 6 Ta vityin nanyaí ihya ta cutuñi chii cha cuenda vatyí chinó iñi cha sanandotó Nyoo chi ñayivi chihí, tari cuhva catyí ra chi sutu chahnu yo ta cha naha. 7 Ndi uchi uvi tahan ityi ñayivi Israel ñu vachi tata sutu chahnu yo nyatú tucu ñu nyehe ñu tyi ndicha cusanandoto Nyoo chi ñayivi chihí. Ta yucuan chaha nyita ri sacuví ñu tyiño nuu Nyoo sacahnu ñu chi ra ñicahñu ta cha cuaa. Vatyí suri cha cuenda tuhun ihya tyaá ra Israel cuatyí siqui vityin, yoho rey Agripa. 8 ¿O ña chinó iñi nyoho vatyí Nyoo sanandotó ra chi ñu chihí?

9 "Ta quivi cuan suri mai chicá xiñi vatyí vaha cha tachí tuñi chi ñayivi chinó iñi chi ra Jesús ra ñuu Nazaret.

10 Ta tyicuan caa chinyacuví nya Jerusalén chihin ndusu yuhu ra cacuví nuu chi tata sutu. Ta cuaha ñu cha chinó iñi chi ra Cristo tyihí vehe caa. Ta tatu cachahñi ra chi ñu, vaha xaan cuñi. 11 Cuaha chaha sanyehí tindocho chi ñu ta sahí fuerza chi ñu nacahan ña vaha ñu siqui ra Jesús. Tyehe caa chinyacuví tandihí ri vehe ñuhu ñu Israel. Ta xaan xaan cuñi nyehi chi ñu. Ta chicá nyiquen chi ñu nyacua nya inga ñuu.

Nu nacatyí tucu ra Pablo yoso caa nanduvi ra, ra cuenda ra Cristo
(Hch. 9.1-19; 22.6-16)

12 "Ta yucuan chaha cuahin quivi cuan nya ñuu Damasco chihin ndusu yuhu ra cuví nuu chi tata sutu. 13 Socoyoho Rey, ityi cuahin ñáá cuhva ora, nyehí noo nduva ñuhu quichi andivi, ñihi ca ican saha ñuhu ñanyii. Sandundichin chi nicachico nu cuahin ta ra cuahan coyo chihin. 14 Tyicuan ta tandihí ndi nduva ndi nu ñuhú. Ta chiñi noo ndusu cha cahán chihin, chihin sahan yo hebreo, ta catyí chi chii: "Saulo, Saulo, ¿ñáá tuhun cha chicá nyicon chii? Tari noo quití chañi nyaa ti chata cha xaan cha saquehén ityi ra chi ti, tyicuan caa cuñún sañicuehun suri chi maun", catyí ndusu cuan chii. 15 Tyicuan ta catyí yuhu: "¿Yóó yoho tata?" Ta Sutú Mañi yo catyí ra chii: "Yuhu cuví ra Jesús, ra cha chicá nyicon chi. 16 Ndicuita ta cuinanyaun, vatyí yuhu

tuví nuun tacuhva vatyí cuasacuvun tyiño nui, vatyí cuacuvun cha ndaa cha nyehun vityin. Ta cucuvun cha ndaa cha nyehun chii nu cuahan ca chi. ¹⁷ Cusacaqui chuun ndaha ra Israel, ta ndaha ra cha ñima ra Israel cuví. Nu nyicú ñu tachí chuun vityin. ¹⁸ Vatyí na nuñon nuu ñu, ta sañahun chí ñu cha ndicha, ta ma sacuvi ca ñu cha ña vaha. Soco sacuvi ñu cha vaha nu ndichin Nyoo vatyí quita ñu chichi ndaha ra ña vaha ta ndihvi ñu ndaha Nyoo tacuhva vatyí tyicuan caa cusahitacahnu iñi cuatyí ñu ta cunaquehen ñu cha vaha cha chahá Nyoo chí ñáyivi yihí cuenda ra”, catyí Sutu Mañi yo chii.

¹⁹ Yucuan chaha rey Agripa, sacuví cha catyí Sutu Mañi yo ra Jesucristo chii nu sañaha ra chí ra chii. ²⁰ Ta cahín tuhun ra xihna ca chihin ñu nyicu ñuu Damasco. Yahá cuan ta cahín chihin ñu ñuu Jerusalén ta tandihí ityi Judea. Ta cahín chihin ñu cha ñima ñu Israel cuví ñandihí. Sacote chí ñu nandu uvi iñi ñu cuatyí ñu, ta nandihvi ñu chichi ndaha Nyoo cha ndicha cuii. Na nasama ñu cuhva iyó ñu chihin cha sacuvi ñu cha vaha. ²¹ Cha cuenda ihya catiñ ra Israel chii chichi vehe ñuhu cahnu. Ta cacuñi ra cahñi ra chii. ²² Soco maa Nyoo tyinyeé chii. Ta iyó que nya vityin. Ta cahín tuhun Nyoo chihin tandihí ñáyivi, ñu ndahvi ta ñu tyayii. Ta ña cahín inga tuhun cha ña

catyí ra Moisés ta ra profeta, vatyí cucuvi nu cuahan ca chi. ²³ Vatyí catyí ra vatyí tahán chí cha cunyehe ra Cristo tindoho. Ta cha yahá cha cúvi ra, cunandoto ra. Ta ican ra cuví ra cunandoto xihna ca. Ta cusacata ra tari noo ñuhú ityi cuahan ñáyivi vatyí sacotó ra yoso caa cacu añima ñu, ñu Israel ta ñu cha ñima ñu Israel cuví —catyí ra Pablo.

Ra Pablo cuñí ra cha nachino iñi rey Agripa ta cunyicon ra chí ra Cristo

²⁴ Cuhva cha catyí ra Pablo tuhun ihya, ra Festo canachaa ra, ta catyí ra:

—¡Loco yoho Pablo! cha cuenda cha cuaha xaan sacuahún ta ndulocon —catyí ra Festo chí ra.

²⁵ Soco ra Pablo catyí ra chí ra:

—Ña loco yuhu, yoho tata Festo. Soco cha cahín, maa maa ri tuhun ndicha cuví. ²⁶ Ihya nyaá rey Agripa. Ta chitó vaha ra tuhun ihya. Yucuan chaha cahín chihin cha ña cahán nui. Vatyí chité tyi chitó tucu maa ra tuhun ihya, vatyí ñima tuhun xehe cuví. ²⁷ Yoho rey Agripa, ¿atu chinó iñun tuhun cha catyaa ra profeta cuenda Nyoo ta cha naha? Yuhu chité vatyí chinó iñun —catyí ra Pablo chí ra Agripa.

²⁸ Tyicuan ta ra Agripa catyí ra chí ra:

—Suhva cuii ri ca ta nachino iñi tuhun cahun ta quihvi cuenda ra Jesús —catyí rey Agripa chí ra Pablo.

²⁹ Tyicuan ta ra Pablo catyí ra:

—Cuví ri suhva, o cuví ri cuaha soco chi Nyoo chiquén vatyi na nduvi ndihun ñáyivi cuenda ra Jesús tari mai. Ta ñima yoho ri, soco tandihí ri ñáyivi, ñu chiñí tuhun cahín. Noo ri cha ña cuñí, cha quihí cadena ndaha ndo tari mai vityin —catyí ra Pablo.

³⁰ Cha yaha cha catyí ra Pablo tuhun ihya, ndicuita rey ta gobernador ta cu Berenice, ta tandihí ra canyicú yucuan. ³¹ Ta cha yaha quita coyo ñu, ta cacatyí ñu chi tahan ñu:

—Ñahri cuatyí ra ihya cha ñihi xaan. Ña tahan chi cúvi ra. Ta ni ña tahan chi cohon ra vehe caa —catyí ñu.

³² Ta ra Agripa catyí ra chi ra Festo:

—Cuví saña yo chi ra, tyehe ta ñima maa ra chicán cha cutuñi chi ra nuu ra cuví rey cahnu —catyí ra.

27

Nu tachí ra Festo chi ra Pablo nya ñuu Roma

¹ Quivi cha catyaa ra Festo ta ra Agripa cuhva tyi tachí ra chi ndi nya ñuu Roma ityi Italia, nacuhva cuenda ra chi ra Pablo ta suhva ca ra chi noo capitán cha nañi Julio. Yihí ra noo batallón sindaro, cha nañi Cuenda Ra Augusto. ² Ta cuahan tucu ra Aristarco chihin ndi ñandihí. Ra ñuu Tesalónica cha nyaá ityi Macedonia cuví ra. Tyicuan ta quihvi ndi chichi noo barcu cha quichi ityi ñuu Adramitio ta cuhun chi ñuu

cha nyicú yuhu tyañuhu ityi Asia. ³ Cha inga quivi cha ndi puerto Sidón. Ta ra Julio vaha ñáyivi cuví ra chihin ra Pablo. Ta chaha ra cha cunyehe ra chi ra tahan ra ñuu cuan. ⁴ Yaha cuan ta quita ndi Sidón ta casanda ra sahma barcu cuan ta chihin fuerza tatyí ri cuahan ndi. Ta vatyi caa tatyí siqui ndi yaha ndi chiyo xehe ca ñuhú Chipre. Vatyi ña ñihi xaan caa tatyí chiyo cuan. ⁵ Yaha sava ndi tyañuhu ityi nuu Cilicia ta Panfilia, ta cha ndi noo ñuu cha nañi Mira ityi Licia. Ta noo ndi barcu cuan.

⁶ Yucuan nañihí capitán cuenda sindaro nonga barcu cha quichi nya ñuu Alejandría ta cuahan chi Italia. Ta catyí capitán na quihvi ndi barcu cuan vatyi cuhun ca ndi nu cuahan ndi. ⁷ Cuaha quivi chica ndi cuee ri. Ta chihin cha cuaha tindoho ta cha ndi yatyin ri ñuu Gnido. Ta cha cuenda cha ñihi xaan caá tatyí, ña chaha chi cha cuhun ndi ityi nuu, ta yaha ndi yatyin ri ñuu Salmón. Ta nacuico ndi ityi yuhu ñuhú Creta. ⁸ Nducu ndi cuhva cha cuhun ndi yuhu tyañuhu cuan ta cha ndi nu nañi Buenos Puertos yatyin ri ñuu Lasea.

⁹ Cha cuaha xaan quivi yaha ta cha yica xaan nanduví cha caca noo ndi ityi nu tyañuhu. Vatyi cha yaha quivi vico ayuno nu ña chachi ñu Israel. Ta cha cuyatyin yoo vichin. Yucuan chaha ra Pablo chaha ra tuhun chi ra

sacaca barcu cuan, ¹⁰ ta catyí ra:

—Nyoho ra canyicú ihya, cuiñi ndo tuhun cahín. Nyehí vatyí yica xaan cuhva cuahan yo. Ta tuví iñi vatyí cuaha xaan cusacunaa yo. Cunaa barcu ta cha nyisó chi ta nyacua nya maa yo ñandihí. Vaha taxin ca nandoo yo ihya —catyí ra chi ra.

¹¹ Soco capitán cuenda sindaro cuan quichahá ca ra chi ra sacacá barcu chihin chitoho barcu ta ñima ca chi ra Pablo. ¹² Ña cuví yaha ndi yoo vichin yucuan tyi ñihi xaan tuhvá caa tatyí, ta yica xaan cuenda barcu. Yucuan chaha tandihí ra ta catyí ra:

—Vaha ca cha quita yo ihya ta nducu yo cuhva chaa yo nya ñuu Fenice suri ñuhú Creta ihya. Yucuan cuví noo nu vaha cunyaa barcu vatyí nyaa ñuu cuan chiyo caña ñanyii —catyí ra.

Nu ñihi xaan caá tatyí nu tyañuhu

¹³ Tyicuan ta quichahá caa chiin tatyí cha quichi ityi sur. Ta cuñí maa ra vatyí vaha xaan vatyí ñima tatyí ñihi cuví, ta cuví cuhun ra chihin barcu ra ñicañi ri yuhu tyañuhu ñuhú Creta cuan. ¹⁴ Ña cuaha ri chicá ra ta quichahá caa noo tatyí xaan cha quichi ityi norte. Ta tyandahá chi barcu inga ityi. ¹⁵ Ta ña cuví ca cuhun ndi ityi nuu ca cha cuenda tatyí cuan. Ta saña ndaha ndi nacuhun maa barcu chihin tatyí nya ityi cuñí maa chi. ¹⁶ Ta tyandahá tatyí chi ndi

ityi chiyo satyin noo ñuhú luhlu cha nañí Clauda. Ta chihin cha yíi xaan naquehen ndi lancha luhlu cha xitá quiñoho barcu, ta natyihí ndi ityi chichi barcu coto nyee chi. ¹⁷ Ta cha yahá natyihí ra lancha cuan, yucuan ta chahñi vaha ra yoho nicachico barcu vatyí coo fuerza chi. Ta yuhví ra coto tahan ra nu yaxin ndutya ta quihví barcu cuan chichi ñiti vita iyó yuhu tyañuhu nu nañí chi Sirte, yucuan chaha sanoo ra sahma barcu ta chahá ra cha cuhun barcu yoso cuhva tyandahá tatyí. ¹⁸ Ta cha inga quiví suri ñihi xaan caá tatyí. Yucuan chaha quichahá catuchi ra carga nu tyañuhu. ¹⁹ Ta cha cu uñi quiví quehen ndi ndaha tyiño barcu ta tyihí ndi nu tyañuhu. ²⁰ Ta cuaha quiví ña nyehe ndi ni ñanyii ta ni tiño. Ta ñihi tatyí nañí chi ndi. Yucuan chaha ña tyaá ca ndi cuhva cha cacu ndi.

²¹ Cuaha quiví yahá ta ña chachí ndi. Tyicuan ta catyí ra Pablo chi tandihí ra:

—Nyehe ndo, vaha ca tyehe ta quichahá ndo chii quiví cuan, ta ndoo taxin yo Creta cuan. Ta vityin nyehé xaan yo tindoho ihya ta cuaha ndaha tyiño sacunaá yo. ²² Soco vityin ma caca xaan iñi ndo vatyí ni noo yo ta ma cuví yo. Barcu ihya cuví cha cunaa. ²³ Vatyí Nyoo nyacá ñaha ra chii, ta sacuví tyiño nuu ra, sanyehe ra noo visión chii cuñi. Ta tuví noo ángel nui. ²⁴ Ta catyí

ángel cuan chii: “Ma yuhvun, Pablo. Vatyí cuñí chi cha cahun tuhun Nyoo nuu rey cahnu Augusto nya Roma. Ta cha cuendon cusacacu Nyoo tandihí ra canyicu chuhun chichi barcu”, catyí ángel cuan chii. ²⁵ Yucuan chaha nyoho cha ñohó ndo chichi barcu, saníi ndo íni ndo. Vatyí yuhu chinó íni chi Nyoo. Ta chitó vahi vatyí cuví tari cuhva catyí ángel cuan chii. ²⁶ Vasi cuanyee barcu soco cuachaa yo noo ñuhú luhlu —catyí ra Pablo chi tandihí ndi.

²⁷ Noo cha cuaa quívi ndihí chahun quívi chica ityi ndi nu tyañuhu, ñohó ndi nu tyañuhu Adria. Ta chata cuan chata ihya tyandahá tatyí chi barcu ndi nu tyañuhu. Ta vasi ora ñuu cuví cuhva cuan ta tuví íni ra sacacá barcu cuan tyi cuachaa ndi noo ñuhú. ²⁸ Tyicuan ta tyicuhva ra cha cono ndutya. Ta nyehe ra tyi oco chahun ín tahan metro iyó. Cuahan ndi chiin ca ityi nuu ca. Ta tyicuhva tucu ra inga chaha. Ta iyó oco ucha metro. ²⁹ Ta cayuhví ra coto nañi barcu cuan chata yuu. Yucuan chaha casanoó ra cumi tahan caa vee cha nyaa gancho nuu, ityi chata barcu. Ta ña íni ca ra cha cundichin. ³⁰ Ta ra sacacá barcu cuan catyaa ra cuhva cacono xehe ra. Ta yucuan chaha quichaha casanoó ra lancha cuan nu ndutya ityi nuu barcu cuan. Ta sahá ri maa ra tyi inga caa casanoó ra. ³¹ Soco ra Pablo sacotó ra chi capitán ta chi sindaró ta

catyí ra:

—Tatu ma ndoo ra cuan chichi barcu. Nyoho ma cuví cacu ndo —catyí ra chi ra.

³² Tyicuan ta sindaro cachahnya ra yoho lancha. Ta casanacava ra nu ndutya.

³³ Ta cha ñaa ca cuan ra Pablo catyí ra chi tandihí ra:

—Cha iyó uchi cumi quívi cha ta cachi ca yo. ³⁴ Catyí chi ndo, na cachi yo vityin. Niñi xaan cuñí chi cha cachi yo ta ndunyee coño ñuhu yo. Vatyí cucacu yo ta ni noo íxi xiñi yo ta ma cunaa.

³⁵ Ta cha catyí ra tuhun ihya, ra Pablo quehen ra noo pan ta nacuhva ra tyahví nyoo chi Nyoo nuu tandihí ra. Tyicuan ta tahví ra ta quichaha chachi ra.

³⁶ Tyicuan ta tandihí ca ra candunií ca íni ra ta cachachi ra ñandihí. ³⁷ Ta cha tandihí ndi cha ñohó ndi chichi barcu cuan, quita uvi ciento uñi xico chahun ín tahan ñáyivi. ³⁸ Cuhva cha ndihí ca chachi ra ta tuchi ra yitín cha yihí trigu nu tyañuhu na nduñahma ca barcu.

Nu nyeé barcu

³⁹ Yaha cuan ta cundichin. Ta canyehe ra cha sacacá barcu noo ñuhú, soco ña canicohon nuu ra nya cuví cuan. Nyehe ra noo nu iyó ñiti. Ta catyaa ra cuhva nyehe ra tatu cuví sacuhun ra barcu yucuan. ⁴⁰ Cachahnya ra yoho cha nuhñi caa vee cuan. Ta sandoó ra chichi tyañuhu. Ta casandutaya ra vitu cha sanacuico barcu. Tyicuan ta casandaa ra

sahma cha tuhvá chitacaá ityi nuu barcu. Ta quichaha quehen tatyí sahma cuan, ta sacuhún chi barcu nya nu iyó ñiti cuan. ⁴¹ Ta chaa barcu cuan noo nu nañi tahan ndutya. Ta nyee xiñi chi chichi ñiti. Ta ña cuví ca natava ra. Ta suhva ca cha ña quihvi chichi ñiti, ñihi xaan cañi tyañuhu chi chi, nyacua tahvi cuatyí chi. ⁴² Tyicuan ta sindaro cacuñi ra cahñi ra chi ndi cuii maa ra cuahan cuacutuñi chi nuu ra cuví rey cahnu, coto cacono ra. ⁴³ Soco capitán sindaro cuñi ra sacacu ra chi ra Pablo. Yucuan chaha ña chaha ra cahñi ra chi ra, soco catyi ra vatyí nya ra cachitó sutya, na cuhun cuee ra nu ndutya ta quita ra nya ñuhú ityi. ⁴⁴ Ta tandihi ca ra cha ña cacuví sutya, na quehen ra vitu cha nyisó barcu, ta suhva ra chihin yiquin vitu barcu cha tahvi tyañuhu. Ta tyicuan caa cacacu tandihi ndi ta quita ndi ñuhú ityi.

28

Nu ñohó ra Pablo ñuhú Malta

¹ Cuhva cha cha yaha cacu ndi ta catyi ñáyivi iyó ñuhú cuan vatyí nu nyaá ndi nañi chi Malta, o Melita. ² Ta vaha xaan tyiñuhu ñu chi ndi. Ta sanatahan ñu ñuhu vatyí coón savi ta vichin xaan. Ta catyi ñu chi tandihi ndi, natuhva ndi yuhu ñuhu cuan natava ndi cha vichin ndi. ³ Tyicuan ta ra Pablo naquehen ra suhva nducu tyihí ra nu ñuhu. Ta noo

coo quita chichi nducu cuan, cha cuenda cha ihñi. Ta chachi yihí ti ndaha ra Pablo ta ndoo ti tacaá ti ndaha ra. ⁴ Cuhva cha canyehe ñáyivi ñuhú cuan tyi tacaá coo cuan ndaha ra, quichaha catyi ñu chi tahan ñu:

—Ra ihya vasi noo ra chahñi ñáyivi cuví ra, vatyí vasi cacu ra nu tyañuhu soco ña chahá Nyoo cha coo ca ra cha cuenda cuatyí ra —catyi ñu.

⁵ Soco ra Pablo naquisi ra chi coo cuan, ta canacava ti nu ñuhú, ta ñahri cuví chi ra. ⁶ Tandihi ñu nyatú ñu ñáá cuhva ndaa nu tyaa ti, o ñáá cuhva cúvi ra. Soco cha yaha nyatu xaan ñu, ta nyehe ñu vatyí ñahri maa cuví chi ra. Tyicuan ta nasama ñu cuhva chicá xiñi ñu, ta quichaha catyi ñu:

—Minoo nyoo cuví ra —catyi ñu.

⁷ Yatyin ri cuan nyaá ñuhú ra cha cuví nuu ñuhú cuan. Publio nañi ra. Ta vaha xaan cahan ra chihin ndi. Ta tyiñuhu xaan ra chi ndi, ndoo ndi vehe ra uñi quivi. ⁸ Ta cuhvi xaan sutu ra chihin cahñi ta cha chiyó ra. Ta ra Pablo chahan ra chinyehe ra nu catuví ra. Ta chican tahvi ra chaha ra. Ta tyiso ra ndaha ra siqui ra ta nduvaha ra. ⁹ Yaha cuan ta quichaha caquichí tucu inga ñu cuhvi cha iyó ñuu cuan. Ta nduvaha tucu ñu. ¹⁰ Ta tandihi ñu tyiñuhu xaan ñu chi ndi. Ta quivi quihvi ndi chichi barcu cha cuacuhun ndi, chaha ñu

tandihí cha cuchihñuhu chi ndi ityi cahun ndi.

Nu chaq ra Pablo ñuu Roma

¹¹ Uñi yoo ñohō ndi Malta cuan. Tyicuan ta ñihí ndi noo barcu cha quichi nya ñuu Alejandría ityi Egipto. Ta ndoō chi Malta nya yahā yoo vichin. Ta nyaa noo cha natava ñu, noo xiñahñu nyoo Cástor ta nyoo Pólux, xiñi chi. Quihví ndi barcu cuan ta cuahan ndi. ¹² Ta chaq ndi ñuu Siracusa. Ta yucuan ndoō ndi uñi quiví. ¹³ Ta yucuan ta quitā ndi ta cuahan ndi ityi yuhu tyañuhu nyacua nya chaq ndi ñuu Regio. Ta cha inga quiví cuan caa xaan tatyí cha quichi ityi sur ta chica ndi uvi quiví ta chaq ndi ñuu Puteoli. ¹⁴ Yucuan ñihí tahan ndi chihin suhva ra hermano. Ta catyí ra chí ndi cha ndoó ndi noo vitya chihin ra. Yahā cuan ta quitā ndi ta cuahan ndi nya ñuu Roma.

¹⁵ Ta ñu yihí cuenda Nyoo ñuu Roma cuan ñihí ñu tuhun tyi cua cha ndi. Ta chahan coyo ñu chisatahan ñu chi ndi ityi. Suhva ñu nyatú ñu chi ndi Nuyahví Apio. Ta inga ñu ñihí tahan ñu chihin ndi nya nu nañi Tres Tabernas. Ta cha nanyehē ra Pablo chí ñu, nacuhvā ra tyahvi nyoo chi Nyoo. Ta ndunñi ca iñi ra.

¹⁶ Cuhva cha chaq ndi Roma cuan, capitán cuan nacuhvā cuenda ra chí ra ca iyó cuatyí cuan chí noo ra cuví nuu chí ra sahá cumi vehe caa. Ta chahā ra cuan cha coo siin ra Pablo. Ta noo ri sindaro sahá cumi chí ra.

Nu cahán ra Pablo tuhun Nyoo ñuu Roma

¹⁷ Uñi quiví cha yahā cha ndi yucuan. Tyicuan ta tachí ra Pablo tyiño naquichí coyo ra cacuví nuu cuenda ñayiví Israel cha iyó ñuu Roma cuan. Ta kuhva cha ndu ñin ri ra, quichaha catyí ra chí ra:

—Nyoho yañi, vasi ñahri sacuví chí ñu Israel tahan yo, ta ni ñahri sacuví siqui costumbre sutu chahnu yo, soco chahā cuenda ra Israel chii chí ra ñuu Roma. Ta ñohí vehe caa Jerusalén ndaha ra ñuu Roma. ¹⁸ Ta cha cutuñí chí, ta cuñí ra nyacá ñaha casaña ra chii. Vatyí ñahri cuatyí cha cahnu cha tahan chí cúví. ¹⁹ Soco cha cuenda cha nduxaán xaan ra Israel siqui, chican taxin cha cutuñi chii nuu maa rey cahnu. Vasi ñahri cuatyí cuacaquen siqui ñu ñui nuu ra. ²⁰ Yucuan chaha canē chí nyoho vatyí cohon nui chí ndo, ta sacoté chí ndo vatyí nuhñi yuhu chihin cadena vityin cha cuenda cha yihí iñi yo, ñu Israel, chí Nyoo —catyí ra Pablo.

²¹ Tyicuan ta catyí ra Israel chí ra Pablo:

—Ña chitó maa ndi tuhun yoho. Ta yori casacotō chí ndi, ni chihin carta, ta ni ta yori ca quichí ityi Judea sacoto cha caun, o cahān ña vaha ñu sicun. ²² Soco cuñí ndi cuiñi ndi tuhun chicá xiñi yoho. Vatyí chitó ndi vatyí tandihí ri ityi cahán ña vaha ñáyiví siqui tuhun cha ihya —catyí ra Israel chí ra Pablo.

²³ Tyicuan ta catyihí tahan ra tuhun nya quiví quichi

coyo ra inga chaha. Ta cha chaq̄ quiv̄i cuan, chaq̄ coyo cuaha ñáyiv̄i nu iyó ra Pablo. Ta nya ñaha ri ta nya cha cuaa cahán ra Pablo tuhun yoso caa nyacá ñaha Nyoo añaíma yo. Ta chihin ley ra Moisés ta tuhun cha catyaa ra profeta Nyoo ta cha naha, sañahá ra chi ñu vatyí ra Jesús cuví ra cha sacacú chi yo, vatyí cuñi ra tyi nachino iñi ñu chi ra.

²⁴ Yihí ñu chinó iñi ñu cha catyí ra Pablo. Ta inga ñu ña chinó iñi ñu. ²⁵ Ta vatyí ña iin ri chino iñi ñu ta siin siin tuhun cahán ñu, ta quichahā cuahan coyo ñu. Ta ra Pablo catyí ra chi ñu:

—Ndicha xaan cha catyí Tatyí Ii chi sutu chahnu yo chihin yuhu ra profeta Isaías ta cha naha. Vatyí catyí ra tyehe caa:

²⁶ Cuahan ta catyí chi ñáyiv̄i ihya tyehe caa:

Nyoho cucuiñi ndo tuhun Nyoo.

Soco ma cutuñi iñi ndo. Ta cunyehe ndo chihin chiti nuu ndo cha sacuví Nyoo.

Ta ma tuvi iñi ndo. Tyicuan caa catyí chi ñu.

²⁷ Vatyí añaíma ñu cha ndundavā xaan.

Ta chiñí ri maa ñu tuhun Nyoo.

Ta natahán chiti nuu ñu, tacuhva cha ma cuví nyehe ñu.

Ta nicunyasí soho ñu.

Yucuan chaha ña chiñí ñu, ta ndundavā añaíma ñu.

Yucuan chaha ña cuñí ñu quihvi ñu chichi ndahi na sanduvahi chi ñu,

catyí Tatyí Ii chihin yuhu ra Isaías ta cha naha.

²⁸ 'Coto vaha nyoho vatyí vityin ta ityi nuu ca cuhin cusacote chi ñu cha ñima ñu Israel cuví vatyí sacacú Nyoo chi ñu. Ta maa ñu cuatyasoho ñu, —catyí ra Pablo chi ñu.

²⁹ Cuhva cha catyí ra Pablo tyehe caa, ra Israel cuahan coyo ra suri cuví yuhu ra chihin ra tahan ra tuhun cha cahán ra Pablo chihin ra.

³⁰ Uvi cuiya nani ndoo ra Pablo vehe nu nyaá ra cuenda yoo ñuu Roma cuan. Ta vaha cahán ra chihin tandihí ñu chahan vehe ra.

³¹ Ta chihin cha ni iñi ra ta cahan ra tuhun yoso caa nyacá ñaha Nyoo añaíma yo. Ta sañahá ra tuhun Sutu Mañi yo ra Jesucristo. Ta yori chasi cha cahán ra.

Carta Cha Sacuhun Ra Apóstol Pablo Chi Ñáyivi Ñuu Roma Cha Yihí Cuenda Nyoo

*Nu sacuhun ra Pablo tutu
chi ñu cuenda Nyoo ñu Roma*

1 Yuhu ra Pablo cuví noo ra sacuví tyiño nuu ra Jesucristo. Nacana ra chii, ta nacachi ra chii vatyi cuví apóstol chi ra, tacuhva vatyi sacote chi ñáyivi yoso caa sacacu Nyoo añima yo.

2 Ihya cuví tuhun cha catyi Nyoo chi yo tyi cusacuvi ra, ta chicunya nu tutu tuhun ra tandihi cha tyaa ra profeta ta cha naha. 3 Ican ihya cuví tuhun Sutú Mañi yo Jesucristo Sehe Nyoo cha cahán chi tuhun, vatyi quichi ra siqui ñuhu ñáyivi chihin coño ñuhu ra tari coño ñuhu maa yo. Tata rey David cuví chi ra. 4 Ta Nyoo chihin Tatyí li ra sacotó cachi ra chi yo vatyi Sehe ra cuví chi ra, vatyi sanandotó ra chi ra chihin cha ndicha ñuhu ra. 5 Ta cha cuenda maa ra Jesucristo chaha Nyoo tumañi iñi chi nyuhu cha cuhun ndi cucaca ndi tyiño ra, tacuhva nachino iñi ñáyivi chi ra nicahnu ñuhu ñáyivi, ta quichaha ñu chi ra. 6 Ta mahñu ñu cuan, ñohó tucu nyoho vatyi suri nacana tucu ra Jesucristo chi nyoho.

7 Sacuhín tutu ihya chi tandihi nyoho cha iyó ndo ñuu Roma. Cuñi Nyoo chi ndo ta nacana ra chi ndo vatyi coo ndo noo ñáyivi cachi cha sacahnu ndo chi ra. Na naquehen ndo cha vaha ta cha taxi ri cuñi añima ndo cha chahá Sutú yo Nyoo ta Sutú Mañi yo Jesucristo chi yo.

*Nu catyi ra Pablo vatyi
cuñi ra cuhun ra ñuu Roma*

8 Cha xihna ri chahi tyahvi nyoo chi Nyoi chihin sivi ra Jesucristo, cha cuenda tandihi nyoho. Vatyi tandihi ri ityi cahán ñu tuhun vatyi chinó xaan iñi ndo chi ra Jesucristo. 9 Ta tyiño nuu Nyoo sacuví yuhu chihin cha tandihi añime. Ta cahín tuhun yoso caa sacacu ra chi yo cha cuenda Sehe ra. Ta Nyoo cuví ra testigu vatyi chitó ra tyi tyicuan ri nicohón iñi chi ndo cuhva cha chicán tahvi chi ra. Ta chicán tahvi cha cuenda ndo. 10 Chiquén chi Nyoo na cuví cuhva cuñi ra, ta cuhin nu nyicú ndo, vatyi cha naha xaan cuñi cuhin. 11 Vatyi cuñi tyinyei chi ndo, ta naquehen ndo cha vaha cha chahá Nyoo ta cuní ca iñi ndo. 12 O cuñi chi catyi vatyi saní yo iñi tahan yo chihin cha chinó iñi yo, tari chinó iñi nyoho ta yuhu ñandihí.

13 Yañi, cuñi tyi coto ndo vatyi cuaha xaan chaha cuñi cunyehe nu nyicú ndo, soco nya vityin ta ña chaha chi cuhva chii. Cuñi vatyi cuní ca iñi ndo tari nduní ca iñi ñu vehe ñuhu inga ñuu nu chahín. Vatyi tatu nduní iñi

ndo, nduní tucu iñi yuhu. ¹⁴ Vatyí nyaá síqui cha cahin tuhun Nyoo chihin tandihí ñáyivi, an cuví ri ñu ñuu Grecia, an cuví ri ñu inga ñuu, an cuví ri ñu chiñi tuñi, an cuví ri ñu ña cutuñi iñi. Tahán chi cha cahin chihin tandihí ri ñu. ¹⁵ Yucuan chaha, cha cuenda yuhu, cuñi xain cahan tiqui tuhun Nyoo chihin nyoho cha iyó ndo ñuu Roma chiña.

Tuhun Nyoo iyó xaan cha ndicha ñuhu chi

¹⁶ Yuhu ña cahán nui cahín tuhun Nyoo, vatyí ihya cuví fuerza Nyoo cha sacacú chi tandihí ñáyivi cha chinó iñi chi ra. Ta cha xihna ri chi ñu Israel. Ta cha cu uvi, ñu inga ñuu. ¹⁷ Vatyí tuhun Nyoo ihya, sañahá chi chi yo yoso caa sacuvahá Nyoo chi yo nuu ra chihin cha chinó iñi yo chi ra. Ta suri cha cuenda cha chinó iñi yo, coo yo ñáyivi chaa chihin ra. Tyehe caa nyaá nu tutu tuhun Nyoo: “Ñu cha nduvahá aña saha Nyoo, coo ñu noo ñáyivi chaa chihin cha chinó iñi ñu chi ra.”

Tandihí ñáyivi ta iyó cuatyí ñu

¹⁸ Ta nyehé yo vatyí nya nu nyaá Nyoo nya andivi ta tachí tuñi ra chi ñáyivi quiñi iyó, ñáyivi ña vaha. Ta cha quiñi iyó ñu, ña chahá chi coto ñu cha ndicha. ¹⁹ Chitó vaha ñu tyí tuhun vaha cuví tuhun Nyoo vatyí suri maa Nyoo sañahá ra chi ñu. ²⁰ Vatyí vasi ña nyehé yo chi ra, cuví coto yo vatyí iyó ra vatyí

nyehé yo tandihí cha savahá ra. Nyata chinq ñuhu ñáyivi ta tandihí cha savahá ra ta sañahá chi chi yo vatyí maa ra cuví Nyoo, ta tunyee iñi cha iyó chi ra ma ndihí maa. Yucuan chaha ma cuvi catyí ñáyivi tyí yori Nyoo iyó. ²¹ Ta vasi cha chitó ñu tyí iyó noo Nyoo cahnu, soco ña sacahnú ñu chi ra tari cuhva tahán chi cha sacahnu yo chi ra. Ni ña nacuhva ñu tyahvi nyoo chi ra. Soco maa maa ri tuhun cha ñima ri tuhun chicá xiñi ñu. Ta cha cuenda cha ndava aña ñu, cutondo cha chiñi tuñi xiñi ñu ta ndoo ñu nu ñaa iñi. ²² Vasi catyí ñu tyí chitó xaan ñu soco ñu tondo cuví ñu. ²³ Vatyí cha nuu cha sacahnú ñu chi Nyoo ra cahnu ca cuví, ra ña tuhva chihí; sacahnú ñu chi xitohyo cha caá tari caá ñáyivi tuhva chihí. Ta nyacua nya xitohyo cha tari caá saa, ta coo, ta quití cha cumi tahan chaha, ta sacahnú ñu.

²⁴ Yucuan chaha saña ndaha ndihí Nyoo chi ñu na sacuvi ñu tandihí cha quiñi caa cha quichí cuví iñi ñu. Yucuan chaha maa maa ri tuhun cha cahán nuu yo nyacuví ñu chihin tahan ñu. ²⁵ Vatyí ña chinó iñi ñu cha ndicha vaha Nyoo. Vatyí noo cha ña ndicha, yucuan chinó iñi ñu. Ta sacuvahá ca ñu, ta casacahnú ca ñu cha savahá Nyoo ta ña cuñi ñu sacahnú ñu chi maa maa ra. Vatyí chi maa ra tahán chi sacahnú yo tyicuan ri maa. Ta na cuví chi tyicuan caa.

²⁶ Yucuan chaha saña

ndaha Nyoo chi ñu na sacuvi ca ñu cha chahá ticahan nuu chi ñu. Vatyí nyacua nya ñusihí nasama ñu cuhva nyacuví ñu, vatyí ca iyó ñu chihin tahan síhi ñu, ta ña tahán chi tyicuan caa. ²⁷ Ta tyicuan caa tucu rayíi, casandihí ra cha ca iyó ra chihin ñasihí ra, ta quichí cuví iñi ra cacao ra chihin tahan yíi ra. Ta canyacuví ra chihin ra tahan ra, tuhun cha chahá ticahan nuu chi ra. Ta cha cuenda cuan tachí tuñi Nyoo chi ra ta tiví ra cha cuenda cha quiñi caa cha canyacuví ra. ²⁸ Ta chaha cha ña cuñi ca ñáyivi nacoto nuu ñu chi Nyoo, yucuan chaha saña ndaha ra chi ñu na caca maa xiñi ñu cha quiñi caa, ta sacuvi ñu cha ña tahán chi sacuvi ñu. ²⁹ Vatyí tandihí nuu cha ña vaha sacuvi ñu. Iyó ñu chihin inga rayíi ta ñima yíi ñu cuví. Ta iyó ra chihin inga ñusihí ta ñima ñasihí ra cuví. Quiñi xaan iyó ñu. Quichi cuví xaan iñi ñu coo ca chi ñu. Nyacuví ñu cha quiñi caa. Nyiyó xaan iñi ñu cha chi inga ñáyivi. Chahñí ñu. Iyó ñu tísihí chihin tahan ñu. Sandaví ñaha ñu chi tahan ñu. Ta quiñi xaan ca iyó ñu. Ta ñii ñu cuendu. ³⁰ Cahán ña vaha ñu síqui inga ñáyivi. Ta tasi cuñi ñu nyehe ñu chi Nyoo. Tyityi iñi ñu. Ta cahnu sahá ñu chi ñu. Casanducuahá ca ñu cha quiñi caa. Ta ña quichahá ñu chi sutu ñu, ta chi síhi ñu. ³¹ Ña cuñi ñu tyasoho ñu tuhun vaha. Ña sacuvi ñu tuhun cahán ñu. Yori maa chi cuñi

ñu. Ta ña casahá ñu ticahnu iñi chi tahan ñu. Ña ndahvi cuñi ñu nyehe ñu chi tahan ñu. ³² Maa ñu chitó vaha ñu ñáá cha catyí Nyoo tyí sacuvi ñu, chitó ñu vatyí ñu casacuví cha ña vaha, tahán chi tuhun chihí chi ñu ta chuhun ñu anyaya. Soco maa ñu sañihí ca ñu sacuvi ñu. Ta nyacua síi cuñi ñu tatu sacuvi inga ñáyivi cha quiñi caa.

2

Tachí tuñi Nyoo chi ñáyivi soco chihin cha ndicha

¹ Yucuan chaha ñahri síqui tyaá ndo, nyoho ñu cha nyehé cha caá inga ñu ta cahán ndo. Ñahri saha, savahri ñu, yóo ri ñu cuví ndo. Vatyí tatu nyehún cha caá inga ñu ta cahún, suri maun sacóun cuatyun. Vatyí suri ñin ri cha sacuvún chihin ñu nyehún ta cahún. ² Vatyí chitó yo vatyí Nyoo tachí tuñi ra chi ñu nyacuví tyehe caa, soco chihin cha ndicha ta chihin cha ndaa, tachí tuñi ra. ³ Ta yoho cha cahán nyaun chi inga ñu, suri ñin ri cha sacuvún chihin ñu. Cutachi tuñi Nyoo chuun cha cahún tyehe caa. ⁴ ¿Ñáá tuhun ña quichahún cha cundahvi cuñi Nyoo nyehé ra chi yo ta cunyeé xaan ra cha sacuví yo? Vaha xaan ñáyivi cuví ra chihin yo. ¿Atu ña tuví iñun vatyí cha cuenda cha cundahvi cuñi ra nyehé ra chuun, ta nyatú ra cha nasamon cuhva iyón? ⁵ Soco yoho ndava xaan añimon. Ta ña cuñún nasamon cuhva

iyón. Ican cuan cuví cuatyun cha sacayá xaun, ta cuxaan ca cuñí Nyoo nyehé ra chuun ta ñihi ca cutachi tuñi ra chuun quiví cutachi tuñi ra chi ñáyiví. Ta cunyehe yo tyi chihin cha ndaa ta chihin cha ndicha tachí tuñi ra chi yo. ⁶ Tatu sacuví yo cha ña vaha, cutahan chi cha ña vaha chi yo. Tatu sacuví yo cha vaha cutahan chi cha vaha chi yo quiví cutachi tuñi ra chi yo. ⁷ Ta cuhva ra ñáyiví cha ma naa ca maa coo ñu cha nanducú cha vaha ta cha cahnu cuví Nyoo, ñu nanducú cuvaha nuu ra, ñu cha cuñí coo tyicuan ri maa. Cuhva ra tandihi cuan chi ñu cha cuenda vatyí sacuví ñu maa maa ri cha vaha chihin cha cama iñi ñu. ⁸ Soco ñihi xaan cutachi tuñi ra chi ñáyiví sacuví cuhva cuñí maa, ta ña cuñí ñu quichaha ñu tuhun ndicha Nyoo, ta sacuví ñu cha ña vaha. ⁹ Cuaha xaan tindoho ta tucuihya iñi cunyehe tandihi ñu casacuví cha ña vaha. Ta cha xihna ri cutachi tuñi ra chi ñu ñuu Israel, ñáyiví cuenda ra. Ta tyicuan caa tucu cutachi tuñi ra chi ñu cha ñima ñu Israel cuví. ¹⁰ Soco chi tandihi ñu cha sacuví cha vaha, Nyoo cucuhva ra cha cucahnu ñu chihin ra, cha xihna ri chi ñu Israel, tyicuan ta chi ñu cha ñima ñu Israel cuví. Ta cucatyí ra tyi sñi cuñi ra chihin ñu. Ta cucuhva ra cha taxi ri coo añima ñu.

¹¹ Vatyí Nyoo ña cachí ra chi yo. Cuví ri yo ñu chitó, o cuví ri yo ñu ña chitó, ñn ri cuhva cuñí maa ra chi yo. ¹² Vatyí

tandihi ñu casacuví cuatyí ta ña chitó ñu ley cha chaha Nyoo chi ra Moisés, cunaa ñu nuu Nyoo soco ñima cha cuenda tuhun cha catyí ley cuan. Ta ñu casacuví cuatyí ta chitó vaha ñu ley cha chaha Nyoo chi ra Moisés, cutachi tuñi Nyoo chi ñu yoso cuhva catyí suri maa nuu ley cuan. ¹³ Vatyí ñu cha chiñí ley, ta ña nyacuví ñu cuhva catyí Nyoo, ñima ñáyiví vaha cuví ñu nuu ra. Soco tyehe ta iyó noo ñu sacuví cuhva catyí ley, ican ñu cuan, vaha ñu nuu Nyoo. ¹⁴ Tatu ñima ñu Israel cuví ñu ta ña chitó ñu ley cuan, soco tuví iñi ñu yoso caa coo ñu; cha tuví iñi ñu chichi añima ñu, ican cuví ley ñu. ¹⁵ Vatyí chihin cuhva iyó ñu, sañahá ñu vatyí añima ñu ñohó ley Nyoo. Cha chiñi tuñi ñu cuví cha ndaa cuenda ñu, vatyí suri maa ñu tuví iñi ñu tatu vaha o ña vaha cha nyacuví ñu. ¹⁶ Cha tyaa Nyoo tyiño chi ra Jesucristo vatyí coo quiví cusandaa ra cuatyí tandihi ñáyiví iyó siquí ñuhu ñáyiví cha cuenda tandihi tuhun xehe cha sacuví ñu. Tari cuhva catyí tuhun Nyoo cha cahín chihin ndo, tyicuan caa cusandaa ra cuatyí yo.

Ñu Israel nyicón ñu ley cha chaha Nyoo chi ra Moisés

¹⁷ Soco yoho catyún tyi ra Israel cuvún. Ta catyún tyi sacuvún cuhva catyí ley cha chaha Nyoo chi ra Moisés, ra cuví nuu chi ñu Israel quiví cuan. Ta cahnu sahún chuun tyi catyún tyi caá tuhun Nyoo añimon. ¹⁸ Ta chitón cuhva

cuñi Nyoo ta ley cuan sañahá chi chuun cha nacachún cha vaha, catyún.¹⁹ Ta vaha xaan sañahún ityi chi ñu cuaa, cuñi maun. Vaha xaan sacatón ñuhú chi ñu cuahan nu ñaa iñi, cuñi maun.²⁰ Ta cuñi maun vatyi chitón saquehen ityun chi ñu cha ña chitó. Ta vatyi chitón tandihí cuii ley ta cha ndicha, chitón yoso caa sañahun chi ñu ña chitó, cuñi maun.²¹ Tatu tyicuan caa yoho sañahún chi inga ñáyivi, ¿ñáá tuhun ña sañahún chi maun? Tatu suri maun catyún vatyi ña tahán chi suhu yo, ¿ñáá tuhun cha tyi maun suhún? ²² Tatu suri maun catyún vatyi ña tahán chi coo inga ñusihí chi noo rayi, o inga rayi chi noo ñaha sihi, ¿ñáá tuhun cha vatyi maun tyicuan caa sacuvún? Tatu tasi cuñún chi xitohyo, ¿ñáá tuhun cha suhún cha tyayí cha iyó nu nyicú chi chichi vehe ñuhu? ²³ Cahnu sahún chuun vatyi chitón ley Nyoo, soco ticahan nu chahún chi Nyoo cha cuenda cha ña sacuvún ley cuan.²⁴ Yucuan chaha vatyí nu tutu tuhun Nyoo catyí chi tyehe caa: “Ñu cha ñima ñu Israel cuví, cahán ña vaha ñu siqui Nyoo cha catyí nyoho”, catyí chi.

²⁵ Ndicha vatyí cha sacuvi ñu tuhun cha tahnya chiin ñi xiñi ndivun ta leun, cha saha ñu circuncidar chuun cuví cuan, tari noo seña cha sañahá vatyí ñáyivi chi Nyoo cuvún. Tuhun cuan tyinyeé chi chuun soco tatu quichahún tandihí

ley cha chaha Nyoo chi ra Moisés ñandihí. Soco tatu ña sacuvún cha catyí ley cuan, tari quivi cha ña sacuvún costumbre circuncisión cuví cuan.²⁶ Soco tatu ñu cha ña sacuvi tuhun cuan, ta sacuvi ñu cuhva catyí ley Nyoo, cusaha Nyoo tari cha sacuvi ñu costumbre circuncisión cuan, vasi ña sacuvi ñu.²⁷ Ra cha ña sacuvi costumbre cuan, soco quichahá ra cuhva catyí ley, cusanatuvi ra chi yoho cha ña quichahún, ta yoho, ra chitó ley ta ra sacuvi costumbre circuncisión cuvún.²⁸ Vatyí ñima cha cuenda vatyí ñu Israel cuví ndo ta chihin cuan ta cuví ndo ñáyivi chi Nyoo. Ta ni ñima cha cuenda cha sacuvi ndo tuhun circuncisión.²⁹ Vatyí ñáyivi nyaá ley Nyoo aña, ican ñu cuví ñu ñu Israel cha ndicha vaha. Tari quivi tyaa Tatyí li seña cuan aña ñu, ta ñima ñi ri ñu. Tatyí li Nyoo sacuvi cuan, ñima ley cha nyaá nuu tutu. Ta ñáyivi ihya cucuvi ñu ñu vaha nuu Nyoo, ta ñima nuu ñáyivi ri.

3

¹ Tatu tyicuan caa, ¿ñáá cha tyinyeé chi yo cha cuví yo ñu Israel? ¿O atu tyinyeé chi chi yo cha sacuvi yo tuhun circuncisión? ² Cuaha cuhva tyinyeé chi. Cha xihna ri, Nyoo chaha ra ley maa ra chi yo ñu Israel.³ Soco yoso caa tatu yihí ñu Israel ta ña chinó iñi ñu cuhva catyí Nyoo, ¿atu cha catyí ñu cuan ta ma sacuvi ca Nyoo cuhva catyí

ra? ⁴ ¡Ñima! Soco na saha yo cuenda vatyí Nyoo ndicha ra. Sacuví ra tandihí cuhva cha catyí ra. Vasi tandihí ñáyiví cahán ñu cuendu. Vatyí nu tutu Nyoo catyí chi tuhun ra tyehe caa:

Sutu Mañi yuhu, cunyehe ñáyiví vatyí ñahri cuendu cahún.

Ta cunyehe vaha ñu chuun vatyí ndicha cha cahún.

⁵ Chitó yo vatyí vaha ca quetuvi noo cha ndii tatu nyaá noo cha mecu xiin. Ndií xaan ca nyehe cuan. Cha ndicha cuví cuan. Soco catyí ñáyiví vatyí tyicuan caa tucu maa Nyoo chihin yo, ndii xaan ca natuvi ra tatu yoó ta cunyacuvi ca yo cha quiñi caa. Sacahnú yo chi ra cuví cuan, catyí ñu. Tyicuan ta ña tahán chi tachi tuñi ra chi yo, catyí ñu. Soco tatu tachi tuñi ra chi yo, ña vaha ra vatyí yoó sacahnú yo chi ra, catyí ñu. ⁶ Ña vaha cuhva cahán ñu, vatyí tyehe ta ña vaha Nyoo ma cuví tachi tuñi ra chi yo. Soco chitó yo tyi tahán chi tachi tuñi ra chi yo cha cuenda cuatyí yo. ⁷ Tatu nyehé yo tyi vaha Nyoo chihin cuatyí sacuví ñáyiví, ¿atu tahán chi tachi tuñi ra chi ñu? Catyí ñu tyi ña tahán chi, soco ña ndicha. ⁸ Tyehe ta ndicha cha cahán ñu cuan, vaha taxin ca sacuví yo maa maa ri cha quiñi caa tacuhva nyehe ñáyiví tyi Nyoo vaha ra. Yihí ñu catyí ñu tyi tyicuan caa sañahá ndi. Ta cutachi tuñi Nyoo chi ñu chaha cha

catyí tyi cahán ñu cuendu siqui ndi.

Tandihí yo ta iyó cuatyí yo

⁹ Ta yoso caa ¿atu vaha ca yoó ñu Israel ta ñima ca inga ñáyiví? ¡Ñima! Vatyí cha yaha sañahi chi ndo vatyí iyó cuatyí tandihí yo. An cuví ri yo ñu Israel, an cuví ri yo ñu cha ñima ñu Israel cuví, soco iyó maa cuatyí yo. ¹⁰ Tyicuan caa catyí nu tutu Nyoo, nu catyí chi tyehe caa:

Yori maa ñáyiví vaha iyó, cha ni ña noo maa.

¹¹ Yori ñu cutuñi iñi tuhun Nyoo.

Yori maa nanducú chi Nyoo.

¹² Tandihí ñu sandoo ñu chi Nyoo, ta tandihí ñu ta sacunaq ñu chi ñu.

Yori maa ñu sacuví cha vaha. Cha ni ña noo maa.

¹³ Tari noo ñaña ndiyí cha tacohó yuhu cuví sucun ñu.

Vatyí quiñi xaan cahán ñu.

Ta cahán ñu cuendu. Tari cha venenu coo yihí yuhu ñu vatyí cahán uhvi ñu chi tahan ñu.

¹⁴ Maa maa ri ca maa cha quiñi caa cahán ñu.

¹⁵ Yatyí xaan ñu cha cacahñi ñu chi tahan ñu.

¹⁶ Chahá xaan ñu tundoño ta tucuihya iñi chi ñáyiví chihin cuhva iyó ñu.

¹⁷ Ta ña chitó ñu yoso caa cuhva coo taxi ri ñu chihin Nyoo, ni chihin tahan ñu.

¹⁸ Ni ña chicá iñi ñu tatu tachi tuñi Nyoo chi ñu noo quiví, catyí chi nu tutu Nyoo.

¹⁹ Chitó yo vatyí tandihí cha catyí ley chahnu cha quehen cuenda ra Moisés, catyí chi cha cuenda ñu nyicón ley cuan, tacuhva vatyí ma cuví catyí ñu tyi ñahri cuatyí ñu. Soco coto ñu vatyí cutahan chi cutachi tuñi Nyoo chi ñu vatyí iyó cuatyí ñu. Ta tyicuan caa tucu tandihí ñáyivi iyó siqui ñuhu ñayivi. ²⁰ Ni minoo ñáyivi ma cuví cuvaha ñu nuu Nyoo cha cuenda tyi sacuví ñu cuhva catyí ley. Soco ley cuan nyaá chi cha cuenda vatyí sacotó chi chi yo tyi iyó cuatyí yo.

Cha cuenda cha chinó iñi yo chi Nyoo ta cuvaha yo nuu ra

²¹ Soco vityin sandoó yo inchiyo xiin ley cuan ta cua nyehe yo vatyí iyó noo cuhva cuvaha yo nuu Nyoo. Suri maa Nyoo sañahá ra chi yo nu tutu tuhun ra cha tyaá profeta ta cha naha. Tatu sacuahá yo yucuan, coto yo noo cha ndicha. ²² Vatyí cha cuenda cha chinó iñi yo chi ra Jesucristo ta cuvaha yo nuu ra, ta sahá ra tuhun tyi ñahri cuatyí yo. Ta ña cachí ra chi yo tatu ñu Israel cuví yo o ñima.

²³ Tandihí ri ñáyivi sacuví ñu cuatyí, ta cañi xaan nyaá ñu chihin cuhva cuñí Nyoo, ta cha tyaqui Nyoo ma cuví cunyaa chihin ñu. ²⁴ Soco cha cuenda cha vaha ñáyivi cuví Nyoo chihin yo, chahá maa ra cha cuvaha yo nuu ra, ta ña tñin cuenda ca ra cuatyí yo. Vatyí chahnya ra Cristo Jesús cuatyí yo. ²⁵ Nyoo

saquichí ra chi ra Cristo vatyí cati ñiñi ra ta cúvi ra nu cruzi cha catyí cuatyí yo. Ta vityin cuví saha Nyoo tucahnu iñi chi yo tatu chinó iñi yo chi ra Cristo. Ta cuví chi tyehe caa, tacuhva nyehe ñáyivi tyi Nyoo vaha ra. Ta tyembu chahnu, Nyoo ña tñin cuenda ra cuatyí ñáyivi cha cuenda vatyí cuchaa chi noo quívi cha cuquichi ra Cristo ta sanaa ra cuatyí ñu. ²⁶ Ta tyicuan caa cuví tacuhva vatyí nyehé ñáyivi vatyí Nyoo tyicuan ri vaha ra, ta saha ra tuhun tyi vaha tandihí ñu chinó iñi chi ra Jesús.

²⁷ ¿Atu cuví sacahnu yo chi yo vityin? Ma cuví. ¿Ñáá tuhun? Cha cuenda vatyí ma cuví catyí yo vatyí sacuví yo cha catyí ley, ta yucuan chaha vaha yo nuu Nyoo. Vatyí cha cuenda cha chinó ri iñi yo chi ra ta cuvaha yo nuu ra. ²⁸ Cha chitó vaha yo vityin vatyí Nyoo sacuvahá ra chi yo nuu ra chihin cha chinó iñi yo chi ra, ta ñima chihin cha sacuví yo cha catyí ley ta cuvaha yo nuu ra.

²⁹ ¿Atu Nyoo cuenda ñu Israel ri cuví ra? ¿Atu ñima suri ra cuví Nyoo ñu cha ñima ñu Israel cuví? Suri Nyoo tucu ñu cuan cuví chi ra. ³⁰ Vatyí noo tuhun ri maa ra iyó. Ta ican ra sacuvahá ra chi yo nuu ra cha cuenda cha chinó iñi yo chi ra. Cuví ri yo ñu sacuví tuhun circuncisión cuan, o cuví ri yo ñu ña sacuví. ³¹ Tatu tyicuan caa, ¿atu ña vaha ca ley chahnu cuan? ¡Ñima cha ña vaha

ca! Vaha. Soco vityin chihin fuerza maa ra Cristo sañahá yo vatyí ndií maa cha catyí ley cuan ta ndicha.

4

Cuhva chiyo ra Abraham sañahá chi chi yo yoso caa cuvaha yo nuu Nyoo

¹ ¿Ñáá cha catyí yo cha cuenda ra Abraham sutu chahnu yo? ¿Ñáá cuenda catyí Nyoo vatyí vaha ra? ² Tyehe ta cuvaha ra nuu Nyoo cha cuenda cha sacuvi ra cha vaha, yucuan ndicha, cuví sacahnu ra chi ra, soco ñima nuu Nyoo. ³ Vatyí ¿ñáá catyí nu tutu tuhun Nyoo? Catyí chi vatyí ra Abraham chinó iñi ra chi Nyoo, ta cha cuenda cha chinó iñi ra chi Nyoo, Nyoo saha ra tuhun tyi vaha ra. ⁴ Vaha, vityin cuacuhve noo cuhva chi ndo: Tatu minoo ra sacuví ra noo tyiño, yahvi cha quehén ra ñima cha ñihi caha ra cuví, soco yahvi tyiño saha ra, ican cuví. ⁵ Soco tatu noo ra cha ña saha tyiño ta ñihi ra cha ñihi ra, noo cha ñihi caha ra cuví. Ta tyicuan caa cuví chihin noo ra cha ña nducu cuhva cacu cha cuenda cha sacuví ra ley, soco chinó iñi ra vatyí Nyoo sahá ra tucahnu iñi chi ñu iyó cuatyí, Nyoo cusaha ra tuhun tyi vaha ra cha cuenda cha chinó iñi ra chi ra. ⁶ Ra David cahan ra tuhun tusi iñi cha iyó chi ñáyivi cha saha Nyoo tuhun vatyí vaha ta ña tñn cuenda ra cuatyí cha sacuvi ñu. ⁷ Tyehe caa catyí ra David:

Ñáyivi cha saha Nyoo tucahnu iñi cuatyí, sií xaan cuñí ñu, vatyí Nyoo ña tñn cuenda ra cuatyí ñu.

⁸ Sií xaan cuñí ñu ña tñn cuenda Nyoo cuatyí.

⁹ ¿Atu cha cuenda ri ñu sacuvi tuhun cha tahnya ñií cuví tusi iñi ihya, o cuví tucu chi cha cuenda ñu ña sacuvi cuan? Cha yaha sañahi chi ndo vatyí Nyoo saha ra tuhun tyi vaha ra Abraham cha cuenda cha chinó iñi ra chi ra. ¹⁰ Soco ¿ama saha ra tuhun tyi vaha ra? ¿Atu cha ni cumañi ca sacuvi ra Abraham tuhun circuncisión cuan, o cha yaha? Ñima nya cha yaha, soco cha ni cumañi ca. ¹¹ Yaha cuan ta sacuvi ra Abraham tuhun cuan, tari noo seña ri o sellu vatyí Nyoo cha yaha saha ra tuhun tyi vaha ra cha cuenda cha chinó iñi ra chi ra. Ta cha cuenda ihya cuví ra Abraham tari noo sutu tandihi yo ñu chinó iñi Nyoo vasi ña sacuvi yo tuhun circuncisión. Ta tyicuan caa, Nyoo sahá ra tuhun vatyí vaha yo. ¹² Ndicha vatyí ra Abraham cuví tucu ra sutu ñu casacuví tuhun cuan, soco tatu chinó tucu iñi ñu chi Nyoo tari chinó iñi tucu maa ra Abraham sutu chahnu yo, quivi cha ta sacuvi ca ra tuhun cuan.

Chihin cha chinó iñi yo ta ñihi yo cha chahá Nyoo chi yo

¹³ Vatyí Nyoo catyí ra chi ra Abraham ta chi sehe ra vatyí cuhva ra cha cunyaca ñaha ñu ñuhu ñáyivi chihin ra. Soco

savahā Nyoo promesa cuan, ñima cha cuenda vatyí ra Abraham sacuví ra cha catyí ley, soco cha cuenda vatyí chinó iñi ra chi Nyoo, ta Nyoo saha ra tuhun vatyí vaha ra. ¹⁴Tyehe ta maa maa ri ñu cha sacuví cuhva catyí ley, cuñihi ñu noo cha cucuhva Nyoo, ñahri yahvi nyaá cha chinó iñi yo chi Nyoo, ta ni ñahri yahvi nyaá cha catyí ra tyi cuhva ra chiyo. ¹⁵Vatyí ley cuan sañahá chi vatyí tahán chi tachi tuñi Nyoo chi yo tatu ña sacuví yo cuhva catyí chi. Soco tyehe ta ñahri ley iyó, ñahri cuatyí yo coo.

¹⁶Yucuan chaha cuñihi yo promesa Nyoo cha cuenda cha chinó iñi yo chi ra, tacuhva vatyí cuvi chi noo tumañi iñi cha chahá ra chi tandihí yo cha cuví yo ñáyivi chi ra Abraham. Ñima ñu chinó ri iñi chi Nyoo ta quichahá ley cuan cuñihi, soco cuñihi tucu ñu cha ña ita iñi ley, soco chi Nyoo ri chinó iñi ñu tari chinó iñi ra Abraham. Ican ra cuví sutu tandihí ñáyivi cha chinó iñi chi Nyoo. ¹⁷Vatyí tari catyí Nyoo nu tutu ra tyehe caa: “¿Yoho cucuvun tari noo sutu cuaha xaan ñáyivi?”, coo siqui ñuhu ñayivi”, catyí ra chi ra Abraham. Ta cha catyí ra tyicuan caa, cuñí chi catyí vatyí cuví yo sehe ra Abraham nuu Nyoo. Chinó iñi ra Abraham chi Nyoo, vatyí Nyoo sanandotó ra ndiyi, ta chihin tuhun cahán ra sacóo ra cha cumañi ca coo.

¹⁸Ra Abraham chinó iñi ra

chi Nyoo vasi ma cuvi ñihi ra promesa cuan tyaa maa ra cuhva, vatyí cha chahnu xaan ra. Soco yihí iñi ra cha cuñihi ra. Ta tyicuan caa, ñihí ra promesa Nyoo ta cuví ra sutu cuaha ñáyivi, tari cuhva catyí Nyoo chi ra: “Tyehe caa cucucuaaha ñáyivi chuun”, catyí ra chi ra. ¹⁹Ra Abraham ña sandihí ra cha chinó iñi ra, vasi cha noo cientu cuiya ra ta tuví iñi ra vatyí cha cuñí cúvi ra. Tari maa ra ta tari cu Sara ñasihi ra, ma cuvi ca coo sehe ñu, tyi cha chahnu xaan ñu. ²⁰Soco ña ndu uvi iñi ra cha cuñihi ra cha catyí Nyoo tyi cuhva ra chi ra. Soco chinó iñi ra chihin cha ni iñi ra. Ta yihí ca iñi ra chi Nyoo. Ta sacahnú ra chi ra, ²¹cha cuenda vatyí chitó vaha ra vatyí Nyoo iyó tunyee iñi chi ra cha cusacuví ra cha catyí ra chi ra. ²²Yucuan chaha Nyoo saha ra tuhun tyi vaha ra cha cuenda cha chinó iñi ra chi ra.

²³Saha Nyoo tuhun vatyí vaha ra Abraham chaha cha chinó iñi ra chi ra. Ña chicunyaá nuu tutu vatyí noo ri ra Abraham cuvaha ra, ²⁴soco chicunyaá tucu nuu tutu cha cuenda yoó. Vatyí sahá Nyoo tuhun tyi vaha tucu yo vatyí chinó iñi yo chi ra, vatyí ican ra sanandotó chi ra Jesús, Sutú Mañi yo. ²⁵Ta maa ra chaha cuenda chi ra Jesús tyi cúvi ra cha cuenda cuatyí yo, ta nandotó ra tacuhva vatyí cuvi cuvaha yo nuu ra.

Vityin cha nicoo vaha yo chihin Nyoo, cuaha cha vaha cucuhva ra chi yo

1 Ta cha yahā nduvahā añima yo nuu Nyoo cha cuenda cha chinó iñi yo chi ra, nicoo vaha yo chihin ra cha cuenda Sutu Mañi yo Jesucristo. 2 Vatyí cha cuenda ra Cristo ñihí yo cha vaha Nyoo cha cuenda cha chinó iñi yo chi ra. Yucuan chaha ñi iñi yo ta sñi cuñi yo, ta yihí vaha iñi yo vatyí cucuhva ra cha cucahnu cuví yo chihin ra. 3 Ta ñima yucuan ri cusñi cuñi yo, tahán tucu chí cusñi cuñi yo quívi nyehé yo tindoho. Vatyí chitó yo vatyí cha nyehé yo tindoho cuan cutuhva ca yo coo cha cama iñi yo. 4 Ta tatu chihin cha cama iñi yo, yahá yo tindoho, quita vaha yo nuu Nyoo. Ta yucuan ta chitó vaha yo tyi cuñihi yo ndñi maa cha cucuhva ra chi yo. 5 Tatu yihí iñi yo chi maa ra, ma cucahan nuu yo nyehé yo chi ra, vatyí cuñi xaan ra chi yo cha cuenda Tatyí Ii ra cha chahā ra cunyaa añima yo.

6 Vatyí quívi cha ña ñihí ca yo yoso caa sacuví yo chihin cha cuaha cuatyí yo, quívi cuan quichí ra Cristo, quichí cúvi ra cha cuenda yo ñu iyó cuatyí. 7 Chitó yo vatyí yori caña iñi cúvi tyiño nuu noo ñáyivi. Vasí xityí ri caña iñi ñu cuhva ñu ñáyivi ñu cha cuenda noo ñu vaha xaan. 8 Soco yucuan cuví nu sañahā Nyoo vatyí cuñi ra chí yo, vatyí quichi cúvi ra

Cristo cha cuenda yo vasí iyó xaan cuatyí yo. 9 Ta vityin cha cha yahā cuvaha yo nuu Nyoo cuenda cha chihí ra Cristo, yucuan chaha chitó vaha yo tyi ma cahun ca yo anyaya nu cutachí tuñi Nyoo chí ñáyivi ña chinó iñi chí ra. 10 Quívi cuan xaan cuví iñi yo chí Nyoo, soco sanicoo vaha ra chí yo chihin ra cha cuenda cha chihí Sehe ra. Yucuan chaha chitó vaha yo tyi cusacacu ndihi ra chí yo vatyí iyó ñáyivi ra Cristo añima yo vityin cha iyó vaha yo chihin ra. 11 Ta ñima ihya ri, soco cusñi tucu cuñi yo chihin Nyoo cha cuenda Sutu Mañi yo Jesucristo, vatyí cha cuenda ra nicoo vaha yo chihin Nyoo.

Ra Adán ta ra Cristo

12 Cha cuenda noo rayñi quihví cuatyí síqui ñuhu ñáyivi ta chicoo tuhun chihi. Ta tuhun chihi cuan chicoo chí síqui tandihí ñáyivi vatyí tandihí ñu sacuví ñu cuatyí cha cuenda ra Adán. 13 Nyata ni cumañi ca cuhva Nyoo ley chí ra Moisés ta cha iyó cuatyí síqui ñuhu ñáyivi, soco ña tñn Nyoo cuenda cuatyí ñáyivi ta ni cumañi ca cuhva ra ley cuan. 14 Soco nyacua nya quívi ra Adán ta nyacua nya quívi ra Moisés, chinyaca ñaha tuhun chihi chí ñu cha sacuví cuatyí, vasí ñima tahan cuatyí ra Adán cuví, cha ña quichahā ra chí Nyoo. Ta ra Adán cuví ra tari noo xiñahñu noo ra cha cua quichi.

15 Soco cuatyí ra Adán ña ndíquí tahan chí chihin tu-

mañi iñi cha chaha Nyoo chi yo. Vatyí cha cuenda cuatyí noo rayií cuan, cuaha xaan ñáyivi chihí. Soco sacacú Nyoo chi yo cha caha ri, cha cuenda noo ri rayií ta ican ra ihya cuví ra Jesucristo. Ta cahnu xaan ca cuví cuan. Ta cha cuenda cha vaha chí cuaha ñáyivi cuví. ¹⁶ Cuatyí noo ri rayií ra Adán cuan, ma cuvi ndiqui tahan chi chihin cha sacacú Nyoo chi yo. Vatyí cha cuenda cuatyí noo ri ra cuan, Nyoo tachí tuñi ra chí ñáyivi. Soco vityin chihin cha ñahri tyiyahví yo, Nyoo sacacú ra chí yo ta sahá ra tuhun tyi vaha yo nuu ra, vasi cuaha xaan cuatyí sacuvi yo. ¹⁷ Ndicha vatyí quichaha nyaca ñaha tuhun chihi siqui ñuhu ñáyivi cha cuenda cuatyí noo ri rayií. Ta cha tyicuan caa chitó yo vatyí cahnu ca cuví cha vaha cha sacuvi nonga ra, ra Jesucristo. Vatyí tandihí ñu cha ñihí cha vaha cha chahá Nyoo, cha cuvaha ñu nuu ra, ta iyó ñu ñáyivi chaa chihin tunyee iñi ra Jesucristo. ¹⁸ Tari cha catyí cuatyí ra Adán ta tachí tuñi Nyoo chí tandihí ñáyivi iyó siqui ñuhu ñáyivi, tyicuan caa tucu cha cuenda cha vaha cha sacuvi ra Jesucristo, Nyoo saha ra tuhun tyi vaha ñáyivi nuu ra ta chahá ra noo ñáyivi vaha coo tandihí ñu. ¹⁹ O cuñí chí catyí tyehe caa: Cha cuenda cha ña quichaha ra Adán cuan nu cahán Nyoo, cuaha xaan ñu chicoo cuatyí ñu. Ta suri tyicuan caa tucu

cha catyí cha quichaha ra Cristo nu cahán Nyoo, cuaha xaan ñu cucuvaha ñu nuu Nyoo.

²⁰ Vatyí Nyoo chaha cuenda ra ley cuan chí ra Moisés tacuhva nacoto ñáyivi tyi iyó cuatyí ñu. Ta vasi quetuví xaan cuatyí yo cha cuenda ley cuan, soco Nyoo cahnu ca tucahnu iñi iyó chí ra chihin yo vatyí cuñí xaan ca ra chí yo. ²¹ Tari chinyaca ñaha cuatyí chí yo ta chaha chí tuhun chihi chí yo, tyicuan caa tucu nyacá ñaha tumañi iñi Nyoo chí yo vityin ta sacuvaha ra chí yo nuu ra vatyí coo yo noo ñáyivi cha ma naa ca maa cha cuenda Sutu Mañi yo Jesucristo.

6

Ma sacuvi ca yo cuatyí soco sacuvi yo cuvaha catyí ra Cristo

¹ ¿Yoso caa catyí yo vityin? ¿Atu cusacuvi ca yo cuatyí tacuhva vatyí sañaha Nyoo vatyí cuaha xaan tucahnu iñi iyó chí ra? ² Ma sacuvi ca yo. Yoó cha yaha ndu uvi iñi yo cuatyí yo. Tari quivi chihí cuatyí yo cuví cuan. Ta ¿yoso caa cuví sacuvi ca yo vityin? Ma cuvi ca. ³ ¿Atu ña chitó nyoho vatyí cha ndu ñn ri yo chihin ra Cristo Jesús cha cuenda cha condutyá yo? Tari quivi chihí yo chihin ra cuví cuan. ⁴ Vatyí cha cuenda cha condutyá yo, tari quivi cha quihvi yo chichi ñuhú ñn ri chihin ra Cristo quivi chihí ra cuví cuan. Ta tari nandoto ra Cristo chihin cha ndicha

ñuhu Sutu yo Nyoo, tyicuan caa tucu maa yo, tacuhva vatyí coo yo noo ñáyiví chaa chihin ra.

⁵ Ta ñin ri coño ñuhu nanduví yo chihin ra, tari quiví chihí yo ñin ri chihin ra cuví cuan, ta cha tyicuan caa, cunandoto tucu yo tari nandoto ra. ⁶ Ta chitó yo vatyí tandihí cuhva chiyó yo ta ityi chata ca, cha yaha chihí chi nu cruzi chihin ra Cristo, tacuhva vatyí coño ñuhu cuatyí yo ma cuví ca cunyaca ñaha chi chi yo. ⁷ Vatyí ñu cha yahá chihí, ma cuví ca sacuví ñu cuatyí. ⁸ Ta tatu cha yahá chihí yo chihin ra Cristo, chinó ñni yo vatyí cucoo tucu yo chihin ra. ⁹ Ta chitó yo vatyí cha yahá chihí ra Cristo, noo ri chaha nandoto ra, ta ma cuví ca ra. Ñahri ca tunyee ñni iyó chi tuhun chihi cha cunyaca ñaha ca chi chi ra. ¹⁰ Yahá cha chihí ra Cristo cha catyí cuatyí ñáyiví, nandoto ra cha ma cuví ca maa ra. Ta vityin iyó ra cha cuenda maa Nyoo. ¹¹ Ta tyicuan caa tucu maa yo, ma sacuví ca yo cuatyí. Saha yo tuhun tyi cha yahá chihí yo cha cuenda cuatyí cuan. Soco coo yo cuhva cuñí Nyoo cha cuenda cha ñin ri cuví yo chihin ra Cristo Jesús Sutu Mañi yo.

¹² Yucuan chaha yoó ma cuhva yo ityi cha cunyaca ñaha ca cuatyí chi coño ñuhu yo. Ma cuhva yo ityi chi coño ñuhu yo cha saniñi chi chi yo cha sacuví yo noo cha ña vaha cha cuñí chi. ¹³ Ma

cuhva yo ityi chi coño ñuhu yo cha sacuví chi cha quiñi caa. Soco cuhva cuenda yo chi yo chi Nyoo, tari noo ñáyiví cha chihí ta nandoto. Cuhva cuenda yo coño ñuhu yo chi Nyoo tacuhva vatyí sacuví yo cha vaha. ¹⁴ Vatyí cuatyí yo ma cuví ca chasaha chi chi yo. Vatyí ley cha tyaa ra Moisés, ña nyacá ñaha ca chi chi yo, soco cha cacu ñnima yo ta iyó yo cha cuenda tumañi ñni cha chahá Nyoo chi yo.

Cuví yo tari noo musu cha sacuví cha vaha

¹⁵ Iyó yo cha cuenda tumañi ñni cuan, ta vityin ña nyacá ñaha ca ley chi yo. ¿Ta tatu ña nyaca ñaha ca ley chi yo, atu tahán chi sacuví ca yo cuatyí? Ña tahán chi. ¹⁶ Nyoho chitó vaha ndo vatyí tatu cuví ndo musu noo ra, tahán chi sacuví ndo cha catyí ra cuan. Ta tyicuan caa cuví yo musu ra cha tuhvá yo quichahá chi. Yucuan chaha tatu quichahá yo cha cuñí cuatyí cha sacuví yo, tari noo chitoho yo cuví cuatyí cuan, vatyí quichahá yo chi cuan. Ta cunaa yo chihin cuan. Soco tatu quichahá yo chi Nyoo, cusaha ra tuhun tyi vaha yo. ¹⁷ Soco tyahvi nyoo chi Nyoo, tyi nyoho nu quichi chi cuví ndo noo musu chi cuatyí vatyí quichahá ndo chi cuan. Soco vityin chihin cha ñni ñni ndo quichahá ndo tuhun Nyoo cha sañahá ñu chi ndo. ¹⁸ Cha yahá cundaá cuatyí ndo, ta vityin ña nyacá ñaha ca chi chi ndo. Ta vityin cuví ndo noo musu cha

cua sacuvi cha vaha. ¹⁹ Cahín noo cuhva cha ña yî ri chihin ndo vatyî ta cutuñi vaha ca iñi ndo tuhun Nyoo. Quiví cuan chahá cuenda ndo coño ñuhu ndo chi cha quiñi caa ta cha ña vaha vatyî sacuvî ndo cha ña vaha. Vityin naçuhva cuenda ndo coño ñuhu ndo chi Nyoo tacuhva vatyî coo ndo noo ñayivî cachi, ta maa maa ri cha vaha sacuvi ndo nuu ra.

²⁰ Quiví cuvî ndo musu cha quiñi caa, ña cuvî sacuvi ndo cha vaha. ²¹ Soco ¿ñáá cha ñihî ndo chihin cuan? Maa ri ticahan nuu chahá cuan chi ndo. Ta ña tuvî iñi ndo. Maa ri tuhun chihi ta anyaya nyisó cuan. ²² Soco vityin ña nyacá ñaha ca cuatyî chi ndo. Ta vityin cha sacuvî ndo tyiño nuu Nyoo. Ta ihya ndicha tyinyeé chi chi ndo vatyî chihin ihya cuvî coo ndo noo ñayivî cachi. Ta nu ndihî tuhun tyicuan ri maa cucoo ndo chihin Nyoo. ²³ Cha sacuvî yo cuatyî, ican cuan chahá tuhun chihi chi yo. Soco tumañi iñi cha chahá Nyoo chi yo, ican cuan cuvî ñayivî cha ma naa ca maa. Ta ican cuan chahá ra ta ñahri tyiyahvi yo, cha cuenda cha ñin ri cuvî yo chihin ra Cristo Jesús, Sutú Mañi yo.

7

Ña nyacá ñaha ca ley chahnu chi ñu yihî cuenda ra Cristo

¹ Yañi, nyoho ñu chitó ley cuvî ndo, chitó ndo vatyî ley nyacá ñaha chi chi noo ñayivî cha ni ri ca cha iyó ñu. ²⁻³ Ta cuñun, noo ñaha tandaha,

catyî ley vatyî coo ña chihin yî ña nyacua nya cúvi ra. Ta tatu iyó ña chihin inga rayî cha ni ri cha iyó yî ña, chicoo cuatyî ña nuu Nyoo. Soco tatu cha yahá chihi yî ña, ña nyacá ñaha ca ley cuenda ñu tandaha chi ña, ta cuvî tandaha ña chihin inga ra, ta ma coo cuatyî ña nuu Nyoo.

⁴ Ta tyicuan caa tucu nyoho yañi. Cha chihî ndo cha cuenda ley chahnu ta cuvî ndo ñu cuenda ra Cristo vatyî ican ra cuvî yî ndo vityin. Ta ican ra cuvî ra cha nandoto, tacuhva vatyî cuvî cotyiño Nyoo chi yo ta sacuvi yo cha vaha. ⁵ Quiví chiyo yo cuhva cuñi coño ñuhu yo, ley chahnu cha tyaa ra Moisés, tacuhva sanaquiquî ri chi chi yo cha sacuvi yo cha quiñi caa, vatyî catyî chi tyî ma sacuvi yo. Soco sacuvî yo, ta yucuan cuvî cha chahá tuhun chihi chi añaïma yo. ⁶ Soco vityin ña nyacá ñaha ca ley chahnu cuan chi yo, vatyî cha yahá chihi cha quiñi caa yo chihin ra Cristo. Ta vityin cuvî sacuvi yo tyiño nuu Nyoo vatyî iyó yo ñayivî chaa cha chahá Tatyî li Nyoo chi yo, ta ña sacuvî ca yo tari sacuvî yo quivî nyicon xaan yo ley chahnu cuan.

Ley Nyoo, ican sañahá vatyî iyó cuatyî yo

⁷ Ta vityin yoso caa, ¿atu ña vaha ley cuan? Ñima cha ña vaha. Vaha. Soco tyehe ta ña tuvî ley cuan, ma cote ñáá cha cuvî cuatyî. Ni ma cote tyi ña vaha cha quichi

cuví iñi cha chii inga ñáyivi, tyehe ta ña catyí ley cuan vatyí ña vaha. ⁸ Tyehe ta ñahri ley cuan, ma cote ñáá cha cuví cuatyí, ta ma cuñi xain sacuvi, soco quívi cha chité ñáá cha cuví cuatyí, yucuan quívi quichí cuví xaan iñi sacuvi, vatyí naquiqui cha quiñi caa cha iyó chi. Soco tyehe ta ñahri ley, ma coto yo tyi iyó cuatyí. ⁹ Ta quívi cha ña chite ñáá tuhun cahán ley cha chaha Nyoo chi ra Moisés, chica iñi vatyí ñahri cuatyí iyó nuu Nyoo. Soco quívi chite ley cuan, ta chite vatyí tahán chi cunai nuu Nyoo vatyí iyó cuatyí. ¹⁰ Catyí ley cuan tyi tatu quichahí chi chi, cucoi tyicuan ri maa. Soco cha nuu cha ñihi tahvi añime chihin ley cuan, cunaa ndihi nuu Nyoo. ¹¹ Ta cuatyí cha iyó chii, sandaví ñaha chi chii vatyí chotyíño chi ley chahnu cuan tacuhva vatyí tahán chi cunai nuu Nyoo, vatyí ña quichahí nu cahán ley cuan.

¹² Ley cha chaha Nyoo chi ra Moisés, vaha xaan, vatyí tuhun cha chaha maa Nyoo cuví, ta tandihi cha catyí ra vatyí sacuvi yo, vaha xaan ta cuíti xaan. ¹³ Ta ley vaha cuan, ¿atu ican cuan sativí chii? Ñima. Cuatyí cha sacuvi, ican sativí chii, yucuan chaha tahán chi cunai nuu Nyoo. Vatyí ley vaha cuan, ican cuví cha sañahá chii vatyí cuatyí cuví cha sacuvi. Ta cha tyicuan caa, sañahá ley vatyí quiñi xaan caa cha sacuví yo

cuatyí.

¹⁴ Ta chitó yo vatyí ley cuan, Nyoo chaha. Ta ñahri cuatyí ley cuan. Soco mai iyó cuatyí vatyí sacuví cha quiñi caa ta nyacá ñaha cuatyí cuan chii. ¹⁵ Ña cutuñí iñi ñáá cha tahin. Vatyí cuñi sacuvi cha vaha, ta ña cuví sacuvi. Ta cha ña vaha cha ña cuñi sacuvi, ican cuan sacuví. ¹⁶ Cuñi xain sacuvi cha vaha, soco ña cuví sacuvi, ta cha tyicuan caa tiin cuenda vatyí ley chahnu Nyoo, vaha chi. ¹⁷ Ñima ca mai sacuví cha ña vaha, soco cuatyí cha iyó chii, ican cuan sacuví cha ña vaha. ¹⁸ Vatyí chité vatyí iyó cuatyí cha cuenda coño ñuhi. Yucuan chaha ñahri cha vaha sacuví, vatyí quichí cuví iñi sacuvi cha vaha, soco ña cuví. ¹⁹ Cuñi sacuvi cha vaha, soco ña sacuví ta sañihí que sacuvi cha ña vaha. ²⁰ Ta tatu sacuví cha ña cuñi sacuvi, ñima ca mai sacuví, soco cuatyí cha iyó chii, ican cuan sacuví.

²¹ Ta tyehe caa iyó noo cha tahin, tatu cuñi sacuvi cha vaha, maa ri cha ña vaha sacuví. ²² Vatyí chichi añime tahán xaan iñi ley Nyoo. ²³ Soco iyó inga ley chichi coño ñuhi, ta ña tahán iñi chi cuhva cha tahán iñi añime. Ta chahá chi cha cunyaca ñaha cuatyí cha iyó chichi coño ñuhi chii. ²⁴ ¡Ndahvi yuhu ra ndahvi! ¿Yóo ra cusacacu chii tacuhva ma cunai nuu Nyoo chihin cuhva ña vaha cha nyacuví coño ñuhi? ²⁵ Noo tuhun ri maa Nyoo sacacú ra chii cha cuenda ra Jesucristo. ¡Tyahvi

nyoo chi Nyoo cha cuenda cuan! Ta vityin nyehí vatyi chihin añime cuñí sacuví ley Nyoo, soco coño ñuhi cuñí chi sacuví chi ley cuatyí.

8

Tatyí Ii Nyoo tyinyeé chi chi yo ta cuví coo yo noo ñayiví chaa

¹ Soco vityin, Nyoo ma tachi tuñi ca ra chi ñu ndu ñin ri chihin ra Cristo Jesús, ta ña iyó ca ñu kuhva cuñí coño ñuhu ñu, soco iyó ñu kuhva cuñí Tatyí Ii ra. ² Ta tyicuan caa tucu yuhu, Tatyí Ii Nyoo nyacá ñaha chii vityin vatyí ndachí chi chii, ta chahá chi noo ñayiví chaa coi cha cuenda cha ñin ri cuví chihin ra Cristo Jesús. Ta vityin ña nyacá ñaha ca ley cuatyí ta tuhun chihí chii. ³ Nyoo sacuví ra noo cha ña cuví sacuvi ley cha quehen cuenda ra Moisés, vatyí ña cuví chasaha chi coño ñuhu cuatyí yo cha nyacá ñaha chi yo. Yucuan chaha Nyoo saquichí ra chi Sehe ra. Quichí ra chihin noo coño ñuhu tari maa yo, ta chihí ra cha cuenda cuatyí yo, ta sandihí ra tuhun cha nyacá ñaha cuatyí chi yo. ⁴ Sacuví Nyoo tyehe caa tacuhva cuví sacuvi yo kuhva catyí ley ra, vatyí ñima ca kuhva cuñí coño ñuhu yo iyó yo, soco iyó yo kuhva cuñí Tatyí Ii Nyoo.

⁵ Vatyí ñu iyó kuhva cuñí coño ñuhu, kuhva cuñí chi chicá xiñi ñu, soco ñu iyó kuhva cuñí Tatyí Ii Nyoo, kuhva cuñí Tatyí Ii Nyoo

chicá xiñi ñu. ⁶ Ta ñu chicá xaan xiñi maa maa ri tuhun cha cuñí coño ñuhu ñu, cunaa ñu nuu Nyoo. Soco ñu chicá xiñi kuhva cuñí Tatyí Ii. Iyó cha taxi ri añima ñu ta cucoo ñu ñayiví tyicuan ri maa chihin Nyoo. ⁷ Ñu cha maa maa ri kuhva cuñí coño ñuhu chicá xiñi, ñu xaan ñi chi Nyoo cuví ñu, vatyí ni ña cuñí ñu ta ni ña cuví sacuvi ñu cha catyí ley ra. ⁸ Yucuan chaha ñu iyó kuhva cuñí coño ñuhu, ña cuví sacuvi ñu kuhva tahán ñi Nyoo. ⁹ Soco nyoho ña iyó ca ndo kuhva cuñí coño ñuhu, vatyí tatu ndicha cha iyó Tatyí Ii Nyoo añima ndo, iyó ndo chihin cha ñin ri cuví ndo chihin Tatyí Ii Nyoo. Ñu cha yori Tatyí Ii ra Cristo ñohó añima, ñima ñu cuenda ra Cristo cuví chi ñu. ¹⁰ Soco ñu iyó ra Cristo añima, nyitó añima ñu vatyí sanduvahá Nyoo. Soco coño ñuhu ñu chihí chi cha catyí cuatyí. ¹¹ Nyoo sanandoto ra chi ra Jesús cha yahá cha chihí ra. Ta tyicuan caa tucu nyoho, tatu iyó Tatyí Ii Nyoo añima ndo, cusanandoto tucu Nyoo chi coño ñuhu ndo chihin Tatyí Ii ra.

¹² Ta tyicuan caa yañi, nyaá noo cha nyaá siqui yo cha sacuvi yo, soco ñima cha sacuvi yo kuhva cuñí coño ñuhu yo. ¹³ Vatyí tatu iyó ndo maa maa ri kuhva cuñí coño ñuhu ndo, cunaa ndo nuu Nyoo. Soco tatu iyó ndo kuhva cuñí Tatyí Ii Nyoo chihin tunyee ñi ra, cuví chasaha ndo chi cha quiñi caa cha cuñí coño ñuhu ndo

ta cuconyito ndo cha ndicha cuii.

¹⁴ Vatyí tandihí ñu sacuví cuhva saquehén ityi Tatyí Ii Nyoo, sehe Nyoo cuví chí ñu.

¹⁵ Nya quiví cha tñn cuenda yo Tatyí Ii Nyoo ta ña yuhví ca yo chí ra, vatyí ñima tari noo ra nyacá ñaha chihin cha xaan cuví ra, ta vityin nanduví yo sehe ra. Tatyí Ii sacahán chí yo na cahan yo chihin Nyoo tyehe caa: “Sutu Mañi yuhu”, catyí yo chí ra.

¹⁶ Ta suri maa Tatyí Ii cuan ndu ñn ri chí chihin cha chiñi tuñi yo ta sacoto chí chí yo vatyí cha cuví yo sehe Nyoo.

¹⁷ Ta cha cuenda cha cuví yo sehe ra, iyó ityi chí yo cha ñihi yo cha vaha cha catyí Nyoo tyí cuhva ra chí yo, ñn ri chihin ra Cristo. Vatyí tatu ñn ri nyehé yo tindoho chihin ra Cristo, suri ñn ri cucahnu yo chihin ra.

¹⁸ Chité vatyí tindoho cha nyehé yo vityin, noo cha luhlu ri cuví cha nuu cha tyaqui cha cunyehe yo nachaa yo nuu nyaá Nyoo.

¹⁹ Tandihí cha savaha Nyoo cuñí xaan chí nyehe chí, ta nyatú chí quiví cha cusañaha ra yóo cha cuví tandihí sehe ra.

²⁰ Vatyí tandihí cha savaha Nyoo tiví chí. Vasi ña cuñí chí tiví chí soco Nyoo chaha ra cha tiví chí cha cuenda cuatyí cha sacuví ñáyivi. Soco catyí Nyoo tyí coo quiví ta cunduchaa tucu chí inga chaha. ²¹ Tandihí cha savaha Nyoo ta cunduchaa tucu chí inga chaha, ta ma cutiví ca, quiví cha cunasama

Nyoo cuhva iyó chí vityin. Ta cucusi cuñí chí ñn ri chihin tandihí sehe Nyoo vatyí ma tiví ca chí. ²² Chitó yo vatyí tandihí cha savaha Nyoo ta nyehé xaan chí tindoho. Cahnu xaan tindoho nyehé chí tari cha uhvi cha nyehé noo ñaha sihi cha cacú sehe ña. ²³ Ta ñima maa ri maa chí nyehé tindoho, soco nyehé tucu yoó. Vasi cha natñn cuenda yo Tatyí Ii cha chaha quiví Nyoo chí yo, soco cahnu xaan tindoho nyehé yo, vatyí cuñí xaan yo cha tahán ri chí quiví cha cunanduví yo sehe ra. Vatyí cunasama ra cuhva iyó coño ñuhu yo. ²⁴ Vasi ta ñihi ca yo tandihí cuan soco chitó yo tyí cuñihi yo vatyí chino ñni yo ta chihin cuan cacu yo. Tatu nyatú yo cha cutahan chí chí yo, cuñí chí catyí vatyí ta ñihi ca yo. Tatu cha yaha ñihi yo chí chí, ma cuatu ca yo. ²⁵ Soco tatu yihí ñni yo cha ñihi yo noo cha ta nyehe ca yo, cuñí chí cha cuatu yo chihin cha cama ñni yo. ²⁶ Ta suri tyicuan caa tyinyeé tucu Tatyí Ii chí yo chihin cha vita cuñí yo vatyí ña chitó yo yoso caa cacan tahvi yo chí Nyoo cuhva tahán chí. Ta Tatyí Ii cuan chicán tahvi chí chí Nyoo cha cuenda yo chihin noo tuhun cha ña cuví nacyí yo. ²⁷ Chitó maa Nyoo ñáa cha caá ñanima yo, ta chitó ra ñáa cha cuñí Tatyí Ii ra cacan chí, vatyí chicán chí cuhva cuñí maa ra cha cuenda ñáyivi cuenda ra.

²⁸ Chitó yo vatyí ñáyivi,

ñu cuñí vavaha chi Nyoo, tandihí cha cuví chi ñu ta tyinyeé chi chi ñu, vatyí maa ñu cuví ñu nacachí ra, tari cuhva tyaa ra cuhva chi ñu. ²⁹ Vatyí nya quívi xihna ri, ta cha ñohó nuu Nyoo yóo cuví ñu cucunyicon chi ra. Ta tyaa ra cuhva chi ñu vatyí cucuvi ñu tari Sehe ra, ra Jesucristo, tacuhva vatyí cucuvi ra ra cha ñihi ca cha nuu tandihí ca yañi ra, ñu yihí tuhun Nyoo. ³⁰ Ta ñu cha tyaa Nyoo cuhva tyí cuví ñu sehe ra, nacana tucu ra chi ñu. Ta ñu cha nacana ra, suri sacuvaha ra chi ñu nuu ra. Ta ñu cha sacuvaha ra chí, chaha ra cha cucahnu cuví ñu chihin ra.

³¹ ¿Ñáa cha catyí yo cha tyicuan caa? Tatu Nyoo ta nyaá ra tumañi iñi chi yo, ¿yóo cha cuví tyaa cuatyí síqui yo? Yori. ³² Nyoo ña catyí ra cha ma cuhva cuenda ra sehe ra, soco chaha cuenda ra chi ra vatyí cúvi ra cha cuenda tandihí yo. Ta tatu tyicuan caa, ¿atu ma cuhva tucu ra tandihí ca cha chínuhú chí yo iin ri chihin Sehe ra? Cuhva ra. ³³ ¿Yóo cha cuví tyaa cuatyí síqui ñu cha nacachí Nyoo? Yori. Vatyí Nyoo ican ra cuví ra saha ra tuhun tyí vaha ñu nuu ra. ³⁴ ¿Yóo cha cuví catyí tyí cuhun yo anyaya? Yori. Vatyí ra Cristo cuví ra chihí cha cuenda cuatyí yo, ta nandoto ra ta vityin nyaá ra chiyo vaha ndaha Nyoo, ta chicán tahvi ra nuu Nyoo cha cuenda yo. ³⁵ Ñahri cha cuví sacuachiyo chi yo chihin

cuhva cuñí xaan ra Cristo chi yo. Vatyí vasi nyehé xaan yo tindoho, vasi iyó tisihi, vasi cahán ñáyivi chi yo cuenda tuhun Nyoo, vasi iyó tama, o ñahri sahma yo, vasi yuhví yo, vasi chihi yo, soco ma cuví sacuachiyo tandihí tindoho cuan chi yo chihin cuhva cuñí ra chi yo. ³⁶ Vatyí tyehe caa cahán chí nuu tutu Nyoo tuhun tindoho cha cunyehe yo:

Cha cuendon, Sutu Mañi yuhu, ta cuñí cahñi ñáyivi chí ndi tandihí quívi.

Ta tari noo mbee cha cua cahñi ñu, tyicuan caa sacuví ñu chí ndi, catyí chí.

³⁷ Soco vasi yahá yo tandihí tindoho cuan, soco cucuvi vaha ca chasaha yo cha cuenda ra cha cuñí xaan chí yo. ³⁸ Yucuan chaha chító vahi vatyí ñahri maa cha cuví sacuachiyo chí yo chihin cuhva cuñí xaan Nyoo chí yo. Ni tuhun chíhi, ni ñáyivi iyó yo, ni ángel, ni tatyí ña vaha, ni cha cuví vityin, ni cha cucuvi ityí nuu ca, ni noo cuan, ta ma cuví sacusiin chí chí yo chihin Nyoo. ³⁹ Ni cha iyó nu sucun, ni cha iyó nu cono xaan, ni nonga cha savaha Nyoo, ma cuví sacusiin chí chí yo chihin Nyoo, ra cuñí xaan chí yo cha cuenda ra Cristo Jesús Sutu Mañi yo.

9

Nyoo nacachí ra chí ñu ñuu Israel

1 Cahín cha ndicha, tari tuhvá cahán noo ra chinó iñi chi ra Cristo. Ña sandaví ñahi, vatyí Tatyí li Nyoo ican saquehén ityi cha chiñi tuñi xiñi. Yucuan chaha chitó vahí vatyí cha ndicha cahín nu catyí tyi 2 cuihya xaan cuñí ta tyicuan ri uhvi cuñí añime 3 cha cuenda ñu ñui ñu Israel. Cuñí xain chi ñu. Ta nyacua cuhve añime na cuhun maa nu uhvi, tyehe ta cuví cacu añima ñu cha tyicuan caa. 4 Ta maa ñu, tata ra Israel vachi ñu. Ta Nyoo naquehen cuenda ra chi ñu tari cha sehe ra. Ta sañaha ra cuhva caá ra chi ñu, tyi cahnu xaan ra cuví ra, vatyí chinyaa ra chihin ñu. Ta natyihí tahan ra tuhun chihin ñu, ta chaha ra ley ra chi ra Moisés vatyí cuhva ra chi ñu. Ta sañaha ra cuhva cuñí ra cha sacahnú ñu chi ra. Ta catyí ra chi ñu yoso caa cusacuví ca ra cha vaha chihin ñu nu cuahan ca chi. 5 Tata ñu sutu chahnu yo cuví chi ñu, ta tata ñu, ican cuví chi ra Cristo cuenda coño ñuhu ra. Ican ra cuví Nyoo. Ta ican ra cuví ra nyacá ñaha tandihí cha iyó. ¡Na sacahnu yo chi ra tyicuan ri maa! ¡Ta na cuví chi tyicuan caa!

6 ¿Atu catyí vatyí ña sacuví Nyoo tari cuhva catyí ra chi ñu Israel ta cha naha? Ñima. Soco cuñí chi coto yo tyi ña tandihí ñáyivi Israel cuví ñu ñu Israel cha ndicha. 7 Ña tandihí ñu tata ra Abraham ta cuví ñu sehe ra cha ndicha. Vatyí tuhun cha cahán maa Nyoo chihin ra, cahán chi cha cuenda noo ri sehe ra. Vatyí catyí Nyoo chi ra tyehe

caa: “Cha cuenda ra Isaac sehun cucoo ñáyivi chuun.”

8 Ihya sañahá chi yo vatyí ñima cha cuenda tata cha vachi ñáyivi ta cuví ñu ñáyivi cuenda Nyoo. Soco tandihí ñáyivi chinó iñi tuhun catyí Nyoo tyi cusacuví ra, ican ñu cuví ñu sehe ra cha ndicha. 9 Vatyí cha catyí Nyoo tyi cuhva ra chi ra Abraham, ican cuví ihya: “Quívi cha tahán chi, cuquichi nu nyicú ndo ta cu Sara cucoo noo sehe ña”, catyí Nyoo chi ra.

10 Ta ñima yucuan ri. Vatyí ni nduvi sehe cu Rebeca, iin ri sutu ra, sutu chahnu yo, ra Isaac. 11-12 Soco cha ni cumañi ca cacu ndotyin, ta sacuví ca ndotyin ni cha vaha, ni cha ña vaha, ta catyí Nyoo chi cu Rebeca: “Sehun cha ñihi ca cucuví ra musu ra cha luhlu ca.” Sacuví Nyoo tyicuan caa vatyí cachí ra chi ñáyivi cha cuñí maa ra, ta ñima cha cuenda cha sacuví ñu. 13 Tari catyí ra nu tutu ra tyehe caa: “Cuñí que chi ra Jacob, ta chi ra Esaú ña cuñí.”

14 ¿Tu tyicuan caa ñáá cha cucatyí yo? ¿Atu cuví catyí yo tyi ña vaha cha sacuví Nyoo? ¡Ma cuví! 15 Vatyí catyí ra chi ra Moisés tyehe caa: “Cu cundahvi cuñi yóo ñáyivi cuñí mai cundahvi cuñi.” 16 Ta tyicuan caa chitó yo vatyí ma cundahvi cuñi Nyoo nyehe ra chi ñáyivi cha cuenda cuhva cuñí maa ñu, o cha cuenda cha sacuví ñu. Soco cuhva cuñí maa Nyoo cucuví. Vatyí maa ra cuví ra cundahvi iñi yóo chi cuñí maa ra. 17 Vatyí nu tutu ra, catyí ra chi rey

Egipto tyehe caa: “Sacuví rey chuun tacuhva sañahí tunyee iñi cha iyó chii chi ndo, ta tandihí ñáyivi cucoto ñu yóo ra cuví yuhu”, catyí Nyoo. ¹⁸ Ta tyicuan caa Nyoo cundahvi cuñi ra yóo ñáyivi cuñi maa ra. Ta suri sandundavá tucu ra añima ñu cuñi maa ra sandundava ra.

¹⁹ Ta cu catyun chii: “Tatu tyicuan caa, ¿ñáá tuhun cha tyaa Nyoo cuatyí siqui ñáyivi? Vatyí ¿yóo cha cuví nacahnu cuhva cuñi ra? ¡Yori!” ²⁰ Soco ña vaha cuhva chicá iñun cha tyicuan caa. Vatyí yori cuví catyí tyi ña vaha cha sacuví Nyoo. ¿Yóo ra cuví yoho vatyí nacahun nu cahán Nyoo? ¿Atu cuví catyí quisí ñuhú cuan chi ñu cha savaha chi chi vatyí ña tahán iñi chi cuhva cha savaha ñu chi chi? Ma cuví. ²¹ Vatyí ñu cha savahá ndaha tyiño iyó ityi chi ñu savahá maa ñu ñáá cha cuñi ñu chihin nyahyu cuan. Chihin nyahyu cuan cuví savaha ñu noo quisí finu xaan. Ta cuví savaha tucu ñu noo cha ndahvi ri.

²² Tyicuan caa tucu Nyoo, iyó ityi chi ra cha tachi tuñi ra chi ñáyivi quiñi iyó cha cuenda cha sacuví ñu cha ña vaha. Ta cuví sañaha ra chi ñu tyi iyó xaan tunyee iñi chi ra. Soco sanyee xaan ra iñi ra chihin ñáyivi cuan. Ta chi maa ñu tahán chi tachi tuñi ra. Ta tahán chi sanaa ra chi ñu. ²³ Ta iyó tucu ityi chi ra cha saha ra tucahnu iñi chi ñu savaha maa ra vatyí sañahá ra tyi cahnu ra cuví ra. Maa ñu cuví ñu ñu cachí ra vatyí cuñihi ñu tandihí cha vaha,

ta cucoo ñu gloria chihin ra. ²⁴ Ta suri maa yo cuví ñu cuan. Vatyí Nyoo cana ra chi yo. Yihí yo cuví yo ñu Israel, ta yihí yo cha ñima ñu Israel cuví yo. ²⁵ Tari catyí Nyoo nu tutu cha tyaa ra Oseas tyehe caa:

Ñu cha ñima ñu ñui cucatyí yuhu tyi ñáyivi chii cuví chi ñu.

Ñu cha ña cuñi, cunacuñi chi ñu, catyí Nyoo.

²⁶ Ta suri nu catyí Nyoo chi ñu tyehe caa: “Nyoho ñima ñáyivi chii cuví ndo.” Ta suri yucuan cunacatyí tucu ra chi ñu: “Sehe yuhu, ra cuví Nyoo nyito, cuacuví ndo.” ²⁷ Soco cha cuenda ñu Israel catyí ra Isaías tyehe caa: “Vasi cuaha xaan ñáyivi ñu Israel tari cha cuaha niyiti iyó yuhu tyañuhu, soco suhva ri ñu cucacu. ²⁸ Vatyí Sutu Mañi yo numi ri cusacuvi ra tandihí cha catyí ra tyi cusacuvi ra siqui ñuhu ñayivi chihin cha cachi.” ²⁹ Tari catyí tucu ra Isaías ta ityi chata ca tyehe caa:

Tyehe ta Sutu Mañi yo ra nyacá ñaha tandihí cha iyó andivi, ta ma sacacu ra chi suhva yo, cunaa tandihí yo,

Tari naa ñáyivi Sodoma ta ñu Gomorra ta cha naha.

Ñu Israel nducú ñu cuhva cuvaha ñu nuu Nyoo soco ña ñihi ñu cuhva

³⁰ ¿Tatu tyicuan caa, ñáá cha catyí yo? Ñáyivi cha ñima ñu Israel cuví, ña nanducu ñu cuhva cuvaha ñu nuu Nyoo, ta ican ñu cuví ñu cuvahá nuu

ra cha cuenda cha chinó iñi ñu chi ra. ³¹ Ta ñu Israel nyicón xaan ñu ley, tyi cuñí maa ñu tyi cuvaha ñu nuu Nyoo chihin cuan, soco ña cuvı. ³² ¿Ñáá tuhun? Vatyı cuñí ñu cuvaha ñu nuu Nyoo chihin cha sacuvı ñu ley cuan, ta ña cuñí ñu cuvaha ñu nuu ra chihin cha chinó iñi ñu chi ra. Yucuan chaha vatyı tari cha catyihı chaha ñu chihin noo yuu cuvı chi cuan. ³³ Yuu cuan cahán Nyoo tuhun nu tutu ra tyehe caa:

Ñuu Sión, yucuan tyajı chi noo rayıı cha cuvı tari noo yuu.

Noo yuu cha sanduvá chi ñáyıvı cuvı ra.

Soco ñu chinó iñi chi ra ma cucahan nuu ñu, catyı Nyoo nu tutu ra.

10

¹ Yañi, cuñí xain chihin cha tandıhi añime cha cacu ñu Israel. Ta cha chıcan tahvi xain cha cuenda ñu. ² Cha ndıcha cuvı vatyı cuñí xaan ñu sacahnú ñu chi Nyoo, soco ña ñihı ñu cuvaha yoso caa tahán chi sacuvı ñu. ³ Vatyı ña chıtó ñu yoso caa sacuvahá Nyoo chi ñáyıvı nuu ra. Ta nducú ñu cuvaha sacuvaha maa ñu chi ñu, ta ña nacuhvá cuenda ñu chi ñu chi ra tacuhva sacuvaha maa ra chi ñu. ⁴ Vatyı ra Cristo cha quıchı ra ta sacuvı ra tandıhi cha catyı ley, ta sacuvı ra vatyı tandıhi ñu chinó iñi chi ra, cuvaha ñu nuu Nyoo.

⁵ Catyı ra Moisés vatyı cuvı cuvaha ñáyıvı, soco tatu quıchahá ñu cha catyı ley,

vatyı catyı ra tyehe caa: “Ñu cha quıchahá tandıhi cha catyı ley, coo ñu noo ñáyıvı cha ma naa ca maa.” ⁶ Soco cha cuvaha yo nuu Nyoo cha cuenda cha chinó iñi yo chi ra Cristo, catyı nuu tutu Nyoo tyehe caa: “Ma caca xiñun vatyı cuñı chi cha cundaa noo ra andıvı ta cusanoo ra chi ra Cristo tacuhva sacacu ra chi yo.” Ma caca xiñun tyıcuan caa vatyı cha yahı quıchı ra Cristo. ⁷ Ni ma caca xiñun vatyı cuñı chi cha cunoo noo ra chıchı ñuhú vatyı sanandoto ra chi ra Cristo, vatyı cha yahı nandoto ra. ⁸ Ma caca xiñun tyıcuan caa vatyı tyehe caa catyı nu tutu Nyoo: “Tuhun Nyoo yatyın nyaá chi chihin ndo, yuhu ndo ta añima ndo nyaá chi.” Ta surı tuhun cuan sacoto ndı chi ndo, tuhun cha quıchı ra Cristo ta nandoto ra. İcan cuvı tuhun cha tahán chi chinó iñi yo. ⁹ Tatu chihin yuhun catyún vatyı ra Jesús cuvı Sutu Mañı yo, ta chihin añımon chinó iñun tyı Nyoo sanandoto ra chi ra cha yahı chıhı ra, cucacu añımon. ¹⁰ Vatyı chihin añima yo cuñı chi chıno iñi yo chi ra Cristo tacuhva cuvı cuvaha yo nuu Nyoo, ta chihin yuhu yo tahán chi catyı yo tyı chinó iñi yo, tyıcuan ta cacu añima yo. ¹¹ Tuhun Nyoo catyı chi: “Ni noo ñu cha chinó iñi chi ra ta ma tahan ñu tıcahan nuu.” ¹² Vatyı Nyoo ĩn rı cuvaha nyehé ra chi ñu Israel ta chi ñu inga ñuu. Vatyı surı maa ra cuvı ra ra nyacá ñaha chi tandıhi yo. Ta nasocó

xaan ra chi tandihí yo cha chicán tahvi yo chi ra. ¹³ Vatyí tyehe caa catyí tuhun Nyoo: “Tandihí ñu cha chicán tahvi chi ra Jesús cucacu añima ñu.” ¹⁴ Soco ¿yoso caa cucacan tahvi ñu chi ra tatu ta chino ca iñi ñu chi ra? Ta ¿yoso caa cuchino iñi ñu chi ra tatu ta cuiñi ca ñu tuhun ra? Ta ¿yoso caa cuiñi ñu tuhun ra tatu ta yori ca cahan tuhun ra chihin ñu? ¹⁵ Ta ¿yoso caa cucahan ñu yihí tuhun Nyoo chihin ñu, tatu yori tachi chi ñu? Tari catyí nu tutu Nyoo: “Ñana cha tyaqui nu chaa ñu cahán tuhun vaha nuu ñáyivi.” ¹⁶ Soco ña tandihí ñu ta quichahá ñu tuhun cha sacacú Nyoo añima yo. Vatyí tyehe caa catyí ra Isaías: “Sutu Mañi yuhu, yori cuñi chino iñi tuhun cahán ndi”, catyí ra. ¹⁷ Yucuan chaha cha chiñi xihna yo tuhun ra Cristo, tyicuan ta chino iñi yo chi ra.

¹⁸ Soco ndacá tuhin ihya: ¿Atu ña chiñi ñu Israel tuhun Nyoo? ¡Chiñi ñu! Vatyí nu tutu Nyoo catyí chi tyehe caa:

Sutu Mañi yuhu, cha sacoto ñáyivi tuhun maun nicahnu siqui ñuhu ñáyivi, catyí chi nu tutu Nyoo.

¹⁹ Soco ndacá tuhin inga chaha tyehe caa: ¿Atu ña chinó iñi ñu Israel cha cuenda tyi ta nacoto ca ñu tuhun Nyoo? ¡Chitó ñu! Vatyí cha xihna ri ra Moisés tyaa ra tuhun cahán Nyoo chihin ñu Israel tyehe caa:

Nyoho, cucuquiñi cuñi ndo

vatyí cucuhve cha vaha chi noo ityi ñáyivi cha ñima ri tuhun, ñáyivi cha ña cutuñi iñi.

Ta cunaquiqui tisihi ndo nyehé ndo chi ñu, catyí Nyoo.

²⁰ Ta ra Isaías caña iñi ra catyí ra tyi ñu cha ña nanducú chi Nyoo, nañihí ñu chi ra. Ta sañahá ra chí ra chí ñu cha ña ndacá tuhun tuhun ra. ²¹ Ta tyaa tucu ra Isaías tuhun cahán Nyoo chihin ñu Israel tyehe caa: “Ndiyaca cané chí ñáyivi chii, nacuhva cuenda ñu chí ñu chii, soco ña quichahá ñu. Ndava xaan iñi ñu”, catyí Nyoo.

11

Yihí ñu Israel cha ñihí ñu cuhva cacu añima ñu

¹ ¿Atu ña cuñi ca Nyoo chí ñu Israel? Ñima cha ña cuñi ca ra chí ñu, vatyí suri ra Israel cuví tucu yuhu. Vatyí tata ra Abraham ta tata ra Benjamín cuví. ² Nyata cha naha cachí Nyoo chí ñu Israel tacuhva cuví ñu ñáyivi chí ra. Ta vityin ñima cha sacuachiyó ndihí ra chí ñu, vatyí chitó ndo cha catyí nu tutu Nyoo nu chicán tahvi ra Elías, profeta Nyoo, ta catyí ra tyi ña vaha sacuví ñu Israel, ta catyí ra tyehe caa: ³ “Sutu Mañi yuhu, chahñi ñu chí ra cuví profeta maun, ta satani ñu arta vehe ñuhu maun. Noo tuhun ri ca mai ndoo, ta cuñi ñu cahñi ndihí ñu chii”, catyí ra. ⁴ Soco nacahan Nyoo ta catyí ra chí ra Elías: “Ñima

maa ri maun ndoo. Ucha ca mil ñáyivi naquehen vahi cha ña chicutiñi chiti ñu nuu xitohyo nyoo Baal”, catyí Nyoo chi ra. ⁵ Ta suri tyicuan caa vityin, ndoo suhva ñu sacahnú chi Nyoo. Ican ñu nacachi Nyoo chii tyi cusaha ra tucahnu iñi chi ñu. ⁶ Vatyí cha cuenda cha vaha ñáyivi cuví Nyoo ta sahá ra ticahnu iñi chi yo. Tyehe ta chihin cha vaha ñáyivi cuví maa yo ta sahá Nyoo tucahnu iñi chi yo, cuñi chi catyí tyi ñima ca chihin cha vaha maa ra ta sacacú ra chi yo.

⁷ Ta ¿yoso caa? Ñu Israel nanducú xaan ñu cuhva cuvaha ñu nuu Nyoo soco ña ñihí ñu cuhva. Soco ñu cha nacachi maa Nyoo chii, ñihí ñu cuan cuhva. Ta inga ñu Israel cuan ndundava xaan añima ñu. ⁸ Tari catyí nu tutu Nyoo tyehe caa: “Nyoo chaha ra noo cuhva chi ñu cha ma cutuñi iñi ñu. Ta chaha ra chiti nuu cha ña cutuñi iñi ñu cha nyehe ñu. Ta chaha ra soho ñu soco ña cutuñi iñi ñu cha chiñi ñu, ta nyacua nya vityin ta tyicuan caa ñu.” ⁹ Ta suri catyí tucu ra David tyehe caa:

Sii xaan cuñi ñu chihin vico cha iyó ñu, soco yucuan cuví trampa cha sanacava chi ñu. Ta cha cuenda cuan ta cutachi tuñi Nyoo chi ñu.

¹⁰ Ta tari cha cunducuaa ñu vatyí ma ndichin ca nyehe ñu cha ndicha.

Ta tyicuan ri cucoso cha vee chata ñu, catyí ra David tuhun ñu Israel

cha ña chinó iñi chi Nyoo.

Yoso caa cuvaha ñu cha ñima ñu Israel cuví nuu Nyoo

¹¹ Ta vityin ndaca tuhin ihya: ¿Atu cha cuenda cha ña quichaha ñu Israel cuan nu cahán Nyoo, ta ndoo ri maa ñu cha ma cacu ca añima ñu? Ñima. Vatyí cha cuenda cha ña quichaha ñu chi ra cha saquichi Nyoo, yucuan chaha sacacú Nyoo chi inga ñu cha ñima ñu Israel cuví. Ta tyicuan caa ta cuquiñi cuñi ñu Israel vatyí nachino iñi inga ñáyivi. Ta cha tyicuan caa ta cuquichi cuví tucu iñi ñu cha cacu añima ñu. ¹² Tatu cha cuenda cha ña quichaha ñáyivi Israel cuhva cha chaha Nyoo chi ñu, cuví chi cha vaha cha cuenda tandihi ca ñáyivi, vatyí chahá chi cuhva, ta cuaha xaan ñu nachino iñi ñu chi ra Cristo, nyaca cuví quivi cundihvi tucu ñu Israel cuenda Nyoo inga chaha. Yucuan quivi, vaha xaan ta tyaqui xaan cucuvi.

¹³ Ta iyó suhva cha cuñi catyí chi nyoho cha ñima ñu Israel cuví ndo, vatyí ra Jesús tyatyíño ra chii cha cuhin nu iyó ñáyivi cha ñima ñu Israel cuví. Ta chité vatyí niñi xaan cuví tyíño cha chaha maa Nyoo chii. ¹⁴ Ta cuñi tiqui vatyí cunyehe ñáyivi Israel ñu ñui cuhva chinó iñi ndo chi Nyoo, ta cuquichi cuví iñi tucu suhva maa ñu sacuvi ñu tyicuan caa. Ta tyicuan caa ta cacu añima ñu. ¹⁵ Vatyí cha cuenda cha ña

natiin cuenda Nyoo chi ñu Israel cuví cuvaha inga ñáyivi nuu ra. Vaha xaan cha tyicuan caa ta nyaca cuvi quivi cunatiin cuenda tucu ra inga chaha chi ñu Israel, cucuvi tari cha cunandoto ñu nu chihí ñu. ¹⁶ Tatu vaha noo pan cha savaha yo cha xihna ri chihin yuchan pan cuan, vaha tandihí ca yuchan cuan. Ta tatu vaha yoho noo yutun, tandihí ca soco tun, ta vaha. Ta tyicuan caa tucu ñu Israel, cuñí Nyoo chi ñu cha cuenda cha vaha ra cha vachi ñu tata.

¹⁷ Ta ñu Israel cuví ñu tari noo soco noo tu olivo vaha cha cumí Nyoo. Ta chahnya Nyoo chi suhva ñu vatyí ña chingo iñi ñu chi ra. Ta chaha tu olivo cuan natyaa tahan ra soco noo tu olivo cuhu. Ta maa ndo cuví tari tu olivo cuhu cuan. Ta tari cha natyaa tahan ra chi ndo chaha tu olivo cha xihna ri cuan. Ta tyicuan caa ndu in ri ndo chihin tu olivo Nyoo ta naquehén ndo tandihí cha vaha cha iyó chi ra. ¹⁸ Soco ma saha ndo tyi vaha ca ndo ican saha inga ñu cha cuví soco tu olivo cha chahnya Nyoo. Vatyí tatu cuñí maa ndo tyi vaha ca ndo, cuñí chi nichon iñi ndo vatyí ñima maa ndo nyisó ndo chi yoho yutun cuan, soco maa yoho yutun cuan nyisó chi ndo.

¹⁹ O catyí ndo: "Ican, soco chahnya Nyoo soco yutun cuan tacuhva nicunyaa maa ndi chaha tun." ²⁰ Vaha. Soco chahnya Nyoo soco cuan cha cuenda tyi ña chingo iñi ñu chi ra. Ta nyoho nicunyaa

ndo yucuan, soco cha cuenda cha chinó ri iñi ndo chi ra. Yucuan chaha ma sacahnu ndo chi ndo, soco saha ndo cuenda chi ndo. ²¹ Vatyí tatu ña saha Nyoo ticahnu iñi chi ñu cha cuví soco vaha cuan, ni chi nyoho ta ma saha ra ticahnu iñi tatu ña chinó vaha iñi ndo chi ra. ²² Nyehe yoso cha vaha Nyoo, soco tyicuan tucu xaan ra chihin ñu cha ña natiin cuenda tumañi iñi chahá ra. Soco chihin nyoho, vaha xaan ñáyivi cuví ra. Soco cuñí chí cha naquehén vaha ndo tumañi iñi cha chahá ra vatyí tatu ña naquehén vaha ndo, cucahnya tucu ra chi nyoho. ²³ Soco tatu nachino tucu iñi ñu Israel inga chaha, cu nicunyaa tucu ñu nu coyo ñu. Vatyí Nyoo iyó tunyee iñi chi ra cha natyatan tucu ra chi ñu cuan inga chaha. ²⁴ Vatyí tatu nyoho cha ñima ñu Israel cuví ndo, ta quehen Nyoo chi ndo cha cuví ndo tari soco noo yutun olivo cuhu, ta natyaa tahan ra chi ndo chihin tu olivo vaha cha cumí ra, jta nyaca cuví ñu Israel cha cuví ñu soco tu olivo vaha! ¡Cunatyaa tahan chaa ra chi ñu inga chaha chaha tu olivo nu coyo ñu!

Nu ndihí ta cucacu tucu ñu Israel

²⁵ Vatyí yañi, cuñí cha coto ndo noo tuhn xehe cha sacuví Nyoo, tacuhva vatyí ma caca xiñi ndo vatyí chitó xaan ndo. Vatyí ñu Israel ndundava ñima ñu suhva quivi, nyacua nya cha cuví nachino iñi inga ñáyivi chi

Nyoo. ²⁶ Ta cha yahā quihvi inga ñu cuenda Nyoo, tyicuan ta tandihī ñu Israel cucacu añima ñu, vatyī nu tutu Nyoo catyī chi tyehe caa:

Ra cha cusacacu chi ñáyivi, ityi Sión cuquichi ra.

Ta cusacanyaha ra cuatyī cha iyó chi ñáyivi chi ra Jacob.

²⁷ Ta ihya cuvī tuhun cha cunatyihī tahin chihin ñu, quivī na sacuachiye cuatyī ñu, catyī Nyoo nu tutu ra.

²⁸ Cuxaán xaan ñu Israel chihin Nyoo cha cuenda tuhun vaha ra Cristo cha cacu añima yo. Ta tyicuan ta cuvī chino iñi maa ndo. Soco Nyoo tacuhva cuñí ri maa ra chi ñu Israel tata ra Abraham, ta ra Isaac, ta ra Jacob vatyī cachino iñi ra chi ra quivī cachiyó ra, ta yucuan chaha cachī ra chi ra. ²⁹ Vatyī noo cha cha yahā chaha Nyoo ña natinyaá ra. Ni ña ndu uvi iñi ra cha yaha nacana ra chi yo. ³⁰ Nyoho, ta ityi chata ca, nacahnū ndo nu cahán Nyoo. Soco vityin, Nyoo cundahvi cuñí ra nyehé ra chi ndo cha cuenda vatyī ñu Israel nacahnú ñu nu cahán ra. ³¹ Nacahnú ñu nu cahán Nyoo vityin tari nacahnū maa ndo quivī cuan. Ta tari cundahví cuñí Nyoo nyehé ra chi ndo vityin, tyicuan caa tucu cucundahvi cuñi ra nyehé ra chi ñu Israel ñandihī. ³² Vatyī Nyoo chahā ra ityi chi tandihī ñáyivi cha nacahnú ñu nu cahán ra, tacuhva vatyī cundahvi cuñi ra nyehé ra inuu ri chi tandihī yo.

³³ ¡Ñana cha cahnu cuvī cha tyayii Nyoo! ¡Ñana cha vaha cha chitó xaan ra, ta cha chiñi tuñi ra! Ma cuvī nacatyī yo cuhva chicá iñi ra, ni ma chaa yo cutuñi iñi yo cuhva sacuvī ra. ³⁴ Vatyī ¿yóó cha cutuñi iñi cuhva chicá xiñi Sutú Mañi yo? ¿O yóó cha sañahá chi ra? Yori. ³⁵ Vatyī yori cha cuvī cuhva xihna ca noo cha vaha chi Nyoo ta cha cuenda cuan ta quihī iñi ñu vatyī na cuhva tucu Nyoo chi ñu. ³⁶ Vatyī tandihī maa cha iyó, maa Nyoo savaha, ta chingo chi ta iyó chi cha cuenda ra. ¡Cahnu xaan ca cuvī Nyoo tyicuan ri maa! Ta na cuvī chi tyicuan caa.

12

Na coo yo noo ñayivi cha sacuvi yo cuhva cuñi Nyoo

¹ Yucuan chaha yañi, chacú ndahvi nuu ndo cha cuenda cha ndahvi cuñi Nyoo nyehé ra chi yo, na nacuhva cuenda yo coño ñuhu yo chi ra, tari noo ofrenda cha nyitó, ta cachi coo yo nuu ra, vatyī yucuan cuvī cuhva tiin cuenda ra cha sacahnú yo chi ra. ² Ta ma coo ca yo cuhva iyó ñáyivi iyó siqui ñuhu ñayivi ihya. Soco na nasama yo cuhva iyó yo chihin cha nduchaa cuhva chicá xiñi yo. Ta tyicuan caa ta coto yo yoso cuhva cuñi Nyoo chihin yo vatyī coto yo nya cha vaha, ta nya cha tahán iñi ra. Ta coto yo ñáá ndihī cha tahán chi sacuvi yo.

³ Nyoo, cha catyī cha vaha ñáyivi cuvī ra, ta tyatyíño ra chii vatyī cuvī apóstol chi

ra, yucuan chaha catyí chi tandihí nyoho vatyí ni noo ndo ta ma caca xiñi ndo tyi vaha ca ndo. Soco caca vaha xiñi ndo yoso cuhva iyó ndo chihin yoso cuhva cha vaha chahá Nyoo chi ndo ñin ri chihin cha chinó ñi ndo chi ra. ⁴ Vatyí cha noo coño ñuhu, cuaha xaan cuhva iyó chi, ta ña ñin ri maa tyiño saha chi. Chiti nuu yo, noo tyiño sahá chi, ta soho yo inga tyiño sahá chi. ⁵ Ta tyicuan caa tucu yoó vasi cuaha yo, soco noo ri coño ñuhu ra Cristo cuví yo, cha cuenda cha ñin ri cuví yo chihin ra, ta ñin ri cuví yo chihin tahan yo. Tari cha noo ri coño ñuhu cuví tandihí ri yo.

⁶ Sñin sñin tyiño chahá Nyoo chi yo, yoso cuhva cha cuñí maa ra cuhva ra chi noo noo yo. Ta cuñí chi cotyiño vaha yo cha vaha cuan. Tatu chahá Nyoo cha vaha cha sahá yo profetizar, na chino ñi yo tyi ican cuan chahá ra chi yo, ta naaquehen yo tuhun sacoto ra chí yo ta ñacatyí yo chi ñáyivi. ⁷ Tatu chahá ra cha vaha cha sacuví yo tyiño nuu inga ñu, cuñí chi sacuví vaha yo. Tatu chahá ra cha cuví sañaha yo chi inga ñu, cuñí chi cunyaa yo tyiño cuan. ⁸ Tatu chahá ra cha cuví cuhva yo tuhun chi ñáyivi na ndu ñi ñi ñu, cuñí chi cunyaa yo tyiño cuan. Ta ñu cha chahá Nyoo xuhun chi, cuñí chi cuhva ñu chihin cha ñi ñi ñu. Tatu chahá Nyoo cha saquehen ityun chi ñu yihí cuenda ra, chihin cha ñi ñun sacuvun. Tatu chahá Nyoo

cha tyinyeé yo chi ñu chiñuhú cha chiñuhú chii, cuñí chi sacuví yo chihin cha sñi cuñí yo.

Nu catyí ra Pablo yoso caa sacuviyo chayihíyo cuendara Cristo

⁹ Cuñi ndo chihin cha ndicha chi tahan ndo. Ta cutasi cuñi ndo chi cha ña vaha. Ta cunyicon ndo cha vaha. ¹⁰ Cuñí chi cha cuñí ndo chi tahan ndo cuenda Nyoo tari cha tahan ndo cha ñin ri sihi ñin ri sutu ndo. Ta quichaha ndo chi ñu ta saha ndo ñáyivi chi ñu.

¹¹ Sañihi ndo ñi ndo. Ma cusuchan ndo. Ta sacuvi ndo tyiño nuu Sutu Mañi yo chihin cha ñi ñi ñu.

¹² Sñi cuñi ndo coo ndo ñáyivi, vatyí chitó ndo vatyí cucoo ndo chihin Nyoo nu cuahan ca chi. Sanyee ndo ñi ndo tatu nyehé ndo tindoho. Ta ma sandihí maa ndo cha cacan tahvi ndo chi Nyoo nyita ri.

¹³ Tyinyee ndo chi ñu yihí cuenda Nyoo chihin ñaá cha chiñuhú chi ñu. Vaha tyiñuhu ndo chi ñu chaa vehe ndo.

¹⁴ Vaha çahan ndo siqui ñu cha çahán chi ndo. Ta ma soco ndo chi ñu. Çacan tahvi ndo cha cuenda ñu nuu Nyoo tacuhva na nasoco ra chi ñu.

¹⁵ Cusñi cuñi ndo chihin ñu sñi cuñí, ta cuacu ndo chihin ñu chacú chaa cha cuihya cuñí ñu.

¹⁶ ñin ri cuví ndo chihin tahan ndo. Ta ma çahnu saha ndo chi ndo. Inuu ri saha ndo chi ndo chihin ñu ndahvi. Ma saha ndo cha chitó xaan ndo.

17 Ma sacuvi ndo cha ña vaha chihin ñu sacuví cha ña vaha chihin ndo. Soco sãñiñi ndo sacuvi ndo cha vaha nuu tandihí ñáyivi. 18 Sãñiñi ndo cha coo taxi ri ndo chihin tandihí ñáyivi. 19 Yañi luhli, tatu yóo cha sataxi iñi chi ndo, ma tachi tuñi ri maa ndo chi ñu, soco sãña ndo ta natyaa ndo ndaha Nyoo na tachi tuñi maa ra chi ñu. Vatyí nu tutu Nyoo catyí chi tyehe caa: “Yuhu tahán chi tachi tuñi, yuhu cutiyahvi chi ñu”, catyí Sutu Mañi yo. 20 Ta suri catyí tucu ra: “Tatu ra xaan iñi chuun ta chisocó ra, cuhva cha cachi ra, ta tatu ityi ra ndutya, cuhva coho ra. Vatyí cha sacuvún tyehe caa, sacuvún cha nyacua nducuaaha soho ra chihin tichahan nuu.” 21 Ma cuhvon cha cunyaca ñaha cha ña vaha chuun, soco sãñiñun ta cuví chasahun chi cha ña vaha chihin cha sacuvún cha vaha.

13

1 Tandihí ñáyivi cuñí chi cha quichaha ñu chi ra cacuví tyiño cuenda gobiernu. Vatyí yori ra cuví tyiño cha ñima Nyoo tyaa tyiño chi ra. Ta ra cuví tyiño cha iyó, maa Nyoo tyiso chi ra. 2 Yucuan chaha, ñu cha ña quichahá chi ra cacuví tyiño, cuñí chi catyi vatyí ña quichahá ñu cuhva catyi Nyoo. Ta ñu cha sacuví tyicuan caa, chicoo cuatyí ñu cha cuenda cuan, ta cucutuñi chi ñu. 3 Vatyí ra cacuví gobiernu, ña nyaá ra cha cuenda cha sayuhví ra chi ñu cha sacuví cha vaha, soco nyaá

ra vatyí tachi tuñi ra chi ñu sacuví cha ña vaha. ¿Atu cuñún coun chihin cha ña yuhvun chi ra cacuví tyiño? Cachi coun, ta cunyehe ra tyi vaha ñáyivi cuvún. 4 Vatyí nyaá ra tyiño vatyí sacuví ra tyiño nuu Nyoo cha cuenda cha vaha chuun. Soco tatu ña cachi iyón, yucuan ndicha cuñí chi cuyuhvun chi ra. Vatyí ña nyaá ri maa ra, soco nyaá ra vatyí tachi tuñi ra chi ñáyivi cha sacuví cha ña vaha, vatyí tyiño cuan tyaa Nyoo chi ra. 5 Yucuan chaha ñiñi cuñí chi cha quichaha ndo chi ra cacuví tyiño, ñima cha cuenda cha yuhvi ndo coto tachi tuñi ra chi ndo, soco cha cuenda vatyí chitó ndo tyi tyicuan caa tahán chi sacuvi ndo. 6 Ta siñ ri cha cuenda cuan tyiyahví ndo xuhun cha tava ra cuví tyiño cha cuenda cha sanduvahá ra ñuu ndo. Vatyí yucuan cuví tyiño tahán chi cunyaa ra, ta cha tyicuan caa tyiño nuu Nyoo sacuví ra.

7 Cuhva ndo cha tahán chi chí minoo minoo ñáyivi. Tyiyahvi ndo cha cuenda ñaá cha tahán chi tyiyahvi ndo cha cuenda cha vaha chi ñuu ndo. Ta quichaha ndo chi ñu cha tahán chi quichaha ndo. Ta saha ndo ñáyivi chi ñu cha tahán chi saha ndo ñáyivi. 8 Ma coso yica ndo chí ni noo ñáyivi. Soco cuñi ndo chi tahan ndo, vatyí tatu cuñí ndo chi tahan ndo sacuví ndo tandihí cha catyi ley Nyoo cha tyaa ra Moisés vatyí sacuví yo. 9 Catyí ley Nyoo tyehe caa: “Ma coo inga ñusihi o rayi chuun tatu

ñima ñasihun o yìun cuví. Ma cahñun chi ñáyiví. Ma suhun. Ma cahun cuendu siqui ni noo ñáyiví. Ma quichi cuvi iñun cha chii ñáyiví.” Tatu ndicha cha cuñún chi tahun, tari cha cuñún chi maun, sacuví tucun tandihí ihya ta tandihí ca inga ca ley. ¹⁰ Tatu cuñún chi tahun, ñahri cha ña vaha cua sacuvun chi ñu. Chihin cha cuñí yo chi tahan yo, sacuví yo tandihí cha catyí ley Nyoo cha tyaá ra Moisés.

¹¹ Chihin tuhun ihya saha yo cuenda quívi iyó yo. Vatyí cha chaá chí cuhva cha ndoyo yo ta ma cundihñi yo. Vatyí quívi nachino iñi yo chi ra Cristo, naha xaan ca nyaá quichi quívi cucacu ndihí añima yo, soco vityin cha cuyatyin. ¹² Cha cua yaha cha cha cuaa. Ta cha cua cundichin. Yucuan chaha cuñí chí sandihí yo cha sacuvi yo cha sacuví ñu iyó nu ñaa iñi. Ta tahan chí sacuvi yo cuhva sacuví ñáyiví iyó nu ndichin. ¹³ Cachi cuñí chí coo yo. Vatyí nu ndichin Nyoo iyó yo. Ta ma coho yo ndixi, ta ma coo yo vico nu chihi xaan ñu ndixi. Ta ni ma coo yo chihin savaha ri ñusihí o rayí. Ni ma coo viciu chí yo. Ta ma cutasi cuñi yo nyehe yo chí tahan yo. Ta ma nyiyo iñi yo nyehe yo chí ñu. ¹⁴ Soco cõo yo chihin tunyee iñi Sutu Mañi yo Jesucristo, tari noo sahma cuví tunyee iñi ra tyi ndihví noo yo. Ta ma quihí iñi ndo cha sacuvi ndo cuhva cuñí coño ñuhu ndo.

Ma cahan nyaun chi tahun

¹ Tatu noo ñáyiví yihí cuenda Nyoo ta chiin ri chinó iñi ñu chi ra, ña vaha cha ma tñn cuenda ndo chí ñu. Vaha natñn cuenda ndo chí ñu soco ma cuví yuhu ndo chihin ñu siqui tuhun cha chicá uvi iñi ñu. ² Vatyí yihí ñáyiví cuñí maa ñu vatyí cuví cachi ñu tandihí. Ta yihí tucu ñu cha ña chinó vaha iñi ñu, ta maa maa ri yucu chachí ñu. ³ Soco ñu chachí tandihí cuan, tahan chí cha tñn cuenda ñu chí ñu cha chachí yucu ri. Ta ñu chachí yucu ri, ma cahan nyaa ñu chí inga ñu cuan. Vatyí Nyoo tñn cuenda ra chí ñu cuan. ⁴ Vatyí çyóó ñu cuví yoho vatyí cahan nyaun chí ñu cha sacuví tyiño nuu inga ra? Vatyí tatu vaha o ña vaha sacuví ñu soco nyehe maa ra cuví nuu chí ñu chihin ñu. Ta vaha cuquita ñu vatyí Sutu Mañi yo iyó tunyee iñi chí ra ta cutyinyee ra chí ñu tacuhva quita vaha ñu.

⁵ Inga tucu cuhva: Yihí ñu cha sacahnú ca ñu chí noo quívi ta ñima ca inga quívi. Ta yihí tucu ñu cha cuñí maa ñu vatyí inuu ri tandihí quívi. Tahan tahan yo cuñí chí coto vaha yo yoso cuhva chicá xiñi yo. ⁶ Ñu cha naquehén vaha noo quívi, naquehén vaha ñu cha cuenda cha sacahnú ñu chí Sutu Mañi yo. Ta ñu cha ña naquehén vaha cuan, suri cha cuenda cha sacahnú ñu chí Nyoo cuví. Ta ñu cha chachí tandihí cuan, suri chachí tucu ñu cha cuenda cha sacahnú ñu chí Sutu Mañi

yo, ta nacuhva ñu tyahvi nyoo chi Nyoo tyi chaha ra cha cachi ñu. Ta ñu cha ña chachí tandihí, ña chachí ñu cha cuenda cha sacahnú ñu chí Sutu Mañi yo ta suri nacuhva tucu ñu cuan tyahvi nyoo chi ra.

⁷ Vatyí ni noo yo ña iyó yo chihin fuerza maa yo. Ni ñima maa yo catyí ama cúvi yo. ⁸ Vatyí tatu iyó yo, iyó yo tacuhva sacuvi yo tyiño nuu Nyoo, ta tatu chihí yo, chihí yo tyi Sutu Mañi yo naquehen cuenda ra ñima yo. Yucuan chaha tatu iyó yo, o chihí yo soco chi Sutu Mañi yo cuví chi yo. ⁹ Vatyí ra Cristo chihí ra ta nandotó tucu ra vatyí tacuhva cunyaca ñaha ra chí ñu nyitó ta chí ñu chihí.

¹⁰ Soco yoho, ¿ñáá tuhun cha nyehé nyaun chí yañun? ¿O ñáá tuhun cha ña natín cuendon chí ra? Vatyí tandihí yo cutahan chí cucuhva cuenda yo chí yo nuu Nyoo vatyí cutuñi chí yo nuu ra. ¹¹ Vatyí nu tutu Nyoo catyí chí tyehe caa:

Cha ndicha ndicha cuii vatyí yuhu nyité, catyí Sutu Mañi yo.

Ta tandihí cuii ñáyivi cunacuiñi chiti ñu nui.

Ta tandihí ñu cunacoto nuu ñu chii cha cuví Nyoo.

Ta cusacahnu ñu chii chihin nuu tandihí ñáyivi, catyí Nyoo.

¹² Yucuan chaha noo noo maa yo ta cunacuhva yo cuenda cha sacuví yo chí Nyoo.

Ma sanacavon nu cuatyí chiyañun

¹³ Yucuan chaha, ña tahán ca chí cahan nyaa yo chí tahan yo. Soco nducu yo cuhva cha ma sanacava yo chí ñu nu cuatyí coto sandihí ñu tuhun cha chino iñi ñu.

¹⁴ Yuhu chité vatyí ñahri cha ma cuvi cachi, vatyí chinó vaha iñi chí Sutu Mañi yo Jesucristo, ta maa ra sañahá chii. Soco tatu yihí ñu chicá xiñi ñu tyi yihí cha ña vaha cachi ñu, cha cuenda maa ñu, ña vaha. ¹⁵ Soco tatu cha cuenda cha chachún ta quiñi cuñi yañun, ña ndicha cha cuñun chí ra, ñima ca cuhva cuñi Nyoo sacuvún. Ma cuhvon cha tiví noo ñu chihin cha chachún vatyí ra Cristo chihí ra cha cuenda ñu.

¹⁶ Ma cuhva ndo cha cahan ña vaha ñu siqui noo cha chaha Nyoo ityi chuun tyi cachun. ¹⁷ Vatyí cha nyacá ñaha Nyoo chí yo cuví chí noo cha cachi coo yo nuu ra. Cusí cuñi yo ta taxi ri cuñi ñima yo cha cuenda Tatyí Ii Nyoo cha nyaá ñima yo. Ta ña niñi tuhun cha chachi yo o cha chihí yo. ¹⁸ Ñu sacuví tyiño nuu ra Cristo tyehe caa, siñ cuñi Nyoo nyehé ra chí ñu, ta catyí tucu ñáyivi tyi vaha ñáyivi cuví ñu.

¹⁹ Yucuan chaha cuñi chí cha sañihi ca yo cha coo taxi ri yo chihin ñáyivi. Ta tyicuan caa ta cuví tyinyee yo chí noo noo tahan yo na cuahnu yo chihin tuhun Nyoo. ²⁰ Ma sativun tyiño sahá Nyoo ñima inga ñáyivi

cha cuenda noo cha chachí run. Ndicha vatyí tandihí cha chachí yo ta vaha. Soco ña vaha cha cachi yo tatu chihin cuan sanacavá yo nuu cuatyí chi inga ñu. ²¹ Yucuan chaha, vaha ca cha ma cachi yo coño, ni cha ma coho yo vinu, tatu quiñi cuñi yañi yo chihin cuan. Ma sanacava yo chi ñu nu cuatyí. Ma casi yo chihin noo cha sacuvi yo nu chinó iñi ñu chi Nyoo. ²² Tatu chinó iñun vatyí cuví cachun tandihí, vaha. Soco ma cahun tuhun cuan chihin inga ñu. Noo tuhun ri maun chihin Nyoo coto tuhun cuan. Sií xaan cuñí yo tatu ña chicá uvi iñi yo noo cha chaha Nyoo ityi chí yo cha sacuví yo. ²³ Soco ñu cha chachí ñáá cha chachí ñu, ta chicá uvi iñi ñu, chicoo cuatyí ñu, vatyí ña chinó vaha iñi ñu tyi cuví cachi ñu. Ta tandihí cha sacuví yo chihin cha ña chiño iñi yo tyi chaha Nyoo ityi chí yo tyi sacuvi yo, cuatyí cuví.

15

Na sacuvi yo cha tahán iñi tahan yo, ta ñima cha tahán iñi ri maa yo

¹ Yoó cha ñihi nyaá yo chihin Nyoo, cuñí chí cha tyinyee yo chí ñu cha ña ñihi nyaá chihin Nyoo. Ta ma nducu yo cha tahán iñi ri maa yo. ² Tahan tahan yo cuñí chí cha sacuvi yo cuhva tahán iñi inga ñu cha cuenda cha vaha chí ñu, tacuhva cuví cuahnu ca ñu chihin tuhun Nyoo. ³ Vatyí ni ri ra Cristo ña sacuví ra cuhva tahán iñi

maa ra, soco cuví chí ra tari catyí nu tutu Nyoo tyehe caa: “Tandihí cha cahán ñáyivi chí Nyoo, chí ra Cristo cahán ñu”, catyí chí. ⁴ Vatyí tandihí cha chicunyaꞗ nu tutu Nyoo ta ityi chata ca, chicunyaꞗ chí cha cuenda cha cutuhva yo, tacuhva cuví cuatu yo cha cuñihi yo chihin cha cama iñi yo. Ta vaha cuñí añima yo cha cuenda cha sacuahá yo nu tutu Nyoo. ⁵ Ta Nyoo ican ra chahá cha cama iñi yo, ta chahá ra cha vaha cuñí añima yo. Na tyinyee ca ra chí yo cha coo yo chihin cha iñi ri cuví yo chihin tahan yo tari cuhva iyó ra Cristo Jesús. ⁶ Vatyí tacuhva tandihí yo iñi ri noo cuhva sacahnu yo chí Nyoo Sutu ra Jesucristo ra nyacá ñaha chí yo.

Ñáyivi ñima ñu Israel cuví, cucuiñi ñu tuhun Nyoo

⁷ Yucuan chaha tñin cuenda vaha yo chí tahan yo tacuhva vatyí sacahnu yo chí Nyoo tari tñin cuenda vaha ra Cristo chí maa yo cha cuenda vatyí sacahnú ra chí Nyoo. ⁸ Vatyí catyí yuhu chí ndo vatyí ra Cristo quichí tyinyee ra chí yo cha cuví yo ñu Israel, tacuhva sacuvi ra cha catyí Nyoo chí sutu chahnu yo tyi cusacuvi ra. Ta tyicuan caa ta sañaha ra Cristo vatyí Nyoo sacuví ra cha catyí ra tyi sacuvi ra. ⁹ Ta quichí tucu ra Cristo tacuhva vatyí ñu cha ñima ñu Israel cuví sacahnu tucu ñu cuan chí Nyoo, vatyí Nyoo ndahví cuñí ra nyehe ra chí ñu, tari catyí nu tutu Nyoo tyehe caa:

Yucuan chaha cusacahni chuun chihin nuu ñu cha ñima ñu Israel cuví, tandihi ityi ñu iyó siqui ñuhu ñáyivi.

Ta cucate yaa cha cuenda cha sacahní chuun nuu ñu, catyí chi.

¹⁰ Ta inga tucu nu catyí chi nu tutu Nyoo tyehe caa:

Cusii cuñi nyoho ñu cha ñima ñu Israel cuví.

Cusii cuñi ndo chihin ñu Israel cha cuví ñu ñáyivi cuenda Nyoo.

¹¹ Ta inga tucu nu catyí chi nu tutu Nyoo tyehe caa:

Sacahnu ndo chi Sutu Mañiyo, nyoho ñu cha ñima ñu Israel cuví.

Tandihí ñáyivi sacahnú ñu chi ra cha cuenda cha cahnu xaan cuví maa ra.

¹² Tyaa tucu ra Isaías nu tutu Nyoo tyehe caa:

Cucacu minoo ra vachi tata ra Isaí.

Cuquichi ra vatyí cunyaca ñaha ra chi ñu cha ñima ñu Israel cuví.

Ta maa ñu cuquihí iñi ñu chi ra vatyí cusacacu ra chi ñu.

¹³ Nyoo ican ra chahá tunyee iñi chi yo ta chitó yo tyí cuhva ra cha cuhva ra chi yo. ¡Na sacutu ra chi ndo chihin tusii iñi! Ta coo cha taxi ri cuñi añima ndo cha cuenda cha chinó iñi ndo chi ra, tacuhva vatyí chihin tunyee iñi Tatyí li ra ta quihí vaha iñi ndo cha cucuhva ra chi ndo.

¹⁴ Yañi luhli, chitó vahi vatyí nyoho vaha xaan ñáyivi cuví ndo ta chitó ndo tandihí, ta chitó vaha ndo cuhva ndo

tuhun chi tahan ndo. ¹⁵ Soco nu carta ihya ñihi xaan cahín siqui tandihí tuhun cha tyaj, tacuhva cha ma naa iñi ndo. Tyehe caa sacuví cha cuenda tyí Nyoo chahá ra tumañi iñi chii ¹⁶ cha sacuvi tyiño nuu ra Jesucristo nu nyicu ñu cha ñima ñu Israel cuví. Ta tyiño cha sacuví, ican cuví cha cahín tuhun Nyoo yoso caa sacacu ra añima ñáyivi. Tyehe caa sacuví tacuhva vatyí ñu cha ñima ñu Israel cuví, cuví nacuhva cuende chi ñu chi Nyoo tari noo ofrenda cha tahan iñi ra, vatyí cha ndundi ñu nuu ra cha cuenda Tatyí li ra.

¹⁷ Cha cuenda cha nacuhva cuende chii chi ra Cristo Jesús, yucuan cuenda cuví cusii cuñi ta chité tyí vaha quitá tyiño sacuví nuu Nyoo. ¹⁸ Vatyí ña cañá iñi cahin cha ña nyehí. Soco nacatyí cha sacuví ra Cristo nu chicá noi cahín tuhun Nyoo tacuhva vatyí ñu cha ñima ñu Israel cuví quichaha ñu chi Nyoo. Ta ihya ndicha cha cahín. ¹⁹ Vatyí chihin seña ta milagru ta chihin tunyee iñi Tatyí li ra sacuví ra. Ta tyicuan caa cahín tuhun cha cacu añima ñu sahá ra. Quichahí nya Jerusalén ta tandihí ityi ta nyacua nya Ilírico. ²⁰ Ta tyicuan caa saniñi cahin tuhun cha cacu añima yo maa maa ri nu ta cuiñi ca maa ñáyivi tuhun ra Cristo, tacuhva vatyí ma saha tyiñe nu quichahá saha tyiño inga ra. ²¹ Tari catyí nu tutu Nyoo tyehe caa:

Cucoto ñáyivi cha ta coto ca

maa tuhun ra.

Ta cucutuñi iñi ñu cha ta ñaha ca maa cuiñi tuhun ra, catyí chi.

Nu tyaá ra Pablo cuhva cha cuhun ra ñuu Roma

²² Yucuan chaha ña cuvi maa tuhun cha cuhin cunyehe nu nyicú ndo, vasi cuaha xaan chaha cuñi cuhin.

²³ Soco vityin cha ndihi tyiño sahí ityi ñuu ihya. Ta cha cuaha xaan cuiya cuñi cuhin cunyehe nu nyicú ndo ta cunyai suhva quivi chihin ndo. ²⁴ Nyehí tatu cuhin cunyehe nu nyicú ndo quivi cuhin España. Ta cha yaha cha cunyehe chi ndo, nyehi tatu cuvi tyinyee ndo chii ta cuchaa ndihi nu cuahin.

²⁵ Soco vityin cuahin ñuu Jerusalén ta nyisé suhva cha cutyinyee chi ñu cuenda Nyoo yucuan. ²⁶ Vatyí ñu vehe ñuhu ityi Macedonia ta ityi Acaya nacuaan iñi ñu cha tava ñu suhva xuhun vatyí sacuhun ñu chi ñu ndahvi ñu cuenda Nyoo cha iyó Jerusalén.

²⁷ Tyehe caa quichi cuvi iñi ñu sacuvi ñu. Ta ndicha vatyí tahán chi sacuvi ñu. Vatyí tari maa ñu Israel, ñu chinó iñi chi ra Cristo, chahá ñu tuhun Nyoo chi ñu cha ñima ñu Israel cuví, tyicuan caa tahán chi chi ñu cuan tyinyee tucu ñu chi ñu Israel chihin cha iyó chi ñu.

²⁸ Yucuan chaha, tatu cha yaha sandai tyiño ihya, ta cha yaha nacuhva cuende xuhun ihya chi ñu Jerusalén, tyicuan ta cuhin nya España ta yahi nu nyicú ndo. ²⁹ Chitó vahi vatyí na cuhin nu nyicú ndo,

cuchai chihin cha tyitu añime chihin cha vaha Nyoo cha chahá ra Cristo chii.

³⁰ Yañi, chacú ndahvi nuu ndo na cu ñin ri ndo chihin, chihin tindocho cha nyehí, ta cacan tahvi ndo chi Nyoo cha cuende vatyí cuñi ndo chi Sutu Mañi yo Jesucristo, ta vatyí chahá Tatyí Ii Nyoo cha cuñi ndo chii. ³¹ Cacan ndo cha cuende, na sacacu Nyoo chii ndaha ñu ña chinó iñi chi ra Cristo ityi Judea cuan. Ta cacan ndo cha cuenda cha nyisé ihya cha cuenda ñu cuenda Nyoo ñu Jerusalén cuan, na natiñ cuenda vaha ñu. ³² Vatyí tatu Nyoo ta cuñi ra, chihin cha siñ cuñi quichi nyehi chi ndo ta cuví nyitati ñin ri chihin ndo. ³³ Ta Nyoo ra chahá cha taxi ri coo añima yo, na cunyaa ra chihin tandihi ndo. Ta nacuvi tyicuan caa.

16

Nu sacuhún ra Pablo nocumi chi ñu amigo ra

¹ Sacoté chi ndo cha cuenda hermana Febe vatyí tyinyee xaan ña chi ñu yihí cuenda Nyoo ñuu Cencrea. ² Tñin cuenda vaha ndo chi ña tari tñin cuenda Sutu Mañi yo, tari tahán chi sacuvi ñu yihí cuenda Nyoo. Ta tyinyee ndo chi ña chihin tandihi cha chiñuhu chi ña, vatyí cuaha xaan ñu tyinyee ña chi, ta chi yuhu ñandihí.

³ Cuhva ndo nocumi chi cu Priscila ta chi ra Aquila ñu cha cutahan chihin ndi nu tyiño cha sacuvi ndi cuenda ra Cristo Jesús. ⁴ Chahnya

iñi ñu ñayivi ñu quivi cuan cha cuenda cha sacacu ñu chii, yucuan chaha vatyí nacuhvé tyahvi nyoo chi ñu. Ta ñima yuhu ri, soco tandihi tucu ñu cha ñima ñu Israel cuvi, ta yihí tucu ñu cuenda Nyoo. ⁵ Cuhva tucu ndo nocumi chi ñu yihí cuenda Nyoo cha candú ñn ri vehe cu Priscila ta ra Aquila. Vachi tucu nocumi chi ra tahin, ra Epeneto. Ican ra cuví ra cha xihna ca chino iñi chi ra Cristo ityi Acaya. ⁶ Cuhva ndo nocumi chi cu María. Sahá tyiño xaan ña nu nyicú ndo. ⁷ Cuhva ndo nocumi chi ñu ñui, ra Andrónico ta ra Junias, ra tahin cha ñohó chihin vehe caa. Cahnu tyiño casahá ra cuenda Sutu Mañi yo chihin tandihi ca ra sahá tyiño cuenda Nyoo. Ta xihna ca ra cachino iñi chi ra Cristo ican saha yuhu.

⁸ Cuhva ndo nocumi chi ra Amplias ra tahin cuenda Sutu Mañi yo. ⁹ Cuhva ndo nocumi chi ra Urbano, ra tahan yo cuenda tyiño ra Cristo Jesús, ta chi ra Estaquis ra tahin ñandihí. ¹⁰ Cuhva ndo nocumi chi ra Apeles. Nyehé yo tyi ndicha cha chinó iñi ra chi ra Cristo. Ta nocumi chi ñáyivi chi ra Aristóbulo ñandihí. ¹¹ Cuhva ndo nocumi chi ra ñui, ra Herodión, ta chi ñáyivi chi ra Narciso ñu cha chinó iñi chi Sutu Mañi yo. ¹² Vachi nocumi chi cu Trifena ta chi cu Trifosa, ñu casahá tyiño chihin Sutu Mañi yo. Ta chi hermana yo cu Pérsida, ñaha cha sahá tyiño xaan nu tyiño Sutu Mañi yo. ¹³ Cuhva

ndo nocumi chi ra Rufo, noo ra cahnu cuví ra nuu Nyoo vatyí chinó vaha iñi ra chi Sutu Mañi yo. Ta vachi tucu noo cumi chi sihi ra Rufo. Cuví ña tari sihi. ¹⁴ Cuhva ndo nocumi chi ra Asíncrito, chi ra Flegonte ta chi ra Hermas, ta chi ra Patrobas, chi ra Hermes ta chi ra hermano cha canyicú chihin ra. ¹⁵ Cuhva tucu ndo nocumi chi ra Filólogo ta chi cu Julia ta chi ra Nereo chihin cuhva ra, ta chi ra Olimpás ta chi tandihi ñu cuenda Nyoo cha nyicú chihin ñu.

¹⁶ Nacuhva ndo noo cumi chi noo noo tahan ndo cuenda Nyoo. Tandihí ñu yihí cuenda ra Cristo saquichí ñu nocumi chi ndo.

¹⁷ Yañi, chacú ndahvi nuu ndo, na saha ndo cuenda chi ñu cuñí sasíñ chi ndo, ta nducú ñu cuhva cha nduva ndo chihin tuhun Nyoo, vatyí ñima tyicuan caa cutuhva ndo tuhun ra Cristo. Ma cutahan ndo chihin ñu cuan. ¹⁸ Vatyí ñu cuan ñima tyiño nuu Sutu Mañi yo Jesucristo sacuví ñu, soco cuhva cuñí maa ñu sacuví ñu. Ta sandahví ñaha ñu añima ñáyivi ndahvi chihin tuhun vita cahán ñu. ¹⁹ Tandihí ñáyivi chitó yoso caa quichahá vaha ndo chi Nyoo. Yucuan chaha cusí xaan cuñí chihin ndo, ta cuñí vatyí natyihi tuñi vaha iñi ndo sacuvi ndo cha vaha. Ta ñaha cutuhva ndo sacuvi ndo cha ña vaha. ²⁰ Nyoo ra iyó tandihí cha taxi ri añima, numi ri cuhva ra cha saha ganaa ndo chi ra ña vaha, ta cuhva ra cha cuañi ndo siqui

ra. Na nasoco Sutu Mañi yo Jesucristo chi ndo.

²¹ Ra Timoteo ra cuví ra tahin nuu tyiño sacuví ndi nuu Nyoo, saquichí ra nocumi chi ndo. Ta tyicuan caa tucu ra Lucio, ta ra Jasón, ta ra Sosípater, tandihi ra ñui cuan casaquichí ra nocumi chi ndo.

²² Yuhu ra Tercio savahi tutu ihya cha cuenda ra Pablo, suri saquichí tiqui nocumi chi ndo tyi ñin ri yihí yo cuenda Sutu Mañi yo.

²³ Saquichí ra Gayo nocumi chi ndo ñandihí. Vehe ra nyaí suri ihya ndú ñin ri ndi tandihi ñu yihí cuenda Nyoo. Ra Erasto ra cuví tesorero ñuu ihya, saquichí ra nocumi chi ndo, ta yañi yo ra Cuarto ñandihí.

²⁴ Na cocumi Sutu Mañi yo Jesucristo chi tandihi ndo. Ta na cuvi chi tyicuan caa.

Nu ndihi cahán ra Pablo ta sacahnú ra chi Nyoo

²⁵ Ta vityin na sacahnu yo chi Nyoo, vatyí maa ra cuví ra cucuhva cha cunñi ñni ndo, ta ma sandihi ndo cha chinó ñni ndo tuhun ra cha sacacú ra añima yo. Ican cuví tuhun cahín ta tuhun cha sañahí cha cuenda ra Jesucristo. ñin ri cuví chi chihin tuhun cha ñohō xehe ta cha naha nyata ni cumañi chinō ñuhu ñayivi. ²⁶ Soco vityin sañahá Nyoo chi yo cha cuenda tutu cha casandoō ra profeta, ra cachaha cuenda tuhun ra ta cha naha. Catyí Nyoo, ra iyó tyicuan ri maa, tyí vityin tahán chi coto tandihi ñáyivi tacuhva chino ñni ñu chi ra

ta quichaha ñu tuhun cahán ra. ²⁷ Nyoo noo tuhun maa ra, ta chiñi tuñi xaan ra. Na sacahnu yo chi ra cha cuenda ra Jesucristo tyicuan ri maa. Ta na cuvi chi tyicuan caa.

Carta Cha Xihna Ri Sacuhun Ra Apóstol Pablo Chi Ñáyiví Ñuu Corinto Cha Yihí Cuenda Nyoo

*Nu tyaá ra Pablo noo tutu
chi ñáyiví ñuu Corinto cha yihí
cuenda Nyoo*

1 Yuhu ra Pablo, nacana Nyoo chii vatyí cuñí ra cha cuví noo apóstol ra Jesucristo, o cuñí chí catyí vatyí tachi ra chii nacaque tyiño ra. Yuhu chihin ra Sóstenes yañi yo ² saquichí ndi noo carta ihya chí ndo cha nyicú ndo vehe ñuhu cuenda Nyoo cha nyaá ñuu Corinto. Ñáyiví chí Nyoo cuví ndo vityin, cha cuenda cha ndu ñin ri ndo chihin ra Cristo Jesús. Nyoo nacana ra chí ndo vatyí nanduvi ndo noo ñáyiví vaha cuenda ra, chihin tandihi ñáyiví cha sacahnú chí Sutu Mañi yo Jesucristo tandihi ri ityi. Vatyí cuví ra Nyoo cuenda ñu ta cuenda maa yo ñandihí. ³ Nyoo Sutu yo ta Sutu Mañi yo Jesucristo na nasoco ra chí ndo, ta nacuhva ra cha taxi ri coo añaíma ndo.

*Yoso caa nasocó Nyoo chí
ñu yihí cuenda ra*

4 Tyicuan ri nacuhvé tyahvi nyoo chí Nyoo cha catyí maa ndo, vatyí chaha ra cha vaha chí ndo cuenda ra Cristo Jesús. ⁵ Ta cha ñin

ri cuví ndo chihin ra Cristo, Nyoo chahá ra tunyee iñi ra chí ndo tacuhva cuví cahán ndo tuhun ra. Ta chahá ra cha chíñi tuñi vaha chí ndo. ⁶ Ta tandihi cha catyí chí ndo, tuhun ra Cristo, cuahán chino cava ñáyiví ndo vityin. ⁷ Yucuan chaha ñahri cha cumañí chí ndo. Chahá Nyoo tandihi cha vaha chí ndo cha ni ri ca cha nyatú ndo quiví quichi Sutu Mañi yo Jesucristo. ⁸ Nyoo cusaha cuenda ra chí ndo nyacua nya naa ñáyiví tacuhva yori cuví catyí ñáá cha catyí chí ndo quiví quichi Sutu Mañi yo Jesucristo. ⁹ Nyoo tyicuan ri sacuví ra tari cuhva catyí ra. Ta maa ra cuví ra nacana chí ndo tyi cu ñin ri ndo chihin Sehe ra, ra Jesucristo, Sutu Mañi yo.

*Tatu yihí yo cuenda Sutu
Mañi yo, ña vaha cha cusin yo*

10 Yañi, chiquén chí ndo chihin sívi Sutu Mañi yo Jesucristo, na ñin ri cuví ndo ta ma cusin ndo. Ta ñin ri cuhva caça xiñi ndo. Ta ñin ri tuhun quíhi iñi ndo. ¹¹ Catyí chí ndo tyehe caa, yañi, tyi catyí ñáyiví chí ra Cloé chii, vatyí iyó tisihi nu nyicú ndo. ¹² Vatyí nyoho sin sin cuhva cahán ndo. Noo ndo catyí ndo: “Yuhu, cuenda ra Pablo yihí.” Inga ndo catyí ndo: “Yuhu, cuenda ra Apolos yihí.” Inga ndo catyí ndo: “Yuhu, cuenda ra Pedro yihí.” Inga ndo catyí ndo: “Yuhu, cuenda ra Cristo yihí.” ¹³ ¿Atu tahvi sava ra Cristo? ¿Atu chihí yuhu ra Pablo nu cruzi

cha catyi ndo? ¿Atu condutyā ndo chihin sivi yuhu? Ñima. ¹⁴ Tyahvi nyoo chi Nyoo vatyi yuhu ña sacondutyē chi ni noo nyoho. Soco noo ri sacondutyē chi ra Crispo ri chihin ra Gayo ri. ¹⁵ Tyicuan caa ta ni noo ndo ta ma cuvi catyi ndo vatyi condutyā ndo chihin sivi. ¹⁶ Aan, ta suri sacondutyā tiqui chi ñáyivī chi ra Estéfanas. Soco ña nichón iñi cha sacondutyē chi inga ndo. ¹⁷ Vatyi ra Cristo ña tachī ra chíi tyi sacondutyē. Soco tachī ra tyiño chíi vatyi cahin tuhun ra yoso caa sacacú ra chi yo. Soco ña cahín chihin cha chiñi tuñi ñáyivī ihya, coto catyi ñáyivī chíi tyi ñahri yahvi nyaá cha chihī ra Cristo cuenda cuatyi yo.

Vaha ca cha chiñi tuñi Nyoo ta ñima ca cha chiñi tuñi ñáyivī ihya

¹⁸ Tuhun cha chihī ra Cristo nu cruzi cha catyi cuatyi yo, ñima ri tuhun cuví cuan cha cuenda chi ñáyivī cha cunaa nu cuví anyaya. Soco cha cuenda chi maa yo cha cuví yo ñáyivī cacú añima, tunyee iñi cha chahá Nyoo chi yo cuví cuan. ¹⁹ Vatyi tyicuan caa tucu catyí maa tuhun Nyoo:

Cusanai cha chiñi tuñi ra cuñí maa tyi chitó xaan.

Ta cha chitó xaan ra chiñi tuñi cutave ñin chiyo xiin, catyí Nyoo.

²⁰ Ñahri tuhun cha chitó xaan ra chiñi tuñi, ta ra sacuaha, ta ra chitó xaan nacahan ñáá ndihī tuhun iyó

siqui ñuhu ñáyivī ihya. Vatyi cha chiñi tuñi cha iyó siqui ñuhu ñáyivī ihya, cha ñima ri tuhun nasahā Nyoo chi cuan. ²¹ Nyoo chihin cha chiñi tuñi ra tyaá ra cuhva vatyi ma cuví cohon nuu ñáyivī chi ra chihin cha chiñi tuñi cha iyó siqui ñuhu ñáyivī ihya, soco tyaá ra cuhva vatyi sacacú ra chi ñu chinó iñi tuhun cha cahan noo ñáyivī nuu ñu. Vasi ñima ri tuhun cuví tuhun cuan cha cuenda ñu cha ña ñohó nuu chi Nyoo.

²² Vatyi ñáyivī Israel cuñí ñu nyehe ñu milagru. Ta ñu Grecia maa maa ri maa cha chiñi tuñi ñáyivī ihya nanducú ñu. ²³ Soco yoó sacotó yo tuhun ra Cristo, ra chihī nu cruzi. Ta ñáyivī Israel cahán nuu ñu chíiñi ñu tuhun ihya. Ta ñu cha ñima ñu Israel cuví, cuñí maa ñu tyi tuhun cha ñima ri tuhun cuví ihya. ²⁴ Soco cha cuenda chí ñu nacana Nyoo, an cuví ri ñu ñu Israel, o ñu Grecia, ra Cristo cuví tunyee iñi ta cha chiñi tuñi Nyoo. ²⁵ Vatyi cuñí maa ñáyivī vatyi noo cha ñima ri tuhun cuví cha sacuvī Nyoo. Soco chíiñi tuñi xaan ca Nyoo ta ñima ca ñáyivī iyó siqui ñuhu ñáyivī ihya. Ta cuñí maa ñáyivī tyi ña ñihí fuerza Nyoo. Soco ican cuan cuví fuerza cha ñihi ca cha nuu fuerza tandihī ñáyivī. ²⁶ Yañi, cuñí chí coto ndo vatyi Nyoo nacana ra chí ndo vasi maa ri ñáyivī soho cuví ndo, ta mañi ndo cuví ndo ñáyivī tyayii o ñáyivī chitó xaan cha chíiñi tuñi ñáyivī ihya. ²⁷ Soco Nyoo nacachī vaha ra chí

ñáyiví soho. Vatyí cuhvá ñu ticahan nuu chi ñu cuñí maa tyí chiñi tuñi xaan. Ta nacachí vaha ra chi ñáyiví ñahri fuerza vatyí cuhva ñu ticahan nuu chi ñu cuñí maa tyí iyó xaan fuerza. ²⁸ Nyoo nacachí vaha ra chi ñáyiví ndahvi cha cuñí maa ñáyiví tyí ña chiñuhú ñu. Nacachí ra chi ñáyiví cha ña cuñí nyehe ñáyiví chii, vatyí sanocuee ra chi ra cuví tyiño nahnu. ²⁹ Tyicuan caa sacuví Nyoo tacuhva tyí yori sacahnú chii nuu ra. ³⁰ Soco maa maa Nyoo sacu ñn ri ra chí yo chihin ra Cristo Jesús. Ta sacuví ra tyí ra Cristo cuhva ra cha chiñi tuñi chí yo, ta sacuvahá ra chí yo ta sandundi ra chí yo nuu Nyoo vatyí tyiyahví ra chihin niñi ra cha catyí cuatyí yo, tacuhva cuví cacu yo. ³¹ Yucuan chaha sacuví yo tari cuhva catyí nu tutu Nyoo tyehe caa: “Tatu yóó cha cuñí cuyaa, vaha na cuyaa maa soco chihin Nyoo.”

2

Tuhun ra Cristo, ra chihí nu cruzi

¹ Soco yañi, quiví chahin chicahin tuhun Nyoo chihin ndo, ña cahin tuhun cha chiñi tuñi ñuhu ñayiví ihya. ² Soco maa ri maa tuhun ra Jesucristo, yoso caa chihí ra nu cruzi cha catyí cuatyí yo tyají xiñi ta nacatyí chí ndo. ³ Ta chají nu nyicu ndo tari cha ñahri fuerze. Ta nihí chihin cha yuhvi. ⁴ Ta cuhva cha cahin nuu ndo, ña cahin chihin tuhun

tyaquí tuhun cha chiñi tuñi tari cahán noo ra chitó xaan. Ñima, Soco chihin fuerza maa Tatyí li Nyoo cahin chihin ndo. ⁵ Tacuhva vatyí nachino iñi ndo chí Nyoo soco cha cuenda fuerza maa Nyoo. Ta ñima cha cuenda cha chiñi tuñi ñayiví ihya.

Nyoo chahá ra cha cohon nuu yo chí ra chihin Tatyí li ra

⁶ Soco suvita ri tyí cahán ndi tuhun cha chiñi tuñi chihin ñu cha ñihi ca nyaá chihin tuhun Nyoo. Soco cha chiñi tuñi Nyoo, ta ñima cha chiñi tuñi ñuhu ñayiví ihya, ni ri cha chiñi tuñi ra nyacá ñaha siqui ñuhu ñayiví. Vatyí maa ra cucunaa ra. ⁷ Soco tuhun xehe cha chiñi tuñi maa Nyoo cahán ndi. Vatyí Nyoo chicumí xehe ra minoo tuhun vaha nya ta ni cumañi chino ñuhu ñayiví ihya. Vatyí tyaa ra cuhva tyí cucacu añima yo ta cunyaa yo noo nu vaha chihin ra tyicuan ri maa. ⁸ Ta tuhun ihya ta cutuñi ca iñi ni noo ra nyacá ñaha ñuhu ñayiví ihya. Vatyí tyehe ta cutuñi iñi ra, ma catyaa ra chí Sutu Mañi yo, ra nyacá ñaha gloria, nu cruzi. ⁹ Soco tari cuhva catyí maa tuhun Nyoo: Nyoo sanduvahá ra noo cha vaha xaan tyí cuhva ra chí ñáyiví cha cuñí chí ra. Ta ni noo ñáyiví ta nyehe ca ñu, ta ta cuiñi ca ñu, ta ta ndichi ca xiñi ñu yoso cuhva cha vaha cha chahá Nyoo chí yo, catyí tuhun Nyoo.

¹⁰ Soco Nyoo chahá ra Tatyí li ra vatyí cutuñi ñi yo tuhun ihya. Vatyí Tatyí li ra sañahá chi tandihí chi yo nyacua nya tuhun cha xehe ca cha cumi maa Nyoo.

¹¹ Ma cuví coto noo ra cha chicá xiñi inga ra. Soco suri maa ra chitó ra cha chicá xiñi maa ra. Ta tyicuan caa tucu noo ri Tatyí li Nyoo chitó cha yihí ñi maa Nyoo. ¹² Yoó ñima cha chiñi tuñi ñuhu ñayivi naquehen yo, soco maa Nyoo chahá ra Tatyí li ra chi yo vatyí sacoto chi chi yo yoso caa cha tyaqui cha chahá Nyoo chi yo. ¹³ Tuhun cha cahán ndi chihin ndo ihya, tuhun cha sañahá maa Tatyí li Nyoo chi ndi cuví. Ñima tuhun cha cutuhva ri maa ndi chihin cha chiñi tuñi xiñi ndi. Nacatyí ndi tuhun cha sañahá Tatyí li Nyoo chi ndi chi ñu cha yihí Tatyí li Nyoo chi.

¹⁴ Soco ñu cha ña yihí Tatyí li Nyoo chi, ña cutuñi ñi ñu ta ña cuñi ñu cuiñi ñu cha sañaha Tatyí li Nyoo chi ñu, vatyí cuñi maa ñu tyi tuhun cha ñima ri tuhun cuví cuan. Vatyí in ri maa ñu cha yihí Tatyí li Nyoo cuví cutuñi ñi ñu tuhun cuan. ¹⁵ Soco ñu yihí Tatyí li Nyoo cuví cutuñi ñi ñu. Ta chitó ñu tatu vaha o ña vaha ñáá noo tuhun. Soco ma cuví catyí inga ñayivi tatu vaha o ña vaha cha caá añima maa ñu. ¹⁶ Vatyí tuhun Nyoo catyí chi: “Yori chitó tuhun cha chicá xiñi Sutu Mañi yo. Yori cuví sañahá chi Nyoo”, catyí tuhun Nyoo. Soco yoó cha yihí yo Tatyí li Nyoo, chitó

yo cha chicá xiñi ra Cristo.

3

Ña tahán chi cunyicon yo chi noo rayañi yo, chí Nyoo na cunyicon yo

¹ Soco yañi, quivi cuan ña cuví cahin chihin ndo tari cahin chihin ñu saquehén ityi Tatyí li Nyoo chi, soco cahin chihin ndo tari cahin chihin ñu ni nachino ñi chi Nyoo, tari cha vatyí ni nyihi ndo chihin tuhun ra Cristo cuví cuan. ² Cahin chihin ndo chihin tuhun cha ña yí ri cutuñi ñi ndo. Tari chahá yo sicu coho cha lee cha ta cuví ca cachi nyayu, tyicuan caa sacuví chihin ndo. Vatyí nyoho, quivi cuan ta cuví ca chi ndo. ¡Ta ni vityin ta ta cuví ca chi ndo! ³ Vatyí ni chicá ca xiñi ndo cuhva chicá xiñi ñayivi iyó siqui ñuhu ñayivi ihya. Nyiyó ñi ndo. Iyó tisihi nu nyicú ndo. Cacusin ndo. Ni chicá ca xiñi ndo tuhun ñuhu ñayivi ihya. Ta nyacuví ndo tari nyacuví ñayivi cha ña ñohó nuu Nyoo. ⁴ Vatyí yihí ndo catyí ndo: “Yuhu cuenda ra Pablo yihí.” Ta inga ndo catyí ndo: “Yuhu cuenda ra Apolos yihí.” Cuñi chi catyí tyi nyacuví ndo tari nyacuví ñayivi ña ñohó nuu chi Nyoo.

⁵ Vatyí ¿yoó ra cuví yuhu, ra Pablo? Ta ¿yoó ra cuví ra Apolos? vatyí cañi tahan ndo cha catyí ndi. Vatyí noo ra casacotó tuhun Nyoo chi ndo cuví ndi. Ta yucuan chaha nachino ñi ndo chí Sutu Mañi yo. Ta noo noo ndi sacuví ndi tyiño cha

catyí maa Nyoo tyi sacuvi ndi. ⁶ Yuhu tachí chiti tuhun Nyoo añima ndo. Ta ra Apolos chosó ra. Soco Nyoo sacuahnu ra tuhun ra añima ndo. ⁷ Ta yucuan chaha ni ri ra cha tachí ta ni ri ra cha chosó, ñahri ra cuví ra. Soco Nyoo cuví ra tandihi. Vatyí maa ra sacuahnú ra tuhun ra añima ndo. ⁸ Ra cha tachí ta ra cha chosó, in ri ra cuví ra. Ta cuñihi ra nu vaha sahá Nyoo yoso cuhva tyiño sahá noo noo ra. ⁹ Ta tyicuan caa nyuhu, sahatyiño ndi soco tyiño nuu Nyoo. Ta nyoho cuví ndo tari noo ñuhú nu sahá tyiño Nyoo.

Cuví tucu ndo tari noo vehe cha cuahán savaha Nyoo. ¹⁰ Catyí Nyoo tyi yuhu cuví tari noo ra cuví nuu cha sama vehe. Vatyí chaquín cuhva vehe cuan ta tyihí chaha chi ñuhú. Ta inga ra samá ityi síqui. Soco cuñi chi sahá ra cuenda yoso cuhva samá ra síqui cuan. ¹¹ Ta yori cuví cacun inga cuhva vatyí cha caá cuhva cuan. Vatyí suri maa ra Jesucristo cuví cuhva cuan. ¹² Ta síqui cuhva cuan cuví sama yo chihin xuhun cuan, chihin xuhun cuichin, chihin yuu tyaquí, o chihin vitu, o chihin tuñama o chihin ndaha numa. ¹³ Soco quiví cutuñi chi ñayiví, cunyehe ra Cristo tyiño saha noo noo yo. Vatyí cuquichi ra chihin ñuhú. Ta ñuhú cuan cucahmi chi nya cha ña vaha. ¹⁴ Ta tatu yihí ñu sacuvi ñu tyiño vaha, ma cayu chi. Cuñihi ñu cha cuhva Nyoo chi ñu. ¹⁵ Soco tatu tyiño sahá ñu ta

ndi cayu, cunaa tandihi tyiño sahá ñu. Cacu maa ñu soco tari noo ra cha cuyatyí ca quita nu ñuhú. Vatyí chiin cuii ri ca ta cayu ra.

¹⁶ ¿Atu ña chitó ndo vatyí vehe ñuhu Nyoo cuví chi ndo, ta Tatyí Ii Nyoo iyó ra añima ndo? ¹⁷ Tatu nya noo ñu sativí vehe ñuhu Nyoo, Nyoo cusanaa ra chi ñu, vatyí vehe ñuhu Nyoo, cha ii cuví. Ta vehe ñuhu cuan ican cuví maa yo.

¹⁸ Ni noo ndo ta ma sandavi ñaha ndo chi ndo. Tatu nya nyoho cuñi maa ndo tyi chitó xaan ndo cha chiñi tuñi ñayiví ihya, ndahvi saha ndo chi ndo tari noo ra cha ña chitó maa. Tyicuan ta Nyoo cuhva ca ra cha chiñi tuñi vaha chi ndo. ¹⁹ Vatyí cha chiñi tuñi ñayiví ihya cuví chi noo cha ñima ri tuhun nuu Nyoo. Vatyí tuhun Nyoo catyí chi: “Nyoo sanacavá ra chi ra chitó, suri maa nu trampa cha savaha ra.” ²⁰ Ta catyí tucu chi: “Sutu Mañi yo chitó ra vatyí cha chicá xiñi noo ra chitó, cha ñima ri tuhun cuví.” ²¹ Yucuan chaha ni noo ndo ña tahán chi sacahnú ndo chi ndo tatu nyicón ndo chi noo rayi. Vatyí tandihi cha iyó ta chi maa ndo cuví, tyi maa Nyoo chaha ra chi ndo. ²² Yuhu ra Pablo, ra Apolos, ra Pedro, maa Nyoo chaha ra chi ndi chi ndo tyi nacatyí ndi tuhun ra chi ndo. Ta ñuhu ñayiví ihya, ñayiví iyó yo, tuhun chihi, cha cuví vityin, cha cuví nu cuahan ca chi, tandihi ta chi maa ndo cuví. ²³ Ta sin ri, maa ndo,

chi ra Cristo cuví chi ndo, ta ra Cristo, chi Nyoo cuví chi ra.

4

Ma sacahnu yo chi yo ta ni chi noo yañi yo

¹ Cuñí chi vatyi nyehé ndo chi ndi tari noo ra sahá tyiño chihin ra Cristo. Vatyí tyaa Nyoo tyiño chi ndi vatyi sañaha ndi tuhun xehe ra cha ña chitó ñáyivi nu quichi chi.

² Ta cuñí chi vatyi nyuhu cha cuví ndi musu Nyoo nyita ri quichahá ndi tandihi cha catyí ra chi ndi. ³ Soco cha cuenda yuhu, ña quichahí tatu cahán ndo chii. O tatu cutuñí chii nuu noo ra cuví tyiño, ñahri cuende. Ta ni ri mai ta ña catyí tyi vahi.

⁴ Vasi tuví iñi mai tyi ñahri ca cuatyí, soco ña cuñí chi catyí vatyi ñahri cuatyí nuu Nyoo. Vatyí nuu maa Sutu Mañi yo cucutuñí chi yo. ⁵ Ican tuhun, nyoho ma cahan ndo chi ndi. Cuatu ndo quivi quichi ra Cristo. Ta maa ra cutava nu ndichin cha ñohó xehe nu ñaa iñi. Vatyí cusanatuvi ra cha caá añima noo noo yo. Tyicuan ta Nyoo cutiyiahvi ra yoso cuhva sacuvi noo noo yo.

⁶ Yañi, cahín tuhun ihya chihin ndo cuenda cha vaha chi maa ndo. Vatyí nyehé ndo cuhva iyé, ta cuhva iyó ra Apolos. Vatyí ña cahnu sahá ndi chi ndi. Ta tyicuan caa tucu maa ndo, cutuhva ndo sacuvi ndo tari catyí nu tutu Nyoo: Ma cahnu saha ndo chi ndo. Ta ñima chi noo ri ra cuñi ndo. Soco inuu ri cuhva cuñi ndo chi tandihi ñáyivi.

⁷ Ni noo ndo ta ña cahnu ca ra cuví ndo ican saha inga ndo. Vatyí cha iyó chi ndo maa ri maa cha chahá Nyoo cuví. Yucuan chaha ña tahán chi cha sacahnú ndo chi ndo, vatyi ñima maa ndo ñihí.

⁸ Cha cuhva cha cuñí maa ndo vatyi tandihi tuhun Nyoo chitó ndo, ta ñahri ca cha cumañi chi ndo. Ta cuñí maa ndo tyi Rey cuví ndo. Ta ña chiñuhú ca nyuhu chi ndo, cuñí maa ndo. Vaha tyehe ta tyicuan caa, tacuhva vatyi cuvi tucu nyuhu rey chihin ndo. ⁹ Nyuhu cha cuví ndi apóstol, tari maa cha sandoo Nyoo chi ndi nya chata ca, cahvi iñi. Vatyí nyehé xaan ndi tindoho. Cuví ndi tari noo ra iyó cuatyí, ta tari quivi cha yahá policía chihin ndi ityi cahnu vatyi tacuhva tyi nyehe ñáyivi ta ángel chi ndi. ¹⁰ Sahá ñáyivi tyi ra tondo cuví ndi cha cuenda ra Cristo. Ta nyoho cuñí maa ndo tyi chitó xaan ndo tuhun ra Cristo. Nyuhu cuví ndi tari noo ra cha ñahri fuerza, cha ni ri ca cha nyoho cuñí maa ndo tyi cuaha xaan fuerza ndo iyó. Tasi cuñí nyehe ñáyivi chi ndi, ta chi nyoho sahá ñu ñáyivi. ¹¹ Nya vityin, nyehé ndi tindoho. Chisocó ndi. Ityi ndi ndutya. Cumañi sahna ndi. Ñahrí vehe ndi iyó. Ta ñáyivi, tasi iñi ñu chi ndi. ¹² Ta chitatú ndi cha sahá tyiño ndi chihin ndaha ndi. Cahán ñáyivi chi ndi. Soco nacahán ndi chihin cha vaha nu cahan ñu. Chicá nyicon ñu chi ndi soco cunyeé ndi. ¹³ Cahán ña vaha ñu siqui ndi. Soco ña

yatyín iñi ndi, vita ri chaha ndi tuhun chi ñu. Sahá ñu tari noo mihin chi ndi. Sahá ñu tari noo cha ña chiñuhú ca chi ñáyivi chi ndi. Tyicuan caa sacuví ñu nyacua nya vityin.

14 Sacuhín tuhun ihya chi ndo, soco ñima ticahan nuu chahí chi ndo. Soco chahí tuhun chi ndo tari chahí tuhun chi sehi tyi cuñí chi ndo. 15 Soco vasi uchi mil ra sacuahá sañahá tuhun ra Cristo chi ndo, soco ña cuaha sutu ndo iyó. Yuhu cuví sutu ndo cha cuenda tuhun ra Cristo Jesús. Vatyí sañahí chi ndo yoso caa cacú añima ndo. 16 Ta tyicuan caa catyí chi ndo na cunyicon ndo cuhva iyé.

17 Yucuan chaha tachí chi ra Timoteo, sehi cuenda Sutu Mañi yo, nu nyicu ndo. Nii xaan iñi ra nyicón ra chi Nyoo. Ta cuñí xain chi ra. Maa ra cuasanicohon ra iñi ndo yoso cuhva iyé, vatyí chinó iñi chi ra Cristo. Cusañaha ra chi ndo yoso cuhva sañahí tandihi ri vehe ñuhu. 18 Yihí nyoho cahnu sahá ndo chi ndo. Cuñí maa ndo vatyí ma cuhun que nu nyicú ndo. 19 Soco tyaí cuhva tyi cunyehi nu nyicu ndo cha numi ri, tatu Sutu Mañi yo ta cuñí ra. Tyicuan ta cunyehi tatu ndicha cha iyó fuerza Nyoo chi ra cahnu sahá chii chiña, o tatu cacahán ri maa ra. 20 Vatyí tatu ndicha cha chahá ra cha cunyacá ñaha Nyoo chi ra, ma cahan ri ra. Soco cuatuvi iñi yo vatyí nyaá fuerza Nyoo chihin ra. 21 ¿Ñáa cha cuñí nyoho vii? ¿Atu cha quichi tachi tuñi chi

ndo, o cha quichi nyehi chi ndo chihin cha vita iñi?

5

Nu cutuñi chi noo ra chiyo chihin sihi queen

1 Catyí ñu chii vatyí iyó noo nyoho cha iyó ndo chihin sihi queen ndo. Ihya cuví noo cuatyí cha cahnu xaan, vatyí ni ñu ña ñohó nuu chi Nyoo ta ña nyacuví ñu tari nyoho. 2 ¡Ta tyicuan caa ta cahnu sahá ndo chi ndo cha nuu cha cucuihyá iñi ndo! Cuñí chi vatyí catyí ndo chi ra cha nyacuví cha quiñi caa cuan vatyí ma cutahan ca ra chihin ndo. 3-4 Vasi ña nyaí chihin ndo chihin coño ñuhi, soco cohon iñi ndo vatyí ñohó iñi tuhun ndo, tari cha nyaá mai chihin ndo cuví cuan. Ta cha sandaj tyiño ra cha sacuvi cuatyí cuan chihin sivi maa Sutu Mañi yo Jesucristo. Cuñí chi tyi ndu in ri ndo. Ta saha ndo tuhun tyi nyaí chihin ndo. Ta cunyaa fuerza maa Sutu Mañi yo Jesús chihin ndo ñandihí. 5 Tyicuan ta cuñí chi vatyí nacuhva cuenda ndo chi ra cuan chi cuihna, tacuhva nativi ndihí coño ñuhu ra. Ta cuhva cuví cacu añima ra quivi quichi Sutu Mañi yo Jesucristo.

6 Ña tahán chi sacahnu ndo chi ndo chihin cha sacuví ndo. Vatyí nyehé ndi ndo nyacuví ra cuan cha quiñi caa. ¿Atu ña chitó ndo noo tuhun cha catyí chi vatyí chihin chiin ri yuchan iya ta nandaa naní yuchan pan? 7 Tava ñehe ndo yuchan iya chahnu cha cuví cha ña vaha

cha sativí chi ndo. Tyicuan ta cuvi ndo tari pan cha ñahri yuchan iya yihí chihin, cha tuhva yo chachí cha vico pas-cua. Ta pan cuan, ican cuví ndo vatyí ra Cristo cuví mbee cha chihí cha catyí cuatyí yo. ⁸ Yucuan chaha tahán chi cachi coo yo cuenda cha chihí maa ra Cristo cha catyí yo. Ta sandoó yo cha quiñi caa cha sacuví yo ityí chata cha cuví tari yuchan iya chahnu. Ta cahán yo maa maa ri cha ndicha chihin cha ñi iñi yo. Vatyí cuví chi tari pan cha ñahri yuchan iya yihí.

⁹ Nuu inga carta cha yaha saquichi chi ndo, catyí chi ndo vatyí nyoho ma cohon naha ndo tuhun chihin ñu cha sacuví cha iyó ri maa chihin ñusihi o rayii. ¹⁰ Ta cha catyí chi ndo tyehe caa, ñima cha cuachiyo ndo ingaña ri nu nyicú ñu cha iyó chihin rayii o ñusihi, ta ñima yii ñu o ñasihi ra cuví, o ñu nyiyó iñi, o ñu suhú, o ñu sacahnú xitohyo. Vatyí tatu tyicuan caa, cuñí chi cha quita ndo ingaña ri ñuhu ñayiví. ¹¹ Soco cha cuñí catyí chi ndo vatyí ma cohon naha ndo tuhun chihin noo ñu cha catyí vatyí hermano cuví ñu, ta iyó ri maa ñu chihin rayii o chihin ñusihi ta ñima yii ñu o ñasihi ra cuví, o nyiyó iñi ñu, o sacahnú ñu xitohyo, o cuendu ñu, o chihí ñu ndixi, o suhú ñu. Ñu cha caá tyehe caa, ni cha ma cunyaa ndo cachi ndo chihin ñu. ¹²⁻¹³ Vatyí yoó ña tahán chi sahá yo cuenda chi ra ña

ñohó nuu chi Nyoo. Nyoo cuvi ra sahá cuenda chi ñu cuan. Soco nyoho cuñí chi sahá ndo cuenda chi ñu yihí cuenda Nyoo. Yucuan chaha tavá ñehe ndo chi ra iyó cuatyí chiña nu nyicu ndo.

6

Ma cacan yo cuatyí chaha noo yañi yo cuenda Nyoo nuu ra cuví tyiño

¹ ¿Yoso caa quichi cuvi iñi nyoho chicán ndo cuatyí chaha tahan ndo nuu ra cuví tyiño cha ña yihí cuenda Nyoo chihin ndo, cha nuu cha sacotó ndo chi ra yihí cuenda Nyoo, tacuhva canyehé ra nya ra iyó cuatyí? ² ¿Atu ña chitó ndo vatyí suri maa ndo cusandaa ndo cuatyí ñáyiví iyó siqui ñuhu ñayiví ihya nu cuahan ca chi? Ta tatu maa ndo cusandaa ndo cuatyí cuan, ¿atu ma cuvi sandaa ndo noo tyiño cha ñima ri tuhun ihya? ³ ¿Atu ña chitó ndo vatyí nyacua nya ángel ta cutuñi chi ra nuu yo? ¡Ta nyaca cuví noo tuhun luhlu ñayiví ihya! ⁴ Yucuan chaha tatu iyó tisihi nu nyicú ndo, ¿ñáá tuhun cuahan ndo nuu ra cuví tyiño cha ña chitó tuhun Nyoo?, ta ñahri tyiño cuví ra cuan vehe ñuhu nu nyicú ndo. ⁵ Ihya ndicha tuhun catyí chi ndo, na coo chiin ticahan nuu nuu ndo. ¿Atu yori ndicha cuii noo ra cuví sandaa noo tyiño yañi yo nu canyicú nyoho chiña? ⁶ Vatyí cuahan ndo cua cacan ndo cuatyí chaha yañi yo cuenda Nyoo nuu noo ra cuví

tyiño cha ña chiño iñi chi Nyoo.

⁷ Cha iyó tisihi nu nyicú ndo, ña vaha. Vaha taxin ca cunyeerí ri ndo tatu sacuvi ñu cha ña vaha chihin ndo. Saña ndo, na suhu maa ñu cha chii ndo. ⁸ ¿Soco nyoho suri maa ndo sata sí ndihi ca iñi ndo chi ñáyiví, ta nyacua nya cha chii yañi ndo ta suhú ndo!

⁹⁻¹⁰ ¿Atu ña chitó ndo vatyi ñu quiñi iyó ma quihví ñu nu nyacá ñaha Nyoo? Ma sandavi ñaha ndo chi ndo. Ma quihví tandihi ñu iyó ri maa chihin ñusihí o chihin rayii cha tyicuan ri caa. Ta ni ri ñu cha sacahnú xitohyo, ni ri ñáyiví cha iyó ñasihí o yii, ta cavá noo ñu chihin inga ñaha o chihin inga rayii, ni ra iyó chihin tahan yii, ni ra suhú, ni ra nyiyó iñi cha tyayii, ni ra chiñí, ni ri ñu cuendu, ni ri ñu chitó yoso caa sacuví cha quiñi caa, ma ñihí ñu cha vaha nu nyacá ñaha Nyoo. ¹¹ Vatyi tyicuan caa cuví suhva nyoho. Soco Nyoo cha sandundii ra añima ndo chihin Tatyí Ií ra. Cha sacuvaha Sutú Mañi yo Jesucristo chí ndo nuu Nyoo.

Coño ñuhu yo cuví vehe ñuhu Nyoo

¹² Catyí chi tuhun vatyi libre iyó yo cha sacuví yo tandihi cha cuñí yo. Cha ndicha cuví. Soco ña tandihi ta cuví chí cha vaha chí yo. Ndicha libre iyó yo cha sacuví yo tandihi, soco saha yo cuenda tatu cha vaha cuví o cha ña vaha. Ta ma cuhva yo cha cunyaca ñaha chí chí

yo. ¹³ Catyí ñáyiví vatyi chahá Nyoo nyayu cha cuenda chichi yo. Ta chaha ra chichi yo cha cuenda cha cachi yo nyayu. Cha ndicha cuví. Soco ninduvi cuan cusanaa Nyoo quiví naa ñayiví. Ta ña ndicha cha coño ñuhu yo cuví cha cuenda cha sacuvi yo cha ña vaha chihin ñusihí o chihin rayii. Vatyi coño ñuhu yo cuenda Sutú Mañi yo cuví. Ta maa Sutú Mañi yo cuví ra cuenda coño ñuhu yo. ¹⁴ Tari sanandoto Nyoo chí ra Cristo Jesús, tyicuan caa cusandoto ra chí yo chihin tunyee iñi ra.

¹⁵ ¿Atu ña chitó ndo vatyi tandihi yo cha yihí yo cuenda ra Cristo nanduvi yo noo coño ñuhu chihin ra? Ta noo noo yo cuví tari suhva ri coño ñuhu ra. ¿Atu quehen yuhu chihin coño ñuhu ra Cristo ta sativí chihin noo ñaha cata iñi? Ña tahán chí cunyacuvi yuhu tyicuan caa. ¹⁶ ¿Atu ña chitó ndo vatyi tatu noo rayii ndu iin ri ra chihin noo ñaha cata iñi, noo ri coño ñuhu nanduvi ra chihin ña? Vatyi nu tutu Nyoo catyí chí tyehe caa: “Cha ninduvi ñu, noo ri nanduvi ñu.” Ta ña tahán chí cu iin ri ra yihí cuenda Nyoo chihin ñaha cata iñi. ¹⁷ Soco tatu noo ñáyiví nacuhvá cuenda ñu añima ñu chí ra Cristo, yucuan cuví nu quihví Tatyí Ií ra añima ñu ta noo ri nanduvi ñu chihin ra.

¹⁸ Sanaa ndo iñi ndo tatu quichí cuví iñi ndo chí ñusihí o rayii tatu ñima ñasihí ndo o ñima yii ndo cuví. Vatyi tandihi inga nu cuatyí cha ny-

acuví ñáyiví ña sativí chi coño ñuhu ñu. Soco ñu nyacuví cu-
 atyi chihin cha iyó ñu chihin
 ñusihí o rayii cha tyicuan ri
 caa, sativí ñu coño ñuhu ñu.
 19 ¿Atu ña chitó ndo vatyí coño
 ñuhu yo cuví vehe Tatyí Ii cha
 chahá Nyoo chi yo, vatyí cun-
 yaa ra chihin yo? Yoó ñima
 maa yo nyacá ñaha yo chi yo,
 Nyoo cuví ra nyacá ñaha chi
 yo. 20 Vatyí Nyoo sata ra chi
 yo ta yahví xaan chahá ra
 chi yo. Yucuan chaha cuñí
 chi vatyí sacahnú yo chi Nyoo
 chihin coño ñuhu yo, ta chi-
 hin cha chiñi tuñi yo vatyí
 ninduvi cuan, chi maa Nyoo
 cuví.

7

*Chahá ra Pablo tuhun yoso
 caa coo ñu tandahá noo ñáyiví
 vaha*

1 Ta vityin cuacatyí tuhun
 cha ndaca tuhun ndo chii
 nu tutu cha sacuhun ndo
 chii. Ndicha vatyí vaha cha
 ma tandaha yo. 2 Soco vatyí
 iyó xaan tuhun cha quichí
 cuví iñi ñáyiví cha coo ñu
 chihin ñáyiví cha tyicuan ri
 caa. Yucuan chaha cuñí chi
 vatyí tahan tahan rayii coo
 noo ñasihí ra, ta tahan tahan
 ñusihí coo noo yii ñu. 3 Na
 sacuvi rayii cuhva tahán chi
 chihin ñasihí ra. Ta tyicuan
 caa tucu maa ñusihí, na
 sacuvi ñu cuhya tahán chi
 chihin yii ñu. 4 Ñaha sihi cuan
 ma cuví cunyaca ñaha ri maa
 ña coño ñuhu ña. Vatyí chi yii
 ña cuví coño ñuhu ña. Tyicuan
 caa tucu maa yii ña, ma cuví
 cunyaca ñaha ri maa ra coño

ñuhu ra vatyí chi ñasihí ra
 cuví coño ñuhu ra. 5 Coto
 ñaha ma cuhva ndo chi ndo
 chi tahan ndo. Tatu cuñí
 ndo nanducu ndo chi Nyoo
 chihin oración, iin ri cuhva
 caca xiñi ninduvi ndo. Ta ma
 cuhva ndo chi ndo chi tahan
 ndo suhva quiví. Yaha cuan
 tyicuan ta cuhva tucu ndo chi
 ndo chi tahan ndo coto ma
 cunyeé ndo. Ta coto nducu
 nyehe ra ña vaha chi ndo ta
 cahun ndo cunducu ndo inga
 ñusihí o inga rayii. Ta ña vaha
 cha tyicuan caa.

6 Cha catyí chi ndo tyehe
 caa ñima cha catyí tyi tan-
 daha ndo. Ña saniñí chi ndo
 cha tandaha ndo. Soco cuví
 tandaha ndo tatu cuñí ndo.
 7 Cha cuenda chi yuhu, vaha
 ca coo maa ri maa ndo tari
 mai. Soco Nyoo siin siin
 fuerza chahá ra chi noo noo
 yo. Yihí yo chahá ra fuerza
 chi yo vatyí cuví coo maa ri
 maa yo. Ta yihí yo ña chaha
 ra fuerza cha coo maa ri maa
 yo.

8 Chi ñu tyivaa ta chi ñu
 chihí yii, chahí tuhun chi ñu.
 Vaha ca cha ma coo yii ñu tari
 mai. 9 Soco tatu ma cunyeé
 ñu cha ma coo yii ñu, vaha ca
 cha tandaha ñu ta ñima ca cha
 quichí ri cuví iñi ñu tandaha
 ñu, ta ña tandaha ñu.

10 Soco ñu cha yaha tan-
 daha, catyí chi ñu vatyí
 ma sanandoo ñu chi yii
 ñu. Cha ndicha cuví vatyí
 mandamiento ihya ñima
 cha ndichí xiñi ri cuví soco
 maa Sutu Mañi yo catyí.
 11 Soco tatu noo ñaha sihi
 ta sanandoo ña yii ña, cuñí
 chi vatyí ndoo ña cunyaa ña

cha ma tandaha ca ña. O naquehen ña chi y# ña. Ta suri tyicuan caa, ña tahán chi sanandoo ray# chi ñasihí ra.

12 Ta cha cuenda chi yuhu catyí chi inga ndo tuhun ihya. Vatyí tatu ñasihí noo hermano ta ña chinó iñi ña chi Nyoo, soco ndoó ña vaha cha cunyaa ña chihin ra, ñahri ityi iyó chi ra cha sanandoo ra chi ña. 13 O tatu y# noo hermana, ta ña chinó iñi ra chi Nyoo, soco ndoó ra vaha cha cunyaa ra chihin ña, ñahri ityi iyó chi ña cha sanandoo ña chi ra. 14 Vatyí cha yaha nasoco Nyoo chi ray# cha ña chinó iñi cuan cha cuenda cha #n ri cuví ra chihin ñaha cha chinó iñi cuan. Ta cha yaha nasoco tucu Nyoo chi ñaha cha ña chinó iñi chi Nyoo cha cuenda cha #n ri cuví ña chihin ra chinó iñi. Tatu ña nyacuví ndo tyicuan caa, sehe ndo cucuvi ndotyín tari sehe ñu cha ña chinó iñi chi Nyoo. Soco cha cuenda cha sacuví ndo tyicuan caa, nasocó Nyoo chi sehe ndo. 15 O tatu ray# o ñusihí cha ña chinó iñi chi Nyoo, ta cuñí ñu sanandoó ñu chi tahan ñu cha chinó iñi chi Nyoo, na sanandoo maa ñu. Tyicuan ta ra hermano o ñaha hermana ndoó ñu libre. Vatyí maa Nyoo cuñí ra vatyí coo vaha yo chihin cha ñahri tisihí. 16 Vatyí ña chitó minoo ñaha sihi tatu cacu añima y# ña saha ña. Ta ni ri noo ray# ña chitó ra tatu cacu añima ñasihí ra saha ra.

17 Ta tyicuan caa catyí chi ndo vatyí coo ndo yoso cuhva catyí Sutu Mañi yo chi ndo.

Ta yoso cuhva iyó ndo quiví nacana Nyoo chi ndo. Ta tyicuan caa catyí chi tandihí ñu yihí cuenda Nyoo noo noo vehe ñuhu. 18 Tatu Nyoo ta nacana ra chi noo nyoho ta cha yaha sacuví ñu costumbre circuncisión chi ndo, ma caca iñi ndo. Soco tatu nacana ra chi noo ndo cha ña sacuví ñu costumbre cuan chihin ndo, ña tahán ca chi sacuvi ndo vityin. 19 Ña niñi xaan cha sacuví yo, o cha ma sacuvi yo costumbre circuncisión cuan. Soco cha niñí ca cha quichahá yo tuhun cahán Nyoo. 20 Tahan tahan ndo cuñí chi ndoó ndo yoso cuhva cha iyó ndo quiví cha nacana Nyoo chi ndo. 21 Vatyí tatu iyó chitoho ndo cha nyacá ñaha chi ndo quiví cha nacana Nyoo chi ndo, ma caca iñi ndo, soco tatu chahá chi cuhva cha ndoó ndo libre, cuñí chi nducu ndo cuhva ta ndoó ndo libre. 22 Vatyí quiví nacana Nyoo chi noo ra cha iyó chitoho, nduví ra tari noo ra cha libre iyó, vatyí sacuví ra tyiño nuu Sutu Mañi yo. Ta suri tyicuan caa tucu ra cha iyó libre quiví cha nacana Nyoo chi ra. Vityin ra Cristo nyacá ñaha chi ra. 23 Sata Nyoo chi nyoho. Ta yahvi xaan chaha ra chi ndo. Yucuan chaha ma cuhva ndo cha cunyaca ñaha ray# chi ndo. Ta ma sacuvi ndo tyiño nuu ra. 24 Ta tyicuan caa catyí chi ndo yañi, coo ndo tari cuhva chiyo ndo quiví nacana Nyoo chi ndo.

25 Ta tyicuan tucu ñu cha

ta tandaha ca. Ñahri tuhun chaha Sutú Mañi yo chii cha cuenda ndo. Soco catyí chi ndo yoso cuhva ndichí xiñi. Ta cuví naquehen ndo tuhun cahín tyi cha chitó ndo vatyí cha ndahvi cuñí Nyoo nyehe ra chii ta chaha ra tyiño ihya chii. ²⁶ Cha cuenda chi yuhu, vaha taxin ca ma tandaha ndo. Vatyí cuaha xaan tindoho ñayiví cha iyó yo vityin. ²⁷ Soco tatu cha iyó ñasihi noo hermano, ma nducu ra cuhva cha sanandoo ra chi ña. O tatu ta coo ca ñasihi ra, ma nducu ra chi ña. ²⁸ Soco tatu tandaha ra, ñima cuatyí cuví. O tatu noo ñaha tyivaa tandaha ña, suri ñima cuatyí cuví. Soco ñu tandaha cuaha xaan tindoho cunyehe ñu ñayiví ihya. Ta yucuan chaha catyí chi ndo vatyí vaha ca cha ma tandaha ndo. Vatyí ña cuñí cha nyehé ndo tindoho ta tisihi cuan.

²⁹ Yañi, cha vityin ta ityi nuu ña cuaha ca quiví nyaá. Cuñí chi vatyí ra cha iyó ñasihi cuví ra tari noo ra cha yori ñasihi. Vatyí nyita ri tahán chi caca xiñi ra tuhun Nyoo. ³⁰ Ta tatu nyaá ndo tucuihya iñi, ma quichaha ndo tucuihya iñi cuan, o tatu nyaá ndo tusii iñi, soco ma quichaha xaan ndo tusii iñi cuan. Ta tyicuan caa tucu tatu iyó xuhun ndo, ma quichaha xaan ndo xuhun cuan. Nacuhva ndo tandihi cuan chi Nyoo. ³¹ Ta ra iyó xaan cha chii ñayiví ihya, ma quichaha xaan ra chi cuan, soco cotyiño ra tyiño Nyoo. Vatyí ñayiví cha nyehé yo ihya

cha cuahán sandihi xaan chi.

³² Cuñí vatyí nyoho ma caca xaan xiñi ndo tuhun cha iyó ñayiví ihya. In ri maa tuhun Nyoo caca xiñi ndo. Noo ra tyivaa cha ta tandaha ca chicá xiñi ra yoso caa sacuví ra cuhva cuñí maa Sutú Mañi yo. ³³ Soco tatu cha tandaha ra, chicá xiñi ra yoso caa coo vaha ra ñayiví cuhva tahan iñi ñasihi ra. ³⁴ Ta siin cuhva iyó noo ñusihi cha cha yaha tandaha, ta siin cuhva iyó tucu noo ñusihi cha cumañi ca tandaha. Ñaha cha cumañi ca tandaha chicá xiñi ña in ri maa tuhun Sutú Mañi yo. Ta chicá xiñi ña yoso caa sacahnú ña chi Nyoo chihin coño ñuhu ña ta chihin cha ñi aña ña. Soco ñaha cha cha yahá tandaha chicá xiñi ña yoso caa coo vaha ña ñayiví ihya cuhva tahan iñi yii ña.

³⁵ Catyí tuhun ihya chi ndo cuenda cha vaha chi maa ndo. Ñima cha saniñi chi ndo. Soco vatyí coo vaha ndo noo ñayiví chihin cha ñahri sayangá chi ndo. Ta in ri tyiño Nyoo sacuvi ndo.

³⁶ Soco nya nyoho chicá xiñi ndo vatyí vaha cha tandaha ndo vatyí cha cuayaha quiví ndo; vaha, tandaha ndo tatu cuñí ndo. Ñima cuatyí cuví cuan. ³⁷ Soco tatu inga ndo cha nacuaan vaha iñi ndo vatyí cuandoo ndo cha ma tandaha ndo, vaha tucu. ³⁸ Tu tandaha ndo, vaha. Tu ma tandaha ndo, vaha ca.

³⁹ Soco catyí nu ley Nyoo chi yo vatyí tahan chi cuny-acá ñaha rayii chi ñasihi ra cha ni ri ca cha iyó ra. Soco tatu

chihj ra, iyó ityi chi ña cha tandaha ña yóó chihin cuñí maa ña. Soco tatu ra yihí cuenda Nyoo cuví ra. ⁴⁰ Soco vaha ca coo ña ñayiví tatu ma tandaha ña inga chaha. Ihya cuví cha chicá xiñi yuhu. Ta chahí tuhun ihya chi ndo chihin Tatyí li maa Nyoo, cahvi iñi.

8

Nu sañahá ra Pablo vatyí ma sacoo yo cuatyí inga ñáyiví

¹ Ta vityin cuanacatyí chi ndo cuenda nyayu cha chahá ñu chi xitohyo. Tandihí yo cha ñohó nuu ca yo chi Nyoo, chitó yo tatu vaha o ña vaha cachi yo nyayu cuan. Ta cha cuenda cha chitó yo, yucuan chaha cañu xaan sahá yo chi yo ta sativí cuan chi yo. Soco cha cuñí yo chi tahan yo sandunyeé cuan chi yo.

² Tatu yihí ndo cha cuñí maa ndo tyi chitó ndo, cha cuenda vatyí ta coto ca ndo yoso cuhva cuñí chi cuví cuan.

³ Soco Nyoo ñohó nuu ra chí ñu ñi vaha iñi cuñí chi ra.

⁴ Ta vityin cha cuenda cha cachi yo nyayu cha iyó vico xitohyo: cha chitó vaha yo vatyí noo xitohyo ñahri maa vale chi, vatyí noo ri maa Nyoo iyó. ⁵ Vasi cuñí maa ñáyiví vatyí cuaha xaan Nyoo iyó nu ñuhu ñayiví ihya ta andiví, ⁶ soco cha cuenda chí maa yo noo ri Nyoo Sutu yo iyó. Ta maa ra savaha ra tandihí cuii maa cha iyó. Ta yoó iyó yo cha cuenda maa ra. Ta iyó tucu noo ri Sutu

Mañi yo Jesucristo. Ta maa ra savaha tandihí maa cha iyó, nyacua nya chi maa yo.

⁷ Soco ña tandihí yo chitó yo tuhun ihya. Vatyí suhva ñu tahan yo cuenda Nyoo, ta ni cumañi ca quihví ñu cuenda Nyoo, sacahnu ñu xitohyo. Ta cha cañ ñu sacahnu ñu chí cuan ta cuñí maa ñu tyi nyitó xitohyo cuan. Vatyí ña ñi vaha iñi ñu nyicón ñu chí Nyoo. Ta tatu chachí ñu nyayu cha chahá ñáyiví chí xitohyo cuan, cuñí maa ñu vatyí chicoó cuatyí ñu cuenda xitohyo cuan nuu Nyoo.

⁸ Soco Nyoo ñahri cuenda ra tatu chachí yo, o ña chachí yo. Ñima vatyí chachí yo ta ña vaha ca yo nuu Nyoo, ta ñima cha cuenda cha ña chachí yo ta vaha ca yo. ⁹ Soco saha ndo cuenda nya ndo chachi nyayu cuan ta chitó ndo vatyí ñahri cuatyí ndo chicoo. Cuví sanacava ndo nuu cuatyí chí ñu ni quihví ri cuenda Nyoo, vatyí ñu cuan cuñí maa ñu tyi chicoo cuatyí ñu tatu chachí ñu nyayu cuan. ¹⁰ Vatyí tatu yoho cha chiton tuhun ihya, ta cunyaun ta cachun noo cha iyó vehe xitohyo, ta noo ra yañi yo cha ña ñihi vaha cuahán ra chihin Nyoo nyehé ra chuun yucuan, ra yañi yo cuan cucachi ndihí ra chuhun. ¹¹ Ta ra yañi yo cutiví añima ra vatyí cuñí maa ra tyi chicoo cuatyí ra. Ta ra cuan chihj ra Cristo cha cuenda ra. Ta vityin chicoo cuatyí ra cuñí maa ra. Ta yoho cha chitón, sicun

cuhun cuatyí cuan. ¹²Yucuan chaha tatu sanacavá yo chí noo yañi yo cha ña ñihí vaha cuahán chihin Nyoo, chicoó cuatyí yo nuu ra Cristo. ¹³Yucuan chaha tatu sanacavé chí noo yañi yo nuu cuatyí cha cuenda cha chachí, vaha taxin ca ma cachi ca mai coño, tacuhva cha ma sanacave chí ra nuu cuatyí.

9

Cha tahán chí sacuví ra apóstol Nyoo

¹Yuhu cuví noo ra apóstol Nyoo. Ta yori ñáyivi nyacá ñaha chii. Vatyí nyehí chí ra Jesús Sutu Mañi yo. Ta suri maa ndo cuví cha ndaa tyi ndicha cuví yuhu noo apóstol Nyoo, vatyí chinó iñi ndo tuhun Nyoo cha sacote chí ndo. ²Vasi ña cuñi ñáyivi chinó iñi ñu cha apóstol Nyoo cuví, soco cha cuenda nyoho ican cuví. Vatyí cha cuenda cha chinó iñi ndo chí Sutu Mañi yo, cuví ndo cha ndaa vatyí ndicha cha apóstol cuví.

³Ihya cuví tuhun cuacahin cuenda ñu cha cahán nyaa chii. ⁴Iyó chí ityi chii cha quehín tandihí cha chahá ñu cachi ta cha chahá ñu cohi. ⁵Ta sijn ri cha coo noo ñasihi cha chinó iñi chí Nyoo, tari yañi ra Jesús, ta ra Pedro ta tandihí ca ra apóstol. ⁶O chicá xiñi ndo vatyí yuhu ri ta ra Bernabé tahán chí saha tyiño ndi chihin ndaha ndi ta sata ndi cha chiñuhú chí ndi. ¿Atu ña tahán chí chí nyuhu sandoo ndi tyiño cuan ta cahán ndi tuhun Nyoo? ⁷Ra

cha cuví sindaro tyiyahví gobiernu chí ra ta chotyíño ra xuhun cuan. Ta ra cha tachí yoho tichaha ndivi, chachí ra tichaha ndivi cha quita nu iyó tyiño saha ra. Ta ra cha sahá cumi mbee chihí ra sicui ti. ⁸Ta ma cuñi ndo vatyí tuhun ihya cha ndichi xiñi ri mai cuví. Vatyí nu ley cha tyaq ra Moisés catyí chí tyehe caa: ⁹“Ma tyihi ndo yoho yuhu quiti cha sandundí trigo, vatyí tahán maa chí cachi ti suhva trigu nu sahá tyiño ti.” Ndicha vatyí Nyoo catyí ra tyehe caa soco ñima vatyí cuniñi xaan cuñi ra chihin quiti. ¹⁰Soco na cutuñi ca iñi yo vatyí tari ra tahví ñuhu ta ra cha tachí, tahán chí vatyí cuita iñi ra vatyí cunaquehen ra cha quita nu saha tyiño ra. ¹¹Ta tyicuan caa, tatu nyuhu quichi cahan ndi tuhun Nyoo chihin ndo, tari quivi cha quichi tachí ndi chiti cuví cuan. Ta tahán chí tyi tyinyeé ndo chí ndi cha cuenda cha sacotó ndi tuhun Nyoo chí ndo. ¹²Tatu tyinyeé ndo chí inga ra cha ña quichi tyihi tuhun Nyoo nu nyicú ndo, tahán ca chí cha tyinyeé ndo chí nyuhu, vatyí nyuhu tyihí ndi tuhun Nyoo nu canyicú ndo.

Soco ña cahán ri ndi, ta cunyeé ndi tandihí. Ta ña sayangá ndi chí ndo chihin cha chiñuhú chí ndi. Tacuhva cha ma sandihí ndo tuhun ra Cristo. ¹³Chitó ndo tyi ra sahá tyiño vehe ñuhu ñáyivi Israel, iyó ra chihin cha iyó vehe ñuhu cuan. Vatyí tahán chí tavá sijn ra suhva coño

quiti vatyi cachi ra. Ta tandihi ca coño cuan cucahmi ra tari cuhva catyí maa Nyoo chi ra. ¹⁴ Ta suri tyicuan caa catyí Sutu Mañi yo, vatyi tahán chi tyinyeé ñu yihí cuenda Nyoo chi ra cahán tuhun Nyoo chihin ñu. ¹⁵ Soco yuhu ni noo chaha ña chiquen cha tahán chi chii. Ta ni ña tyaí tuhun ihya vatyi cuñi cha cuhva ndo cha cuhva ndo chii. Vatyi tatu chiquén cha tahán chi chii, ña siñi cuñi cahín tuhun Nyoo. Vaha taxin ca cuñi cha cúvi ta ñima ca cha caquen xuhun chi ndo.

¹⁶ Cha cuenda chi yuhu ñima cha cahnu sahí chii cha cahín tuhun Nyoo. Soco vatyi nyaá siqui cha sacuví. Soco ndahvi cuví yuhu ra ndahvi tatu ma cahin tuhun Nyoo ihya. ¹⁷ Yucuan chaha tatu sacuví chihin cha iyó iñi, cuñihi yahvi. Soco tatu sacuví chihin fuerza, suri cuví chi, vatyi noo tyiño cha tachí maa Nyoo chii tyi sacuví, tahán chi cha sacuví. ¹⁸ Ta tyicuan caa, yahvi cha ñihi, ican cuví cha siñi cuñi cahín tuhun ra Cristo. Ta ña chiquén cha tahán chi chii cha cuenda cha cahín tuhun ra.

¹⁹ Vasi ñima musu cuví yuhu. Soco nanduví musu tandihi ñáyivi. Vatyi tyicuan caa saha ganai cuaha ca ñáyivi cuenda ra Cristo. ²⁰ Tatu ñohí nu nyicú ra Israel, nanduví tari maa ra tacuhva vatyi tyasoho ra tuhun cahin. Vatyi cuñi saha ganai chi ra cuenda ra Cristo. Vatyi ra cuan iyó ra cuhva catyí ley ra Moisés. Ta yuhu

sacuví tari cuhva catyí ley cuan. Soco ñima ley cuan nyacá ñaha chii. ²¹ Soco tatu cuñi saha ganai chi ñu ña quichahá ley ra Moisés, sacuví tari cuhva sacuví ñu. Vatyi tacuhva saha ganai chi ñu. Soco ley maa Nyoo nyacá ñaha chii vatyi chihin ley ra Cristo chicá noi ta ña cuví cunyacuvi cha quiñi caa tari nyacuví maa ñu. ²² Tatu nyaí chihin noo ra cha ta coo vaha ca fuerza Nyoo chii, nanduví tari maa ra, vatyi tacuhva cahan que tuhun Nyoo chihin ra. Ta ndunyeé ca iñi ra chihin tunyee iñi Nyoo. Nanduví yuhu tari cuhva caa noo noo ñáyivi, vatyi tacuhva tyasoho ñu tuhun Nyoo cha cahín ta cacú aña ñu. ²³ Tyicuan caa sacuví tacuhva cuví sacoté tuhun Nyoo chi ñáyivi. Vatyi tacuhva ñihi tumañi iñi cha chahá maa Nyoo chi yo.

²⁴ Chitó ndo vatyi noo sihva cha chinó ñu, tandihi ñu chinó, soco noo ri ñu sahá ganaa. Tyicuan caa tucu maa yo, cuñi chi cha ñihi cunyicon yo chi Nyoo tacuhva sahá ganaa yo nu vaha cha chahá ra chi yo. ²⁵ Tandihi ñu cuahan sihva, sandoo ñu tandihi cha satyoño chi ñu vatyi cuñi ñu sahá ganaa ñu. Ta ñu cuan, cusaha ganaa ñu, soco noo corona numa cha tañi tyehe ri na ityi. Ta yoó nducú yo cuhva soco cha sahá ganaa yo noo cha mativi ca maa. ²⁶ Cha cuenda yuhu ña chinó tondo ri mai, ni ña cañi tahan tondo ri mai.

27 Soco ñihi nyacá ñahi chi coño ñuhi. Ta saniñi quichahi chi Nyoo. Coto suri mai cha yaha sañahi chi inga ra ta ndoí.

10

Nu sañahá ra Pablo vatyí ma tyaa xiin yo Nyoo

1-2 Yañi, ña cuñi cha naa iñi ndo cha cuví chi sutu chahnu yo ta cha naha. Nyoo tyinyee ra chi ñu, ta tachi ra noo vico vatyí cuhun ityi nuu ñu coto cunaa ñu. ñin ri nanduví ñu chihin ra Moisés, ra cuví nuu chi ñu, ta yaha sava ñu tyañuhu. Ta cha tyicuan caa, tari cha condutya ñu chihin vico cuan ta chihin tyañuhu cuví cuan. ³ Ta tandihí ñu chachi ñu ñin ri nyayu cha chaha maa Nyoo. ⁴ Ta tandihí ñu chihí ñu ñin ri ndutya cha chaha maa Nyoo. Vatyí ndutya cuan tava ra chata noo yuu cha cuahan chihin ñu. Ta yuu cuan ra Cristo cuví. ⁵ Soco vasi nyehe ñu cuaha milagru cha sacuví Nyoo, cuaha ñu ña quichaha ñu tuhun cahan ra chihin ñu. Ta chihí ñu chiqui ndí cuan, ta yucuan ndoo ñu.

⁶ Tandihí tuhun ihya chahá chi noo cuhva chi yo. Vatyí tacuhva ma cuñi yo sacuví yo cha ña vaha tari sacuví ñu cuan. ⁷ Yucuan chaha ma sacahnu nyoho chi xitohyo, tari chinyacuví suhva ñu cuan ta cha naha, tari catyí nu tutu Nyoo tyehe caa: “Ta cachiyó ñu vico, ta cachachi ñu, ta cachihí ñu.” ⁸ Ta ma coo ri maa yo chihin inga

ñusihí o chihin inga rayí tatu ñima ñasihí yo cuví, o yí ñu cuví, tari chinyacuví suhva ñu cuan. Ta noo ri quivi chihí oco uñi mil ñu cha cuenda cha chinyacuví ñu cha quiñi caa cuan. ⁹ Ta Sutu Mañi yo cama iñi ra, soco ña tahán chi nducú nyehe yo chi ra. Tari chinyacuví suhva ñu cuan. Ta cachihí ñu cha tyaa coo chi ñu, cha cuenda cha cuñi ñu nducu nyehe ñu chi ra. ¹⁰ Ta ni ma cahan ña vaha ndo siqui Nyoo, tari cahan ña vaha suhva ñu cuan siqui ra. Ta saquichí ra ángel cuenda ra ta chahñi ra chi ñu.

¹¹ Tandihí ihya cuví chi sutu chahnu yo cha chiyo ta cha naha. Ta chicunyaa chi nu libru Nyoo tari noo cuhva vatyí sacotó ra chi yo cha iyó yo ñayivi ihya vityin, nu cuahán sandihí chi. ¹² Ta tyicuan caa tatu tuví iñi maa ndo tyi vaha cuahán ndo chihin Nyoo, ñasaha ndo cuenda coto canacava ndo saha ra ña vaha. ¹³ Tindoho cha nyehé ndo, cuñi maa ndo tyi noo ri maa ndo nyehé tindoho cuan. Soco inuu ri nyehé tandihí ca ñu. Soco cuví cunyeé iñi ndo chi Nyoo, ta maa ra ma cuhva ra nyehé ndo tindoho cha ma cunyeé ca ndo. Soco tatu chaa tindoho chi ndo, tyicuan ta Nyoo cunducu ra cuhva cha quita ndo chichi tindoho cuan ta cuví cunyeé ndo.

¹⁴ Yucuan chaha yañi, ma sacahnu ndo chi xitohyo. ¹⁵ Cahín chihin ndo tari cahín chihin noo ra tyihí tuñi iñi. Yucuan chaha saha ndo

cuenda cha catyí chi ndo. Ta nyehé ndo tatu ndicha o ña ndicha tuhun cahín chihin ndo. ¹⁶ Quiví cha nicohón iñi yo tyi chihí ra Cristo nu cruzi, chihí yo vinu ta chachí yo pan. Ta vinu cuan cuñí chi catyi vatyí ñn ri cuví yo chihin ra Cristo cuenda ññi ra. Ta chachi yo pan ta cuñí chi catyi vatyí ñn ri cuví yo chihin ra cuenda coño ñuhu ra. ¹⁷ Vatyí vasi cuaha yo, soco tandihí yo chachí yo noo ri pan. Ta yucuan chaha tandihí yo nduví yo noo ri coño ñuhu ra.

¹⁸ ¿Atu nicohón iñi ndo yoso caa iyó ñu Israel? Chachí tucu maa ñu quití cha chahá ñu chi Nyoo, ta cha cuenda cha nyacuví ñu cha tyicuan caa, ñn ri cuví ñu chihin cuan. ¹⁹ Ñima cha catyí chi ndo tyi vale xitohyo cha sacahnú ñu ña ñohó nuu chi Nyoo. Ña vale, ni ri coño cha chahá ñu chi xitohyo cuan ta ña vale. ²⁰ Soco catyí chi ndo vatyí ñu ña ñohó nuu chi Nyoo chahá ñu cha chahá ñu, soco chi ra ña vaha. Ta ñima chi Nyoo. Ta ña tahán chi cha ndu ñn ri ndo chihin ra ña vaha. ²¹ Vatyí ma cuví coho yo copa Nyoo ta suri cuhva cuan ta coho tucu yo copa ra ña vaha. Ta ma cuví cachi yo nu mesa Nyoo. Ta suri cuhva cuan cachi yo nu mesa ra ña vaha. ²² Ma cuhva yo tisihi chi Nyoo vatyí maa ra iyó ca fuerza chi ra ta ñima ca maa yo.

Sacuvi yo ñáá cha sacuvi yo, soco cha cuenda cha vaha chi tahan yo

²³ Catyí chi tuhun: “Cuví sacuvi yo ñáá cha cuñí yo. Soco ña tandihí ta cuví chi cha vaha chi yo.” Ta ndicha cuví sacuví yo cha cuñí yo. Soco ña tandihí ta tyinyeé chi chi yo cha cuahnu yo chihin tuhun Nyoo. ²⁴ Ma nanducu yo cha vaha chi maa ri maa yo, soco na nducu tucu yo cha vaha chi inga ñu.

²⁵ Cachi ndo ñáá coño cha xicó ñu nuyahvi. Ta ma ndaca tuhun ndo ta ma ndichí xiñi ndo yóó chi cuenda cuví. ²⁶ Vatyí ñuhu ñayiví ta tandihí cha iyó nuu chí, chi maa Nyoo cuví.

²⁷ O tatu noo ñu ña chinó iñi chi Nyoo, catyí ñu chi ndo cha cucachi ndo vehe ñu, ta tatu cuñí ndo cuhun ndo, cuhun ndo ta cachi ndo tandihí cha chahá ñu cachi ndo. Ta ma ndaca tuhun ndo ñáá cuenda cuví. ²⁸ Soco tatu nya noo ñu catyí ñu chi ndo: “Nyayu ihya nyayu cha chaha cuenda ñu chi xitohyo cuví”, catyí ñu. Ma cachi ca ndo tacuhva cha ma nducuihya cuñi añima ñu cha catyi chi ndo tyicuan caa. ²⁹ Cahín tuhun ihya cuenda inga ñu ta ñima cuenda maa ndo.

Soco yihí ndo catyí ndo: “¿Ñáá tuhun cha sahá xaan ra ihya cuenda chi yuhu cha catyi inga ñáyivi? ³⁰ Tatu nacuhvé tyahvi nyoo chi Nyoo cuhva cha cuacachi, ñáá tuhun catyí inga ra cuan tyi ña vaha cachí”, catyí ndo. ³¹ Cuacatyí chi ndo tyehe caa, tatu chachí ndo, o chihí ndo, o sacuví ndo ñáá ca cha sacuví ndo, sacuví ndo soco

chi maa Nyoo sacahnu ndo chihin cha sacuví ndo. ³² Ta ma cuhva ndo cuhva cha canacavá noo tahan ndo, ni ra Israel, ni ñáyivi cha ñima ñu Israel cuvi, ni ñu yihí cuenda Nyoo. ³³ Tari yuhu, nanduquí cha vaha cuví chi ñáyivi. Ña nanduquí cha vaha chi mai, soco cha vaha chi inga ñáyivi nanduquí. Vatyí tacuhva cacu añima ñu.

11

¹ Cuñí vatyí cunyicon ndo cuhva nyacuví. Tari mai nyiquén cuhva nyacuví ra Cristo.

Yoso caa coo ñusihí nu ndu ñn ríyo

² Yañi, sii xaan cuñí vatyí tyicuan ri nicohón iñi ndo chii. Ta quichahá ndo cha sañahí chi ndo. ³ Soco cuñí tyí coto ndo vatyí ra Cristo cuví xiñi noo noo rayii, ta rayii cuví xiñi ñasihí ra, tari Nyoo cuví ra xiñi ra Cristo.

⁴ Tatu noo rayii, nyasí xiñi ra ta chicán tahvi ra o cahán ra tuhun cha chahá Nyoo chí ra, ticahan nuu chahá ra chí ra cuví xiñi ra. ⁵ Soco tatu noo ñaha síhi ña chasí ña xiñi ña cuhva cha chicán tahvi ña, o cuhva cha cahán ña tuhun cha chahá Nyoo chí ña, tari cha satya ndii xiñi ña cuví cuan. Ta ticahan nuu chahá ña chí ra cuví xiñi ña. ⁶ Tatu noo ñaha síhi ña chasí ña xiñi ña, vaha taxin ca nacahnya ña tandihí ixi xiñi ña. O tatu cahán nuu ña cha satya ndii ixi xiñi ña, nacasi ña xiñi ña. ⁷ Ña tahan chí casi rayii xiñi ra. Vatyí cuhva caá Nyoo

caa ra, vatyí nyacá ñaha ra chí ñasihí ra, tari nyacá ñaha Nyoo chí ra. Soco noo ñaha síhi chahá ña cha cunyaca ñaha yii ña chí ña. ⁸ Vatyí quívi savaha Nyoo chí rayii, ña savaha ra chí ra chihin yiqui naha ñaha síhi. Soco chihin yiqui naha rayii savaha Nyoo chí ñaha síhi. ⁹ Ta cha catyí rayii, ta chingo ñaha síhi. ¹⁰ Yucuan chaha ñusihí cuñí chí cunyasi xiñi ñu. Vatyí ican cuan cuví noo seña vatyí nyacá ñaha yii ñu chí ñu. Ta cha cuenda cha vaha chí ángel cuví. ¹¹ Soco tyaa maa Nyoo cuhva vatyí chiñuhú rayii chí ñusihí. Ta chiñuhú ñusihí chí rayii. ¹² Vatyí ndicha ñaha síhi chingo ña chihin yiqui naha rayii, tari quívi cha sacacu ra chí ña cuví cuan. Soco nya cua nya quívi cuan ta maa ña quichaha sacacu ña chí rayii. Ta nya cua nya vityin ñusihí ta rayii maa Nyoo chaha cha coo ni nduvi tahan ñu.

¹³ Nyehé maa ndo. ¿Atu vaha quetuví cha ña nyasí xiñi ñusihí ta chicán tahvi ñu chichi vehe ñuhu? ¹⁴ Vatyí cha chitó ndo vatyí ticahan nuu cuví chí rayii tatu nañi xiñi ra. ¹⁵ Soco ñusihí, vaha cha cunañi xiñi ñu vatyí Nyoo chahá ra ixi nañi chí ñu vatyí casi chí xiñi ñu. ¹⁶ Soco tatu yóo cha cuñí cuví yuhu cha catyí tuhun ihya, cuñí chí coto ndo vatyí ni nyuhu ta ni vehe ñuhu Nyoo, ñahri inga costumbre iyó chí ndi.

Nu sañahá ra Pablo chí ñu vatyí ña vaha cuhva chachí ñu Santa Cena

17 Yañi, nonga tuhun cuacatyí chí ndo. Vatyí ña sii cuñí chihin ndo, vatyí ndu ñin ri ndo, soco ña chahá chí cha vaha chí ndo. Ta sativí chí chí ndo. 18 Ta cuaha xaan ñáyiví nacatyí chí vatyí cuhva cha ndu ñin ri ndo cha cuacoo culto, iyó ndo cha tavá sijn ndo chí ndo. Ta suhva ri chinó ñni, ta suhva ña chinó tucu ñni. Soco vasi ndicha. 19 Vasi cuñí chí coo tisihi nu nyicú ndo tacuhva coto yo nya ndo ndicha cha yihí cuenda Nyoo. 20 Soco tatu tyicuan caa iyó tisihi nu nyicú ndo, ñima Santa Cena chachí ndo cuví cuan. 21 Vatyí cuhva cha cuacachi ndo, chachí ri ndo cha nyisó ndo. Ta ña nyatú ndo nya ndu ñin ri tahan ndo. Ta yihí ndo cuaha chachí ndo. Ta chíñi ndo chihin vinu. Ta yihí ndo ña ñihí ndihi ndo cha cachi ndo. 22 ¿Atu ñahri vehe ndo cachi ndo ta coho ndo? Vatyí cha nyacuví ndo tyehe caa, ña cuñi nyehé ndo vehe ñuhu Nyoo cuví cuan. Ta chahá ndo ticahán nuu chí ñu ñahri maa iyó chí. ¿Atu tahán chí catyí chí ndo vatyí vaha cuhva nyacuví ndo, cuñi maa ndo? Ña tahán chí tyi ñahri noo cha cachi caa nyacuví ndo.

Ra Pablo chahá ra tuhun chí ñu, ñáá tuhun quehén ñu Santa Cena

(Mt. 26.26-29; Mr. 14.22-25; Lc. 22.14-20)

23 Vatyí yuhu suri maa Sutu Mañi yo sañaha tuhun ihya chí. Ta suri maa tuhun ihya sañahi chí ndo. Cha cuaa cha

ni cumañi ca cuhva cuenda ra Judas chí Sutu Mañi yo chí ra xaan ñni chí ra, ra Jesús quehén ra noo pan. 24 Ta cha yahá nacuhva ra tyahvi nyoo chí Nyoo ta tahvi sava ra. Ta catyí ra: “Cachi ndo. Vatyí tari coño ñuhi cuví pan ihya. Ta cha catyí ndo ta cucúvi yuhu. Sacuvi ndo tyehe caa vatyí nicohon ñni ndo chí”, catyí ra Jesús. 25 Ta cha yahá cha cacuxiñi ra ta quehén ra Jesús copa ta catyí ra: “Chihin copa vinu ihya natyihí tahan Nyoo tuhun chaa chihin ndo vityin. Vatyí vinu cha yihí chichi copa ihya, ñni cuví. Tahan ri cuacoho ndo, coho ndo cha cuenda cha nicohón ñni ndo chí”, catyí ra Jesús cha cuaa cuan. 26 Ta tahan ri cha ndu ñin ri yo ta chachí yo pan ta chíhí yo vinu sacotó yo chí ñáyiví vatyí cha catyí cuatyí yo chíhí Sutu Mañi yo. Ta tyicuan caa sacotó yo chí ñáyiví nyacua nya quiví quichi tucu ra.

Ra Pablo chahá ra tuhun chí yo yoso caa saccoó yo Santa Cena

27 Tatu chachí yo pan ta chíhí yo vinu noo cuhvá cha ña chitahán ñni Nyoo, chicoó cuatyí yo. Vatyí ña sahá yo ñáyiví coño ñuhu ta ñni ra Cristo. 28 Yucuan chaha cuñí chí sahá yo cuenda tatu vaha cuahán yo chihin Nyoo cha ni ri ca cha cumañi cachi yo pan ta coho yo vinu. 29 Vatyí tatu chachí yo ta chíhí yo chíhín cha ña sahá yo cuenda ñáá tuhun chíhí ra Cristo, Nyoo cutachi tuñi ra chí yo.

³⁰ Yucuan chaha cuaha xaan nyoho cuhví ndo, ta ñahri vaha fuerza ndo. Ta yihí ndo cha chihí ndo. ³¹ Soco tatu sahá vaha yo cuenda chi yo, Sutu Mañi yo ma tachi tuñi ra chi yo. ³² Soco tatu Sutu Mañi yo ta tachi tuñi ra chi yo tyicuan caa, vatyí tacuhva ma cunaa yo chihin ñáyiví iyó siquí ñuhu ñayiví ihya.

³³ Ta tyicuan caa nyoho yañi, tatu cuandu ñn ri ndo cha cuacoo Santa Cena, cuatu ndo chi noo noo tahan ndo ta cachi ndo ta coho ndo ñn ri. ³⁴ Soco tatu nya noo nyoho chisocó ndo, cachi ndo nya vehe ndo tacuhva cha ma tachi tuñi Nyoo chi ndo.

Ta inga tuhun cusandaa mai quiví cha quichi nyehi nu nyicu ndo.

12

Cha vaha cha chahá Tatyí Ii Nyoo chi yo

¹ Yañi, cuñí vatyí coto ndo ñáá ndihí cha vaha cha chahá Tatyí Ii Nyoo chi noo noo yo.

² Chitó ndo vatyí quiví cha ña ñohó nuu ndo chi Nyoo, chahá ndo chi ndo cha cunyaca ñaha xitohyo cha ña cuví cahan. ³ Yucuan chaha cuñí tyí coto ndo vatyí tatu noo ra catyí tyí ña vaha ra Jesús, ñima Tatyí Ii Nyoo yihí chi ra. Soco tatu noo ra cha catyí tyí ra Cristo cuví Sutu Mañi yo, Tatyí Ii Nyoo yihí chi ra.

⁴ Sñn sñn cha vaha naquehén noo noo yo, soco maa Tatyí Ii Nyoo ican chahá. ⁵ Sñn sñn cuhva sahá tyiño yo soco tyiño nuu noo ri maa

Sutu Mañi yo sacuví yo. ⁶ Sñn sñn tunyee iñi chahá ra chi noo noo yo. Soco noo ri maa Nyoo cuví ra chotyíño chi tandihí yo. ⁷ Chi noo noo yo chahá ra tunyee iñi Tatyí Ii ra, tacuhva tyí tyinyeé yo chi tandihí ñu yihí cuenda ra. ⁸ Chi suhva ñu chahá Tatyí Ii Nyoo vatyí cahán ñu chihin cha chiñi tuñi maa ra. Ta chi inga ñu chahá ra cha nacoto ñu ta cahan ñu tuhun cha sacotó Nyoo chi ñu. ⁹ Ta chi inga ñu chahá ra cha chinó vavaha iñi ñu chi ra. Ta suri maa Tatyí Ii ra chahá ra tunyee iñi chi inga ñu vatyí cuví sanduvaha ñu chi ñu cuhví. ¹⁰ Ta chi inga ñu chahá ra tunyee iñi vatyí cuví sacuví ñu milagru. Ta inga ñu chahá cuenda ñu tuhun cahán Nyoo. Ta chi inga ñu chahá ra vatyí cuví cohon nuu ñu Tatyí Ii Nyoo ta tatyí ña vaha. Ta chi inga ñu chahá ra tunyee iñi ra vatyí cuví cahan ñu inga sahan cha ña chitó ñu. Ta chi inga ñu chahá ra tunyee iñi vatyí cuví nacoto ñu ta nacatyí ñu inga sahan cha cahán tahan ñu. ¹¹ Soco tandihí tuhun ihya, noo ri maa Tatyí Ii Nyoo chahá. Soco sñn sñn cuhva chahá ra chi noo noo yo, yoso cuhva cuñí maa ra.

Chichi cha tandihí yo ta nduví yo noo ri coño ñuhu ra Cristo

¹² Ra Cristo cuví ra tari noo coño ñuhu. Vatyí cuaha cha nyaá chi coño ñuhu. Nyaá xiñi. Nyaá ndaha. Nyaá chaha. Ta chichi cha tandihí cuan nanduví chi noo ri coño

ñuhu. ¹³ Ta tyicuan caa tucu tandihí yo, an cuví yo ñu Israel, o ñu Grecia, o ñu iyó chitoho, o ñu yori chitoho, condutya yo vatyí cuví yo noo ri coño ñuhu cuenda ra Cristo. Vatyí noo ri maa Tatyí Ii ra chahá ra tyí quihí chi tandihí yo.

¹⁴ Noo coño ñuhu cuaha xaan cuenda yihí tahan. Ñima minoo ri cuenda. ¹⁵ Tyehe ta cuví cahan chaha yo ta catyí chi: “Yuhu ñima coño ñuhu cuví vatyí ñima ndaha cuví.” Ñima vatyí catyí chi tyicuan caa ta ñima coño ñuhu cuví chi. ¹⁶ O tyehe ta cuví cahan soho yo ta catyí chi: “Yuhu ñima coño ñuhu cuví vatyí ñima chiti nuu cuví.” Ñima tyí catyí chi tyicuan caa ta cusandihí chi cha cuví chi coño ñuhu. ¹⁷ Tyehe ta tandihí coño ñuhu yo cuví chiti nuu yo, yoso caa cuví cuiñi yo. O tyehe ta tandihí coño ñuhu yo cuví soho yo, yoso caa cuví tahñi yo. ¹⁸ Soco Nyoo tyaa ra noo noo cuan nu cuñí maa ra. ¹⁹ Tatu ñin cahnu ri caa coño ñuhu yo, ñima coño ñuhu cuví. Ta ña vaha quetuví. ²⁰ Soco vasi cuaha cha nyaá chi yo, vaha quetuví vatyí nyaá tandihí cha cuví coño ñuhu chi yo.

²¹ Tyehe ta cuví cahan chiti nuu yo, ñahri ityí iyó chi chi cha catyí chi chi ndaha yo: “Ña chiñuhú yoho chii.” Ta ni xiñi yo ta ñahri ityí iyó chi chi cha catyí chi chi chaha yo: “Ña chiñuhú yoho chii.”

²² Ña vaha cha catyí chi tyicuan caa. Vatyí vasi luhlu

ri noo coño ñuhu yo cha cuñí maa yo tyí ña chiñuhú chi yo, ican cuan cuví cha chiñuhú ca chi yo. ²³ Ta nu cuñí vaha yo, ican cuan sacuihnó vaha ca yo. Ta nu cuñí maa yo tyí ña tyaqui, ican cuan sacuví ca yo. ²⁴ Ta nu tyaqui ca, ña cuñí chi sacuví yo. Soco maa Nyoo sandu ñin ri ra coño ñuhu yo, tacuhva vatyí nu cuñí maa yo tyí ña tyaqui, sacahnú ca yo. ²⁵ Tacuhva cha ma cusin coño ñuhu, tahan tahan chi cuñí chi quihí iñi chi cha catyí inga tahan chi. ²⁶ Tatu suhva coño ñuhu yo nyehé chi tandocho, tandihí ri chi nyehé, ñima noo ri chi. Ta tatu suhva chi cusí cuñi chi, tandihí ri chi ta cusí cuñi chi, ñima noo ri chi.

²⁷ Ta maa yo cuví yo coño ñuhu ra Cristo. Ta suhva suhva coño ñuhu ra cuví noo noo yo. ²⁸ Ta Nyoo cuatyaa ra chi noo noo yo vehe ñuhu tacuhva tyinyeé yo chi tahan yo. Cha xihna ca cuatyaa ra chi ra apóstol. Cha cu uvi, chi ra profeta, o ra cachahá cuenda tuhun cahán Nyoo cuví cuan. Ta cha cu uñi, chi ra casañahá. Ta yaha cuan, ra cha casacuví milagru, ta ra cha casanduvahá chi ñu cuhví, ta ra cha catyinyeé chi ñáyivi, ta ra casahacuendá vehe ñuhu, ta ra cha cacahán inga sahan cha ña chitó ra. ²⁹ Ña tandihí yo cuví yo apóstol. Ña tandihí yo cuví yo noo profeta. Ña tandihí yo cuví yo ra sañaha. Ña tandihí yo sacuví yo milagru. ³⁰ Ña tandihí yo chahá

Nyoo vatyí sanduvahá yo ñu cuhví. Ña tandihí yo cahán yo inga sahan cha ña chitó yo. Ña tandihí yo cuví nacoto yo ta nacatyí yo ñáá cha cuñí chi catyí noo cha cahán yo chihin inga sahan. ³¹ Ta nducu ndo cuhva naquehen ndo cha vaha ca cha chahá Nyoo. Soco cuasañahi noo ityi cha vaha ca chi ndo.

13

Chahá ra Pablo tuhun chi yo yoso caa tahán chi cha cuñí yo chi ñáyivi

¹ Tatu yuhu ta cuví cahin cuaha ri nuu sahan iyó siqui ñuhu ñayivi ihya, ta cuví cahantiquí sahan ángel ñandihí, soco tatu ñahri cha cuñí chi Nyoo ta chi ñáyivi, cuví tari noo tambu cha nañí ri maa o noo caa cha chacú ndaxin ri maa. ² Tatu cuví cuhva cuende tuhun cahan Nyoo, o tatu cutuñí iñi tandihí tuhun xehe ca, ta chité tandihí, ta ña cuñí chi Nyoo ta chi ñáyivi, ñahri maa tuhun. Tatu chinó vavaha iñi chi Nyoo nyacua cuví catyi chi ra na tohon ra noo yucu cuan ta natyaa ra inga ityi, ta sacuví ra cha chiquén, soco tatu ña cuñí chi Nyoo ta chi ñáyivi, ñahri ra cuví. ³ O tatu cuhve tandihí cha iyó chii chi ñu ndahvi, ta nyacua cuhva cuende ñayivi tyi cayu coño ñuhi, soco tatu ña cuñí chi Nyoo ta chi ñáyivi, ñahri maa tuhun.

⁴ Tatu cuñí yo chi Nyoo ta chi ñáyivi, ña ihñi tisihi yo. Vaha ñáyivi cuví yo. Ña nyiyó iñi yo cha chahá Nyoo chi inga ñu, ña cahnu sahá yo

chi yo, ta ña yaá yo. ⁵ Tatu cuñí yo chi Nyoo ta chi ñáyivi, ña quiñi iyó yo. Ña nanducú yo maa ri cha vaha chi maa yo. Ña cuxaán yo. Ña ndoó tisihi añima yo. ⁶ Tatu cuñí yo chi Nyoo ta chi ñáyivi, ña cusii cuñí yo ñáá ndihí cha ña vaha sacuví ñáyivi. Soco cusii cuñi yo cuenda cha vaha ta cha ndicha. ⁷ Tatu cuñí yo chi Nyoo ta chi ñáyivi, cunyeé yo nyehe yo tindoho sahá ñáyivi. Chinó iñi yo tyi cusacuví ñu cha vaha. Nyatú yo cha nasama ñu cuhva iyó ñu. Chihin cha cama iñi yo ta cunyee yo tandihí.

⁸ Cha cuñí yo chi Nyoo ta chi ñáyivi ma ndihí maa, soco coo quivi cha ma coo ca tuhun cha sahá yo profetizar. Ta ma cahan ca yo inga sahan cha ña chitó yo, ta tandihí tuhun cha chitó xaan yo cundihí. ⁹ Vityin chiin ri chitó yo ta chiin ri sahá yo profetizar. ¹⁰ Soco quivi quichi ra Cristo, cunduvaha tandihí ta cucoto yo tandihí, ta cundihí tuhun cha chitó yo chiin ri.

¹¹ Quivi cu luhlí cahin ta chica xiñi tari ra cuatyaa. Soco quivi chahní sandoj cha nyacuví tari ra cuatyaa. ¹² Ta tyicuan caa tucu, cuví yo tari ra cuatyaa vityin. Tari cha nyehé yo nu ino cha ña ndichin vaha. Soco quivi quichi ra Cristo ta cunyehe vaha yo chihin nuu yo chi ra. Chiin ri chitó yo cha vityin. Soco quivi cuan tandihí cuii ta cucoto yo, tari ñohó nuu Nyoo chi yo. ¹³ Iyó uñi tahan cha

ma ndihí maa: cha chinó iñi yo chi Nyoo, cha cuatu yo cha ñihí yo cha cuenda ra Cristo, ta cha cuñí yo chi Nyoo ta chi ñáyivi. Soco chichi cha ninduñi tahan cuan, cha chiñuhú ca chi yo, cha cuñí yo chi Nyoo ta chi ñáyivi.

14

Nu sañahá ra Pablo yoso caa cahán yo inga sahan cha ña chitó yo

¹ Na sañihi yo cuñí yo chi Nyoo ta chi ñáyivi. Ta na nducu yo cuhva naquehen yo tunyee iñi cha chahá Tatyí Ii Nyoo chi yo. Na nducu xihna yo cha cuhva cuenda yo tuhun cahán Nyoo, o sahá yo profetizar cuví cuan. ² Vatyí tatu cahán yo inga sahan cha ña chitó yo, cahán yo soco chihin Nyoo. Ñima chihin ñáyivi. Vatyí ni noo ñu ta ña cutuñí iñi ñu. Vatyí tuhun xehe cuví tuhun cha cahán yo cha cuenda Tatyí Ii Nyoo. ³ Soco tatu sahá yo profetizar, cutuñí iñi ñu. Ta chahnu ca ñu chihin tuhun Nyoo. Ta tyicuan caa sanduní yo ta sandunyeé ca yo iñi ñáyivi. ⁴ Tatu cahán yo inga sahan cha ña chitó yo, maa ri maa yo ndunyeé yo. Soco tatu sahá yo profetizar, ndunyeé cuñi tandihí ñu yihí cuenda Nyoo.

⁵ Yuhu cuñí vatyí tandihí ndo cahán ndo inga sahan cha ña chitó ndo. Soco vaha ca cha saha ndo profetizar. Vatyí tyinyeé ca chi chi ñu nyicú vehe ñuhu ta ñima ca cha cahán yo inga sahan.

Soco tatu noo ndo cuví nacoto ndo ñáá tuhun cahán noo tahan ndo chihin inga sahan, nacatyí ndo. Tyicuan ta cuví tyinyee chi chi tandihí ndo. ⁶ Yucuan chaha yañi, tatu yuhu ta chai nu nyicu ndo, ta cahín inga sahan, ña tyinyeé chi chi ndo. Soco tatu cahán noo cha sanyehe Nyoo chii, o noo cha sacoto ra chii, o noo profesia, o noo cha sañahi chi ndo, tyinyeé chi chi tandihí cuii maa ndo.

⁷ Tatu tiví yo noo cutu, o sacucacu yo noo guitarra ta ña quita vaha ndusu cuan sahá yo, ma coto yo ñáá yaa cuví. ⁸ Ta tatu nu iyó cuatyí ta ña tyacú vaha trompeta, yori coto ñáá cuhva tahán chi cañi tahan ra. ⁹ Ta tyicuan caa yoó, tatu cahán yo inga sahan cha ña cutuñí iñi ñáyivi, ma coto ñu ñáá tuhun cahán yo. Tari cha cuví yuhu ri maa yo cuví cuan. ¹⁰ Cuaha xaan nuu sahan iyó ñáyivi ihya. Ta noo noo nuu sahan ta iyó iyó ri cha cuñí chi catyí. ¹¹ Soco tatu ña cutuñí iñi sahan cha cahán inga ñáyivi chihin, ma cuví ndatuhin chihin ñu. Ta ni ri maa ñu ma cuví ndatuhun ñu chihin yuhu. Cuví ñu tari ñu inga ñuu cha cuende. ¹² Yucuan chaha nyoho cha cuñí xaan ndo naquehén ndo tunyee iñi cha chahá Tatyí Ii Nyoo, nducu ndo noo tunyee iñi cha vaha ca cutyinyee chi ñáyivi vehe ñuhu.

¹³ Yucuan chaha nyoho cha cahán ndo inga sahan, çacan ndo chi Nyoo vatyí cuví nacoto ndo ta nacatyí ndo chi tahan ndo. ¹⁴ Vatyí

tatu nacuatí chi Nyoo chihin noo sahan cha ña cutuñi iñi, espíritu mai cha yihí chichi coño ñuhi ican nacuatatu soco cha chiñi tuñi xiñi ña cutuñi iñi chi. ¹⁵ Yucuan chaha cuñi chi caçan tahvi chi Nyoo chihin inga sahan. Soco cuñi tucu chi cha caçan tahvi chi ra chihin sahan cha cutuñi iñi. Ta cuñi tucu chi cha cate chihin sahan cha ña cutuñi iñi, Soco cuñi tucu chi cha cate chihin sahan cha cutuñi iñi yo ñandihí. ¹⁶ Vatyí tatu maa maa ri chihin sahan cha chahá Tatyí li Nyoo chuun, sacahnún chi ra, ma cutuñi iñi ñáyiví cha ña chitó ñáá cha cuví cuan. Ta ma cuvi sacahnu ñu Nyoo chuhun. ¹⁷ Vasi vaha tuhun cahún, cuhva cha nacuhvón tyahvi nyoo chi Nyoo tyicuan caa, soco ña tyinyeé chi chi inga ñáyiví vatyí ña cutuñi iñi ñu tuhun cahún. ¹⁸ Soco yuhu nacuhvé tyahvi nyoo chi Nyoo vatyí cuaha ca chaha cahin inga sahan ta ñima ca tandihí nyoho. ¹⁹ Soco chichi vehe ñuhu tahan ca iñi cahín vasi ohon tahan tuhun cha cutuñi iñi ndo vatyí sañahi chi inga ndo, ta ñima ca cha cahín uchi mil tuhun cha ña cutuñi iñi ndo.

²⁰ Chahnu cuhva caça xiñi ndo, yañi. Ta ma lee xaan cuhva caca xiñi ndo. Soco lee cuhva cunyacuvi ndo. Vatyí cha lee ña nyacuví chi cha quiñi caa. ²¹ Catyí Nyoo nu libru ley ra tyehe caa: “Cuhahin chihin ñáyiví ihya chihin yuhu ñáyiví inga ñuu ta chihin inga sahan. Cha ña cutuñi iñi ñu. Soco ni ri tyicuan

caa ta ma quichaha ñu chii”, catyí Sutu Mañi yo. ²² Yucuan chaha tuhun cha cahán yo inga sahan cuví chi tari noo seña chi ñu cha ña chino iñi tuhun ra Cristo. Soco tuhun cha sahá yo profetizar, cuví chi cuenda ñu cha chinó iñi chi ra. ²³ Vatyí tatu ndu ñin ri ndo, ta tandihí ndo cahán ndo inga sahan ta quihví noo ñu cha ña yihí cuenda Nyoo, cucatyí ñu tyi ña vaha cuñi xiñi ndo. ²⁴ Soco tatu tandihí ndo sahá ndo profetizar, ta quihví noo ñu cha ña yihí cuenda Nyoo, o noo ñu ña cutuñi vaha iñi tuhun Nyoo, coto ñu tyi iyó cuatyí ñu cha cuenda tyi cutuñi iñi ñu cha cahán ndo. ²⁵ Ta tandihí cha caa chichi aña ñu cunacoto ñu. Ta nicuiñi chiti ñu ta sacahnu ñu chi Nyoo. Ta catyí ñu vatyí ndicha ndicha cuii cha nyaá Nyoo chihin ndo.

Yoso caa sacoo yo culto minoo cha cachi minoo cha ndaa

²⁶ Yucuan chaha yañi, tatu cuandu ñin ri yo, cuiso noo noo yo yaa cha cata yo, o cha sañaha yo, o ñáá cha sanyehe o sacoto Nyoo chi yo, o cahan yo inga sahan, o cha nacoto yo ta nacatyí yo yoso caa cuahán tuhun inga sahan cuan. Soco tandihí ihya nacuvi chi noo cha chahá tunyee iñi maa Nyoo chi tandihí yo cha yihí yo cuenda ra. ²⁷ Tatu cuacahan yo inga sahan nu ndu ñin ri yo, cuñi chi cahan uvi yo o uñi ri yo, soco noo noo ri yo cahan. Ma cahan yo ñin ri. Ta sñin ri cuñi chi cha

nacatyí noo yo tuhun cahán tahan yo. ²⁸ Soco tatu yori cuví nacatyí ñáá tuhun cahán yo, vaha taxin ca ma cahan ca yo chihin inga sahan nu ndu ñn ri yo. Cahán yo inga sahan soco xehe ri chihin Nyoo tacuhva cuiñi ri maa yo. ²⁹ Tyicuan caa tucu tatu sahá yo profetizar, cahan uvi yo, o uñi ri yo. Ta tandihi ca yo saha yo cuenda tatu vaha cha cahán tahan yo.

³⁰ Soco tatu sacoto Nyoo ñáá noo ca tuhun chi inga ñu cha canyicú chiñi tuhun cuan. Tyicuan ta ñu cha xihna ri, cuñí chi sandihi ñu cha cahán ñu tacuhva cuví cahan inga ñu cuan. ³¹ Ta tyicuan caa tandihi ndo cha naquehén ndo tuhun cha chahá Nyoo chi ndo cuví nacatyí noo noo ndo. Vatyí tacuhva cutuhva tandihi ca ndo ta cunii ca iñi ndo. ³² Ñu cha sahá profetizar cuví cuatu noo ñu nya ndihi cahán inga ñu. Vatyí noo ri Nyoo cuví ra cha nyacá ñaha chi noo noo yo. ³³ Vatyí Nyoo cachi iyó ra ta ña iñi ndaa iñi noo nyacuví ra.

Quehen ndo cuhva vaha nyacuví inga hermano nu ca ndu ñn ri ra. ³⁴ Ñusihí taxi ri na coo ñu. Cuñí chi quichaha ñu chi yí ñu tari catyí ley Nyoo. ³⁵ Tatu ñáá cha cuñí ñu coto ñu, na ndaca tuhun ñu chi yí ñu nya vehe ñu. Vatyí ña vaha quetuví cha cahán ñusihí nu ndu ñn ri yo.

³⁶ Tatu siñ cuhva chicá xiñi ndo, cuñí chi ñicohón iñi ndo vatyí ñima chihin

ndo quichaha tuhun Nyoo. Ta ñima nyoho ri naquehén tuhun Nyoo. ³⁷ Tatu nya noo ndo cuñí maa ndo vatyí profeta cuví ndo, o tatu cuñí maa ndo tyi Tatyí Ii saquehén ityi ra chi ndo, cunacoto ndo vatyí cha catyí chi ndo ihya, mandamiento Sutu Mañi yo cuví. ³⁸ Soco tatu ña cuñí ndo naquehén ndo tuhun ihya, ni nyuhu ta ma naquehen ndi tuhun cahán ndo.

³⁹ Ta tyicuan caa yañi, na nducu ndo cuhva saha ndo profetizar. Ta ma casi ndo cha cahán ñu inga sahan. ⁴⁰ Soco sacuvi ndo tandihi chihin cha ndaa ta chihin cha cachi.

15

Yoso caa nandoto ra Cristo

¹ Vityin yañi, cuñí vatyí ñicohon iñi ndo tuhun ra Cristo, cha sacacú chi yo, cha cahin nuu ndo quivi cuan. Ta ican naquehen ndo ta ñi iñi ndo chinó iñi ndo. ² Ta suri cha cuenda tuhun ra Cristo cacú añima ndo tatu cuahan ndo tari cuhva sañahi chi ndo. Soco tatu natyihí caxiin ndo cuahan ndo, ñahri maa tuhun cha chinó iñi ndo chi Nyoo.

³ Cha xihna ri sacote tuhun cha cutuhve chi ndo. Ta sañahi chi ndo vatyí ra Cristo chihí ra cha catyí cuatyí yo, tari catyí nu libru Nyoo vatyí cucuvi. ⁴ Tyicuan ta chicuchi ñu chi ra. Soco nu ndu uñi quivi nandoto ra tari catyí tucu nu libru Nyoo. ⁵ Tyicuan ta tuví ra Cristo nuu ra Pedro ta yahá cuan ta nuu ndi uchi uvi tahan ra chicá tyiño ra.

⁶ Yaha cuan ta noo chaha tuvī ra nuu yaha ca ohon cientu yañi yo. Ta cuaha ca ñu cuan iyó ca ñu vityin. Soco suhva ñu cha yaha chihī ñu. ⁷ Yaha cuan ta tuvī ra nuu ra Jacobo. Yaha cuan ta nuu tandihī ra apóstol.

⁸ Ta nu ndihī tuvī tucu ra nuu yuhu, cha cuvī tari noo ra cuatyaa cha cacu ta ta chaa ca yoo cacu. (Vatyī ta cuntuñi ca iñi tuhun Nyoo cuvī cuan.) ⁹ Vatyī cha nuu tandihī ca ra apóstol cuvī yuhu noo cha ñima ri tuhun. Ta ni ña nañé cha cuvī apóstol vatyī chicā nyicon xain chi ñu ñohó cuenda Nyoo. ¹⁰ Soco Nyoo vaha xaan ñáyivi cuvī ra chihin. Ta ñima cha caha ri saha ra tumañi iñi chii cha cuvī noo ra chicá tyiño ra. Ta ñihi ca sahá tyiñe ican saha inga ra. Soco ñima mai sahá tyiñe vatyī maa Nyoo nyaá chihin. Ta ican ra sacuvī tandihī cuan. ¹¹ Soco ñahri saha, an yuhu, an inga ra cuan. Soco tuhun cahán ndi chihin ndo, ican ihya cuvī tuhun cha chinó iñi ndo.

Nu sañahá ra Pablo vatyī cha ndicha cuvī vatyī cunandoto ñu ndiyi

¹² Tatu cahán ndi tuhun cha nandoto ra Cristo mahñu ñu ndiyi chihin ndo, ¿ñáá tuhun cha yihí ndo catyí ndo vatyī ma nandoto ñu ndiyi? ¹³ Vatyī tatu ma nandoto ñu ndiyi, ni ri ra Cristo ta ña nandoto ra cuvī cuan. ¹⁴ Tyehe ta ña nandoto ra Cristo, tuhun cha cahán ndi chihin ndo ñahri maa vale. Ta ni ri cha chinó iñi ndo, ñahri maa tuhun.

¹⁵ Tatu tyehe ta ña ndicha cha sanandoto Nyoo chi ra Cristo, cuvī ndi noo ra cuendu tyi catyí ndi vatyī sanandoto Nyoo chi ra. Ta tatu ña ndicha cha nandoto ñu ndiyi, ña ndicha cha sanandoto Nyoo chi ra Cristo. ¹⁶ Vatyī tyehe ta ma nandoto ñu ndiyi, ni ri ra Cristo ta ña nandoto ra. ¹⁷ Ta tatu ña nandoto ra Cristo, ñahri maa tuhun cha chinó iñi ndo cha sandachí ra cuatyí ndo. Ta tacuhva iyó ri maa cuatyí ndo. ¹⁸ Ta ñu yihí cuenda ra ta cachihī ñu, cuanaa ri maa ñu cuvī cuan. ¹⁹ O tyehe ta ihya ri ñayivi tyinyeé ra Cristo chi yo, ta ma nandoto yo quivi quichi ra, cuvī yo noo ñu tondo cha nuu tandihī ca ñáyivi.

²⁰ Soco chitó vaha yo vatyī cha ndicha cuvī cha nandoto ra Cristo. Ta ican ra cuvī cha nandoto xihna ca mahñu ñu ndiyi. ²¹ Vatyī cha catyī cuatyí ra Adán ta chicoó tuhun chihī. Yucuan chaha tahán chi cúvi yo. Soco cha catyī cha nandoto ra Cristo tahán chi nandoto tucu ñu yihí cuenda ra. ²² Ta tari tandihī ñáyivi chihī cha cuenda ra Adán, tyicuan caa tucu cunandoto tandihī ñu cuenda ra Cristo. ²³ Soco noo noo yo cunandoto yo quivi tahan chi chi yo. Xihna ca ra Cristo nandoto. Yaha cuan ta quivi quichi tucu ra inga chaha cunandoto tucu ñu yihí cuenda ra. ²⁴ Yaha cuan ta cundihi tuhun ñuhu ñayivi ihya ta ma cunyaca ñaha ca ra cuvī tyiño nahnu, ta vatyī ña vaha. Vatyī ra Cristo

cuatinyaa ra fuerza chi ra cuan. Ta cunacuhva cuenda ra chi Nyoo Sutu ra. ²⁵ Vatyí ra Cristo cunyaca ñaha ra nyacua nya quiví cuhva Nyoo cha cuví chasaha ra chi tandihí ra xaan iñi chi ra. ²⁶ Ta nya nu ndihí, cusanaa ra tuhun chihi. ²⁷ Vatyí cha yaha nacuhva cuenda Nyoo tandihí chi ra Cristo vatyí cunyaca ñaha ra. Soco nu catyí chi vatyí tandihí natyaa Nyoo ndaha ra, cuñí chi catyí vatyí ma cunyaca ñaha ra chi maa Nyoo vatyí ican maa Nyoo natyaa tandihí cuan ndaha ra. ²⁸ Soco quiví saha ganaa ra Cristo tandihí, tyicuan ta maa ra cha cuví ra Sehe Nyoo, cunacuhva cuenda ra tandihí chi Nyoo Sutu ra. Vatyí Nyoo cucuvi ra Nyoo cuenda tandihí maa cha iyó.

²⁹ Tatu tyehe ta ña nandotó ñu chihí, ¿ñáá tuhun yihí ñu condutyá ñu tyiño nuu ñu chihí?

³⁰ Ta tyicuan caa tucu mai, tatu ma nandote, ¿ñáá tuhun ndoí vaha cha ndí quiví nyatí tuhun chihi? ³¹ Tandihí quiví nyatí tuhun chihi. Soco ñahri caa vatyí sí cuñi chihin ndo. Vatyí chinó iñi ndo chí Sutu Mañi yo Jesucristo. ³² Ñáá ri tuhun nyehí tindoho ñuu Éfeso tatu tyehe ta ma nandoto ca yo. Vaha taxin ca sacuvi yo tari catyí ñáyivi: “Na cachi yo, na coho yo vatyí tyaan isa cúvi yo”, catyí maa ñáyivi cha ña chitó.

³³ Ma cuhva ndo cha sandavi ñaha ñu chi ndo.

Vatyí iyó tucu tuhun cha catyí: “Tatu ñu tahan yo quiñi iyó ñu, cuví sativí ñu cuhva vaha cuahan yo.” ³⁴ Saha ndo cuenda cuhva iyó ndo. Ta ma sacuvi ca ndo cha quiñi caa. Vatyí chihin cuhva iyó suhva ndo chité tyi ña ñohó nuu ndo chí Nyoo. Catyí chí ndo tyehe caa vatyí nacoo ticahan nuu nuu ndo.

Nu sañahá ra Pablo yoso caa cusanandoto Nyoo chí yo quiví quichi ra Cristo

³⁵ Soco yihí ndo ndacá tuhun ndo: “¿Yoso caa cunandoto ñu chihi? ¿Ñáá coño ñuhu cucuiso ñu?” ³⁶ ¡Tondo xaan xiñi ndo! ¿Atu ña chitó ndo vatyí tatu tachí yo noo chiti yutun, cuñí chí cha tyahyu soo chiti cuan? Tyicuan ta cañá noo yutun. (Chihí chiti cuan tacuhva na coo yutun cuan ñayivi.)

³⁷ Vatyí cha tachí yo ñima maa tun tachí yo. Soco chiti tun, an cuví ri nuñi, o trigu, o ñáá ndihí ca chiti. ³⁸ Ta cha cañá cuan Nyoo sacuvi ra yoso cuhva cuñí maa ra chí noo noo cha cañá cuan. Vatyí siin siin cuhva caa noo noo nuu chiti. ³⁹ Ta tyicuan caa tucu tandihí coño ñuhu, ña iin ri caá chí. Siin caa coño ñuhu ñáyivi. Siin caa coño ñuhu cuiñi. Siin caa coño ñuhu saa. Siin caa coño ñuhu tiyaca. ⁴⁰ Ta tyicuan caa tucu cha iyó andivi. Siin caa cha iyó yucuan. Ta siin caa tucu cha iyó ñuhu ñayivi ihya. Ta cha iyó nya andivi tyaqui xaan, ta cha iyó siqui ñuhu ñayivi tyaqui tucu cuan

soco s̄in caa. ⁴¹ Cha ndichin ñanyii, ña inuu ri chihin cha ndichin yoo. Ta ña inuu ri chihin cha ndichin tiño. Ta tiño ña inuu ri chihin inga tucu tiño. ⁴² Ta tyicuan caa tucu tuhun cha nandoto yo. Vatyí chicuchi yo noo coño ñuhu yo cha tuhva tyahyu. Ta cunandoto yo soco chihin noo cha ma cúvi ca maa. ⁴³ Chicuchi yo noo cha numi ri tyahyu. Soco cunandoto noo cha tyaqui. Tyihi yo noo coño ñuhu pehe chichí ñuhú. Ta cunandoto noo cha nyee. ⁴⁴ Vatyí chicuchí yo coño ñuhu yo cuenda ñayiví ihya chichí ñuhu. Ta cunandoto noo cha ñima ca cuenda ñayiví ihya cuví, soco cuenda Nyoo andiví. Tatu iyó coño ñuhu yo ñayiví ihya. Suri coo tucu noo cha ñima ca cuenda ñuhu ñayiví, soco cuenda andiví.

⁴⁵ Catyí tuhun Nyoo vatyí ra Adán ra cha chiyo cha xihna ri, chahā Nyoo ñayiví coo ra. Soco ra Adán cu uvi, ra cuví Cristo, cuví ra Tatyí Ii ta chahá ra noo ñayiví cha ma naa ca maa chi yo. ⁴⁶ Yucuan chaha, cha xihna ri tahán chi coo yo chihin coño ñuhu cuatyí yo. Ta yaha cuan ta coo yo cuenda Tatyí Ii Nyoo. ⁴⁷ Rayii cha chinq cha xihna ri, chihin ñuhú chinq ra. Ra cuenda ñuhu ñayiví cuví ra. Ta rayii cu uvi cha cuví Sutu Mañi yo, ra cuenda andiví cuví ra. ⁴⁸ Tandihí yo nyisó yo coño ñuhu cha chinq chihin ñuhú, tari coño ñuhu ra Adán. Ta cha cucuiso yo andiví cuví chi tari nyisó ra

Cristo ra quichí nya andiví. ⁴⁹ Tari ndacú yo chi rayii, ra cha chinq chihin ñuhú, tyicuan caa tucu cundacu yo chi ra Cristo ra quichi nya andiví.

⁵⁰ Ta cuñí catyí chi ndo yañi, vatyí coño ñuhu yo ma cuví quihví chi andiví nu nyacá ñaha Nyoo. Noo cha tañi tyehe ri tiví ma cuví quihví noo nu ña tiví. ⁵¹ Soco cuñí tyi coto ndo noo tuhun xehe cha yori maa chitó. Vatyí ña tandihí yo cucúvi yo. Soco tandihí yo ta cunasama cuhva caa yo. ⁵² Ta ñin yaha cuí ri, tari noo cha ndahvá nuu ri yo, nu ndihí tiví ángel trompeta. Vatyí cutiví ángel trompeta ta ñu ndiyí cunandoto ñu cha ma cúvi ca maa ñu. Ta Nyoo cunasama cuhva caá ñu. ⁵³ Vatyí cuñí chi tyi nasama Nyoo coño ñuhu yo chihin noo cha ma naa ca maa. ⁵⁴ Ta quiví cuan nasama coño ñuhu yo ta quehen yo cha ma tiví maa. Cua cuví tari catyí nu libru Nyoo tyehe caa:

“Nyoo cuví chasaha ra chi tuhun chihi.”

⁵⁵ Yoho, Tuhun Chihi, ¿nya nyaa tunyee ñi chuun vityin vatyí cahñun chi ndí?

¿Nya nyaa cha cua saha ganaun vityin, yoho Tuhun Chihi?

⁵⁶ Vatyí cuatyí yo ican chahá cha cahñi tuhun chihi chi yo. Ta ley chahnu, ican cuví cha chahá fuerza chi chi. ⁵⁷ Soco tyahví nyoo chi Nyoo, yañi. Vatyí sahá ganaa yo siqui

cuan cha catyi Sutu Mañi yo Jesucristo.

⁵⁸ Yucuan chaha yañi, na cuinanyaa yo chihin Nyoo chihin cha ñi iñi yo. Tyicuan ri na saha tyiño yo nu tyiño Sutu Mañi yo. Vatyí tyiño sahá yo chihin Sutu Mañi yo, ñima cha sahá tyiño caha ri maa yo cuví.

16

Chahá ra Pablo tuhun chi ñu Corinto yoso caa tyinyee ñu chi tahan ñu cuenda Nyoo

¹ Ta tuhun cha tyinyeé ndo xuhun chi ñu ndahvi, ñu yihí cuenda Nyoo. Cunyacuvi ndo tari catyí chi ñu nyicú tandihí vehe ñuhu ityi Galacia. ² Ma cuatu ndo nya quichi ta cuhva ndo xuhun. Soco tahan tahan nu ndihí vitya ri ta tyihi sñn ndo cha tahan chi cuhva ndo chi ñu, yoso cuhva cha chahá Nyoo chi ndo. ³ Ta quivi cha quichi, cutachi nya ra cha cuñi maa ndo vatyí cunyaca ra xuhun cuan chihin carta chi tahan yo cha canyicú nya Jerusalén. ⁴ Ta tatu tahan tucu chi cuhin, cuhun coyo ra chihin.

Yihí iñi ra Pablo nya ndihí nu cucahan ra tuhun ra Cristo

⁵ Cuhin nu nyicu ndo Corinto chiña, soco cuhun xihne ityi Macedonia. Vatyí ityi cuan cuyahi. ⁶ Ta tatu chahá chi cuhva cundoí chihin ndo nyacua nya yahá yoo vichin. Tyicuan ta cuví tyinyeé ndo chiin chií ta cuhin inga ñuu. ⁷ Ña cuñi cha ñn yaha ri yahi nu nyicu ndo.

Vatyí cuñi ndoi suhva quivi chihin ndo tatu Sutu Mañi yo ta cuñi ra. ⁸ Soco cunyai ñuu Éfeso ihya, nyacua nya yaha quivi cha sanducahnú ñu Israel vico Pentecostés. Tyicuan ta quichi nu nyicu ndo. ⁹ Cundoí suhva ihya vatyí vasi cuaha xaan ñáyivi ña cuñi nyehe ñu tuhun Nyoo, soco chahá xaan chi cuhva cahín tuhun Nyoo chihin ñáyivi ñuu ihya.

¹⁰ Tatu chaa ra Timoteo, na cunyaa ra chihin ndo. Ta vaha tyiñuhu ndo chi ra. Vatyí sahá tyiño tucu maa ra cuenda Sutu Mañi yo tari mai. ¹¹ Ta vaha cõo iñi ndo nyehé ndo chi ra. Ta tyinyee ndo chiin chi ra tyi quichi ra nu nyaí. Vatyí nyatí chi ra chihin inga yañi yo.

¹² Ta yañi yo, ra Apolos, chacu ndahvi xain nuu ra nacuhun ra chihin inga yañi yo nu nyicu ndo. Soco ña cuñi ra. Soco cuhun maa ra nacuhva chi cuhva chi ra, na.

Chahá ra Pablo nocumi chi tandihí ñu yihí cuenda Nyoo ñuu Corinto

¹³ Sañihi ndo chinó ca iñi ndo chi Nyoo. Ta cunñi iñi ndo ta nacoo vaha fuerza Nyoo chi ndo. ¹⁴ Tandihí cha sacuví ndo, sacuví ndo cha cuenda cha cuñi ndo chi Nyoo ta chi tahan ndo.

¹⁵ Chitó ndo yañi vatyí ñáyivi chi ra Estéfanos xihna ca ñu chinó iñi tuhun ra Cristo ityi Acaya chiña. Ta vityin sacuví ñu tyiño nuu ra hermano. ¹⁶ Ta catyí chi ndo vatyí saha ndo ñáyivi chi ñu cha iyó tari iyó ñu

chiña, ta chi tandihí ñu cha tyinyeé ta sahá tyiño cuenda Nyoo. ¹⁷ Ta cusii xaan cuñi cha quichí coyo ra Estéfanos ta ra Fortunato ta ra Acaico. Vatyí maa ra catyinyeé ra chi ndi. Vatyí tandihí ndo ña cuví quichi ndo vatyí cañi xaan ñuu ndo. ¹⁸ Soco maa ra quichí coyo ra. Ta sandunyeé ca ra iñi chihin tuhun Nyoo. Tari sanduní ra iñi nyoho ñandihí. Ta vaha ço iñi ndo nyehé ndo tyiño casacuví ra. Vatyí maa ra ñn ri chi Nyoo canyicón ra.

¹⁹ Ta vachí nocumi chi ndo sahá tandihí yañi yo ta tahan yo cha ndu ñn ri ityi Asia ihya. Ta vachi tucu nocumi chi ndo sahá ra Aquila ta cu Priscila, ta ñu yihí cuenda Nyoo cha ndu ñn ri vehe ñuhu nu cuví vehe ñu. ²⁰ Vachi nocumi chi ndo sahá tandihí yañi yo, ta nacuhva maa ndo nocumi chi noo noo ndo nu nyicú ndo chiña.

²¹ Nocumi cha vachí chi ndo ihya, yuhu ra Pablo tyai chihin ndahi.

²² Tatu nya ñáyivi ña cuñi chi Sutú Mañi yo Jesucristo, nacuhun ñu anyaya. Soco yuhu catyí: ¡Sutú Mañi yuhu, ñaha!

²³ Ta nasoco Sutú Mañi yo Jesucristo chi tandihí ndo. ²⁴ Ta catyí chi ndo vatyí yuhu cuñi chi tandihí ndo cha cuenda ra Cristo Jesús. Ta nacuví chi tyicuan caa.

Carta Cha Cu Uvi Sacuhun Ra Apóstol Pablo Chi Ñáyivi Ñuu Corinto Cha Yihí Cuenda Nyoo

Nu sacuhún ra Pablo noo tutu chi ñu ñuu Corinto chayihí cuenda Nyoo

¹ Yuhu ra Pablo, cuví noo ra apóstol ra Jesucristo vatyí Nyoo nacachí vaha ra chíi. Ta yuhu ta ra Timoteo yañi yo tyaá ndi noo tutu ihya chi ndo cha cuví ndo ñáyivi ñuu Corinto cha yihí cuenda Nyoo, ta chi tandihí ñu yihí cuenda Nyoo nicacahnu ityi Acaya chiña. ² Nyoo Sutu yo ta Sutu Mañi yo Jesucristo na nasoco ra chi ndo ta nacuhva ra cha taxi ri coo ñima ndo.

Nu chicá noo ra Pablo sacotó ra tuhun ra Cristo nyehé xaan ra tindoho

³ Na sacahnu yo chi Nyoo Sutu Sutu Mañi yo Jesucristo. Vatyí ican ra cuví Nyoo Sutu yo. Ta cundahvi xaan cuñi ra nyehé ra chi yo. Ta maa ra tyicuan ri naquehén ndahvi ra chi yo. ⁴ Ta cuhva cha nyehé yo tindoho maa ra naquehén ndahvi ra chi yo. Vatyí tyicuan caa ta cuvi naquehen ndahvi tucu maa yo chi ñu nyehé tindoho tari naquehén ndahvi tucu maa ra chi yo. ⁵ Vatyí cha cuenda ra Cristo, nyehé xaan ndi

tindoho ta suri cha cuenda ra Cristo naquehén ndahvi xaan Nyoo chi ndi. ⁶ Tatu nyehé ndi tindoho cha cuenda cha sacotó ndi tuhun ra Cristo chi ndo, soco cha cuenda cha vaha chi ndo cuví vatyí tyicuan ta Nyoo naquehen ndahvi tucu ra chi ndo, ta sacacu ra chi ndo. Ta tatu Nyoo ta sandunyeé ra iñi ndi, cuví tucu chi cha cuenda cha sandunyeé tucu ra iñi maa ndo ta cacu ndo, ta siin ri tacuhva cha cunyeé ndo tindoho cha nyehé ndo. Vatyí iin ri tindoho nyehé yo. ⁷ Vatyí chitó vaha ndi tatu nyehé ndo tindoho cha cuenda ra Cristo tari cha nyehé nyuhu, maa ra cunaquehen ndahvi ra chi ndo, tari naquehén ndahvi tucu ra chi nyuhu.

⁸ Yañi, cuñi ndi tyi coto ndo vatyí cuaha xaan tindoho nyehé ndi ta chinyaa ndi ityi Asia. Ñihi xaan chiyo tindoho nyacua cha ñahri ca fuerza ndi cahvi iñi ndi. Ta tyaá ndi cuhva vatyí cha yaha chíhi ndi ta quita ndi yucuan. ⁹ Cuñi maa ndi vatyí cha cha cuacúvi ndi. Ta ña cuví sacacu ndi chi ndi. Soco yucuan sañaha chíhi ndi na nachinó ca iñi ndi chí Nyoo ra sanandotó ndiyi. ¹⁰ Nyoo sacacu ra chi ndi ndaha tuhun chíhi quivi cuan, ta sacacú ca ra chí ndi nya vityin. Ta chitó ndi vatyí tyicuan ri cusacacu maa ra chí ndi. ¹¹ Tatu tyinyeé ndo chí ndi chíhin cha chicán tahvi ndo chaha ndi, ta tatu cuaha ñáyivi chicán tahvi

chaha ndi, cunacuhva ñu tyahvi nyoo chi Nyoo cha cuenda tyi ñihí ñu tuhun tyi Nyoo chahá ra cha vaha chi ndi, vatyí chicán tahvi ñu chaha ndi.

Nu nacatyí ra Pablo ñáá tuhun ña chaq ñaha ra ñuu Corinto

¹² Iyó noo tuhun cha cusii xaan cuñí ndi, vatyí yoso ri sandaví ñaha ndi. Vatyí cachi cuhva iyó ndi. Ta ndaa cuhva iyó ndi xihna ca chihin tandihi ri ndo, ta chihin inga ñáyivi ñandihí. Ta ñima chihin cha chiñi tuñi maa ndi iyó ndi tyehe caa, soco cha cuenda tyi tyinyeé xaan maa Nyoo chi ndi. ¹³⁻¹⁴ Ta nu tutu cha sacuhún ndi chi ndo, maa maa ri tuhun cha cuví sacuahá ndo, ta cha cuví cutuñi iñi ndo, tyaá ndi. Vityin cuahán cutuñi iñi ndo suhva. Ta nyatú ndi na cutuñi vaha ca iñi ndo tandihi tuhun cuan. Tacuhva cusii cuñi ndo chihin ndi quívi quichi Sutu Mañi yo. Ta cusii cuñi tucu maa ndi chihin ndo.

¹⁵⁻¹⁶ Ta cha cuenda cha cusii iñi yo tyehe caa, tyaj cuhva quívi cuan cha cuhun xihne nu nyicú ndo. Yihí iñi cha cuhin nu nyicú ndo, quívi cha yahí cha cuahín nya Macedonia ihya. Ta quívi cha nayahá tiqui cha chahin Macedonia, cuhin inga chaha nu nyicú ndo. Tyicuan caa ta cuví cusii iñi ndo chihin yuhu uvi chaha, tyaj cuhva. Ta tyicuan caa ta cuví tyinyee ca ndo chii ta cuhin ityi Judea. ¹⁷ O cuñí maa ndo vatyí ña tyaj cuhva cha cuhin nu

nyicu ndo. Ta vasi cuñí maa ndo vatyí sacuví tari ñáyivi iyó siqui ñuhu ñáyivi ihya. Vatyí catyí ñu tyi cuhun ñu, ta ña sacuví ñu. ¹⁸ Maa Nyoo chitó ra vatyí ndicha cha cahín. Ta ña tuhvé sandaví ñahi. ¹⁹ Vatyí yuhu ta ra Silvano ta ra Timoteo cahán ndi chihin ndo. Vatyí tuhun maa ra Cristo maa maa ri tuhun ndicha cuví. ²⁰ Tyi cha cuenda maa ra ñihí yo tandihi cha vaha cha catyí Nyoo tyi cucuhva ra chi yo. Yucuan chaha cuhva cha sacahnú yo chi Nyoo, o chicán tahvi yo chi ra, catyí yo: "Amén". Vatyí chitó yo tyi cuacuhva ra cha vaha chi yo cha cuenda ra Cristo. ²¹ Ta Nyoo sanduní ca ra iñi yo nu sandu in ri ra chi yo chihin ra Cristo. Ta nacachi ra chi yo. ²² Ta tari cha tyaq ra tuñi ra chi yo cuví cuan. Vatyí chahá ra Tatyí li ra quihí añima yo cha cuenda cha cuñihi ca yo ñáá ca cha cucuhva ra chi yo.

²³ Na naquehen Nyoo chii vityin ri tatu ña ndicha tuhun cua catyí chi ndo. Ta cuhun que nu nyicú ndo Corinto chiña vatyí tatu cuhin tyaj cuhva cha cahin chiin chi ndo. Yucuan chaha ña cuñí ñahi cuhin vatyí nacuaan iñi nyehí chi ndo. Ta Nyoo chiñí ra vatyí ndicha cha cahín. ²⁴ Ñima cha cuñí ndi cunyaca ñaha ndi chi ndo yoso cuhva chinó iñi ndo chi Nyoo. Vatyí chinó vaha iñi ndo. Soco cha cuñí ndi tyinyeé ca ndi chi ndo na coo ca tusii iñi maa Nyoo añima ndo.

2

¹ Yucuan chaha ña cuñi quichi tiqui nu nyicu ndo coto cuhva que tucuihya iñi chi ndo. ² Vatyí tatu yuhu ta sanducuihyé iñi ndo, yori ca cuví sandusií iñi mai. Vatyí ma cuvi ca sandusií ndo iñi tatu cha yaha sanducuihye iñi ndo. ³ Yucuan chaha sacuhin tuhun cuan chi ndo. Vatyí tatu cuhin soco ma sanducuihya ndo iñi chihin cuhva iyó ndo. Vatyí tahn chi sandusií ndo iñi. Ta tatu sií cuñi yuhu, chité tyi tandihi yo ta cusii iñi yo. ⁴ Quivi cha tyai carta cuan chi ndo, chica xaan xiñi. Ta nducuihya xaan iñi nyacua chaqui. Soco ñima cha sacuhin carta cuan chi ndo vatyí cuñi cha nducuihya iñi ndo. Soco vatyí coto ndo vatyí yaha xaan cuñi chi ndo.

Nu chahá ra Pablo tuhun chi ñu yoso caa saha ñu ticahnu iñi

⁵ Tucuihya iñi cha chaha ra chiña, ñima iin ri chi yuhu chaha ra. Chaha tucu ra chiin chi tandihi nyoho ñandihí. Catyí tyehe caa tacuhva cha ma yaha xaan cahín. ⁶ Vahari, cha iyó vaha. Ma cahan ca ndo chi ra. Ma tachí tuñi ca ndo chi ra. ⁷ Ta vityin tahn chi vatyí saha ndo ticahnu iñi chi ra. Ta naquehén ndahvi ndo chi ra, coto yaha xaan nducuihyá iñi ra. ⁸ Yucuan chaha catyí chi ndo sañaha ndo cha cuñi ndo chi ra. ⁹ Sacuhin carta cuan chi ndo quivi cuan vatyí cuñi cote tatu sacuví ndo cuhva chahí chi ndo. ¹⁰ Ta vityin tatu

sahá ndo ticahnu iñi, sahá tucu yuhu ticahnu iñi yóo cha chahá tisihi chi yo. Tatu ndicha cha chahá ra tisihi chii. Soco sahí ticahnu iñi chi ra cha cuenda cha vaha chi nyoho. Vatyí yucuan cuhva cuñi maa ra Cristo. ¹¹ Vatyí chitó yo vatyí tatu ma saha yo ticahnu iñi chi tahan yo, cuhna cutyihí ra cha quiñi caa añima yo. Vatyí maña xaan ra. Ta cuví sacañi tahan ra chi yo.

Ña ndoo ra Pablo ñuu Troas vatyí ña nañihí ra chi ra Tito

¹² Quivi chaj ñuu Troas cha cuacahin tuhun ra Cristo, chahá chi cuhva cha sahá tyiñe tyiño nuu Sutu Mañi yo yucuan. ¹³ Soco ña sií maa cuñi añime. Vatyí ña nañihí chi yañi yo, ra Tito. Yucuan chaha ña ndoo que ñuu cuan cahin chihin ñu. Ta vachi ityí Macedonia ihya.

Cahán ra Pablo tuhun ra Cristo chihin cha ñi iñi ra

¹⁴ Soco tyahvi nyoo chi Nyoo vatyí tyicuan ri sahá ganaa yo chihin fuerza ra Cristo Jesús. Vatyí sacotó yo tuhun ra chi ñáyivi. Ta tuhun ra cha cahán yo, cuví chi tari noo xico vixi chahan cha caña tandihí ri ityí nu cuahán yo. ¹⁵ Ta yóo cuví yo tari noo xico vixi cha chahá cuenda ra Cristo chi Nyoo. Ta caña xico cuan mahñu ñu cha cucacu añima, ta mahñu ñu cha ma cacu añima ñandihí. ¹⁶ Soco cha cuenda ñu cha ma cacu añima cuan, quiñi chahán, tari noo xico ndiyí cuví tuhun cha sacotó yo chi ñu, cuñi maa ñu. Vatyí

sacotó yo yoso caa cucuvi ñu vatyí ña chinó iñi ñu chi ra Cristo. Soco cha cuenda ñu cha cacú añima, vixi xaan chahán, Vatyí sacotó yo yoso caa coo ñu ñayiví cha ma naa ca maa. Soco ¿yóo cha cuví sacuvi tyiño ihya? ¹⁷ Nyuhu ña sacuví ndi tari sacuví cuaha ra cachicá noo. Ra cuan cuñi ra xuhun. Tuhun ra Cristo ñima noo cha xicó yo cuví. Soco cahán ndi chihin cha ñi iñi ndi tuhun ra vatyí ñin ri cuví ndi chihin ra, ta Nyoo ta ra Cristo tachí ra chi ndi.

3

Tuhun chaa cha quichi cacun ra Cristo

¹ Ta cha cahán ndi tuhun ihya, ¿atu cha cuñi ndi sayaa ndi chi ndi, cuñi maa ndo? Ñima tyicuan caa. Ta yoó ¿atu chihuhú cha cuiso yo tutu cha catyí chi vatyí vaha ñáyivi cuví yo, tari tuhva inga ra canyiso? Ñima. ² Vatyí nyoho cuví ndo carta ndi cha tyaá Nyoo añima ndi. Vatyí cuví nyehe ñáyivi yoso caa nasamā Nyoo cuhva iyó ndo. Ta coto ñu tyi maa maa ri cha vaha sañahá ndi chi ndo. ³ Ta cachi nyehé ñu tyi cuví ndo carta cha tyaá ra Cristo vatyí nyehe ñu, ta nyuhu nacuhva cuenda ndi carta cuan chi ñu. Ta ñima chihin tinta tyaá Tatyí Ii Nyoo nyitó añima ndo. Ta ni ñima nu yuu chicunyaa.

⁴ Cahán ndi tyehe caa vatyí chitó ndi vatyí Nyoo cuacuhva ra cha quita vaha tyiño sahá ndi. Vatyí tyinyeé ra Cristo chi ndi. ⁵ Ma caña

iñi ndi caca xiñi ndi tyi iyó tunyee iñi maa ndi cha sacuví ndi ñáa cha sacuví ndi. Soco tandihí cha sacuví ndi maa Nyoo sacuví. ⁶ Maa Nyoo chahá ra tunyee iñi ra chi ndi, ta sacotó ndi tuhun chaa cha natyihí tahan ra tuhun chihin yo. Vatyí Tatyí Ii ra chahá ñayiví chaa coo yo. Ta ley chahnu cuan cha chahā Nyoo chi ra Moisés, sacuhún chi chi yo anyaya vatyí ña cuví quichaha yo tandihí ley cuan.

⁷ Ley chahnu cuan, chicun-yaa chihin letra chata yuu ta cha naha. Ta cuhva cha chaá ra Moisés chihin cuan, tyaquí xaan xiño nuu ra nyacua nayuhví ñu Israel nanyehe ñu nuu ra. Soco suvita ri tyi cha tyaquí cuan numi ri ndihí. Soco tatu tyaquí cuví cuan, ⁸ tyaquí ca cuví tuhun chaa cha quichí nyaca Tatyí Ii Nyoo chi yo. Tyaquí xaan ca cuan. ⁹ Tatu ley chahnu cha sacuhún chi yo anyaya, tyaquí xaan cuví, nyaca cuví tuhun cha saváha chi yo nuu Nyoo. Tyaquí xaan ca cuví cuan. ¹⁰ Vatyí ley chahnu tyaquí xaan cuví quivi cuan, cuñi maa ñáyivi. Soco vityin chitó yo tyi ña tyaquí xaan cuví. Vatyí tyaquí xaan ca maa tuhun ra Cristo cha sacacú chi yo nuu Nyoo. ¹¹ Vatyí tatu tyaquí xaan cuví cha ñin yaha ri chiyó, nyaca cuví noo cha ma ndihí ca maa.

¹² Chitó ndi tyi ma naa cuan. Yucuan chaha cahán ndi chihin cha ñi iñi ndi. Ña cahán nuu ndi ta ña yuhví

ndi. ¹³ Ña sacuví ndi tari sacuví ra Moisés. Vatyí chası́ ra nuu ra chihin noo sahma, tacuhva cha ma nyehe ñu Israel nu cunaa cha xiño cuan. ¹⁴ Soco quívi cuan ña cutuñí iñi ñu. Ta nyacua nya vityin ta ña cutuñí iñi ñu. Vatyí tatu sacuahá ñu ley cuan tari quívi cha nyasí nuu ñu. Vatyí ña cutuñí iñi ñu. Soco noo tuhun ri maa ra Cristo nuhá ra nuu yo. ¹⁵ Ta nyacua nya vityin tatu sacuahá ñu Israel ley ra Moisés, ña cuví cutuñí iñi ñu. Vatyí tari noo cha nyasí nuu ñu. ¹⁶ Soco tatu nacuhvá ñu añima ñu chi Sutu Mañi yo, maa ra cunuña ra nuu ñu. ¹⁷ Vatyí Sutu Mañi yo, Tatyí li cuví ra. Ta tatu nyaá Tatyí li Sutu Mañi yo añima yo, sacotó ra chi yo tyi ña nyacá ñaha ca ley chahnu chi yo. ¹⁸ Yucuan chaha tandihí yo ña nyasí ca nuu yo. Ta vityin cuví yo tari noo ino, tacuhva cuví nyehe ñáyivi cha vaha Sutu Mañi yo. Ta cuahán nduvaha ca yo yoso cuhva sacuví Tatyí li Sutu Mañi yo chi yo.

4

¹ Yucuan chaha ma ndu uvi maa iñi ndi, vatyí Nyoo nyehé ndahvi ra chi ndi. Ta tyaa tyiño ra chi ndi tyi cahan ndi tuhun ra chihin ñáyivi. ² Ña sacuví ndi cha xehe vatyí ticahan nuu cuví cuan. Ña chicá noo ndi sandaví ñaha ndi chi ñáyivi. Maa maa ri tuhun Nyoo sañahá ndi. Ña nasacá noo ndi tuhun Nyoo chihin inga tuhun. Soco chihin nuu Nyoo chacú ndahvi ndi

nuu tandihí ñáyivi, na saha vaha ñu cuenda vatyí maa maa ri cha ndicha sañahá ndi. ³ Nyuhu ña tyihí xehe ndi tuhun Nyoo. Soco cha cuenda chi ñu cha cua cunaa ñohó xehe. ⁴ Cuihna, ra nyacá ñaha cha quiñi caa ñuhu ñáyivi ihya, ican ra chası́ cha chiñi tuñi xiñi ñu cha ña chinó iñi chi Nyoo. Vatyí coto nyehe ñu cha ndichin Nyoo. Ta coto cutuñí iñi ñu yoso caa sacacú ra Cristo chi yo. Vatyí ra Cristo nyitó ra ta cuví ra xiñahñu Nyoo. ⁵ Cuhva cha cahán ndi chihin ñáyivi, ña cahán ndi tuhun maa ndi. Soco sacotó ndi tyi ra Jesucristo cuví ra Sutu Mañi yo. Ta nyuhu cuví ndi noo musu ndo cha catyí cha cuñí ndi chi ra. ⁶ Vatyí suri maa Nyoo catyí vatyí na ndundichin nu ñaa iñi quívi chinó ñuhu ñáyivi. Ican ra chaha ra cha ndichin coo añima yo, tacuhva vatyí chihin cha ndichin cha chaha ra Cristo chi yo, cuví cutuñí ca iñi yo tyi cahnu xaan ca cuví maa Nyoo.

Chihin cha chinó ri iñi yo chi Nyoo coo yo noo ñáyivi chaa

⁷ Coño ñuhu yo cuví tari noo quisi ñuhú, vatyí noo cha ñima ri tuhun cuví. Vatyí tyicuan caa ta cuví nyehe ñáyivi tunyee iñi cha cahnu xaan cha iyó chi yo, maa Nyoo chahá, ta ñima tunyee iñi maa yo cuví. ⁸ Yucuan chaha vasi iyó tisihi tandihí ri ityí nu cuahán ndi, soco ña ndu uvi iñi ndi. Vasi ña cutuñí iñi ndi tandihí cha cuví chi

ndi, soco chitó ndi tyi quitá vaha ndi. ⁹ Vasi chicá nyicon ñu chi ndi soco ñima maa ri maa ndi nyicu. Vatyí Nyoo nyaá ra chihin ndi. Vasi cha chacun taxin ñu chi ndi soco ña chihí ndi. ¹⁰ Tandihí ri ityi nu cuahán ndi ta nyatú ndi tuhun chihí cha catyi tuhun ra Jesús. Vatyí yucuan cuhva nyehé ñu tyi iyó ndi ñayiví chaa cha chahá ra chi yo. ¹¹ Vatyí nyuhu tandihí quiví, cha yatyin cúvi ndi cha cuenda ra Cristo tacuhva cuví nyehe ñáyiví vatyí yihí ñayiví ra Cristo añima ndi. ¹² Nyatú ndi tuhun chihí cha cuenda cha cahán ndi tuhun Nyoo. Soco cha tyehe caa, nañihí ndo ñayiví chaa.

¹³ Chinó iñi ndi chi Nyoo tari chingo iñi ra David. Ta tyaa ra nu libru Salmos: “Chinó iñi chi Nyoo, yucuan chaha cahín tuhun ra”, catyi ra David. Ta tyicuan caa tucu nyuhu. Chinó iñi ndi chi Nyoo. Ta yucuan chaha cahán ndi tuhun ra. ¹⁴ Vatyí chitó ndi vatyí Nyoo ra sanandoto chi Sutu Mañi yo Jesucristo, cusanandoto tucu ra chi yo. Ta ñin ri chihin nyoho, cunyaca ra chi yo nya gloria nu nyaá ra. ¹⁵ Tandihí ihya cuví cha vaha chi maa ndo ta chi inga ñáyiví. Vatyí cuaha cha vaha Nyoo cuñihi ndo. Ta cuaha ndo nacuhvá ndo tyahvi nyoo chi ra, ta sacahnú ndo chi ra.

¹⁶ Yucuan chaha ña ndu uví maa iñi ndi. Vasi coño ñuhu ndi cha cuahán sandihí xaan chi. Soco ñayiví chaa cha iyó ndi cuahán nduchaa chi

tahan tahan quiví. ¹⁷ Tindoho cha nyehé ndi ñayiví ihya, tindoho ñin yaha ri cuví. Vatyí chahá chi cha cunañihi ndi noo nu vaha ca cha ma ndihí maa nu nyaá Nyoo. ¹⁸ Vatyí ñima cha cuví nyehe yo sahá ndi cuenda. Sahá ndi cuenda soco cha ña nyehé yo. Vatyí cha cuví nyehé yo ñayiví ihya, ña naha maa chiyo. Soco cha ña cuví nyehé yo, yucuan cuví cha ma ndihí ca maa.

5

¹ Ta chitó ndi vatyí quiví cúvi yo, coño ñuhu yo cunaa chi. Vatyí cuví chi tari noo vehe cha ña naha maa chiyo. Soco Nyoo cumí ra noo nu cunyaa añima yo, noo cha ma naa ca maa nya andiví. Ta ñima cha cacu chihin ndaha rayí ñayiví ihya cuví. ² Ndicha, cha ñi ri ca cha iyó yo chichi coño ñuhu yo, nducuihyá xaan cuñí yo, vatyí nyatú tuhva yo nicoo yo chichi cha chahá Nyoo chi yo nya andiví. ³ Vatyí cohon añima yo chichi cha chahá Nyoo tacuhva cha ma cuvityiyaá yo. ⁴ Cha ñi ri ca cha iyó yo chichi coño ñuhu yo cha cuví tari noo vehe ri, nducuihyá iñi yo vatyí ña cuñí yo quita ri maa añima yo chichi coño ñuhu cuan ta cuvityiyaá chi. Soco cuñí yo cha coo añima yo chichi cha ma naa ca maa nya andiví ta tyicuan ri maa cuaco yo. ⁵ Ta Nyoo tyaa ra cuhva vatyí tyehe caa cucuvi chi yo. Ta chahá quiyí ri ra Tatyí li ra chi yo. Vatyí tacuhva coto yo tyi

cuví naquehen ca yo tandihi ca cha cuacuhva ra chi yo.

⁶ Ta yucuan chaha ma yuhvi yo cha cúvi yo. Vatyí chitó yo tyi cha ni ri ca cha iyó yo chichi coño ñuhu ihya ñayiví, ña yatyin nyaá yo chihin Sutu Mañi yo andívi. ⁷ Vityin ña cuví nyehe yo chi ra, soco chihin cha chiñó ri iñi yo chi ra, iyó yo ñayiví ihya. ⁸ Soco yihí vaha iñi yo chi ra ta cha cuñí yo quita yo chichi coño ñuhu ihya vatyí cuhun yo cucunyaa yo chihin Sutu Mañi yo. ⁹ Yucuan chaha sañihi ca ndi nducú ndi cuhva yoso caa cha tahan iñi Sutu Mañi yo sacuví ndi. Cuví ri cha iyó ca ndi chihin coño ñuhu ñayiví ihya. O cuví ri cha yori ca ndi, vatyí cha nyaá ndi chihin Sutu Mañi yo nya andívi. ¹⁰ Vatyí tahan tahan yo ta cuhun yo nuu ra Cristo cucuhva yo cuenda nu nyaá cutuñi chi yo nuu ra. Ta cuñihi yo cha tahán chi chi yo, yoso cuhva cha vaha o cha ña vaha cha sacuví noo noo yo quívi chiyó yo chihin coño ñuhu yo ñayiví ihya.

Nu sacotó ra Pablo yoso caa nicoo vaha yo chihin Nyoo

¹¹ Vatyí chitó ndi vatyí Sutu Mañi yo cutachi tuñi ra chi ndi tatu ma sacuvi ndi tuhun cahán ra. Yucuan chaha nducú ndi cuhva cahán ndi chihin ñáyivi na nacuhva cuenda ñu chi ñu chi Nyoo. Ta Nyoo chitó ra vatyí tyicuan ri sacuví ndi. Ta chitó tucu maa ndo ñandíhi. ¹² Ñima cha cuñí ndi cuyaa ndi chihin cha cahán ndi tyehe caa, soco

cha cuñí ndi vatyí nicohón iñi ndo vatyí tuhun ndicha sacotó ndi, ta cuví cusí iñi ndo chihin ndi. Ta cuñihí ndo cuhva cahán ndo chihin inga ra cha sacahnú chii. Catyí ra tyi vaha iyó ra, soco ñima cha ndicha caa añima ra. ¹³ Tatu ña vaha cuñí xiñi ndi, cuñí maa ñáyivi tyi cahín tuhun tyehe caa, soco cha cuenda maa Nyoo. Soco tatu vaha cuñí xiñi ndi, ta cachi tuhun cahán ndi, soco cha cuenda tyi cuñí ndi tyinyeé ndi chi ndo. ¹⁴ Soco saniñí ndi chi ndi cha sacotó ndi tuhun ra Cristo chi ñáyivi. Vatyí chitó ndi tyi cuñí xaan ra chi ñu. Ta chitó ndi tyi chihí ra cha catyí cuatyí tandihi cuii maa ñáyivi. Ta yucuan chaha chihi tucu yo cha ma sacuvi ca yo cha ña vaha cha chinyacuví yo nu quichí chi. ¹⁵ Ra Cristo chihí ra cha catyí tandihi yo vatyí tacuhva cha ma coo ca yo cuhva cuñí maa yo. Coo yo soco cuhva cuñí maa ra. Vatyí chihí ra ta nandotó ra cha cuenda yo. ¹⁶ Cha cuhva cha vityin, tatu nyehé yo chi noo ñáyivi, ma caca xiñi yo nyehe yo chi ñu tari chicá xiñi ñáyivi cha ña ñohó nuu chi Nyoo. Noo quívi tyicuan caa chicá xiñi vatyí ra Cristo cuví ra noo ra ñuhu ñayiví ri. Vityin ña chicá ca xiñi tyicuan caa. ¹⁷ Vatyí quívi nacuhva cuenda yo chi yo chi ra Cristo, maa ra sanduchaá ra añima yo. Ta tandihi tuhun cha chicá xiñi yo nu quichí chi, ña chicá ca xiñi yo vityin. Vatyí maa ra

nacuhvā ra nonga cha chiñi tuñi chaa chi yo.

18 Ta tandihī ihya maa Nyoo sacuvī, vatyi sanicoo vaha ra chi yo chihin ra cha cuenda maa ra Cristo Jesús. Ta catyí ra chi yo vatyi na sacoto yo chi ñáyivī vatyi Nyoo cuñí ra cha nicoo vaha ñu chihin ra. 19 Vatyi chihin cha chihī ra Cristo cha catyi cuatyi yo, ñáyivī nicoó vaha ñu chihin Nyoo. Ta Nyoo sahá ra tuhun tyi ñahri ca cuatyi ñu. Ta chi nyuhu, catyí ra vatyi sacotó ndi tuhun ihya chi ñu. 20 Ta vityin cuví ndi ra chicá tyiño ra Cristo. Ta tari cha maa Nyoo chacú ndahvi nuu ndo, vatyi tyiño maa ra chicá ndi. Ta yucuan chaha chacú ndahvi ndi nuu ndo chihin sivī ra Cristo, na nicoo vaha ndo chihin ra. 21 Ra Cristo ña sacuvī ra ni minoo cuatyi. Soco Nyoo tachī ra chi ra siqui ñuhu ñayivī ihya, quichī cúvi ra tari noo ra iyó cuatyi cahnu. Tacuhva vatyi cuví sacacu ra chi yo. Ta cha cuenda maa ra Cristo saha Nyoo tuhun tyi vaha yo nuu ra.

6

1 Yañi, ñn ri tyiño Nyoo sacuví yo. Yucuan chaha chacú ndahvi xaan ndi nuu ndo vatyi ma coo ndo tari cha ña ñohó nuu ndo Nyoo. Cotyiño ndo tandihī cha vaha cha chahá ra chi noo noo ndo. 2 Vatyi catyí Nyoo nu tutu tyehe caa:

Quiví tahañ chi tyi sacaqui chuun, yuhu chiñi

nu cahun ta tyinyeī chuun, catyí Nyoo.

Saha ndo cuenda tyi vityin cuví quiví tahañ chi. Vityin cuví quiví sacacú Nyoo chi yo.

3 Nducú xaan ndi cuhva cha ma nyehe nyaa ñáyivī tyiño Nyoo cha sacuví ndi, coto ma chino iñi ñu chi Nyoo. 4 Soco cuñí ndi vatyi nyehé ñu vatyi ndicha cha cuví ndi musu Nyoo vatyi cunyeé ndi ñáá ndihī cha cuví chi ndi, tandihī tindoho, tandihī tisihi. 5 Vasi cañi ñáyivī chi ndi, vasi tyihí ñu chi ndi vehe caa, vasi canachaá ityi ñu siqui ndi, soco cunyeé xaan ndi. Ta ñihi xaan sahá tyiño ndi nyacua ña quixí ndi. Ta yahá ndi soco. 6 Ta tandihī maa ihya cunyeé ndi vatyi ndicha ndicha cuii cha cuví ndi musu Nyoo. Yucuan chaha cachi iyó ndi. Ta chitó ndi cha ndicha. Ta cunyeé ndi chihin cha ña chihí ndi tisihi tandihī cha cuví chi ndi. Ta vaha ñáyivī cuví ndi. Ta cuñí ndi chi ñáyivī. Ta nyaá maa Tatyí Ii Nyoo chihin ndi. 7 Cahán ndi maa ri tuhun ndicha maa Nyoo. Ta nyaá fuerza ra chihin ndi. Ta chotyíño ndi tandihī cha vaha cha chahá maa ra chi ndi, tacuhva cuví chasaha ndi chi ra ña vaha. 8 Iyó quiví cuñí nyehe ñáyivī chi ndi. Ta iyó quiví ña cuñí nyehe ñu chi ndi. Iyó quiví vaha cahán ñu siqui ndi. Ta iyó quiví quiñi cahán ñu siqui ndi. Iyó chaha catyí ñu vatyi ra cuendu cuví ndi. Soco maa maa ri cha ndicha cahán ndi. 9 Sahá ñu chi ndi tari noo ra ña ñohó

nuu ñu. Soco ñu yihí vaha cuenda Nyoo ñohó nuu vaha ñu chi ndi. Iyó quiví cha yatyin ri cúvi ndi, soco iyó ca ndi. Ta iyó quiví tachí tuñi ñu chi ndi, soco ña chihí ndi. ¹⁰ Vasi iyó quiví cha nducuihyá iñi ndi, soco tyicuan ri sñi cuñí ndi. Vatyí tyiño Nyoo sacuví ndi. Vasi ndahvi ndi, soco cuaha ñáyiví ñihi ñu cha vaha chihin tuhun cha chahá Nyoo chí ndi. Vasi ñahri maa iyó chí ndi, soco iyó tandihí cha vaha Nyoo chí ndi.

¹¹ Cahán ndi chihin ndo yañi, cha cuví ndo ñáyiví ñuu Corinto chiña. Catyí cachi ndi chí ndo chihin cha ñiñi añima ndi vatyí ndicha cha cuñí ndi chí ndo. ¹² Nyuhu, ña quiñi cuñi ndi nyehe ndi chí ndo. Maa ndo cuví ñu ña vaha cuñi nyehe chí ndi. ¹³ Chacú ndahvi ndi nuu ndo tari chacú ndahvi noo rayii nuu sehe ra, nuña ndo añima ndo, ta ma quiñi cuñi ndo nyehe ndo chí ndi, vatyí maa ndi ña quiñi cuñi ndi nyehé ndi chí ndo.

Cuví yo vehe Nyoo vatyí ñohó ra añima yo

¹⁴ Ma ndu ñn ri ndo chihin ñu ña chinó iñi chí Nyoo. Vatyí ña nacachí tahan añima ndo chihin ñu cuan. Vatyí cha vaha ma cuví ndu ñn ri chihin cha ña vaha. Ta cha ndichin ma cuví ndu ñn ri chihin cha ñaa iñi. ¹⁵ Vatyí ra Cristo ña ndu ñn ri ra chihin ra cuví cuihna. Ta tyicuan caa tucu ñu chinó iñi chí ra Cristo, ña nacachí tahan chí tatu ndu ñn ri ñu chihin ñu ña chinó iñi chí ra. ¹⁶ Ña chahá chí cha sacahnú yo Nyoo ta sacahnú

tucu yo chí cha cuví xitohyo. Vatyí maa yo cuví yo vehe Nyoo nyitó. Tari catyí maa ra tuhun ihya ta cha ñaha: Coi ta caca noi chihin ñu. Ta yuhu cucuvi Nyoo ñu, ta maa ñu cucuvi ñu ñáyiví chii, catyí Nyoo.

¹⁷ Yucuan chaha catyí tucu ra quiví cuan:

Quíta ndo mahñu ñu ña chinó iñi chii.

Ta ma cutahan ndo chihin ñu. Ta ma sacuvi ndo cha ña vaha.

Tyicuan ta cunaquehin chí ndo.

¹⁸ Ta sutu ndo cucuvi chii. Ta maa ndo cucuvi ndo sehi, catyí Sutu Mañi yo, ra iyó tandihí tunyee iñi chii.

7

¹ Ican ihya cuví cha chahá Nyoo chí yo. Yucuan chaha yañi, cuñi chí nducu yo cuhva cuvaha yo nuu Nyoo. Ma sacuvi yo cha quiñi caa ni ri ma caca xiñi yo cha ña vaha. Na ndu cuiñi coo yo vatyí sahá yo ñáyiví chí Nyoo.

Nu nacatyí ra Pablo yoso caa nasama ñu cuhva iyó ñu

² Yañi, chacú ndahvi ndi nuu ndo, na cuvaha coo iñi ndo nyehe ndo chí ndi vatyí ñahri cha sacuví ndi chí ni noo ndo. Ta ni ña sativí ndi chí ndo. Ni noo ndo ta ña sandaví ñaha ndi chí ndo. ³ Cha catyí chí ndo tyehe caa ñima cha cahín chí ndo. Vatyí cha yaha catyí tiqui chí ndo ta ityi chata ca, vatyí ndicha cha cuñi chí ndo. Vatyí ñn ri ñu cuví yo chihin Nyoo. Tatu iyó yo soco ñn ri cuví yo. O tatu

cúvi yo soco ñin ri cuví tucu yo. ⁴ Ñahri maa cha chica ñi chihin nyoho. Siñ xaan cuñi nyehi chi ndo. Ta yucuan chaha vasi nyehé ndi tindoho ihya, cuniñ ca ñi ndi. Ta cusñ xaan ca cuñi ndi.

⁵ Nya quivi chañ ndi Macedonia ihya, ta ta nyitatu ca maa ndi. Vatyí cuaha xaan tisihi ta tindoho nyehe ndi tandihi ri ityi chahan ndi. Ta cañi tahan ñu chihin ndi. Ta yuhví ndi. ⁶ Soco Nyoo, tyicuan ri sandunñ ca ra ñi yo tatu cuihyá cuñi yo. Ta sandunñ ra ñi ndi cuhva cha chañ ra Tito. ⁷ Ta ñima cha cuenda cha chañ ri ra. Soco cha cuenda cha ndunñ ñi ra saha nyoho. Nacatyí ra chi ndi vatyí cuñi xaan ndo nyehe ndo chi ndi. Ta chacu xaan ndo cha cuihya ñi ndo. Ta cuñi ca ndo chii, na. Ta cha cuenda cuan ndusñ xaan ca cuñi vityin.

⁸ Soco quivi cuan chica xaan xiñi vatyí chahí tucuihya ñi chi ndo chihin tutu cha sacuhin chi ndo. Ta ndu uví ñi cha sacuhin tutu cuan chi ndo. Soco suhva ri quivi, nducuihya ñi ndo. Ta vityin ña chicá ca xiñi cha cuenda tucuihya ñi cha chahí chi ndo. ⁹ Ta vityin cusñ xaan cuñi, ñima cha cuenda tucuihya ñi cha chiyo ndo, soco cha cuenda vatyí tucuihya ñi cuan sanandichí chi ndo ndaha Nyoo. Nyoho cunyeé ndo tucuihya ñi cuan yoso cuhva tahan ñi Nyoo, yucuan chaha cha vaha sacuví ndi chihin ndo chihin tucuihya

ñi cuan. ¹⁰ Iyó tucuihya ñi cha maa Nyoo chahá, tacuhva ndu uvi ñi yo cuatyí yo ta nañihi yo ityi vaha cuhun yo nu nyaa ra. Ta ña tahan chi cha cuxaán yo chi Nyoo cha cuenda cuan. Soco tucuihya ñi cha iyó chi ñu cha ña ñohó nuu chi Nyoo, ñima tucuihya ñi chi Nyoo cuví cuan. Vatyí ña tyinyeé chi chi ñu tacuhva cha ma cuhun ñu anyaya. ¹¹ Nyoho cunyeé ndo tucuihya ñi yoso cuhva tahan ñi Nyoo. Soco vityin nyehé ndo vatyí cuaha xaan cha vaha nañihí ndo cuenda cha cucuihya ñi ndo. Ta sandañ vaha ndo tyiño ra cuan. Cuxaán ndo chí ra. Ta nyacua cuñi ndo tachí tuñi ndo chí ra. Tandihí cuan, ta nayuhví ndo chí Nyoo. Ta nacatyí vaha ndo yoso caa cuahan. Yaha cuan ta nyacua quichí cuvi ñi ndo nyehe ndo chii. Ta cha cuenda cha sacuví ndo tari cuhva cuñi Nyoo, cuñi chí catyí vatyí ñahri cuatyí ndo cha cuenda cuan. ¹² Yucuan chaha quivi sacuhin carta cuan chi ndo ñima cha cuenda cha chicá xaan xiñi cuenda ra cha sacuví cuatyí cuan. Ta ñi ñima cuenda ra cha nyehe tisihi cuan. Soco cha cuenda maa ndo, vatyí cuñi tyi coto ndo yoso cuhva chicá xiñi ndo tuhun ndi nuu Nyoo vatyí cuñi ndo tyinyeé ndo chí ndi. ¹³ Yucuan chaha nduvaha cuñi añima ndi. Ta siñ xaan cuñi ndi vatyí chitó ndi tyi cuñi ndo chí ndi.

Ta siñ ca cuñi ndi cha nyehé ndi vatyí chahá xaan ndo

tunyeé iñi añima ra Tito. Vatyí vaha xaan tyiñuhú ndo chi ra. ¹⁴ Catyí chi ra Tito cha cumañi ca cuhun ra nu nyicú ndo vatyí vaha cutyasoho ndo tuhun cha sacuhin chihin ra. Ta vityin sií cuñí vatyí chinó cava tuhun cahín chihin ra. Maa maa ri cha ndicha cahín chihin ndo. Ta tyicuan caa ndicha tucu tuhun cha catyí chi ra Tito. ¹⁵ Ta cuñí xaan ra chi ndo vatyí nicohón iñi ra vatyí nyoho sacuví ndo tandihí cuí cha catyí ra chi ndo. Ta cuhva cha chaá ra, ndahvi sahá ndo chi ndo nuu ra. Ta vaha xaan cahán ndo chihin ra. Ta vaha xaan quichahá ndo chi ra. ¹⁶ Ta sií xaan cuñí vatyí chité tyi tyicuan ri sacuví ndo cha vaha.

8

Tahán chi tyinyeé yo chi ñu yihí cuenda Nyoo chihin cha iyó vaha iñi yo

¹ Ta vityin yañi, cuñí ndi nacatyí ndi chi ndo vatyí cuaha xaan tyinyeé Nyoo chi ñu yihí cuenda ra, ityi Macedonia ihya. ² Vasi cuaha xaan tindoho nyehé ñu, soco sií xaan ca cuñí ñu chihin Nyoo. Ta vasi ndahvi ñu soco cuaha cha iyó chi ñu chahá ñu, tari maa cha tyayí ñu. ³ Ta yuhu cuví noo cha ndaa vatyí nyehí tyi chihin cha iyó vaha iñi ñu chahá ñu yoso cuhva cha iyó chi ñu. Ta nyacua yaha ca chahá ñu. ⁴ Chacú ndahvi xaan ñu nuu ndi tyi nacuhvá ndi cha tyinyeé tucu maa ñu chi ñu tahan yo nya

Jerusalén. ⁵ Cuaha ca sacuví ñu cha nuu cha yihí iñi ndi. Vatyí cha xihna ca cha sacuví ñu, nacuhvá cuenda ñu chi ñu chi Nyoo chihin cha ñi vaha iñi ñu. Ta quichahá vaha ñu tuhun Nyoo cha sacote chi ñu, vatyí yucuan cuhva cuñí maa Nyoo. ⁶ Ta cha nyehí tyi tyehe caa chinyacuví ñu Macedonia ihya, yucuan chaha catyí chi ra Tito vatyí na sandihí ndihí ra tyiño vaha cha quichahá ra cha nacaya ra xuhun nu nyicú ndo. ⁷ Nyoho vaha xaan sacuví ndo tandihí ri. Chinó xaan iñi ndo chi Nyoo. Vaha xaan sañahá ndo tuhun ra. Ta vaha cutuñí iñi ndo. Ta ñi xaan iñi ndo sacuví ndo tyiño nuu ra. Ta vaha xaan ñáyivi cuví ndo chihin ndi. Ta tyicuan caa tucu tahán chi cha tyinyeé ndo chi ñu ndahvi ñu yihí cuenda Nyoo noo cuhva vaha xaan.

⁸ Ñima tyi catyí chi ndo tyehe caa ta cuñí ndo tyi cha saniñí chi ndo. Soco cha cuñí vatyí nyehé ndo cha vaha cha nyacuví ñu yihí cuenda Nyoo inga ityi. Ta tyicuan caa tucu maa ndo sañahá ndo chi inga ñáyivi tyi ndicha vaha ñáyivi cuví ndo chihin tahan ndo. ⁹ Vatyí cha chitó maa ndo yoso cha cuñí Sutu Mañi yo Jesucristo chi yo. Vatyí maa ra tyayí xaan ra. Soco sandundahví ra chi ra cha catyí yo tacuhva vatyí cuví sandutyayí ra chi yo.

¹⁰ Chahí tuhun ihya chi ndo cha cuenda cha vaha chi maa ndo. Na sañihi ndo chihin tuhun cha quichahá

ndo quiyava. Ñima tacuhva sacuví ri ndo, soco sacuví ndo chihin cha iyó vaha iñi ndo. ¹¹ Ta tari chaha ndo chihin cha iyó vaha iñi ndo, tyicuan caa sacuvi tucu ndo vityin. Ta cuhva ndo yoso ri cuhva cha iyó chi ndo. ¹² Vatyí tatu noo ñáyiví ñi vaha iñi ñu, cuñí ñu cuhva ñu yoso ri cuhva cha iyó chi ñu, Nyoo naquehén ra cha chahá ñu. Vatyí Nyoo ña chicán ra cha ñahri iyó chi yo.

¹³ Ñima cha cuñí vatyí nyehe ndo tindocho cha cuenda cha tyinyeé ndo chi inga ñu tacuhva ma nyehe ca ñu cuan tindocho. ¹⁴ Soco vityin cha iyó chiin chi ndo, tahan chi cha tyinyee ndo chi ñu ndahvi cuan. Ta inga chaha maa ñu cucuhva cha chiñuhú chi maa ndo. Tyehe caa tahán chi tyinyeé chi tahan ri yo tacuhva tyi ninoo yo ta ni inga yo ma nyehe yo tindocho. ¹⁵ Vatyí tyehe caa catyí chi tuhun Nyoo: “Ra cha cuaha xaan cumí, ña ndoó ca chi ra. Ta ra cha chiin ri cumi, ña cumañí chi ra”, catyí tuhun Nyoo.

Ra Tito chihin ra tahan ra tyaá ra cuhva cuhun ra ñuu Corinto

¹⁶ Soco tyahvi nyoo chi Nyoo vatyí chahá ra cha vaha coo añima ra Tito tyi chicá xiñi ra tuhun ndo tari chicá xiñi yuhu. ¹⁷ Ta quehén ra tuhun cha catyí chi ra cha cuhun ra nu nyicú ndo. Tyi cha yihí xaan iñi tucu maa ra tuhun ndo. Ta yucuan chaha vityin vachí ra nu nyicú ndo

chihin cha iyó vaha iñi maa ra.

¹⁸ Hin ri chihin ra Tito tachí ndi chi noo ra yañi yo. Ta vaha xaan hermano cuví ra, ta tyicuan caa catyí tandihi ñáyiví yihí cuenda Nyoo. ¹⁹ Ta siin ri nacachí vaha maa ñu yihí cuenda Nyoo chi ra yañi yo ihya vatyí cuhun ra chihin ndi cunyaca ndi xuhun chi ñu ndahvi nya Jerusalén. Ta cuñí ndi sacahnú ndi chi Sutu Mañi yo cha sacuví ndi tyiño ihya. Ta suri sañahá ndi vatyí cuñi xaan ndi tyinyee ndi chi tandihi ñu yihí cuenda Nyoo. ²⁰ Ta cuñí ndi sacuví ndi tyehe caa tacuhva cha ma quihí yuhu ñáyiví tuhun ndi cha cuenda cha nacayá ndi xuhun cha cuacuhva ndi chi ñu ndahvi. ²¹ Ta nducú xaan ndi cuhva sacuví ndi noo cuhva cachi. Tatu ñáá noo cha cuasacuvi ndi soco chihin cha cachi iyó ndi chihin nuu Sutu Mañi yo ta chihin nuu ñáyiví ñandihí.

²² Ta chihin ra Tito ta inga yañi yo cuan, vachí inga tucu ra yañi yo, vatyí nyehé ndi vatyí ñi xaan iñi ra. Ta vityin yaha ca cuhva, vatyí vaha cuñí ra nyehé ra chi ndo cha cuenda cha chinó xaan iñi ra tyi cuñí ndo sacuví ndo cha vaha nuu Nyoo. ²³ Tatu yóó cha ndaca tuhun tuhun ra Tito, catyí ndo chi ñu tyi ra tahan cuví chi ra. Ta sahá tyiño ra chihin, ta tyinyeé ra chi ndo chihin tuhun Nyoo. Ta tatu ndaca tuhun ñu tuhun inga uvi ca ra yañi yo ihya, catyí ndo chi ñu vatyí maa ñu yihí cuenda Nyoo saquichí

chi ra. Ta vaha xaan sacuvi ra tyiño nuu ra Cristo. ²⁴Yucuan chaha sañaha ndo chi ra ihya vatyí ndicha ndo cha cuñí ndo chi ra. Tyicuan ta coto tandihí ñu yihí cuenda Nyoo vatyí tahán chi cha cahín tuhun ndo tyicuan caa.

9

Nu chahá ra Pablo tuhun yoso caa cuatyinyee ñu chi ñu ndahvi ñu yihí cuenda Nyoo nya Jerusalén

¹ Ta cuenda xuhun cha nacayá ndo cuenda ñu ndahvi ñu yihí cuenda Nyoo, ña cuñí chi cha sacuhin tuhun chi ndo. ² Vatyí cha chité cha vaha caá añima ndo. Yucuan chaha chihin cha sii cuñí nacatyí chi ñu ityi Macedonia ihya, vatyí nyoho ñu ityi Acaya, nya ta quiyava quichaha cuñí ndo tyinyee ndo. Ta cuaha xaan ñu Macedonia cunii ca iñi ñu cha tyinyee tucu maa ñu.

³ Soco suvita ri yuhu cutachi chi yañi yo ihya nu nyicú ndo. Vatyí sanumi ndo ta sacaya ndo xuhun, tari cuhva catyí vatyí yihí iñi ndo sacuví ndo. Vatyí tacuhva cha ma catyí ñu Macedonia ihya vatyí ña ndicha cha cahín siqui ndo cha cuenda cuan. ⁴ Vatyí coto cuhun nya noo ra Macedonia chihin, ta nyehe ra vatyí ñahri maa nacayá ndo. Ta cuquehin ticahan nuu cha cuenda cha ñahri cumi ndo. Ta vihi ca maa ndo. Vatyí cha yaha catyí vatyí cuatyinyee ndo. ⁵ Yucuan chaha cuñí mai vatyí vaha cha cuhun

xihna ca ra yañi yo ihya nu nyicú ndo tacuhva tyinyee ra chi ndo cha sacañá tahan ndo xuhun cha yihí iñi ndo tyí cuhva ndo. Tacuhva tyí quivi quichi soco tandihí ta cha iyó vaha. Vatyí cha iyó vaha iñi maa ndo cuví, ta ñima noo cha saniñi ndi chi ndo.

⁶ Ta ñicohon iñi ndo tuhun ihya: Ra cha chiin ri tachí, chiin ri tyiño sahá ra chicoó. Ta ra cuaha tachí, cuaha tyiño sahá ra chicoó. ⁷ Ta tahan tahan yo cuñí chi cuhva yo yoso cuhva quichi cuvi añima yo. Ñima chihin cha ña ñii iñi yo o chihin fuerza. Vatyí Nyoo cuñí ra chi ñu cha chahá chihin cha sii cuñí. ⁸ Nyoo cuví cuhva ra cuaha, ndihi ndoo ndihi cuiti nuu cha vaha chi ndo. Vatyí tyicuan ta coo tandihí ri cha chiñuhú chi ndo. Ta ndoo ca ta cuví tyinyee ndo chi ñáyivi chihin tandihí ri nuu chiñuhú chi ñu. ⁹ Tuhun Nyoo catyí chi tyehe caa:

Minoo ra vaha, chahá ra cha iyó chi ra chi ñu ndahvi.

Ta tumañi iñi cha sacuví ra cuan, yucuan cuví cha ña chinaá nuu Nyoo, catyí chi.

¹⁰ Nyoo chahá ra chiti tachí yo. Ta chahá tucu ra cha cachi yo. Cuhva tucu ra cuaha ca chiti tachi ndo ta cuhva ra cuvaha chi. Ta chihin cha chahá ndo, cusacuví ra tyí cuaha cha vaha cucun-yaa añima ñáyivi. ¹¹ Tyicuan caa ta coo tandihí ri nuu cha tyayii chi ndo, tacuhva cuví tyinyee ndo chi tahan ndo. Ta maa ñu cuan, cuanacuhva

ñu tyahvi nyoo chi Nyoo cha cuenda cha tyinyeé yo chi ñu. ¹² Vatyí cha tyinyeé yo tyehe caa chi ñu yihí cuenda Nyoo, uvi tahan cha vaha sacuví yo. Noo cha chahá yo cha chiñuhú chi ñu. Ta inga cha nacuhvá xaan ñu tyahvi nyoo chi Nyoo. ¹³ Maa ñu cusacahnu ñu chi Nyoo. Vatyí chihin cha tyinyeé ndo chi ñu, nyehé ñu vatyí ndicha cha quichahá ndo tuhun ra Cristo. Ta cuhva ñu gloria chi Nyoo cha tyinyeé xaan ndo chi ñu ta chi tandihí ñáyivi. ¹⁴ Ta cucacan tahvi ñu chaha ndo. Ta cucuñi ca ñu chi ndo cha cuenda cha vaha cha chahá Nyoo chi ñu cha cuenda ndo. ¹⁵ Tyahvi nyoo chi Nyoo vatyí chahá ra noo cha vaha xaan chi yo. Nyacua ña ñihí yo cuhva nacatyí yo.

10

Iyó ityi chi ra Pablo tyi saha ra cuenda chi ñu cha sacotó ra tuhun Nyoo chii

¹ Yuhu ra Pablo chiquén noo tumañi iñi chi ndo chihin cha vita iñi. Tari cha vita iñi ra Cristo. Vatyí yihí ndo catyí ndo vatyí tatu ñáa tuhun sacoté chi ndo chihin tutu, ñihi xaan cahín chihin ndo. Soco tatu nyaí chihin ndo, vita xaan cahín, catyí ndo. ² Vaha. Soco quiví cuhin nu nyicú ndo, ma saniñi ndo chii cha cahín chi ndo. Soco chité tyi cuñí chi cha sañahí chi suhva ndo yoso cuhva cha ñihi cahín. Vatyí yihí ndo catyí ndo vatyí sacuví tari sacuví noo ra ña yihí cuenda

Nyoo. ³ Ndicha vatyí ñáyivi cuví ndi. Soco ña cañi tahan ndi tari cañi tahan ra ñáyivi ihya. ⁴ Vatyí cha xaan cha cañi tahan ndi chihin, ñima cha xaan ñáyivi ihya cuví. Soco maa tunyee iñi Nyoo cuví, vatyí cuví chasaha ndi tandihí maa fuerza nyacua nya fuerza tatyí ña vaha. ⁵ Ta tyicuan caa cuví chasaha ndi chi tandihí tuhun cha cahán ñáyivi siqui tuhun Nyoo, ta tandihí cha cahnu sahá chii cha chasi nu quichahá yo tuhun Nyoo. Tandihí cuhva chicá xiñi yo siqui ñuhu ñáyivi ihya, chahá yo na cunyaca ñaha ra Cristo vatyí quichahá yo chi maa ra. ⁶ Ta quiví cuquichaha vaha tandihí ndo chi ra Cristo, tatu nya nonga ndo ña cuñi ndo quichahá ndo, tyaá ndi cuhva cha tachi tuñi ndi chi ndo.

⁷ Soco nyoho sahá ndo cuenda cuhva caá ri noo ñáyivi. Ta ña sahá ndo cuenda cuhva caá añima ñu. Ta tatu nya noo nyoho chitó vaha ndo vatyí cuenda ra Cristo yihí ndo, coto tucu ndo vatyí yihí tucu nyuhu cuenda ra. ⁸ Vatyí vasi yaha cuhva cahín, ña tahán chi cha cucahan nuí. Vatyí maa Sutu Mañi yo chahá ra ityi chii cha cunyaca ñahi cha cuenda cha vaha chi maa ndo, tacuhva ñihi ca ndo tunyee iñi Nyoo. Ta ñima cha sativí chi ndo. ⁹ Ña cuñi vatyí catyí ndo vatyí sayuhví chi ndo chihin cha cahín nu tutu cha sacuhín chi ndo. ¹⁰ Vatyí yihí ndo catyí ndo vatyí nu tutu cha

saquichí chi ndo ñihi xaan cahín chihin ndo. Soco tatu mai chaa nu nyicú ndo cuví noo ra ña ñihí tuhun cahan, catyí ndo. Ta tuhun cha cahín, maa maa ri tuhun cha ña chiñuhú cuví, catyí ndo. ¹¹Soco ñu cha catyí tyehe caa cuñí chi cha coto ñu vatyí tari cuhva cahín nu tutu, tyicuan caa cusacuvi tiqui nachai nu nyicú ndo.

¹²Ndicha ña cañá iñi ndi sandu inuu ri ndi chi ndi chihin ra casayaá chi tyi cahán ra tuhun maa ra. Vatyí casacuví ra cha ña tahán chi. Vatyí nyehé ra cuhva chicá xiñi maa ra ta cuhva cuahan inga ra, ta cuñí maa ra tyi vaha cuahan ra. Ta ña cutuñí iñi ra tyi tahán chi nanducú ra cuhva cuñí Nyoo. ¹³Nyuhu ma sacahnu ndi chi ndi chihin cha ña tahán chi chi ndi. Nyoo cuví ra sañahá ñáá cuví tyiño cha tahán chi cha sacuví ndi. Ta maa ra chahá cha quichi ndi nya nu nyicú ndo Corinto chiña. ¹⁴Tyehe ta ñima xihna ca ndi sacoto tuhun Nyoo chi ndo, ña tahán chi sahá ndi cuenda chi ndo. Soco tahán maa chi vatyí xihna ca maa ndi chaá ndi nu nyicú ndo chihin tuhun ra Cristo. ¹⁵Soco nyuhu ña sayaá ndi chi ndi chihin tyiño sahá inga ra. Ña catyí ndi tyi tyiño maa ndi cuví. Soco yihí iñi ndi vatyí cunachino vaha ca iñi ndo chi Nyoo. Tyicuan ta cuví sañaha ca ndi tuhun ra Cristo chi ndo, soco yoso cuhva tahán chi chi ndi. ¹⁶Ta yihí iñi ndi cha cahan ndi tuhun ra

Cristo chihin ñáyivi nya ndihi ñuu nu cañi ca cha nuu nu nyicú ndo chiña, nu ta coto ca ñu tuhun ra. Tacuhva cha ma catyí ñáyivi vatyí cuyaa ndi chihin tyiño sahá inga ra.

¹⁷Soco tatu nya noo yoó cuñí yo cuyaa yo, na cuyaa yo soco chihin Sutu Mañi yo. ¹⁸Vatyí nuu Nyoo ña quitá vaha ra catyí tyi vaha maa. Soco tatu cahán Nyoo tuhun noo ra ta catyí ra tyi vaha sacuví ra, ican ra cuan cuví ra quitá vaha nuu Nyoo.

11

Nu chahá ra Pablo tuhun chi ñu Corinto na saha ñu cuenda coto sandaví ñaha ra cuendu chi ñu

¹Vaha tyehe ta cunyeé ndo chiin cha ñima ri tuhun cha cuacatyí chi ndo. (Vasi ña tahán chi cha sacoté tuhun mai, soco cuñí chi cha nacotó ndo yoso caa cuñí ra cuan sandaví ñaha ra chi ndo.) Ta yucuan chaha vasi yoso ca caa soco cunyeé ndo cha cuacatyí chi ndo. ²Vatyí cuiño xain chi ndo. Ta maa Nyoo chahá cha cuiñe chi ndo, vatyí mai ican tyihí chi ndo ityi ra Cristo. Ta cuñí tyi cuñí ndo chi ra tari noo ñaha tyivaa cha cuñí xaan ña chi noo ri maa ra cha cuatandaha ña chihin. ³Soco chicá xiñi cha cuenda ndo, coto cuví chi ndo tari cuví chi cu Eva. Vatyí sandaví ñaha coo chihin maña ti chi ña. Ta coto casandaví ñaha ra cuan chi ndo. Ta coto ndusiñ caa cuhva nacacá xiñi ndo tuhun ra Cristo. Ta sandihí ndo tuhun cha sacahnú ndo chi noo tuhun

ri maa ra. ⁴ Ta nyoho tañi tyehe xaan ri tyasohó ndo nu cacahán ra tuhun ra Jesús soco ña ndicha ra. Vatyí ñima tuhun ra Jesús cha sacotó ndi chi ndo cuví. Ta vaha xaan cuñí ndo nacacá xiñi ndo siin ca tuhun cha ña chachí tahan chihin tuhun Tatyí Ii Nyoo cha naquehen ndo quivi xihna ri. Ñima tuhun ra Cristo cha sacacú chi yo cacahán ra cuan. Ta nyoho tañi tyehe xaan ri tyasohó ndo chi ra. ⁵ Soco tuví iñi tyi ra cha cacatyí tyi apóstol Nyoo cacuví ra, ñima ra vaha xaan cuví ra cuan cha nuu yuhu. Soco nyoho, nyicón ndo chi ra. ⁶ Vasi ña ñihí vahi cuhva cahín, cuñí maa ndo. Soco cutuñi vaha iñi tuhun Nyoo. Ta yucuan sañahá ndi chi ndo chihin tandihi cuhva sacuví ndi.

⁷ O cuñí maa ndo vatyí ña vaha cuhva sacuví quivi cha cahín tuhun ra Cristo chihin ndo. Vatyí ña quehín yahvi chi ndo. Ta sandundahví chii cha cuenda cha cuñí cha cacu ndo. ⁸ Ñáyivi inga vehe ñuhu tyinyee ñu chii. Vatyí maa ñu chahá xuhun chii. Ta yuhu quehín xuhun cuan ta sacuví tyiño nuu ndo. ⁹ Ta quivi cha chinyaj chihin ndo ña चाहि tindoho chi ni noo ndo vasi iyó cha chiñuhú chii. Vatyí ra hermano cha quichi coyo nya ityi Macedonia, ican ra chahá tandihi cha chiñuhú chii. Ta sahá vavahi cuenda chii vatyí ña cuñi cuhve tindoho chi ndo. Ta tyicuan ri sacuví que. ¹⁰ Vatyí chitó vahi tyi maa maa ri tuhun ndicha ra Cristo cahín, ta chité tyi ma

cuhve cha tinyaa ni noo ndo, cha cuví ndo ñu ityi Acaya chiña, cha vaha cuñí cha ña chiquén cha coo yahvi chi ndo. ¹¹ ¿Ñáá tuhun cha cahín tyehe caa? ¿Atu cha cuenda cha ña cuñí chi ndo? Ñima, Nyoo chitó ra yoso cha cuñí chi ndo.

¹² Ta cuasacuvi que tari cuhva sacuví mai. Vatyí ña cuñí cuhve ityi chi ra cachicá noo yanga vatyí cacatyí ra tyi sacuví ra tari cuhva sacuví ndi soco ña ndicha. ¹³ Vatyí cacatyí ra cuan vatyí apóstol cuví ra. Soco ña ndicha ra. Vatyí cuví ra noo ra sandaví ñaha ta nasahá ra chi ra tari noo ra apóstol ra Cristo. ¹⁴ Ta ihya ñima cha iyo cuñi yo cuví. Vatyí cuihna cuví nasaha ra chi ra tari noo ángel cha xiño tuví chihin cha ndichin Nyoo. ¹⁵ Yucuan chaha ra cha nyicón chi ra ña vaha, nasahá tucu maa ra chi ra tari noo ra cha sacuví cha vaha. Soco coo quivi cutachi tuñi Nyoo chi ra cha cuenda cha ña vaha cha sacuví ra.

Tindoho cha nyehé ra Pablo nu chicá noo ra tyiño Nyoo

¹⁶ Inga chaha catyí tiqui chi ndo vatyí ni noo ndo ta ma caca xiñi ndo vatyí loque cha cahín tyehe caa. Soco tatu tyicuan caa chicá xiñi ndo, saña ndo chii na cahin chihin ndo tari noo ra loco. Vatyí tyicuan caa ta cuví sacahnu tucu yuhu chiin chii. ¹⁷ Ñima Sutu Mañi yo catyí chii vatyí sacahni chii tyehe caa. Soco cahín tari cahán noo ra loco. ¹⁸ Vatyí cuaha ra cha cacatyí

vatyí tyiño Nyoo cachicá ra, ta ñima, vatyí cahnu xaan casahá ra chí ra. Yucuan chaha cusacahnu tucu yuhu chii ñandihí. ¹⁹ Nyoho, chitó xaan ndo, cuñí maa ndo. Ta quiyí ri tyasohó ndo nu cahán ra cuan. Ta tondo xaan cacuví ra. ²⁰ Soco nyoho ñahri cuenda ndo cha saniñí ra chí ndo cha sacuví ndo tyiño nuu ra. Suhú ra chí ndo ta ña tuví iñi ndo. Sandaví ñaha ra chí ndo. Ta ña cuñí nyehe ra chí ndo. Ta nyacua cañí chihin ndaha ra chí ndo. Ta maa ndo cunyeé xaan ndo cha sacuví ra chí ndo. ²¹ Vasi cahán nuu ndi soco cua catyí ndi, nyuhu vita xaan cuñí ndi yucuan chaha ña cañá iñi ndi sacuví ndi chí ndo tyicuan caa.

Soco inga ra cuan cañá ndicha cuiñi iñi ra sacotó ra tuhun maa ra. Ta yuhu tucu cañá iñi vasi cahín tari noo ra loco. ²² Tatu ñáyivi hebreo cuví ra, suri cuví tucu yuhu. Ta tatu ñáyivi Israel cuví ra, ican cuví tucu yuhu. Ta tatu vachí ra tata ra Abraham, suri vachi tucu yuhu. ²³ Ta tatu ra sacuví tyiño nuu ra Cristo cuví ra, vihi ca yuhu. Vatyí yaha ca cuhva sacuví tyiño nuu ra Cristo. Vasi cahín tari noo ra loco vatyí catyí tyicuan caa. Soco ndicha. Vatyí ñihi ca sahá tyiñe ican saha ra cuan. Ta cha cuaha ca chaha ndohí chihin ñii ican saha ra cuan. Ta cuaha ca chaha ñohí vehe caa ican saha ra cuan. Ta cuaha chaha cha cha yatyin cúvi, soco ña chihí. ²⁴ Ta ohon tahan chaha cacañí ra Israel chii chihin ñii. Cha noo chaha cañí ra

chii, oco chahun cumi tahan chaha sahvi ra ñii chate. ²⁵ Ta uñi chaha cañí ra chii chihin yutun. Ta noo chaha cacañí ra chii chihin yuu. Ta uñi tahan chaha nyeé barcu cha yihí. Ta chichi cha uñi tahan chaha cuan, noo chaha ndojí nu tyañuhu noo ñuu ta noo quivi. ²⁶ Cha cuaha xaan cha cuví chii nu chica noi. Ta cha cuaha chaha cuñí tyañi chihin yuvi ndutyá. Ta cuaha cha cuví chii. Quita ra suhu nu cuahin. Nyacua nya ra ñui, ra Israel, ta satasí iñi ra chii. Ta ra inga ñuu ñandihí. Ta cuaha cha cuví chii ityi chichi ñuu, ityi nu chiqui, ityi nu tyañuhu. Ta cuaha cha cuví chii mahñu ra cha catyí vatyí hermano cuví ta ñima hermano cuví ra. ²⁷ Ta ñihi sahá tyiñe ta chitati. Ta cuaha xaan chaha ña quixí. Yahí soco: soco xita ta soco ndutyá. Cuaha chaha sahí ayunar, o ña chachí ta nanduqui chí Nyoo cuví cuan. Cuaha chaha yahí cha vichin. Ta ni sahme ta ñahri.

²⁸ Ta siin ri nyaá siqui vatyí sanií que iñi tandihí ndo: nyoho ta ñu inga ñuu cha yihí cuenda Nyoo. ²⁹ Vatyí tatu noo ndo vita cuñí ndo, yuhu tari cha vita cuñí cha cuenda ndo. O tatu sacó ñu cuatyí nya noo ndo, yuhu quehín tisihi ta ticahan nuu. ³⁰ Tatu cuñí chí cha sacote tuhin tacuhva nacoto ndo tyi ndicha cuví yuhu noo musu Nyoo, cusacote soco cha cuví chii. Vatyí sañahá chí tyi ñahri maa fuerza mai iyó chii. ³¹ Nyoo sutu Sutu

Mañi yo Jesucristo, tahán chi cha sacahnú yo chi ra tyicuan ri maa. Ta chitó maa ra vatyí ndicha cha cahín, ñima cuendu cahín. ³² Quiví chinyaj Damasco (ñuu nu nicachico yihí barda) ra cha cuví gobernador cha sacuví tyiño nuu rey Aretas ñuu Damasco cuan, cuatyaa ra chi sindaro yuvehe cahnu ñuu cuan, tyi casahá cuenda ra. Vatyí tatu quite yuvehe ñuu cuan catin ra chii ta cunyaca ra chii vehe caa. ³³ Soco ñáyivi iyó chaha barda cuan iyó ventana ñu. Ta ityi ventana sanoq ñu chii. Yihí chichi noo tica cahnu. Ta tyicuan caa sacacu Nyoo chii ndaha gobernador cuan.

12

Noo cha chaha Nyoo vatyí nyehe ra Pablo

¹ Ñahri maa ñihí chihin cha cahín tuhun mai, soco cuanacatyí cha sañaha Sutu Mañi yo chii. ² Ñohó nui chi noo ra cha yihí cuenda ra Cristo. Ta cha iyó uchi cumi cuiya quehen Nyoo chi ra ta chahan ra nya nu cu uñi toto andivi. Soco ña chité tatu chahan ra chihin coño ñuhu ra o chihin cha chiñi tuñi xiñi ra. Ña chité. Nya ri ca maa Nyoo chitó ra. ³⁻⁴ Soco chité vatyí ra cuan chinyaca Nyoo chi ra nya nu iyó ñáyivi vaha, ñu cha chihí. Ña chité tatu chahan ra cuan chihin coño ñuhu ra o chihin cha chiñi tuñi xiñi ra. Noo tuhun ri ca maa Nyoo chitó. Ta nu chahan ra cuan chiñi ra

tuhun xehe. Ta ñahri ityi iyó chi ñáyivi cha nacatyí ñu tuhun xehe cuan. ⁵ Tahán chi sacahní chii chihin cha sañahá Nyoo chii quivi cuan. Soco ña sacahní chii cha cuenda cuan. Sacahní chii, soco chihin cha ñahri fuerza mai iyó chii. ⁶ Tatu cuñí tiqui cahín tuhun mai, ñima noo tuhun tondo ri cuví. Vatyí maa maa ri cha ndicha cuacatyí. Soco ma catyi vatyí coto cahnu xaan sahá ñáyivi chii. Vaha ca nyehe ñu cuhva vaha iyé ta cuhva vaha sañahí, tyicuan ta coto ñu tatu ra vaha o ra ña vaha cuví.

⁷ Ña cuñí Nyoo cha sacahnú xain chii chihin cha sañahá ra chii. Yucuan chaha chahá ra cha sanyehé xaan cuihna tindoho chii. Tari uhvi nu quiñi noo iñu cahnu, tyicuan caa uhvi chii. Vatyí tyicuan caa ta ma cuví cuyai chihin cha sañahá Nyoo chii. ⁸ Ta cha uñi chaha chiquen chi Sutu Mañi yo na tinyaa ra tindoho cuan siqui. ⁹ Soco maa Sutu Mañi yo catyí ra chii tyehe caa: “Chahí tandihí cha vaha cha iyó chii chuun. Vatyí yucuan cuví cha chiñuhú chuun. Vatyí tatu ñáyivi ta ñahri maa tunyee iñi maa ñu iyó chi ñu, yucuan ta cuví cunyaa maa maa ri tunyee iñi mai chihin ñu”, catyí ra. Yucuan chaha sii xaan cuñí cha ñahri fuerza mai iyó chii. Vatyí tyicuan caa ta cuví cunyaa tunyee iñi ra Cristo chihin. ¹⁰ Yucuan chaha sii xaan cuñí cha ñahri tunyee iñi mai iyó chii. Vasi cahán ñáyivi chii, vasi chicá nyicon

ñu chii, vasi ñahri cha iyó chii, vasi cuaha cha cuví chii, soco sií xaan cuñí cha nyehí tindoho cha cuenda maa ra Cristo. Vatyí tatu ñahri fuerza mai iyo chii, soco ñihi ca cuñí chihin fuerza maa Nyoo.

Chicá xiñi ra Pablo tuhun ñu yihí cuenda Nyoo ñuu Corinto cuan

¹¹ Cahín tari noo ra loco. Soco maa ndo cuñí ta cahín tyicuan caa vatyí ña sahá ca ndo ñáyivi chii. Vatyí maa ndo tahán chi cuyaa ndo chihin. Vasi noo ra cha ñima ri tuhun cuví yuhu, soco nyaca cuví ra cha catyí tyi apóstol cuví ra, ta ña ndicha ra. Cuñí maa ra tyi vaha xaan ca ra cha nuu inga ra chicá tyiño Nyoo. ¹² Nyehe ndo yoso caa tyiño Nyoo cha sacuvi mahñu ndo. Ta chihin cha cama iñi ta cunyej tandihi tindoho cha nyehi. Ta cuaha xaan milagru sañaha Nyoo chi ndo tacuhva coto ndo vatyí ndicha cha cuví yuhu noo ra chicá tyiño maa ra. ¹³ ¿Atu vaha ca cuhva tyiñuhí chí yañi yo inga ñuu cha nuu nyoho? Ñima. Inuu ri cuhva tyiñuhí chí tandihi ndo. Noo ri cha ña sacuví chihin nyoho cha ña cuñí cuhve tindoho chí ndo. Saha ndo ticahnu iñi chíi tatu ña vaha cuhva sacuví.

¹⁴ Ta vityin cha iyó vahi cha quichi nyehi nu nyicu ndo. Cha cu uñi chaha vityin. Ta ñahri tindoho tyái siqui ndo. Vatyí ñima cha iyó chí ndo vachí nanduquí. Chi maa ndo cuví cha cuñí yuhu. Vatyí sutu, ican tahan chi cuhva

cha chiñuhú chi sehe. Ta ñima sehe nducú cha chiñuhú chí sutu. ¹⁵ Yucuan chaha yuhu nyacua sií cuñí cusanaí cha iyó chíi cha cuenda cha vaha chí ndo. Ta nyacua sií cuñí cuhve ñayivi cha cuenda ndo. Soco ta caa ri vatyí tatu cuñí que chí ndo, maa ndo ña cuñí vaha ndo chíi.

¹⁶ Ta vasi chitó cachi ndo vatyí ña चाहí tindoho chí ndo, soco yihí ndo catyí ndo vatyí sandaví ñahi chí ndo ta ña tuví iñi ndo. ¹⁷ ¿Atu sandaví ñahi chí ndo chihin nya noo ra cha tachí nu nyicu ndo quivi cuan? ¹⁸ ¿Atu sandaví ñaha ra Tito chí ndo quivi tachí chí ra chihin inga yañi yo cuan nu nyicu ndo? Ña sandaví ñaha ra chí ndo. Vatyí nyuhu ña tuhvá ndi sandaví ñaha. Vatyí ñn ri cuhva iyó ndi. Ta ñn ri cuhva sacuví ndi.

¹⁹ Vasi chicá xiñi ndo vatyí cuahan ndi tumañi iñi chí ndi cha cuenda tuhun cha cahán ndi ihya, soco ñima tyicuan caa. Vatyí tandihi tuhun ihya cahán ndi cha cuenda cha vaha chí maa ndo tacuhva cohon nuu ca ndo chí Nyoo. Vatyí ndicha cha cuñí ndi chí ndo. Ta cahán ndi soco chihin nuu Nyoo ta cha cuenda maa ra Cristo. ²⁰ Chicá xiñi coto iñi ndaa iñi noo nyicú ndo ta cháí. Ta ma cutahan iñi cuhva nyicú ndo. Ta maa ndo ma cutahan iñi ndo cuhva cucahin chí ndo. Yuhví coto coo tisíhi, coto nya ndo quichí cuví iñi ndo cha chíi noo tahan ndo, coto nya ndo cuxaán ndo chí tahan ndo, coto nducú ndo

maa maa ri cha vaha chi maa ndo, coto nya ndo ñi ca ndo cuendu, coto cahán cuehe ndo chi tahan ndo, coto nya ndo cahnu sahá ndo chi ndo. Yuhví coto nyehi tyi ña cachi ña ndaa nyicú ndo. ²¹ Ta yuhví coto cha cuhin inga chaha nu nyicú ndo, Nyoi cuhva ra cha cuhan nui cha cuenda nyoho. Ta chicá xiñi coto quita ndutya nui cha cuenda cha nyacuví ndo. Vatyí yihí ndo sacuví ndo cuatyí nu quichi quivi. Ta nya vityin ta ña ndu uví ñi ndo cha ca iyó ndo chihin ñusihi ta ñima ñasihi ndo cuví, ta iyó ndo chihin rayi ta ñima yi ndo cuví. Ta ña sandihí ndo tuhun cha sacuví ndo ñáá ndihi cha ña vaha.

13

Chahá ra Pablo tuhun chi ñu Corinto, na saha vaha ñu cuenda chi ñu tatu vaha cuahán ñu chihin Nyoo

¹ Quivi cha cuquichi inga chaha nu nyicu ndo cuví chi chaha cu uñi. Yucuan ta cuví cundaa tyiño ñu cha sacuví cuatyí. Soco cuñi chi uvi o uñi cha ndaa. ² Vatyí quivi chahin nu nyicú ndo cha cu uvi chaha, catyí chi ra sacuví cuatyí cuan, na sandihi ra tuhun. Ta vityin catyí tiqui inga chaha chi ra, ta chi tandihi ndo. Vatyí tatu cha quichi inga chaha, ta sacuví ca ndo cuatyí cuan, ma cundahvi cuñi nyehi chi ndo. ³ Tyicuan ta coto ndo cha cuñi xaan ndo coto ndo. Vatyí ndicha ndicha cha chihin fuerza maa ra Cristo cahán.

Vatyí ra Cristo ñima noo ra ñima ri tuhun cuví ra. Yucuan chaha sañahá ra tunyee ñi ra chi ndo. ⁴ Ndicha vatyí chihí ra nu cruzi tari noo ra cha ñahri tunyee ñi iyó chii. Soco nandoto ra ta iyó ra chihin tunyee ñi Nyoo. Ta tyicuan caa tucu maa ndi vasi ñahri fuerza maa ndi iyó chi ndi. Soco in ri cuví ndi chihin ra Cristo. Ta iyó ndi chihin tunyee ñi maa Nyoo vatyí tyicuan caa ta cuvi tyinyee tucu nyuhu chi nyoho.

⁵ Saha ndo cuenda chi ndo tatu ñi vaha ñi ndo cuahán ndo chihin Nyoo. Saha ndo cuenda vatyí ra Cristo ñohó ra añima ndo tatu chinó vaha ñi ndo chi ra. Soco tatu ñima chihin cha ñi ñi ndo cuahán ndo chata Nyoo, ra Cristo ña nyaá ra chihin ndo. ⁶ Soco chitó vahi tyi coo quivi cunacoto ndo tyi vaha cuhva tyinyee ndi chi ndo tacuhva cuví cuhun vaha ndo chihin ra Cristo. ⁷ Ta chicán tahvi xaan ndi chi Nyoo chaha ndo, tacuhva vatyí ma sacuví ndo cha ña vaha. Ñima cha cuñi ndi tyi catyí ñáyivi tyi vaha ndi. Soco cha cuñi ndi vatyí nyoho sacuví ndo maa maa ri cha vaha. Ñahri saha vasi catyí ñáyivi, an vaha, an ña vaha cuhva cha sacuví ndi. ⁸ Vatyí nyaá siqui ndi cha sacuví ndi cha vaha. Ma cuvi tixehe ndi tuhun ndicha. Noo ri cha cuví sacuví ndi, cha sañahá ndi tuhun ndicha. ⁹ Yucuan chaha cusii xaan cuñi ndi cha ñahri fuerza maa ndi iyó chi ndi, ta cuhva tyi nyee cuñi ndo chihin fuerza maa Nyoo. Ta tyicuan ri chicán tahvi ndi chaha ndo

na vaha ca cuhun ndo chihin Nyoo nyacua nya cha ñahri ca cumañi chi ndo. ¹⁰ Sacuhín carta ihya chi ndo cha ni ri ca cha cumañi quichi nu nyicú ndo. Vatyí sanduvaha ndo chi ndo. Tyicuan ta ma cuñi ca chi cha cahín chi ndo quivi chai nu nyicu ndo. Vatyí ndicha cha chahá Nyoo ityi chii cha sahi cuenda chi ndo. Soco chahá ra tyiño ihya chii vatyí sandunyeé que iñi ndo. Ta ñima cha sanducuihyá ndihi que iñi ndo.

¹¹ Ta nu ndihi cahín, yañi, catyí chi ndo, na nducu ndo cuhva nicoo vaha ndo ta siñ cuñi ndo. Nanducu ndo cuhva coo cuñi ndo nuu Nyoo cha ñahri cumañi chi ndo. Na cunñi iñi ndo, na coo vaha ndo chihin tahan ndo. Ta Nyoo ra cuñi xaan chi ndo, ta ra chahá cha taxi coo ñima ndo na cunyaa ra chihin ndo. ¹² Ta nacuhva maa ndo nocumi chi noo noo tahan ndo chihin cha siñ cuñi ndo nyehé ndo chi ñu. ¹³ Ta vachí nocumi chi ndo sahá tandihi ñu yihí cuenda Nyoo ñuu ihya.

¹⁴ Nacuhva Sutu Mañi yo Jesucristo cha vaha coo ñima ndo. Ta nacoto ndo tyi Nyoo cuñi xaan ra chi ndo. Ta na cunyaa Tatyí Ii ra chihin ndo. Ta nacuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ityi Galacia Cha Yihí Cuenda Nyoo

Ra Pablo tyaá ra noo carta chi ñu ityi Galacia cha yihí cuenda Nyoo

¹ Yuhu ra Pablo cuví noo apóstol. Soco ñima ñáyivi tachí chii. Ta ñima rayi catyi vatyi ñihí yuhu tyiño ihya. Soco maa ra Jesucristo ta maa Nyoo Sutu yo chaha ra tyiño ihya chii. Vatyi ícan Nyoo sanandoto chi ra Cristo mahñu ñu chihí. ² Yuhu ta tandihí yañi yo cha nyicú chihin, tyaá ndi carta ihya chi nyoho ñu yihí cuenda Nyoo tandihí vehe ñuhu Galacia. ³ Nyoo Sutu yo ta Sutu Mañi yo Jesucristo nasoco ra chi ndo ta nacuhva ra cha taxi ri coo añima ndo. ⁴ Vatyi maa ra Jesucristo chaha ra ñáyivi ra tyiño nuu yo cha catyi cuatyi yo. Vatyi tacuhva sacacú ra chi yo mahñu ñu quiñi iyo cha iyó siqui ñuhu ñáyivi ihya vityin. Vatyi tyicuan caa tyaá maa Nyoo Sutu yo cuhva tyi sacuvi ra Cristo. ⁵ Yucuan chaha na sacahnu yo chi maa Nyoo tyicuan ri maa. Ta na cuvi chi tyicuan caa.

Ñahri ca inga cuhva cuví cacu añima yo

⁶ Iyo xaan cuñí vatyi nyoho numi xaan cuahan sandoó ndo chi Nyoo, ra nacana chi ndo tyi nicoo vaha ndo chihin ra cha cuenda tumañi iñi cha sahá ra Cristo chi yo. Ta vityin siin caa ityi natyihi ndo cuahan ndo. Ta cuñi maa ndo tyi cucacu ndo chihin cuan.

⁷ Soco ñahri ca inga cuhva cuví cacu añima yo. Soco iyó ra cuñi satondo xiñi ndo. Ta cuñi ra sativi ra tuhun cha sacacu ra Cristo chi yo. ⁸ Ñahri saha, an cuví ri nyuhu, an cuví ri noo ángel cha quichi nya andivi, soco tatu tyehe ta cahán noo ndi tuhun ra Cristo nuu ndo, ta siin caa, ta ñima tari cuhva sañaha ndi chi ndo quivi cuan, Nyoo cutachi tuñi ra chi ndi. ⁹ Cha catyi tuhun ihya chi ndo quivi cuan soco cuacatyí tiqui inga chaha chi ndo vityin. Tatu yóo cha cahán tuhun cha cacú añima yo chihin ndo ta siin caa, ta ñima cuhva cha chiñi ndo quivi xihna ri, Nyoo cutachi tuñi ra chi ra cahán tyicuan caa.

¹⁰ Cha catyi tuhun ihya chi ndo, ñima cha nduquí cuhva savahi chii nuu ñáyivi. Soco nduquí cuhva savahi chii nuu Nyoo. Tyehe ta nduquí cuhva savahi chii nuu ñáyivi, ñima noo ra sacuvi tyiño nuu ra Cristo cuví.

Yoso caa cha nanduvi ra Pablo noo ra chicá tyiño Nyoo

¹¹ Soco cooto ndo tuhun ihya yañi, vatyi tuhun ra Cristo cha cahán yuhu, ñima tuhun cha ndichí xiñi ñáyivi cuví.

¹² Ñima ñáyivi sañaha chii.

Yori sañaha chii. Soco suri maa ra Cristo sacotó chii.

¹³ Vatyí nyoho chiñi ndo yoso caa chinyacuvi quivi cuan, quivi ñohi cuenda ñu Israel. Ta chitó ndo yoso caa cha xaan chica nyiquen chi ñu yihí cuenda Nyoo. Ta nduquj cuhva sativi cuhva chinó iñi ñu. ¹⁴ Ta ñohi cuenda ñu Israel, yuhu cuví ra cuahan ityi nuu ca ta ñima ca suhva ca ra tahin cha ñin ri cuiya ndi. Vatyí cuñi xaan que sacuvi yoso cuhva chinyacuvi maa sutu chahni ta ityi chata ca. ¹⁵ Soco nya ta ni cumañi caqui ta tyaá Nyoo cuhva tyi cusaha ra tumañi iñi chii. Ta nya cha chaa maa chi quivi cha tyaá ra cuhva, yucuan ta nacana ra chii. Vatyí cuñi xaan ra chii. ¹⁶ Ta tyicuan caa sacuvi ra vatyí cohon nui chi Sehe ra. Tacuhva vatyí cahin tuhun Sehe ra, ra Cristo, chihin ñáyivi cha ñima ñu Israel cuví, tacuhva cacu aña ñu. Ta quivi cha cuví tyehe caa, ña nduquj cuhva cha catyí ñáyivi chii ñáa cha tahán chi sacuvi. ¹⁷ Ta ni ña chahin nya Jerusalén nu canyicu ra apóstol, vasi cha chicha ca ra chihin tuhun Nyoo, vatyí maa ra cha naha cana Nyoo chi ra ta ñima ca yuhu. Soco chahin nya Arabia. Tyicuan ta cuanuhu tiqui inga chaha nya Damasco.

¹⁸ Cha yaha uñi cuiya tyicuan ta chahin nya Jerusalén, ta chicohon nui chi ra Pedro. Ta ndoj chihin ra chahun quivi. ¹⁹ Soco ña

nyehi chi inga apóstol. Noo ri ra Jacobo yañi Sutu Mañi yo nyehi. ²⁰ Ta chihin nuu Nyoo ta catyí chi ndo vatyí tuhun cha catyí chi ndo nu tutu ihya, cha ndicha cuví.

²¹ Cha yaha cha chahin Jerusalén ta chahin ityi Siria ta ityi Cilicia. ²² Soco ra yañi yo cha canyicu vehe ñuhu ra Cristo cha nyaa nicacahnu Judea, ña ñoho nuu maa ra chii. ²³ Tacuhva cha cachiñi ri ra cahan ñu tuhun, vatyí catyí ñu: “Ra cha chica nyicon chi yo quivi cuan, vityin cahan noo ra nuu ñáyivi na nachino iñi ñu chi ra Cristo. Ta quivi cuan cuñi ra sativi ra tuhun ra Cristo”, catyí ñu. ²⁴ Ta ra canyicu vehe ñuhu ra Cristo casacahnu ra chi Nyoo cha cuenda cha sacuvi Nyoo chihin tyicuan caa.

2

Ra nyisó tyiño vehe ñuhu Jerusalén, ndoó ra vaha cuhva sahá tyiño ra Pablo

¹ Cha yaha cha uchi cumi cuiya, chahin Jerusalén inga chaha chihin ra Bernabé. Ta chahan ra Tito chihin ndi. ² Chahin nyicuan vatyí maa Nyoo sañaha chii vatyí tahán chi cuhin Jerusalén. Ta nacatyí chi ñu yoso caa sañahí tuhun ra Cristo chi ñu cha ñima ñu Israel cuví. Quita siin chihin ra cha canyiso tyiño vehe ñuhu, ta chahí cuenda chi ra yoso caa tuhvé cahin chihin ñu. Coto ma candoo ra vaha ta cacatyí ra vatyí yuhu sahá tyiño caha ri mai. ³ Soco candoo ra vaha. Vatyí

ni ri chi ra Tito ta ña saniñi ra cha sacuvi ra costumbre circuncisión. Ta ra Tito ñima ra Israel cuví ra. ⁴ Ndicha vatyí quihvi xehe suhva ra cha catyí vatyí yañi yo cuví chi ra, soco ñima. Vatyí cuñí ra nyehe nyaa ra cuhva iyó yo. Vatyí libre iyó yo cha cuenda ra Cristo Jesús. Soco cuñí ra cuan tyi cunyaca ñaha tucu ley chahnu chí yo. ⁵ Soco ni noo cuhva ta ña chaha ndi cha cunyaca ñaha ra cuan chí ndi. Vatyí cuñí ndi vatyí nyoho ma saña ndo cha ndicha tuhun ra Cristo cha cacu añima yo.

⁶ Soco maa ra canyisó tyiño vehe ñuhu, ñahri tuhun chaa chaha ra chii. Ta vasi cahnu tyiño canyisó ra cuan, soco cha cuenda chí yuhu, ñahri saha. Vatyí Nyoo ña sahá ra cuenda cuhva tyiño nyisó yo. Soco añima yo sahá ra cuenda. ⁷ Cha nuu cha catyí ra canyiso tyiño vehe ñuhu cuan chí ñáá ndihi tuhun, maa ra canacoto ra vatyí maa Nyoo tachí chí vatyí cahín tuhun ra Cristo chihin ñu cha ñima ñu Israel cuví. Tari tachí ra chí ra Pedro vatyí cucahan ra suri tuhun ra Cristo cuan chihin ñu Israel. ⁸ Vatyí suri maa Nyoo tachí chí ra Pedro tyi cuví ra apóstol cuenda ñu Israel. Ta tachí tucu ra chí yuhu tyi cuví apóstol ra Cristo cuenda ñu cha ñima ñu Israel cuví.

⁹ Yucuan chaha ra Jacobo, ra Pedro ta ra Juan ra cacuví nuu yucuan, nicohón nuu ra vatyí Nyoo chahá ra tunyee iñi chí cha cahín tuhun ra Cristo chihin ñáyivi. Ta

chaha ra ndaha ra chí, ta chí ra Bernabé vatyí candoq ra vaha cha sahatyiño ndi mahñu ñu cha ñima ñu Israel cuví. Ta maa ra casahatyíño ra mahñu ñu Israel. ¹⁰ Noo ri vatyí catyí ra chí ndi vatyí na nicohon iñi ndi ta natyinyee ndi chí ñu ndahvi. Ta ican cuví cha nanducú xain cuhva sacuví tandihi quivi.

Ra Pablo cahan ra chí ra Pedro vatyí ña vaha cha nyacuví ra

¹¹ Soco quivi chahan ra Pedro ñuu Antioquía, cahan vavahi chí ra chihin nuu ra vatyí ña vaha cha nyacuví ra. ¹² Vatyí cha xihna ri vaha sacuví ra vatyí chachí ra chihin ñu cha ñima ñu Israel cuví, nyacua nya cha chaa suhva ñáyivi Israel cha tachí ra Jacobo. Tyicuan ta quichaha ña chachí ca ra chihin ñu. Tyicuan caa sacuví ra vatyí yuhví ra coto cahan ra itá iñi costumbre circuncisión cha chaa coyo cuan chí ra. ¹³ Tyicuan ta inga ra Israel cha yihí cuenda ra Cristo ndu ñin ri ra chihin ra Pedro. Ta sacuví ra cha ña vaha cuan. Vatyí ndu uvi yuhu ra tari ndu uvi yuhu ra Pedro. Ta nyacua nya ra Bernabé ta ndutahan ra chihin ra. ¹⁴ Soco nyehí vatyí ña vaha cuahán nyacuví ra. Ñima tari cuhva catyí tuhun ra Cristo. Yucuan chaha catyí chí ra Pedro chihin nuu tandihi ñu canyicu cuan: “Yoho cuvún noo ra Israel. Ta iyón tari iyó ñáyivi cha ñima ñu Israel cuví. ¿Yoso caa cha cuñún saniñun chí ñu

tyi sacuvi ñu costumbre cha sacuvi ñu Israel? Ta ni maun ta ña sacuví con”, catyi yuhu chi ra.

¹⁵ Maa yo cha cuví yo ra Israel nya ta cacu yo, ña sacuví yo cuatyí tari sacuví ñu cha ñima ñu Israel cuví. ¹⁶ Soco chitó yo vatyí ma cuví savaha yo chi yo nuu Nyoo chihin cha nanducú yo kuhva sacuvi yo ley chahnu cha tyaa ra Moisés. Soco nduvahá yo nuu Nyoo cha cuenda cha chinó ri ñi yo chi ra Jesucristo. Yucuan chaha chinó tucu ñi maa yo chi ra. Vatyí tyicuan caa ta nicoo vaha yo chihin Nyoo. Ta ñima cha cuenda cha nducú yo kuhva sacuvi yo cha catyí ley. Vatyí ni noo yo ta ña nduvahá yo nuu Nyoo chihin cha nanducú yo kuhva sacuvi yo kuhva catyí ley chahnu.

¹⁷ Soco vityin tatu nducú yo kuhva nduvaha yo nuu Nyoo cha cuenda ra Cristo, cuñí chi catyí vatyí nacoto yo tyi iyó tucu cuatyí yo tari iyó cuatyí ñu cha ñima ñu Israel cuví. Tatu tyicuan caa, ¿atu cuñí chi catyí vatyí ra Cristo sacuví ra tyi iyó cuatyí yo vatyí sandoo yo ley ta nachino ñi yo chi ra? Ñima. ¹⁸ Soco tyehe ta naquehen tucu yo ley cha cha yaha sandoo yo, yucuan ndicha coo cuatyí yo. ¹⁹ Vatyí ley cuan sañahá chi chii vatyí tahán chi cúvi, ta yucuan chaha sandihí tuhun cha nduqui kuhva caqui chihin ley cuan, ta chihí cha cuenda chi cuví cuan, tachva cuvi coi cha cuenda

Nyoo. ²⁰ Yuhu, tari cha chihí nuu cruzi ñn ri chihin ra Cristo. Ta ñima ca ñayiví mai iyé soco ra Cristo iyó ra añime. Ta ñayiví ra cha iyé vityin, iyé soco chihin cha chinó ñi chi ra cha cuví ra Sehe Nyoo. Ican ra cuñí ra chii, ta chihí ra cha catyí cuatyí yuhu. ²¹ Ña cuñí yuhu sacuachiye cha vaha Nyoo. Vatyí tatu tyehe ta cuví cacu añima yo cha cuenda ley, ñahri tuhun chihí ra Cristo cuví chi cuan.

3

Naquehén yo Tatyí Ii Nyoo cha cuenda cha chinó ñi yo chi ra Cristo

¹ ¡Ñana cha tondo iyó nyoho ñu canyicu Galacia chiña! ¿Yóo cha sativí chi ndo vatyí ña cuñí ca ndo quichaha ndo tuhun cha ndicha? Cachi xaan chaha ndi cuenda tuhun ra Jesucristo chi ndo. Ta cutuñi vaha ñi ndo ñáa cuenda chihí ra nu cruzi. ² Noo ri cuñí ndaca tuhun chi ndo. ¿Atu naquehen ndo Tatyí Ii Nyoo cha cuenda cha sacuví ndo cha catyí ley ra Moisés, o cha cuenda cha chinó ñi ndo tuhun ra Cristo cha chiñi ndo? ³ ¿Yoso caa cha tondo xaan iyó ndo vityin? Ta quiví xihna ri vaha xaan quichaha ndo chi Nyoo chihin tunyee ñi Tatyí Ii ra. Soco vityin, ¿yoso caa cuñí ndo coo ndo ñayiví chaa chihin fuerza maa ndo? ⁴ ¿Atu cha caha ri nyehé ndo cha sacuví Tatyí Ii Nyoo chihin ndo? Ñima cha caha ri cuví, cahví ñi.

⁵ ¿Ñáá tuhun chahá Nyoo Tatyí li ra chi ndo, ta sacuví ra milagru mahñu ndo? Ñima cha cuenda vatyí nducú ndo cuhva sacuví ndo cha catyí ley, soco cha cuenda vatyí chinó iñi ndo tuhun ra Cristo cha chiñí ndo.

⁶ Ra Abraham, chingo iñi ra tuhun cahan Nyoo chihin ra, yucuan chaha cuví ra noo ra vaha nuu Nyoo. ⁷ Yucuan chaha tahán chi coto ndo vatyí ñu cha ndicha cuví ñáyiví chi ra Abraham, ican ñu cuan chinó iñi ñu chi Nyoo. ⁸ Ta cha naha ndoo tuhun Nyoo nu tutu. Ta catyí chi vatyí nu cuahán ca chi quívi, cusacuví Nyoo tyi nduvaha ñáyiví cha ñima ñu Israel cuví nuu ra cha cuenda cha chinó iñi ñu chi ra. Yucuan chaha catyí Nyoo chi ra Abraham ta cha naha: “Tandihí ri maa ñu cunasoque cha cuenda maun”, catyí Nyoo chi ra. ⁹ Yucuan chaha ñu cha chinó iñi chi ra Cristo, Nyoo nasocó ra chi ñu in ri chihin ra Abraham, vatyí chinó iñi tucu maa ra.

¹⁰ Ñu cha itá iñi ley cha tyaa ra Moisés, cutachi tuñi Nyoo chi ñu. Vatyí tuhun Nyoo catyí. “Tandihí ñu cha ña sacuví tandihí cuii maa tuhun cha nyaá nu libru ley cuan, cutachi tuñi Nyoo chi ñu.” ¹¹ Ta ndicha vatyí yori yo nduvaha yo nuu Nyoo cha cuenda cha itá iñi yo ley cuan. Vatyí tuhun Nyoo catyí chi: “Ra nduvahá nuu Nyoo cha cuenda cha chinó iñi ra, coo ra ñáyiví”, catyí tuhun Nyoo. ¹² Ta ley ra Moisés ña cu in ri

chi chihin cha chinó iñi yo chi ra Cristo. Vatyí catyí ley cuan: “Yóo ñu cha sacuví tandihí cuii ley ihya, coo ñu ñáyiví cha cuenda cuan”, catyí chi.

¹³ Ra Cristo natava ra chi yo ndaha ley cha catyí tyi tahán chi cutuñi chi yo cha cuenda cuatyí yo. Vatyí maa ra nanduvi ra noo ra iyó cuatyí tyiño nuu yo. Vatyí catyí tuhun Nyoo: “Ñima ra vaha cuví ra cha chihí ta tacaá nu yutun.” ¹⁴ Tyicuan caa cuví tacuhva vatyí cha cuenda ra Cristo Jesús ta nasocó Nyoo chi ñáyiví cha ñima ñu Israel cuví, tari catyí ra chi ra Abraham tyi cunasoco ra chi ra. Ta chihin cha chinó iñi yo chi Nyoo, naquehén tandihí yo Tatyí li cha catyí Nyoo tyi cuhva ra chi yo.

Ley chahnu sañahá chi chi yo vatyí iyó cuatyí yo, soco ña sacacú chi chi yo

¹⁵ Yañi, cuacuhve noo cuhva chi ndo, cuhva iyó yo síqui ñuhu ñáyiví ihya. Tatu noo ra catyí ra vatyí cucuhva ra cha cucuhva ra chi inga ra. Ta tatu cha yaha tyihí ra firma, yori cuví satani. Ta yori cuví natyiso suhva ca síqui. ¹⁶ Ta vityin, Nyoo catyí ra tyi cucuhva ra cha cucuhva ra chi ra Abraham ta chi nonga ra cha vachi tata ra. Ña catyí nu tutu Nyoo vatyí cuhva ra chi cuaha ra vachi tata ra, soco chi nonga ri ra. Ta ican ra cuan cuví ra Cristo. ¹⁷ Cha catyí yuhu, ican cuví ihya: Nyoo natyihí tahan ra tuhun chihin ra Abraham. Ta in ri tuhun

cahán ra. Tyicuan ta yaha cumi ciento oco uchi cuiya ta chaá ley cha tyaa ra Moisés. Soco ma cuvi casi ley cuan nu natyihí tahan Nyoo tuhun chihin ra Abraham. Ta ma cuvi casi chi nu naquehen yo cha catyí Nyoo tyi cuhva ra chi yo. ¹⁸ Tyehe ta naquehén yo cha tahán chi chi yo cha cuenda ley ra Moisés, cha caha ri cuvi tuhun natyihí tahan Nyoo chihin yo. Soco vatyí Nyoo catyí ra chi maa ra Abraham vatyí cuhva maa ra chi ra.

¹⁹ Tatu tyicuan caa, ¿ñáá cuenda vaha ley ra Moisés? Chahá Nyoo ley cuan soco cha yahá catyí ra tyi cuhva ra cha cucuhva ra chi yo. Vatyí ley cuan sanatuví chi cuatyí yo. Ta ndoo chi nyacua nya quívi quichí ra Cristo ra cuví tata ra Abraham. Ta chi maa ra Cristo catyí Nyoo tyi cuhva ra cha cucuhva ra. Ta ángel Nyoo chahá cuenda ley cuan chi ra Moisés. Ta ra Moisés chahá ra chi ñáyívi. ²⁰ Soco Nyoo noo tuhun ri maa ra cahán ra chihin ra Abraham quívi cuan. Ta ña chiñuhú cha nducu ra noo ra nacatyí tuhun cuan chi ra Abraham.

²¹ ¿Atu cuñí chi catyí vatyí ley cha tyaa ra Moisés ña chachí tahan chihin cha catyí Nyoo tyi cuhva ra chi yo? Ñima. Soco tyehe ta cuví coo yo ñayívi chaa cha cuenda ley cuan, yucuan ndicha nduvaha yo nuu Nyoo cha cuenda chi. Soco ma cuvi. ²² Vatyí catyí nu tutu Nyoo tyi iyó cuatyí tandihí cuií ñáyívi.

Vatyí tyicuan caa ta ñu chinó iñi chi ra Jesucristo cuví ñihi ñu ñayívi chaa cha catyí Nyoo tyi cuhva ra chi yo.

²³ Ta ni cumañi ca quichi tuhun cha chinó iñi yo chi ra Cristo, ley cuan chicumí chi chi yo tari cha ñohó yo vehe caa. Vatyí nyatú yo nyacua nya sañaha Nyoo chi yo yoso caa chino iñi yo chi ra. ²⁴ Ta ley cuan cuví tari noo ñu cha sahá cumi chi ra cuatyaa. Vatyí ley sahá cumi chi yo tari ra cuatyaa nyacua nya quívi quichí ra Cristo. Ta cuví chinó iñi yo chi ra ta nduvaha yo nuu Nyoo. ²⁵ Ta vityin cha chaá quívi cha chinó iñi yo chi ra Cristo, ña sahá cumi ca ley cuan chi yo tari noo ra cuatyaa.

²⁶ Vatyí tandihí yo cuví yo sehe Nyoo vatyí chinó iñi yo chi ra Cristo Jesús. ²⁷ Ta tandihí yo condutyá yo ta ndu ñin yo chihin ra Cristo. Vatyí nyaá ra añima yo. ²⁸ Ña niñi xaan ca cha cuví yo, an ñu Israel, an ñu Grecia, an cuví ri yo ñu libre iyó, an cuví yo ñu iyó chitoho. An cuví yo rayí, an cuví yo ñusihí, soco ña chiñuhu ca cuan. Vatyí cha ñin ri cuvi yo chihin ra Cristo, noo ri cuví yo chihin ra. ²⁹ Ta tatu cuenda ra Cristo yihí ndo, ndicha cha ñáyívi vachi tata ra Abraham cuví ndo. Ta ñihí ndo cha catyí Nyoo chi ra Abraham tyi cuhva ra chi ra.

4

¹ Cuacuhve minoo cuhva chi ndo. Noo ra cuehe tatu chihí sutu cue, ta sandoq sutu

cue tandihí cha tyayí ra chí cue, ra cuehe ihya ma cuví cotyíño ñaha cue cha tyayí sutu cue. Nyacua nya quívi cuahnu cue ta cuví cotyíño cue. Ta cha ní ri ca cha ta cuahnu ca cue, cuví cue tari noo musuri. Vasi chí maa cue cuví tandihí cha tyayí sutu cue. ² Iyó ra cumí chí cue nyacua nya chaa cuiya cue cha catyí sutu cue, tyi naquehen cue cha tyayí cuan. ³ Ta tyicuan caa cuví maa yo. Cha ní ri ca cha ta quichí ca ra Cristo, cuví yo tari noo musuri chí cha nyacá ñaha síqui ñuhu ñayívi. ⁴ Soco quívi tahan chí, Nyoo tachí ra chí Sehe ra, sacacú noo ñaha síhí chí ra. Ta chínyacá ñaha ley chahnu chí ra. ⁵ Tachí Nyoo chí ra tacuhva sacacú ra chí yo ndaha ley cuan. Vatyí tyicuan caa ta Nyoo naquehén cuenda ra chí yo tari sehe ra.

⁶ Ta vatyí sehe ra nanduví yo, Nyoo tachí ra Tatyí lí ra Cristo cunyaa añima yo. Ta cha cuenda Tatyí lí ra caná chaa yo chí Nyoo ta catyí yo: “Sutu Mañi yuhu.” ⁷ Yucuan chaha sehe Nyoo cuvun ta ñima ca noo musuri. Ta cha cuenda cha cuvún sehe Nyoo, chahá ra cha vaha cha tahán chí chuun cha cuenda ra Cristo.

Chicá xiñi ra Pablo cha cuenda ñu yihí cuenda Nyoo

⁸ Quívi ta cohon nuu ca ndo chí Nyoo, cuví ndo musu noo cha ñima Nyoo cuví. ⁹ Soco vityin ñohó nuu ndo Nyoo, o maa Nyoo ñohó nuu ra chí ndo. ¿Yoso caa cha cuñí ndo

natíin tucu ndo noo tuhun ndahví cha ñima ri tuhun, ta nanduví tucu ndo musu inga chaha? ¹⁰ Nyoho sanducahnú ndo quívi vico, quívi natyacú yoo, ta vico cuiya. ¹¹ Yuhví xain coto vaha ñahri maa tuhun sahá tyíñe chihin ndo.

¹² Yañi, chacú ndahví nuu ndo na nanduví ndo tari mai (cha ña nyacá ñaha ca ley chí). Vatyí yuhu cha nanduví tari maa ndo, soco ñima cha satívi ndo chí. ¹³ Vatyí cha chitó ndo quívi chahan nui ñuu ndo yihí noo cuehe chí. Ta chaha chí cuhva cahin tuhun ra Cristo chihin ndo. ¹⁴ Ta cuehe cuan cuví tari noo prueba cha cuenda vatyí ña tyaa xiin ndo chí. Soco vaha naquehen cuenda ndo chí, tari noo ángel Nyoo, ta tari cha vatyí suri maa ra Cristo cuví. ¹⁵ ¿Nya nyaa cha síi xaan cuví chí ndo chihin vityin? Vatyí yuhu cuví cha ndaa vatyí quívi cuan, nyacua caña íñi ndo catava ndo chíi nuu ndo ta cuhva ndo chí, tyehe ta cuví nduvahi chihin cuan. ¹⁶ Ta vityin, ¿atu cuñí maa ndo tyi nanduví yuhu noo ra cha xaan cahnu íñi ndo cha cuenda vatyí catyí cha ndicha chí ndo?

¹⁷ Ñáyívi cuan, cuñí xaan ñu chí ndo, catyí ñu. Soco ñima chihin cha vaha. Vatyí cha cuñí ñu cuan, cha sacanyaha ñu chí ndo chí ndi. Ta cunyicon ndo chí maa ñu. ¹⁸ Soco vaha cha cuñí yo chí ñáyívi, soco chihin cha vaha, ta tyicuan ri maa. Ta ñima íñ yaha ri cuhva cha

nyaa ri yuhu chihin ndo. ¹⁹ Sehe luhli, inga chaha nyehí tindoho ta cha uhvi cha catyi ndo. Tari noo sihi cha yihí cha uhvi chi ña tatu cuacacu sehe ña. Ta cunyehe que tindoho nyacua nya ndunye vaha ndo chihin fuerza maa ra Cristo. ²⁰ Vaha tyehe ta nyaí chihin ndo vityin vityin. Tacuhva cuví cahan vii chihin ndo inga cuhva. Vatyí ña chité yoso caa caca xiñi cha cuenda ndo.

Nacoo yo cha cuenda Nyoo ta ñima ca cha cuenda ley chahnu

²¹ Nyoho cha cuñí ndo cha cunyaca ñaha ley ra Moisés chi ndo, catyi ndo chii. ¿Atu ta cuiñi ca ndo cha catyí ley cuan? ²² Catyí chi vatyí ra Abraham chiyo uvi tahan sehe ra. Noo sehe ra chiyo chihin ñaha cha cuví musu ñasihi ra. (Chinañi ña Agar.) Ta nonga sehe ra chiyo chihin cu Sara cha cuví ñasihi vaha ra. ²³ Cacū sehe ñaha cha cuví musu cuan tari cacú tandihi ra cuatyaa. Soco sehe ñasihi vaha ra Abraham cacū cue tacuhva chino cava cha catyí Nyoo chi ra Abraham vatyí cuhva ra noo sehe chi ñasihi ra. ²⁴ Ta chihin ihya iyó noo cha cuñi chi catyí chi chi yo. Ninduvi ñusihí cuan cuví ñu tari uvi tahan tuhun cha natyihí tahan Nyoo chihin yo. Noo tuhun cuan cuenda yucu Sinaí. Ta ñáyivi yihí cuenda ley cuan cuví ñu tari cu Agar, vatyí noo musu ri cuví tucu maa ña chihin sehe ña. ²⁵ Tari cu Agar, ta tari yucu Sinaí

cha nyaá Arabia, tyicuan caa tucu ñuu Jerusalén quivi vityin. Vatyí ñáyivi ñuu cuan nyaá ñu ndaha ley chahnu. Tari noo musu ley cuan cuví ñu. ²⁶ Soco nya andivi iyó inga Jerusalén, cha cuví ñuu yo. Ta yori nyacá naha chi chi. Ta cuví chi tari sihi yo. ²⁷ Ta catyi tuhun Nyoo:

Cūsi iñi yoho, ñaha sihi cha ña cuví coo sehe.

Yoho yori sehun.

Çana chaa chihin cha sii cuñun, yoho cha ña ñoho nuu cha uhvi cha cacū sehe.

Vatyí ñaha sihi cha sanando yí chi, coo ca sehe ña ta ñima ca ñusihí cha iyó yí, catyí tuhun Nyoo.

²⁸ Yañi, yoó cuví yo tari ra Isaac, ra cuví sehe cu Sara. Cuví yo sehe ra Abraham cuenda tuhun cha natyihí tahan Nyoo chihin ra. ²⁹ Ta ra cha cuví sehe ñaha cha cuví musu cuan xaan iñi ra chi ra Isaac cha cuví sehe ñasihi vaha ra Abraham. Tyicuan caa cuví tucu vityin. Ra cha cuñí vatyí sacuví yo cha catyí ley, xaan iñi ra ta chicán nyicon ra chi yo cha cuví yo ñáyivi nacacū chaa chihin Tatyí Ii Nyoo. ³⁰ Soco ¿ñáá cha catyí tuhun Nyoo? Catyí chi: “Tava ñehe chi ñaha cha cuví musu cuan chihin sehe ña. Vatyí sehe ña ma cuví naquehen cue cha tahán chi chi sehe ñasihi vaha ra Abraham”, catyí tuhun Nyoo. ³¹ Yucuan chaha, yañi, ñima tari sehe ñaha cha cuví musu cuan cuví yo. Soco cuví

yo tari sehe ñasihi vaha ra Abraham.

5

Ñihi cuinanyaa yo chihin cha ña nyacá ñaha ca ley chi yo

¹ Ra Cristo sacacu ra chi yo ndaha ley chahnu cuan. Yucuan chaha saha ndo cuenda coto nanduvi ndo musu inga chaha cuenda ley.

² Tyasoho ndo, yuhu ra Pablo catyi chi ndo. Tatu cuhva ndo cha saha ñu circuncidar chi ndo, ta cuñi maa ndo tyi cucacu ndo chihin cuan, ma cuvi tyinyee ra Cristo chi ndo. ³ Cuñi catyi inga chaha chi ndo vatyí tandihi ra cha cuñi cacu chihin cha saha ñu circuncidar chi ra, cuñi chi vatyí sacuvi ra tandihi cuii cha catyí ley ra Moisés ñandihí. ⁴ Tandihí nyoho cha nducú ndo nduvahá ndo nuu Nyoo cha cuenda ley cuan, cha sañá tahan ndo chihin ra Cristo cuví cuan. Ta sañá ndaha ndo tumañi ñi cha chahá Nyoo chi ndo.

⁵ Soco yoó chihin cha tyinyee Tatyí Ii Nyoo chi yo ta chinó ñi yo chi ra Cristo. Ta itá ñi yo nduvahá yo nuu Nyoo.

⁶ Vatyí tatu ñn ri cuví yo chihin ra Cristo Jesús, ñahri tuhun cha sacuvi yo costumbre circuncisión, o cha ña sacuvi yo. Cha vale ca tatu chinó ñi yo chi ra Cristo. Ta chihin cha chinó ñi yo coo yo, chihin cha cuñi yo chi noo noo tahan yo.

⁷ Nyoho vaha cuahán ndo quivi cuan. ¿Yóó cha sativi chi ndo? Ta ña tyasohó ca ndo cha ndicha. ⁸ Tuhun cha

sañahá ñu cuan, ñima tuhun Nyoo ra nacana chi yo cuví. ⁹ Vatyí tari nandaá yuchan pan chihin chiin ri yuchan iya, tyicuan caa tucu noo ri ñáyivi quiñi caa cuví sativi ñu chi cuaha ñáyivi. ¹⁰ Nyoo cutachi tuñi ra chi ñáyivi cha sativi chi ndo. Ñahri cuenda ra yóó ñu cuví ñu. Soco yuhu chitó vahi tyi Sutu Mañi yo cutyinyee ra chi ndo tacuhva vatyí nyoho ma caca xiñi ndo inga cuhva cha ña sañahí chi ndo.

¹¹ Ta cha cuenda chi yuhu, yañi, tyehe ta catyí vatyí ñu chinó ini chi ra Cristo cuñi chi cha sacuvi ñu costumbre circuncisión, ra Israel ma caca nyicon ra chii. Ta ma cuquiñi ca cuñi ra chihin tuhun ra Cristo cha chihí nu cruzi cha catyi cuatyí yo. ¹² Soco ra sayangá chi ndo chiña, vaha cha quita ra nu nyicu ndo, tacuhva cha ma sayanga ca ra chi ndo.

¹³ Vatyí nyoho, yañi, nacana Nyoo chi ndo vatyí coo ndo libre. Soco ñima cha cuenda cha iyó ndo libre ta cuví sacuvi ndo ñáá ndihí cha cuñi çoño ñuhu ndo. Soco sacuvi ndo tyiño nuu tahan ndo chihin cha cuñi ndo chi ñu. ¹⁴ Vatyí iyó noo tuhun Nyoo cha catyí chi: “Cuñi ndo chi tahan ndo tari cuñi ndo chi maa ndo”, catyí chi. Ta tatu ndicha ndicha cha cuñi yo chi tahan yo, ña yí sacuvi yo tandihí cha catyí ley chahnu. ¹⁵ Saha ndo cuenda vatyí tatu cahán ndo ta sataší ñi ndo chi tahan ndo, cutivi nu nyicu ndo.

Cuhva cuñi coño ñuhu yo ta cuhva iyó yo chihin Tatyí Ii Nyoo

¹⁶ Cha cuñi catyi chi ndo ican cuvi ihya: Coo ndo chihin tunyee iñi Tatyí Ii Nyoo. Tyicuan caa ta ma cuvi ca sacuví ndo cuhva ña vaha cuñi ndo. ¹⁷ Vatyí cha sacuví yo cha ña vaha cha cuñi yo, ñima cuhva cuñi Tatyí Ii Nyoo cuví. Vatyí Tatyí Ii Nyoo ña cuñi chi cha sacuví yo cha ña vaha. Ta coño ñuhu yo ña cuñi chi sacuví chi cuhva cuñi Tatyí Ii Nyoo. Ña nacachí tahan cha cuñi Tatyí Ii Nyoo chihin cha cuñi coño ñuhu yo. Ta yucuan chaha ma cuvi sacuvi yo cha cuñi yo. ¹⁸ Soco tatu sacuví yo cha catyí Tatyí Ii Nyoo chí yo, ma cuvi ca cunyaca ñaha ley chi yo.

¹⁹ Ña xehe caa ñu sacuví cuhva ña vaha cha cuñi coño ñuhu. Yihí ra, iyó ñasihi ra ta iyó inga ñu chi ra. Ta yihí ñu iyó yí ñu ta iyó inga ra chí ñu. Ta yihí ñu sacuví ñu cha ña vaha chihin coño ñuhu ñu ta iyó viciu chí ñu. ²⁰ Yihí ñu sacahnú ñu xitohyo. Yihí ñu satasí ñu. Yihí ñu tasi cuñi nyehe ñu chí tahan ñu. Yihí ñu cañi tahan ñu. Yihí ñu cuiñó ñu. Ta yihí ñu yatyin iñi ñu. Yihí ñu chicá xiñi ñu maa maa ri cha vaha chí maa ñu. Ta yihí ñu iyó división nu nyicu ñu. Vatyí cacañi tahan ñu. Ta tyicuan caa ta cusín ñu. ²¹ Ta yihí ñu nyiyó iñi ñu cha tyayí. Ta yihí ñu cachahñi chí tahan ñu. Ta yihí ñu tuhva ñu chiñi. Ta yihí ñu

chachí cuahyi ñu. Ta sacuví ñu cuaha ca cha sacuví ñu. Ta catyí chí ndo tari catyí chí ndo quivi cuan. Vatyí tandihí ñu cha sacuví tyehe caa ma cuvi naquehen cuenda ñu nu nyacá ñaha Nyoo.

²² Soco cha chahá Tatyí Ii Nyoo, ican cuvi ihya: cha cuñi yo chí Nyoo ta chí tahan yo, cha sñi cuñi yo, cha taxi cuñi ña yivi, cha masu iñi yo, cha vaha ña yivi cuvi yo, cha ña cundihñi yo sacuví yo cha vaha chihin ña yivi, cha chinó iñi yo chí ra Cristo. ²³ Ta inga cha chahá Tatyí Ii Nyoo chí yo, ican cuvi ihya: cha ndahvi sahá yo chí yo, cha ña sacuví yo cuhva cuñi coño ñuhu yo. Tatu sacuví yo tandihí cha vaha ihya, ni noo ley ta ma cuvi catyi chí tyi iyó cuatyí yo. ²⁴ Ta yoó cha yihí yo cuenda ra Cristo Jesús, cha sandihí yo tuhun cha sacuví yo cuhva ña vaha cha cuñi coño ñuhu yo. ²⁵ Ta tari cha iyó yo ña yivi chaa cha cuenda Tatyí Ii Nyoo, tyicuan caa cuñi tucu chí cha quichahá yo cha saquehen ityi ra chí yo.

²⁶ Ma cahnu saha yo chí yo. Ta ma sacañi tahan yo chí tahan yo. Ma quichi cuvi iñi yo cha chí inga tahan yo.

6

Tahán chí tyinyee yo chí tahan yo

¹ Yañi, tatu nanyehé yo sacuví noo tahan yo cuatyí. Nya yo cha ñihi nyaá yo

chihin Tatyí Ii Nyoo tyinyee yo chi ñu na ndunye ñu inga chaha. Soco cuñí chi cahán vii yo chihin ñu chihin cha vita iñi yo. Ta cuñí chi sahá yo cuenda chi yo coto nducu nyehe tucu cuihna chi maa yo. ² Na tyinyee yo chi tahan yo ñáá cha cuví chi ñu. Tatu tyicuan caa sacuví yo, quichahá vaha yo chi ra Cristo cuví cuan.

³ Tatu nya noo yo cuñí maa yo vatyí cahnu ñu cuví yo, ta ñahri ñu cuví yo, suri chi maa yo sandaví ñaha yo. ⁴ Ma saha yo tuhun tyi vaha yo tari vaha noo hermano cha vaha chicá chihin Nyoo. Nasaha xihna yo cuenda tatu vaha cha nyacuví yo. Tyicuan ta coto yo tatu vaha sacuví yo ta cusii cuñi yo. ⁵ Vatyí tahán chi cunye noo noo yo ñáá ndihi cha tyisó Nyoo síqui yo.

⁶ Ta cuñí chi tyinyeeé ndo chihin cha chiñuhú chi ra cha sañahá tuhun Nyoo chi ndo.

⁷ Ta ma sandavi ñaha ndo chi ndo. Nyoo yori cuví cuacu nyaa chi ra. Vatyí tandihi cha tachí ñáyivi, ican cuan cunaquehén ñu. Vatyí tatu sacuví ñu cha vaha, cha vaha naquehén ñu. Soco tatu sacuví ñu cha ña vaha, cha ña vaha cuñihi ñu. ⁸ Tatu noo ñáyivi nyacuví ñu cuhva ña vaha cha cuñí coño ñuhu ñu, suri maa cha sacuví ñu cusativí chi chi ñu. Soco tatu nyacuví ñu cuhva cuñí Tatyí Ii Nyoo, Tatyí Ii Nyoo cucuhva noo ñáyivi chaa cha ma naa ca maa tyi coo ñu. ⁹ Yucuan chaha ma cutatu yo cha sacuví yo cha vaha.

Vatyí tatu ma ndu uvi iñi yo, coo quivi ta naquehen yo cha vaha. ¹⁰ Yucuan chaha tahan ri chaha cha chahá chi cuhva, na sacuvi yo cha vaha chihin tandihi ri ñáyivi. Ta cha xihna cuii ri sacuvi yo cha vaha chihin ñu yihí cuenda Nyoo.

Cusii xaan cuñí ra Pablo vatyí nyehé ra tindoho cha cuenda ra Cristo

¹¹ Nyehe ndo ñana cha nahnu letra tyai chihin ndahi nu tutu ihya vityin. ¹² Ñu cha cuñí saniñí chi ndo vatyí sacuvi ndo costumbre circuncisión, saniñí ra chi ndo vatyí cuñí ra cuvaha ra nuu ñáyivi. Ña cuñí ra nyehe ra tindoho cha cuenda ra Cristo, ra chihí nu cruzi. ¹³ Vatyí ni maa ra cha sacuví ra costumbre circuncisión cuan ta ña quichahá ra tandihi cha catyí ley. Soco cuñí ra cha sacuvi nyoho costumbre cuan. Vatyí tyicuan caa ta cuví sacahnu ra chi ra vatyí sacuví ndo cuhva catyí ra. ¹⁴ Soco yuhu ña cuñí sacahni chii cha cuenda ñáá ndihi tuhun. Soco sii xaan cuñí cha chihí Sutu Mañi yo Jesucristo nu cruzi cha cuenda yuhu. Vatyí cha cuenda cha chihí ra nu cruzi, tari quivi cha yaha chihí cha quiñi caa cha iyó ñáyivi ihya. Ta cha yaha chihí tucu mai cha cuenda cuan. ¹⁵ Vatyí tatu nyicón yo chi ra Cristo Jesús, ña niñi xaan cha sacuví yo costumbre circuncisión o cha ña sacuví yo. Noo cha niñi ca, cha nanduví yo noo ñáyivi chaa. ¹⁶ Tandihi ndo cha iyó ndo

tyehe caa, naquehen ndo cha taxi ri coo añima ndo. Ta na cundahvi cuñi ra nyehe ra chi tandihí ndo, ñu cha ndicha cuví ndo ñáyiví cuenda ra.

¹⁷ Cha vityin ta nu cuahán chi ityi nuu ca, ni nonga ndo ta ma cuhva ca ndo tisihí chii. Vatyí tandihí pehla cha nyaá coño ñuhi, cuñí chi catyi vatyí ndicha cha cuví yuhu noo ra chicá tyiño Sutu Mañi yo Jesús.

¹⁸ Yañi, Sutu Mañi yo Jesucristo na nasoco chi tandihí ndo. Ta tyicuan caa na cuví chi.

Carta Cha Sacuhún Ra Apóstol Pāblo Chi Ñáyivi Ńuu Éfeso Cha Yihí Cuenda Nyoo

Nu sacuhún ra Pablo noo tutu chi ñu ñuu Éfeso cha yihí cuenda Nyoo

¹ Yuhu ra Pablo cuví noo apóstol ra Jesucristo. Vatyí yucuan cuhva cuñí maa Nyoo. Tyai noo carta ihya chi tandihí ndo cha yihí ndo cuenda Nyoo ñuu Éfeso chiña, ta níi ñi ndo chinó ñi ndo chí ra Cristo Jesús. Ta ñn ri cuví ndo chihin ra. ² Na nasoco Nyoo ta Sutu Mañi yo Jesucristo chi ndo. Ta nacuhva ra cha taxi ri coo añima ndo.

Cha ñn ri cuví yo chihin ra Cristo, Nyoo nasocó xaan ra chí yo

³ Na sacahnu yo chí Nyoo, ra cuví Sutu Sutu Mañi yo Jesucristo. Vatyí nasocó xaan ra chí yo chihin tandihí nuu cha vaha cha iyó andiví cha cuenda cha ñn ri cuví yo chihin ra Cristo. ⁴ Vatyí nyata ni cumañi ca savaha ra ñuhu ñayiví ta nacachí vaha ra chí yo tyí cu ñn ri yo chihin ra Cristo. Vatyí tyicuan caa cundundií yo nuu ra chihin cha ñahri ca cuatyí yo. Cha cuenda cha cuñí ra chí yo, ⁵ ta nyata cha naha ta tyaá ra

cuhva chí yo vatyí nanduvi sehe ra chí yo cha cuenda ra Jesucristo. Tyicuan caa sacuví ra vatyí yucuan cuhva cuñí maa ra. ⁶ Yucuan chaha tyicuan ri sacahnú yo chí ra. Vatyí vaha xaan ñáyivi cuví ra. Ta cahnu xaan tumañi ñi chahá ra chí yo. Vatyí sacu ñn ri ra chí yo chihin Sehe ra, ra cha cuñí xaan ra chí. ⁷ Ta cha cuenda cha cuñí xaan Nyoo chí yo, natava ra chí yo ndaha ra ña vaha, tacuhva cha ma cutuñi chí yo. Vatyí chihin cha chatí ñiñi Sehe ra, sandachí ra cuatyí yo. Ta tyicuan caa sahá Nyoo ticahnu ñi chí yo. ⁸ Ta vatyí cahnu xaan tumañi ñi sahá ra chí yo, chahá xaan ra cha chiñi tuñi ra chí yo. ⁹ Ta chahá ra cha cutuñi ñi yo tuhun ra cha ña chito ñáyivi. Vatyí sacotó ra chí yo yoso cuhva tyaá ra cuhva tyí sacuví ra chihin tandihí cha iyó cha cuenda ra Cristo. ¹⁰ Vatyí coo quiví cuchino cava cha tyaá ra cuhva tyí sacuví ra. Vatyí cusandu ñn ri ra tandihí cha iyó ihya ñayiví ta cha iyó andiví, ta tandihí cucunyaa ndaha ra Cristo. Vatyí maa ra cucunyaca ñaha ra tandihí.

¹¹ Cha cuenda ra Cristo ñihí tucu maa yo cha tahán chí chí yo. Vatyí Nyoo nyata cha naha nacachí ra chí yo tyí cu ñn ri yo chihin ra Cristo. Tyicuan caa tyaá Nyoo cuhva tyí cusacuví ra. Ta maa ra sacuví tandihí yoso cuhva nyehé maa ra tyí vaha. ¹² Ta tyehe caa sacuví ra tacuhva vatyí nyuhu cha nachino ñi

ndi chi ra Cristo cha xihna ri, coo ndi soco cha sacahnu ndi chi Nyoo cha cuenda cha cahnu cuví maa ra. ¹³ Ta tyicuan caa tucu nyoho. Vatyí quiví chiñi ndo tuhun Nyoo cha ndicha vaha, catyí ñu chi ndo tuhun ra Cristo yoso caa sacacú ra chi yo. Ta chino iñi ndo chi ra. Ta ndu ñn ri ndo chihin ra. Ta tari cha tyaá Nyoo tuñi ra chi ndo cuví cuan, vatyí chaha ra Tatyí li ra cohon añima ndo, tari cuhva catyí ra tyi sacuvi ra. ¹⁴ Ta ican maa Tatyí li cuví cha chaha quiví ri Nyoo chi yo tacuhva cuví naquehen ca yo cha cucuhva ra chi yo. Vatyí tyinyeé Tatyí li ra chi yo nyacua nya quiví ndihi sacacu ra chi yo, cha cuví yo ñáyiví chi ra. Ta tandihi ihya sacuví ra chihin yo tacuhva sacahnu yo chi ra. Vatyí maa ra cahnu ca ra cuví ra.

¹⁵⁻¹⁶ Yucuan chaha, cuhva cha chicán tahvi chi Nyoo, ña sandihí tuhun cha nacuhvé tyahvi nyoo chi ra cha cuenda ndo. Vatyí ñihí tuhun tyi chinó vaha iñi ndo chi Sutu Mañi yo Jesucristo. Ta cuñí xaan ndo chi tandihi ñu tahan yo ñu yihí cuenda Nyoo. ¹⁷ Chiquén chi Nyoo Sutu Sutu Mañi yo Jesucristo. Vatyí ican ra cuví ra cahnu ca. Ta chiquén chi ra nacuhva ra cha chiñi tuñi Tatyí li ra chi ndo, tacuhva cutuñi iñi ndo cha sañahá ra chi ndo. Vatyí cohon nuu vaha ca ndo chi ra. ¹⁸ Ta chiquén chi ra, na nuña ra cha chiñi tuñi xiñi ndo, na coto ndo ñáá cha cuñí ra cha naquehen ndo

cha cuenda cha cana ra chi ndo. Ta na coto ndo ñana cha tyaqui ta tyayíi cha chahá Nyoo chi yo ñu yihí cuenda ra. ¹⁹ Ta chiquén chi Nyoo tyi cuhva ra cha coto ndo ñana cha cahnu tunyee iñi iyó chi ra, nyacua ña cuví tyicuhva yo. Ta ican cuan tyinyeé chi yo cha chino iñi yo chi ra. Ta suri maa chihin tunyee iñi ihya ²⁰ Nyoo sanandoto ra chi ra Cristo. Ta cuatyaa ra chi ra chiyo vaha ra nya andiví. ²¹ Ta yucuan cuví nu sacahnu xaan ca Nyoo chi ra Cristo cha nuu tandihi ca cha nyacá ñaha siqui ñuhu ñayiví ihya ta andiví ñandihí. Cuví ri tandihi rey, o cuví ri ra cuví tyiño nahnu, o cuví ri ángel andiví. Soco yori yóó ca ra cahnu ñayiví ihya ta niri ñayiví cha cua coo. Vatyí noo tuhun ri maa ra Cristo cuví ra cahnu cuví. ²² Ta tandihi cuii maa chaha Nyoo tyi cunyaca ñaha ra Cristo. Ta suri chi maa ra chaha Nyoo vatyí cuví ra xiñi o nuu chi ñu yihí cuenda ra. ²³ Vatyí yoó, cha yihí yo cuenda ra, cuví yo coño ñuhu ra. Ta maa yo ta maa ra cuví chi noo coño ñuhu nani ra, Ta maa ra cuví ra sandunaníi tandihi.

2

Sacacú Nyoo chi yo cha cuenda cha cuñí ra chi yo

¹ Nyoo chaha ra noo ñayiví chaa chi ndo tyi coo ndo quiví ndu ñn ri ndo chihin ra Cristo, vasi nicaa ni iñi ndo cuatyí quiví cuan. Ta tari maa cha chihí añima

ndo tyi ñahri maa ñayiv̄i Nyoo chinyaā añima ndo. ² Ta chinyacuv̄i ndo cuhva nyacuv̄i ñáyiv̄i ña ñohó nuu Nyoo. Ta chinyicon ndo chi cuihna ra cuv̄i nuu. Ta ican ra cuv̄i tatyi ña vaha cha tyiyuhú chi ñu ña quichahá nu cahán Nyoo. ³ Ta suri tyicuan caa chiyo tucu yoó quiv̄i cuan. Vatyi chinyacuv̄i yo cha ña vaha cha quichi cuv̄i iñi yo cha cuñí coño ñuhu yo. Ta sacuv̄i yo yoso cuhva chicā xiñi yo. Ta cha cuenda tuhun cha chinyacuv̄i yo tahán chi tachi tuñi Nyoo chi yo inuu ri chihin tandih̄i ca ñu sacuv̄i cha ña vaha. ⁴ Soco Nyoo cundahv̄i xaan cuñi ra nyehe ra chi yo. Vatyi cuñí xaan ra chi yo. ⁵ Ta vasi cuaha xaan cuatyi yo quiv̄i cuan, tari quiv̄i cha chih̄i añima yo chihin cuatyi cuan, soco Nyoo chahā ra cha conyito añima yo noo ñayiv̄i chaa, vatyi sacu ñn ri ra chí yo chihin ra Cristo. Ta cha cuenda tumañi iñi cha saha Nyoo chi ndo ta cacū ndo. ⁶ Ta tari quiv̄i cha sanandotō Nyoo añima yo quiv̄i nandotō ra Cristo Jesús. Vatyi iyó yo noo ñayiv̄i chaa cha chahā maa Nyoo tyi coo yo. Ta tari quiv̄i cha cuatyaā ra chi yo andiv̄i. ⁷ Ta sacuv̄i Nyoo tyehe caa tacuhva vatyi nu cuahán ca chi quiv̄i cusañaha ra chí tandih̄i ñáyiv̄i yoso cuhva cha cahnu tumañi iñi chahā ra chí yo cha cuenda ra Cristo Jesús. Vatyi vaha xaan ñáyiv̄i cuv̄i ra chihin yo tyi sacu ñn ri ra chí yo

chihin ra Cristo. ⁸ Vatyi cha sacacú Nyoo chi yo cuv̄i chi noo cha chahá ra chi yo. Ta naquehén yo tumañi iñi cuan chihin cha chinó iñi yo chi ra. Ta cha sacacú Nyoo chi yo ñima noo cha cuv̄i sacuv̄i maa yo cuv̄i. Vatyi yucuan cuv̄i noo tumañi iñi cha sacuv̄i ra chihin yo. ⁹ Ñima cha cuenda cha sacuv̄i yo cha vaha ta cuita iñi yo cha sacacú cuan chi yo. Tyehe ta cuv̄i chi tyicuan caa, cahnu cusaha yo chi yo. ¹⁰ Nyoo sacuv̄i ra vatyi nduvahā añima yo chihin cha ndu ñn ri yo chihin ra Cristo Jesús. Ta sacuv̄i ra tyehe caa tacuhva vatyi cuv̄i sacuv̄i yo cha vaha. Vatyi maa ra tyaa ra cuhva nu quichi quiv̄i vatyi tyicuan ri sacuv̄i yo cha vaha.

Cuv̄i ri yo ñu Israel, o cuv̄i ri yo ñu inga ñuu, soco cha cuenda ra Cristo ñn ri ñáyiv̄i chí Nyoo cuv̄i tandih̄i yo

¹¹ Yucuan chaha ñicohon iñi ndo cuhva chiyo ndo nu quich̄i quiv̄i, tyi cuv̄i ndo ñáyiv̄i cha ñima ñu Israel cuv̄i. Ta catyí ñáyiv̄i Israel tyi ñu cha ñima ri tuhun cuv̄i ndo cha ña sacuv̄i ndo costumbre circuncisión tari sacuv̄i maa ra. Ta cha cuenda cuan cuñi maa ra Israel tyi vaha ra nuu Nyoo ta nyoho ña vaha ndo. ¹² Ñicohon iñi ndo vatyi nu quich̄i chí, yori ra Cristo chinyaā añima ndo. Ta ña ñn ri cuv̄i ndo chihin ñu Israel. Ta ña chito ndo tuhun cha tyih̄i tahan Nyoo chihin ra Abraham: tuhun cha catyí Nyoo tyi cuhva ra cha ñicoo

vaha yo chihin ra. Chiyo maa ndo ñuhu ñáyiví ihya chihin cha yori Nyoo nyaá chihin ndo, ta ña yihí iñi ndo cha cuñihi ndo. ¹³ Ta quiví cuan cañi xaan chinyaa ndo chihin Nyoo. Soco vityin ñin ri cuví ndo chihin ra Cristo Jesús. Maa ra Cristo chihí ra. Ta chati niñi ra cha catyi ndo. Ta yucuan chaha cuví cuyatyin ndo nuu Nyoo. ¹⁴ Vatyí ra Cristo sanicoo vaha ra chi yo chihin Nyoo. Ta sandu ñin ri ra chi ninduvi yo. Sandu ñin ri ra chi nyuhu cha cuví ndi ñu Israel chihin nyoho cha cuví ndo ñu inga ñuu. Ta sanduvaha ra cuhva iyó yo. Vatyí tari noo cha sanduva ra noo nama vehe cha nanyaa mahñu, cha chasí nu cu ñin ri yo. ¹⁵ Maa ra Cristo sandihí ra tuhun ley chahnu chihin cha chaha cuenda ra coño ñuhu ra tyí cúvi ra nu cruzi. Vatyí tandihí ley cuan sasíin chi chí yo. Tyí nyuhu sacuví ndi costumbre cha catyí ley cuan. Ta nyoho ña sacuví ndo. Soco ra Cristo sandu ñin ri ra chí yo quiví chaha ra noo cuhva chaa tyí coo yo. Ta tyicuan caa sanicoo vaha ra chi yo. ¹⁶ Vatyí chihí ra nu cruzi cha catyi cuatyí yo. Ta sacuvi ra vatyí nanduvaha coo yo chihin Nyoo. Ta tyicuan caa sanaa ra cha ña cuñi nyehe yo chí tahan yo.

¹⁷ Ra Cristo quichí ra ta cahan ra tuhun vaha Nyoo chihin yo: chihin nyoho cha cañi ca chinyicu ndo chihin Nyoo ta chihin nyuhu ñu

Israel, ñu chitó tuhun Nyoo. Catyí ra chí yo vatyí na nicoo vaha yo chihin Nyoo. ¹⁸ Vatyí chaha cha catyi cha chihí ra Cristo cha cuenda yo cuví natuhva ninduvi yo chí Nyoo Sutu yo. Vatyí noo ri Tatyí Ii ra nyaá añima yo: an cuví ri yo ñu Israel, an cuví ri yo ñu cha ñima ñu Israel cuví. ¹⁹ Yucuan chaha nyoho ña cuví ca ndo ñu inga ñuu. Soco nanduví ndo ñáyiví ñuu Nyoo ñin ri chihin tandihí ñu yihí cuenda ra. Nanduví ndo ñáyiví chí ra. ²⁰ Ta cuví tucu ndo tari noo vehe. Ta ra apóstol, ta ra profeta, ra cachahá cuenda tuhun Nyoo cacuví ra tari ra catyihí yuu chaha vehe. Vatyí suri maa ra Cristo cuví yuu cha niñi ca cha yihí chaha vehe cuan. ²¹ Ta cha cuenda maa ra Cristo cuahan ndaa vehe cuan ta vehe cuan ican cuví maa yo ñin ri chihin ra. Ta cuahán sandu ñin ri ra chí tandihí yo ta nanduví yo tari noo vehe ii nu nyaá maa Sutu Mañi yo. ²² Ta tyicuan caa tucu nyoho chihin tandihí ñu yihí cuenda Nyoo, nanduví ndo tari noo nu iyó Nyoo. Vatyí nyaá Tatyí Ii ra añima tandihí yo.

3

Nyoo tachí ra tyiño chí ra Pablo vatyí cahan ra tuhun ra chihin ñu cha ñima ñu Israel cuví

¹ Yucuan chaha yuhu ra Pablo ñohí vehe caa ihya vatyí sacoté tuhun ra Cristo Jesús chí nyoho cha ñima ñu

Israel cuví ndo. ² Tahán chi natyihí tuñi iñi ndo tyi cahnu xaan tumañi iñi chahá ra chii cha cuenda cha vaha chi ndo, tyi sacoté chi ndo. ³ Vatyí cha yaha catyí suhva chi ndo yoso caa sañahá Nyoo chii noo tuhun xehe. ⁴ Ta cuhva cha sacuaaha ndo tuhun cha yaha catyí chi ndo, cuví coto ndo yoso caa chahá Nyoo tyi cutuñi iñi tuhun ra Cristo cha ña chitó ñáyivi. ⁵ Vatyí nu quichí chi, ña sañahá Nyoo chi ñáyivi, tari sañahá ra chi apóstol ta ra cacuví profeta cha vityin. Vatyí Nyoo chihin Tatyí lí ra sañahá ra chi yo cha vityin. ⁶ Ta tuhun xehe cuan, ican cuví ihya: vatyí nyoho cha ña cuví ndo ñu Israel, in ri cha cutahan chi chi ndo chihin nyuhu cha cuví ndi ñu Israel. Vatyí noo ri coño ñuhu ra Cristo cuví yo. Ta cuñihi yo cha catyí Nyoo tyi cuhva ra chi yo cha cuenda maa ra Cristo Jesús.

⁷ Saha Nyoo tumañi iñi chi yuhu vatyí chahá ra tunyee iñi ra chii tyi sacoté tuhun vaha ihya chi ñáyivi. ⁸ Soco cha cuenda chi yuhu cuví noo ra luhlu, noo ra ndahvi ca cha nuu tandihi ca ñu yihí cuenda Nyoo. Soco sahá Nyoo tumañi iñi ihya chii. Vatyí tacuhva cahin tuhun ra Cristo chihin ñu cha ñima ñu Israel cuví. Ta sacoté chi ñu ñana cha tyayí cha cuñihi ñu cha cuenda ra Cristo. ⁹ Tyatyíño Nyoo chii tyi sacote chi tandihi ñáyivi yoso caa tyaa ra cuhva nyata ni cumañi ca savaha ra tandihi cha iyó. Ta cha naha ña chahá

Nyoo cha coto ñáyivi tuhun ihya. ¹⁰ Tyicuan caa cuví tacuhva vatyí vityin tandihi ra nyacá ñaha andivi cunyehe yoso caa cha vaha cha sacuví Nyoo chihin yo cha cuví yo ñu yihí cuenda ra. Ta cucoto ra tyi chiñi tuñi xaan Nyoo. ¹¹ Tandihi ihya chachí tahan chihin cha tyaa Nyoo cuhva tyi sacuvi ra chihin Sutu Mañi yo Jesucristo cha cuenda cha vaha chi yo. ¹² Ta cha cuenda maa ra Cristo iyó chi ityi chi yo cha chaá yo nuu Nyoo chihin cha ña yuhví yo. Vatyí chinó iñi yo chi ra Cristo. ¹³ Yucuan chaha chacú ndahvi nuu ndo tyi ma ndu uvi iñi ndo chi Nyoo cha nyehi tindoho cha cuenda ndo. Vatyí cuví chi cha cuenda cha vaha chi maa ndo. Ta cusíi cuñi ndo cha cuenda ihya.

Chicán tahvi ra Pablo chaha ñu, na cohon nuu ca ñu chi ra Cristo

¹⁴ Yihí iñi yoso cuhva cha vaha cha tyaa Nyoo Sutu yo cuhva tyi cuhva ra chi yo. Ta yucuan chaha chicuñi chiti nuu ra. ¹⁵ Maa ra cuví ra Sutu tandihi ñáyivi cuenda ra: ñu cha cuahan coyo andivi, ta ñu cha iyó ca siqui ñuhu ñáyivi. Tandihi yo cuví yo ñáyivi chi ra. ¹⁶ Ta chiquén chi ra na sandunyee ra iñi ndo chihin Tatyí lí ra cha nyaá aña ndo. Vatyí maa ra cahnu xaan ca cha tyayí ra chahá ra chi yo. ¹⁷ Ta na coo ra Cristo aña ndo vatyí chinó iñi ndo chi ra. Ta coo ndo chihin cha cuñi Nyoo chi ndo. Vatyí

tari yihí vaha yoho noo yutun chichi ñuhú, tyicuan caa cun-
yaa vaha añima ndo chihin
Nyoo. ¹⁸ Tyicuan ta cuacoo
tunyea iñi ra chi ndo tacuhva
cuví cutuñi vaha iñi ndo chi-
hin tandihí ñu yihí cuenda
ra vatyí cuñí xaan ra Cristo
chí yo. Nyacua ña ñihí ca
yo cuhva catyí yo yoso cuhva
cha cuñí ra chí yo. ¹⁹ Vatyí
yaha xaan cahnu cuan. Ny-
acua ma cuví cohon nuu yo
yoso cha cuñí ra chí yo. Soco
cuñí cha nacoto ndo yoso
cha cuñí ra chí yo. Tyicuan
ta ñahri ca cumañi chí ndo.
Vatyí Nyoo nyaá maa ra chi-
hin ndo.

²⁰ Ta vityin na sacahnu yo
chí Nyoo, ra cha iyó xaan ca
tunyea iñi chii. Vatyí cuaha
vavaha ca cha cuví sacuvi
ra cha nuu cuhva cha chicán
maa yo chí ra o cha nuu
cuhva cha chicá xiñi yo. Vatyí
suri chihin tunyea iñi ra cha
iyó chí yo, sacuví ra tandihí.

²¹ Yoó ñu chino iñi chí Nyoo,
na sacahnu yo chí ra tyicuan
ri maa, ta tandihí tyembu cha
cuenda cha sacuví ra Cristo
Jesús. Ta na cuví chí tyicuan
caa.

4

*Cha cuenda Tatyí Ii Nyoo
in ri cuví tandihí yo chayihí yo
cuenda ra Cristo*

¹ Yucuan chaha yuhu cha
ñohí vehe caa cha cuenda
Sutu Mañi yo chacú ndahvi
nuu ndo na cachi coo ndo tari
cuhva tahán chí coo ñu cha
nacanā Nyoo chii. Vatyí chí
nyoho nacana Nyoo tyí cuví
ndo ñáyivi chí ra. ² Ndahvi

saha ndo chí ndo. Ta vaha
cāhan ndo chihin ñáyivi.
Cama cuví iñi ndo. Ta cunyea
ndo ñáá cha sahá noo noo
tahan ndo chí ndo chihin cha
cuñí ndo chí ñu. ³ Nducu ndo
cuhva cha tyicuan ri cu in ri
ndo chihin tahan yo. Vatyí
maa Tatyí Ii Nyoo tyinyeé chí
yo, na coo vaha yo chihin
tahan yo. ⁴ Vatyí iyó noo
ri coño ñuhu ra Cristo. Ta
ican cuan cuví tandihí yo.
Ta tari cha noo ri Tatyí Ii
Nyoo iyó, tyicuan caa tucu
iyó noo cha chitó cachi yo tyi
cunaquehen yo tyi nacaná ra
chí yo. ⁵ Ta iyó noo ri Sutu
Mañi yo nyacá ñaha chí yo.
Ta noo ri chí maa ra chinó
iñi tandihí yo. Ta noo ri cha
cuenda maa ra condutyā yo.
⁶ Ta noo ri Nyoo iyó ta maa
ra cuví ra Sutu tandihí yo. Ta
maa ra nyacá ñaha chí tandihí
yo. Ta chotyíño ra chí tandihí
yo yoso cuhva cuñí maa ra.
Ta nyaá ra añima tandihí yo.

⁷ Chaha ra Cristo noo
cuhva chí noo noo yo, vatyí
sacuvi yo tyiño nuu ra yoso
cuhva cuñí maa ra cuhva ra.
⁸ Yucuan chaha cahān Nyoo
tuhun ra Cristo nu catyí chí:

Cuví chasaha ra chí ra xaan
iñi chí ra, ta nandaā
xica ra andiví chihin
ñu tavā ra ndaha ra ña
vaha.

Ta chaha ra cuhva yoso
cuhva cusaha tyiño ñu
tyiño nuu ra, catyí chí.

⁹ ¿Ta ñáá cha cuñí chí catyí
cha nandaā xica ra cuan?
Cuñí chí catyí vatyí noo xi-
hna ra nya yuvi ca nu ñuhu
ñáyivi. ¹⁰ Ra cha noo cuan,

nandaq̄ tucu ra nya nu sucun ca andiv̄i. Vatyí tyicuan caa ta cuví sacutu ra tandih̄i maa ta cunyaa ra chihin yo tandih̄i ityi. ¹¹ Ta suri maa ra Cristo chah̄a ra cha vaha chi yo. Chi suhva yo chah̄a ra tyi cuvi yo apóstol ra. Ta chi inga yo chah̄a ra cha cuhva cuenda yo tuhun cha chahá ra chi yo, o saha yo profetizar cuví cuan. Ta chi inga yo chah̄a ra tyi sacoto yo chi ñáyiv̄i yoso caa sacacú ra añima yo. Ta chi inga yo chah̄a ra cha quih̄i ndaha yo chi ñu yih̄i cuenda ra, ta chi inga yo chah̄a ra cha cuví sañaha yo tuhun ra chi ñu. ¹² Tyicuan caa chah̄a Nyoo tyiño chi yo vatyí cunyaa yo tyiño cha sandunyeé yo iñi tahan yo vatyí cuví yo coño ñuhu ra. ¹³ Nyacua nya cu ñn vaha tandih̄i yo cha cuenda cha chinó vaha iñi yo chi Sehe Nyoo. Ta cohon nuu vaha yo chi ra. Tyicuan caa ta cutu yo chihin tandih̄i cha vaha cha chah̄a ra Cristo chi yo. ¹⁴ Yucuan ta ma cuvi ca yo tari ra cuatya. Vatyí totyehe ri chino iñi ndotyin ñáá noo tuhun cha ñima ri tuhun sandaví ñaha ñu chi ndotyin. Ta coto cutondo xiñi yo tyicuan caa chihin tuhun cha ña ndicha cha sañahá ñu sandaví ñaha. ¹⁵ Soco cha nuu cha cuví yo tari ra cuatya, cuñí chi cha cahán yo cha ndicha chihin cha cuñí yo chi Nyoo ta chi ñáyiv̄i. Ta ndunyeé ca añima yo chihin nd̄i cha vaha cha iyó chi Nyoo. Ta cuahnu yo chihin ra Cristo, cha cuví ra

nuu chi yo. ¹⁶ Ta cha cuenda ra Cristo tandih̄i yo cha cuvi yo coño ñuhu ra, ñn ri cuvi yo. Tari yih̄i tahan noo coño ñuhu, ta sahá tyiño tahan tahan nu yih̄i tahan chi, yoso cuhva tyiño cha tahán chi chi, ta tyicuan caa tyinyeé chi chi coño ñuhu, na coo vaha chi ta cuahnu chi, ta tyicuan caa yoó, cuñí yo chi tahan yo ta tyinyeé yo chi ñu.

Ñayiv̄i chaa cha tahán chi coo yo cha cuenda ra Cristo

¹⁷ Ican ihya cuví cha chah̄i cuenda chi ndo, catyí Sutu Mañi yo. Ta cuñí chi cha quichaha ndo. Ma coo ca yo tari iyó ñu ña ñohó nuu chi Nyoo. Vatyí maa ri maa cha chiñi tuñi tondo chicá xiñi ñu. ¹⁸ Ta ña cutuñí iñi ñu, tyi ñima ñayiv̄i Nyoo iyó ñu. Vatyí ña chitó ñu, cha cuenda cha ndava añima ñu. ¹⁹ Ña cahán ca nuu ñu cha sacuví ñu cha ña vaha. Ta nacuhva cuenda ñu chi ñu chi cha quiñi caa. Cuaha xaan cha ña vaha quichi cuvi iñi ñu. ²⁰ Soco ñima tyicuan caa cutuhva yo. Vatyí ñima tyicuan caa cuhva iyó ra Cristo. ²¹ Tatu ndicha tyi chiñi yo cha cah̄an ra chihin yo, ta cutuhva yo cha ndicha cha sañah̄a ra chi yo, ²² ma coo ca yo cuhva chiyó yo quivi cuan. Vatyí chiyó yo ñayiv̄i chahnu quiñi caa. Vatyí cha quichi cuvi iñi yo sandaví ñaha chi chi yo. ²³ Nacuhva cuenda yo chi yo chi Nyoo na nasama ra cuhva chicá xiñi yo. ²⁴ Ta nacoo yo noo ñayiv̄i chaa chihin noo añima chaa

cha savahá Nyoo. Ta cuvi yo noo ñu vaha cha ndicha ndicha, noo ñu cachi iyó nuu Nyoo tari maa ra.

²⁵ Yucuan chaha ma cahan ca yo cuendu. Cahan yo maa maa ri cha ndicha chihin tahan yo. Vatyí ñn ri ñáyiví cuvi yo.

²⁶ Tatu cuxaan yo, saha yo cuenda coto sacuvi yo cha ña vaha. Ta suhva ri cuhva cuxaan yo. Ma cuxaan yo ndiyaca. ²⁷ Ta ma cuhva yo cuhva chi ra ña vaha.

²⁸ Ra cha tuhva suhu quiví cuan, ma suhu ca ra vityin. Soco saha tyiño vaha ra chihin ndaha ra. Tyicuan caa ta coo cha chii ra, tacuhva cuvi tyinyee ra chi ñu cha chiñuhú chii.

²⁹ Ma cahan yo cha quiñi caa. Cahan yo, soco maa ri cha vaha cha tyinyee ta sacuahnu chi ñu chiñi tuhun cahán yo. ³⁰ Ta ma cuhva yo tucuihya iñi chi Tatyí Ii Nyoo. Vatyí chaha Nyoo Tatyí Ii ra chi yo tari noo tuñi ra tyaa ra añaima yo nyacua nya quiví ndihi sacacú ra chi yo.

³¹ Ta ma xaan cuñi yo. Ta ma cuxaan yo. Ta ma quihí tisihi iñi yo. Ma cana chaa yo siqui tahan yo. Ma cahan uhvi yo chi tahan yo. Ta ninoo cha ña vaha ma caxiñi yo. ³² Soco vaha ñáyiví cuvi yo chihin tahan yo. Ta cundahvi cuñi yo nyehe yo chi ñu. Ta saha yo ticahnu iñi chi ñu, tari Nyoo sahá ra ticahnu iñi chi maa yo cha cuenda ra Cristo.

5

Yoso caa tahan chi coo ñáyiví yihí cuenda Nyoo

¹ Yucuan chaha nanducu yo cuhva coo yo tari cuhva iyó maa Nyoo. Vatyí sehe ra cuví chi yo. Ta cuñi xaan ra chi yo. ² Vita cuvi iñi yo. Cuñi yo chi tahan yo, tari ra Cristo cuñi ra chi yo. Ta tari noo mbee luhlu cha tuhva tata sutu cachaha ra chi Nyoo ta cha naha, tyicuan caa chaha cuenda ra Cristo chi ra cha cuenda yo. Ta si xaan cuñi Nyoo cha cuenda cha chaha cuenda ra chi ra.

³ Soco vityin cha cuví yo ñáyiví yihí cuenda Nyoo, ña tahan chi sacuví yo cha quiñi caa chihin coño ñuhu yo. Ni ña tahan chi cha cahán yo cha quiñi caa. Ta ni ma nyiyo iñi yo. ⁴ Ma cahan yo tuhun cha chahá ticahan nuu. Ni ri ma cahan yo noo tuhun cha ñima ri tuhun. Vatyí ña tahan chi cahan yo cha tyicuan caa. Soco cha nuu cha cahán yo cha ña tahan chi, na nacuhva yo tyahvi nyoo chi Nyoo. ⁵ Vatyí cha chitó yo vatyí tandihí ñu cha sacuví cha quiñi caa, ma quihvi ñu nu nyacá ñaha ra Cristo chihin Nyoo. Ra iyó chihin ñusihí ta ñima ñasihí ra cuví, o ñu iyó chihin rayí ta ñima yí ñu cuví, ñu nyiyó iñi, ma quihvi ñu nu nyacá ñaha Nyoo. Vatyí cha nyiyó iñi yo tari cha sacahnú yo xitohyo cuví cuan. Vatyí tavá xiin yo chi Nyoo. ⁶ Ma cuhva yo cha sandavi ñaha ñáyiví chi yo chihin tuhun cha ña ndicha, tuhun cha

ñima ri tuhun. Vatyí tachí tuñi Nyoo chí ñu cha ña quichahá chí ra. ⁷ Ta ni ma cutahan yo chihin ñu cuan.

⁸ Vatyí chiyó yo nu ñaa ñi quívi cuan. Soco vityin iyó yo nu ndichin chihin Nyoo. Cachi cōo yo tari tahán chí coo ñu chitó tuhun Nyoo. ⁹ Vatyí Nyoo sacundichín ra añima yo tacuhva cuvaha añima yo ta sacuvi yo cha vaha ta cha ndicha. ¹⁰ Saniñi yo cutuhva yo cuhva tahán ñi Sutu Mañi yo. ¹¹ Ma sacuvi yo cha nyacuví ñu nyicú nu ñaa ñi. Vatyí ñahri cha vaha ñihí ñu chihin cuan. Soco sacoto yo chí ñáyivi tyi ña vaha cuan. ¹² Vatyí cahán nuu yo cha cahán yo tuhun cha nyacuví ñu cuan cha xehe ri. ¹³ Soco quívi quita cha ñohó xehe nu ndichin, tyicuan ta cucoto yo cha ndicha. Vatyí cha ndichin Nyoo sanatuví tandihí cha ñohó xehe. ¹⁴ Yucuan chaha iyó nu catyí chí:

Yoho cha quixun, ndicuita mahñu nu nyicú ñu chihí chiña.

Ta ra Cristo cusacata ra ñuhu nu cuahún, catyí chí.

¹⁵ Yucuan chaha saha yo cuenda cuhva iyó yo. Ta ma coo yo tari noo ra soho. Cōo yo tari noo ra chitó. ¹⁶ Ma sacunaa yo quívi yo. Na cahán yo tuhun Nyoo chihin ñáyivi. Vatyí vityin quiñi xaan caa ñáyivi iyó yo, ta ña naha ca iyó yo. ¹⁷ Yucuan chaha ma tondo xaan cohon ñi yo. Soco nandichí xiñi yo cuhva cuñí maa Sutu Mañi yo

tyi sacuvi yo. ¹⁸ Ma coho yo ndixi. Vatyí ican cuan sativí chí yo. Soco cuhva yo na cun-yaca ñaha vaha Tatyí Ii Nyoo añima yo. ¹⁹ Cahán yo chihin tahan yo soco chihin cha sacahnú yo chí Nyoo. Cāta yo salmo cuenda ra. Cāta yo yaa cha chahá Tatyí Ii chí yo. Sacahnu yo chí Sutu Mañi yo chihin cha tandihí añima yo. ²⁰ Tyicuan ri ñacuhva yo tyahvi nyoo chí Nyoo Sutu yo cha cuenda tandihí maa, vasi sii cuñí yo, vasi nyehé yo tindoho. Ñacuhva yo tyahvi nyoo chí ra chihin sivi Sutu Mañi yo Jesucristo.

Na coo vaha yo chihin tahan yo cuenda ra Cristo, catyí ra Pablo

²¹ Quichaha yo nu cahán inga tahan yo cuenda ra Cristo. Vatyí sahá yo ñáyivi chí ra Cristo.

²² Nyoho ñu iyó yí quichaha ndo cha cahán Sutu Mañi yo. Ta tyicuan caa tucu quichaha ndo nu cahán yí ndo. ²³ Vatyí rayí ican ra cuví nuu chí ñasihí ra, tari cuhva cuví ra Cristo nuu chí ñu yihí cuenda ra. Ta suri maa ra sacacú ra chí yo cha cuví yo coño ñuhu ra. ²⁴ Soco tari tahán chí cha quichahá ñu yihí cuenda ra Cristo chí ra, tyicuan caa cuñí tucu chí cha quichahá ñusihí tandihí cha catyí yí ñu.

²⁵ Ta rayí cuñí chí cha cuñí ra chí ñasihí ra, tari cuñí ra Cristo chí yo cha yihí yo cuenda ra. Ta chaha ra ñáyivi ra cha catyí yo. ²⁶ Tacuhva

vatyí sandundí ra añima yo. Ndí añima yo vatyí nacatyá ra quívi cha nachino iñi yo tuhun cahán ra ta condutyá yo. ²⁷ Ndoq añima yo tari ndoq noo sahna, ña yacua ca chi, ña tiyi ca chi. Vatyí ra Cristo sandundí ra chi yo cha cuví yo ñu yihí cuenda ra. Tacuhva cuví nacuhva cuenda ra chi yo chi Nyoo, soco vaha yo, ñahri ca cutyi yo. ²⁸ Ta tyicuan caa tucu cuñi chi cha cuñi rayi chi ñasihí ra, tari cha cuñi ra chi coño ñuhu ra. Vatyí tatu cuñi ra chi ñasihí ra, tari cha cuñi ra chi maa ra cuví cuan. ²⁹ Vatyí yori noo yo cha ña cuñi nyehe yo chi coño ñuhu yo. Soco sacachí yo ta sacuihnó yo chi coño ñuhu yo. Ta ra Cristo suri tyicuan caa sacuví ra chihin ñu yihí cuenda ra. ³⁰ Vatyí coño ñuhu ra cuví yo. Ta noo noo yo cuví yo suhva coño ñuhu ra ta yiquí ra. ³¹ Catyí tuhun Nyoo: “Rayi sandoó ra chi sutu ra ta chi sihi ra. Ta ndu ín ri ra chihin ñasihí ra. Ta noo ri nanduví ñu.” ³² Ta yuhu catyí vatyí ihya cuví noo tuhun xehe cha cahnu xaan. Ta cuñi chi catyí tyi ra Cristo ndu ín ri ra chihin ñu yihí cuenda ra. ³³ Ta sñin ri cuñi tucu chi catyí vatyí tahan tahan ndo cuñi ndo chi ñasihí ndo, tari cuñi ndo chi maa ndo. Ta nyoho cha cuví ndo ñusihí, saha ndo ñáyivi chi yíi ndo.

6

¹ Nyoho cha cuví ndo sehe, tahán chi cha tyasoho ndo

nu cahán sutu ndo ta sihi ndo. Vatyí cuñi ndo chi Nyoo. ²⁻³ Nu tutu Nyoo nyaá cha xihna ri sacuvi yo ta nañihi yo cha cucuhva Nyoo chi yo. Catyí chi: “Saha ndo ñáyivi chi sutu ndo, chi sihi ndo. Tyicuan caa ta sii xaan cuacoo ndo. Ta naha xaan cuacoo ndo ñáyivi ihya”, catyí Nyoo.

⁴ Ta nyoho cha iyó sehe ndo, ma nanducu ndo cha cuxaan sehe ndo. Soco sañaha ndo tuhun Nyoo chi ñu, ta yoso caa quichaha ñu chi ndo ta chi Nyoo.

⁵ Ta nyoho cha cuví ndo musu, quichaha ndo chi chitoho ndo siqui ñuhu ñáyivi ihya. Saha ndo ñáyivi chi ñu. Quichaha ndo chi chitoho ndo chihin cha ñi iñi ndo. Tatu sacuví ndo tyicuan caa, chi ra Cristo quichahá ndo cuví cuan.

⁶ Ma saha tyiño ndo cuhva cha nyehe ri chitoho ndo tacuhva vatyí catyí ñu tyi vaha ndo. Soco saha tyiño vaha ndo tari cha vatyí sacuví ndo tyiño nuu ra Cristo. Ta tyicuan caa sacuví ndo cuhva cuñi Nyoo chihin cha ñi añima ndo. ⁷ Chihin cha iyó vaha iñi ndo sacuvi ndo. Tari cha sahá tyiño ndo nuu Sutu Mañi yo ta ñima nuu ñáyivi. ⁸ Vatyí cha chitó yo tyi tahan tahan yo, an cuví ri yo musu, an ñima, soco cutiyahvi Sutu Mañi yo chi yo yoso cuhva cha vaha cha chinyacuvi yo.

⁹ Ta nyoho cha iyó musu ndo, suri vaha coo ndo chihin musu ndo. Ta ma sayuhvi ndo chi ñu. Vatyí chitó ndo tyi

ña cahnu ca maa ndo cha nuu musu ndo. Inuu ri cuví ndo nuu Nyoo ra cuví chitoho yo nya andivi. Vatyí maa ra ña cachi ra chi yo.

Tunyee ñi cha chahá Nyoo chi yo cha yihí yo cuenda ra

¹⁰ Ta vityin sandunyeeyo yo ñi yo chihin cha ñi ri cuví yo chihin Sutu Mañi yo. Vatyí iyó xaan tunyee ñi chi ra.

¹¹ Ta tari noo sindaro sahá cuenda ra chi ra, tyicuan caa tucu yoó, ñasaha cuenda vaha yo chi yo chihin tandihí cha cuví tyinyee Nyoo chi yo. Tyicuan caa ta cuví chasaha yo chi cuihna. Vatyí nducú xaan ra cuhva sandavi ñaha ra chi yo. ¹² Tyicuan caa coo yo chihin tunyee ñi Nyoo.

Vatyí ñima chihin ñáyivi cañí tahan yo. Soco cañí tahan yo chihin tatyí ña vaha cha ña nyehé yo. Vatyí ican cuan cuví cha nyacá ñaha chí ñáyivi cha nyacuví cha quiñi caa. ¹³ Yucuan chaha saha cuenda vaha yo chí yo chihin tandihí cha cuví tyinyee Nyoo chi yo, tacuhva cuví chasaha yo chí ra ña vaha ñáá quiñi nducu tin ra chí yo.

Coto cana cava yo saha ra. ¹⁴ Tari noo sindaro ñihi nanyaá ra chihin noo sincho yihí chichi ra, tyicuan caa ñihi cuinanyaa yo chihin tuhun cha ndicha vaha. Tari cacú noo sindaro vatyí tyaá ra noo caa pecho ra, tyicuan caa Nyoo cusacacu ra chí yo ndaha ra ña vaha, tatu maa ri cha vaha sacuví yo. ¹⁵ Ta tari natyihí sindaro bota chaha ra ta nyatú tuhva ra cha cuhun

ra cuatyí, tyicuan caa cuatu tuhva yo chihin tuhun Nyoo. Na sacoto yo chí ñáyivi yoso caa nicoo vaha ñu chihin ra. ¹⁶ Ta tari sindaro chasí ra chí ra chihin noo caa tacuhva ma ña ñi nduva chí ra, tyicuan caa cuñí chí nachino vaha ñi yo chí Nyoo tacuhva cha cuví chasaha yo tandihí cha sacuví ra ña vaha chí yo. ¹⁷ Ta tari sahá cuenda sindaro xiñi ra chihin noo caa, tyicuan caa nacuhva cuenda yo chí yo chí Nyoo, na sacacu ra chí yo. Ta naquehen yo tuhun cha chahá ra chí yo. Vatyí tari noo mityí Tatyí Ii ra cuví tuhun cuan. Vatyí chihin tuhun ra sahá ganaa yo chí cuihna. ¹⁸ Ta nyita ri cahan yo chihin Nyoo. Ta Tatyí Ii ra cuatyinyee chí yo tacuhva cacan tahví yo chí ra. Ta cuacu ndahví yo nuu ra. Ta tyicuan caa cuatu tuhva ri yo. Ta ma ndu uvi ñi yo. Tyicuan ri cacan tahví yo cha cuenda tandihí ñu yihí cuenda Nyoo. ¹⁹ Ta ñacuatu tucu ndo chahi, tacuhva vatyí ñihi que tuhun cahin. Ta ma yuhví sacote tuhun ra Cristo chí ñáyivi. Vatyí ta cha naha ña chito ñáyivi tuhun ra. ²⁰ Ta cha cuenda cha sacoté tuhun ra Cristo ñohí vehe caa ihya vityin. Soco Nyoo tachí chii vatyí cahin tuhun ra chihin ra nyicú vehe caa ihya. Cacan tahví ndo cha cuende, tacuhva cuví cahin chihin cha ña yuhví, tari cuhva tahán chí cahin.

Tachí ra Pablo chí ra Tíquico tyi cuhun ra nu nyicu

ñu

²¹ Ta ra Tíquico yañi yo, cunacatyí ra tandihí tuhin chi ndo. Maa ra ñi ñi ra sahá tyiño ra cuenda Sutu Mañi yo. Ta cuñi xaan yo chi ra. ²² Tachí chi ra nu nyicú ndo tacuhva sacoto ra chi ndo yoso caa iyó ndi ihya, tacuhva nduní ca ñi ndo chino ñi ndo chi Nyoo. ²³ Ta Nyoo Sutu yo ta Sutu Mañi yo Jesucristo nacuhva ra cha taxi ri coo añaíma tandihí ra yañi yo. Ta na cuhva Nyoo cha chinó vaha ñi ra chi ra. Ta vityin suri Nyoo nacuhva ra cha cuñí ca ra chi ra ta chi ñáyivi. ²⁴ Ta na nasoco ra chi tandihí yo cha nyita ri cuñí yo chi Sutu Mañi yo Jesucristo chihin cha ñi ñi yo. Ta nacuvi chi tyicuan caa.

Carta Cha Sacuhun Ra Apóstol Pāblo Chi Ñáyivi Ñuu Filipos Cha Yihí Cuenda Nyoo

Ñohó ra Pablo vehe caa, ta tyaá ra noo carta chi ñu yihí cuenda Nyoo ñuu Filipos

¹ Yuhu ra Pablo ta ra Timoteo sacuví ndi tyiño nuu ra Jesucristo. Ta tyaá ndi carta ihya chi tandihí ndo cha cuví ndo ñu ñuu Filipos cha yihí cuenda Nyoo. Ta chi ra cayihí ndaha vehe ñuhu, ta chi ra canyehe tyiño vehe ñuhu, ta chi tandihí ndo. ² Na nasoco Nyoo Sutu yo ta Sutu Mañi yo Jesucristo chi ndo. Ta nacuhva ra cha taxi ri coo añima ndo.

Nu chicán tahvi ra Pablo chaha ñu yihí cuenda Nyoo ñuu Filipos

³ Tahan ri cha nichón iñi chi ndo, nacuhvá xain tyahvi nyoo chi Nyoo cha cuenda ndo. ⁴ Ta chicán tahvi chi Nyoo cha cuenda ndo chihin cha sii cuñí añime. ⁵ Vatyí nyata quivi xihna ri cha chiñi ndo tuhun ra Cristo ta nya vityin ta ña sandihí ndo tuhun cha tyinyeé ndo chii. Vatyí ñn ri tuhun ra Jesucristo sacotó yo chi ñáyivi. ⁶ Quivi naquehen cuenda Nyoo añima ndo, maa ra chaha tunyee iñi chi ndo, na sacuvi ndo tyiño nuu

ra. Ta chité tyi tyicuan ri cuacuhva ra chi ndo nyacua nya quivi quichi ra Cristo inga chaha. ⁷ Tahán chi cha caca xiñi tyehe caa cha cuenda ndo, vatyí cuñí xain chi ndo. Vatyí ñn ri nasocó Nyoo chi yo. Vasi ñohí vehe caa, o vasi nanyaí nuu ra cuví tyiño, soco sacoté tuhun Nyoo chi ra canyicú vehe caa ihya, ta chi ra cuví tyiño, na cacoto ra tyi ndicha tuhun ra Cristo. ⁸ Nyoo chitó ra vatyí cuñí xain chi tandihí nyoho tari cuñí ra Jesucristo chi ndo. ⁹ Ta chicán tahvi xain chi Nyoo na cuvita ca iñi ndo, ta cuñi ca ndo chi ñáyivi. Ta suri coo ca cha chiñi tuñi Nyoo chi ndo, ¹⁰ tacuhva vatyí tyicuan ri coto ndo nacachi ndo cha vaha ca. Ta tyicuan caa ta cachi coo ndo ta ma coo ca cuatyí ndo quivi quichi ra Cristo. ¹¹ Maa ra cutyinyee ra chi ndo. Ta tyicuan ri cusacuvi ndo maa maa ri cha vaha, ta cha ndaa. Tyicuan caa ta cusacahnu ñáyivi chi Nyoo tyi cahnu xaan ca cuví maa ra ta sacuví ra tyicuan caa chihin ndo.

Maa maa ri tyiño Nyoo sacuví ra Pablo vatyí ñohó ra Cristo añima ra

¹² Ta cuñí tyi coto ndo yañi vatyí tandihí cha cuví chii tyinyeé xaan chi chii nu cahín tuhun Nyoo chihin ñáyivi. ¹³ Vatyí chitó tandihí sindaro vehe rey ta tandihí inga ñáyivi ihya vatyí ñohí vehe caa cha cuenda cha nyiquén chi ra Cristo. ¹⁴ Ta cuaha xaan ra yañi yo cuenda

Sutu Mañi yo cuní ca iñi ra cha cuenda cha ñohí vehe caa. Ta naá cha yuhvi ra vatyí cachitó ra vatyí tyinyeé Nyoo chi yo. Ta ñihi ca cacahán ra tuhun Nyoo chihin ñáyivi.

¹⁵ Ta ndicha vatyí yihí ra, cahán ra tuhun ra Cristo soco cha cuenda cha tasi cuñi ra nyehé ra chii, o cuñi ra na cunyicon ñáyivi chi ra. Soco yihí ra cahán ra tuhun ra Cristo chihin ñáyivi, soco chihin cha vaha chicá xiñi ra. ¹⁶ Yihí ra cacahán ra tuhun ra Cristo cha cuenda cha cuñi ra chi ra. Vatyí chitó ra vatyí maa Sutu Mañi yo quichi nyaca ra chii ihya. Vatyí cotyiño ra chii, ta sacoté chi ñáyivi tyi ndicha cha sacacú ra añima yo. ¹⁷ Soco inga ra cuan ñima cha ñi iñi ra cahán ra tuhun ra Cristo, soco cuñi ra cuhva ra tisihi chii nu ñohí vehe caa ihya. ¹⁸ Soco cha cuenda chi yuhu ñahri saha, vasi sacuví ra chihin cha vaha chicá xiñi ra o chihin cha ña vaha. Soco tuhun ra Cristo ican casacotó ra. Ta sñi xaan cuñi cha cuenda cuan.

¹⁹ Ta cusñi ca iñi vatyí chité vatyí chichi cha tandihi cha cuví chii, Nyoo cuasacacu ra chii. Tyahvi nyoo chi Nyoo vatyí chicán tahvi xaan nyoho cha cuende nuu Nyoo. Ta tyinyeé xaan Tatyí lí ra Cristo chii. ²⁰ Chitó vahi vatyí Nyoo cutyinyee ra chii cha ma cucahan nui, ta ma yuhvi cahín chihin cha nú iñi tuhun ra Cristo. Ñahri cuende, an coo que ñáyivi, an cúvi, soco cuñi vatyí vityin ta ityi nuu ca saha ñáyivi cuenda cuhva iyé ta coto ñu tyi ra Cristo

cahnu ca cuví ra. ²¹ Vatyí cha cuenda yuhu tatu iyé, sacuvi tyiño nuu ra Cristo ihya siqui ñuhu ñáyivi. Soco tatu cúvi, cuñihi cha tyaqui cha iyó andivi. ²² Soco tatu iyó que, vaha xaan. Vatyí sahá tyiño que cha cuenda cha vaha maa Sutu Mañi yo. Yucuan chaha ña chité nya ityi cuhin, an cuhin ityi andivi, an cuhin cucahan que tuhun Nyoo chihin ñáyivi, ña chité. ²³ Yñi xaan cote nya cha cuñi, vatyí iyó quivi cuñi cha coo que. Soco iyó quivi ña cuñi. Vatyí cha cuñi cunuhi cucunyai chihin ra Cristo. Vatyí vaha ca cuan. ²⁴ Soco cha cuenda cha vaha chi nyoho, vaha ca cha ndoi chihin ndo. ²⁵ Yucuan chaha chité vatyí cundoí suhva ca ñáyivi ihya. Vatyí cuñi chi cha tyinyeé que chi ndo tacuhva cuvi cuhun ca ndo ityi nuu ca ta cu sñi cuñi ndo chihin cha chinó iñi ndo chi Nyoo. ²⁶ Ta quivi cunyehi nu nyicu ndo, tyicuan caa ta cuvi cusñi ca iñi yo cha ñn ri cuví yo chihin ra Cristo.

²⁷ Cuñi chi cha coo yo yoso cuhva tahán chi coo noo ñu yihí cuenda Nyoo. Vasi nyaí chihin ndo, o cañi nyaí, soco cuñi cote tuhun ndo vatyí nyoho vaha cuahan ndo chihin Nyoo. Ta ñn ri sahá tyiño ndo tacuhva nachino iñi ñáyivi tuhun ra Cristo. ²⁸ Ta ma yuhvi ndo ñáa cha sacuví ñu xaan iñi chi ndo cuenda tuhun Nyoo. Vatyí cha tyicuan caa, cachi xaan sañahá chi chi yo vatyí cunaa ñu. Ta sañahá tucu chi chi yo vatyí

cha cacú añima yo sahá maa Nyoo. ²⁹ Vatyí tari chahá ra Cristo ityi chí yo cha chinó iñi yo chí ra, tyicuan caa tucu chahá ra cha nyehé yo tindoho cha cuenda ra. ³⁰ ñin ri cuhva nyehé yo tindoho ta sacotó yo tuhun ra Cristo, ta cha chitó ndo yoso caa nyehi tindoho, ta vityin suri chitó ndo vatyí ña sañé cha sahá tyiñe tuhun Nyoo.

2

Tyayii xaan ra Cristo, soco quichí cúvi ra tari noo ra ndahvi

¹ Ndicha vatyí ra Cristo saníi xaan ra iñi yo cha ñin ri cuví yo chihin ra. Ta vaha cuñí yo cha cuenda cha cuñí ra chí yo. Ta ndicha tucu vatyí nyaá Tatyí Ii Nyoo chihin yo. Ta ndicha tucu cha ndahvi cuñí yo nyehé yo chí tahan yo. ² Tatu ndicha tandihí ihya, cuhva ndo cha cusii cuñí chihin cha ñin ri cuví ndo. Ta cuñí ndo chí tahan ndo tari cuñí ra Cristo chí ndo. Ta ñin ri cuhva caca xiñi ndo. Ta ñin ri cuhva sacuvi ndo. ³ Ma sacuvi ndo cha vaha chí maa ri maa ndo, soco sacuvi ndo cha vaha chí ñáyivi ñandihí. Ta ma cahnu saha ndo chí ndo. Ndahvi saha yo chí yo. Ta tahan tahan yo saha yo tuhun vatyí vaha ca inga ñáyivi ta ñima ca maa yo. ⁴ Ta tahan tahan yo caca xiñi yo cha cuenda cha vaha chí inga ñáyivi, ta ñima cha vaha chí maa ri maa yo.

⁵ Caca xiñi ndo tari chicá xiñi ra Jesucristo.

⁶ Vasi cuví ra Nyoo,

soco ña cahnu saha ra chí ra ta ña quichí cuví iñi ra cha sacahnu ñáyivi chí ra, tari sacahnú ñu chí Nyoo Sutu ra.

⁷ Soco sandoo ra tandihí tunyee iñi ra ta tandihí cha tyayii ra ñin chiyo xiin.

Ta quichí nanduví ra noo ñáyivi ndahvi quívi cacu ra siquí ñuhu ñáyivi.

⁸ Ta ndahvi saha ra chí ra, vatyí nanduví ra noo rayii ri.

Ta chihin cha iyó vaha iñi ra ta quichaha vaha ra chí Nyoo nyacua chaha ra cha cahñi ñáyivi chí ra.

Tari noo ra quiñi iyó saha ñu chí ra, vatyí nu cruzi chihí ra.

⁹ Yucuan chaha Nyoo sacahnú xaan ra chí ra.

Ta chahá Nyoo noo sívi chí ra, noo sívi cha cahnu xaan ca cuví nuu tandihí maa sívi.

¹⁰ Vatyí tacuhva tatu cuiñi yo sívi ra Jesucristo, tandihí yo ta cuiñi chiti yo. tandihí cha iyó andívi.

Ta tandihí cha iyó siquí ñuhu ñáyivi, ta chichi ñuhú, cucuiñi chiti ta sacahnu chí ra.

¹¹ Vatyí tandihí cha iyó ta nacoto nuu vatyí ra Jesucristo cuví ra nyacá ñaha chí tandihí maa cha iyó.

Tyicuan caa cunyehe chí tyi cahnu xaan ca cuví maa Nyoo Sutu yo.

Ñu yihí cuenda Nyoo cuví ñu tari noo cha ndichin siqui ñuhu ñayiví ihya

12 Yañi, cuñi xain chi ndo. Ta tari cha quichaha ndo chii quivi chinyai chihin ndo, quichaha tucu ndo chii vityin cha cañi nyaí. Nducu xaan ndo kuhva na nyehe ñáyivi tyi ndicha cha sacacú Nyoo chi ndo. Ta saha ndo cuenda kuhva coo ndo chihin ra. 13 Vatyí maa Nyoo sacacú cha vaha añaíma ndo. Ta tyinyeé ra chi ndo tacuhva vatyí quichi cuví iñi ndo quichaha ndo nu cahán ra, ta sacuvi ndo kuhva cuñi ra.

14 Tatu cuasacuvi ndo ñáá cha cuasacuvi ndo, nducu ndo kuhva cha ma coo tisihi, ta ma cañi tahan ndo. 15 Tyicuan ta ma coo ni noo cuatyí ndo. Cuvi ndo noo ñáyivi cachi iyó, cuvi ndo ñáyivi ñahri cuatyí, tari tahán chi coo ñáyivi cuenda Nyoo mahñu ñáyivi quiñi iyó ihya. Cuñi chi cha cuví ndo tari noo ñuhu cha sandichín nu ñaa iñi siqui ñuhu ñayiví ihya. 16 Cahán yo tuhun Nyoo chihin ñáyivi vatyí ican cuan chahá ñayiví chaa cha iyó yo. Sacuvi ndo tyicuan caa, tyicuan ta quivi cuquichi ra Cristo, yuhu vaha coo iñi cha cuenda nyoho, vatyí ña sacotó cahí tuhun Nyoo chí ndo. 17 Ta vasi cahñi ñáyivi chi yuhu, cha catyí tuhun Nyoo, soco sií xaan cuñi ta cuñi cusí cuñi ndo chihin vatyí tyicuan caa sacañá tahir cha cucuhva cuenda yo chí Nyoo, cha cuenda cha chinó iñi ndo chí ra. 18 Ta

tahán chí cha cusí iñi tucu nyoho chihin yuhu ñandihí.

Nu tachí ra Pablo chí ra Timoteo ta ra Epafrodito nu nyicu ñu yihí cuenda Nyoo ñuu Filipos cuan

19 Tatu Sutu Mañi yo ta cuñi ra cutachi chí ra Timoteo quichi nyehe ra nu nyicú ndo. Ta quivi ndichi ra nu nyaí cucusí xaan cuñi. Vatyí cunacatyí ra chii yoso caa nyicú ndo. 20 Vatyí noo tuhun ri maa ra chicá xiñi ra cha cuenda cha vaha chí maa ndo tari chicá xiñi yuhu. Ta yori yóo ca ra chicá xiñi tyicuan caa. 21 Vatyí tandihí ca ra, maa maa ri cha cuenda chí maa ra nanducú ra. Ta ña nanducú ra yoso caa kuhva cuñi ra Jesucristo. 22 Chitó ndo vatyí ra Timoteo, vaha cuahan ra chihin Nyoo, ta cha cuenda chí yuhu cuví ra tari noo sehi. Ta tyinyeé xaan ra chii cha cahán ndi tuhun ra Cristo chihin ñáyivi. 23 Ta nyaá sacuhin chí ra nu nyicú ndo. Soco nya coto xihne ñáá catyí ra cuví tyiño, tatu ña naha ca ñohí. 24 Vatyí chitó vahi tyi Sutu Mañi yo numi ri kuhva ra cha chihin cunyehe nu nyicú ndo.

25 Ta vaha cha cunuhu ra Epafrodito yañi yo nu nyicu ndo. Tachí ndo chí ra vatyí quichi tyinyeé ra chii nu tyiño sahi. Ta tñn tahan xaan ndi chihin ra ña vaha cha cuví ndi sindaro ra Cristo. 26 Ta cuñi xaan ra Epafrodito cunuhu ra nu nyicú ndo, vatyí chicá xaan xiñi ra cha chitó ndo tyi cuhví ra. 27 Vatyí ndicha cuhví xaan

ra ta cha yatyin maa cha cúvi ra. Soco Nyoo cundahvi cuñi ra nyehe chi ra, ta chi yuhu ñandihí. Ta ña chaha ra cha cúvi ra. Ña cuñi ra cha coo ca tucuihya iñi chii. ²⁸ Yucuan chaha yuhu cuñi xain cha ndichi ra nu nyicú ndo. Vatyí chité tyi nyoho cundusii xaan cuñi ndo cha nanyehe ndo chi ra. Tyicuan ta ma caca ca xiñi tuhun ndo. Vatyí cha nanyehé ndo chi ra tyi iyó vaha ra. ²⁹ Yucuan chaha vaha ñaquehen ndo chi ra chihin cha sii cuñi ndo, vatyí yañi yo cha cuenda maa Sutu Mañi yo cuví chi ra. Ta tyicuan ri saha ndo ñáyivi chi yañi yo cha iyó tari caa cuhva iyó ra. ³⁰ Vatyí cha yatyin maa cha cúvi ra cha cuenda cha sacuví ra tyiño ra Cristo. Soco ña yuhví ra vasi cúvi ra cha cuenda cha tyinyeé ra chii. Vatyí maa ndo ña cuví quichi tyinyee ndo chii vatyí cañi xaan nyicu ndo.

3

Nu sañahá ra Pablo yoso caa ndu ndii yo nuu Nyoo

¹ Ta vityin yañi, cusii iñi ndo chihin Sutu Mañi yo. Cha cuenda chi yuhu ñahri sahá cha cha yaha tyai tuhun ihya chi ndo, cutyaa tiqui inga chaha. Vatyí cha vaha chi maa ndo cuví. ² Saha ndo cuenda chi ndo chihin ra cha quiñi iyó chiña. Nyacuví ra cuhva cuñi ra ña vaha. Vatyí catyí ra tyi cuñi chi sacuvi yo costumbre circuncisión ta cacu yo. ³ Soco yoó noo circuncisión cha ndicha

savaha Nyoo chi yo. Vatyí maa yo sacahnú yo chi ra chihin Tatyí Ii ra cha ñohó añima yo. Ta cusii cuñi yo vatyí cuenda maa ra Cristo Jesús yihí yo. Ta ña itá iñi yo tyi cacu yo chihin cha sacuví yo costumbre. ⁴ Tyehe ta cuví cacu yo chihin cha sacuví yo, yuhu vihi ca caquí cha nuu tandihí ñu sacuví tyicuan caa. ⁵ Vatyí uña quivi ta saha ñu circuncidar chii. Vatyí tata ra Israel vachi. Ta tata ra Benjamín sehe ra Israel cuví. Ta tata ñu cahán sahan hebreo cuví. Yucuan chaha yuhu hebreo cuví. Ta siin ri quichaha xain ley chahnu quivi cuan, vatyí fariseo cuví. ⁶ Ta cha cuenda cha cuñi quichahí ley, ta chican nyicon xain chi ñu yihí cuenda ra Cristo. Ta ña cuñi nyehi chi ñu. Ta quichahí tandihí maa ley chahnu, vatyí nducu xain cuhva quichahí nu cahán ley cuan. ⁷ Soco tandihí cha cuñi mai vatyí vale xaan quivi cuan, vityin ña vale ca cuan. Vatyí maa ra Cristo cuví ra itá iñi. ⁸ Ta siin ri tandihí cha sacuví, chitó mai vatyí ña vale cha cuenda cha chicohón nui chi ra Cristo Jesús, Sutu Mañi yuhu. Vatyí yucuan cuví cha tyayii xaan ca. Ta cha cuenda ra Cristo tandihí cha sacuví ta ityi chata ca cuví chi noo cha ñima ri tuhun vityin. Yucuan chaha sandoi iin chiyo xiin tandihí cuan. Vatyí cuñi cohon nuu que chi ra Cristo. ⁹ Ta cha cuñi yuhu nacu iin ri que chihin ra. Vaha iyé cha cuenda tyi

chinó iñi tyi sacacú ra chi yo. Ñima cha cuenda cha quichahí ley Nyoo ta vaha iyé, soco cha cuenda vatyi chinó iñi tuhun cahán ra, vatyi sacacú ra chi yo. Ta cha cuenda cha chinó ri iñi yo, ra Cristo naquehén cuenda ra chi yo. ¹⁰ Cha cohon nuu que chi ra Cristo yucuan cuví cha cuñí. Nyoo sanandotó ra chi ra Cristo chihin tunyee iñi ra. Ta cuñí tyi coo ca tunyee iñi cuan chii. Ta cuñí cunyeí tindoho cha tahán chi nyehí. Ta cuñí cha cúvi tandihí cha ña vaha cha cuñí coño ñuhi, tari chihí ra Cristo cha catyi cuatyi yo. ¹¹ Vatyi nanducú xain cuhva cha cunandote noo ñayiví chaa chihin Nyoo nya andiví.

Cuhun cayo ityi nuu ca chihin Nyoo

¹² Ñima tyi catyí chi ndo tyi ñahri ca cha cumañí chii, ta vaha xain. Soco cuahin ityi nuu ca. Vatyi cuñí naquehin cha chahá ra Cristo chii. Vatyi xihna ca maa ra naxita ra chii ityi ra. ¹³ Yañi, ña catyí chi ndo tyi cha ñihí tandihí cha vaha cuan. Soco sanaí iñi cha quichi ityi chata. Ta sañihí cuhin ityi nuu ca. ¹⁴ Tacuhva tyi chaí nu nyaá cha tahán chi chii. Vatyi caná Nyoo chi yo nya andiví. Vatyi cunaquehen yo cha catyí ra chi yo vatyi cuhva ra cha cuenda cha ñin ri cuví yo chihin ra Cristo Jesús.

¹⁵ Tyehe caa tahán chi caca xiñi tandihí yo cha ñihi nyaá yo chihin Nyoo. Soco tatu ñima tyehe caa chicá

xiñi nya noo nyoho, Nyoo cucuhva ra cha cutuñí iñi ndo. ¹⁶ Soco noo ri tyi cuñí chi cha quichahá vaha yo tuhun cha cha yaha sacotó Nyoo chi yo.

¹⁷ Yañi, quehen ndo cuhva iyé ta cuhva cahín. Ta saha ndo cuenda chi ñu iyó tari cuhva sañahá ndi chi ndo. ¹⁸ Vatyi ticuítí chaha catyí chi ndo, saha ndo cuenda chi ra cuendu. Ta vityin catyí tiqui chi ndo inga chaha chihin cha chaquí cha cuihya iñi, vatyi cuaha xaan ra xaan iñi chi ra Cristo. Vatyi catyí ra tyi noo cha ña ñiñi xaan cuví cha chihí ra Cristo nu cruzi. ¹⁹ Soco quiví quichi tucu ra Cristo, cuhun coyo ra cuan anyaya. Vatyi sacuví ra cuhva cuñí coño ñuhu ra. Ta cahnu sahá ra chi ra chihin cha tahán chi coo ticahan nuu nuu ra. Ta itá iñi ra maa maa ri cha iyó ihya ñayiví ri. ²⁰ Soco yoó nya andiví nyaá ñuu yo. Ta suri ityi cuan nyatú yo chi Sutu Mañi yo Jesucristo, ra sacacú chi yo. ²¹ Ta cuquehen ra coño ñuhu pehe yo. Ta cusananduvi ra chi yo tari coño ñuhu maa ra. Ta chihin tunyee iñi cha iyó chi ra cha nyacá ñaha ra tandihí, cusacuvi ra tyicuan caa.

4

Tyicuan ri na cusí cuñi yo chihin Sutu Mañi yo

¹ Yañi, cuñí chi ndo. Ta cuñí xain nyehi chi ndo. Ta sñi xaan cuñí chihin ndo. Ta chité tyi ña cahán cahi tuhun Nyoo chihin ndo. Vatyi ñiñi xaan iñi ndo nyicón ndo chi

ra. Na cuinyaña ca ndo chi Nyoo chihin cha ñí ñi ndo.

² Ta vityin chiquén chi cu Evodia, ta chi cu Síntique, nanduvaha coo ñu chihin tahan ñu. Ta na coo ñu tari cha cuhu ñu cuenda Sutu Mañi yo. ³ Yoho, yañi, ñi ñun sahá tyiñon chihin, ta chiquén chuun na tyinyeun chi ñu tahan yo ihya. Vaty tyinyeē xaan ñu chii chihin cha sacoto ñu tuhun Nyoo cha cacu añima yo chihin ra Clemente ta suhva ca ñu ñandihí. Ta nyaá sivi ñu nuu tutu Nyoo nya andivi.

⁴ Ta tyicuan ri maa cusii ñi ndo chihin Sutu Mañi yo. Ta catyí tiqui chi ndo inga chaha, na cusii ñi ndo chihin ra. ⁵ Ta tandihí ñáyivi na nyehe ñu chi nyoho vaty ndicha noo ñáyivi vaha cuví ndo. Ta ñicohon ñi ndo vaty cha nyaña yatyin quivi quichi Sutu Mañi yo.

⁶ Ta ma ndahvi xaan cuñi ndo ñáá ndihí cha cuví chi ndo. Nyita ri ñacatyí ndo chi Nyoo ñáá ndihí cha cuví chi ndo. Ta çacan tahvi ndo chi ra ñáá ndihí cha chiñuhú chi ndo. Ta yaha cuan ta nacuhva ndo tyahvi nyoo chi ra. ⁷ Ta cha sacuví ndo tyehe caa, Nyoo cuhva ra cha taxi ri coo añima ndo. Ta cahnu xaan ca cha vaha cuví cuan. Ta ni noo ñáyivi ta ña cuví cutuñi ñi ñu yoso cuhva cha cahnu cuan. Ta cha taxi maa Nyoo cusaha cumi añima ndo ta cha chiñi tuñi xiñi ndo. Vaty ñin ri cuví ndo chihin ra Cristo Jesús.

Na caca xiñi yo maa maa ri cha vaha

⁸ Yañi, nu ndihí tuhun çaca xiñi ndo maa ri cha ndicha vaha, cha cachi iyó, cha ndoo iyó, cha ndii, cha ñahri cha quiñi caa, cha tyaqui, cha vaha. Çaca xiñi ndo maa maa ri maa cha vaha tacuhva cuví sacahnu yo chi Nyoo.

⁹ Sacuvi ndo cha sañahi chi ndo. Tuhun cha chiñi ndo cahin, cha nyehe ndo chinyacuvi, sacuvi ndo. Ta Nyoo ra chahá cha taxi coo añima yo, cucunya ra chihin ndo.

Tyinyeé ñu Filipos chi ra Pablo chihin cha iyó chi ñu

¹⁰ Sii xaan cuñi. Ta sacahní chi Sutu Mañi yo cha cuenda cha tyinyeē ndo chii inga chaha. Ta chité vaty tyicuan ri cuñi ndo tyinyeé ndo chii. Soco ña chaha chi cuhva chi ndo. ¹¹ Ñima tyi catyí chi ndo tyehe caa ta cuñi ndo tyi iyó cha chiñuhú chii, vaty yuhu cha cutuhve cha cusii cuñi chihin ñáá ri cha iyó chi. ¹² Vaty yuhu chité yoso caa coo ndahvi ta chité yoso caa coo tyayii. Vaty cha cutuhve coi chihin cha iyó o chihin cha ñahri cha cachi, o tatu nyacua ndoo ca, o tatu ñahri tucu, ndoi vaha. ¹³ Tandihí ta cuví chasahí vaty maa ra Cristo cuví ra tyineé chii. ¹⁴ Soco nyoho yañi vaha xaan cha tyinyeē ndo chii chihin tindoho cha nyehé xain.

¹⁵ Cha chitó nyoho ñu Filipos yoso caa cuví quivi quichaha cahin tuhun Nyoo chihin ndo. Ta quite Macedonia chiña tyi cuasacote

tuhun Nyoo inga ñuu. Ta noo tuhun ri nyoho tyinyee ndo chii chihin xuhun, vatyí vaha xaan cuñí ndo cha cahín tuhun Nyoo chihin ndo. ¹⁶ Ta sñn ri cha ni ri ca cha chinyai Tesalónica, cuaha ri chaha tyinyee ndo chii. ¹⁷ Ñima cha chicá xiñi cha cuenda cha cuhva ca ndo chii, soco cha cuñí vatyí nyoho coo ca cha vaha chi ndo nuu Nyoo. ¹⁸ Ta vityin cuhva, ñahri cha cumañí chii. Nyacua ndoó ca cha sacuhun ndo chii chihin ra Epafrodito. Ta cha chaha ndo cuan cuacuví chi tari noo xico vixi, xico vaha cha chaá nuu Nyoo. Yucuan cuví cha tahán iñi ra. ¹⁹ Ta Nyoo cuhva ra tandihi cha chiñuhú chi ndo. Cha cuenda ra Cristo cucuhva ra tandihi cha vaha cha tyayii cha cumí ra nya andivi. ²⁰ Chi Nyoo Sutu yo na sacahnu yo tyicuan ri maa. Ta na cuví chi tyicuan caa.

Sacuhún ra Pablo nocumi chi ñu Filipos

²¹ Chahí nocumi chi tandihi ndo cha yihí ndo cuenda ra Cristo chiña. Ta vachi tucu nocumi chi ndo sahá yañi yo cuenda Nyoo cha nyicú chihin ihya. ²² Ta ñáyivi cha nyicú vehe ra nyacá ñaha ñuu Roma ihya, ta tandihi ca ñu yihí cuenda Nyoo ñuu ihya chahá ñu nocumi chi ndo.

²³ Ta na nasoco maa Sutu Mañi yo Jesucristo chi tandihi ndo. Ta na cuví chi tyicuan caa.

Carta Cha Sacuhun Ra Apóstol Pāblo Chi Ñáyivi Nūu Colosas Cha Yihí Cuenda Nyoo

Nu sacuhún ra Pablo noo tutu chi ñáyivi nūu Colosas cha yihí cuenda Nyoo

¹⁻² Yuhu ra Pablo cuví noo apóstol ra Jesucristo. Vatyí tyicuan caa cuhva cuñí maa Nyoo. Yuhu chihin ra Timoteo yañi yo, tyaá ndi noo carta ihya chí ndo ñu ñuu Colosas cha yihí vaha cuenda Nyoo ta cuenda ra Cristo. Nyoo Sutu yo nasoco ra chí ndo ta nacuhva ra cha taxi ri coo añima ndo.

Nu chicán tahvi ra Pablo chaha ñu yihí cuenda Nyoo ñuu Colosas

³ Tyicuan ri cha chicán tahvi ndi chaha ndo. Ta nacuhvá ndi tyahvi nyoo chí Nyoo Sutu Sutu Mañi yo Jesucristo cha cuenda ndo. ⁴ Vatyí ñihí ndi tuhun vatyí chinó xaan iñi ndo chí ra Cristo Jesús. Ta cuñí xaan ndo chí tandihí ñu cha yihí cuenda ra. ⁵ Tyicuan caa sacuví ndo vatyí chitó vaha ndo vatyí cucoo ndo chihin Nyoo nya andivi. Nya quívi chíñi ndo tuhun Nyoo cha ndicha vaha, quíhi iñi ndo vatyí sacacú ra Cristo añima ndo. ⁶ Ta suri maa tuhun ra Cristo cha cahān ra Epafras chihin

ndo, ican cuan chityá tandihí ri ityi tari chityá tucu nu canyicú ndo. Ta cuaha ñáyivi nacuhvá cuenda ñu chí ñu chí Nyoo, tari nacuhvá cuenda nyoho chí ndo ñandihí. Ta cuhva cha chíñi ndo tuhun ra Cristo, ta chito ndo vatyí ndicha vaha cha cuñí Nyoo chí yo. ⁷ Ican ihya sañaha yañi yo ra Epafras chí ndo. Vatyí iñ ri tuhun Nyoo sahá tyiño ndi chihin ra. Ta ican ra cuví ra sacuví tyiño nuu ra Cristo cha cuenda ndo. ⁸ Maa ra sacoto tuhun ndo chí ndi, vatyí cuñí xaan ndo chí tahan ndo. Vatyí maa Tatyí Ii Nyoo chahá cha vaha coo añima ndo.

⁹ Yucuan chaha nyacua nya quívi chito ndi tuhun ndo ta ña sandihí ndi tuhun cha nacuatú ndi chaha ndo. Ta chicán ndi chí Nyoo nacuhva ra cha chíñi tuñi ra chí ndo cha cuenda Tatyí Ii ra. Ta cuacutuñi iñi ndo tacuhva coto vaha ndo ñáá ndihí cha cuñí Nyoo tyí sacuví ndo. ¹⁰ Tyicuan caa ta cuví coo ndo tari cuhva tahán chí coo ñu yihí cuenda Nyoo. Ta na sacuvi ndo tari cuhva cuñí maa ra. Tacuhva sacuvi ndo tandihí nuu cha vaha ta cohon nuu vaha ca ndo chí ra. ¹¹ Ta chicán tucu ndi vatyí na sandunye ca ra chí ndo chihin tunyee iñi cahnu ra vatyí cuví cunye ndo tandihí cuii chihin cha cama iñi ndo. ¹² Ta chihin cha sii cuñi ndo, ta nacuhvá ndo tyahvi nyoo chí Nyoo Sutu yo, vatyí chahá ra cha coo ndo noo ñáyivi chaa. Vatyí natavá ra chí ndo nu quiñi caa, ta nanyitá ndo

nu ndichin nu nyacá ñaha ra chi tandihí ñu yihí cuenda ra. Ta cuhva ra tandihí cha vaha cha tahán chi chi ñu yihí cuenda ra. ¹³ Nyoo tava ra chi yo nu ñaa iñi ta nacuhva cuenda ra chi yo chi ra Cristo vatyí cunyaca ñaha ra chi yo. Vatyí ican ra Cristo cuví Sehe Nyoo. Ta cuñí xaan Nyoo chi ra. ¹⁴ Nasata Nyoo chi yo chihin niñi ra Cristo ta saha ra tucahnu iñi cuatyí yo.

Nduvaha iyó yo chihin Nyoo cha cuenda cha chihí ra Cristo cha catyí cuatyí yo

¹⁵ Nyoo, ña nyehé yo chi ra. Soco nanduví ra ñáyiví tacuhva cuví cohon nuu yo chi ra. Ta ican ra cuví Cristo Sehe Nyoo. Nya ta ni cumañi ca chinó ñáyiví ta cha iyó maa ra Cristo. ¹⁶ Ta Nyoo chaha ra tyi savaha maa ra Cristo tandihí cha iyo andiví ta siqui ñuhu ñáyiví. Ta savaha ra cha cuví nyehe yo ta cha ña cuví nyehe yo. Savaha ra ángel. Ta savaha ra chí ra ña vaha ta chi tatyí ña vaha ñandihí. Ta tandihí cha nyacá ñaha siqui ñuhu ñáyiví ihya, maa ra savaha. Ta tandihí ihya chinó chí tacuhva cotyíñó ra yoso cuhva cuñí maa ra. ¹⁷ Ra Cristo cha iyó maa ra nya ta ni cumañi coo tandihí maa cha iyó. Ta tyicuan ri chahá ra cha conyito tandihí maa cha savaha ra. ¹⁸ Ta maa yo cha yihí yo cuenda ra Cristo, ñin ri cuví yo chihin ra. Cuví yo coño ñuhu ra. Ta maa ra Cristo, cuví xiñi yo, vatyí maa ra cuví nuu chi yo.

Ta ican ra cuví cha nandoto cha xihna ca. Yucuan chaha cuví ra nuu chí tandihí cha iyó. ¹⁹ Vatyí maa Nyoo cuñí ra tyi coo tandihí tunyee iñi ra chí ra Cristo. ²⁰ Ta cuñí tucu ra vatyí cha cuenda ra Cristo ta nicoó vaha tandihí cha iyó chihin ra. Yucuan chaha chaha Nyoo cha chihí ra Cristo. Ta chatí niñi ra nu cruzi. Vatyí cuñí ra cha nicoó vaha tandihí cha iyó siqui ñuhu ñáyiví ta andiví chihin ra.

²¹ Ta nu quichí chi, xaan cuví iñi ndo chí Nyoo cuhva cha chica xiñi ndo cha cuenda cha ña vaha cha chinyacuví ndo. ²² Soco Nyoo sanicoo vaha ra chí ndo chihin ra vatyí tachí ra chí Sehe ra, ra Cristo vatyí quichí cuví ra nu cruzi. Ta nyehé ra tindoho chihin coño ñuhu ra ta chí ra, tacuhva vatyí cuhva cuenda ra chí ndo chí Nyoo, soco ñahri ca cuatyí ndo. ²³ Yucuan chaha cuñí chí vatyí sañihí ca ndo chinó iñi ndo. Ta ma sandihí ndo cha yihí iñi ndo tuhun ra Cristo cha chíñi ndo tyi cusacacu ra añima ndo. Ican tuhun ihya, cuví cha cacahán ra nicacahnu ñáyiví. Ta sacuvi Nyoo vatyí yuhu ra Pablo tyinyeí cahin tuhun ihya chihin ñáyiví.

Nu catyí ra Pablo vatyí nyaá siqui ra cha sañahá ra tuhun ra Cristo tandihí ri vehe ñuhu

²⁴ Vityin cusí cuñí cha cuenda cha nyehí tindoho chihin coño ñuhi cha catyí ndo. Vatyí cha tyicuan caa

sacañá tahn tindoho cha nyehe ca ra Cristo cha cuenda yo cha cuví yo coño ñuhu ra. ²⁵ Yuhu cuví noo ra cahán tuhun ra Cristo vatyí tyicuan caa tyinyeí chi tandihí ñu yihí cuenda ra. Vatyí maa Nyoo catyí ra vatyí cahin tandihí tuhun ra cha cuenda cha vaha chi ndo. ²⁶ Sañahí tuhun cha ñohó xehe nya ta tyembu chahnu, nya ta ni cumañi ca chino ñayiví. Nyoo chicumi xehe ra. Soco vityin cuñí ra cha coto tandihí cuí maa ñu yihí cuenda ra. ²⁷ Ta chi ñu cha ñima ñu Israel cuví tari nyoho, cuñí Nyoo sacotó ra noo tuhun vaha xaan, noo tuhun xehe chi ndo. Ta tuhun xehe cuan ican cuví ihya, vatyí ra Cristo ñohó ra añima ndo cha yihí ndo cuenda ra. Ta cha cuenda maa ra cuñihí ndo gloria nu cunyaa yo chihin Nyoo.

²⁸ Tuhun maa ra Cristo cahán ndi. Ta chahá ndi tuhun chí tandihí ñayiví. Ta sañahá ndi chí ñu tandihí cha chíñi tuñi, tacuhva cuahnu ñu ta nyacua nya cha ñahri ca cumañi chí ñu cha ñin ri cuví ñu chihin ra Cristo. ²⁹ Yucuan chaha tyi ní ñi sahá tyiñe chihin tunyee ñi ra Cristo ta ñihi xaan chotyíñó tunyee ñi cuan chii.

2

¹ Vatyí cuñí cha coto ndo vatyí chicá xiñi cha cuenda ndo. Ta chicán tahvi xain cha cuenda tandihí ndo ta cha cuenda ñu Laodicea, ta tandihí inga ñu cha ta nyehe ca chii. ² Chiquén chí Nyoo na cuní ca ñi ndo, ta cu ñin ri

ndo chihin cha cuñí ndo chí tahn ndo. Ta cutuñi vaha ca ñi ndo yoso caa cohon nuu ca ndo chí ra Cristo. Vatyí ican ra cuví tuhun cumí xehe Nyoo ta cha naha. Soco vityin sacotó ra chí yo tuhun ihya. ³ Maa ra Cristo chahá ra tandihí cha vaha ta cha chíñi tuñi chí yo. Tatu ñohó nuu yo chí ra Cristo, ñohó nuu yo chí Nyoo. ⁴ Catyí chí ndo tyehe caa tacuhva cha ma sandavi ñaha ñayiví chí ndo chihin tuhun tyaquí. ⁵ Vasi ña nyaí chihin ndo, soco cohon ñi ndo vatyí ñohó ñi tuhun ndo. Ta sí cuñí nyehi chí ndo. Vatyí vaha xaan cuhva cuahán iyó ndo. Ta ní xaan ñi ndo cuahan ndo chata ra Cristo.

⁶ Yucuan chaha tari chinó ñi ndo chí noo tuhun ri maa ra Cristo quiví nañihí ndo chí ra, tyicuan caa cuñí tucu chí coo ndo ta ñin ri cuví ndo chihin ra. ⁷ Ta cuinyaña ca ndo chí ra. Ta quihí vaha yoho ndo chihin ra. Ta saní ca ndo ñi ndo chihin cha chino ñi ndo, tari cuhva sañaha ñu chí ndo. Ta nyita ri nacuhvá ndo tyahvi nyoo chí Nyoo.

Ñayiví chaa cha chahá ra Cristo chí yo

⁸ Saha ndo cuenda vatyí iyó ñayiví cuñí ñu sandavi ñaha ñu chí ndo chihin tuhun cha ndichí ri maa xiñi ñayiví, tuhun cha ña ndicha. Vatyí ñima chí ra Cristo chinó ñi ñu cuan. Noo costumbre ri nyicón ñu cuan. Ta nyicón ñu chí cha nyacá ñaha síqui ñuhu ñayiví ihya.

⁹ Soco cha sañahá ñu cuan, ñima cha ndicha cuví. Vatyí Nyoo ta tandihí cha cahnu cuví ra, tandihí cuan ta nyaá chihin ra Cristo. Vatyí maa ra Cristo cuví Nyoo. ¹⁰ Ta cha nyaá ra Cristo chihin ndo, tyitú añima ndo chihin Nyoo. Ta ra Cristo ican ra cuví ra nuu chí tandihí ángel ta tatyí cuihna cha nyacá ñaha. ¹¹ Quiví nañihí ndo chí ra Cristo, quihví ra añima ndo. Ña nduvahá ndo nuu Nyoo chihin costumbre circuncisión cha itá xaan iñi ra Israel. Maa ra Cristo sacuachiyó tandihí cha ña vaha cha tuhva ndo sacuví. Sahá ra circuncidar añima ndo cuví cuan soco ñima chihin ndaha ra. ¹² Quiví condutyá ndo chichi ndutyá, tari quiví chihí ndo chihin ra Cristo cuví cuan. Tyicuan ta quitá ndo chichi ndutyá, tari quiví nandoto ndo chihin ra Cristo, vatyí chinó iñi ndo tyi Nyoo chihin tunyee iñi ra sanandoto ra chí ra Jesús. ¹³ Nu quichí chí ña ñohó nuu ndo chí Nyoo. Vatyí sacuví xaan ndo cuatyí. Ta cuví ndo tari noo ñáyiví chihí chihin cuatyí cuan. Ta ña sahá ñu circuncidar chí ndo. Soco vityin Nyoo sahá ra tcahnu iñi tandihí cuatyí ndo. Ta chahá ra cha coo ndo noo ñayiví chaa chihin cha ñn ri cuví ndo chihin ra Cristo. ¹⁴ Sanatuví ley chahnu cuan cuatyí yo. Ta catyí chí tyi tahán chí chuhun yo anyaya vatyí ña quichahá yo chí chí. Soco ley cuan Nyoo sacuachiyó

ra quiví chihí ra Cristo nu cruzi. ¹⁵ Quiví cha chihí ra nu cruzi cuví chasaha ra chí cuihna ta chí tandihí tatyí ña vaha cha nyacá ñaha. Chihin nuu tandihí maa ángel Nyoo sacotó ra vatyí cahnu ca cuví maa ra ta ñima ca cuihna.

Nu chahá ra Pablo tuhun tyi nanducú yo cha vaha cha chahá Nyoo

¹⁶ Yucuan chaha ña tahán chí quihí yuhu ñáyiví chí yo cha cuenda cha chachí yo o cha chihí yo, o cha cuenda cha ña naquehén vaha yo noo quiví vico. Cuví ri quiví cha natyacu yoo, o cuví ri quiví nyitatu yo. ¹⁷ Tandihí cuan cuví chí tari noo xiñahñu ri cha cuquichí ityí nuu. Ta vityin cha quichí ra Cristo ta ican ra cuví ra cha ndicha vaha sacacu chí yo. ¹⁸ Ma cuhva ndo cha casi ñáyiví nu naquehen ndo noo cha cuacuhva Nyoo chí ndo. Maa ñu ndahví sahá ñu chí ñu soco ña ndicha ñu, ta sacahnú ñu chí ángel. Ta sahá ñu tyi ñyehe ñu cha sañaha Nyoo chí ñu. Ta cahnu sahá ñu chí ñu chihin cha chicá xiñi ñu tuhun ñayiví ihya. ¹⁹ Ñu cuan ñima chí ra Cristo ra cuví xiñi nyicón ñu. Yucuan chaha nyacuví ñu tandihí cuan. Soco yoó cha nyicón yo chí ra, maa ra cuví nuu chí yo. Ta sandu ñn ri ra chí yo chihin ra. Ta sacuahnú ca ra chí yo chihin tunyee iñi ra tari cuhva cuñí maa Nyoo.

²⁰ Tari quiví chihí coño ñuhu cuatyí ndo chihin ra Cristo cuví cuan. Ta ña nyacá ñaha ca tuhun ñuhu

ñayiví ihya chi ndo. ¿Ñáá tuhun cha iyó ca ndo tari caa iyó ñáyiví cha ña ñohó nuu Nyoo? Ta quichahá ca ndo cha cahán ñu cha sacuví costumbre cuan. ²¹ Vatyí catyí ñu chi ndo tyehe caa: “Ma tiun ihya chihin ndahun, ma cachun ihya. Coto ma cacun”, catyí ñu. ²² ¿Ñáá tuhun cha quichahá ca ndo tuhun cahán ñu cuan? Vatyí maa maa ri cha ndichí xiñi ñáyiví cuví. Vatyí nyayu noo cha in yaha ri cuví. Ma tiví ndo nuu Nyoo cha cuenda cha cachi ndo. ²³ Ndicha vatyí costumbre ihya tari maa cha vaha cuví, cuñí maa ñáyiví. Vatyí sanyehé ñu tindoho coño ñuhu ñu. Ta cuñí ñu tyi vaha sacahnú ñu chi Nyoo tatu sacuví ñu tyicuan caa. Soco ña chaá cuan nuu Nyoo. Vatyí ma cuví tinyaa cuan cha quiñi caa cha cuñí coño ñuhu ñu.

3

¹ Chahá Nyoo noo ñayiví chaa chi yo vatyí nandotó ra Cristo. Ta vityin nyaá ra chiyo vaha Nyoo andiví. Yucuan chaha na nducu yo cha vaha cha chahá Nyoo chi yo nya andiví. ² Caca xiñi ndo cha vaha cha chahá Nyoo chi yo nya andiví. Ta ma caca xaan xiñi ndo tuhun cha iyó siqui ñuhu ñayiví ihya. ³ Vatyí nyoho cha yaha chihí ndo in caa ri chihin ra Cristo. Ta vityin iyó ndo in ri chihin ra chihin Nyoo. ⁴ Ta quiví quichi tucu ra Cristo, ra chahá ñayiví chaa cha iyó ndo, tyicuan ta cunyehe ñáyiví tyi cahnu

xaan ca ra cuví maa ra. Ta cunanyehe tucu ñu chi nyoho in caa ri chihin ra. Ta cutahan tucu maa ndo quichi ndo nu tyaqui cuan chihin ra.

Yoso caa chiyo yo costumbre nu quichi chi ta yoso caa cuñí chi coo yo chihin Nyoo vityin

⁵ Yucuan chaha cuñí chi cha nanducú yo cuhva na cuví tandihí cha quiñi caa cha quichí cuví iñi coño ñuhu yo. Ta ni noo yo ta ma coo ri maa yo chihin ñusihi o chihin rayi. Ta ma sacuvi yo cha ña vaha cha cuñí coño ñuhu yo, o inga cha ña vaha. Ta ma nyiyo iñi yo cha tyayi. Vatyí tari cha sacahnú yo xitohyo, o tavá xiin yo chi Nyoo cuví cuan. ⁶ Cha cuenda tandihí cha ña vaha cuan cuxaán xaan Nyoo chihin ñu cha ña quichahá nu cahán ra. Ta cutachi tuñi ra chi ñu vatyí sacuví ñu cha ña vaha cuan. ⁷ Ta suri tyehe caa chinyacuví tucu maa ndo quiví ña ñohó nuu ndo chi Nyoo. ⁸ Soco vityin ma sacuvi ca yo tandihí cha ña vaha cuan. Ma cuxaan ca yo. Ma cahan uhvi ca yo chi tahan yo. Ta ma cahan cuehe yo chi tahan yo. Ta ma cahan ca yo cha quiñi caa. Ma quita tuhun quiñi caa yuhu yo. ⁹ Ma ñi ca yo cuendu. Vatyí quiví ta ityi chata ca, quiví ña ñohó nuu yo chi Nyoo, tyicuan caa chinyacuví yo. Soco vityin ña nyacá ñaha ca tandihí cuan chi yo. ¹⁰ Vatyí ñayiví cha iyó yo vityin, ñayiví chaa cuví. Noo ñáyiví chaa nanduví yo. Ta

nduchaá ca yo tari cuhva caá Nyoo, ra savaha chi yo, nyacua nya cohon nuu vaha yo chi ra. ¹¹ Ña niñi cha cuví yo ñu Israel, an ñu Grecia, an ñu inga ñuu. Ta ña niñi cha sacuví yo costumbre circuncisión, an cha ma sacuvi yo. Cuví ri yo noo ra chiñi tuñi o cuví ri yo noo ra soho. Cuví ri yo ra iyó chitoho, o cuví ri yo ra yori nyacá ñaha chi yo, ña niñi xaan ca tuhun cuan. Niñi ca cha ñn ri cuví tandihi yo chihin ra Cristo, vatyí maa ra cuví tandihi.

¹² Nyoo cuñí ra chi yo ta nacachi vaha ra chi yo vatyí cuví yo ñáyivi chi ra. Yucuan chaha na coo yo ñáyivi cha tari tahán chi coo ñu yihí cuenda ra. Na cundahvi cuñi yo nyehé yo chi tahan yo. Na cuví yo ñáyivi vaha. Ndahvi saha yo chi yo. Na cumasu iñi yo. Cunyee yo tandihi tisihi tindoho chihin cha sñi cuñí yo. ¹³ Na cucama iñi yo chihin noo noo tahan yo. Ta saha yo ticahnu iñi chi tahan yo tatu ñáá cha sacuví ñu chi yo. Tari sahá ra Cristo ticahnu iñi chi yo, tyicuan caa cuñí chi cha sacuví tucu maa yo. ¹⁴ Ta sñin ri cuñi yo chi tahan yo. Ta nducu yo cuhva coo vaha yo chihin ñu. Vatyí ícan cuan cuví cha sacu ñn ri chi yo. Ta ícan cuan cuví cha niñi ca. ¹⁵ Ta cha taxi maa Nyoo na coo añima yo. Vatyí ra Cristo nyacá ñaha chi yo. Nyoo nacana ra chi yo vatyí tacuhva ñn ri cuví yo cuenda ra Cristo. Ta tyicuan ri nacuhva yo tyahvi nyoo chi ra cha cuenda ihya.

¹⁶ Ta tuhun ra Cristo na sacutu añima yo. Sañaha ca yo tuhun ra chi tahan yo. Ta sanñi ca yo iñi tahan yo chihin cha chiñi tuñi Nyoo. Sacahnu yo chi Nyoo chihin cha cata yo yaa, o salmo. Ta cata yo yaa cha chahá maa Tatyí li Nyoo chi yo chihin cha ñi añima yo. Ta tyicuan ri nacuhva yo tyahvi nyoo chi Nyoo. ¹⁷ Tatu ñáá tyiño sahá yo, o ñáá tuhun cahán yo, sacuvi yo soco tari cha tyi tyiño maa Sutu Mañi yo Jesús sacuví yo. Ta nacuhva yo tyahvi nyoo chi Nyoo cha cuenda maa ra Cristo.

Chahá ra Pablo tuhun yoso caa nducú yo cuhva coo vaha yo chihin ñáyivi

¹⁸ Nyoho cha iyó yñi ndo, cuhva ndo cha cunyaca ñaha yñi ndo chi ndo. Vatyí yucuan cuhva tahán chi coo ndo, vatyí yihí ndo cuenda Sutu Mañi yo. ¹⁹ Ta nyoho rayñi, cuñi ndo chi ñasihí ndo. Ta ma nduxaan ndo chi ña. ²⁰ Nyoho cha cuví ndo sehe quichaha ndo chi sutu ndo ta chi sihi ndo. Vatyí yucuan cuhva cuñí maa Sutu Mañi yo. ²¹ Nyoho cha cuví ndo sutu ta sihi, ma cahan xaan ndo chi sehe ndo, vatyí coto nducuihya iñi chi. ²² Ta nyoho cha cuví ndo musu, quichaha ndo chi chitoho ndo. Ñima cuhva cha nyehé ri ra chi ndo quichaha ndo chi ra, tacuhva vatyí vaha cuñí ra nyehe ra chi ndo. Soco sacuvi ndo chihin cha tandihi añima ndo. Vasi ña nyehé ra. Vatyí Nyoo nyehé ra chi ndo.

23 Tandihí ri tyiño sacuví yo, sacuvi yo chihin cha níi ñi yo. Saha yo tuhun tyi tyiño nuu maa Sutu Mañi yo sacuví yo. Ta ñima maa ri maa tyiño nuu ñáyivi. 24 Vatyí chitó yo vatyí maa Sutu Mañi yo cucuhva ra noo cha tahán chi chi yo vatyí sacuví yo tyiño nuu ra Cristo. Vatyí ican maa ra cuví chitoho yo cha ndicha vaha. 25 Soco tatu sacuví yo cha ña vaha, Nyoo cutachi tuñi ra chí yo cha cuenda cha ña vaha cha sacuví yo. Ta tandihí yo ñin ri ñáyivi cuví yo nuu ra. Vatyí Nyoo ña cachi ra ñáyivi cuñí ra.

4

1 Nyoho cha iyó musu ndo, cuñí chi tyi vaha ñáyivi cuví ndo chihin musu ndo. Nícohon ñi ndo vatyí iyó tucu noo chitoho maa ndo nya andivi. Ta maa ra nyehé ra chí ndo.

2 Ta tyicuan ri caçan tahvi ndo chihin cha níi ñi ndo. Ta nacuhva yo tyahvi nyoo chí Nyoo cha cuenda tandihí maa. 3 Caçan tahvi ndo chaha ndi, vatyí nanuña ca Sutu Mañi yo xiñi ñáyivi ta tyasohó ñu tuhun ra Cristo cha cahán ndi nuu ñu. Vatyí tari noo tuhun xehe cuví tuhun ra Cristo chí ñu, vatyí ña chitó ñu tyi ican ra cuví ra sacacú chí yo. Ta cha catyi tuhun ihya ñohí vehe caa. 4 Caçan tahvi ndo chahi tacuhva cuví sañahí chí ñu yoso cuhva cuví cutuñi vaha ñi ñu tuhun ra Cristo, tari cuhva tahán chí tyi sacuví.

5 Cachi ço ndo chihin ñu ña ñohó nuu chí Nyoo. Vatyí tyicuan caa ta cuví cahan ndo tuhun Nyoo chihin ñu. 6 Cuñí chí vatyí ndatuhún yo maa maa ri cha vaha, ta cha cachi, (ta cha tahán ñi ñáyivi) tari tahán chí cunyacuví yo cha yihí yo cuenda ra Cristo. Tyicuan ta cuví coto yo yoso caa cunacahan yo tatu ñáá noo tuhun ndacá tuhun ñu chí yo.

Nu sacuhún ra Pablo nocumi chí ñu ñuu Colosas cha yihí cuenda Nyoo

7 Ra Tíquico, yañi yo, ra sahá tyiño tyiño Sutu Mañi yo chí hin, maa ra cunacatyí ra chí ndo yoso caa cuahán nyaí. 8 Yucuan chaha tachí chí ra nu nyicu ndo vatyí nacatyí ra chí ndo yoso caa nyicú ndi. Ta sanduní ca ra ñi ndo. 9 Ta chihin ra Tíquico vachi tucu ra Onésimo, yañi yo. Ta ñi ñi ra. Ta cuñí yo chí ra. Cuví ra noo ra ñuu ndo. Maa ra cucanacatyí ra chí ndo tandihí cha cuví nu nyaí.

10 Ra Aristarco, ra tahir cha ñohó ndi vehe caa, saquichí ra nocumi chí ndo. Ta saquichí tucu ra Marcos, yañi cunducuatyi ra Bernabé, nocumi chí ndo. Ta cha sacote chí ndo tuhun ra Marcos. Tatu chaa ra nu nyicu ndo, vaha cahan ndo chihin ra. 11 Vachi tucu nocumi chí ndo sahá ra Jesús, ra cha nañi tucu Justo. Ta chichi cha tandihí ñu Israel cha yihí cuenda Nyoo, uñi tahan ri ra ihya sahá tyiño ra tuhun Nyoo chihin. Ta nduní xaan ca ñi sahá ra. 12 Vachi tucu nocumi chí ndo sahá

ra Epafra, ra ñuu ndo. Ta maa ra sacuví ra tyiño nuu ra Cristo. Tyicuan ri chicán tahvi ra chaha ndo chi Nyoo tyi nacaca vaha ndo chihin Nyoo. Nacuhva cuenda vaha ndo chi ndo chi Nyoo tacuhva cuvi sacuvi ndo cuhva cuñí ra. ¹³ Ta yuhu cuví cha ndaa vatyi ra Epafra chicán tahvi xaan ra cuenda ndo, ta cuenda ñu cha nyicu nya ñuu Laodicea ta ñuu Hierápolis. ¹⁴ Vachi tucu nocumi chi ndo sahá ra Lucas, ra cha cuví doctor cha cuñí xaan yo chi. Ta vachi tucu nocumi chi ndo sahá ra Demas ñandíhi.

¹⁵ Cuhva ndo nocumi chi yañi yo ta tahan yo cha nyicu ñuu Laodicea. Ta cuhva ndo nocumi chi cu Ninfas ta chi tandíhi ñu yihí cuenda Nyoo cha ndu ín ri vehe ña. ¹⁶ Tatu yaha sacuaha ndo carta ihya, ta sacuhun ndo nu canyicu ñu yihí cuenda Nyoo nya Laodicea na sacuaha tucu maa ñu. Ta sacuaha tucu maa ndo carta cha sacuhin chi ñu Laodicea. ¹⁷ Catyi ndo chi ra Arquipo vatyi na sacuvi vaha ra tyiño cha chahá Sutu Mañi yo chi ra tyi sacuví ra.

¹⁸ Yuhu ra Pablo saquichí nocumi ihya chi ndo. Ta ma naa ñni ndo cha ñohí vehe caa. Ta Nyoo na nasoco ra chi ndo. Ta na cuvi chi tyicuan caa.

Carta Cha Xihna Ri Sacuhun Ra Apóstol Pablo Chi Ñáyivi Ñuu Tesalónica Cha Yihí Cuenda Nyoo

Nu tyaq ra Pablo ta ra tahan ra noo tutu chi ñu yihí cuenda Nyoo

¹ Yuhu ra Pablo chihin ra Silvano ta ra Timoteo, tyaá ndi tutu ihya chi ndo cha cuví ndo ñu yihí cuenda Nyoo ñuu Tesalónica chiña. Vatyí ñn ri cuví ndo chihin Nyoo Sutu yo ta chihin Sutu Mañi yo Jesucristo. Ta Nyoo Sutu yo ta Sutu Mañi yo Jesucristo na nasoco ra chi ndo. Ta na cuhva ra cha coo cha taxi ri añima ndo.

Vaha xaan chinó iñi ñu Tesalónica cuan chi Nyoo

² Tyicuan ri nacuhvá ndi tyahvi nyoo chi Nyoo cha cuenda tandihí ndo. Ta nyita ri chicán tahvi ndi cha cuenda ndo. ³ Tyicuan ri yihí iñi ndi tuhun ndo nuu Nyoo Sutu yo ta nichón iñi ndi vatyí ñi iñi ndo chinó iñi ndo chi Nyoo ta sacuví ndo tyiño nuu ra. Ta ñihi sahá tyiño ndo cha cuenda cha cuñí ndo chi ra. Ta chihin cha ñi iñi ndo yihí iñi ndo cha cuañihi ndo cha cuenda ra Jesucristo. ⁴ Vatyí chitó ndi tyi Nyoo nacachí vaha ra chi nyoho yañi. Ta cuñí xaan ra chi ndo. ⁵ Vatyí quívi

cahan ndi tuhun Nyoo yoso caa sacacú ra añima yo chihin ndo, ñima chihin tuhun yuhu ri cahan ndi, soco tyinyee xaan Tatyí li chi ndi, ta cuaha xaan sacuvi ra chihin tunyee iñi ra. Ta cahan ndi chihin cha chitó vaha ndi tyi tuhun ndicha Nyoo cuví. Ta nyehe vaha ndo yoso caa chiyo ndi quívi chinyaa ndi chihin ndo. Tyicuan caa chiyo ndi cha cuenda cha vaha chi maa ndo.

⁶ Ta quichaha iyó ndo cuhva iyó ndi, ta cuhva iyó Sutu Mañi yo. Vatyí natiñ cuenda ndo tuhun Nyoo, vasi cuaha tindoho nyehe ndo cha cuenda cuan. Soco sii xaan cuñí ndo vatyí maa Tatyí li chahá tusii iñi cuan chi ndo, ⁷ Ta cha tyicuan caa, tyinyee xaan ndo chi tandihí ñu yihí cuenda Nyoo nicahnu ityi Macedonia chiña ta nicahnu ityi Acaya ihya ñandihí, vatyí nyehé ñu cuhva iyó ndo chihin Nyoo. ⁸ Ñima ityi Macedonia ta Acaya ri, soco tandihí ri ityi nu chiñí ñu tuhun ndo chitó ñu tuhun Sutu Mañi yo ta chitó ñu vatyí chinó xaan iñi ndo chi Nyoo. Ta yucuan chaha nyacua ña ñiñi ca cha cahan ndi tuhun Nyoo chihin ñu. ⁹ Vatyí suri maa ñu nacatyí ñu chi ndi yoso caa cha vaha xaan tiñ cuenda ndo chi ndi quívi cuan. Nacatyí ñu yoso caa sandihí ndo tuhun cha sacahnu ndo xitohyo ta quichaha sacuvi ndo tyiño nuu Nyoo nyitó, Nyoo cha ndicha. ¹⁰ Ta nacatyí tucu ñu

yoso caa nyatú ndo naquichi tucu ra Jesús Sehe Nyoo inga chaha ityi andiví. Ican ra cuví ra cha sanandoto Nyoo chii. Ta maa ra cuví ra ra sacacú chi yo tacuhva cha ma tachi tuñi Nyoo chi yo quiví sacutuñi ra chi ñáyiví.

2

Tyiño sahá ra Pablo ñuu Tesalónica

¹ Nyoho yañi, chitó ndo vatyí ñima cha caha ri chahan ndi chicahan ndi tuhun Nyoo ñuu ndo. ² Vatyí chitó ndo yoso caa nyehe ndi tindoho saha ñáyiví ñuu Filipino cha ni cumañi ca cha ndi ñuu ndo. Ta vasi nyehe xaan ndi tindoho ñuu cuan soco quiví cha ndi ñuu ndo cahan tucu ndi tuhun Nyoo chihin ndo chihin cha ña yuhví ndi. Ta vasi xaan xaan nanduví ñáyiví ñuu ndo, soco tyinyee xaan Nyoo chi ndi ta sacoto ndi chi ndo yoso caa sacacú ra aña yo. ³ Vatyí tuhun cha chaha ndi chi ndo maa maa ri cha ndicha cuví. Ta ñahri cha quiñi caa chicá xiñi ndi. Ta ni ñima cha cuñi ndi sandavi ñaha ndi chi ndo. ⁴ Ñahri cha ña vaha cahan ndi, vatyí Nyoo nyehé ra chi ndi, ta maa ra tyatyíño ra chi ndi vatyí sacoto ndi chi ndo yoso caa sacacú ra aña yo. Ta yucuan cuví cha cahan ndi tari cuhva tyatyíño ra chi ndi. Vatyí ña cuñi ndi cuvaha ndi nuu ñáyiví, soco nuu Nyoo cuñi ndi cuvaha ndi, vatyí maa ra nyehé ra ñáa cha caa aña yo. ⁵ Ta nyoho

chitó ndo vatyí ni noo chaha ña cahan ndi chihin tuhun tyaqui cha cuñi ndi sandavi ñaha ndi chi ndo. Ta ni ñima cha cuñi ndi saha ganaa ndi xuhun ta cahan ndi tuhun ihya chihin ndo. Nyoo cuví ra cha ndaa tyi ndicha cha cahín ihya. ⁶ Ta ni noo chaha ña nanducu ndi cuhva cha sacahnu ñáyiví chi ndi, ni nyoho, ni inga ñu. Ndicha, iyó ityi chi ndi cha cunyacá ñaha ndi chi ndo tyi maa ra Cristo tachi ra chi ndi, soco ña cuñi ndi coso ndi siqui ndo cha tyicuan caa. ⁷ Soco cuñi ndi tyinyee ndi chi ndo. Tari noo sihi sacuahnú ña chi sehe ña, sahá cuenda ña chi cue, tyicuan caa cuñi ndi tyinyee ndi chi ndo. ⁸ Cuñi xaan ndi chi nyoho, ta cahví iñi ndi vatyí ñima tuhun Nyoo ri cuhva ndi chi ndo, soco nyacua nya ñayiví ndi ñandihí, cha cuenda cha cuñi ndi chi ndo. ⁹ Nyoho yañi, nicohón iñi ndo yoso caa saha tyiño ndi quiví chinyicu ndi chihin ndo. Sahá tyiño ndi ñicahnú ta cha cuaa vatyí ña cuñi ndi coso ndi siqui ni noo ndo cha ni ri ca cha cahan ndi tuhun Nyoo chihin ndo.

¹⁰ Ta nyoho cuví ndo cha ndaa, ta Nyoo ñandihí, vatyí maa ri cha vaha ta cha ndaa chinyacuví ndi quiví chinyaa ndi chihin ndo cha cuví ndo ñu chinó iñi chi ra Cristo. Maa maa ri cuhva cuñi Nyoo chinyacuví ndi, ta ña chaha ndi cuhva vatyí cahan ña vaha ndo siqui ndi. ¹¹ Ta chitó tucu ndo yoso caa sanduní ndi iñi noo noo ndo chihin

tuhun chaha ndi chi ndo. Sandunyee ndi iñi ndo tari noo ra chihin sehe ra. ¹² Ta catyi ndi chi ndo nacachi coo ndo tari tahan chi coo ñu yihí cuenda Nyoo. Vatyí maa ra nacana chi ndo vatyí coo ndo nu nyacá ñaha ra, ta nyehe ndo cha tyaqui gloria ra.

¹³ Yucuan chaha tyicuan ri nacuhvá ndi tyahvi nyoo chi Nyoo, vatyí quivi chiñi ndo tuhun ra cha cahan ndi chihin ndo, natin cuenda ndo vatyí nacoto ndo tyi tuhun Nyoo cuví ta ñima tuhun ñáyivi ri. Ta ndicha cha tuhun Nyoo cuví, vatyí sacuvi chi vatyí chino iñi ndo chi Nyoo ta nasama ndo cuhva iyó ndo. ¹⁴ Yaha cuan ta nyehe tucu maa ndo tindoho saha ñáyivi ñuu ndo, tari nyehe tucu ñu yihí cuenda ra Cristo Jesús nicahnu ityi Judea. Tyicuan caa sanyehe tucu ñu Israel ityi Judea cuan tindoho chi ñáyivi tahan yo cuenda ra Cristo cuan. ¹⁵ Ta ican ñu Israel cuan cachahñi chi Sutu Mañi yo Jesús tari cachahñi tucu ñu chi ra profeta, ra cachaha cuenda tuhun cahan Nyoo ta ityi chata ca. Ñu Israel cuan tava ñehe ñu chi ndi. Ñima cuhva cuñi Nyoo iyó ñu. Ta tasi cuñi ñu nyehe ñu chi tandihi ñáyivi. ¹⁶ Tatu cuñi ndi cahan ndi tuhun Nyoo chihin ñu cha ñima ñu Israel cuví tacuhva cacu ñu, ña chahá ñu Israel cuan cahan ndi. Ta cha cuenda cha chasí ñu nu cahan ndi, cucuaha ca cuatyí ñu. Ta

vityin nu ndihi tuhun cutachi tuñi xaan Nyoo chi ñu.

Nu catyi ra Pablo vatyí cuñi ra cunyehe ra nu nyicú ñu Tesalónica inga chaha

¹⁷ Yañi, cha yaha cha quita ndi ñuu ndo vasi ña naha nyehe ndi chi ndo soco ñohó xaan iñi ndi chi ndo. Ta chihin cha nñi iñi ndi cuñi ndi cunyehe ndi nu nyicú ndo inga chaha. ¹⁸ Ta nducu ndi cuhva cuhun ndi soco ña cuví. Ta yuhu ra Pablo ñandihí, cuaha xaan chaha nduqui cuhva cuhun ndi, soco tahan ri chaha cha cuñi ndi cuhun ndi ta ña chaha ra ña vaha. ¹⁹ Soco ¿yóó chi ita iñi ndi? Ta ¿yóó chi cuenda cusii cuñi ndi, ta vaha cuñi ndi? ¿Atu ñima cha cuenda maa ndo cusii xaan cuñi ndi nuu Sutu Mañi yo Jesucristo quivi quichi ra inga chaha? ²⁰ Vatyí cha cuenda cha vaha cuahan ndo chihin Nyoo ta nyehé yo tyi ña caha ri sahá tyiño ndi. Ta sii xaan cuñi ndi cha cuenda cuan.

3

¹ Ta yucuan chaha ña cunyehe que cha ma cote yoso caa cuahan ndo chihin Nyoo. Ta natyaji iñi tyi ndoñi ñuu Atenas. ² Ta tachí chi yañi yo ra Timoteo na cuhun ra cunyehe ra chi ndo. Maa ra sacuví ra tyiño nuu Nyoo vatyí in ri chihin ndi cahan ra tuhun yoso caa cacú añima yo sahá ra Cristo. Tachí ndi chi ra nu nyicú ndo na sandunii ca ra iñi ndo ta sandunyee ca ra iñi ndo tacuhva vatyí chinó ca iñi ndo chi

Nyoo. ³ Tyicuan caa ta ni noo ndo ta ma ndu uvi iñi ndo cha cuenda cha nyehé ndo tindoho. Vatyí nyoho chitó ndo vatyí nyaá yo cha nyehe yo tindoho tyehe caa. ⁴ Vatyí ta ninyaá ca ndi chihin ndo, catyí ndi chi ndo vatyí cha cuñí quichi quivi cha nyehé yo tindoho. Ta chitó vaha maa ndo tyi tyicuan caa cuvi. ⁵ Yucuan chaha ña cunyeé que cha cuñí cote tuhun ndo. Ta tachí tyiño chihin ra Timoteo na nyehe ra yoso caa cuhva cuahan chinó iñi ndo chi Nyoo. Vatyí yuhví coto sandavi ñaha cuihna chi ndo ta nandihví tucu ndo nu quiñi caa inga chaha. Vatyí tu tyicuan caa, cucunaa tandihi tyiño saha ndi nu nyicú ndo.

⁶ Soco vityin cha nachaa ra Timoteo cha chahan ra nu nyicú ndo ñuu Tesalónica chiña. Ta nacatyí ra chi ndi vatyí ní iñi ndo chinó iñi ndo chi Nyoo. Ta cuñí xaan ndo chi tahan ndo. Ta catyí ra tyi tyicuan ri nicohón iñi ndo chi ndi ta cuñí xaan ndo nyehe ndo chi ndi, tari nyuhu, cuñí tucu maa ndi nyehe ndi chi ndo. ⁷ Yucuan chaha, yañi, vasi cuaha cha cuví chi ndi ta nyehé ndi tindoho, soco vaha xaan cuñí ndi cha chitó ndi vatyí nyoho vaha chinó iñi ndo chi Nyoo ta ña saña ndo chi ra. ⁸ Tari quivi cha nduchaa ñayivi ndi, cuñí maa ndi cuhva cha nacoto ndi vatyí nyoho ñihi cuahan ndo chihin Nyoo. ⁹ Nyacua ña ñihí ndi cuhva nacuhva ndi tyahvi nyoo chi Nyoo

cha cuenda ndo. Vatyí sii xaan cuñí ndi nuu Nyoo cha cuenda vatyí vaha cuahan ndo chihin ra. ¹⁰ Chicán tahvi xaan ndi chi Nyoo ñicahñu ta cha cuaa, vatyí cuñí ndi cuhun ndi cunyehe maa ndi chi ndo. Tyicuan ta cuvi sandunanii ndi cha chinó iñi ndo.

¹¹ Ta vityin nyatú ndi na tyinyee maa Nyoo Sutu yo ta Sutu Mañi yo Jesucristo tacuhva cuvi cuhun ndi nu nyicú ndo. ¹² Ta na tyinyee ca Sutu Mañi yo Jesucristo chi ndo tacuhva cuñí ca ndo chi noo noo tahan ndo ta chi tandihi ñayivi tari cuñí nyuhu chi nyoho. ¹³ Tacuhva vatyí cunii ca iñi ndo ta cunduvii ndihi añima ndo. Ta ma coo ca cuatyí ndo nuu Nyoo Sutu yo quivi quichi tucu Sutu Mañi yo Jesucristo chihin tandihi ca ñu yihí cuenda ra.

4

Cuhva cha tahán iñi Nyoo cha coo yo

¹ Vityin yañi, chacú ndahvi ndi nuu ndo ta chahá ndi tuhun chi ndo chihin ndusu yuhu Sutu Mañi yo Jesucristo, na coo ca ndo tari cuhva sañaha ndi chi ndo, cuhva tahán iñi Nyoo. Ta sañihi ca ndo coo ndo tyicuan caa noo noo quivi.

² Nyoho cha chitó ndo yoso caa chaha ndi cuhva chi ndo tari chaha tucu maa Sutu Mañi yo Jesús cuhva chi ndi. ³ Cha cuñí Nyoo, ican cuví ihya: Cha nacuhva ndihi ndo chi ndo chi ra tacuhva sanduvii ndihi ra añima ndo. Ta ni noo ndo ta ma coo ndo

chihin noo ñaha sihi o rayi#
tatu ñima ñasihi o y#i ndo cuví.

⁴ Ta tahan tahan ndo cuñí
chi coto ndo yoso caa coo
ndo chihin ñasihi ndo. Coo
vii ndo chihin ña chihin cha
cuñí ndo chi ña. ⁵ Ñima chihin
cha quichi cuvi iñi ndo cha
quiñi caa tari nyacuví ñáyiví
cha ña ñohó nuu chi Nyoo.

⁶ Ta ni noo ndo ta ma sandavi
ñaha ndo chi yañi ndo ta coo
ndo chihin ñasihi ra. Vatyí
Sutu Mañi yo, ñihi xaan tachí
tuñi ra chi ñu sacuví tyicuan
caa, tari cuhva catyí ndi chi
ndo. ⁷ Vatyí Nyoo nacana# ra
chi yo vatyí tacuhva sacuvi
yo cuhva cuñí maa ra, ta
ñima noo cuhva quiñi caa.

⁸ Ta yucuan chaha yóo ñu
cha ña cuñí tyasoho tuhun
ihya, ñima tuhun ñáyiví ri ña
tyasohó ñu, soco tuhun Nyoo
ña tyasohó ñu. Vatyí suri maa
Nyoo chaha# ra Tatyí li ra chi
ndo. ⁹ Soco tuhun cha cuñí yo
chi tahan yo, ña chiñuhú cha
tyai nu tutu ihya tuhun cuan.
Vatyí suri maa Nyoo cha
sañaha# ra chi ndo vatyí cuñi
yo chi tahan yo cuenda Nyoo.

¹⁰ Ta tyicuan caa cuñí ndo
chi tandihí tahan yo nicahnu
Macedonia chiña. Soco chacú
ndahví nuu ndo yañi, vatyí
na cuñi ca ndo chi ñu noo noo
quíví. ¹¹ Nducú ndo cuhva
coo vii ndo. Ta ma tyihi ndo
chi ndo nu ña tahán chi, soco
iin ri tyiño maa ndo ca#a
xiñi ndo. Ta saha tyiño ndo
chihin ndaha ndo tari cuhva
catyí ndi chi ndo quíví cuan.

¹² Tyicuan caa sacuvi ndo
tacuhva vatyí ñáyiví ña ñohó
nuu Nyoo cuasaha ñu ñáyiví

chi ndo. Ta ñahri cuacumañi
chi ndo.

*Yoso caa cucuvi quíví
quichi Sutu Mañi yo Jesús inga
chaha*

¹³ Yañi, ña cuñí ndi cha ma
coto ndo ñáa cha cuví chi
ñáyiví chihí, vatyí coto ndu-
cuihya iñi ndo tari nducuihyá
iñi ñáyiví cha ma tahan chi
nyehe chi Nyoo. ¹⁴ Ta tari
cha chinó iñi yo vatyí chihí ra
Jesús ta nandoto# ra, tyicuan
caa chinó tucu iñi yo vatyí
Nyoo cusanandoto ra chi ñu
ndiyí cha chinó iñi chi ra.

¹⁵ Yucuan chaha catyí ndi
chi ndo tari sañaha# Sutu Mañi
yo chi ndi. Vatyí yoó cha
nyitó yo nyacua nya quíví
quichi ra, ñima xihna ca yo
cuhun ican saha ñu cha yaha#
chihí. ¹⁶ Vatyí suri maa Sutu
Mañi yo cunoo xica ra andiví,
ta cucana chaa ra vatyí maa
ra cuví ra nyacá ñaha. Ta cu-
cana chaa noo ra cuví nuu chi
ángel. Ta cunativí trompeta
Nyoo. Tyicuan ta ñáyiví cha
yihí cuenda ra Cristo ta chihí
ñu, xihna ca ñu cunandoto.
¹⁷ Yaha# cuan ta yoó cha ny-
itó ca yo cundaa xica yo iin
ri chihin ñu nu vico, nu cu-
nañihi tahan yo chihin Sutu
Mañi yo ityi andiví. Ta yu-
cuan ta cucunyata yo chihin
ra tyicuan ri maa. ¹⁸ Yucuan
chaha sandun# ndo iñi tahan
ndo chihin tuhun ihya.

5

¹ Soco ama o ñáa quíví cu-
cuví tuhun ihya, ña niñi cha
cahin tuhun cuan chihin ndo
yañi. ² Vatyí cha chitó vaha
maa ndo vatyí ma tuvi ri

iñi yo ta cuchaa quivi quichi tucu Sutu Mañi yo. Vaty tari cuhva quihvi noo ra suhu vehe ñáyivi cha cha cuaa, tyicuan caa cucuvi. ³ Vaty quivi cha catyí ñáyivi vaty vaha xaan iyó ñu, ta ñahri maa cha yuhvi ñu, tyicuan ta sana iñi ñu ta quichi tindoho cuan siqui ñu. Tari noo ñaha sihi cha cuacacu sehe, sana iñi ña ta quihvi cha uhvi chi ña. Ta tyicuan caa cucuvi chi ñáyivi quivi quichi Sutu Mañi yo, vaty ma cuvi cono ñu. ⁴ Soco nyoho yañi, ñima ca nu ñaa iñi nyicú ndo ta catyi ndo vaty sana iñi ndo ta cuchaa chi quivi Sutu Mañi yo, tari sana iñi ñáyivi tatu quihvi ra suhu vehe ñu. ⁵ Vaty tandihi yo chitó yo yoso caa tahán chi coo yo vaty Nyoo sandundichin ra añima yo, ta ña iyó ca yo nu ñaa iñi tari ñu ña ñohó nuu Nyoo. ⁶ Yucuan chaha ma cuvi yo tari inga ñu cuan. Tari quivi cha quixí ñu vaty ña quichahá ñu cha ndichi Sutu Mañi yo. Soco yoó cuatu tuhva yo ta cachi coo yo. ⁷ Vaty ñu quixí, quixí ñu cha cha cuaa, ta ñu chihi xaan ndixi, chini ñu cha cha cuaa. ⁸ Soco yoó cha cuvi yo ñu cuenda cha ñicahñu, nacachi coo yo. Ta tari noo sindaro sahá ra cuenda chi ra chihin noo cha tyaá ra pechu ra, tyicuan caa saha yo cuenda chi yo chihin cha ñi iñi yo chinó iñi yo chi Nyoo, ta chihin cha cuñi yo chi tandihi ñáyivi. Ta tari sindaro sahá cuenda ra xiñi ra chihin noo caa, tyicuan caa

cuñi chi cha sahá yo cuenda chi yo chihin cha yihí iñi yo tyi cacu yo. ⁹ Vaty Nyoo ña tyaa ra cuhva chi yo vaty tachi tuñi ra chi yo, soco nacachi ra chi yo vaty cacu yo cha cuenda Sutu Mañi yo Jesucristo. ¹⁰ Vaty ra Jesucristo chihí ra cha cuenda yo vaty tacuhva coo yo ñin ri chihin ra. Ñahri saha vasi cha chihí yo o iyó ca yo, soco tandihi yo coo yo ñin ri chihin ra. ¹¹ Yucuan chaha sanduní ca ndo iñi tahan ndo ta sandunye ca ndo iñi ñu, tari cuhva cuahan nyacuví ndo vityin.

Nu chaha ra Pablo tuhun chi ñu

¹² Soco yañi, chacú ndahvi ndi nuu ndo, na saha ndo ñáyivi chi ra sahá tyiño nu nyicú ndo. Vaty nyisó ra tyiño cuenda Sutu Mañi yo ta chahá ra tuhun chi ndo. ¹³ Cuñi chi cha saha xaan ndo ñáyivi chi ra chihin cha cuñi ndo chi ra. Vaty sacuvi ra tyiño Sutu Mañi yo. Ta vaha coo ndo chihin tahan ndo cuenda Nyoo.

¹⁴ Ta tyatyíño ndi chi ndo yañi, vaty cuhva ndo tuhun chi ñu cha ña cuñi saha tyiño. Ta sanduní ndo iñi ñu cha ña ñi ca iñi. Ta tyinyee ndo chi ñu vita cuñi vaty ta chino vaha ca iñi ñu. Ta cucama iñi ndo chihin tandihi ñáyivi.

¹⁵ Saha ndo cuenda coto sacuvi ndo cha ña vaha chihin ñu nyacuví cha ña vaha chihin ndo. Nducu ndo cuhva sacuvi ndo cha vaha chihin tahan ndo cuenda Nyoo ta chihin tandihi ñáyivi.

16 Tyicuan ri cūsiñ cuñi ndo. 17 Ta cācan tahvi ndo tyicuan ri maa. 18 Naçuhva ndo tyahvi nyoo chi Nyoo cha cuenda tandihī cha cuvī, Vatyī ican ihya cuvī cha cuñi Nyoo cha sacuvi yo cha cuvī yo ñu chinó iñi chi ra Cristo Jesús.

19 Ma ndahva ndo ñuhu Tatyī li cha nyaá añaima ndo. 20 Ma cuacu nyaa ndo tuhun Nyoo cha cahán noo ra cahán tuhun chahá Nyoo. 21 Tññ cuenda ndo tandihī cha cahán ra. Ta naquehen ndo cha vaha. 22 Cuachiyo ndo nuu tandihī cha quiñi caa.

23 Ta maa Nyoo ra iyó cha taxi ri chii, na sanduvii ca ra añaima ndo tacuhva vatyī ññ ri chi maa ra nacuhva cuenda ndo chi ndo. Ta na cocumi ra añaima ndo ta cha chiñi tuñi ndo ta coño ñuhu ndo tacuhva vatyī ma coo ca cuatyī ndo quivī quichi tucu Sutu Mañi yo Jesucristo. 24 Ra cha nacachi chi ndo, cuvī cunyeē iñi yo chi ra, vatyī maa ra cusacuvi ra tandihī maa ihya.

Nu ndihī cañan ra Pablo ta chaha ra nocumi chi ñu

25 Yañi, cācan tahvi ndo cha cuenda ndi.

26 Ta naçuhva ndo nocumi chi tandihī yañi yo cuenda Nyoo.

27 Tyatyīñé chi ndo chihin ndusu yuhu Sutu Mañi yo vatyī saçuaha ndo carta ihya nuu tandihī tahan yo cuenda Nyoo.

28 Ta na nasoco Sutu Mañi yo Jesucristo chi ndo. Ta na cuvī chi tyicuan caa.

Carta Cha Cu Uvi Cha Sacuhun Ra Apóstol Pabło Chi Ñáyivi Ñuu Tesalónica Cha Yihí Cuenda Nyoo

Nu tyaq ra Pablo ta ra tahan ra noo tutu chi ñu ñuu Tesalónica cha yihí cuenda Nyoo

¹ Yuhu ra Pablo chihin ra Silvano ta ra Timoteo, tyaá ndi noo tutu ihya tyi sacuhun ndi chi ndo cha cuví ndo ñu yihí cuenda Nyoo ñuu Tesalónica chiña. Vatyí ñn ri cuví ndo chihin Nyoo Sutu yo ta chihin Sutu Mañi yo Jesucristo. ² Ta na nasoco Nyoo Sutu yo ta Sutu Mañi yo Jesucristo chi ndo. Ta na cuhva ra cha taxi ri coo añima ndo.

Nu catyi ra Pablo yoso caa cusacutuñi Nyoo chi ñu iyó cutyi quivi quichi ra Cristo

³ Nyoho yañi, tyicuan ri cuñí chi cha nacuhva ndi tyahvi nyoo chi Nyoo cha cuenda ndo, vatyí tyicuan caa tahán chi cha sacuví ndi cha cuenda cha ñihi ca cuahan chinó iñi ndo chi Nyoo noo noo quivi, ta siin ri cuñí xaan ca ndo chi tahan ndo. ⁴ Yucuan chaha sií cuñí ndi cahán ndi tuhun ndo chihin nuu ñu yihí cuenda Nyoo inga ca vehe ñuhu. Vatyí nyoho cama xaan iñi ndo ta vaha xaan chinó iñi ndo chi Nyoo cha ni ri ca yahá ndo tandihi

tindoho sanyehé ñáyivi chi ndo. ⁵ Ihya sañahá chi yo vatyí vaha cuhva sacutuñi Nyoo chi yo, vatyí nu ndihi tuhun cusaha Nyoo tuhun vatyí naña tucu nyoho quihvi ndo nu nyacá ñaha ra. Vatyí cha cuenda tuhun ra, nyehe xaan ndo tindoho vityin.

⁶ Ta cha cuenda chi Nyoo, vaha cha cutyiyahvi ra chihin tindoho chi ñu sanyehé tindoho chi ndo. ⁷⁻⁸ Ta chi nyoho cha nyehé ndo tindoho sahá ñu, cuhva ra cha nyitatu ndo tari cuhva tucu ra chi nyuhu, quivi cuquichi tucu Sutu Mañi yo Jesucristo nya andivi chihin ángel cha iyó xaan tunyee iñi ra chi, quichi ra chihin ñuhu cha cayú. Vatyí cutachi tuñi ra chi ñáyivi ña ñohó nuu Nyoo, ñu ña quichahá tuhun ra, tyi cuví ra Sutu Mañi yo Jesucristo, ra quichi sacacu chi yo. ⁹ Ñu cuan, cundoho ñu ta ma ndihi maa cha ndoho ñu, ta cunaa ñu nuu Sutu Mañi yo Jesucristo vatyí ma nyehe ñu chi ra. Ni ma nyehe ñu ñana cha cahnu cuví ra chihin tunyee iñi ra ¹⁰ quivi cuquichi ra. Vatyí quivi cuan ñu yihí cuenda ra cusacahnu ñu chi ra, tandihi ri ñu chinó iñi chi ra. Ta mahñu ñu, ñohó tucu nyoho vatyí chinó iñi ndo cha ndaa cha chahá ndi chi ndo.

¹¹ Yucuan chaha tyicuan ri chicán tahvi ndi chaha ndo, na tyinyee Nyoo yo chi ndo tacuhva na saha ra tuhun vatyí naña ndo cha cuví ndo ñáyivi nacachi ra. Ta chicán tahvi tucu ndi

chaha ndo na tyinyee ra chi ndo tacuhva cuvi sacuvi ndo cha vaha chihin tunyee iñi ra. Ta tandihí tyiño sahá ndo nuu ra cuacacu vaha, suri cha cuenda tunyee iñi chahá ra chi ndo vatyí chinó iñi ndo chi ra. ¹² Tacuhva sacahnu ñáyiví sivi Sutu Mañi yo Jesucristo, vatyí nyehé ñu cuhva iyó ndo. Ta maa ra cusacahnu ra chi ndo nuu ñáyiví cha cuenda tumañi iñi cha chahá Nyoo chi ndo cha cuenda ra.

2

Ra cha ñahri maa ley Nyoo iyó chi

¹ Ta cha cuenda quiví cuquichi Sutu Mañi yo Jesucristo nu cusandu in ri ra chi yo, cuñí cahin vityin, nyoho yañi. Vatyí chacú ndahvi nuu ndo, ² ma yatyi xaan cutondo xiñi ndo. Ni ma nayuhvi ndo vatyí nyacua nya tatyí ñavaha ta cucatyí chi chi ndo vatyí cha cha quiví Sutu Mañi yo, ta nyacua nya ra cahán tuhun Nyoo ta cucatyí ra vatyí cha cha quiví cuan, ta cutyaa ra nu carta ta cucatyí ra tyi yuhu sacuhin carta cuan chi ndo. ³ Ni noo cuhva ma cuhva ndo cha sandavi ñaha ñu chi ndo. Vatyí cha ni cumañi ca cha quiví cuan cuaha xaan ñu cusandihí ñu cha chino iñi ñu chi Nyoo ta cundicuita rayii cha ñahri ley Nyoo iyó chí, ra cacu vatyí cunaa cuví ra cuan. ⁴ Ican ra cuví ra xaan iñi chi Nyoo. Cundicuita ra siqui tandihí cha nyisó sivi Nyoo. Tandihí cuhva sacahnú ñáyiví chi

Nyoo cunducuita ra siqui. Ta nyacua nya chichi vehe ñuhu cahnu Nyoo ta cucunyaa ra ta cunyaca ñaha ra, cusaha ra tyi Nyoo cuví ra.

⁵ ¿Atu ña nichón iñi ndo vatyí ta ni nyaa que chihin ndo cahin tuhun ihya chihin ndo? ⁶ Soco vityin nyoho chitó ndo ñáá tuhun cha ña ndicuita ñaha ra tacuhva vatyí ndicuita ra soco nya quiví tahán maa chí. ⁷ Cha iyó tuhun cha ña quichahá ñáyiví chi Nyoo siqui ñuhu ñayiví, soco iyó xehe chí, vatyí iyó noo cha chasí, ta ña chahá cuan cha nducuaaha chí. Soco quiví canyaha cuan, cunduñihi cha quiñi caa cuan. ⁸ Tyicuan ta cundicuita ra quiñi caa cuan ta Sutu Mañi yo cucahñi ra chí ra chihin tatyí yuhu ra ta cusanaa ra chí ra chihin cha xiño ra quiví cuquichi ra. ⁹ Ra quiñi caa cuan, cuenda cuihna cuquichi ra. Ta tandihí tunyee iñi cuihna cucoo chí ra, ta cusandavi ñaha ra chí ñáyiví chihin seña ta milagru ta cha iyo. ¹⁰ Tandihí ri nuu cha ña vaha cucotyíño ra tacuhva cuvi sandavi ñaha ra chí ñáyiví cha cucunaa. Vatyí ñu cuan ña cuñí ñu quichaha ñu cha ndicha tacuhva cuvi cacu ñu. ¹¹ Ta yucuan chaha cucuhva Nyoo vatyí cusandavi ñaha cha ña vaha cuan chí ñu. Ta cuchino iñi ñu cha ña ndicha. ¹² Tacuhva vatyí cutachi tuñi ra chí tandihí ñu vatyí ña cuñí ñu chino iñi ñu cha ndicha. Ta tahán ca iñi ñu sacuví ñu cha ña vaha.

Nu cahan ra Pablo tuhun ñu cha nacachi Nyoo vatyí cacu ñu

¹³ Soco tyicuan ri cuñi chi cha nacuhva ndi tyahvi nyoo chi Nyoo cha cuenda nyoho yañi. Vatyí cuñi xaan Sutu Mañi yo chi ndo. Vatyí Nyoo nacachi ra chi ndo nyata quivi xihna ri vatyí cuacacu ndo cha cuenda cha sanduvaha Tatyí Ii ra añima ndo ta cha cuenda cha chinó iñi ndo cha ndicha. ¹⁴ Yucuan cuenda nacana Nyoo chi ndo quivi cahan ndi tuhun ra chihin ndo tacuhva vatyí cuñihi ndo chiin cha cahnu cuví Sutu Mañi yo Jesucristo.

¹⁵ Yucuan chaha sãni ndo iñi ndo, nyoho yañi. Ta ma naa iñi ndo tuhun cha sañaha ndi chi ndo ta ni nyaa ca ndi chihin ndo. Ni ma naa iñi ndo tuhun cha tyaã ndi nu tutu cha sacuhun ndi chi ndo. ¹⁶⁻¹⁷ Sutu Mañi yo Jesucristo ta Nyoo Sutu yo cuví ra cha cuñi chi yo. Ta cha cuenda tumañi iñi cha chahá ra chi yo sanduní ra iñi yo tyicuan ri maa. Ta chahá ra cha cuita iñi yo coo yo chihin ra. Ta na nacuhva maa ra cha sã cuñi añima ndo. Ta na sandunaní ra iñi ndo, tacuhva cuvi cahan ndo ta sacuvi ndo tandihi nuu cha vaha.

3

Nu chicán ra Pablo na cacan tahvi ñu chaha ra

¹ Nu ndihi tuhun, nyoho yañi, çacan tahvi ndo chaha ndi tacuhva vatyí numi ri chaa tuhun Sutu Mañi yo tandihi ri ityi. Ta na quichaha ñáyivi ta natiin cuenda ñu tari

natiin cuenda nyoho. ² Çacan tahvi tucu ndo tacuhva vatyí na cacu ndi ndaha ñáyivi ña vaha, ñu quiñi iyó. Vatyí ña tandihi ñáyivi chinó iñi ñu chi Sutu Mañi yo. ³ Soco Sutu Mañi yo ndicha ra. Ta maa ra cuasaquehen ityi ra chi ndo, ta cuasaha cuenda ra chi ndo coto tiin ra ña vaha chi ndo. ⁴ Ta cunyeé xaan iñi ndi chi Sutu Mañi yo vatyí nyoho sacuví ndo tari cuhva catyí ndi chi ndo, ta cusacuvi ca ndo. ⁵ Ta vityin na tyinyee ca Sutu Mañi yo chi ndo tacuhva cuñi ca ndo chi ñáyivi tari maa ra cuñi ra chi ñu. Na tyinyee ra chi ndo na cucama iñi ndo cuhva nyehe ndo tindoho, tari ra Cristo cunyeé xaan iñi ra nu nyehe ra tindoho.

Tahán chi cha saha tyiño yo

⁶ Ta vityin chihin ndusu yuhu Sutu Mañi yo Jesucristo, catyí ndi chi ndo, nyoho yañi, ma cutahan ndo chihin yañi yo ra ña cuñi saha tyiño, ta ña iyó ra cuhva sañaha ndi chi ndo. ⁷ Vatyí nyoho chitó ndo yoso caa tahán chi coo ndo tari cuhva sañaha ndi chi ndo. Vatyí nyuhu ña chinyicu ndi chihin ndo cha ña sahá tyiño ndi. ⁸ Ta ni ña chachi ndi cha chii ndo cha ña tyiyahvi ndi. Soco saha tyiño ndi ñicahñu ta cha cuaa vatyí ña cuñi ndi coso ndi siqui ni noo ndo. ⁹ Vasi iyó chi ityi chi ndi cha cacan ndi cha tyinyee ndo chi ndi, soco nyuhu saha tyiño ndi vatyí cuñi ndi sañaha ndi noo cuhva vaha cunyicon ndo.

¹⁰ Vatyí quiví chinyaa ndi chihin ndo, catyí ndi chi ndo vatyí ñu cha ña cuñí saha tyiño, ma cachi ñu. ¹¹ Cahán ndi siqui ihya vatyí ñihí ndi tuhun vatyí yihí ndo chicá noo yanga ri ndo ta ñahri maa tyiño sahá ndo. ¹² Chi nyoho cha iyó ndo tyicuan caa, catyí ndi chi ndo chihin ndusu yuhu maa Sutu Mañi yo Jesucristo, na casaha tyiño vaha ndo, ta yaha ndo noo noo quiví.

¹³ Yañi, ma cutatu ndo sacuvi ndo cha vaha. ¹⁴ Tatu iyó noo ra ña cuñí quichaha tuhun cahán ndi nu tutu ihya, saha ndo cuenda chi ra ta ma cutahan ndo chihin ra tacuhva na cucahan nuu ra. ¹⁵ Soco ma cuxaan iñi ndo chi ra, soco cuhva ndo tuhun chi ra vatyí yañi yo cuví ra.

Nu ndihí cahan ra Pablo

¹⁶ Sutu Mañi yo taxi ri iyó aña ra, ta suri maa ra na cuhva ra cha taxi ri coo aña ndo tandihí ri cuhva tandihí ri quiví. Ta ñacuhva ndo cha cunyaa vaha ra chihin tandihí ndo. ¹⁷ Yuhu ra Pablo tyai nocumi ihya chi ndo chihin ndahi, ta chihin letre. Ta tyehe caa tyihí firme nu tandihí carte. Ta tyehe caa tuhvé tyai. ¹⁸ Ta Sutu Mañi yo Jesucristo na nasoco ra chi tandihí ri ndo. Ta na cuvi chi tyicuan caa.

Carta Cha Xihna Ri Sacuhun Ra Apóstol Pablo Chi Ra Timoteo

*Nu tyaa ra Pablo noo tutu
chi ra Timoteo*

¹ Yuhu ra Pablo cuví noo apóstol chi ra Jesucristo vatyí tachí ra chii na caque tyiño ra. Maa Nyoo cuví ra sacacú chi yo. Ta ican ra catyí tyi sacuvi tyiño ihya, ta Sutu Mañi yo Jesucristo ñandihí. Vatyí maa ra cuví ra cha yihí iñi yo. ² Tyaí tutu ihya chi yoho Timoteo vatyí sehe vahi cuví chuun cha cuenda cha chinó iñun tuhun ra Cristo cha sacote chuun. Ta cuñí vatyí nasoco Nyoo Sutu yo ta Sutu Mañi yo Jesucristo chuun. Ta na nyehe ndahvi ra chuun. Ta na coo ca cha taxi ri añimon saha ra.

*Nu sañaha ra Pablo chi
yo yoso caa saha yo cuenda
tuhun cha ña ndicha*

³ Quiví quite ñuu Éfeso chiña cha cuaquichi ityi Macedonia ihya, catyí chuun na ndoun Éfeso chiña ta catyun chi suhva ñu vatyí ma sañaha ñu tuhun cha ña ndicha. Ta vityin catyí tiqui chuun na sacuvi con tari cuhva catyí chuun quívi cuan. ⁴ Catyun chi ñu cuan vatyí ma tyaa ñu xiñi ñu tuhun tyisu, ni tuhun cha cuví chi noo noo sutu chahnu ñu. Vatyí cha nuu cha tyinyeé chi chi yo, satondó chi xiñi yo. Maa maa ri cha

ñima ri tuhun cuví yuhu yo. Ña tyinyeé chi chi yo cha chinó iñi yo cha sacuví ca yo cha catyí Nyoo.

⁵ Soco tuhun cha catyí maa yo chi ñáyivi, cha cuñi yo chi tahan yo chihin cha cacú añima yo cha sanduvaha Nyoo. Cuñi yo chi ñu chihin cha vaha chicá xiñi yo ta chihin cha ndicha chinó iñi yo chi Nyoo. ⁶ Soco yihí ñu saña ñu tuhun ihya ta quita caxiin ñu chihin tuhun cha ñima ri tuhun. ⁷ Cuñí ñu cuví ñu ñu sacuahá cuenda ley chahnu Nyoo soco ni maa ñu ta ña cutuñí iñi ñu tuhun cahán ñu.

⁸ Chitó yo tyi ley cuan, vaha chi, soco cotyiño yo tari cuhva tahán chi. ⁹ Cuñí chi coto yo vatyí ni noo ley ña chicunyaá chi cha cuenda ñu vaha. Soco nyaá chi cha cuenda ñu nacahnú nu cahán Nyoo, ñu iyó cuatyí, ñu quiñi iyó, ñu ña saha ñáyivi chi Nyoo. Nyaá tucu chi cha cuenda ñu chahñí chi sutu, chi sihi, ta cha cuenda tandihí ñu chahñí. ¹⁰ Nyaá ley cuan cha cuenda ñu iyó chihin rayi o ñusihi ta ñima yí ña o ñasihi ra cuví. Nyaá chi cha cuenda ra ca iyó chihin tahan yí, ta cha cuenda ñu suhu cha chii ñáyivi, ta ñu cuendu, ta ñu cha catyí: “Chito vaha Nyoo”, ta ña ndicha cha cahán ñu. Ta suri nyaá tucu ley cuan cha cuenda yóo ñu cha ña nyicon cuhva cahan tuhún Nyoo. ¹¹ Ta tuhun tyaqui xaan cha sacoto Nyoo chi yo cha cuenda ra Cristo,

ican cuví tuhun cha nacuhva cuenda Nyoo chii vatyí sacoté chi ñáyiví. Maa ra cuví ra cha sacahnú yo.

Chahá ra Pablo tyahvi nyoo chi Nyoo vatyí nyehé ndahvi ra chi ra

¹² Nacuhvé tyahvi nyoo chi Sutu Mañi yo Jesucristo cha cuenda tunyee iñi cha chaha ra chii ta nyehé ra chi tari noo ra chinó vaha iñi, ta natyaa tyiño ra chii vatyí sacuví tyiño nuu ra. ¹³ Tyehe caa sacuvi ra chihin vasi ta ityi chata ca yuhu cahan ña vahi siqui ra. Chica nyiquen chi ra ta cahan cuehi chi ra. Soco Nyoo cundahvi cuñi ra nyehé ra chii, vatyí yuhu ta chino ca iñi chi ra, ta ña chite cha chinyacuví. ¹⁴ Ta tyinyee xaan Sutu Mañi yo chii. Ta chaha ra cha chino xaan iñi yo chi ra, ta cha cuñi xaan yo chi ñáyiví vatyí in ri cuví yo chihin ra.

¹⁵ Ta ndicha, cha ndicha vaha cuví tuhun ihya. Ta tahán chi cha chino iñi yo, vatyí ra Cristo Jesús quichi ra siqui ñuhu ñayiví ihya vatyí sacacú ra chi ñu iyó cuatyí. Ta yuhu cuví noo ra quiñi caa ca cha nuu tandihí ñu cuan. ¹⁶ Yucuan chaha xihna que tava Nyoo chii nu quiñi caa vatyí tacuhva sañaha ra Jesucristo chi ñáyiví tyi cuñi xaan ra chi ñu. Tacuhva vatyí nachino iñi ñu ta cucoo ñu noo ñayiví chaa cha ma naa ca maa. ¹⁷ Yucuan chaha na sacahnu yo chi ra cha tyicuan ri nyacá ñaha, ra cha ñahri tuhun chihí iyó chi, ra cha ña cuví nyehé yo chi, ra cha noo

ri maa ra cuví Nyoo ta chitó ra tandihí cha chiñi tuñi. Na sacahnu yo chi ra ta na cunyaca ñaha ra tyicuan ri maa. Ta na cuvi chi tyicuan caa.

¹⁸ Ihya tuhun chahí chuun, yoho Timoteo sehi, vatyí cañi tahan vahun chihin tatyí ña vaha chihin cha chinó iñun, ta chihin cha vaha cuñi añimon tyi chitón tyi vaha sacuvun noo cha sacuvún vatyí suri tuhun ihya cachaha ra hermano chuun chihin ndusu Nyoo. ¹⁹ Ta ma sandihun cha chinó iñun chi Nyoo ta sacuvun cha vaha na vaha cuñi añimon. Vatyí sava ra sandihí ra tuhun ihya, yucuan chaha caquita xiin ra. ²⁰ Tyicuan caa sacuví tucu ra Himeneo ta ra Alejandro. Ta yucuan chaha nacuhva cuende chi ra chi cuihna, na cacutuhva ra yoso caa tahán chi sacuvi ra ta ma cahan ña vaha ca ra chi Nyoo.

2

Nu sañaha ra Pablo yoso caa cacan tahvi yo

¹ Catyí chi ndo vatyí cha nuu tandihí ca, tahán chi cha cacan tahvi ndo chi Nyoo cha cuenda tandihí ñáyiví. Ta nacuhva ndo tyahvi nyoo chi Nyoo cha cuenda ñu. ² Cacán tahvi ndo cha cuenda ra cacuvi rey ta cha cuenda tandihí ra cacuví tyiño. Cacán tahvi ndo cha cuenda ra tacuhva cuví coo vaha yo, coo taxi yo, coo yo noo ñayiví cachi nuu Nyoo ta nuu ñáyiví. Ta cusaha ñu ñáyiví chí yo.

³ Vatyí ihya cuví cuhva tahán iñi Nyoo ra cha sacacú chi yo. ⁴ Ta maa ra cuñí ra vatyí cacu tandihi ñáyivi. Ta cuñí ra cha nacoto ñu cha ndicha. ⁵ Vatyí iyó noo ri Nyoo. Ta iyó noo ri ra cuví chaa nuu Nyoo tyiño nuu yo. Ican ra cuví ra Cristo Jesús. Ta cuví ra ñáyivi tari maa yo. ⁶ Ta maa ra Jesucristo chaha ra ñayivi ra tyiño nuu tandihi ñáyivi. Tyiyahvi ra cuatyí yo tacuhva cuví cacu tandihi yo. Ta chinq cava cuan quivi tyaq maa Nyoo cuhva. ⁷ Cha cuenda ihya, tyatyíño Nyoo chii, vatyí cahin tuhun ra, ta cuvi apóstol ra, tachí ra chii vatyí sañahi chi ñu cha ñima ñu Israel cuví, yoso caa nachino iñi ñu cha ndicha. Ta nyoho chitó ndo tyi ña tuhvé cahín cuendu vatyí cuenda ra Cristo yihí.

⁸ Yucuan chaha cuñí vatyí cacan tahvi rayi tandihi ri ityi. Ta na coo ra noo ñayivi ndii. Ta na sacahnu ra chi Nyoo chihin cha nacoñehe ra ndaha ra nuu Nyoo. Ta vaha caca xiñi ra. Ta ma coo ra tisihi chihin ñáyivi. Ta ni ma xaan ra. ⁹ Tyicuan caa tucu ñusihi. Cachi cuhva cuhno ñu, tari cuhva tahán chí cuihno ñu yihí cuenda Nyoo. Ta ma iyo xaan cuhno ñu. Ma iyo xaan sanduvii ñu xiñi ñu. Ñima chihin xuhun cuaan o yuu tyaqui, o chihin sahmayahvi xaan sanduvii ñu chí ñu. ¹⁰ Soco chihin cha cachi coo ñu ta chihin cha sacuvi ñu cha vaha na sanduvii ñu chí ñu, tari tahán chí sacuvi ñu nacuhva cuenda chí chí

Nyoo. ¹¹ Ta taxi ri cunyaa ñusihi ta tyasoho ñu tuhun Nyoo. Ta saha ñu ñáyivi chí ra chahá tuhun chí ñu. ¹² Vatyí ña chahí cha sañaha ñusihi. Ni ña chahí cha cunyaca ñaha ñu chí rayi. Soco taxi ri na cunyaa ñu. ¹³ Vatyí xihna ca chí ra Adán savaha Nyoo ta yaha cuan ta chí cu Eva. ¹⁴ Ta ñima chí maa ra Adán sandavi ñaha ra ña vaha, soco chí ñasihi ra cuvi sandavi ñaha ra ta chicoo cuatyí ña. ¹⁵ Soco ñusihi cucacu ñima ñu cha cuenda cha sacacú ñu sehe ñu, ta sacuahnú vaha ñu chí chí. Soco tatu chinó vaha iñi ñu chí Nyoo ta cuñí ñu chí ra ta chí ñáyivi, ta cachi coo ñu nuu Nyoo ta nuu ñáyivi ñandihí.

3

Yoso caa tahán chí coo ra yihí ndaha chí ñu yihí cuenda ra Cristo

¹ Ndicha tuhun ihya: Tatu minoo ndo cuñí ndo quindaha ndo chí ñáyivi yihí cuenda ra Cristo, vaha xaan tyiño quichí cuvi iñi ndo sacuvi ndo. ² Soco niñi cuñí chí vatyí ra yihí ndaha vehe ñuhu cuvi ra noo ra ñahri cuatyí iyó. Ta cuñí chí cha coo noo ri ñasihi ra. Ta cuñí chí cha cuvi ra noo ra tyihí tuñi vaha iñi yoso caa cunyacuvi, noo ra vaha nuu ñáyivi. Ta cuñí chí vatyí vaha cuví ra chihin ñáyivi chaa vehe ra. Ta coto ra yoso caa sañahá ra. ³ Ma cuvi ra noo ra tuhvá chihí ndixi, ni ma cuvi ra noo ra nanducú tisihi. Ta ma cuvi ra noo ra nducu xuhun noo cuhva ña vaha. Soco cuñí chí

cha vaha ñáyiví cuví ra, ta cuví ra noo ra ña tuhvá cañi tahan. Ta ma cuví ra noo ra cuñí xaan xuhun. ⁴ Ta cuví ra noo ra yihí ndaha vaha ñasihí ta sehe: Noo ra nyacá ñaha chi sehe tacuhva vatyí quichaha ñu chi ra, ta saha ñu ñáyiví chi ra. ⁵ Vatyí tatu ña chitó ra cunyaca ñaha ra vehe ra, ¿yoso caa cusaha cumi ra vehe ñuhu Nyoo? ⁶ Ta noo ra nichaa chihin tuhun Nyoo ña tahán chi quindaha ra vehe ñuhu vatyí coto sacahnu ra chi ra ta tachi tuñi Nyoo chi ra, tari tachi tuñi ra chi cuihna vatyí cahnu sahá ra chi ra. ⁷ Ta sñin ri cuñí chi vatyí cuví ra noo ñáyiví vaha nuu ñu ityi chata, coto tahan ra tichan nuu ta cana cava ra chichi ndaha cuihna.

Yoso caa tahán chi coo noo ra tyinyee chihin tyiño vehe ñuhu

⁸ Ta tyicuan caa tucu ra tyinyeé chihin tyiño vehe ñuhu. Na cachi coo ra. Ma cuví ra noo ra cuendu, ta ma cuví ra noo ra tuhva chihí ndixi ñandihí. Ta ni ma nyiyo iñi ra saha canaa ra xuhun chihin noo cuhva ña vaha. ⁹ Cuñí chi vatyí cutuñí vaha iñi ra yoso caa tahán chi chino iñi yo chi Nyoo ta coto vaha ra tyi vaha cuahan ra chihin Nyoo. ¹⁰ Ta cuñí tucu chi cha nyehe xihna yo tatu vaha iyó ra chihin Nyoo tyicuan ta cuví sacuvi ra tyiño vehe ñuhu. ¹¹ Ta tyicuan caa tucu ñusihí, cuñí chi vatyí cuví ñu ñáyiví vaha. Ma ññi ñu cuendu. Ta cachi coo ñu. Ta niñi cuñí ñu chihin tandihí

ri tyiño. ¹² Noo ra tyinyeé chihin tyiño vehe ñuhu na coo noo ri ñasihí ra. Ta cuñí chi vatyí coto vaha ra cunyaca ñaha ra chi sehe ra ta ñáyiví nyicú vehe ra. ¹³ Vatyí ra tyinyeé, tatu vaha sacuvi ra tyiño cha tahán chi sacuvi ra, cuahan ca ra ityi nuu chihin Nyoo. Ta cunñi ca iñi ra cahan ra tuhun cha chinó iñi ra chi ra Cristo.

Noo tuhun xehe cuenda cuhva chino iñi yo

¹⁴⁻¹⁵ Yihí iñi cha cuhin cha numi ri cunyehe nu nyaún. Soco tatu cucuei, yucuan chaha tyai ihya chuun tacuhva coton yoso caa tahán chi coo ñáyiví cuenda Nyoo. Vatyí maa yo cuví yo vehe ñuhu Nyoo nyitó. Ta cuñí chi vatyí sañihí ca yo sañaha yo cha ndicha cha cumí yo chi inga ñáyiví. ¹⁶ Cha ndicha cuví vatyí yaha xaan cuhva cahnu tuhun xehe cha sanatuvi Nyoo, vatyí coo yo tari iyó maa ra: Nyoo nanduvi ra rayñi ta chicoo ra chichi noo coño ñuhu tari maa yo. Ta catyí Tatyí Ii vatyí vaha ra. Ta nyehe ángel chi ra. Nicahnu ñuhu ñayiví cahán ñu tuhun ra. Ta chinó iñi ñáyiví chi ra nicacahnu ñuhu ñayiví. Ta cuanuhu ra nya gloria.

4

Nu catyí ra Pablo vatyí yihí ñu ma chino ca iñi ñu nu cuahan chi tyembu

¹ Soco cahán cachi Tatyí Ii ta catyí chi vatyí nu

cuandihí tyembu yihí ñu ma chino ca ñi ñu chi ra Cristo vatyí cutyasoho ñu tuhun cahán tatyí ña vaha cha sandavi ñaha chi ñu. Ta cunyicon ñu ndusu ñuhu cuihna. ² Cutyasoho ñu tuhun cahán ñu cuendu. Ta ñu cuendu cuan ña tuví ca ñi ñu cuhva nyacuví ñu vatyí cha ndundava xaan añima ñu. Tari cha cayú añima ñu chihin noo caa ihñi ta ndundava chi cuví cuan. ³ Cucasi ñu cuan nu tandaha ñáyivi. Ta cucatyí ñu vatyí ña vaha cha cachi yo suhva nuu nyayu. Vasi chitó yo tyi tandihí nuu cha cachi yo, Nyoo savaha. Ta tandihí yo cha chinó ñi yo chí Nyoo ta chitó yo cha ndicha, cuví cachi yo ta nacuhva yo tyahvi nyoo chí ra. ⁴ Vatyí tandihí cha savaha Nyoo ta vaha. Ta ña tahán chí catyí yo tyi ña vaha. Cuví cachi yo tatu nacuhva yo tyahvi nyoo chí Nyoo. ⁵ Vatyí ndundhí chí cha cuenda tuhun Nyoo ta cha cuenda cha chicán tahvi yo chí Nyoo.

Yoso caa noo ra vaha sacuví tyiño nuu ra Jesucristo

⁶ Tatu sañahun tuhun ihya chí tandihí yañi yo, cua cuvun noo ra vaha cahán tuhun ra Cristo Jesús. Ta tuhun cha chinó ñi yo ta tandihí tuhun ra Cristo cha nyicón, cua tyinyee chí chuun. ⁷ Soco ma quichahun tuhun cuendu, tuhun tondo cha iyó ñáyivi ihya. Vaha ca saníñun chuun sacuvun maa maa ri cuhva cuñí Nyoo. ⁸ Cha saniñí yo ndunye coño ñuhu yo

tyinyee chí suhva chí yo. Soco cha saniñí yo sacuví yo cuhva cuñí Nyoo, tyinyee chí chí yo tandihí ri cuhva, vatyí tyinyee chí chí yo ñáyivi ihya. Ta tyinyee tucu chí chí yo cha coo vaha yo nu cuchaa yo andivi. ⁹ Ta ndicha, cha ndicha vaha cuví tuhun ihya ta tandihí yo tahán chí cha chinó ñi yo. ¹⁰ Ta suri cha cuenda ihya sahá tyiño yo ta nyehé yo tindoho vatyí nyatú yo naquehen yo cha vaha cha chaha Nyoo nyito chí yo. Vatyí maa ra cuví ra sacacú chí tandihí ñáyivi, ta xihna ca chí yoó cha chinó ñi yo chí ra.

¹¹ Ihya tuhun cua sañahun chí ñáyivi, ta cusaniñun chí ñu na cutuhva ñu. ¹² Cachi sañahun chuun coto ma saha ñu ñáyivi chuun cha cuenda cha cuvún noo ra tyivaa. Soco sañahun noo cuhva vaha chí ñu chihin cuhva iyón, chihin cuhva cahun. Sañahun chí ñu, chihin cuhva cha cuñún chí Nyoo ta chí ñáyivi, chihin cuhva chicá xiñun, chihin cuhva chinó ñiñun, ta chihin cuhva sacuvún maa maa ri cha vaha. ¹³ Cha ni ri ca cha cumañi chai nu nyicú ndo, sacuahá con tuhun Nyoo nuu ñu yihí cuenda Nyoo. Cuhva tuhun chí ñu ta sañahun chí ñu yoso caa caca vaha ñu ityi Nyoo. ¹⁴ Sañahun cuenda nyatu cha chaha Nyoo chuun quivi cha tyiso ra yindaha vehe ñuhu ndaha ra sicun ta cahan ra yoso cuhva chahá Tatyí Ii Nyoo chí ra. ¹⁵ Tyaa vaha xiñun tuhun ihya ta sacuvun.

Tacuhva vatyí nyehe ñáyiví yoso caa cuahun ityi nuu ca chihin Nyoo. ¹⁶ Saha cuenda chuun chihin cuhva iyón. Ta saha cuenda cuhva sañahun chi ñáyiví ta ñaha saña ndahun cha vaha. Tatu tyicuan caa sacuvún cuacacun, ta cucacu ñu chiñí tuhun sañahun ñandíhi.

5

Nu chahá ra Pablo tuhun chí ra Timoteo yoso caa cuhva ra tuhun chí ñu yihí cuenda ra Cristo

¹ Ma cahun chí noo ra chahnu, soco cuhva tuhun chí ra tari cha sutun cuví chí ra. Ta chí ra tyivaa cuhva tuhun chí ra tari cha yañun cuví chí ra. ² Ta chí ñu chahnu tari cha síhun cuví chí ñu. Ta chí ñu tyivaa, tari cha cuhvon cuví chí ñu. Ta sacuvun chihin cha vaha chicá xiñun.

³ Tyinyee chí ñu ndahví ñu chíhí yíi tatu yori ñáyiví chí ñu cha tyinyee chí ñu. ⁴ Soco tatu iyó noo ñaha chíhí yíi ta iyó sehe ña, o sehe ñañi ña, cuñí chí cha cutuhva xihna maa ñu cha tyinyee ñu chí ña. Na nichon iñi ñu yoso caa saha cuenda síhi ñu chí ñu ta luhlu ñu. Ta tyicuan caa tahán chí cha saha cuenda tucu ñu chí ña vityin. Vatyí cha tyehe caa vaha xaan, ta cha tahán iñi Nyoo cuví. ⁵ Soco ñu chíhí yíi cha ndoo noo tuhun ri maa, chí Nyoo tyihí ñu iñi ñu ta tyicuan ri chicán tahvi ñu chí ra ñicahñu ta cha cuaa. ⁶ Soco noo ñaha chíhí yíi cha nducú tusíi iñi cha iyó ñáyiví ihya, tari quiví cha chíhí ña cha cuenda tuhun

Nyoo cuví cuan, vasi iyó ña. ⁷ Sacoto tuhun ihya chí tahan yo tacuhva cha ma ñihi ñáyiví cuhva cahan ñu chí ñu. ⁸ Soco tatu yihí yo cha iyó ñáyiví chí yo cha chíhí yíi ta ña chicá xiñi yo cha cuenda ñu, ta cha xihna ri cha cuenda ñu vehe yo, tari quiví cha ña chinó iñi yo chí Nyoo cuví cuan. Ta cahnu ca cuatyí yo ta ñima ca ñu cha ña chinó iñi chí Nyoo.

⁹ Nu tutu cha nyaá sívii ñu chíhí yíi, na cunyaa sívii ñu, soco ñu cha yahá ca uñi xico cuiya. Ta cuví cunyaa sívii ñu tatu noo ri yíi ñu chíyo. ¹⁰ Ta cuñí chí tatu ñohó nuu vaha ñáyiví chí ñu cha cuenda cha vaha cha sacuví ñu: tatu sacuahnu vaha ñu sehe ñu, tatu chahá ñu cha cachi ñu chaá vehe ñu, tatu sacuví ñu tyiño nuu yañi yo chihin cha tandíhi añima ñu chihin cha ndahvi sahá ñu chí ñu, tatu tyinyee ñu chí ñu nyehé tindoho, tatu tyehe caa sacuví ñu tandíhi nuu cha vaha, cuví cunyaa sívii ñu.

¹¹ Soco ma tyihí ndo sívii ñu cha ta chaa ca uñi xico cuiya coto coo quiví ta quichi cuví iñi ñu tandaha ñu inga chaha ta sandíhi ñu tuhun sacuví ñu tyiño nuu ra Cristo. ¹² Ta tyicuan caa cucoo cuatyí ñu vatyí ña sacuví ca ñu cuhva catyí ñu. ¹³ Ta síin ri tatu chicá noo suchan ri maa ñu tahan tahan vehe ñáyiví. Ta ñima yucuan ri soco chicá noo ndíhi ñu chihin cuendu ñu. Ta tyihí ñu chí ñu noo nu ñahri cuenda ñu. Ta cahan ñu cha ña tahán chí. ¹⁴ Yucuan chaha vaha taxin ca na tandaha ñu inga chaha. Na coo sehe ñu.

Na saha cuenda ñu vehe ñu. Ta ma cuhva ñu ityi chi ñu xaan iñi chi yo vatyí cahan nyaa ñu chi yo. ¹⁵ Tyehe caa catyí chuun vatyí yihí ñu cha saña ñu chi Nyoo ta na nyicon ñu chi ra ña vaha. ¹⁶ Tatu noo ñu yihí cuenda Nyoo ta iyó noo ñáyivi chi ñu cha chihí yí, cuñí chi cha tyinyee ñu chi ñu, tacuhva cha ma cuví ñu noo carga chi vehe ñuhu. Ta tyicuan caa ta cuví tyinyee ñu vehe ñuhu chi ñu chihí yí cha ndicha ndicha chiñuhú chi.

¹⁷ Ra chahnu ra nyisó tyiño vehe ñuhu, cuñí chi vatyí saha xaan ñu ñáyivi chi ra. Ta cha xihna ca chi ra cahán tuhun Nyoo ta ra sañahá chi ñu. ¹⁸ Vatyí tuhun Nyoo catyí chi: “Ma tyihun yoho yuhu sindiqui nu saha tyiño ti tacuhva vatyí cuví cachi ti chiin.” Ta catyí tucu chi: “Iyó ityi chi ra cha sahá tyiño cha ñihí ra yahvi ra.”

¹⁹ Tatu tyaá ñu cuatyí siqui noo ra chahnu ra nyisó tyiño vehe ñuhu, ta tatu ña quita uvi o uñi tahan cha ndaa, ma quichahun chi ñu tyaá cuatyí cuan. ²⁰ Soco ñu sañihi ca sacuvi cuatyí cuñí chi cha catyí ndo chi ñu chihin nuu tandihí ñu nyicú vehe ñuhu tacuhva vatyí tandihí ca ñu na cuyuhvi ñu sacuvi ñu cha ña vaha. ²¹ Tyatyíne chuun chihin nuu Nyoo ta chihin nuu Sutu Mañi yo Jesucristo, ta chihin nuu ángel cha nacachi ra. Ta catyí chuun vatyí quichahun cha catyí ihya ta ma cahun tumañi iñi chi noo ra ta ni chi

inga ra. ²² Ma numi xaan ri tyaa tyiño chi noo ra cha cuví ra tyiño vehe ñuhu. Coto ndoo cuatyí sacuví ra sicun. Saha vahun cuenda chuun chihin tandihí cha sacuvín ta ma cuhvon ityi chi cha ña vaha.

²³ Ta vatyí iyó noo cuehe chichun, ma cohun maa ri maa ndutya, soco cohun chiin vinu ñandihí.

²⁴ Yihí ñáyivi quetuví ri cuatyí ñu cha cumañi ca cutuñi chi ñu. Ta yihí ñu nya cha yaha cutuñi chi ñu ta cuquetuvi cuatyí ñu. ²⁵ Ta tyicuan caa tucu cha vaha cha sacuví yo, ña xehe caá. Soco vasi ña tuví cha numi ri, ñima tyicuan ri cucohon xehe chi.

6

¹ Ñu cha cuví musu cuñí chi cha saha vaha ñu ñáyivi chi chitoho ñu. Tyicuan ta ma ñihi ñáyivi cuhva cahan ña vaha ñu siqui Nyoo ni siqui tuhun ra, cha sañahá yo. ² Ta tatu noo musu iyó chitoho ra cha yihí cuenda Nyoo, ña tahan chi cha ma saha ra ñáyivi chi ra vatyí yañi ra cuenda Nyoo cuví chi ra. Soco ñihi ca cuñí chi cha sacuví ra tyiño nuu ra, vatyí chinó tucu iñi maa ra chi ra Cristo, ta Nyoo cuñí ra chi ra. Sañaha tuhun ihya chi ñu hermano ta cuhva tuhun chi ñu na sacuvi ñu.

Cuhva iyó yo ta cusí cuñi yo

³ Tatu iyó noo ra cha sañahá inga tuhun cha ña chachi tahan chi chihin tuhun vaha cha sañahá Sutu Mañi yo Jesucristo, ta ni ri chihin tuhun

vaha cha cuahan sacuaha yo, ⁴ cuví ra noo ra cahnu sahá chi. Ta tahán xaan iñi ra cuvi yuhu ra siqui noo cha ñima ri tuhun. Tari noo cuehe cuví cuan. Ta cha cuenda tuhun ihya cacú tisihi ta tuhun nyiyo iñi, tuhun cha cahán ña vaha chi tahan, ta tuhun cha ña vaha cuñi nyehe chi tahan. ⁵ Ta tyicuan ri cañi tahan ñu vatyí quiñi chica xiñi ñu, vatyí ña chitó ñu cha ndicha. Nyacua cuñi maa ñu tyi cusaha ganaa ñu xuhun chihin tuhun Nyoo. Ma cuctahan ndo chihin ñu cuan. ⁶ Ndicha vatyí cha sacuví yo cuhva catyí Nyoo ta ndoó yo vaha chihin cha cha chaha ra chi yo cuví chi tari noo cha tyayí iyó chi yo. ⁷ Vatyí ñahri nyisó yo vachi yo ihya ñayivi. Ta ñahri cuiso yo cunuhu yo quivi cúvi yo. ⁸ Soco tatu iyó cha cachi yo ta sahma ñihnó yo, na cusí iñi yo, ta na ndoo yo vaha chihin yucuan ri. ⁹ Soco ñu cuñi cutyayí, nducú nyehe ra ña vaha chi ñu. Caná cava ñu chichi xayu ra. Cutondó xiñi ñu chihin cha cuaha xaan cha quichi cuví iñi ñu. Ta sativí chi chi ñu ta nu ndihí tuhun cutiví ndihí ñu ta cunaa ñu. ¹⁰ Vatyí cha cuñi xaan yo xuhun, yucuan cuví nu caña tandihí ca nuu cha ña vaha. Ta yihí ñu cha tyehe caa cuñi xaan ñu xuhun, ta cha cuenda cuan sandihí ñu tuhun cha chinó iñi ñu tuhun Nyoo. Ta yucuan cuví nu suri chi maa ñu sanyehé ñu tindocho.

Lucha cha iyó chi yo cha chino iñi yo chi Nyoo

¹¹ Soco yoho cuvún noo rayí cuenda Nyoo. Caca cono chi tandihí cha quiñi caa cuan. Ta cūhun chata cha cuiti. Vaha coun nuu Nyoo. Cūñi iñun chihin ra. Cūñun chi ñáyivi. Coo cha cama iñun chihin tandihí cha cuví chuun. Ta masu cuví iñun. ¹² Ñihi sacuvun tyiño nuu Nyoo vatyí tyicuan caa tahán chi tyi chinó iñi yo chi ra. Ta ma saña ndahun ñayivi chaa cha ma ñaa ca maa cha chaha Nyoo chí yo. Vatyí ican cuenda cuan nacana Nyoo chuun, quivi catyí cachun tyi chinó iñun nuu cuaha xaan ra cuví cha ndaa. ¹³ Ta chihin nuu Nyoo, ra cha chaha ñayivi coo tandihí cha iyó, ta chihin nuu ra Cristo Jesús ra cha chaha vaha cuenda nuu ra Poncio Pilato, catyí chuun vityin, ¹⁴ na sacuvun tandihí cha catyí chuun tacuhva ma cuhvon cuhva cha cahan ñáyivi chuun nyacua nya quivi quichi Sutu Mañi yo Jesucristo. ¹⁵ Na chaa maa quivi, Nyoo cusaquichi ra chi ra Cristo inga chaha. Ican ra cuví ra cha sacahnu yo, ta noo tuhun ri maa ra cuví Nyoo ra iyó xaan tunyee iñi chii. Rey cuví ra cuenda tandihí ca ra cuví rey. Ta nyacá ñaha ra chi tandihí ca ra cha nyacá ñaha. ¹⁶ Noo ri maa ra cuví ra ra ñahri tuhun chihi iyó chii. Ta iyó ra nu ndichin nu yori maa tuhva. Ta ni noo ñáyivi ta nyehe ca ñu chi ra. Ta ni ña cuví nyehe ñu chi ra. Chi maa ra na sacahnu yo. Ta na cunyaca ñaha ra tyicuan ri maa. Ta na

cuvi chi tyicuan caa.

¹⁷ Ta ñu cha iyó cha tyayii chi ñayiví ihya, catyí chi ñu vatyí ma cahnu xaan saha ñu chi ñu. Ta ma cuita iñi ñu chi cha tyayii cha iyó chi ñu. Vatyí coto coo quiví ta ndihi cha tyayii cuan. Soco na cuita iñi ñu chi Nyoo nyitó, vatyí maa ra cuví ra chahá tandihi. Ta cuaha chaha ra chi yo tacuhva cusii cuñi yo.

¹⁸ Cātyun chi ñu tyayii na sacuvi ñu cha vaha ta nii iñi ñu cūhva ñu cha iyó chi ñu chihin cha ma uhvi cuñí ñu.

¹⁹ Tyicuan ta coo cha tyayii ñu andiví ta cutyinyee chi chi ñu nu cuahan ca chi quiví. Ta tyehe caa cuvi coo ñu ñayiví cha ma naa ca maa.

*Nu ndihi chahá ra Pablo
tuhun chi ra Timoteo*

²⁰ Yoho Timoteo saha cumi vahun tyiño cha chahá Nyoo chuun. Ma tyasohun tuhun cha siin caa, tuhun cha ñima ri tuhun. Ma quichahun tuhun cha catyí ñu vatyí cha chiñi tuñi cuví, vatyí ña ndicha.

²¹ Vatyí cha cuenda cuan yihí ñu cha quita caxiin ñu ityi Nyoo. Ta ña chinó vaha ca iñi ñu cha ndicha.

Ta Nyoo na nasoco ra chi ndo.

Ta na cuvi chi tyicuan caa.

Carta Cha Cu Uvi Cha Sacuhun Ra Apóstol Pablo Chi Ra Timoteo

*Nu tyaq ra Pablo noo tutu
chi ra Timoteo*

¹ Yuhu ra Pablo cuví noo apóstol ra Jesucristo vatyí tachí ra chii na caque tyiño ra. Vatyí tyicuan caa cuñí maa Nyoo, tyi cuñí ra cha sacote chi ñáyiví vatyí chahá ra noo ñayiví chaa chi tandihi ñu cha ndu in ri chihin ra Cristo Jesús vatyí nacuhva cuenda ñu chi ñu chi ra. ² Tyaí tutu ihya chi yoho Timoteo. Ta cuñí xain chuun tyi tari cha sehi cuví chuun. Ta cuñí vatyí Nyoo Sutu yo ta Sutu Mañi yo Jesucristo na nasoco ra chuun. Ta na nyehe ndahvi ra chuun. Ta na coo ca cha taxi ri cuñí añimon saha ra.

*Nu catyi ra Pablo chi ra
Timoteo tyi nacatyí ra chi
ñáyiví tyi cuenda ra Cristo yihí
ra*

³ Tyicuan ri nicohón iñi tuhun yoho cuhva cha chicán tahvi chi Nyoo ñicahñu ta cha cuaa. Ta nacuhvé tyahvi nyoo chi ra cha cuendon. Nu maa ra sacuví yuhu tyiño chihin cha vaha chicá xiñi, tari sacuví tucu ñáyiví chii ta cha naha. ⁴ Tyicuan ri nicohón xaan iñi chuun ta nicohón xaan iñi tuhun yoso caa chacun quiví cuachiye chiña. Ta cuñí xain nyehi chuun inga chaha ta cusii

iñi chuhun. ⁵ Vatyí nicohón iñi yoso caa chinq xaan iñi cu Loida chiton chi Nyoo, ta cu Eunice sihun ñandihí. Tyicuan caa tucu yoho chinó xaan iñun vityin.

⁶ Yucuan chaha chahí tuhun chuun vatyí na saniun iñun ta cotyiño nyatu cha cahun tuhun Nyoo cha chaha ra chuun quiví tyisé ndahi sicun. ⁷ Nyoo ña chaha ra cha yuhvi yo. Soco chaha ra noo tunyee iñi cahnu chí yo. Ta chaha ra vatyí cuñí yo chi tahan yo. Ta chaha ra cha cunyaca ñaha vaha yo chi yo. ⁸ Yucuan chaha ma cahan nuun cahun tuhun Sutu Mañi yo. Ta ni ri cha ma cahan nuu cha cuenda cha ñohí vehe caa cha cuenda ra. Soco chihin tunyee iñi chaha Nyoo chuun ta chihin cha iyó vaha iñun cunyeun tindoho cha vachi siqui yo cha cuenda tuhun Nyoo. ⁹ Vatyí ican ra sacacú chi yo. Ta nacana ra chí yo vatyí coo yo noo ñayiví ii. Ñima cha cuenda cha vaha cha sacuví yo ta nacana ra chí yo, soco vatyí tyicuan caa tyaq ra cuhva nyata ni cumañi ca chinq ñuhu ñayiví. Vatyí nya quiví cuan cuñí ra chí yo cha in ri cuví yo chihin, ra Cristo Jesús. ¹⁰ Ta vityin cha quichí ra Jesucristo sacacú ra chí yo, nacoto yo vatyí tyicuan caa cuñí ra chí yo. Ta nu quichí ra, sataní ra tandihí tunyee iñi cha iyó chí tuhun chihi. Ta chihin tuhun vaha cahan ra, tava ra nu ndichin tuhun cha coo yo noo ñayiví chaa

cha yori cuví sativi.

2

¹¹ Nyoo tyaá ra tyiño chii vatyi cahin tuhun ihya chihin ñáyivi. Tachí ra chii vatyi cuví noo apóstol chi ra, ta sañahí chi ñu cha ñima ñu Israel cuví. ¹² Yucuan chaha nyehí tandihí tindoho ihya. Soco ña cucahán nui vatyi chitó mai yóo chi chinó iñi. Vatyi nacuhva cuende chii chi ra, ta chitó vahi vatyi cuví saha cuenda ra chii nyacua nya quívi quichi tucu ra.

¹³ Cunyicon tuhun vaha cha chahí chuun. Ta coun chihin cha chinó vaha iñun chi Nyoo. Tyicuan ri cunñun chi ñáyivi tahan yo. Vatyi yucuan cuví cha chahá Nyoo chi yo tyi ñin ri cuví yo chihin ra Cristo Jesús. ¹⁴ Ta maa Tatyí Ii cha iyó ñima yo na tyinyee chuun ta saha cumun tuhun vaha cha chahá Nyoo chuun.

¹⁵ Cha chitón vatyi tandihí ra ityi Asia chiña casandoo ra chii, tari ra Fígelo ta ra Hermógenes. ¹⁶ Soco ra Onesíforo na nyehe ndahvi Sutu Mañi yo chi ñáyivi chi ra vatyi cuaha xaan chaha quichí sandunyeer ra iñi. Ta ña cucahan nuu ra cha cuenda cha ñohí vehe caa. ¹⁷ Soco quívi chinyaá ra ñuu Roma ihya, ña sandihí ra tuhun cha nanducu ra chii nyacua nya cha nañihí ra chii. ¹⁸ Sutu Mañi yo nacuhva ra cha ñihi ra tumañi iñi quívi cha cutuñi chi yo nuu ra. Chitó vahun yoso cuhva tyinyee ra Onesíforo chi yo nya ñuu Éfeso chiña.

Noo sindaro vaha ra Jesucristo

¹ Ta yoho sehe luhli, sandunyeer iñun chihin tunyee iñi cha chahá ra Cristo Jesús chuun cha cuenda cha ñin ri cuví yo chihin ra. ² Tuhun cha chihun cha cahin nuu cuaha ñáyivi, nacatyí chi ra cha ñii iñi chinó iñi chi Nyoo, ra cha cacuví sañaha chi inga ñu.

³ Ta cunyeun tindoho tari noo sindaro vaha ra Jesucristo. ⁴ Ni noo ra cuví sindaro ta ma cuví tyihí ra chi ra chihin inga tyiño. Vatyi cuñí chi sacuvi ra maa maa ri cha catyí ra cuví nuu chi ra. ⁵ Ta tyicuan caa tucu ra canyasiquí, ma saha canaa ra cha tahán chi saha canaa ra tatu ma cunyasiquí ra tari cuhva tahán chi. ⁶ Noo ra sahá tyiño chichi cuhu, tahán chi cha saha tyiño xihna ra, yucuan ta cachi ra cha quitá nu iyó tyiño sahá ra. ⁷ Caca xiñun tuhun cha catyí chuun ihya, ta maa Sutu Mañi yo cucuhva ra cha cutuñi iñun tandihí.

⁸ Nicohon iñi tuhun ra Jesucristo, ra cha nandoto cha yaha nyehe ra tindoho ta chihí ra. Cuví ra tata rey David. Ta ican ihya cuví tuhun Nyoo cha cacu ñima yo cha chahá ra vatyi cahin tuhun. ⁹ Ta cha cuenda tuhun ihya cunyeí tandihí tindoho nyacua nuhñí chihin cadena tari noo ra quíni iyó. Soco tuhun Nyoo ña nuhñí chi. ¹⁰ Yucuan chaha cunyei

tandihi tindoho cha cuenda cha vaha chi tandihi ca ñu nacachi Nyoo chi, tacuhva vatyí cuví cacu tucu tandihi ñu. Chihin cha ndu ñin ri yo chihin ra Cristo cuacacu yo ta cuñihi yo noo nu tyaqui xaan cha ma ndihi ca maa. ¹¹ Ihya cuví cha ndicha xaan:

Tatu cúvi yo cha cuenda ra, coo tucu yo chihin ra.

¹² Tatu cunyeé yo tindoho, cucunyaca ñaha yo chihin ra.

Tatu catyí yo tyi ña yihí yo cuenda ra, maa ra cucatyí ra tyi ñima ñáyivi cuenda ra cuví chi yo.

¹³ Tatu sandoo yo chi ra, soco maa ra tyicuan ri sacuví ra cuhva catyí ra.

Vatyí maa ra ña tuhvá ra nasama ra tuhun cahán ra.

Tatu sahá tyiño vaha yo, cuaquita vaha yo

¹⁴ Sanicohun iñi ñu tuhun ihya, ta catyun chi ñu chihin nuu Sutu Mañi yo na sandihi ñu cha cuví yuhu ñu cha ñima ri tuhun. Vatyí cha cuví yuhu ñu tyehe caa, ñahri maa tuhun. Tyi sativí ñu chi ñu tyasohó tuhun cahán ñu. ¹⁵ Saninun ta cuhva cuendon chuun nuu Nyoo tari noo ra sahá tyiño vaha. Vatyí ñahri cha cucahan nuun tatu chotyíño vahun tuhun ndicha yoso cuhva tahán chi.

¹⁶ Ñaha tyasohun tuhun cha ñima ri tuhun ñayivi ihya. Vatyí ñahri maa tyinyeé chi chi yo. Soco sativí ca chi chi yo nuu Nyoo ¹⁷ vatyí

tari quihvi xico ndiyi noo nu cahvi, tyicuan caa cuví tuhun cuan vatyí sativí chi chi yo. Ta cuaha ñu cuativí cha cuenda cuan. Ican cuví cha cuví chi ra Himeneo ta ra Fileto. ¹⁸ Vatyí caquita caxiñ ra ityi vaha ta catyí ra vatyí tari quivi cha yahá nandoto yo ta ma nandoto ca coño ñuhu yo. Ta tyicuan caa satondo ra cuhva chinó iñi suhva ñu. ¹⁹ Ta vasi yihí ñu nducaxiñ ñu, soco Nyoo chacun ra cha ndicha, ta yucuan cuví cha ma nasama maa. Ta nyisó chi noo seña cha catyí: “Sutu Mañi yo ñohó nuu ra chi ñu cuenda ra.” Ta catyí tucu chi: “Tandihi ñu nyisó sivi ra Cristo na quita ñu nu quiñi caa.” ²⁰ Chichi noo vehe cahnu, ñima maa maa ri ndaha tyiño chino chihin xuhun cuaan ta xuhun cuichin iyó. Iyó tucu cha chino chihin vitu ta chihin nyahyu. Yihí cuan chotyíño ñu chi nu vaha, ta yihí cuan cha chotyíño ñu nu ñima ri tuhun. ²¹ Tyicuan caa tucu maa yo tatu ña tiñ cuenda yo tuhun cha ñima ri tuhun ñayivi ihya, cuví yo noo ñáyivi cha chotyíño Nyoo chi, tari noo vaso xuhun cuaan. Ta cuñi chi vatyí cundi vaso cuan, tyicuan ta cuví cotyíño ra chi yo cha cuenda tandihi nuu vaha.

²² Ma caca xiñun tari chicá xiñi ra tyivaa ñayivi ihya. Vatyí maa maa ri cha quiñi caa chicá xiñi ra. Coo noo ñayivi cuiti. Chino vaha iñun chi Nyoo. Cuñun chi Nyoo

ta chi ñáyivi. Coo taxi run chihin tandihi ñu yihí cuenda Nyoo, ñu cha chihin cha vaha añima chicán tahvi chí Sutu Mañi yo. ²³ Ta ma quichahun tuhun cha ñima ri tuhun cha cuví yuhu ñáyivi. Vatyí chitón tyi chihin cuan cacú tisihi. ²⁴ Ta noo ra sacuví tyiño nuu Sutu Mañi yo, ña tahán chi cañi tahan ra. Soco tahán chí cha vaha ñáyivi cuvi ra chihin tandihi ñáyivi. Ta cuñí chí cha ñihi vaha ra cuhva sañaha ra tuhun Nyoo. Ta cuñí tucu chí cha cama cuvi iñi ra chihin ñáyivi. ²⁵ Ta chihin cha masu iñi ra cuñí chí cha sandundoo ra chí ñáyivi ndava iñi. Ta cuatu ra nasama Nyoo cuhva iyó ñu ta nacoto ñu cha ndicha. ²⁶ Ta tyicuan caa ta cunducachi iñi ñu ta cuaquita ñu chichi ndaha ra cuví cuihna vatyí cha vityin nyacuví maa ra yoso cuhva cuñí ra chihin ñu.

3

Yoso caa cucoo ñáyivi nu cuandihí ca quivi

¹ Ta cuñí tucu chí cōton vatyí nu cuandihí tyembu cuquichi quivi cha yíi xaan coo yo. ² Vatyí cucoo ñáyivi ñu cuñí xaan suri chí maa. Ta cucuñi xaan ñu xuhun. Ta yaa xaan cucuvi ñu. Ta cahnu cusaha ñu chí ñu. Cucahan ña vaha ñu siqui Nyoo. Ta ma quichaha ñu nu cahán sutu ñu ta sihi ñu. Ma nacuhva ñu tyahvi nyoo chí Nyoo, ni chí tahan ñu. Ma quichaha ñu chí Nyoo. ³ Ma cuñi ñu chí tahan ñu. Ma coo ticahnu iñi chí ñu chihin ñáyivi. Cuñi

ñu cuendu. Ma cuvi cunyaca ñaha ñu coño ñuhu ñu. Xaan xaan cucuvi ñu. Ta ma cuñi nyehe maa ñu cha vaha. ⁴ Cunaxico tuhun ñu chí tahan ñu. Ta ndava xaan cucuvi iñi ñu. Ta cucaña iñi ñu sacuvi ñu ñáá ndihi cha cuñí ñu. Ta maa maa ri cha quichi cuvi iñi ñu cunanducu ñu, ta ma nanducu ñu chí Nyoo. ⁵ Cunyicon ñu noo cuhva tari cha chinó iñi ñu chí Nyoo, soco ña ndicha ñu. Vatyí chasí ñu cha sañahá Nyoo tunyee iñi ra. Ma cutahun chihin ñu caa tyicuan caa. ⁶ Vatyí mahñu ñu ihya iyó ra cha quihvi ra chichi vehe ta sandavi ñaha ra chí ñusihi cha ñahri cha chíni tuñi xiñi. Ta nyisó ñusihi cuan cuatyí, vatyí nyicón ñu tandihí cha quichi cuvi iñi ñu. ⁷ Tyicuan ri cuñí ñu coto ñu tandihí tuhun chaa soco ña cuví cutuñi iñi ñu ñáá cha cuvi cha ndicha. ⁸ Ta ñu cucoo cha cahin tuhun ihya, cucuvi ñu tari maa ra Janes ta ra Jambres, ra tasi cha cachiyo ta cha naha. Ta cuñi ra saha canaa ra chí ra Moisés. Ta tyicuan caa tucu ñu cucoo nu cuahan ca chí. Ma tahan iñi ñu sacuvi ñu cha vaha. Quiñi cucaca xiñi ñu. Ta ma chino iñi ñu cha vaha. ⁹ Soco cuhva cunyacuvi ñu ma cuvi cutya chí vatyí ña xehe caa tyi cha ñima ri tuhun cuví cha cusacuvi ñu, tari cha chinyacuví ra Janes ta ra Jambres.

Nu ndihí tyatyíño ra Pablo chí ra Timoteo

¹⁰ Soco yoho chitó vahun tyi yuhu ñima tyicuan caa

iyé. Vatyí chitón tuhun cha sañahí, ta cuhva iyé. Ta chitón ñáá cha nanduquí ta yoso cuhva chinó ñni chi Nyoo. Ta chitó tucun yoso caa cunyeé ñni cha cahán ñáyivi chii. Ta chitón yoso cha cuñí chi ñu. ¹¹ Ta chitón yoso caa cunyeí tindhó nu chicán nyicon ñáyivi chii. Chitón cha cuví chii, tandihí tindhó cha nyehí cha catyi tuhun Nyoo ñuu Antioquía, ta ñuu Iconio, ta ñuu Listra. Soco Sutu Mañi yo sacacú ra chii chichi tandihí cuan. ¹² Cha ndicha cuví vatyí tandihí yo cha cuñí yo coo yo cuhva cuñí ra Cristo Jesús cunyehe yo tindhó saha ñáyivi. ¹³ Soco ñu quiñi iyó ta ñu sandaví ñaha, quiñi xaan ca cunanduvi ñu. Vatyí cusandavi ñaha ñu chi ñáyivi ta cusandavi ñaha ñáyivi chi ñu.

¹⁴ Soco yoho sañihun coun chihin cha cutuhvon. Vatyí chitón yóo cha sañaha chuun ta chitó vahun tyi cha ndicha cuví. ¹⁵ Nya ta ni luhlun ta chitón cha nyaá nu tutu tuhun Nyoo. Ta yucuan cuví cha chahá cha cutuñi ca ñun tacuhva cacun cha cuenda cha chinó ñun chi ra Cristo Jesús. ¹⁶ Tandihí tuhun cha nyaá nu tutu Nyoo, ta maa Nyoo chaha. Ta tyinyeé xaan chi chi yo nacoto yo yoso caa tahán chi chinó ñni yo. Sañahá chi chi yo cuhva caa yo. Sandundoó chi chi yo. Ta sañahá chi chi yo yoso caa coo yo noo ñáyivi vaha nu Nyoo. ¹⁷ Tyehe caa tyinyeé tuhun Nyoo chi yo tacuhva vatyí

cuví yo noo ra cuíti cuenda Nyoo. Ta cuatu tuhva yo sacuvi yo tandihí cha vaha.

4

¹ Tyatyíñe chuun nuu Nyoo ta nuu Sutu Mañi yo Jesucristo, vatyí maa ra cusandaa ra cuatyí ñu nyitó ta ñu chihí quivi quichi ra cunyaca ñaha ra chihin tunyee ñni ra. ² Cahan tuhun Nyoo chihin ñáyivi. Tyicuan ri sañihun sacuvun. Cahan tuhun Nyoo nuu ñu tatu chahá chi cuhva o vasi ña chahá chi cuhva. Cuhva tuhun chi ñu, catyi cuhva caa ñu tacuhva cunyicon vaha ñu chi ra Cristo. Ta cuatun nasama ñu cuhva iyó ñu chihin cha cama ñun. Ta sañahun chi ñu yoso caa tahán chi coo ñu. ³ Vatyí coo quivi ma cunyee ca ñni ñáyivi tyasoho ñu tuhun vaha. Soco cunducu ñu cuaha xaan ra sacuahá cha sañahá maa maa ri cha tahan ñni maa ñu cuiñi ñu. ⁴ Ta cusacuachiyó xiin ñu cha ndicha. Ta cucuñi ñu cuiñi ñu noo tuhun cha ña ndicha. ⁵ Soco yoho saha cuenda chuun chihin cha vaha chica xiñun. Cunyeun tindhó. Cahan tuhun Nyoo chihin ñáyivi. Sacuvi vahun tyiño chaha Nyoo chuun.

⁶ Yuhu cha cuñí cuii ri nacuhva cuende ñáyivi cha cuenda tuhun Nyoo, vatyí cha nyaña yatyin tuhun chihi chii. ⁷ Cha cañi tahin tari cuhva tahán maa chi ta cha sandihí tyiño cha chaha Nyoo chii. Ta ña sandihí tuhun cha chinó ñni chi ra. ⁸ Ta vityin nu cuahan ca chi

quivi, nyatú tuhva noo cha tahán chi chii cha cuacuhva Sutu Mañi yo chii. Ta ñima chi maa ri mai cuhva ra, soco cuhva tucu ra chi tandihí ca ñu cha nyatú chi ra. Vatyí noo ri maa ra cuví ra vaha sacutuñí.

Nonga tyiño tyaa ra Pablo chi ra Timoteo

⁹ Saniñi ta quichun cha numi ri, quichi nyehun nu nyai. ¹⁰ Vatyí ra Demas sandoo ra chii vatyí cuñí ca ra cha iyó ñayivi íhya. Ta cuahan ra nya ñuu Tesalónica. Ta ra Crescente cuahan ra nya ityi Galacia. Ta ra Tito cuahan ra ityi Dalmacia. ¹¹ Noo ri maa ra Lucas nyaá chihin. Nanducu chi ra Marcos ta na quichi ra chuhun quivi quichun. Vatyí chiñuhú xaan ra chii nu tyiño Nyoo. ¹² Tachi chi ra Tíquico ñuu Éfeso. ¹³ Quivi quichun cuison sahma cocon cha sandoi ñuu Troas vehe ra Carpo. Tyicuan caa tucu libri, quihí ndahun quichi. Ta cha niñi ca tuti.

¹⁴ Ra Alejandro ra cañi mityi cuan, cuaha xaan cha ña vaha chinyacuví ra chihin. Ta maa Sutu Mañi yo cutyiyahvi chi ra cha cuenda cha chinyacuví ra chihin. ¹⁵ Saha cuenda chuun chihin ra. Vatyí xaan xaan cuñí ra siqui tuhun Nyoo cha cahán yo.

¹⁶ Cha xihna ri quivi sacaquí chii nuu ra cuví tyiño, yori maa tyinyee chii. Casandoo noo tuhun maa ra chii. Na saha Nyoo ticahnu iñi chi ra cha cuenda cuan.

¹⁷ Soco Sutu Mañi yo tyinyee xaan ra chii. Ta chaha ra tunyee iñi chii tacuhva cuví cahan cachi tuhun ra nuu ñu, ta chiñi tandihí ñu cha ñima ñu Israel cuví. Ta sacacu Nyoo chii cha cachi ndicaha chii. ¹⁸ Ta cuasacacu ca ra chii ndaha tandihí cha ña vaha. Ta cuasaha cuenda ra chii nyacua nya nachaa quivi cunyai chihin ra nu nyaca ñaha ra. Chi maa ra na sacahnu yo tyicuan ri maa. Ta na cuví chi tyicuan caa.

Nu ndihí cahan ra Pablo ta chaha ra nocumi chi ñu

¹⁹ Íhya vachi nocumi chi cu Prisca ta chi ra Aquila ta chi ñayivi chi ra Onesíforo. ²⁰ Ndoo ra Erasto ñuu Corinto. Ta ndoo ra Trófimo ñuu Mileto vatyí cuhví ra. ²¹ Saniñun ta quichun cha ni cumañi ca chaa yoo vichin.

Vachi nocumi chuun sahá ra Eubulo ta ra Pudente ta ra Lino ta cu Claudia ta tandihí ca ñayivi tahan yo cuenda Nyoo íhya.

²² Na cunyaa Sutu Mañi yo chuhun. Ta Nyoo na nasoco ra chi tandihí ndo.

Carta Cha Sacuhun Ra Apóstol Pablo Chi Ra Tito

Nu tyaq ra Pablo noo tutu chi ra Tito

¹ Yuhu ra Pablo sacuví tyiño nuu Nyoo. Ta cuví noo apóstol ra Jesucristo, o cuñí chi catyi vaty tyatyño maa ra chii vaty tyinyei chi ñu nacachi maa Nyoo, na nachino iñi ñu chi ra, ta cohon nuu ñu cha ndicha, ta coo ñu cuhva cuñí Nyoo. ² Ta cuatu tuhva ñu coo ñu ñayivi chaa cha ma naa ca maa andivi. Vaty ta ni cumañi ca chino ñuhu ñayivi ta catyi Nyoo vaty cucuhva ra noo ñayivi chaa chi yo. Ta maa ra ña cuendu ra. ³ Ta vityin chaa quivi cha tyaq Nyoo cuhva tyi nacoto yo tuhun ra. Maa ra cuví ra sacacú chi yo, ta chaha ra tyiño chi yuhu cha cahin tuhun ra chihin ñayivi. ⁴ Sacuhín tutu ihya chuun, Tito, vaty tari noo sehe vahi cuví chuun cha cuenda tuhun Nyoo, vaty in ri chinó iñi yo chi ra Jesucristo. Cuñí vaty Nyoo Sutu yo ta Sutu Mañi yo Jesucristo, ra sacacú chi yo, na nasoco ra chuun, ta na nyehe ndahvi ra chuun, ta na coo ca cha taxi ri añimon sahá ra.

Tyiño chaha ra Pablo chi ra Tito tyi sacuvi ra ñuhu Creta

⁵ Sandoj chuun ñuhu Creta vaty sandaun tyiño Nyoo cha

nyaá cundaa. Ta tyison ra chahnu ra quindaha vehe ñuhu tahan tahan ñuu tari cuhva catyi chuun. ⁶ Vaty ra nyisó tyiño ihya cuñí chi coo ra noo cuhva cha ma cahan ñayivi chi ra. Noo ri ñasihí ra coo. Ta tandihí sehe ra cuñí chi cha chinó iñi ñu chi Nyoo, ta cachi coo ñu ta ma ndava iñi ñu tacuhva cha ma tyaq ñayivi cuaty siqui ñu. ⁷ Vaty ra yindahá chi ñu yihí cuenda Nyoo, Nyoo tyatyño cuan chi ra. Yucuan chaha niñi cuñí chi vaty cuví ra noo ra vaha. Ñima noo ra cahnu sahá chii, ni ñima noo ra tyityi iñi, ni ñima noo ra tuhvá chiñi. Ñima noo ra quixin cuaty, ni ñima noo ra cuñí xuhun cha ña saha ganaa vaha ra. ⁸ Soco tyicuan ri sñi cuví chi ra tatu chaa ñayivi vehe ra. Ta tahan chi cuhva ra nu coo ñu. Cuñí chi cuví ra noo ra cha sacuví cha vaha. Noo ra chitó yoso caa nyaca ñaha ra chi maa ra. Na cuví ra noo ra ndaa iyó, noo ra sacahnú vaha chi Nyoo. Ta chitó vaha ra cuhva tahan chi sacuvi ra ta sñiñi ra sacuvi ra. ⁹ Ta cunyicon vaha ra tuhun ndicha cha sañahá yo chi ra. Tyicuan ta coto ra sandunñi ra iñi inga ñu chihin tuhun vaha ihya. Ta chi ñu catyí tyi ña ndicha tuhun cahan yo, coto ra yoso caa sañaha ra chi ñu tyi ña vaha cahán ñu siqui tuhun Nyoo. ¹⁰ Vaty cuaha xaan ra ndava iñi iyó. Cuaha ra cahán cha ñima ri tuhun, cuaha ra sandaví ñaha. Ta cuaha xaan ca ñayivi Israel sacuvi tyicuan caa. ¹¹ Cuñí chi cha

casi yo yuhu ra cuan, vatyí cuaha xaan ñáyivi satondó ra xiñi. Vatyí cha cuenda cha cacuñí ra xuhun ta sañahá ra noo tuhun cha ña tahán chi.

¹² Ta suri maa noo ra Creta, noo ra chiñi tuñi, ra cahán nuu ñu catyí ra tyehe caa: “Ñu Creta, cuendu xaan ñu. Tari quiñi cuví ñu. Cuahyi ñu ta suchan ñu”, catyí ra cuan.

¹³ Ta cha ndicha catyi ra cuan. Yucuan chaha cuñí chi cha cahan ñihun chihin ñu na saña ñu tuhun cuan, tacuhva vatyí vaha na chino iñi ñu chi ra Cristo. ¹⁴ Tacuhva cha ma tyasoho ca ñu tyisu cha ñima ri tuhun cha canasavaha ri maa ñu Israel. Ta ni ma tyasoho ca ñu tuhun cahán ñáyivi cha ña cuñí coto cha ndicha.

¹⁵ Cha cuenda ñáyivi cha vaha chicá xiñi, tandihi ta vaha chi ñu. Soco cha cuenda ñu cha ña chinó iñi ta ña vaha chica xiñi, ñahri maa cha vaha chi ñu vatyí nyacua nya cuhva chicá xiñi ñu ta cuhva tuví iñi ñu ta ña vaha ta quiñi caa. ¹⁶ Catyí ñu vatyí ñohó nuu ñu chi Nyoo, soco chihin cha ña vaha nyacuví ñu nyehé yo tyi ña ndicha ñu. Vatyí quiñi yihí iñi ñu ta ndava iñi ñu. Ta ma cuví sacuvi ñu noo cha vaha.

2

Tuhun vaha cha chaha Nyoo tyi sañaha yo

¹ Soco yoho, sañaha tuhun vaha tari cuhva sañahá tuhun Nyoo chi yo. ² Sañahun vatyí ra chahnu, cachi coo ra, tacuhva vatyí na saha ñáyivi ñáyivi chi ra. Ta tyicuan ri

cachi caca xiñi ra. Vii cuhun ra chihin cha chino iñi ra. Cuñí chi cha cuñí ra chi Nyoo ta chi ñáyivi. Ta cunyehe iñi ra tandihi. ³ Ta tyicuan caa tucu ñu chahnu. Catyi chi ñu na coo ñu noo cuhva cha tahán iñi Nyoo. Ta ma ñiñ ñu cuendu. Ma coho ñu ndixi. Ta na sañaha ñu cha vaha iyó ñu, ⁴ na nyehe ñu nicaa tandaha. Tacuhva vatyí cuñi ñu chi yí ñu ta chi sehe ñu. ⁵ Na caca vaha xiñi ñu. Ta saha vaha ñu cuenda cuhva iyó ñu. Na saha cuenda vaha ñu vehe ñu. Ta vaha ñáyivi cuví ñu. Na cuhva ñu cha cunyaca ñaha yí ñu chi ñu tacuhva vatyí yori cuví cahan ña vaha siqui tuhun Nyoo.

⁶ Ta tyicuan caa tucu ra tyivaa. Cuhva tuhun chi ra na cacachi coo ra. ⁷ Ta maun cuñí chi cha sañahun maa ri cha vaha chihin cuhva iyón chi ra. Sañahun chi ra chihin cha cachi ta cha ndaa. ⁸ Maa ri tuhun vaha cahan tacuhva vatyí yori cuví tyaa cuatyí sicun. Tyicuan ta ra xaan iñi chi ndo cucahan nuu ra vatyí ma ñihi ra cuhva cahan ña vaha ra siqui ndo.

⁹ Cuhva tuhun chi ra yañi yo ra iyó chitoho, na caquichaha ra chi chitoho ra. Na sacuvi vaha ra tandihi cha catyí ra. Ta ma na cahan ra nu cahan ra. ¹⁰ Ta ma tiñ ri maa ra cha chii chitoho ra. Soco na saha vaha ra ñáyivi chi ra, tacuhva vatyí cunyehe ñáyivi vatyí vaha xaan tuhun Nyoo ra sacacú chi yo.

¹¹ Vatyí Nyoo sañahá ra vatyí vaha xaan ñáyivi cuví ra. Ta cuñí ra sacacu ra

chi tandihí ñáyivi. ¹² Chihin cuan sañahá Nyoo chi yo vatyí na saña yo cha quiñi caa cha nyacuví ñáyivi ña ñohó nuu chi ra ta cha quichi cuvi iñi ñu. Ta cachi coo yo siqui ñuhu ñayivi ihya, tari cuhva cuñi Nyoo. ¹³ Ta sañahá tucu ra chi yo yoso caa cuatu tuhva yo cha vaha cha cuñihi yo quivi quichi tucu ra Jesucristo. Vatyí cucusi xaan cuñi yo cuhva cha cunyehe yo cha tyaqui quivi quichi ra cuví Nyoo yo ra cahnu ca, ra cha sacacú chi yo. ¹⁴ Chahá ra ñayivi ra tyiño nuu yo tacuhva sacacu ra chi yo ndaha tandihí cha quiñi caa. Ta sandundi ra chi yo tacuhva na cuvi yo ñáyivi cuenda ra, ta cha yaha tuhun cuan cuñi ra vatyí sacuvi yo maa maa ri cha vaha. ¹⁵ Ican ihya cuñi chi sañahun chi ñáyivi. Sanduniun iñi ñu. Ta cahun nuu ñu chihin ndusu yuhu Nyoo tatu ña vaha sacuvi ñu. Ta ma sacuvun ni noo cha ña vaha. Tyicuan ta ma cuvi ñihi ñu cuhva cahan nyaa ñu chuun.

3

Cuhva cha tahán chi sacuvi ñu yihí cuenda Nyoo

¹ Sanicohun iñi ñu tahan yo cuenda Nyoo na quichaha ñu chi gobiernu ta chi ra cacuví tyiño. Ta chihin cha ñi iñi ñu na sacuvi ñu ñáá tyiño vaha cha catyí ra cuví tyiño tyi sacuvi ñu. ² Ta ma cahan ña vaha ñu siqui ni noo ñáyivi. Na taxi ri coo ñu. Vaha ñáyivi na cuvi ñu. Na masu

cuvi añima ñu chihin tandihí ñáyivi.

³ Vatyí nyacua nya maa yo ta tyicuan caa cuvi yo ta ityi chata ca. Tondo xaan chiyo yo. Ta ndava xaan cuvi iñi yo. Ñahri noo ityi vaha chica noo yo vatyí ra cuví cuihna sandahvi ñaha ra chi yo. Chinyaca ñaha cuhva ña vaha cha cuñi coño ñuhu yo chi yo. Ta chinyacuvi yo tandihí maa cuhva cuñi chi. Tandihí cha iyó chi inga ñáyivi ta cuñi yo coo chi yo. Tasi cuñi yo nyehe yo chi tahan yo. Ta ñáyivi ña cuñi nyehe ñu chi yo. ⁴ Soco Nyoo vaha ñáyivi cuví ra ta sacacu ra chi yo. Yucuan cuvi nu sañahá ra vatyí cuñi ra chi tandihí ñáyivi. ⁵ Ñima cha cuenda cha cachi iyó yo ta sacacu ra chi yo, soco cha cuenda cha ndahvi cuñi ra nyehe ra chi yo. Ta chihin ñiñi ra Jesús nacatya yo cuaryi yo ta nacacu chaa yo, ta chahá Tatyí li ra noo ñayivi chaa coo yo. ⁶ Ta chahá xaan Nyoo cha coo Tatyí li ra añima yo cha cuenda maa ra Jesucristo ra sacacú chi yo. ⁷ Chihin tumañi iñi cha chahá ra chi yo ta sacuvaha ra chi yo nuu ra. Ta vityin nyatú yo cunanyehe yo noo cha cha yaha chahá ra chi yo, noo ñayivi cha ma naa ca maa. ⁸ Tandihí tuhun ihya ndicha xaan. Ta cuñi vatyí cahun tuhun ihya nuu ñu chinó iñi chi Nyoo chihin cha ñi iñun, tacuhva na saha cuenda ñu chi ñu, ta sacuvi ñu cha vaha. Vaha xaan tuhun ihya, ta cuatyinyee chi chi

tandihí ñáyivi tatu quichahá ñu. ⁹ Soco ma tyasohun nu cuví yuhu ñu tuhun cha ñima ri tuhun. Ma tyasohun tuhun cahán ñu vatyí ñu cuan ñañí xaan cuñí ñu coto ñu yoso caa vachi tata yo. Ma quichahun chí ñu cañí tahan cha cuenda ley cha tyaa ra Moisés ta cha naha. Ñahri maa tyinyeé cuan. Cha ñima ri tuhun cuví.

¹⁰ Tatu iyó ñu cuñí ñu sacusiñ ñu chí ñu nyicú vehe ñuhu, caña chí ñu noo chaha o uvi chaha ta çatyi chí ñu tyi ña vaha sacuví ñu. Ta tatu ña quichahá ñu, casi nu quichí ñu. ¹¹ Vatyí ma chihin yucuan ri chitón vatyí ña vaha añima ñu tatu tyicuan caa nyacuví ñu. Chicoo cuatyí ñu. Ta suri maa ñu sacunaá ñu chí ñu.

Tyiño tyaa ra Pablo chí ra Tito

¹² Cutachi chí ra Artemas, o chí ra Tíquico nu nyaún. Quiví chaa ra, nducu cuhva ta cūhun ñuu Nicópolis vatyí cuñihi tahan yo yucuan. Vatyí tyái cuhva cuyahi yoo vichin yucuan. ¹³ Nducu cuhva tyinyeun chí ra Zenas ra chitó xaan ley, ta chí ra Apolos ta cūhva cha chiñuhú chí ra nu cachicá noo ra tuhun Nyoo.

¹⁴ Na cutuhva ñu yihí cuenda Nyoo sacuvi ñu cha vaha ta tyinyee ñu tatu iyó cha cumañi chí inga ñu. Tyicuan ta ña caha ri nyicón ñu chí Nyoo.

Nu ndihí cahān ra Pablo

¹⁵ Tandihí ra nyicu chihin, chahá ra nocumi chuun, Tito. Ta na cuhva nocumi chí tandihí ñu cuñí chí ndi

cha cuenda cha ñn ri cuví yo cuenda Nyoo. Na nasoco Nyoo chí tandihí ndo.

Carta Cha Sacuhún Ra Apóstol Pablo Chi Ra Filemón

*Nu tyaá ra Pablo noo tutu
chi ra Filemón*

¹⁻² Yuhu ra Pablo ta ra Timoteo yañi yo, tyaá ndi tutu ihya chi yoho, Filemón, tyi ra tahan ndi nu tyiño Sutu Mañi yo cuvún. Ñohí vehe caa ihya cha cuenda ra Jesucristo ta sacuhún ndi tutu ihya chuun ta chi ra Arquipo, ra cuvi sindaro ra Jesucristo chihin yo, ta chi cu Apia, ta chi tandihí ñu ndu ín ri vehun. ³ Na nasoco Nyoo Sutu yo ta Sutu Mañi yo Jesucristo chi ndo. Ta na coo cha taxi ri cuñi añima ndo sahá ra.

*Nu catyi ra Pablo vatyí ra
Filemón vita xaan iñi ra ta
chino vaha iñi ra chi Nyoo*

⁴ Tyicuan ri nacuhvé tyahvi nyoo chi Nyoi cha cuendon nu nichón iñi tuhun, nu chicán tahvi chi ra. ⁵ Vatyí ñihí tuhun tyi chinó vaha iñun chi Sutu Mañi yo Jesucristo, ta cuñi xaun chi ra ta chi ñu yihí cuenda ra. ⁶ Ñáyivi cha sacotón yoso caa cuhva chinó iñun chi Nyoo, nachino iñi tucu maa ñu chi ra ta vityin chicán tahvi cha cuenda ñu, na coto vaha ñu tandihí cha vaha cha chahá Nyoo chi yo cha cuenda ra Cristo Jesús. ⁷ Sii xaan cuñi, ta vaha xaan cuñi añime vatyí

cuñi xaun chi ñu tahan yo, ta sandunyeún iñi ñu.

Nu chicán ra Pablo noo tumañi iñi chi ra Filemón cha cuenda ra Onésimo

⁸ Vasi iyó chi ityi chii cha catyi chuun ñáá cha tahan chi sacuvun vatyí apóstol cuví, soco ña cuñi saniñi chuun. ⁹ Vaha ca cha caquen noo tumañi iñi chuun cha cuenda cha cuñi yo chi Nyoo vatyí yuhu ra chahnu cuví ta ñohí vehe caa cha cuenda ra Cristo Jesús. ¹⁰ Chiquén noo tumañi iñi chuun cha cuenda ra Onésimo vatyí nanduví ra sehi cha cuenda Sutu Mañi yo nu ñohí vehe caa ihya.

¹¹ Quiví cuan musu cuví ra chuun, ta chaha xaan ra tisihi, soco vityin musu vaha cuví ra, tyi vaha sacuví ra tyiño nui ta tyicuan caa tucu cusacuvi vaha ra tyiño nuu maun. ¹² Ta vityin sacunuhí chi ra chuun. Ta cuñi vatyí ñaquehen cuenda vahun chi ra tari cha mai cuví. ¹³ Vasi cuñi cha ndoo ra ihya chihin, ta tyinyee ra chii tyiño nuu maun cha niri ca cha ñohí vehe caa cha cuenda tuhun Nyoo, ¹⁴ soco ña cuñi cha ndoo ra tyiño nuun tatu ña ndoun vaha, vatyí tacuhva sacuvun tumañi iñi chii soco chihin cha iyó vaha iñun ta ñima ca chihin cha saniñi chuun. ¹⁵ Ra Onésimo chahá xaan ra tisihi chuun quiví cuan, soco vaha xaan nanduví ra vityin, vasi yucuan cuenda canyahá ra chuun ta vityin nachaa ra nu nyaún vatyí cuacunyaa ra chuhun tyicuan ri maa ¹⁶ soco ñima tari noo musu

ri, soco tari noo ra vaha ca. Vatyí yañi yo cuví chi ra. Ta cuñí xain chi ra, ta vihi ca yoho, tahán chi cha cuñí con chi ra. Vatyí ñima noo yañun cuenda coño ñuhu ri cuví chi ra. Soco yañun cha cuenda Sutu Mañi yo cuví chi ra ñandihí.

¹⁷ Tatu ndicha cha ra tahun cuví chii, cuñí vatyí naquehun chi ra Onésimo tari cha chi yuhu naquehún.

¹⁸ Tatu iyó cha sacuví ra chuun, o tatu yosoyicá ra chuun, tyiyahví mai. ¹⁹ Yuhu ra Pablo tyaí tuhun ihya vatyí cutiyahví cha yosoyicá ra chuun, cha nuu cha tahán chí catyí chuun vatyí yosoyicón nyacua nya ñayivun chii.

²⁰ Chiquén chuun, yañi, na sandusiun iñi ta naquehun chí ra Onésimo chihin cha vaha. Sanduchaa añime chihin cha ñin ri cuví yo cha cuenda ra Cristo.

²¹ Tyaí tutu ihya chuun vatyí chité tyi cuaquichahun tuhun cahín. Ta chité vatyí ñima yucuan ri, soco cuaha ca cuasacuvun. ²² Ta nonga cha chiquén chuun tatu ma sanduvahun chiin noo nu cuví cunyai chihin ndo. Ta cuñí vatyí cācan tahvun cha cuende, na cuhva Nyoo cha cuhin nu nyaá ndo.

Nu ndihí cahān ra Pablo ta chahá ra nocumí chi ñu

²³ Vachi nocumí chuun sahá ra Epafra, ra ñoho chihin vehe caa cha cuenda ra Cristo Jesús. ²⁴ Ta vachi tucu nocumí chuun sahá ra Marcos, ta ra Aristarco ta ra Demas, ta ra Lucas, ra

catyinyeé chii chihin tyiño Nyoo.

²⁵ Na nasoco Sutu Mañi yo Jesucristo chuun. Ta na cuví chi tyicuan caa.

Carta Cha Chino Cha Cuenda Ñayivi Israel, Ñu Cahán Sahan Hebreo

*Nyoo cahán ra chihin yo
chihin yuhu Sehe ra*

¹ Ta tyembu chahnu cahán Nyoo cuaha xaan chaha, ta cuaha xaan cuhva, chihin sutu chahnu yo, ñu chiyo ta cha naha. Cahán ra chihin yuhu ra cacuvi profeta, ra cha cachahá cuenda tuhun cahán ra. ² Ta vityin nu cua ndihi tyembu ihya, cahán ra chihin yo chihin yuhu Sehe ra. Ta tandihi maa ta natyaa ra ndaha Sehe ra. In ri cuví ra chihin Sehe ra ta savahá ra ñuhu ñayivi. ³ Cha cahnu ta cha tyaquí cuví Nyoo iyó chi Sehe ra, vatyí suri ican ra cuví maa maa xiñahñu Nyoo. Ta chihin tunyee iñi tuhun cahán ra, nyisó cuenda ra tandihi cha iyó. Ta cha yahá sandachí ra cuatyí yo, ta chicunyaá ra chiyo vaha Nyoo, ra cha cahnu ca cuví. Ta vityin nyacá ñaha ra chihin ra nya andivi.

*Cahnu ca cuví Sehe Nyoo
ta ñima ca ángel*

⁴ Ta tyicuan caa cahnu xaan ca nanduvi Sehe Nyoo ta ñima ca tandihi ángel. Ta cahnu ca sivi chahá Nyoo chi ra ta ñima ca ángel cuenda ra. ⁵ Vatyí Nyoo ña catyi ra ni noo

chaha chi ni noo ángel tyehe caa:

Yoho cuvún Sehi.

Ta yuhu chahí ñayivi coun vi-tyín.

Ta ni ña cahán ra tuhun ni noo ángel tyehe caa:

Yuhu cucuvi Sutu ra.

Ta maa ra cucuvi Sehi.

⁶ Soco quivi saquichí Nyoo chi Sehe nuu ra siquí ñuhu ñayivi, catyi ra:

Na sacahnu tandihi ángel cuende chi ra.

⁷ Ta cahán tucu ra tuhun ángel cuenda ra ta catyi ra:

Sacuvi vatyí tatyí cuví ángel cuende,

ta tari yaa ñuhu cuví ra sacuvi tyiño nui, catyi Nyoo.

⁸ Soco tuhun Sehe ra catyi ra tyehe caa:

Nyoo cuvún, ta cua cunyaca ñahun tyicuan ri maa chihin cha ndaa ta chihin cha ndicha.

⁹ Vatyí cuñún cha vaha ta cutasi cuñún cha ña vaha.

Yucuan chaha vatyí yuhu, ra cha cuví Nyoo cuendon, cuaha ca tusi iñi chahí chuun, ta ñima ca chi ra tahun.

¹⁰ Ta catyi tucu Nyoo chi Sehe ra tyehe caa:

Yoho, ra nyacá ñaha cuvún. Ta quivi xihna ri savahun ñuhu ñayivi ta chihin ndahun savahun andivi.

¹¹ Maa ñuhu ñayivi ta andivi cundihí chi, soco yoho, cundoun tyicuan ri maa.

Tandihí maa cuan cu cuchahnu tari sahma.

¹² Ta cunicava tahnu chi tari noo vestido.

Ta cunasama chi tari nasamá ñáyiví sahma ñu.

Soco yoho suri maa ra cuvún tyicuan ri maa.

Ta ma ndihi maa ñayivun, catyí Nyoo chi Sehe ra.

¹³ Nyoo ni noo chaha ña catyí ra chi ni noo ángel tari catyí ra chi Sehe ra tyehe caa:

Cunyaun chiyo vahi nyacua nya cha caquin chi ra xaan iñi chuun chahun.

¹⁴ Soco tandihi ángel, tatyí cacuví ra ta tyaá Nyoo tyiño chi ra cha caca ra ta tyinyee ra chi ñu cucacu aña.

2

Cahnu xaan cuví tuhun cha sacacú Nyoo aña chi yo

¹ Yucuan chaha vatyí cuñí chi cha quichahá xaan ca yo tuhun ndicha cha chiñi yo, coto cunuhu yo ityi quiñi caa.

² Ta cha naha catyí Nyoo chi ángel, na cuhva ra ley ra chi ra Moisés. Nyoo catyí ra tyi tahán chi quichaha ñáyivi.

Ta ñu casacuví cuatyí ta ña quichahá ñu ley ra, tachí tuñi ra chi ñu tari cuhva catyí maa ley cuan. ³ Cahnu xaan cuhva sacacú Nyoo aña yo.

¿Yoso caa cucacu aña yo tatu sacunaa yo cuhva cuan? Cha xihna ri suri maa Sutu Mañi yo Jesucristo cahan ra tuhun yoso caa cuví cacu aña yo. Ta yahá cuan ta ñu cha cachiñi tuhun cahan ra, chitó ñu tyi ndicha ta canacatyí tucu ñu chi maa yo.

⁴ Ta siin ri, Nyoo sañahá cachi ra chi yo chihin cuaha milagru ta cha iyo, vatyí ndicha

cha sacacú ra chi yo. Ta chahá ra Tatyí li ra chi yo siin siin cuhva, yoso cuhva cha cuñí maa ra. Ta chihin tandihi cuan sañaha ra chi yo vatyí ndicha cha sacacu ra aña yo.

Ra Jesucristo cuví ra cha cua sacacu aña yo

⁵ Nyoo, ña chahá ra cha cunyaca ñaha ángel chi ñuhu ñayivi chaa cha cahan yo tuhun vityin. ⁶ Vatyí iyó noo nuu cahan chi nu tutu Nyoo tyehe caa:

Nyoo Suti ¿yóó ra cuví rayi vatyí nicohon iñun tuhun ra?

¿Yóó ra cuví Sehe ra vatyí tñ cuendon chi ra?

⁷ Vatyí suhva quivi, ndahvi ca sacuvun chi ra, ican saha ángel.

Soco yahá cuan sacahnú xaun chi ra. Ta sahá xaun ñáyivi chi ra.

Ta chahun cha cunyaca ñaha ra siqui tandihi cha savahun.

⁸ Tandihi cuan natyaun ndaha ra.

Tandihi maa, Nyoo chahá cha cunyaca ñaha ra, cuví chi cuan. Soco nyehé yo vatyí cumañi ca quichaha tandihi cuan chi ra. ⁹ Soco nyehé yo chi ra Jesús vatyí suhva ri quivi, sanocuee Nyoo chi ra ican saha chi ángel. Soco cha cuenda cha cuñi xaan Nyoo chi yo, chahá cuenda ra chi ra Jesús cha cuví ra cha cuenda tandihi yo. Ta vityin sahá xaan Nyoo ñáyivi chi ra ta sacahnú xaun ra chi ra cha

cuenda tindoho cha nyehe ra quivi chihj ra.

¹⁰ Tandihj maa cha iyó, cha cuenda maa Nyoo cuví. Ta maa ra savaha. Ta cuñi ra vatyj tandihj sehe ra ta chi maa ñu cucuvi tandihj cha tyaqui cha iyó gloria. Ta chihin tindoho cha sanyehe ra chi ra Jesucristo Sehe ra, sacuvaha ra chi ra. Vaha xaan quita ra. ¹¹ Sehe Nyoo cuví chi ra Cristo, ra sacacú añima ñáyivi. Ta suri sehe Nyoo nanduví chi ñáyivi ñu chinó iñi chi ra. Yucuan chaha vatyj ña cucahan nuu ra Cristo catyj ra yañi ra chi ñu, vatyj in ri sutu ra chihin ñu. ¹² Vatyj catyj ra Cristo nu tutu Nyoo tyehe caa:

Cucahin tuhun maun chihin yañi.

Ta cucate yaa cuendon nu ndú in ri ñu.

¹³ Catyj tucu ra tyehe caa:

Yuhu cuita iñi chi Nyoo.

Ta catyj tucu ra:

Ihya nyaí chihin sehi, cha chaha Nyoo chi, catyj ra.

¹⁴ Ta tandihj yo cha cuví yo sehe ra, coño ñuhu cuví yo ta yihí niñi yo, yucuan chaha ra Jesús ñandihj, suri coño ñuhu ta niñi ñáyivi nyiso ra suhva quivi, tacuhva cuví chaa tuhun chihi chi ra, ta tyicuan caa ta satani ra chi cuihna, ra cha chiyo tunyee iñi chi cha cahni chi ñáyivi. ¹⁵ Ta tyicuan caa sacacú ra chi ñu cha yuhvi chi tuhun chihi. Chiyo ñu tari noo musu ra ña vaha vatyj yuhvi ñu cha cuví ñu. ¹⁶ Cha ndicha vatyj ña quichj tyinyee ra chi

ángel, soco chi ñáyivi tata ra Abraham quichj tyinyee ra.

¹⁷ Yucuan chaha cuñi chi cha nduvi ra tari ñáyivi, tacuhva cuví ra noo ra ndicha cundahvi cuñi chi yo. Ta tyicuan caa cuví ra tata sutu cahnu cha cuenda yo nuu Nyoo. Ta tyicuan caa ta sacuachiyo ra cuatyj ñáyivi cha cuenda tindoho cha nyehe ra. ¹⁸ Vatyj maa maa ra nyehe tindoho quivi nducú nyehe ra ña vaha chi ra, yucuan chaha, vityin cuví tyinyee tucu ra chi maa yo tatu nducú nyehe ra ña vaha chi yo.

3

Cahnu ca cuví ra Jesús ta ñima ca ra Moisés

¹ Yañi, nyoho chaha cuenda ndo chi ndo chi Nyoo. Ta cuví tucu ndo ñu cha nacana Nyoo chii vatyj coo ndo chihin ra andivi. Ta cha cuenda cha nyehe ra Cristo Jesús tindoho tyiño nuu ndo, yucuan chaha, nyehe vaha ndo cuhva vaha iyó ra. Vatyj ican ra cuví ra cha saquichj Nyoo chi vatyj cuví ra tata sutu cahnu cuenda yo cha chinó iñi yo tuhun Nyoo. ² Ta maa ra quichaha ra tandihj cha catyj Nyoo cha sacuvi ra, tari quichaha tucu ra Moisés ta cha naha, ta sacuvi ra tyiño cha tahan chi sacuvi ra nuu ñáyivi sehe Nyoo. ³ Ta ra Jesucristo cahnu ca ra cuví ra, ta ñima ca ra Moisés. Vatyj noo ra cha savahá vehe, cahnu ca cuví ra ta ñima ca maa vehe cuan. ⁴ Tahan tahan vehe, iyó ra savaha chi

chi, soco Nyoo cuví ra cha savaha tandihí maa cha iyó.
 5 Ra Moisés, quichaha vaha ra chi Nyoo ta sacuví ra tyiño nuu ra cha cuenda ñáyiví Israel ta cahan ra tuhun cha cusacoto Nyoo nu cuahan ca chi ityi nuu. 6 Soco ra Cristo ra cuví Sehe Nyoo, suri quichaha vaha ra chi Nyoo ta ican ra nyacá ñaha vehe Nyoo. Ta vehe cuan ican cuví maa yo, tatu saní ca yo iñi yo cahun yo ityi nuu chihin Nyoo ta itá iñi yo chí ra nyacua nya nu ndihí, ta tyicuan ri cusí cuñí yo nyatú yo cha cuñihi yo.

Ñu chinó iñi chi Nyoo, nyitátú ñu chihin Nyoo

7 Yucuan chaha cuñí chi saha cuenda yo chí yo, tari catyí Tatyí Ii Nyoo nuu tutu Nyoo tyehe caa:

Tatu chiñí ndo tuhun cahán Nyoo chihin ndo vityin,

8 ma sandava ndo añima ndo, tari sacuví ñu ña quichaha chi Nyoo quívi canducú nyehe ñu chí ra nu chicá noo ñu chiqui ndí cuan.

9 Tyehe caa catyí Nyoo: Ñáyiví cuan nducu nyehe ñu chí,

vasi chíchi cha uvi xico cuiya nyehe ñu cha sacuví.

10 Yucuan chaha cuxain chi ñu,

ta catyí tyehe caa: "Tyicuan ri chicá uvi iñi ñu, ta ña cuñí ñu coto ñu ityi mai."

11 Yucuan chaha cuxain chi ñu, ta catyí cachi chí ñu,

vatyí ma quíhví ñu nyitatu ñu chihin, catyí Nyoo.

12 Yañi, saha ndo cuenda chi ndo coto cu ña vaha añima ndo ta coto yoso ri caa ta sandoo ndo chí ra cuví Nyoo nyitó cha cuenda cha ña chinó ca iñi ndo chí ra. 13 Soco saní ndo iñi tahan ndo tahan tahan quívi, cha ní ri ca cha chahá ca chí cuhva vityin, tacuhva vatyí ní noo ndo ta ma sandaví ñaha cha quíñi caa chí ndo, ta ndundava añima ndo. 14 Vatyí tatu saní yo iñi yo chihin Nyoo nyacua nya nu ndihí ñáyiví, yucuan ta ñn ri cuñihi yo cha vaha chihin ra Cristo.

15 Catyí chí nu tutu Nyoo vatyí saha yo cuenda chí yo tyehe caa:

Vityin tatu nyoho ta chíñí ndo cha catyí Nyoo.

Ma sandava xaan ndo añima ndo, tari sacuví ñu ña quichaha chí, catyí Nyoo.

16 ¿Yóó ñu cha cachiñí tuhun cahan Nyoo ta ña tyasohó ñu? Tandihí ñu Israel cha tavá ra Moisés Egipto ta cha naha, ican ñu cuan.

17 Ta ¿yóó chí cuxaan Nyoo chíchi cha uvi xico cuiya? Suri chí ñu cuan, ñu cha chicoo cuatyí. Ta cachiñí ñu nu chiqui ndí nu chicá noo ñu. 18 ¿Ta yóó chí catyí cachi Nyoo tyi ma quíhví ñu, cunyitatu ñu chihin ra? Chí ñu cha ña tyasohó nu cahán ra. 19 Nyehe yo vatyí ña cuví quíhví ñu cuan vatyí ña chinó iñi ñu chí ra.

4

¹ Yucuan chaha, cha ni ri ca cha iyó ca quivi cuvi quihvi yo cunyatatu yo chihin Nyoo, cuñí chi saha yo cuenda coto ma cuvi quihvi nya noo nyoho nu cunyatatu yo chihin Nyoo. ² Vatyí chiñi tucu yoó tuhun Nyoo cha sacacú ra ñima yo, tari chiñi maa ñu Israel cuan. Soco ñahri maa tuhun cha chiñi ñu, vatyí chiñi ndi ri maa ñu, ta ña chinó iñi ñu. ³ Soco yoó cha chinó iñi yo, ican yo cuvi ñu quihvi nyitatu chihin Nyoo. Ta cha cuenda ñu ña chinó iñi cuvi chi tari catyí Nyoo tyehe caa:

Yucuan chaha cuxain chi ñu ta catyí cachi chi ñu vatyí ma quihvi ñu nyitatu ñu chihin, catyí Nyoo.

Soco cha nyaá nu nyitatu yo chihin Nyoo vatyí nyitatu Nyoo cha sandihí ra tyiño sahá ra nyata savaha ra ñuhu ñayivi. ⁴ Vatyí yihí nu catyí chi nu tutu Nyoo cha cuenda quivi cu ucha nu ndihí vitya. Tyehe caa catyí chi:

Nyoo nyitatu ra nu cu ucha quivi, vatyí ndihí tyiño sahá ra.

⁵ Ta inga tucu chaha catyí chi nu tutu Nyoo tyehe caa:

Ni noo quivi ma quihvi ñu nu cunyatatu ñu chihin, catyí Nyoo.

⁶ Ñu cuan, ñu cha xihna ri cachiñi tuhun cha sacacú Nyoo ñima yo, ña quihvi ñu cha cuenda vatyí nacahnú ñu nu cahán Nyoo. Soco nyaá cha quihvi inga ñu. ⁷ Vatyí cha

yaha nacahnú ñu Israel cuan nu cahán Nyoo, natyaa tucu ra cuhva vatyí nya inga quivi cuvi quihvi yo cunyatatu yo chihin ra, ta ican cuvi quivi vityin. Ta cahán Nyoo tuhun quivi vityin chihin cha catyí ra David. Nyaá chi nu tutu Nyoo tyehe caa:

Vityin tatu nyoho ta chiñi ndo cha catyí,

Ma sandava xaan ndo ñima ndo, catyí Nyoo.

⁸ Tyehe ta chinyaca ra Josué chi ñu Israel cuan nu cunyatatu ñu chihin Nyoo, ma cahan ca Nyoo inga chaha tuhun cha cuenda inga quivi.

⁹ Soco nyaá ca nu cuvi nyitatu ñu yihí cuenda Nyoo chihin ra. ¹⁰ Vatyí ñu quihvi nyitatu chihin Nyoo, ña chicá ca iñi ñu soco nyitatu ñima ñu tari nyitatu Nyoo quivi ndihí tyiño saha ra. ¹¹ Cuñí chi saniñi yo chinó iñi yo chi Nyoo tacuhva cuvi nyitatu yo chihin ra, coto yoso ri caa nya noo nyoho sacuvi ndo tari sacuvi ñu Israel cuan vatyí ña cuñi ñu chino iñi ñu chi ra.

¹² Vatyí tuhun Nyoo, nyitó chi, ta iyó tunyee iñi chi chi. Ta xaan ca chi ta ñima ca mityí cha xaan ninduvi chiyo yuhu, ta nyee chi nyacua nya chichi ñima yo ta nyacua nya chichi cha chiñi tuñi xiñi yo, nyacua nya chichi tuhun xehe cha caá ñima yo. Ta sañahá cachi Nyoo ñáá cha chicá iñi yo ta ñáá cha caá ñima yo tatu vaha o ña vaha. ¹³ Ñahri maa cha savaha Nyoo ta cuvi tixehe nuu chi chi ra. Tandihí maa ta nyehé ra. Ta chi ra

nyaá nacuhva cuenda yo cha sacuví yo.

Ra Jesús cuví ra tata sutu cahnu cha cahán chahayo nuu Nyoo

¹⁴ Ra Jesús Sehe Nyoo, cuví ra tata sutu cahnu cha cuenda yo, vatyí quihví ra nuu Nyoo ta cahán ra chaha yo. Yucuan chaha cuñí chi cha ma sandihí yo cha chinó iñi yo chi ra. ¹⁵ Vatyí ra cuví tata sutu cha cuenda yo cuví naquehen ndahví ra chí yo tatu cuihya cuñí yo chihin Nyoo, vatyí chitó tucu maa ra cha cuví tindoho cha nyehe yo vatyí nyehe tucu maa ra tandihí nuu tindoho, saha ra ña vaha cha nducu nyehe ra chí ra, soco maa ra Jesús, ñahri cuatyí ra chicoo. ¹⁶ Yucuan chaha cuví tuhva yo nuu nyaá Nyoo ta cahan yo chihin ra chihin cha ña yuhví yo vatyí cuñí xaan ra chí yo, ta ndahví cuñí ra nyehe ra chí yo. Ta cha cuenda cha vaha ñáyivi cuví ra, tyinyeé ra chí yo nu nyehe yo tindoho.

5

¹ Tandihí ra cuví tata sutu cahnu ca cuenda ñu Israel, ñáyivi cuví ra. Ta na cachí Nyoo chí ra vatyí cahan ra chaha tandihí ñu nuu Nyoo, ta kuhva cuenda ra cha chahá ñu chí Nyoo, ta cahñi ra quití cha cuenda cuatyí ñu. ² Ta suri vachi quivi ndahví cuñí ra cacuví sutu cha nducú nyehe ra ña vaha chí ra, yucuan chaha cuví cundahví cuñi ra nyehé ra chí ñáyivi ña chitó maa, ta tyinyeé ra

chi ñu quitá caxiin ityi vaha Nyoo, na ndu uvi iñi ñu cuatyí ñu. ³ Ta cha cuenda cuatyí maa ra ta cha cuenda cuatyí ñáyivi, cachahñi ra quití ta chahá cuenda ra chí Nyoo na cahnya ra cuatyí ñu.

⁴ Yori sacuvi ri maa sutu chí. Maa Nyoo cuví ra caná chí ra, ta chahá ra cha cuví ra tata sutu, tari sacuví ra chí hin ra Aarón ta cha naha. ⁵ Ta tyicuan caa tucu ra Cristo, ñima maa ra sacuví ra sutu chí ra, soco maa Nyoo chahá cha cuví ra, tari catyí maa ra tyehe caa:

Yoho cuví Sehi.

Yuhu chahí ñáyivi coun vityin, catyí Nyoo chí ra Cristo.

⁶ Tari catyí tucu ra chí ra nu inga nu cahán chí tyehe caa: Yoho cuvún tata sutu tyicuan ri maa.

Cuvún tari ra Melquisedec.

⁷ Ta quivi chiyo ra Cristo ihya siqui ñuhu ñáyivi, chican tahvi ra chí Nyoo, ta chacu chaa ra ta cahan ra chihin Nyoo vatyí ican ra cuví ra iyó tunyee iñi chii cha sacacu chí ra ndaha tuhun chihi. Ta Nyoo chíñi ra tuhun cahan ra vatyí sacuví ra tandihí cha catyí Nyoo. ⁸ Yucuan chaha vasi Sehe Nyoo cuví chí ra Cristo, soco cutuhva ra cha quichaha ra chí Nyoo chihin cha nyehe ra tindoho. ⁹ Ta cha yaha cha sacuvaha Nyoo chí ra, tyicuan ta cuví ra ra sacacú ñima ñáyivi tacuhva coo ñu chihin Nyoo tyicuan ri maa, tandihí ñu cha quichahá tuhun cahan ra. ¹⁰ Vatyí Nyoo tyaa tyiño chí ra cha cuví

ra tata sutu cahnu, tari ra Melquisedec.

Yica xaan cha sandihí yo cha chinó iñi yo tuhun Nyoo

¹¹ Cuaha xaan nyaá cahan yo siqui tuhun ihya, soco yihí xaan nacatyí yoso caa cuahan, vatyí nyoho ña cuñí ndo cutuñi iñi ndo. ¹² Cha naha xaan chinó iñi ndo chi Nyoo, cuñí chi cha cuví ndo ra sacuahá ta sañaha ndo chi inga ñu. Soco nyoho ni cuñí chi cha nacatyí tucu ndi inga chaha chi ndo tuhun cha xihna ri chiñi ndo tuhun Nyoo. Tari cha lee cuví ndo chihin tuhun Nyoo, vatyí tari cha chaxin ca ndo cha nuu cha cachi ndo nyayu. ¹³ Ta ñu cuví tari cha lee cha chaxín, ta chaa ca ñu cutuñi iñi ñu yoso caa coo vaha ñu nuu Nyoo. ¹⁴ Soco nyayu vaha cuví chi cha cuenda ñu chahnu chihin tuhun Nyoo: ñu cha cutuñí vaha iñi tuhun ra, nacotó ñu nya cha vaha ta nya cha ña vaha.

6

¹ Yucuan chaha ma ndoo ri yo chihin cha xihna ri cutuhva yo tuhun ra Cristo, cuhun yo ityi nuu ca tacuhva cuví yo ñáyivi chahnu chihin tuhun Nyoo. Ma ndoo ri yo chihin tuhun cha yaha cutuhva yo, ta cuñun tuhun cha ma nducu yo cuhva cha cuvaha yo nuu Nyoo chihin cha sacuví yo cha vaha, ta tuhun nachino iñi yo vatyí sacacú Nyoo chi yo. ² Ma ndoo yo chihin tuhun cha yaha sacuvi yo, tari cha condutya yo, tari cha tyisó yo

ndaha yo siqui ñu chiñó iñi chi Nyoo na nasoco ra chi ñu, tari tuhun cha cunandoto tandihí ñáyivi cha yaha chihí, ta tari tuhun cha cucutuñi chi tandihí ñáyivi nuu Nyoo ta yihí ñu cuhun ñu anyaya tyicuan ri maa. Ma ndoo ri yo chihin tandihí cuan. ³ Soco tatu Nyoo ta chaha ra, sacuvi yo ihya: cuhun yo ityi nuu ca.

⁴⁻⁶ Vatyí ñu cha yaha naquehen cuenda cha ndichin Nyoo noo chaha, chitó ñu cha chahá Nyoo, ta nyaá Tatyí Ii Nyoo chihin ñu. Ta cha chitó ñu yoso caa cha vaha tuhun Nyoo, ta cha ñihi ñu tunyee iñi Nyoo. Ta chihin tunyee iñi cuan cunyaca ñaha Nyoo ñuhú ñáyivi chaa. Tatu cha yaha naquehen cuenda ñu tandihí cha vaha cuan noo chaha, ta yaha cuan ta sandihí ñu cha chinó iñi ñu chi Nyoo, ma cuví ca cha ndu uvi iñi ñu inga chaha. Vatyí suri maa ñu tari cha tyaá ñu chi ra Cristo nu cruzi inga chaha, vatyí chahá ñu cha cuacu nyaa ñáyivi chi ra. ⁷ Añima ñáyivi cuví tari noo ñuhú nu sahá tyiño ñu, vatyí noo ñuhú tahan ri chaha cha coon savi, chihí ñuhú cuan ndutya savi cuan. Tatu vaha ñuhú cuan ta vaha cuvaha cha tachí ñu nuu chi, cunasoco Nyoo chi ñuhú cuan. ⁸ Soco tatu cañá iñu ta cañá nyava nuu chi, ñahri maa tuhun. Ta cusoco Nyoo chi ñuhú ña vaha cuan ta cucayu chi. Ta tyicuan caa tucu cucuvi chi ñu cha sandihí cha chinó iñi chi Nyoo.

9 Yañi, vasi cahán ndi tyicuan caa, soco chító vaha ndi vatyí nyoho sacuví ndo cha vaha, maa maa ri cha sacuví ñu cha cacú añima sacuví ndo, ta ña sacuví ndo tari ñu cuví tari ñuhú ña vaha cuan. ¹⁰ Vatyí Nyoo, ra vaha cuví ra, ta ma naa iñi ra cha sacuví ndo. Ta nyehé ra vatyí cuñí xaan ndo chi ñu yihí cuenda Nyoo, vatyí tyinyee ndo chi ñu, ta tyinyeé ca ndo chi ñu nya vityin. ¹¹ Cuñí ndi vatyí na cuní ca iñi ndo nyacua nya quichi Sutu Mañi yo, tyicuan caa ta cuñihi ndo tandihí cha nyatú ndo. ¹² Ña cuñí ndi cha cusuchan ndo, soco saha ndo cuenda chi ñu cha chinó vaha iñi chi Nyoo ta sacuví ndo tari sacuví ñu. Vatyí ñu chinó vaha iñi chi Nyoo chihin cha cama iñi ñu, ican ñu ñihí cha catyí Nyoo tyi cuhva ra chi yo.

¹³ Vatyí ta cha naha catyí Nyoo chi ra Abraham, vatyí cuhva ra noo cha cuhva ra chi ra. Ta Nyoo tyaá ra cuhva cha cuhva ra, ta noo ri tuhun cahán ra vatyí maa ra, Nyoo cuví ra. ¹⁴ Ta tyehe caa catyí ra: “Cha ndicha vatyí cunasoco xain chuun ta cuaha xaan sehun cucuhve”, catyí ra chi ra Abraham. ¹⁵ Ta ra Abraham chihin cha cama iñi ra, nyatu ra tuhun cahán Nyoo chihin ra, ta tyicuan caa naquehen cuenda ra cha catyí Nyoo tyi cuhva ra chi ra. ¹⁶ Tatu noo ñáyivi cuacuhva ñu noo cha cuacuhva ñu chi tahan ñu ta tyanaha ñu sivi noo ra cahnu ca. Ma chihin yucuan ri. ¹⁷ Ta yucuan

chaha vatyí Nyoo minoo ri tuhun cahán ra, vatyí cuñi ra cha coto ñáyivi vatyí ndicha tuhun cahán ra, ta ña nasamá ra tuhun cahán ra. ¹⁸ Yucuan chaha iyó uvi tahan cha ma cuvi nasama chi. Noo cuví cha catyí Nyoo tyi cuhva ra nyatu chi ra Abraham, ta cha cu uvi, noo ri tuhun cahan ra vatyí maa ra, Nyoo cuví ra. Ta Nyoo ña cahán ra cuendu. Yucuan chaha tandihí yo cha nyañaá yo chi ra, ñi iñi yo cunyeé iñi yo chi ra, ta nyatú yo cha tyaá ra cuhva cha cuhva ra chi yo. ¹⁹ Tari noo barcu cha nuhñi noo caa vee, coto cuhun chi chihin tatyí, ta tyicuan caa quihí iñi yo cha sacacú ra Cristo añima yo. Ta cha quihí iñi yo chi ra, nuhñi yo chihin Nyoo ra nyaá inga chiyo cortina, o nya gloria cuví Cuan. ²⁰ Vatyí ra Jesús cha quihvi ra yucuan ta nuña ra ityi nu cuhun yo nu nyaá Nyoo. Ta ican ra Jesús cuví ra minoo tata sutu tyicuan ri maa, tari ra Melquisedec.

7

Ra Jesús cuví tata sutu tari ra Melquisedec

¹ Ra Melquisedec cha cahín tuhun, cuví ra rey ñuu Salém, ta cuví ra tata sutu cuenda Nyoo, ra cuví ra cahnu ca. Quivi cha cuandichi ra Abraham cha chahan ra chicañi tahan ra chihin suhva ra cacuvi rey, ta cuví chasaha ra chi ra, tyicuan ta quitá ra Melquisedec ityi nuu ra ta nasoco ra chi ra. ² Ta ra Abraham uchi uchi tinyaa ra

siquí cha saha ganaa ra nu chicañi tahan ra, ta chaha ra chi ra Melquisedec. Ta sivi ra Melquisedec cuan cuñi chi catyí: “Rey, ra cuví ra vaha.” Ta rey ñuu Salem cuan cuví ra, yucuan chaha cuví ra: “Rey vaha cha chahá cha taxi coo ñima ñáyivi.” ³ Ña catyí tuhun Nyoo yóo cha cuví sutu ra ta sihi ra, ni ña cahán chi tuhun yóo ñáyivi chi ra. Ni ri ña cahán chi tuhun ama cacu ra, ni ama chihí ra. Yucuan chaha cuví ra tari caá Sehe Nyoo, noo tata sutu tyicuan ri maa.

⁴ Soco, vityin nyehé ndo yoso cha cahnu cuví ra Melquisedec, vatyí ra Abraham tinyaa ra uchi uchi siqui cha saha ganaa ra chi ra cacuví rey cuan nu chicañi tahan ra, ta chaha ra chi ra Melquisedec. ⁵ Tyehe ta tata ra Abraham cuví ra Melquisedec, ta cuví ra sutu, ma catyí yo tyi ra cahnu ca cuví ra. Vatyí nu cuahan ca chi ityi nuu ta suri maa ley Nyoo saniñi chi ñáyivi tata ra Abraham nacuhva ñu uchi uchi cha saha ganaa ñu chi ra cacuví sutu tata ra Leví, vasi tata ra Abraham cacuví chi ra tari maa ñu. ⁶ Ta ra Melquisedec, ñima tata ra Leví cuví chi ra, ta ni ñima tata ra Abraham, soco vita ri tyi quehen ra uchi uchi siqui tandihí cha ñihí ra Abraham. Ta nasocó ra Melquisedec chi ra Abraham, ra cha chaha Nyoo promesa chii. ⁷ Ta chitó cachi yo vatyí cahnu ca cuví ra cha nasocó cuan, ta ñima ca ra cha nasocó ra

chi. ⁸ Nyehé yo vatyí cahnu ca ra cuví ra Melquisedec cha nuu inga ra caquehén cuenda uchi uchi siqui cha iyó chi ñáyivi, vatyí rayi ri cacuví ra cuan, ta tuhva chaa tuhun chihí chi ra. Soco tuhun ra Melquisedec cahán chi nu tutu Nyoo ta catyí chi tyi ñahri tuhun chihí iyó chi ra. ⁹ Ta ra Leví, chihin sehe ra, ra cacuví tata ra Abraham, ican ra cacuví tata sutu cha tahán chi caquehén cha uchi uchi siqui cha iyó chi ñáyivi. Soco tari quivi tyiyahvi tucu ra Leví cuan uchi uchi cha saha ganaa ra chi ra Melquisedec cuví cuan, vatyí ra Abraham tyiyahvi ra. ¹⁰ Vatyí ra Leví, tata ra Abraham cucuvi chi ra, vasi ta cacu ca ra quivi chisatahan ra Melquisedec chi ra Abraham.

¹¹ Ta ra cacuví tata ra Leví suri tata ra Aarón cacuví chi ra, ican ra cacuví sutu cuenda yo ñu Israel, ta cha cuenda ra cuan quichí ley chahnu Nyoo. Ta vityin tyehe ta cuví nduvaha coo yo chihin Nyoo cha cuenda cha sacuví yo cha catyí ley cuan, yucuan ndicha ña niñi ca cha quichí ra Cristo ra cuví tata sutu tari ra Melquisedec, ta ñima tari ra Aarón. ¹² Vatyí tatu Nyoo ta nasama ra chi ra cuví sutu, cuñi tucu chi cha nasama ley ñandihí. ¹³ Ta Sutú Mañi yo cha cahán tutu Nyoo tuhun, ñima tata ra Leví ta ra Aarón cuví ra, soco tata inga sehe ra Israel cuví chi ra. Ta ni noo ra vachi tata cuan ta ña tuhvá ra cuví sutu. ¹⁴ Vatyí chitó vaha yo vatyí Sutú Mañi

yo tata ra Judá, sehe ra Israel vachi ra, ta ra Moisés ñahri maa tuhun tata ra Judá cahān ra quiví cahān ra tuhun ra cacuví sutu.

¹⁵ Ta yucuan nyehé vaha yo, vatyí Nyoo natyaa ra inga sutu tari ra Melquisedec.

¹⁶ Ñima tari catyí ley quichí ra, vatyí ley catyí chí yóo chí tata cua quichi noo ra cuví sutu, ta ña quichí ra tata cuan, soco quichí ra vatyí iyó cha ndicha ñuhu Nyoo chihin ra ta ñahri tuhun chihí nyisó ra. ¹⁷ Vatyí ican ihya cuví cha cahán Nyoo tuhun ra:

Yoho cuvún tata sutu tyicuan ri maa,

Tari ra Melquisedec.

¹⁸ Yucuan chaha sacuachiyo Nyoo ley chahnu cuan vatyí ña cuví maa tyinyee chí chí ñáyiví, ta ña chiñuhú. ¹⁹ Vatyí ley cha chahā Nyoo chí ra Moisés, ña sanduvahā maa chí añima yo. Ta vityín, tyiño nuu ley chahnu cuan, iyó inga tuhun vaha ca cha yihí iñi yo. Ta chihin ihya tuhvá yo chí Nyoo vatyí sanduvahā ra Cristo cuhva coo yo chihin Nyoo.

²⁰⁻²¹ Nyoo tyaa ra cuhva ta tyanahā ra vatyí cuhva ra noo sutu cha cahnu ca chí yo. Soco sutu cha iyó vityín ña tyanahā Nyoo quiví tyiso ra chí ra. Vatyí nu tutu Nyoo catyí chí tyehe caa:

Sutu Mañi yo, ñin ri tuhun cahān ra, ta ma nasama ra cuhva catyí ra tyehe caa:

“Yoho cuvún Sutú tyicuan ri maa,

tari cuví ra Melquisedec”,
catyí Nyoo.

²² Yucuan chaha ra Jesús chahā ra noo tuhun vaha ca chí yo, ta ñima ca tuhun chaxihna ri cuan. ²³ Vatyí cha cuaha xaan ra cacuví sutu, soco chaa chaa ri tuhun chihí chí ra. ²⁴ Soco ra Jesús ñahri tuhun chihí iyó chí ra, ta ña ndihí tuhun cha cuví ra sutu. ²⁵ Yucuan chaha tyicuan ri maa cuví sacacu ra añima ñu natuhvá chí Nyoo cha cuenda ra, vatyí iyó maa ra tyicuan ri maa, vatyí cacān tahvi ra chí Nyoo cha cuenda ñu.

²⁶ Yucuan chaha ra Jesús cuví sutu cha chiñuhú chí yo. Ta maa ra, ii ra, ñahri cha quiñi caa sacuví ra, ta ni ñahri cuatyí ra. Ta ña cutahán ra chihin ñu iyó cuatyí. Ta sucun ca nyaá ra, ican saha andiví. ²⁷ Ñima tari inga ra cacuví tata sutu cuan, vatyí cuñi chí cha cacahñi ra chí quiti ta cuhva cuenda ra chí Nyoo ndi quiví. Ta cha xihna ri, na naa cuatyí maa ra, ta yaha cuan ta naa cuatyí ñáyiví. Soco ra Jesús noo ri chaha, chahā cuenda ra chí ra chí Nyoo na naa cuatyí tandihí yo. ²⁸ Ley Nyoo cha quehen cuenda ra Moisés, tyisó chí chí ra cacuví nuu chí tata sutu, soco ra iyó cuatyí cacuví ra. Soco yahā cuan ta chahā Nyoo noo tuhun chaa, ta ñin ri tuhun cahān ra. Ta tyiso ra chí Sehe ra cha cuví ra Sutú cahnu ca, ta maa ra cuví ra noo ra vaha tyicuan ri maa.

8

Natyihī tahan Nyoo tuhun chaa chihin yo quivī chihī ra Jesús cha cuenda yo

¹ Ta chichi cha tandihī cha cahín nu tutu ihya, ícan ihya cuví cha niñi ca tuhun: Ra cuví tata sutu cahnu chí yo cuví ra noo ra vaha tyicuan ri maa, ta chicunyaá ra nu tyayu chichi gloria chiyo vaha Nyoo. ² Ta cuví ra

Sutu noo nu cuví vehe ñuhu cha ndicha vaha nu nyaá Nyoo. Maa Sutú yo Nyoo savaha vehe cuan, ta ñima rayi. ³ Tandihī ra cacuví tata sutu tyisó Nyoo chí ra, vatyí cuhva cuenda ra ofrenda chí Nyoo ta cahni ra quití na naa cuatyí ñáyiví chihin niñi ti. Ta yucuan chaha niñi cuñi chí cuhva cuenda tucu ra Jesucristo niñi ra chí Nyoo.

⁴ Tyehe ta siqui ñuhu ñayiví nyaá ra cuví ra sutu, ni ñima sutu cuví ra tatu tyicuan caa. Vatyí siqui ñuhu ñayiví, iyó ca ra cacuví sutu cha cachahá cuenda ofrenda chí Nyoo tari cuhva catyí ley cha tyaa ra Moisés. ⁵ Soco ra

cacuví sutu siqui ñuhu ñayiví, sacuví ra tyiño nuu Nyoo soco tari cuhva cuví andiví. Cuví chí noo xiñahñu tyiño sahá ra Cristo. Ta chitó yo vatyí tyicuan caa, vatyí quiví cha cua savaha ra Moisés vehe ñuhu cuan ta cha naha, Nyoo catyí ra chí ra tyehe caa: “Saha vaha cuenda, ta savahun tari cuhva caá cha sañahí chuun quiví chinyaun nu yucu cuan”, catyí Nyoo chí ra. ⁶ Soco ra Cristo ra cuví sutu cahnu chí yo, vaha ca

cuhva sacuví ra, vatyí cha cuenda maa ra, natyihí tahan Nyoo noo tuhun vaha xaan ca chihin yo, vatyí vaha ca cha cucuhva ra chí yo.

⁷ Vatyí tyehe ta cuví cacu añima yo chihin tuhun xihna ri cha natyihí tahan Nyoo chihin yo, ña chiñuhú ca cha natyihí tahan chaa ra tuhun chihin yo cha cu uvi chaha. ⁸ Soco Nyoo nyehe ra vatyí ña vaha maa sacuví ñáyiví cuan, ta cahán ra tuhun ñu nu tutu ra tyehe caa:

Cuchaa chí quiví vatyí cunatyihí tahin tuhun chaa chihin ñáyiví Israel ta ñu Judá, catyí Sutú Mañi yo.

⁹ Ñima tari natyihí tahin tuhun chihin ñáyiví chahnu ñu, quiví tijn ndaha ñu ta tave chí ñu ñuu Egipto.

Vatyí ña sacuví ñu tuhun cha natyihí tahin chihin ñu,

ta yucuan chaha sañe chí ñu, catyí Sutú yo Nyoo.

¹⁰ Tuhun cha cunatyihí tahin chihin ñu ñuu Israel nu cuahan ca chí, tyehe caa cucuvi, catyí Sutú Mañi yo:

Chichi cha chiñi tuñi xiñi ñu, cutyai ley mai, ta chichi añima ñu cutyai.

Tyicuan ta mai cucuvi Nyoo ñu,

ta maa ñu cucuvi ñu ñáyiví chii.

¹¹ Tyicuan ta ña niñi ca cha sañahá ñu chí tahan ñu, ni chí yañi ñu, tacuhva

vatyí cohon nuu ñu chi yuhu cha cuví Nyoo ñu. Vatyí tandihí ñu, cucohon nuu ñu chii, nyacua nya ñu luhlu ca ta nyacua nya ñu chahnu cá.

12 Ta cusahi ticahnu iñi cha quiñi caa cha sacuví ñu.

Ta ma nicohon ca maa iñi cuatyí ñu, catyí Sutu Mañi yo.

13 Quiví cha cahán Nyoo tuhun cha natyihí chaa ra tuhun chihin yo, cuñí chi catyí vatyí cha sacuchahnu ra cha xihna ri cuan. Ta numi ri cundihi tuhun cha cuví cha chahnu cuan.

9

Nu sañahá chi yoso caa vehe ñuhu cha iyó siqui ñuhu ñayivi ta vehe ñuhu nu cuví andivi

1 Quiví natyihí tahan Nyoo tuhun cha xihna ri chihin ñáyivi, chahá ra cuhva chi ñu yoso caa sacahnu ñu chi ra, soco chichi noo vehe ñuhu cha nyaá siqui ñuhu ñayivi ihya. 2 Tyehe caa chingó vehe ñuhu cuan: Chata noo cortina nyaá cuarto cha xihna ri nu tayucú cañileru, ta nanyaá mesa nu catuví pan ii. Ta chicunañi cuarto cuan Nu Ii. 3 Chata cortina cu uvi, yucuan cuví nu chicunañi Nu Ii Xaan Ca. 4 Ta yucuan nanyaá noo arta xuhun cuaan nu chahmi ra cutu. Ta nanyaá caja, cha natyihí tahan Nyoo tuhun chihin yo, ta iñi xuhun cuaan nicacahnu. Ta chichi cuan ñohó casitu xuhun cuaan cha

ñohó maná. Ta ñohó yutun cha natyacú cha chindahá ra Aarón. Ta ñohó tucu yuu cha nyaá ndi uchi mandamientu. 5 Ta siqui caja cuan nyicú cha tari caa ángel, ta cuñí chi catyí vatyí nyaá Nyoo yucuan. Ta chihin ndichin ángel cuan cachasí ra nu cuví nu tuhva Nyoo sahá ra ticahnu iñi cuatyí ñáyivi. Cha vityin ña cuví nacatyí ca ndi siqui tuhun ihya.

6 Ta tyicuan caa cuví vehe ñuhu cuan. Ta ndiquivi ri caquihvi ra cacuví sutu chichi cuarto cha xihna ri nu nañi Nu Ii, tacuhva sacahnu ra chi Nyoo. 7 Soco cuarto cu uvi Nu Ii Xaan Ca cuan iyó maa minoo ra cuví nuu chi sutu, ta yucuan ra cuví quihvi yucuan, noo chaha cha noo cuiya. Ta cuhva cha quihvi ra, cuñí chi cuiso ra niñi quití vatyí cuhva cuenda ra chi Nyoo cha cuenda cuatyí maa ra ta cuatyí ñáyivi. 8 Ta cha tyicuan caa sañahá Tatyí Ii Nyoo chi yo vatyí, ta cuví ca chaa yo nuu Nyoo vatyí ni nyaá ca cuarto cha xihna ri cuan. 9 Tandihí maa ihya cuví chi tari noo xiñahñu ri cha cuenda tuhun chaa cha chacun Nyoo vityin: vatyí noo cha chahá cuenda ñu chi Nyoo ña tyiñyee chi chi ñu na caca vaha iñi ñu. 10 Vatyí tandihí cuhva sacuví ra cacuví sutu cuan cahán chi maa ri cuenda ñáá cha cuví cachi ñáyivi, ta ñáá cha cuví coho ñu, ta yoso caa cundundí coño ñuhu ri ñu. Ta catuví cuhva cuan, nyatú chi nya quivi cacun Nyoo inga

cuhva vaha ca.

11 Soco vityin cha yaha quichij ra Cristo ta maa ra cuví tata sutu cahnu cha cuenda tuhun vaha ca cha chacun Nyoo. Quihvi ra chichi vehe ñuhu vaha ca, ta ndi ca, vatyí maa ra cuví sutu. Ta ñima rayi savaha vehe ñuhu cuan o cuñi chi catyí, ñima vehe ñuhu ñuhu ñayivi ihya cuví. 12 Ra Cristo quihvi ra vehe ñuhu nu cuví gloria Nu li Xaan Ca. Soco ñima ca cha cuhva cuenda ra niñi mbee luhlu, o becerro, soco niñi maa ra chaha cuenda ra. Ta tyicuan caa quihvi ra noo ri chaha nu ndihi tuhun, ta tyicuan caa ta cuví sacacu ra chi yo tyicuan ri maa. 13 Niñi toro, ta niñi ndixihyu, ta ñiyaa becerro cha cachahmi ra nu arta, tuhva ra catyicu ra chata ñu ca iyó cuatyí, ta coño ñuhu ri ñu sandundi chi cuan nuu Nyoo. 14 Ta tatu tyicuan caa, jÑana cha cahnu ca tunyee iñi iyó chi niñi ra Cristo! Vatyí tyinyee Tatyí li chi ra ta chaha cuenda ra chi ra chi Nyoo chihin cha ñahri cuatyí ra. Ta niñi ra sandachí chi cha ña vaha cha caá aña yoyacuhva ma cuita ca iñi yoyacuhva ley cha chaha tuhun chihí chi yo, ta tyicuan caa ta cuví sacuvi yoyacuhva nuu ra cuví Nyoo nyitó.

15 Yucuan chaha ra Jesucristo cuví ra cha cahán chaha yoyacuhva cuenda tuhun chaha cha natyihí tahan Nyoo chihin yo. Ta cha cuenda cha chihí ra, iyó ticahnu iñi cuatyí cha sacuvi yoyacuhva

chinyaca ñaha tuhun cha xihna ri cuan chi yo. Ta yoo, ñu nacana Nyoo chi cuví yo, cuví naquehen cuenda yoyacuhva ma ndihi ca maa, cha catyí maa ra tyi cuhva ra chi yo. 16 Vatyí tatu iyó noo tutu cha sandoo noo ra chihí, ta catyí tutu cuan ñáá ndihi cha cuñihi ñayivi chi ra tatu chihí ra; cuñi chi cha coto vaha ra cuví tyiño tatu ndicha cha chihí ra cha sandoo tutu cuan; tyicuan ta cuví sacaca ra tyiño cuan ta nasacha ra cha tahán chi chi ñu cuan. 17 Vatyí cha niri ca cha iyó ra cha sandoo tutu cuan, ma cuví cundaa tyiño cha quehen cuenda ñu cha tahán chi chi ñu, soco nya cúvi ra, tyicuan ta cuví quehen cuenda ñu. 18 Yucuan chaha chihí quiti ta chati niñi ti quivi natyihí tahan Nyoo tuhun cha xihna ri cuan chihin yo. 19 Quivi cuan, ra Moisés sacoto ra tandihi ley Nyoo chi tandihi ñayivi. Yaha cuan ta quehen ra noo sahma cuaha cha chingo chihin ixi mbee ta chihin noo soco yutun cha nañi hisopo, satyí ra nu niñi becerro ta nu niñi ndixihyu luhlu, nasaca ra chihin ndutya, ta tyicu ra chata libru ley Nyoo ta chata tandihi ñayivi ñandihí. 20 Tyicuan ta quichaha catyí ra chi ñu: “Ican ihya cuví niñi cha cuví cha ndaa vatyí natyihí tahan Nyoo tuhun chihin ndo”, catyí ra. 21 Ta suri tyicu tucu ra Moisés niñi nu cuví vehe ñuhu cuan, ta siqui tandihi cha cachotyíño

ra yucuan nu casacahnú ra chi Nyoo. ²² Tyicuan caa sacuví ra vatyí catyí ley Nyoo tyi tandihí ta chihin niñi, cuñí chi ndundí nuu Nyoo. Ta catyí tucu chi vatyí ma saha Nyoo tìcahnu iñi cuatyí tatu ma cati niñi.

Niñi ra Cristo, ican cuan tinyaa cuatyí yo

²³ Ta yucuan chaha cuñí chi cha sacuví tata sutu tyicuan caa, vatyí ndundí tandihí cuan, vatyí cuví chi noo xiñahñu cha iyó ityi andívi. Soco tandihí cha cuenda ityi andívi, cuñí chi noo niñi vaha ca cha cuhva cuenda yo, ta ñima ca tari niñi quití cuan. Cuñí chi niñi ra Cristo. ²⁴ Vatyí ra Cristo ña quihví ra chichi noo vehe ñuhu cha savahá ñáyivi cha cuví xiñahñu ri. Soco quihví ra chichi vehe ñuhu cha ndicha vaha cha cuví gloria. Ta vityin cahán ra chaha yo nuu Nyoo. ²⁵ Ra cuví nuu chi sutu cuenda ñu Israel quihví ra Nu Ii Xaan Ca cuan tahan cuiya vatyí cuhva cuenda ra niñi cha ñima niñi ra cuví. Soco ra Cristo, ña cuaha chaha cuñí chi cuhva cuenda ra chi ra. ²⁶ Vatyí tyehe ta tyicuan caa, cuaha chaha cuñí chi cha nyehe ra tindoho ta cúvi ra nyata chinq ñuhu ñáyivi ta nya vityin. Soco vityin cha cua cuyatyin cundihí tuhun ñáyivi, noo ri chaha quichí ra Cristo, ta chahá cuenda ra chi maa ra tacuhva vatyí cuví tinyaa ra cuatyí yo. ²⁷ Noo ri chaha, cúvi yo ta yaha cuan ta cucutuñi chi yo. ²⁸ Ta tyicuan caa tucu ra Cristo,

noo ri chaha, chahá cuenda ra chi ra tacuhva tinyaa ra cuatyí cuaha xaan ñáyivi. Yahá cuan ta cuquichi ra cha cu uvi chaha, ñima ca cha quichi tinyaa ra cuatyí, soco cha quichi sacacu ra chi ñu cha nyatú chi ra.

10

¹ Vatyí ley Nyoo cha tyaa ra Moisés, cuví chi tari noo xiñahñu ri, cha cuenda cha vaha ca cha cuquichi. Soco ñima maa cha ndicha vaha cuví. Vatyí ley cuan, ma cuví maa sanduvaha chi chi ñu nanducú chi Nyoo. Vatyí tahan cuiya ri chahá cuenda ra cuví nuu chi tata sutu cuenda ley chahnu niñi quití. Soco ma cuví cacu añima yo chihin cuan. ² Vatyí tyehe ta cuví sanduvaha ley cuan chi ñu, cundihí tuhun cha chahá cuenda ra niñi ndicuiya ri. Vatyí tatu cha ndundí ñu noo chaha cha cuenda tandihí maa, ma caca ca xiñi ñu vatyí iyó cuatyí ñu ta ña chiñuhú ca cha cuhva cuenda ra inga chaha. ³ Soco tahan cuiya ri chahá cuenda ra niñi, ta ican cuan sanicohón chi iñi ñu vatyí iyó cuatyí ñu. ⁴ Vatyí niñi toro ta niñi ndixihyu, ma cuví maa tinyaa chi cuatyí yo.

⁵ Yucuan chaha ra Cristo, quívi cuaquichi ra síqui ñuhu ñáyivi ihya, catyí ra chi Nyoo tyehe caa:

Ña cuñún cha cahñi ñáyivi
quití ta cuhva cuenda
ñu chuun,
yucuan chaha savahun noo
coño ñuhu chii.

(Vatyi tyicuan caa ta cuví cuhva cuende chii chuun.)

6 Ta vatyi ña tahán iñun cha cahmi ñu quití ta cuhva cuenda ñu chuun cha cuenda cha tinyaa cuatyí ñu.

7 Catyí yuhu: “Ma yuhu, vachi ihya vatyi sacuvi cuhva cuñún, Nyoo Suti,

tari cuhva cahán chi tuhin nu libru ley maun”, catyí ra Jesucristo.

8 Cha xihna ri, catyí ra Jesucristo vatyi Nyoo, ña cuñí ra cha cuhva cuenda ñu chi quití chi ra. Ni cha cahmi ñu quití cha cuenda cha tinyaa cuatyí ñu, ña cuñí Nyoo, catyí ra. Vasi maa ri tuhun cha catyí ley chahnu vatyi sacuví yo cuví, soco ña tahán iñi Nyoo, catyí ra. 9 Ta yaha cuan ta catyí tucu ra: “Ma yuhu vachi ihya, vatyi sacuvi cuhva cuñún, Nyoo Suti.” O cuñí chi catyí, sacuachiyó Nyoo cuhva chahnu cuan, ta nacuvi chi inga cuhva chaa ihya. 10 Nyoo sandundí ra chi yo vatyi ra Jesucristo sacuví ra cuhva cuñí Sutu ra, ta chaha cuenda ra coño ñuhu ra. Noo ri chaha chihí ra ta ndihí tyiño saha ra.

11 Tandihí ra cacuví tata sutu ñuu Israel, ndí quiví sacuví ra tyiño nuu Nyoo, ta tyicuan ri chaha cuenda ra suri maa cha tuhvá maa ra chahá cuenda chi Nyoo, vasi ña cuví tinyaa chi cuatyí yo.

12 Soco ra Jesucristo, noo ri chaha chaha cuenda ra chi ra chi Nyoo cha cuenda cuatyí

yo. Tyicuan ta chicunyaá ra tyayu gloria chiyo ndaha vaha Nyoo. 13 Ta yucuan nyatú ra nyacua nya cacun Nyoo chi ra xaan iñi chi ra chaha ra. 14 Vatyi chihin noo ri chaha cha chihí ra Cristo ta cuví sanduvaha ra añima ñáyivi cuenda Nyoo, tyicuan ri maa. 15 Ta suri tyicuan caa catyí tucu Tatyí Ii Nyoo chi yo. Vatyi cha xihna ri catyí ra chi yo nu tutu tuhun Nyoo tyehe caa:

16 Tuhun cha cunatyihí tahin chihin ñu quiví cuan, tyehe caa cucuvi, catyí Sutu Mañi yo:

Cutyai ley mai chichi añima ñu, ta cutyai chichi cha chiñi tuñi xiñi ñu, catyí Nyoo.

17 Ta yaha cuan ta catyí tucu ra:

Ma nichon ca maa iñi cuatyí ñu, niri cha quiñi caa cha chinyacuví ñu, catyí Sutu Mañi yo.

18 Ta cha yaha saha Nyoo ticahnu iñi cuatyí, ña cuñí ca chi cha cahñi ñáyivi chi quití, ta cuhva cuenda ñu chi Nyoo cha cuenda cuatyí ñu.

Cuñí chi nanducu yo chi Nyoo

19 Yucuan chaha yañi, cuví quihví maa yo Nu Ii Xaan Ca cuan nu nyaá Nyoo, cha cuenda vatyi cha chatí niñi ra Jesucristo ta tinyaa ra cuatyí yo. 20 Cha nuña ra Cristo noo ityi chaa, ityi cahun yo nu conyito añima yo. Vatyi maa maa cuhva cha chihí ra ta ndatá cortina cha chasi nu chinyaá Nyoo. Cha tahnya

cortina, ican cuví cha chihí ra, tacuhva nuña ityi quihví yo ta chaa yo nu nyaá Nyoo.

²¹ Ra Jesús cuví sutu cha nyacá ñaha nu cuví vehe Nyoo andiví. ²² Yucuan chaha cuñí chi nanducu yo chi Nyoo chihin noo cha ndicha ta chihin cha ñi ñi yo chinó ñi yo chi ra, vatyí maa ra sandundií ra añima yo, tacuhva ma quihí ca ñi yo vatyí iyó cuatyí yo, vatyí tari cha nacatya ra coño ñuhu yo chihin ndutya cuii, na ndu ndií yo nu Nyoo. ²³ Na cuní ca ñi yo chino ñi yo chi Nyoo ta ma ndu uvi ñi yo vatyí Nyoo cuhva ra cha catyí ra vatyí cuhva ra chi yo. ²⁴ Ta cuñí chi nanducu yo cuhva tyinyee yo chi tahan yo, na cuñi ca ñu chi tahan ñu ta sacuvi ca ñu cha vaha. ²⁵ Ña tahán chi quehen yo cuhva caá ñu cha sandihí cha quichi nu ndu ñn ri yo, soco cuñí chi cha sanduní yo ñi noo noo tahan yo. Ta yaha ca cuhva cuñí chi tyinyee yo chi tahan yo vityin cha nyehé yo vatyí Sutu Mañi yo cha cuñí chaa quiví quichi ra ta cucutuñi chi tandihí ñáyiví.

²⁶ Vatyí tatu cha yaha chicohon nuu yo cha ndicha, ta ña quichahá yo ta tyicuan ri sacuví ca yo cuatyí, ñahri ca cuhva coo ticahnu ñi cuatyí yo. ²⁷ Ta cutachi tuñi Nyoo chi yo. Ta cutyihí ra chi yo nu cucayu ñáyiví cha xaan ñi chi ra, ta cundihí tuhun ñu. ²⁸ Tatu noo ñáyiví Israel ña quichaha ñu cuhva catyí ley ra Moisés, ta chiyo uvi o uñi testigu, cúvi ñu cuan

cha cuenda cuatyí ñu, ta yori cundahvi cuñi nyehe chi ñu. ²⁹ Ta nyaca cuví ñu cha ña quichaha ca chi Sehe Nyoo ta sahá ñu tyi ñiñi ra cha sanduvaha añima ñu cha ñima ri tuhun cuví. Ta chihin ñiñi cuan natyihí tahan Nyoo tuhun chihin yo. Soco cahán ña vaha ñu siqui Tatyí li Nyoo cha chahá tumañi ñi chi yo. Yaha ca cuhva cutachi tuñi Nyoo chi ñu cuan. ³⁰ Vatyí chitó yo vatyí Sutu Mañi yo, ican ra catyí ra tyehe caa: “Yuhu tahán chi tachi tuñi chi ñáyiví, yuhu catyí cha cuví chi ñu.” Ta catyí tucu ra vatyí cutuñi chi ñu nuu ra. ³¹ Ndicha cha iyó Nyoo, ta yucuan chaha tahán chi cuyuhvi yo chi ra, coto tachi tuñi ra chi yo cha cuenda cuatyí yo.

³² Soco ma naa ñi ndo quiví natiñ cuenda ndo cha ndichin Nyoo chichi añima ndo, vatyí quiví cuan cunyeē xaan ñi ndo cha nyehe ndo tñdoho cha cuenda ra. ³³ Yihí nyoho cahán ñáyiví chi ndo, ta sanyehe ñu tñdoho chi ndo nu tuvi. Ta yihí nyoho uhvi xaan cuví chi ndo cha nyehe ndo cha cuví chi tahan ndo cha tyicuan caa, ta cunyeē xaan ndo. ³⁴ Ta cundahví ñi ndo chi ñu ñoho vehe caa, ta chihin cha si cuñí ndo cunyeē ndo quiví tinyaa ñu cha iyó chi ndo, vatyí chitó ndo vatyí andiví iyó ca cha vaha ca cha cuenda ndo, ta ña ndihí maa cuan. ³⁵ Yucuan chaha ma sandihí ndo cha quihí ñi ndo chi ra Cristo, vatyí nu

cuahan ca chi ta cuñihi ndo cha vaha ca vatyí chinó iñi ndo. ³⁶ Cuñí chi cha coo cha cama iñi ndo tacuhva cuví sacuvi ndo cuhva cuñí Nyoo, ta tyicuan caa ta naquehen ndo cha catyí ra tyi cuhva ra. ³⁷ Vatyí nu tutu Nyoo catyí chi tyehe caa:

Ña naha ca ta cuquichi ra cha tahán chi quichi, ta ma cucuee ca ra.

³⁸ Ta catyí Sutu Mañi yo tyehe caa: “Ñu cha sanduvahí añima,

chihin cha chinó ri iñi ñu chi yuhu, ta conyito añima ñu.

Soco tatu cunuhu chata ñu, ma cusii cuñi yuhu chihin ñu”, catyí Nyoo.

³⁹ Soco maa yo ña sacuví yo tari sacuví ñu cuanaá añima, vatyí ñu chinó iñi chi Nyoo cuví yo, ta tyicuan caa cucacu añima yo.

11

Cuhva cuñí chi cha chinó iñi yo chi Nyoo

¹ Cha chinó iñi yo chi Nyoo ican cuví cha chitó vaha yo tyi cuñihi yo cha nyatú yo, ta chitó vaha yo vatyí noo cha ndicha vaha cha ña nyehé yo vityin, cuñihi yo vatyí chinó iñi yo chi Nyoo. ² Ñáyivi chiyo ta cha naha, chinqo iñi ñu chi Nyoo, ta yucuan chaha quita vaha ñu nuu ra.

³ Cha cuenda cha chinó iñi yo chi Nyoo, ta chitó yo vatyí savaha ra ñuhu ñayivi chihin tuhun cahán ra. Ta chitó yo vatyí tandihi cha nyehé yo vityin, chinqo chi ta cha naha chihin cha ña tuhva yo nyehé.

⁴ Cha cuenda cha chinqo iñi ra Abel chi Nyoo, ta chaha cuenda ra noo cha chaha ra chi Nyoo. Ta vaha ca cha chaha ra ta ñima ca cha chaha ra Cain, yañi ra. Ta yucuan chaha natin cuenda Nyoo chi ra tari noo ra vaha, ta natin cuenda ra cha chaha ra. Yucuan chaha vasi cha chihí ra Abel, soco tari quivi cahán ca ra tuhun chihin yo vityin, yoso caa tahán chi chino iñi yo chi Nyoo.

⁵ Cha cuenda cha chinqo xaan iñi ra Enoc chi Nyoo, ta cuanuhu ra chihin Nyoo chihin cha ña chihí ra. Ta ña nañihí ca ñu chi ra, vatyí naquehen Nyoo chi ra. Ta nu tutu Nyoo, catyí chi vatyí cha ni cumañi ca naquehen Nyoo chi ra Enoc, sacuví ra maa ri maa cuhva tahán iñi Nyoo, yucuan chaha naquehen ra chi ra. ⁶ Soco ma cuví sacuvi yo cha tahán iñi Nyoo tatu ña chinó iñi yo chi ra. Vatyí tatu cuñí yo nanducu yo chi ra, cuñí chi cha chinó iñi yo tyi iyó ra. Ta cuñí tucu chi chinó iñi yo vatyí cucuhva ra cha vaha chi ñu nanducú chi ra.

⁷ Cha cuenda cha chinqo iñi ra Noé chi Nyoo, ta quichaha ra tuhun cahán Nyoo, cha catyí Nyoo chi ra noo cha cucuvi ityi nuu ca. Ta vasi tañaha ca nyehe ra soco cha cuenda cha chinó iñi ra chi Nyoo, ta savaha ra barcu cuan ta sacacu ra chi ñáyivi chi ra. Ta cha cuenda cha chinqo iñi ra chi Nyoo, sandoo ra cuatyí ñu siqui ñu cha ña quichahá chi Nyoo, na tachi tuñi ra chi ñu. Ta cha cuenda

cha chinq̄ iñi ra Noé chi Nyoo cuvahā ra nuu ra.

⁸ Ta cha cuenda cha chinq̄ iñi ra Abraham chi Nyoo, ta quichahā ra chi ra quiv̄i canā ra chi ra. Yucuan chaha quita ra ñuu ra ta cuahan ra nu cucuhva Nyoo ñuhú cha cundoo chi ra. Quita ra ñuu ra chihin cha ña chitó ra nya cuahan ra. ⁹ Cha cuenda cha chinó iñi ra Abraham, yucuan chaha chiyō ra nu ñuhú cha ta cuhva ca Nyoo chi ra. Chiyō ra noo vehe sahma ri, ta suri tyicuan caa tucu ra Isaac, sehe ra, ta ra Jacob, sehe ñañi ra. Vatyí suri catyí tucu Nyoo chi ninduvi ra cuan tyi cucuhva ra ñuhú cuan chi ra. ¹⁰ Vatyí ra Abraham nyatú maa ra noo ñuu vaha ca cha cucuhva Nyoo chi ra, ta maa Nyoo chacun cuhva ñuu cuan ta maa ra savahā ra, ta chicha cimientu tyihi ra chaha.

¹¹ Ta suri chinq̄ iñi tucu cu Sara cha catyí Nyoo chi ña cha cucoo sehe ña. Ta vasi cha chahnu xaan ña, soco chahā Nyoo fuerza ra chi ña, ta chicoō sehe ña. Tyicuan caa cuv̄i vatyí chinq̄ iñi cu Sara cha catyí Nyoo chi ña. ¹² Yucuan chaha vasi cha nyaña quiv̄i cha cúvi ra Abraham, soco chicoō sehe ra. Ta yahā cuan cuaha xaan ñáyiv̄i cacū cha cuv̄i ñu tata ra. Tari cha cuaha tiñoo andiv̄i, ta tari cha cuaha niyiti yuhu tyañuhu, vatyí ña cuv̄i nacahvi yo.

¹³ Tandih̄i ñu cuan cachih̄i ñu cha ni cumañi ca naquehen cuenda ñu cha catyí Nyoo tyi cuhva ra chi

ñu. Soco vasi ta naquehen cuenda ca ñu ta chih̄i ñu soco nyehe cachi vaha ñu chihin cha chinó iñi ñu. Ta si xaan cuñi ñu. Ta chihin cuan cutuñi iñi ñu ta cahán ñu tuhun vatyí noo ñu yahá ri siqui ñuhu ñayiv̄i ihya cuv̄i ñu. ¹⁴ Vatyí ñu cacahán tyehe caa, cuñi chi catyí vatyí ni nanducú ñu noo nu coo ñu. ¹⁵ Tyehe ta chicá ca xiñi ñu ñuu nu quita ñu, totypehe cuv̄i cunuhu ñu nyicuan. ¹⁶ Soco vatyí cuñi ñu noo ñuu vaha ca, o cuñi chi catyí nya gloria, yucuan chaha Nyoo ña cucahan nuu ra cha cuv̄i ra Nyoo ñu. Vatyí cumí ra noo ñuu nu cuv̄i coo ñu.

¹⁷ Ta cha cuenda cha chinq̄ iñi ra Abraham chi Nyoo, yucuan cuenda quichahā ra nu cahan Nyoo ta tyaa ra cuhva cha cahñi ra chi sehe mañi ra ra Isaac, quiv̄i nducu nyehe Nyoo chi ra tu ndicha cha chinó iñi ra, vasi suri maa Nyoo catyí ra ¹⁸ vatyí cuaha xaan ñáyiv̄i cucuv̄i tata ra chihin ra Isaac cuan. ¹⁹ Soco ña yuhv̄i ra Abraham cuacuhva cuenda ra sehe ra chi Nyoo, vatyí chitó ra vatyí Nyoo, iyó tunyee iñi chi ra nyacua nya cha sanandotó ra ndiyi. Ta tari quiv̄i sanandotó Nyoo chi sehe ra, vatyí cha nyaá cha cua cahñi ra chi ra, ta nacuhvā Nyoo chi sehe ra chi ra inga chaha.

²⁰ Ta ra Isaac chinq̄ tucu iñi ra chi Nyoo. Ta yucuan chaha catyí ra vatyí sehe ra, ra Jacob ta ra Esaú, cuñihi ra cha vaha nu cuahan ca chi. ²¹ Ta ra Jacob chinq̄ iñi ra chi

Nyoo, cuhva cha cua cúvi ra. Ta catyí ra vatyí tahan tahan sehe ñañi ra, sehe ra José, cuñihi ra cha vaha. Ta sac-ahnu ra chi Nyoo nu nanyaá ra chihin yutun cha tuví ra.

²² Ta ra José ñandihí, chinqo ñi ra chi Nyoo, ta catyí ra, cuhva cha cua cúvi ra, vatyí ñu Israel, ñáyivi chí ra, cu quita coyo ñu ñuu Egipto cuan nu cuahan ca chí. Ta sandoo ra tyiño chí ñu, vatyí na naquehen ñu yiquí ra quívi quita ñu ñuu cuan.

²³ Cha cuenda cha chinqo ñi sutu ra Moisés ta sihi ra chí Nyoo, yucuan chaha quívi cacu ra, nyehe ñu tyi noo cha lee tyaqui xaan cuví ra. Ta yihí ñi ñu cha cusacacu Nyoo chí ra ta ma cúvi ra, vasi catyí rey cuan vatyí cúvi ndi ra cuatyaa. Ta ña yuhvi ñu ta tixehe ñu chí cue uñi yoo.

²⁴ Ta ra Moisés tucu, chinqo ñi ra chí Nyoo. Ta quívi cha chahnu ra, ña cuñi ca ra cha cuvi sihi ra chí ñaha sehe rey ñuu Egipto cuan.

²⁵ Ta ni ña cuñi ra ndoo ra ñuu Egipto cuan vatyí cusí ñi ra o cunyacuvi ra cha quiñi caa. Vatyí chitó ra tyi tuhun ñi yaha ri cuví cuan. Soco vaha taxin ca cuñi ra nyehe ra tindoho chihin ñáyivi cuenda Nyoo. ²⁶ Ra Moisés, vaha ca cuñi ra cha nyehe ra ticahan nuu cuenda ra Cristo vatyí cahnu ca cha tyayí cuví cuan chí maa ra ta ñima ca tandihí cha tyayí cha iyó ñuu Egipto. Vatyí chitó ra tyi cua cuhva Nyoo cha vaha chí ra. ²⁷ Ta cha cuenda cha chinqo ñi ra Moisés chí Nyoo, ta quita ra ñuu Egipto,

ta ña yuhvi ra cha cuxaán rey cuan. Ta sanyee xaan ra ñi ra. Tari cha vatyí nyehe ra chí Nyoo cha ña nyehé yo.

²⁸ Cha cuenda cha chinqo ñi ra Moisés chí Nyoo ta sanducahnu ra vico cha cahñi ñu noo mbee luhlu, ta tachí ra nacahyu ñu niñi ti yuvehe ñu, tacuhva vatyí ma cahñi ángel Nyoo chí ni noo sehe nuu ñu Israel. ²⁹ Ta cha cuenda cha chinqo ñi ñu Israel chí Nyoo ta yaha sava ñu Tyañuhu Cuaha, tari cha yaha ñu noo ñuhú ityi. Ta cuhva cha cacuñi tucu ra Egipto cayaha ra, ña cuvi yaha ra vatyí nacasi Nyoo tyañuhu cuan siqui ra ta cachihí ra chichi ndutya cuan.

³⁰ Ta cha cuenda cha chinqo ñi ñu Israel chí Nyoo, ta chico ñu ucha tahan chaha chata ñuu Jericó, ta tandihí cuii maa nu sama chata ñuu cuan canacojo. ³¹ Ta cha cuenda cha chinqo ñi cu Rahab, ñaha cata ñi cuan, chí Nyoo, ta ña chihí ña ñi ri chihin ñu ñuu ña, ñu ña quichaha chí Nyoo, vatyí maa ña, tyinyee vaha ña chí ra Israel, ra chahan coyo chinyehe tatu cuví chasaha ra tinyaa ra ñuu ña chí ra nyacá ñaha ñuu cuan.

³² ¿Ñáá ca cha cuvi catyí vityin? Cuaha xaan cuhva cucuñi chí chíi tatu cahin tuhun ra Gedeón, ra Barac, tuhun ra Sansón, ra Jefe, ta tuhun ra David, ta ra Samuel ta tuhun ra cacuvi profeta Nyoo ta cha naha. ³³ Cha cuenda cha cachinqo ñi ra chí Nyoo, ta yihí ra saha ganaa ra chí inga

ñuu nahnu. Ta yihí ra vaha xaan chinyaca ñaha ra ñáyiví cuenda Nyoo. Yihí ra ñihí ra cha catyí Nyoo tyi cuhva ra chi ra. Yihí ra chasi ra yuhu ndicaha. ³⁴ Yihí ra ña cayu ra chihin ñuhú chichi horno nu catyihí ra chi ra. Yihí ra cacú ra cha cahñi ñáyiví chi ra chihin mityi. Yihí ra cha ñahri fuerza chi ra, soco candunyeē ra, ta chiyo xaan fuerza chí ra chichi cuatyí cuan, ta cuví chasaha ra chí sindaro cuenda ñu xaan iñi chí ra. ³⁵ Ta chicoq suhva ñusihí, nandoto ñáyiví chi ñu.

Ta inga ñáyiví chihí ñu chihin cha cuaha xaan tindocho sanyehe ñáyiví chi ñu, soco ña sandoq ñu chí Nyoo vasi chihí ñu cha catyí ra, vatyí chitó ñu, vatyí tatu ma sandihí ñu cha chinó iñi ñu chí Nyoo, cunandoto ñu ta cucoo ñu noo ñáyiví vaha xaan ca. ³⁶ Ta inga ñu nyehe ñu tindocho cha cahán nyaa ñáyiví chí ñu ta cañí ñu chí ñu. Ta inga ñu chinuhñí ñu chihin cadena ta cuahan ñu vehe caa. ³⁷ Yihí ñu chihin yuu chahñí ñáyiví chí ñu. Yihí ñu chahnya ra chihin cierra chí ñu. Yihí ñu nducú nyehe ñáyiví chí ñu. Yihí ñu chihí ñu cha chahñí ñáyiví chí ñu chihin mityi. Yihí ñu chica noo ñu ta ñahri sahma ñu. Chihin ñi mbee ri ta ñi ndixihyu ñihnq ñu. Ndahvi xaan ñu. Ta cuihya xaan cuñí ñu. Ta sanyehe ñáyiví cha ña ñohó nuu Nyoo tindocho chí ñu. ³⁸ Ta ñáyiví ña ñohó nuu Nyoo ña nañá ñu

cha cu ñn ri ñu chihin ñáyiví ndahvi cuan vatyí vaha ñu nuu Nyoo. Chica noo ndahvi ñu ityí chiqui ndi, ityí yucu. Chiyo ñu chichi yavi yuu ta yavi ñuhú. ³⁹ Tandihí maa ñu vasi cahan vaha Nyoo siqui ñu cha cuenda cha chinó iñi ñu chí ra, soco ña ñihí ñu cha catyí Nyoo cha cuhva ra chí ñu. ⁴⁰ Vatyí natyaa ra cuhva, cha cuhva ra nonga cha vaha ca chí ñu vatyí natyihí ra cuenda chí yo ta ñn ri cutahan chí chí yo chihin ñu cuan.

12

ñn ri chí ra Jesús tahán chí cuita iñi yo

¹ Tandihí ñáyiví cuan quita vaha ñu vatyí chinq iñi ñu chí Nyoo. Ta vityin chihin cuan sanduní ñu iñi yo ta nyatú ñu nyehe ñu tatu quita vaha yo. Yucuan chaha cuñí chí cha sacuachiyo xiin yo tandihí cha sayangá chí yo, tandihí cuatyí cha nyicón chí yo. Ta chihin cha cama iñi yo ta cuhun yo ityí nuu ca chihin Nyoo. ² ñn ri chí ra Jesús quihí nuu yo, vatyí maa ra chaha ra cha chinó xaan iñi yo chí Nyoo, ta chaha ra tandihí cuhva tahán chí chino iñi yo. Ta cha ni cumañi ca cúvi ra, chitó ra vatyí sñi xaan cucuvi chí ra cha yaha cúvi ra. Yucuan chaha, chaha ra cha cahñi ñáyiví chí ra. Ña quichaha ra ticahan nuu cha cúvi ra tari chíhi noo ra iyó cuatyí, ta vityin nyaá ra chiyo vaha Nyoo gloria.

³ Saha ndo cuenda cuhva chiyō ra Jesús, vatyí nyehe xaan ra tindoho saha ñu iyó cuatyí. Yucuan chaha ma cutatu ndo, ta ma ndu uvi ñi ndo cha nyicón ndo chi ra. ⁴ Vatyí nyoho ta chaa ca ndo nyehe ndo tindoho cha cuenda cha cañí tahan ndo chihin cha quiñi caa, tari nyehe ra Cristo tindoho ta chihí ra. ⁵ ¿Atu cha naa ñi ndo tuhun chaha Nyoo chi ndo tari cha sehe ra chi ndo? Catyí ra tyehe caa nu tutu ra:

Sehe luhli, ma cuxaun tatu saquehen ityi chuun.

Ma nducuihya ñhun tatu cahín chuun.

⁶ Vatyí ra saquehén ityi yuhu chi, chaha cha cuñí chi ra, vatyí sehi cuví chi ra, catyí Nyoo.

⁷ Cunyee ndo ta cutuhva ndo tatu saquehen ityi ra chi ndo, vatyí Nyoo, sehe vaha ra saha ra chi ndo. Vatyí tandihí ra iyó sehe, saquehén ityi ra chi sehe ra. ⁸ Vatyí tatu ña saquehén ityi Nyoo chi ndo, ñima sehe vaha ra cuví chi ndo, soco tatu saquehén ityi ra chi ndo, sehe vaha ra cuví chi ndo. ⁹ Ta sñn ri, ta nyihi yo, sutu yo ihya ñayiví saquehen ityi ra chi yo, ta saha yo ñayiví chi ra. Ta nyaca cuví Nyoo, tahan tucu chi saha yo ñayiví chi Sutu yo Nyoo, tyicuan ta coo ñima yo tyicuan ri maa. ¹⁰ Sutu yo cuenda coño ñuhu yo, saquehen ityi ra chi yo suhva ri quiví, yoso cuhva cha cuñi chí. Soco Nyoo saquehén ityi ra chi yo cha cuenda noo cha

vaha ca chi yo, vatyí sa ii ra chi yo tari maa ra, cha ii ra. ¹¹ Ndicha vatyí ña tahan ñi yo cha ndohó yo vatyí uhvi chi yo. Soco chihin cha ndoho yo, cutuhva yo coo yo noo ñayiví vaha.

Yica xaan tatu ma quichaha yo cha catyí Nyoo chi yo

¹² Yucuan chaha sandunyee ndo ñi ndo, ta ma quihí ñi ndo cha ma cuví cunyicon ndo chi ra Cristo. ¹³ Ta nanducu ndo cuhva coo vaha ndo chihin Nyoo, nanducu ndo cuhva caca ndoo ndo chihin ra. Tyicuan ta maa ra cuhva ra fuerza chi ndo ta nduvaha ndo nuu Nyoo ta ma cucuihya ca cuñí ndo.

¹⁴ Saniñi ndo coo vaha ndo chihin tandihí ñayiví. Ta coo ndo noo ñayiví cachi. Vatyí tatu ña cachi iyó yo, chihin Sutu Mañi yo Nyoo, ma nyehe yo chi ra. ¹⁵ Saha ndo cuenda chi ndo coto yihí ndo, ma ñihi ndo tumañi ñi cha iyó chi ra. Ta saha ndo cuenda chi ndo, coto cuví ndo tari noo yutun cha chahá chiti uva, ta coto quehen ñayiví cha caá ndo ta tiví ñu nuu Nyoo. ¹⁶ Ta ni noo ndo ta maa coo ndo chihin ñayiví tatu ñima ñasihi ndo o yihí ndo cuví. Ni ma cuñi ndo vatyí tuhun Nyoo noo cha ñima ri tuhun cuví, vatyí tyicuan caa sacuví ra Esaú, vatyí chihin noo nyayu ri, xico ra tandihí cha tahan chí ra cha cuví ra sehe nuu sutu ra. ¹⁷ Ta chitó ndo vatyí cha yaha cuan ta cuñi ra Esaú cha nasoco sutu ra chí ra, soco ña cuví ca. Ta vasi

chacu vavaha ra, soco ña ñihj ca ra cuhva nasama ra cuhva cha chinyacuj ra.

18 Ta maa ndo cha ndo nuu nyaá Nyoo soco ñima tari cha ñu Israel cuan quivi chahan ñu noo yucu nu cuvi yucu Sinaí. Ta yucuan nyehe ñu cayu ñuhu, ta nduña ñi, ta ñihi xaan tatyí. 19 Ta chihj ñu nativi cutu cuihya ta cahan Nyoo chihin ñu. Ta ñu cha chihj tuhun cahan ra, chacu ndahvi ñu tacuhva ma cahan ca ra chihin ñu, vatyí yuhvi xaan ñu 20 cha cuenda vatyí ña cunyeë ñi ñu tuhun cha chaha ra chi ñu. Vatyí catyí ra tyehe caa: “Tatu quihvi noo ñáyivi, cahñi ndo chi ñu chihin yuu o chihin lanza, cuví ri ñu ñáyivi o quití”, catyí Nyoo chi ñu. 21 Yuhvi xaan ñu cha nyehé ñu yucuan, vatyí nyacua nya ra Moisés ta catyí ra: “Ñihi xain chihin cha yuhví”, catyí ra.

22 Soco yoó ña nyehe yo cha yuhvi cuan vatyí noo yucu cha nañí Sión nu cuví ñuu Nyoo nyitó cha yo. O cuñi chi catyí ñuu Jerusalén cha nyaá andivi, nu nyicú cuaha mil ángel. 23 Candú ñn ri yo vatyí sacahnu yo chi Nyoo vatyí ndú ñn ri tandihí ñu cha cuví sehe Nyoo cha nyicú sivi nu tutu nya andivi. Ta cha yo nuu Nyoo cha cuví juee chi tandihí ñáyivi. ñn ri nyicú yo chihin añima ñu vaha cha sanduvaha maa Nyoo. 24 Ta natuhva ndo chi ra Jesús ra cuví ra cahan chaha yo vityin cha natyihj tahan Nyoo tuhun cha chi-

hin yo. Ta chati ñi ra. Ta ican chi chahá noo cha vaha ca ta ñima ca cha chahá ñi ra Abel. (Vatyí ra Abel chihj ra ta tachi tuñi Nyoo chi yañi ra. Soco chihj ra Jesús, ta iyó tucahnu ñi cuatyí yo.)

25 Yucuan chaha saha yo cuenda coto ma quichaha yo chi ra cha cahan chihin yo. Vatyí ñu Israel cuan, ña cacu ñu cha ña cuñi quichaha nu cahan Nyoo quivi cahan ra nu cuví yucu Sinaí ihya siqui ñuhu ñayivi. Ta nyaca cuví yoó, ma cuví maa cacu yo tatu nacuhva yo chata yo chi ra cha cahan chihin yo nya andivi vityin. 26 Quivi cuan ndusu Nyoo sacanda chi ñuhu ñayivi. Soco vityin catyí chi tyehe caa: “Noo ri ca chaha cusacande ta ñima ñuhu ñayivi ri, soco andivi ñandihí.” 27 Ta cha catyí ra vatyí cusacanda ra nonga chaha, cutuñi ñi yo vatyí cucuachiyo tandihí cha nyaá ii ri cha savaha Nyoo. Ta cundoo cha ma cuví nacanda. 28 Nu chahá Nyoo cunyaa yo chihin ra nu nyacá ñaha ra, ma nacanda cuan. Yucuan chaha na nacuhva yo tyahvi nyoo chi ra, ta sacahnu yo chi ra chihin cha ñi ñi yo, ta chihin cha saha yo ñáyivi chi ra, vatyí tyicuan caa tahn ñi ra. 29 Vatyí Nyoo cuenda yo, cuví ra tari noo ñuhú cha chahmí tandihí, ta tyicuan caa cusanaa ra tandihí cha ña vaha.

13

Na coo yo cuhva tahn ñi Nyoo

1 Ma sandihi ndo cha cuñi ndo chi tandihi ñu yihí cuenda Nyoo tari cha tahan ndo chi ñu. 2 Ta ma naa iñi ndo cha cuvaha ñáyivi cuví ndo chihin ñáyivi cha chaá vehe ndo. Vatyí iyó chaha cha cuenda cha vaha ñáyivi cuví ndo, ta chahā ndo nu coo ñáyivi; chi ángel, chahā ndo nu coo, ta ña tuví iñi ndo.

3 Ma naa iñi ndo chi ra ñohó vehe caa tari cha ñohó tucu maa ndo vehe caa chihin ra. Ta tyicuan caa tucu ñu nyehé tindocho sahá ñáyivi. Saha ndo tyi nyehé tucu maa ndo tindocho tari nyehé ñu, tyicuan ta cundahvi cuñi ndo chi ñu ta tyinyee ndo chi ñu. Vatyí chitó ndo yoso caa uhvi chi ñu cuan tyi ñáyivi cuví ñu tari maa ndo.

4 Cha tandaha ndo, noo cha vaha cuví. Ta nyoho cha tandahā ndo tahán chi saha ndo ñáyivi chi yíi ndo o chi ñasihí ndo. Vii coo ndo chihin tahan ndo, vatyí Nyoo cutachí tuñi ra chi ñu iyó yíi ta iyó inga ra chi ñu, o ra iyó ñasihí ta iyó inga ñusihí chi ra.

5 Ma cuñi xaan ndo xuhun. Ndoo ndo vaha chihin cha iyó chi ndo, vatyí Nyoo catyí ra: “Ma sañe chuun ta ni ma sandoo ñihne chuun”, catyí ra. 6 Yucuan chaha cuví catyí yo chihin cha ñi iñi yo:

Sutu Mañi yo cuví ra tyinyee chii,
Ma yuhvi ñáá cha sacuvi ñáyivi chii.

7 Nícohon iñi ndo chi ra cayihí ndaha vehe ñuhu, ra cacahán tuhun Nyoo chihin ndo. Nacaca xiñi ndo vatyí

maa ra cachi iyó ra nuu Nyoo, ta cunyicon ndo cuhva cha vaha xaan chinó iñi maa ra chi Nyoo.

8 Ra Jesucristo ña nasamá ra. Ican ra cuví ra ta tyembu chahnu, ta ican ra cuví ra vityin. Ta ican ra cuví ra nuu cuahan ca chi tyicuan ri maa. 9 Ma cuhva ndo cha sandavi ñaha ñáyivi chi ndo chihin tuhun sñn caa cha sañahá ñu. Vaha ca cha cu ñi iñi ndo chihin cha cuñi Nyoo chi yo, ta ñima ca tuhun cha sañahá ñu cuan: cha yica cha cachi yo. Ña tyinyee maa cuan chi ñu nyacuví tyicuan caa.

10 Iyó noo arta cha cuenda yo. Nu chati niñi ra Cristo nu cruzi, ican cuan cuví. Ta ñu cuñi cacu chihin cha quichahá ñu ley chahnu cha quichahā ra cacuví sutu ta cha naha, ma cuví tyinyee ra Cristo chi ñu. 11 Ra cuví sutu cahnú cuenda ñu Israel chinyaca ra niñi quití Nu lí Xaan Ca cuan cha cuenda cuatyí ñáyivi, soco coño ti chinyaca ra ityi chata ñuu vatyí cayu chi. 12 Ta tyicuan caa tucu ra Jesús, tyaā Nyoo tyiño chi ra cha nyehe ra tindocho ta cúvi ra ityi chata ñuu Jerusalén, tacuhva vatyí sandundi ra chi yo chihin niñi ra. 13 Ma cahan nuu yo nyehe yo tindocho ticahan nuu cha cuenda ra Cristo, tari nyehe tucu maa ra cha cuenda yo quivi chahan ra chicúvi ra ityi chata ñuu Jerusalén. Tari quivi cha cuahan tucu yoó ityi chata ñuu cuví chi cuan tatu ña cahán nuu yo nyehe yo

tindoho cha cuenda tuhun ra. ¹⁴ Vatyí ihya siqui ñuhu ñayivi, ñahri noo ñuu cha tyicuan ri maa cucoo iyó. Soco nanducú yo noo ñuu cha cuquichi, cha yaha ndihí tuhun ñuhu ñayivi ihya. ¹⁵ Yucuan chaha vityin cha ñohó ra Cristo añaima yo, tahán chi cha saniñi yo ta sacahnu yo chi Nyoo chihin yaa, ta chihin cha cahan yo tuhun cha cahnu cuví ra. ¹⁶ Ta ma naa iñi ndo cha sacuví ndo cha vaha. Ta tyinyee ndo chi tahan ndo chihin cha iyó chi ndo, vatyí ican ihya cuví cha tahán iñi Nyoo.

¹⁷ Quichaha ndo tuhun cahán ra casaquehén ityi chi ndo, ta cuhva ndo chi ndo cunyaca ñaha ra vatyí nyicú ra tyiño casahá cumi ra añaima ndo. Ta coo quivi cutahan chi cunacuhva ra cuenda tyiño casahá ra chi Nyoo. Nducu ndo cuhva sacuvi ndo cha vaha, tacuhva vatyí chihin cha siñi cuñi ra cuhva ra cuenda ndo nuu Nyoo, vatyí tatu ña sacuví ndo cha vaha, chihin cha cuihya iñi ra cuhva ra cuenda ndo, ta nyoho, ma quita vaha ndo nuu Nyoo.

¹⁸ Vaha cuñi añaima ndi chihin Nyoo, ta cuñi ndi cha cacan tahvi ndo chaha ndi vatyí cuñi ndi sacuví ca ndi cha vaha. ¹⁹ Ta chiquén noo tumañi iñi chi ndo cha cacan tahvi ndo chiin chahi tacuhva vatyí nacuhva Nyoo cuhin cucunyai cha numi ri chihin ndo inga chaha.

²⁰ Nyoo ican ra iyó cha taxi chi ra, ican ra sanandoto ra chi Sutu Mañi yo Jesucristo, ra cuví ra sahá vaha cuenda chi yo tari cha cuví yo mbee sana ra. Ra Cristo chati niñi ra, ta chihin cuan natyihí tahan Nyoo tuhun chaa cha ma ndihí ca maa chihin yo. ²¹ Na cuhva Nyoo cha vaha chi ndo tacuhva cuvi sacuvi ndo cuhva cuñi ra. Ta na sacuvi maa ra cha cuñi maa ra cha cuenda ra Jesucristo chihin tandihí maa yo. ¡Na sacahnu yo chi ra Cristo tyicuan ri maa! ¡Na cuvi chi tyicuan caa!

²² Yañi, chacú ndahvi nuu ndo, na cunyee xaan iñi ndo chihin tuhun cha chahí ihya chi ndo, vatyí ña cuaha xaan tyai nu tutu ihya chi ndo. ²³ Coto ndo vatyí ra yañi yo, ra Timoteo, cha quita ra vehe caa. Ta tatu nachaa ra cha numi ri, cuhun ra chihin, na cuhin cunyehi nu nyicú ndo.

²⁴ Cuhva ndo nocumi chi tandihí ra sañahá chi ndo, ta chi tandihí ra yañi yo cuenda ra Cristo. Ñu Italia ihya, tachí ñu nocumi chi ndo.

²⁵ Ta Nyoo na nasoco ra chi tandihí maa ndo. Ta na cuvi chi tyicuan caa.

Nu ndihí cahan ra ta nacuhva ra nocumi chi ñu

Carta Cha Sacuhun Ra Santiago Chi Ñu Yihí Cuenda Ra Cristo

*Nu chahá ra Santiago
nocumi chi ñu*

¹Yuhu ra Santiago cuví noo ra sacuví tyiño nuu Nyoo ta nuu Sutu Mañi yo Jesucristo. Sacuhín nocumi chi ndo cha cuví ndo cha uchi uvi ityi ñáyivi Israel ñu yihí cuenda ra Cristo. Ta quití cuatyí ndo siin siin ñuu.

*Cha chiñi tuñi cha chahá
maa Nyoo*

²Yañi, cuñí chi vatyí sií cuví chi ndo tatu cuaha nuu tindoho nyehé ndo. ³Vatyí chitó ndo tatu nyehé ndo tindoho tari cha vatyí Nyoo nducu nyehé ra tatu ndicha cha chinó iñi ndo chi ra cuví cuan. Ta tyicuan caa ta cua cutuhva ca ndo cha cucama iñi ndo. ⁴Saña ndo na quichi maa tindoho siqui ndo, vatyí ican cuví cha sacoo cha cama iñi ndo. Ta tatu cha chicoo cha cama iñi ndo ta cucuvi ndo noo ñáyivi chicha chihin tuhun Nyoo, ta cuacunyeé ndo tandihí cuii maa tindoho cha vachi ca siqui ndo.

⁵Tatu nya noo nyoho cumañi cha chiñi tuñi chi ndo, çacan ndo chi Nyoo. Ta Nyoo cuhva ra. Ta ñima chiin ri chahá ra chi ñu chicán chi ra. Ta ña tyicuhvá ra cuhva chahá ra. Ta ña natyihí ra nuu yo cha cuenda cha chahá

ra chi yo. ⁶Soco cuñí chi çacan yo chi ra chihin cha chinó vaha iñi yo. Ta ma quihí iñi yo vatyí ma cuhva ra chi yo. Vatyí ñu cha ña chinó vaha iñi, cuví ñu tari ndutya yuhu tyañuhu cha tyandahá tatyí chii siin siin ityi. ⁷⁻⁸Ta tyicuan caa maa ñu cuan, siin siin cuhva chicá xiñi ñu, vatyí siin cha chicán ñu vityin ta siin cha chicán ñu tyaan, ta ña nñi iñi ñu sacuví ñu noo cha sacuví ñu. Ña tahán chi quihí iñi ñu vatyí cuñihi ñu cha cuacuhva Sutu Mañi yo chi ñu. ⁹Tatu iyó noo ra yañi yo, ndahvi ra, cuñí chi cusí cuñí ra vatyí Nyoo nacoñehé ra chi ra. ¹⁰Soco tatu noo ra yañi yo, tyayí ra, cuñí tucu chí cha cusí cuñí ra tatu ndundahvi ra, vatyí ra tyayí cuví ra tari noo ita cha nyaá nu cuhu, vatyí ña naha maa chiyó chí. ¹¹Vatyí tatu cañá ñanyii ta ihñi vavaha cuhu cuan, na ityi chí. Ta ita cuan canacavá ri ta ndihí cha tyaqui chí. Ta tyicuan caa tucu ra tyayí, cuquichi tuhun chihí chí ra ta ndoo maa tyiño sahá ra.

*Yoso caa cunyeé yo
tindoho*

¹²Ñana cha sií cuví chí ndo cha cunyeé ndo chihin cha cama iñi ndo ñáá tindoho cha vachí chí ndo. Vatyí tatu cunyeé ndo, cuñihi ndo tari noo corona. Vatyí Nyoo cucuhva ra chí ñu cuñí chí ra, cha coo ñu ñáyivi chaa chihin ra. ¹³Tatu nya noo nyoho quichí cuví iñi ndo cha sacuvi ndo cha ña vaha, ma cuñi ndo vatyí Nyoo sacuví

cha caca xiñi ndo tyicuan caa. Vatyí Nyoo ña quichí cuví iñi ra sacuví ra cha ña vaha. Ta ni ña tyiyuhú ra chi yo cha sacuví yo cha ña vaha. ¹⁴ Soco tatu nya noo ndo quichí cuví iñi ndo sacuví ndo cha ña vaha, suri cha cuenda cha chicá xiñi maa ndo cha ña vaha, yucuan chaha canacava ndo nu cuatyí. ¹⁵ Tatu cuhva xaan yo cuhva cha quihi tuhun ña vaha iñi yo, cuacoo noo quívi ta cuasacuvi yo cuhva ña vaha cuan, ta tyicuan caa cacu cuatyí yo nuu Nyoo. Ta Nyoo tachi tuñi ra cuatyí cuan ta cuchaa tuhun chihi chi yo. ¹⁶ Yañi yuhu, cuñi xain chi ndo. Ma sandavi ñaha ndo chi ndo. ¹⁷ Tandihí cha vaha ta cha vii cha ñihí yo, quichi chí nya ityi síqui vatyí maa Nyoo chahá ra. Ta maa ra savaha ra ñuhu cha iyó andívi: tiñoo, ta yoo, ta ñanyii. Ta Nyoo tyicuan ri cuví ra Nyoo, ta ni chiin ña tuhvá ra nasama ra cuhva cuví ra. ¹⁸ Ta chahá ra ñayiví chaa cha iyó yo cha cuenda tuhun ndicha cha cahán ra. Vatyí xihna ca yo cuví cha nduchaá cha nuu tandihí ca cha savaha ra. Vatyí tyicuan caa cuñi maa ra.

Noo ityi cha ndicha cha tahán chi cuhun yo

¹⁹ Yucuan chaha yañi, noo noo yo ta cuñi chí cha yatyi cōhon iñi yo cha tyasoho yo, soco cuñi chí cha ma yatyi xaan nacahán yo ta ma yatyi xaan cuxaan yo. ²⁰ Vatyí ñáyiví cha cuxaán, ña nyacuví ñu cha tahán iñi

Nyoo. ²¹ Yucuan chaha saña ndo cha ña vaha ta cha quiñi caa cha cuaha xaan iyó síqui ñuhu ñayiví. Ta natin cuenda vaha ndo chihin cha masu iñi ndo tuhun Nyoo cha tachi ra añima ndo. Vatyí tuhun Nyoo cuan iyó tunyee iñi chi chi vatyí sacacú chi añima yo. ²² Soco sacuvi yo yoso cuhva sañahá tuhun Nyoo. Ta ma cuiñi ri maa yo vatyí tatu tacuhva chiñi ri maa yo, suri chi maa yo sandavi ñahá yo. ²³ Vatyí ñu cha chiñi ri maa tuhun Nyoo ta ña sacuví ñu, cuví ñu tari noo ñu cha nyehé chi nu ino. ²⁴ Ta nyehé ñu yoso caa nuu ñu, ta yaha cuan ta cuahan ñu ta naá ri iñi ñu yoso cuhva caá nuu ñu. ²⁵ Soco inga ñu cha nyita ri tyasohó tuhun Nyoo, vatyí sacuví vaha ñu cha chiñi ñu. Ta tyicuan ri sahá vaha ñu cuenda cha catyí ley Nyoo, cha cuví ley vaha ca, ley cha chahá libertad chi yo tyi tava chi chi yo ndaha ra ña vaha. Ta ñu nyacuví tyicuan caa sii xaan cucuvi chí ñu. ²⁶ Tatu nya noo ñáyiví cuñi maa ñu vatyí ityi Nyoo cuahan ñu, soco ña nyatú yuhu ñu cahan ñu, suri chí maa ñu sandahví ñahá ñu. Ta cha catyí ñu tyi ityi Nyoo cuahan ñu, cha ñima ri tuhun cuví. ²⁷ Vatyí ityi ndicha, ityi vaha nuu Nyoo Sutu yo ican cuví ihya: Cha tyinyeé yo chí ñu nyehe tindoho, ñu yori sutu ta sihi, ta ñu chihí yá. Ta inga, cha sahá vaha yo cuenda chí yo coto sacuví yo cha quiñi caa cha sacuví ñu ña ñohó nuu

Nyoo.

2

Ña tahan chi cuñi yo chi noo ñáyivi ta chi inga ñu ma cuñi yo. Inuu ri tahan chi cuñi yo chi ñu

¹ Yañi yuhu, nyoho chinó iñi ndo chi Sutú Mañi yo Jesucristo ra cha cahnu ca cuví, ta ña tahan chi cha vaha ca cahán ndo chihin noo ri ñáyivi, ta chihin inga ñu ma cahan ndo. ² Vatyí tatu quihvi noo ra tyayii nu nyicu ndo, yihí xehe xuhun cuaan ndaha ra, ta finu sahma ra, ta quihvi tucu nonga ra cha ñihno sahma chahnu ri. ³ Ta nyoho tatu vaha ca tyiñuhu ndo chi ra cha vaha ñihno cuan, ta catyí ndo chi ra: “Cunyata ihya noo nu vaha.” Ta chi ra ndahvi cuan catyí ndo chi ra: “Yoho cunanyaa yucuan o cunyata ihya nu ñuhú”, catyí ndo chi ra. ⁴ Ña vaha tatu sacuví ndo tyicuan caa, vatyí ña inuu ri sahá ndo ñáyivi chi ñu, ta cha tyicuan caa, ña vaha cha chicá xiñi ndo.

⁵ Yañi, tyasoho ndo tuhun ihya. Nyoo nacachi vaha ra chi ñu ndahvi ihya ñáyivi, vatyí ta cuhva cuví ñu ñu tyayii chihin cha chinó xaan iñi ñu chi Nyoo, ta cuñihi ñu nu vaha nu nyacá ñaha ra. Vatyí ican ihya cuví cha catyí ra tyí cuhva ra chi ñu cuñi chi ra. ⁶ Soco nyoho chahá ndo ticahan nuu chi ñu ndahvi. Ta çatu ña chitó ndo vatyí ñu tyayii, ican ñu cuví ñu cha chahñi ndahvi chi ndo? Ta

chinyacá ñu chi ndo nuu ra cuví tyiño. ⁷ Ta çatu ña chitó ndo vatyí ican ñu cuví ñu cahán ña vaha siqui ra Cristo? Ta cuenda ra Cristo yihí ndo.

⁸ Tatu ndicha cha sacuví ndo tandihi cha catyí ley Nyoo ra cuví rey cuenda yo, vaha nyacuví ndo. Tari catyí tuhun Nyoo: “Cuñi ndo chi tahan ndo tari cuñi ndo chi maa ndo.” ⁹ Soco tatu chi noo ri ñu cuñi ndo. Ta chi inga ñu ña cuñi ndo, chicoó cuatyí ndo. Ta iyó cuatyí ndo nu ley Nyoo. ¹⁰ Vatyí tatu noo ñáyivi sacuví ñu tandihi cha catyí ley, ta cumañi ñu noo ri cha catyí chi, cuví chi tari cha tandihi ley ña sacuví ñu. ¹¹ Vatyí Nyoo catyí ra vatyí ma coo inga ñusihi o inga rayii chi ñu, tatu iyó yii ñu o iyó ñasihi ra. Ta suri maa ra catyí vatyí ma cahñi yo. Yucuan chaha tatu noo ñu ña sacuví ñu cuatyí cha ña iyó inga rayii o inga ñusihi chi ñu soco chahñi ñu, suri ña quichahá ñu cha catyí ley. ¹² Soco yoó cucutuñi chi yo nu ley ra Cristo cha sacacú chi yo. Yucuan cuenda tahan chi nducu yo cuhva cahan yo ta nducu yo cuhva coo yo. ¹³ Vatyí ñu cha ña cundahvi cuñi nyehe chi inga ñu, Nyoo cusacutuñi ra chi ñu, soco ma cundahvi cuñi ra nyehé ra chi ñu. Soco ñu cha ndahvi cuñi nyehé chi inga ñu, cuquita vaha ñu cuhva cha cutuñi chi ñu.

¿Ñáa cha sacacú chi yo, cha chinó iñi yo o cha sacuví yo cha vaha?

14 Yañi, ñáá ri tuhun tatu catyí ndo vatyí chinó iñi ndo, soco ñahri cha vaha nyacuví ndo. ¿Atu cuví cacu ndo chihin cha chino iñi ri ndo chi Nyoo? 15 Vatyí tatu noo ñu tahan yo cumañi sahma ñu, cumañi cha cachi ñu, 16 ta minoo nyoho catyí ndo chi ñu: “Cuñhan ta Nyoo na cocumi ra chuun. Na coo ca sahmon ta cha cachun”, catyí ndo. Soco ña chahá ndo cha chiñuhú chi ñu. ¿Ñáá ri tuhun cuan? 17 Ñahri yahvi nyaa cha catyí yo vatyí chinó iñi yo chi Nyoo, ta ña tyinyeé yo chi tahan yo.

18 Vasi yihí ndo cua catyí ndo: “Yoho chihin cha chinó iñun chi Nyoo ta cuñun cacun, ta yuhu caqui soco chihin cha vaha ñáyivi cuví ta chihin cha tyinyeí chi tahan yo.” Vaha. Soco yuhu catyí chuun, ¿atu cuví sañahun chii tyi ndicha chinó iñun chi Nyoo tatu ña vaha ñáyivi cuvún ta ña tyinyeún chi tahan? Ma cuví. Soco yuhu chihin cha tyinyeí chi tahan yo sañahí chuun vatyí chinó vaha iñi chi Nyoo. 19 Ta yoho chinó vavaha iñun tyi iyó noo ri Nyoo. Vaha cha chinó iñun. Soco cuihña chinó tucu iñi ra cuan tyi iyó noo ri Nyoo. Ta nihí ra chihin cha yuhví ra vatyí ma cacu ra. 20 Ma tondo xaan caca xiñun. Na cutuñi iñun vatyí tatu chinó iñi yo ta ña sacuví yo cha vaha, ñahri yahvi nyaa cha chinó iñi yo. 21 Ra Abraham sutu chahnu yo, cuví ra noo ra vaha nuu Nyoo cha cuenda

cha sacuví ra cha catyí Nyoo. Vatyí chahá ra chi sehe ra, ra Isaac chi Nyoo tari cuhva catyí Nyoo chi ra. 22 Nyeñun vatyí chinó iñi ra Abraham chi Nyoo ta chaha cha chinó iñi ra ta sacuví ra tuhun cha catyí Nyoo chi ra tyi sacuví ra. Ta nu sacuví ra cuhva catyí Nyoo chi ra, yucuan cuví nu natuvi vaha cha chinó iñi ra chi Nyoo. 23 Ta tyicuan caa chingó cava tari cuhva catyí nu tutu Nyoo tyehe caa: “Ra Abraham chingó iñi ra chi Nyoo ta yucuan chaha Nyoo sahá ra tuhun tyi vaha ra nuu ra.” Ta iyó inga nu catyí chi: “Ra Abraham, nanduví ra amigó Nyoo.”

24 Ta tyicuan caa nyehe yo vatyí vaha yo nuu Nyoo cha cuenda cha nyacuví yo cha vaha, ta ñima cha cuenda cha chinó ri iñi yo chi ra. 25 Ta tyicuan caa tucu cu Rahab ñaha cata iñi cha chiyo ta cha naha. Yahá cha sacuví ña cuatyí, sacuví ña cha vaha quivi chahá ña nu cacohon xehe ra cha tachí ra Josué. Ta tyinyeé ña chi ra cha cuhun ra inga ityi. Ta cha cuenda cuan Nyoo sahá ra tuhun tyi vaha ña. 26 Ta tyicuan caa tucu cuví noo coño ñuhu ñáyivi. Tatu ñahri ca cha nyitó ñu yihí chichi coño ñuhu cuan, ñahri ca vale chi. Ta tyicuan caa yoó, tatu ña sacuví yo cha vaha, ña vale cha chinó iñi yo.

3

Yoso caa saha cuenda yo cuhva cahan yo

¹ Nyoho yañi, ma yatyi xaan quichi cuvi ñni ndo cuvi ndo noo ra sañahá tuhun Nyoo. Vatyí nyuhu cha sañahá ndi tuhun Nyoo, tatu ña vaha sañahá ndi, cahnu ca cuatyí cuvi, ta cuaha ca cutachi tuñi Nyoo chi ndi. ² Vatyí ni noo yo ta ña sacuví yo maa maa ri maa cha vaha. Soco tandihí yo cuaha ri cuhva sacuví yo cuatyí. Soco tatu noo yo cuví cunyaca ñaha vaha yo cuhva cahan yo tacuhva ma coo cuatyí yo cha cuenda cha cahán yo, cuñí chi catyi vatyí ñahri cuatyí yo vatyí cuví tucu cunyaca ñaha yo tandihí coño ñuhu yo. ³ Vatyí tatu tyihí yo yoho yuhu caballo cuví cunyaca ñaha yo chi ti, vasi cahnu ti. ⁴ Ta tyicuan caa tucu noo barcu cahnu, vasi cahnu chi soco chihin noo vitu luhlu ri cha nyaá chata chi, cuví sacuhun ra chi chi nya ityi nu cuñí maa ra, vasi ñihí tatyí. ⁵ Ta tyicuan caa tucu yaa yo. Cuví chi noo cha luhlu ri. Soco cahnu xaan cahnu xaan nanduvi noo tuhun luhlu ri cahan yaa yo. Tari nahnu cuvi cayu chihin ñuhu lee cha tyaa yo chichi cuhu ta ndi maa yutun cayu. ⁶ Vatyí tyicuan caa yaa yo tari noo ñuhu luhlu cuví chi. Ta cuví chi tari noo cha quiñi caa cahnu cha ñohó chichi coño ñuhu yo, ta sativí chi chi coño ñuhu yo ta tandihí cuhva iyó yo ñayiví, vatyí suri maa cuihna, ican tyiyuhú chi chi. ⁷ Ñáyiví cuví samasu ñu tandihí ri nuu quití: saa,

coo, ta quití cha iyó chichi tyañuhu, ta samasú ñu chi ti. ⁸ Soco yori cuví samasu yaa yo. Vatyí cuví chi noo cha ña vaha cha ña chahá chi cha cunyaca ñaha yo chi chi. Tari noo coo, tyaa ti chi ñáyiví, tyihí ti venenu ti ta chihí ñáyiví. Ta tyicuan caa yaa yo. ⁹ Vatyí suri chihin yaa yo sacahnú yo chi Nyoo Sutu yo. Ta suri chihin cuan cahán ña vaha yo chi ñáyiví cha savaha Nyoo tari cuhva caá maa ra. ¹⁰ Suri maa chihin yuhu yo sacahnú yo chi Nyoo. Ta suri chihin cuan cahán yo cha quiñi caa. Soco yañi, ña tahán chi cha sacuví yo tyicuan caa. ¹¹ Vatyí, ¿atu cuví quita ndutya vixi ta ndutya uva noo ndohyo? Ma cuvi. ¹² Yañi, ¿atu cuví quita papaya nuu noo tumangu, o cuvi cuhva tupapaya noo mangu? Ma cuvi. Ta tyicuan caa ma cuvi quita ndutya uhva ta ndutya vixi noo ndohyo.

Cha chiñi tuñi cha vaha ca

¹³ Tatu yihí ndo cha chitó ndo ta iyó cha chiñi tuñi chi ndo, sañaha ndo chihin cha cachi iyó ndo. Ta sacuvi ndo cha vaha chihin cha ma cahnu saha ndo chi ndo, vatyí iyó cha chiñi tuñi Nyoo chi ndo. ¹⁴ Soco tatu iyó tuhun nyiyo ñni ña vaha chichi aña ndo, sacuví ndo cha sacuvi ndo soco cha cuenda cha cuñí ndo cuvaha ndo nuu ñáyiví, ta cha tyicuan caa nyacuví ndo, ña tahán chi cuyaa ndo tyí iyó cha chiñi tuñi chi ndo, vatyí cha cuyaa ndo, sandaví

ñaha ndo cuví cuan, ta tixehe ndo cha ndicha. ¹⁵ Vatyí tatu chicá xiñi ndo tyicuan caa ñima cha chiñi tuñi Nyoo cuví cuan, soco cuhva chicá xiñi ñu ña ñohó nuu Nyoo cuví. Cuenda cuihna cuví. ¹⁶ Vatyí tatu nyiyo iñi ndo ta cuñí ndo cuvaha ndo nuu ñáyiví, yucuan cuví nu ican ñima nyicú ndo. Ta iyó tucu tandihí inga nuu cha ña vaha nu nyicú ndo. ¹⁷ Soco tatu iyó cha chiñi tuñi Nyoo chi ndo, ndaa iyó ndo, cachi iyó ndo. Ta nanducú ndo cuhva coo vaha ndo chihin ñáyiví chihin cha vita iñi ndo. Ta vaha ñáyiví cuví ndo. Ta cachi vaha chicá xiñi ndo. Ta cundahví cuñi ndo chí ñáyiví. Ta nducú ndo cha vaha chí tandihí ñáyiví chihin cha nii iñi ndo. ¹⁸ Tatu nanducú yo cha coo vaha yo chihin ñáyiví, ta sañihi yo coo taxi ri yo chihin ñu, cuacoo yo noo ñáyiví cha cuiñi.

4

Ma sacuvi yo cuhva cuñi coño ñuhu yo

¹ ¿Ñáá tuhun iyó tisihi nu nyicu ndo? ¿Ñáá tuhun iyó cuatyí? Cha cuenda cha ña vaha cha cuñi coño ñuhu ndo. Vatyí tyicuan ri iyó cha cuñi ndo ta yucuan sacańi tahan chí ndo. ² Nyoho cuñí ndo coo ñáá ndihí cha coo chí ndo. Ta ñahri iyó chí ndo. Tyicuan ta sataśi iñi ndo ta chahńi ndo tacuhva ñihi ndo. Iyo tahan ndo chihin cha nyiyo iñi ndo ñáá cha nyehé ndo soco ña cuví ñihi ndo. Tyicuan ta cańi tahan ndo. Iyó

cuatyí nu nyicú ndo soco ña ñihí ndo cha cuñí ndo. Vatyí ña chicán tahvi ndo chí Nyoo. ³ Ta tatu chicán tahvi ndo chí Nyoo, ni ri ña ñihí ndo cha cuenda vatyí ña vaha chicán ndo. Vatyí cuñí ndo soco cha sanaa ndo cha caca noo ri maa ndo cuhva cuñí ñáyiví. ⁴ Ña ndicha cha chinó iñi ndo chí Nyoo. ¿Atu ña chitó ndo vatyí tatu nyacuví ndo cuhva cuñí ñáyiví, ñu xaan iñi chí Nyoo cuví ndo vatyí ña nyacuví ndo cuhva cuñí Nyoo? Yucuan chaha tatu yihí ndo nyacuví ndo cuhva cuñí ñáyiví, ñu xaan iñi chí Nyoo cuví ndo. ⁵ ¿Atu cha caha ri catyí nu tutu Nyoo vatyí Tatyí li cha chahá Nyoo coo añima yo, cuñí xaan chí chí yo, ta cuiño xaan chí chí yo? Cuñí Nyoo cha ñn ri chí maa ra cua cuñi xaan yo. ⁶ Soco tyinyeé ca ra chí yo tacuhva vatyí cuvi nacuhva ndihí yo chí yo chí ra. Yucuan chaha catyí tucu tuhun Nyoo vatyí Nyoo ña tahán iñi ra chí ñu cahnu saha chí. Soco tyinyeé ca ra chí ñu nacotó tyi chiñuhu ra chí ñu. ⁷ Ican tuhun nacuhva vaha ndo chí ndo chí Nyoo. Ma quichaha ndo nu cahán cuihna chihin ndo. Ta maa ra cucacacono ra nyehe ra chí ndo. ⁸ Tuhva yatyin ndo chí Nyoo ta maa ra tuhva yatyin ra chí ndo. Nyoho ñu iyó cuatyí, sandundí ndo chí ndo. Ta nyoho cha uvi nyaa xiñi ndo sanduní ndo iñi ndo ta cuhva ndo na sacutu Nyoo añima ndo chihin cha vaha,

tyicuan ta cundundii ndo nuu ra. ⁹ Cücüihya cuñi ndo. Cuacu ndo. Na ndichi xiñi ndo vatyí ña vaha cuhva iyó ndo. Cha nuu cha cuacu ndo chihin cha sii cuñi ndo cuacu ndo chihin cha cuihya iñi ndo. Ta cha sii cuñi ndo na nanduvi chi tucuihya iñi. ¹⁰ Ndahvi saha ndo chi ndo nuu Sutu Mañi yo, ta maa ra cusanducahnu ca ra chi ndo.

Ma nyehe nyaa yo chi tahan yo

¹¹ Yañi, ma cahan ña vaha ndo siqui noo tahan ndo. Vatyí ñu cha cahán ña vaha siqui noo tahan, o nyehé nyaa ñu chi ñu, siqui ley Nyoo cahán ña vaha ñu ta nyehé nyaa ñu. Vatyí tatu nyehe nyaun, juez nasahún chuun cha nuu cha quichahún nu cahán ley cuan. ¹² Vatyí noo ri ra cuví ra cha chahá ley cuan. Ta suri ra cuví ra juez. Ta suri maa ra cuví ra ra saçacu chi yo, o sacunaa ra chi yo. Soco ¿yóo ñu cuví yoho vatyí nyehe nyaun chi inga ñu, ta sacutuñun chi ñu tari cha juez cuvún?

Ña chitó yo ñáá cha cucuvi chi yo tyaan, ta yucuan chaha ña tahan chi cahnu saha yo chi yo

¹³ Vityin cuiñi ndo tuhun ihya, nyoho cha catyí ndo: “Vityin o tyaan cuhun yo ñuu cuan, o inga ñuu cuan. Ta yucuan cunyaa yo noo cuiya vatyí sahatyiño yo ta saha ganaa yo xuhun”, catyí ndo. ¹⁴ Ta ni ña chitó ndo cha cucuvi tyaan. Vatyí ñayivi cha iyó yo cuví chi tari noo vico

nuhu vatyí noo ri cuhva yihí chi, ta tañi ri ta cha naa tucu chi. ¹⁵ Soco tahan chi catyí ndo tyehe caa: “Tatu Sutu Mañi yo ta cuñi ra, coo yo ta sacuvi yo ihya o yucuan.” ¹⁶ Soco nyoho nyee xaan ndo cuñi maa ndo ta cahnu sahá ndo chi ndo. Ta ña vaha tyicuan caa. ¹⁷ Vatyí tandihí yo cha chitó yo sacuví yo cha vaha ta ña sacuví yo, chicoó cuatyí yo cha tyicuan caa.

5

Nu catyí ra Santiago ñáá cha cucuvi chi ñu tyayí

¹ ¡Cuiñi ndo tuhun ihya, nyoho ñu tyayí! Cuacu ndo chihin cha cuihya cuñi ndo, çanachaa ndo cha cuenda tindoho cha cunyehe ndo. ² Vatyí cha tyayí cha sacayá ndo, cha cuñi tivi. Ta sahma finu ndo, ndii maa cha cuñi cachi tiquixin. ³ Xuhun cuaan ndo ta xuhun cuichin ndo cuxi vavaha chi. Ta yucuan chahá chi noo seña cha chinyacuví ndo. Ta tari quivi cha cucahmi chi chi ndo tari cayu ñuhu vatyí cucunaa ndo. Tyí sacayá xaan ndo cha tyayí ndo tyí cotyiño ndo tyaan. ⁴ Ta ña tyiyahvi ndo yahvi cha tahan chi chi ñu ndahvi cha sahatyiño nu tyiño sahá ndo. Ta vityin chicán ñu cuatyí chaha ndo nuu Sutu Mañi yo ra nyacá ñaha ángel cha cuví sindaro cuenda ra. Ta maa Sutu Mañi yo chiñi ra tuhun cahán ñu ndahvi cuan. ⁵ Ihya siqui ñuhu ñayivi tyaqui iyó ndo, tyayí iyó ndo. Ta sacuví ndo

yoso cuhva cuñí maa ndo. Tari nduxahan quini cha cucúvi, tyicuan caa nyoho, vatyí cucunaa ndo. ⁶ Ta nyoho tyaa ndo cuatyí chaha ñáyivi vaha. Ta chahñi ndo chí ñu. Ta ñu ndahvi cuan ña cuví sacacu ñu chí ñu.

Cuatu yo chi ra Cristo chihin cha cama iñi yo

⁷ Yucuan chaha, yañi, nyatú yo chihin cha cama iñi yo nyacua nya quivi quichi Sutu Mañi yo. Tari noo ra cha sahá tyiño chí huhu nyatú ra nyacua nya cha coon savi cha xihna ri ta cha yaha savi nu ndihi, tyicuan ta naquehen ra ñáa cha tachi ra. ⁸ Ican tuhun cuatu ndo chí Nyoo chihin cha cama iñi ndo. Ta cunhi ca iñi ndo vatyí cha cuyatyin cha quichi Sutu Mañi yo.

⁹ Yañi, ma tyaa ndo cuatyí chaha tahan ndo, coto tachi tuñi Nyoo chí ndo. Vatyí Nyoo, juez cuví ra. Ta cha cuñi quichi ra. ¹⁰ Yañi, saha ndo cuenda cuhva chiyo ra profeta cha chaha cuenda tuhun Sutu Mañi yo ta cha naha, vatyí cuhva cha canyehé ra tindoho, cacunye xaan ra. ¹¹ Chitó yo vatyí si xaan cuñi ra cha cunye tandihi nu tindoho. Tari ra Job. Chiñi ndo tuhun yoso caa cunye ra tindoho cha nyehé ra. Ta chitó ndo vatyí nu ndihi tuhun, cuaha xaan cha vaha chaha Sutu Mañi yo chí ra. Vatyí Sutu Mañi yo iyó xaan tichahnu iñi chí ra. Ta cundahvi cuñi ra nyehé ra chí yo. ¹² Soco yañi, ma tyanaha ndo tacuhva

chino iñi ñáyivi vatyí ndicha cha sacuví ndo. Ma tyanaha ndo ni tuhun andivi, ni tuhun ñuhu ñáyivi, ni ma catyí ndo: “Chitó vaha maa Nyoo.” Tatu ndicha tuhun cahán ndo, ndicha catyí ndo. Soco tatu chitó ndo tyi ña ndicha, catyí ndo tyi ña ndicha, vatyí coto tachi tuñi Nyoo chí ndo.

¹³ Tatu nya noo nyoho nyehé ndo tindoho, cacan tahvi ndo chí Nyoo. Ta tatu nya noo ndo si cuñi ndo, cata ndo yaa Nyoo. ¹⁴ Tatu nya noo ndo cuhvi ndo, cuñi chí cana ndo chí ra nyisó tyiño vehe ñuhu vatyí cacan tahvi ra chaha ñu cuhvi cuan ta tyihi ra acetye chí ñu chihin sivi ra Cristo. ¹⁵ Ta tatu chinó vavaha iñi ra chí Nyoo cuhva cha chicán tahvi ra, ñu cuhvi cuan cucacu ñu. Ta Sutu Mañi yo cusanducuita ra chí ñu. Ta tatu sacuvi ñu cuatyí, Nyoo cusaha ra tichahnu iñi cuatyí ñu. ¹⁶ Yucuan chaha nahma ndo cuatyí ndo nuu tahan ndo. Ta cacan tahvi ndo chaha tahan ndo vatyí na nduvaha ndo. Vatyí nu chicán tahvi noo ra vaha chicá chihin Nyoo iyó xaan tunyee iñi Nyoo. ¹⁷ Tari ra Elías ra profeta Nyoo ta cha naha. Cuvi ra noo rayi tari maa yo. Ta chicán tahvi ra chí Nyoo vatyí ma coon savi. Ta ña coon savi uñi cuiya sisava. ¹⁸ Yahá cuan ta nacacan tahvi tucu ra chí Nyoo inga chaha. Ta nacoon savi inga chaha. Ta cuvaha chiti cha tachi ñáyivi nu ñuhú.

¹⁹ Yañi, tatu noo tahan ndo sandoq ñu tuhun ndicha Sutu

Mañi yo, ta cuanuhu ñu ñayiv̄i
 inga chaha, ta tatu tyinyeé
 ndo chi ñu na ndichi ñu ityi
 Nyoo inga chaha, ²⁰ coto
 ndo vatyí cha tyinyeé ndo
 chi ñu sacuv̄i cuatyí cuan
 na ndihvi ñu ityi Nyoo inga
 chaha, sacacú ndo añima ñu
 ndahvi cuan coto cuhun ñu
 anyaya. Ta sacuv̄i ndo vatyí
 saha Nyoo ticahnu iñi tandih̄i
 cuatyí ñu.

Carta Cha Xihna Ri Cha Sacuhun Ra Apóstol Pedro Chi ñáyivi Yihí Cuenda Nyoo

*Nu tyaq ra Pedro noo carta
chi ñáyivi yihí cuenda Nyoo*

¹ Yuhu ra Pedro cuví noo apóstol cuenda ra Jesucristo, ta cuñí chi catyí, vatyí maa ra tachí chii vatyí caque tyiño ra. Tyaí noo tutu ihya chi nyoho cha ña iyó ndo ñuu ndo, vatyí iyó ndo noo noo ñuu ityi Ponto, ta Galacia, ta Capadocia, ta Asia ta Bitinia. ² Chi nyoho nacachí vaha maa Nyoo Sutu yo vatyí nyata cha naha chitq ra vatyí tyicuan caa cuquichaha ndo chi ra. Maa Tatyí li tyinyee chi ndo vatyí cuví nacuhva ndo chi ndo chi Nyoo, ta tyicuan caa cuví quichaha ndo chi ra Jesucristo, ta ndundií ndo chihin niñi ra. Na naquehen ndo cuaha ca cha vaha ta cha taxi ri coo añima ndo sahá maa Nyoo.

*Noo cha yihí vaha iñi yo
vatyi cuñihi yo*

³ Sacahnu yo chi Nyoo Sutu Sutu Mañi yo Jesucristo vatyí ndahvi cuñí ra nyehé ra chi yo ta chahá ra cha nacacu chaa yo inga chaha tacuhva coo yo ñáyivi chaa cha ma naa ca maa. Ta yucuan cuví cha chaha cha cuita iñi yo cha cuñihi yo vatyí cha

nandotq ra Jesucristo. ⁴ Ta Nyoo cuacuhva ra tandihi cha tahán chi chi yo cha cumí vaha ra nya andivi. Ta cuví chi noo cha ma naa ta ni mativi, ta ni ma ndahva chi tari ndahva ita. ⁵ Ta vatyí chinó iñi yo chi Nyoo maa ra sahá cumi chi yo chihin tunyee iñi ra nyacua nya cacu ndihi añima yo. Ta cusañaha ra chi yo ñáá cha cuñi chi catyi cha cacú yo nu cuandihí tyembu. Vatyí cha nyatú tuhva cuan chi yo.

⁶ Ta yucuan chaha sñi xaan cuñí ndo, vasi tahán chi cha nyehé ndo ndihí nuu tindoho suhva quivi. ⁷ Vatyí cha chinó iñi yo chi Nyoo, vaha ca ican saha xuhun cuaan. Vatyí xuhun cuaan cuví chi noo cha cundihí. Soco cuví nyehe yo chihin ñuhú tatu vaha chi, vatyí chihin cha ihñi cundutya chi ta cucayu cha ña vaha yihí chihin chi. Soco ndoó xuhun cuaan vaha cuan. Tyicuan caa tucu nyehé Nyoo chi ndo tatu vaha chinó iñi ndo chi ra. Yucuan chaha nyehé ndo tindoho vityin. Soco tatu ña ndu uví iñi ndo cha chinó iñi ndo chi ra, cutuvi ndo nuu ra ta cusacahnu ñáyivi chi maa ra ta chi maa ndo quivi quichi Sutu Mañi yo Jesucristo inga chaha.

⁸ Nyoho cuñí ndo chi ra Jesucristo vasi ta nyehe ca ndo chi ra. Ta vasi ña nyehé ndo chi ra vityin, soco chinó iñi ndo chi ra, ta sñi xaan sñi xaan cuñí ndo nyacua ña ñihí ca ndo cuhva catyí ndo yoso cuhva cha sñi cuñí ndo. ⁹ Vatyí

cucacu ndihí ańima ndo ta yucuan cuví cha cuńihí ndo vatyí chinó ińi ndo chi Nyoo.

¹⁰ Siquí cuan canducu tuhun ra profeta Nyoo ta cha naha. Ta canducu xaan ra cuhva coto ra ñáá cha cuví cuan. Ta catyaa ra nu tutu cuenda tumańi ińi cha cucuhva Nyoo chí yo. ¹¹ Ta Tatyí Ii ra Cristo sacotó chí chí ra ñáá ndihí tindoho cunyehe ra Cristo, ta yaha cuan yoso caa cusanducahnu Nyoo chí ra. Ta profeta cuan canducu xaan ra cuhva cacoto ra yóo ra cucuvi ra Cristo cha cucuvi chí tyicuan caa, ta ama cucuvi tuhun cha catyí Tatyí Ii chí ra. ¹² Soco sacotó Nyoo chí ra vatyí tyińo cha casacuví ra, ñima cha vaha chí maa ra cuví, soco cha vaha chí maa yo cuví. Ta ican cuví cha sacotó ndi chí ndo vityin. Vatyí chihin tunyee ińi maa Tatyí Ii cha saquichí Nyoo, cahan ndi tuhun ra Cristo nuu ndo yoso caa sacacú ra chí yo. Ta ángel cacuńi xaan ra cacoto ra tuhun ihya.

Nacana Nyoo chí yo vatyí coo yo noo ñayiví cachi

¹³ Yucuan chaha saha vaha ndo cuenda cha cua sacuvi ndo, ta cachi coo ndo. Quihí vaha ińi ndo cha cuacuhva Nyoo chí yo cha cuenda cha cuńi ra chí yo. Cuaha cuacuhva ra chí yo quiví quichi ra Jesucristo inga chaha. ¹⁴ Ta coo ndo tari noo sehe cha quichahá chí nu cahán sutu chí. Ma coo ndo tari chiyo ndo quiví ta ni cumańi ca cohon nuu ndo chí

Nyoo. Vatyí cha ña vaha cha cuńi cońo ñuhu ndo chinyaca ñaha chí chí ndo. ¹⁵ Soco coo ndo noo ñayiví ndi, vatyí maa Nyoo, ra cha nacana chí ndo, ndi ra. ¹⁶ Vatyí tyicuan caa catyí Nyoo nu tutu ra. “Cundi ndo vatyí mai ndi”, catyí Nyoo.

¹⁷ Tatu tuhvá ndo chicán tahvi ndo chí Nyoo ta catyí ndo “Sutu Mańi yuhu” chí ra, saha ndo cuenda chí ndo ta saha ndo ñayiví chí ra cha ni ri ca cha iyó ndo siqui ñuhu ñayiví. Vatyí Nyoo ña sahá ra cuenda cuhva cahán yo. Soco sahá ra cuenda cuhva iyó noo noo yo, an cuví ri yo ñu tyayí, an cuví ri yo ñu ndahvi. ¹⁸ Nyoo nasama ra cuhva chiyo ndo, vatyí cuhva cuan ña vaha, Cuhva cha sanandoo Sutu chahnu ndo chí ndo cuví. Ta chitó ndo tyi Nyoo tyiyahví ra tacuhva cuví cacu ańima yo. Soco ñima chihin xuhun cuaan o xuhun cuichin. Noo cha cundihi noo quiví cuví cuan. ¹⁹ Soco cha tyiyahví maa Nyoo chihin nińi ra Cristo. Ta yucuan cuví noo cha vaha xaan ca. Ta ra Cristo cuví ra tari noo mbee luhlu quiti vaha, ñahri nu pehe ti, tyicuan caa ra Cristo, ñahri cuatyí ra soco chihí ra. ²⁰ Ta nyata ni cumańi ca chino ñuhu ñayiví chicunyaa cuhva cha cucuvi chí ra Cristo tyehe caa. Soco ña cuví cha numi ri. Nyacua nya vityin nu cuandihí quiví, chinq cava tandihí cuan cha cuenda cha vaha chí maa yo. ²¹ Cha cuenda ra Cristo ta chinó ińi ndo chí Nyoo.

Vatyi ican ra sanandoto chi ra Cristo cha yaha chihí ra. Ta sacahnú Nyoo chi ra. Ta yucuan chaha chinó vaha iñi ndo chi Nyoo tyi cunaquehen ra chi ndo.

²² Maa Tatyí li Nyoo tyinyeé chi ndo ta cuví quichahá ndo tuhun cha ndicha. Yucuan ta cuví cuñi ndo chi tahan ndo cuenda Nyoo chihin cha ñi iñi ndo. Tyicuan caa cuñi chi cha cuñi ndo chi tahan ndo chihin cha vaha yihí aña ndo ta chihin tandihi fuerza ndo. ²³ Vatyi tari quivi cha nacacú chaa ndo, ñima tari cacu ndo chihin sutu ndo ihya ñuhu ñayivi, vatyi ra cuan numi ri chihí ra, soco nacacú chaa ndo chihin tuhun Nyoo cha ña tuhvá chihí vatyi tuhun Nyoo tyicuan ri maa iyó. ²⁴ Vatyi tyehe caa catyí tuhun Nyoo:

Tandihí ñayivi iyó siqui ñuhu ñayivi ihya cuví ñu tari cuhu.

Ta cha cahnu cha sacuví ñu cuví chi tari ita.

Vatyi cuhu cuan na ityi, ta coyo ita cuan. (Ta tyicuan caa ñayivi, chihí ri ñu.)

²⁵ Soco tuhun Sutú Mañi yo tyicuan ri maa iyó.

Ican cuví tuhun cha cahnu ndi chihin ndo: tuhun vaha cha sacacú Nyoo aña yo.

2

¹ Yucuan chaha na sandoo yo tandihí nuu cha quiñi caa. Ma sandavi ñaha yo chi ñayivi. Ma saha ri maa yo tyi vaha yo ta ña ndicha. Ma nyiyo iñi yo nyehe yo cha

iyó chi inga ñayivi. Ñahri cuendu cahan yo. ² Soco tari cha lee cha ni cacu, nanducú vavaha chi cha caxin chi, tyicuan caa nducu ndo tuhun Nyoo tacuhva vatyi chihin cuan cuahnu ndo ta cohon nuu ca ndo chi Nyoo, nyacua nya cacu ndihi aña ndo, ³ tatu ndicha cha nacotó ndo vatyi Sutú Mañi yo, vaha xaan ñayivi cuví ra chihin yo.

Tari yuu nyitó, tyicuan caa cuví ra Cristo

⁴ Sayatyin ca ndo chi ndo chi Sutú Mañi yo. Vatyi cuví ra tari noo yuu nyitó. Ñayivi ña cuñi ñu cotyíño ñu yuu cuan. Soco Sutú Mañi yo cuví ra tari noo yuu tyaqui cha nacachí Nyoo. ⁵ Ta nyoho tucu cuví ndo tari yuu nyitó. Ta maa Nyoo tari noo ra savahá vehe cuví ra. Ta yucuan chaha cuhva ndo na sandu ñn ri ra chí ndo tacuhva cuví ndo tari noo vehe nu coo ra. Na cu ñn ri ndo ta cuhva ndo cha sandu ii Nyoo chí ndo tacuhva cuví sacuvi ndo tyiño nuu ra. Ta maa maa ri tyiño cha sacahnú ndo chi Nyoo cucunyaa ndo. Vatyi yucuan cuví cha tahán iñi Nyoo sacuvi yo chihin tunyee iñi maa ra Jesucristo. ⁶ Vatyi catyí tucu nuu tutu Nyoo tyehe caa:

Nyehe xihna, yuhu nacachí noo yuu cha chiñuhú ca ta tyaqui xaan ca, ta chaquin yuu cuan nu cuasavahi vehi nya Sión.

Ta ñu chinó iñi chi ra cha cuví yuu cuan, ma quehen

ñu ticahan nuu. Ty-
icuan caa catyí Nyoo
tuhun ra Cristo nuu
tutu ra.

⁷ Yucuan chaha, cha cuenda
yoó cha chinó iñi yo chí
ra Cristo ra cuví yuu cuan,
chiñuhú xaan ra chí yo. Soco
cha cuenda ñu cha ña chinó
iñi chí ra, cuví ra tari noo
yuu cha cahán Nyoo tuhun
nu tutu ra ta catyí chí tyehe
caa:

Yuu cha ña cacuñi ra
casavahá vehe cotyiño
ra, ican cuví yuu cha
chiñuhú ca, catyí chí.

⁸ Ta catyí tucu chí:

Ican ra cuví yuu cha cuaha
xaan ñu cunañi chaha
ta nduva ñu.

Cuví ra noo cava cha sanduvá
chí ñu, catyí chí nuu
tutu Nyoo.

Tari cha nduvá ñu cuví cuan
vatyi chíñi ñu tuhun Nyoo, ta
ña quichahá ñu. Vatyí tyicuan
caa nyaá vatyi cusacuvi ñu
cuan.

*Ñáyivi cha yihí cuenda
Nyoo*

⁹ Soco nyoho cuví ndo
ñáyivi nacachi vaha Nyoo.
Ta tari tata sutu cuví ndo tyi
sacuví ndo tyiño nuu Nyoo,
ra nyacá ñaha. Ta cuví tucu
ndo noo ñáyivi ii nuu Nyoo.
Vatyí cuví ndo ñáyivi chí maa
ra, tacuhva vatyi cahan ndo
tuhun cha vaha cha sacuví
ra. Vatyí maa ra natavá ra
chí ndo nu ñaa iñi ta vityin
cuahan ndo nu ndichin nu
tyaqui. ¹⁰ Ta quivi ca cuan,
cuví ndo ñáyivi cha ñima ri
tuhun. Soco vityin ñáyivi chí
Nyoo cuví ndo. Ta quivi cuan

yori cundahvi cuñi nyehe
chí ndo, soco vityin Nyoo
cundahvi cuñi ra nyehé ra
chí ndo.

*Nu catyí ra Pedro vatyi coo
yo, soco sacuvi yo tyiño nuu
Nyoo*

¹¹ Yañi, cuñi xain chí ndo.
Chicá noo ndo siqui ñuhu
ñáyivi ihya, soco ñima ca ra
ñuhu ñáyivi ihya cuví ndo.
Soco andivi cuví ñuu ndo.
Yucuan chaha catyí chí ndo
ma cuhva ndo ityi chí coño
ñuhu ndo vatyi sacuvi ndo
cha ña vaha cha cuñi chí.
Vatyí tari quivi cañi tahan
cuan chihin añima yo cuví
cuan. ¹² Saha ndo cuenda
cuhva iyó ndo mahñu ñu cha
ña ñohó nuu Nyoo. Vatyí vasi
cahán ña vaha ñu siqui ndo,
ta catyí ñu vatyi ña vaha ndo,
soco nyehé ñu cha vaha cha
sacuví ndo ta cusacahnu ñu
chí Nyoo nachaa chí quivi cha
cuquichi nyehe ra cha sacuví
yo.

¹³ Ta cha cuenda cha cuñi
ndo chí Nyoo, quichaha ndo
chí ra cuví tyiño ñuu nu iyó
ndo. Quichaha ndo chí ra
cuví tyiño, cuví ri ra rey
cahnu ca, ¹⁴ o cuví ri noo
ra tachi rey chí vatyi tachi
tuñi ra chí ra iyó cuatyí o
tatu ñahri cuatyí yo ma tachi
tuñi ra chí yo, soco cucatyí
ra tyi vaha yo. ¹⁵ Vatyí Nyoo
cuñi ra vatyi chihin cha vaha
nyacuví ndo ta sandihi ñu
tondo cha cuví yuhu ñu, ñu
cahán cha ña ndicha vatyi ña
chitó ñu tuhun cahán ñu.

¹⁶ Coo ndo tari cha yori
nyacá ñaha chí ndo, soco ñima

cha cuenda cuan ta cusacuvi tucu ndo cha ña vaha. Soco sacuvi ndo tyiño nuu Nyoo. 17 Saha ndo ñáyivi chi tandihi ñáyivi. Cuñi ndo chi ñu yihi cuenda Nyoo. Saha ndo cuenda vatyí Nyoo nyehé ra tandihi cha sacuví ndo. Saha ndo ñáyivi chi ra nyacá ñaha.

Uvi tahan cuhva nyehé yo tindoho

18 Nyoho cha cuví ndo musu, cuhva ndo cha cun-yaca ñaha chitoho ndo chi ndo, ta quichaha ndo chi ra, vasi xaan ra o vasi vaha ra. 19 Vatyí tatu cunyeé yo tindoho cha sanyehé ñáyivi chi yo cha cuenda cha sacuví yo cha vaha nuu Nyoo, yucuan cuví cha chaá nuu Nyoo. 20 Soco tatu sacuví ndo noo cha ña vaha ta tachí tuñi ñu chi ndo, ñahri maa tuhun cha cunyeé ndo tindoho cha nyehé ndo cha cuenda cuan. Soco tatu nyehé ndo tindoho cha cuenda cha sacuví ndo cha vaha, ta cunyeé ndo chihin cha cama iñi ndo, ican ihya cuví cha vaha nuu Nyoo. 21 Vatyí nacana Nyoo chi yo vatyí coo yo tyehe caa. Vatyí tyicuan caa tucu nyehé ra Cristo tindoho cha cuenda maa yo, na cutuhva yo ta quehen yo cha caá ra. 22 Maa ra ni noo cuatyí ña sacuví ra. Ni noo chaha ña sandavi ñaha ra chi ninoo ñáyivi. 23 Cuhva cha cahán ñu chi ra, ña nacahán xaan ra. Cuhva cha nyehé ra tindoho, ña tyanahá ra chi ñu. Soco natyaa ra chi ra ndaha Nyoo, vatyí Nyoo tuhvá ra sacutuñi

ra chi ñáyivi chihin cha ndaa ta chihin cha ndicha. 24 Vatyí chata maa ra Cristo nicoso ndi maa cuatyí tandihi yo cuhva cha tacaá ra nu cruzi cuan. Tyicuan caa cuví tacuhva vatyí ma sacuvi ca yo cuatyí, ta coo yo noo ñáyivi vaha. Vatyí cha cuenda cha ñicuehe maa ra, yoó nduvaha yo. 25 Vatyí quivi cuan chica noo ndo tari mbee cha cuanaá. Soco vityin nacuhva cuenda ndo chi ndo chi ra Cristo, ra cuví pastor cha sahá cuenda añima yo.

3

Yoso caa tahan chi coo ñu tandaha

1 Tyicuan caa tucu nyoho, ñu iyó yí. Quichaha ndo chi yí ndo. Vatyí tatu ña quichahá ra tuhun Nyoo soco cunachino iñi ra cha cuenda cha nyehé ra cuhva iyó ndo. Ta ña chiñuhú ri cha cuvi yuhu xaan ndo chihin ra. 2 Vatyí nyehé ra tyi cachi iyó ndo ta sahá ndo ñáyivi chi ra. 3 Ta ma caca iñi ndo tuhun cha sandutyaquí ndo chi ndo cuhva nyehé ndo, cuví ri chihin cha iyo xaan sanduvií ndo xiñi ndo, o cuví ri cha sandutyaquí ndo chi ndo chihin cha tyaa ndo xuhun cuaan chi ndo, o cuvi ri cha cuihno ndo sahma vaha xaan. Ma nducu ndo tandihi cuan. 4 Soco nducu ndo cuhva ndutyaquí ndo chihin cuhva vaha iyó ndo. Vatyí cha vita iñi yo ta cha taxi ri iyó yo, yucuan cuví cha quitá chichi añima yo. Ta yucuan ña tuhvá

cuan tiví. Vatyí ñahri nonga cha tyaquí ca nuu Nyoo tari cuan. ⁵ Vatyí tyicuan caa cuhva chiyo ñusihí cha yihí iñi chí Nyoo ta cha naha. Tyicuan caa sandutyaquí ñu chí ñu, ta quichahá ñu chí yíi ñu. ⁶ Tari cu Sara, quichahá ña chí ra Abraham yíi ña. Ta catyí ña: “Tata”, chí ra. Ta nyoho tari sehe ña cuví chí ndo tatu sacuví ndo cha vaha tari maa ña. Ta ñahri cha yuhví ndo.

⁷ Ta tyicuan caa tucu nyoho ra iyó ñasihí. Cutuñi iñi ndo cuhva coo ndo chihin ñasihí ndo. Ta saha ndo ñáyiví chí ña, ñima vatyí yíca ca ña cha nuu nyoho. Soco vatyí ñn ri naquehen ndo tumañi iñi cha chahá Nyoo chí ndo. Ta yucuan cuví ñayiví iyó ndo. Vaha coo ndo tyehe caa, tacuhva vatyí tiin cuenda Nyoo tuhun chicán tahvi ndo chí ra.

Nu catyí ra Pedro yoso caa tahán chí coo yo

⁸ Nu ndíhi tuhun, cuñi chí cha ñn ri cuhva caca xiñi tandíhi ndo. Ta cundahvi cuñi ndo nyehe ndo chí tahan ndo. Cuñi ndo chí tahan ndo cuenda Nyoo tari cha yañi ndo cuví. Vita cahan ndo chihin ñu. Ta ma cahnú saha ndo chí ndo. Vaha ñáyiví cuví ndo. ⁹ Ma sacuví ndo cha ña vaha chihin ñu sacuví cha ña vaha chihin ndo. Ni ma cahan ndo chí ñu tatu cahán ñu chí ndo. Soco cha vaha sacuví ndo chihin ñu. Vatyí Nyoo nacana ra chí ndo vatyí cunaquehen ndo cha vaha cha

iyó chí ra. ¹⁰ Vatyí catyí tuhun Nyoo tyehe caa:

Ñu cha cuñi coo noo ñayiví chihin tusí iñi, cuñi chí saha ñu cuenda cuhva cahán ñu.

Ta ma cahan ñu cha ña vaha, ta ni ma cahan ñu cuendu.

¹¹ Ta cuñi chí cha sandoo ñu cha ña vaha

ta sacuví ñu cha vaha.

Nanducu ñu cuhva coo taxi ri ñu.

Ta ma saña ñu.

¹² Vatyí Sutu Mañi yo sahá cuenda ra chí ñu vaha.

Ta tyasohó ra nu chicán tahvi ñu chí ra.

Soco ñu sacuví cha ña vaha, xaan cuñi ra nyehé ra chí ñu.

¹³ ¿Yóo cha cuví sacuví cha ña vaha chihin ndo tatu nyoho tyicuan ri nducú ndo cuhva sacuví ndo cha vaha?

¹⁴ Soco vasi nyehé ndo tindoho cha cuenda cha sacuví ndo cha vaha, soco cucusí cuñi ndo. Ta ni ma nayuhvi ndo tatu tyanaha ñáyiví chí ndo. ¹⁵ Soco chichi añima ndo sacahnu ndo chí ra Cristo ta cuhva ndo na cunyaca ñaha ra chí ndo. Tyicuan ri caça iñi ndo tuhun Nyoo tacuhva vatyí tatu ndaca tuhun noo ñu chí ndo ñáá tuhun chinó iñi ndo chí ra, soco cuví nacuhva ndo cuenda chí ñu chihin cha ña cahnú saha ndo chí ndo ta chihin cha ndicha sahá ndo ñáyiví chí ra.

¹⁶ Cachi coo ndo tacuhva cha ma yuhvi añima ndo nuu Nyoo, vatyí tatu cahán ña vaha ñáyiví siquí ndo cha cuenda cuhva vaha iyó ndo chihin tuhun

ra Cristo, soco suri maa ñu cucahan nuu ñu cha cuenda

tuhun cahan ñu siqui ndo. ¹⁷Tatu maa Nyoo cuñi ra cha nyehe yo tindoho, vaha ca cha nyehé yo cha cuenda cha sacuvi yo cha vaha ta ñima ca cha cuenda cha sacuvi yo cha ña vaha. ¹⁸Vatyí suri ra Cristo nyehe ra tindoho ta chihí ra ñin chaha cuiri cha cuenda cuatyí yo. Ra vaha cuví ra ta chihí ra cha cuenda yo ñu iyó cuatyí. Vatyí tyicuan caa nuña ra ityí nachaa yo ityí nuu Nyoo. Chihí coño ñuhu ra, soco nandoto tucu ra chihin Tatyí li ra. ¹⁹Tyicuan ta chihin Tatyí li ra chahan ra chicahan ra chihin añima cha ñohó vehe caa. ²⁰Ta ican ñu cuan cuví ñu ña quichaha chi Nyoo quivi chiyo ra Noé ta tyambu chahnu. Ta nyatú Nyoo chi ñu nandu uvi ñi ñu cuatyí ñu cha ñi ri ca cha cuahan chino barcu cha savaha ra Noé. Soco ña cuaha ñu cacu quivi sahvi ndutya ñuhu ñayivi. Uña tahan ri ñu cacu chihin ndutya vatyí nandaá barcu nu ñohó ñu nu ndutya cuan. ²¹Ta tyicuan caa tucu maa yo tari quivi cacu yo chihin ndutya nu condutya yo. Cacu yo soco ñima cha cuenda cha nacatya yo coño ñuhu mecu yo. Soco cha cuenda cha chicán tahvi yo chi Nyoo na sanduvii ra añima yo ta sacacu ra chi yo cha cuenda cha nandoto ra Cristo. ²²Ta nandaá xica ra andivi, ta nyaá ra chiyo vaha Nyoo. Nyacá ñaha ra chi ángel ta tandihí cha nyacá ñaha chi ñáyivi.

4

Na sacuvi yo tyiño nuu tahan yo yoso cuhva chaha Nyoo chi yo

¹Yucuan chaha tari nyehe ra Cristo tindoho chihin coño ñuhu ra, sandunyeé ndo ñi ndo tacuhva cuví cunyeé ndo nyehé tucu nyoho tindoho. Vatyí ñu nyehé tindoho chihin coño ñuhu, ña sacuvi ca ñu cha quiñi caa cha cuñi coño ñuhu ñu. ²Tacuhva vatyí cuví coo ñu cuhva cuñi Nyoo. Ta ma sacuvi ca ñu cuhva cuñi coño ñuhu ñu. ³Vityin cha yaha chinyacuví xaan ndo cha quiñi caa nu quichi chi. Sacuvi ndo cuhva tahan ñi ñu ña ñohó nuu Nyoo. Ta chiyo ndo yoso cuhva cuñi ndo, cuaha viciu sacuvi ndo, cuaha cha quichi cuví ñi coño ñuhu ndo cha quiñi caa chinyacuví ndo. Chiñi ndo chihin ndixi. Maa maa ri vico chiyo ndo. Ta quiñi xaan sacahnú ndo xitohyo cha ña tahan chi sacahnú ndo. ⁴Ta vityin iyo cuñi ñu ña ñohó nuu Nyoo vatyí ña cutahán ca ndo chihin ñu ta ña sacuvi ca ndo cha quiñi caa cuan. Ta yucuan chaha cahan ña vaha ñu siqui ndo. ⁵Soco nyaá nacuhva ñu cuenda chi ra cha nyatú tuhva quivi sacutuñi ra chi ñu nyitó ta chi ñu chihí. ⁶Yucuan chaha sacoto ra Cristo tuhun vaha chi ñu ndiyi ñandihi. Vatyí tacuhva cuví coo añima ñu tari iyó Nyoo, vasi cha cutuñi chi ñu tari cutuñi chi tandihí ñáyivi iyó siqui ñuhu ñayivi quivi chihí coño ñuhu ñu.

⁷ Soco cha cuyatyin cha cundihi tandihi maa. Yucuan chaha cachi çoo ndo ta cunyaa vaha ndo tyiño cha chicán tahvi ndo. ⁸ Ta cha xihna ri tahán chi cha cuñi xaan ndo chi tahan ndo. Vatyí tatu cuñí yo chi tahan yo, cuaha xaan chaha cusaha yo ticahnu iñi chi ñu, tyi maa Nyoo cuñí ra chi yo ta cuaha xaan chaha sahá ra ticahnu iñi chi yo. ⁹ Tatu chaá noo ñáyivi vehe ndo, vaha tyiñuhu ndo chi ñu ta ma cuñi ndo tyi sayangá ñu chi ndo. ¹⁰ Ta tahan tahan yo na sacuvi yo tyiño nuu inga yo, yoso cuhva cha chahá Nyoo chi yo. Vatyí cuñí chi cha cotyiño yo sñn sñn cha vaha cha chahá ra chi noo noo yo cha cuenda cha vaha chi inga tahan yo. ¹¹ Tatu chahá Nyoo vatyí ñihi vahun tuhun cahun chihin ñáyivi, çahan soco maa maa ri tuhun cha chahá Nyoo. Tatu chahá ra tyi sacuvun tyiño nuu ñáyivi, na sacuvun chihin fuerza cha chahá ra. Tandihí cha sacuvi ndo, sacuvi ndo tacuhva vatyí chihin tandihí cha nyacuví ndo sacahnú ndo chi Nyoo cha cuenda ra Jesucristo. Chi maa Nyoo tahán chi sacahnu yo. Ta na cunyaca ñaha ra chihin tunyee iñi ra tyicuan ri maa. Ta na cuví chi tyicuan caa.

Cuví cusii cuñi yo tatu nyehé yo tindoho cha cuenda ra Cristo

¹² Yañi, cuñí xain chi ndo. Ma iyo xaan cuñi ndo tatu vachi tindoho ñihi siqui ndo. Ma cuñi ndo vatyí ña

tahán chi nyehe ndo tindoho. ¹³ Soco cusii cuñi ndo vatyí cuví nyehe ndo tindoho tari nyehe ra Cristo tindoho. Vatyí tyicuan caa ta cuví cusii tucu cuñi ndo na nyehe ndo cha cahnu cuví ra quivi cuquichi ra. ¹⁴ Tatu cahán ña vaha ñu siqui ndo vatyí nyicón ndo chi ra Cristo, cusii cuñi ndo, vatyí tyaqui xaan nyaá Tatyí li chihin ndo. Maa ñu cuan cahán ña vaha ñu siqui ra Cristo, soco nyoho sacahnú ndo chi ra. ¹⁵ Soco tatu nyehé ndo tindoho cha tyicuan caa, vaha, ta ñima ca cha nyehé ndo tindoho cha cuenda cha chahñi ndo, o cha suhu ndo, o cha sacuvi ndo cha ña vaha, o cha tyihí ndo chi ndo nu ña tahán chi. ¹⁶ Soco tatu nyehé ndo tindoho cha cuenda cha yihí ndo cuenda ra Cristo, ma cucahan nuu ndo. Soco sacahnu ndo chi Nyoo, vatyí chahá chi cuhva nyehe ndo chiin tindoho cha cuenda maa ra Cristo.

¹⁷ Vatyí cha chaá quivi cha quichahá sacutuñi Nyoo chi tandihí ñáyivi. Ta xihna ca chi yoó cha cuví yo ñu yihí cuenda ra. Soco tatu tyehe caa tachí tuñi Nyoo chiin ri chi maa yo, ¿yoso caa cucuvi chi ñu cha ña quichahá tuhun Nyoo? ¹⁸ Tatu yí cacú aña ñu vaha, ¿yoso caa cucuvi chi ñu quiñi iyó, ñu iyó cuatyí? ¹⁹ Yucuan chaha tatu nyehé ndo tindoho cuhva cuñí Nyoo, cuñí chi cha sañihi ca ndo sacuvi ndo cha vaha. Ta tyaa ndo aña ndo ndaha Nyoo. Maa ra savahá chi

¹² Sacuhín carta ihya chi ndo chihin ra Silvano, yañi yo. Ta cha cuenda chi yuhu, maa ra cuví noo ra ñi xaan iñi nyicón chi ra Cristo. Tyají suhva nu tutu ihya chi ndo vatyí chahí tuhun chi ndo ta catyí chi ndo vatyí cha vaha cha ñihí ndo cuví cha ndicha vaha cha chahá Nyoo chi yo cha cuenda cha cuñí ra chi yo. Ma saña ndo ihya.

¹³ Vachi nocumi chi ndo sahá ñu yihí cuenda Nyoo nya nu cuví ityi Babilonia. Tari nacachi Nyoo chi maa ndo, tyicuan caa nacachi tucu ra chi ñu cuan. Ta vachi nonga nocumi sahá ra Marcos sehi cha cuenda Sutu Mañi yo.

¹⁴ Cuhva ndo nocumi chi noo noo tahan yo chihin cha cuñí ndo chi ñu.

Na coo cha taxi ri cuñi aña tandihí ri ndo cha ñi ri cuví ndo chihin ra Jesucristo.

Ta na cuvi chi tyicuan caa.

Carta Cha Cu Uvi Cha Sacuhun Ra Apóstol Pedro Chi Ñáyivi Yihí Cuenda Nyoo

*Nu tyaá ra Pedro noo tutu
chi ñu yihí cuenda Nyoo*

¹ Yuhu ra Simón Pedro sacuví tyiño nuu ra Jesucristo. Ta cuví noo apóstol chi ra. Cuñí chi catyí tyi tachí ra chii vatyí caque tyiño ra. Tyaí tutu ihya chi nyoho cha chinó iñi ndo chi Nyoo tari cuhva cha tyaqui chinó iñi nyuhu. Vatyí yucuan cuví cha chino iñi yo vatyí vaha ra Jesucristo, ra cuví Nyoo, ra sacacú chi yo. ² Na naquehen ca ndo cha vaha cha chahá Nyoo chi yo. Ta na coo ca cha taxi ri añima ndo cha cuenda cha ñohó nuu ndo chi Nyoo ta chi Sutu Mañi yo Jesús.

*Yoso caa coo ñu yihí cuenda
Nyoo*

³ Nyoo chihin tunyee iñi ra, chahá ra tandihi cha chiñuhú chi yo tacuhva cuví coo cachi yo nuu ra ta saha yo ñáyivi chi ra. Tandihi ihya ñihí yo cha cuenda cha chicohon nuu yo chi ra cha caná chi yo. Vatyí chicohon nuu yo tyi cahnu cuví ra ta tyaqui xaan cha sacuví ra. ⁴ Ta chihin tandihi ihya, chahá ra cha catyí ra tyi cucuhva ra chi yo. Ta cahnu xaan ta yahvi xaan nyaá cuan. Vatyí cha cuenda ihya nanduvi yo tari maa ra.

Vatyí sacanyaha ra cha quiñi caa cha quichí cuvi iñi yo, ta ma tiví yo tari tiví ñáyivi iyó siqui ñuhu ñáyivi ihya. ⁵ Ta yucuan chaha cuñí chi cha chinó ca iñi yo chi Nyoo ta nducu yo cuhva cha coo cachi yo. Yaha cuan cuñí chi cha nducu yo cuhva ta cutuñi vaha iñi yo cuhva cuñi Nyoo chihin yo. ⁶ Ta yaha cuan cuñí chi cha saniñi yo cha cunyaca ñaha yo coño ñuhu yo ta cuhva chicá xiñi yo. Yaha cuan ta nducu yo cuhva cha cucama iñi yo. Yaha cuan ta nducu yo cuhva cha cuiti ca coo yo nuu Nyoo. ⁷ Yaha cuan ta nducu yo cuhva cha cuñi yo chi tahan yo. Yaha cuan nducu yo cuhva cha cuvita xaan añima yo chihin tandihi ñáyivi.

⁸ Tatu tyehe caa iyó ndo ta tyicuan ri nducú ndo cuhva cha coo tandihi ihya chi ndo, Nyoo cucotyíño xaan ra chi ndo. Ta tatu sacuvi ndo tyehe caa, ña caha xaan ri chicohon nuu ndo chi Sutu Mañi yo Jesucristo. ⁹ Soco ñu cha ñahri ihya iyó chi, cuví ñu tari noo ra cuaa. Ña cutuñi iñi ñu cha tahán chi coto ñu. Ta naá iñi ñu tyi sandachí Nyoo cuatyí ñu ta ityi chata ca. ¹⁰ Yucuan chaha yañi, saniñi ndo coo ndo tyehe caa. Tyicuan ta cundicha vaha tyi caná Nyoo chi ndo ta nacachí ra chi ndo. Vatyí tatu sacuvi ndo tyehe caa, ma canacava maa ndo. ¹¹ Tyicuan caa ta totyehe ri cuhva Nyoo cha quihvi ndo nu nyacá ñaha

Sutu Mañi yo Jesucristo tyicuan ri maa. Maa ra cuvi ra sacacú chi yo.

¹² Yucuan chaha cuasanicohón que iñi ndo tuhun ihya, vasi cha chitó ndo, ta nñi iñi ndo sacuví ndo tuhun ndicha cha cutuhva ndo. ¹³ Ta cuhva cha cuñí mai, vatyí cha ni ri ca cha iyé, vaha sanicohin iñi ndo coto naa iñi ndo tuhun ihya. ¹⁴ Vatyí chité tyi ña naha ca ta cusandoi ñayivi ihya. Vatyí tyicuan caa sacoto Sutu Mañi yo Jesucristo chii. ¹⁵ Soco cuasaníni tacuhva vatyí tatu yahá chihí soco nicohón iñi ndo tuhun ihya.

Nu nacatyí ra Pedro yoso caa nyehera cha cahnu cuvi ra Cristo

¹⁶ Ñima tyisu ri canatava ndi quivi sacoto ndi tuhun ra Jesucristo chi ndo. Vatyí cha nyehé vaha ndi chihin chiti nuu ndi cuví. Vatyí nyehé ndi cha cahnu xaan cuví Sutu Mañi yo Jesucristo. Ta sacoto ndi chi ndo tyi iyó xaan tunyee iñi chi ra ta cuquichi ra inga chaha. ¹⁷ Vatyí nyehé ndi nu sacahnú xaan Nyoo Sutu yo chi ra. Ta tyaqui xaan tyaqui xaan cuví nu cahan Nyoo ta catyí ra: “Ican ihya Sehi. Ta cuñí xain chi ra. Ta sií cuñí chihin ra”, catyí Nyoo tuhun ra Jesús quivi cuan. ¹⁸ Ta nyuhu chiñi ndi ndusu Nyoo cha quichí ityi andivi quivi cha nyicú ndi chihin Sutu Mañi yo nu yucu ii cuan.

¹⁹ Ta siin ri cumí yo nonga tuhun cha ndicha vaha cha catyaa ra profeta. Nyaá vaha nu tutu nu cahán chi tuhun ra Cristo. Ta vaha sacuví

ndo tatu quichahá vaha ndo tuhun ihya. Vatyí cuví chi tari noo ñuhú ndichin cha cayú nu maa iñi nyacua nya cundichin ta caña ra Cristo tari cañá tiño cahnu cha ñaa ca, vatyí sandichín ra aña ma yo. ²⁰ Soco coto vaha ndo vatyí cha minoo tuhun ri yo, ma cuvi catyí yo ñáá cha cuñí chi catyí noo tuhun cha nyaá nu tutu Nyoo. ²¹ Vatyí ra cacuvi profeta ta cha naha, ña cahan ra cuhva cuñí ri maa ra. Soco cuhva cuñí Nyoo cahan ra. Ta Tatyí li saquehen ityi chi ra.

2

Ra casañahá cha ña ndicha (Judas 4-13)

¹ Soco cachiyo tucu ra profeta cuendu nu nyicu ñu Israel ta cha naha, cacatyí ra tyi cuvi ra profeta Nyoo. Ta tyicuan caa cuacoo tucu ra sacuahá ra sañahá cuendu nu nyicu ndo. Xehe ri cuasañaha ra tuhun cha ña ndicha cha cuví sativi chi ndo. Ta cuacatyí ra tyi ña ndicha Sutu Mañi yo ra sacacú chi ra. Yucuan chaha numi ri cucunaa ra cuan. ² Ta cuaha xaan ñu cucunyicon ñu chi ra chihin cha quiñi caa cha sacuví ra. Ta cuaha xaan ñu cucahan ña vaha ñu siqui tuhun cha ndicha vaha ra Cristo. ³ Ta chaha cha iyo cuñi ra xuhun, ta cusandavi ñaha ra chi ndo chihin cha casañahá ra maa ri cha ña ndicha. Soco nyatú Sutu Mañi yo tachi tuñi ra chi ra vatyí cha naha iyó maa tuhun cha cunaa ra.

⁴ Vatyí ni ri chi ángel cha chicoo cuatyí quivi cuan ta ña saha Nyoo ticahnu iñi.

Soco tuchj ra chi ra anyaya. Ta sandoq ra chi ra nu ñaa iñi, nuhñi ra chihin cadena nyacua nya quivi cutuñi chi ra nuu Nyoo. ⁵ Ta ni ña saha Nyoo ticahnu iñi chi ñu chiyo ta cha naha. Yucuan chaha tachj ra savi xaan siqui ñáyivi quiñi iyó cuan. Ta sacacu ra chi noo tuhun ri maa ra Noé, ra cha cahan tuhun vatyí coo yo noo ñayivi cachi. Ta cacu tucu ucha ca ñáyivi ñandihí. ⁶ Ta tyicuan caa tucu sacunaq Nyoo ñuu Sodoma ta ñuu Gomorra. Vatyí chahmí ra nyacua nya cha ndihí maa nduvi ñiyaa. Tacuhva vatyí cunyehe ñáyivi quiñi iyó cha cucoo nu cuahan ca chí. ⁷ Soco sacacu ra chi ra Lot vatyí cuví ra noo ra vaha nuu ra. Ta cuihya cuñí ra Lot nyehé ra cuhva iyó ñu quiñi iyó cuan. ⁸ Ta ndi quivi cuihya cuñí añima ra Lot quivi chiyo ra ñuu cuan, cha cuenda cha nyehe ra ta chiñi ra cha quiñi caa nyacuvi ñu cuan. Vatyí maa ra, ra vaha cuví ra. Ta maa ñu maa maa ri cha ña vaha nyacuvi ñu. ⁹ Ta tyicuan caa cuví sacacu Nyoo chi yo tatu iyó yo cuhva cuñí ra. Ta ñu quiñi iyó naquehén vaha Nyoo chi ñu vatyí cutachi tuñi ra chi ñu quivi cutuñi chi ñu nuu ra.

¹⁰ Ta yaha ca cutachi tuñi Nyoo chi ñu nyicón cha ña vaha cha cuñí coño ñuhu, ñu ña cuñí cha cunyaca ñaha Sutu Mañi yo chí. Ta cahnu sahá ñu chí ñu ta sacuvi ñu maa ri cuhva cuñí maa ñu. Ta ñu cuan ña yuhví ñu cahan ña vaha ñu siqui ra nahnu

ca ican saha maa ñu cuví ri siqui ángel, cuví ri siqui tatyí ña vaha, cuví ri siqui Nyoo. ¹¹ Soco ángel, cahnu ca cuví ra cha nuu ñáyivi, soco ña ca-cañá iñi ra cahan ña vaha ra siqui ra nahnu ca cuan chihin nuu Sutu Mañi yo.

¹² Soco ra cahán cuendu nu nyicú ndo cuví ra tari quiti cha ña cutuñi iñi ta sacuvi ti cuhva cuñí maa ti. Vatyí quiti, ¿ñáá cuenda iyó ti? Iyó ti vatyí tñn rayi chí ti, ta cahñi ra chí ti. Tyicuan caa maa ra cuan. Cacahán ña vaha ra siqui cha ña cutuñi iñi ra. Ta cucúvi ra tari chihí quiti. ¹³ Cunyehe ra tindoho tari sanyehé maa ra tindoho chí inga ñáyivi. Ta sii xaan cacuñí ra chihin cha quiñi caá nyacuví ra nu tuvi. Ticahan nuu chahá ra, tatu cha cutahan ra chihin ndo nu iyó ndo vico. Nyaá vavaha ra tusi iñi. Soco ña ndicha cuhva sañahá ra.

¹⁴ Ta tandihí ri ñusihí cha nyehe ra ta quichi cuvi iñi ra. Ña chitatú ra cha casacuvi ra cha quiñi caa. Casandaví ñaha ra chí ñu ña ñihi nyaá chihin Nyoo. Vatyí xaan ra cha nducu ra cuhva maa maa ri cha cuenda maa ra. Nyaá cha cunaa ndihí ra minoo quivi. ¹⁵ Casandoq ra cuan ityi vaha ta naquehen ra ityi nu cucunaa ra. Casacuví ra tari sacuvi ra Balaam sehe ra Beor. Vatyí cuñí ra Balaam saha ganaa ra xuhun chihin cha ña vaha cha nyacuví ra. ¹⁶ Tyicuan ta noo burra nacahan ti chihin ra, tari cahán ñáyivi, ta ña chaha ti cha cahun ca ra Balaam chihin cuhva loco chicá xiñi ra.

3

17 Ta tyicuan caa tucu maa ra cha nyicú chihin ndo. Cacuví ra tari noo yavi ityi cha ñahri ndutya ñohó. Ta cuví ra tari noo vico cha tyandaha tatyí ñihi chi. Soco cha nyaá cha cohon ra nu ñaa iñi cahnu tyicuan ri maa cha cuenda cha nyacuví ra tyicuan caa. 18 Yaa vavaha cahán ra soco tandihí tuhun cahán ra cha ñima ri tuhun cuví. Ta chihin vicio ta chihin cha quichi cuvi iñi coño ñuhu yo casandaví ñaha ra chi ñu cha yahá quitá mahñu cha quiñi caa. 19 Ta tyiyuhú ndihí ra chi ñu na cunyacuvi ca ñu cha quiñi caa vatyí yori nyacá ñaha chi ñu, catyí ra. Soco suri maa ra chahá ra cha cunyaca ñaha cha quiñi caa chi ra. Vatyí tatu chahá yo cha cunyaca ñaha noo cha cunyaca ñaha chi yo, musu cuan cuví chi yo. 20 Vatyí ñu cha chicohon nuu chi Sutú Mañi yo Jesucristo, ra sacacú chi yo, cha yahá sandoq ñu cha quiñi caa ñayiví ihya. Soco tatu natiñ tucu ñu tuhun ñayiví ihya inga chaha, quiñi ca nanduvi ñu ta ñima ca ta cuvi maa. 21 Vaha taxin ca tyehe ta ña chicohon nuu ñu ityi vaha cuan, ta ñima ca cha yahá chicohon nuu ñu ta nacuhva ñu chata ñu tuhun cha chahá Nyoo chi ñu. 22 Soco cuví chi ñu tari cuhva catyí noo tuhun cha iyó ñayiví: “Ina nduchan ti, ta nacachi tucu ti cha nduchan ti. Ta quini chityí ti, ta ndihví tucu ti nu nyahyu inga chaha.”

Quivi cuquichi tucu Sutú Mañi yo

1 Yañi, cuñi xain chi ndo. Ta ihya cuví carta cha cu uvi sacuhín chi ndo. Ta nu ninduvi tahanan carta chahí tuhun chi ndo tacuhva vatyí caca vaha xiñi ndo. 2 Ta ñicohon iñi ndo tuhun cha cahán ra cacuví profeta Nyoo, ta cha naha. Ta ñicohon tucu iñi ndo tuhun cha sañaha nyuhu chi ndo. Vatyí cuví ndi apóstol cuenda Sutú Mañi yo Jesucristo ra sacacú chi yo.

3 Çoto xihna ndo vatyí nu cundihi ca chi quivi cuquichi ñáyivi cucuacu nyaá ñu tuhun Sutú Mañi yo. Cucoo ñu yoso cuhva cha quiñi caa cha cuñi coño ñuhu ñu. 4 Ta cucatyí ñu: “Ra Jesucristo catyí ra vatyí cuquichi ra inga chaha. ¿Ta nya nyaá ra vityin? Vatyí nyata cachihí sutu chahnu yo ta nyata chinqo ñuhu ñayiví ta nya vityin ta cuhva caa ri maa”, cucatyí ñu chi ndo. 5 Vatyí maa ñu ña cuñi ñu coto ñu vatyí ta tyembu chahnu cahán Nyoo ta savahá ra andiví ta ñuhu ñayiví. Quitá ñuhu ñayiví chichi ndutya ta chihin ndutya chinqo chi. 6 Soco cha yahá savahá Nyoo ñuhu ñayiví ta suri chihin ndutya cuanaq ñayiví cuan quivi coon savi xaan. 7 Soco andiví ta ñuhu ñayiví cha iyó vityin sahá cumi vaha Nyoo vatyí suri chihin ñuhu cucayu chi quivi cutuñi chi ñáyivi nuu ra. Tyicuan ta ñuhu cha

cayu cuan cusanaa chi chi ñu ña quichahá chi Nyoo.

⁸ Soco yañi, cuñi xain chi ndo. Ta cuñi vatyí ma naa iñi ndo vatyí cha cuenda Sutu Mañi yo noo quivi tari cha noo mil cuiya cuví cuan, ta cha noo mil cuiya tari cha noo quivi cuví cuan chi ra.

⁹ Ñima cha ña cuñi ñaha Sutu Mañi yo quichi ra. Vasi yihí ñu chicá xiñi ñu cha tyicuan caa. Soco Sutu Mañi yo nyatú ra chi yo vatyí ña cuñi ra cha cunaa ni noo yo. Cuñi ra vatyí tandihí yo ndu uvi iñi yo cuatyí yo ta nasama yo cuhva iyó yo.

¹⁰ Soco quivi cuquichi Sutu Mañi yo, tari cuaquichi noo ra suhu cha cha cuaa, tyicuan caa cucuvi. Vatyí sana iñi yo ta cuquichi ra. Tyicuan ta cucunaa andivi. Iyo xaan cucachan cuhva cuan. Ta cucayu tandihí cha iyó andivi. Cundutya ndi cuii chihin cha ihñi xaan. Ta tyicuan caa cucayu tucu ñuhu ñayivi ta tandihí cha iyó nuu chi.

¹¹ Ta tyicuan caa cutani tandihí. Yucuan chaha cuñi chi vatyí cachi coo yo tari cuhva cuñi Nyoo. ¹² Cuatu tuhva yo na chaa quivi quichi Nyoo. Nducu yo cuhva cha sanumi ra quichi ra. Quivi cuan cunaa andivi chihin ñuhu. Tandihí cha iyó cundutya chihin cha ihñi. ¹³ Soco yoó nyatú yo noo andivi chaa ta noo ñuhu ñayivi chaa cha catyi Nyoo tyi cucuhva ra. Ta maa maa ri cha vaha chi Nyoo cucoo yucuan.

¹⁴ Yucuan chaha yañi, cha ni ri ca cha nyatú ndo na quichi Sutu Mañi yo, saníñi ndo tacuhva vatyí quivi quichi ra, vii iyó ndo chihin ra ta ñahri cha iñi ndo ta ñahri cuatyí ndo. ¹⁵ Ta tñin vaha ndo cuenda, vatyí Sutu Mañi yo nyatú ra chi yo vatyí cuñi ra vatyí cuaha ca ñayivi cacu. Ta tyicuan caa tucu catyi ra Pablo yañi yo nu tutu cha sacuhun ra chi ndo. Vatyí chihin cha chiñi tuñi cha chaha Nyoo chi ra tyaq ra. ¹⁶ Ta tandihí ri nu carta ra ta cahán ra tuhun ihya chihin ndo. Vasi yihí tuhun cha yñi vavaha cutuñi iñi yo. Ta ñu cha ña cutuñi iñi, ñu cha ña ñihi nyaá chihin Nyoo, sin caa cuhva natyihí tuñi iñi ñu tuhun cuan. Ta suri tyicuan caa sacuvi tucu ñu chihin tuhun cha tyaq inga ra nu tutu tuhun Nyoo. Sin caa cuhva natyihí tuñi iñi ñu. Ta cha tyicuan caa, sacunaá ñu suri chi maa ñu.

¹⁷ Yucuan chaha yañi, vityin cha chitó ndo tuhun ihya cha ni cumañi ca cuvi, saha ndo cuenda chi ndo, coto cunyicon ndo cuhva sandavi ñaha ra quiñi caa cuan, ta coto sandoo ndo cuhva vaha cha cuahan ndo. ¹⁸ Soco cohon nuu vaha ca ndo chi Sutu Mañi yo ra Jesucristo ra sacacú chi yo. Ta cuahnu ca ndo chihin tumañi iñi cha chahá ra chi ndo. Na sacahnu yo chi ra vityin ta tyicuan ri maa. Ta na cuvi chi tyicuan caa.

Carta Cha Xihna Ri Cha Tyaa Ra Apóstol Juan

Ñayiví chaa coo yo

1 Ihya tyaa ndi tuhun cha cha iyó maa quiví cha quichaha tandihi. Ta cuví chi tuhun cha chiñi ndi ta cha nyehe ndi chihin nuu ndi; vatyí nyehe ndi ta tiñi ndi chihin ndaha ndi. Ta ican tuhun ihya cuví tuhun cha chahá ñayiví chaa coo yo. ²Ñayiví chaa ihya quetuví quiví quichi ra Cristo. Maa ndi nyehe ndi ta chahá ndi cuenda tuhun chi; ta sacotó ndi tuhun ñayiví chaa cha ma naa ca maa ihya chi ndo. Vatyí ñayiví ihya, nyaá chi chihin Sutu yo Nyoo, ta vityin tuví chi nu nyicú yo. ³Nacatyí ndi chi ndo cha nyehe ndi ta cha chiñi ndi tacuhva na cu ñin ri ndo chihin ndi, tari maa ndi, ndicha cuii vatyí ñin ri cuví ndi chihin Sutu yo Nyoo ta chihin Sehe ra, ra Jesucristo. ⁴Ta tyaa ndi tuhun ihya chi ndo tacuhva na coo tandihi tusii ñni cha chahá Nyoo chi ndo.

Nyoo, ñuhü ndichin cuví ra

⁵Ican ihya cuví tuhun cahán ra Cristo chihin ndi. Ta chiñi ndi ta sacotó ndi chi ndo: Nyoo maa ri ñuhü ndichin iyó nu nyaá ra. Ta ñahri cha ñaa ñni, (ñahri cha ña vaha yihí ñni ra cuví cuan). ⁶Tatu catyí yo vatyí ñin ri cuví yo chihin ra, soco sacuví yo

cha ña vaha, nu ñaa ñni chicá noo yo cuví cuan. Sandaví ñaha yo. Ta ñahri tuhun ndicha cahán yo. ⁷Soco tatu nu ndichin iyó yo, tari maa Nyoo iyó ra nu ndichin, tyicuan ta ñin ri cuví yo chihin tahan yo, ta ñni ra Jesucristo Sehe Nyoo, nacatyá chi ndi cuii maa cuatyí yo.

⁸Tatu catyí yo vatyí ñahri cuatyí yo, suri chi maa yo sandaví ñaha yo, ta ñahri cha ndicha nyaá ñni yo. ⁹Soco tatu nahmá yo cuatyí yo nuu Nyoo, yihí ñni yo chi ra vatyí vaha ra ta ña sandaví ñaha ra, soco sacuví ra cuhva catyí ra, ta cusaha ra ticahnu ñni cuatyí yo ta cusandachi ra ndi cuii maa cha quini caa yo. ¹⁰(Nyoo catyí ra tyi iyó cuatyí yo), ta tatu catyí yo vatyí ñahri cuatyí yo, sahá yo tuhun tyi Nyoo, cuendu ra. Ta tuhun cahán ra, ñahri maa nyaá ñni yo.

2

Ra Cristo cuví ra cahán chaha yo

¹Sehe nyihi, sacoté tuhun ihya chi ndo, tacuhva ma sacuvi ndo cuatyí. Soco tatu chicoo cuatyí minoo ndo, ma yuhvi ndo, vatyí iyó ra cahán chaha yo nuu Nyoo. Ta ican ra cuví ra Jesucristo, ra vaha. ²Ta maa ra cuví ra chahnyá cuatyí yo, vatyí chihí ra tyiño nuu yo cha cuenda cuatyí yo. Ta ñni cha cuenda maa ri maa yo, soco cha cuenda tandihi ñayiví.

³Tatu quichahá yo tuhun cahán Nyoo, ñohó nuu yo chi

ra. ⁴ Soco tatu noo ra catyí ra: “Yuhu, ñohó nui chi Nyoo”, soco tatu ña quichahá ra tuhun cahán ra, cuví ra noo ra cuendu. Ta ñahri tuhun ndicha caá añima ra. ⁵ Soco ñu naquehén vaha tuhun cahán Nyoo, ican ñu cuan cuví ñu cuñí chi ra chihin cha ñi añima ñu. Ta cha tyicuan caa chitó yo tyi ñin ri cuví yo chihin ra. ⁶ Yóo cha catyí vatyí ñin ri cuví chihin Nyoo, tahán chi coo ra tari cuhva chiyo maa ra Jesucristo quívi chícá noo ra siqui ñuhu ñayívi.

Tuhun chaa cha cuñí yo chi tahan yo

⁷ Yañi yo, ñima noo tuhun chaa sacoté chi ndo, soco cuví chi noo tuhun chahnu cha chitó ndo nyata quívi xihna ri. Ta ican tuhun chahnu ihya cuví tuhun chiñi ndo. ⁸ Soco tari noo tuhun chaa cuví chi. Ta sacuví ra Cristo, ta chaha ra cha sacuví tucu maa ndo ñandihí. Ta cha tyicuan caa, cha ñaa iñi cuahan nocuee chí. Ta cha ndichin Nyoo cha sandundichín chi.

⁹ Ñu cha catyí vatyí nyaá ñu nu ndichin, ta ña cuñí nyehe ñu chi tahan ñu, ni nyaá ca ñu nu ñaa iñi. ¹⁰ Ta ñu cuñí chi tahan, nu ndichin nyaá ñu. Ta ñahri maa cha cuví sanacava chí ñu nu cuatyí. ¹¹ Soco ñu cha ña cuñí nyehe chí tahan, nu ñaa iñi nyaá ñu. Ta ña chitó ñu nya ityi cuahan ñu vatyí ña cuví nyehe ñu vatyí tari cha cuaa ñu.

¹² Sacuhín tuhun ihya chí nyoho, ra cuatyaa sehi. Vatyí cha yaha saha Nyoo ticahnu iñi cuatyí ndo cha cuenda cha

chihí ra Jesucristo tyiño nuu ndo. ¹³ Ta chí nyoho, cha cuví ndo sutu, sacuhín tuhun ihya chí ndo, vatyí ñohó nuu ndo chí ra iyó nyata cumañi cacu ñuhu ñayívi. Ta chí nyoho, ra tyivaa, sacuhín tuhun ihya vatyí cuví chasaha ndo chí ra ña vaha.

Ta chí nyoho, cha cuví ndo ra cuatyaa sehi, sacuhín tuhun ihya vatyí ñohó nuu ndo chí Sutú yo Nyoo. ¹⁴ Sacuhín tuhun ihya chí nyoho cha cuví ndo sutu, vatyí ñohó nuu ndo chí ra cha iyó nyata cacu ñuhu ñayívi. Ta sacuhín tuhun ihya chí nyoho ra tyivaa vatyí nyaá xaan fuerza chí ndo. Ta tuhun Nyoo caá añima ndo. Ta cuví chasaha ndo chí ra ña vaha.

¹⁵ Ma cuñi ndo cha quiñi caa cha iyó ñayívi ihya. Ni ma cuñi ndo cha iyó siqui ñuhu ñayívi. Vatyí ñu cuñi tandihí ihya, ña cuñi ñu chí Nyoo. ¹⁶ Vatyí tandihí cha iyó ñayívi ihya, cha ña vaha cha quichi cuvi iñi coño ñuhu yo, ta cha nyehe yo ta quichi cuvi iñi yo coo chí yo, ta cha cuñi yo cuyaa yo chihin cha iyó chí yo, tandihí ihya ñima cuhva chahá Sutú yo Nyoo chí yo cuví, soco maa maa ri cha chahá ñayívi ihya cuví. ¹⁷ Ta ñayívi ihya cuahan sandihí chí, chihin tandihí cha quiñi caa cha quichi cuvi iñi ñayívi. Soco ñu cha sacuví cuhva cuñi Nyoo, tyicuan ri maa cuacoo ñu chihin ra.

Ra xaan iñi chí ra Cristo

¹⁸ Sehe nyihí, cha nyaá yo nu cuandihí quívi. Ta nyoho

chiñi soho ndo vatyí vachi noo ra cha ña cuñi nyehe chi ra Cristo, ta vityin cha cuaha xaan ra ña cuñi nyehe chi ra Cristo iyó vityin. Yucuan chaha nacoto yo vatyí cha nyaá yo nu cuandihi quivi. ¹⁹ Maa ra nu nyicú yo quita coyo ra, vatyí ñima ra cuenda yo cuví chi ra. Vatyí tyehe ta ra cuenda yo cacuví chi ra, candoó ra chihin yo. Soco cuahan coyo ra tacuhva que-tuvi vatyí ña tandihi ñáyivi ta cuenda yo cuví ñu.

²⁰ Soco chi nyoho chaha ra Cristo Tatyí Ii Nyoo cun-yaa añima ndo. Ta chitó ndo tandihi. ²¹ Sacuhín tuhun ihya chi ndo ñima cha cuenda vatyí ña chitó ndo cha ndicha, soco vatyí chitó ndo. Ta ni noo cuendu ma quita cahan ñu sacuví cha ndicha.

²² ¿Yóó cha cuví ñu cuendu? Ñu catyí vatyí ra Jesus ñima ra Cristo cuví ra. Ta ñu cha catyí tyehe caa, ñu xaan iñi chi ra Cristo cuví ñu. Vatyí ña chinó iñi ñu chi Sutu yo Nyoo, ta ni ri chi ra Jesucristo Sehe Nyoo. ²³ Tandihi cuii ñu ña chinó iñi chi Sehe Nyoo, yori Sutu yo Nyoo nyaá chihin ñu. Soco ñu catyí vaha chi ñáyivi vatyí ra Jesucristo cuví Sehe Nyoo, ñin ri cuví ñu chihin Nyoo ñandihí.

²⁴ Yucuan chaha nyoho, tuhun cha chiñi ndo nya quivi xihna ri, naquehen vaha ndo chichi añima ndo. Tatu ndoó chi chichi añima ndo, ñin ri cuví ndo chihin Sehe Nyoo ta chihin Sutu yo Nyoo ñandihí.

²⁵ Ta ra Jesucristo catyí ra vatyí cuhva ra noo ñayivi chaa cha ma naa ca maa coo yo.

²⁶ Sacuhín tuhun ihya chi ndo cha cuenda vatyí cuaha xaan ra sandaví ñaha chi ndo iyó. ²⁷ Soco ra Jesucristo chaha ra Tatyí Ii Nyoo cha cunyaa añima ndo, ta ña chiñuhú ca cha sañaha ni noo ñáyivi chi ndo. Vatyí suri maa Tatyí Ii Nyoo sañahá chi ndo ndi cuii maa tuhun. Ta cha ndicha cuví, ñima cuendu cuví. Yucuan chaha sañihi ca ndo cu ñin ri ndo chihin ra Cristo tari cuhva sañahá Tatyí Ii Nyoo chi ndo.

²⁸ Ta vityin nyoho, ra cuatyaa sehi, cunjyaaña yo chi ra Cristo tacuhva vatyí nachaa chi quivi quichi ra, ma cutucu cuñi yo chihin ra. Ta tyicuan caa tucu maa ra chihin yo. Ta ñin ri tacuhva cha ma tahan yo ticahan nuu nuu ra quivi quichi ra. ²⁹ Cha chitó ndo vatyí ra Cristo vaha ra. Chitó tucu ndo vatyí tandihí ñu cha nyacuví cha vaha, sehe Nyoo cuví chi ñu.

3

Ñu cha cuví sehe Nyoo

¹ Nyehe ndo, yoso cha cuñi Sutu yo Nyoo chi yo, vatyí nasaha ra sehe ra chi yo. Ta catyí ra: “Nyoho, sehi cuví chi ndo.” Yucuan chaha ñáyivi, ña cuñi nyehe ñu chi yo vatyí tyicuan caa tucu, ña cuñi nyehe ñu chi maa ra. ² Yañi, vityin cha cuví yo sehe ra. Soco ta coto ca yo yoso caa cucuvi yo. Soco chitó yo

vatyi nachaa chi quivi quichi ra Jesucristo, cucuvi yo tari maa ra, vatyi cunyehe vaha yo chi ra tari cuhva caá ra. ³ Ta tandihi yo cha nyatú yo cha cucuvi tyehe caa, nducú yo cuhva ta sandundí ca yo añima yo, tari ndí maa Sutu Mañi yo Jesucristo.

⁴ Tandihí ñu sacuví cuatyí, ña quichahá ñu ley Nyoo. Vatyí cha sacuví yo cuatyí, ña quichahá yo ley Nyoo cuví chi cuan. ⁵ Cha chitó ndo vatyí ra Cristo quichí ra ñayiví tacuhva tinyaa ra cuatyí yo, ta maa ra ñahri cuatyí ra. ⁶ Tandihí yo cha ñn ri cuví yo chihin ra, ña sacuví yo cuatyí. Soco ñáyiví cha sacuví cuatyí, ta quehen cuenda ca ñu chí ra, ni ta cohon ca ra añima ñu. ⁷ Sehe luhli, ñaha sandavi ñaha ñáyiví chí ndo, vatyí ñu cha sacuví cha vaha, vaha ñu, tari maa ra Cristo vaha ra. ⁸ Soco ñu cha sacuví cuatyí, cuenda ra ña vaha yihí ñu. Vatyí ra ña vaha sacuví ra cuatyí nyata quivi xihna ri. Soco yucuan chaha quichí ra Jesucristo, ra cha cuví Sehe Nyoo, tacuhva vatyí satani ra ndí cuii cha sacuví ra ña vaha.

⁹ Tandihí yo cha cha yaha nacacu chaa yo, nanduví yo sehe Nyoo, ta ña sacuví ca yo cuatyí, vatyí ñayiví Nyoo iyó yo. Yucuan chaha ña sacuví ca yo cuatyí, vatyí cha yaha nacacu chaa yo ta sehe Nyoo cuví chí yo. ¹⁰ Ta tyehe caa cuví nichon nuu yo chí ñu cha cacuví sehe Nyoo, ta ñu cuví sehe cuihna. Vatyí yóo

ñu sacuví cha ña vaha o ña cuñí nyehe ñu chí tahan ñu, ñima ñáyiví cuenda Nyoo cuví ñu.

Na cuñi yo chi noo noo tahan yo

¹¹ Vatyí ican ihya cuví tuhun cha chiñí ndo quivi xihna ri: Cha cuñí yo chí noo noo tahan yo. ¹² Ña tahan chí sacuví yo tari cuhva sacuví ra Caín. Cuví ra noo ra cuenda ra ña vaha. Ta chahñí ra chí yañi ra. ¿Ñáa tuhun chahñí ra chí ra? Cha cuenda vatyí vaha cuhva sacuví yañi ra, ta maa ra Caín chinyacuví ra cha ña vaha.

¹³ Yañi yo, ma iyo cuñí ndo tatu ña cuñí nyehe ñáyiví chí ndo. ¹⁴ Yoó chitó yo vatyí tari minoo ra chihí ta nandoto cuví yo vatyí iyó yo noo ñayiví chaa vatyí cuñí yo chí tahan yo. Ñu cha ña cuñí chí tahan, tari quivi ni cuví ca ñu tari noo ra chihí, ta ta nandoto ca ñu. ¹⁵ Yóo ñu cha xaan iñi chí tahan, tari noo ñu chahñí ñáyiví cuví ñu. Ta chitó ndo vatyí ni noo ñu chahñí, ma cuhva Nyoo ñayiví chaa cha ma naa ca maa coo añima ñu. ¹⁶ Nichón nuu yo ñáa cha cuví cha cuñí yo chí tahan yo vatyí ra Jesucristo sañaha ra chí yo. Vatyí maa ra cuñí ra chí yo, ta chaha ra ñayiví ra cha catyí yo. Ta tyicuan caa tucu maa yo, cuñí yo chí tahan yo ta cuhva yo ñayiví yo cha cuenda ñu. ¹⁷ Ta tatu yihí yo iyó chiin chí yo siqui ñuhu ñayiví ihya, ta nyehé yo cumañí cha cumañí chí tahan yo, ta sahá ri yo cha

ña nyehé yo, ¿atu cuñí yo chi Nyoo cha sacuví yo cha tyicuan caa? Ña cuñí yo chi ra cuví chi cuan. ¹⁸ Ra cuatyaa sehi, ñima chihin tuhun yuhuri yo, cuñi yo chi tahan yo, soco na cuñi yo chi ñu chihin cha sacuví yo tumañi iñi, ta chihin cha ñi iñi yo.

Yoso caa sacuvi yo ta coo vaha yo chihin Nyoo

¹⁹ Tatu sacuví yo tyicuan caa, chitó yo tyi yihí yo tuhun ndicha. Ta vaha iyó yo chihin Nyoo. ²⁰ Tatu chichi añima yo ta tuví iñi yo tyi iyó cuatyí yo, vihi ca cuví Nyoo, chitó ra cha caá añima yo. ²¹ Yañi, tatu tuví iñi yo tyi ñahri cuatyí yo, ma yuhvi cuñi yo nyehe yo chi Nyoo. ²² Ta ñáá ri cha cacan tahvi yo cuacuhva ra chi yo, vatyí quichahá yo tuhun cahán ra, ta sacuví yo cuhva tahán iñi ra. ²³ Ta ican ihya cuví tuhun chahá ra chi yo: Cha chino iñi yo vatyí ra Jesucristo cuví Sehe ra. Ta cha cuñi yo chi noo noo tahan yo vatyí tyicuan caa tuhun cha chahá ra chi yo. ²⁴ Ta ñu cha quichahá tuhun chahá ra chi yo, iyó ñu cha ñn ri cuví ñu chihin ra, ta maa ra iyó ra chichi añima ñu. Ta cha cuenda Tatyí Ii ra cha chahá ra chi yo, chitó yo vatyí nyaá ra chihin yo.

4

Tatyí Ii Nyoo ta tatyí ña vaha

¹ Cuñí xain chi ndo, yañi. Ma chino iñi ndo tandihi ñáyiví cha catyí tyi cuenda

Nyoo cahán ñu. Nyehe xihna ndo tatu nacachí tahan cha cahán ñu chihin tuhun Nyoo. Vatyí cuaha xaan ra cha catyí vatyí Nyoo sañahá chi ra. Soco ña ndicha. ² Soco tyehe caa cuví nicohon nuu ndo tatu Tatyí Ii Nyoo sacahán chi ra o ñima. Tandihí ra cha catyí vatyí quichí ra Jesucristo nya gloria ta cacu ra chihin coño ñuhu ñáyiví ihya, ican ra cuan, sacahán Tatyí Ii Nyoo chi ra. ³ Soco ndií cuíi maa ñáyiví cha catyí vatyí ra Cristo ña chica noo ra chihin coño ñuhu ñáyiví ihya, ñima Nyoo sacahán chi ñu cuan, soco tatyí ña vaha, cha xaan iñi chi ra Cristo, ican sacahán chi ñu. Cha chiñi ndo vatyí nyaá quichi cuan. Ta vityin cha chicá noo chi siqui ñuhu ñáyiví.

⁴ Ra cuatyaa sehi, ñáyiví chi Nyoo cuví ndo. Ta cuví chasaha ndo chi ra xaan iñi chi ra Cristo. Vatyí cahnu ca ra Cristo, ra nyaá añima ndo ta ñima ca ra ña vaha, ra cha chicá noo siqui ñuhu ñáyiví ihya. ⁵ Maa ñu cuan, ñu cuenda ñáyiví ri ihya cuví ñu. Yucuan chaha cahán ñu tuhun ñáyiví ihya. Ta ñu cuenda ñáyiví ihya tyasohó ñu tuhun cahán ñu. ⁶ Soco yoó cuví yo ñu cuenda Nyoo. Ta ñu cuenda Nyoo tyasohó ñu tuhun cahán yo, soco ñu yihí tatyí ña vaha añima, ña cuñí ñu tyasoho ñu. Ta tyicuan caa cuví nicohon nuu yo chi ñu yihí Tatyí Ii Nyoo ta ñu yihí tatyí ña vaha.

Nyoo cuñí xaan ra chi

tandihí ñáyivi

⁷ Yañi yo, na cuñi yo chi tahan yo, vatyí Nyoo sañahá ra chi yo yoso caa cha tahán chi cuñi yo chi ñu. Tandihí yo cha cuñi yo chi tahan yo sehe Nyoo cuví chi yo, ta ñohó nuu yo chi Nyoo. ⁸ Soco ñu cha ña cuñi chi tahan, ta cohon nuu ca ñu chi Nyoo, vatyí Nyoo cuñi xaan ra chi yo ta chi tandihí ñáyivi. ⁹ Ta sañahá Nyoo vatyí cuñi ra chi yo chihin cha chahá ra noo Sehe mañi ra tyi quichí ra siqui ñuhu ñáyivi ihya, vatyí cuhva ra noo ñáyivi chaa coo yo. ¹⁰ Nyehe xihna, yoso cha cuñi Nyoo chi yo. Ñima vatyí xihna ca yo cuñi yo chi ra, soco xihna ca maa ra cuñi ra chi yo. Ta tachí ra chi Sehe ra vatyí tacuhva cúvi ra tyiño nuu yo ta cahnya ra cuatyí yo.

¹¹ Nyoho yañi, tatu cuñi Nyoo chi yo cha tyicuan caa, tahán tucu chi cuñi maa yo chi tahan yo. ¹² Vasi ni nonga ñáyivi, ta nyehe ca ñu chi Nyoo, soco tatu cuñi yo chi noo noo tahan yo, Nyoo nyaá ra añima yo. Ta tyicuan caa ñi vaha iñi yo cuñi yo chi ra. ¹³ Ta chitó yo vatyí nyaá yo chichi ndaha ra, ta maa ra nyaá añima yo vatyí chahá ra Tatyí Ii ra cunyaa añima yo. ¹⁴ Ta nyuhu nyehe vaha ndi ta cuví ndi cha ndaa vatyí Sutu yo Nyoo saquichí ra chi Sehe ra tacuhva vatyí sacacu ra chi yo cha cuví yo ñáyivi iyó siqui ñuhu ñáyivi. ¹⁵ Tandihí ñu nachinó iñi chihin cha ñi iñi ñu ta catyí ñu vatyí ra Jesús

cuví ra Sehe Nyoo, Nyoo nyaá ra chichi añima ñu. Ta maa ñu nyaá ñu chichi ndaha ra.

¹⁶ Ta yoó cha nacoto yo ta nachino iñi yo tyi Nyoo cuñi ra chi yo, ta chi tandihí ñáyivi. Ta ñu cha cuñi chi tahan, chichi ndaha Nyoo nyaá ñu. Ta Nyoo nyaá ra chichi añima ñu. ¹⁷ Vatyí tatu cuñi yo chi Nyoo chihin cha ñi iñi yo ma yuhvi cuñi yo nyehe yo chi ra, nachaa chi quivi cutuñi chi tandihí ñáyivi nuu ra. Vatyí tari cuhva iyó maa ra Jesucristo, tyicuan caa iyó yo siqui ñuhu ñáyivi ihya. ¹⁸ Nyoo cuñi ra chi yo, ta tatu cuñi yo chi ra, ñahri maa cha yuhví yo. Tatu ñi iñi yo cuñi yo chi Nyoo ña nuña ca nu quihí tuhun yuhví añima yo, vatyí Nyoo tava ñehe ra tandihí maa cuan. Vatyí tatu yihí cha yuhvi cuñi yo, yihí cha cuenda vatyí iyó cuatyí yo. Ta yuhví yo cha cutachí tuñi Nyoo chi yo. Vatyí tatu yuhvi cuñi yo, yuhví yo vatyí ña cuñi vaha yo chi Nyoo.

¹⁹ Yoó cuñi yo chi Nyoo vatyí xihna ca maa ra cuñi ra chi yo. ²⁰ Tatu yoó cha catyí: “Yuhu cuñi chi Nyoo”, catyí ñu, soco ña cuñi nyehe ñu chi tahan ñu, noo ñu cuendu cuví ñu. Vatyí tatu ña cuñi nyehe ñu chi tahan ñu cha nyehé ñu, ¿atu cuví cuñi ñu chi Nyoo cha ña nyehé ñu? Ma cuví. ²¹ Ta Nyoo chahá ra tuhun ihya chi yo: Ñu cha cuñi chi Nyoo, tahán chi cha cuñi tucu ñu chi noo noo tahan ñu ñandihí.

5

Cha n̄i iñi yo chinó iñi yo chi Nyoo sahá ganaa yo chi cha ña vaha

¹ Tandih̄i ñu chinó iñi tyi ra Jesús cuv̄i Cristo cha saquich̄i Nyoo, sehe Nyoo cuv̄i chi ñu; ta tatu cuñi yo chi noo sutu, cuñi tucu yo chi tandih̄i sehe ra. ² Tatu cuñi yo chi Nyoo ta sacuv̄i yo cha catȳi ra, chitó yo vatȳi cuñi tucu yo chi ñu sehe Nyoo. ³ Vatȳi cha cuñi yo chi Nyoo ican cuv̄i cha quichahá yo tuhun chah̄a ra chi yo. Ta tandih̄i tuhun cha chah̄a ra chi yo ña ȳi sacuvi yo. ⁴ Vatȳi tandih̄i yo cha cuv̄i yo sehe Nyoo, cuv̄i chasaha yo chi cha ña vaha cha iyó ñayiv̄i ihya chihin cha chinó iñi yo chi Nyoo. ⁵ Ñu cha chinó iñi vatȳi ra Jesús cuv̄i Sehe Nyoo, ican ñu cuan cuv̄i chasaha chi cha ña vaha cha iyó ñayiv̄i ihya.

Tatȳi Ii Nyoo cuv̄i chanda cuenda ra Jesús ra cuv̄i Sehe Nyoo

⁶ Ra Jesucristo quich̄i ra siqui ñuhu ñayiv̄i ihya. Ta chitó yo tyi ndicha cha Sehe Nyoo cuv̄i chi ra nu condutȳa ra, ta nu chat̄i niñi ra ñandih̄i. Ñima noo ri nu condutȳa ra. Soco nu chat̄i niñi ra ñandih̄i. Ta Tatȳi Ii Nyoo cuv̄i cha ndaa tyi tyicuan caa cuv̄i. Ta maa ri cha ndicha cahán Tatȳi Ii Nyoo. ⁷ Iyó uñi tahan testigu cha nyaá andiv̄i: Sutu yo Nyoo ta ra Cristo ra cuv̄i Tuhun Cahán Nyoo, ta Tatȳi Ii Nyoo. Ta nduñi tahan ihya cuv̄i noo ri, ta ñn ri cuhva

cahán nduñi tahan. ⁸ Ta iyó uñi tahan testigu siqui ñuhu ñayiv̄i ihya: Tatȳi Ii Nyoo cha nyaá añima yo catȳi vatȳi ican ra Jesús cuv̄i Sehe Nyoo. Yucuan cuv̄i noo. Ta nu condutȳa ra Jesús, Nyoo catȳi ra vatȳi ican ra cuv̄i Sehe ra. Yucuan cuv̄i cha cu uvi. Ta nu chat̄i niñi ra Jesús, yucuan cuv̄i cha cu uñi cha sañahá chi vatȳi ra Jesucristo cuv̄i ra Sehe Nyoo. Ta tyicuan caa nduñi tahan cuan ñn ri cuhva cahán. ⁹ Yoó tuhvá yo naquehen yo tuhun cahán ra cuv̄i testigu siqui ñuhu ñayiv̄i ihya. Soco Nyoo cahnu ca cuv̄i ra ta ñima ca ra ñuhu ñayiv̄i ihya. Ta ican ra catȳi ra vatȳi ra Jesús cuv̄i Sehe ra. ¹⁰ Ñu cha chinó iñi tyi Sehe Nyoo cuv̄i chi ra Jesús, chitó ñu chichi añima ñu tyi ndicha. Ñu cha ña chinó iñi chi ra, tari quiv̄i cha sahá ñu tuhun tyi Nyoo ra cuendu cuv̄i ra, vatȳi ña cuñi ñu chino iñi ñu cha cahán Nyoo tumañi iñi cuenda Sehe ra, ra Jesús. ¹¹ Ta ican ihya cuv̄i tuhun cahán Nyoo chihin yo: Catȳi ra tyi chah̄a ra noo ñayiv̄i chaa coo yo tatu chinó iñi yo vatȳi ra Jesucristo cuv̄i Sehe ra. ¹² Ñu cha nyaá Sehe Nyoo añima, iyó ñu ñayiv̄i chaa ihya. Ta ñu cha yori Sehe Nyoo nyaá añima, ñahri ñayiv̄i chaa cuan iyó ñu.

Nu ndih̄i cahan ra Juan ta chahá ra tuhun chi ñu

¹³ Sacuhín tuhun ihya chi nyoho cha chinó iñi chi ra Jesús Sehe Nyoo, tacuhva

coto ndo tyi cha iyó ndo ñayivi
 chaa cha ma naa ca maa.

¹⁴ Cunyeé xaan iñi yo chi
 Nyoo vatyí chitó yo vatyí tatu
 chicán yo cha chicán yo chi
 ra ta cuhva cuñi ra cuví, maa
 ra chiñi ra tuhun cahán yo.
¹⁵ Ta tatu chitó yo tyi chiñi ra
 tuhun cahán yo, chitó tucu yo
 tyi cha ñihí yo cha chicán yo
 chi ra.

¹⁶ Tatu nyehé yo noo ñu
 tahan yo sacuví ñu noo cu-
 atyi, soco noo cuatyí cha ña
 sacunaá chi chi ñu nuu Nyoo,
 cuví cacán tahvi yo chi ra
 cha cuenda ñu. Ta cusaha ra
 ticahnu iñi cuatyí ñu tacuhva
 coo ca ñu nuu ra. Soco iyó noo
 cuatyí cha sativí chi ñáyivi
 nuu Nyoo. Ña tahán chi cacán
 tahvi yo cha cuenda ñu cha
 sacuvi cuatyí cuan. ¹⁷ Tandihí
 cha ña vaha cha sacuví ñáyivi,
 cuatyí cuví. Soco iyó cuatyí
 cha ña sativí ndihí chi chi yo
 nuu Nyoo.

¹⁸ Chitó yo vatyí ñu cha
 nacacu chaa saha Nyoo, ña
 sañihí ñu sacuvi ñu cuatyí.
 Vatyí Sehe Nyoo sahá cuenda
 chi ñu ta ña chahá ra cha tñn
 ra ña vaha chi ñu.

¹⁹ Ta yoó chitó yo tyi
 cuenda Nyoo yihí yo. Tandihí
 ca ñáyivi, cuenda ra ña vaha
 yihí ñu, vatyí nyacá ñaha ra
 chi ñu.

²⁰ Chitó tucu yo vatyí cha
 quichí Sehe Nyoo. Ta chaha
 ra cha chiñi tuñi vatyí cohon
 nuu yo chi Nyoo, ra ndicha
 vaha. Ta nyaá yo chichí
 ndaha ra cuví cha ndicha, ra
 cuví Sehe Nyoo, ra Jesucristo.
 Ican ra cuví Nyoo cha ndicha,

ican ra cuví ñayivi chaa cha
 ma naa ca maa. ²¹ Nyoho
 ra cuatyaa sehi, saha ndo
 cuenda chi ndo chihin cha
 sacahnú ñáyivi, ta ni ñima
 Nyoo cuví.

Ta na cuvi chi tyicuan caa.

Carta Cha Cu Uvi Cha Tyaa Ra Apóstol Juan

*Nu catyí ra Juan vatyí cuñí
xaan ra chi ñu yihí cuenda
Nyoo*

¹ Nyoo nacachí ra chuun, yoho Hermana. Ta yuhu cha cuví ra chahnu vehe ñuhu, sacuhín tutu ihya chuun ta chi tandihí sehun. Ta cuñí xain chi ndo chihin cha ñi ñi. Ta ñima yuhu ri cuñí chi ndo soco tandihí ca ñu cha nacotó cha ndicha ñandihí. ² Cuñí chi ndo cha cuenda cha ndicha cha ñohó chichi añima yo. Ta tyicuan ri maa cunyaa cha ndicha cuan chihin yo. ³ Sutu yo Nyoo ta Sutu Mañi yo Jesucristo Sehe Nyoo na nasoco ra chi ndo ta na nyehe ndahvi ra chi ndo. Ta na coo cha taxi ri añima ndo, chihin cha ndicha, vatyí cuñí xaan ra chi ndo.

⁴ Si xaan cuñí cha chité tuhun suhva sehun ta nyehí vatyí iyó ñu tari cuhva catyí cha ndicha, tari cuhva catyí Sutu yo Nyoo tyi sacuvi yo.

⁵ Ta vityin, Hermana, chacú ndahvi nuun, na cuñi yo chi noo noo tahan yo. Ican ihya cuví cha tyái nu tutu ihya. Ta ñima noo tuhun chaa cha chahá Nyoo chi yo cha vityin ri cuví cha cuñí yo chi noo noo tahan yo. Soco ican ihya cuví tuhun cha catyí Nyoo chi yo nyata quivi xihna ri.

⁶ Ta cha cuñí yo chi ra, ican cuví cha sacuvi yo tandihí cha

catyí ra chi yo. Ican ihya cuví cha catyí Nyoo tyi sacuvi yo. Ta nyoho, chiñi ndo tuhun ihya nya quivi xihna ri. Na coo ndo chihin cha cuñí ndo chi Nyoo ta chi ñáyivi.

*Nu catyí ra Juan vatyí saha
cuenda yo chi yo chihin ñu
chicá noo sandavi ñaha*

⁷ Catyí chuun tyehe caa vatyí cuaha xaan ra casandaví ñaha cachicá noo ra nicahnu siqui ñuhu ñayivi. Cacatyí ra vatyí ña ndicha cha quichi cacu ra Jesucristo chihin coño ñuhu ñayivi ihya. Ra cacatyí tyicuan caa, sandaví ñaha ra chi ñáyivi. Ta cuví ra noo ra xaan ñi chi ra Cristo. ⁸ Yucuan chaha, saha ndo cuenda chi ndo chihin tuhun cha sañahá ra coto sacunaa ndo cha vaha cha sacuvi ndo, ta coto ma ñihi ca ndo tandihí cha cuacuhva Nyoo chi ndo.

⁹ Yóo ñu cha ña ndoó vaha chihin cha sañahá ra Cristo chi yo ta sañahá ñu inga tuhun, yori Nyoo nyaá chihin ñu cuan. Soco ñu ndoó vaha ta quichahá tuhun cha sañahá ra Cristo, nyaá Sutu yo Nyoo ta ra Jesucristo Sehe ra chihin ñu cuan. ¹⁰ Tatu chaa noo ra vehe ndo, cua nyehe ra nu nyicú ndo ta cuñí ra sañaha ra tuhun cha ña sañahá ra Jesucristo, ma cuhva ndo vehe ndo cunyaa ra, ni ma tyinyee ndo chi ra. ¹¹ Vatyí tari quivi cha ñin ri cha ña vaha sacuvi yo chihin ra tatu naquehén cuenda vaha yo chi ra cuan.

Nu ndihí cahan ra Juan

¹² Cuaha xaan ca tuhun tyai' cuhva sacote chi ndo, soco ña cuñi' sacote chi ndo chihin tutu. Soco nyati' cuhin nu nyicu' ndo. Tyicuan ta ndatuhun vaha maa yo, tacuhva cusii' ca cuñi yo.

¹³ Ihya vachi nocumi chuun saha' sehe cuhun. Nacachi' tucu Nyoo chi maa ña ñandihí.

Carta Cha Cu Uñi Tyaa Ra Apóstol Juan

Nu catyí ra Juan vatyí ra Gayo vaha cuahan ra chihin Nyoo

¹ Yuhu cha cuví ra chahnu vehe ñuhu, sacuhín carta ihya chi yoho, Gayo, vatyí yoho cuvún noo ra tahn cha cuñí xain chihin cha ñi ñi.

² Yañi, chicán tahvi chi Nyoo cha cuendon vatyí na coo vahun. Ta tari cuhva cuahan vahun chihin Nyoo, ta tyicuan caa tucu, na nasoco Nyoo chuun tacuhva cha ma tin cuehe chuun. ³ Vatyí cusí xaan cuñí quivi quichí coyo suhva ra yañi yo. Ta canacatyí ra vatyí cha ndicha vaha iyón cuhva cha sañahá ra Cristo. Ta ican cuví cha ndicha vaha. ⁴ Ñahri ca cha sí cuñí tari cha chité vatyí sehi sacuví vaha ñu cuhva catyí tuhun ndicha.

⁵ Cuñí xain chuun, yañi. Vaha xaan sacuvún, vatyí tyiñuhún chi ra yañi yo, ta cha vaha xaan ca cha sacuvún vatyí tyiñuhún chi ra yañi yo inga ñuu cha chaa vehun.

⁶ Chihin nuu tandihi ñu vehe ñuhu canacatyí ra vatyí cuñí xaan chi ra. Ta saha tumañi ñi, yoho Gayo, tyinyee con chihin cha chiñuhú chi ra yañi yo vatyí sañihi ca ra cuhun coyo ra nu cuahan ra. Vatyí tyicuan caa tahn ñi Nyoo cha sacuví yo. ⁷ Vatyí tyiño nuu Jesucristo cachicá noo ra. Ta ña cacuñí ra cha

tyinyee ñáyivi cha ña ñohó nuu Nyoo chi ra. ⁸ Yucuan chaha vatyí maa yo tahn chi nyehe yo ñáá ndihi cha chiñuhú chi ra. Ta tyicuan caa ta cutahan yo chihin ra nu cahán ra tuhun ndicha.

Nu catyí ra Juan vatyí ra Diótrefes, ña vaha sacuví ra

⁹ Yuhu sacuhín noo carta chi ñu nyicú vehe ñuhu, soco ra Diótrefes sacuví ri maa ra nuu chi ra, ta ña tyasohó ra tuhun cahín. ¹⁰ Yucuan chaha tatu cuhin chiña, cusandai tyiño chihin ra cha cuenda tuhun cahán ra, vatyí cahán ña vaha ra siqui yo. Ta siin ri tatu yóó hermano chaa, ña naquehén cuenda ra chi ra. Ta tatu ñu nyicú vehe ñuhu naquehén cuenda ñu chi ra, chasí ri ra, ta tavá ñehe ra chi ñu vehe ñuhu.

¹¹ Cuñí xain chuun, yoho yañi. Ma sacuvun cuhva ña vaha tari cha sacuví ra, soco sacuvun cha vaha. Vatyí ra sacuví cha vaha, ra cuenda Nyoo cuví ra, soco ra sacuví cha ña vaha, ña ñohó nuu ra chi Nyoo.

Nu catyí ra Juan vatyí vaha xaan cuhva chinó ñi ra Demetrio

¹² Tandihi ñu ta vaha cahán ñu siqui ra Demetrio. Ta vaha xaan quichahá ra tuhun Nyoo, ta suri ican cuan sañahá chi tyi ra vaha cuví ra. Ta siin ri nyuhu tucu cuví ndi cha ndaa cha cuenda ra, ta nyoho chitó ndo vatyí tuhun ndicha cahán ndi.

Nu ndihi cahan ra Juan

¹³ Cuaha xaan tuhun tyai
cuhva sacote chuun, soco
ña cuñí sacote chuun chihin
tutu. ¹⁴ Soco nyatí cuhin nu
nyaún cha numi ri, tyicuan
ta ndatuhun vaha ca maa yo.
¹⁵ Na coo cha taxi ri añimon.
Ra tahan yo cha iyó ityi tyehe
saquichí xaan ra nocumi
chuun. Ta sahun tumañi iñi
cuhvon nocumi chi noo noo
ra tahan yo cha iyó ityi chiña.

Carta Cha Sacuhun Ra Apóstol Judas Chi Ñáyivi Yihí Cuenda Nyoo

Nu tyaq ra Judas noo tutu chi ñu nacana Nyoo chi

¹ Yuhu ra Judas cuví noo ra sacuví tyiño nuu ra Jesucristo. Ta yañi ra Jacobo cuví chii. Tyaí noo carta ihya chi ndo cha cuví ndo ñáyivi cha nacana Nyoo Sutu yo. Ta naquehén vaha ra chi ndo vatyí cuví ndo ñáyivi cuenda ra. Ta vityin cumí vaha ra chi ndo cha cuenda cha ñin ri cuví ndo chihin ra Jesucristo. ² Nyoo na nyehe ndahvi ra chi ndo. Ta na cutuñi ca ñi ndo yoso caa cha cuñi ra chi yo. Ta na coo cuaha ca cha taxi ri cuñi añima ndo, saha ra.

Nu cahan ra Judas siqui ñáyivi cha sañahá cha ña ndicha
(2 Pedro 2.1-17)

³ Cha naha xaan yihí ñi tyai noo carta chi nyoho yañi, vatyí cuñi cahin chiin siqui yoso caa sacacu Nyoo añima yo. Soco vityin cuñi chi cha tyai tutu ihya chi ndo vatyí saniñi chi ndo cunñi ñi ndo chihin tandihí fuerza ndo ta cuhun ndo ityi nuu ca chihin cha chinó ñi ndo tuhun vaha cha chaha Nyoo chi yo. Vatyí noo ri chaha chaha ra ta ñin caña ri chaha ra tandihí cha tahán chi chi yo vatyí chinó ñi yo cha cuví yo ñu

yihí cuenda ra. ⁴ Vatyí yihí ra quihví xehe ra nu nyicu ndo. Ta cuñi ra sandavi ñaha ra chi ndo. Catyí ra vatyí cha yaha saha Nyoo ticahnu ñi chi yo ta yucuan chaha cuví sacuvi yo yoso cuhva quichi cuví ñi coño ñuhu yo. Soco ra canyacuví tyicuan caa, cuví ra noo ra cucunaa. Vatyí tyicuan caa catyí Nyoo nya tyembu chahnu, vatyí canyacuví ra cha quiñi caa cha ña tahán chi sacuvi ra. Vatyí ña caquichahá ra chi Nyoo ta ña chinó ñi ra cha Nyoo cuví noo ra cahnu ca, ra nyacá ñaha chi yo. Ta ñi ri ra Jesucristo Sutu Mañi yo, ña cahnu xaan cuví ra, cacatyí ra.

⁵ Vasi cha chitó ndo cha sacuvi Nyoo ta cha naha, soco cuñi sanicohín ñi ndo vatyí Sutu yo Nyoo tava ra chi sutu chahnu yo ñu Israel ñuu Egipto, sacacu ra chi ñu ndaha ñáyivi ñuu Egipto cuan. Soco yaha cuan sanaa ra tandihí maa ñu cha ña chinó ñi chi ra. ⁶ Ta tyicuan caa tucu ángel. Ii ra. Ñahri cuatyí ra. Soco suhva ra caquita ra nu cuatyaq Nyoo chi ra cha cuenda cha ña quichahá ra chi ra. Yucuan chaha Nyoo cumí ra chi ángel cuan, nuhñi ra chihin cadena nu ñaa ñi. Nyatú ra cha sacutuñi Nyoo chi ra na chaa chi quivi cahnu. ⁷ Tyicuan caa tucu ñáyivi ñuu Sodoma ta ñuu Gomorra, ta ñu ñuu cuatyaq cha chiyo nicachico ñuu cuan. Sanaa Nyoo chi ñu cha cuenda cha quiñi caa cha chinyacuví ñu. Ca chiyó

ri maa ra chihin ñusihí. Ta ñusihí ca chiyó ri maa ñu chihin noo ra ta chihin inga ra. Ta cuaha ca cha quiñi caa chinyacuví ñu vatyí rayi ca chiyó ra chihin tahan yí ra ñandihí. Soco cha cuenda cuan, nyehe ñu tindoho nu cayu ñu, quiví chahmí Nyoo ñuu ñu. Ta yucuan sañahá chi chi yo vatyí ñu sacuví cha quiñi caa, cucayu ñu chihin ñuhu cha ma ndahva ca maa.

8 Ta tyicuan caa tucu ra cacuñí sativí chi ndo. Vasi cha chitó vaha ra cha sacuví Nyoo ta ityi chata ca, soco maa ra chicá iñi ra vatyí tyaqui xaan cuacoo ra nu cuahan ca chi chihin cha nyacuví ra tyicuan caa. Soco ndahvi ra vatyí tari quiví cha tahan ra noo ñumahna tyaqui cuví cuan. Sativí ra coño ñuhu ra ta ña cuñí ra cha cunyaca ñaha Sutu Mañi yo chi ra. Ta cahán ña vaha ra siqui ra nahnu ca cha nuu maa ra, cuví ri siqui ángel, cuví ri siqui tatyí ña vaha, cuví ri siqui Nyoo. 9 Soco ángel Miguel cha cuví ra noo ra cahnu nuu Nyoo, ta ña caña iñi ra sacuví ra tyicuan caa. Vatyí quiví cañi tahan ra chihin ra ña vaha cha cuenda coño ñuhu ra Moisés, ña caña iñi ra cahán ña vaha ra siqui ra ña vaha. Noo ri cha catyí ra chi ra: “Maa Sutu Mañi yo na tachi tuñi ra chuun cuenda cha ña vaha cha nyacuvún”, catyí ángel Miguel cuan chi ra. 10 Soco ra cha sayangá chi ndo cuan, cahán cuehe ra vatyí ña chitó ra. Ta sacuví ra tari sacuví quití. Vatyí quití

ña cutuñí iñi ti. Nyacuví ri maa ti cha cuñí coño ñuhu ti. Ta tyicuan caa tucu ra cuan. Chihin cha quiñi caa nyacuví ra, sativí ra chi ra.

11 ¡Ndahvi ra ndahvi cuan! Vatyí quehen ra cha caa ra Caín. Ta cha cuenda cha cuñí ra saha ganaa ra xuhun, quitá caxiin ra tari quitá caxiin ra Balaam. Ta cucunaa ra tari cuanaa ra Coré, vatyí chihí ra cuan cha cuenda cha nacahnú ra nu cahán ra cuví nuu chi ra. 12 Ra cha sayangá chi ndo chahá ra tìcahan nuu chi ndo nu ndu iin ri ndo. Vatyí chachí ra ta chihí ra, chihin cha siñi cuñí ra. Ta ña cahán nuu ra cha ña sahá ra ñáyiví chi Nyoo. Ta noo ri maa ra sacuvahá ra chi ra. Cuví ra tari noo vico cha tyandahá tatyí chi, ta cuñí maa yo tyi cua coon savi, ta ña coón ra. Cuví ra tari noo yutun cha ña chaha chiti. Vatyí noo yutun cha ña chahá chiti cuví tun tari noo yutun chihí vasi nyitó tun. Ta siñ maa cha cucuvi vaha tun vatyí cucahnya ñáyiví chi tun. Tari cha uvi chaha chihí tun cuví cuan. Ta tyicuan caa maa ra, tari cha uvi chaha chihí ra vatyí chitó ra tuhun vaha ta ña cuñí ra sacuvi. 13 Tari ndutya yuhu tyañuhu tatu cha nduxaan chi, iyo xaan nicuinanyaa chi. Soco iin yaha ri tyicuan ta ndoo maa ri maa tiñi ta mihin nu niyiti cuan. Tyicuan caa maa ra, sandoó ra cha quiñi caa añima ñáyiví. Ta cuví ra tari tiñoo andiví cha cuanaa. Soco cha nyaá maa cha cundoo ra nu ñaa iñi cahnu tyicuan ri

maa.

¹⁴ Tuhun maa ra cuan cahan ra Enoc ta cha naha. Ra Enoc tata cu ucha ra Adán cuví ra. Ta cahan ra tuhun cha chaha maa Nyoo chi ra, ta catyí ra: “Nyehi chi Sutu Mañi yo cha vachi ra chihin cuaha mil ángel cuenda ra ¹⁵ vatyí nyehe ra cha sacuvi tandihi ñayivi. Ta tachi tuñi ra chi tandihi ñu quiñi iyó cha cuenda tandihi cha ña vaha cha chinyacuví ñu, ta cha cuenda tuhun quiñi caa cha cacahan ñu siqui ra”, catyí ra Enoc ta cha naha. ¹⁶ Ra cha sayangá chi ndo, ña ndoó ra vaha chihin cha chahá Nyoo chi ra. Cahán ra chi Nyoo ta chi ñayivi ta iyó ra tari cuhva quichi cuví iñi coño ñuhu ra. Cahán ra chihin cha cahnu sahá ra chi ra. Tatu cahan vaha ra chihin noo ñayivi soco cha cuenda cha cuñi ra cuvaha ra nuu ñu.

Nu chahá ra Judas tuhun chi ñu yihí cuenda Nyoo

¹⁷ Soco nyoho yañi, ma quichaha ndo chi ra cuan. Soco nichon iñi ndo tuhun cha cahan ra apóstol cuenda Sutu Mañi yo Jesucristo. ¹⁸ Cacatyí ra chi ndo vatyí nu cuasandihí ca chi quivi ta cuacoo ra cucuacu nyaa tuhun Nyoo. Ta coo ra yoso cuhva quichi cuví iñi maa ra chihin cha quiñi caa ra. ¹⁹ Ta ican ra ihya cacuví ra cuñi sacusin chi yo. Vatyí quichahá ra cuhva cuñi coño ñuhu ra ta ñahri Tatyí Ii Nyoo nyaá chihin ra.

²⁰ Soco nyoho yañi, cunii ca iñi ndo chihin cha chinó

iñi ndo chi ra Cristo. Ta cacan tahvi ndo chi ra chihin tunyee iñi Tatyí Ii maa ra. ²¹ Ta tyicuan ri ñiñi cunyañaa ndo chi Nyoo, ta coto ndo vatyí cuñi xaan ra chi ndo. Ta cuatu tuhva ndo quivi chaa yo nu coo yo ñayivi chaa cha ma naa ca maa. Vatyí ican cuví cha cuacuhva Sutu Mañi yo Jesucristo chi yo cha cuenda cha ndahvi cuñi ra nyehé ra chi yo.

²² Ta ndahvi cuñi nyehe ndo chi ñu cha ña ñi vaha iñi. ²³ Ta inga ñu, tyinyee ndo chi ñu tacuhva cacu ñu. Tari quivi cha tava ndo chi ñu nu cayú ñuhu. Ta chi inga ñu cundahvi cuñi ndo nyehe ndo chi ñu, soco saha ndo cuenda chi ndo chihin cha quiñi caa cha sacuví ñu, coto sacuvi ndo tari sacuví ñu. Nyacua nya sahama ñihnó ñu ta ña vaha cha cuenda cha sacuví ñu cha quiñi caa.

Nu ndihí cahan ra Judas ta sacahnu ra chi Nyoo

²⁴⁻²⁵ Noo ri Nyoo iyó, ta chiñi tuñi xaan ra. Ta ican ra cuví ra cha sacacú chi yo. Ta iyó xaan tunyee iñi chi ra cha sahá cuenda ra chi yo ta sanduvií ra chi yo cha ñahri cuatyí yo coo quivi cunyaca ra chi yo nu nyaá ra chihin cha cahnu cuví ra. Ta si xaan cucuvi chi yo.

Na coto yo ñana cha cahnu xaan ca cuví ra. Chi maa ra na sacahnu yo vatyí cahnu xaan ca maa ra. Ta iyó xaan ca tunyee iñi chi ra. Noo tuhun ri maa ra nyacá ñaha tandihí. Nyacá ñaha ra ta ityí chata ca, vityin. Ta tyicuan ri

maa cunyaca ñaha ra. Ta na
cuvi chi tyicuan caa.

Cha Sañaha Ra Jesucristo Chi Ra Apóstol Juan

Cha nyehe ra Juan

¹ Ican ihya cuví noo cha catyí Nyoo chi ra Jesucristo vatyí na sacoto ra chí ra casacuví tyiño nuu ra. Sañaha ra ñáá ndihi cha cucuvi cha numí ri. Noo ángel tachí ra Jesucristo vatyí sañaha ra chí yuhu ra Juan. ² Ta cahín cha ndaa ta cha ndicha cuenda tandihi cha nyehí. Ta cuví cha ndaa cuenda tuhun Nyoo ta cuenda tandihi cha sacoto ra Jesucristo.

³ Sii xaan cuñí ñu sacuha tuhun cha nyaá nu tutu tuhun Nyoo ihya. Ta sii xaan cuñí ñu chiñí tuhun cha cahán chí ta quichahá ñu, vatyí tandihi tuhun cha nyaá nuu tutu Nyoo, cha nyaña vatyin quívi cha cunyehe yo.

Nu sacuhun ra Juan tutu chi ndi ucha tahan vehe ñuhu

⁴ Yuhu ra Juan sacuhín tutu ihya chí ndi ucha vehe ñuhu ñuu cha nyicú ityí Asia. Nyoo ta ndi ucha tahan Tatyí lí ra cha nyicú nuu ra nu nyaá ra nyacá ñaha ra nu tyayu chichi gloria, na nasoco ra chí ndo. Ta na coo cha taxi ri añima ndo sahá ra. Nyoo ican ra cuví ra iyó vityin, ta iyó maa ra quívi quichaha tandihi, ta ican ra cuquichi. ⁵ Ta naquehen tucu ndo cha vaha cuan sahá ra Jesucristo ñandihí. Vatyí ican ra cuví ra

cha ndaa vaha ta ra ndicha. Ta cuví tucu ra noo ra cha nandoto cha xihna ri ta tyicuan ri maa cucoo ra. Ta iyó ityí chí ra ta nyacá ñaha ra chí ra cacuví rey cha iyó siquí ñuhu ñayívi ihya. Ican ra cuví ra cha cuñí xaan chí yo. Ta sandachí ra cuatyí yo chihin ñíni ra. ⁶ Ta sacuví ra rey chí yo. Ta sacuví ra tata sutu chí yo tacuhva vatyí sacuvi yo tyiño nuu Nyoo Sutu ra. ¡Na sacahnu yo chí ra. Ta na cunyaca ñaha ra tyicuan ri maa! Ta tyicuan caa na cuví.

⁷ ¡Nyehe ndo! ¡Cha vachi ra Cristo nu vico andívi! Tandihí ñáyívi cunyehe ñu chí ra. Nyacua nya ñu cha sañicuehe chí ra ta cunyehe ñu chí ra. Ta tandihí ñu cucuacu chaa ñu chihin cha yuhví ñu na nanyehe ñu chí ra inga chaha vatyí suri maa ra cuví. Cha ndicha, tyicuan caa cucuvi.

⁸ Catyí Nyoo:

—Yuhu cuví ra xihna cuiri, ta yuhu cuví ra cundoo nu ndihi tuhun —catyí Sutu yo Nyoo, ra iyó tandihí tunyee íni chí. Ican ra cuví ra iyó vityin. Ta iyó maa ra nu quichaha tandihí, ta ican ra cuquichi.

Noo cuhva tyaqui cha sañaha Nyoo chí ra Juan cuenda ra Cristo

⁹ Yuhu ra Juan cuví yañi nyoho. Ta ñin ri nyehé yo tindoho. Ta ñin ri nyacá ñaha Nyoo chí yo. Ta ñin ri cunyee xaan yo ñáá ndihi cha cuví chí yo vatyí tyinyeé ra Jesucristo chí yo. Ñoho yuhu vehe caa noo ñuhú cha

nañi Patmos cha nyaá mahñu tyañuhu. Ñohi vehe caa cha cuenda vatyí cahín tuhun Nyoo cha quichi sañaha ra Jesucristo. ¹⁰ Ta cuví chi noo quivi cha sacahnú yo chi Sutu mañi yo. Ta ñihi xaan chinyaá Tatyí li Nyoo chihin. Ta chiñi noo ndusu ñihi xaan ityi chate, tari noo ndusu cha ñihi xaan tari ndusu trompeta. ¹¹ Ta catyí chi chii tyehe caa:

—Yuhu cuví ra xihna cuiri, ta yuhu cundoí nu ndihi tuhun. Tyaá nuu noo libru tuhun cha nyehun, yoho Juan. Ta sacuhun chi ndi ucha vehe ñuhu cha nyicú ityi Asia. Sacuhun chi ñu nyicú vehe ñuhu ñuu Éfeso, chi ñu vehe ñuhu ñuu Esmirna, chi ñu vehe ñuhu ñuu Pérgamo, ta chi ñu vehe ñuhu ñuu Tiatira, ta chi ñu vehe ñuhu ñuu Sardis, ta chi ñu vehe ñuhu ñuu Filadelfia, ta chi ñu vehe ñuhu ñuu Laodicea —catyí ndusu cuan.

¹² Tyicuan ta nanyocave vatyí cuñi nyehí yóo chi ndusu cha cahán chihin cuan. Ta nanyehi ucha tahan cañileru xuhun cuan. ¹³ Ta mahñu ucha tahan cañileru cuan, nyehi chi noo ra cha caá tari caá noo rayi ñuhu ñayivi ihya. Ñihnó ra noo sahna cañi nya nu chaha ra. Ta yihí ra noo sinchu xuhun cuan, ta nya nu nyaá pachu ra chitahan sinchu cuan. ¹⁴ Ta cuichin ixi xiñi ra, tari ixi mbee cuichin, tari cha cuichin catyí. Ta tari cha cayú ñuhu chiti nuu ra. ¹⁵ Ta xiñó chaha ra

tari xiñó noo caa cha nañi bronce cha tuhva nducuaaha nu cayú ñuhu chichi noo horno. Ta ñihi xaan ndusu ra tari ndusu cha cuaha vavaha yuvi nahnu. ¹⁶ Ta yihí ndaha ra ucha tahan tiñoo andivi chiyo vaha ra. Ta tari caa noo mityi cha xaan ninduvi chiyo yuhu, (tyicuan caa tuhun cahán ra cha quitá yuhu ra). Ta tari caá cha ñihi xaan nyehé ñanyii cha xiñó vavaha, tyicuan caá nuu ra.

¹⁷ Cuhva cha nanyehi chi ra, nduve chaha ra tari maa cha chihí. Soco maa ra tyiso ra ndaha chiyo vaha ra siqui, ta catyí ra chii:

—Ma yuhvun. Yuhu cuví ra xihna cuiri, ta yuhu cundoí nu ndihi tuhun. ¹⁸ Iquen cuví ra cha nyitó. Ta vasi chihí soco vityin cuacoí tyicuan ri maa. Ta iyó ityi chii cha catyí ama tahan chi tuhun chihí chi noo noo ñayivi, ta iyó ityi chii cha catyí tatu cuhun ñu anyaya. ¹⁹ Tyaá nu libru tandihi cha nyehún, cha iyó vityin, ta cha cucoo nu cuahan ca chi. ²⁰ Ican ihya cuví tuhun xehe cuenda ndi ucha tiñoo andivi cha nyehún yihí ndaha chiyo vahi, ta cha cuenda ndi ucha cañileru xuhun cuan cuan: Ndi ucha tiñoo andivi cuan cuñi chi catyí: ra cha cahán tuhun ucha tahan vehe ñuhu cuan. Ta ndi ucha cañileru cuan cuñi chi catyí ndi ucha vehe ñuhu cuan.

2

Tuhun cha sacuhun ra chi ñu nyicú vehe ñuhu ñuu Éfeso

1 'Sacuhun tutu chi ra cahán tuhin chihin ñu nyicú vehe ñuhu cha nyaá ñuu Éfeso. Ta catyun chi ra tyehe caa: "Tyehe caa catyí ra cha yihí ndaha ucha tiño chihin ndaha chiyo vaha ra. Ta chicá noo ra mahñu ndi ucha cañileru xuhun cuaan: 2 Yuhu chité tandihi cha sacuví ndo. Chité vatyí ñihi xaan tyiño sacuví ndo. Ta cunyeé xaan iñi ndo. Ta chité vatyí ña cunyeé iñi ndo nyehé ndo chi ñu quiñi iyó. Ta chité vatyí tuhva ndo nducu nyehe ndo chi ra cha catyí vatyí tyiño Nyoo chica noo ra soco ña ndicha ra. 3 Cunyeé xaan iñi ndo. Ta nyehé xaan ndo tindoho ta cha sahá tyiño xaan ndo cha cuende chihin cha ña ndu uvi iñi ndo. 4 Soco iyó noo cha caá ndo nui. Vatyí ña cuñi vaha ca ndo chii tari quivi xihna ri. 5 Yucuan chaha nicohon iñi ndo nya maa maa cuví nu ña vaha sacuví ndo. Ta nasama ndo cuhva iyó ndo. Ta sacuvi ndo tari cuhva chiyo ndo quivi natiin cuenda ndo notuhun Nyoo. Tatu ma nasama ndo cuhva iyó ndo, numi ri cuhin nu nyaá ndo, ta tinyai cañileru ndo nu nyaá chi. Soco tatu ndu uvi iñi ndo cuatyí ndo, ma tinyai. 6 Soco iyó tucu cha vaha nyacuví ndo. Vatyí ña cuñi nyehe ndo cha quiñi caa cha sacuví ñu yihí cuenda ra Nicolás. Tyicuan tucu yuhu ña cuñi nyehí yucuan. 7 Ta nyoho cha cutuñi iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu.

Catyí ra tyehe caa: Tatu cuví chasaha ndo chi ra ña vaha, cuhve cha cachi ndo chiti yutun cha chahá cha conyito añima ndo. Ta yutun cuan nanyaá tun nya nu iyó Nyoo andivi, ta cuñihi ndo tandihi cha vaha cha iyó yucuan."

Tuhun cha sacuhun ra Jesucristo chi ñayivi nyicú vehe ñuhu ñuu Esmirna

8 'Sacuhun tucu tutu chi ra cahán tuhin chihin ñu nyicú vehe ñuhu cha nyaá ñuu Esmirna, ta catyun chi ra tyehe caa: "Tyehe caa catyí ra cuví cha xihna cuiri, ra cundoo nu ndihi tuhun, ra cha chihita nandoto: 9 Yuhu chité tandihi cha sacuví ndo. Ta chité tindoho cha nyehé xaan ndo. Ta chité cha ndahvi ndo. Soco chihin tuhun Nyoo, tyayii ndo. Ta chité yoso caa ñu cha catyí vatyí ñu Israel cuví ñu, ta cahán ña vaha ñu siqui ndo. Ta ni ñima ñu Israel cuví ñu vatyí noo ityi ñu yihí cuenda ra ña vaha, ra nañi Satanás, cuví ñu. 10 Soco ma yuhvi ndo cha cunyehe ndo tindoho. Vatyí ra ña vaha cutyihi ra vehe caa chi suhva nyoho, vatyí cunducu nyehe ra chi ndo tatu cusaña ndo chi Nyoo. Ta uchi quivi cunyehe ndo tindoho. Soco cunyicon vaha ndo chi Nyoo nyacua nya quivi cúvi ndo. Ta yuhu cuhve ñayivi coo ndo chihin Nyoo. 11 Ta nyoho cha cutuñi iñi ndo tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu. Catyí ra tyehe caa: tatu cuví chasaha ndo chi ra ña vaha, ña tahán

chi cuhun ndo anyaya, nu cuchi tuñi Nyoo chi añima ña vaha.”

Tuhun cha sacuhun ra Jesucristo chi ñu nyicú vehe ñuhu ñuu Pérgamo

12 'Sacuhun tucu tutu chi ra cahán tuhin chihin ñu nyicú vehe ñuhu ñuu Pérgamo. Ta catyun chi ra tyehe caa: “Tyehe caa catyí ra cha nyisó mityi cha xaan ndinduvi chiyo yuhu: 13 Yuhu chité tandihí cha sacuví ndo. Ta chité vatyi iyó ndo nu nyacá ñaha cuihna, ra nañi Satanás. Soco tyicuan ri chinó iñi ndo chii. Ta vasi nu canyicú ndo chiña chahñi ñu chi ra Antipas, ra cha cuví noo cha ndoo cuende, vatyi chiña chicá noo ra cha nañi Satanás cuan. Soco ni ri maa chahñi ñu chi ra, nyoho ña sandihí maa ndo tuhun cha chinó iñi ndo chii. 14 Soco catuví suhva cha caá ndo nui: Vatyi nu nyicú ndo nya Pérgamo chiña, yihí ra cha ña cacuñi ra saña ra cuhva cha sacuví ra Balaam. Ta maa ra Balaam tyiyuhu ra chi ra Balac, na sacachi ra chi ñu Israel nyayu cha chiyo nu sacahnú ñu chi xitohyo. Tyiyuhu ra chi ra nacatyi ra chi ñu vatyi ñahri caa cha coo ñu chihin tahan ñu vasi ñima yñi ñu cuví, o vasi ñima ñasihí ra cuví. 15 Ta suri iyó suhva ñáyivi mahñu ndo cha ña cacuñi ñu saña ñu cuhva sañahá ra cuenda ra Nicolás. Ta yuhu ña cuñi nyehi cuhva sañahá ra cuan. 16 Yucuan chaha numi ri nasama ndo cuhva iyó ndo. Vatyi tatu

ma nasama ndo cuhva iyó ndo, cuquichi siqui ndo cha numi ri ta cucañi tahir chihin ñu cuan chihin cha tari mityi cha quitá yuhi. 17 Ta nyoho cha cutuñi iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu: tatu cuví chasaha ndo chi ra ña vaha, cucuhve cha cachi ndo noo pan maná cha ñohó xehe. Ta cucuhve noo yuu cuichin chi ndo. Ta nu yuu cuan cucun-yaa noo sivi chaa cha yori chitó. Ta noo tuhun ri ñu cuquehen cuenda cuan cucoto.”

Tuhun cha sacuhun ra Jesucristo chi ñu nyicú vehe ñuhu ñuu Tiatira

18 'Sacuhun tucu tutu chi ra cahán tuhin chihin ñu nyicú vehe ñuhu cha nyaá Tiatira. Ta catyun chi ra tyehe caa: “Tyehe caa catyí Sehe Nyoo, ra cha caá chiti nuu tari noo cha cayú ñuhu. Ta tari caá noo caa finu cha nañi bronce cha xiño xaan, tyicuan caa chaha ra: 19 Yuhu chité tandihí cha sacuví ndo. Ta chité yoso cuhva cha cuñi ndo chi ñáyivi. Ta chité cuhva cha chinó xaan iñi ndo chii. Ta tyinyeé ndo chi tahan ndo. Ta cunyeé xaan iñi ndo. Ta chité vatyi cuaha ca cha vaha sacuví ndo vityin ta ñima ca ta nu quichaha. 20 Soco iyó noo cha caá ndo: Vatyi chahá ndo ityi chi ñaha cha nañi Jezabel na sañaha ña chi ndo. Catyí ña vatyi cuenda Nyoo cahán ña. Soco chihin tuhun cha sañahá ña, sandaví ñaha ña chi ñu sacuví tyiño nui. Vatyi sañahá

ña cha coo ñu chihin inga rayii o ñusihi ta ñima yii ñu o ñasihi ra cuví. Ta sañahá ña cha cachi ñu nyayu cha chiyo nu sacahnū ñu chi xitohyo. ²¹ Yuhu cha nyatu xain cha nasama ña cuhva iyó ña, soco ña cuñi ña nasama ña. Vatyí ta sandoo ca ña cha iyó ña chihin rayii ta ñima yii ña cuví. ²² Ta vityin cua quehen noo cuehe chi ña. Ta cua cuhvi ña. Ta ma cuvi nducuita ña. Ta ñu sacuví cha quiñi caa chihin ña, tatu ma ndu uvi iñi ñu, cucuhve noo tindoho nyehe ñu. ²³ Ta cucahñi chi sehe ña. Ta tyicuan caa, coto tandihi ñu nyicú vehe ñuhu, vatyí yuhu chité tandihi cha chicá xiñi ñu, ta tandihi cha caá añima ñu. Ta chi tahan tahan nyoho cucuhve cha tahán chi chi ndo yoso cuhva cha sacuví ndo. ²⁴ Soco chi tandihi ca nyoho ñuu Tiatira, cha ña quehen ndo cuhva cha sañahá ña, ni ña sacuví ndo cha catyí maa ñu tuhun nahnu cuenda ra ña vaha, ña tyaí inga tuhun cha yii siqui ndo. ²⁵ Soco ma saña ndo cuhva cha vaha nyacuví ndo nyacua nya quichi. ²⁶ Ta nyoho tatu cuví chasaha ndo chi ra ña vaha, ta sacuví ndo cuhva cuñi nyacua nya nu ndihi tuhun, cucuhve ityi chi ndo cha cunyaca ñaha ndo chi ñu ñuhu ñayivi. ²⁷ Tari chaha Suti ityi chii cha cunyaca ñahi, tyicuan caa cucunyaca ñaha ndo. Tari cha chihin noo yutun caa cutachi tuñi ndo chi ñu. Tari tahvi cuatyí minoo quisi ñuhú, tyicuan caa cusacuví ndo chihin

ñu. ²⁸ Ta cuhve tiñoó cahnu andivi cunyaa chihin ndo. Ta ican yuhu cuví cuan. ²⁹ Ta nyoho cha cutuñi iñi ndo tyasoho ndo ñáá cha catyí Tatyí li Nyoo chi nyoho, ñu nyicú vehe ñuhu.”

3

Tuhun cha sacuhun ra Jesusucristo chi ñu nyicú vehe ñuhu ñuu Sardis

¹ Sacuhun tucu tutu chi ra cahán tuhun chihin ñu nyicú vehe ñuhu ñuu Sardis. Ta catyun chi ra tyehe caa: “Tyehe caa catyí ra cha yihí ndaha ndi ucha Tatyí li Nyoo ta ndi ucha tiñoó andivi; Yuhu chité tandihi cha sacuví ndo. Ta vasi catyí ñayivi tyi nyitó ndo soco cha cuenda chi yuhu, chihí ndo. ² Saha cumi vaha ndo chiin ri ca cha vaha cha iyó chi ndo. Vatyí cha cuñi ndihi tuhun nu nyicú ndo. Vatyí nyehí vatyí cha sacuví ndo, ña vaha maa nuu Nyoo. ³ Nicohon iñi ndo tuhun vaha cha cutuhva ndo. Cunyicon ndo cuhva cuan, ta nasama ndo cuhva iyó ndo. Vatyí tatu ma naquehen vaha ndo cha vaha, sana iñi ndo ta cuquichi siqui ndo, tari tuhva ra suhu quichi. ⁴ Soco iyó suhva nyoho ñu Sardis chiña cha ña sacuví ndo cha quiñi caá. Ña sacanyahyu ndo sahma ndo cuví cuan. Ta maa ndo cucuihno ndo sahma cuichin chihin. Ta cucaca noo ndo chihin, vatyí tyicuan caa tahán chi chi ndo. ⁵ Ta nyoho tatu cuví chasaha ndo chi ra ña vaha, cucuihno ndo sahma cuichin chihin.

Ta ma sanai sivi ndo nu libru ñu cuaconyito chihin Nyoo. Ta cunacoto nui chi ndo, chihin nuu Suti, ta chihin nuu ángel. ⁶ Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu Filadelfia

⁷ Sacuhun tucu tutu chi ra cahán tuhin chihin ñu nyicú vehe ñuhu ñuu Filadelfia. Ta catyun chi ra tyehe caa: “Tyehe caa catyí ra ii, ra ñahri cuatyí, ra cha ndicha vaha, ra cha ndaha ndaha ticu rey David, ra cha nuñá yuvehe ta ni noo ñu ta ma cuvi nacasi ñu. Ta tatu nacasi ra, ni noo ñu ta ma cuvi nuña ñu. Tyehe caa catyí ra: ⁸ Yuhu chité tandihí cha sacuví ndo. Ta nuu ndo nuñe noo yuvehe. Ta yori cuví nacasi, (vatyi chahí cha cahan ndo tuhun Nyoo chihin ñáyivi, ta yori cuví casi). Ta vasi chiin ri fuerza ndo, soco quichahá ndo tuhun cahín, ta ña catyí ndo vatyi ña ñohó nuu ndo chii. ⁹ Ta ñu cuenda ra ña vaha, ñu cuendu, ñu catyí vatyi ñu Israel cuví ñu, ta ñima, cusacuiñi chiti chi ñu nuu ndo, tacuhva coto ñu tyi yuhu cuñí chi ndo. ¹⁰ Ta sacuví ndo cha catyí, vatyi cunyeve iñi ndo. Ta yucuan cuenda cusaha cuende chi ndo chihin tindoho cahnu cha cusaquichi siqui tandihí ñáyivi, vatyi cunducu cote chihin tandihí ñu iyó siqui ñuhu ñayivi tatu cuñí ñu chii. ¹¹ Numí ri cuquichi. Saha

vaha ndo cuenda cuhva iyó ndo, coto yóo cha tinyaa premio cha cuñihi ndo. ¹² Nyoho tatu cuví chasaha ndo chi ra ña vaha, cahnu ca tyiño cucuvi ndo nuu Nyoi. Ta ma canyaha ca ndo nu nyaá Nyoo. Ta cutyai sivi Nyoi chi ndo, ta sivi ñuu Nyoi, ñuu Jerusalén chaa cha cusaquichi Nyoi nya andivi, ta suri cutyaa tiqui sivi chai chi ndo ñandihí. ¹³ Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu ñuu Laodicea

¹⁴ Sacuhun tucu tutu chi ra cahán tuhin chihin ñu nyicú vehe ñuhu ñuu Laodicea. Ta catyun chi ra tyehe caa: “Tyehe caa catyí ra cha ndicha vaha, ra cuví cha ndaa vaha cha cahán cha ndicha, ra cha savaha tandihí cha iyó chihin Nyoo. ¹⁵ Yuhu chité tandihí cha sacuví ndo. Ta chité vatyi ni ña cuñí vaha ndo chii. Ta ni ña cuñí tucu ndo saña ndihí ndo chii. Vaha tyehe ta saña ndihí ndo chii, o sañihi ndo quichaha ndo tuhun cahin, vaha. ¹⁶ Soco vatyi chiin ri cuñí ndo chii, ta ni ña saña ndihí ndo chii, ta ni ña cuñí ndo sacuvi ndo tuhun cahin, yucuan chaha cusanaa ndihí iñi tuhun ndo. ¹⁷ Vatyi nyoho catyí ndo tyehe caa: Yuhu tyayii, vaha iyé, ta ñahri ca maa cha chiñuhú chii, catyí ndo. Ta ña chitó ndo vatyi cuví ndo noo ra ña si cuñí,

noo ra ñahri iyó chi, noo ra ndahvi, noo ra cuaa, noo ra vityiyaa cuví ndo. ¹⁸ Yucuan chaha chahí tuhun chi ndo vatyí chi mai sata ndo xuhun cuaan vaha cha yahá nu ñuhú ta ña cayú, tacuhva na cutyay#i ndo. Ta chi mai sata ndo sahma cuichin vatyí cuihno ndo, tacuhva cha ma cuahan nuu ndo vatyí vityiyaa ndo. Ta tyíhi ndo colirio chiti nuu ndo tacuhva na nanyehe ndo. ¹⁹ Yuhu chahí tuhun chi ñu cha cuñí xain chi. Ta tachí tuñi chi ñu ñandihí. Yucuan chaha catyí chi ndo, nasama ndo cuhva iyó ndo ta sacuvi ndo cha vaha. ²⁰ Yuhu nanyaí yuvehe añima ñáyivi ta sacachén. Tatu nya noo ñu chiñí ñu ndusi, ta nuña ñu yuvehe, yuhu quihvi ta cuxiñi chihin ñu. Ta maa ñu cuxiñi ñu chihin mai. ²¹ Cucuhve cha cunyaa ndo chihin nu nyacá ñahi tatu cuví chasaha ndo chi ra ña vaha. Tari yuhu cuví chasahi chi ra, ta vityin nyaí chihin Suti nu nyacá ñaha ra. ²² Ta nyoho cha cuví cutuñi iñi ndo, tyasoho ndo cha catyí Tatyí Ii Nyoo chi nyoho ñu nyicú vehe ñuhu” —catyí ra Jesucristo.

4

Noo cuhva cha sacahnú ñu chi Nyoo nya gloria

¹ Cha yahá tuhun cuan, ta nyehi noo yuvehe tacoho nya andivi. Ta noo ndusu cha tari caa ndusu trompeta chiñi cha cahán chihin cha xihna ri ta catyí chi chii:

—Ndáa ihya ta cusañahi chuun cha cuacuvi nu cuahan ca chi —catyí ndusu cuan chii.

² Ta caa cuhva ri cuan ta tuví iñi vatyí ñihi vavaha nyaá Tatyí Ii Nyoo chihin. Ta nanyehi noo tyayu nanyaá nya andivi. Ta nyaá noo ra nuu tyayu cuan. ³ Ta ra nyaá cuan, xiño nuu ra tari xiño noo yuu vaha cha nañi jaspe ta cornalina. Ta nicachico yuhu tyayu cuan nyaá noo coo yahnyi, ta xiño ti tari yuu cha nañi esmeralda. ⁴ Ta nicachico tyayu cuan nyehi oco cumi ca tahan tyayu. Ta nyicú oco cumi tahan ra cha vaha chahnu. Cañihnó ra sahma cuichin. Ta yihí corona xuhun cuaan xiñi ra. ⁵ Ta nu nanyaá tyayu cha nyaá mahñu cuan, yucuan quitá minoo tacha. Ta vaa ri ca maa cuví. Ta ñihi xaan cahán savi. Ityi nuu tyayu cuan cayú ucha tahan ñuhu. Ta ucha tahan Tatyí Ii Nyoo cuví cuan. ⁶ Ta ityi nuu tyayu cuan iyó tucu noo cha tari caa tyañuhu, xiño xaan tari ino.

Nicachico yuhu tyayu cuan ta mahñu tyayu cuan, tayucú cumi tahan cha nyitó cha tari caa quití ta tari caa ñáyivi caa. Ta cuaha xaan chiti nuu cuan nyicú, tari ityi nuu ta tari ityi chata. ⁷ Cha xihna ri cha nyitó ihya, tari caá noo ndicaha caá. Ta cha cu uvi tari caá noo sindiqui caá. Ta cha cu uñi, tari caá nuu ray#i caá nuu. Ta cha cucumi tari caá noo tasu cha cuahan ndava, tyicuan caá. ⁸ Ta ndi cumi tahan cha nyitó ihya, tahan

tahan chi ta nyaá iñu tahan ndichin chi. Ta nicañnu maa chi nyaá chiti nuu chi, tari ityi chata chi ta tari ityi chichi ndichin chi. Ta ndiyaca ta ñiyaca ta ña chicuita chi catyí chi tyehé caa:

Ra ii xaan cuvún, ra ndi xaan cuvún, ra ñahri cuatyí cuvún,

Sutu Mañi yuhu, Nyoo, iyó tandihí tunyee iñi chuun.

Ra cha iyó nu quichaha tandihí cuvún, Ta ra iyó vityin. Ta ra cha nyaá cha cuquichi.

⁹ Ta cachahá ndi cumi tahan cha nyitó cuan gloria chi Nyoo. Ta sacahnú chi chi ra, ta canacuhvá chi tyahvi nyoo chi ra nyaá nu tyayu cahnu cuan, ra cha iyó tandihí tyembu. Ta tahan ri chaha cha casacuví chi tyicuan caa,¹⁰ ta ndi oco cumi ra cha vaha chahnu cuan chicuiñi chiti ra ta casacahnu ra chi ra iyó tandihí tyembu. Ta catyihí ra corona ra nu tyayu cahnu cuan. Ta cacatyí ra tyehé caa:

¹¹ Sutú Mañi nyuhu, Nyoo cuvún chi ndi.

Chi yoho tahán chi cha cuhva ndi gloria, ta sacahnú ndi chuun.

Ta tahán chi cha cunyaca ñahun.

Vatyí maun savahá tandihí cha iyó.

Ta cha cuenda cha iyó iñi maun ta chicoq tandihí, cacatyí ra.

5

Nu nyehe ra Juan noo libru ta noo Mbee Luhlu cha cuví ra Jesucristo

¹ Tyicuan ta chiyo vaha ra cha nyaá nu tyayu cahnu cuan, nyehí yihí ndaha ra noo libru tari caá noo tutu cha natuví yo. Ta nyaá letra ityi nuu ta ityi chata. Ta nyasí chi chihin ucha tahan sellu.
² Ta nyehí noo ángel cha nyee xaan. Ta chaa xaan cahán ra ta ndacá tuhun ra:

—¿Yóo ra tahán chi nuña libru ihya ta sacanyaha ra sellu ihya? —catyí ra.

³ Soco ni ityi andiví ta ni ityi nu ñuhu ñayiví, ta ni ityi chichi ñuhú, ta yori maa cha cuví nuña libru cuan. Ta ni cha nyehe ñu nuu, ta ma cuví.

⁴ Ta yuhu chacu chaa xain, vatyí yori maa quitá cha cuví nuña libru cuan. Yori maa cuví sacuahá, ta yori cuví nyehe nuu chi. ⁵ Tyicuan ta noo ra cha vaha chahnu cuan catyí ra chii:

—Ma cuacu con. Vatyí ra cuví ndicaha o cuñí chi catyí, ra nyacá ñaha, ra vachi tata ra Judá, ra vachi tata rey David, ican ra cuví chasaha ra tacuhva cuví nuña ra nu libru cuan ta cahnya ra ndi ucha sellu cuan —catyí ra.

⁶ Tyicuan ta mahñu tyayu cuan ta mahñu ndi cumi cha nyitó cuan, ta mahñu ra cha vaha chahnu cuan, nyehí chi noo Mbee Luhlu. Nanyaá ti ta caa ti cha chahñi ñáyiví chi ti. Ucha tahan ndiquí ti ta ucha tahan chiti nuu ti nyaá. Ta chiti nuu cuan ican cuví ndi ucha tahan Tatyí Ii

Nyoo cha tachj ra nicacahnu siqui ñuhu ñayivi. ⁷ Ta ra cuví Mbee Luhlu cuan chahan ra ta quehen ra libru cuan cha yihí ndaha chiyo vaha ra nyaá nu tyayu cuan. ⁸ Cuhva cha quehen ra libru cuan, ndi cumi cha nyitó cuan ta ndi oco cumi ra cha vaha chahnu cuan cachicuiñi chiti ra nuu ra cuví Mbee Luhlu cuan. Ta tahan tahan ra cha vaha chahnu cuan nyisó ra arpa, noo cha tari caá guitarra caá. Ta canyisó tucu ra copa xuhun cuan tyitu yihí cutu. Ta cutu cuan cuví chi tandihi cha chican tahvi ñu cuenda Nyoo. ⁹ Ta cachita ra noo yaa chaa, ta catyí ra tyehe caa:

Yoho cuví ra tahán chi cha quehun libru ihya, ta cahnyon ndi ucha sellu cha nyaá nu chi.

Vatyí chihun saha ñayivi. Ta chihin niñun saton chi ndi vatyí coo vaha ndi chihin Nyoo.

Ta cuví ndi ñayivi ñuu nyihi ta ñuu nahnu nicacahnu ñuhu ñayivi, ñayivi sin sin sahan cahán, ñayivi sin sin tata.

¹⁰ Chahun ityi chi ndi vatyí cuví ndi rey ta cuví ndi sutu cha cuenda Sutu yo Nyoo.

Ta cucunyaca ñaha ndi chi ñayivi iyó siqui ñuhu ñayivi, cacatyí ra, chitá ra.

¹¹ Yahá cuan ta nanyehi, ta chiñi ndusu cha cahán cuaha xaan ángel, tayucú ra nicachico yuhu tyayu cahnu cuan, ta nu nyicú cumi tahan cha nyitó cuan, ta nu nyicú ra cha vaha chahnu cuan.

Ta cuenda millón ángel nyicú cuan, nyehi. ¹² Ta chihin cha ñihi cahan ángel cuan, ta cacatyí ra:

Ra cuví Mbee Luhlu cha chahñi ñayivi, tahán chi cha cunyaca ñaha ra, ta naquehen cuenda ra cha tyayii.

Tahán chi naquehen cuenda ra cha chiñi tuñi.

Tahán chi cha naquehen cuenda ra tandihi tunyee iñi.

Tahán tucu chi cha kuhva yo gloria chi ra, ta sacahnu yo chi ra.

Ta cahnu xaan ca ra cuví maa ra, cacatyí ángel cuan.

¹³ Ta chiñi tiqui cha cahán tandihi cha savaha Nyoo, tandihi cha iyó andivi, ta siqui ñuhu ñayivi, tandihi cha iyó chichi ñuhú, ta chichi tyañuhu, tandihi cha savaha Nyoo catyí chi tyehe caa:

Cahnu xaan ca cuví ra cha nyaá nu tyayu.

Cahnu xaan ca cuví ra cuví Mbee Luhlu.

Ta nacuhva yo gloria chi ra.

Ta na cunyaca ñaha ra tandihi maa tyembu, catyí tandihi cha savaha Nyoo.

¹⁴ Ta ndi cumi cha nyitó cuan catyí chi:

—¡Tyicuan caa na cuvi!
—catyí chi.

Ta ndi oco cumi ra cha vaha chahnu cuan, cachicuiñi chiti ra ta casacahnu ra chi ra iyó tandihi tyembu.

6

Nu chahnya ra Jesucristo ndi ucha tahan sellu

¹ Tyicuan ta nyehi nu chahnya ra cuví Mbee Luhlu cuan sellu cha xihna ri chichi cha ndi ucha tahan cuan. Ta chiñi cahán noo cha nyitó cha cumi tahan cuan, chihin noo ndusu cha tari caá cha cahán savi ta catyí chi:

—iÑaha, ta nyehun!
—catyí chi chii.

² Tyicuan ta nanyehi ta nyehi noo caballu cuichin, ta ra yosó chi ti cuan ndaha ra noo arco. Ta ñihí ra noo corona quihí xiñi ra vatyi saha ganaa ra, ta cuasaha ganaa ca ra. ³ Ta cuhva cha chahnya ra cuví Mbee Luhlu cuan sellu cu uvi, chiñi cha catyí cha nyitó cu uvi cuan tyehe caa:

—iÑaha ta nyehun! —catyí cuan chii.

⁴ Ta quita inga caballu, tyacu cuaha. Ta ra cha yosó chi ti chicoo ityi chi ra vatyi tinyaa ra cha taxi ri iyó ñayivi, tacuhva cahñi ñu chi tahan ñu. Ta ñihí ra noo mityi cahnu quindaha ra. ⁵ Ta cuhva cha chahnya ra cuví Mbee Luhlu cuan sellu cu uñi, ta chiñi cha catyí cha nyitó cu uñi cuan tyehe caá:

—iÑaha ta nyehun! —catyí cuan chii.

Ta nanyehi, ta nyehi noo caballu toon. Ta ra yosó chi ti, yihí ndaha ra noo ticatya. ⁶ Ta chiñi noo ndusu mahñu cumi tahan cha nyitó cuan, ta catyí cuan:

—Tari cuhva xuhun yahvi ñu cha noo quivi, yucuan cuhva yahvi noo litru nuñi.

Tyicuan caa tucu uñi litru cebada. Ta ma sativun acetye ta vinu —catyí ndusu cuan.

⁷ Ta cuhva cha chahnya ra cuví Mbee Luhlu cuan sellu cu cumi, chiñi cha cahán cha nyitó cucumí cuan, ta catyí chi, tyehe caa:

—iÑaha ta nyehun! —catyí chi.

⁸ Ta nanyehi ta nyehi noo caballu cuaan. Ta ra yosó chi ti nañi ra Tuhun Chihi. Ta chata ra vachi inga ra cha nañi Ra Nyacá Ñaha Nu Nyicú Ndiyi. Ta cañihí ra tunyee iñi cha cahñi ra chi cuaha xaan ñáyivi iyó siqui ñuhu ñayivi. Vatyi chichi cha sava ñáyivi iyó siqui ñuhu ñayivi, cucahñi ra sava ñu. Ta cucahñi ra chi ñu chihin cha sanacanda ra cuatyí, ta chihin tama, ta chihin cuehe, ta chihin quiti xaan iyó siqui ñuhu ñayivi.

⁹ Cuhva cha chahnya ra cuví Mbee Luhlu cuan sellu cu ohon, nyehi xiu arta. Yucuan ñohó añima ñu cha chihí cha cuenda tuhun Nyoo tyi sacoto ñu tuhun ra chi ñáyivi. ¹⁰ Ta tyehe caa catyí ñu chihin noo ndusu chaa xaan:

—Sutu Mañi yuhu, ra ii cuvún. Ta sacuvún cha catyún. ¿Ama cutachi tuñun chi ñáyivi cha chahñi chi ndi cha catyi tuhun maun? —catyí ñu.

¹¹ Tyicuan ta cañihí noo noo ñu cuan sahna cuichin cuihno ñu. Ta catyí ra chi ñu na canyitatu ñu suhva ca quivi, nyacua nya cha caña tahan tandihí ca tahan ñu, ñu sacuví tyiño nuu ra Cristo, ñu cha

tahán chi cucúvi tari cuhva chihí maa ñu.

¹² Cuhva cha chahnya ra cuví Mbee Luhlu cuan sellu cu iñu, nanyehí ta quichi noo cha taán cahnu. Ta nduñaá ñayiví, tari sahma ñu nyaá tucuihya iñi, toon xaan nduví. Ta yoo andívi cuan nanduví tari ñiñi. ¹³ Ta tiñoo andívi canacoyo ti nya nu ñuhu ñayiví. Tari sanacoyo tu higo chiti yutya tun tatu yahá noo tatyí ñihi. ¹⁴ Tari natuví yo noo tutu tyicuan caa cuanaa ri andívi. Ta tandihí yucu ta tandihí ñuhú cha nyicú mahñu tyañuhu nacanda chi ta nasama chi nu nyaá chi. ¹⁵ Ta tandihí rey cha iyó siqui ñuhu ñayiví ñn ri chihin ra nahnu, ta ra tyayii, ta ra cacuví nuu chi sindaro, ta ra iyó xaan fuerza chi, ta tandihí ñu cacuví musu, ta ñu cha ña cuví musu, tandihí ri ñu cuan caquihví xehe ñu chichi yavi yuu cha iyó yucu nahnu, ta chichi yavi ñuhú. ¹⁶ Ta catyí ñu chi yucu cuan ta chi yuu cuan tyehé caa:

—Canacoyo ndo siqui ndi, ta tixehé ndo chi ndi nuu ra nyaá nu tyayu andívi, coto tachi tuñi ra cuví Mbee Luhlu cuan chi ndi.

¹⁷ Vatyí cha chaá quiví cahnu cha cutachi tuñi ra chi ndi. ¿Ta yóo cuví cha cuví cunyeé cuan? —catyí ñu.

7

*Nu ñihí ñu Israel sellu cun-
yaa tyaan ñu*

¹ Cha yaha tuhun ihya ta nyehí cumi tahan ángel catayucú ra ndi cumi chiyo

nu quichi tatyí siqui ñuhu ñayiví. Ta ña chaha ra yaha tatyí cuan vatyí cava chi siqui ñuhu ñayiví. Ni ña chaha ra cha cava chi nuu tyañuhu, ni siqui yutun catayucú nuu ñuhú. ² Ta nyehe tiqui inga ángel, vachi ra ityi nu cañá ñanyii, ta nyisó ra sellu Nyoo nyitó. Ta ángel cuan canachaa ra chihin cha ñihi ndusu ra chi inga cumi ca ángel cuan, ra cha ca iyó ityi chi vatyí casativí ra nuu ñuhu ñayiví ta nuu tyañuhu. Ta catyí ra chi ra:

³ —Ma sativí ñaha ndo nuu ñuhu ñayiví, ni nuu tyañuhu, ta ni nuu yutun cha niri ca cha ta sañaha ca ndi yóo ñu cuví musu Nyoo, vatyí cutyaa ndi noo sellu tyaan ñu —catyí ángel cuan.

⁴ Ta chiñi nacatyí ra yoso tahan ñayiví tyaá ra sellu cuan: cientu uvi xico cumi mil tahan ñu Israel. ⁵ Uchi uvi mil ñu tata ra Judá chicunyaá sellu, ta uchi uvi mil ñu tata ra Rubén, inga uchi uvi mil ca ñu cuenda tata ra Gad, ⁶ uchi uvi ca mil cuenda tata ra Aser, uchi uvi mil ca cuenda tata ra Neftalí, uchi uvi mil ñu tata cuenda ra Manasés, ⁷ ta uchi uvi mil cuenda tata ra Simeón, uchi uvi mil cuenda tata ra Leví, ta uchi uvi mil cuenda tata ra Isacar, ⁸ uchi uvi mil ñu cuenda tata ra Zabulón, ta uchi uvi ca mil ñu cuenda tata ra José, ta uchi uvi mil ca ñu cuenda tata ra Benjamín. Tandihí ñu cuan ta chicunyaá sellu Nyoo chi ñu.

Nu nyehe ra Juan chi ñu ñihno sahma cuichin

⁹ Cha yahā tuhun cuan ta nanyehi ta nyehi cuaha xaan ñáyivi nyicú. Ta yori cuví nacahvi chí ñu, vatyí nyicú ñáyivi tandihí ri ñuu nyihí ta ñuu nahnu iyó síqui ñuhu ñáyivi. Ta nyicú ñáyivi siin siin sahan cahan. Ta nyicú ñáyivi tandihí ri tata. Ta catayucú ñu nuu ra nyaá nu tyayu, ta nuu ra cuví Mbee Luhlu. Ta cañihno ñu sahma cuichin. Ta cayihí ndaha ñu ndaha ñoo.
¹⁰ Ta tandihí ñu chihin cha ñihí ndusu ñu, ta canachaa ñu ta catyí ñu:

—Sutu yo Nyoo, ra nyaá nu tyayu gloria, ta ra cuví Mbee Luhlu, ican ra sacacú chi yo —catyí ñu canachaa ñu.

¹¹ Ta tandihí ángel catayucú ra nicachico yuhu tyayu cuan, ta nicachico chata ra cha vaha chahnu cuan, ta nicachico chata ndi cumi tahan cha nyitó cuan. Ta cachicuiñi chiti ra chihin nuu ra nya nu ñuhú nuu ra nyaá tyayu cuan. Ta casacahnú ra chí ra. Vatyí Nyoo cuví ra.
¹² Ta cacatyí ra:

Tahán chi tyehe caa chuun:

Sacahnú ndi chuun ta chahá ndi gloria chuun vatyí chíñi tuñi xaun.

Nacuhvá xaan ndi tyahvi nyoo chuun.

Ta sacuvahá ndi chuun vatyí iyó xaan tunyee iñi chuun, ta cuaha xaan fuerza iyó chuun, Nyoo Sutu ndi cuví chuun. Ta tyicuan ri na cuví chí tandihí tyembu, catyí ra.

¹³ Tyicuan ta noo ra cuví ra cha vaha chahnu cuan ndaca tuhun ra chíi ta catyí ra:

—¿Yóó ñu cañihno sahma cuichin ihya? ¿Ta nya ityi quichí coyo ñu? —catyí ra.

¹⁴ Ta yuhu catyí chí ra:

—Tata, yoho chitón.

Ta catyí ra chíi:

—Ican ñu ihya cuví ñu cayaha nu tindoho cahnu. Ta canacatyá ñu cuatyí ñu, ta nducuichin sahma ñu chihin niñi ra cuví Mbee Luhlu.
¹⁵ Yucuan chaha nyicú ñu ityi nuu tyayu nu nyaá Nyoo.

Ta sacuví ñu tyiño nuu ra ndiyaca ta ñiyaca chichi vehe ñuhu ra. Ta ican ra cuví ra nyaá nu tyayu gloria ta cusaha cumi ra chí ñu vatyí cua cunyaa ra chihin ñu.
¹⁶ Ta ma nyehe ca ñu tindoho chihin soco, ni chihin cha ityi ñu ndutya. Ta ni ma cahmi ca ñanyii chí ñu. Ni ma sayanga ca cha ihñi chí ñu. ¹⁷ Vatyí ra cuví Mbee Luhlu cha nyaá mahñu tyayu cuan cusaha cumi ra chí ñu, tari sahá cumi yo mbee. Ta cunyaca ra chí ñu nu coho ñu ndutya cha chahá cha cuconyito ñu tandihí tyembu. Ta Nyoo cunacuhva ra tandihí ndutya nuu ñu —catyí ra chíi.

8

Nu chahnya ra Jesucristo sellu cu ucha ta quitá noo ángel chihin noo cuu xuhun cuaan

¹ Cuhva cha chahnya ra cuví Mbee Luhlu sellu cu ucha nu libru cuan, ndutaxin ri nya andivi tari noo cha sava hora.

² Yaha cuan ta nyehi chi ndi ucha ángel catayucú ra nuu Nyoo. Ta caquehen cuenda ra ucha tahan trompeta. ³ Yaha cuan ta quichi inga ángel chihin noo cuu xuhun cuaan cha tuhvá yihí cutu. Ta chicuinanyaa ra ityi nuu arta cuan. Ta quehen cuenda ra cuaha xaan cutu, vatyí cuhva cuenda ra in ri chihin cha chicán tahvi ñáyivi chi Nyoo. Nuú arta xuhun cuaan cha nyaá ityi nuu tyayu Nyoo, yucuan chaha cuenda ra. ⁴ Ta quita ñuhma cutu cuan, nandaá chi nu nyaá Nyoo in ri chihin cha chicán tahvi ñu cuenda ra. ⁵ Tyicuan ta ángel cuan quehen ra cuu cuan. Tyicuan ta sacutu ra chihin titi ñuhu cha quita arta cuan. Ta tuchi ra siqui ñuhu ñáyivi. Ta quichaha cahan savi, ta iyo cuví. Ta quihvi tacha, ta quichaha taan.

Nu tiví ángel trompeta

⁶ Tyicuan ta ndi ucha ángel cha canyisó ndi ucha trompeta cuan, cha nyatú tuhva ri ra vatyí cativi ra.

⁷ Ángel cha xihna ri cuan quichaha tiví ra trompeta ra. Ta quichaha coon savi yuu ta saca ñiñi chihin chi, ta saca ñuhu cha cayú chihin. Ta cayú cha yatyin cha sava ñuhu ñáyivi. Ta cha yatyin cha sava yutun cayú chihin tandihi cuhu cuii.

⁸ Ta ángel cu uvi cuan tiví tucu ra trompeta ra. Ta canacava tari noo yucu cha cayú ñuhu mahñu tyañuhu. Ta cha yatyin sava tyañuhu

cuan nduvi chi ñiñi. ⁹ Ta cha yatyin sava quití cha iyó chichi tyañuhu cuan chihí ti. Ta cha yatyin sava barcu cha iyó cuan, catahvi cuatyí.

¹⁰ Ta ángel cu uñi tiví ra trompeta ra. Ta canacava noo tiñoó cahnu andivi, suri cayú ñuhu chi ti tari ñuhu ñiti. Canacava ti siqui cha yatyin ri sava yuvi nahnu ta siqui cha yatyin ri sava ndohyo. ¹¹ Ta tiñoó cahnu cuan nañi ti Ajenjo. Ta cha yatyin ri sava ndutya cha iyó, nanduvi chi Ajenjo cha cuví noo veneno cha uva xaan. Ta cuaha xaan ñáyivi chihí cha cuenda ndutya cuan, vatyí ndu uva chi. ¹² Ta ángel cu cumi cuan nativi ra trompeta ra ta cha yatyin sava ñanyii nduñaa, ta cha yatyin sava yoo, ta cha yatyin cha sava tiñoó andivi cuanaa ti. Ta cha cuenda cha nduñaa suhva ñanyii cuhva cuan, nduñaa cumi tahan hora cha noo noo quivi. Ta cha cuenda cha tiví yoo ta tiñoó, yucuan chaha ña cacuví sandichin chi cumi tahan hora cha noo noo ñuu.

¹³ Yaha cuan ta nanyehi ta chihí vatyí noo ángel ndavá ra mahñu andivi. Ta chihin cha ñihi ndusu ra ta catyí ra tyehe caa:

—¡Ndahvi cuví ñu iyó siqui ñuhu ñáyivi vatyí nyaá tiví uñi ca tahan ángel trompeta ra!
—catyí ángel cuan.

9

¹ Ta ángel cu ohon cuan nativi ra trompeta ra. Ta nyehi chi noo ra cuan, tari tiñoó andivi caá ra. Ta canacava ra siqui ñuhu ñáyivi.

Ta quehen cuenda ra cuan ndaha ticu cha cuenda yavi cono cha ñahri maa nu chitahan chi. ² Tyicuan ta nuña ra yavi cuan. Ta cuaha ñuhma nandaa tari maa ñuhma cha quitá chichi noo horno cahnu. Ta ñuhma cuan chasi chi nuu ñanyii ta nasaca noo chihin tatyí. Ta nduñaa ñayivi. ³ Ta mahñu ñuhma cuan caquita coyo pinchi. Ta candava coyo ti siqui ñuhu ñayivi. Ta chicoq ityi chi ti vatyí tyaa ti chi ñáyivi tari tisuhma cha iyó siqui ñuhu ñayivi. ⁴ Quehen ti tuhun vatyí ma satasi iñi ti, ni chi cuhu cha iyó nu ñuhu ñayivi, ta ni noo cuhu cuii, ta ni noo yutun, soco chi ñáyivi cha ñahri sellu Nyoo nyaá tyaan ñu. Chi ñu cuan cutyaa ti. ⁵ Soco ñahri ityi iyó chi ti cha cahñi ti chi ñáyivi, soco tacuhva tyaa ri ti chi ñu. Ta coo xico uhvi chi ñu chichi cha ohon yoo. Ta cha uhvi cuan, tari caá xico tisuhma cha tyaa chi ñáyivi tyicuan caá. ⁶ Ta quivi cuan ñáyivi cunanducu ñu tuhun chihi. Soco ma nañihi ca ñu. Ta vasi cuñi ñu cúvi ñu, soco tuhun chihi cucono ri chi chi ñu vatyí ma cúvi ñu.

⁷ Tari caá caballu nahnu cha cachicá cuatyí, tyicuan caá pinchi cuan. Ta xiñi ti yihí tari caá noo corona xuhun cuaan. Ta tari caá nuu rayii, caá nuu ti. ⁸ Ta ixi xiñi ti tari caá ixi xiñi ñusihí caá. Ta tari caá noho ndicaha caá noho ti. ⁹ Ta soo ti tari caa, tyicuan caa. Ta ñihi xaan cachan ndichin ti. Tari cachan cha cuaha xaan carreta caballu

cuhva cha cachinó ti nu iyó cuatyí. ¹⁰ Ta tari caá suhma tisuhma caá suhma ti, vatyí yihí iñu. Ta chihin cuan cuví tyaa ti chi ñáyivi chichi cha ohon yoo. ¹¹ Ta pinchi cuan iyó noo ra cuví nuu chi ti. Ta ican cuví noo ángel cha nyacá ñaha yavi cahnu ta cono cha ñahri nu chitahan. Ta cha chihin sahan hebreo nañi ra Abadón. Ta chihin sahan griego nañi ra Apolión, ta cuñi chi catyi: Ra Sanaa.

¹² Yahá noo tindoho cuan, soco cumañi uvi ca.

¹³ Ta ángel cu iñu cuan nativi ra trompeta ra. Ta chiñi noo ndusu cha quitá chichi ndi cumi ndiqui tutun arta xuhun cuaan cha nyaá nuu Nyoo. ¹⁴ Ta ndusu cuan catyi chi ángel cu iñu cha nyisó trompeta cuan, tyehe caa:

—Ndachi chi ndi cumi ángel cha canuhñi yatyin yuhu yuvi cahnu Eufrates —catyi ndusu cuan.

¹⁵ Tyicuan ta ndachi ndi cumi ángel cuan, vatyí cha nyatu tuhva xaan ra maa maa cuhva cuan maa maa quivi cuan, maa maa yoo cuan, maa maa cuiya cuan, vatyí cahñi ra chi cha yatyin cha sava ñáyivi iyó siqui ñuhu ñayivi. ¹⁶ Ta chiñi yoso tahan sindaro chihin caballu ra, ta quitá uvi cientu millón tahan ra.

¹⁷ Ta tyicuan caa nyehi caballu cuan chihin visión, cha sanyehé Nyoo chii. Ta pechu ra cayosó chi ti cuan, yihí noo caa tyacu cuaha, tyacu azu ta tyacu cuaan. Ta tari caá xiñi

ndicaha caá xiñi caballu ra. Ta chichi yuhu ti quitá ñuhu ta ñuhma ta azufre. ¹⁸ Ta cha yatyin sava ñáyivi iyó siqui ñuhu ñáyivi cachihí chihin uñi tahan cha caquitá yuhu caballu cuan; ñuhu ta ñuhma ta azufre. ¹⁹ Vatyí tunyee iñi cha iyó chi ti, chichi yuhu ti ta suhma ti nyaá. Vatyí tari caá coo, caá suhma ti. Tari noo xiñi coo tyicuan caa nuu suhma ti. Ta chihin cuan sañicuehé ti chi ñáyivi.

²⁰ Soco tandihí ca ñu cha candoq, cha ña cachihí chihin cuehe cuan, ña sacucuita ñu cha sacuvi ñu cha ña vaha. Ta ni ña sacucuita ñu cha sacahnú ñu chi tatyí ña vaha ta chi xitohyo. Vatyí cuví cuan noo xuhun cuan, xuhun cuichin, bronce, yuu, yutun. Cha ña cuví nyehe, ni ña chiñí ta ni ña cuví caca cuví cuan. ²¹ Ni ña casandihí ñu cha chahñí ñu, ta cha satasí ñu. Ta ña sandihí ñu cha iyó ñu chihin rayii ta chihin ñusihí ta ñima yí ñu cuví, ta ñima ñasihí ra cuví. Ta ña sandihí ñu cha suhú ñu.

10

Ángel cha nyisó libru luhlu

¹ Tyicuan ta nyehí inga ángel cha iyó xaan tunyee iñi chii, cha vachi noó ityi andivi mahñu noo vico. Ta noo coo yahnyi nyaá xiñi ra. Ta xiño xaan nuu ra tari ñanyii. Ta tari cha cayú ñuhu chaha ra, tyicuan caá. ² Ta yihí ndaha ra noo libru luhlu cha tanuña nuu. Ta chinanyaa ra chaha chiyo vaha ra nu tyañuhu. Ta chaha chiyo

satyin ra chinanyaa ra siqui ñuhu ñáyivi. ³ Tyicuan ta ñihi xaan cana chaa ra, tari ndusu ndicaha cha nduxaan ti. Ta cuhva cha canachaa ra, chiñi ucha tahan ndusu cha siin siin caa tari cha cahan savi, tyicuan caa ndusu ra. ⁴ Ta cha yaha cha chiñi cha cahan ndi ucha ndusu cuan, tyicuan ta cuatyai nuu tutu. Soco chiñi noo ndusu ityi andivi, ta catyí chi chii tyehe caa:

—Cocumi xehun tuhun cha chiñun cahan ndi ucha ndusu cuan. Ta ma tyaun nuu tutu —catyí ndusu cuan chii.

⁵ Tyicuan ta ángel cha nyehí cha chañí nu tyañuhu ta siqui ñuhu ñáyivi, nacoñehe ra ndaha chiyo vaha ra ityi andivi. ⁶ Ta ángel cuan tyanaha ra vatyí cahan ra noo cha ndicha cuenda Nyoo, ra nyitó tyicuan ri maa, ra cha savaha andivi ta ñuhu ñáyivi ta tyañuhu ta tandihí cha iyó nuu chi. Ta catyí ra:

—Ñahri ca cha cucuee. ⁷ Vatyí cuhva cha cuquichaha tiví ángel cu ucha cuan trompeta ra, yucuan cuhva cuchino cava tuhun xehe cha yihí iñi Nyoo tyi sacuvi ra, tari cuhva sacoto ra chi ra casacuví tyiño nuu ra, ra cacuví profeta cuenda ra —catyí ángel cuan.

⁸ Ta ndusu cha chiñi yuhu, cha quitá ityi andivi, cahan tucu chi chihin inga chaha, ta catyí chi chii tyehe caa:

—Cuahan, ta quehun libru luhlu cha tanuña nuu, cha yihí ndaha ángel cha chañí

nu tyañuhu ta nu ñuhu ñayivi
—catyí chi.

⁹ Tyicuan ta chahin nu nyaá ángel cuan ta chiquen libru luhlu cuan nacuhva ra chii, ta catyí ra chii:

—Quehen, ta cachun, vixi xaan tari tyañuñu. Soco chichun cundu uva chi —catyí ra chii.

¹⁰ Tyicuan ta quehin libru luhlu cha yihí ndaha ángel cuan, ta chachi. Vixi xaan tari tyañuñu. Soco cha yaha cha chachi, uva xaan nduvi chi chichi. ¹¹ Tyicuan ta catyí ra chii:

—Cuñí chi cha cunacatyun inga chaha tuhun cha cahán Nyoo siqui ñáyivi cuaha xaan ñuu nyihi ta ñuu nahnu, ta siqui ñáyivi siin siin sahan cahán, ta siqui ra cacuví rey —catyí ra chii.

11

Uvi tahan ra cacuví cha ndaa

¹ Tyicuan ta cachaha ra noo ndoo cha tari caá noo yutun cha tyicuhvá chi. Ta cacatyí ra chii tyehe caa:

—Ndūcuita ta tyicuhvon vehe ñuhu Nyoo ta arta ra, ta nacahvun yoso tahan ñu tuhvá sacahnú chi Nyoo yucuan. ² Soco ma tyicuhvon nuquehe cha nyaá ityi chata vehe ñuhu cuan. Vatyí cha cuenda ñu inga ñuu cuví. Ta ican ñu cuan cucuaca chaha ñu ñuu ii cuan chichi cha uñi cuiya sisava. ³ Ta yuhu cutachi uvi testigu cucahan ra cha cuende cha ni ri ca cha chichi noo mil uvi cientu uñi

xico quivi. Ta cacuihno ra sahma tucuihya iñi.

⁴ Ta ican ninduvi testigu cuan cuví uvi tahan yutun olivo ta uvi tahan cañileru cha tayucú nuu Sutu Mañi yo, ra nyacá ñaha siqui ñuhu ñayivi. ⁵ Tatu yóo ñu cuñí sataşi iñi chi ninduvi testigu cuan, cuquita ñuhu yuhu ninduvi ra, ta cahmi chi tandihi ñu xaan iñi chi ra. Ta tyicuan caa cucuvi ñu cuñí sataşi iñi chi ra. ⁶ Testigu cuan iyó ityi chi ra cha cacasi ra nu ma coon savi cha niri ca cha cachahá cuenda ra tuhun cahán Nyoo chi ñáyivi. Ta iyó tucu ityi chi ra cha casananduvi ra niñi chi ndutya. Ta iyó tucu ityi chi ra cha casanyehe ra tindoho chi ñu iyó siqui ñuhu ñayivi chihin tandihi ri nuu cuehe, yoso tahan chaha cha cacuñí maa ra. ⁷ Soco cuhva cha cua ndihi cuhva cuenda ra tuhun Nyoo chi ñáyivi, cuquita noo quití xaan yavi cono cuan, ta cucañi tahan ti chihin ninduvi testigu cuan. Ta cucuvi chasaha ti chi ra. Ta cucahñi ti chi ra. ⁸ Ta coño ñuhu ra cundo noo maa cava calle ñuu nu chihí Sutu Mañi yo nu cruzi. Ta tari Sodoma ta Egipto nanduví ñuu cuan, (cha cuenda cha ña vaha cha sacuvi ñáyivi ñuu cuan). ⁹ Ta chichi cha uñi quivi sisava, cunyehe tandihi ñáyivi coño ñuhu ra, ñáyivi tandihi ñuu nyihi, ñáyivi tandihi ri tata, ta ñáyivi siin siin sahan cahán, ta ñáyivi ndihi ri ñuu nahnu, cunyehe ñu coño ñuhu ra. Ta ma cuhva ñu cha quihí coño ñuhu ra chichi ñuhú. ¹⁰ Ta ñu cha iyó siqui ñuhu ñayivi

cu cusii xaan cuñí ñu cha cuenda cha cachihí ra cuan. Ta nyacua cutachí ñu regalo chí tahan ñu cha sii cuñí ñu, vatyí cachihí ñanduvi rayii cha cachahá cuenda tuhun cahán Nyoo chí ñu. Vatyí chahá xaan ra tindoho chí ñu cha cuhva cha cuñí maa ñu. ¹¹ Soco cha yahá cha uñi quivi sisava, Nyoo sanandoto ra chí ra, ta candicuitá tucu ra inga chaha. Ta tandihí ñu nyehe canandoto ra, canayuhví xaan ñu. ¹² Tyicuan ta ñanduvi testigu cuan cachihí ra noo ndusu ñihi xaan ityi andivi. Ta catyí chí chí ra tyehe caa:

—Ndaa ndo ityi siqui ihya
—catyí ndusu cuan chí ra.

Ta candaá ra ityi andivi chichi noo vico. Ta canyehe ñu xaan iñi chí ra nu canandaá ra. ¹³ Ta cuhva cuan quichí noo cha taan cahnu. Ta chichi ñuu cuan canacoyo cuaha xaan vehe. Ta chichi cha uchi uchi tahan vehe, canacoyo noo noo. Ta cha tandihí chichi ñuu cuan chihí ucha mil ñáyivi cha cuenda cha taan cuan. Ta ñáyivi ña chihí, casacahnú ñu chí Nyoo, ra nyaá andivi, cha cuenda cha yuhví ñu.

¹⁴ Yahá tindoho cu uvi cuan, soco numi ri cuquichi tindoho cu uñi.

Nu tiví ángel trompeta cu ucha

¹⁵ Ta ángel cu ucha nativí ra trompeta ra. Ta canatyacu ndusu ñihi xaan ityi andivi, ta catyí chí tyehe caa:

Tandihí nu nyacá ñaha rey siqui ñuhu ñayiví ihya,

cha yahá nanduvi chí Sutu yo Nyoo ta chí ra Cristo.

Ta maa ra cucunyaca ñaha tyicuan ri maa, catyí ndusu cuan.

¹⁶ Tyicuan ta ndi oco cumi ra cha vaha chahnu, ra canyicú nuu tyayu nu nyaá Nyoo, cachicuiñi chiti ra chihin nuu ra nya nu ñuhu. Ta casacahnú ra chí Nyoo. ¹⁷ Ta cacatyí ra:

Nacuhvá ndi tyahvi nyoo chuun, Sutu Mañi nyuhu.

Nyoo ra iyó tandihí tunyee iñi chíi cuvún.

Yoho iyón vityin, ta iyón nu quichaha tandihí ta nya cha cuquichun.

Vatyí cha naquehen cuendon tunyee iñun.

Ta cha quichahun nyaca ñahun vityin.

¹⁸ Ta ñáyivi tandihí ñuu nahnu cuxaan ñu.

Soco cha chaá quivi cha tachi tuñun chí ñu.

Ta cha chaá quivi cha cucutuñi chí ñu ndiyi.

Ta cucuhyon cha vaha cha tahan chí chí ñu sacuví tyiño nuun, ñu chahá cuenda tuhun cahún,

ñu cha nacuhvá cuenda añaima chí maun, ta sacahnú ñu sivun.

Vasí cahnu ñu cuví ñu ta vasí ndahvi ñu.

Ta chaá cuhva cha sanaun chí ñu sativí chí ñáyivi siqui ñuhu ñayiví, cacatyí ra.

¹⁹ Tyicuan ta nuña yuvehe ñuhu Nyoo cha nyaá andivi, ta chichi vehe ñuhu natuví caja

cuenda cha natyihj tahan ra tuhun chihin yo. Ta quihvj tacha. Ta vaa ri maa cuví, ta cahān savi. Ta chiyō noo cha taan. Ta ñihi xaan coqn savi yuu.

12

Nu chicān nyicon noo coo cahnu chi noo ñaha sihi

¹ Tyicuan ta tuvj noo seña cahnu andiví. Vatyí quita noo ñaha sihi ta siquí noo ña ñanyii tari cha ñihnó ña vestido. Ta chañí ña siqui yoo. Ta yihí noo corona cha uchi uvi tiñoo andiví xiñi ña. ² Ta ñaha sihi ihya ñohó sehe ña. Ta chacú chaa vavaha ña chihin cha uhvi cha cacú sehe ña, vatyí nyehé xaan ña tindoho cha cua cacu sehe ña. ³ Tyicuan ta quita nonga seña ityí andiví. Ta nyehj noo coo cuaha cahnu. Ta nyaá ucha xiñi ti, ta uchi ndiqui ti. Ta tahan tahan xiñi ti yihí noo corona. ⁴ Ta chihin suhma ti sanacoyo ti cha yatyin cha sava tiñoo andiví siqui ñuhu ñayiví. Ican coo ihya chicuñi ti nuu ñaha cha cua cacu sehe cuan, vatyí ta cha cacu ri cue ta cachi ti chi cue. ⁵ Ta ñaha cuan sacacú ña noo rayi. Ta ican ra cuacunyaca ñaha tandihí ñáyiví iyó siqui ñuhu ñayiví. Ñihi xaan cua cunyaca ñaha ra tari cha chihin noo yutun caa vee. Ta cha yaha cacu ra, naxita Nyoo chi ra nu nyaá ra nu tyayu ra. ⁶ Ta ñaha cuan chinq ña cuahan ña noo ñuhú ityí, nu sanduvaha Nyoo noo nu coo ña, vatyí yucuan cucuhva ra cha cachi ña

cha ni ri ca cha noo mil uvi cientu uñi xico quiví.

⁷ Yaha cuan ta chiyō noo cuatyí nya andiví, nu cañi tahan ángel cahnu Miguel ta tandihí ángel cuenda ra chihin coo cahnu cuan. Ta coo cuan ta tandihí tatyí ña vaha cuenda ti, cacañi tahan chihin ra Miguel. ⁸ Soco ña saha ganaa ti cha cañi tahan ti. Ta ña ñihj ca ti nu ndoo ti nya andiví chihin tatyí ña vaha cha candihí chihin ti. ⁹ Tyicuan ta tava ñehe Nyoo chi ti, cuví ti Coo Chahnu, cha nañi cuihna ra cuví nuu, ra cha sandaví ñaha chi tandihí ñáyiví iyó siqui ñuhu ñayiví. Maa ra ta tatyí ña vaha cuenda ra cacanacoyo ra nya nu ñuhu ñayiví.

¹⁰ Tyicuan ta chiñi noo ndusu ñihi nya andiví. Catyí chi tyehe caa:

—Cha chaa nu cacu añima yo vityin. Cha saha ganaa tunyee iñi Nyoo. Cha nyacá ñaha Nyoo yo vityin chihin ra Cristo Sehe ra. Vatyí cha tava ñehe ra chi ra cha tyaa xaan cuatyí siqui ra yañi yo ndiyaca ta ñiyaca nuu Nyoo. ¹¹ Ta ra yañi yo cacuví chasaha ra chi ra chihin ñiñi ra cuví Mbee Luhlu, ta chihin tuhun Nyoo cha cacahan ra tuhun chihin ñáyiví. Vatyí ña yuhvi ca ra cha cucúvi ra. ¹² Yucuan chaha cusii cuñi nyoho cha iyó ndo andiví. Soco jndahvi nyoho ñu iyó siqui ñuhu ñayiví ta nu tyañuhu! Vatyí cuihna canacava ra nya andiví ta nyacua nya siqui ñuhu ñayiví nu nyicú ndo. Ta xaan xaan ra

vatyi chitó ra vatyi suhva ri ca quiví ra nyaá.

¹³ Ta cha nyehe coo cahnu cuan vatyí nacavá ti nu ñuhu ñayiví, chica nyicon ti chi ñaha cha sacacú sehe cuan. ¹⁴ Soco ñaha cuan ñihí ña uvi tahan ndichin nahnu tasu, tacuhva cuví ndava ña ta cono ña chi coo cuan nyacua nya ñuhu ityi cuan. Ta yucuan cuví nu cuñihí ña cha cachi ña chichi cha uñi cuiya sisava. ¹⁵ Ta coo cuan tuchí ti ndutya chihin yuhu ti, vatyí cono noo yuvi cahnu, vatyí satyañi chi ñaha cuan. ¹⁶ Soco ñuhu ñayiví tyinyee chi ña, vatyí ndata chi ta quihví yuvi cahnu cha tuchí coo cahnu cuan chihin yuhu ti. ¹⁷ Ta cha cuenda cha ña cuví chasaha ti chi ña, cuahan tí cua cañi tahan ti chihin ñayiví vachí tata ña, ñu cha quichahá tuhun cahán Nyoo, ñu nyicón cha ndicha cha cahán ra Jesucristo chihin cha ñi iñi ñu.

13

Nu nyehe ra Juan uvi quití quiñi caa

¹ Chicuinanyají nu ñiti yuhu tyañuhu cuan. Ta nyehí quitá noo quití quiñi xaan caa nuu tyañuhu. Ta nyaá ucha xiñi tí, ta uchi ndiquí ti. Ta tahan tahan ndiquí ti yihí noo corona. Ta xiñi tí nyaá noo tuhun cha cahán ña vaha siqui Nyoo. ² Quití quiñi caa ihya caá ti tari caá noo cuiñi. Ta tari caá chaha yihí caá chaha ti. Ta yuhu ti tari caá yuhu ndicaha caá. Ta coo cahnu cuan chahá ti ityi chí

quití quiñi caa cha cunyaa ti nu tyayu ti. Ta chahá ti ityi chí ti cha cunyaca ñaha ti chí ñáyivi. ³ Ta noo xiñi quití quiñi caa cuan tari maa cha nyaá noo nu cahví cahnu. Soco nu cahví cuan nduvahá. Ta iyo xaan cuñí tandihí ñáyivi iyó siqui ñuhu ñayiví. Ta nanyicón ñu chí quití quiñi caa cuan. ⁴ Ta sacahnú tucu ñu chí coo cahnu cuan, vatyí chahá ti ityi chí quití quiñi caa cuan. Ta sacahnú tucu ñu chí quití quiñi caa cuan, ta catyí ñu:

—¿Yóo cha cuví chí tari cuví chí quití quiñi caa ihya? ¿Ta yóo cha cuví cañi tahan chihin tí? —catyí ñu.

⁵ Ta ñihí tucu quití quiñi caa cuan ityi vatyí cahan ña vaha ti ta cahan quiñi caa ti siqui Nyoo. Ta cua cunyaca ñaha ti chichi cha uvi xico uvi yoo. ⁶ Ta tyicuan caa sacuví ti. Cahán ti siqui Nyoo. Ta cahán ña vaha ti siqui nu nyaá Nyoo. Ta cahán ti chí ñu nyicú andívi. ⁷ Ta chicoo tucu ityi chí ti cha sacoo ti cuatyí siqui ñu cuenda Nyoo nyacua nya cuví chasaha ti chí ñu. Ta chicoo ityi chí ti siqui ñáyivi ndihí ri tata, ñáyivi siin siin sahan cahan, ñáyivi tandihí ri ñuu nyihí, tandihí ri ñuu nahnu, ⁸ tandihí ñu cha ma ñihí ñayiví chaa coo chihin ra cuví Mbee Luhlu, ra cha chihí. Ma ñihí ñu vatyí nyata ni cumañi chingo ñuhu ñayiví ta ñahri sívi ñu nyaá nu libru ra. Tandihí ñu cuan cusacahnu ñu chí quití quiñi caa cuan. ⁹ Ta ñu cutuñí iñi, na quichaha ñu tuhun ihya:

10 Ñu cunyaca vehe caa chi inga ñu, suri cuhun tucu maa ñu. Ta ñu cha cachahñi chihin cha xaan, suri chihin cuan cucuvi tucu maa ñu. Yucuan chaha cuñi xaan chi cha cun- yee xaan iñi ñu cuenda Nyoo. Ta cuñi chi cha chino iñi ñu chi ra.

11 Yaha cuan ta nyehi inga quiti quiñi caa. Quita ti chichi ñuhu. Quiti ihya nyaá uvi ndiqui ti cha tari caá ndiqui mbee luhlu. Soco tari cahán noo coo xaan vavaha cahán ti. 12 Ta nyacá ñaha ti tari nyacá ñaha quiti quiñi caa cha xihna ri cuan. Suri chihin nuu quiti cha xihna ri cuan nyacá ñaha ti. Ta tyiyuhu ti chi ñuhu ñayivi ta ñu iyó siqui na sacahnu ñu chi quiti quiñi caa cha xihna ri cuan, quiti cha nduvaha nu cahvi cahnu cha chinyaá chi ti. 13 Ta cuaha xaan milagru sacuvi ti. Nyacua cuvi sanacoyo ti ñuhu cayú ityi andivi chihin nuu ñayivi. 14 Ta sandavi ñaha ti chi ñayivi iyó siqui ñuhu ñayivi chihin seña cha cuvi sacuvi ti chihin nuu quiti quiñi caa cha xihna ri cuan. Ta tachí ti nachino noo xiñahñu quiti quiñi caa cha tahnya cahvi chihin mityi, soco ña chihí ti. 15 Ta quiti quiñi caa cu uvi cuan chicoo ityi chi ti cha cuhva ti cha conyito xiñahñu quiti quiñi caa cha xihna ri cuan, vatyí xiñahñu cuan cuvi cahan. Ta tachí xiñahñu cuan nacuvi tandihi ñayivi ña cuñi sacahnu chi chi. 16 Ta siin ri catyí ti vatyí na cunyaa noo tuñi chi tandihi ñayivi,

tandihí ñu nyihí, ñu chahnu, ñu tyayii, ñu ndahvi, ñu yori chitoho, ta ñu iyó chitoho. Ta cucunyaa tuñi cuan ndaha chiyo vaha ñu o tyaan ñu. 17 Ta yori maa cuví sata ta xico tatu ñahri tuñi cuan nyaá chi ñu. O tatu ñahri sivi ti, o número sivi ti nyaá chi ñu. 18 Tuhun ihya cuñi xaan chi cha chiñi tuñi. Ñu cutuñi iñi, na saha ñu cuenda número quiti quiñi caa cuan. Vatyí número noo rayii cuví. Ta número ra cuan ícan cuví iñu cientu uñi xico iñu.

14

Nu sacahnú cientu uvi xico cumi mil ñáyivi chi Nyoo chihin cha chitá ñu

1 Yaha cuan ta nyehi chi ra cuví Mbee Luhlu, nanyaá ra nu yucu Sión. Ta chihin ra tayucú cientu uvi xico cumi mil ñáyivi cha nyaá sivi ra tyaan ta sivi Sutu ra. 2 Tyicuan ta chiñi noo cha cayu cha quichi ityi andivi, tari cayu cuaha yuvi nahnu. Ta tari cahán savi cha ñihi xaan, o tari noo ndusu cha cuaha xaan ra casacuacú arpa. 3 Ta cachitá ñu noo yaa chaa nuu tyayu Nyoo, ta nuu ndi cumi cha nyitó cuan, ta nuu tandihí ra cha vaha chahnu cuan. Ta yori cuví cutuhva yaa cuan, iin ri maa cientu uvi xico cumi mil ñu cha cacu añima siqui ñuhu ñayivi. 4 Ican ñu ihya cuví ñu cha ña chicoo cuatyí ñu chihin inga rayii ta ni ri rayii chihin inga ñusihí, vatyí ii ndoo ñu, ta nyicón ñu chi ra cuví Mbee Luhlu

tandihí ri ityi nu cuahan ra. Cacū añima ñu ta cuví ñu ñu xihna ca chahā cuenda ñu chi ñu chi Nyoo ta chi ra cuví Mbee Luhlu. ⁵ Yori cuví catyi vatyí cuendu ñu, vatyí ni noo cuendu ña tuhvá ñu cahan. Yucuan chaha ñahri cuatyí ñu nuu Nyoo.

Tuhun cha sacoto ũi tahan ángel

⁶ Tyicuan ta nyehí inga ángel cuahan ndava ra andívi. Ta nyisó ra tuhun Nyoo cha ma ndihí ca maa, ta ican tuhun ihya cuví cha sacacú ra Cristo añima yo, Vatyí cusacoto ra tuhun ihya chi ñáyivi iyó síqui ñuhu ñayivi, ñáyivi ndihí ri ñuu nahnu, ta ndihí ri ñuu nyihi, ta ñáyivi ndihí ri tata, ta ñáyivi siin siin sahan cahan. ⁷ Ta ñihi xaan cahan ra ta catyí ra:

—Na yuhvi ndo chi Nyoo, ta sacahnu ndo chi ra. Vatyí cha chaā cuhva cha cua cu-tuñi chi ñáyivi. Sacahnu ndo chi ra savahā andívi ta ñuhu ñayivi, ta tyañuhu ta ndohyo ndutya.

⁸ Tyicuan ta cuahan inga ángel cuan chata ra, ta catyí ra:

—Cha canacava ñuu Babilonia cahnu vityin, cha taní chi. Vatyí ñu iyó ñuu cuan sañahā ñu chi inga ñáyivi iyó síqui ñuhu ñayivi cha quiñi caa tari sacuví maa ñu. Tari quívi cha sacuíñi ñu chi ñu chihin vinu ña vaha cuví cuan.

⁹ Ta nacahan ángel cu ũi chihin cha ñihi ndusu ra ta catyí ra:

—Tatu nya noo ñu sacahnú ñu chi quiñi quiñi caa cuan ta chi xiñahñu ti, o chahá ñu chi ñu cha cunyaa tuñi ti tyaan ñu, o ndaha ñu, ¹⁰ cunyehe xaan ñu tindoho vatyí cutyíhi Nyoo chi ñu nu ñuhu, ta nu azufre tari cha cusacoho Nyoo noo vinu xaan chi ñu. Ta chihin nuu ángel ta chihin nuu ra cuví Mbee Luhlu cucuví cuan. ¹¹ Ta ñuhma cha quitá nu nyehé ñu tindoho cuan tyicuan ri maa cuquita chi. Ta ma nyitatu maa ñu ndiyaca ta ñiyaca nu cohon ñu yucuan, vatyí sacahnú ñu chi quiñi quiñi caa cuan ta chi xiñahñu ti, o chahā ñu cha cunyaa tuñi sívi ti chi ñu. ¹² Yucuan chaha ñu yihí cuenda Nyoo, ñu quichahá tuhun cahán ra, ñi iñi ñu chinó iñi ñu chi ra Jesús ta cuñí chi cha cunyehe xaan iñi ñu cha nyehe ñu tindoho sacuvi inga ñáyivi.

¹³ Tyicuan ta chiñi noo ndusu cha quichí ityi andívi, ta catyí chi chíi tyehe caa:

—Tya tuhun ihya: “Vityin ta ityi nuu ca, si xaan cucuvi chi ñu chihí ta chinó iñi ñu chi Sutu Mañi yo.” Ndicha, catyí Tatyí Ii Nyoo vatyí cunyitatu ñu chihin tyiño sahá ñu. Ta ñn ri cuhun cha vaha cha sacuví ñu chihin ñu.

Nu cutachi tuñi Nyoo chi ñáyivi

¹⁴ Tyicuan ta nanyehí ta nyehí noo vico cuichin. Ta síqui vico cuan nyaá noo rayi cha ndicha cuii maa cha quichí nya gloria. Ta yihí noo corona xuhun cuan xiñi ra.

Ta yihí ndaha ra noo mityi cutya ta xaan. ¹⁵ Ta quita nonga ángel chichi vehe ñuhu ta chaa canachaꝯ ra chi ra nyaá siqui vico cuan. Ta catyí ra:

—Vityin saha tyiñon chihin mityun, ta na satacon cosecha cha iyó siqui ñuhu ñayivi. Vatyí cha chaꝯ cuhva, ta cha iyó siqui ñuhu ñayivi cha chityí chi —catyí ra.

¹⁶ Tyicuan ta ra cha nyaá siqui vico cuan sayaha ra mityi ra siqui ñuhu ñayivi, ta nasataꝯ ra cha iyó nuu chi.

¹⁷ Tyicuan ta inga tucu ángel quita chichi vehe ñuhu cha nyaá andivi. Ta nyisó tucu maa ra noo mityi cutya cha xaan vavaha. ¹⁸ Ta nu nyaá arta quita tucu nonga ángel cha iyó ityi chi cha cunyaca ñaha chi ñuhu cha cayú. Ta canachaꝯ ra ta cana ra chi ra cha nyisó mityi cutya cha xaan cuan. Ta catyí ra chi ra:

—Saha tyiñon chihin mityi xaan cha nyisón chiña, ta na satacon vatu tichaha ndivi cha iyó siqui ñuhu ñayivi, vatyí cha chityí —catyí ra.

¹⁹ Ta ángel cuan sayaha ra mityi ra siqui ñuhu ñayivi ta chahnya ra tichaha ndivi cha iyó siqui ñuhu ñayivi. Ta tyihí ra noo nu tyihi ra vatyí cucuhñi ra ta quita ndutya chi. Ta cha tyehe caa cuñí chi catyí cha cutachi tuñi Nyoo chi ñayivi. ²⁰ Ityi chata ñuu cachahñi ra tichaha ndivi cuan, ta cuñí chi catyí vatyí cachihí cuaha xaan ñayivi, ta nu cuví cuan, cama xaan

cama xaan niñi ñu chati. Ta chaa chi nya nu sucun nu nyaá frenu yuhu caballu ta tari cuhva noo uñi cientu kilómetro chinó niñi cuan.

15

Nu quita ángel chihin ucha ca tahan tindoho cha cunyehe ñáyivi nu ndihi tuhun

¹ Nyehe nonga seña cahnu andivi, ta yuhvi xain cuví, vatyí nyehí ucha tahan ángel chihin ndi ucha tindoho. Chihin ihya cuví nu ndihi tindoho vatyí cundihi cha cuxaan Nyoo chihin ñáyivi cha ña quichahá ñu tuhun cahán ra.

² Ta nyehe tiqui noo cha tari caa tyañuhu, xiño tari caá ino, nasaca chi chihin ñuhu cha cayú. Ta ñu cha yaha cuví chasaha chi quití quiñi caa cuan ta chi xiñahñu ti, ñu cuví chasaha cha ma cunyaa número sivi ti cuan chi ñu, tandihí ñu tayucú ñu yuhu tyañuhu cha xiño cuan. Ta ndahá ñu arpa, cha chaha Nyoo chi ñu. ³ Ta chitá ñu yaa ra Moisés, ra sacuví tyiño nuu Nyoo, ta yaa ra cuví Mbee Luhlu. Ta tyehe caa catyí ñu: Cahnu ta iyo xaan caá tandihí maa cha sacuvín.

Nyoo, Sutu ndi, iyó tandihí tunyee iñi chuun.

Ndoo xaan ta ndicha xaan ityun.

Yoho Rey cuvún cuenda tandihí ñáyivi iyó siqui ñuhu ñayivi.

⁴ ¿Yóó cha ma yuhvi chuun, yoho Sutu Mañi nyuhu?

¿Yóó cha ma sacahnu chuun?

Vatyí noo tuhun ri maun cuví ra ii.

Ta cuquichi coyo ñáyiví tandihí ñuu, ta cusacahnu ñu chuun.

Vatyí cha nyehe ñu cha vaha cha sacuvún, catyí ñu chitá cuan.

⁵ Cha yaha tuhun ihya ta nanyehí nuña yuvehe ñuhu nya andiví nu cumi vaha ñu tabla cha nyaá ley. ⁶ Ta chichi vehe ñuhu cuan quitá coyo ndi ucha ángel cha canyisó ndi ucha tindoho cuan. Ta cañihnó ra sahma finu, cuichin ta xiño. Ta cayihí ra sincho xuhun cuaan ta nya pechu ra chitahan.

⁷ Tyicuan ta noo cha nyitó cuan, chahá cuan noo noo copa xuhun cuaan chi ndi ucha tahan ángel cuan. Ta chichi copa cuan tyitu maa yihí cha xaan Nyoo cha cutachi tuñi ra chi ñáyiví. Ta ican ra iyó ra tyicuan ri maa.

⁸ Ta chichi vehe ñuhu cuan chítu maa chihin ñuhma cha cuenda cha cahnu xaan cuví Nyoo ta cha cuenda tunyee iñi iyó chi ra. Ta yori maa cuví quihví chichi vehe ñuhu cuan cha niri ca cha cumañi ndihí ndi ucha tindoho cha nyisó ndi ucha tahan ángel cuan.

16

Copa cha yihí tindoho cha cua saquichi ndi ucha tahan ángel cuan

¹ Tyicuan ta chiñi noo ndusu ñihí cha quitá vehe ñuhu nu nyaá Nyoo. Ta catyí chi chi ndi ucha ángel cuan:

—Cuahan ndo cua coyo ndo cha ñohó chichi copa chiña siqui ñáyiví iyó siqui ñuhu ñayiví, vatyí Nyoo cutachi tuñi ra chi ñu —catyí ndusu cuan.

² Ángel cha xihna ri cuan chahan ra ta coyo ra cha ñohó chichi copa cuan siqui ñáyiví cha nyaá tuñi quitá quiñi caa cuan chi, ñu cha sacahnú xiñahñu ti. Ta quitá noo nu cahvi xaan chi ñu, ta uhvi xaan.

³ Ta ángel cu uvi cuan coyo ra cha yihí chichi copa ra nu tyañuhu. Ta ndutya tyañuhu cuan nanduví niñi tari niñi noo ndiyi, ta tandihí cha nyitó chichi tyañuhu cuan cachihí.

⁴ Ta ángel cu uñi cuan coyo ra cha yihí chichi copa ra siqui yuvi nahnu ta siqui ndohyo ndutya ta cananduví chi niñi. ⁵ Tyicuan ta chiñi cha cahán ángel cuenda ndutya tyehe caa:

—Sutu Mañi yuhu, yoho cuvún noo ra vaha vatyí tachí tuñun chi ñáyiví tyehe caa, Sutu Mañi yuhu, Nyoo ii cuvún ta iyón vityin ta nu quichaha tandihí. ⁶ Vatyí maa ñu cachati ñu niñi ñáyiví cuendon ta niñi ra cacuví profeta cuendon. Ta vityin yoho tari cha cunasacohun niñi chi ñu vatyí tyicuan caa tahán chi chi ñu —catyí ángel cuan.

⁷ Ta chiñi tiqui vatyí cahan noo cha cahán ityi nu nyaá arta Nyoo tyehe caa:

—Ndicha, Sutu Mañi yuhu Nyoo, iyó tandihí tunyee iñi chuun. Vityin cha yaha tachi

tuñun chi ñáyiví chihin cha ndicha ta chihin cha ndaa —catyí cuan.

⁸ Ta ángel cu cumi cuan coyo ra cha yihí chichi copa ra nu ñanyii. Ta chicoo ityi chi ñanyii cuan vatyí cahmí chi chi ñáyiví chihin ñuhú chi. ⁹ Ta tandihí ñu, quiñi xaan chahmí ñanyii chi ñu. Soco ña canasama ñu cuhva iyó ñu, ni ña casacahnu ñu chi Nyoo. Ta cahan ña vaha ñu siqui Nyoo ra cuví sanyehe tindocho chi ñu tyehe caa.

¹⁰ Ta ángel cu ohon cuan coyo ra cha yihí chichi copa ra siqui tyayu quití quiñi caa cuan. Ta nduñaa ri nu nyacá ñaha ti. Ta ñáyiví cuenda ti, nyacua nacachi yihí ñu yaa ñu cha cuenda cha nyehé xaan ñu cha uhví. ¹¹ Soco ni tyicuan caa ta ña sandihí ñu cha sacuví ñu cha ña vaha. Ta cahan ña vaha ñu siqui Nyoo ra nyaá andiví cha cuenda cha uhví chi ñu ta cha cuenda nu cahví chi ñu.

¹² Ta ángel cu iñu cuan coyo ra cha yihí chichi copa ra siqui yuvi cahnu Eufates. Ta yuvi cuan na ityi chi tacuhva vatyí nuña noo ityi cha yaha ra cacuví rey cha vachi coyo ityi nu caña ñanyii. ¹³ Tyicuan ta nyehí cha quitá yuhu quití quiñi caa cuan ta yuhu coo cahnu cuan ta yuhu ra cuví profeta cuendu. Vatyí caquitá coyo uñi tahan tatyí ña vaha yuhu ra cuan. Tari caá sahva caá tatyí ña vaha cuan. ¹⁴ Ican ihya cuví tatyí cuhna cha casacuví milagru nahnu. Ta quitá coyo chi

vatyí sandu iñ ri chi tandihí rey cha iyó siqui ñuhu ñáyiví, vatyí cacañi tahan ra quiví cusañaha Nyoo tyi iyó tandihí tunyee iñi chi ra. ¹⁵ Ta catyí Nyoo:

—Nyehé ndo vatyí yuhu cha vachi tari noo ra suhu. Vatyí sana ri iñi ndo ta quihví ra suhu vehe ndo. Siñi xaan cucuvi chi ñáyiví nyatú tuhva ri quiví quichi. Ta vii cumí ñu sahma ñu (o cuñí chi catyí añima ñu) tacuhva cha ma cuvityiyaa ñu nu cua quichi, ta ma cucahan nuu ñu, catyí Nyoo.

¹⁶ Ta cundu iñ ri ra cacuví rey nu nañi chí chihin sahan hebreo Armagedón.

¹⁷ Tyicuan ta ángel cu ucha cuan coyo ra cha yihí chichi copa ra nu tatyí, ta nya vehe ñuhu andiví nu nyaá Nyoo nu tyayu ra, quitá noo ndusu chaa xaan ta catyí chí:

—Cha cuví vityin —catyí ra.

¹⁸ Tyicuan ta vaa ri maa cuví ta cahan savi ta quihví tacha. Ta ñihi xaan tañ siqui ñuhu ñáyiví. Ta ndaha chicoo ñáyiví siqui ñuhu ñáyiví, ta ña tuhva tañ cha ñihi xaan tyicuan caa. ¹⁹ Ta nu tañ cuan ndata ñuu cahnu cuan, uñi nu ndata. Ta tandihí ca ñuu siqui ñuhu ñáyiví canacoyo. Ta Nyoo nicohon iñi ra chí ñuu cahnu Babilonia cuan vatyí quiñi xaan sacuví ñu. Ta sanyehe xaan ra tindocho chí ñu vatyí cuxaan xaan ra chí ñu. ²⁰ Tandihí ñuhú cha iyó chichi tyañuhu ta tandihí yucu, ndihí cuanaa. ²¹ Ta nahnu xaan tucu savi

yuu coon ityi andiví siqui ñáyiví. Ta vee xaan. Tari noo cha uvi xico kilu vee noo noo savi yuu cuan. Ta ñáyiví cahān ña vaha ñu siqui Nyoo cha cuenda tindoho savi yuu cuan, vatyi cuví chi noo tindoho cahnu xaan cha cuenda ñu.

17

Nu cua tachi tuñi Nyoo chi noo ñaha cata iñi

¹ Tyicuan ta chichi cha ucha tahan ángel cha cayihí ndaha ucha copa cuan, quichí noo ra nu nyaí, ta catyí ra chii:

—Ñaha tyi cusañahi chuun yoso caa cucutuñi chi ñaha cata iñi cahnu cha nyaá siqui tyañuhu. ² Vatyi ra cacuví rey siqui ñuhu ñáyiví casacuví ra cha quiñi caa chihin ña, ta ñáyiví cha iyó siqui ñuhu ñáyiví, tiví xaan ñu chihin cha quiñi caa cha sacuví ña —catyí ra chii.

³ Tyicuan ta nyehi noo cha sañaha Tatyí Ii Nyoo chii, ta chinyacā ángel cuan chii chiqui ndi nu yori maa ñáyiví iyó, ta yucuan nyehi chi noo ñaha, yosó ña siqui noo quiñi cuaha quiñi caa. Ta nyicú sivi cha cahán ña vaha siqui Nyoo chi ti. Ta ucha tahan xiñi ti nyaá ta uchi ndiqui ti.

⁴ Ta ñaha cuan ñihnó ña noo sahma tyacu nyaa ta tyacu cuaha. Ta cuaha xaan xuhun cuaan iñi chi ña, yuu tyaqui ta perla ñandihí. Ta yihí ndaha ña noo copa xuhun cuaan tyitú yihí chihin cha ña vaha ta cha quiñi caa cha sacuví

ña. ⁵ Ta tyaan ña nyaá noo sivi cha cuví noo tuhun xehe cha ña cutuñi iñi ñáyiví. Vatyi catyí chi: “Ican ñaha sihi ihya cuví ñuu Babilonia cahnu, sihi tandihí ñu cha cata iñi ta tandihí cha ña vaha cha iyó siqui ñuhu ñáyiví.” ⁶ Tyicuan ta tuví iñi vatyi ñaha cuan chiñi ña chihin cha chihí ña niñi ñu cuenda Nyoo, ta ñu cha cachihí cha cuenda cha cahān ñu tuhun ra Jesús. Ta cha nyehi cuan, iyo xaan cuñí. ⁷ Tyicuan ta catyí ángel cuan chii:

—¿Ñáá tuhun cha iyo xaan cuñún? Cua sacote chuun ñáá cha cuñí chi catyí tuhun xehe ñaha sihi ihya ta quiñi quiñi caa cha yosó ña, quiñi cha nyicú ucha xiñi ta uchi ndiqui. ⁸ Quiñi quiñi caa cha nyehun cuan, cuví ti noo quiñi cha chiyo ta vityin yori ca ti iyó. Soco cuquita ti chichi yavi cono xaan cha ñahri nu chitahan. Yucuan ñohó ti cha ni cumañi ca ndihí tuhun ti. Ta ñáyiví iyó siqui ñuhu ñáyiví iyo xaan cucuñi ñu na nanyehe ñu chi quiñi quiñi caa cha chiyo tyicuan, soco vityin yori ca ti iyó, soco cuquichi ti inga chaha. Ñu cua nyehe chi ti cuan, cuví ñu ñu cha ñahri sivi nyaá nu libru Nyoo nyata quiñi chino ñuhu ñáyiví. Ican libru cuan cucatyí yóó ñáyiví cuconyito tyicuan ri maa. ⁹ Ihya cuví noo cha cuñí chi nacoto ndo; Ndi ucha xiñi ti cuan cuñí chi catyí ucha tahan yucu cha nyaá ñaha cuan siqui. ¹⁰ Ta xiñi ti cuñí tucu chi catyí ucha tahan rey. Ta ohon tahan

rey cuan cha yaha chinyaca ñaha ra. Ta rey cu iñu nyacá ñaha ra vityin. Ta ra cu ucha, cumañi ca cucunyaca ñaha ra. Ta quivi quichi ra nu ndihi, ña naha cucunyaca ñaha ra. ¹¹ Ta chichi cha ucha tahan rey cuan, cunanyita noo ra inga chaha, ta ican ra cucuvi ra rey cu uña. Ta ican tucu ra cuví quiti quiñi caa cha chiyo quivi cuan, ta vityin yori ca ti soco cunanyita ti inga chaha. Ta cha yaha cunyaca ñaha tucu ti, yucuan cuvi nu cua ndihi tuhun ti.

¹² Ta ndi uchi tahan ndiqui cha nyehun cuan, cuñi chi catyí ndi uchi tahan rey cha cumañi ca cacunyaca ñaha. Soco cucoo ityi chi ra cha cunyaca ñaha ra noo ora, in ri chihin quiti quiñi caa cuan. ¹³ Ndi uchi tahan rey cuan in xaan ri cuhva cucaca xiñi ra. Ta cunacuhva ra tunyee iñi ra chi quiti quiñi caa cuan. Ta tandihi ityi cha iyó chi ra cunacuhva ra chi ti. ¹⁴ Ta cucacañi tahan ra chihin ra cuví Mbee Luhlu. Soco ra cuví Mbee Luhlu cuan, cucuvi chasaha ra chi ra. Vatyí ican ra cuví nuu chi tandihi ra nyacá ñaha. Ta cuví tucu ra nuu chi tandihi ra cacuví rey. Ta ñu nyicú chihin ra, Nyoo nacana chi ñu ta nacachi ra chi ñu. Ta ñi xaan iñi ñu nyicón ñu chi ra.

¹⁵ Ta catyí tucu ángel cuan chii ñandihí:

—Tandihí tyañuhu cha nyehun cuan, cha nyaá ñaha cata iñi cuan siqui, ican cuví ñáyivi tandihí ñuu nyihi ta tandihí ñuu nahnu, ñu siin

siin sahan cahan. ¹⁶ Ta ndi uchi ndiqui cha nyehun xiñi quiti quiñi caa cuan cha cuví uchi tahan rey cuan, ican ra cuan cuasatasi iñi chi ñaha cata iñi cuan. Ta cusandoo ra chi ña cha notuhun ri maa ña. Ta cusanduvityiyaa ra chi ña. Ta cucachi ra coño ñuhu ña. Ta cutyihí ra chi ña nu cayú ñuhu. ¹⁷ Vatyí Nyoo sana ndaha ra ñima rey cuan vatyí casacuvi ra cuhva cuñi maa ra. Vatyí in ri cuhva cucaca xiñi ra, ta cucuhva ra ityi chi quiti quiñi caa cuan cha cunyaca ñaha ti tari rey nyacua nya chino cava tuhun cahán maa Nyoo. ¹⁸ Ñaha sihi cha nyehun cuan, ican cuví ñuu cahnu cha nyacá ñaha chi tandihí ra cuví rey siqui ñuhu ñáyivi.

18

Nu cua tiví ñuu Babilonia

¹ Cha yaha tuhun ihya ta nyehi inga ángel cha vachi noó ityi andivi ta iyó xaan ityi chi ra. Ta ñuhu ñáyivi ndichin xaan nduvi chihin cha ndichin ra. ² Ta ñihi xaan ndusu ra ta canachaá ra, ta catyí ra:

—Cha yaha tuhun ñuu Babilonia cahnu cuan. Ta cha nanduvi chi nu iyó ra ña vaha. Vehe tandihí nuu tatyí ña vaha cha nanduvi. Ta taca saa ña vaha nanduvi ñandihí. ³ Vatyí tandihí ñáyivi tiví ñu cha cuenda cuatyí sacuvi ñuu Babilonia cuan. Ta ra cacuví rey, ra nyacá ñaha siqui ñuhu ñáyivi tari cha cachiyo ra chihin ñaha cuan cha cuví ñuu Babilonia. Casacuvi ra cuatyí

chihin ña. Ta ra cha cuahan cuanaxico ñuu Babilonia cuan candutyayii ra chihin cha xico ra chi ñu ñuu cuan vatyí tandihí cuhva ta sanaa ñu xuhun ñu chihin cha cata iñi ñu.

⁴ Tyicuan ta chiñi nonga ndusu ityi andivi. Ta catyí chi:

—Quita ndo ñuu chiña, nyoho cha cuví ndo ñáyivi chii, tacuhva cha ma cutahan ndo sacuvi ndo cuatyí chihin ñu chiña, tacuhva ma cutahan ndo ndoho ndo tari maa ñu. ⁵ Vatyí cha caá ticuítí cuatyí ñu ñuu cuan, nyacua cha chaá chi nu nyaá Nyoo. Ta Nyoo cha nicohon iñi ra cha ña vaha sacuví ñu. ⁶ Cuhva ndo chi ñu suri maa cha chahá ñu chi inga ñáyivi. Ta uvi ca chaha sananyehe ndo tindoho siqui cha sacuvi ñu. Cuhva ndo noo tindoho cunyehe ñu cha ñihi uvi ca chaha ican saha cha chahá maa ñu chi inga ñáyivi. ⁷ Yucuan chaha cuhva ndo cha iyo xaan tahan ñu chihin ta sanyehe xaan ndo tindoho chi ñu tari cuhva cha sacahnú xaan ñu chi ñu ta cusii xaan iñi ñu. Vatyí catyí ñuu cuan chichi añima chi: “Ihya nyaí tari noo reina. Ñima ñaha chihí yii cuví, ta ni ma cunyehe tindoho”, chicá iñi chi. ⁸ Yucuan chaha chichi cha noo ri quívi cuquichi tindoho siqui ñuu cuan, cuquichi tuhun chihí, cuquichi tucuihya iñi ta coo tama ñuu cuan, ta cucayu chi chihin ñuhú. Vatyí iyó xaan tunyee iñi chi Nyoo Sutu yo ta cutachi tuñi ra chi ñu ñuu

cuan.

⁹ Ra cacuví rey siqui ñuhu ñáyivi ihya tari cha cachiyo ra chihin ñaha cha cuví ñuu cuan, cuacu chaa ra, cunducuihya xaan iñi ra na cananyehe ra ñuhma cha cayú ñuu cuan. ¹⁰ Ta nya sava ri cucuitayucu ra cha cuenda cha cayuhvi ra tindoho cuan. Ta cucatyí ra:

—¡Ndahvi yoho, ñuu cahnu Babilonia, ñuu cha chiyo xaan tunyee iñi chii! Vatyí noo tuhun cuhva ta chaá tindoho nyehún —cucacatyí ra.

¹¹ Ta ra cha canaxicó ñáá ndihí cha canaxicó, suri cucuacu chaa ra ta cucanducuihya iñi ra cha cuenda ñuu cuan. Vatyí yori ca sata cha canaxicó ra. ¹² Vatyí xicó ra xuhun cuaan, xuhun cuichin, yuu tyaquí, perla, sahma lino finu, sahma seda, ta sahma tyacu nyaá, ta tyacu cuaha. Ta nyisó tucu ra tandihí nuu vitu cha vixi chahán ta ñáá ndihí cha chinó chihin noho landa, vitu tyaquí, ta caa cha cuví bronce, ta caa cha cuví hierro, ta yuu cha cuví mármol. ¹³ Ta nyisó tucu ra canela, ñáá ndihí ca cha vixi chahán, tari cutu, mirra, perfume, vinu, acetye, yutyí paan finu, ta trigu. Ta suri nyisó tucu ra quití cuenda carga, ta mbee, caballu, carru. Ta nyacua nya añima ndahvi cha cuví musu ra ta caxico ra. ¹⁴ Ta catyí ra chi ñáyivi ñuu cuan tyehe caa:

—Ñahri ca cha tyaquí cha chiyo chuun, cha tahán xaan iñun. Ta cha cuachiyó tandihí

cha tyayiuun. Ta ma cunañihi ca maun tandihi cuan —catyí ra.

¹⁵ Ra cha caxicó tandihi ihya, candutyayii ra cha cuenda cha sata ñu ñuu cuan cha xicó ra. Cañi cucuitayucu ra chihin cha cayuhvi ra cha cunyehe ñu cuan tindoho. Ta cucuacu chaa ra ta cunducuihya iñi ra. ¹⁶ Ta cucatyí ra:

—¡Ndahvi ñuu cahnu cuan! Cuví chi tari noo ñaha sihi cha ñihnoo sahma lino finu, sahma tyacu nyaa ta tyacu cuaha. Ta iyo yihí ña xuhun cuaan, ta yuu tyaqui ta perla. ¹⁷ ¡Vatyí noo tuhun ri cuhva ta ndihi cha tyayii xaan cuan! —cucatyí ra caxico cuan.

Ta tandihi ra cuví capitán cuenda barcu, chihin ñu cañoho chichi, tandihi ñu casahá tyiño nu tyañuhu, nya sava candoó ñu. ¹⁸ Ta cha cananyehé ñu ñuhma cha cayú ñuu cuan, canachaa ñu, ta catyí ñu:

—¿Ñáá nonga ñuu chiyo tari ñuu cahnu ihya? Ñahri ca —cucatyí ñu.

¹⁹ Ta tyicu ñu niyaca xiñi ñu, ta chacu chaa ñu. Ta cuihya iñi ñu, ta canachaa ñu ta catyí ñu:

—¡Ndahvi nduví yo cha cuanaa ñuu cuan! Vatyí chihin cha tyayii ñuu cahnu cuan ndutyayii tandihi yo, ñu chicá noo nu tyañuhu chihin barcu. ¡Ta vityin noo tuhun cuhva luhlu ri ta cuanaa chi! —catyí ñu.

²⁰ Soco cusii cuñi nyoho cha cuenda ñuu cuan, nyoho cha iyó andivi, nyoho ñu

yihí cuenda Nyoo ta nyoho ra cachicá tyiño ra Cristo ta nyoho ra cacuví profeta Nyoo. Cusii cuñi ndo vatyí cha cuenda ndo ta tachí tuñi Nyoo chi ñu cuan, ta cha cuenda cha ña vaha cha sacuví ñu chihin ndo.

²¹ Tyicuan ta noo ángel cha iyó xaan tunyee iñi chi, nacoñehē ra noo yuu molino cahnu xaan ta tuchi ra cuahan nu tyañuhu, ta catyí ra:

—Suri tyehe caa cundihí tuhun ñuu Babilonia cahnu, Ta ni inga ca chaha ta ma nyehe ca ndo chi ñu. ²² Ta ma cuiñi con yaa ityi chichi ñuu cuan, vatyí yori ca cusacuacu arpa, ta ni flauta, ta ni trompeta, ta ma tiví ca ñu. Ta ni ma coo ca ra casahá tyiño ñáá ndihi tyiño. Ta ni ma tyacu ca cha cayu molino.

²³ Ta ni nonga ñuhú tima, ta ma cayu ca chichi ñuu cuan. Ta ni nonga chaha ta ma cuiñi yo ndusu ñu cha iyó ñu vico tandaha. Vasi ra canaxico cha chiyo ñuu cuan, ican ra cuví ra cahnu ca cuvi nuu ñáyivi iyó siqui ñuhu ñayivi. Nyoho ñu Babilonia, sandaví ñaha xaan ndo chi tandihi ñáyivi iyó siqui ñuhu ñayivi chihin cha sata si ndo.

²⁴ Vatyí cuaha xaan niñi ra cacuví profeta Nyoo iñi chichi ñuu cuan vatyí chahñi ñu chi ra. Ta iñi tucu niñi ñu cuenda Nyoo, ta niñi tandihi ñu cha cachahñi ñáyivi nicahnu ñuhu ñayivi.

19

¹ Cha yaha cuan, ta chiñi noo ndusu cha cuaha vavaha

ñáyivi nya andivi. Ta catyí ñu:
 ¡Cahnu xaan cuví Nyoo! Sutú
 Mañi yo, Nyoo cuví ra
 ra sacacú chi yo. Ta
 chi maa ra tahán chi
 cha sacahnu yo, tyi iyó
 xaan tunyee iñi chi ra.

2 Vatyí vaha sacutuñí ra chi-
 hin cha ndaa ta chihin
 cha ndicha.

Tachí tuñi ra chi ñaha cata iñi
 cuan.

Vatyí sativi xaan ña chi ñáyivi
 iyó siqui ñuhu ñayivi
 chihin cha quiñi caa
 cha sacuvi ña chihin
 ñu.

Ta yucuan chaha tachí tuñi ra
 chi ña, ta cha cuenda
 cha chahñi ña chi ñu
 sacuvi tyiño nuu ra.

3 Ta quichaha catyí ñu inga
 chaha:

—¡Cahnu xaan cuví Nyoo!
 Ñuhma cha cayú ña, ma cu-
 cuita ca maa cha ndaa chi ityi
 siqui —catyí ñu.

4 Ta ndi oco cumi ra cha
 vaha chahnu ta ndi cumi
 tahan cha nyitó cha nyicú nu
 nyaá tyayu Nyoo, cachicuiñi
 chiti ra nya nu ñuhú. Ta
 casacahnú ra chi Nyoo nu
 nyaá ra nu tyayu ra. Ta catyí
 ra:

—¡Na cuvi chi tyicuan caa!
 ¡Cahnu xaan cuví Nyoo! —ca-
 catyí ra.

5 Ta nu nyaá tyayu Nyoo,
 tyacu noo ndusu, ta catyí chi:
 Sacahnu ndo chi Sutú yo
 Nyoo

Tandihí nyoho cha sacuvi
 ndo tyiño nuu ra,
 ta quichahá ndo chi ra, vasi
 nyihi ndo, o chahnu
 ndo.

*Nu cua tandaha ra cuví
 Mbee Luhlu chihin ñáyivi
 chinó iñi chi ra*

6 Ta chiñi tiqui noo ndusu
 tari cha cuaha vavaha ñáyivi
 cahán, tari ndusu nu cuaha
 xaan yuvi ndutya, ta tari cha
 ñihi xaan cahán savi. Ta catyí
 chi:

¡Cahnu xaan cuví Sutú yo
 Nyoo! Vatyí cha
 quichahá nyaca ñaha
 ra ta iyó tandihí tunyee
 iñi chi ra.

7 Na cusí cuñi yo ta na cutu
 yo chihin tusí iñi. Na
 sacahnu yo chi ra.

Vatyí cha chaá cuhva cha cua
 coo yo vico tandaha ra
 cuví Mbee Luhlu.

Ta yoó cuacuvi yo tari noo
 ñasihí ra, cha nyatú
 tuhva ri yo quivi
 tandaha yo chihin ra.

8 Ta maa yo cucuihno yo
 sahma linu finu, ndí
 ta cuichin.

Vatyí sahma linu finu cuan
 cuñi chi catyí cha vaha cha
 sacuvi ñáyivi cuenda ra.

9 Tyicuan ta quichaha catyí
 ángel cuan chi:

—Tyáa tuhun ihya nu tutu:
 “¡Sí xaan cuví chi ñu cha
 nyaá huhun vico tandaha ra
 cuví Mbee Luhlu!”

Ta catyí tucu ra chii tyehe
 caa:

—Ican ihya cuví tuhun
 ndicha Nyoo —catyí ra chii.

10 Tyicuan ta chicuiñi chiti
 chaha ángel Nyoo cuan vatyí
 sacahni chi ra, soco catyí ra
 chii:

—Ma sacahnun chii, vatyí
 musu Nyoo cuví tucu yuhu
 tari yoho, ta tari tandihí ra

yañi yo cha nyicón tuhun ndicha ra Jesucristo. Chi Nyoo tahán chi sacahnu yo —catyí ra chii.

Vatyí tuhun ndicha ra Jesús, ican cuví cha chahá cuhva chi ra cacuví profeta, ra cha cachahá cuenda tuhun cahán Nyoo chihin yo.

Nu sañahá chi cuenda ra cha yosó caballu cuichin

¹¹ Tyicuan ta nyehi tanuña andivi. Tyicuan ta tuví noo caballu cuichin. Ta ra yosó chi ti nañi ra Ra Ndicha Cha Nii Iñi Sacuvi Tyiño Nu Nyoo. Vatyí chihin cha ndaa sacutuñi ra chi ñáyivi, ta cañi tahan ra chihin cha ña vaha chihin cha ndaa. ¹² Xiño xaan chiti nuu ra tari cha cayú ñuhu. Ta cuaha xaan corona yihí xiñi ra. Ta nyaá noo sivi chi ra cha noo tuhun ri maa ra chitó ra ñáá sivi nyaá chi ra. ¹³ Ta ñihnó ra noo sahma iñi niñi. Ta maa ra nañi ra Tuhun Cahán Nyoo. ¹⁴ Ta canyicón sindaro andivi chi ra, cañihnó ra sahma linu finu, sahma cuichin ta ndi. Ta cayosó ra caballu cuichin. ¹⁵ Ta chichi yuhu ra nañi Tuhun Cahán Nyoo cuan, quitá noo mityi cha xaan ni nduvi chiyo yuhu, vatyí chihin tuhun cahán ra cusañicuehe ra ñáyivi iyó siqui ñuhu ñáyivi. Ta ñihi cunyaca ñaha ra chi ñu tari chihin noo yutun caa. Maa ra cutachi tuñi ra chi ñu tari noo ra cha sacunyihi tichaha ndivi chihin chaha ra. Ta cusacoho ra vinu uva chi ñu, ta ihya cuñi chi catyí tyi cuxaan Nyoo chihin ñu ta

cutachi tuñi ra chi ñu vatyí chaha xaan ñu tisihi chi Nyoo ra iyó tandihi tunyee iñi chii. ¹⁶ Ta nu sahma ra ta nu sihin ra cuan nyaá letra cha catyí tyehe caa: “Ihya cuví Ra cuví nuu chi tandihi rey. Ta ican ra cuví nuu chi tandihi ra nyacá ñaha.”

¹⁷ Tyicuan ta nyehi chi nonga ángel nanyaá ra nu ñanyii. Ta chihin tandihi fuerza ra canachaa ra chi tandihi saa cha candavá ityi andivi, ta catyí ra chi ti:

—Ñaha ndo ta candu in ri ndo vatyí cuxiñi ndo cha chaha Nyoo cachi ndo. ¹⁸ Vatyí cachi ndo coño ra cacuví rey ta ra cuví nuu chi sindaro ta chi ra ndachan xaan saha chii. Ta cachi ndo coño caballu ta coño ñuhu ra cha cayosó chi ti. Cachi ndo coño tandihi ra, vasi ra yori chitoho o ra iyó chitoho, vasi ra nyihi o ra chahnu —catyí ra chi saa.

¹⁹ Tyicuan ta nyehi chi quití quiñi caa cuan ta chi ra cacuví rey cha iyó siqui ñuhu ñáyivi chihin sindaro cuenda ra, vatyí candu in ri ra vatyí cacañi tahan ra chihin ra yosó caballu cuichin cuan ta chihin sindaro cuenda ra. ²⁰ Ta tin ra chi quití quiñi caa cuan in ri chihin ra cuví profeta cuendu cuan, vatyí chihin nuu quití quiñi caa cuan ta sacuvi ra cuendu cuan milagru, ta sandavi ñaha ra chi ñáyivi cha chaha chi cunyaa tuñi quití quiñi caa cuan, ta chi ñu sacahnú chi xiñahñu ti. Ta nyitó nyitó ra ta tuchi ra yosó caballu

cuichin chi n̄nduvi ra nu ñuh̄ cha cayú chihin azufre. ²¹ Ta tandih̄i ca ñu cachih̄i ñu chihin mityi xaan cha quitá yuhu ra cha yosó caballu cuichin cuan. Ta tandih̄i maa saa, cachach̄i xaan ti coño ñu.

20

Nu sañahá chi cuenda noo mil cuiya

¹ Cha yahā tuhun cuan ta nyeh̄i chi noo ángel vachi noó ityi andiv̄i ta yih̄i ndaha ra ndaha ticu yuvehe yavi cono cuan. Ta yih̄i tucu ndaha ra noo cadena cahnu. ² Ángel ihyā t̄in ra chi coo cahnu cuan, quit̄i cha cuv̄i Coo Chahnu cuan, cha cuv̄i cuihna. Ta chahñ̄i ra chi ti chihin cadena noo mil cuiya. ³ Ta tuch̄i ra chi ti yavi cono cuan. Ta yucuan nacas̄i ra chi ti. Ta tyāa ra noo sellu yuvehe cuan tacuhva cha ma sandavi ñaha ca ti chi ñáyiv̄i iyó s̄iqui ñuhu ñayiv̄i, nyacua nya cha yaha noo mil cuiya. Ta cha yaha noo mil cuiya cuan ta cundachi tucu ti suhva ca quiv̄i.

⁴ Yahā cuan ta nanyeh̄i cuaha xaan tyayu tayucú. Ta nuu chi nyicú ñu cha chicoo ityi chi vatyi tachi tuñi ñu chi ñáyiv̄i. Ta nyeh̄e tiqui añima ñu chahnyā ñáyiv̄i xiñi cha cuenda cha cah̄an ñu tuhun Nyoo cha chah̄a cuenda ra Jesús chi ñu. Ta maa ñu, ña sacahnū ñu chi quit̄i quiñi caa cuan, ni chi xiñah̄ñu ti, ni ña chah̄a ñu chi ñu cha cunyaa tuñi ti tyaan ñu, ni ndaha ñu. Nyeh̄i vatyi ican ñu ihya,

canandotō ñu ta chicunyacā ñaha ñu chihin ra Cristo noo mil cuiya. ⁵ Ican ñu ihya cuv̄i cha nandotō cha xihna ca. Soco inga ityi ndiȳi ña nandotō ñu nyacua nya cha yahā mil cuiya cuan. ⁶ ¡S̄i xaan cuñi ñu ii cuenda Nyoo, ñu cha tahán chi nandotō cha xihna ri! Ta ma cahun ñu tuhun chih̄i cu uvi nu cuv̄i anyaya nu tachi tuñi Nyoo chi añima ña vaha. Vatyi cucuvi ñu sutu cha cuenda Nyoo ta cuenda ra Cristo. Ta cucunyacā ñaha ñu mil cuiya chihin ra. ⁷ Ta cha yaha mil cuiya cuan, tyicuan ta cundachi cuihna nu ñohó ra vehe caa. ⁸ Ta cuquita ra, ta cusandavi ñaha ra chi ñáyiv̄i nicahnu s̄iqui ñuhu ñayiv̄i. Cuquit̄a ra vatyi cusandavi ñaha ra chi ñáyiv̄i Gog ta Magog, ñu xaan iñi chi Nyoo. Ta cusandū in ri ra chi sindaro ñuu cuan vatyi cahun ra cuatyi. Cuaha xaan ra, tari maa ñiti yuhu tyañuhu. ⁹ Tyicuan ta cuahan coyo ra nicacahnu s̄iqui ñuhu ñayiv̄i. Ta cachas̄i cutya ra nu iyó ñu cuenda Nyoo ñuu Jerusalén nu cuñi xaan Nyoo. Soco Nyoo cusaquichi ra ñuh̄u ityi andiv̄i ta cucahmi chi chi tandih̄i sindaro cuan. ¹⁰ Ta cuihna cha sandav̄i ñaha chi ñu, cutuchi Nyoo chi ra chichi anyaya cahnu nu cayú ñuh̄u chihin azufre, nu tuch̄i tucu ra chi quit̄i quiñi caa cuan ta chi ra cha cuv̄i profeta cuendu. Ta yucuan cunyehe ra tindoho tyicuan ri maa ndiyaca ta ñiyaca.

Nu cua cutuñi chi ñáyiv̄i nu

tyayu cuichin nu nyaá Nyoo

¹¹ Tyicuan ta nyehi noo tyayu cuichin cahnu. Ta nyehi chi ra nyaá nuu tyayu cuan. Ta chihin nuu ra ta cuanaa ñuhu ñayivi ta andivi. Ta ñahri ca maa nu cucunyaa chi. ¹² Ta nyehi chi tandihi ñu ndiyi, ñu chahnu ta ñu nyihi, tayucú ñu nuu Nyoo. Tyicuan ta canuña libru cha nyaá tandihi cha sacuvi ñu quivi chiyo ñu ñayivi. Ta nuña tucu inga libru cha nyaá sivi ñu cha cuconyito tyicuan ri maa chihin Nyoo. Ñu ndiyi cuan cuacutuñi chi ñu ñáá ndihi cha chinyacuvi ñu cha nyaá nu tandihi libru cuan. ¹³ Ta tyañuhu nacuhva cuenda chi chi ndiyi cha cumi chi. Ta tandihi nu nyicú ñu chihí nu nyacá ñaha Tuhun Chihí, nacuhva cuenda chi ndiyi cha cumi chi. Ta tandihi ñu cuatahan chi chi ñu yoso cuhva cha casacuvi ñu. ¹⁴ Tyicuan ta cundihi Tuhun Chihí cuan ta ñahri ca nu cuacunyicu ñu chihí, vatyí cutuchi Nyoo chi ninduvi tahan cuan chichi anyaya cahnu nu cayú ñuhu. Ta ícan ihya cuví Tuhun Chihí Cu Uvi. ¹⁵ Ta yucuan tuchi ra chi ñu cha ñahri sivi nyaá nu libru cha cuenda ñayivi cha cua conyito chihin Nyoo tyicuan ri maa.

21

Nu nyehe ra Juan andivi chaa ta ñuhu ñayivi chaa

¹ Yahá cuan ta nyehi noo andivi chaa ta noo ñuhu ñayivi chaa, vatyí andivi ta ñuhu

ñayivi cha xihna ri cuanaa chi. Ta tyicuan caa tucu tyañuhu, cuanaa tucu cuan. ² Yuhu ra Juan nyehi ñuu ii Jerusalén chaa cha vachi noó ityi andivi nu nyaá Nyoo. Ta tyaqui xaan nduvii chi tari noo ñaha cha cua tandaha chihin noo ra, tyicuan caa nduvii chi. ³ Ta chiñi noo ndusu ñihi cha quitá ityi andivi, ta catyí chi:

—¡Nyehe ihya! Nyoo, iyó ra mahñu ñáyivi. Ta cua coo ra chihin ñu. Ta maa ñu cua cuvi ñu ñuu ra. Ta cua cunyaa ra chihin ñu. Ta cua cuvi ra Nyoo cuenda ñu. ⁴ Ta Nyoo cunacuhva ra ndutya nuu ñu. Ta ma cúvi ca ñu. Ta ma cucuihya ca iñi ñu. Ma cuacu ca ñu vatyí ma nyehe ca ñu tindoho. Ta ma nyehe ca ñu cha uhvi. Vatyí tandihi cha chiyo, cha yahá tuhun —catyí chi.

⁵ Tyicuan ta Nyoo, ra cha nyaá nu tyayu cahnu, catyí ra:

—Nyehe. Sanduchaj tandihi maa cha iyó.

Ta catyí tucu ra:

—Tyaa tuhun ihya, vatyí tuhun cahín ihya, ndicha. Ta cuví cuní iñun vatyí tuhun cahín cuchino cava —catyí Nyoo chii.

⁶ Yahá cuan ta catyí tucu ra chii:

—Cha tandihi chinqo cava vityin. Yuhu cuví ra xihna cuiri, ta yuhu cundoí nu ndihi tuhun. Ñáyivi cha ityi ndutya cha cuñi ñu tuhun yuhu, cucuhve ndutya cha chahá ñayivi cha ma naa ca maa coho ñu, ta ñahri cutyiyahvi

ñu. ⁷ Ñu cha cuví chasaha chi ra ña vaha, cuñihi ñu tandihi ihya, tari noo cha cundoo chi ñu. Ta yuhu cucuvi Nyoo cuenda ñu ta maa ñu cucuvi ñu sehi. ⁸ Soco ñáyivi cha yuhví xaan, ñu cha ña chinó iñi, ñu cha quiñi iyó, ñu cha chahñi ñáyivi, ñu iyó chihin rayi, ta ñima yí ñu cuví, o ra iyó chihin ñusihi ta ñima ñasihi ra cuví, ñu tasi, ñu casacahnú xitohyo, ta tandihi ñu cuendu, tandihi ñu cuan, tahán chi cuhun ñu chichi anyaya cahnu nu cayú ñuhú chihin azufre, nu cuví Tuhun Chihí Cu Uvi, nu tachi tuñi Nyoo chi añima ña vaha.

Nu nyehe ra Juan yoso caa cucuvi ñuu Jerusalén chaa

⁹ Tyicuan ta quichi noo ángel cha ucha tahan cuan, ra cha canyisó ndi ucha copa tyitú chihin ndi ucha tahan tindoho cuan. Ta cahán ra chihin ta catyí ra:

—Ñaha, ta cusañahi chuun yóo ñu cuví ñu yihí cuenda ra Cristo, ñu cha cuví tari ñasihi ra, tyi ra cuví Mbee Luhlu cuví ra —catyí ra chii.

¹⁰ Ta Tatyí Ii Nyoo chinyaca chii noo yucu cahnu ta sucun. Ta sañaha ra ñuu ii, ñuu Jerusalén cahnu cuan chii. Maa maa cuhva cha vachi noó ñuu cuan ityi andivi nu nyaá Nyoo, sañaha ra chii. ¹¹ Xiño xaan ñuu cuan chihin cha tyaqui Nyoo. Xiño xaan tari caá noo yuu tyaqui, tari caá yuu jaspe, ta xiño tari ino. ¹² Nicachico ñuu cuan sucun xaan sama. Ta iyó uchi uvi tahan yuvehe. Ta noo

ángel nanyaá tahan tahan yuvehe. Ta ndi uchi uvi tahan sivi tata ñáyivi Israel nyaá yuvehe cuan. ¹³ Uñi tahan yuvehe cuan nyaá ityi nu caña ñanyii. Ta uñi tahan ityi norte. Ta uñi tahan ityi tyañuhu. Ta uñi tahan ityi nu quee ñanyii. ¹⁴ Uchi uvi tahan yuu yihí nu sama ra nu cacú chaha chi. Ta nuu yuu cuan nyaá sivi ndi uchi uvi apóstol cuenda ra cuví Mbee Luhlu.

¹⁵ Ta ángel cha cahán chihin cuan, yihí ndaha ra noo yutun xuhun cuan, vatyí chihin cuan cutyicuhva ra ñuhú ñuu cuan, ta yuvehe ta nu sama nicachico ñuu cuan. ¹⁶ Cumi tahan tutun ñuu cuan nyaá. Ta inuu ri cuhva cha quehen ta cha cañi. Ta ángel cuan tyicuhva ra ñuu cuan chihin yutun xuhun cuan cuan. Ta tyicuhva ra, ta quitá uvi mil uvi cientu kilómetro. Ta inuu ri cha cañi ta cha sucun ta cha quehen. ¹⁷ Tyicuan ta tyicuhva ra nu sama nicachico ñuu cuan. Ta quitá uñi xico cumi metru cha cocon, tari tyicuhvá ñáyivi, tyicuan caa tyicuhva ángel cuan.

¹⁸ Chihin yuu jaspe sama yuhu ñuu cuan. Ta maa maa ri xuhun cuan cuví ñuu cuan. Tari caá noo ino cha ndi vavaha, tyicuan caa. ¹⁹ Ta yuu cha cuví cimientu cuan tandihi ri maa nuu yuu tyaqui cuví: yuu cha xihna ri cuví jaspe; yuu cha cu uvi cuví yuu zafiro; yuu cha cu uñi cuví yuu ágata; yuu cha cu cumi cuví yuu esmeralda; ²⁰ ta yuu cu ohon cuví yuu

ónice; ta cha cu iñu cornalina; ta cha cu ucha crisólito; ta cha cu uña berilo; ta cha cu ñn topacio; ta cha cu uchi criso-prasa; ta cha cu uchi ñn jacinto; ta yuu cu uchi uvi cuví amatista. ²¹ Ndi uchi uvi yuvehe cuan cuví chi uchi uvi tahan perla. Tahan tahan yuvehe cuan, ta chingo chi chihin noo ri perla. Ta nu cuví ityi cahnu ñuu cuan, maa ri maa xuhun cuaan cuví, tari ino cha xiño.

²² Ni noo vehe ñuhu ña nyehí chichi ñuu cuan, vatyí Sutu yo Nyoo, ra iyó tandihí tunyee iñi chii, ican cuví vehe ñuhu ñu cuan, ta tyicuan caa tucu ra cuví Mbee Luhlu. ²³ Ñuu cuan ña chiñuhú cha sacundichín ñanyii. Ta ni cha ndichin yoo ta ña chiñuhú. Vatyí suri maa cha ndichin Nyoo chihin ra cuví Mbee Luhlu cuví cha sacundichin chichi ñuu cuan. ²⁴ Tandihí ñu cha cacu añima, cucaca noo ñu nu ndichin ñuu cuan. Ta ra cacuví rey siqui ñuhu ñayivi cunyaca ra cha tyayii ra ta cuhva cuenda ra tandihí cha cahnu cacuví ra chi ñuu cuan. ²⁵ Ta ma nacunyasi yuvehe cha ñicahñu, ta yucuan ma coo cha cha cuaa. ²⁶ Ta tandihí cha tyayii, ta cha cahnu, cha iyó siqui ñuhu ñayivi cuchaa chi nya ñuu cuan. ²⁷ Soco ma cuví quihvi cha quiñi caa. Ni noo ñu sacuví cha quiñi caa, ni ñu cuendu ma cuvi quihvi ñu. Noo ri maa ñu nyaá sivi nu libro ra cuví Mbee Luhlu cuquihvi ñu, vatyí cuconyito ñu chihin ra tyicuan ri maa.

22

¹ Tyicuan ta sañaha ángel cuan noo yuvi cuii vavaha chii. Ndutya cha chahá cha conyito yo cuví. Cuii vavaha tari noo yutyi finu. Ta quitá yuvi cuan nuu nyaá tyayu Nyoo ta nu nyaá ra cuví Mbee Luhlu. ² Mahñu ityi cahnu ñuu cuan ta ninduvi chiyo yuvi cuan, nanyaá yutun cha chahá cha conyito yo. Ta uchi uvi chaha cha noo cuiya chahá tun chiti. Tahan tahan ri yoo chahá tun chiti. Ta ndaha tun, vaha cha cuví tatan chi ñáyivi iyó siqui ñuhu ñayivi. ³ Ñuu cuan, ñahri maa cha ña vaha cucoo vatyí yucuan nyaá Nyoo nu tyayu ra ta cucunyaca ñaha ra chihin ra cuví Mbee Luhlu. Ta cusacahnu ñu cuenda ra chi ra. ⁴ Ta cunyehe ñu chi ra chihin nuu ñu. Ta cua cunyaa sivi ra tyaan ñu. ⁵ Ta ma coo ca cha cha cuaa yucuan. Ta ñu coo yucuan ma cuchihñu ñuhu lámpara chi ñu, ni ñuhu ñanyii. Vatyí Nyoo Sutu yo cusacundichin ra nu nyicú ñu. Ta maa ñu cucunyaca ñaha ñu chihin ra tyicuan ri maa.

Nu sañahá chi vatyí cha cuyatyin quichi ra Cristo

⁶ Tyicuan ta catyí ángel cuan chii:

—Ihya tuhun ndicha cuví, ta cuví cunii iñun vatyí cuchino cava tuhun ihya. Ta suri maa Sutu yo Nyoo ra cahan chihin yuhu ra cacuví profeta cuenda ra ta cha naha, ican ra tachí ra chi ángel ra, vatyí sañaha ra chi ñu

sacuví tyiño nuu ra yoso caa cucuvi cha numi ri —catyí ra.

Ta catyí Sutu Mañi yo:

⁷ —iCha cuñi quichi! —catyí ra.

iSií xaan cuñi ñu cha sacuví cuhva cahán tuhun Nyoo cha nyaá nu libru ihya!

⁸ Yuhu ra Juan, chiñi tuhun ihya. Ta nyehi tandihí ihya. Ta cha yahá nyehi ta chiñi, chicuiñi chiti chaha ángel cha sañaha cuan chii, vatyí sacahní chi ra. ⁹ Soco maa ra catyí ra chii:

—Ma sacahnun chii, vatyí yuhu, musu Nyoo cuví, tari yoho. Ta yañun cuví, tari ra yañi yo cha cacuví profeta cuenda Nyoo, ta tari tandihí ñu quichahá tuhun cha nyaá nu libru ihya. Chi Nyoo tahán chi sacahnu yo —catyí ra chii.

¹⁰ Ta catyí tucu ra chii:

—Ma tixehun tuhun Nyoo cha nyaá nu libru ihya, vatyí cha cuyatyin quivi cha cuchino cava chi. ¹¹ Soco saña chi ñu quiñi iyó, na sacuví ca maa ñu cuhva cuñi maa ñu. Ta ñu sacuví cuatyí na sacuví ca maa ñu. Soco ñu sacuví cha vaha, na sacuví ca ñu cha vaha. Ta ñu ii, ñu nacuhva cuenda añima chi Nyoo, na cuní ca iñi ñu chihin ra —catyí ra chii.

¹² Ta Sutu Mañi yo catyí ra:

—Nyehe ndo. Cha cuyatyin quivi quichi. Ta cutiyahvi chí tahan tahan ñáyivi yoso cuhva cha sacuví ñu, tatu cha vaha o cha ña vaha. ¹³ Yuhu cuví ra xihna cuiri ta yuhu cundoí nu ndihí tuhun, yuhu iyé nu quichaha tandihí ta

cucoo que nu cundihí tuhun —catyí Sutu Mañi yo.

¹⁴ Sií xaan cucuvi chi ñu sanduvii sahma o añima cuví cuan, vatyí coo ityi chí ñu cachi ñu chiti yutun cha chahá cha conyito añima yo tyicuan ri maa. Ta cuví quihvi ñu yuvehe ñuu cuan.

¹⁵ Soco ñu cha sacuví cha quiñi caa, ñu tasi, ñu cha iyó chihin tahan, ta ñima ñasihí ra o yí ñu cuví, ñu chahñi ñáyivi, ñu sacahnú xitohyo, ta tandihí ñu ñi cuendu ta sandavi ñaha ñu, tandihí ñu cuan, cundoo ñu ityi chata ñuu cuan.

¹⁶ Ta catyí tucu Sutu Mañi yo:

—Yuhu ra Jesús, sacuhin chí ángel cuende vatyí sacoto ra tandihí tuhun ihya chí ñu nyicú vehe ñuhu. Yuhu cuví ñáyivi chahnu chí rey David. Ta vachi tiqui tata ra ñandihí. Ta cuví tiqui tiño cañu cha xiño, cha caña cha ñaa ca —catyí ra.

¹⁷ Tatyí Ii Nyoo ta ñasihí ra cuví Mbee Luhlu cha cuví ñu cuenda ra, catyí ñu tyehe caa:

—Ñaha, Sutu Mañi yuhu —catyí ñu.

Ta ñu chiñi tuhun ihya, ta catyí ñu chí ra:

—Ñaha —catyí ñu.

Ta ñu ityi ndutya cha conyito yo chihin, ta tandihí ñu cuñi quichi, na quichi ñu ta coho ñu ndutya cha chahá cha conyito añima yo, ta ñahri cutiyahvi ñu.

¹⁸ Ta yuhu catyí chí tandihí ndo cha chiñi ndo tuhun Nyoo cha nyaá nu libru ihya, yuhu sacoté chí ndo noo

tuhun ihya: Tatu nya noo ñáyiví sanducuaha ca ñu tuhun ihya, Nyoo cunatyiso ca ra tindoho cha nyaá nu libru ihya siqui ñu. ¹⁹ Ta tatu nya noo ñáyiví tinyaa ñu suhva tuhun Nyoo cha nyaá nu libru ihya, Nyoo cu tinyaa ra cha tahán chi chi ñu cha nyaá nu libru cha cahán chi tuhun cha cuconyito ñu tyicuan ri maa ta cucoo ñu ñuu ii cuan. Ta ma tahan ca chi chi ñu cha vaha cha cahán

nu libru ihya. ²⁰ Ta Sutu Mañi yo ra cha chahá cuenda ihya catyí ra tyehe caa:

—Cha ndicha vatyí cha cuñí quichi —catyí ra.

Ta yuhu catyí:

—Na cuvi chi tyicuan caa. Ñaha, Sutu Mañi yuhu, Jesús —catyí yuhu.

²¹ Na naquehen tandihí ndo cha vaha chahá Sutu Mañi yo Jesucristo chi yo. Ta na cuvi chi tyicuan caa.